


Se-nānā Diosē nanā  
sā' me rá catūū  
nimán ní' a



New Testament in Triqui, Copala (MX:trc:Triqui, Copala)

**Se-nānā Diosē nanā sã' me rá catũũ nimán ní' a**  
**New Testament in Triqui, Copala (MX:trc:Triqui, Copala)**

copyright © 1987 Wycliffe Bible Translators, Inc.

Language: Triqui, Copala

Translation by: Wycliffe Bible Translators, Inc.

Triqui, Copala [trc], Mexico

**Copyright Information**

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Triqui, Copala

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 22 Feb 2024 from source files dated 29 Jan 2022  
 3a8f2838-fe9f-5490-8d78-a7bbfddab871

## Contents

San Mateo . . . . .	1
San Marcos . . . . .	77
San Lucas . . . . .	123
San Juan . . . . .	200
Hechos . . . . .	255
Romanos . . . . .	323
I Corintios . . . . .	354
II Corintios . . . . .	385
Gálatas . . . . .	404
Efesios . . . . .	416
Filipenses . . . . .	427
Colosenses . . . . .	434
1 Tesalonicenses . . . . .	441
2 Tesalonicenses . . . . .	447
1 Timoteo . . . . .	451
2 Timoteo . . . . .	459
Tito . . . . .	465
Filemón . . . . .	469
Hebreos . . . . .	471
Santiago . . . . .	494
1 Pedro . . . . .	501
2 Pedro . . . . .	509
1 Juan . . . . .	514
2 Juan . . . . .	521
3 Juan . . . . .	522
Judas . . . . .	523
Apocalipsis . . . . .	526

## Nihánj me se-nana Jesucristó nana sa' cachrón síi cu'naj Mateo rihaan yanj a

*Nana nihánj taj xna'anj che'é nij xii  
Jesucristó nij síi man gaa naá a*

<sup>1</sup> Yanj nihánj me taj xna'anj che'é nij xii Jesucristó a. Veé xii Jesucristó me síi cu'naj David síi cane gaa naá, ne xii David me síi cu'naj Abraham síi cane gaa naá adonj.

<sup>2</sup> Dan me se síi cu'naj Abraham me rej síi cu'naj Isaac, ne Isaac me rej síi cu'naj Jacob, ne Jacob me rej nij tinuj síi cu'naj Judá, <sup>3</sup> ne Judá me rej síi cu'naj Fares ga síi cu'naj Zara, ne chana cu'naj Tamar me nii roj so' a. Ne Fares me rej síi cu'naj Esrom, ne Esrom me rej síi cu'naj Aram, <sup>4</sup> ne Aram me rej síi cu'naj Aminadab, ne Aminadab me rej síi cu'naj Naasón, ne Naasón me rej síi cu'naj Salmón, <sup>5</sup> ne Salmón me rej síi cu'naj Booz, ne nii Booz me chana cu'naj Rahab a. Ne Booz me rej síi cu'naj Obed, ne nii Obed me chana cu'naj Rut a. Ne Obed me rej síi cu'naj Isaí, <sup>6</sup> ne Isaí me rej síi cu'naj David, ne síi cu'naj David ro', me síi nicaj suun rey uun chij rihaan nij yuvii israelitá gaa cane so' adonj.

Ne David me rej síi cu'naj Salomón, ne nii Salomón me nica síi cu'naj Urías a. <sup>7</sup> Ne Salomón me rej síi cu'naj Roboam, ne Roboam me rej síi cu'naj Abías, ne Abías me rej síi cu'naj Asa a. <sup>8</sup> Ne Asa me rej síi cu'naj Josafat, ne Josafat me rej síi cu'naj Joram, ne Joram me rej síi cu'naj Uzías a. <sup>9</sup> Ne Uzías me rej síi cu'naj Jotam, ne Jotam me rej síi cu'naj Acáz, ne Acáz me rej síi cu'naj Ezequías a. <sup>10</sup> Ne Ezequías me rej síi cu'naj Manasés, ne Manasés me rej síi cu'naj Amón, ne Amón me rej síi cu'naj Josías a. <sup>11</sup> Ne Josías me rej nij tinuj síi cu'naj Jeconías, ne cayáan nij so' yo' qui'yaj canaán nij síi man Babilonia rihaan nij yuvii

israelitá, ne ca'anj nicaj nij so' man nij yuvii israelitá chiháán nij so' guun nij yuvii israelitá mozó rihaan nij so' adonj.

<sup>12</sup> Guun naá doj, ne guun Jeconías rej síi cu'naj Salatiel, ne Salatiel me rej síi cu'naj Zorobabel, <sup>13</sup> ne Zorobabel me rej síi cu'naj Abiud, ne Abiud me rej síi cu'naj Eliaquim, ne Eliaquim me rej síi cu'naj Azor, <sup>14</sup> ne Azor me rej síi cu'naj Sadoc, ne Sadoc me rej síi cu'naj Aquim, ne Aquim me rej síi cu'naj Eliud, <sup>15</sup> ne Eliud me rej síi cu'naj Eleazar, ne Eleazar me rej síi cu'naj Matán, ne Matán me rej síi cu'naj Jacob, <sup>16</sup> ne Jacob me rej síi cu'naj José, ne José me síi xcaj man chana cu'naj Mariá, ne no' me nii síi cu'naj Jesús, ne síi ca'née Diose tinanii man yuvii man rihaan chumii nihánj rihaan sayuun me Jesús adonj.

<sup>17</sup> Dan me se asij síi cu'naj Abraham ndaa síi cu'naj David síj xca'anj xii síi cu'naj Jesucristó a. Ne asij síi cu'naj David ndaa ca'anj nicaj nij síi man Babilonia man nij yuvii israelitá chiháán nij so' síj yo'ó xca'anj xii síi cu'naj Jesucristó a. Ne asij ca'anj nicaj nij síi man Babilonia man nij yuvii israelitá chiháán nij so' ndaa ca'ngaa síi cu'naj Jesucristó, ne síj yo'ó xca'anj nij xii Jesucristó uún adonj.

*Nana nihánj taj xna'anj daj guun  
gaa ca'ngaa Jesucristó rihaan chumii  
nihánj a*

<sup>18</sup> Ne nihánj me se vaa guun asij rque gaa ataa ca'ngaa Jesucristó a. Dan me se nii Jesucristó me chana cu'naj Mariá a. Gaa asino yaan guun ya rá no' ga síi cu'naj José se vaa xcaj tuvi' roj so' a. Tzaj ne ataa cunuu rcua'aan roj so' a. Tzaj ne xcaj no' cuentá se vaa aj nari' no' ne'ej qui'yaj Nimán Diose a. <sup>19</sup> Dan me se síi cu'naj José me síi xcaj man chana cu'naj Mariá, ne xcaj so' cuentá se vaa aj nuú rque no' ne'ej a. Che'é dan nuchruj raa so', ne guun rá so' se vaa tanáj yuve so' man no' adonj. Dan me se sij vaa nica nimán me so', ne

guun rá so' cataj xna'anj so' rihaan nij sí nicaj suun, tzaj ne guun vij rá so', ne ne ca'vej rá so' cuta' so' cacun' xraá chana cu'naj Mariá rihaan nij sí nicaj suun a. <sup>20</sup> Dan me se nuchruj raá so' daj qui'yaj so', gaa ne rej nij ca'mii nej rihaan so' a. Dan me se cotoj so', ne naqui'yaa rihaan so' se vaa ca'na' yo'o se-mozó sí 'nij ra'a man ní', ne cataj se-mozó sí 'nij ra'a man ní' rihaan so' a:

—Cunó so' ca'mii 'unj, José. 'O se ta'nij si'no sí cu'naj David sí cane gaa naá mé so' adonj. Se cuchu'vi' so' xcaj so' man chana cu'naj Mariá ma'. Ne tumé no' cacun' ma'. Maan se nayón ne'ej rque no' qui'yaj Nimán Diose adonj. <sup>21</sup> Dan me se cuchruj no' ne'ej sno'o cunii, ne asa' cuchruj no' ne'ej, ne Jesús tucu'náj so' man ne'ej yo' á. Danj tucu'náj soj man so', che'é se guun so' sí tinanii man nij tuvi' so' rihaan chrej chi'ii uun chij nimán nij so' adonj. —Danj ca'mii se-mozó sí 'nij ra'a man ní' rihaan sí cu'naj José a.

<sup>22</sup> Nu' nihánj me se vaa qui'yaj sí 'nij ra'a man ní' a. Qui'yaj guee so' nu' nana cataj xna'anj so' gaa naá rihaan 'o sí nata' se-nana Diose rihaan yuvii, ne nihánj me nana ca'mii so' rihaan sí nata' se-nana Diose yo' a: <sup>23</sup> “Quene'en soj se vaa quinari' 'o chana yaan ne'ej, ne cuchruj no' ne'ej sno'o cunii, ne Emanuel cu'naj ne'ej adonj”. Danj ca'mii sí 'nij ra'a man ní' gaa naá rihaan sí nata' se-nana Diose, ne nana “Emanuel” taj se vaa cane ma'an Diose ga ní' adonj.

<sup>24</sup> Veé dan, ne quinanuú rá sí cu'naj José, ne qui'yaj so' nu' ndaa vaa cataj xna'anj se-mozó sí 'nij ra'a man ní' rihaan so', ne xcaj so' man chana cu'naj Mariá a. <sup>25</sup> Tzaj ne ne cotoj so' ga no' ndaa se quisíj cuchruj no' ne'ej sno'o cunii a. Ne tucu'náj José Jesús man ne'ej adonj.

## 2

*Nana nihánj taj xna'anj che'é nij sí tucu'yón ndo'o che'é yati' a*

<sup>1</sup> Dan me se ca'ngaa Jesucristó chuman' Belén chuman' naj estadó Judea, ne sí cu'naj Herodes me sí nicaj suun rey uun chij rihaan chuman' rej ca'ngaa Jesucristó a. Quisíj ca'ngaa Jesucristó, gaa ne ca'na' nij sí tucu'yón ndo'o che'é yati' chuman' cu'naj Jerusalén, ne nij sí cavii rej síj güii me nij so' a. <sup>2</sup> Ne xná'anj nij so' man nij sí man Jerusalén, cataj nij so':

—Ne'ej guun sí nicaj suun rey guun chij rihaan nij yuvii israelitá ro', me rej ca'ngaa so' ga. Quene'en núj yati' taj xna'anj yo' se vaa ca'ngaa so' nanj á. Cavii yati' yo' xta' rej síj güii, ne che'é dan ca'na' núj quina'vij núj rihaan so' adonj —taj nij sí tucu'yón ndo'o che'é yati' a.

<sup>3</sup> Gaa ne cuchi' nana rihaan sí nicaj suun rey cu'naj Herodes se vaa xná'anj ndo'o nij sí tucu'yón ndo'o che'é yati' me rej ca'ngaa ne'ej yo', gaa ne cuchu'vi' ndo'o so' se vaa cachij ne'ej yo', ne ca'nee ne'ej yo' se-suun so' ra'a so' vaa güii, rá so' a. Ne cuchu'vi' ndo'o nij sí man chuman' Jerusalén se vaa caxrii yuvaá Herodes man ma'an nij so' a. <sup>4</sup> Veé dan, ne cunuu chre' taran' nij xrej ata suun nocoo doj cunuu chre' nij sí naqui'yaj cuu se-tucuanj Moisés rihaan nij yuvii cunuu chre' rihaan so', qui'yaj so', ne xná'anj Herodes man nij so' me rej ca'ngaa sí ca'nej Diose tinanii man yuvii man rihaan chumii rihaan sayuun a. <sup>5</sup> Gaa ne cataj nij so' rihaan Herodes a:

—Ca'ngaa so' chuman' Belén chuman' naj estadó Judea a —taj nij so' rihaan sí nicaj suun rey cu'naj Herodes a.

Danj ca'mii nij so' che'é nana nihánj nana cachrón sí nata' se-nana Diose rihaan yanj a: <sup>6</sup> “Ne ma'an so', chuman' Belén chuman' naj estadó Judea ro', chuman' sa' ndo'o 'nij ra'a man tuvi' chuman' naj estadó Judea mé so' á. Dan me se vaa sí guun chihanj man so', ne guun chij uxrá so', ne uxrá cutumé so' man nij yuvii israelitá yuvii cuné' 'unj canoco'

manj a". Nihánj me nana cachrón sí nata' se-nana Diose rihaan yanj gaa naá a.

<sup>7</sup> Cuno sí nicaj suun Herodes nana ca'mii nij so', gaa ne ca'neé yuve so' nana rihaan nij sí tucu'yón ndo'o che'é yati' se vaa ca'na' nij so' rihaan Herodes a. Gaa ne xna'anj Herodes man nij so' me yavii curuvi' naca yati' taj xna'anj che'é ne'ej yo', taj Herodes a. Gaa ne cataj xna'anj nij so' rihaan Herodes a. <sup>8</sup> Gaa ne ca'neé Herodes man nij so' ca'anj nij so' chuman' Belén, ne ca'ne' Herodes suun rihaan nij so', ne cataj Herodes:

—Nanō' uxrá soj man ne'ej yo', ne asá' nari' soj man ne'ej, ne cataj xna'anj soj rihanj me rej ne ne'ej yo', gaa ne ca'anj ma'anj quina'vij ma'anj rihaan ne'ej yo' adonj —taj Herodes rihaan nij sí tucu'yón ndo'o che'é yati', ca'mii ne so' rihaan nij sí tucu'yón ndo'o che'é yati' a.

<sup>9</sup> Quisíj cuno nij so' nana cataj xna'anj sí nicaj suun rey rihaan nij so', gaa ne curihanj nij so', ca'anj nij so', gaa ne quene'en uún nij so' man yati' yo' a. Yati' aj quene'en nij so' rej síj güii me yati' yo', ne dan me se vaj yati' yo', ne yo'o canoco' nij so' man yati' yo', ndaa se canicun' yati' yo' rej xta' rej yanj ne'ej yo' a. <sup>10</sup> Gaa quene'en nij so' man yati' yo', gaa ne uxrá guun niha' rá nij so', <sup>11</sup> gaa ne catúj nij so' rá ve' rej canicun' yati' xta', gaa ne nari' nij so' man ne'ej ga nii ne'ej chana cu'naj Mariá, gaa ne canicun' ruj nij so', ne quina'vij nij so' rihaan ne'ej yo' a. Veé dan, gaa ne nuxra' nij so' se-chrunj nij so', gaa ne rqué ndo'o nij so' rasuun sa' rihaan ne'ej yo' a. Dan me se aga' oró míi do', squíi cu'naj incienso do', squíi cu'naj mirra do', rqué uun nij so' rihaan ne'ej yo' a. <sup>12</sup> Ne rej nii ca'mii nej rihaan nij so', ne cataj xna'anj Diose rihaan nij so' se vaa se canicaj uún nij so' ca'anj nij so' rihaan sí nicaj suun rey cu'naj Herodes, taj nej rihaan nij so' a. Che'é dan yo'ó chrej canicaj nij so' quinan' nij so' chiháan nij so' a.

*Nana nihánj taj xna'anj se vaa ca'anj nicaj José ga Mariá man Jesucristó rej cu'naj Egiptó a*

<sup>13</sup> Quisíj quinan' nij sí tucu'yón ndo'o che'é yati', gaa ne rej nii ca'mii nej rihaan sí cu'naj José a. Dan me se naqui'yaa yo'o se-mozó sí 'nij ra'a man ní' rihaan so', ne cataj se-mozó sí 'nij ra'a man ní' rihaan so' a:

—Naxagaa so', ne nicaj so' man roj nii ne'ej, ne cunanj so' ca'anj so' rej cu'naj Egiptó, ne cayáan so' Egiptó ndaa güii ca'mii uún 'unj rihaan so' á. 'O se nanō' ndo'o sí nicaj suun rey cu'naj Herodes man ne'ej, ne ticavi' so' man ne'ej yo' vaa taj so' adonj —taj se-mozó sí 'nij ra'a man ní' rihaan sí cu'naj José a.

<sup>14</sup> Gaa ne naxagaa sí cu'naj José, ne nicaj so' man roj nii ne'ej, ne rej nii cavii nij so' ca'anj nij rej so' Egiptó, <sup>15</sup> ne cane nij so' Egiptó yo' ndaa se cavi' sí nicaj suun rey cu'naj Herodes a.

Dan me se quisíj ya nu' nana ndaa vaa cataj xna'anj sí 'nij ra'a man ní' rihaan 'o sí nata' se-nana Diose gaa naá, se vaa cataj so': “Canacúun 'unj man ta'níj se vaa cavii so' Egiptó ca'na' so' adonj”. Danj taj Diose gaa naá che'é ta'níi so' Jesucristó adonj.

*Nana nihánj taj xna'anj se vaa cavi' ndo'o ne'ej man chuman' Belén, qui'yaj sí nicaj suun cu'naj Herodes a*

<sup>16</sup> Quisíj ca'anj nij rej Jesucristó rej cu'naj Egiptó, gaa ne xcaj sí nicaj suun rey cu'naj Herodes cuentá se vaa aj tiha' yu'unj nij sí tucu'yón che'é yati' man so', gaa ne ca'maan ndo'o rá so', ne che'é dan ca'ne' so' suun rihaan tanuu se vaa ticavi' tanuu man nu' ne'ej sno'o cunii yanj nu' anicaj chuman' Belén a. Ne'ej vaj vij yo' rej rque ro', cavi', taj so' a. Danj qui'yaj so', gaa ne cavi' ne'ej ca'mii yati' che'é taj nij sí tucu'yón che'é yati' rihaan so', rá so' a.

<sup>17</sup> Danj qui'yaj so', ne quisíj ya nu' nana cataj xna'anj sí nata' se-nana Diose gaa naá sí cu'naj Jeremías, se vaa cataj so': <sup>18</sup> “Cuno nii ta'vee ndo'o chana man chuman' cu'naj Ramá a.

Ase vaa chana cu'naj Raquel chana cane gaa naá gaa nij chana, ta'vee ndo'o nij no' che'é ta'níi nij no' a. Ne se ca'vej uxrá rá nij chana naqui'yaj niha' no' nimán no', che'é se navij ta'níi nij no' cavi' nanj adonj". Danj ca'mii síi cu'naj Jeremías gaa naá a.

*Nana nihanj taj xna'anj se vaa curihanj uún nij rej Jesucristó rej cu'naj Egiptó, ca'anj nij so' chuman' Nazaret a*

<sup>19</sup> Gaa quisij cavi' síi nicaj suun rey cu'naj Herodes, gaa ne naqui'yaa uún yo'o se-mozó síi 'nij ra'a man ní' rihaan síi cu'naj José gaa yáán so' Egiptó gaa otoj so' rej nij a. <sup>20</sup> Ne cataj xna'anj se-mozó síi 'nij ra'a man ní' rihaan José a:

—Naxagaa so', ne nicaj so' roj nij ne'ej, ne ca'anj so' rej cu'naj Israel á. 'O se yaj me se cavi' nij síi me rá ticavi' man ne'ej yaj nanj adonj —taj se-mozó síi 'nij ra'a man ní' rihaan síi cu'naj José a.

<sup>21</sup> Gaa ne naxagaa síi cu'naj José, ne nicaj uún so' roj nij ne'ej ca'anj so' rej cu'naj Israel a. <sup>22</sup> Ne cuchi' nana rihaan so' se vaa síi cu'naj Arquelao guun síi nicaj suun rey uun chij rihaan estadó Judea a. Dan me se nayón síi cu'naj Arquelao rihaan rej so' síi cu'naj Herodes a. Che'é dan cuchu'vi' ndo'o síi cu'naj José ca'anj so' estadó Judea, gaa ne ca'mii nej rihaan uún so' se vaa se ca'anj so' estadó Judea ma'. Che'é dan ca'anj so' estadó Galilea, <sup>23</sup> ne cuchi' so' chuman' Nazaret, ne cayáán so' chuman' yo' a. Dan me se cayáán nij so' chuman' Nazaret, ne quisij ya nu' nana cataj nij síi nata' se-nana Diose gaa naá, se vaa síi cavii Nazaret me síi ca'nej Diose tinanii man yuvii rihaan sayuun adonj. Inanj danj ca'mii nij síi nata' se-nana Diose gaa naá yo' a.

### 3

*Nana nihanj taj xna'anj daj vaa ca'mii natáj síi cu'naj Juan síi cuta' ne yuvii a*

<sup>1</sup> Dan me se yo'o yáán Jesucristó chuman' Nazaret, ne cavii síi cu'naj Juan tacaan estadó Judea, ne ca'mii natáj ndo'o so', <sup>2</sup> cataj so':

—Nuchran' nimán soj, ne tanáj soj chrej chi'ii ei. 'O se nichrun' guun chij Diose rihaan chumii nihanj nanj adonj —taj so', a'mii natáj so' a.

<sup>3</sup> Síi nata' se-nana Diose rihaan yuvii gaa naá síi cu'naj Isaías ro', cataj xna'anj che'é síi cu'naj Juan, cataj so': “Nucuj ndo'o ca'mii natáj 'o so' rej tacaan, ne cataj so' se vaa nuchran'nimán yuvii, ne ve'é ca'mii nij yuvii ga síi 'nij ra'a man ní' asa' ca'na' so' a”, taj síi cu'naj Isaías gaa naá a.

<sup>4</sup> Dan me se síi cu'naj Juan me se nuu so' yatzij nuj xcuu camello ne 'nij catuun so' merque nuj, ne chá so' inanj rquii, ne catzi' xtaan man quij co'o so' adonj. <sup>5</sup> Ne curihanj ndo'o yuvii man chuman' Jerusalén do', yuvii man nu' estadó Judea do', yuvii man nij chuman' naj tu'va chraá cu'naj Jordán do', ca'na' rihaan síi cu'naj Juan, <sup>6</sup> gaa ne cata' ne nij yuvii rá chraá cu'naj Jordán, qui'yaj Juan a. Dan me se nata' ya nij yuvii che'é nu' cacun' tumé nij yuvii, gaa ne cata' ne nij yuvii adonj.

<sup>7</sup> Gaa ne quene'en síi cu'naj Juan se vaa ca'na' ndo'o nij síi fariseo do', nij síi saduceo do', me rá nij so' cuta' ne Juan man nij so' a. Gaa ne ca'mii natáj so' rihaan nij so', cataj so':

—Ase vaa xcuáá yuvaa vaa soj á. Me síi cataj xna'anj rihaan soj cunanj soj, ne quinanii soj rihaan sayuun qui'yaj Diose ga. Asa' ca'vee quinanii soj rihaan sayuun, qui'yaj inanj na cata' ne soj ga. <sup>8</sup> Sese ya cunuu sa' nimán soj, ne ca'anj soj qui'yaj soj ndaa vaa 'yaj yuvii cunuu sa' nimán á. <sup>9</sup> Ne tadó soj sese quisij rá soj cataj soj se vaa ta'níi ta'nij si'no síi cu'naj Abraham síi cane gaa naá me soj, ne ne tumé soj cacun', cataj soj á. Se ca'mii soj daj chihaa mij danj ma'. Maan se cataj xna'anj 'unj rihaan soj se vaa nuveé se ya'anj tiha' ta'níi ta'nij si'no síi cu'naj Abraham me soj



a ma'. Maan se sese Diose rá, ne ca'vee nicaj Diose náá guun yahij naj rihaan yo'óó nihánj, ne qui'yaj Diose man 'o ta'níi ta'nij si'no sítí cu'naj Abraham adonj. Che'é dan canoco' ya soj man Diose á.

<sup>10</sup> "O se nichrun' qui'yaj Diose sayuun man nij sítí na'vej rá cuno rihaan so' nanj á. Ase vaa sítí oro' aga' a'ne' chruun, ne oro' so' aga' ca'ne' so' chruun ro', danj vaa Diose cuano ei. Che'é dan ase vaa 'yaj nii man chruun ro', ta'nga' danj qui'yaj Diose man nij sítí ne uno rihaan so' a. Dan me se a'ne' nii chruun nuvi' chruj sa' raa, ne araa nii man chruun yo' rihaan ya'an a. Ta'nga' danj qui'yaj Diose man nij sítí na'vej rá canoco' chrej sa' adonj.

<sup>11</sup> "Unj nihánj me sítí cuta' ne uun man soj sij nuchran' nimán canoco' chrej sa' a. Tzaj ne vaa yo'ó sítí ca'na', ne sij sca' doj guun so' rihanj a. Che'é dan me aj ne nó xcúnj nachej nuj correá 'nij tacanj so' ma'. Ne ca'na' so', ne ca'na' Nimán Diose ga so', ne caxrii ya'an so' man soj sij na'vej rá cuno rihaan Diose, ne cacaa soj adonj. <sup>12</sup> Dan me se ase vaa sítí oro' chruun palá vaa so' cuano adonj. Dan me se sítí nicaj chruun palá ro', rii nu' 'núú trigó naj rihaan yo'óó, ne naqui'yaj chre' so' man 'núú trigó sa', ne araa so' man 'núú trigó sa' rá ve', ne anicaj so' araa so' squij ni'ya xráá trigó rihaan ya'an a. Ne ase vaa sítí nicaj palá man cuano ro', danj qui'yaj sítí ca'na', ne naqui'yaj chre' so' man cunudanj nij sítí cunuu sa' nimán, ne caraa so' man nij sítí chi'ii rihaan ya'an, ne cacaa nij so' nu' cavii nu' ca'anj, ne daj chihaa míj se quina'áj ya'an yo' a man adonj. —Danj ca'mii sítí cu'naj Juan rihaan nij yuvii yo' a.

*Nana nihánj taj xna'anj se vaa cata' ne Jesucristó a*

<sup>13</sup> Gaa ne curihanj Jesucristó es-tadó Galilea ca'anj so' chráá cu'naj Jordán rihaan sítí cu'naj Juan, ne cuta' ne Juan man Jesucristó, rá so' a. Dan me se cuchí' Jesucristó rihaan sítí cu'naj Juan, <sup>14</sup> tzaj ne veé dan me se

ne ca'vej rá sítí cu'naj Juan cuta' ne so' man Jesucristó ma'. Maan se cataj sítí cu'naj Juan rihaan Jesucristó a:

—Me che'é 'ná' so' cuta' ne 'unj man so' ga. Tananj ma'an so' me sítí vaa che'é cuta' ne man ma'anj nanj á. Tzaj ne xa' 'unj me se ne nó xcúún 'unj cuta' nej man so' ma' —taj sítí cu'naj Juan rihaan Jesucristó a.

<sup>15</sup> Gaa ne cataj Jesucristó rihaan so' a:

—Ca'vej so' cuta' ne so' manj ei. Danj qui'yaj ní', che'é se no xcúún ní' qui'yaj ní' nu' se vaa me rá Diose qui'yaj ní' adonj —taj Jesucristó rihaan sítí cu'naj Juan, gaa ne ca'vej rá so', gaa ne cuta' ne so' man Jesucristó a.

<sup>16</sup> Quisíj cata' ne Jesucristó, gaa ne curihanj so' rá na, gaa ne taj ni'yón naxra' rej xta', ne quene'en so' se vaa nanij Nimán Diose rej xta', ne ase vaa cha'aan ro', vaa Nimán Diose, curuvi' yo' rej xta' nanij yo' raa Jesucristó a.

<sup>17</sup> Gaa ne rej xta' ca'mii Diose rihaan Jesucristó, ne cuno nij sítí nicun' ga Jesucristó nana ca'mii Diose, ne dan me se cataj Diose a:

—Ta'níi 'unj sítí 'ee ndo'o raj man mé so', ne niha' ndo'o raj ni'yaj 'unj man so' adonj —taj nana cavii rej xta' ca'mii Diose rihaan Jesucristó a.

## 4

*Nana nihánj taj xna'anj se vaa guun ndo'o rá sítí chree tiha' yu'unj sítí chree man Jesucristó a*

<sup>1</sup> Gaa ne ca'anj Jesucristó rej tacaan, qui'yaj Nimán Diose, che'é rej ca'vee guun rá sítí chree tiha' yu'unj sítí chree man Jesucristó a. <sup>2</sup> Ne vij chihaa ya güii quisíj Jesucristó toco' Jesucristó x'naa man ma'an so' che'é se aráj guee so' rihaan Diose, gaa ne quina'aan ndo'o rque Jesucristó a.

<sup>3</sup> Dan me se cuchí' sítí chree rihaan Jesucristó, gaa ne guun rá so' tiha' yu'unj so' man Jesucristó, che'é se guun rá so' canoco' Jesucristó man so' adonj. Che'é dan cataj so' rihaan Jesucristó, ne:



—Sese ya ya ta'nij Diose mé so', ne cataj so' rihaan yahij nihánj se vaa guun yo' rachrúun cha so' á —taj síi chree rihaan Jesucristó a.

<sup>4</sup> Gaa ne cataj Jesucristó rihaan síi chree a:

—Tzaj ne danj Diose taj: “Nu-veé inanj se chá me se achiin rihaan yuvij, ne ca'vee cayáán sa' yuvij ma'. Tananj achiin cunudanj se-nana Diose cunoyuvij, ne ve'é cayáán yuvij ei”. Inanj danj taj danj Diose —taj Jesucristó rihaan síi chree yo' a.

<sup>5</sup> Gaa ne ca'anj nicaj síi chree man Jesucristó chuman' guee chuman' Jerusalén, ne tacavii so' man Jesucristó raq nuvií nocoo, <sup>6</sup> ne cataj so' rihaan so':

—Sese ya ta'nij Diose mé so', ne güej so', ne nanij guee so' rihaan yo'óó á. 'O se danj Diose taj: “Yo'ó a'ne' Diose suun rihaan nij se-mozó so' se vaa cutumé nij so' mán so', ne caráán ra'a nij so' mán so', se gaa nanj cacó' che'é so' yahij a”. Inanj danj a'mii danj Diose —taj síi chree rihaan Jesucristó adonj.

<sup>7</sup> Gaa ne cataj Jesucristó rihaan so' a:

—Tzaj ne ne nó xcúnj qui'yáj danj ma'. 'O se taj uún danj Diose: “Se guun qui'ri'yunj so' man Diose síi 'nij ra'a man ní' ne tihá' so' man so' ma’”. Inanj danj a'mii danj Diose rihaan ní' adonj —taj Jesucristó rihaan síi chree a.

<sup>8</sup> Gaa ne nicaj síi chree man Jesucristó ca'anj so' raq 'o quij xcaan ndo'o uún a. Ne tihaan so' man nu' chuman' man rihaan cunu' chumij rihaan Jesucristó, ne tihaan so' rihaan Jesucristó se vaa ve'é ndo'o vaa nu' chuman' yo' adonj. <sup>9</sup> Dan me se cataj uún síi chree rihaan Jesucristó a:

—Guun chij so' rihaan cunudanj chuman' naj rihaan chumij, qui'yáa 'unj, sese canicun' ruj so' quina'vij so' rihaan 'unj á —taj síi chree yo' rihaan Jesucristó a.

<sup>10</sup> Gaa ne cataj xna'anj Jesucristó rihaan síi chree a:

—Naxuun yanij so' mán so', Satanás. 'O se danj Diose taj: “Rihaan orún' Diose síi 'nij ra'a man ní' canicun' ruj so', ne a'ó rihaan tuví' so' se ca'vee na'vij so' ma’”. Danj taj danj Diose adonj —taj Jesucristó rihaan síi chree yo' a.

<sup>11</sup> Gaa ne tanáj síi chree man so', ca'anj síi chree yo', gaa ne cuchí' nij se-mozó Diose rihaan Jesucristó, rqué nij so' me ma'an se cachiin rihaan Jesucristó a.

*Nana nihánj taj xna'anj se vaa ca'anj Jesucristó estadó cu'naj Galilea a*

<sup>12</sup> Cuchi' nana rihaan Jesucristó se vaa quita'aa nij tanuu man síi cu'naj Juan, caxrij tanuu taga' man so', ne che'é dan ca'anj Jesucristó estadó Galilea, <sup>13</sup> tzaj ne ne cayáán so' chuman' Nazaret ma'. Cavii so' chuman' Nazaret yo', ne ca'anj so' cayáán so' chuman' Capernaum chuman' naj tu'va na lacuaná a. Chuman' yo' naj rihaan to'óó nij ta'níi ta'nij si'no síi cu'naj Zabulón do', síi cu'naj Neftalí do', síi man gaa naá yo' a.

<sup>14</sup> Dan me se danj qui'yaj Jesucristó ca'anj so' rej yo', gaa ne guun ya nu' ndaa vaa cataj síi cu'naj Isaías síi nata' se-nana Diose gaa naá se vaa cataj so': <sup>15</sup> “To'óó nij ta'níi ta'nij si'no Zabulón do', to'óó nij ta'níi ta'nij si'no Neftalí do', me yo'óó naj tu'va na lacuaná rej rej tu'va chráa cu'naj Jordán, ne estadó Galilea estadó yanj nij síi yanij me uún yo' a. <sup>16</sup> Ne nij síi man rej yo' ro', guun que'ee yo' ne quene'en uxrá nij so' rasuun che'é Diose ma'. Maan se ase vaa yuvij ne rej rmí' ro', danj vaa nij so' ne nij so' nanj adonj. 'O se vaa güii, ne caví' uun nij so', ne danj uun ma'an, rá nij so' adonj. Tzaj ne ca'na' 'o ya'an, ne cuchuguun rej yanj nij so', qui'yaj ya'an yo', ne ve'é ndo'o xcaj nij so' cuentá adonj”. Yo' me se vaa cataj síi cu'naj Isaías gaa naá a.

<sup>17</sup> Gaa ne guun che'e Jesucristó ca'mii natáj so' rihaan yuvij, ne cataj so':

—Nuchran' nimán soj ei. 'O se nichrun' quisij güii ca'na' Diose guun chij Diose rihaan chumiñ nihánj nanj adonj. —Inanj danj ca'mii natáj Jesucristó rihaan nij yuviñ a.

*Nana nihánj taj xna'anj se vaa cataj xna'anj Jesucristó rihaan ca'anj sí rii xcuañ se vaa canoco' nij so' man Jesucristó a*

<sup>18</sup> 'O güii cachén Jesucristó tu'va na lacuaná cu'naj na Galilea, ne quene'en so' man roj tinuj roj so' a. Yo'o so' me sí cu'naj Simón, ne Pedró cu'naj yo'ó se-chuviñ sí cu'naj Simón yo' a. Ne tinúú so' me sí cu'naj Andrés a. Dan me se gaa quene'en Jesucristó man roj so', ne nicun' roj so' tu'va na lacuaná, ne tiguñ roj so' nanj rque na, ne dan me se sí rii xcuañ me roj so' a. <sup>19</sup> Ne cataj Jesucristó rihaan roj so' a:

—Canoco' roj soj manj á. 'O se sí naqui'yaj chre' xcuañ me roj soj, tzaj ne rej rihaan ní' me se guun roj soj sí naqui'yaj chre' yuviñ, qui'yaj, ne canoco' nij yuviñ manj a —taj Jesucristó rihaan roj tinuj roj so' a.

<sup>20</sup> Ne nu' canicaj roj so' tanáj roj so' xnánj roj so', ne canoco' roj so' man Jesucristó ca'anj roj so' nanj adonj.

<sup>21</sup> Veé dan, ne cachéé nij so' doj, ne quene'en Jesucristó man yavíj roj tinuj roj so' a. Yo'o so' me sí cu'naj Jacobo, ne tinúú so' me sí cu'naj Juan, ne ta'níí sí cu'naj Zebedeo me roj tinuj roj so' a. Dan me se nuu roj so' rque rihoo chéé rihaan na ga rej roj so' sí cu'naj Zebedeo, ne naqui'yaj sa' nij so' nanj rii xcuañ, ne canacúún Jesucristó man roj tinuj roj so' canoco' roj so' man Jesucristó a. <sup>22</sup> Veé dan, ne canicaj roj so' tanáj roj so' rihoo do', rej roj so' do', ne canoco' roj so' man Jesucristó ca'anj roj so' nanj adonj.

*Nana nihánj taj xna'anj se vaa nahuun ndo'o yuviñ, qui'yaj Jesucristó a*

<sup>23</sup> Veé dan, ne cachéé Jesucristó nu' estadó Galilea, ne tucu'yón so' se-nana Diose man nij yuviñ nuu chre' rá ve' tucu'yón nij yuviñ israelitá

se-tucuañ Moisés, ne ca'mii natáj so' nana sa' rihaan nij yuviñ che'é yan guun chij Diose rihaan chumiñ nihánj me nana sa' ca'mii natáj so' a. Ne nahuun cunudañ nij yuviñ ran' do', cunudañ nij yuviñ ninaj do', qui'yaj so' a. <sup>24</sup> Ne cuchí' nana che'é so' nu' estadó Siria, gaa ne nicaj ndo'o nij yuviñ tuvi' nij yuviñ sí ran' ndo'o, ca'anj nij yuviñ rej vaj Jesucristó a. Dan me se nij yuviñ ran' ndo'o qui'yaj chí'ij do', nij yuviñ a'ngaj ndo'o cúu man do', nij yuviñ nuu nana chree nimán do', nij yuviñ snúú qui'yaj yavii do', nij yuviñ na'vee cachee do', cuchí' rihaan Jesucristó, qui'yaj tuvi' nij yuviñ, ne nahuun cunudañ nij so', qui'yaj Jesucristó nanj adonj. <sup>25</sup> Veé dan, ne canoco' que'ee ndo'o yuviñ man so', ne dan me se yuviñ man estadó Galilea do', yuviñ man rej cu'naj Chí' Chuman' do', yuviñ man chuman' Jerusalén do', yuviñ man estadó Judea do', yuviñ man ndaa rnej tu'va chraá cu'naj Jordán do', canoco' man so' nanj adonj.

## 5

*Nana nihánj taj xna'anj se vaa cavii Jesucristó raq quiñ gañ nij yuviñ, ne nago' so' chrej man nij yuviñ a*

<sup>1</sup> Quene'en Jesucristó man ndo'o yuviñ nu' anicaj x'núú so', ne che'é dan cavii so' ca'anj so' raq 'o quiñ, ne ndaa dan ca'anj cayáán so', gaa ne cuchí' nij sí tucu'yón se-nana so' rihaan so' a.

*Nana nihánj taj xna'anj me yuviñ cavii sa' doj a*

<sup>2</sup> Gaa ne guun che'e Jesucristó tucu'yón Jesucristó rihaan nij so', cataj so':

<sup>3</sup> —Cavii sa' taran' nij sí vaa nica' nimán adonj. 'O se nij so' me sí cayáán ga Diose güii guun chij Diose rihaan chumiñ nihánj adonj.

<sup>4</sup> "Cavii sa' taran' nij sí nanó ndo'o rá adonj. 'O se guun niha' nimán ma'an nij so', qui'yaj Diose vaa güii adonj.

5 "Cavii sa' taran' nij sí ni'yanj a'mii adonj. 'O se guun to'óó ma'an nij so' man nu' chumii vaa güii adonj.

6 "Cavii sa' taran' nij sí me ndo'o rá cunuu sa' nimán adonj. 'O se cunuu sa' ma'an nij so' vaa güii, qui'yaj Diose adonj.

7 "Cavii sa' taran' nij sí 'ee rá man tuvi' adonj. 'O se cunuu 'ee rá Diose man ma'an nij so', ne taj sayuun quiran' nij so', qui'yaj Diose a man adonj.

8 "Cavii sa' taran' nij sí vaa sa' nimán adonj. 'O se quene'en ma'an nij so' man Diose vaa güii adonj.

9 "Cavii sa' taran' nij sí nacaj man sí me rá cunuu' adonj. 'O se ase vaa Diose ro', danj gaa ma'an nij so' vaa güii adonj.

10 "Cavii sa' taran' nij sí ran' sayuun 'yaj tuvi' che'é se ve'é 'yaj sa' nij so' adonj. 'O se cayáán ma'an nij so' ga Diose güii guun chij Diose rihaan chumii nihánj adonj.

11 "Ne cavii sa' ndo'o soj sese ca'mii yuvii nana nij rihaan soj do', sese qui'yaj yuvii sayuun man soj do', sese ca'mii ne yuvii cataj yuvii se vaa tumé ndo'o soj cacun' do', che'é se me soj sí noco' mán 'unj adonj. Ne quene'en soj se vaa ya cavii sa' soj adonj. 12 Gaa ne no xcúún soj guun niha' uxrá rá soj, che'é se uxrá naru'vee Diose rihaan soj asa' nucui' soj rej xta' adonj. 'O se ase vaa 'yaj nii sayuun man soj ro', ta'nga' danj qui'yaj nii sayuun man nij sí nata' se-nana Diose rihaan yuvii gaa naá uún adonj.

*Nana nihánj taj xna'anj se vaa ase vaa yaan do', ase vaa ya'an chuguun do', danj vaa ní a*

13 "Ase vaa yaan ga chraa ro', danj vaa soj ga chumii nihánj ei. Dan me se sese ne 'ne' chá yaan yo', gaa ne taj se qui'yá' cunuu sa' yaan gaa a ma'. Taj se gún' man yaan yo' gaa ma'. Maan se quiri'ij nii man yaan yo' xe', ne cachee uun yuvii xráá yaan yo' nanj ei. Ne danj vaa uún soj ei. Sese taj se gún' man soj rihaan chumii nihánj, ne

daj chihaa míj se cavii sa' soj a man adonj.

14 "Ne ase vaa ya'an vaa soj chuguun soj rihaan chumii nihánj a. Ne'en soj se vaa sese naj 'o chuman' raá tacaan, ne quene'en cunudanj yuvii naj chuman' yo' raá tacaan ei.

15 Ne gaa rmi', ne a 'ó yuvii uta' ya'an raá aga' ya'an ne axríj yuve nij so' rque 'o chrúún ma'. Sese rmi', ne achrón nii ya'an raá aga' ya'an ne uta' nii aga' yo' rej xta', ne daj a nij yuvii atúj rá ve' ro', chuguun ni'yaj nij so' adonj. 16 Ne veé danj vaa guee soj, ne ase vaa aga' ya'an ro', vaa soj rihaan chumii nihánj, ne sese sa' qui'yaj soj, ne sa' doj xcaj yuvii cuentá, qui'yaj soj ei. Che'é dan se guun na'aj soj quene'en yuvii daj vaa 'yaj soj ma'. Tananj guun niha' rá soj quene'en yuvii se vaa ve'é 'yaj soj, ne che'é dan danj nanj ve'é ca'mii nij yuvii che'é Rej ní' Diose, qui'yaj soj nanj adonj.

*Nana nihánj taj xna'anj se vaa no xcúún ndo'o ní' cunó ní' se-nana Jesucristó a*

17 "Se guun rá soj se vaa ca'ná' 'unj tiri' 'unj se-tucuanj Moisés tucuáán cuchruj so' gaa naá ma'. Se guun rá soj se vaa ca'ná' 'unj tiri' 'unj nana ca'mii natáj nij sí nata' se-nana Diose gaa naá ma'. Nuveé che'e yo' ca'naj ma'. Tananj ca'naj che'é rej quinavij quisij nu' tucuáán yo', gaa ne nari' nu' soj daj me rá Diose qui'yaj soj adonj. 18 Ya uxrá cataj xna'anj 'unj rihaan soj se vaa gaa ataa navij chumii nihánj do', gaa ataa navij xta' nihánj do', ne qui'yaj Diose nu' se vaa me rá Diose qui'yaj Diose rihaan chumii nihánj, ne che'é dan se tanáj xco ní' a 'ó nana rqué Diose rihaan ní' canoco' ní' ma'. 19 Dan me se me ma'an 'o sí tiri' 'o nana le'ej a'mij nihánj ne ino vaa nana tahaan so' man nij tuvi' so', ne asa' guun chij Diose, ne guun so' sí le'ej uxrá rihaan Diose nanj adonj. Tzaj ne sese me ma'an 'o sí 'yaj ya ndaa vaa taj 'unj nihánj ne tahaan ya so' man tuvi' so' ndaa vaa taj 'unj

nihánj, ne síí nihánj ro', me síí guun síí chij rej guun chij Diose vaa güii adonj.

20 "O se cataj xna'anj 'unj rihaan soj, ne sese nij síí naqui'yaj cuu se-tucuanj Moisés rihaan yuvij ga nij síí fariseo me se 'yaj sa' nij so' rihaan yuvij, rá nij so', tzaj ne sese se qui'yaj sa' soj doj rihaan nij yuvij ndaa vaa 'yaj nij síí naqui'yaj cuu se-tucuanj Moisés ga nij síí fariseo, gaa ne daj chihaa míj se cayáán soj ga Diose asa' guun chij Diose rihaan chumij nihánj a man adonj.

*Nana nihánj taj xna'anj se vaa sese axrij yuvaq ní man tuvi' ní, ne tumé ní cacun' a*

21 "Aj ne'en soj nana nihánj nana ca'na' rihaan nij síí man gaa naá ei: "Se ticavi' soj man yuvij ma'. Dan me se qui'yaj Diose sayuun man cunudanj yuvij ticavi' tuvi' adonj", me nana ca'na' rihaan nij so' a. 22 Tzaj ne 'unj nihánj me se cataj xna'anj 'unj, ne a me ma'an 'o síí ca'maan rá ni'yaj man tinúú, ne aj tumé so' cacun' rihaan Diose, ne veé danj qui'yaj Diose sayuun man so' uún adonj. Ne a me ma'an síí cataj rihaan tuvi': "Síí snúú rma'an mé so' ei", cataj so' rihaan tinúú so', ne aj tumé ndo'o so' cacun' rihaan Diose nanj adonj. Ne a me ma'an 'o síí cataj rihaan tuvi' se vaa mayán tuvi' so' me se vaa che'é ca'anj ma'an so' rihaan ya'an cacaa so' nanj adonj.

23 "Che'é dan me sese ca'anj nıcaj so' rasuun rihaan chraan altar, rque so' rasuun guee rihaan Diose, rá so', ne sese ninuj rá so' se vaa qui'yáá so' cacun' man tinúú so', 24 ne se guun go' so' rasuun yo' rihaan Diose ma'. Maan se cuchruj so' rasuun yo' rihaan yo'óó, ne ca'anj so' rej yanj tinúú so', gaa ne na'mii sa' so' ga so', gaa ne canıcaj so' rej naj si'yáá so', gaa ne rque so' si'yáá so' rihaan Diose adonj.

25 "Ne so' me se sese vaa síí taj se vaa nij qui'yáá so' rihaan so', ne gaa tıhaj vaj so' chrej ga so', ne ve'é ca'mii so' ga so', cataj so' rihaan so' se vaa:

"Ca'ne' rá so', ne se cutá' so' cacun' xráj ma'", cataj so', ne ve'é ca'mii so' ga so' á. Ne sese se qui'yáá so' danj ve'é ca'mii so' ga so' gaa tıhaj vaj roj soj chrej rihaan chumii nihánj, ne nıcaj so' mán so' ca'anj so' rihaan cuese, ne cuese yo' ro', tacuachén mán so' ra'a síí tumé taga', ne so' me síí caxrii taga' mán so', 26 ne yo' me se guun raan ndo'o so', ne ndaa navij naru'vee so' nu' cacun' qui'yáá so', gaa ne curıhanj so' taga' nanj adonj.

*Nana nihánj taj xna'anj se vaa tumé ní man ní se qui'yaj ní cacun' ga yo'ó chana a*

27 "Aj ne'en soj nana nihánj a: "Orún' nıca soj cotoj ga soj á", me nana ca'na' rihaan soj gaa naá a. 28 Ne cataj xna'anj 'unj rihaan soj se vaa naj guun síí ni'yaj ni'yaj man yo'ó chana, ne che'é rej guun ndo'o rá so' cotoj so' ga no' ro', ase vaa nimán síí otoj ga yo'ó chana ro', ta'nga' danj vaa nimán síí ni'yaj ndo'o man yo'ó chana yo' nanj adonj. Ne tumé ya so' cacun' adonj. 29 Danj nanj uún, ne sese 'o rlij rihaan so' rej nuva' so' me rá qui'yaj cacun', ne táá a se quirıi so' man yo', ne taj se 'yaj ma'. Ca'vee a doj quirıi' orún' yo' ne se cacaa nu' nee mán so' ma'. 30 Danj nanj uún, ne sese 'o ra'á so' rej nuva' so' me rá qui'yaj cacun', ne táá a se ca'ne' so' man yo', ne taj se 'yaj ma'. Ca'vee a doj ca'anj ni'ya orún' yo' ne se ca'anj ni'ya cunudanj nee man ma'an so' ma'.

*Nana nihánj taj xna'anj che'é síí me rá quirıi'ij nıca a*

31 "Ne gaa naá me se ca'na' nana nihánj a: "Sese me rá yo'ó so' quirıi'ij so' nıca so', ne nıxıcaj so' 'o yanj cataj xna'anj se vaa ya quirıi'ij so' nıca so' á". Danj vaa nana ca'na' rihaan nij yuvij ei. 32 Ne cataj xna'anj 'unj rihaan soj se vaa sese quirıi'ij yo'ó so' man nıca so', ne sese nuvi' cacun' tumé no' se vaa cotoj no' ga yo'ó chii, ne ma'an síí ri'ij man no' qui'yaj tumé no' cacun' gaa ei. Ne che'é se quirıi'ij nıca chana man no', che'é dan xıcaj



no' yo'ó snó'o, ne ase vaa chana otoj ga naj guun snó'o ro', danj gaa ma'an no', qui'yaj sí quiri'íj man no' adonj. Ne sí xcaj man chana quiri'íj nica me se ase vaa sí otoj ga nica yo'ó snó'o ro', vaa uún so' adonj.

*Nana nihánj taj xna'anj se vaa ca'mii ya ní a*

<sup>33</sup> "Ne aj ne'en soj nana nihánj nana ca'na' rihaan nij sí man gaa naá adonj: "Sese cata' tu'vá so' rihaan sí 'nj ra'a man ní' se vaa qui'yáá so', ne se ca'ne' rá so' qui'yáá so' danj ma'. Maan se ya qui'yáá so' nu' se vaa cataj xna'anj so' rihaan so', gaa ne ca'vee nanj adonj". <sup>34</sup> Ne cuano nihánj ro', cataj xna'anj 'unj rihaan soj se vaa asa' ca'mii soj 'o nana guun ya ya rá soj, ne daj chihaa míj se cuta' soj raá xta' ma'. 'O se xta' ro', nicun' ma'an Diose ya ya nanj adonj. <sup>35</sup> Ne raá chumii se cuta' soj ma'. 'O se chumii nihánj me rej taj tacóo Diose nanj adonj. Ne raá chuman' Jerusalén se cuta' soj ma'. Ése chuman' yo' ne ma'an Diose sí nica yu'unj man ní' nanj adonj. <sup>36</sup> Ne raá ma'an soj se cuta' soj ma'. 'O se se guun nucuaj soj naqui'yaj catzii soj yo'ó yuvé raá soj, ne se guun nucuaj soj naqui'yaj maruu soj yo'ó yuvé raá soj ma'. <sup>37</sup> Veé dan, ne sese ya a'mii soj, rá soj, ne cataj soj: "Ya ei". Ne sese ne ya vaa 'o nana, rá soj, ne cataj soj: "Ne ya ma'", cataj soj á. Inanj danj ca'mii soj ei. Sese nano' soj yo'ó nana, ne chi'ii vaa nimán soj nanj adonj.

*Nana nihánj taj xna'anj daj qui'yaj ní' rihaan yuvi' yaj chi'ii rihaan ní' a*

<sup>38</sup> "Aj ne'en soj nana nihánj nana ca'na' gaa naá a: "Sese curihanj rlij rihaan so' qui'yaj tuví' so', ne ca'vee quirii so' rlij rihaan tuví' so' á. Ne sese curihanj cúu yán' so', qui'yaj tuví' so', ne ca'vee quirii so' cúu yan' tuví' so' á". Danj vaa nana ca'na' rihaan yuvi' nanj adonj. <sup>39</sup> Tzaj ne cuano nihánj ro', cataj xna'anj 'unj rihaan soj se vaa se qui'yaj soj sayuun man sí 'yaj sayuun man soj ma'. Tananj sese

vaa sí coxro nichrej xruú so', gaa ne ca'ne' rá so' coxro so' nichrej xruú so' uún ei. <sup>40</sup> Ne sese me rá yo'ó so' cuta' so' cacun' xráa so' rihaan cuese ca'nee so' cotoó nuu so', ne go' uun so' cotoó yo' do', ndaa se-roto so' do', go' so' man so' ei. <sup>41</sup> Ne sese ca'ne' yo'ó so' suun rihaan so' ca'anj tanáj so' si'yaj so' yo'ó kilómetro, ne ca'vej so' ca'anj tanáj so' si'yaj so' ndaa vij kilómetro ei. <sup>42</sup> Sese achíin yo'ó so' rasuun man so', ne go' so' se achíin man so' ei. Ne sese me rá yo'ó so' racuuj so' sa'anj man so', ne se cataj so' se vaa taj vaj sa'anj ma'. Racuuj so' man so' ei.

*Nana nihánj taj xna'anj daj qui'yaj ní' gaa 'ee rá ní' man nij sí taj ri'yunj man ní' a*

<sup>43</sup> "Aj ne'en soj nana nihánj nana ca'na' gaa naá a: "Gaa 'ee rá so' man tuví' so', tzaj ne se guun gaa 'ee rá so' man nij sí taj ri'yunj man so' ma'". Danj vaa nana ca'na' gaa naá nanj adonj. <sup>44</sup> Tzaj ne cuano nihánj me cataj xna'anj 'unj rihaan soj se vaa no xcúun soj cunu 'ee rá soj ni'yaj soj man nij sí taj ri'yunj man soj, ne cachinj ni'yaj soj rihaan Diose che'é nij sí 'yaj sayuun man soj á. <sup>45</sup> Gaa ne guun soj ta'níi Rej soj Diose sí nicun' xta' ei. 'O se Diose 'yaj síj güii, ne o' naán rihaan to'óo nij sí chi'ii do', rihaan to'óo nij sí sa' do', 'yaj Diose, ne aman' rihaan to'óo nij sí 'yaj sa' do', rihaan to'óo nij sí 'yaj chi'ii do', 'yaj uún Diose adonj. <sup>46</sup> 'O se sese 'ee rá soj man inanj nij sí 'ee rá man soj, gaa ne me che'é naru'vee Diose rihaan soj, rá soj ga. 'O se ne'en soj se vaa ndaa nij sí tiha' yu'unj man soj che'é puextó ro', 'ee rá nij so' man tuví' ma'an nij so' adonj. <sup>47</sup> Che'é dan, sese ve'é a'mii soj ga inanj tinúu soj, ne sa' doj vaa soj rihaan yo'ó nij yuvi', rá soj na'. Taj ma'. Ne ndaa nij sí ne ne'en daj vaa Diose ro', ne'en soj se vaa 'ee rá nij so' man tuví' ma'an nij so' nanj á. <sup>48</sup> Che'é dan sese nuveé sij tiha' yu'unj do', sij yanj do', me soj, ne no xcúun soj guun soj sí vaa sa' inanj nimán adonj. Ne ase vaa sí

sa' inanj me Diose ro', danj gaa ma'an soj, sí sa' inanj guun soj adonj.

## 6

*Nana nihánj taj xna'anj daj qui'yaj ní' gaa rque ní' sa'anj man nij sí nique a*

1 "Ne cutumé soj man soj gaa 'yaj soj se sa' do', se luj do' á. Se guun rá soj quene'en yuvii man soj ne cataj nij yuvii che'é soj se vaa sí sa' inanj me soj ma'. Sese danj qui'yaj soj, ne daj chihaa míj se rque Rej soj sí nicun' xta' a doj rasuun sa' man soj a man adonj. 2 Che'é dan sese me rá so' rque so' sa'anj man nij sí nique, ne se guun rá so' ca'yanj nii chruun a'yánj qui'yáa so', ne ni'yaj yuvii go' so' sa'anj man sí nique, ne cataj nij yuvii se vaa ve'é qui'yáa so' ma'. 'O se inanj danj 'yaj nij sí nucui' rá gaa vaj nij so' rá ve' tucu'yón ní' se-tucuanj Moisés do', rihaan nij callé do', ne uno cunudanj yuvii, 'yaj nij so' adonj. Ya ya cataj xna'anj 'unj rihaan soj se vaa aj ve'é ca'mii yuvii che'é nij so', tzaj ne a 'ó rasuun se quiri' uún nij so' a ma'. A 'ó xco' se naru'vee Diose rihaan nij so' man adonj. 3 Tzaj ne so' ro', sese me rá so' rque so' sa'anj man nij sí nique, ne se natá' so' rihaan yuvii daj 'yáa so' ma'. Dan me se daj chihaa míj se cataj xna'anj so' rihaan ra'á so' rej nichruún so' se vaa rque ra'á so' rej nuva' so' ma'. 4 Asa' quisíj rque yuve so' sa'anj yo', gaa ne orún' Réé so' Diose me sí quene'en daj qui'yaj yuve so', gaa ne so' me sí naru'vee rihaan so' quene'en cunudanj yuvii nanj adonj.

*Nana nihánj taj xna'anj daj qui'yaj ní' gaa achín ni'yaj ní' rihaan Diose a*

5 "Ne gaa achín ni'yaj soj rihaan Diose, ne se qui'yaj soj se vaa 'yaj nij sí nucui' rá ma'. 'O se niha' rá nij so' canicun' nij so' rá ve' tucu'yón yuvii se-tucuanj Moisés, ne niha' rá nij so' canicun' nij so' rej nuná tuvi' chrej ca'aan nocoo, ne achín ni'yaj nij so' rihaan Diose, tzaj ne inanj me rá nij

so' quene'en yuvii man nij so', ne ve'é ca'mii yuvii che'é nij so', rá nij so' adonj. Ya ya cataj xna'anj 'unj rihaan soj se vaa aj ve'é ca'mii yuvii che'é nij so', ne aj navij quiri' nij so' tu'vee nij so' vaa, ne a 'ó xco' se naru'vee uún Diose rihaan nij so' a ma'. 6 Tzaj ne so' ro', gaa me rá so' cachinj ni'yáa so' rihaan Diose, ne asino catuu so' rá ve', gaa ne caráán so' ta'yaa, gaa ne cachinj ni'yaj yuve so' rihaan Rej ní' Diose á. Ne Rej ní' Diose me sí ne'en se vaa achín ni'yaj niganj so' rihaan so', ne naru'vee so' rihaan so' adonj. 7 Ne gaa achín ni'yaj soj rihaan Diose, ne se qui'yaj soj se vaa 'yaj nij sí ne ne'en daj vaa Diose ma'. Dan me se a'mii rma'an ndo'o nij so' nana, tzaj ne ne'en nij so' me taj nana yo' ma'. Maan che'é se a'mii a'mii nij so', che'é dan guun niha' rá Diose ne cunoo Diose nu' nana a'mii nij so', rá nij so' nanj adonj. 8 Che'é dan se qui'yaj soj danj ma'. 'O se asij ataa cachinj ni'yaj soj rihaan Rej soj Diose, ne aj ne'en so' nu' se vaa achín man soj nanj adonj.

9 "Che'é dan asa' achín ni'yaj soj, ne nihánj cataj soj á: "Ataj Chij sí nicun' xta', me rá núj xcaj yuvii cuentá se vaa inanj sa' 'yáa so' a. 10 Ne me rá núj quisíj güii guun chij so' rihaan chumii nihánj, ne me rá núj qui'yaj yuvii nu' se vaa me rá so' qui'yaj yuvii a. Dan me se ase vaa 'yaj nij sí man xta' nu' se vaa me rá so' qui'yaj nij so' ro', danj gaa qui'yaj núj síj man rihaan chumii nihánj nu' se vaa me rá so' qui'yaj núj, rá núj a. 11 Ne rque so' nu' rasuun achín rihaan núj cha núj cuan' á. 12 Ne caraa x'naa so' che'é xcúun taj xráa núj rihaan so' á. Dan me se ase vaa qui'yaj núj caráj x'naa núj che'é cacun' qui'yaj tuvi' núj rihaan núj ro', ta'nga' danj qui'yáa so' che'é ma'an núj caraa x'naa so' rihaan núj á. 13 Dan me se caráán ra'á so' xráa núj rihaan chrej chí'ii á. Ne tinanii so' man núj se guun qui'yaj núj cacun' a". Inanj danj ca'mii soj cachinj ni'yaj soj rihaan Diose adonj. 14 'O se sese caraa x'naa soj che'é cacun' qui'yaj tuvi' soj



rihaan soj, ne danj qui'yaj uún Rej soj síí nicun' xta', ne caraa x'naa so' rihaan soj uún adonj. <sup>15</sup> Tzaj ne sese se ca'vej rá soj caraa x'naa soj che'é cacun' qui'yaj tuvi' soj rihaan soj, ne daj chihaa mǐj se tinavij Rej soj Diose cacun' tumé ma'an soj a man adonj.

*Nana nihánj taj xna'anj daj qui'yaj ní' gaa caraa guee ní' rihaan Diose a*

<sup>16</sup> "Ne gaa toco' soj x'naa man soj che'é se aráj guee soj rihaan Diose, ne se qui'yaj soj ndaa vaa 'yaj nij síí nucui' rá ma'. Dan me se gaa aráj guee nij so', ne ase vaa rihaan síí nanó ndo'o rá ro', vaa rihaan nij so', 'yaj nij so', ne anó ndo'o nacaj rihaan nij so', 'yaj uún nij so', ne me inanj rá nij so' quene'en yuvii man nij so' daj 'yaj nij so' gaa ne xcaj nij yuvii cuentá se vaa aráj guee nij so' rihaan Diose, rá nij so' nanj adonj. Ya ya cataj xna'anj 'unj rihaan soj cuano se vaa aj quiri' nij so' tu'vee nij so' vaa, ése aj ve'é ca'mii yuvii che'é nij so' nanj adonj. Ne a 'ó rasuun se quiri' nij so' rihaan Diose a ma'. <sup>17</sup> Tzaj ne soj ro', ino qui'yaj soj á. Gaa toco' soj x'naa man ma'an soj che'é se aráj guee soj rihaan Diose, ne canaan soj rihaan soj ne caxrii soj casté raá soj á. <sup>18</sup> Dan me se se guun rá soj quene'en yuvii se vaa aráj guee soj a ma'. Ne ca'vee se taj vaj yuvii quene'en man soj aráj guee soj, tzaj ne quene'en Rej soj Diose daj 'yaj soj, ne so' me síí naru'vee rihaan soj nanj adonj.

*Nana nihánj taj xna'anj se vaa qui'yaj suun ní' che'é yan cumán si'yaj ní' rej xta' a*

<sup>19</sup> "Se qui'yaj suun soj cumán ndo'o si'yaj soj rihaan chumii nihánj ma'. 'O se rihaan chumii nihánj mán ndo'o xcuu xlúú xǐj rasuun do', tacunj yoo do', chá si'yaj yuvii nihánj a. Ne vaa síí ituu atúj rá ve' ne 'yaj ituu si'yaj tuvi' uún a. <sup>20</sup> 'O se taj che'é naqui'yaj ru'vee soj man soj nihánj ma'. Tananj qui'yaj suun ndo'o soj che'é yan cumán si'yaj soj rej xta' á. Dan me se xta' ro', taj se chá si'yaj soj ma'. Ne taj síí qui'yaj ituu si'yaj

soj man adonj. <sup>21</sup> Ne sese inanj che'é rasuun man rihaan chumii nihánj qui'yaj suun soj, gaa ne veé maan rihaan chumii nihánj quinaj nimán soj gaa nanj adonj. Ne sese inanj che'é rasuun man xta' ro', qui'yaj suun soj, gaa ne veé rej xta' ro', ca'anj nimán soj nanj adonj. Me rej ma'an araa sa' soj rasuun, ne veé rej danj vaj nimán soj nanj adonj.

*Nana nihánj taj xna'anj se vaa no xcúún ní' xcaj ní' cuentá daj qui'yaj ní' a*

<sup>22</sup> "Rlij rihaan ní' me ya'an nicaj yu'unj man ní' ei. Dan me se sese rlij rihaan ní' ro', ni'yaj yo' ne nuu sa' rá yo', gaa ne nu' nee man ní' ro', sa' vaa, ne adi' se chuguun aga' ya'an ro', danj chuguun man ní' gaa sa' rihaan ní' adonj. <sup>23</sup> Tzaj ne sese rlij rihaan ní' ro', ni'yaj yo' ne inanj uun chi'ii rá yo', gaa ne nu' nee man ní' ro', uun chi'ii rá, gaa ne adi' síí nicun' yan rmi' ne cunudanj man so' ro', rmi', ne danj vaa síí uun chi'ii rá, ne rmi' uxrá nu' man so' adonj.

*Nana nihánj taj xna'anj se vaa se guun nucuaaj ní' ca'nej nucuaaj ní' nimán ní' qui'yaj suun ní' se-suun Diose, sese me rá ní' qui'yaj suun ní' che'é sa'anj a*

<sup>24</sup> "Taj vaj síí guun nucuaaj qui'yaj suun sa' rihaan vij ru'vee ma'. Sese qui'yaj suun 'o so' rihaan vij ru'vee, ne nachri' so' ni'yaj so' man 'o ru'vee yo', ne caran' rá so' ni'yaj so' man yo'ó ru'vee yo' a. Se guun nucuaaj so' caran' rá so' ni'yaj so' man vij ru'vee ma'. Ne xa' soj, tzaj ne se ca'vee qui'yaj suun soj che'é Diose ne qui'yaj suun soj che'é nij rasuun man rihaan chumii nihánj a ma'.

*Nana nihánj taj xna'anj se vaa ne nó xcúún ní' nano ndo'o rá ní' che'é se chá ní' do', che'é yatzǐj cunuû ní' do' a*

<sup>25</sup> "Che'é dan cataj xna'anj 'unj rihaan soj se vaa taj che'é nano ndo'o rá soj che'é soj ma'. Ne che'é dan se nanó rá soj che'é se chá soj do', che'é yan quiri' soj se caráán xráá soj do', se nanó rá soj ma'. Dan me se aj ne'en soj vaa i'na' soj, qui'yaj Diose, ne se

guun nucaj Diose rque Diose se cha soj, rá soj gaa a na'. Daj chihaa míj se guun danj rá soj ma'. Ne Diose me sí ca'vee rque se cha soj ei. Ne Diose me sí qui'yaj nee man soj, ne se guun nucaj Diose rque Diose yatzíj caráán xráá soj, rá soj gaa a na'. Daj chihaa míj se guun danj rá soj ma'. Ne Diose me sí ca'vee rque se caráán xráá soj ei.

<sup>26</sup> "Xcaj soj cuentá daj 'yaj nij xtâj vaj xta', ne ne unô nij xo' 'núú, ne ne rii nij xo' naa, ne ne araa nij xo' tan' rá cuchruu, tzaj ne Rej soj sí nicun' xta' ro', a'vee rque se chá nij xo' ei. Ne táá a soj, ne sa' doj vaa soj rihaan xtâj ne'en Diose a adonj. Ya sa' doj vaa soj chuguanj. <sup>27</sup> Ne nda' se nanó ndo'o rá soj che'é yan chre' vaa soj, tzaj ne a 'ó xco' se guun nucaj soj cachij xcaan soj doj qui'yaj ma'an soj ma'. Maan Diose ro', me sí ne'en daj gaa cachij soj, ne che'é dan taj che'é nanó rá soj a ma'.

<sup>28</sup> "Ne me che'é nanó rá soj che'é yatzíj caráán xráá soj ga. 'O se xcaj soj cuentá ni'yaj soj nij yâj man tacaan se vaa ve'é ndo'o vaa nij yâj man tacaan ei. Ne 'yaj suun nij yâj, tzaj ne ma'an Diose ro', me sí sa' ndo'o vaa qui'yaj man nij yâj adonj. Ne ne rii nij yâj yu'vej ma'. <sup>29</sup> Tzaj ne adi' se vaa sí ru'vee ne sa' uxrá vaa sagan' so' ro', vaa nij yatzíj nuu nij yâj adonj. Dan me se cataj xna'anj 'unj rihaan soj se vaa sí cu'naj Salomón sí cane gaa naá, ne ve'é uxrá vaa yatzíj nuu so', qui'yaj cunudanj sa'anj vaa rihaan so', tzaj ne nij doj vaa yatzíj nuu so' rihaan nij yâj man tacaan yo', qui'yaj Diose adonj. <sup>30</sup> Dan me se danj nanj nij yâj man tacaan yo', tzaj ne sa' uxrá vaa nij yatzíj nuu nij yâj yo', 'yaj Diose, ne cuan' ro', mán nij yâj tacaan, tzaj ne a'yuj ne ca'ne' nii man nu' coj do', yâj do', man tacaan, ne caraa nii man yo' rihaan ya'an, ne cacaa nu' nij yâj yo' nanj adonj. Ne a doj yu'vee taj nó yâj yo' a ma'. Táá a soj yuvii, ne se nanó rá soj ma'. Diose me sí rque sagan' soj adonj. Tzaj ne ne guun ya sa' rá soj se vaa Diose me

sí racuíj ya man soj man adonj.

<sup>31</sup> "Dan me se se nanó ndo'o rá soj cataj soj: "Me se cha ní' ga. Me se co' o ní' ga. Me se caráán xráá ní' ga". Se guun rá soj danj ma'. <sup>32</sup> 'O se nij sí ne ne'en daj vaa Diose ro', inanj 'yaj suun ndo'o nij so' che'é rasuun man rihaan chumij nihánj adonj. Tzaj ne nu' rasuun achiin man soj ro', aj ne'en Rej soj sí nicun' xta' se vaa achiin nu' rasuun yo' man soj adonj. <sup>33</sup> Che'é dan nano' soj rej daj qui'yaj soj ne guun chij Diose nimán soj ne cunuu sa' nimán soj, gaa ne rque Diose nu' rasuun yo' man soj ei. <sup>34</sup> Che'é dan se nanó rá soj che'é se vaa cachij rihaan soj a'yuj ma'. 'O se vaa sayuun 'na' daj a 'o 'o güii adonj. Che'é dan xcaj soj cuentá daj qui'yaj soj güii cuan', ne se nanó rá soj che'é se vaa qui'yaj soj güii a'yuj ma'.

## 7

*Nana nihánj taj xna'anj daj qui'yaj ní' gaa ca'mii ní' ga tinúú ní' che'é cacun' tumé tinúú ní' a*

<sup>1</sup> "Se guun niha' rá soj cuta' soj cacun' xráá tinúú soj, gaa ne taj cacun' cuta' Diose xráá ma'an soj man adonj. <sup>2</sup> Dan me se sese guun niha' rá soj cuta' soj cacun' xráá tinúú soj, ne cuta' Diose cacun' yo' xráá ma'an soj ei. Ne sese se cuta' soj cacun' xráá tinúú soj, ne cunuu ee rá Diose man ma'an soj uún nanj adonj. <sup>3</sup> Me che'é guun chree rá so' ni'yaj so' ni'ya nuu rihaan tinúú so' ga. Ne ne ni'yaj so' chruun manj nuu rihaan ma'an so' a. <sup>4</sup> Asa' ca'vee cataj so' rihaan tinúú so', "rque so' rihaan so' quirii 'unj ni'ya á". Se guun a doj cataj so' danj tihá' so' man tinúú so' ma'. 'O se ni'yaj so', ne chruun manj vaa guee nuu rihaan so' ei. <sup>5</sup> Sí nucui' rá mé so' ei. Asino quirii so' chruun manj nuu rihaan so', gaa ne ca'vee quirii so' ni'ya nuu rihaan tinúú so' adonj. Dan me se ase vaa aráán ni'ya rihaan yuvii ro', danj vaa aráán rihaan yuvii 'yaj cacun' ata yuvii adonj.

6 "Tzaj ne ne'en soj se vaa ne nó xcúún soj go' soj rasuun guee man chuvee ma'. Ne se caraa soj chruj perlá tu'vee ndo'o rihaan xcáá ma'. 'Q se chuvee yo' ro', canicaj ne cha man soj, ne xcáá yo' ro', tuguáj che'é xcáá man se sa' yo', ne quinavij nu' yo' xtun', qui'yaj xcáá nanj adonj. Ne se sa' yo' me chrej noco' ní' adonj. Che'é dan sese na'vej uxrá rá yuvii cunō yuvii chrej nago' soj rihaan nij yuvii, ne ase vaa xcáá do', ase vaa chuvee do', danj vaa nij yuvii ei. Ne se nago' soj doj chrej sa' man nij yuvii 'yaj danj a ma'.

*Nana nihánj taj xna'anj se vaa no xcúún ní' cachinj ni'yaj ní' rihaan Diose che'é rasuun achiin man ní' ei*

7 "Cachinj soj se vaa achiin man soj rihaan Diose, ne so' me sí rque man soj, ne nano' soj rasuun achiin man soj, ne nari' soj rasuun yo', ne ase vaa 'yaj sí tica'mii ta'yaa tucúa tuvi' ro', danj qui'yaj soj ga Diose, ne ca'nuu Diose ta'yaa yo', ne rque Diose rasuun achiin man soj adonj. 8 'Q se sí achín rasuun rihaan Diose ro', quirí' so' rasuun achiin man so', ne sí nano' rasuun achiin man ro', quirí' so' rasuun yo', ne sí tica'mii ta'yaa rej yanj Diose ro', ca'nuu Diose ta'yaa, ne quirí' sí tica'mii ta'yaa rasuun achiin man so' adonj. 9 Xcaj soj cuentá se vaa ma'an soj, nanj yuvii me soj, tzaj ne sese achín ta'níi yo'o soj chraa cha yo' man soj, ne se ca'vee nano' soj yahij ne caxrii soj ston yo' ma'. 10 Ne sese achín ta'níi soj nee xcuaaj cha yo' man soj, ne se ca'vee nano' soj xcuáá ne caxrii soj ston so' ma'. 11 Dan me se danj nanj soj, ne sí chí'ij nimán me soj, tzaj ne ne'en soj rque soj se sa' cha ta'níi soj ei. Che'é dan táá a Rej soj sí nicun' xta', ne sij sa' inanj me so', ne so' me sí rque ya rasuun sa' man nij sí achín rasuun man so' nanj adonj.

*Nana nihánj taj xna'anj daj qui'yaj ní' rihaan tuvi' ní' a*

12 "Dan me se daj se uun rá soj qui'yaj sa' yuvii rihaan soj ro', ta'nga' danj qui'yaj sa' soj rihaan tuvi' soj

á. Sese danj qui'yaj soj rihaan tuvi' soj, ne sí uno nu' se-tucuanj Moisés me soj, ne sí uno nu' se-nana nij sí nata' se-nana Diose gaa naá me uún soj adonj.

*Nana nihánj taj xna'anj che'é vij chreja*

13 "Ase vaa vij chrej vaa rej vaa rihaan soj, ne dan me se chrej ca'aan me yo'o chrej yo', ne caxra' ndo'o vaa rej nayón yuvii, ne rihaan ya'an ro', vaj chrej yo' nanj adonj. Ne man uxrá yuvii vaj chrej yo' ei. Se ca'anj soj chrej yo' ma'. Nanj vaa chrej ca'anj soj ei. Chrej catuun me chrej ca'anj soj, 14 ne chruj vaa rej nayón yuvii a. Sayuun ndo'o vaa vaj yuvii chrej yo', tzaj ne vaj chrej yo' rej gaa i'na' yuvii cayáan yuvii ga Diose nu' cavii nu' ca'anj adonj. Tzaj ne doj nij yuvii nari' chrej catuun nanj ei.

*Nana nihánj taj xna'anj daj gaa qui'yaj ní' quene'en ní' daj vaa nimán yuvii a*

15 "Vaa yuvii taj se vaa me nij so' sí nata' se-nana Diose, tzaj ne ne ya a'mii nij so' ma'. Cutumé soj man soj, se gaa nanj qui'yaj nij so' sayuun man soj á. Dan me se vaa güii cuchí' nij so' rihaan soj, ne ase vaa matz-inj ro', danj gaa nij so' cuchí' nij so' rihaan soj, ne ni'yanj ndo'o ca'mii nij so' rihaan soj, tzaj ne nimán nij so' ro', ase vaa nimán xca'yanj ca'nu' ro', gaa nimán nij so', guun rá nij so' qui'yaj nij so' sayuun man soj nanj adonj. 16 Che'é dan xcaj soj cuentá ni'yaj soj man nij so' daj qui'yaj nij so', gaa ne quene'en nij soj daj vaa nimán nij so' ei. Uta nii chruj chá raá chruun tanj, rá soj na'. Taj ma'. Ne uta nii chruj chá raá coj yâ ya'aa, rá soj na'. Taj ma'. 17 Dan me se chruun sa' ro', mán chruj chá raá a. Ne chruun tanj ro', man chruj xnaj raá uún a. Sese cuchruu chruun, ne se cumán chruj sa' raá chruun yo' a ma'. 18 Chruun sa' ro', se guun cumán chruj nij raá ma'. Ne chruun nij ro', se guun cumán chruj sa' raá ma'. Ase vaa chruun yo' ro', danj vaa nimán

yuvii, ne ase vaa chruj yo' ro', danj vaa rasuun 'yaj yuvii adonj. <sup>19</sup> Ne sese nuvi' chruj sa' raa 'o chruun, ne a'ne' nii man chruun yo', ne axri' ya'an nii man chruun yo' nanj adonj. Ne ase vaa ran' chruun yo' ro', ta'nga' danj quiran' uun' nij yuvii 'yaj se chi'ii nanj adonj. <sup>20</sup> Dan me se sese xcaj soj cuentá ni' yaj soj man yuvii, gaa ne quene'en soj daj vaa nimán nij yuvii, gaa ne quene'en soj daj yuvii me nij so' adonj.

*Nana nihánj taj xna'anj me sí cayáan ga Diose asa' guun chij Diose rihaan chumii nihánj a*

<sup>21</sup> "Ne'en soj se vaa man ndo'o yuvii taj rihanj se vaa uno nij so' rihanj, tzaj ne tu'va rma'an ta'aj nij so' nanj á. Nuveé cunudanj nij sí taj ne'en manj ca'anj cayáan ga Diose asa' guun chij Diose rihaan chumii nihánj ma'. Tananj orún' me se inanj nij sí uno rihaan Réé 'unj sí nicun' xta' me sí cayáan ga so' nanj adonj. <sup>22</sup> Ne güii ca'ne' 'unj cacun' che'é yuvii me se cumán ndo'o yuvii cataj rihaan 'unj: "Sí uno rihaan so' me núj, Señor. Aj nata' núj nana rqué so' man núj rihaan yuvii á. Ne cata' tu'va núj se-chuvií so', ne quirii núj nana chree nimán yuvii á. Ne qui'yaj suun ndo'o núj suun sa' che'é so' adonj". Danj ca'mii nij yuvii yo' rihaan 'unj vaa güii nanj adonj. <sup>23</sup> Gaa ne cataj yá 'unj rihaan nij yuvii a: "A 'o güii ne ne'én 'unj man soj ma'. Maan sí 'yaj inanj cacun' me soj nanj adonj. Naxuun soj man soj rihanj á". Danj cataj 'unj rihaan nij sí 'yaj cacun' vaa güii nanj adonj.

*Nana nihánj taj xna'anj daj quiran' nij sí uno rihaan Jesucristó do', nij sí ne uno rihaan Jesucristó do' a*

<sup>24</sup> "Dan me se a me ma'an sí uno sa' nana nihánj nana cataj xna'anj 'unj rihaan soj ne 'yaj so' ndaa vaa taj 'unj, ne ase vaa 'o sí cune' ve' tucúa rihaan yuvej vaa so' ei. Sí cune' ve' yo' me se sí acaj ndo'o cuentá me so', ne cune' so' ve' yo' rihaan 'o yuvej adonj. <sup>25</sup> Gaa ne ca'na' maan, ne go' ndo'o

maan raá ve', ne cavii ni'yoj chráá, ne ca'na' go' tacóo ve', ne ca'na' uxrá nana yuvaa, ne go' rihaan ve' yo' a. Tzaj ne ne canee ve' yo' a ma'. 'O se raan inanj ne ve' yo' rihaan yuvej nanj adonj. <sup>26</sup> Tzaj ne sí na'vej rá cunó nana nihánj nana cataj xna'anj 'unj rihaan soj me se ase vaa sí cune' ve' rihaan yo'óo vaa so' adonj. Ne sí ni'yon rmi me so', ne cune' so' ve' rihaan yo'óo chruu, <sup>27</sup> ne veé dan, gaa ca'na' uxrá maan yuvaa go' yo' xráá ve', ne cavii ni'yoj chráá, ne ca'na' na xee go' na xee tacóo ve', ne ca'na' uxrá nana yuvaa ne go' xráá ve' yo' a. Veé dan, ne canee nu' ve' tucúa sí ni'yon yo' nanj adonj. Che'é dan xcaj soj cuentá, ne ve'é cunó soj nana nihánj, ne se quiran' soj sayuun ma'. —Inanj nana nihánj ca'mii Jesucristó rihaan nij sí tucu'yón se-nana so' a.

<sup>28</sup> Veé dan, ne quisij tucu'yón Jesucristó nu' nana nihánj rihaan nij yuvii, gaa ne caraya'anj ndo'o nij yuvii noco' man so' che'é nana nihánj, nana cataj xna'anj Jesucristó rihaan nij so' a. <sup>29</sup> 'O se xcaj nij yuvii cuentá se vaa ase vaa a'mii 'o sí nicaj suun avii tu'va ro', vaa a'mii Jesucristó, rá nij so' a. Ne cuu doj vaa se-nana so' ga se-nana nij sí naqui'yaj cuu se-tucuanj Moisés, rá nij so' a.

## 8

*Nana nihánj taj xna'anj daj vaa nahuun sa' 'o sí ran' luj ri'yuj, qui'yaj Jesucristó a*

<sup>1</sup> Gaa ne nanij Jesucristó quij yo', ne cachée ndo'o yuvii ga so' a.

<sup>2</sup> Dan me se cuhi' yo'o sí ran' luj ri'yuj rihaan Jesucristó, ne canicun' ruj so' rihaan Jesucristó, ne cataj so':

—Sese me rá so', ne ca'vee ca'nee so' chi'ii xráj, Señor —taj so' rihaan Jesucristó a.

<sup>3</sup> Gaa ne cuta' Jesucristó ra'a Jesucristó raá sí ran', ne cataj Jesucristó:

—Me raj qui'yáj danj ei. Nahuún so', qui'yáj adonj —taj Jesucristó rihaan so' a.



Nu' danj cataj Jesucristó, ne nu' quinavij luj xráá síí ran' a. <sup>4</sup> Gaa ne cataj Jesucristó rihaan so' a:

—Cütumé so' mán so' se cataj xna'anj so' rihaan yuvij che'é se qui'yáá 'unj che'é so' ma'. Maan se cuchí' so' rihaan xrej, ne tiháán so' mán so' rihaan xrej se vaa nahuún so', ne rque so' rihaan Diose se vaa cataj síí cu'naj Moisés gaa naá ndaa vaa no xcuún so' rque so' rihaan Diose á. Gaa ne xcaj nij xrej cuentá se vaa nahuún so' qui'yáj adonj —taj Jesucristó rihaan síí nahuun yo' a.

*Nana nihánj taj xna'anj se vaa nahuun se-mozó yo'o tanuu capitán, qui'yaj Jesucristó a*

<sup>5</sup> Dan me se cuchí' Jesucristó chuman' Capernaum, ne catúj so' chuman' yo', ne cuchí' yo'o tanuu capitán rihaan so' a. Ne so' ro', me síí rii ta'nga' rihaan 'o cientó tanuu adonj. Dan me se cachíín ni'yaj so' rihaan Jesucristó, <sup>6</sup> cataj so':

—Canó chi'ii man se-mozó 'unj, Señor. Ne ne nasqui' so' ma'. 'O se yo'o naj so' rá ve', ne ran' uxrá so' sayuun, 'yaj chi'ii nanj á —taj tanuu capitán yo' rihaan Jesucristó a.

<sup>7</sup> Ne cataj Jesucristó rihaan so':

—Ca'anj ní', gaa ne nahuun so', qui'yáj á —taj Jesucristó a.

<sup>8</sup> Gaa ne cataj uún tanuu capitán yo':

—'O se nuveé sij sa' mé 'unj ma'. Ne nó xcuún 'unj catuu so' rá ve' tucaj qui'yáj a ma'. Maan se ca'ne' uun so' suun se vaa nahuun se-mozó 'unj, gaa ne nahuun ma'an so' adonj. <sup>9</sup> 'O se vaa síí rii ta'nga' rihaan 'unj, ne rii ta'ngá' 'unj rihaan tanuu, ne taj xna'anj 'unj rihaan tanuu se vaa ca'anj nij so', ne 'anj nij so', ne taj xna'anj 'unj rihaan nij so' se vaa ca'na' nij so', ne 'na' nij so' rihaan 'unj, ne taj xna'anj 'unj daj qui'yaj nij so', ne veé danj 'yaj tanuu adonj. Ne ne'én 'unj se vaa ase vaa rii ta'ngá' 'unj rihaan nij tanuu noco' manj ro', danj rii ta'nga' guee so' rihaan chi'ii

anó man yuvij nanj á —taj tanuu capitán yo' rihaan Jesucristó a.

<sup>10</sup> Dan me se, gaa cuno Jesucristó nana ca'mii tanuu capitán yo', ne ca'anj rá Jesucristó, ne cataj so' rihaan nij síí noco' rej xco so' a:

—Ya ya cataj xna'anj 'unj rihaan soj se vaa taj vaj a 'ó rej ne naríj man yo'o síí israelitá síí cuchumán ndo'o rá nana a'mii 'unj ndaa vaa amán rá tanuu capitán nihánj a ma'.

<sup>11</sup> Ne cataj xna'anj 'unj rihaan soj se vaa güii guun chij Diose rihaan chumij nihánj ro', ca'na' ndo'o yuvij man cunú' chumij, ne cayáán nij so' rihaan se-mesa Diose, ne cha nij so' chraa ga síí cu'naj Abraham do', ga síí cu'naj Isaac do', ga síí cu'naj Jacob do', adonj. <sup>12</sup> Ne nij síí israelitá ro', no xcuún nij so' cuchuman rá nij so' ni'yaj nij so' manj, ne sese cuchuman rá nij so' ni'yaj nij so' manj, ne ca'vee cane nij so' uún ga Diose nanj á. Tzaj ne na'vej rá nij so' a man adonj. Che'é se na'vej rá nij so' qui'yaj nij so' danj, che'é dan quiri'ij gan' ndo'o nii man nij so' rej rmi', ne ta'vee uxrá nij so', ne ndaa cha ruj ma'an nij so' cúu yan' nij so' nanj adonj. Danj quiran' nij so' che'é se na'vej rá nij so' cuchuman rá nij so' ni'yaj nij so' manj nanj á —taj Jesucristó rihaan nij yuvij canoco' man so' a.

<sup>13</sup> Canicaj uún Jesucristó cataj Jesucristó rihaan tanuu capitán:

—Ca'vee ca'anj so' yaj a. Ya cuchumán rá so' se vaa nahuun se-mozó so' qui'yáj a. Ne nahuun so' ei —taj Jesucristó rihaan so' a.

Ne veé maan orá yo' ro', nahuun se-mozó tanuu capitán yo', qui'yaj Jesucristó adonj.

*Nana nihánj taj xna'anj daj qui'yaj Jesucristó, nahuun nii chej Pedró do', que'ee uxrá yo'ó yuvij do', qui'yaj Jesucristó a*

<sup>14</sup> Gaa ne ca'anj Jesucristó tucúa síí cu'naj Pedró, ne quene'en so' se vaa naj nii chej Pedró ran' no', ne caxríj uxrá cachi' man no' a. <sup>15</sup> Ne quita'aa Jesucristó ra'a no', gaa ne veé maan

orá dan nahuun no', qui'yaj Jesucristó, ne naxagaa no', ne qui'yaj chuvii no' cha nij so' nanj adonj.

<sup>16</sup> Rej ca'anj güii cuchi' yuvii rihaan Jesucristó a. Dan me se nicaj nij yuvii man que'ee uxrá síi nuu nana chree nimán, cuchi' nij yuvii rihaan Jesucristó, ne cataj xna'anj uun Jesucristó rihaan nij nana chree se vaa naxuun nij so' man nij so', gaa ne, veé dan, ne curihanj nij nana chree nimán nij yuvii, gaa ne cunuu sa' nimán nij yuvii yo' cuaj nanj adonj. Ne quinahuun sa' cunudanj nij síi ran', qui'yaj uún Jesucristó a.

<sup>17</sup> Dan me se quisij ya nu' nana nihánj nana ca'mii síi cu'naj Isaías síi nata' se-nana Diöse gaa naá, se vaa cataj so': "Ninaj ní', ne canó chi'ii man ní', tzaj ne nahuun ní', qui'yaj síi ca'na' vaa güii nanj adonj", taj síi cu'naj Isaías gaa nata' so' adonj.

*Nana nihánj taj xna'anj daj ca'mii Jesucristó rihaan vij síi tihaj guun rá canocó' man so' a*

<sup>18</sup> Quene'en Jesucristó se vaa man ndo'o yuvii anicaj rej nicun' so' ni'yaj man so' a. Che'é dan ca'ne' so' suun rihaan nij síi tucu'yón se-nana so' se vaa ca'anj nij so' ga so' ndaa rnej na lacuaná cu'naj Galilea a.

<sup>19</sup> Gaa ne cuchi' yo'o so' rihaan Jesucristó a. So' ro', me síi naqui'yaj cuu se-tucuanj Moisés rihaan yuvii adonj. Ne cataj so' rihaan Jesucristó a:

—Canocó' 'unj mán so' daj rej ma'an vaj so', maestro —cataj so' rihaan Jesucristó a.

<sup>20</sup> Gaa ne cataj ya Jesucristó se vaa ran' so' chéé so' a:

—'O se nij chunee ro', otoj sa' nij xo' rá yu'uj taj rque yo'óó, ne nij xtáj chéé xtá' ro', vaa saca' nij xo' a. Ne xa' 'unj sij ca'neé Diöse nicaj yu'unj man yuvii, tzaj ne taj a 'ó rej quinaá 'unj cotoj 'unj a ma' —taj Jesucristó rihaan so' a.

<sup>21</sup> Ne vaa yo'ó síi tucu'yón se-nana Jesucristó cuchi' rihaan so', ne cataj so':

—Ca'vej so' nanj tucuaaj, ne ndaa cavi' réj, gaa ne cachin' 'unj man réj, gaa ne canocó' 'unj mán so', Señor —taj yo'ó so' a.

<sup>22</sup> Tzaj ne cataj Jesucristó rihaan so' a:

—Ca'ne' rá so' cachin' ma'an nij síi cavi' nimán man tuvi' so' xngá á. Tzaj ne cuano nihánj ro', no xcúun so' yo'o canocó' so' manj adonj —taj Jesucristó rihaan yo'ó so' a.

*Nana nihánj taj xna'anj se vaa ca'ne' Jesucristó suun rihaan na do', rihaan nana do', se vaa canicun' yo' a*

<sup>23</sup> Gaa ne catúj Jesucristó rque rihoo chéé rihaan na, gaa ne catúj nij síi tucu'yón se-nana so' rque rihoo ga so' a. <sup>24</sup> Veé dan, ne nasqui' nucuaj ndo'o rihaan na lacuaná, ne me ndo'o rá na yo' guun nucuaj yo' caráán yo' xráá rihoo a. Ne veé dan vaj Jesucristó, ne cotoj so' adonj. <sup>25</sup> Gaa ne ca'anj nij síi tucu'yón se-nana Jesucristó rej naj so' cotoj so', ne narii nij so' nej rihaan so', ne cataj nij so':

—Tinanii so' man ní' se cavi' nu' ní', man Señor —taj nij so' rihaan Jesucristó a.

<sup>26</sup> Dan me se ma'an Jesucristó cataj, ne:

—Me che'é chu'vi' ndo'o nimán soj ga. Yo' me rej ataa cuchuman sa' rá soj ni'yaj soj manj adonj —taj Jesucristó rihaan nij so' a.

Gaa ne canicun' caya so', ne caxrj yuvaa so' man na do', man nana do' a. Gaa ne canicun' dínj uxrá rihaan na lacuaná yo', qui'yaj Jesucristó nanj adonj.

<sup>27</sup> Ne cucu'vi' nij snó'o yo' ni'yaj nij so' man Jesucristó, cataj nij so':

—Daj sij me síi nihánj ga. 'O se ndaa nana ndaa na uno a'mii so' ason —taj nij so' rihaan tuvi' nij so' a.

*Nana nihánj taj xna'anj se vaa quirii Jesucristó man nij nana chree nimán vij snó'o a*

<sup>28</sup> Gaa ne cuchi' Jesucristó ndaa rnej na lacuaná yo' rej ne nij síi man chuman' cu'naj Gadara a. Ne vaa yu'uj yuvej, rej cachin' nij yuvii



xnangá a. Dan me se cavii vij snó'o yu'uj yuvej yo', ne cuchi' roj so' rihaan Jesucristó a. Roj so' me síi nuu nana chree nimán, ne yuvaá ndo'o roj so' adonj. Che'é roj so' na'vee cachén yuvij rej yo' a ma'. <sup>29</sup> Dan me se caguáj roj so' rihaan Jesucristó, cataj roj so':

—Veé ne'en núj se vaa ta'nij Diose mé so' á. Me che'é ca'ná' so' rej ne núj ga. Ca'ná' so' qui'yáá so' sayuun man núj na'. 'O se ataa doj quisij güii qui'yáá so' sayuun man núj adonj —taj roj so' rihaan Jesucristó a.

<sup>30</sup> Dan me se rej xcó roj so' ro', vaj que'ee xcáá chá coj man tacaan a. <sup>31</sup> Ne nij nana chree nuu nimán roj snó'o yo' ro', cachín ni'yaj nij so' rihaan Jesucristó, cataj nij so':

—Sese quirij so' man núj nimán roj snó'o nihánj, ne qui'yáá so' se ndo'o ca'nej so' man núj, catuuj núj nimán xcáá yo' ruguanj —taj nij nana chree yo' rihaan Jesucristó a.

<sup>32</sup> —Ca'anj soj cuaj á —taj Jesucristó rihaan nij so' a.

Gaa ne ca'anj nij so' catúj nij so' nimán xcáá yo', ne dan me se ruvaá uxrá tacaan nicun' tu'va na lacuaná rej vaj nij xcáá yo', ne gaa catúj nij nana chree nimán nij xcáá yo' me se cunánj ndo'o nij xo' ca'anj xo', ne veé danj vaj nij xo', ne quini cunudanj nij xo' rque na, ne canó xráá nij xo', qui'yaj na nanj adonj. <sup>33</sup> Ne nij síi tumé xcáá yo' ro', cunánj nij so' ca'anj nij so' ndaa chuman', ne catúj nij so' chuman', ne cataj xna'anj nij so' rihaan nij síi man chuman' yo' nu' se vaa quiran' roj snó'o do', nij xcáá do' a. <sup>34</sup> Gaa ne curihanj cunudanj nij síi man chuman' yo', guun rá nij so' narí' nij so' man Jesucristó a. Dan me se quene'en nij so' man so', ne cachín ni'yaj nij so' rihaan so' se vaa curihanj so' rej yanj nij so' ca'anj so' rej yanj a.

## 9

*Nana nihánj taj xna'anj se vaa nahuun sa' 'o síi na'vee cachee, qui'yaj*

## *Jesucristó a*

<sup>1</sup> Gaa ne cavii Jesucristó rihoo chée rihaan na, ne ca'anj so' chuman' cayáán so', ne catúj so' chuman' yo' a. <sup>2</sup> Ne veé nicaj nii man 'o síi na'vee cachee táá rihaan yuvéé, ne ca'na' nii rihaan Jesucristó a. Ne quene'en Jesucristó se vaa cuchumán uxrá rá nij yuvij se vaa nahuun sa' síi na'vee cachee yo' qui'yaj so' a. Che'é dan cataj so' rihaan síi ran' yo' a:

—No xcúún so' guun niha' rá so' che'é se navij cacun' xráá so', nanj tinuj —taj Jesucristó rihaan síi na'vee cachee yo' a.

<sup>3</sup> Dan me se cane doj síi naqui'yaj cuu se-tucuanj Moisés rihaan yuvij rá ve' ga Jesucristó, ne cataj nij so' rihaan tuvi' nij so' a:

—Nij vaa nana ca'mii síi nihánj rihaan Diose á. 'O se orún' Diose no xcúún cataj se vaa navij cacun' xráá yuvij á —taj nij síi tucuyón se-tucuanj Moisés ni'yaj nij so' man Jesucristó a.

<sup>4</sup> Ne quene'en Jesucristó me nana guun rá nij so' ca'mij nij so', ne che'é dan cataj so':

—Me che'é avii ndo'o nana chi'ii raa soj ga. <sup>5</sup> Tu'va ruma'án 'unj se vaa navij cacun' xráá síi nihánj, rá soj a na'. Ca'vee cataj uun ní' navij cacun' xráá síi nihánj na'. Ase ca'vee doj cataj ní' naxagaa so', ne cachee so' cuaj, cataj ní' xa'. <sup>6</sup> Dan me se me rá 'unj xcaj soj cuentá se vaa síi ca'née Diose nicaj yu'unj man yuvij mej ne no xcúún 'unj tinaví' 'unj cacun' xráá nij yuvij man rihaan chumij nihánj adonj —taj Jesucristó rihaan nij so' a.

Dan me se cataj Jesucristó rihaan síi na'vee cachee a:

—Nacue so' tuvée so', ne nan' so' tucua' so' á —taj Jesucristó rihaan síi naj rihaan yuvéé yo' a.

<sup>7</sup> Gaa ne naxagaa so', ne cavii so', ne quinan' so' tucua' so' adonj. <sup>8</sup> Ne quene'en nij yuvij se vaa nahuun sa' so', qui'yaj Jesucristó, ne che'é dan cuchu'vi' nimán nij so', quene'en nij so' Jesucristó, ne ve'é ndo'o ca'mii nij

so' che'é Diose, se vaa guun nucuaj Jesucristó racuíj ndo'o Jesucristó man yuvií, qui'yaj Diose adonj.

*Nana nihánj taj xna'anj se vaa cataj xna'anj Jesucristó rihaan síí cu'naj Mateo se vaa canoco' so' man Jesucristó a*

<sup>9</sup> Gaa ne cavii Jesucristó rej yo', ne quene'en so' man yo'ó síí yanj 'o ve' a'néj nii puextó man yuvií a. Mateo cu'naj síí ne rej yo' a.

Dan me se cataj Jesucristó rihaan so', ne:

—Canoco' so' manj, ca'anj ní' á —taj Jesucristó rihaan so' a.

Gaa ne naxumaan so', ne canoco' so' man Jesucristó, ca'anj so' a.

*Nana nihánj taj xna'anj se vaa me rá Jesucristó racuíj so' man nij síí tumé cacun' a*

<sup>10</sup> Dan me se 'o güii cayáán Jesucristó rá ve', ne ca'na' ndo'o tuvi' so' síí a'néj puextó do', yo'ó nij síí tumé ndo'o cacun' do', ne catúj nij so' rá ve', ne ca'anj cayáán nij so' ga Jesucristó, ne dan me se man rcua'aan nij síí tucu'yón se-nana Jesucristó do', ne chá cunudanj nij so' chraa a. <sup>11</sup> Ne quene'en nij síí fariseo se vaa chá Jesucristó chraa ga nij síí a'néj puextó do', ga yo'ó nij síí tumé ndo'o cacun' do', ne xná'anj nij so' man nij síí tucu'yón se-nana Jesucristó, cataj nij so':

—Síí tucu'yón nana rihaan soj ro', me che'é chá so' chraa ga nij síí a'néj puextó do', ga yo'ó nij síí tumé ndo'o cacun' do', rá núj a —taj nij síí fariseo rihaan nij síí tucu'yón se-nana Jesucristó a.

<sup>12</sup> Ne cuno Jesucristó nana ca'mii nij so', ne cataj so' rihaan nij so' a:

—Síí vaa nucuaj ro', ne nano' nij so' man doctor ma'. Maan síí ran' ro', me síí nano' man doctor adonj. Gaa ne ase vaa síí ran' ro', danj vaa nij síí nihánj adonj. <sup>13</sup> 'O se vaa che'é ca'anj soj tucu'yón soj daj taj nana nihánj nana no rihaan danj Diose á: “Ne uun niha' rá 'unj ni'yaj 'unj yuvií nago' xcuu rihaan 'unj ma'. Tananj uun niha' rá 'unj ni'yaj 'unj yuvií 'ee

rá man tuvi' adonj”. Inanj danj me se-nana Diose nana tucu'yón soj á. Dan me se xcaj soj cuentá se vaa ne ca'na' 'unj canacunj 'unj man síí sa' ma'. Che'é nij síí tumé cacun' ca'naj se vaa canoco' nij so' se-nanaj adonj. Tzaj ne sese síí sa' me soj, rá soj, ne nuveé sij canacunj 'unj man me soj ma' —taj Jesucristó rihaan nij so' a.

*Nana nihánj taj xna'anj me che'é ne toco' nij síí tucu'yón se-nana Jesucristó x'naa man ma'an nij so' a*

<sup>14</sup> Gaa ne nij síí tucu'yón se-nana síí cu'naj Juan cuchí' rihaan Jesucristó, ne xná'anj nij so' man so', cataj nij so':

—Me che'é, ne toco' núj x'naa man ma'an núj che'é se aráj guee núj rihaan Diose, ne toco' nij síí fariseo x'naa man ma'an nij so' uún, tzaj ne nij síí tucu'yón se-nana so' me se ne toco' nij so' x'naa man ma'an nij so' ga —taj nij so' rihaan Jesucristó a.

<sup>15</sup> Gaa ne cataj Jesucristó rihaan nij so' a:

—Ase vaa síí cuchruj sa'anj vaa 'unj, ne asa' ca'vee toco' nij síí man gaj x'naa man ma'an nij so', rá soj ga. Ase vaa síí cataj xcaj man chana ne man tuvi' so' do', danj vaa nij síí man nihánj cuano, ne anuú ndo'o cha'anj man nij so', ne se ca'vee toco' nij so' x'naa man ma'an nij so' ma'. Tzaj ne vaa güii, ne guun yaníj 'unj rihaan nij so' qui'yaj yuvií, gaa ne nano' rá nij síí nihánj, gaa ne toco' nij so' x'naa man ma'an nij so' adonj.

*Nana nihánj taj xna'anj se vaa nij síí noco' tucuáán nga ro', se guun nucuaj nij so' cunó nij so' se-nana Jesucristó ma'*

<sup>16</sup> “Tzaj ne ase vaa yatzíj sin' vaa tucuáán nga noco' soj, ne se guun na'nej ní' mantá naca man yatzíj nga yo' ma'. 'O se sese qui'yaj ní' danj, ne güii quinanj yuvií yatzíj yo', gaa ne nagüej mantá naca yo', ne sese cuxuun yuvií man yatzíj yo', ne quisin' yo', gaa ne cunuu xij doj yu'uj aj taj man yatzíj nga yo' nanj adonj. <sup>17</sup> Ne dan me se ase vaa nuj nga nuj araa nii na vinó vaa uún soj a. Ne se ca'vee

tucu'yón 'un̄j se-tucuānj 'un̄j rihaan soj ma'. 'O se ase vaa na vinó naca vaa nanā tucu'yón 'un̄j, ne se guun caraa yuvii na vinó naca rque nuj nga ma'. Sese dan̄j qui'yaj yuvii, ne cuyan̄j na vinó cunūu xee na vinó, ne se cacuā nuj nga ma'. Che'é dan canūu yo', ne cayan̄j na vinó rihaan yo'óo a. Che'é dan araa nii na vinó naca rque nuj naca, ne 'o mán sa' na vinó rque nuj yo' a. Che'é dan in̄anj rihaan síi naca síi ne noco' tucuaán̄ nga tucu'yón 'un̄j se-nan̄aj nan̄j adon̄j —taj Jesucristó rihaan nij síi tucu'yón se-nanā síi cu'naj Juan yo' a.

*Nanā nihán̄j taj xna'an̄j che'é chala cunii do', che'é chanā chij do', nahuun sa', qui'yaj Jesucristó a*

<sup>18</sup> Asij ca'mii Jesucristó nanā yo' rihaan nij síi tucu'yón se-nanā síi cu'naj Juan, ne cuchi' 'o síi nicaj suun rihaan Jesucristó, ne canicun' ruj so', cachíin ni'yaj so' rihaan Jesucristó, cataj so':

—Cuan̄o cavi' ta'nij chala cunii a. Tzaj ne qui'yáa so' se ndo'o, ca'an̄j ní', ne cuta' so' ra'á so' xraá no', ne cunūu i'na' uún no' nan̄j ruguan̄j —taj so', cachíin ni'yaj so' rihaan Jesucristó a.

<sup>19</sup> Gaa ne naxumaan̄ Jesucristó, ne canoco' so' do', nij síi tucu'yón se-nanā so' do', man síi nicaj suun yo' a.

<sup>20</sup> Gaa ne ca'na' 'o chanā rej xco Jesucristó, ne quisij 'o chuvij yo' xra' ton man chanā yo', ne canó ra'a no' doj tu'va sagan' Jesucristó a. <sup>21</sup> 'O se: “Sese canō ra'aj sagan' Jesucristó, ne nahuun sa' 'un̄j nan̄j adon̄j”, guun rá no' a.

<sup>22</sup> Gaa ne canicaj Jesucristó quene'en Jesucristó man no', ne cataj so':

—Nō xcúún so' guun niha' rá so', nocoj. 'O se che'é se amán rá so' ni'yaj so' man̄j ro', che'é dan nahuun sa' so' á —taj Jesucristó rihaan chanā yo' a.

Ne veé maan̄ orá dan nahuun sa' chanā yo' adon̄j.

<sup>23</sup> Gaa ne ca'an̄j Jesucristó ve' tucuā síi nicaj suun yo', ne catúj so' rá ve', ne quene'en so' se vaa man̄ síi o' chra'

man rihuu flauta, ne quene'en so' se vaa man̄ ndo'o yuvii rá ve', ne nanó ndo'o rá nij yuvii che'é se cavi' chala cunii yo' adon̄j. <sup>24</sup> Gaa ne cataj so':

—Curihan̄j soj xe' á. 'O se ne cavi' chala cunii nihán̄j ma'. Maan̄ se otoj uun̄ no' nan̄j á —taj Jesucristó rihaan nij yuvii man̄ rá ve' yo' a.

Gaa ne ca'nga' nacōo nij yuvii ni'yaj nij so' man Jesucristó a.

<sup>25</sup> Gaa quisij quirii Jesucristó man cunudan̄j nij yuvii xe', ne catúj Jesucristó rej táa chala cunii yo', ne quita'aa so' ra'a no', ne cunūu i'na' uún chala cunii, ne naxagaa no' adon̄j. <sup>26</sup> Ne cuchi' nanā rihaan cunudan̄j nij yuvii man̄ rej yo' che'é se vaa qui'yaj Jesucristó, se vaa cunūu i'na' chala cunii yo' qui'yaj so' adon̄j.

*Nanā nihán̄j taj xna'an̄j se vaa naxra' rihaan vij síi tuchrii, qui'yaj Jesucristó a*

<sup>27</sup> Dan me se gaa cavii Jesucristó tucuā síi nicaj suun yo', ne canoco' vij síi tuchrii man so' a. Ne caguáj roj so', cataj roj so':

—Ne'en rój se vaa tuvi' síi cu'naj David síi cane gaa naá mé so' á. Che'é dan cunūu 'ee rá so' man rój ruguan̄j —taj roj so', caguáj roj so' a.

<sup>28</sup> Dan me se catúj Jesucristó rá ve', ne cuchi' roj síi tuchrii yo' rihaan so' a. Gaa ne cataj Jesucristó rihaan roj so':

—Amán rá roj soj se vaa guun nūcuáj naxra' rihaan roj soj qui'yaj na' —taj Jesucristó, xna'an̄j Jesucristó man roj so' a.

—Amán rá rój, Señor —taj roj so' rihaan Jesucristó a.

<sup>29</sup> Gaa ne cuta' ra'a Jesucristó rihaan roj so', ne cataj Jesucristó:

—Che'é se amán rá roj soj, ne che'é dan naxra' rihaan roj soj adon̄j —taj Jesucristó a.

<sup>30</sup> Veé dan, ne naxra' rihaan roj so' nan̄j adon̄j.

Gaa ne caxrij yuvaā Jesucristó rihaan roj so', ne cataj Jesucristó rihaan roj so' a:

—Cütumé uxrá roj soj man roj soj, ne a 'ó yuvii se cuno se vaa qui'yáá 'unj che'é roj soj á. —Dan me se nucuaj ndo'o ca'mii Jesucristó nana yo' rihaan roj so' a.

<sup>31</sup> Tzaj ne curihanj roj so' ca'anj roj so', ne uxrá nata' roj so' rihaan cunudanj nij yuvii man rej yo' che'é yan qui'yaj sa' Jesucristó che'é roj so' nanj adonj.

*Nana nihánj taj xna'anj se vaa ca'vee ca'mii 'o síi ya'mii, qui'yaj Jesucristó a*

<sup>32</sup> Dan me se tanáj roj so' man Jesucristó, gaa ne ca'anj Jesucristó, gaa ne cuchí' yuvii rihaan so' a. Dan me se nicaj nij yuvii man 'o síi ya'mii cuchí' nij yuvii rihaan Jesucristó a. Síi ya'mii yo' me se nana chree nuú nimán so', ne che'é dan ne ca'mii so', qui'yaj nana chree yo' a. <sup>33</sup> Dan me se quirii Jesucristó man nana chree yo' nimán so', gaa ne guun che'e síi ya'mii ca'mii so' nanj adonj. Veé dan quene'en nij yuvii, ne caráya'anj uxrá nij yuvii, ne cataj nij so':

—Xa' ní' sij israelitá, tzaj ne a 'ó síi 'yaj danj ne quene'en ní' ma' —taj nij yuvii che'é Jesucristó a.

<sup>34</sup> Tzaj ne nij síi fariseo cataj me se:

—Guun nucuaj so' quirii so' man nana chree, che'é se a'mii so' ga ma'an síi chree uun chij adonj —taj nij síi fariseo, ca'mii ne nij so' che'é Jesucristó a.

*Nana nihánj taj xna'anj daj qui'yaj Jesucristó gaa cunuu 'ee ndo'o rá so' man nij yuvii a*

<sup>35</sup> Gaa ne ca'anj Jesucristó nu' nij chuman' nocoo nu' nij chuman' cunii nu', ne tucu'yón so' rihaan nij yuvii man rá ve' tucu'yón nij yuvii israelitá se-tucuanj Moisés, ne ca'mii natáj so' nana sa' che'é güii guun chij Diose rihaan chumii nihánj, ne nahuun sa' taran' nij síi ran' do', nij síi ninaj do', qui'yaj uún so' adonj. <sup>36</sup> Ne quene'en so' man cunudanj nij yuvii, ne cunuu 'ee rá so' man nij yuvii yo' a. 'O se quene'en so' se vaa ase vaa matz-inj vaj ma'an vaa nij yuvii, nuvi' síi

tumé man nij so', ne aj quiran' ndo'o nij so' sayuun, ne ninaj ndo'o nij so' adonj. <sup>37</sup> Gaa ne cataj so' rihaan nij síi tucu'yón se-nana so' a:

—Ya uxrá, ne vaa ndo'o suun rihaan ní', ne nij síi 'yaj suun me se doj nij so' nanj adonj. <sup>38</sup> Ne cachinj ni'yaj ní' doj nij síi qui'yaj suun rihaan Diose síi uun chij 'nij ra'a suun, gaa ne ca'nej so' doj yuvii qui'yaj suun se-suun so' adonj —taj Jesucristó rihaan nij síi tucu'yón se-nana so' a.

## 10

*Nana nihánj taj xna'anj se vaa ca'neé Jesucristó man chuvij nij síi tucu'yón se-nana so' ca'anj ca'mii natáj nij so' a*

<sup>1</sup> Gaa ne canacúun Jesucristó man chuvij nij síi tucu'yón se-nana so', ne cuchí' nij so' rihaan so', ne go' so' rej nucuaj man nij so', gaa ne ca'vee qui'yaj canaán nij so' rihaan nij nana chree a. Dan me se guun nucuaj nij so' quirii nij so' man nij nana chree nimán yuvii, ne guun nucuaj nij so' nahuun sa' yuvii ran' do', yuvii ninaj do', qui'yaj uún nij so' a.

<sup>2</sup> Ne nihánj me se-chuvii chuvij nij apóstol cune' Jesucristó man nata' rihaan yuvii che'é so' a. Yo'o so' me síi cu'naj Simón, ne Pedró cu'naj yo'ó se-chuvii síi cu'naj Simón a. Ne yo'ó so' me tinúú Simón, síi cu'naj Andrés a. Ne yo'ó so' me síi cu'naj Jacobo, ne ta'nii síi cu'naj Zebedeo me so' a. Ne yo'ó so' me tinúú Jacobo, síi cu'naj Juan a. <sup>3</sup> Ne vaa síi cu'naj Felipe vaa síi cu'naj Bartolomé vaa síi cu'naj Tomás vaa a. Ne yo'ó so' me síi cu'naj Mateo síi ca'nej puextó man yuvii a. Ne yo'ó so' me síi cu'naj Jacobo uún, ne ta'nii síi cu'naj Alfeo me so' a. Ne yo'ó so' me síi cu'naj Lebeo, ne Tadeo cu'naj yo'ó se-chuvii síi cu'naj Lebeo a. <sup>4</sup> Ne yo'ó so' me síi cu'naj Simón uún, ne so' me tuvi' nij síi me rá cunuu' ga gobiernó man Romá a. Ne yo'ó so' me síi cu'naj Judas Iscariote, ne so'



me sí tacuachén man Jesucristó rihaan nij síí taj ri'yunj man Jesucristó a.

<sup>5</sup> Dan me se ca'néé Jesucristó man chuvij nij snó'o yo', ne cataj xna'anj so' rihaan nij so' daj qui'yaj nij so' a:

—Se ca'anj nij soj rej man nij síí yaníj ma'. Se ca'anj soj chiháán nij yuvii samaritana ma'. <sup>6</sup> Rihaan orún' nij yuvii israelitá ca'anj soj á. 'O se ase vaa daán Diose matzinj vaa nij so', tzaj ne ca'anj ni'ya nij so', ne ne noco' sa' nij so' man Diose ma'. <sup>7</sup> Dan me se ca'anj soj, ne ca'mii natáj soj rihaan nij so', cataj soj: “Nichrun' quisij güii guun chij Diose rihaan chumii nihánj adonj”. Danj cataj soj á.

<sup>8</sup> Nahuun sa' nij síí ran', qui'yaj soj, ne cunuun i'na' uún nij síí cavi', qui'yaj soj, ne nahuun sa' nij síí ran' luj ri'yuj, qui'yaj uún soj, ne quirii soj man nij nana chree nimán nij yuvii á. Cuanó nihánj me rquej rej nucuaj man soj qui'yaj soj danj a. Che'é dan nihánj me cataj xna'anj 'unj rihaan soj se ca'néj soj sa'anj man nij yuvii ma'.

<sup>9</sup> “Se nano' soj aga' oró míí do', aga' platá catzii do', naj guun sa'anj do', caraa soj rque se-caxran' soj a ma'.

<sup>10</sup> Se nicaj soj xnánj soj ma'. Se ca'anj vij cotoó ga soj ma'. Se qui'nij tacóo soj canj ma'. Ne chruun garroté se coro' soj cachee soj ma'. Maan se gaa uun soj ca'anj soj á. 'O se no xcuún yuvii rque yuvii chraa cha soj che'é suun sa' 'yaj suun soj nanj adonj.

<sup>11</sup> Asa' catúj soj chuman' noco do', chuman' ra'a do', ne xna'anj soj man nij yuvii me síí ne chuman' yo' me síí sa', gaa ne cuchi' soj tucua síí sa' yo', ne cayáán soj tucua so' ndaa se cavii uún soj ca'anj soj á. <sup>12</sup> Asa' cuchi' soj tucua síí sa' yo', ne ve'é ca'mii soj nana sa' rihaan nij síí tucua yo', cataj soj se vaa díj gaa cumán nij so' á.

<sup>13</sup> Ne sese ya síí sa' me nij síí tucua yo', ne ya díj gaa cumán nij so', qui'yaj a. Tzaj ne sese nuveé sij sa' me nij so', ne canicaj uún nana sa' ca'mii soj rihaan ma'an soj, qui'yaj, tzaj ne se cavii sa' nij síí tucua yo' a ma'. <sup>14</sup> Ne naj guun yuvii se ca'mii sa' ga soj do', naj guun

yuvii se ca'vej rá cunó nana a'mii soj do', cavii soj ve' tucua so' cavii soj chiháán so' cavii soj, ne nacunan' soj tacóo soj tucuyuu soj yo'óo tachruu avii chuman' yo' rihaan yo'óo, ne ndaa dan, gaa ne quene'en yuvii se vaa síí man chuman' yo' tumé cacun' se vaa ne uno nij so' rihaan Diose ma'. <sup>15</sup> Ya ya cataj xna'anj 'unj rihaan soj se vaa güii ca'ne' 'unj cacun' che'é nij yuvii, gaa ne quirán' yuvii man chuman' yo' doj sayuun rihaan nij síí chi'ii man chuman' Sodoma do', rihaan yuvii man chuman' Gomorra do' adonj.

*Nana nihánj me taj xna'anj Jesucristó rihaan nij síí tucuyón se-nana so' daj gaa sayuun quirán' nij so' a*

<sup>16</sup> “Dan me se ca'nej 'unj man soj rej man síí me rá qui'yaj sayuun man soj a. Ase vaa matzinj vaj rej man xca'yanj ca'nu' ro', danj gaa soj adonj. Che'é dan gaa cuu raá soj á. Ase cacuij raá xtaa ro', danj cacuij gaa raá soj á. Tzaj ne ase vaa taj vaj cacun' tumé cha'aan ro', danj gaa soj, se cutumé soj cacun' ma'. <sup>17</sup> Cutumé ndo'o soj man soj se qui'yaj yuvii sayuun man soj ma'. Dan me se ca'anj nicaj nij yuvii man soj rihaan cuese, ne go' ndo'o nij so' vará xraá soj rá ve' tucuyón nij so' se-tucuanj Moisés a. <sup>18</sup> Ne ca'anj nicaj nij yuvii man soj rihaan síí nicaj suun do', rihaan síí nicaj suun rey do', che'é se me soj síí noco' manj a. Ne cataj xna'anj soj rihaan nij síí nicaj suun do', rihaan nij síí yaníj do', che'ej a. <sup>19</sup> Asa' tacuachén nij so' man soj rihaan nij síí nicaj suun, ne se nanó rá soj daj ca'mii soj rihaan nij so' ma'. Maan Nimán Diose rque nu' nana ca'mii soj maan orá yo' nanj adonj. <sup>20</sup> 'O se nuveé ma'an soj me nij síí ca'mii rihaan nij so' ma'. 'O se Nimán Rej ní' me síí rque nana ca'mii soj nanj adonj.

<sup>21</sup> “Dan me se ca'anj nicaj snó'o man tinúú snó'o rihaan yuvii, ne ticavi' nii man tinúú snó'o yo', qui'yaj ma'an so' nanj adonj. Ne ca'anj nicaj snó'o man ta'níí snó'o rihaan yuvii,

ne ticavi' nii man ta'núí snó'o yo', qui'yaj so' ei. Ne cunu' xnii ga rej xnii, ne ca'anj nıcaj xnii man rej xnii rihaan yuvii, ne ticavi' nii man rej xnii yo', qui'yaj xnii ei. <sup>22</sup> Ne quitaj ri'yunj cunudanj yuvii man soj che'é se me soj sí noco' manj a. Tzaj ne sí yo'o canoco' manj ndaa se quisij nu' sayuun yo' ro', ve'é cavii sa' so' rihaan Diose adonj. <sup>23</sup> Ne sese qui'yaj nij sí man yo'o chuman' sayuun man soj, ne cunanj soj ca'anj soj yo'ó chuman' á. Ya ya cataj xna'anj 'unj rihaan soj se vaa se canó cunudanj nij chuman' man nij yuvii israelitá ca'anj soj, ne ca'na' uún 'unj sij ca'neé Diose nıcaj yu'unj man yuvii rihaan chumii nihánj adonj.

<sup>24</sup> "Dan me se tucu'yón 'unj se-nanaj rihaan soj, ne noco' soj se-nanaj a. Ne ase vaa uno mozó rihaan se-ru'vee mozó ro', danj vaa uno soj rihanj nanj á. Ne ne'en soj se vaa ase vaa 'yaj yuvii man sí tucu'yón nana rihaan tuvi' ro', danj qui'yaj uún nij yuvii man sí noco' nana yo' a. Ne ase vaa 'yaj yuvii man nij ru'vee ro', danj qui'yaj uún nij yuvii man se-mozó ru'vee yo' a. <sup>25</sup> Dan me se ne'en sí noco' nana ne'en mozó ne'en daj qui'yaj yuvii man ma'an so', tzaj ne me inanj rá so' guun so' ndaa vaa sí tucu'yón nana man so' do', ndaa vaa se-ru'vee so' do' a. Dan me se tucu'náj nij yuvii Beelzebú manj, cataj nij yuvii se vaa sí chree mej a. Ne ase vaa rej soj vaa 'unj a. Che'é dan danj ca'mii nij yuvii nana vaa danj che'é ma'an soj nanj adonj.

*Nana nihánj taj xna'anj se vaa se cuchu'vi' ní quene'en ní yuvii ma'*

<sup>26</sup> "Che'é dan se cuchu'vi' soj ni'yaj soj yuvii me rá qui'yaj sayuun man soj ma'. 'O se nu' nana ca'mii yuve nij yuvii do', nu' se vaa qui'yaj yuve nij yuvii do', nu' yo' ro', nurihanj quene'en cunudanj yuvii vaa güii adonj. <sup>27</sup> Nana a'mii yuve 'unj rihaan soj cuano ro', ca'mii ranga' soj á. Ne nu' se vaa a'mii 'unj xrée soj ro', cavii

soj rej quene'en yuvii man soj, ne ca'mii natáj soj nana yo' á.

<sup>28</sup> "Ne se cuchu'vi' soj quene'en soj nij sí guun nucuj ticavi' man inanj nee man soj ma'. 'O se se guun nucuj nij so' ticavi' nij so' man nimán soj a ma'. Tzaj ne vaa che'é cuchu'vi' soj ni'yaj soj Diose nanj á. 'O se so' me sí guun nucuj qui'yaj cacaa nimán soj cacaa nee man soj cacaa rihaan ya'an adonj.

<sup>29</sup> "Ne'en soj daj vaa nij xtâj chrin' se vaa vij un' yo' nó yo'o sa'anj nii cuató a. Tzaj ne se guun cavii yo'o xo' quinij xo' rihaan yo'óó, sese na'vej Rej soj sí nicun' xtâ' cavii yo'o xo' ma'. <sup>30</sup> Ne Diose me se vaa cuentá yuvé raaj soj 'yaj so', ne ne'en so' me daj yuvé raaj soj, <sup>31</sup> ne che'é dan se cuchu'vi' soj che'é sayuun qui'yaj yuvii man soj ma'. 'O se uxrá vaa yu'vee doj nó soj rihaan xtâj chrin' yo', 'yaj Diose adonj.

*Nana nihánj taj xna'anj se vaa no xcúún ní cataj xna'anj ní rihaan yuvii che'é Jesucristó a*

<sup>32</sup> "Che'é se tumé Diose man soj, che'é dan no xcúún soj nata' ya soj rihaan yuvii se vaa me soj sí noco' manj, ne nu' sí 'yaj danj ro', vaa güii, ne nata' 'unj rihaan Réé 'unj sí nicun' xtâ' se vaa sij noco' manj me so' a. <sup>33</sup> Ne sí taj xna'anj rihaan yuvii se vaa ne noco' so' manj ro', vaa güii, ne cataj xna'anj 'unj rihaan Réé 'unj sí nicun' xtâ' se vaa nuveé sij noco' manj me so' a ma'.

*Nana nihánj taj xna'anj se vaa cunu' ndo'o yuvii ga tuvi' yuvii che'é Jesucristó a*

<sup>34</sup> "Se guun rá soj se vaa ca'ná' 'unj rihaan chumii nihánj che'é rej dınj doj cayáán nij yuvii man rihaan chumii nihánj ga tuvi' yuvii ma'. Ne qui'yaj danj ma'. 'O se che'é se ca'ná' 'unj rihaan chumii nihánj, che'é dan cunu' ndo'o yuvii ga tuvi' yuvii adonj.

<sup>35</sup> 'O se ca'ná' 'unj che'é rej nata' 'unj se-nanaj rihaan yuvii, tzaj ne se cunó cunudanj nij yuvii rihanj ma'. Che'é dan cunu' snó'o ga rej ma'an so', ne



xá' chana, tzaj ne cunu' no' ga nii no' do', ga nii chej no' do', che'ej a. <sup>36</sup> Ne nij tuvi' yuvií sí man rá ve' tucua yuvií cunu' ga yuvií nanj á. <sup>37</sup> Sese guun rá yo'ó so' se vaa sa' doj vaa rej so' do', nii so' do', rihanj, ne taj che'é cataj so' se vaa sij noco' manj me so' ma'. Ne sese guun rá yo'ó so' se vaa sa' doj vaa ta'níi so' rihanj, ne taj che'é cataj so' se vaa sij noco' manj me so' ma'. <sup>38</sup> Ne síi na'vej rá quiran' sayuun che'é se me so' síi noco' manj ro', taj che'é cataj so' se vaa me so' síi noco' manj ma'. <sup>39</sup> Síi cavii sa' nimán rihaan chumií nihánj ro', cavi' nu' so' a. Ne síi cavi' che'é se noco' so' manj ro', so' me síi gaa i'na' nimán nu' cavii nu' ca'anj adonj.

*Nana nihánj taj xna'anj daj quiran' nij yuvií racuj man nij síi 'yaj suun rihaan Diose a*

<sup>40</sup> "Sese a'mii sa' yo'ó so' ga soj, ne sij a'mii sa' gaj me so' adonj. Ne sese a'mii sa' so' gaj, ne sij a'mii sa' ga síi ca'née manj rihaan chumií nihánj me uún so' adonj. <sup>41</sup> Sese a'mii sa' yo'ó so' ga 'o' síi nata' se-nana Diose, che'é se ve'é 'yaj so' nata' so' se-nana Diose, ne rá se vaa ma'an síi nata' se-nana Diose vaa so' uún adonj. Dan me se 'o' cyaan naru'vee Diose rihaan so' ga ma'an síi nata' se-nana Diose ei. Ne sese a'mii sa' yo'ó so' ga yo'ó síi sa' 'yaj, ne naru'vee Diose rihaan so' uún adonj. 'O' cyaan naru'vee Diose rihaan so' ga ma'an síi sa' 'yaj ei. <sup>42</sup> Dan me se a me ma'an yo'ó síi rqué doj na acoj co'ó yo'ó nij síi noco' uún nihánj che'é se-chuvií 'unj, ne ya ya cataj xna'anj 'unj rihaan soj se vaa daj chihaa míj se quinavij se sa' naru'vee Diose rihaan síi rqué doj na yo' ma'.

## 11

<sup>1</sup> Dan me se quisij nana yo' nana cataj xna'anj Jesucristó rihaan chujij nij síi tucu'yón se-nana so', ne curihanj Jesucristó rej yo', ne ca'anj so' chiháan nij yuvií israelitá

tucu'yón so' rihaan nij so' ne ca'mii natáj so' rihaan nij so' a.

*Nana nihánj taj xna'anj che'é nana ca'mii Jesucristó che'é síi cu'naj Juan síi cuta' ne man yuvií a*

<sup>2</sup> Dan me se 'nij síi cu'naj Juan síi cuta' ne man yuvií taga', ne cuchi' nana rihaan so' che'é nu' se vaa qui'yaj Jesucristó a. Che'é dan ca'née so' vij tuvi' nij síi tucu'yón se-nana so' rihaan Jesucristó a. <sup>3</sup> Ne nana nihánj ro', xna'anj roj so' man Jesucristó, qui'yaj síi cu'naj Juan a:

—So' me síi ca'na' tinanii man yuvií rihaan sayuun na'. Ase na'vij ní ca'na' yo'ó so' xa'. —Dan me nana me rá síi cu'naj Juan xna'anj roj so' man Jesucristó a.

<sup>4</sup> Gaa ne cataj xna'anj Jesucristó rihaan roj so' a:

—Cavii roj soj cuchi' uún roj soj rihaan síi cu'naj Juan, ne cataj xna'anj roj soj rihaan so' nu' nana cuno roj soj do', nu' se vaa quene'en roj soj do' á. <sup>5</sup> Dan me se nij síi tuchrii ro', naxra' rihaan, ne nij síi na'vee cachee ro', chée nij so', ne nij síi ran' luj ri'yuj ro', nahuun sa', ne nij síi so'ó ro', nachuguun xrée nij so', ne nij síi cavi' ro', cunuu i'na' uún, ne nij síi nique ro', uno nij so' nana sa' a. Nu' nihánj cataj xna'anj roj soj rihaan síi cu'naj Juan yo' á. <sup>6</sup> Ne cataj uún roj soj rihaan síi cu'naj Juan se vaa cavií sa' so' qui'yaj Diose, sese se guun na'aj so' ni'yaj so' manj a. Danj ca'mii roj soj rihaan síi cu'naj Juan yo' á —taj Jesucristó rihaan roj síi tucu'yón se-nana Juan yo' a.

<sup>7</sup> Dan me se ca'anj roj so', gaa ne guun che'e Jesucristó ca'mii so' rihaan cunudanj nij yuvií che'é síi cu'naj Juan síi cuta' ne man yuvií a:

—Asij ca'anj soj rej tacaan quene'en soj man síi cu'naj Juan ro', ne daj gaa so' quene'en soj, rá soj ga. Ase vaa yo'ó rcoo naan ndo'ó 'yaj nana vaa so', rá soj na'. Guun vij nimán so' che'é tucuaán noco' so', rá soj na'. Taj ma'. <sup>8</sup> Maan se daj gaa so' rá soj, asij ca'anj soj quene'en soj

man so' ga. Sij nuu yatzíj laruu ndo'o me so', rá soj na'. Taj ma'. 'O se nij sí nuu yatzíj laruu ro', yanj rá ve' tucua' sí nicaj suun rey adonj. <sup>9</sup>Maan se daj gaa sí cu'naj Juan rá soj, asij ca'anj soj quene'en soj man so' ga. Sij nata' se-nana Diose me so', rá soj na'. Ya uxrá ei. Ne cataj xna'anj 'unj rihaan soj se vaa sa' doj vaa so' rihaan cunudanj nij sí nata' se-nana Diose adonj.

<sup>10</sup> "O se nana nihánj nana no rihaan danj Diose ro', taj xna'anj che'é sí cu'naj Juan a: "Vaa sí ca'anj suun che'é 'unj, ne ca'nej 'unj man so' quitaj yaan so' rihaan so', ne nuchran' nimán yuvii ve'é ca'mii nij yuvii ga so', qui'yaj so' a". Danj taj danj Diose che'é sí cu'naj Juan se vaa nuchran' nimán yuvii ve'é ca'mii nij yuvii ga sí ca'na' tinanii man nij yuvii rihaan sayuun, qui'yaj sí cu'naj Juan, taj danj Diose, ne danj qui'yaj so' adonj.

<sup>11</sup> "Ya ya cataj xna'anj 'unj rihaan soj cuano se vaa sij sa' doj rihaan cunudanj nij yuvii man rihaan chumii me sí cu'naj Juan sí cuta' ne man yuvii a. A 'o yuvii ne vaa sa' doj rihaan so' ma'. Tzaj ne cuano ro', uun chij Diose nimán yuvii man rihaan chumii nihánj, ne naj guun yuvii uun chij Diose nimán ro', me sí sa' doj rihaan sí cu'naj Juan a. <sup>12</sup> Dan me se asij tucuyón sí cu'naj Juan rihaan yuvii ndaa cuano me se naqui'yaj ino ndo'o yuvii se-nana Diose se vaa guun chij so' rihaan chumii nihánj, ne vaa sí sca' ndo'o sí me inanj rá cataj daj qui'yaj Diose asa' guun chij Diose adonj. <sup>13</sup> 'O se nij sí nata' se-nana Diose rihaan yuvii gaa naá do', nu' se-tucuanj Moisés do', ndaa ma'an sí cu'naj Juan do', cataj xna'anj ndo'o nij so' che'é güii guun chij Diose nimán yuvii man rihaan chumii nihánj nanj á. <sup>14</sup> Dan me se aj ne'en soj se vaa sí cu'naj Elías sí nata' se-nana Diose rihaan yuvii gaa naá ro', ca'na' uún so' rihaan chumii nihánj, taj danj Diose a. Dan me se

sese me rá soj guun ya rá soj cunog soj nana nihánj, ne cataj xna'anj 'unj rihaan soj se vaa sí cu'naj Juan me sí ata' se-suun sí cu'naj Elías sí cane gaa naá yo' á. <sup>15</sup> Sese taj yu'uj xreé soj, ne cunog soj nana nihánj ei.

<sup>16</sup> "Ne daj vaa yuvii man rihaan chumii nihánj cuano, rá soj ga. Dan me se cataj xna'anj 'unj rihaan soj á. Ase vaa xnii ca'anj rihaan yu'vee ne tico ga tuvi' ro', vaa nij yuvii man rihaan chumii nihánj adonj. Dan me se yáan nij xnii yo' rihaan yo'óo, <sup>17</sup> ne aguáj nij xnii rihaan tuvi' xnii, taj nij xnii: "Nicaj núj ta'ánj núj, go' núj chra' choco', tzaj ne me che'é ne ra'anj soj ga. Ne go' núj chra' xnangá, tzaj ne me che'é ne ta'vee soj ga. Me che'é ne 'yaj soj ndaa vaa me rá núj ga", taj nij xnii rihaan tuvi' nij so' a. <sup>18</sup> 'O se ca'na' sí cu'naj Juan sí cuta' ne man yuvii, gaa ne ne cha' so' do', ne co'o so' do', ma'. Ne che'é dan taj nij yuvii se vaa nuu nana chree nimán so', taj nij yuvii a. <sup>19</sup> Ne ca'ná' 'unj sij ca'née Diose nicaj yu'unj man yuvii, gaa ne niha' rá 'unj chá 'unj do', co'o 'unj do', gaa ne che'é dan taj uún nij yuvii se vaa sí cachén chá do', sí cachén co'o do', mé 'unj, taj uún nij yuvii a. Ne taj uún nij so' se vaa tuvi' 'unj me sí a'néj puextó man yuvii do', yo'óo nij sí tumé cacun' do', taj nii a. Danj tu'va nij so', tzaj ne ne ne'en uxrá nij so' ma'. Sese xcaj yuvii cuentá daj vaa 'yaj rój, ne guun ya rá nij yuvii se vaa sij cuu raa me rój ga sí cu'naj Juan yo' adonj —taj Jesucristó rihaan nij yuvii a.

*Nana nihánj taj xna'anj se vaa cataj xna'anj Jesucristó che'é sayuun quiran' yuvii man va'núj chuman' yuvii ne ca'vej rá cunog se-nana Jesucristó a*

<sup>20</sup> Sij, gaa ne guun che'e Jesucristó cuta' Jesucristó cacun' xraá nij yuvii man va'núj chuman' a. Dan me se cuta' so' cacun' xraá nij so' se vaa guun nichraj nimán nij so' a. Dan me se nda' se doj a vaa suun sa' qui'yaj suun so' chiháan nij so' quene'en nij so' rihaan suun sa' qui'yaj suun

so' yo'ó chuman', tzaj ne ne canicaj nimán nij so' a ma', taj Jesucristó a. <sup>21</sup> Ne nihánj me nana ca'mii Jesucristó che'é nij yuvii man nij chuman' yo' a:

—Nique soj sij man chuman' Corazín a. Nique soj sij man chuman' Betsaida a. 'O se quiran' uxrá soj sayuun nanj á. Dan me se nij sí man chuman' Tiro do', nij sí man chuman' Sidón do', me sí chi'ij nimán nanj á. Tzaj ne sese ca'anj 'unj chiháán nij so' ne sese qui'yáj suun sa' nocoo ni'yaj nij so', gaa ne cuno nij so' se-nanaj, ne guun ya rá nij so' se vaa tumé nij so' cacun', ne canicaj nimán nij so', ne quinano' ndo'o rá nij so' che'é cacun' tumé nij so', ne ndaa yatzíj ya' cunuú nij so', ne ndaa yaj chruun acaa ruvaj caraa nij so' raaj nij so', che'é se quinano' rá nij so' che'é cacun' tumé nij so' asuun saj adonj. Nihánj, ne ne ca'anj 'unj ma'. Maan inanj chiháán soj 'naj, ne qui'yáj suun sa' nocoo quene'en ma'an soj, tzaj ne ne canicaj nimán nij soj a ma'. <sup>22</sup> Dan me se yaj cataj xna'anj 'unj rihaan soj se vaa güii ca'ne' 'unj cacun' che'é nij yuvii ro', doj a gaa sayuun quiran' soj rihaan sayuun quiran' nij sí chi'ij man chuman' Tiro do', man chuman' Sidón do' adonj.

<sup>23</sup> "Ne vaa soj sij man chuman' Capernaum uún á. Ne sí sa' inanj me ma'an soj, rá soj na'. Nuveé sij sa' me soj ma'. Sí ca'anj rihaan ya'an guun soj á. Dan me se nij sí man chuman' Sodoma ro', me sí chi'ij nimán a. Tzaj ne sese ca'anj 'unj chiháán nij so' ne sese qui'yáj suun sa' nocoo ni'yaj nij so', ne cuno nij so' se-nanaj, ne guun ya rá nij so' se vaa tumé nij so' cacun', ne canicaj nimán nij so', ne ne cacaa chiháán nij so' ma'. Ne naj chiháán nij so' ndaa cuano' asuun saj a. Tzaj ne ne ca'anj 'unj ma'. Maan se inanj chiháán soj 'naj, ne qui'yáj suun sa' nocoo yo' quene'en ma'an soj, tzaj ne ne canicaj nimán nij soj a ma'. <sup>24</sup> Dan me se cataj xna'anj 'unj rihaan soj se vaa güii ca'ne' 'unj cacun' che'é nij yuvii ro', doj a gaa sayuun quiran'

soj rihaan sayuun quiran' nij sí chi'ij man chuman' Sodoma yo' adonj —taj Jesucristó che'é nij yuvii ne ca'vej rá cuno se-nana so' a.

*Nana nihánj taj xna'anj me sí nari' sa' se-nana Jesucristó a*

<sup>25</sup> Dan me se güii yo' cachíin ni'yaj Jesucristó rihaan Diose, cataj so':

—Sí 'nij ra'a xta' do', sí 'nij ra'a chumiij do', mé so', Ataj Chij. Ne sa' uxrá qui'yáa so' caráan so' rihaan nij sí avii raaj do', rihaan nij sí acaj cuentá do', se vaa se cuno nij so' se-nanaj ma'. Maan nij sí vaa nica' nimán ro', ve'é cuno nij so', qui'yáa so' á. <sup>26</sup> Danj inanj qui'yáa so', che'é yan danj me rá so' qui'yáa so', Ataj —taj Jesucristó rihaan Rej so' Diose a.

<sup>27</sup> Canicaj Jesucristó ca'mii so' rihaan nij yuvii, cataj so' a:

—Aj rqué Réé 'unj Diose cunudanj rasuun rihanj á. Ne a 'ó sí ne ne'en daj vaa 'unj; maan orún' Réj ne'en a. 'O se ta'nii so' mej adonj. Ne a 'ó yuvii ne ne'en daj vaa Réj ma'. Maan orún' 'unj ne'en daj vaa so' adonj. Ne sese me rá 'unj cataj xna'anj 'unj rihaan yo'ó nij yuvii daj vaa Réj, ne quene'en yo'ó nij so' uún adonj. <sup>28</sup> Ne sese vaa sí navij ndo'o rá che'é yan nano' uxrá so' tucuáán sa' do', sese vaa sí nanó ndo'o rá che'é yan ne guun nucuj so' qui'yaj so' nu' tucuáán sa' tucuáán nocoo so' do', ne ca'na' nij sí vaa danj rihanj á. 'O se naraan rá nij sí vaa danj, qui'yáj nanj á. <sup>29</sup> Dan me se canoco' soj manj, ne qui'yaj soj tucuáán tucu'yón 'unj man soj á. 'O se sí vaa nica' nimán mej, ne quinari' soj chrej quinaraan rá soj adonj. <sup>30</sup> 'O se ne sayuun vaa tucuáán cuchruj 'unj canoco' soj ma'. 'O se guun nucuj soj qui'yaj soj cunudanj adonj —taj Jesucristó a.

## 12

*Nana nihánj taj xna'anj che'é güii naranj rá ní a*

<sup>1</sup> Dan me se naca ca'mii Jesucristó nana yo', ne 'o güii naranj rá nij yuvii israelitá me yo', ne vaj Jesucristó

rque 'o naa 'núú trigó a. Vaj nij sí tucu'yón se-nana so' ga so' a. Veé dan vaj nij so', ne na'aan rque nij so' a. Che'é dan me guun che'e nij so' cuta nij so' doj 'núú trigó chá nij so' a. <sup>2</sup> Tzaj ne quene'en nij sí fariseo se vaa cuta nij so' doj 'núú trigó, ne cataj nij so' rihaan Jesucristó a:

—Nij'yaj so' ei. Güii naránj rá yuvii me güii cuan' á. Ne nó xcúún nij sí tucu'yón se-nana so' cuta nij so' 'núú trigó cuan' a ma' —taj nij so' rihaan Jesucristó a.

<sup>3</sup> Gaa ne cataj Jesucristó rihaan nij so' a:

—Me che'é, ne ne nayaá soj rihaan danj Diose daj qui'yaj sí cu'naj David gaa naá a. Gaa quina'aan rque nij tuvi' nij so', <sup>4</sup> gaa ne catúj nij tuvi' nij so' rá nuvíi, ne chá nij so' rachrúún taj rihaan se-mesa Diose a. Ne ne nó xcúún nij so' chá nij so' rachrúún yo'; maan se orún' nij xrej nó xcúún chá rachrúún yo' a. Tzaj ne maan che'é se rque nij so' na'aan uxrá, gaa ne chá nij so' rachrúún yo' nanj adonj. Tzaj ne ne cataj Diose se vaa tumé sí cu'naj David cacun' ma'.

<sup>5</sup> Ne ne nayaá soj me taj se-tucuanj Moisés che'é nij xrej 'yaj suun nuvíi na'. 'O se che'é se-suun nij so', 'yaj nij so' se vaa ne nó xcúún yuvii qui'yaj yuvii güii naránj rá ní' sij israelitá ma'. Tzaj ne ne tumé nij so' cacun' che'é se vaa 'yaj nij so' ma'. <sup>6</sup> Ne cuano nihánj me cataj xna'anj 'unj rihaan soj se vaa vaa sí nicun' rihaan soj cuano, ne sa' doj vaa so' rihaan nuvíi yo' adonj. <sup>7</sup> Ne vaa yo'ó nana no rihaan danj Diose taj: “Ne uun niha' rá 'unj ni'yaj 'unj sí rqué xcuu rihaan 'unj ma'. 'O se uun niha' rá 'unj ni'yaj 'unj yuvii 'ee rá man tuvi' adonj”. Yo' me se-nana Diose nana no rihaan yanj yo' a. Sese cuno soj me taj nana yo', ne ne cuta' soj cacun' xráá nij sí nihánj saj ma'. Ne ne tumé nij sí nihánj cacun' ma'. <sup>8</sup> 'O se sí ca'neé Diose nicaj yu'unj man yuvii mej, ne no xcúnj quirii ta'ngaj daj qui'yaj yuvii güii naránj rá yuvii

adonj —taj Jesucristó rihaan nij sí fariseo yo' a.

*Nana nihánj taj xna'anj se vaa nahuun sa' 'o sí nacoo ra'a, qui'yaj Jesucristó a*

<sup>9</sup> Gaa ne curihanj Jesucristó rej naj naa yo', ne catúj so' rá ve' tucu'yón nij sí man chuman' yo' se-tucuanj Moisés a. <sup>10</sup> Dan me se yáán 'o sí nacoo ra'a rá ve' yo' a. Ne xná'anj nij sí fariseo man Jesucristó sese no xcúún yuvii qui'yaj cono'ó yuvii man tuvi' yuvii güii naránj rá yuvii a. Danj tu'va nij so' rihaan Jesucristó, che'é yan me rá nij so' cuta' nij so' cacun' xráá Jesucristó che'é nana ca'mii Jesucristó adonj. <sup>11</sup> Gaa ne cataj Jesucristó rihaan nij so' a:

—Sese vaa daán yo'o soj matzinj, ne sese quinij xo' rá yu'uj güii naránj rá yuvii, ne cuxuun sí daan man xo' quirii so' man xo' rque yu'uj yo', raj a. <sup>12</sup> Ne sa' uxrá doj vaa yuvii rihaan matzinj yo' adonj. Che'é dan no xcúún yuvii racuíj yuvii man tuvi' yuvii güii naránj rá yuvii á —taj Jesucristó rihaan nij sí fariseo yo' a.

<sup>13</sup> Canicaj Jesucristó cataj Jesucristó rihaan sí nacoo ra'a yo':

—Tucua' so' ra'á so' á —taj Jesucristó rihaan so' a.

Gaa ne tucua' so' ra'a so', ne cunuu sa' ra'a so', ne ase vaa guee nichrej ra'a so' rej vaa sa' ro', danj vaa guee nichrej ra'a so' uún a.

<sup>14</sup> Dan me se curihanj nij sí fariseo rá ve' yo', ne ca'anj nij so' rej yaníj, ne guun rá taran' nij so' daj gaa qui'yaj nij so' ne cavi' Jesucristó a.

*Nana nihánj taj xna'anj se vaa ca'ne' Jesucristó suun rihaan yuvii se vaa se nata' nij yuvii rihaan tuvi' yuvii che'é so' a*

<sup>15</sup> Tzaj ne quene'en Jesucristó daj me rá nij sí fariseo qui'yaj nij so' man Jesucristó a. Che'é dan cavii so' rej yo', ne ca'anj ndo'o yuvii ga so', ne nahuun cunudanj nij sí ran' vaj ga nij yuvii, qui'yaj Jesucristó a. <sup>16</sup> Ne ca'ne' so' suun rihaan nij yuvii se vaa



se nata' nij yuvij rihaan tuvi' yuvij che'é yan vaa 'yaj so' a.

<sup>17</sup> Danj ca'mii Jesucristó, gaa ne quisíj ya nu' nana nihánj nana cataj xna'anj Diose rihaan yuvij gaa naá a. Dan me se ca'mii Diose nana nihánj cuno síí cu'naj Isaías síí nata' se-nana Diose gaa naá, ne nata' síí cu'naj Isaías nana nihánj rihaan yuvij che'é Diose a. Nana ca'mii ma'an Diose, cataj xna'anj Diose che'é Jesucristó me nana nihánj a: <sup>18</sup> “Xcaj soj cuentá se vaa síí nihánj me síí 'yaj suun rihanj a. Narii 'unj man so' cunuú so' rihanj, ne 'ee rá 'unj man so', ne aran' raj ni'yaj 'unj man so' a. Ca'nej 'unj Nimanj nimán so', ne nata' so' rihaan nij síí yaníj se vaa ve'é ca'ne' 'unj cacun' che'é nij so' a. <sup>19</sup> Se cunu' so' ga yuvij ma'. Se caguáj so' rihaan yuvij ma'. Se canicun' so' chrej ca'aan ca'mii natáj so' rihaan yuvij ma'. <sup>20</sup> Ne sese narí' so' man yo'o síí quiri' rá síí ne uun nucuaj nocó' chrej sa', ne se tiri' nu' so' man síí quiri' rá yo' ma'. 'O se racuíj so' man so' adonj. Dan me se ca'vee se ase vaa rcoo xtun' do', ca'vee se ase vaa aga' ya'an navij na acaa rque do', vaa síí quiri' rá yo', tzaj ne racuíj so' man so', yan cunu sa' so' adonj. Dan me se qui'yaj canaán nana ya ca'mii síí 'yaj suun rihanj gaa ve'é ca'ne' so' cacun' che'é yuvij nanj adonj. <sup>21</sup> Ne gaa nucuaj rá nij síí yaníj man so' se vaa racuíj so' man nij síí yaníj adonj”, taj Diose gaa naá a.

*Nana nihánj taj xna'anj se vaa cuta' nij síí fariseo cacun' rmi' xráá Jesucristó se vaa ca'mii Jesucristó ga síí chree a*

<sup>22</sup> Guun naá doj, gaa ne ca'na' yuvij rihaan Jesucristó, ne nicaj nij yuvij man 'o síí ya'mii aráán rihaan nuu nana chree nimán a. Xa' síí nuu nana chree nimán, tzaj ne caráán rihaan so', ne ya'mii so' a. Ne nahuun nu' so', qui'yaj Jesucristó, ne naxra' rihaan so', ne ca'mii so' adonj. <sup>23</sup> Dan me se quene'en nij yuvij se vaa nahuun sa'

so' qui'yaj Jesucristó, ne guun niha' rá nij yuvij, ne cataj nij yuvij:

—Síí nihánj me tuvi' síí cu'naj David gaa naá, rá soj na'. Síí tinanii man ní' rihaan sayuun me síí nihánj, rá soj na' —taj nij yuvij, xna'anj nij yuvij man tuvi' yuvij me síí me Jesucristó a.

<sup>24</sup> Tzaj ne cuno nij síí fariseo daj ca'mii nij yuvij che'é Jesucristó, ne cataj nij so':

—Nuveé ma'an síí nihánj rii nana chree ma'. Maan se a'mii so' ga síí chree uun chij síí cu'naj Beelzebú, ne che'é dan rii so' nij nana chree nimán yuvij adonj —taj nij síí fariseo che'é Jesucristó, ca'mii ne nij so' a.

<sup>25</sup> Dan me se quene'en Jesucristó daj vaa nimán nij síí fariseo yo', gaa ne ca'mii so' rihaan nij síí fariseo a:

—Ne'en soj se vaa sese vaa 'o nación, ne sese xra' ta'aj nij síí uun chij rihaan nación yo' ne cunu' nij ma'an nij so' ga tuvi' nij so', ne vaa güii, ne nu' nación yo' quiri' nu' nanj adonj. Ne sese cunu' ta'aj nij yuvij man ma'an chuman' ga tuvi' yuvij, ne vaa güii quiri' nu' chiháán nij so', qui'yaj nij so' nanj adonj. Ne sese cunu' ta'aj nij yuvij man 'o barrio ga ma'an tuvi' yuvij síí man ma'an barrio yo', ne vaa güii quiri' nu' barrio yo', qui'yaj nij so' nanj adonj. <sup>26</sup> Che'é dan me sese racuíj síí chree síí cu'naj Satanás manj rii 'unj tuvi' so' nana chree nimán nij yuvij, gaa ne asa' ca'vee guun chij ndo'o so' rihaan nij yuvij man rihaan chumij nihánj, rá soj ga. <sup>27</sup> Dan me se sese rii 'unj nana chree nimán nij yuvij, 'yaj síí chree cu'naj Beelzebú, che'é se a'mii 'unj ga so', rá soj a. Tzaj ne nij síí tucu'yón se-nana soj me se veé danj rii uún nij so' nij nana chree nimán yuvij uún á. Ne asa' a'vee 'yaj nij so' danj, rá soj ga. Ne vaa nij so' vaa, veé danj a'mii nij so' ga síí chree, rá soj gaa na'. Che'é nana ca'mii soj me se ma'an nij síí tucu'yón se-nana soj cuta' cacun' xráá soj se vaa ca'mii ne soj adonj. <sup>28</sup> Tzaj ne 'unj me se ya Nimán Diose

me sí racuj manj rii 'unj nana chree nimán yuvij adonj. Che'é dan xcaj soj cuentá se vaa aj guun che'e Diose uun chij Diose rihaan chumij nihánj adonj.

<sup>29</sup> "Ne sese me rá yo'o so' catuu so' rá ve' tucua sí ru'vee qui'yaj ituu so' si'yaj sí ru'vee yo', ne asino numij so' man sí ru'vee yo', gaa ne canicaj so' catzij so' tucua sí ru'vee yo' ei. Ne ase vaa 'yaj sí atúj tucua sí ru'vee ro', danj 'yáj man sí chree yo' chuguanj. Dan me se numij 'unj man so', ne cuano nihánj a'néj 'unj man nu' nij sí 'nij ra'a so' adonj.

<sup>30</sup> "Naj guun sí na'vej rá qui'yaj suun ga 'unj ro', sí taj ri'yunj manj me so' a. Ne naj guun sí ne racuj manj naquiyaj chre' 'unj man yuvij canoco' man Diose ro', so' me sí ticha'nuu man nij yuvij, ne aráan so' rihaan nij yuvij se canoco' nij yuvij man Diose ei. <sup>31</sup> Che'é dan cataj xna'anj 'unj rihaan soj se vaa nu' cacun' tumé yuvij do', nu' nana chi'ii ca'mii yuvij do', ca'vee tinavij Diose cacun' yo' che'é nij yuvij a. Tzaj ne sese nachrij' yo'o so' ni'yaj so' man Nimán Diose, ne daj chihaa mij se quinavij cacun' yo' xraá so' a ma'. <sup>32</sup> Dan me se 'unj sij ca'née Diose nicaj yu'unj man yuvij ro', ca'vee se ca'mii yo'o so' nana chi'ii che'ej, tzaj ne ca'vee navij cacun' yo' xraá so' qui'yaj Diose ei. Tzaj ne sese ca'mii chi'ii yo'o so' che'é Nimán Diose, ne daj chihaa mij se tinavij Diose cacun' yo' xraá so' a ma'. Dan me se ca'vee se rihaan chumij nihánj do', ca'vee se ndaa cavij' so' do', tzaj ne se quinavij cacun' yo' nu' cavij nu' ca'anj xraá so' a ma'.

*Nana nihánj taj xna'anj se vaa ase vaa nimán yuvij ro', danj vaa nana a'mii yuvij a*

<sup>33</sup> "Sese sa' vaa 'o chruun ne sa' vaa chruj man raá chruun yo' a. Sese chi'ii vaa 'o chruun ne chi'ii vaa chruj man raá chruun yo' a. Dan me se sese ne'en yuvij se vaa vaa sa' chruj man raá chruun, ne ne'en yuvij se vaa

chruun sa' me yo' a. Ne sese ne'en yuvij se vaa vaa chi'ii chruj man raá chruun, ne ne'en uún yuvij se vaa chruun chi'ii me yo' adonj. <sup>34</sup> 'O se ase vaa xcuáá yuvaá vaa soj ei. Chi'ii vaa nimán soj, ne chi'ii vaa nana a'mii soj ei. 'O se ase vaa se man nimán yuvij ro', danj vaa nana avii tu'va yuvij adonj. <sup>35</sup> Dan me se sí sa' ro', man ndo'o se sa' nimán so', ne inanj nana sa' a'mii so' adonj. Sí chi'ii ro', man ndo'o se chi'ii nimán so', ne inanj nana chi'ii a'mii so' adonj. <sup>36</sup> Ne cuano nihánj me cataj xna'anj 'unj rihaan soj se vaa nu' nana a'mii ne nij yuvij ro', cataj xna'anj nij yuvij rihaan Diose me che'é ca'mii nij yuvij nana vaa danj asa' quisij güii ca'ne' Diose cacun' che'é cunudanj nij yuvij man rihaan chumij nihánj adonj. <sup>37</sup> 'O se sese sa' vaa nana ca'mii so', ne cataj Diose se vaa ne tumé so' cacun' ma'. Ne sese chi'ii vaa nana ca'mii so', ne cuta' Diose cacun' xraá so' adonj —taj Jesucristó rihaan nij sí fariseo yo' a.

*Nana nihánj me taj xna'anj Jesucristó me suun sa' nocoo me qui'yaj Jesucristó, gaa ne guun ya rá yuvij se vaa ya vaa nana a'mii so' a*

<sup>38</sup> Cachén doj, gaa ne ca'na' uún doj sí naquiyaj cuu se-tucuanj Moisés ga doj sí fariseo rihaan Jesucristó, ne cataj nij so':

—Qui'yáá so' 'o suun sa' nocoo quene'en núj, maestro. Gaa ne guun ya rá núj se vaa ya a'mii so' á —taj nij so' rihaan Jesucristó a.

<sup>39</sup> Gaa ne cataj Jesucristó rihaan nij so' a:

—Xa' soj sij 'na' inanj rej chi'ii do', rej cacun' do', me se me rá gaa soj qui'yáj suun sa' nocoo ni'yaj soj, tzaj ne daj chihaa mij se qui'yáj ndaa vaa me rá soj ma'. Maan se quene'en soj se vaa ase vaa quiran' sí cu'naj Jonás sí nata' se-nana Diose gaa naá ro', danj quirán' 'unj, vaa güii, ni'yaj soj adonj. <sup>40</sup> 'O se ase vaa cunuú sí cu'naj Jonás va'núj ya güii rque xcuu xij vaj rque na ya'anj ro', ta'nga' danj gaa



va'nuj ya güii nuvíi nigan' quináá 'unj rque yo'óo quene'en soj adonj. <sup>41</sup> Nij síi man chuman' cu'naj Nínive ro', canicun' nij so' ga ma'an soj sij vaa i'na' rihaan chumií nihánj cuano asa' quisíj güii ca'ne' Diose cacun' che'é yuvií, ne cuta' nij síi man chuman' Nínive yo' cacun' xráá soj adonj. Cuno nij so' nana ca'mii natáj síi cu'naj Jonás, ne nuchran' nimán nij so', ne canoco' nij so' man Diose adonj. Ne xa' 'unj sij nicun' rihaan soj cuano, tzaj ne sa' doj vaa 'unj rihaan síi cu'naj Jonás yo', tzaj ne taj se qui'yá' nuchran' nimán soj ma'. <sup>42</sup> Ne güii ca'ne' Diose cacun' che'é yuvií ro', cuchí' chana nicaj suun reiná guun chij rihaan chuman' naj gan' ndo'o rej sur, ne canicun' no' rihaan soj, qui'yaj Diose, ne cuta' no' cacun' xráá soj adonj. 'O se gan' ndo'o cachéé no' cuchí' no' rihaan síi cu'naj Salomón, ne cuno no' nana cuu tucu'yón Salomón man no' adonj. Ne xa' 'unj sij nicun' rihaan soj cuano, tzaj ne sa' doj vaa 'unj rihaan síi cu'naj Salomón yo' a adonj. Tzaj ne na'vej rá soj cuno soj nana a'mii 'unj rihaan soj a man adonj.

*Nana nihánj taj xna'anj daj 'yaj nana chree gaa anicaj uún nana chree nimán yuvií a*

<sup>43-44</sup> "Ne gaa tihaj yuun avii yo'o nana chree nimán snó'o, ne chéé rma'an nana chree yo' nano' so' rej cayáán so', tzaj ne taj se qui'yá' quiri' nana chree yo' rej cayáán so', gaa ne me rá uún nana chree yo' canicaj so' rej cavii so' gaa naá a. Dan me se taj nana chree yo': "Canicaj uún 'unj nan' 'unj rej cavii 'unj a. Ve'é nanj vaa tucuaaj, ne naruvii rá ve' tucuaaj cuano, ne uun yaj yanj rá ve' tucuaaj cuano adonj", taj nana chree yo' a. <sup>45</sup> Gaa ne dan me se anicaj uún nana chree yo' nimán snó'o yo', ne nano' nana chree yo' yo'óo chíj tuví nana chree yo' síi chí'íi doj, ne 'na' nique uún so' nimán snó'o yo', gaa ne cayáán taran' nij nana chree yo' a. Dan me se gaa naá gaa cayáán orún'

nana chree yo', ne maan ta'nga' quií vaa nimán snó'o yo', tzaj gaa namán yo'óo chíj nana chree yo', gaa ne doj a tico nana chree man so', ne doj a quií vaa nimán snó'o yo', 'yaj nana chree yo' a adonj.

"Ne ase vaa ran' snó'o yo' ro', ta'nga' danj quirán' soj sij israelitá sij na'vej rá cuno se-nana 'unj ei. 'O se che'é se natá' 'unj se-nanaj rihaan soj ro', che'é dan doj a gaa sayuun quirán' soj rihaan sayuun quirán' nij síi ataa cuno se-nanaj adonj —taj Jesucristó rihaan nij síi naquí'yaj cuu se-tucuañj Moisés do', rihaan nij síi fariseo do' a.

*Nana nihánj taj xna'anj se vaa ase vaa nii Jesucristó do', ase vaa tinúú Jesucristó do', ase vaa ra'vij Jesucristó do', vaa nij síi uno rihaan Diose a*

<sup>46</sup> Ataa quisíj ca'mii Jesucristó rihaan nij yuvií, ne cuchí' nii Jesucristó do', tinúú Jesucristó do', rihaan ve' a. Nanó rá nij so' daj qui'yaj nij so' ca'mii nij so' ga Jesucristó a. <sup>47</sup> Ne cataj yo'o so' rihaan Jesucristó a:

—Xe' ro', nicun' níi so' nicun' tinúú so' nicun', ne me ndo'o rá nij so' ca'mii nij so' ga so' á —taj so' rihaan Jesucristó a.

<sup>48</sup> Ne cataj uún Jesucristó rihaan síi cataj xna'anj rihaan Jesucristó a:

—Me chana me níi 'unj rihaan 'unj, rá so' ga. Me síi me tinúú 'unj rihaan 'unj, rá so' ga —taj Jesucristó rihaan so' a.

<sup>49</sup> Ne ticun' so' ra'a so' rihaan nij síi tucu'yón se-nana so', ne cataj so':

—Ní'yaj so' ei. Ase vaa níi 'unj do', ase vaa tinúú 'unj do', vaa nij síi nihánj adonj. <sup>50</sup> 'O se yuvií uno rihaan Réé 'unj síi nicun' xta' ro', ase vaa tinúú 'unj do', ase vaa ra'vij 'unj do', ase vaa níi 'unj do', vaa nij so' rihanj adonj —taj Jesucristó a.

## 13

*Nihánj me cuentó nanó Jesucristó che'é 'núú trigó tix'nuu yo'o so' a*

<sup>1</sup> Dan me se guun naá doj, ne curihanj Jesucristó rá ve', ne cane so'

tu'va na lacuaná, <sup>2</sup> ne ca'na' ndo'o yuvii rihaan so', ne che'é dan cavii so' rque 'o rihoo chéé rihaan na, ne ca'anj cane so' rque rihoo yo', ne canicun' nij yuvii tu'va na lacuaná yo' a. <sup>3</sup> Ne nanó ndo'o Jesucristó cuentó rihaan nij yuvii, cataj so':

—Dan me se curihañj 'o síi me rá cuchruj naa 'núú trigó, ne tix'nuu so' 'núú trigó yo' rihaan yo'óó, <sup>4</sup> ne cayuu doj 'núú trigó yo' rá chrej chéé yuvii, ne ca'na' xtâj chá xtâj man 'núú trigó naj rá chrej yo', ne dan me se navij nu' 'núú trigó yo', qui'yaj nij xtâj nanj adonj. <sup>5</sup> Ne yo'ó ta'aj 'núú trigó yo' ro', cayuu rihaan yuvej rej taj catun' yo'óó a. Che'é dan cuaj xra' stanj le'ej a. <sup>6</sup> Veé dan, ne quisij güii, ne cuchrii naa le'ej, qui'yaj naán, che'é se ne ca'vee ca'anj nij yáá naa le'ej yo' a man adonj. <sup>7</sup> Ne yo'ó ta'aj 'núú trigó yo' ro', cayuu sca'núj coj tanj, ne dan me se yoo doj cachij coj tanj yo' rihaan naa le'ej, ne quinavij nu' naa le'ej, qui'yaj coj tanj yo' nanj adonj. <sup>8</sup> Ne yo'ó ta'aj 'núú trigó yo' ro', cayuu rihaan yo'óó sa', ne naa yo' ro', cachij sa' a. Dan me se rihaan ta'aj yo'óó sa' yo' cientó ya 'núú cavii, qui'yaj 'o 'o 'núú le'ej nii quiniñ rihaan yo'óó sa' yo', ne rihaan yo'ó ta'aj yo'óó sa' yo' va'núj chihaa ya 'núú cavii, qui'yaj 'o 'o 'núú le'ej nii quiniñ rihaan yo'óó sa' yo', ne rihaan yo'ó ta'aj yo'óó sa' yo' íco chí' ya 'núú trigó cavii, qui'yaj 'o 'o 'núú le'ej nii quiniñ rihaan yo'óó sa' yo' nanj adonj.

<sup>9</sup> "Sese taj yu'uj xréé soj, ne cuno soj nana nihánj ei. —Veé dan quisij cuentó yo' cuentó nanó Jesucristó a.

*Nana nihánj taj xna'anj me che'é nanó ndo'o Jesucristó cuentó che'é nij rasuun rihaan nij yuvii a*

<sup>10</sup> Gaa ne quinichrun' nij síi tucu'yón se-nana Jesucristó rihaan so', ne xná'anj nij so' man Jesucristó a:

—Me che'é nanó so' cuentó che'é nij rasuun rihaan nij yuvii ga —taj nij so', xná'anj nij so' man Jesucristó a.

<sup>11</sup> Gaa ne cataj Jesucristó rihaan nij so' a:

—Xa' soj, tzaj ne tihaan Diose nana rihaan soj daj qui'yaj Diose asa' guun chij Diose rihaan chumii nihánj adonj. Dan me se nana ne ne'en cunudanj yuvii me nana tihaan Diose rihaan soj adonj. Ne ne racuíj Diose man yo'ó ta'aj nij yuvii quene'en nij yuvii daj qui'yaj Diose asa' guun chij Diose rihaan chumii nihánj ma'. <sup>12</sup> 'O se síi aj nari' nana ro', doj a nari' uún so', ne uxrá quene'en ndo'o so', qui'yaj Diose nanj adonj. Ne síi na'vej rá nari' sa' nana ro', tananj ca'nee Diose doj nij nana nari' so' man so', ne quinañ uun so' nanj adonj. <sup>13</sup> Che'é dan nanó cuentó che'é nij rasuun rihaan nij yuvii yo', che'é se ni'yaj nij so' do', nanó xrej nij so' do', tzaj ne ne ne'en nij so' do', ne acaj nij so' cuentá do', ma'. <sup>14</sup> Ne ase vaa nana nihánj nana nata' síi cu'naj Isaías che'é Diose gaa naá ro', veé danj vaa nij yuvii ne veé danj 'yaj nij yuvii cuano ei: "Catuu uxrá nana xréé soj, tzaj ne se xcaj soj cuentá ma'. Ne ni'yaj uxrá soj, tzaj ne se quene'en soj ma'. <sup>15</sup> 'O se caraán ma'an nij yuvii nihánj rihaan nij so', che'é rej na'vej rá nij so' quene'en ma'an nij so', ne caraán nij so' xréé nij so', che'é rej na'vej rá nij so' cuno nij so' uún a. Ne ne atúj nana nimán nij so', 'yaj nij so', che'é yan na'vej rá nij so' xcaj nij so' cuentá ne canicaj nimán nij so' a ma'. 'O se na'vej uxrá rá nij so' quinahuun sa' nimán nij so' qui'yáa 'unj a man adonj". Yo' me se-nana Diose nana nata' síi cu'naj Isaías che'é ma'an Diose gaa naá a.

<sup>16</sup> "Tzaj ne vaa che'é gaa niha' rá soj che'é rihaan soj do', che'é xréé soj do' ei. 'O se aj quene'en soj se vaa qui'yaj, ne aj cuno soj nana ca'mij á. <sup>17</sup> Ya ya cataj xna'anj 'unj rihaan soj se vaa man ndo'o síi man gaa naá síi nata' se-nana Diose do', síi sa' do', guun rá quene'en se vaa quene'en nij soj, tzaj ne ne quene'en nij so' ma'. Ne guun rá nij so' cuno nij so' se vaa uno soj, tzaj ne ne cuno nij so' man adonj

—taj Jesucristó rihaan nij sí tucu'yón se-nanā so' a.

*Nana nihánj taj xna'anj me taj cuentó che'é 'núú trigó yo' a*

<sup>18</sup> Gaa ne cataj uún Jesucristó:

—Che'é dan cunō ma'an soj, cataj xna'anj 'unj rihaan soj me taj cuentó che'é 'núú trigó tix'nuu sí cuchruj naa yo' á. <sup>19</sup> Cunudanj yuvij uno nana che'é daj qui'yaj Diose asa' guun chij Diose rihaan chumij ro', sese ne acaj sa' nij so' cuentá, ne 'na' sí chree, ne a'néj sí chree nana yo' nimán yuvij yo' a. Dan me se ase vaa 'núú trigó cayuu rá chrej chée yuvij vaa yuvij yo' a. <sup>20</sup> Ne 'núú trigó cayuu rihaan yo'óo taj rihaan yuvej ro', ase vaa sí uno se-nanā Diose vaa yo', ne cuaj uun niha' rá so' canoco' so' nana yo', <sup>21</sup> tzaj ne ataa xcaj sa' so' cuentá, ne gaa uun che'e yuvij 'yaj yuvij sayuun man so' che'é nana nocō' so', ne cuaj nu' uun na'aj so', ne tanáj so' nana yo' cuaj nanj adonj. <sup>22</sup> Ne 'núú trigó cayuu sca'núj coj tanj ro', ase vaa sí uno se-nanā Diose vaa yo', tzaj ne nanó ndo'o rá so' che'é rasuun man rihaan chumij nihánj, ne me ndo'o rá so' qui'yaj canaán so' sa'anj, ne che'é dan tiha' yu'unj so' man ma'an so' che'é sa'anj a. Che'é dan me taj se 'yá' canoco' sa' so' nana nari' so', ne ne nuu sa' nimán so' rihaan Diose ma'. <sup>23</sup> Ne 'núú trigó cayuu rihaan yo'óo sa' ro', ase vaa sí uno se-nanā Diose vaa yo', ne xcaj sa' so' cuentá, ne nuu sa' nimán so' rihaan Diose a. Ne sa' uxrá 'yaj ta'aj nij so', ne sa' doj 'yaj yo'ó ta'aj nij so', ne sa' doj tzin' 'yaj yo'ó ta'aj nij so' nanj adonj. —Veé danj quisíj nana ca'mii Jesucristó che'é cuentó yo' a.

*Nihánj me cuentó nanó Jesucristó che'é coj cachij sca'núj 'núú trigó a*

<sup>24</sup> Ne nanó so' yo'óo cuentó nii rihaan nij so', cataj so':

—Ase vaa qui'yaj 'o sí tix'nuu 'núú trigó sa' to'óo so' ro', danj gaa qui'yaj Diose asa' guun chij Diose rihaan chumij nihánj adonj. <sup>25</sup> Dan me se quisíj tix'nuu so' 'núú trigó yo', ne rej

nij orá otoj yuvij catúj 'o sí taj ri'yunj man so' to'óo so', ne tix'nuu sí chi'ii yo' caân coj chi'ii rihaan yo'óo naj 'núú trigó yo', ne veé dan me se ca'anj uún so', <sup>26</sup> ne dan me se xra' 'núú trigó xra' coj xra', gaa ne quichihón caa raā 'núú trigó do', raā coj do', ne xcaj nij se-mozó sí to'oj yo' cuentá se vaa nuveé 'nuj trigó me nu' naa a. Maan se man uxrá coj rque naa yo' nanj adonj. <sup>27</sup> Che'é dan cuchí' nij se-mozó sí to'oj yo' rihaan sí to'oj, ne cataj xna'anj nij so' rihaan so', cataj nij so': “Ya inanj 'núú trigó sa' tix'nuu so' na'. Me rej cavii coj chi'ii nihánj ga, señor”, taj nij mozó rihaan sí to'oj yo' a. <sup>28</sup> Gaa ne cataj so' rihaan nij se-mozó so' a: “Sí taj ri'yunj man me sí tix'nuu caân coj chi'ii rihaan to'ój ei”, taj so' rihaan nij se-mozó so' a. “Ne me rá so' quirihaa núj coj ne naqui'yaj chre' núj coj na'”, taj nij mozó rihaan ru'vee yo' a. <sup>29</sup> “Taj che'é qui'yaj soj danj ma'. Sese quirihaa soj man coj yo', gaa ne quirihaa uún soj man ta'aj 'núú trigó yo' gaa nanj adonj. <sup>30</sup> Maan se ca'ne' rá soj cachij rcua'aan coj yo' ga 'núú trigó yo', gaa ne yavii quirii ní' naa trigó, gaa ne cataj xna'anj 'unj rihaan nij sí quirii naa se vaa asino naqui'yaj chre' nij so' coj yo', gaa ne numíj nij so' coj yo', gaa ne cacaa coj yo' adonj. Gaa ne naqui'yaj chre' nij so' 'núú trigó sa', gaa ne caraa sa' nij so' man yo' rá cuchruu adonj”, cataj sí to'oj rihaan se-mozó so' a —cataj Jesucristó rihaan nij yuvij a.

*Nihánj me cuentó nanó Jesucristó che'é caân cuêj mostazá xlá a*

<sup>31</sup> Ne nihánj me yo'óo cuentó nanó Jesucristó rihaan nij yuvij a:

—Ase vaa achij caân cuêj mostazá xlá ro', danj gaa guun chij Diose rihaan chumij nihánj adonj. Dan me se nicaj yo'ō so' man caân cuêj mostazá xlá, ne axríj so' caân yo' rihaan to'óo so' a. <sup>32</sup> Dan me se le'ej doj vaa caân cuêj mostazá xlá rihaan cunudanj nij caân, tzaj ne asa' cachij yo', ne xij doj vaa yo' rihaan nu' coj man tacaan, ne

ase vaa chruun vaa yo' a. Dan me se ayuu nij xtâj vaj rej xta' raâ cuêj yo', ne 'yaj nij xo' se-sca' nij xo' raâ cuêj yo' adonj. —Danj ca'mii Jesucristó rihaan nij so' a.

*Nihánj me cuentó nanó Jesucristó che'é levadura se 'yaj naraa nana rque rachrúún a*

<sup>33</sup> Ne nihánj me yo'ó cuentó nanó Jesucristó rihaan nij yuvií a:

—Dan me se naqui'yaj ní' 'o chana caxrj yo'ó levadura rque cunj hariná gaa 'yaj no' rachrúún a. Dan me se ase vaa 'o chana, ne cuxra' ta'aj no' 'o va'núj ya aga' yo'ó hariná, ne caxrj ndo'o no' yo'ó levadura, ne caxrj yuve no' man yo' ndaa navij naraa ndo'o nana rque yo' a. Ase vaa uun chij yo'ó levadura rihaan cunj hariná ro', danj gaa guun chij Diose rihaan chumii nihánj adonj. —Danj ca'mii Jesucristó rihaan nij so' a.

*Nana nihánj taj xna'anj se vaa inanj cuentó nanó Jesucristó rihaan nij yuvií a*

<sup>34</sup> Inanj cuentó che'é nij rasuun nanó Jesucristó rihaan nij yuvií, gaa ne a'vee nata' so' rihaan nij yuvií a. <sup>35</sup> Danj qui'yaj so', che'é yan me rá so' qui'yaj so' nu' se vaa cataj 'o sí nata' se-nana Diose gaa naá, cataj so': “Inanj cuentó che'é nij rasuun nanó 'unj rihaan yuvií, ne dan me se cataj xna'anj 'unj rihaan nij so' che'é se vaa qui'yaj Diose asij qui'yaj Diose man nu' chumii nihánj adonj”. Danj ca'mii sí nata' se-nana Diose gaa naá a.

*Nana nihánj taj xna'anj me taj cuentó che'é coj cachij sca'núj 'núú trigó yo' a*

<sup>36</sup> Gaa ne na'née Jesucristó chrej man nij yuvií, ne catúj so' rá ve', gaa ne cuchí' nij sí tucu'yón se-nana so' rihaan so' a. Ne xna'anj nij so' man so', cataj nij so':

—Cataj xna'anj so' rihaan núj me taj cuentó che'é coj cachij sca'núj 'núú trigó yo' á —taj nij so' rihaan Jesucristó a.

<sup>37</sup> Gaa ne cataj xna'anj Jesucristó rihaan nij so', cataj so':

—Sí tix'nuu 'núú trigó sa' rihaan yo'ó ro', ase vaa 'unj sij ca'née Diose nica yu'unj man yuvií vaa so', <sup>38</sup> ne ase vaa chumii nihánj vaa yo'ó yo', ne 'núú trigó sa' ro', ase vaa nij sí cayáán ga Diose asa' guun chij Diose rihaan chumii vaa yo', ne ase vaa coj chi'ii yo' ro', vaa nij sí noco' man sí chree, <sup>39</sup> ne ase vaa sí tix'nuu caán coj chi'ii rihaan yo'ó yo' ro', vaa ma'an sí chree yo', ne ase vaa güii ca'ne' Diose cacun' che'é yuvií man rihaan chumii nihánj ro', danj vaa güii quirii nii naa yo', ne ase vaa nij se-mozó Diose vaa nij sí quirii naa yo' á. <sup>40</sup> Dan me se ase vaa naqui'yaj chre' nii man coj yo' ne cacaa yo' rihaan ya'an ro', danj gaa quiran' nij sí noco' man sí chree güii ca'ne' Diose cacun' che'é yuvií man rihaan chumii nihánj adonj. <sup>41</sup> Dan me se sí ca'née Diose nica yu'unj man yuvií mej, ne güii dan ca'nej 'unj man nij se-mozó 'unj, ne narií nij so' man nij sí chi'ii 'nij sca'núj nij yuvií guun chij 'unj rihaan a. Dan me se nu' sí tumé cacun' do', nu' sí na'vej rá cunó rihaan Diose do', quirii nij se-mozó 'unj man nij so' rihaan chumii nihánj, <sup>42</sup> ne ca'nej nij so' man nij sí chi'ii rque chrúún acaa ndo'o nanj adonj. Ne yuvií cuman rej yo' me se ta'vee ndo'o nij so', ne ndaa cha ruj ma'an nij so' cúú yan' nij so' nanj adonj. <sup>43</sup> Gaa ne cuchuguun nij sí sa' yo' adonj. Dan me se ase vaa chuguun güii ro', danj gaa cuchuguun nij so', ne guun chij Rej nij so' sí nicun' xta' rihaan nij so' ei.

”Dan me se sese taj yu'uj xrée soj, ne cunó soj nana nihánj ei.

*Nihánj me cuentó nanó Jesucristó che'é chrúún sa'anj nari' yo' o so' a*

<sup>44</sup> ”Ase vaa 'o chrúún sa'anj 'nij yuve rque yo'ó vaa rej rihaan soj se vaa cayáán soj ga Diose asa' guun chij Diose rihaan chumii nihánj adonj. Dan me se nari' 'o snó'o man chrúún sa'anj yo', gaa ne naráán uún so' yo'ó xraá yo', ne guun niha' uxrá rá so' che'é chrúún sa'anj nari' so', ne



ca'anj so' cutu'vej so' nu' si'yaj so', ne nicaj so' sa'anj, ca'anj so', quiránj so' nu' yo'óo 'nij chrúún sa'anj yo' nanj adonj.

*Nihánj me cuentó nanó Jesucristó che'é chruj perlá tu'vee ndo'o a*

<sup>45</sup> Ne ase vaa sí ne tiendá ne nanao' chruj perlá tu'vee ndo'o quiraan ro', danj vaa sí cayáán ga Diose asa' guun chij Diose rihaan chumij nihánj adonj. <sup>46</sup> Dan me se nari' sí ne tiendá yo' 'o chruj perlá sa' uxrá doj rihaan yo'ó perlá, gaa ne ca'anj so' cutu'vej so' cunudanj si'yaj so', ne nicaj so' sa'anj, quiránj so' man chruj perlá sa' doj yo' nanj adonj.

*Nana nihánj me cuentó nanó Jesucristó che'é xcuj atúj rque nanj tiguíj nii rá na a*

<sup>47</sup> Ne ase vaa quiran' xcuj catúj rque nanj tiguíj nii rá na ro', danj gaa quiran' yuvij asa' guun chij Diose rihaan chumij nihánj ei. Dan me se tiguíj yuvij man nanj yo' rque na, ne dan me se me ma'an xcuj catúj rque nanj yo' a. <sup>48</sup> Ndaa síj gaa caraa nanj yo', gaa ne cuxuun nij yuvij man nanj yo' ndaa tu'va na yo', gaa ne ca'anj cayáán nij so' rihaan yo'óo, gaa ne narij nij so' man xcuj sa', ne narij nij so' man xcuj nij uún a. Gaa ne xcuj sa' yo' me se caraa nij so' man xcuj sa' yo' rá scaa a. Tzaj ne xcuj nij me se quiri'ij uun nij so' man yo' nanj ei. <sup>49</sup> Ne ase vaa quiran' nij xcuj yo' ro', danj quiran' yuvij asa' ca'ne' Diose cacun' che'é yuvij, ne cavij nij se-mozó Diose ne cuxra' ta'aj nij so' man nij sí chi'ij ga nij sí vaa sa', <sup>50</sup> ne quiri'ij nij so' man nij sí chi'ij yo' rque chrúún ya'aan ndo'o, gaa ne dan me se ta'vee uxrá nij so', ne ndaa cha' ruj ma'an nij so' cúu yan' nij so' nanj adonj —taj Jesucristó rihaan nij sí tucu'yón se-nana so' a.

*Nana nihánj taj xna'anj che'é sí ne'en cunudanj se-nana Diose a*

<sup>51</sup> Ne xná'anj Jesucristó man nij sí tucu'yón se-nana so', cataj so':

—Cuno soj nu' cuentó nanó 'unj cuano na' —taj Jesucristó, xná'anj so' man nij sí tucu'yón se-nana so' a.

—Cuno núj nu' cuentó yo' á —taj nij so' a.

<sup>52</sup> Ne cataj Jesucristó rihaan nij so' a:

—Che'é dan cataj xna'anj 'unj rihaan soj se vaa nij sí naqui'yaj cuu se-tucuanj Moisés me se sese nari' uún nij so' nana che'é güi guun chij Diose rihaan chumij nihánj, ne sí ne'en nu' nana me nij so', ne sí cuu raa guun nij so', qui'yaj nu' nana nari' nij so' adonj. Dan me se ase vaa sí ru'vee ne man rasuun nga do', rasuun naca do', rihaan ro', danj gaa nij so', ne cavij sa' uxrá nij so' nanj adonj —taj Jesucristó rihaan nij sí tucu'yón se-nana so' a.

*Nana nihánj taj xna'anj se vaa ne ca'vej rá nij sí man chiháán Jesucristó chuman' cu'naj Nazaret cunó nij so' nana ca'mii Jesucristó ma'*

<sup>53</sup> Dan me se quisij nanó Jesucristó nu' cuentó nihánj rihaan yuvij, ne curihanj so' rej yo', ne ca'anj so' a. <sup>54</sup> Gaa ne nucui' so' rej chiháán so', ne ca'anj so' ve' tucu'yón nij sí man chiháán so' se-tucuanj Moisés, ne tucu'yón so' man nij sí man rá ve' yo' a. Dan me se caráya'anj nij so', ne cataj nij so':

—Me rej nari' sí nihánj nana cuu avij raa sí nihánj ga. Me rej nari' so' suun sa' 'yaj suun so' ga. <sup>55</sup> Nuveé ta'nij sí acój chruun sí ne chiháán ní me so' na'. Ne nii so' me chana cu'naj Mariá á. Ne tinúú so' me sí cu'naj Jacobo do', sí cu'naj José do', sí cu'naj Simón do', sí cu'naj Judas do' á. <sup>56</sup> Ne nij ra'vij so' me chana ne chiháán ní á. Tzaj ne ne ne'enj me rej me nari' so' suun nihánj qui'yaj suun so' ma' —taj nij sí man chiháán Jesucristó rihaan tuvi' nij so' a.

<sup>57</sup> Ne guun nacoó rá nij so' ni'yaj nij so' man Jesucristó a. Ne cataj Jesucristó rihaan nij so' a:

—Me rej ma'an vaj 'o sí nata' se-nana Diose, ne aráj cochroj nij yuvij rihaan so', tzaj ne nij yuvij

man chiháán so' do', nij tuvi' so' sí yanj tucua' so' do', na'vej rá caraa cochroj rihaan so' ma'—taj Jesucristó rihaan nij sí man chiháán so' chuman' cu'naj Nazaret yo' a.

<sup>58</sup> Ne doj vaa suun sa' qui'yaj suun Jesucristó chiháán so', che'é se ne cuchuman rá nij sí man chiháán so' ni'yaj nij so' man so' a.

## 14

*Nana nihánj taj xna'anj se vaa cavi' Juan sí cuta' ne man yuvi, qui'yaj sí nicaj suun cu'naj Herodes a*

<sup>1</sup> Dan me se cachén doj güii, gaa ne cuchi' nana rihaan sí nicaj suun cu'naj Herodes che'é nu' se vaa qui'yaj Jesucristó a. <sup>2</sup> Gaa ne cataj so' rihaan nij se-mozó so' a:

—Sí cu'naj Jesucristó ro', ya sí cu'naj Juan sí cuta' ne man yuvi me so' á. Dan me se cunuu i'na' ya uún sí cu'naj Juan, raj á. Ése sí cu'naj Juan me sí guun nucuaj qui'yaj nij suun sa' nocoo yo' nanj adonj —taj Herodes rihaan nij se-mozó so' a.

<sup>3</sup> Danj ca'mii sí cu'naj Herodes, che'é se gaa rque doj, ne so' me sí qui'yaj quita'aa nij tanuu man sí cu'naj Juan, ne numij nij tanuu man sí cu'naj Juan, ne caxrij sí cu'naj Herodes taga' man sí cu'naj Juan gaa rque doj a. Danj qui'yaj so' che'é chana cu'naj Herodías nica tinúú Herodes sí cu'naj Felipe a.

<sup>4</sup> Dan me se xcaj sí cu'naj Herodes man no', ne cataj xna'anj sí cu'naj Juan rihaan so' se vaa ne nó xcúún so' xcaj so' man choco' so' ma'. <sup>5</sup> Che'é se cataj sí cu'naj Juan rihaan so', gaa ne guun ndo'o rá sí cu'naj Herodes cavi' sí cu'naj Juan yo' a. Tzaj ne kuchu'vi' so' se vaa ca'maan rá nij yuvi a. 'O se sí nata' se-nana Diöse me sí cu'naj Juan, rá nij yuvi a.

<sup>6</sup> Dan me se quisij güii canuú se-cha'anj ma'an sí cu'naj Herodes, gaa ne quira'ánj ndo'o ta'núú chana cu'naj Herodías ni'yaj cunudanj nij sí ca'na' a. Ne guun niha' rá sí cu'naj Herodes quene'en so' man

chana yaan quira'ánj, <sup>7</sup> gaa ne che'é dan cata' tu'va so' se vaa ya uxrá rque so' rihaan no' me ma'an rasuun cachinj no' rihaan so' a. <sup>8</sup> Dan me se cataj xna'anj chana cu'naj Herodías rihaan ta'núú no' daj ca'mii no' rihaan sí cu'naj Herodes, gaa ne canicun' chana yaan yo' rihaan sí cu'naj Herodes, qui'yaj nii no' chana cu'naj Herodías a. Ne cataj chana yaan yo':

—Ca'nej so' cúú yave sí cu'naj Juan rque aga' rco'oo, ne rque so' manj nihánj á —taj chana yaan yo' rihaan sí cu'naj Herodes, qui'yaj nii no' chana cu'naj Herodías a.

<sup>9</sup> Gaa ne quinano' ndo'o rá sí cu'naj Herodes yo' gaa cuno so' nana yo' a. Quinano' rá so' se vaa cuno cunudanj nij sí ca'na' nana ca'mii so' se vaa rque so' me ma'an rasuun rihaan chana yaan yo' a. Tzaj ne cataj xna'anj so' se vaa nicaj ya chana yaan se vaa cachín no' rihaan so' nanj á. <sup>10</sup> Ne ca'ne' so' suun rihaan tanuu ca'anj tanuu taga' ca'ne' tanuu cúú yave sí cu'naj Juan yo' a. Ne danj qui'yaj nij tanuu a. <sup>11</sup> Ne ca'née nij tanuu cúú yave Juan rque aga' rco'oo, ne ca'anj nicaj nij tanuu cúú yave Juan rihaan chana yaan yo', ne caxrij nij so' man yo' ston chana yaan yo' a. Ne ca'anj nicaj chana yaan yo' man cúú yave Juan rihaan nii no' a.

<sup>12</sup> Gaa ne cuchi' nij sí tucuyón se-nana Juan taga', ne ca'anj nacaj nij so' cúú man sí cu'naj Juan, ne cachin' nij so' man so' rque yo'óo a. Gaa ne ca'anj nij so', cataj xna'anj nij so' rihaan Jesucristó se vaa cavi' sí cu'naj Juan yo' a.

*Nana nihánj taj xna'anj se vaa ca'vee quirii Jesucristó se chá 'un' mjí snó'o a*

<sup>13</sup> Dan me se cuno Jesucristó daj cataj sí cu'naj Herodes che'é so', ne che'é dan curihanj Jesucristó rej yo', ne dan me se cavii so' rque rihoo chéé rihaan na, ne ca'anj so' rej quij rej taj vaj yuvi man a. Ne cuno nij yuvi nana se vaa ca'anj so' rej quij yo' a. Che'é dan curihanj nij yuvi chiháán

nij yuvii, ne cachéé tacoj nij yuvii tu'va na lacuaná, ne ca'anj nij yuvii rej ca'anj Jesucristó a. <sup>14</sup> Ne nani Jesucristó rá rihoo, ne quene'en so' se vaa aj mán uxrá yuvii, ne cunuu 'ee rá so' man nij yuvii, ne nahuun sa' taran' nij sí ran' ca'na', qui'yaj so' nanj adonj.

<sup>15</sup> Dan me se cachén ndo'o orá, ne nani güii, ne cuchi' nij sí tucu'yón se-nana Jesucristó rihaan so', ne cataj nij so':

—Rco' quij uun me nihánj, ne taj se chá chá nij yuvii nihánj, ne cachén ndo'o orá nanj á. Qui'yáá so' se ndo'o, ne na'nej so' chrej man nij yuvii, ca'anj nij yuvii chuman' quiraan nij yuvii se chá nij yuvii á —taj nij so' rihaan Jesucristó a.

<sup>16</sup> —Taj che'é ca'anj nij yuvii ma'. Maan se go' ma'an soj se chá chá nij yuvii á —taj Jesucristó rihaan nij so' a.

<sup>17</sup> —Tzaj ne taj se chá rihaan núj nihánj ma'. Maan orún' 'un' rachrúún do', vij guee xcuaj do', vaa rihaan núj nanj á —taj nij so' rihaan Jesucristó a.

<sup>18</sup> —Rque soj man yo' rihanj nihánj á —taj Jesucristó rihaan nij so' a.

<sup>19</sup> Gaa ne ca'ne' Jesucristó suun rihaan nij yuvii ca'anj cayáán nij yuvii rihaan coj chrin', gaa ne coró' so' 'un' nij rachrúún ne vij roj xcuaj, ne ni'yaj so' rej xtá', ne nago' so' graciá rihaan Diose, gaa ne cuxra' ta'aj so' man rachrúún yo', ne caxrj so' ston nij sí tucu'yón se-nana so', ne caxrj nij so' ston nij yuvii a. <sup>20</sup> Gaa ne chá taran' nij yuvii, ne caraa rque cunudanj nij so', ne ndaa quináj ndo'o se chá, qui'yaj nij yuvii a. Gaa ne naqui'yaj chre' nii man se quináj tu'va nij yuvii, ne caraa yo'ó chujij ya scaa a. <sup>21</sup> Ne nij snó'o rqué Jesucristó chraa me se 'un' mój snó'o me nij so', ne ne qui'yaj contá nii man chana man xni man chá se chá yo' ma'.

*Nana nihánj taj xna'anj se vaa cachéé Jesucristó rihaan na a*

<sup>22</sup> Gaa ne ra'yanj ca'ne' Jesucristó suun rihaan nij sí tucu'yón se-nana

so' se vaa cavii nij so' rihoo chéé rihaan na ca'anj nij so' rej xco na lacuaná yo', quitaj yaan nij so' rihaan Jesucristó, ne dan me se ma'an Jesucristó na'nej chrej man nij yuvii, taj Jesucristó rihaan nij sí tucu'yón se-nana so' a. <sup>23</sup> Dan me se ca'anj nij so', ne cataj Jesucristó rihaan nij yuvii se vaa ca'vee ca'anj nij yuvii a. Gaa ne cavii orún' so' raá quij, ne cachín ni'yaj so' rihaan Diose a. Ne daj doj catá' güii raá quij, ne so' me se quináj so' raá quij yo' a.

<sup>24</sup> Dan me se gan' uxrá vaj rihoo nuu nij sí tucu'yón se-nana Jesucristó rihaan na, ne güej ndo'o rihoo yo' rihaan na, qui'yaj nana, che'é se go' nana rej rihaan rihoo yo' a. <sup>25</sup> Dan me se yan' si'nu' ca'anj Jesucristó rej vaj nij so', chéé tacoj uun so' rihaan na yo', vaj so' nanj adonj. <sup>26</sup> Ne quene'en nij sí tucu'yón se-nana so' man so' se vaa chéé uun so' rihaan na, ne cuchu'vi' ndo'o nimán nij so' a.

—Ta'naj me yo' ei —taj nij so' rihaan tuvi' nij so', ne caguáj nij so', che'é se cuchu'vi' nij so' a.

<sup>27</sup> Veé dan, ne nu' cataj Jesucristó rihaan nij so' a:

—Naqui'yaj nucuaj soj nimán soj ei. 'Unj 'na' ei. Se cuchu'vi' soj ma' —taj so' rihaan nij so' a.

<sup>28</sup> Gaa ne cataj Pedró rihaan so' a:

—Sese ya ya veé so' 'na', ne qui'yáá so' se ndo'o, ne ca'vee cachee 'unj rihaan na qui'yáá so', Señor —taj Pedró rihaan Jesucristó a.

<sup>29</sup> —Ca'vee ca'na' so' á —taj Jesucristó rihaan Pedró a.

Ne nani Pedró rá rihoo, ne cachéé so' rihaan na, ne ca'anj so' rihaan Jesucristó a. <sup>30</sup> Tzaj ne ni'yaj so' na se vaa cavii ndo'o nana yo', ne cuchu'vi' so', ne guun che'e so' ca'anj nij so' rque na yo' a. Che'é dan caguáj so' rihaan Jesucristó, cataj so':

—Tinani so' manj rihaan na, Señor —taj so' a.

<sup>31</sup> Veé dan, ne nu' quita'aa Jesucristó ra'a Pedró, ne quiri Jesucristó man so' rque na, ne cataj Jesucristó:

—Doj amán rá so' ni'yaj so' manj á. Me che'é guun vij nimán so' ga —taj Jesucristó rihaan so' a.

<sup>32</sup> Gaa ne catúj roj so' rque rihoo chéé rihaan na, gaa ne canicun' nana yo' a. <sup>33</sup> Gaa ne canicun' ruj nij sí man rque rihoo rihaan Jesucristó, ne cataj nij so':

—Ya ta'nij Diose mé so' á —taj nij so' a.

*Nana nihánj taj xna'anj se vaa nari nucuaj nij sí ran' man rej cu'naj Genesaret, qui'yaj Jesucristó a*

<sup>34</sup> Gaa ne cuchi' nij so' tu'va na lacuaná, ne ca'anj nij so' rej cu'naj Genesaret a. <sup>35</sup> Ne nuu yaan nij sí man rej yo' man Jesucristó, ne ca'née nij so' nana rihaan cunudanj nij sí yanj nu' anicaj se vaa ca'na' Jesucristó a. Ne nicaj nii man cunudanj nij sí ran' yanj rej yo' ca'na' nii rihaan Jesucristó a. <sup>36</sup> Ne cachín ni'yaj uxrá nij yuvij rihaan Jesucristó se vaa ca'vej Jesucristó cano ra'a nij so' doj tu'va sagan' so' a. Ne nu' nij sí cano ra'a doj tu'va sagan' so' ro', nahuun sa' cunudanj nij so' cuaj nanj adonj.

## 15

*Nana nihánj taj xna'anj me che'é ne na'ya' nij sí tucu'yón se-nana Jesucristó gaa chá nij so' chraa a*

<sup>1</sup> Gaa ne quinichrun' sí fariseo do', quinichrun' sí naqui'yaj cuu se-tucuanj Moisés do', rihaan Jesucristó, ne sí cavii chuman' Jerusalén me nij so' a. Ne xná'anj nij so' man Jesucristó, cataj nij so':

<sup>2</sup> —Nij sí tucu'yón se-nana so' ro', me che'é ne uno nij so' nana cataj xna'anj nij sí man gaa naá ga. 'O se ne na'ya' nij so' gaa chá nij so' chraa ma' —taj nij so' rihaan Jesucristó a.

<sup>3</sup> Gaa ne cataj Jesucristó rihaan nij so' a:

—Danj nanj ma'an soj, ne me che'é ne uno ma'an soj se-nana Diose 'yaj ma'an tucuaán noco' soj ga. <sup>4</sup> 'O se ca'ne' Diose suun se vaa: “Caraa cochróo so' rihaan rée so' do', rihaan ní so' do' á”. Ne: “Sí a'mii chree rihaan rej do', rihaan nii do', me se

vaj so' ne nu' che'e cavij so' á”. Danj vaa nana cataj xna'anj Diose rihaan ní á. <sup>5</sup> Tzaj ne taj soj se vaa sese cataj yo'o so' rihaan rej so' do', rihaan nii so' do', se vaa aj rqué so' nu' si'yaj so' rihaan Diose ne che'é dan se ca'vee racuj so' man rej so' do', man nii so' do', <sup>6</sup> ne daj chihaa mij ne nó xcúun so' racuj so' man rej so' do', man nii so' do', taj soj a. Dan me se danj inanj a'mii soj gaa tucu'yón soj se-nana nij sí man gaa naá, ne axrij yuve soj man se-nana Diose nanj adonj.

<sup>7</sup> ”Dan me se sí tu'va rma'an me soj nanj á. Dan me se ca'mii natáj sí cu'naj Isaías se-nana Diose gaa naá, ne cataj xna'anj so' daj sij me soj a. Cataj so': <sup>8</sup> “Yuvij nihánj ro', ase vaa nana a'mii sí aráj cochroj rihanj vaa nana a'mii nij so', tzaj ne tu'va rma'an nij so' nanj á. Nimán nij so' me se ino vaa nanj adonj. 'O se ne noco' uxrá nimán nij so' manj ma'. <sup>9</sup> Na'vij rma'an nij so' rihanj nanj á. 'O se nanj se-nana yuvij me nana tucu'yón nij so' nanj adonj”. Dan me se-nana Diose nana a'mii che'é soj á —taj Jesucristó rihaan nij sí fariseo do', rihaan nij sí naqui'yaj cuu se-tucuanj Moisés rihaan yuvij do' a.

<sup>10</sup> Gaa ne canacúun Jesucristó man nij yuvij ca'na' nij yuvij rihaan so' a. Gaa ne cataj so' rihaan nij yuvij:

—Cuno soj nana nihánj, ne xcaj soj cuentá nedij'. <sup>11</sup> Nuveé se atúj tu'va yuvij me se 'yaj chi'ij man yuvij ma'. Se avii tu'va yuvij ro', 'yaj chi'ij man yuvij adonj —taj Jesucristó rihaan nij yuvij a.

<sup>12</sup> Gaa ne cuchi' nij sí tucu'yón se-nana Jesucristó rihaan Jesucristó, ne cataj nij so':

—Ne'én so' se vaa ca'maan rá nij sí fariseo che'é nana ca'mii so' rihaan nij so' na' —taj nij so', xná'anj nij so' man Jesucristó a.

<sup>13</sup> Gaa ne cataj Jesucristó:

—Xa' nij so', tzaj ne ase vaa coj xra' ma'an vaa nij so' do', vaa nana tucu'yón nij so' do' adonj. Nuveé sij tucu'yón se-nana Diose me nij so' ma'.



Che'é dan, ase vaa tiri' nii man coj xra' ma'an ro', danj gaa tirí' Diose man nij so' ga nana tucu'yón ma'an nij so' nanj adonj. <sup>14</sup> Tanáj nij soj man nij so' á. Me rá nij so' cataj xna'anj nij so' rihaan yuvií daj qui'yaj yuvií á. Tzaj ne ase vaa síí aráán rihaan vaa nij so' adonj. Dan me se ne'en soj se vaa sese guun rá síí tuchrii racuíj so' man yo'ó síí tuchrii nari' so' chrej ca'anj so', ne quinij roj síí tuchrii yo' rá yu'uj nanj ei —taj Jesucristó rihaan nij síí tucu'yón se-nana so' a.

<sup>15</sup> Gaa ne cataj Pedró rihaan so' a:

—Cataj xna'anj so' rihaan núj me taj nana ca'mii so' che'é se atúj tu'va yuvií á —taj Pedró a.

<sup>16</sup> Gaa ne cataj Jesucristó:

—Vaa soj vaa, ne ataa xcaj ma'an soj do' cuentá a na'. <sup>17</sup> Ne ne'en soj se vaa nu' se atúj tu'va yuvií ro', achén yo' rque yuvií, ne urihanj yo' gaa re'é yuvií nanj á. <sup>18</sup> Tzaj ne se urihanj tu'va yuvií ro', yo' me nana avii nimán yuvií, ne nana yo' me 'yaj chi'ii ndo'o man yuvií adonj. <sup>19</sup> 'O se nihánj me se chi'ii avii nimán yuvií a: se chi'ii do', yan ticavi' man tuvi' do', yan cotoj ga nica tuvi' do', che'é yan qui'yaj ituu si'yaj tuvi' do', che'é yan ca'mii ne che'é tuvi' do', che'é yan nachri' ni'yaj man tuvi' do', me nu' se avii nimán yuvií, <sup>20</sup> ne nu' yo' me se vaa 'yaj chi'ii man yuvií nanj adonj. Tzaj ne che'é nu' se chá yuvií me se ca'vee se ne na'ya' yuvií gaa chá yuvií chraa, tzaj ne se qui'yaj chi'ii yo' man yuvií ma' —taj Jesucristó rihaan nij síí tucu'yón se-nana so' a.

*Nana nihánj taj xna'anj se vaa cuchumán rá 'o chana cananea se vaa racuíj Jesucristó man no' a*

<sup>21</sup> Gaa ne curihanj Jesucristó rej yo', ne ca'anj so' rej naj chuman' cu'naj Tiro do', chuman' cu'naj Sidón do' a. <sup>22</sup> Gaa ne curihanj 'o chana cananea chana ne rej yo' a. Ne caguáj ndo'o no' rihaan Jesucristó, cataj no':

—Ne'enj se vaa tuvi' síí cu'naj David síí cane gaa naá mé so', Señor. Che'é dan cunu 'ee rá so' manj á. 'O

se canó uxrá nana chree man ta'nij chala cunii nanj á —taj chana yo', caguáj no' rihaan Jesucristó a.

<sup>23</sup> Tzaj ne a 'ó nana ne ca'mii Jesucristó rihaan no' a. Gaa ne cuchí' nij síí tucu'yón se-nana Jesucristó rihaan so', ne cachíin ni'yaj nij so' rihaan so', cataj nij so':

—Qui'yáá so' se ndo'o, ne cataj xna'anj so' rihaan chana yo' se vaa ca'anj chana yo' nanj ruguanj. 'O se noco' uxrá no' man ní', ne aguáj ndo'o no' nanj asanj —taj nij so' a.

<sup>24</sup> Gaa ne cataj so':

—Nanj chana yaníj me no', ne inanj rihaan nij yuvií israelitá ca'née Diose manj nanj á. 'O se ase vaa daán Diose matzinj ro', vaa nij síí israelitá rihaan Diose, ne aj ca'anj ni'ya uxrá nij so', ne che'é yan nano' 'unj man síí ca'anj ni'ya 'naj nanj adonj —taj Jesucristó rihaan nij so' a.

<sup>25</sup> Gaa ne cuchí' chana yo' rihaan Jesucristó, ne canicun' ruj no' rihaan Jesucristó, ne:

—Racuíj so' manj, Señor —taj no' a.

<sup>26</sup> Gaa ne cataj so':

—Dan me se ne'én so' se vaa se ca'vee cata'aa ní' co'oo man rihaan nij xnii ne go' ní' chá nij chuvee ma'. Che'é dan ne nó xcúnj racuíj man soj sij yaníj a man adonj. Maan se inanj ma'an nij yuvií israelitá me no' xcúun 'unj racuíj 'unj nanj adonj —taj Jesucristó rihaan chana yo' a.

<sup>27</sup> Gaa ne cataj no':

—Veé danj vaa guee, Señor. Ne nij chuvee ro', chá nij xo' tachruu ayuu tu'va se-xqui' nij xo' nanj á. Ne ase vaa chuvee chá tachruu vaa 'unj rihaan so' nanj adonj. Che'é dan me ndo'o raj racuíj so' doj manj, raj nanj adonj —taj chana yo' rihaan Jesucristó a.

<sup>28</sup> Gaa ne cataj Jesucristó:

—Cuchumán uxrá rá so' ni'yaj so' manj, nocoj. Che'é dan qui'yáj se vaa achíin so' rihanj nanj ei —taj Jesucristó rihaan no' a.

Ne veé maan orá dan nahuun sa' ta'níí chana yo' a.

*Nana nihánj taj xna'anj se vaa nahuun sa' uxrá yuvii, qui'yaj Jesucristó a*

<sup>29</sup> Gaa ne curihanj Jesucristó rej yo', ne cachén so' na lacuaná cu'naj Galilea, gaa ne cavii so' raá 'o quij, ne ca'anj cayáán so' rihaan yo'óo a. <sup>30</sup> Ne cuchí' uxrá yuvii rihaan so', ne ca'na' nij yuvii nicaj nij yuvii man tuvi' nij yuvii síí ran' rihaan so' a. Dan me se síí chéé rengó do', síí tuchrii do', síí ya'mii do', síí anó chi'ii do', cuchí' rihaan Jesucristó, qui'yaj nij yuvii, ne cuchruj nij yuvii man nij síí ran' yo' tacóo Jesucristó, ne nahuun sa' nij so', qui'yaj Jesucristó a. <sup>31</sup> Ne caráya'anj ndo'o nij yuvii quene'en nij yuvii se vaa ca'mii nij síí ya'mii yo' do', se vaa cachéé sa' nij síí rengó do', se vaa nachuguun rihaan nij síí tuchrii do' a. Ne sa' uxrá ca'mii nij yuvii che'é Diose se vaa ve'é ndo'o vaa Diose síí nocó' nij yuvii israelitá man a.

*Nana nihánj taj xna'anj se vaa go' Jesucristó se chá rihaan ca'anj mjí snó'o a*

<sup>32</sup> Gaa ne canacúún Jesucristó ca'na' nij síí tucu'yón se-nana so' rihaan so', ne cataj so':

—Cunuu 'ee raj man nij yuvii nihánj nanj á. 'O se quisíj va'nuj güii mán nij so' gaj, ne taj yan vaj se chá nij so' a ma'. Ne na'vej raj ca'nej 'unj man nij so' ca'anj nij so' ma'. 'O se vaj nij so' chrej, ne na'aan rque nij so', ne ninaj nij so' rá chrej, rá 'unj nanj adonj —taj Jesucristó a.

<sup>33</sup> Ne cataj nij síí tucu'yón se-nana so' rihaan so' a:

—'O se rco' quij uun me nihánj, ne me rej quirí' ní' rachrúún chá cunudanj nij yuvii nihánj ga —taj nij so' a.

<sup>34</sup> —Me daj rachrúún vaa rihaan soj ga —taj Jesucristó, xná'anj so' man nij síí tucu'yón se-nana so' a.

—Daj 'o chij rachrúún ne daj doj xcuaj le'ej nii ne, vaa rihaan núj nanj adonj —taj nij so' a.

<sup>35</sup> Gaa ne ca'ne' Jesucristó suun rihaan nij yuvii se vaa cayáán nij yuvii rihaan yo'óo a. <sup>36</sup> Gaa ne nicaj so' chij

rachrúún yo' ne doj xcuaj, ne nago' so' graciá rihaan Diose, gaa ne cuxra' ta'aj so' man rachrúún yo' do', man ne xcuaj yo' do', ne caxríj so' ston nij síí tucu'yón se-nana so', ne rqué nij so' rihaan nij yuvii a. <sup>37</sup> Gaa ne chá cunudanj nij yuvii, ne ndaa caraa rque nij so' a. Gaa ne naqui'yaj chre' nii se vaa quináj tu'va nij yuvii yo', ne quisíj 'o cunu' chij ya scaa caraa qui'yaj se quináj tu'va nij yuvii yo' a. <sup>38</sup> Dan me se cunudanj nij so' chá, ne quisíj ndaa ca'anj mjí nij snó'o chá, ne ino me se chá nij chana do', nij xnii do', nanj adonj. <sup>39</sup> Gaa ne na'née Jesucristó chrej man nij yuvii, ne cavii so' rá rihoo chéé rihaan na, ne ca'anj so' rej cu'naj Magadán a.

## 16

*Nana nihánj taj xna'anj se vaa cachúin nij síí fariseo do', nij síí saduceo do', qui'yaj Jesucristó 'o suun sa' nocoo quene'en nij so' a*

<sup>1</sup> Gaa ne cuchí' nij síí fariseo cuchí' nij síí saduceo cuchí' rihaan Jesucristó, ne me rá nij so' quene'en nij so' sese ya síí ca'née Diose me Jesucristó a. Che'é dan cachúin ni'yaj nij so' rihaan Jesucristó se vaa racuíj Diose man Jesucristó, ne qui'yaj Jesucristó 'o suun sa' nocoo quene'en nij so', gaa ne guun ya rá nij so' se vaa síí ca'née ya Diose me Jesucristó, rá nij so' a. <sup>2</sup> Gaa ne ca'mii Jesucristó rihaan nij so', cataj so':

—Dan me se gaa ata' güii, ne ni'yaj soj xta', ne sese maree vaa xta', ne: “Xraj, ne x'nuu a'yuj”, taj soj á. <sup>3</sup> Ne rej na'yaan ni'yaj soj xta', ne sese maree vaa rej xta', ne sese aráán ndo'o ngaa rej xta', ne: “Corá caman' uxrá maan”, taj uún soj á. Dan me se ne'en soj xcaj soj cuentá che'é se vaa ne'en soj rej xta', tzaj ne ne'en soj xcaj soj cuentá che'é sayuun quiran' soj sij man rihaan chumii nihánj vaa güii a ma'.

<sup>4</sup> —Maan che'é se yuvii 'na' rej chi'ii na'vej rá canoco' sa' man Diose me soj sij israelitá, ne che'é dan me rá soj

qui'yáj suun sa' nocoo á. Tzaj ne se qui'yáj suun sa' nocoo ma'. Maan se quene'en soj se vaa ase vaa quiran' sí cu'naj Jonás sí nata' se-nana Diose gaa naá ro', danj quirán' 'unj, vaa güii nanj á —taj Jesucristó rihaan nij sí fariseo do', rihaan nij sí saduceo do' a. Gaa ne tanáj Jesucristó man nij so', ne ca'anj so' a.

*Nana nihánj taj xna'anj se vaa ne ca'vej rá Jesucristó cunō nij sí tucuyón se-nana so' man nana tucuyón nij sí fariseo do', nij sí saduceo do' a*

<sup>5</sup> Gaa ne ca'anj nij sí tucuyón se-nana Jesucristó rej xco na lacuaná, gaa ne xcaj nij so' cuentá se vaa quini'yón nij so', ne nīcaj nij so' rachrúun chá nij so' a. <sup>6</sup> Gaa ne cataj Jesucristó rihaan nij so' a:

—Cutumé soj man soj se gaa nanj quiran' soj sayuun, qui'yaj se-levadura nij sí fariseo do', nij sí saduceo do' á —taj Jesucristó no nij so' a.

<sup>7</sup> Ne nuchruj raá ndo'o nij sí tucuyón se-nana Jesucristó che'é nana ca'mii so', ne:

—Che'é se taj rachrúun nicaj ní, ne che'é dan a'mii so' che'é levadura se 'yaj naraa nana rque rachrúun nanj adonj —taj nij so' a.

<sup>8</sup> Ne aj ne'en Jesucristó daj uun nimán nij so', ne che'é dan cataj so':

—Me che'é nanó ndo'o rá soj se vaa taj rachrúun rihaan soj ga. 'O se doj amán rá soj ne'en soj manj vaa gaa nanj asan. <sup>9</sup> Me che'é ataa xcaj soj cuentá ga. Ne ne nuú rá soj gaa vaa daj 'o 'un' guee rachrúun rihaan ní tzaj ne quisíj chá cunū' 'un' mīj snó'o, qui'yáj a. Ne ndaa que'ee scaa se chá quináj tu'va yuvii gaa naqui'yaj chre' soj a. <sup>10</sup> Ne me che'é quini'yón soj che'é chij rachrúun ga. Ne nuú rá soj gaa vaa daj 'o chij guee rachrúun rihaan ní tzaj ne quisíj chá cunū' ca'anj mīj snó'o, qui'yáj a. Ne ndaa que'ee scaa se chá quináj gaa naqui'yaj chre' uún soj a. <sup>11</sup> Daj me che'é ne ne cunō soj ga. Nuveé

che'e nanj rachrúun ca'mij rihaan soj ma'. Maan se cutumé soj man soj se gaa nanj quiran' soj sayuun qui'yaj se-levadura nij sí fariseo do', nij sí saduceo do' adonj —taj Jesucristó rihaan nij so' a.

<sup>12</sup> Gaa ne xcaj nij so' cuentá se vaa nuveé che'e nanj levadura se 'yaj naraa nana rque rachrúun me cataj xna'anj Jesucristó rihaan nij so' se vaa cutumé nij so' man nij so'; maan ne 'o se che'e se ne ca'vej rá Jesucristó tihá' yu'unj nij sí fariseo do', nij sí saduceo do', man nij so' ga se-nana nij so' ro', che'é dan ca'mii Jesucristó nana vaa danj rihaan nij sí nocō' man so' nanj adonj.

*Nana nihánj taj xna'anj se vaa cataj xna'anj Pedró me sí me Jesucristó a*

<sup>13</sup> Gaa ne ca'anj Jesucristó rej naj chuman' cu'naj Cesarea de Filipino, gaa ne xná'anj so' man nij sí tucuyón se-nana so', cataj so':

—Daj taj nij yuvii che'é 'unj sij ca'née Diose nīcaj yu'unj man yuvii ga. Ne me sí mé 'unj, taj nij yuvii ga —taj Jesucristó, xná'anj so' man nij so' a.

<sup>14</sup> —Vaa sí taj se vaa sí cu'naj Juan sí cuta' ne man yuvii mé so' ei. Ne vaa sí taj uún se vaa sí cu'naj Elías sí nata' se-nana Diose gaa naá me uún so' chuguanj. Ne vaa sí taj uún se vaa sí cu'naj Jeremías do', yo'ó sí nata' se-nana Diose gaa naá do', me uún so' xa'. 'O se danj taj 'o 'o nij yuvii che'é so' nanj adonj —cataj nij so' rihaan Jesucristó a.

<sup>15</sup> —Ne ma'an soj, gaa ne me sí mé 'unj, rá ma'an soj ga —taj Jesucristó, xná'anj so' man nij sí tucuyón se-nana so' a.

<sup>16</sup> Gaa ne cataj sí cu'naj Simón Pedró:

—Sí ca'née Diose tinanii man yuvii rihaan sayuun mé so', ne ta'nij Diose sí vaa i'na' ya mé so' ei —taj so' rihaan Jesucristó a.

<sup>17</sup> Gaa ne cataj Jesucristó rihaan Pedró a:

—Qui'yaj uxrá Diose se luj che'é so', Simón ta'nij sí cu'naj Jonás á.

'O se nuveé nana cataj xna'anj yuvii rihaan so' me nana ca'mii so' cuano ma'. 'O se Réé 'unj síi nicun' xta' me síi racuíj mán so' narí' so' nana yo' nanj adonj. <sup>18</sup> Ne cuano nihánj me se cataj xna'anj 'unj rihaan so' se vaa ya Pedró cu'naj so', che'é se ase vaa yuvej ne tacóo ve' ro', vaa so', ne síi nucuaj ndo'o nimán mé so' ei. Che'é dan, ase vaa 'yaj nii une' nii ve' xráa yuvej ro', danj gaa qui'yáj, cune' 'unj man nij síi noco' manj, se vaa guun nucuaj rá nij so' mán so', ne nica' yu'unj so' man nij so', qui'yáj nanj adonj. Ne se cavi' nu' soj sij noco' manj a ma'. 'O se gaa i'na' soj nu' cavii nu' ca'anj nanj adonj. <sup>19</sup> Ne cune' 'unj mán so' se vaa guún so' síi qui'yaj cayáan yuvii ga Diose asa' guun chij Diose rihaan chumii nihánj, ne naj guun rasuun cataj xna'anj so' se vaa ne nó xcúún yuvii qui'yaj yuvii me se veé danj ma'an Diose na'vej qui'yaj yuvii danj ma'. Ne naj guun rasuun cataj xna'anj so' se vaa ca'vee qui'yaj yuvii me se veé danj ma'an Diose a'vej qui'yaj yuvii danj adonj. —Inanj danj ca'mii Jesucristó rihaan síi cu'naj Pedró a.

<sup>20</sup> Gaa ne cataj xna'anj Jesucristó rihaan nij síi tucu'yón se-nana so' se vaa se nata' nij so' rihaan a 'ó yuvii se vaa síi ca'née Diose tinanii man yuvii rihaan sayuun me so', taj so' a.

*Nana nihánj taj xna'anj se vaa cataj xna'anj Jesucristó se vaa cavi' so', ne cunu i'na' uún so' a*

<sup>21</sup> Dan me se güii yo' guun che'e Jesucristó cataj xna'anj Jesucristó rihaan nij síi tucu'yón se-nana so' se vaa no xcúún so' cavii so' chuman' Jerusalén, ne quirán' ndo'o so' sayuun qui'yaj nij síi uun chij do', nij xrej ata suun noco'oj do', nij síi naqui'yaj cuu se-tucuanj Moisés rihaan nij yuvii do' a. Ne ticavi' nii man so', ne cachén va'nuj güii, gaa ne cunu i'na' uún so', cataj so' a. <sup>22</sup> Gaa ne quirii yaníj síi cu'naj Pedró man Jesucristó, ne guun che'e so' cataj so'

se vaa ne nó xcúún Jesucristó ca'mii Jesucristó danj a. Ne cataj Pedró:

—Cunu 'ee rá Diose mán so', Señor. Daj chihaa míj se quirán' so' danj ma' —taj Pedró rihaan Jesucristó a.

<sup>23</sup> Gaa ne canicaj Jesucristó, ne ca'mii so' rihaan Pedró a:

—Naxuun so' mán so' rihanj á. Na'vej raj quene'enj mán so' ma'. 'O se ase tu'va síi chree síi cu'naj Satanás ro', danj tu'vá so', ne aráan so' chrej rihanj cunoj rihaan Diose ei. Danj tu'vá so', che'é se ne acaj so' cuentá daj me rá Diose adonj. Maan se inanj acaj so' cuentá daj me rá yuvii nanj adonj —taj Jesucristó rihaan síi cu'naj Pedró yo' a.

<sup>24</sup> Gaa ne cataj Jesucristó rihaan nij síi tucu'yón se-nana so' a:

—Sese me rá yo'o so' canoco' so' manj, ne se guun rá so' qui'yaj so' se vaa me rá ma'an so' qui'yaj so' ma'. Ne ca'vee se quirán' uxrá so' sayuun do', ca'vee se ndaa cachron nii man so' rihaan rcutze do', tzaj ne yo'o qui'yaj suun so' che'ej, ne yo'o canoco' raan so' manj adonj. <sup>25</sup> Tzaj ne sese vaa 'o síi me rá tinanii man ma'an rihaan sayuun, ne vaa güii yo'o cavi' nimán so' adonj. Tzaj ne sese cavi' yo'o so' che'é se vaa me so' síi noco' manj, ne vaa güii cunu i'na' uún so' adonj. <sup>26</sup> Ne a me se quirii 'o so' sese qui'yaj canaan so' nu' rasuun man rihaan chumii nihánj ne ca'anj ni'ya nimán so', rá soj ga. Daj chihaa míj se ca'vee cavii sa' so', qui'yaj rasuun man rihaan chumii nihánj a ma'. Tzaj ne ca'vee se navij nu' si'yaj yo'o so' rihaan chumii nihánj, tzaj ne sese gaa i'na' nimán so' nu' cavii nu' ca'anj, ne quinano rá so', rá soj na'. Daj chihaa míj se quinano rá so' a ma'. 'O se cavii sa' uxrá so' nanj adonj.

<sup>27</sup> 'O se ya ya ca'na' 'unj sij ca'née Diose nica' yu'unj man yuvii, ne uxrá ve'é gaa 'unj, qui'yaj Réé 'unj, ne ca'na' nij se-mozó so' ga 'unj nanj adonj. Gaa ne naru'vee 'unj rihaan 'o 'o so' che'é suun qui'yaj suun 'o 'o so' nanj adonj. <sup>28</sup> Ya ya cataj xna'anj



'unj rihaan soj cuano se vaa xa' ta'aj soj sij nicun' nihánj cuano me se gaa ataa a cavi' ta'aj soj, ne ya quene'en ta'aj soj asa' ca'ná' 'unj guun chij 'unj rihaan chumij nihánj, ne quene'en ta'aj soj manj nanj adonj. Dan me se sí ca'née Diose nıcaj yu'unj man yuvij mej nanj adonj —taj Jesucristó rihaan nij sí tucu'yón se-nana so' a.

## 17

*Nana nihánj taj xna'anj se vaa chuguun ndo'o man Jesucristó ni'yaj nij sí tucu'yón se-nana so' a*

<sup>1</sup> Cachén vatan' güii, gaa ne nicaj Jesucristó man sí cu'naj Pedró do', sí cu'naj Jacobo do', tinúu Jacobo sí cu'naj Juan do', ca'anj so' raá 'o quij xcaan rej taj vaj a 'ó yuvij ne a. <sup>2</sup> Gaa ne yo'o cunuu ino cunudanj man Jesucristó ni'yaj nij sí tucu'yón se-nana so', ne dan me se chuguun ndo'o rihaan so', ne ase vaa chuguun güii ro', danj chuguun rihaan so' nanj á. Ne nuu catzıi ndo'o sagan' so', ne ase vaa ya'an chuguun vaa sagan' so' a. <sup>3</sup> Gaa ne naqui'yaa sí cu'naj Moisés sí cane gaa naá ga sí cu'naj Elías sí cane gaa naá rihaan nij so', ne nanó roj so' cuentó ga Jesucristó a. <sup>4</sup> Gaa ne cataj Pedró rihaan Jesucristó a:

—Cunaj uxrá vaa mán nıj nihánj ga so', Señor. Sese me rá so', ne qui'yáá 'unj va'nıj ve' yacataj canı soj nanj á. 'O ve' canı so', ne yo'ó ve' canı sí cu'naj Moisés, ne yo'ó ve' canı sí cu'naj Elías ei —taj Pedró rihaan Jesucristó a.

<sup>5</sup> Ataa quisij ca'mii Pedró, ne ca'na' 'o ngaa chuguun ndo'o, ne caráan ngaa chuguun yo' man taran' nij so' a. Gaa ne Diose ro', ca'mii nana cuno nij so' rque ngaa yo', ne cataj Diose:

—Sí nihánj me ta'nıj adonj. 'Ee raj man so', niha' raj ni'yaj 'unj man so' adonj. Cuno soj rihaan so' ei —taj Diose cuno nij so' a.

<sup>6</sup> Dan me se cuno nij sí tucu'yón se-nana Jesucristó nana yo', gaa ne ca'anj quinaj nij so' rihaan yo'óo, ne cuchu'vi' ndo'o nij so' a. <sup>7</sup> Gaa ne

cuchi' Jesucristó rihaan nij so', ne cuta' ra'a so' xráá nij so', ne cataj so':

—Canicun' caya soj, ne se cuchu'vi' soj ma' —taj so' a.

<sup>8</sup> Gaa ne naxcaj rihaan nij so' ni'yaj nij so', ne daj orún' Jesucristó nicun', quene'en nij so' nanj adonj.

*Nana nihánj taj xna'anj se vaa ase vaa sí cu'naj Elías ro', danj vaa sí cu'naj Juan sí cuta' ne man yuvij a*

<sup>9</sup> Gaa ne gaa nanij nij so' tacóo quij yo' me se ca'ne' Jesucristó suun rihaan nij so', cataj so':

—Se nata' soj rihaan a 'ó yuvij che'é se vaa quene'en soj cuan' ma'. Yo'o dınj gaa tu'va soj che'é se vaa quene'en soj á. Ndaa quisij cavi' 'unj ne cunuu i'na' uún 'unj, gaa ne ca'vee nata' soj se vaa quene'en soj daj quirán' 'unj sij ca'née Diose nıcaj yu'unj man yuvij nanj adonj —taj Jesucristó rihaan nij so' a.

<sup>10</sup> Gaa ne xná'anj nij sí tucu'yón se-nana so' man so', cataj nij so':

—Me che'é taj nij sí naqui'yaj cu se-tucuanj Moisés rihaan yuvij se vaa asino ca'na' sí cu'naj Elías sí nata' se-nana Diose gaa naá, gaa ne ca'vee ca'ne' Diose cacun' che'é yuvij ga —taj nij sí tucu'yón se-nana Jesucristó, xná'anj nij so' man Jesucristó a.

<sup>11</sup> Gaa ne cataj Jesucristó:

—Ya a'mii nij sí naqui'yaj cu se-tucuanj Moisés, taj nij so' se vaa asino ca'na' sí cu'naj Elías, gaa ne naqui'yaj sa' so' nu' rasuun adonj.

<sup>12</sup> Tzaj ne cuano nihánj me se cataj xna'anj 'unj rihaan soj se vaa aj ca'na' sí cu'naj Elías yo', tzaj ne ne cuno nij yuvij rihaan so' ma'. Maan se qui'yaj ya nij yuvij ndaa vaa me rá ma'an nij yuvij man so' nanj adonj. Ne nda' se sij ca'née Diose nıcaj yu'unj man yuvij mej, tzaj ne ase vaa quiran' so' sayuun qui'yaj nij yuvij ro', danj inanj quirán' 'unj sayuun qui'yaj uún nij yuvij nanj adonj —taj Jesucristó a.

<sup>13</sup> Gaa ne xcaj nij sí tucu'yón se-nana Jesucristó cuentá se vaa ca'mii Jesucristó che'é sí cu'naj Juan

sí cuta' ne man yuvij cataj Jesucristó se vaa sí nacaj se-suun sí cu'naj Elías me sí cu'naj Juan yo' a.

*Nana nihánj taj xna'anj se vaa nahuun sa' 'o xnii nuu nana chree nimán, qui'yaj Jesucristó a*

<sup>14</sup> Gaa ne ca'anj nij so' rej vaj ndo'o yuvij, ne cuchí' 'o snó'o rihaan Jesucristó, gaa ne canicun' ruj so' rihaan Jesucristó, gaa ne cataj so':

<sup>15</sup> —Cunuu 'ee rá so' man ta'níj, Señor. 'O se quisnúú so', qui'yaj yavii, ne inanj naxru' so' rihaan ya'an, ne ran' ndo'o so' sayuun nanj adonj. Veé dan, ne inanj naxru' so' rque na uún, ne ne ni'yanj uxrá ran' so' ma'. <sup>16</sup> Ne ca'anj nicaj 'unj man so' rihaan nij sí tucu'yón se-nana so', tzaj ne taj se qui'yá' nahuun sa' so', qui'yaj nij so' ma' —taj snó'o yo' a.

<sup>17</sup> Gaa ne cataj Jesucristó:

—Dan me se sí ne amán rá me soj sij man rihaan chumij nihánj cuano, ne chí'ii vaa nimán soj, ne a me daj cachej ga soj, ne a me daj gaa naj nimanj ni'yaj 'unj man soj, gaa ne ca'vee qui'yaj canaán soj ga. Nicaj soj man xnii ca'na' soj rihanj cuaj á —taj Jesucristó a.

<sup>18</sup> Gaa ne ca'ne' Jesucristó suun rihaan nana chree nuu nimán xnii se vaa tanáj so' man xnii yo' a. Gaa ne curihanj so' nimán xnii, ca'anj so', ne veé maan orá dan nahuun sa' xnii yo' a.

<sup>19</sup> Gaa ne cuchí' inanj nij ma'an nij sí tucu'yón se-nana Jesucristó rihaan Jesucristó, ne xná'anj nij so' man so', cataj nij so':

—Me che'é ne guun nucaj núj ca'vee quirii núj man nana chree yo' nimán xnii ga —cataj nij so', xná'anj nij so' man Jesucristó a.

<sup>20</sup> Gaa ne cataj Jesucristó:

—Che'é se doj amán rá soj, che'é dan ne ca'vee guun nucaj soj ei. Tzaj ne ne'en soj se vaa caán man raá cuêj mostazá xlá, ne nda' se tzin' vaa yo', tzaj ne asa' achij yo', ne ase vaa caán chruun chí' ndo'o ro', vaa yo' ei. Ne ase vaa caán cuêj mostazá xlá yo' ro',

danj gaa ma'an soj á. Ya ya cataj xna'anj 'unj rihaan soj se vaa sese ya amán rá soj ne sese cataj soj rihaan 'o qui se vaa curihanj qui yo' rej nicun' yo' ne natuna qui yo' rej nicun' qui yo', ne sese ya ya cuchuman rá soj se vaa ca'anj qui yo', ne cavii qui yo' rej nicun' yo', ne ca'anj yo' níchrej ei. Ne guun nucaj soj qui'yaj soj cunudanj nanj adonj. <sup>21</sup> Ne nana chree vaa danj ro', se ca'vee qui'yaj ní' curihanj nij so' nimán yuvij sese ne achín ni'yaj ndo'o ní' rihaan Diose ne sese ne toco' ní' x'naa man ma'an ní' che'é se aráj guee ní' rihaan Diose a —taj Jesucristó rihaan nij so' a.

*Nana nihánj taj xna'anj se vaa cataj xna'anj uún Jesucristó se vaa caví' so' ne cunuu i'na' uún so' a*

<sup>22</sup> Dan me se cunuu chre' uún taran' nij so' estadó Galilea, gaa ne cataj Jesucristó rihaan nij sí tucu'yón se-nana so' a:

—'O se sí ca'née Diose nicaj yu'unj man yuvij mej, ne vaa güii nago' nii manj rihaan yuvij adonj. <sup>23</sup> Dan me se ticaví' nij yuvij manj, gaa ne cachén va'núj güii, gaa ne cunuu i'na' uún 'unj nanj adonj —taj Jesucristó a.

Gaa ne quinanó ndo'o rá nij sí tucu'yón se-nana so' a.

*Nana nihánj taj xna'anj me che'é ne nó xcúún Jesucristó go' so' puextó che'é nuvíi a*

<sup>24</sup> Catúj nij so' chuman' Capernaum, gaa ne cuchí' nij sí ca'néj puextó che'é nuvíi rihaan sí cu'naj Pedró, ne xná'anj nij so' man Pedró, cataj nij so':

—Sí tucu'yón nana rihaan soj ro', o' so' puextó che'é nuvíi na' —taj nij so' a.

<sup>25</sup> —O' so' ei —taj Pedró rihaan nij so' a.

Gaa ne catúj Pedró rá ve', tzaj ne aj ne'en Jesucristó se vaa me rá Pedró xná'anj Pedró sese ya o' Jesucristó puextó che'é nuvíi a. Che'é dan asino Jesucristó xná'anj man Pedró, cataj so':

—Daj uun rá so', ga Simón'. Nij sí nicaĵ suun rey uun chij rihaan yuviĵ mañ rihaan chumiĵ nihánĵ me se me sí a'néĵ nij so' puextó rihaan ga. Rihaan ma'an ta'níĵ nij so' na'. Ase rihaan yo'ó yuviĵ xa' —taj Jesucristó, xná'anĵ so' man Pedró a.

<sup>26</sup> —Rihaan yo'ó yuviĵ adonĵ —taj Pedró rihaan Jesucristó a.

Gaa ne cataĵ Jesucristó:

—Che'é dan taj che'é go' ta'níĵ sí nicaĵ suun puextó ma'. Ne ase vaa sí nicaĵ suun vaa Réé 'unĵ Diose, ne rii ta'nga' so' rihaan nuvíĵ, ne che'é dan ne nó xcúnĵ goĵ puextó che'é nuvíĵ ma'.

<sup>27</sup> "Tzaj ne se guun ca'maan rá nij sí a'néĵ puextó che'é nuvíĵ, qui'yaj ní' ma'. Che'é dan ca'anĵ so' tu'va na lacuaná, ne tagüéĵ so' 'o aga' ata'aa xcuaj rque na, ne quita'aa so' xcuaj cano aga' asino yaan á. Gaa ne nuxra' so' tu'va xcuaj yo', ne quirĵ so' sa'anĵ aga' estatero tu'va xcuaj yo', ne go' so' sa'anĵ yo' che'é ní' rihaan nij sí a'néĵ puextó á —taj Jesucristó a.

## 18

*Nana nihánĵ taj xna'anĵ me sí me sí guun chij doj asa' guun chij Diose rihaan chumiĵ nihánĵ a*

<sup>1</sup> Veé maan orá dan cuhi' nij sí tucu'yón se-nana Jesucristó rihaan so', ne xná'anĵ nij so' man so' a:

—Ne me sí me sí guun chij doj asa' guun chij Diose rihaan chumiĵ nihánĵ ga —taj nij so' a.

<sup>2</sup> Gaa ne canacúun Jesucristó ca'na' 'o ne'ej rihaan so', ne cachrón so' man ne'ej yo' tanuĵ nij sí tucu'yón se-nana so', <sup>3</sup> ne cataĵ so':

—Ya ya cataĵ xna'anĵ 'unĵ rihaan soĵ cuano se vaa no xcúun soĵ nuchran' nimán soĵ, ne ase vaa ne'ej nihánĵ ro', danĵ gaa soĵ á. Sese na'veĵ rá soĵ qui'yaj soĵ danĵ, ne daj chihaa míĵ se cayáan soĵ ga Diose asa' guun chij Diose rihaan chumiĵ nihánĵ a ma'.

<sup>4</sup> Dan me se sese naqui'yaj nica' yo' o so' nimán so', ne sese ase vaa nimán ne'ej nihánĵ danĵ gaa nimán so', ne

so' me sí guun chij doj asa' guun chij Diose rihaan chumiĵ nihánĵ nanĵ adonĵ.

*Nana nihánĵ taj xna'anĵ daj quiran' sí qui'yaj chi'ii nimán 'o sí nica' nimán sí cuchumán rá ni'yaj man Jesucristó a*

<sup>5</sup> "Ne me ma'an 'o sí aráj cochroj ne a'mii sa' ga 'o ne'ej nihánĵ che'ej, ne adi' ma'anĵ me aráj cochroj ne a'mii sa' so' ga vaa nanĵ adonĵ. <sup>6</sup> Dan me se me ma'an 'o sí qui'yaj chi'ii nimán 'o sí le'ej amán rá ni'yaj manĵ, ne ca'vee a doj cavii sa' sí qui'yaj danĵ sese toco' nii 'o yuveĵ xij váj 'núú trigó gaán chihá so' ne tagüéĵ nii man so' rque na ya'anĵ nanĵ adonĵ. Dan me se doj a sayuun quiran' so', sese qui'yaj chi'ii so' nimán 'o sí le'ej amán rá ni'yaj manĵ adonĵ. <sup>7</sup> Nique ndo'o nij sí mañ rihaan chumiĵ nihánĵ, che'é se vaa ya'núĵ uxrá rihaan nij so' canoco' nij so' chrej chi'ii ei. Ne inanj danĵ vaa chumiĵ nihánĵ, mañ ndo'o chrej chi'ii canoco' yuviĵ ei. Tzaj ne nique sí 'yaj anoco' yuviĵ chrej chi'ii yo' nanĵ adonĵ. 'O se daj chihaa míĵ se cavii sa' so' ma'.

<sup>8</sup> "Dan me se sese ra'á so' do', tacóo so' do', me rá qui'yaj cacun', ne táa a se ca'ne' so' man yo', gaa ne se gaa nanĵ ca'anĵ so' rihaan ya'an qui'yaj yo' ei. Taj se 'yaj sese taj vaj tacóo so' do', ra'á so' do', tzaj ne ca'vee cayáan so' ga Diose gaa ei. Tzaj ne sese quitaj ra'á so' do', tacóo so' do', ne qui'yaj nij yo' cacun', ne ca'anĵ so' rihaan ya'an, qui'yaj nij yo', ne dan me se yo' me se cunuĵ so' nu' cavii nu' ca'anĵ ei. <sup>9</sup> Veé danĵ uún sese me rá rlij rihaan so' qui'yaj yo' cacun', ne táa a se quirii so' man yo', ne sí rihaan canuĵ gaa so', tzaj ne ca'vee cayáan so' ga Diose gaa ei. Tzaj ne sese cunuĵ rlij rihaan so' ne qui'yaj yo' cacun', ne ca'anĵ so' rihaan ya'an, qui'yaj yo' ei.

*Nana nihánĵ taj xna'anĵ se vaa ve'é ndo'o tumé Diose man nij sí vaa nica' nimán sí noco' man so' a*

<sup>10</sup> "Cutumé soĵ man soĵ se cataĵ soĵ se vaa taj yu'vee nó yo' o tuvi' soĵ sí

nica' nimán ei. 'Q se cataj xna'anj 'un̄j rihaan soj cuano se vaa vaa se-mozó Réé 'un̄j sí nicun' xta' tumé man 'o 'o nij so' nan̄j adon̄j. Ne nigan̄j nicun' nij so' rihaan Réj, ne uno Réj nu' nana nata' nij so' rihaan Réj ei. <sup>11</sup> 'Q se xa' 'un̄j sij ca'neé Diose n̄icaj yu'un̄j man yuvī, tzaj ne ca'ná' 'un̄j che'é rej tinanī 'un̄j man nij sí ca'anj ni'ya rihaan sayuun a.

<sup>12</sup> "Tumé Diose man nij sí nica' nimán sí noco' man so', rá soj na'. Nihánj me cataj xna'anj 'un̄j rihaan soj á. Ne'en soj se vaa sese vaa 'o cientó daán yo'o so' matzinj, ne sese ca'anj ni'ya orún' matzinj yo', ne tanáj sí daan matzinj yo' man ca'anj chihaa xnu' ca'anj matzinj yo' raa quij, ne ca'anj so' nano' so' matzinj ca'anj ni'ya yo' ei. <sup>13</sup> Ne cataj xna'anj 'un̄j rihaan soj se vaa sese nari' so' daán so' matzinj, ne guun niha' uxrá rá so' nan̄j adon̄j. Doj tzin' gaa niha' rá so' che'é ca'anj chihaa xnu' ca'anj nij matzinj ne ca'anj ni'ya a. Tzaj ne che'é matzinj nari' uún so' doj a gaa niha' rá so' nan̄j adon̄j. <sup>14</sup> Dan me se ase vaa na'vej rá so' ca'anj ni'ya orún' daán so' matzinj ro', danj vaa na'vej rá Rej ní' sí nicun' xta' ca'anj ni'ya a 'o sí nica' vaa nimán sí noco' man so' nan̄j adon̄j.

*Nana nihánj taj xna'anj se vaa vaa suun rihaan ní' ca'mii ní' rihaan tinúú ní' che'é cacun' tumé tinúú ní' a*

<sup>15</sup> "Ne sese qui'yaj tinúú so' cacun' rihaan so', ne ca'anj orún' so' rihaan so', ne cataj xna'anj so' rihaan so' che'é cacun' tumé so' á. Ne sese cun̄o so' rihaan so', ne dan me se aj qui'yaj canaán so', ne yo'o canoco' tinúú so' man Diose ga so' vaa gaa nan̄j adon̄j. <sup>16</sup> Tzaj ne sese ne cun̄o so' rihaan so' ne n̄icaj so' yo'ó do', yavíj do', tinúú so' ca'anj so' rihaan tinúú so' sí tumé cacun' yo', ne ndaa síj, gaa ne canicun' vij va'n̄uj soj sij cun̄o nana ca'mii so', gaa ne guun ya rá soj a. Sese 'o cyaan gaa nana ca'mii vij va'n̄uj sí quene'en, ne ya vaa nana ca'mii nij so' a. <sup>17</sup> Ne sese ne cun̄o

sí tumé cacun' rihaan vij va'n̄uj nij tinuj nij soj, gaa ne ca'anj soj nata' soj rihaan taran' nij sí noco' man Diose yan̄j chiháan soj á. Ne sese ne cun̄o so' rihaan taran' nij sí noco' man Diose, gaa ne guun yan̄j soj rihaan so' á. Dan me se ase vaa 'o sí yan̄j do', ase vaa 'o sí tiha' yu'un̄j che'é puextó do', danj gaa so' rihaan soj ei.

<sup>18</sup> "Cuan̄o nihánj me cataj yá 'un̄j rihaan soj se vaa a me ma'an rasuun se ca'vee qui'yaj yuvī rá soj, ne veé danj na'vej rá Diose qui'yaj yuvī uún a. Ne naj guun rasuun cataj soj se vaa ca'vee qui'yaj yuvī, ne veé danj gaa qui'yaj yuvī, rá ma'an Diose uún a. <sup>19</sup> Dan me se cataj uún 'un̄j rihaan soj, ne sese vaa vij soj me rá cachin̄j ni'yaj rihaan Réj sí nicun' xta', ne cachin̄j ni'yaj soj se vaa achiin rihaan soj, ne rque so' man soj se vaa achiin man soj a. <sup>20</sup> Ése me rej ma'an nuu chre' 'o vij sí noco' manj cachin̄j ni'yaj nij so', ne veé danj nicun' ma'anj ga nij so' a —taj Jesucristó a.

*Nana nihánj taj xna'anj se vaa no xcúún ndo'o ní' caraa x'naa ní' che'é tinúú ní' a*

<sup>21</sup> Gaa ne cuchi' sí cu'naj Pedró rihaan Jesucristó, ne xná'anj so' man so', cataj so':

—Me daj nó xcúnj caraa x'naj che'é tinúj sí qui'yaj chi'ii manj ga. Chij ya caraa x'naj na' —taj Pedró, xná'anj so' a.

<sup>22</sup> Gaa ne cataj Jesucristó rihaan so' a:

—Ne ne'en uxrá so' á. 'Q se naj guun cacun' qui'yaj tinúú so', ne yo'o caraa x'naa nigan̄j so' che'é tinúú so' nu' cavii nu' ca'anj nan̄j adon̄j. <sup>23</sup> Dan me se ase vaa 'o sí n̄icaj suun rey ro', danj gaa Diose asa' guun chij Diose rihaan chumij nihánj adon̄j. Dan me se sí n̄icaj suun rey yo' me se 'o güii, ne guun rá so' nachin' so' sa'anj man nij se-mozó so' a. <sup>24</sup> Dan me se guun che'e so' ca'nee so' sa'anj vaa xcúún, ne asino yaan n̄icaj nii man 'o sí 'yaj xcúún que'ee millón peso ca'na' nii rihaan sí n̄icaj suun rey yo' a. <sup>25</sup> Ne taj yan vaj a doj sa'anj n̄icaj sí 'yaj



xcúún yo' narque so' rihaan rey a ma'. Che'é dan cataj xna'anj sí nicaj suun rey yo' se vaa cane' mozó cane' nicaj mozó cane' ta'níi mozó cane' nu' si'yaj mozó cane', gaa ne nari' rey se-sa'anj rey, taj rey a. <sup>26</sup> Gaa ne canicun' ruj mozó yo' rihaan sí nicaj suun rey yo', ne cachíin ni'yaj uxrá so', cataj so': "Caraa x'naa uxrá so' doj, ne vaa güii narquej cunudanj sa'anj mán so', sí chij", taj se-mozó so' rihaan so' a. <sup>27</sup> Gaa ne cunuu 'ee rá sí nicaj suun rey ni'yaj so' man se-mozó so', ne ca'néj so' xcúún xráá mozó yo', ne ca'ne' rá so', ca'anj uun mozó yo', qui'yaj so' a.

<sup>28</sup> "Veé dan, gaa ne curihanj mozó yo', ca'anj so', gaa ne nari' tuvi' so' ga yo'ó mozó 'yaj suun rcua'aan ga so', gaa ne yo'ó mozó yo' me sí qui'yaj xcúún doj peso' rihaan mozó caráj x'naa rey a. Gaa ne quita'aa so' man tuvi' so' mozó yo', ne cataj so': "Narque so' nu' se vaa 'yaj xcúún so' rihanj cuaj vij", taj so' rihaan tuvi' so' a. <sup>29</sup> Gaa ne canicun' ruj yo'ó mozó yo' rihaan tuvi' so' sí nachin' xcúún yo', gaa ne cataj so': "Caraa x'naa so', ne vaa güii, ne narquej sa'anj mán so' ei", taj mozó yo' rihaan tuvi' so' a. <sup>30</sup> Tzaj ne ne ca'vej rá so' caraa x'naa so' rihaan tuvi' so' mozó yo' a ma'. Maan se ca'anj so', ne caxrój so' taga' man tuvi' so', ne ndaa se narque ya tuvi' so' nu' se vaa 'yaj xcúún yo' rihaan so', gaa ne ca'ne' rá so' a.

<sup>31</sup> "Veé dan, gaa ne quene'en yo'ó nij se-mozó sí nicaj suun rey daj qui'yaj sí caxrój taga' man tuvi', ne nanó ndo'o rá nij so' che'é sí 'nij taga' yo' a. Che'é dan cuchi' nij so' rihaan sí nicaj suun rey yo', ne nata' nij so' cunudanj rihaan rey a. <sup>32</sup> Gaa ne ca'néé sí nicaj suun rey yo' nana rihaan mozó caxrój taga' man tuvi' se vaa ca'na' so' rihaan so' a. Dan me se ca'na' so' rihaan rey, gaa ne ca'mii rey rihaan so' a: "Mozó chi'ij nimán mé so' ei. 'Unj me se ca'néj uun 'unj xcúún xráá so', che'é se cachíin ni'yáá so' rihanj a. <sup>33</sup> Ne ase vaa cunuu 'ee raj mán so' ro', danj vaa no' xcúún so'

cunuu 'ee rá so' man tuvi' so' mozó 'yaj suun ga so' adonj", taj so' rihaan se-mozó so' a. <sup>34</sup> Gaa ne ca'maan ndo'o rá sí nicaj suun, ne tacuachén sí nicaj suun man mozó yo' rihaan sí 'nij ra'a taga', ne naqui'yaj naca sí nicaj suun yo' xcúún xráá mozó, ne cataj xna'anj so' se vaa se curihanj mozó yo' taga' ndaa naru'vee ya so' nu' se vaa qui'yaj xcúún so', gaa ne curihanj so' a.

<sup>35</sup> "Ne ase vaa qui'yaj sí nicaj suun yo' ro', ta'nga' danj qui'yaj uún Réj sí nicun' xta' che'é soj, sese na'vej rá soj caraa x'naa soj rihaan tinúú soj nanj adonj —taj Jesucristó a.

## 19

*Nana nihánj taj xna'anj se vaa ne nó xcúún yuvij quiri'ij yuvij man nica yuvij a*

<sup>1</sup> Gaa ne quisij ca'mii Jesucristó nana yo', gaa ne curihanj so' estadó Galilea, ne ca'anj so' ndaa rnej tu'va chráá cu'naj Jordán, ndaa estadó Judea a. <sup>2</sup> Ne canoco' uxrá yuvij man so', ne nahuun sa' nij sí ran', qui'yaj so' a.

<sup>3</sup> Gaa ne cuchi' doj sí fariseo rihaan Jesucristó, ne me rá nij so' cuta' nij so' cacun' xráá Jesucristó che'é nana ca'mij Jesucristó a. Che'é dan xná'anj nij so' man Jesucristó, cataj nij so':

—Sese ne chihan' 'yaj chana nica yo'ó snó'o, rá snó'o yo', ne no' xcúún so' quiri'ij so' man no' na' —taj nij so' a.

<sup>4</sup> Gaa ne cataj Jesucristó:

—Aj nayaa soj nana no' rihaan danj Diose nana taj se vaa asij qui'yaj Diose chumij, ne qui'yaj Diose snó'o, ne qui'yaj Diose chana, ne vij roj so' me yuvij, qui'yaj Diose a. <sup>5</sup> Ne vaa yo'ó nana taj: "Che'é dan tanáj snó'o man rej so' do', man nii so' do', ne ve'é nacaj snó'o man chana nica so', ne ase vaa orún' yuvij ro', danj gaa roj so' adonj". Danj taj danj Diose a.

<sup>6</sup> Dan me se nuveé vij ran' yuvij me roj so' asij xcaj tuvi' roj so' a ma'. 'Q se ase vaa orún' yuvij ro', vaa roj so' nanj adonj. Dan me se ma'an Diose

qui'yaj xcaj tuvi' roj so', ne che'é dan ne nó xcúún a 'ó yuvii ca'ne' tanuú yuvii man roj so' ma' —taj Jesucristó rihaan nij síi fariseo yo' a.

<sup>7</sup> Gaa ne cataj nij síi fariseo:

—Che'é dan, me che'é cataj xna'anj Moisés se vaa naxcaj snó'o 'o yanj cataj xna'anj se vaa quiri'ij so' chana nica so', ne ca'vee quiri'ij so' man no' ga —taj nij so' a.

<sup>8</sup> Ne cataj Jesucristó rihaan nij so' a:

—Che'é se nichraj ndo'o nimán soj ro', che'é dan cataj xna'anj Moisés rihaan soj se vaa naxcaj soj yanj yo', ne quiri'ij soj nica soj a. Tzaj ne asij guun che'e Diose qui'yaj Diose man yuvii, ne ne vaa danj ma'. <sup>9</sup> Cuanó nihánj me se cataj xna'anj 'unj rihaan soj se vaa sese ne cotoj chana nica yo'o so' ga yo'ó chii, ne sese ri'ij rma'an so' man chana yo' ne xcaj so' man yo'ó chana, ne síi tumé ndo'o cacun' me ma'an so' nanj adonj. Veé ase vaa síi cotoj ga naj guun chana ro', vaa so' rihaan Diose nanj adonj —taj Jesucristó rihaan nij so' a.

<sup>10</sup> Gaa ne cataj nij síi tucu'yón se-nana Jesucristó rihaan so':

—Sese ne nó xcúún snó'o quiri'ij so' man chana nica so', ne taj che'é xcaj snó'o man chana ma'. Maan se sa' doj cavii síi ne un adonj —taj nij so' a.

<sup>11</sup> Gaa ne cataj Jesucristó:

—Nuveé tucuanj canoco' cunudanj yuvii me nana ca'mii soj ma'. Maan se doj vaa nij yuvii canoco' tucuaán yo', qui'yaj Diose nanj ei. <sup>12</sup> Dan me se vaa síi asij ca'ngaa so', danj na'vej rá so' xcaj so' man chana, tzaj ne vaa yo'ó so' uún, ne gaa me so' xnii, ne ta'aj nij síi xcoj ruvaa rá ne ma'an nij so' naqui'yaj capuú man ta'aj xnii, ne gaa achij xnii, gaa ne na'vej rá so' xcaj so' man chana gaa a man adonj. Dan me se vaa yo'ó so' uún, ne ca'vee nanj xcaj so' chana, tzaj ne maan se noco' ndo'o so' man Diose, ne me ndo'o rá so' guun chij Diose rihaan chumii nihánj, ne 'yaj suun ndo'o so', ne ne vaa ya'núj rihaan so' xcaj so' chana, rá so', gaa ne che'é dan na'vej inanj rá

ma'an so' xcaj so' chana a man adonj. Sese guun nucuaj yo'o so' canoco' so' tucuaán yo', ne ve'é canoco' so' tucuaán yo' nanj adonj —taj Jesucristó a.

*Nana nihánj taj xna'anj me che'é caran'rá Jesucristó ni'yaj so' man ne'ej a*

<sup>13</sup> Gaa ne nicaj nij yuvii man nij ne'ej ca'na' nij yuvii rihaan Jesucristó a. Me rá nij yuvii cuta' Jesucristó ra'a so' raa nij ne'ej, ne cachinj ni'yaj so' rihaan Diose che'é nij ne'ej yo' a. Tzaj ne cataj xna'anj nij síi tucu'yón se-nana Jesucristó rihaan nij yuvii se vaa ne nó xcúún nij ne'ej ca'na' nij ne'ej rihaan Jesucristó, taj nij so' a.

<sup>14</sup> Tzaj ne cataj Jesucristó:

—Ca'ne' rá soj ca'na' nij ne'ej rihanj á. Se caráán soj chrej rihaan nij ne'ej mei. 'O se tucua' nij síi vaa danj ro', me rej yanj Diose uun chij Diose nanj adonj —taj Jesucristó a.

<sup>15</sup> Gaa ne cuta' so' ra'a so' raa nij ne'ej, gaa ne curihanj so' rej yo' a.

*Nana nihánj taj xna'anj che'é yo'o síi me rá cayáán ga Diose nu' cavii nu' ca'anj a*

<sup>16</sup> Dan me se cuchi' yo'o síi tachruu yo' rihaan Jesucristó, ne xná'anj so' man Jesucristó, cataj so':

—Me suun sa' qui'yaj sunj, ne ca'vee cayánj ga Diose nu' cavii nu' ca'anj, ga maestro' —taj so' a.

<sup>17</sup> Gaa ne cataj Jesucristó:

—Me che'é xná'anj so' manj che'é se sa' ga. 'O se orún' Diose vaa sa' á. Tzaj ne sese me rá so' cayáán so' ga Diose nu' cavii nu' ca'anj, ne cunó so' nij nana noco' ya ya nana cataj xna'anj Diose rihaan ní' á —taj Jesucristó a.

<sup>18</sup> —Me nana ga —taj síi tachruu yo', xná'anj so' man Jesucristó a.

Gaa ne cataj Jesucristó:

—Nana nihánj a: “Se ticaví' so' yuvii ma'. Se cotoj so' ga chana nica yo'ó yuvii ma'. Se qui'yaj ituu so' si'yaj yo'ó yuvii ma'. Se nanó so' cuentó ne che'é yuvii ma'. <sup>19</sup> Caraa cochróo so' rihaan rée so' do', rihaan níi so' do' á. Ase vaa 'ee rá so' man ma'an so' ro',

danj gaa 'ee rá so' man tuví' so' á." Yo' me nana cunó so' ei —taj Jesucristó rihaan sí tachruu yo' a.

<sup>20</sup> —Nu' nana yo' unoj adonj. Vaa yo'ó se vaa achiin qui'yáj na' —taj sí tachruu yo' rihaan Jesucristó a.

<sup>21</sup> Gaa ne cataj Jesucristó rihaan so' a:

—Sese me rá so' cunuu sa' inanj nimán so', ne cavii so' ca'anj so', ne cutu'vee so' nu' si'yáá so', ne sa'anj quirí' so' ro', caxrii so' ston nij sí nique, ne cumán ndo'o si'yáá so' rej xta', qui'yaj Diose nanj ei. Ne dan me se ca'na' so', ne canocó' so' manj, ca'anj ní' á —taj Jesucristó a.

<sup>22</sup> Dan me se cuno sí tachruu yo' nana cataj xna'anj Jesucristó rihaan so', ne ca'anj uun so', ne nanó ndo'o rá so' a. 'O se sí ru'vee me so', ne vaa ndo'o si'yaj so' a.

<sup>23</sup> Gaa ne ca'mii Jesucristó rihaan nij sí tucu'yón se-nana so', cataj so':

—Ya ya cataj xna'anj 'unj rihaan soj se vaa sayuun uxrá vaa quisij sí ru'vee cayáán sí ru'vee ga Diose asa' guun chij Diose rihaan chumii nihánj nanj adonj. <sup>24</sup> Dan me se ne'en soj se vaa sayuun ndo'o vaa cachén xcuu camelló rihaan yu'uj taj tacúún cúu nuvá, tzaj ne cuano nihánj me se cataj xna'anj 'unj rihaan soj se vaa ca'vee a doj cachén xcuu yo' yu'uj taj tacúún cúu nuvá, ndaa rá se vaa sí ru'vee, ne se guun cachén so' cayáán so' ga Diose asa' guun chij Diose rihaan chumii nihánj a ma' —taj Jesucristó a.

<sup>25</sup> Dan me se cuno nij sí tucu'yón se-nana Jesucristó nana ca'mii so', ne caráya'anj uxrá nij so', cataj nij so':

—Che'é dan me se me sí guun nucaj quinanii rihaan sayuun ga —taj nij so' a.

<sup>26</sup> Ni'yaj Jesucristó man nij so', ne cataj so':

—Se guun nucaj yuvii quinanii ma'an nij yuvii rihaan sayuun ma'. Sayuun uxrá vaa rihaan nij so' nanj adonj. Tzaj ne xa' Diose me se ne sayuun a doj vaa rihaan so' a ma'. Canó rasuun ca'vee qui'yaj so' nanj adonj —taj so' a.

<sup>27</sup> Gaa ne cataj Pedró rihaan Jesucristó a:

—Ne núj ga. Aj tanáj núj nu' si'yaj núj, ne canoco' núj mán so' á. Daj quirán' núj ga —taj Pedró, xná'anj so' a.

<sup>28</sup> Gaa ne cataj Jesucristó:

—Veé sí noco' manj me soj, ne sí ca'née Diose nicaj yu'unj man yuvii mej adonj. Ne ya ya cataj xna'anj 'unj rihaan soj se vaa asa' cunuu naca chumii nihánj, ne asa' guun che'ej cayánj gunj sí rii ta'nga' rihaan chumii nihánj, ne cayáán chuvij nij soj ca'ne' soj cacun' che'é chuvij nij x'ne' nij yuvii israelitá adonj. <sup>29</sup> Ne sí tanáj ve' tucúa tanáj tinúú tanáj ra'vij tanáj rej tanáj nii tanáj ta'níi tanáj yo'óo tanáj canoco' so' manj ro', uxrá doj rasuun quirí' uún so', ne cayáán so' ga Diose nu' cavii nu' ca'anj adonj.

<sup>30</sup> Tzaj ne que'ee nij sí guun chij ndo'o rihaan chumii nihánj ro', guun nij so' sí noco' ei. Ne que'ee nij sí ne guun chij rihaan chumii nihánj me se guun chij nij so', qui'yaj Diose nanj adonj.

## 20

*Cuentó nihánj taj xna'anj daj qui'yaj Diose naru'vee Diose rihaan taran' ní' sij 'yaj suun che'é so' a*

<sup>1</sup> "Ase vaa qui'yaj 'o sí to'oj rej man ndo'o coj chruj uvá ro', danj qui'yaj Diose asa' guun chij Diose rihaan chumii nihánj adonj. Dan me se sí to'oj yo' ro', rej taxrej curihanj so' nano' so' sí qui'yaj suun rihaan to'óo so' rej man coj chruj uvá yo' a. <sup>2</sup> Gaa ne yo'ó ca'mii so' ga nij sí qui'yaj suun rihaan to'óo so', se vaa 'o sa'anj denario go' so' che'é suun qui'yaj suun 'o 'o nij so' 'o güii, ne ca'née so' man nij so', qui'yaj suun nij so' rihaan to'óo so' a.

<sup>3</sup> "Gaa ne aga' uun curihanj uún sí to'oj yo', ca'anj so' rihaan yu'vee, gaa ne quene'en so' doj snó'o nicun' ma'an uun rihaan yu'vee, ne taj vaj suun rihaan nij so' a. <sup>4</sup> Gaa ne cataj so' rihaan nij so': "Ca'anj soj qui'yaj suun soj rihaan to'ój ei. Naru'vee

'unj rihaan soj che'é nu' suun qui'yaj suun soj ei", taj so' rihaan nij mozó a.

<sup>5</sup> Dan me se ca'anj nij snó'o yo' qui'yaj suun nij so' uún to'óo sí to'oj yo' a.

"Gaa ne caxuj do', aga' va'nuj do', curihañj uún sí to'oj yo', ne nari' so' doj sí qui'yaj suun rihaan to'óo so', ne ca'neé so' man nij so' qui'yaj suun nij so' rihaan to'óo so' uún a.

<sup>6</sup> "Gaa ne aga' 'un' curihañj uún sí to'oj yo', ne nari' so' doj sí nicun' ma'an rihaan yu'vee a. "Me che'é nicun' ma'an soj nu' güii nihánj ga. Taj vaj suun qui'yaj suun soj á", taj so', xná'anj so' man nij so' a. <sup>7</sup> "Maan se taj sí rqué suun man núj qui'yaj suun núj ma'", taj nij so' a. "Ca'anj soj qui'yaj suun soj rihaan to'ój ei", taj so' rihaan nij so' a.

<sup>8</sup> "Veé dan, gaa ne nichrun' cata' güii tu'va quij, gaa ne ca'ne' sí to'oj yo' suun rihaan se-mozó so' sí tumé sa'anj se vaa naru'vee so' sa'anj rihaan nij sí qui'yaj suun rihaan to'óo so' yo' a. "Canacunj so' ca'na' nij sí qui'yaj suun yo', ne naru'vee so' rihaan nij so' á. Asino yaan naru'vee so' rihaan nij sí catúj suun aga' 'un', gaa ne naru'vee so' rihaan nij sí catúj suun rej na'yaan á", taj so' rihaan sí tumé sa'anj yo' a.

<sup>9</sup> "Dan me se asino yaan ca'na' nij sí catúj naa aga' 'un' rihaan sí tumé sa'anj, ne 'o sa'anj denario quiri' 'o 'o nij so' a. <sup>10</sup> Gaa ne ca'na' nij sí catúj suun rej na'yaan rihaan sí tumé sa'anj yo' a. Nocoj doj sa'anj quiri' nij so', rá nij so', tzaj ne veé danj 'o sa'anj denario quiri' 'o 'o nij so' uún a. <sup>11</sup> Nicaj nij so' sa'anj, gaa ne guun che'e nij so' ca'maan rá nij so' ni'yaj nij so' sí to'oj yo', <sup>12</sup> gaa ne cataj nij so': "Sí nihánj me se orún' orá guee qui'yaj suun nij so', tzaj ne 'o cyaan naru'vee so' rihaan nij so' ga núj, ne qui'yaj suun núj nu' güii, ne go' uxrá naán xráá núj á", taj nij so' rihaan sí to'oj yo' a. <sup>13</sup> Gaa ne sí to'oj yo' cataj rihaan yo' o tuvi' nij mozó: "Ne ta'yunj man so', man tinuj. Maan se aj ca'mii ní' che'é se vaa qui'yaj suun

so' che'é 'o sa'anj denario che'é 'o güii a. <sup>14</sup> Nacaj so' sa'anj qui'yaj canaan so', ca'anj so' á. Maan se inañj me raj cyaan naru'vej rihaan soj nanj adonj. <sup>15</sup> Ne nó xcúnj qui'yaj se vaa rií nimanj, rá so' na'. Xcoj ruvaa rá so', che'é se qui'yaj se luj rihaan tuví' so' na'", taj sí to'oj yo' rihaan sí qui'yaj suun rihaan to'óo so' a.

<sup>16</sup> "Dan me se ase vaa qui'yaj sí to'oj yo' ro', danj qui'yaj uún Diose che'é nij sí 'yaj suun che'é Diose nanj adonj. Che'é dan nij sí ne guun chij rihaan chumij nihánj me se xta' ro', guun chij nij so' a. Ne nij sí guun chij ndo'o rihaan chumij nihánj me se xta' ro', guun nij so' sí noco', qui'yaj Diose nanj adonj —taj Jesucristó a.

*Nana nihánj taj xna'anj se vaa síj va'nuj cataj xna'anj Jesucristó se vaa cavi' so' ne cunuu i'na' uún so' a*

<sup>17</sup> Gaa ne cavii Jesucristó ca'anj so' chuman' Jerusalén, ne ca'anj chuvij nij sí tucuyón se-nana so' ga so', qui'yaj so' a. Veé asij vaj orún' cha'nuj nij so' ga Jesucristó chrej, ne ca'mii Jesucristó rihaan nij so', cataj so':

<sup>18</sup> —Nihánj me ca'anj ní' chuman' Jerusalén, ne quita'aa nii manj síj ca'neé Diose nicaj yu'unj man yuvij, ne nago' nii manj rihaan nij xrej ata suun nocoj doj do', rihaan nij sí naqui'yaj cuu se-tucuanj Moisés rihaan yuvij do' a. Ne cuta' nij so' cacun' xráj, ne cataj nij so' se vaa cavi' 'unj a. <sup>19</sup> Gaa ne nago' nij so' manj rihaan nij sí yaníj, ne ca'nga' nacoj nij sí yaníj quene'en nij so' manj, ne go' nij so' quartá xráj, ne cachron nij so' manj rihaan rcutze a. Gaa ne cachon va'nuj güii, gaa ne cunuu i'na' uún 'unj, qui'yaj Diose ei —taj Jesucristó a.

*Nana nihánj taj xna'anj se vaa cachún ni'yaj nii sí cu'naj Jacobo do', sí cu'naj Juan do', se vaa cata roj so' suun sa' doj qui'yaj Jesucristó a*

<sup>20</sup> Gaa ne cuchi' nii sí cu'naj Jacobo do', sí cu'naj Juan do', rihaan Jesucristó, ne ta'núí sí cu'naj Zebedeo me uún roj so' a. Dan me se cuchi' nij ta'nij no' rihaan Jesucristó, gaa ne



canicun' ruj no' rihaan Jesucristó, ne cataj no' se vaa vaa se cachinj ni'yaj no' rihaan so', rá no' a.

<sup>21</sup> —Me se achiin mán so' ga —taj Jesucristó, xná'anj so' man no' a.

Ne cataj no':

—Cataj xna'anj so' se vaa asa' guun chij so' rihaan chumij nihánj, ne quitaj roj ta'nij x'núú so', ne cata roj so' suun sa' doj qui'yáá so' á. Dan me se yo'o so' cayáán rej nuva' so', ne yo'ó so' cayáán rej nichruún so', ne quirij ta'nga' roj so' ga so', cataj so', raj a —taj chana yo' a.

<sup>22</sup> Gaa ne cataj Jesucristó rihaan roj tinuj roj so' a:

—Ne ne'en roj soj me rasuun cachíin ni'yaj roj soj rihanj nihánj a ma'. 'O se guun nucuj roj soj quirán' roj soj sayuun ndaa vaa quirán' 'unj na' —taj Jesucristó, xná'anj so' a.

—Guun nucuj rój nanj adonj —taj roj so' a.

<sup>23</sup> Gaa ne cataj Jesucristó:

—Ya ya quirán' soj sayuun gaj nanj á. Tzaj ne ne nó xcúnj cataj xna'anj 'unj me sí cayáán x'núú 'unj rej nuva' 'unj do', rej nichrunj do', ma'. Orún' Réj sí nicun' xta' cataj xna'anj me sí quirij ta'nga' gaj nanj adonj —taj Jesucristó a.

<sup>24</sup> Gaa ne cuno yo'ó chij' nij sí tucu'yón se-nana Jesucristó se vaa ca'mii roj tinuj roj so' rihaan Jesucristó, ne ca'maan rá nij so' ni'yaj nij so' man roj so' a. <sup>25</sup> Gaa ne canacúún Jesucristó man cunudanj nij so' se vaa ca'na' nij so' rihaan so', ne cataj so':

—Ne'en soj se vaa nij sí atá suun man rihaan chumij nihánj me se rii ta'nga' uxrá nij so' rihaan tuvi' nij so' nanj adonj. <sup>26</sup> Tzaj ne se gaa danj sca'núj nij soj a ma'. 'O se sese me rá nij soj guun chij' nij soj rihaan tuvi' nij soj, ne guun nij soj sí qui'yaj suun rihaan taran' tuvi' nij soj, <sup>27</sup> ne ase vaa mozó ro', danj gaa xa' nij soj rihaan taran' tuvi' nij soj nanj adonj. <sup>28</sup> Dan me se ca'néé Dióse manj nicaj yu'unj 'unj man yuvij, tzaj ne ne ca'na' 'unj ne guun nij yuvij mozó rihanj ma'.

'O se ca'ná' 'unj qui'yaj suun ma'anj rihaan nij yuvij nanj adonj. Ne ca'ná' 'unj nayon ma'anj rihaan yuvij ne cavi' 'unj che'é cacun' atá nij so', gaa ne cavi' sa' uxrá nij so', qui'yaj nanj adonj —taj Jesucristó a.

*Nana nihánj taj xna'anj se vaa naxra' rihaan vij sí tuchrij, qui'yaj Jesucristó a*

<sup>29</sup> Gaa ne cavij nij so' chuman' Jericó, ne cachéé ndo'o yuvij xcó Jesucristó a. <sup>30</sup> Ne vaa vij sí tuchrij ne tu'va chrej, ne cuno roj so' cuentó se vaa cachén Jesucristó rej ne roj so' a. Che'é dan caguáj roj so', cataj roj so':

—Ya ya ta'ní ta'nij si'no sí cu'naj David sí cane gaa naá mé so', Señor. Cunuu 'ee rá so' man rój ei —taj roj so' a.

<sup>31</sup> Tzaj ne:

—Dínj tu'va roj soj á —taj nij yuvij rihaan roj so' a.

Tzaj ne doj a nucuj caguáj roj so', cataj roj so':

—Ta'ní ta'nij si'no sí cu'naj David sí cane gaa naá mé so', Señor. Cunuu 'ee rá so' man rój ei —taj uún roj so' a.

<sup>32</sup> Gaa ne canicun' Jesucristó, ne canacúún Jesucristó man roj so' se vaa ca'na' roj so' rihaan so', ne cataj so':

—Daj qui'yaj man roj soj, rá roj soj ga —taj Jesucristó, xná'anj so' man roj so' a.

<sup>33</sup> —Cunuu sa' rihaan rój, rá rój, Señor —cataj roj so' a.

<sup>34</sup> Gaa ne cunuu 'ee rá Jesucristó man roj so', ne cuta' Jesucristó ra'a Jesucristó rihaan roj so', gaa ne veé maan orá dan cunuu sa' rihaan roj so' nanj adonj. Gaa ne ca'anj roj so' ga Jesucristó a.

## 21

*Nana nihánj taj xna'anj daj qui'yaj Jesucristó gaa catúj Jesucristó chuman' Jerusalén a*

<sup>1</sup> Gaa ne cuchi' Jesucristó cuchi' nij sí tucu'yón se-nana so' cuchi' tu'va chuman' cu'naj Betfagé a. Naj chuman' yo' tacóo quij cu'naj Quij man

Chruun Olivó, ne nichrun' naj chuman' Jerusalén ga chuman' cu'naj Betfagé yo' a. Gaa ne ca'née Jesucristó man vij tuvi' nij sí tucu'yón se-nana so' ca'anj roj so' rque chuman' yo', <sup>2</sup> ne cataj so' rihaan roj so' a:

—Catuj roj soj chuman' nihánj, chuman' naj rihaan ní, ne nari' nu' roj soj yo'o burró chana numii, ne vaa ta'níi xo' burró le'ej ya'anj nicun' ga xo' adonj. Nache roj soj man burró chana yo', ne nicaj roj soj man roj xo' ca'na' roj soj rihaan 'unj á. <sup>3</sup> Ne sese xna'anj nii man roj soj me che'é nache roj soj burró, ne cataj roj soj: “Síi 'nij ra'a man ní' achiin xcuu nihánj rihaan chuguanj”, cataj roj soj, gaa ne nu' ca'nej nij so' man roj xcuu ca'na' roj xcuu ga roj soj ei —taj Jesucristó rihaan roj so' a.

<sup>4</sup> Dan me se nu' yo' qui'yaj Jesucristó, qui'yaj guee so' ndaa vaa taj síi nata' se-nana Diose gaa naá a. Ne síi nata' yo' ro', cataj so': <sup>5</sup> “Dan me se cataj xna'anj soj rihaan nij síi man chuman' Jerusalén se vaa xcaj nij so' cuentá se vaa ca'na' síi guun chij rihaan nij so' adonj. Dan me se síi nicaj nimán me so', quitaj so' xraá burró a. Dan me se quitaj so' xraá ta'níi xcuu 'yaj suun nanj adonj”, taj síi nata' yo' a.

<sup>6</sup> Dan me se ca'anj roj síi tucu'yón se-nana Jesucristó, ne qui'yaj roj so' nu' ndaa vaa cataj xna'anj Jesucristó rihaan roj so' a. <sup>7</sup> Dan me se nicaj roj so' man roj ta'nij roj burró chana yo' ca'anj roj so' rihaan Jesucristó, ne cuta' roj so' yatzíj xraá roj xcuu, ne cavii Jesucristó a. <sup>8</sup> Ne que'ee nij yuvii cuchruj yatzíj sagan' nij yuvii rá chrej, ne ta'aj nij tuvi' nij so' ro', ca'ne' ra'a chruun, ne caraa nij so' rá chrej, cachee roj burró yo' rihaan yatzíj do', rihaan ra'a chruun do' a. <sup>9</sup> Ne man uxrá yuvii quitáa yaan rihaan Jesucristó, ne man uxrá yuvii noco' rej xco Jesucristó a. Ne caguáj nij yuvii, cataj nij yuvii:

—Caraa guee ní' rihaan ta'níi ta'nij si'no síi cu'naj David síi cane gaa naá

nanj á. Cunaj ndo'o vaa ca'na' síi ca'née síi 'nij ra'a man ní' adonj. Se luj ndo'o me 'yaj Diose che'é ní' á. Caraa guee ní' rihaan Diose síi nicun' xta' ei —taj nij yuvii, caguáj nij yuvii a.

<sup>10</sup> Dan me se catúj Jesucristó chuman' Jerusalén, ne caráya'anj taran' nij yuvii man chuman' yo', ne cataj nij so':

—Me síi atúj chuman' ga —cataj nij síi man chuman' Jerusalén, xna'anj nij so' man nij yuvii atúj chuman' Jerusalén a.

<sup>11</sup> —Síi nihánj me Jesucristó síi cavii chuman' Nazaret chuman' naj estadó Galilea, ne síi nata' se-nana Diose me so' adonj —taj nij yuvii catúj chuman' Jerusalén, ni'yaj nij so' man Jesucristó a.

*Nana nihánj taj xna'anj se vaa quirii Jesucristó man nij yuvii tu'vej rasuun man rá nuvií noco a*

<sup>12</sup> Gaa ne catúj Jesucristó rá nuvií noco, gaa ne quirii so' man taran' nij síi tu'vej rasuun do', man taran' nij síi quiránj rasuun man rá nuvií do' a. Ne tiguíj ra'a so' nij chruun mesá natuná nii sa'anj rihaan, ne tiguíj ra'a so' chruun xlá taj nij síi tu'vej cha'aan a. <sup>13</sup> Gaa ne ca'mii so' rihaan nij so', cataj so':

—Danj Diose taj se vaa tucua Diose rej na'víj yuvii rihaan Diose me nihánj á. Tzaj ne guun tucua síi ituu man tucua Diose nihánj, qui'yaj soj nanj á —taj Jesucristó a.

<sup>14</sup> Gaa ne catúj síi tuchrii catúj síi rengo catúj rá nuvií, ne nahuun sa' nij so', qui'yaj Jesucristó a.

<sup>15</sup> Ne man xnii catúj rá nuvií, ne caguáj nij xnii cataj nij xnii:

—Caraa guee ní' rihaan síi nihánj ta'níi ta'nij si'no síi cu'naj David síi cane gaa naá ei —taj nij xnii a.

Ne vaa xrej ata suun noco doj vaa síi naqui'yaj cuu se-tucuanj Moisés vaa, ne quene'en nij so' nu' suun sa' qui'yaj Jesucristó rá nuvií, ne cuno nij so' nana caguáj nij xnii a. Gaa ne ca'maan rá nij so', <sup>16</sup> ne cataj nij so':

—Unó so' nana aguáj xnii nihánj na'. Me che'é a'vej so' caguaj xnii danj ga —taj nij so', xná'anj nij so' man Jesucristó a.

Ne cataj Jesucristó:

—Unó 'unj ei. Me che'é na'vej rá nij soj ca'mii xnii danj ga. Ne ni'yaj soj, ne Diose ca'née nana vaa danj nimán xnii ca'mii xnii danj a. Me che'é ne nayaa nij soj nana no rihaan danj Diose ga. Ése gaa naá, ne ca'mii yo'o so' rihaan Diose, cataj so' se vaa ve'é ca'mii xnii do', ve'é ca'mii ne'ej utzii too do', rihaan Diose, qui'yaj ma'an Diose, taj nana no rihaan danj Diose a —taj Jesucristó rihaan nij so' a.

<sup>17</sup> Gaa ne tanáj Jesucristó man nij so', ne curihanj so' chuman' Jerusalén, ne ca'anj so' chuman' Betania, ne caran' so' 'o yan' a.

*Nana nihánj taj xna'anj se vaa canacoó 'o chruun man chruj higó, qui'yaj Jesucristó a*

<sup>18</sup> Rej ranga' cavii uún Jesucristó ca'anj so' chuman' Jerusalén, ne na'aan rque so' a. <sup>19</sup> Gaa ne quene'en so' 'o chruun man chruj higó nicun' tu'va chrej, ne ca'anj so' tacóo chruun yo', tzaj ne taj vaj a 'o chruj higó ne quirí' so' a ma'. Maan nanj coj uun táa raa chruun yo' a. Gaa ne ca'mii so' rihaan chruun yo', cataj so':

—Daj chihaa mij se cumán chruj raá so' ma' —taj Jesucristó a.

Ne nu' ca'mii so' ga chruun, ne maan orá dan canacoó chruun man chruj higó yo' a. <sup>20</sup> Gaa ne caráya'anj nij sí tucu'yón se-nana Jesucristó, quene'en nij so' se vaa quiran' chruun yo' a. Ne cataj nij so':

—Asa' ca'vee nu' nacoó chruun nihánj cuano ga —taj nij so', caráya'anj nij so' a.

<sup>21</sup> Gaa ne cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa sese se guun vij rá soj ne yo'o cuchuman rá soj, ne doj a qui'yaj soj vaa güii, se vaa qui'yáa 'unj man chruun nihánj a adonj. Dan me se cataj xna'anj nij soj rihaan quij xcaan

yo' se vaa curihanj quij rej nicun' qui ne ca'anj nij qui rque na ya'anj, ne ya ca'anj nij yo' rque na ya'anj, qui'yaj soj adonj. <sup>22</sup> Ne nu' se vaa cachinj ni'yaj soj rihaan Diose ro', rque Diose rihaan soj, sese ya ya cuchuman rá soj nanj adonj —taj Jesucristó a.

*Nana nihánj taj xna'anj se vaa xná'anj nii man Jesucristó me sí ca'ne' suun rihaan so' qui'yaj so' ndaa vaa 'yaj so' a*

<sup>23</sup> Gaa ne catúj Jesucristó rá nuví, ne tucu'yón so' nana man nij sí man rá nuví yo' a. Gaa ne cuchí' nij xrej ata suun nocoo doj do', nij sí uun chíj rihaan nij yuvii do', rihaan so', ne xná'anj nij so' man so', cataj nij so':

—Me sí ca'ne' suun rihaan so' qui'yáa so' ndaa vaa 'yáa so' ga —taj nij so' a.

<sup>24</sup> Gaa ne cataj Jesucristó rihaan nij so' a:

—Ne vaa yo'o nana xna'anj 'unj man nij soj, ne sese ya cataj xna'anj nij soj nana yo' rihanj, ne cataj xna'anj 'unj rihaan soj me sí ca'ne' suun rihanj a. <sup>25</sup> Dan me se me sí ca'ne' suun rihaan sí cu'naj Juan cuta' ne so' man yuvii, rá soj ga. Ma'an Juan cavii raa na'. Ase Diose cataj xna'anj rihaan so' xa'. Cataj xna'anj nij soj rihanj á —taj Jesucristó a.

Gaa ne nuchruj raa ndo'o nij so' ga tuvi' nij so', cataj nij so':

—Sese cataj ní' se vaa Diose ca'ne' suun rihaan sí cu'naj Juan cuta' ne so' man yuvii, ne cataj Jesucristó rihaan ní' me che'é ne cuchuman rá ní' nana ca'mii Juan, cataj so' a. <sup>26</sup> Tzaj ne sese cataj ní' se vaa nuveé sij ca'ne' Diose suun rihaan me sí cu'naj Juan, ne ca'maan rá nij yuvii, ne quiran' ní' sayuun, qui'yaj nij yuvii nanj á. 'O se nij yuvii me se sí ca'née Diose nata' se-nana Diose me sí cu'naj Juan, rá cunudanj nij yuvii nanj á —taj nij so' rihaan tuvi' nij so' a.

<sup>27</sup> Gaa ne cataj nij so' rihaan Jesucristó:

—Ne ne'en núj me sí ca'ne' suun rihaan sí cu'naj Juan cuta'ne so' man yuvii ma' —taj nij so' a.

—Che'é dan se cataj xna'anj 'unj rihaan nij soj me sí ca'ne' suun rihaan qui'yaj ndaa vaa 'yaj ma' —taj Jesucristó rihaan nij so' a.

*Nana nihánj me cuentó nanó Jesucristó che'é roj ta'níi 'o so' a*

<sup>28</sup> Gaa ne nanó Jesucristó cuentó nihánj cuno nij so' a:

—Ne daj vaa nana nihánj nana cataj xna'anj 'unj rihaan soj, rá soj ga. Vaa vij ta'níi 'o so' a. Ne cuchi' so' rihaan yo'o ta'níi so', cataj so': “Cuan' cavii so' qui'yaj suun so' rque naa chruj uvá, rej”, taj so' rihaan ta'níi so' a. <sup>29</sup> “Se ca'anj 'unj ma'”, taj xnii yo' rihaan rej so' a. Tzaj ne orá nii doj naqui'yaj nica' so' nimán so', ne ca'anj qui'yaj suun so' a. <sup>30</sup> Gaa ne cuchi' rej xnii rihaan yo'ó ta'níi so', ne cataj xna'anj so' se vaa ca'anj xnii yo', qui'yaj suun yo' a. “Ca'anj 'unj, ataj”, taj so' rihaan rej so' a. Tzaj ne ne ca'anj so' qui'yaj suun so', ne tiha' so' man rej so' a. <sup>31</sup> Ne me ta'níi snó'o yo' cuno sa' rihaan so', rá soj ga —taj Jesucristó, xna'anj Jesucristó man nij so' a.

—Xnii ca'anj qui'yaj suun ro', cuno ya so' rihaan rej so' ei —taj nij so' rihaan Jesucristó a.

Gaa ne cataj Jesucristó rihaan nij so' a:

—Ya ya cataj xna'anj 'unj rihaan nij soj cuano se vaa nij sí tiha' yu'unj man yuvii che'é puextó do', nij chana niha' rá ga chii do', quitaj yaan rihaan soj catuu nij so' rihaan Diose asa' guun chij Diose rihaan chumii nihánj, ne quinaj xco nij soj adonj. <sup>32</sup> 'O se cuchi' sí cu'naj Juan rihaan nij soj, ne tucu'yón so' rihaan nij soj daj qui'yaj soj cuno sa' soj rihaan Diose, tzaj ne ne cuchuman rá nij soj nana ca'mii so' ma'. Tzaj ne nij sí tiha' yu'unj man yuvii che'é puextó do', nij chana niha' rá ga chii do', cuchumán rá nana ca'mii Juan nanj adonj. Ne quene'en soj se

vaa cuchumán rá nij so', tzaj ne ne nuchran' nimán soj, ne ne cuchuman rá ma'an soj ma'.

*Nana nihánj me cuentó nanó Jesucristó che'é yuvii chí'ii 'yaj suun rihaan yo'ó a*

<sup>33</sup> Ne cuno uún nij soj yo'ó cuentó nihánj á. Dan me se vaa yo'o sí to'oj, ne chruj so' yo'o naa chruj uvá, ne qui'yaj so' chingá nu' anicaj tu'va naa yo', gaa ne gáan so' yu'uj rej xtun' chruj uvá ne cavii na, ne cune' so' 'o ve' nata' cayáan nij sí cutumé naa yo' a. Gaa ne tanáj so' man naa yo' rihaan sí qui'yaj suun naa yo', ne curihaan so' ca'anj so' gan' a. <sup>34</sup> Cachén doj yavii, ne quisij yavii cuta' nii chruj uvá, ne ca'née sí xnaa yo' man yo'ó ta'aj nij se-mozó so' rihaan nij sí nuu tumé xnaa so' a. Me rá so' ca'na' nica' yo'ó nij se-mozó so' doj chruj uvá rihaan ma'an so' a. <sup>35</sup> Gaa ne quita'aa nij sí nuu tumé naa man yo'ó nij mozó cuchi' uún a. Dan me se go' uxrá nij so' chruun xraá yo'o mozó yo', ne ticavi' nij so' man yo'ó mozó yo', ne go' uxrá nij so' yahij man yo'ó mozó yo' ne yuun che'e cavi' so' nanj adonj. <sup>36</sup> Gaa ne ca'née uún sí xnaa yo' man yo'ó danj mozó ca'anj uún rej naj xnaa so' a. Tzaj ne nij sí nuu tumé naa ro', yo'ó danj qui'yaj uún nij so' man uún nij sí cuchi' uún a. <sup>37</sup> Veé dan, gaa ne ca'née sí xnaa yo' ta'níi so' rej man nij sí nuu tumé xnaa so' a. “Caraa cochroj nij sí tumé naa rihaan ta'níj sese ca'anj ta'níj saj xee”, taj sí xnaa yo' a. <sup>38</sup> Tzaj ne quene'en nij sí tumé naa man ta'níi sí xnaa, ne cataj nij so': “Sí nihánj me sí guun sí xnaa naa nihánj vaa güii ei. Che'é dan ticavi' ní' man so', ne vaa güii, ne guun xnaa ma'an ní' man naa nihánj chuguanj”, taj nij so' rihaan tuvi' nij so' a. <sup>39</sup> Gaa ne quita'aa nij so' man ta'níi sí xnaa yo', ne quirii nij so' xe', ne ticavi' nij so' man ta'níi sí xnaa adonj. <sup>40</sup> Ne vaa güii, ne ca'na' uún sí xnaa yo', ne daj qui'yaj so' man nij sí nuu tumé xnaa so', rá nij soj



ga —taj Jesucristó, xná'anj so' man nij xrej do', man nij síi uun chij do' a.

<sup>41</sup> —Qui'yaj ndo'o síi xnaa yo' sayuun man nij síi chi'ii 'yaj suun xnaa so', ticavi' so' man nij so' nanj á. Ne tacuachén so' xnaa so' rihaan yo'ó síi tumé xnaa so', ne yavii cuta nii chruj uvá ro', ve'é rque nij so' chruj yo' rihaan síi xnaa yo' nanj adonj —taj nij so' rihaan Jesucristó a.

<sup>42</sup> Gaa ne cataj Jesucristó:

—Me che'é ne nayaá nij soj nana nihánj nana no rihaan danj Diose ga: “Yuvej quiri'ij nij síi cune' ve' ro', guun yuvej sa' doj rihaan cunudanj nij yuvej man tacóo ve' yo' nanj adonj. Ma'an síi 'nij ra'a man ní qui'yaj yo', ne cunaj uxrá vaa yo', rá ní á”, taj danj Diose a. <sup>43</sup> Che'é dan cuano nihánj me se cataj xna'anj 'unj rihaan nij soj se vaa ca'nee Diose se-suun soj suun guun chij ga Diose rihaan chumii nihánj, gaa ne cune' Diose man yo'ó yuvii se vaa guun chij yo'ó nij yuvii rihaan chumii nihánj ga so', ne ve'é qui'yaj yo'ó nij yuvii yo' nu' se vaa me rá Diose qui'yaj nij so' nanj á. <sup>44</sup> Ne yuvej yo' me se ase vaa yuvej yo' vaa 'unj, ne ase vaa yuvii tíxé yuvej yo' vaa yuvii na'vej rá cuno rihaan 'unj, ne uxrá quiran' nij so' sayuun nanj adonj. Ne ase vaa yuvii quini yuvej yo' xraá vaa nij yuvii qui'yáá 'unj sayuun man, ne yuun che'e quinavij nij so' nu' cavii nu' ca'anj nanj adonj —taj Jesucristó a.

<sup>45</sup> Dan me se cuno nij xrej ata suun nocoo doj cuno nij síi fariseo cuno cuentó nanó Jesucristó, ne quene'en nij so' se vaa che'e ma'an nij so' me cuentó nanó Jesucristó a. Ase vaa nij síi nuu tumé naa vaa ma'an nij so' ni'yaj Jesucristó, ne quene'en nij so' se vaa che'é dan nanó Jesucristó cuentó yo' a. <sup>46</sup> Gaa ne nanó rá nij so' daj gaa quita'aa nij so' man Jesucristó, tzaj ne cuchu'vi' nij so' ni'yaj nij so' man nij yuvii a. 'O se síi nata' se-nana Diose me Jesucristó, rá nij yuvii a.

## 22

*Nana nihánj me cuentó nanó Jesucristó che'é nij síi catuu rihaan Diose asa' guun chij Diose rihaan chumii nihánj a*

<sup>1</sup> Gaa ne ca'mii uún Jesucristó, nanó so' doj cuentó rihaan nij so', cataj so':

<sup>2</sup> —Ase vaa qui'yaj yo'o síi nicaj suun rey ro', danj qui'yaj uún Diose asa' guun chij Diose rihaan chumii nihánj ei. Dan me se síi nicaj suun rey yo' me se qui'yaj so' cha'anj che'é ta'nii so' síi nara'aa, <sup>3</sup> ne vaa yuvii navij rá cha'anj ga so', ne ca'neé so' se-mozó so' ca'anj nij so' rihaan nij yuvii, cataj xna'anj se-mozó so' rihaan nij yuvii se vaa ca'na' nij so' tucua so' navij rá nij so' cha'anj nara'aa yo', tzaj ne ne ca'vej nij yuvii yo' ca'na' nij so' tucua síi nicaj suun rey a. <sup>4</sup> Gaa ne ca'neé uún so' man doj se-mozó so' rihaan nij síi navij rá cha'anj ga so', ne ca'neé so' nana rihaan nij yuvii yo' se vaa aj qui'yaj chuvii so' cha'ni'yánj nij so' do', se vaa aj ticavi' so' scúj aj ticavi' so' scúj le'ej ramii ndo'o aj ticavi' so' do', se vaa aj vaa chuvii nu' rasuun qui'yaj so' a. Che'é dan ca'na' nij so', ne navij rá nij so' cha'anj ga so', ne che'é dan ca'neé so' nana rihaan nij síi navij rá cha'anj ga so' a.

<sup>5</sup> ”Tzaj ne ne ca'na' a 'o' nij so' a ma'. Maan se ta'aj nij so' ca'anj qui'yaj suun xnaa nij so', ne yo'ó ta'aj nij so' ca'anj cutu'vee rasuun rihaan yuvii uún a. <sup>6</sup> Ne yo'ó nij so' quita'aa man nij se-mozó síi nicaj suun rey, ne qui'yaj chi'ii nij so' man mozó yo', ne ticavi' nij so' man mozó nacúun man nij so' a. <sup>7</sup> Gaa ne ca'maan ndo'o rá síi nicaj suun rey yo', ne ca'neé so' man nij se-tanu so' ca'anj ticavi' nij so' man síi ticavi' man se-mozó so' a. Cuchi' nij tanuu rihaan nij síi ticavi' man mozó yo', ne ticavi' nij tanuu man nij so', ne caxrj ya'an nij tanuu man se-chuman' nij so', ne caca nu' chuman' yo' a.

<sup>8</sup> ”Gaa ne ca'mii síi nicaj suun rey rihaan nij se-mozó so', cataj so': “Síj

qui'yaj chuvii ní' navij rá ní' cha'anj, tzaj ne nij sí me rá 'unj navij rá cha'anj gaj me se nuveé sij sa' me nij so' a ma'. Ne nó xcúún nij so' ca'na' nij so' ma'. <sup>9</sup> Che'é dan ca'anj soj rej nuná tuvi' chrej, ne naj guun yuvii nari' soj ro', cataj xna'anj soj rihaan yuvii yo' se vaa ca'na' nij so' navij rá nij so' cha'anj ga ní' á". Danj ca'mii so' rihaan se-mozó so', <sup>10</sup> gaa ne curihanj nij mozó, ne naqui'yaj chre' nij so' man cunudanj nij yuvii nari' nij so' rá chrej, ne dan me se ta'aj nij yuvii yo' me sí chi'ii, ne ta'aj nij yuvii yo' me sí sa' a. Dan me se quisíj caraa nu' ve' canuú cha'anj, gaa ne ca'anj cayáán taran' nij yuvii rihaan mesá cha ni'yánj nij so' a.

<sup>11</sup> "Gaa ne catúj sí nicaj suun rey yo' rá ve' chá ni'yánj nij so', ne quene'en so' man yo' o so', se vaa nuvi' yatzíj nuu nij sí navij rá cha'anj nara'aa nuú so' a. <sup>12</sup> Gaa ne ca'mii sí nicaj suun rey rihaan so', cataj so': "Me che'é catúj so' rá ve' nihánj ve' anuú cha'anj, ne nuvi' yatzíj nara'aa nuú so', ga tinu'", taj so' a. Ne guun na'aj so', ne ne ca'mii so' a. <sup>13</sup> Gaa ne ca'ne' sí nicaj suun rey yo' suun rihaan nij se-mozó so', cataj so': "Numíj soj tacóo sí nihánj numíj soj ra'a sí nihánj numíj soj, ne quirí'ij soj man so' xe' ca'anj so' rej rmi' á", taj sí nicaj suun rey yo' a. Rej rmi' yo' me se yo' me rej ta'vee ndo'o yuvii ne ndaa cha ruj yuvii cúu yan' yuvii adonj. <sup>14</sup> O se nacúún Diose man uxrá yuvii ca'na' nij yuvii cayáán nij yuvii ga so', tzaj ne doj vaa nij yuvii narii Diose cane ga so' nanj adonj —taj Jesucristó a.

*Nana nihánj taj xna'anj che'é puextó go' ní' rihaan gobiernó ne che'é se rque ní' rihaan Diose do' a*

<sup>15</sup> Gaa ne curihanj nij sí fariseo, ne nuchruj raa nij so' ga tuvi' nij so' daj qui'yaj nij so' cuta' nij so' cacun' xraá Jesucristó che'é nana ca'mii Jesucristó a. <sup>16</sup> Gaa ne ca'neé nij so' man nij sí tucu'yón se-nana ma'an nij so' do', man nij sí noco' man sí

cu'naj Herodes do', cuchí' nij so' rihaan Jesucristó a. Ne cataj nij so' rihaan Jesucristó a:

—Ne'en núj se vaa nana ya inanj a'mii so', ne ya tucu'yón so' rihaan yuvii daj qui'yaj yuvii canoco' yuvii man Diose, maestro. Ne ne chu'ví' so' ni'yaj so' man nij yuvii daj cataj yuvii ma'. Ne 'o cyaan vaa nu' yuvii rihaan so' chuguanj. <sup>17</sup> Che'é dan cataj xna'anj so' rihaan núj daj qui'yaj yuvii, rá so' á. No xcúún yuvii go' yuvii puextó rihaan sí nicaj suun cu'naj César na'. Ase se go' yuvii xa' —taj nij so', xna'anj nij so' nana tiha' yu'unj man Jesucristó a.

<sup>18</sup> Tzaj ne quene'en Jesucristó se vaa me rá nij so' qui'yaj chi'ii nij so' man so' a. Che'é dan cataj so':

—Me che'é me rá soj tiha' yu'unj soj manj ne cuta' soj cacun' xraj ga. 'O se sí tiha' yu'unj man yuvii me soj, ne quij vaa nimán soj adonj. <sup>19</sup> Tihaan soj rihanj daj vaa sa'anj o' nii che'é puextó á —taj Jesucristó rihaan nij sí me rá tiha' yu'unj yo' a.

Gaa ne nano' nij so' sa'anj aga' o' yuvii che'é puextó, ne tihaan nij so' sa'anj aga' yo' rihaan Jesucristó a.

<sup>20</sup> —Me sí nó rihaan sa'anj aga' nihánj ga. Ne me sí se-chuvii nó rihaan sa'anj aga' nihánj ga —taj Jesucristó, xna'anj so' man nij sí me rá tiha' yu'unj yo' a.

<sup>21</sup> —Sí nicaj suun cu'naj César me nó rihaan sa'anj aga' yo', ne nó se-chuvii so' rihaan sa'anj ei —taj nij so' a.

Gaa ne cataj Jesucristó:

—Che'é dan go' soj si'yaj sí nicaj suun cu'naj César rihaan ma'an so', ne rque soj si'yaj Diose rihaan Diose á —taj Jesucristó a.

<sup>22</sup> Dan me se cuno nij so' nana ca'mii Jesucristó, ne ca'anj rá nij so', ne tanáj nij so' man Jesucristó, ca'anj nij so' a.

*Nana nihánj taj xna'anj se vaa ya cunu i'na' uún nij sí cavi' a*

<sup>23</sup> Ne corá cuchí' doj nij sí saduceo rihaan Jesucristó a. Nij sí saduceo

ro', a'mii nana nihánj se vaa daj chihaa míj se cunuu i'na' uún yuvií asa' cavi' yuvií, taj nij so' a. Dan me se xná'anj nij so' man Jesucristó,<sup>24</sup> ne cataj nij so' nana nihánj a:

—Cataj xna'anj síi cu'naj Moisés nana nihánj cunō ní' a: “Sese cavi' yo'ō so', ne sese taj vaj ta'níi so', ne nō xcúún tinúú so' xcaj tinúú so' man choco' so' chana quináj, ne cotoj tinúú síi cavi' ga choco' so', ne cuchruj no' ne'ej, ne guun ta'nij síi cavi' man ne'ej yo', ne cunuú ne'ej yo' rihaan to'óó síi cavi' yo' a”, taj síi cu'naj Moisés gaa naá, maestro.<sup>25</sup> Dan me se vaa chíj nij tinuj 'o' nij so' ne ga núj a. Síi chava' ro', xcaj man chana, tzaj ne cavi' so', ne taj vaj ne'ej cuchruj chana nica so', qui'yaj so', ne che'é dan quináj uun chana yo', ne che'é dan xcaj scue'ee síi cavi' yo' man choco' so' a.<sup>26</sup> Tzaj ne cavi' so' uún, ne quináj uun chana xcaj scue'ee so' uún, ne veé dan me se xcaj chíj nij tinuj nij so' man chana yo', tzaj ne cavi' taran' nij so' nanj á.<sup>27</sup> Síj, gaa ne cavi' ma'an chana yo' uún,<sup>28</sup> ne dan me se asa' cunuu i'na' uún nij síi cavi', gaa ne me nij tinuj nij so' nica man chana yo', rá so' ga. 'O se gaa vaa i'na' nij so', ne nica taran' nij tinuj nij so' guun orún' no' a —taj nij síi saduceo, xná'anj nij so' man Jesucristó a.

<sup>29</sup> Gaa ne cataj Jesucristó rihaan nij so' a:

—Ne ne'en uxrá soj ma'. 'O se ne ne'en soj me taj danj Diose, ne ne ne'en soj sese nucuaj ndo'o Diose a.<sup>30</sup> 'O se asa' cunuu i'na' uún nij síi cavi', ne se xcaj tuvi' nij so' a ma'. 'O se ase vaa yáán nij se-mozó Diose rej xta' ro', danj gaa cayáán nij so' nanj adonj.<sup>31</sup> Gaa ne cataj xna'anj 'unj rihaan soj daj gaa quene'en soj se vaa ya ya cunuu i'na' uún yuvií asa' cavi' yuvií ei. Ataa nayaa soj nana nihánj nana ca'mii ma'an Diose na'. Dan me se se-nana Diose taj: <sup>32</sup> “Diose síi noco' nij síi man gaa naá síi cu'naj Abraham do', síi cu'naj Isaac do', síi cu'naj Jacob do', mej a.” Danj ca'mii

Diose che'é nij síi man gaa naá yo' a. Dan me se nuveé se-Diose nij xngangá me Diose ma'. Inanj nij síi vaa i'na' a'vee noco' man Diose nanj adonj. Che'é dan, nda' se síi cane gaa naá me va'nuj nij so', tzaj ne vaa i'na' nij so' rihaan Diose nanj ei —taj Jesucristó a.

<sup>33</sup> Dan me se cuno nij yuvií nana ca'mii Jesucristó, gaa ne guun niha' uxrá rá nij so' se vaa ve'é uxrá tucu'yón so' a.

*Nana nihánj taj xna'anj me nana me nana nocoo doj cunō ní' a*

<sup>34</sup> Dan me se cuchi' nana rihaan nij síi fariseo se vaa sa' uxrá ca'mii Jesucristó rihaan nij síi saduceo ne taj vaj nana nari' nij síi saduceo ca'mii uún nij so' rihaan Jesucristó ma'. Gaa ne cunuu chre' nij síi fariseo nuchruj raá nij so' daj qui'yaj ma'an nij so' a.<sup>35</sup> Gaa ne xná'anj yo'ō tuvi' nij so' yo'ō nana man Jesucristó, quene'en so' sese guun nucuaj Jesucristó cataj xna'anj Jesucristó nana yo' a. Dan me se cataj so':

<sup>36</sup> —Me nana cataj xna'anj Moisés me nana nocoo ndo'o nana cunō uxrá ní' ga —taj so', xná'anj so' a.

<sup>37</sup> Gaa ne cataj Jesucristó:

—“Ndaa nimán yá so' guun rá so' ni'yaj so' man Diose síi 'nij ra'a man ní', ne yo'ō ndaa cúú yave mán so' cuchuman rá ni'yaj man Diose nanj adonj”.<sup>38</sup> Ne nihánj me ya nana uun chíj ya nanj ei.<sup>39</sup> Ne ase vaa nana yo', danj vaa yo'ó nana nihánj nana me rá Diose cunō uún ní' a: “Adi' se 'ee rá so' man ma'án so' ro', danj gaa 'ee rá so' man tuví' so' á”.<sup>40</sup> 'O cuyaán a'mii roj nana nihánj ga nu' tucuáán cuchruj síi cu'naj Moisés gaa naá do', ga nu' nana nata' nij síi nata' se-nana Diose gaa naá do' nanj adonj —taj Jesucristó a.

*Nana nihánj taj xna'anj se vaa síi ca'nej Diose tinanii man yuvií rihaan sayuun ro', nuveé nanj yuvií me so' ma'*

<sup>41</sup> Dan me se nuu chre' nij síi fariseo rihaan Jesucristó, gaa ne xná'anj Jesucristó man nij so', cataj so':

42 —Daj sij me sí ca'nej Diose t̄inani man yuvi rihaan sayuun, rá nij soj ga. Me sí tuvi' me so', rá soj ga —taj Jesucristó, xná'anj so' man nij sí fariseo a.

—Ta'nú ta'nij si'n̄o sí cu'naj David sí cane gaa naá me sí ca'na' t̄inani man yuvi rihaan sayuun nanj á —taj nij sí fariseo a.

43 Gaa ne cataj Jesucristó:

—Tzaj ne gaa cunuú Nimán Diose nimán sí cu'naj David, ne cataj David se vaa sí 'nij ra'a man ma'an so' me sí ca'nej Diose t̄inani man yuvi rihaan sayuun nanj á. Dan me se cataj so': 44 “Ca'mii Diose sí 'nij ra'a man ní' rihaan sí 'nij ra'a manj, cataj so' se vaa cayáán sí 'nij ra'a manj x'núú Diose rej nuva' Diose ndaa se quisij qui'yaj canaán Diose rihaan taran' nij sí taj ri'yunj man sí 'nij ra'a manj ne quirii ta'nga' sí 'nij ra'a manj rihaan nij so' nanj adonj”, taj sí cu'naj David yo' a. 45 Dan me se sí 'nij ra'a man sí cu'naj David me sí ca'nej Diose t̄inani man yuvi rihaan sayuun, taj sí cu'naj David yo' a. Sese 'nij ra'a so' man David, ne me che'é taj soj se vaa nanj ta'ní ta'nij si'n̄o David me so' ga. Taj che'é cataj soj se vaa nanj yuvi me so' ma' —taj Jesucristó rihaan nij sí fariseo yo' a.

46 Ne a 'ó nij so' ne guun nucaj cataj xna'anj 'o nana rihaan Jesucristó, ne a 'ó nij so' ne quisij rá xná'anj doj nana man Jesucristó a ma'.

## 23

*Nana nihánj taj xna'anj che'é cacun' tumé nij sí naqui'yaj cuu se-tucuanj Moisés do', che'é cacun' tumé nij sí fariseo do' a*

1 Gaa ne ca'mii Jesucristó rihaan nij yuvi do', rihaan nij sí tucu'yón se-nana so' do', 2 cataj so':

—Nij sí naqui'yaj cuu se-tucuanj Moisés do', nij sí fariseo do', atá nij so' se-suun sí cu'naj Moisés sí cane gaa naá a. 3 Che'é dan, naj guun nana cataj nij so' rihaan soj ro', cun̄o soj nu' nana yo', ne danj qui'yaj guee soj

á. Tzaj ne se qui'yaj soj ndaa vaa 'yaj nij so' a ma'. 'O se taj xna'anj nij so' daj qui'yaj yuvi, tzaj ne ne 'yaj ma'an nij so' se vaa taj nij so' ma'. 4 Ne a'ne' uxrá nij so' suun rihaan yuvi daj qui'yaj yuvi canoco' yuvi man Diose, ne dan me se ase vaa yuvi araa ndo'o rasuun 'ee xráá tuvi' vaa nij so', tzaj ne a doj ne racuíj nij so' man yuvi cata yuvi rasuun 'ee yo' a ma'. A 'ó raá ra'a nij so' ne racuíj nij so' man yuvi nanj man adonj. 5 Naj guun suun sa' 'yaj nij so' ro', tzaj ne maan che'é rej me rá nij so' quene'en yuvi, ne che'é dan 'yaj nij so' danj nanj adonj. 'O se caxra' ndo'o vaa nij caxran' nu se-nana Diose noco' rihaan nij so', 'yaj nij so', ne xcaan ndo'o vaa yiquitzij noco' tu'va sagan' nij so', 'yaj uún nij so', 6 ne niha' rá nij so' nano' nij so' rej sa' doj quitaj nij so' gaa 'anj nij so' cha'anj, ne niha' rá nij so' nano' nij so' chruun xlá sa' doj quitaj nij so' rá ve' tucu'yón yuvi se-tucuanj Moisés, 7 ne niha' rá nij so' gaa ve'é a'mii yuvi ga nij so' gaa chéé nij so' yu'vee, ne niha' rá nij so' cataj yuvi “Sí guun chij” rihaan nij so', 8 tzaj ne ma'an soj ro', se guun cataj yuvi “Sí guun chij” rihaan ma'an soj, qui'yaj soj a ma'. 'O se vaa orún' sí uun chij rihaan soj, ne tinuj taran' soj nanj á. 9 Ne se guun cataj soj “Ataj chij” rihaan yuvi man rihaan chumii nihánj a ma'. 'O se vaa orún' Rej soj sí nicun' xtá' á. 10 Ne se guun cataj yuvi se vaa noco' nij yuvi man soj, qui'yaj soj a ma'. 'O se orún' sí ca'néé Diose t̄inani man yuvi rihaan sayuun me sí canoco' soj man nanj adonj. 11 Ne me ma'an tuvi' soj sí 'yaj suun che'é soj ro', yo' me sí sa' doj rihaan taran' soj, 12 ne xa' sí me rá ticavii sa' man ma'an, tzaj ne quirí' so', ne guun na'aj so', ne xa' sí 'yaj nica' nimán, tzaj ne cavii sa' so' adonj —taj Jesucristó rihaan nij yuvi a.

13 Gaa ne canicaj Jesucristó ca'mii Jesucristó rihaan nij sí fariseo do', rihaan nij sí naqui'yaj cuu se-tucuanj Moisés rihaan yuvi do', cataj so':



—Nique soj sij fariseo do', sij naqui'yaj cuu se-tucuanj Moisés rihaan yuvii do' a. Quiran' uxrá soj sayuun adonj. Dan me se a'néj nij soj ve' tucua chana cavi' nica, ne yuun che'e guun tucua nij soj man ve' yo', 'yaj ma'an nij soj, ne raan ndo'o achíin ni'yaj nij soj rihaan Diose, che'é rej sa' doj guun nucujaj nij soj tiha' yu'unj soj man yuvii a. Che'é dan doj a gaa sayuun quiran' soj qui'yaj Diose, asa' ca'ne' Diose cacun' che'é yuvii adonj.

14 "Nique soj sij fariseo do', sij naqui'yaj cuu se-tucuanj Moisés rihaan yuvii do' a. Quiran' uxrá nij soj sayuun nanj adonj. Síí nucui' rá me nij soj adonj. Dan me se aráán soj chrej catuu yuvii rihaan Diose asa' guun chij Diose rihaan chumii nihánj á. 'O se ne uun chij Diose nimán soj, 'yaj soj ma'. Ne ndaa nij síí me rá guun chij Diose nimán ro', aráán soj chrej cunō nij so' rihaan Diose adonj.

15 "Nique soj sij naqui'yaj cuu se-tucuanj Moisés rihaan yuvii do', sij fariseo do' ei. Quiran' uxrá nij soj sayuun nanj adonj. Síí nucui' rá me nij soj á. Dan me se chéé soj ndaa rej xco tu'va na ya'anj do', ndaa rej xco quij do', nano' soj yo'o síí canoco' man soj, gaa ne quisíj canoco' yo'o so' man soj 'yaj soj, gaa ne nuu chi'ii doj nimán so' rihaan nimán soj, 'yaj soj, ne quitaj yaan so' rihaan soj ca'anj taran' nij soj rihaan ya'an adonj.

16 "Nique soj che'é sayuun quiran' soj nanj á. Ase vaa síí tuchrii vaa soj, tzaj ne me rá soj tihaan soj rihaan yuvii daj gaa qui'yaj yuvii a. Ca'vee se cuta' yo'o so' raá nuvíí nocoo se vaa ya vaa nana ca'mii so', tzaj ne taj se 'yaj sese ca'mii ne so' ma', taj soj a. Tzaj ne sese cuta' yo'o so' raá aga' oró míí nuu rá nuvíí, gaa ne che'é dan ya vaa nana ca'mii so', ne nō xcúún so' qui'yaj so' nu' ndaa vaa cataj so', taj soj a. 17 Ase vaa síí ni'yon do', ase vaa síí tuchrii do', vaa soj adonj. Me che'é ne ne'en soj se vaa nuvíí nocoo me se sa' doj vaa yo' rihaan aga' oró míí nuu rque nuvíí yo' ga. 'O se ne'en

soj se vaa che'é ma'an nuvíí nocoo yo' ro', nuu guee aga' oró míí yo' rihaan Diose á. 18 Ne taj uún soj se vaa sese cuta' yo'o so' raá chraan altar acaa xcuu rque yuvii rihaan Diose se vaa ya vaa nana ca'mii so', ne taj se 'yaj sese ca'mii ne so' ma', taj uún soj a. Tzaj ne sese cuta' so' raá xcuu naj rihaan chraan altar yo', ne nō xcúún so' qui'yaj so' nu' ndaa vaa cataj so', taj uún soj a. 19 Dan me se ase vaa síí tuchrii vaa soj adonj. Me che'é ne ne'en soj se vaa sa' doj vaa chraan altar yo' rihaan xcuu naj rihaan yo' ga. 'O se che'é ma'an chraan altar ro', che'é dan nuu guee xcuu yo' rihaan Diose nanj á. 20 Che'é dan sese cuta' yo'o so' raá chraan altar yo', ne nuveé raá chraan altar yo' me se cuta' so' raá ma'. 'O se cuta' so' raá chraan altar do', raá nu' se taj rihaan chraan altar yo' do' adonj. 21 Ne sese cuta' yo'o so' raá nuvíí nocoo, ne nuveé inanj raá nuvíí nocoo me se cuta' so' raá ma'. 'O se cuta' so' raá nuvíí nocoo do', raá ma'an Diose síí yanj nuvíí nocoo do' adonj. 22 Ne sese cuta' yo'o so' raá rej xta', ne nuveé inanj rej xta' me se cuta' so' raá ma'. 'O se cuta' so' raá rej xta' do', raá chruun xlá chruun taj ma'an Diose gaa rií ta'nga' Diose do', raá ma'an Diose síí taj rihaan chruun xlá yo' do', cuta' so' nanj adonj.

23 "Nique soj sij naqui'yaj cuu se-tucuanj Moisés rihaan yuvii do', sij fariseo do' ei. Quiran' uxrá soj sayuun adonj. Síí nucui' rá me nij soj nanj á. Dan me se sese vaa nuu xlá do', coj eneldo do', coj cominó do', rihaan soj, ne rque soj 'o nánj coj rihaan Diose rihaan daj a chí' nánj coj yo' a. Tzaj ne nana nocoo doj ne 'yaj soj ma'. Ne a'ne' nica soj cacun' che'é tuvi' soj ma'. Ne 'ee rá soj tuvi' soj ma'. Ne uun nucujaj rá tuvi' soj man soj ma'. Tzaj ne Diose ro', me rá qui'yaj soj nu' nana nocoo nihánj, ne na'vej rá Diose tanáj xco soj a yo'ó nana le'ej doj ma'. 24 Dan me se ase vaa síí tuchrii vaa soj, tzaj ne me rá soj tihaan soj rihaan yuvii daj qui'yaj

yuvii adonj. Ase vaa sí rii ndaa 'o yacoo le'ej rque na co'o ro', vaa soj, tzaj ne chumánj uun soj cunu' xcuu camelló vaa guee nanj adonj.

<sup>25</sup> "Nique soj sij naqui'yaj cuu se-tucuanj Moisés rihaan yuvii do', sij fariseo do' a. Quiran' uxrá nij soj sayuun adonj. Sí nucui' rá me nij soj nanj á. Dan me se ase vaa rasuun, ne sa' uxrá na'nu' nii xráá yo', tzaj ne rque yo' ro', me se vaa nacaj guee yo', ta'nga' danj vaa guee soj, ne xráá soj me se ve'é naruvii, tzaj ne nimán soj me se quij vaa, ne niha' uxrá rá soj ca'nee soj si'yaj tuvi' soj, ne taj se 'yá' ca'ne' rá soj a ma'. <sup>26</sup> Ase vaa sí tuchrii vaa soj sij fariseo ei. Ase vaa 'yaj yuvii na'nu' rque rasuun ro', danj qui'yaj uún soj, naqui'yaj sa' soj nimán soj á. Ndaa síj, gaa ne sa' inan' qui'yaj soj quene'en yuvii ei.

<sup>27</sup> "Nique soj sij naqui'yaj cuu se-tucuanj Moisés rihaan yuvii do', sij fariseo do' a. Quiran' uxrá nij soj sayuun adonj. Sí nucui' rá me nij soj nanj á. Dan me se ase vaa chraan naj xngangá rihaan santó ro', vaa soj, ne xráá soj ro', vaa catzii, ne ve'é ndo'o ruvi' man soj, tzaj ne nimán soj me se adi' se vaa cúu ri'yuj ro', vaa nimán soj, ne chi'ii vaa nu' nimán soj adonj. <sup>28</sup> Dan me se ase vaa sí nica nimán vaa soj chéé soj ni'yaj yuvii, tzaj ne 'yaj yuve ndo'o soj se chi'ii, ne ne uno uxrá soj rihaan Diose a ma'. Inan' danj vaa nimán soj nanj adonj.

<sup>29</sup> "Nique soj sij naqui'yaj cuu se-tucuanj Moisés rihaan yuvii do', sij fariseo do' a. Quiran' uxrá soj sayuun adonj. Sí nucui' rá me nij soj nanj á. Dan me se ve'é une' soj chraan yan naj cúu man nij sí nata' se-nana Diose gaa naá do', man nij sí vaa sa' cane gaa naá do', ne ve'é tumé soj man chraan yo' a. <sup>30</sup> Ne taj soj se vaa sese cayáan soj ga xii soj nij sí man gaa naá ro', ne ne ticavi' soj man nij sí nata' se-nana Diose ndaa vaa qui'yaj ma'an xii soj a ma'. Danj a'mii soj, <sup>31</sup> taj xna'an' ma'an soj se vaa ya tuvi' nij sí ticavi' man nij sí nata'

se-nana Diose gaa naá me ma'an soj nanj á. <sup>32</sup> Ne ataa quisij cacun' qui'yaj nij tuvi' soj nij sí man gaa naá yo' a. Tzaj ne tisij soj cacun' yo' adonj.

<sup>33</sup> "Ase vaa xcuáá yuvaa vaa soj, ne taj se qui'yá' quinanii soj rihaan sayuun qui'yaj Diose man soj ma'. Cacaá soj rihaan ya'an adonj. <sup>34</sup> Che'é dan xa' soj, tzaj ne ca'nej 'unj sí nata' se-nana Diose ca'nej 'unj sí ca'mii nana cuu ca'nej 'unj sí tucu'yón se-nana Diose ca'nej 'unj rihaan soj, gaa ne ticavi' soj man ta'aj nij so', ne cachron soj man ta'aj nij so' rihaan rcutze, ne go' soj cuartá xráá ta'aj nij so', ne cunanj nij so' rihaan soj, curihanj nij so' 'o chuman', ne canoco' uxrá soj man nij so' ndaa 'o chuman' uún, qui'yaj soj vaa güii nanj adonj. <sup>35</sup> Ndaa síj, gaa ne nu' ton cayanj man nij sí sa' rihaan Diose rihaan chumii nihánj ro', nu' cacun' yo' ro', nata' xráá nij soj a. Dan me se asij ton cayanj man sí sa' cu'naj Abel ne ndaa ton cayanj man sí cu'naj Zacarías ta'nii sí cu'naj Berequías gaa cavi' so' rihaan nuvi' yan nicun' chraan altar ro', nu' cacun' yo' ro', nata' xráá nij soj a. <sup>36</sup> Ya ya cataj xna'an' 'unj rihaan soj cuano se vaa quiran' ma'an nij tuvi' nij soj sayuun che'é nu' cacun' yo' adonj —taj Jesucristó rihaan nij sí fariseo do', rihaan nij sí naqui'yaj cuu se-tucuanj Moisés rihaan yuvii do' a.

*Nana nihánj taj xna'an' daj quiran' nij sí man chuman' Jerusalén a*

<sup>37</sup> Gaa ne cataj uún Jesucristó a:

—Naná uxrá raj che'é soj sij man chuman' Jerusalén nihánj nanj á. Dan me se ticavi' soj man nij sí nata' se-nana Diose, ne go' soj yahij man nij sí ca'neé Diose cuchí' rihaan soj á. Guun que'ee ndo'o guun rá 'unj naqui'yaj chre' 'unj man soj cutumé 'unj man soj, tzaj ne taj se qui'yá' ca'vee ma'. Dan me se ase vaa 'yaj chuchee naqui'yaj chre' chuchee man ta'nii xo' caráán xo' xcóo xo' xráá ta'nii xo' ro', danj guun raj qui'yaj man soj, tzaj ne ne ca'vej rá

soj qui'yáj danj a ma'. <sup>38</sup> Yaj me se cutumé ma'an soj man soj nanj adonj. <sup>39</sup> 'O se cuano nihánj me se cataj xna'anj 'unj rihaan soj se vaa rej rihaan ní' ro', se quene'en uún soj manj ma'. Tzaj ne ndaa güii ca'na' uún 'unj rihaan chumiij nihánj quene'en soj manj, ne cataj soj: "Ve'é uxrá 'na' sí a'née sí 'nij ra'a man ní' á", cataj soj a —taj Jesucristó ni'yaj so' man nij sí man Jerusalén yo' a.

## 24

*Nana nihánj taj xna'anj se vaa canee nu' nuví nocoo ne chuman' Jerusalén a*

<sup>1</sup> Gaa ne curihanj Jesucristó nuví nocoo, ca'anj so', ne cuchi' nij sí tucu'yón se-nana so' rihaan so' a. Guun rá nij so' quene'en Jesucristó daj vaa nij ve' man nuví nocoo yo' a. <sup>2</sup> Gaa ne cataj Jesucristó rihaan nij so' a:

—Dan me se ne'en soj nu' ve' man nuví nocoo nihánj na'. Ya ya cataj xna'anj 'unj rihaan soj cuano se vaa vaa güii, ne canee nu' nuví nocoo nihánj, ne a 'ó yuvej se quitáa xráa tuvi' yuvej nihánj a ma' —taj Jesucristó a.

*Nana nihánj taj xna'anj che'é sayuun guun rihaan chumiij nihánj vaa güii a*

<sup>3</sup> Dan me se ca'anj cayáan Jesucristó raá quij cu'naj Quij man Chruun Olivó, ne cuchi' orún' nij sí tucu'yón se-nana so' rihaan so', ne cataj nij so':

—Cataj xna'anj so' rihaan núj aman canee nu' nuví nocoo yo' do', a me rasuun ca'na' qui'yáa so' asa' quisij ca'na' so' quene'en núj ne quinavij nu' chumiij nihánj, maestro —taj nij so', xná'anj nij so' man Jesucristó a.

<sup>4</sup> Gaa ne cataj Jesucristó:

—Cutumé ndo'o soj man soj se gaa nanj tihá' yu'unj yuvij man soj á. <sup>5</sup> 'O se ca'na' uxrá yuvij cataj: "Unj me sí ca'née Diöse tinanii man yuvij rihaan sayuun", cataj nij so', ne dan me se

tihá' yu'unj uxrá nij so' man tuvi' nij so' nanj á.

<sup>6</sup> "Dan me se vaa güii, ne quene'en soj se vaa cunu' uxrá chuman' ga tuvi' chuman' a. Ne cunoo uxrá soj nana se vaa unu' chuman' man gan' ga tuvi' chuman' yo' a. Cutumé soj man soj se cuchu'vi' nimán soj ma'. Maan se vaa che'é guun sayuun yo' rihaan chumiij nihánj adonj. Tzaj ne asa' quisij guun danj, gaa ne se ca'anj ni'ya chumiij nihánj nu' orá ma'. 'O se quinaj chumiij nihánj doj adonj. <sup>7</sup> Dan me se cunu' uxrá yuvij man chuman' nocoo ga yo'ó chuman' nocoo, ne cunu' gobiernó ga tuvi' gobiernó a. Ne cachén x'naa cachén yuún nocoo cachén que'ee chuman' a. <sup>8</sup> Nu' sayuun nihánj ro', ase vaa guun che'e 'o chana ve'ee rque no' cuchruj no' ne'ej ro', danj gaa nu' sayuun nihánj nanj ei. Dan me se nu' ne'en chana ve'ee rque yo', ne ne'en no' doj a quiran' no' sayuun rej rihaan, ne ase uun rá chana yo', danj guun rá soj gaa ca'na' sayuun yo', guun rá soj se vaa daj doj guun uxrá sayuun rihaan chumiij nihánj nanj adonj.

<sup>9</sup> "Gaa ne ca'anj nicaj yuvij man ta'aj soj rihaan nij sí nicaj suun, ne quiran' ta'aj soj sayuun ne cavi' ta'aj soj nanj á. Ne nachri' cunudanj nij sí yanij ni'yaj nij so' man soj, che'é se me soj sí noco' manj adonj. <sup>10</sup> Gaa ne tanáj que'ee tinúú soj chrej sa', ne tacuachén tinúú soj sí tanáj chrej sa' man yo'ó tinúú soj rihaan sí nicaj suun, ne nachri' uún tinúú soj sí tanáj chrej sa' man ta'aj soj sij noco' manj nanj á. <sup>11</sup> Gaa ne ca'na' uxrá sí nata' rihaan yuvij se vaa sij nata' se-nana Diöse me nij so', cataj nij so', tzaj ne ca'mii ne uun nij so', ne tihá' yu'unj uxrá nij so' man yuvij adonj. <sup>12</sup> Gaa ne xna'anj ndo'o se chi'ij qui'yaj yuvij, ne ca'ne' rá nij yuvij ga suun noco' se-nana Diöse, ne che'é dan tanáj uxrá nij sí noco' manj chrej sa' chrej 'ee rá man tuvi' a. <sup>13</sup> Tzaj ne sí noco'

raan manj ndaa se ca'anj ni'ya chumii nihánj ro', so' me síi quinanii rihaan sayuun adonj. <sup>14</sup> Ne ca'mii natáj yuvii nana sa' nihánj nana che'é güii guun chij Diose rihaan chumii nihánj cuno yuvii man cunudanj chuman' man rihaan chumii, ne xcaj nij yuvii cuentá che'ej, gaa ne guun che'e chumii nihánj quinavij chumii nihánj nanj adonj —taj Jesucristó rihaan nij síi tucu'yón se-nana so' a.

<sup>15</sup> Ne soj sij nayaá nana nihánj nana cachronj rihaan yanj nihánj ro', xcaj uxrá soj cuentá me taj nana nihánj nana ca'mii Jesucristó che'é se chi'ii á.

Dan me se cataj uún Jesucristó:

—Aj ne'en soj se vaa cataj xna'anj síi cu'naj Daniel síi nata' se-nana Diose gaa naá che'é yo'o se chi'ii qui'yaj ndo'o sayuun man yuvii, ne dan me se güii quene'en soj se chi'ii yo' rej guee, <sup>16</sup> ne yo'o cunanj nij síi man estadó Judea ca'anj nij so' raa quij á. <sup>17</sup> Ne síi taj xraá ve' tucua' ro', se catúj so' rá ve' tucua' so' quirii so' si'yaj so' ma'. <sup>18</sup> Ne síi 'yaj suun tacaan ro', se canicaj so' nano' so' sagan' so' tanáj so' rihaan yo'óo ma'. Se guun raan nij so' ma'. Maan se yo'o cunanj nij so' á. <sup>19</sup> Nique chana nuu rque do', chana vaa ta'níi ne'ej utzii do', güii ca'na' sayuun yo' a. 'O se se guun nucuaj chana yo' cunanj chana yo' ma'. <sup>20</sup> Cachinj ni'yaj soj rihaan Diose se vaa se ca'na' sayuun yo' güii gaa maan do', güii no' xcúún yuvii naraan rá yuvii do' ma'. <sup>21</sup> 'O se güii ca'na' sayuun ro', quij ndo'o guun nanj á. Quij doj gaa sayuun yo' rihaan nu' nij sayuun quiran' yuvii gaa nu' ca'na', ne daj chihaa mój se quiran' uún yuvii sayuun vaa danj ma'. <sup>22</sup> Sese que'ee uxrá güii guun sayuun, ne se quinanii yuvii rihaan sayuun yo' ma'. Tzaj ne vaa güii quisij sayuun, qui'yaj Diose, che'é rej quinanii nij síi narii so' canoco' man so' adonj.

<sup>23</sup> "Ne güii yo' me se sese cataj yuvii rihaan soj: "Ni'yaj so' ei. Nihánj 'na'

síi tinanii man ní rihaan sayuun á", ne se cuchumán rá soj ma'. <sup>24</sup> 'O se ca'na' uxrá síi ne síi cataj se vaa síi tinanii man yuvii rihaan sayuun me nij so', ne ca'na' uxrá síi ne síi cataj se vaa nata' nij so' se-nana Diose, ne qui'yaj nij so' suun sa' nocoo, ne tiha' yu'unj nij so' man cunudanj nij yuvii man rihaan chumii nanj adonj. Ndaa nij síi narii Diose man ro', sese taj vaj Diose tumé man nij so', ne cuchuman rá nij so' ni'yaj nij so' man nij síi tiha' yu'unj yo' nanj adonj. <sup>25</sup> Nihánj me se cataj xna'anj 'unj rihaan soj daj guun rihaan chumii nihánj nanj á. <sup>26</sup> Che'é dan me sese cataj yuvii rihaan soj se vaa vaj 'unj rej quij, ne se ca'anj soj rej quij nano' soj manj ma'. Ne sese cataj yuvii rihaan soj se vaa yáan 'unj rá 'o ve', ne se cuchumán rá soj ma'. <sup>27</sup> Dan me se ndaa rá se uun gaa raan rej síj güii ne 'o chuguun nu' xta' ndaa rej ata' güii ro', ne ne'en cunudanj yuvii se vaa raan rihaan chumii a. Ne ase uun rá soj ne'en soj gaa raan ro', danj guun rá soj asa' ca'ná' 'unj sij ca'née Diose nicaj yu'unj man yuvii, ne yo'o quene'en nu' yuvii man rihaan chumii nihánj se vaa ca'ná' 'unj adonj. <sup>28</sup> Aj ne'en soj daj 'yaj yachruú vaj rej xta', ne ne'en ma'an xo' me rej naj nee cha xo' a. Taj síi nata' rihaan xo' me rej naj nee yo' ma'. Ne ase uun rá yachruú ro', danj guun rá ma'an soj asa' ca'na' uún 'unj rihaan chumii nihánj adonj. Quene'en ma'an soj sij man rihaan chumii nihánj me rej ca'na' 'unj adonj.

*Nana nihánj taj xna'anj daj gaa ca'na' uún Jesucristó rihaan chumii nihánj a*

<sup>29</sup> "Síj quiran' yuvii sayuun yo', gaa ne guun rmi' güii guun rmi' yavii guun rmi', ne cayuu nij yati' xta' ne quinaan taran' nij rasuun nucuaj man rej xta' do' a. <sup>30</sup> Gaa ne vaa se curuvi' rej xta' quene'en soj, ne quene'en soj se vaa daj doj ca'na' uún 'unj sij ca'née Diose nicaj yu'unj man yuvii a. Gaa ne cunudanj nij síi man rihaan chumii nihánj ro',



quinano ndo'o rá ma'an nij so', gaa ne quene'en nij so' mán 'unj sij ca'née Diose nıcaj yu'unj man yuvii á. Dan me se xráá ngaa quitaj 'unj ca'na' 'unj, ne guun nucuj ndo'oj quirii ta'ngaj, ne ve'é uxrá curuvij ca'naj á. <sup>31</sup> Gaa ne ca'yanj nii chruun a'yánj, qui'yáj, ne ca'nej 'unj man nij se-mozó 'unj ca'na' nij so' rihaan chumii nihánj, ne naqui'yaj chre' nij se-mozó 'unj man nij síi narii Diose man canoco' manj a. Dan me se cachee nij se-mozó 'unj rihaan nu' chumii nihánj, nano' nij so' taran' nij síi cunu chre' ga 'unj nanj adonj.

*Nana nihánj taj xna'anj se vaa ya quene'en ní' se vaa nichrun' ca'na' uún Jesucristó a*

<sup>32</sup> "Tucu'yón soj nana nihánj nana che'é chruun man chruj higó raá á. Gaa quisij guun laruu ra'a chruun, ne naca coj ya'lij raá chruun, ne ne'en soj se vaa nichrun' 'na' dió naman maan a. <sup>33</sup> Dan me se xcaj uún soj cuentá se vaa asa' quene'en soj nu' se vaa cataj xna'anj 'unj rihaan soj cuano, ne nichrun' ca'na' uún 'unj nanj adonj. Dan me se ase vaa síi nicun' ta'yaa ro', gaa 'unj ei. <sup>34</sup> Ya ya cataj xna'anj 'unj rihaan soj cuano quisij nu' rasuun nihánj nu' se vaa cataj xna'anj 'unj rihaan soj cuano ei. Ne ya quene'en soj nu' nihánj gaa ataa cavi' soj ei. <sup>35</sup> Vaa güii ca'anj ni'ya yo'óo do', xta' do', tzaj ne se-nanaj me se daj chihaa mįj se quinavij yo' ma'.

*Nana nihánj taj xna'anj se vaa ne ne'en ní' me güii ca'na' uún Jesucristó ma'*

<sup>36</sup> "Nihánj me cataj xna'anj 'unj rihaan soj se vaa a' ó síi ne ne'en me güii ca'na' uún 'unj rihaan chumii nihánj ma'. Ca'vee se ndaa se-mozó Diose 'yaj suun rej xta', ca'vee se ndaa ma'anj ta'nij Diose, tzaj ne ne ne'en núj me güii me yo' ma'. Qrún' Réj me síi ne'en nanj adonj. <sup>37</sup> Ase vaa qui'yaj yuvii gaa cayáán síi cu'naj Noé rihaan chumii ro', danj gaa qui'yaj uún yuvii asa' ca'na' uún

'unj sij ca'née Diose nıcaj yu'unj man yuvii rihaan chumii nihánj adonj. <sup>38</sup> Dan me se gaa cayáán síi cu'naj Noé, ne daj doj caráán na ya'anj rihaan chumii, tzaj ne chá yuvii do', co'o yuvii do', ne xcaj tuvi' nij yuvii do'; inanj danj qui'yaj nij yuvii ndaa quisij güii catúj nij tuvi' síi cu'naj Noé rque rihoo xij chée rihaan na a. <sup>39</sup> Ne ne xcaj nij yuvii cuentá sese caráán na ya'anj xráá nij so' ma'. Maan se ndaa quisij caráán na ya'anj xráá cunudanj nij so', ne danj gaa xcaj nij so' cuentá nanj á. Ne ase vaa ne xcaj nij yuvii man gaa naá cuentá se vaa quiran' nij so' sayuun ro', danj gaa uún yuvii asa' quisij ca'na' uún 'unj sij ca'née Diose nıcaj yu'unj man yuvii rihaan chumii nihánj adonj. 'O se ndaa síj güii quene'en nij so' manj, gaa ne xcaj nij so' cuentá nanj á.

<sup>40</sup> "Ne asa' quisij güii yo', ne cunuú vij roj snó'o qui'yaj suun roj so' yo'óo, ne nacaj se-mozó Diose man yo'ó so', ne quinaj yo'ó so' a. <sup>41</sup> Ne cunuú vij roj chana gaj roj no' 'núú trigó, ne nacaj se-mozó Diose man yo'ó no', ne quinaj yo'ó no' nanj adonj. <sup>42</sup> Che'é dan cutumé uxrá soj man soj á. 'O se ne ne'en soj me güii ca'na' síi 'nij ra'a man soj a ma'. <sup>43</sup> Dan me se sese 'o síi tucua ve' ro', aj ne'en so' me orá ca'na' síi ituu ne qui'yaj ituu síi ituu rasuun man tucua so', ne uxrá cutumé so' tucua so', ne se qui'yaj ituu síi ituu tucua so' tzaj ma'. Maan se ne ne'en soj me orá ca'na' síi ituu man adonj. <sup>44</sup> Dan me se ta'nga' danj vaa guee 'unj sij ca'née Diose nıcaj yu'unj man yuvii, ne ne ne'en soj me orá ca'na' uún 'unj man adonj. Che'é dan yo'ó ni'yaj soj á.

*Nana nihánj taj xna'anj daj quiran' síi ve'é 'yaj suun rihaan Diose do', daj quiran' síi ne 'yaj suun sa' rihaan Diose do' a*

<sup>45</sup> "Che'é dan me sese cune' síi tucua yo'ó ve' man yo'ó se-mozó so' se vaa cutumé mozó yo' man tuvi' mozó rque so' se chá rihaan nij so' orá chá nij so' chraa, ne daj qui'yaj

mozó yo', rá soj ga. Sese ya ya sij ve'é 'yaj suun me so' do', sese ya ya sij avii raá me so' do', ne daj qui'yaj so', rá soj ga. <sup>46</sup> Gaa ne güii naman se-ru'vee mozó ro', sese quene'en se-ru'vee mozó se vaa ve'é 'yaj suun mozó se-suun ru'vee, ne cavii sa' uxrá mozó yo', qui'yaj se-ru'vee mozó yo' adonj. <sup>47</sup> Ya ya cataj xna'anj 'unj rihaan soj cuano se vaa cune' ru'vee yo' man mozó yo' guun so' sí tumé man cunudanj si'yaj ru'vee yo' a. <sup>48</sup> Tzaj ne sese vaa chi'ii nimán mozó yo', ne guun rá so' se vaa guun raan ndo'o se-ru'vee so', <sup>49</sup> gaa ne guun che'e so' go' so' man tuvi' so' mozó, ne cha so' co'o so', ne guun xno so' a. <sup>50</sup> Dan me se ne ne'en so' aman naman se-ru'vee so' a. Ne na'vij so' ca'na' ru'vee a. Tzaj ne síj güii síj orá síj, ne ca'na' ma'an se-ru'vee mozó yo', <sup>51</sup> gaa ne ca'ne' nu' so' man mozó yo' ne cataj so' se vaa ca'anj mozó yo' rihaan ya'an ga yo'ó nij sí nucui' rá a. Ne yuvii man rihaan ya'an yo' ro', ta'vee uxrá, ne ndaa chá ruj ma'an nij yuvii cúu yan' yuvii ei.

## 25

*Nihánj me cuentó nanó Jesucristó che'é chi' chana yaan me rá catuu rej anuû cha'anj nara'aa a*

<sup>1</sup> "Ne asa' ca'na' uún 'unj rihaan chumii nihánj, ne ase vaa chi' chana yaan ro', danj gaa nij yuvii me rá catuu rihaan Diose asa' guun chij Diose á. Dan me se nicaj nij chana yaan yo' saga' nij no' aga' ya'an, ne ca'anj na'vij nij no' man sí nara'aa a. <sup>2</sup> Dan me se 'un' nij chana yaan yo' ro', me chana ni'yon, ne yu'un' nij chana yaan yo' ro', me chana nicaj cuentá a. <sup>3</sup> 'O se nij chana ni'yon yo' ro', nicaj nij no' saga' nij no' aga' ya'an, tzaj ne taj vaj casté acaa nicaj nij no' a ma'. <sup>4</sup> Ne nij chana nicaj cuentá ro', nij no' me se nicaj nij no' saga' nij no' aga' ya'an do', aga' nuu casté acaa do' a. <sup>5</sup> Dan me se guun raan sí nara'aa, ne ca'na' nej rihaan taran' nij chana yaan yo', ne cotoj

taran' nij no' a. <sup>6</sup> Guun yan', ne caguáj yuvii cataj yuvii: "Na' sí nara'aa ga chana yaan ei. Cuvá' soj nari' tuvi' soj ga so' ei", cataj yuvii rihaan chi' nij chana yaan yo' a. <sup>7</sup> Gaa ne cuno nij chana yaan, ne ra'yanj naxagaa taran' nij no', ne naqui'yaj sa' nij no' saga' nij no' aga' ya'an a. <sup>8</sup> Ne cataj nij chana ni'yon rihaan nij chana nicaj cuentá, ne: "Qui'yaj soj doj se ndo'o, rque soj doj casté acaa rihaan núj ruguanj. Quina'áj saga' núj aga' ya'an nanj achuguanj", taj nij chana ni'yon yo' rihaan tuvi' no' a. <sup>9</sup> Gaa ne tuvi' no' chana nicaj cuentá me se cataj: "Maan se se quisij casté acaa cacaa rihaan taran' ní' ma'. Ca'anj soj rej ane' casté acaa, ne quiraan soj man yo' á", taj nij chana nicaj cuentá yo' rihaan nij chana ni'yon a. <sup>10</sup> Veé dan, ne ca'anj nij chana ni'yon yo' quiraan nij no' casté acaa, ne ca'na' sí nara'aa, ne nij chana nicaj cuentá me se ne cachin casté acaa rihaan nij no' ma'. Che'é dan catúj nij no' rá ve' canuû cha'anj ga sí nara'aa, ne caráán nii ta'yaa yo' a. <sup>11</sup> Cachén doj orá, gaa ne ca'na' nij chana ni'yon uún, ne cataj nij no': "Ca'nuu so' ta'yaa catuu núj, socoj", cataj nij no' rihaan sí nara'aa a. <sup>12</sup> Ne cataj sí nara'aa yo': "Ya ya cataj xna'anj 'unj rihaan soj se vaa ne ne'én 'unj man soj ma'", taj so' rihaan nij chana ni'yon yo' a.

<sup>13</sup> "Che'é dan cutumé uxrá nij soj man soj á. 'O se ne ne'en soj me güii ca'na' 'unj ne ne'en soj me orá ca'na' 'unj ne ne'en soj ma'.

*Nana nihánj me cuentó nanó Jesucristó che'é sí racuíj sa'anj rihaan se-mozó so' a*

<sup>14</sup> "'O se güii ca'na' 'unj me se ase vaa qui'yaj yo'o ru'vee ga se-mozó ru'vee ro', danj gaa qui'yaj ga soj sij noco' manj adonj. Dan me se guun rá ru'vee yo' ca'anj so' yo'ó chuman', ne canacúún so' man nij se-mozó so', ne racuíj so' se-sa'anj so' rihaan nij mozó yo' a. <sup>15</sup> Dan me se rihaan yo'o so' racuíj so' 'un' sa'anj noco' uxrá cu'naj talento a. Rihaan yo'ó

so' racuíj so' vij sa'anj talento a. Ne rihaan yo'ó so' racuíj so' yo'ó sa'anj talento a. Danj qui'yaj so', racuíj so' sa'anj rihaan 'o 'o nij se-mozó so', ne rihaan 'o 'o mozó yo' racuíj so' ndaa vaa guun nucuaj mozó tinaca mozó yo' a. Dan me se me rá so' qui'yaj suun 'o 'o mozó tinaca 'o 'o mozó sa'anj rqué so' rihaan mozó yo', ne che'é dan qui'yaj so' danj a. Ne cavii so', ca'anj so' a.

16 "Sij ca'anj so', ne cavii síi nicaj 'un' sa'anj talento ca'anj so', ne qui'yaj suun so', ne quisij, gaa ne qui'yaj canaán so' yu'un' sa'anj talento ga sa'anj uún a. 17 Ne ase vaa qui'yaj so' ro', danj vaa qui'yaj síi nicaj vij sa'anj talento uún, ne qui'yaj canaán so' yavij sa'anj talento uún a. 18 Tzaj ne síi quirí' 'o sa'anj talento yo' me se cavii so' ca'anj so', ne gáán so' 'o yu'uj, ne caxríj yuve so' man sa'anj racuíj ru'vee rihaan so' a.

19 "Veé dan, ne guun raan uxrá, ne namán se-ru'vee va'núj nij mozó, ne xná'anj ru'vee man 'o 'o nij so' daj qui'yaj nij so' a. 20 Ne cuchí' síi nicaj 'un' sa'anj talento rihaan ru'vee, ne rqué so' chí' sa'anj talento man se-ru'vee so', cataj so': "Un' sa'anj talento racuíj so' manj, señor. Ne yaj ro', nuu yo' chí' sa'anj talento, qui'yáj nanj á", taj so' a. 21 Ne cataj ru'vee yo' rihaan se-mozó so': "Cunaj uxrá vaa qui'yáá so' ei. Mozó sa' mé so', ne gaa nucuaj raj mán so' adonj. Ve'é cutumé so' man doj si'yáj á. Che'é dan, ne yaj cané so' tumé so' nocoo doj si'yáj á. Cuvá' so' cayáán so' ga 'unj, ne ve'é cayáán ní' nanj ei", taj so' rihaan se-mozó so' a.

22 "Gaa ne cuchí' síi nicaj vij sa'anj talento uún, ne cataj so': "Racuíj so' vij sa'anj talento rihanj, señor. Ne yaj, ne nuu yo' ca'anj sa'anj talento, qui'yáj nanj á", taj so' a. 23 Ne cataj ru'vee yo' rihaan so': "Cunaj uxrá vaa qui'yáá so' ei. Mozó sa' mé so' uún, ne gaa nucuaj raj mán so' uún adonj. Ve'é cutumé so' man doj si'yáj, ne che'é dan yaj cané so' tumé so' nocoo

doj si'yáj ya ei. Cuvá' so', cayáán so' ga 'unj, ne ve'é cayáán ní' ya ei", taj ru'vee yo' rihaan yo'ó se-mozó so' a.

24 "Veé dan, ne cuchí' síi nicaj yo'ó sa'anj talento uún rihaan se-ru'vee so', ne cataj so': "Ne'én 'unj se vaa sij sca' ndo'o nimán mé so', señor. Ne'én 'unj se vaa yo'ó yuvij unô 'núú, ne ma'án so' me síi rii uun naa nanj adonj. Ne yo'ó yuvij narii squíj man 'núú trigó, 'yáá so', ne ma'án so' naran' uun man 'núú trigó sa' yo' nanj adonj. 25 Che'é dan cuchu'ví' 'unj, ne ca'anj 'unj, ne caxríj yuve 'unj se-sa'anj so' rque yo'óo nanj adonj. Dan me se nacaj guee uún so' se-sa'anj so' nanj ei", taj mozó yo' rihaan ru'vee a. 26 Ne cataj ru'vee yo' rihaan mozó: "Mozó chí'ii nimán do', mozó rmij do', mé so' ei. Se danj ne'én so' se vaa yo'ó yuvij unô 'núú, ne ma'anj rii naa, ne ne'én so' se vaa yo'ó yuvij narii squíj man 'núú trigó, ne 'unj naran' 'núú trigó sa' yo', 27 ne me che'é ne tacuachén so' se-sa'anj 'unj rihaan nij síi nuta' raá sa'anj ga. Gaa ne asa' 'ná' 'unj, ne nicaj 'unj se-sa'anj 'unj ga sa'anj nata' raá yo' ga", taj ru'vee yo' rihaan yo'ó mozó yo' a.

28 "Ne ca'mii uún ru'vee yo' rihaan yo'ó nij se-mozó so', cataj so': "Ca'nee soj sa'anj nicaj mozó chí'ii nihánj, ne tacuachén soj rihaan síi nicaj chí' sa'anj talento á. 29 'O se síi ne'en sa' qui'yaj suun rihanj me se vaa güii, ne doj a guun nucuaj so' qui'yaj suun so' rihanj adonj. Ne síi ne ne'en qui'yaj suun rihanj me se ca'nee 'unj suun le'ej nii atá so', ne quinaj uun so', qui'yáj adonj. 30 Ne mozó chí'ii yo' me se taj se uun so' rihanj ma'. Quiri'ij soj man so' xe' rej rmí' á. Ne yuvij man rej rmí' yo' me se ta'vee uxrá ne ndaa chá ruj ma'an nij yuvij cúu yan' nij so' nanj adonj", taj ru'vee rihaan yo'ó nij se-mozó so' a.

*Nana nihánj taj xna'anj che'é güii ca'ne' Jesucristó cacun' che'é yuvij man rihaan chumij a*

31 "Dan me se síi ca'néé Diose ñicaj yu'unj man yuvií mé 'unj, ne ca'na' uún 'unj rihaan chumií nihánj, ne ve'é uxrá gaa ca'na' 'unj, ne ca'na' cunudañj nij se-mozó 'unj, ne asa' ca'ná' 'unj, ne quitaj 'unj rihaan xruún 'unj chruun xlá sa', ne ca'ne' 'unj cacun' che'é yuvií adonj. 32 Dan me se naqui'yaj chre' nij se-mozó 'unj man cunudañj nij yuvií man rihaan chumií, ne canicun' nij yuvií rihaan 'unj, ne cuxra' ta'aj 'unj man nij yuvií, ne dan me se ase vaa 'yaj síi tumé matzinj uxrá' ta'aj so' man nij matzinj ga' nij tana ro', danj gaa qui'yáá 'unj, cuxra' ta'aj 'unj man nij yuvií yo' nanj adonj. 33 Dan me se nij síi sa' ro', ase vaa matzinj gaa nij so' rihanj, ne cachén nij so' canicun' nij so' rej nuva' 'unj, ne nij síi chi'ii ro', ase vaa tana gaa nij so' rihanj, ne cachén nij so' canicun' nij so' rej ñichruún 'unj a.

34 "Ne guún 'unj síi nicaj suun rey, quirii ta'ngá' 'unj rihaan nij so', ne dan me se ca'mii 'unj rihaan nij síi nicun' rej nuva' 'unj, cataj 'unj: "Cuva' soj ei. Nihá' uxrá rá Réé 'unj ni'yaj so' man soj á. Dan me se asij qui'yaj Réé 'unj man chumií nihánj, ne cachrón so' güii guun chij ma'an soj rihaan chumií nihánj a. Che'é dan ca'na' soj, ne nacaj soj nu' se sa' qui'yaj Réé á. 35 'Q se gaa naá, ne quina'aan rquej, ne rqué soj se chaj á. Ne nacoó 'unj na, ne rqué soj na co'oj á. Ne ase vaa síi 'na' yo'ó chuman' vaa 'unj rihaan soj, tzaj ne ve'é ca'mii soj gaj a. 36 Tachrinj uun vaa sagan' 'unj, tzaj ne rqué soj yatzíj manj á. Ne canó chi'ii manj, ne cuchí' soj rej náj, ne taj ya'anj soj manj á. Qui'nij 'unj taga', ne cuchí' soj taga', ne ca'mii soj gaj adonj", cataj 'unj rihaan nij síi nicun' rej nuva' 'unj a.

37 "Gaa ne ca'mii nij síi sa' yo' rihanj, cataj nij so': "Aman quene'en núj se vaa na'aan rqué so', ne rqué núj se chá so', Señor. Aman quene'en núj se vaa nacoó so' na, ne rqué núj na co'o so' ga. 38 Aman ase vaa síi 'na' yo'ó chuman' vaa so' rihaan núj, ne

ca'mii núj ga so' ga. Aman quene'en núj se vaa tachrinj uun vaa sagan' so', ne rqué núj yatzíj cunuú so' ga. 39 Aman quene'en núj se vaa canó chi'ii mán so' do', se vaa catúj so' taga' do', ne cuchí' núj racuíj núj mán so' ga", cataj nij síi sa', xna'anj nij so' manj a.

40 "Gaa ne cataj 'unj rihaan nij so': "Ya ya cataj xna'anj 'unj rihaan soj cuano se vaa racuíj ndo'o soj man nij tinúú 'unj gaa quiran' nij so' sayuun vaa danj á. Nda' se síi nica' ndo'o me ta'aj nij so', tzaj ne racuíj ndo'o soj man nij so', ne che'é se racuíj ndo'o soj man tinúú 'unj, ne che'é dan nuchruj 'unj cuentá se vaa me soj síi racuíj man ma'anj adonj", cataj 'unj rihaan nij so' a.

41 "Gaa ne cataj 'unj rihaan nij síi nicun' rej ñichruún 'unj a: "Naxuun soj man soj rihanj ei. Maan se cataj ya Diose se vaa inanj sayuun quiran' soj, ca'anj soj rihaan ya'an, cacaa soj nu' cavii nu' ca'anj nanj á. Dan me se qui'yaj Diose ya'an yo' cacaa síi chree cacaa nij nana chree cacaa, ne cacaa nij soj cacaa ga so' adonj. 42 'Q se quina'aan rquej gaa naá, tzaj ne ne rque soj a doj se chá chaj ma'. Nacoó 'unj na, tzaj ne ne rque soj a doj na co'oj ma'. 43 Ase vaa síi 'na' yo'ó chuman' vaa 'unj rihaan soj, tzaj ne ne ca'mii soj gaj ma'. Tachrinj uun nuú 'unj, tzaj ne ne rque soj a doj yatzíj ma'. Canó chi'ii manj do', qui'nij 'unj taga' do', tzaj ne a 'ó güii ne cuchí' soj rihanj ma'", cataj 'unj rihaan nij so' a.

44 "Gaa ne cataj ma'an nij síi chi'ii yo': "Aman quene'en núj mán so' se vaa na'aan rqué so' do', se vaa nacoó so' na do', se vaa ase vaa síi ca'na' yo'ó chuman' vaa so' do', se vaa achiin yatzíj cunuú so' do', se vaa canó chi'ii mán so' do', se vaa qui'nij so' taga' do', ne ne racuíj núj mán so', Señor", cataj nij so', xna'anj nij so' manj a.

45 "Gaa ne cataj 'unj rihaan nij so': "Ya ya cataj xna'anj 'unj rihaan soj cuano se vaa a 'ó xco' ne racuíj soj



man nij tinúú 'unj gaa quiran' nij so' sayuun vaa danj ma'. Ne nda' se sí nica' ndo'o me ta'aj nij so', tzaj ne no xcuún nij soj racuúj soj man nij so' adonj. Ne che'é se ne racuúj soj man nij so' ro', che'é dan nuchruj 'unj cuenta se vaa nuveé sij racuúj manj me soj ma'", cataj 'unj rihaan nij so' a.

<sup>46</sup> "Gaa ne cavií nij so' ca'anj nij so', ne quiran' ndo'o nij so' sayuun nu' cavií nu' ca'anj, tzaj ne nij sí sa' ro', ve'é cayáan nij so' ga Dióse nu' cavií nu' ca'anj nanj adonj —taj Jesucristó rihaan nij sí tucu'yón se-nana so' a.

## 26

*Nana nihánj taj xna'anj se vaa 'o guun rá nij xrej ata suun nocoo doj do', nij sí uun chij do', se vaa cavií Jesucristó a*

<sup>1</sup> Sij cataj xna'anj Jesucristó nu' nana yo', gaa ne ca'mii uún so' rihaan nij sí tucu'yón se-nana so', cataj so':

<sup>2</sup> —Ne'en soj se vaa cachén vij güii, gaa ne canuú cha'anj pascuá, ne tacuachén nii manj rihaan nij sí cachón manj rihaan rcutze nanj adonj. Danj qui'yaj nij so', che'é se sí ca'néé Dióse nicaj yu'unj man yuvii mej a —taj Jesucristó a.

<sup>3</sup> Gaa ne cunuu chre' nij xrej ata suun nocoo doj do', nij sí uun chij do', rihaan ve' xij tucua' xrej ata suun nocoo doj sí cu'naj Caifás a. <sup>4</sup> Ne 'o guun rá cunudanj nij so' se vaa tihá' yu'unj nij so' man Jesucristó, ne quita'aa yuve' nij so' man Jesucristó, ne cavií' Jesucristó, qui'yaj nij so', rá nij so' a. <sup>5</sup> Tzaj ne cataj nij so':

—Se quita'aa ní' man so' gaa aman anuú cha'anj ma'. Maan se sese danj qui'yaj ní', ne ca'maan rá nij yuvii, ne guun sayuun, qui'yaj nij yuvii nanj adonj —taj nij so' a.

*Nana nihánj taj xna'anj se vaa caxrj 'o chana casté raq Jesucristó a*

<sup>6</sup> Dan me se yáan Jesucristó chuman' cu'naj Betania, ne ne so' rá 'o ve' tucua' sí cu'naj Simón sí canó luj ri'yuj man, <sup>7</sup> ne yáan Jesucristó

rihaan mesá, ne cuchí' yo'o chana rihaan so', ne nica' chana yo'o aga' catzii nuu casté gun' daj, ne casté tu'vee' ndo'o me yo' a. Gaa ne caxrj chana casté raq Jesucristó a. <sup>8</sup> Ne ca'maan rá nij sí tucu'yón se-nana Jesucristó, ne cataj nij so':

—Me che'é tiri' rma'an chana nihánj casté sa' ga. <sup>9</sup> Me che'é ne cutu'vee' no' casté, ne quirí' uxrá no' sa'anj, ne go' no' sa'anj yo' man sí nique ga —cataj nij so', ni'yaj nij so' man chana yo' a.

<sup>10</sup> Ne quene'en Jesucristó daj vaa ca'mii nij so', ne cataj so' rihaan nij so' a:

—Me che'é a'mii soj danj ni'yaj soj man chana ga. 'O se ve'é uxrá vaa qui'yaj no' manj á. <sup>11</sup> 'O se sí nique me se daj a güii mán nij sí nique ga soj, ne ca'vee qui'yaj soj danj ga sí nique ei. Tzaj ne 'unj me se vaa güii ca'anj 'unj, ne quina'j uun soj, ne se ca'vee qui'yaj soj se luj che'ej ma'. <sup>12</sup> Dan me se caxrj chana nihánj casté raj, ne che'é dan ne'en soj se vaa cachín' nii manj adonj. <sup>13</sup> Ya ya cataj xna'anj 'unj rihaan soj cuano se vaa me rej ma'an ca'mii natáj yuvii se-nanaj nana sa' rihaan nij yuvii man rihaan nu' chumii nihánj ro', ne cataj xna'anj uún nij yuvii rihaan tuvi' yuvii che'é se vaa qui'yaj chana nihánj manj, ne se quini'yón yuvii man chana nihánj ma' —taj Jesucristó a.

*Nana nihánj taj xna'anj se vaa cutu'vej sí cu'naj Judas man Jesucristó rihaan nij sí taj ri'yun man Jesucristó a*

<sup>14</sup> Gaa ne cavií sí cu'naj Judas Iscariote, ca'anj so' rihaan nij xrej ata suun nocoo doj a. Dan me se yo'o tuvi' chuvij nij sí tucu'yón se-nana Jesucristó me sí cu'naj Judas yo' a. <sup>15</sup> Dan me se cataj so' rihaan nij xrej a:

—A me se rque soj manj, ne racuúj 'unj man soj tacuachén 'unj man Jesucristó rihaan soj ga —taj so', xna'anj so' man nij xrej a.

Ne go' nij so' ico chí' sa'anj platá catzii man síí cu'naj Judas yo' a. <sup>16</sup> Gaa ne guun che'e síí cu'naj Judas nuchruj raa so' aman guun nucuaj so' racuíj so' man nij xrej atá suun nocoo doj, tacuachén so' man Jesucristó rihaan nij so' a.

*Nana nihánj taj xna'anj se vaa ma'an Jesucristó taj xna'anj se vaa tacuachén yo'o tuvi' nij síí tucu'yón se-nana so' man so' rihaan nij síí taj ri'yunj man so' a*

<sup>17</sup> Ne güii canuú cha'anj pascuá ro', cuchí' nij síí tucu'yón se-nana Jesucristó rihaan Jesucristó, ne xná'anj nij so' man so', cataj nij so':

—Me rej qui'yaj chuvii núj chá xti'no ní' cha'anj pascuá, rá so' ga —taj nij so' rihaan Jesucristó a.

<sup>18</sup> Ne cataj xna'anj Jesucristó rihaan nij so' se vaa catuu nij so' chuman' Jerusalén, ne cuchí' nij so' rihaan yo'o so', ne ca'mii nij so' nana nihánj rihaan so' a: “Taj xna'anj maestró rihaan so' se vaa daj doj quisij se-ora so' a. Ne chá xti'no so' do', nij síí tucu'yón se-nana so' do', cha'anj pascuá tucúá so' á”, cataj nij so' rihaan síí ne chuman' yo', taj Jesucristó rihaan nij so' a. <sup>19</sup> Dan me se qui'yaj nij síí tucu'yón se-nana Jesucristó ndaa vaa cataj xna'anj Jesucristó rihaan nij so', ne qui'yaj chuvii nij so' chá xti'no nij so' cha'anj pascuá a. <sup>20</sup> Ne rej ti'nuu, ne cayáán Jesucristó ga chuvij nij síí tucu'yón se-nana so' rihaan mesá a. <sup>21</sup> Ne gaa chá nij so' chraa, ne cataj Jesucristó:

—Ya ya cataj xna'anj 'unj rihaan soj se vaa tacuachén yo'o tuvi' soj manj rihaan nij síí taj ri'yunj manj ei —taj Jesucristó a.

<sup>22</sup> Gaa ne quinanó ndo'o rá nij síí tucu'yón se-nana Jesucristó, ne guun che'e nij so' ndaa 'o 'o nij so' xná'anj man Jesucristó, cataj 'o 'o nij so':

—'Unj me síí qui'yaj danj ni', Señor' —taj 'o 'o nij so' a.

<sup>23</sup> Gaa ne cataj Jesucristó:

—Síí tiguíj rachrúún ga 'unj rá co'oo ro', so' me síí tacuachén manj rihaan

nij síí taj ri'yunj manj adonj. <sup>24</sup> 'O se taj danj Diose se vaa ca'anj 'unj caví' 'unj sij ca'née Diose nicaj yu'unj man yuvií ne ya danj quirán' 'unj adonj. Tzaj ne nique ndo'o síí tacuachén manj rihaan nij síí taj ri'yunj manj nanj á. Quirán' uxrá so' sayuun nanj á. Snó'o yo' me se sese ne ca'ngaa so', ne cavii sa' so' doj tzaj adonj —taj Jesucristó a.

<sup>25</sup> Ne síí cu'naj Judas síí me rá tacuachén man Jesucristó rihaan nij síí taj ri'yunj man Jesucristó me se xná'anj so' man Jesucristó, cataj so':

—'Unj me síí qui'yaj danj ni', maestro' —taj ma'an so', xná'anj ma'an so' man Jesucristó uún a.

—Ya uxrá cataj so', veé so' qui'yaj danj ei —taj Jesucristó rihaan so' a.

*Nana nihánj taj xna'anj che'é rachrúún rqué Jesucristó rihaan nij síí tucu'yón se-nana so' chá nij so' do', che'é na vinó rqué so' co'o nij so' do' a*

<sup>26</sup> Ne gaa chá nij so' chraa ne quita'aa Jesucristó yo'o rachrúún, ne nago' so' graciá rihaan Diose, ne cuxra' ta'aj so' rachrúún, ne rqué so' rihaan nij síí tucu'yón se-nana so', ne cataj so':

—Quita'aa soj rachrúún nihánj, chá soj man yo' á. Ne manj me rachrúún nihánj ei —taj so' a.

<sup>27</sup> Gaa ne quita'aa Jesucristó aga' tazá nuu na vinó, ne nago' so' graciá rihaan Diose, ne tacuachén so' aga' nuu na vinó rihaan nij so', ne cataj so':

—Co'o taran' soj na vinó nihánj á.

<sup>28</sup> 'O se ton manj me na nihánj, ne che'é ton manj ro', rqué Diose 'o nana rihaan soj daj qui'yaj Diose ga soj a. Dan me se che'é se cayanj ton manj ro', che'é dan me caraa x'naa Diose ni'yaj Diose cacun' tumé que'ee yuvií adonj. <sup>29</sup> Ne cuano nihánj me se cataj xna'anj 'unj rihaan soj se vaa veé doj nihánj me co'oj, ne se co'oj yaj a ma'. Tzaj ne asa' quisíj güii guun chíj Réé 'unj rihaan chumii nihánj, ne cunuu naca chumii nihánj, ne co'o ní' na

vinó naca ei —taj Jesucristó rihaan nij síi tucu'yón se-nāna so' a.

<sup>30</sup> Gaa ne cachráa taran' nij so' chra' rihaan Diose, ne cavii nij so', ca'anj nij so' quij cu'naj Quij man Chruun Olivó a.

*Nana nihánj taj xna'anj se vaa cataj xna'anj Jesucristó se vaa guun na'aj síi cu'naj Pedró ne cataj so' se vaa nuveé sij noco' man Jesucristó me so' a*

<sup>31</sup> Gaa ne cataj Jesucristó rihaan nij so' a:

—Danj Diose taj se vaa go' Diose man síi tumé matzinj, ne cunanj nij matzinj cha'nuu nij xo' a. Ne ya ase vaa daán 'unj matzinj vaa soj, ne ni corá guun na'aj taran' soj, ne se canoco' soj manj a ma'. <sup>32</sup> Tzaj ne asa' quisíj cunuu i'na' uún 'unj, ne quitaj yaan 'unj rihaan soj ca'anj 'unj estadó Galilea, ne nari' tuvi' ní' estadó Galilea nanj adonj —taj Jesucristó rihaan nij síi tucu'yón se-nāna so' a.

<sup>33</sup> Gaa ne cataj síi cu'naj Pedró rihaan so' a:

—Ca'vee se tanáj taran' nij so' mán so', tzaj ne daj chihaa míj se tanáj 'unj mán so' ma' —taj Pedró a.

<sup>34</sup> Ne cataj Jesucristó:

—Ya ya cataj xna'anj 'unj rihaan so' cuano se vaa aj ne'én 'unj se vaa ni corá gaa ataa caguaj to'loo, ne va'nuj ya cataj so' rihaan yuvii se vaa nuveé sij noco' manj mé so' a —taj Jesucristó rihaan Pedró a.

<sup>35</sup> Ne cataj Pedró:

—Taj ma'. Ca'vee se ticavi' yuvii man ní', tzaj ne daj chihaa míj se cataj 'unj se vaa nuveé sij noco' mán so' mej ma' —taj Pedró rihaan Jesucristó a.

Ne ase vaa cataj Pedró ro', danj cataj taran' nij síi tucu'yón se-nāna Jesucristó a.

*Nana nihánj taj xna'anj daj qui'yaj Jesucristó gaa cachíin ni'yaj Jesucristó rihaan Diose a*

<sup>36</sup> Gaa ne ca'anj Jesucristó ga nij so' ndaa yo'ó rej cu'naj Getsemaní, ne cataj xna'anj Jesucristó rihaan nij so':

—Cane soj nihánj, na'vij soj mán 'unj, ne ca'anj 'unj gan' doj tzin', ne

cachinj ni'yaj rihaan Réj a —taj Jesucristó a.

<sup>37</sup> Ne nicaj Jesucristó man Pedró do', man roj ta'níi síi cu'naj Zebedeo do', ca'anj so', ne guun che'e so' quinanó ndo'o rá so' a. <sup>38</sup> Gaa ne cataj so' rihaan va'nuj nij síi ca'anj ga so' a:

—Naná uxrá raj adonj. Maan che'é rej nanó ndo'o raj, qui'yaj cavi' 'unj, raj a. Qui'yaj soj se ndo'o quinaj soj nihánj, ne se cotoj soj ma' —taj Jesucristó rihaan va'nuj nij so' a.

<sup>39</sup> Gaa ne cavii so' yaníj doj tzin', ne ca'anj cayáan rno so' rihaan yo'óo, ne cachíin ni'yaj so' rihaan Diose, ne cataj so' rihaan Diose a:

—Sese ca'vee, ne caráan ra'á so' xraj, se gaa nanj quirán' uxrá 'unj sayuun, tzaj ne sese ma'an so' me rá quirán' 'unj sayuun, ne qui'yáa so' ndaa vaa me rá ma'an so', ne se qui'yáa so' ndaa vaa me rá manj, man Ataj —taj Jesucristó, cachíin ni'yaj so' rihaan Diose a.

<sup>40</sup> Gaa ne canicaj uún so' ca'na' so' rihaan va'nuj nij síi tucu'yón se-nāna so', ne quene'en so' se vaa cotoj cunudanj nij so' a. Gaa ne cataj so' rihaan Pedró a:

—Dan me se xa' soj me se a 'ó orá ne guun nucuaj soj ni'yaj soj gaj a ma'. Ya na'. <sup>41</sup> Maan se ni'yaj soj, ne cachinj ni'yaj soj rihaan Diose se vaa caráan Diose rihaan síi chree se caxrj síi chree chrej chi'ij rque soj á. 'O se niha' rá soj qui'yaj soj se sa', tzaj ne ne guun nucuaj soj ma' —taj Jesucristó rihaan nij so' a.

<sup>42</sup> Gaa ne cavii uún so', ne cachíin ni'yaj uún so' rihaan Diose, cataj so':

—Sese se ca'vee quinanii 'unj rihaan sayuun ase vaa, ne qui'yáa so' ndaa vaa me rá so', Ataj —taj Jesucristó, cachíin ni'yaj so' a.

<sup>43</sup> Gaa ne canicaj uún so' ca'na' so', ne quene'en so' se vaa cotoj uún va'nuj nij síi tucu'yón se-nāna so' a. 'O se ca'na' ndo'o nej rihaan nij so' a.

<sup>44</sup> Gaa ne tanáj so' man nij so', ne cavii uún so', ne cachíin ni'yaj uún so' rihaan Diose, ne ase vaa cachíin

ni'yaj so' gaa rque ro', danj vaa cachiín ni'yaj uún so' rihaan Diose a.

<sup>45</sup> Gaa ne canicaj uún so' ca'na' so' rihaan va'nuj nij sí tucu'yón se-nana so', ne cataj so':

—Ca'vee cotoj soj ca'vee naraan rá soj ca'vee sese vaa ya'núj rihaan soj á. Dan me se daj doj quisij orá tucuchén yo'o so' manj rihaan sí tumé ndo'o cacun', che'é se mé 'unj sí ca'née Diose nicaj yu'unj man yuvij adonj. <sup>46</sup> Naxagaa soj, ca'anj ní' nanj ei. Ni'yaj soj nedi'. 'Na' sí tucuchén manj rihaan sí taj ri'yunj manj nanj chuguanj —taj Jesucristó a.

*Nana nihánj taj xna'anj daj qui'yaj nii gaa quita'aa nii man Jesucristó a*

<sup>47</sup> Dan me se nicun' Jesucristó ca'mii so', ne nu' ca'na' sí cu'naj Judas yo'o tuvi' chuvij nij sí tucu'yón se-nana Jesucristó, ne ca'na' uxrá yuvij ga so', ne nicaj nij yuvij neê espadá do', chruun do' a. Dan me se nij yuvij ca'née nij xrej atá suun nocoo doj do', nij yuvij ca'née nij sí uun chij rihaan nij yuvij israelitá do', me nij yuvij ca'na' a. <sup>48</sup> Ne sí cu'naj Judas cataj xna'anj rihaan nij yuvij se vaa daj gaa qui'yaj so' ga Jesucristó, gaa ne cunu yaan nij yuvij man Jesucristó, ne cataj so':

—Sí cachron tu'vaj ro', so' me sí quita'aa soj cuaj á —taj sí cu'naj Judas a.

<sup>49</sup> Gaa ne nu' cuchi' so' cuaj rihaan Jesucristó, ne cataj so':

—Ca'na' uxraj, nanj maestro —taj so' rihaan Jesucristó a.

Gaa ne nu' cachron tu'va so' xruu Jesucristó a.

<sup>50</sup> Gaa ne xna'anj Jesucristó man Judas, cataj so':

—Me che'é ca'ná' so', ga tinu' —taj so' rihaan Judas a.

Gaa ne cuchi' nij yuvij rihaan Jesucristó, ne quita'aa nij yuvij man Jesucristó a.

<sup>51</sup> Ne yo'o sí nicun' ga Jesucristó me se quirii so' taneê so' neê espadá, ne go' so' neê espadá yo' raa yo'o se-mozó xrej atá suun nocoo doj,

ne veé dan güéj nu' xrée mozó yo', qui'yaj so' a. <sup>52</sup> Gaa ne cataj Jesucristó rihaan sí nicaj neê espadá yo' a:

—Na'nej so' taneê so' á. 'O se nu' yuvij nicaj neê espadá ro', veé neê espadá qui'yaj cavi' nij yuvij nanj adonj. <sup>53</sup> Ne ne ne'én so' se vaa guun nu'cuáj cachinj ni'yáj rihaan Réj, ne ca'na' que'ee ndo'o se-mozó Réj rihanj cuano, ne ca'vee qui'yaj cananj a. <sup>54</sup> Tzaj ne sese danj qui'yáj, gaa ne asa' ca'vee qui'yaj ní' nu' nana no rihaan danj Diose nana taj xna'anj daj gaa quirán' 'unj ga —taj Jesucristó rihaan sí nicaj neê espadá yo' a.

<sup>55</sup> Ne canicaj Jesucristó, cataj Jesucristó rihaan nij yuvij a:

—Me che'é nicaj soj neê espadá nicaj soj chruun nicaj soj, ca'na' soj ga. Sí ituu mé 'unj, rá soj na'. Ne 'o se guun que'ee güi cayáan 'unj rá nuví nocoo, tucu'yón 'unj se-nanaj rihaan nij yuvij, tzaj ne ne quita'aa soj manj a. <sup>56</sup> Tzaj ne nihánj me se quirán' 'unj nu' se vaa taj nana cachron nij sí nata' se-nana Diose gaa naá rihaan yanj a —taj Jesucristó a.

Gaa ne tanáj cunudanj nij sí tucu'yón se-nana Jesucristó man so', ne cunanj nij so', ca'anj nij so' a.

*Nana nihánj taj xna'anj daj qui'yaj nii gaa cuta'aa nii cacun' xraá Jesucristó a*

<sup>57</sup> Dan me se nij sí quita'aa man Jesucristó me se nicaj nij so' man Jesucristó ca'anj nij so' rihaan sí cu'naj Caifás xrej atá suun nocoo doj a. Ne aj mán chre' nij sí naqui'yaj cu se-tucuanj Moisés do', nij sí uun chij do', rihaan sí cu'naj Caifás yo' a. <sup>58</sup> Ne gan' gan' canoco' sí cu'naj Pedró xcó Jesucristó, ne cuchi' so' rihaan chingá rej yanj sí cu'naj Caifás yo', ne catúj so' rá chingá ne ca'anj cayáan so' ga nij se-mozó xrej man rá chingá, quene'en so' daj quirán' Jesucristó a.

<sup>59</sup> Dan me se nano' nij xrej atá suun nocoo doj nano' nij cuese nano' man yuvij cataj xna'anj che'é cacun' tumé Jesucristó a. Me rá nij so' nari' nij



so' cacun' rmi' cuta' nij so' xraá Jesucristó ne cavi' Jesucristó, rá nij so' a. Tzaj ne taj vaj a 'ó cacun' tumé Jesucristó a ma'. <sup>60</sup> Che'é dan nda' se cuchí' uxrá síi ne rihaan nij cuese ca'mii ne nij so', tzaj ne taj vaj cacun' quiri' nij so' cuta' nij so' xraá Jesucristó a ma'. Veé dan, ne cuchí' vij roj so', <sup>61</sup> ne cataj roj so':

—Síi nihánj cataj se vaa guun nucaj so' tacuanee so' nuvií nocoo nuvií na'vij ní' rihaan Diose, ne rque va'núj güii cune' uún so' nuvií yo', taj so' ei —taj roj so' a.

<sup>62</sup> Gaa ne canicun' xrej ata suun nocoo doj, ne xna'anj so' man Jesucristó, cataj so':

—Me che'é ne a'mii so' ga. Daj vaa nana nihánj nana a'mii roj síi nihánj che'é so' ga —taj so', xna'anj so' man Jesucristó a.

<sup>63</sup> Tzaj ne dínj táa Jesucristó a. Gaa ne cataj uún xrej ata suun nocoo doj rihaan Jesucristó a:

—Ase vaa nana taj xna'anj ma'an Diose rihaan so' ro', danj gaa nana nihánj nana cataj xna'anj 'unj rihaan so' á. 'Unj me síi ya ya ca'ne' suun rihaan so' cataj xna'anj so' sese ya ya mé so' ta'níi Diose síi tinanii man yuvií rihaan sayuun á —taj so' rihaan Jesucristó a.

<sup>64</sup> Gaa ne cataj Jesucristó rihaan so' a:

—Ya vaa nana ca'mii ma'an so' ei. Ne vaj a doj cataj xna'anj 'unj rihaan so' se vaa ndaa yaj quene'en soj se vaa síi ca'née Diose nicaj yu'unj man yuvií mej, ne quene'en soj se vaa cayáán 'unj rej nuva' Diose síi nucuaj ndo'o ei. Ne quene'en uún soj se vaa ca'na' uún 'unj rihaan chumii nihánj, ne quitaj 'unj xraá ngaa xta' ca'naj adonj —taj Jesucristó rihaan xrej ata suun nocoo doj yo' a.

<sup>65</sup> Gaa ne ca'maan rá xrej yo', ne cutzin' xrej yo' sagan' ma'an xrej, ne cataj xrej rihaan tuvi' xrej a:

—Nj'yaj soj vij. Quij uxrá tu'va síi nihánj rihaan Diose nanj ei. Se cachiin doj síi ca'na' cataj xna'anj rihaan ní' che'é cacun' tumé síi nihánj

a ma'. Maan se cuano nihánj me se cuno ma'an soj nana quij ca'mii so' se vaa cayáán ma'an so' rej x'núj Diose, taj so' ei. <sup>66</sup> Daj qui'yaj ní' man so', rá soj ga —taj xrej, xna'anj xrej man nij tuvi' xrej a.

—Cavi' so' ei —taj nij so' a.

<sup>67</sup> Gaa ne quirii talúj nij so' rihaan Jesucristó, ne go' nij so' man Jesucristó a. Ne coxro ta'aj nij so' xruu Jesucristó, <sup>68</sup> ne cataj nij so':

—Sese ya ya ca'née Diose man so' tinanii so' man yuvií rihaan sayuun, ne racuj Diose man so' cataj xna'anj so' rihaan núj me síi go' man so' vij —taj nij so', ca'mii nacoo nij so' man Jesucristó a.

*Nana nihánj taj xna'anj daj qui'yaj síi cu'naj Pedró gaa cataj so' se vaa nuveé sij nocoo man Jesucristó me so' a*

<sup>69</sup> Veé dan, ne ne Jesucristó ga yo'ó nij so' rá ve', ne ne síi cu'naj Pedró xe' rá chingá a.

Ne cuchí' yo'q mozó chana rihaan so', ne cataj no':

—Ne so' me yo'q síi cachée ga Jesucristó síi cavii estadó Galilea á —taj mozó chana yo' rihaan Pedró a.

<sup>70</sup> —Taj ma'. Ne unó 'unj me taj so' ma' —taj Pedró cuno taran' nij yuvií cayáán ga so' a.

<sup>71</sup> Gaa ne curihanj Pedró, ne canicun' so' rej atúj yuvií chingá a.

Gaa ne quene'en yo'q mozó chana man so', ne ca'mii no' rihaan nij yuvií nicun' rihaan ve' ga Pedró, cataj no':

—Síi nihánj cachée ga Jesucristó síi cavii chuman' Nazaret asuun asanj —taj chana yo' a.

<sup>72</sup> Gaa ne nucuaj ndo'o ca'mii uún Pedró, cataj so':

—Taj ma'. A doj ne ne'enj man snó'o yo' ma' —taj Pedró yo' a.

<sup>73</sup> Ne corá nii cuchí' nij síi nicun' ga Pedró rihaan Pedró, ne cataj nij so':

—Ya ya yo'q síi cachée ga Jesucristó mé so' ei. 'Q se ase vaa nana a'mii nij síi cachée ga Jesucristó ro', vaa nana a'mii so' chuguanj —taj nij so' rihaan Pedró a.

<sup>74</sup> Gaa ne guun che'e Pedró nucaj doj ca'mii Pedró, cataj Pedró se vaa ca'vee qui'yaj Diose sayuun man so' sese nuveé nana ya me nana a'mii so', ne cataj so':

—Ne ne'enj man snó'o yo' ma' —taj uún Pedró, gaa ne nu' caguáj to'loo a.

<sup>75</sup> Gaa ne ninuj rá Pedró ndaa vaa cataj Jesucristó rihaan so' quii se vaa gaa ataa caguaj to'loo, ne va'nuj cataj Pedró se vaa nuveé sij noco' man Jesucristó me ma'an Pedró ma'. Gaa ne curihanj Pedró xe', ne uxrá ta'vee Pedró a.

## 27

*Nana nihánj taj xna'anj se vaa nicaj nii man Jesucristó, ca'anj nii rihaan síi cu'naj Pilato a*

<sup>1</sup> Rej ranga' nuchruj raa taran' nij xrej ata suun nocoo doj do', nij síi uun chij do', daj qui'yaj nij so', ne cavi' Jesucristó a. <sup>2</sup> Gaa ne numíj nij so' man so', ne nicaj nij so' man so' ca'anj nij so' rihaan síi nicaj suun gobernador cu'naj Pilato, ne tacuachén nij so' man Jesucristó rihaan so' a.

*Nana nihánj taj xna'anj daj quiran' síi cu'naj Judas gaa cavi' so' a*

<sup>3</sup> Dan me se síi cu'naj Judas me síi tacuachén man Jesucristó rihaan nij síi taj ri'yunj man Jesucristó gaa asino yaan, ne xcax so' cuentá se vaa ya ya ticavi' nii man Jesucristó ne ma'an so' me síi tumé cacun' se vaa cavi' Jesucristó a. Che'é dan nanó ndo'o rá so', ne me rá so' narque uún so' ico chi' sa'anj platá catzii yo' rihaan nij xrej ata suun nocoo doj do', rihaan nij síi uun chij do' a. Dan me se cuchi' so' rihaan nij so', <sup>4</sup> ne cataj so':

—Tumé 'unj cacun' se vaa tacuachén 'unj man yo'o síi sa' inanj rihaan soj á —taj síi cu'naj Judas yo' a.

—Nuveé se-cacun' núj me cacun' tumé so' ma'. Xcaj ma'an so' cuentá daj gaa qui'yáa so' ei —taj nij so' rihaan síi cu'naj Judas a.

<sup>5</sup> Gaa ne nicaj so' sa'anj aga' yo', ri'ij uun so' rá nuvíi nocoo, ne cavii so' ca'anj so', ne toco' vaj ma'an so' man

so', ne cavi' so' a. <sup>6</sup> Gaa ne naran' nij xrej ata suun nocoo doj man sa'anj aga' yo', ne cataj nij so':

—Ne nó xcúún ní' caraa ní' sa'anj nihánj rá chrúún sa'anj taj rihaan Diose ma'. 'O se sa'anj go' ní' che'é rej cavi' yo'o yuvii me sa'anj nihánj á —taj nij so' a.

<sup>7</sup> Dan me se nuchruj raa nij so' daj qui'yaj nij so', ne nicaj nij so' sa'anj yo', ne quiránj nij so' to'óo síi rii xruj a. Ne guun yo'óo yo' santó cachin' nii man náa guun yuvii 'na' yo'óo chuman' yuvii cavi' chuman' Jerusalén a. <sup>8</sup> Che'é dan cu'naj yo'óo yo' Yo'óo Ton cuano ei. <sup>9</sup> Dan me se quisíj qui'yaj nij so' nu' se vaa cataj síi cu'naj Jeremías síi nata' se-nana Diose gaa naá gaa cataj so': “Gaa ne nicaj nij so' ico chi' sa'anj aga' a. Sa'anj yo' me sa'anj no yo'o so', cataj nij yuvii israelitá a. <sup>10</sup> Ne nicaj nij so' sa'anj yo' quiránj nij so' to'óo síi rii xruj, ndaa vaa cataj xna'anj síi 'nij ra'a man ní' rihanj nanj adonj”, taj síi cu'naj Jeremías a.

*Nana nihánj taj xna'anj daj ca'mii síi cu'naj Pilato ga Jesucristó a*

<sup>11</sup> Dan me se canicun' Jesucristó rihaan síi nicaj suun gobernador yo', ne xná'anj síi nicaj suun yo' man Jesucristó, cataj so':

—So' me síi nicaj suun rey uun chij rihaan nij yuvii israelitá na' —taj so', xná'anj so' man Jesucristó a.

—Vej ei —taj Jesucristó rihaan so' a.

<sup>12</sup> Ne xná'anj síi nicaj suun gobernador yo' man Jesucristó che'é cacun' cuta' nij xrej ata suun nocoo doj do', nij síi uun chij do', xráa Jesucristó a. Tzaj ne ne ca'mii Jesucristó a 'ó nana rihaan so' ma'. <sup>13</sup> Gaa ne xná'anj uún síi nicaj suun yo' man Jesucristó, cataj so':

—Aj cunó so' cataj nij so' se vaa tumé so' cacun' na'. Me che'é ne a'mii so' ga —taj so', xná'anj so' man Jesucristó a.

<sup>14</sup> Tzaj ne yuun che'e ne ca'mii Jesucristó a 'ó nana rihaan so' che'é cacun' cuta' nii xráa so' a. Veé dan,

ne caráya'anj uxrá sís nicaj suun gobernador yo' che'é yan qui'yaj so' danj a.

*Nana nihánj taj xna'anj se vaa cataj xna'anj sís cu'naj Pilato se vaa cavi' Jesucristó rihaan rcutze a*

<sup>15</sup> Ne vaa yo'õ tucuáán noco' sís nicaj suun gobernador se vaa rii so' man yo'õ sís 'nij taga' 'õ 'õ cha'anj pascuá, ne tinavij uun so' cacun' tumé sís urihanj taga' yo' a. Me ma'an 'õ sís 'nij taga' a'mii nij yuvii che'é se vaa quirii so', ne ca'vee qui'yaj so' ndaa vaa taj nij yuvii a. <sup>16</sup> Ne veé yo' yo' ro', 'nij yo'õ sís cu'naj Barrabás taga', ne quene'en cunudanj nij yuvii se vaa tumé ndo'o so' cacun' a. <sup>17</sup> Dan me se nuu chre' nij yuvii rihaan sís nicaj suun gobernador cu'naj Pilato, ne xna'anj so' man nij yuvii, cataj so':

—Me sís quirii 'unj, rá soj ga. Sís cu'naj Barrabás na'. Ase sís cu'naj Jesucristó xa' —taj so', xna'anj so' man nij yuvii a.

<sup>18</sup> Danj ca'mii so', ne'en so' se vaa maan che'é se guun xcoj ruvaa rá nij xrej atá suun nocoõ doj me tacuachén nij xrej man Jesucristó rihaan ma'an so' a.

<sup>19</sup> Ne asij yáán sís cu'naj Pilato yo' rihaan xrúun so' chruun xlá, ne ca'néé nica so' nana cuchi' rihaan so', taj no':

—Se guun ca'ne' so' cacun' che'é sís sa' yo' ma'. 'õ se asij cua'aa me se nanó ndo'o raj che'é yan tucua'nu' snó'o yo' manj adonj —taj nica sís cu'naj Pilato rihaan so' a.

<sup>20</sup> Tzaj ne cataj xna'anj nij xrej atá suun nocoõ doj do', nij sís uun chij do', rihaan nij yuvii se vaa ca'mii nij yuvii che'é sís cu'naj Barrabás rihaan sís cu'naj Pilato, ne cataj nij yuvii se vaa cavi' Jesucristó a. Ne cuchumán rá nij yuvii a. <sup>21</sup> Gaa ne xna'anj sís nicaj suun gobernador cu'naj Pilato man nij yuvii, cataj so':

—Me ya ya sís quirij, rá soj ga —taj so', xna'anj so' man nij yuvii a.

—Quirij so' man sís cu'naj Barrabás ei —taj nij yuvii rihaan so' a.

<sup>22</sup> —Ne me qui'yáá 'unj ga sís cu'naj Jesucristó, rá soj ga —taj uún sís cu'naj Pilato, xna'anj so' man nij yuvii a.

—Cavi' so' rihaan rcutze, rá núj ei —taj taran' nij yuvii a.

<sup>23</sup> —Tzaj ne me cacun' tumé so' ga —taj sís cu'naj Pilato, xna'anj so' man nij yuvii a.

Tzaj ne doj a caguáj nij yuvii, cataj nij yuvii:

—Cavi' so' rihaan rcutze ei. —Danj inanj caguáj nij yuvii a.

<sup>24</sup> Dan me se quene'en sís cu'naj Pilato se vaa taj se 'yá' quina'maan rá nij yuvii, ne maan se doj a ca'maan rá nij yuvii, ne doj a qui'yaj nij yuvii sayuun a. Che'é dan nicaj so' na, ne na'ya' so' ni'yaj nij yuvii a. Ne cataj so':

—Se tumé 'unj cacun' sese cavi' sís nihánj a ma'. 'õ se ma'an soj me sís qui'yaj cavi' so' adonj —taj sís cu'naj Pilato a.

<sup>25</sup> Gaa ne cataj nij yuvii rihaan so' a:

—Veé ma'an núj, ma'an ta'níí núj do', me sís tumé cacun' se vaa cavi' so' ei —taj nij yuvii yo' a.

<sup>26</sup> Gaa ne quirii sís cu'naj Pilato man sís cu'naj Barrabás taga' che'é nij yuvii, ne go' nij tanuu cuartá xráá Jesucristó, qui'yaj sís cu'naj Pilato, ne tacuachén sís cu'naj Pilato man so' rihaan nij tanuu se vaa cachron nij tanuu man so' rihaan rcutze a.

*Nana nihánj taj xna'anj se vaa ca'nga' nacoõ nij tanuu ni'yaj nij tanuu man Jesucristó a*

<sup>27</sup> Gaa ne ca'anj nicaj nij tanuu 'yaj suun rihaan sís nicaj suun gobernador man Jesucristó rá ve' tucua sís nicaj suun gobernador yo' a. Ne naqui'yaj chre' nij tanuu man taran' nij tuvi' tanuu nij so' a. <sup>28</sup> Gaa ne quirii nij so' sagan' Jesucristó man Jesucristó, ne na'néé nij so' sagan' rey yatzíj maree man Jesucristó, <sup>29</sup> ne qui'yaj nij so' cachriin tanj, ne cuta' nij so' cachriin tanj raá Jesucristó, ne caxríj nij so' yo'õ vará tico uun ston Jesucristó a. Gaa ne canicun' ruj nij tanuu rihaan Jesucristó, ne ca'nga'

nacoꝝ nij so' ni'yaj nij so' man Jesucristó, ne cataj nij so':

—Ya ya sij nicaj suun rey rii ta'nga' rihaan nij yuvii israelitá mé so' ei —taj nij so' tiha' nij so' man Jesucristó a.

<sup>30</sup> Gaa ne quirii talúj nij so' man Jesucristó, ne nacaj nij so' vará noco' ra'a Jesucristó, ne go' nij so' vará raꝝ Jesucristó a. <sup>31</sup> Sij ca'nga' nacoꝝ nij so' ni'yaj nij so' man Jesucristó, gaa ne quirii uún nij so' sagan' rey yatzij maree nuu Jesucristó, ne na'née uún nij so' sagan' uún Jesucristó man uún so', gaa ne nicaj nij so' man Jesucristó cavii nij so' ca'anj nij so' yan cachron nij so' man Jesucristó rihaan rcutze a.

*Nana nihánj taj xna'anj daj qui'yaj nij yuvii gaa cachrón nij yuvii man Jesucristó rihaan rcutze a*

<sup>32</sup> Dan me se cavii nij so', ne nari' nij so' man yo'ꝝ sít ne chuman' Cirene, ne so' me sít cu'naj Simón a. Veé dan, ne qui'yaj uxrá nij tanuu fuerzá man sít cu'naj Simón yo' caꝝa so' rcutze canꝝ Jesucristó rihaan a. <sup>33</sup> Gaa ne cuchí' nij so' tacaan cu'naj Gólgota, ne Gólgota ro', me rej cu'naj Tacaan Cúu Yave Xnangá a. <sup>34</sup> Gaa ne rque nij tanuu doj na vinó nachej ga na e' man Jesucristó co'ꝝ so' a. Ne doj tzin' tiguíj daa Jesucristó, ne ne ca'vej rá so' co'ꝝ so' ma'. <sup>35</sup> Veé dan, ne cachrón nij tanuu man Jesucristó rihaan rcutze, ne tico tixaj nij so' che'é sagan' Jesucristó, <sup>36</sup> gaa ne ca'anj cane nij so' rihaan yo'óꝝ, ne tumé nij so' man Jesucristó a. <sup>37</sup> Ne cachrón nij tanuu yo'ꝝ rcuchra' raꝝ rcutze, ne no letrá rihaan rcuchra' yo', ne taj xna'anj letrá yo' me che'é cavi' Jesucristó, ne: “Sít nihánj me sít cu'naj Jesucristó, ne sít nicaj suun rey uun chij rihaan nij yuvii israelitá me so' a”, taj letrá yo' a. <sup>38</sup> Gaa ne cachrón nij tanuu man yavij snó'o rihaan yavij rcutze yo', ne yavij roj so' me sít ituu a. Dan me se nicun' yo'ꝝ so' rej nuva' Jesucristó, ne nicun' yo'ó so' rej nichruun Jesucristó a.

<sup>39</sup> Gaa ne cachén yuvii rej nicun' Jesucristó, ne ca'mii chí'ii ndo'o nij

so' ni'yaj nij so' man Jesucristó a. Dan me se tucunó nij yuvii raꝝ nij yuvii, <sup>40</sup> cataj nij yuvii:

—Tacuanees so' man nuvií nocoꝝ, ne rque va'núj güii cune' so' yo'ó nuvií nocoꝝ, rá so' na'. Dan me se sese ya ya ta'nij Diose mé so', ne tinanii so' mán so' rihaan rcutze, ne nanij so' rihaan yo'óꝝ yaj vij —taj nij yuvii rihaan Jesucristó a.

<sup>41</sup> Ne ase vaa qui'yaj nij yuvii yo' ro', danj qui'yaj uún nij xrej ata suun nocoꝝ doj do', nij sít naqui'yaj cuu se-tucuanj Moisés do', nij sít uun chij do', ca'mii chí'ii nij so', cataj nij so':

<sup>42</sup> —Tinanii sít nihánj man yo'ó yuvii rihaan sayuun, rá so', tzaj ne ne guun nucuaj so' tinanii so' man ma'an so' rihaan rcutze danj. Sese ya ya sij nicaj suun rey uun chij rihaan ní' sij israelitá me so', ne nanij so' cuano rihaan yo'óꝝ, ne cuchuman rá ní' ni'yaj ní' man so' ei. <sup>43</sup> Dan me se nucuaj rá so' man Diose se vaa cavii sa' so', qui'yaj Diose, rá so' a. Ca'vee tinanii Diose man so' cuano, sese sij 'ee rá Diose man me so' á. 'O se ma'an so' taj se vaa ta'nij Diose me ma'an so' adonj —taj nij so', chí'ii ndo'o ca'mii nij so' ni'yaj nij so' man Jesucristó a. <sup>44</sup> Ne ase vaa ca'mii nij so' ro', danj ca'mii uún roj sít ituu noco' rihaan rcutze rej x'núj Jesucristó, ca'mii roj so' nana nij rihaan Jesucristó a.

*Nana nihánj taj xna'anj daj guun gaa cavi' Jesucristó a*

<sup>45</sup> Veé dan, ne caxuj, ne yuun che'e guun rmí' rihaan chumii, ne yo'ꝝ guun rmí' chumii ndaa quisíj aga' va'núj rej anoco' güii a. <sup>46</sup> Veé dan, ne quisíj aga' va'núj, gaa ne nucuaj ndo'o caguáj Jesucristó, cataj so':

—Elí, Elí, lama sabactani —taj so', caguáj so' xna'ánj a'mii ma'an so', ne nana caguáj so' taj: “Diose noco' 'unj mé so' á. Me che'é tanáj uun so' mán 'unj ga”, taj nana caguáj Jesucristó a.

<sup>47</sup> Ne cuno ta'aj nij sít nicun' rej x'núj Jesucristó nana caguáj so', tzaj ne ne cunꝝ nij so' me taj Jesucristó ma'. Maan se:



—Nacúún síí nihánj man síí cu'naj Elías tadonj —taj nij so' rihaan tuvi' nij so' a.

<sup>48</sup> Gaa ne nu' ra'yanj cunanj yo'o síí nicun' rej x'núj Jesucristó, ne nicaj so' yataan esponja, ne caraa so' na vinó yuu rque yataan, ne cuta' so' raá yo'o vará, ne ru'maan so' yataan tu'va Jesucristó, ne co'o Jesucristó na yuu yo', qui'yaj so' a. <sup>49</sup> Tzaj ne ca'mii yo'ó nij yuvii, cataj nij so':

—Dínj qui'yáá so' á. Quene'en níí sese ca'na' síí cu'naj Elías tinanii síí cu'naj Elías man so' rihaan rcutze ei —taj nij yuvii yo' a.

<sup>50</sup> Gaa ne sca' caguáj uún Jesucristó, ne cavi' so' a. <sup>51</sup> Veé dan, ne quisin' yatzíj mantá cortiná noco' rá nuvíí noco'o ndaa rej raá, ne 'o quiniy ca'anj ndaa tacóo yo' a. Dan me se cachén yuún, ne quixra' ta'aj nij yuvej, <sup>52</sup> ne x'núj rej cachin' nii man nij síí cavi', ne cunuu i'na' uún que'ee nij síí sa' cavi' asij rque a. <sup>53</sup> Ne gaa quisij orá cunuu i'na' uún ma'an Jesucristó, ne curihanj nij síí cunuu i'na' uún yo', ne catúj nij so' chuman' guee chuman' Jerusalén, ne quene'en uxrá yuvii man nij so' a.

<sup>54</sup> Veé dan, ne nicun' tanuu capitán nicun' yo'ó nij tanuu nicun' cutumé man Jesucristó a. Ne quene'en nij so' cachén yuún, ne quene'en nij so' nu' se vaa guun, ne cuchu'vi' ndo'o nij so', ne ndaa dan asuun gaa xcaj nij so' cuentá se vaa ya uxrá ta'nij Diose me Jesucristó, ne dan me se cataj nij so':

—Ya ta'nij Diose me síí nihánj tadonj —taj nij so' a.

<sup>55</sup> Ne gan' doj nicun' que'ee chana, ni'yaj uun nij chana man Jesucristó a. Chana cuno se-nana Jesucristó asij cavii Jesucristó estadó Galilea me nij chana yo', ne qui'yaj suun nij chana yo' che'é Jesucristó a. <sup>56</sup> Yo'o no' me chana cu'naj Mariá Magdalena, ne yo'ó no' me chana cu'naj Mariá nii síí cu'naj Jacobo ga síí cu'naj José a. Ne yo'ó no' me nii roj ta'níí síí cu'naj Zebedeo a.

*Nana nihánj taj xna'anj se vaa cachin' nii man Jesucristó rque yu'uj yuvej a*

<sup>57</sup> Ne rej ata' güii ca'na' yo'o síí ru'vee síí ne chuman' Arimatea a. José cu'naj so', ne so' me síí tucu'yón se-nana Jesucristó a. <sup>58</sup> Dan me se ca'anj so' rihaan síí cu'naj Pilato, ne cachín ni'yaj so' rihaan síí cu'naj Pilato se vaa ca'vej síí cu'naj Pilato cachin' so' man Jesucristó a. Ne síí cu'naj Pilato ro', cataj se vaa ca'vee qui'yaj so' danj a. <sup>59</sup> Ne nicaj síí cu'naj José man Jesucristó, ne nacutáj so' yatzíj mantá naruvii xráá Jesucristó, <sup>60</sup> ne vaa yu'uj yuvej rihaan so', rej achin' nii man nij síí cavi', tzaj ne yu'uj naca me yo' a. Ma'an so' me síí qui'yaj gáán nii yu'uj yo', ne taj vaj xnangá naj rque yu'uj ma'. Ne caxrij so' man Jesucristó rque yu'uj yo', ne caráán so' yuvej xij tu'va yu'uj yo' a. <sup>61</sup> Ne cayáán chana cu'naj Mariá Magdalena cayáán yo'ó chana cu'naj Mariá cayáán tu'va yu'uj yo' a.

*Nana nihánj taj xna'anj se vaa tumé uxrá nii man yu'uj nuu Jesucristó a*

<sup>62</sup> Veé dan, ne taxrej, ne ndaa quisij qui'yaj chuvii nij yuvii israelitá che'é güii naraan rá nij so', ne cunuu chre' nij xrej ata' suun noco'o doj do', nij síí fariseo do', ne ca'anj nij so' rihaan síí cu'naj Pilato, <sup>63</sup> ne cataj nij so':

—Nuu rá núj daj cataj síí tiha' yu'unj yo' gaa gaa i'na' so', señor. Dan me se cataj so' se vaa cachén va'núj güii, gaa ne cunuu i'na' uún so', cataj so' adonj. <sup>64</sup> Che'é dan ca'ne' so' suun rihaan tanuu se vaa tumé tanuu man yu'uj naj so' ndaa se quisij va'núj güii yo' ruguanj. Sese se qui'yaj ní' danj, ne ca'na' nij síí tucu'yón se-nana so', ne quirii nij so' man so', ne cataj nij so' rihaan nij yuvii se vaa cunuu i'na' uún so' nanj adonj. Asa' quisij, gaa ne doj a tiha' yu'unj uún nij so' man nij yuvii nanj adonj —taj nij so' rihaan síí cu'naj Pilato a.

<sup>65</sup> Ne cataj síí cu'naj Pilato rihaan nij so' a:

—Vaa tanuu rihaan soj ei. Nijcaj soj man tanuu ca'anj soj cutumé soj man yu'uj yo' á. Ne'en ma'an soj daj qui'yaj soj á —taj Pilato rihaan nij so' á.

<sup>66</sup> Gaa ne cavii nij so' ca'anj nij so' tumé nij so' man yu'uj yuvej yo' a. Dan me se ca'ne' nij so' suun rihaan tanuu cutumé tanuu yu'uj, ne cachrón nij so' yánj nichraj tu'va yuvej caráán tu'va yu'uj yo' a.

## 28

*Nana nihánj taj xna'anj se vaa cunuu i'na' uún Jesucristó a*

<sup>1</sup> Dan me se ca'anj güii cuetan' güii naránj rá nij yuvií israelitá, ne na'yaan cotungó me yo', ne daj doj quisij güii a. Ne ca'na' chana cu'naj Mariá Magdalena do', yo'ó chana cu'naj Mariá do', quene'en roj chana yu'uj catúj Jesucristó a. <sup>2</sup> Veé dan, ne cachén uxrá yuún, ne cavii yo'ó se-mozó síi 'nij ra'a man ní' rej xta', ca'na' so', nanij so' tu'va yu'uj yo', gaa ne quirii yaníj so' yuvej aráán tu'va yu'uj yo', ne ca'anj cané so' xráá yuvej yo' a. <sup>3</sup> Daj se uun rá roj no' ne'en roj no' gaa raan ro', danj guun rá roj no' gaa curuvi' so' a. Ne daj se uun rá roj no' ne'en roj no' yu've' catzij ndo'o ro', danj guun rá roj no' ne'en roj no' sagan' so' a. <sup>4</sup> Gaa ne cuchu'vi' ndo'o nij tanuu man tumé tu'va yu'uj yo', ne quiri'íj ndo'o man nij so' a. Dan me se ase vaa mán síi cavi' vaa mán nij so' rihaan yo'ó a. <sup>5</sup> Veé dan, ne cuchu'vi' roj chana yo' rihaan se-mozó Diose, ne cataj se-mozó Diose rihaan roj no' a:

—Se cuchu'vi' roj soj ma'. 'O se aj ne'én 'unj se vaa nano' roj soj man Jesucristó síi cavi' rihaan rcutze adonj. <sup>6</sup> Taj vaj so' naj nihánj a ma'. 'O se cunuu i'na' uún so', ndaa vaa cataj xna'anj so' rihaan soj á. Catuu roj soj ni'yaj roj soj rej quinaj so' á. <sup>7</sup> Gaa ne ra'yanj ca'anj roj soj, cataj xna'anj roj soj rihaan nij síi tucu'yón se-nana so' se vaa cunuu i'na' uún so' á. Veé dan me se quitaj yaan so' rihaan soj ca'anj so' estadó Galilea, ne ca'anj soj

ndaa yo', ne quene'en soj man so' á. Danj gaa cataj xna'anj soj rihaan nij síi tucu'yón se-nana so' á. Veé dan me quisij nana cataj xna'anj 'unj rihaan soj a —taj se-mozó Diose rihaan roj chana yo' a.

<sup>8</sup> Veé dan, ne curihanj roj chana ca'anj roj no' a. Veé roj no' cuchu'vi', ne veé roj no' guun niha' rá uún a. Veé dan me se cunanj ndo'o roj no', cataj xna'anj roj no' rihaan nij síi tucu'yón se-nana Jesucristó nu' se vaa quene'en roj no' do', nu' nana cataj xna'anj se-mozó Diose rihaan roj no' do' a. <sup>9</sup> Ne maan orá dan nari' tuvi' ma'an Jesucristó ga roj chana yo', ne cataj so':

—Gaa niha' nimán roj soj á —taj Jesucristó rihaan roj no' a.

Gaa ne cuchu'vi' roj chana yo' rihaan Jesucristó, ne ca'anj canicun' ruj roj no' rihaan so', ne quita'aa roj no' tacóo Jesucristó, ne na'víj roj no' rihaan Jesucristó a. <sup>10</sup> Gaa ne cataj Jesucristó rihaan roj chana a:

—Se cuchu'vi' roj soj ma'. Maan se ca'anj roj soj cataj xna'anj roj soj rihaan nij tinúú 'unj se vaa cavii nij so' ca'anj nij so' estadó Galilea, ne ndaa yo' quene'en nij so' manj á —taj Jesucristó rihaan roj chana yo' a.

*Nana nihánj taj xna'anj che'é nana cataj xna'anj nij tanuu rihaan nij xrej ata suun nocoo doj a*

<sup>11</sup> Ne gaa quisij ca'anj roj chana yo', ne dan me se cavii ta'aj nij tanuu man tu'va yu'uj yo' rque chuman', ne cataj xna'anj nij tanuu rihaan nij xrej ata suun nocoo doj nu' se vaa guun a. <sup>12</sup> Ne cunuu chre' nij xrej ata suun nocoo doj ga nij síi uun chij, ne nuchruj raa nij so' daj qui'yaj nij so' a. Gaa ne go' uxrá nij so' sa'anj rihaan nij tanuu yo', <sup>13</sup> ne cataj nij so':

—Cataj soj se vaa rej nij cotoj soj, ne nij síi tucu'yón se-nana so' ro', ca'na' quirii man so' a. Danj cataj soj á. <sup>14</sup> Ne sese cuchu'vi' nana yo' rihaan síi nicaj suun gobernador, ne sese me rá so' qui'yaj so' sayuun man soj, ne ma'an

núj caráán ra'a sayuun xráá soj á —taj nij so' rihaan nij tanuu a.

<sup>15</sup> Dan me se guun ya rá nij tanuu, ne quita'aa nij so' sa'anj yo', ne qui'yaj nij so' nu' se vaa cataj xna'anj nij xrej atá suun nocoo doj do', nij síi uun chij do', rihaan nij so' a. Ne ase vaa nana ca'mii nij tanuu rihaan yuvii ro', ta'nga' danj vaa nana ticha'nuu nij yuvii israelitá rihaan yuvii ndaa yo' yaj nanj adonj.

*Nana nihánj taj xna'anj che'é suun ca'ne' Jesucristó rihaan nij síi tucu'yón se-nana so' a*

<sup>16</sup> Gaa ne ca'anj xaán nij síi tucu'yón se-nana Jesucristó estadó Galilea, ne cavii nij so' raa 'o quij a. Danj qui'yaj nij so', ése cuno nij so' nana cataj xna'anj Jesucristó rihaan nij so' gaa rque a. <sup>17</sup> Gaa ne quene'en nij so' man Jesucristó, ne na'víj nij so' rihaan so', tzaj ne ne guun ya rá ta'aj nij so' se vaa ya ya Jesucristó me so' a. <sup>18</sup> Gaa ne cuchi' Jesucristó rihaan nij so', ne cataj so' rihaan nij so':

—Yaj me se 'unj me síi uun chij xta' do', nu' rihaan yo'óo do', qui'yaj Diose ei. <sup>19</sup> Che'é dan ca'anj soj tucu'yón soj se-nanaj rihaan nij yuvii man 'o 'o chuman' naj rihaan chumii, ne canoco' nij yuvii manj, qui'yaj soj, ne cata' ne soj man nij so', ne cata' tu'va soj se-chuvii Réé 'unj Diose do', se-chuvii 'unj ta'nij Diose do', se-chuvii Nimán Diose do' á. <sup>20</sup> Ne tucu'yón soj rihaan nij yuvii se vaa cuno nij yuvii nu' nana cataj xna'anj 'unj rihaan soj á. Veé dan yuun che'e cachee 'unj ga soj nu' güii cachee soj rihaan chumii nihánj, ndaa se quinavij nu' chumii nihánj nanj adonj —taj Jesucristó rihaan nij so' a.

## Nihánj me se-nana Jesucristó nana sa' cachrón síi cu'naj Marcos rihaan yanj a

*Nana nihánj taj xna'anj che'é síi cu'naj Juan síi cuta' ne man yuvii a*

<sup>1</sup> Nānj vaa guun che'e se-nana Jesucristó nana sa' a. <sup>2</sup> Dan me se síi cu'naj Isaías síi nata' se-nana Diose gaa naá ro', cachrón so' nana nihánj rihaan yanj, ne: “Vaa síi ca'anj suun che'é 'unj, ne ca'nej 'unj man so' quitaj yaan so' rihaan so', ne nuchran' nimán yuvii ve'é ca'mii nij yuvii ga so', qui'yaj so' a”, me se-nana Diose nana cachrón síi cu'naj Isaías rihaan yanj a. <sup>3</sup> Ne yo'ó nana cachrón uún so' me nana nihánj, ne: “Nucua'j ndo'o ca'mii natáj 'o so' rej tacaan, ne cataj so' se vaa nuchran' nimán yuvii, ne ve'é ca'mii nij yuvii ga síi 'nij ra'a man ní' asa' ca'na' so' adonj”, taj síi cu'naj Isaías gaa naá, ne ase vaa cataj so' ro', ta'nga' danj guun adonj. <sup>4</sup> Dan me se cavii síi cu'naj Juan síi cuta' ne man yuvii, ne vaj so' rej tacaan, ne ca'mii natáj so' rihaan nij yuvii, cataj so' se vaa nuchran' nimán nij yuvii, ne tanáj nij yuvii chrej chi'ii, ne ca'vee tinavij Diose cacun' tumé nij yuvii, taj Juan adonj. <sup>5</sup> Ne dan me se curihanj ndo'o nij yuvii man estadó Judea do', man ma'an chuman' Jerusalén do', ca'na' nij yuvii rihaan síi cu'naj Juan, ne cata' ne nij yuvii rá chráa cu'naj Jordán, qui'yaj Juan a. Dan me se nata' ya nij yuvii che'é cacun' tumé nij yuvii, gaa ne cata' ne nij yuvii adonj.

<sup>6</sup> Dan me se síi cu'naj Juan me se cachij taj xráa xcuu camelló guun yatzíj nuu so', ne 'nij catuun so' 'o nuj, ne chá so' rquíí chá so' catzi' xtaan man quij chá so' a. <sup>7</sup> Ne ca'mii natáj so', ne cataj so':

—Vaa 'o síi sca' doj rihanj, ne so' me síi ca'na' rej rihaan ní', ne 'unj nihánj

me se ne nó xcúnj nachej nuj correá 'nij tacanj so' ma'. <sup>8</sup> Ne síi uta' ne na uun man soj mej, tzaj ne ca'na' so', ne ca'na' Nimán Diose rihaan soj, qui'yaj so' adonj —taj síi cu'naj Juan rihaan nij yuvii a.

*Nana nihánj taj xna'anj se vaa cuta' ne Juan man Jesucristó a*

<sup>9</sup> Ne güii yo' ta' asuun me se cavii Jesucristó chuman' Nazaret chuman' naj estadó Galilea, ne cata' ne so' rá chráa cu'naj Jordán, qui'yaj síi cu'naj Juan a. <sup>10</sup> Nu' curihanj uún Jesucristó rque na, ne nu' quene'en so' se vaa naxra' rej xta', ne quene'en so' se vaa nanij Nimán Diose raá ma'an so', ne ase vaa cha'aan ro', vaa Nimán Diose, curuvi' yo' a. <sup>11</sup> Gaa ne rej xta' ca'mii Diose rihaan Jesucristó, ne cuno nij síi nicun' ga Jesucristó nana ca'mii Diose, ne dan me se cataj Diose a:

—Ta'nii 'unj síi 'ee ndo'o raj man mé so', ne niha' ndo'o raj ni'yaj 'unj man so' adonj —taj nana cavii rej xta' ca'mii Diose rihaan Jesucristó a.

*Nana nihánj taj xna'anj se vaa guun ndo'o rá síi chree tiha' yu'unj síi chree man Jesucristó a*

<sup>12</sup> Ne dan me se ca'anj ndo'o Jesucristó rej tacaan, qui'yaj Nimán Diose a. <sup>13</sup> Ne vij chihaa güii vaj so' rej tacaan, ne guun rá síi chree tiha' yu'unj so' man Jesucristó, ne vaj Jesucristó rej man xcuu yuvaa, ne rqué nij se-mozó Diose me ma'an se cachiin rihaan Jesucristó a.

*Nana nihánj taj xna'anj se vaa ca'anj Jesucristó estadó cu'naj Galilea a*

<sup>14</sup> Dan me se gaa quisíj quita'aa nij tanuu man síi cu'naj Juan, ne ca'anj Jesucristó estadó cu'naj Galilea, <sup>15</sup> ne ca'mii natáj so' se-nana Diose nana sa', ne cataj so' se vaa nichrun' quisíj güii ca'na' Diose guun chij Diose rihaan chumii nihánj, ne:

—Che'é dan nuchran' nimán soj, ne cuchuman rá soj cuno soj se-nanaj nana sa' á —taj so' rihaan nij yuvii a.



*Nana nihánj taj xna'anj se vaa cataj xna'anj Jesucristó rihaan ca'anj sí rii xcuj se vaa canoco' nij so' man Jesucristó a*

<sup>16</sup> 'Q güii cachén Jesucristó tu'va na lacuaná cu'naj na Galilea, ne quene'en so' sí cu'naj Simón ga tinúú Simón sí cu'naj Andrés, ne dan me se nicun' roj so' tu'va na lacuaná, ne tiguíj roj so' nanj rque na, ne dan me se sí rii xcuj me roj so' a. <sup>17</sup> Gaa ne cataj Jesucristó rihaan roj so' a:

—Canoco' roj soj manj á. 'Q se sí naqui'yaj chre' xcuj me roj soj, tzaj ne rej rihaan ní' me se guun roj soj sí naqui'yaj chre' yuvi, qui'yáj, ne canoco' nij yuvi manj a —taj Jesucristó rihaan roj tinuj roj so' a.

<sup>18</sup> Ne nu' canicaj roj so' tanáj roj so' xnánj roj so', ne canoco' roj so' man Jesucristó, ca'anj roj so' nanj adonj.

<sup>19</sup> Veé dan, ne cachéé nij so' doj, gaa ne quene'en Jesucristó man sí cu'naj Jacobo ta'ní sí cu'naj Zebedeo do', man tinúú Jacobo sí cu'naj Juan do' a. Dan me se nuu roj so' rque rihoo chéé rihaan na, ne naqui'yaj sa' roj so' nanj rii xcuj, ne canacúún Jesucristó man roj tinuj roj so' canoco' roj so' man Jesucristó a. <sup>20</sup> Veé dan, ne canicaj roj so', tanáj roj so' man rej roj so' sí cu'naj Zebedeo rá rihoo ga nij se-mozó so', gaa ne cavii roj so' canoco' roj so' man Jesucristó, ca'anj roj so' nanj adonj.

*Nana nihánj taj xna'anj se vaa quirii Jesucristó man yo'o nana chree nimán 'o snó'o a*

<sup>21</sup> Dan me se catúj nij so' chuman' Capernaum, ne daj a güii naránj rá nij yuvi israelitá ca'anj Jesucristó ve' tucu'yón nij so' se-tucuanj Moisés, ne tucu'yón so' se-nana Diose man nij yuvi a. <sup>22</sup> Ne caráya'anj nij yuvi se-nana so', che'é se cuu doj vaa se-nana so' ga se-nana nij sí naqui'yaj cuu se-tucuanj Moisés a. 'Q se ase vaa a'mii 'o sí uun chij ndo'o ro', danj ca'mii so' rihaan nij yuvi a.

<sup>23</sup> Ne dan me se 'o güii naránj rá nij yuvi israelitá, ne yáán 'o sí nuu nana

chree nimán rá ve' yo', ne caguáj so', <sup>24</sup> ne cataj so' se vaa:

—Me che'é ra'yunj so' man núj, ga Jesús Nazareno'. 'Na' so' tarí' so' man núj na'. Ne'enj mán so' se vaa sí guee cavii rihaan Diose mé so' adonj —taj sí nuu nana chree nimán rihaan Jesucristó a.

<sup>25</sup> Gaa ne canicaj Jesucristó, caxrij yuvaa Jesucristó man nana chree nuu nimán snó'o yo', ne cataj so':

—Dínj tu'vá so', curihanj so' cuaj nimán sí nihánj á —taj Jesucristó rihaan nana chree yo' a.

<sup>26</sup> Ndaa quisnúú ma'an snó'o yo', qui'yaj nana chree, ne nucuaj ndo'o caguáj nana chree, ne curihanj nana chree nimán snó'o yo', ne nahuun sa' so' a. <sup>27</sup> Gaa ne ca'anj uxrá rá nij yuvi, ne xná'anj nij yuvi man tuvi' nij yuvi, cataj nij yuvi:

—Asa' ca'vee qui'yaj so' danj ga. Tucuaán naca me nihánj chuguanj. 'Q se guun chij ndo'o sí nihánj, ne ndaa rihaan nij nana chree taj xna'anj sí nihánj daj qui'yaj nij so', ne uno nij nana chree yo' rihaan so' ga —taj nij yuvi rihaan tuvi' nij yuvi a.

<sup>28</sup> Gaa ne cuchi' nana che'é Jesucristó rihaan cunudanj nij yuvi man nichrun' estadó Galilea yo' a.

*Nana nihánj taj xna'anj se vaa nahuun sa' nii chej Simón Pedró, qui'yaj Jesucristó a*

<sup>29</sup> Dan me se curihanj nij tuvi' Jesucristó rá ve' tucu'yón nii se-tucuanj Moisés, gaa ne catúj taran' nij so' rá ve' tucua Simón ga Andrés, ne 'na' Juan ga Jacobo ga nij so' a. <sup>30</sup> Dan me se nii chej Simón ro', ran' no' chi'ii naca yuvaa, ne naj no', ne cataj xna'anj yo'o nij so' rihaan Jesucristó se vaa ran' uxrá no' a. <sup>31</sup> Gaa ne cuchi' Jesucristó rej naj no', ne canó so' ra'a no', ne naxcaj so' man no', ne naxagaa no', ne nu' x'néj chi'ii xráa no', qui'yaj Jesucristó a. Ne veé maan orá dan qui'yaj chuvii no' cha nij so' nanj adonj.

*Nana nihánj taj xna'anj se vaa nahuun que'ee sí ran', qui'yaj Jesucristó a*

<sup>32</sup> Dan me se cata' güii, ne ti'nuu, ne nicaj nij yuvii cunudanj tuvi' nij yuvii sí ran' do', sí nuu nana chree nimán do', vaj nij yuvii rej ne Jesucristó a. <sup>33</sup> Ne dan me se que'ee nij yuvii man chuman' Capernaum yo' nuu chre' rihaan ta'yaa ve' ne Jesucristó a. <sup>34</sup> Gaa ne nahuun que'ee nij sí ran' daj a chi'ii, qui'yaj Jesucristó, ne quirii ndo'o so' nana chree nimán nij yuvii, ne ca'ne' so' suun rihaan nij nana chree se vaa se ca'mii nij nana chree a doj nana a. Dan me se ne ca'vej rá Jesucristó cataj nij nana chree se vaa cunuu yaan nij nana chree man Jesucristó a.

*Nana nihánj taj xna'anj se vaa ca'anj Jesucristó nu' nij ve' tucu'yón nij yuvii israelitá se-tucuñj Moisés, ca'mii natáj so' a*

<sup>35</sup> Gaa ne rej taxrej naxagaa Jesucristó, ne cavii so' chuman' Capernaum, ne ca'anj so' rej tacaan cachinj ni'yaj so' rihaan Diose a. <sup>36</sup> Gaa ne canoco' nij tuvi' Simón man so', <sup>37</sup> gaa ne nari' nij so' man so', ne cataj nij so' rihaan so' se vaa:

—Cunudanj nij yuvii nano' mán so' á —taj nij tuvi' Simón rihaan Jesucristó a.

<sup>38</sup> Gaa ne cataj Jesucristó rihaan nij so':

—Cavii ní' rej nihánj, ca'anj ní' yo'ó nij chuman' naj nichrun', ne ca'mii natáj 'unj rihaan nij yuvii man yo'ó nij chuman' uún á. 'O se che'é dan ca'ná' 'unj adonj —taj Jesucristó rihaan nij so' a.

<sup>39</sup> Gaa ne ca'anj so' nu' nij chuman' naj estadó Galilea, ne ca'mii natáj so' rá ve' tucu'yón nij sí man nij chuman' yo' se-tucuñj Moisés, ne quirii so' man nij nana chree nuu nimán yuvii a.

*Nana nihánj taj xna'anj se vaa nahuun sa' 'o sí ran' luj ri'yuj, qui'yaj Jesucristó a*

<sup>40</sup> Gaa ne ca'na' 'o sí ran' luj ri'yuj, ne canicun' ruj so' rihaan Jesucristó, ne cachín ni'yaj so' rihaan Jesucristó, ne cataj so' se vaa:

—Sese me rá so', ne ca'vee ca'nee so' chi'ii xráj á —taj sí ran' luj ri'yuj yo' rihaan Jesucristó a.

<sup>41</sup> Gaa ne cunuu 'ee rá Jesucristó man so', ne cuta' Jesucristó ra'a Jesucristó raá so', ne cataj Jesucristó:

—Me raj qui'yáj danj ei. Nahuún so' qui'yáj adonj —taj Jesucristó rihaan so' a.

<sup>42</sup> Nu' danj cataj Jesucristó, ne nu' quinavij luj xráá sí ran', ne nahuun sa' so' cuaj a.

<sup>43</sup> Gaa ne ca'mii yuvaa Jesucristó ga so', ne quirii Jesucristó man so' rá ve', <sup>44</sup> ne cataj Jesucristó rihaan so':

—Se guun cataj xna'anj so' a doj nana rihaan a 'o yuvii ma'. Maan se ca'anj so' rihaan xrej, ne tahaán so' mán so' rihaan xrej se vaa nahuún so', qui'yaj Diose, ne rque so' rihaan Diose ndaa vaa cataj sí cu'naj Moisés gaa naá ndaa vaa no xcúún so' rque so' rihaan Diose che'é yan nahuún so' adonj. Gaa ne xcaj nij xrej cuentá se vaa nahuún so' qui'yáj adonj —taj Jesucristó rihaan sí nahuun yo' a.

<sup>45</sup> Tzaj ne curihanj sí nahuun yo', ne guun che'e so' ca'mii natáj ndo'o so', ndaa síj, gaa ne cha'nuu ndo'o nana se vaa nahuun so' qui'yaj Jesucristó a. Ne dan me se ne ca'vee a doj catuu ranga' Jesucristó rá nij chuman', qui'yaj nij nana yo', ne inanj rej tacaan vaj so', ne canó nij yuvii cuchí' rej vaj so' a.

## 2

*Nana nihánj taj xna'anj se vaa nahuun sa' 'o sí na'vee cachee, qui'yaj Jesucristó a*

<sup>1</sup> Dan me se cachén doj güii, gaa ne catúj uún Jesucristó chuman' Capernaum, gaa ne cuchí' nana rihaan nij yuvii se vaa yanj so' rá ve' a. <sup>2</sup> Gaa ne cunuu chre' que'ee ndo'o nij yuvii rihaan ve' yo', ne ndaa raan ma'an mán nij yuvii, ne ndaa rihaan ta'yaa ve' yo' taj rej quisij doj cumán nij

yuvii a. Ne nata' Jesucristó se-nana so' rihaan nij yuvii a. <sup>3</sup> Ne dan me se ca'na' doj yuvii uún, ne nij so' me se nicaj nij so' yo' o' tuvi' nij so' sí na'vee cachee, ne táa chiha ca'anj nij so' man sí na'vee cachee yo', ne dan me se guun rá nij so' cuchí' sí na'vee cachee yo' rihaan Jesucristó a. <sup>4</sup> Tzaj ne ne ca'vee cuchí' sí na'vee cachee yo' rihaan Jesucristó, qui'yaj nij so' a ma'. 'O se man uxrá yuvii, ne ne ca'vee cachén nij so' a. Che'é dan cavii nij so' xráa ve', ne caya' nij so' yu'uj xráa ve' rej nicun' Jesucristó rá ve', ne tananij nij so' yuvéé táa sí na'vee cachee yo' rihaan Jesucristó a. <sup>5</sup> Dan me se gaa quene'en Jesucristó se vaa cuchumán uxrá rá nij tuvi' sí na'vee cachee yo' se vaa ca'vee nahuun so' qui'yaj Jesucristó, gaa ne cataj so' rihaan sí na'vee cachee yo':

—Navij cacun' xráa so', nanj tinuj —taj Jesucristó rihaan so' a.

<sup>6</sup> Ne ne doj sí naqui'yaj cuu se-tucuanj Moisés rá ve' yo' ga Jesucristó, ne nuchruj raá nij so', ne guun rá nij so': <sup>7</sup> “Me che'é a'mii sí nihánj danj ga. 'O se a'mii so' nana vaa nij rihaan Diose asan. Orún' Diose guun nucuaj tinavij cacun' xráa yuvii nanj á”, guun rá nij sí naqui'yaj cuu se-tucuanj Moisés yo' a. <sup>8</sup> Dan me se quene'en ma'an Jesucristó se vaa guun rá nij so' danj, ne che'é dan cataj so':

—Me che'é nuchruj raá soj nana nanj ga. <sup>9</sup> Tu'va rma'an 'unj se vaa navij cacun' xráa sí nihánj, rá soj a na'. Ca'vee cataj un ní' navij cacun' xráa sí nihánj na'. Ase ca'vee doj cataj ní' naxagaa so', ne nacue so' tuvée so', ne cachee so' cuaj, cataj ní' xa'. <sup>10</sup> Dan me se me rá 'unj xcaj soj cuentá se vaa sí ca'née Diose nicaj yu'unj man yuvii mej ne no xcuún 'unj tinaví' 'unj cacun' xráa nij yuvii man rihaan chumij nihánj adonj —taj Jesucristó rihaan nij so' a.

Dan me se cataj Jesucristó rihaan sí na'vee cachee a:

<sup>11</sup> —Rihaan so' sij na'vee cachee taj 'unj, ne nacue so' tuvée so', ne nan' so'

tucúa so' á —taj Jesucristó rihaan sí naj rihaan yuvéé yo' a.

<sup>12</sup> Gaa ne naxagaa sí na'vee cachee yo', ne nacué so' tuvée so', gaa ne curihanj so' rá ve', ni'yaj taran' nij yuvii man rá ve' a. Ndaa síj, gaa ne ca'anj rá nij yuvii, ne cataj nij yuvii se vaa sa' uxrá qui'yaj Diose, ne:

—Daj chihaa mij ne quene'en ní' suun danj a man adonj —taj nij yuvii yo' a.

*Nana nihánj taj xna'anj se vaa nacúun Jesucristó man Leví, ne canoco' Leví man so' a*

<sup>13</sup> Gaa ne curihanj uún Jesucristó, ca'anj so' tu'va na lacuaná, gaa ne ca'na' cunudanj nij yuvii rej vaj so', gaa ne tucu'yón so' man nij yuvii a.

<sup>14</sup> Veé danj vaj so', ne quene'en so' man sí cu'naj Leví ta'níi sí cu'naj Alfeo, ne dan me se ne so' 'o ve' a'néj nii puextó, ne a'néj so' puextó man yuvii a. Gaa ne cataj Jesucristó rihaan so', ne:

—Canocó' so' manj, ca'anj ní' á —taj Jesucristó rihaan so' a.

Gaa ne naxumaan so', ne canoco' so' man Jesucristó, ca'anj so' a.

*Nana nihánj taj xna'anj se vaa me rá Jesucristó racuj so' man nij sí tumé cacun' a*

<sup>15</sup> Dan me se 'o güii yáan Jesucristó rá ve' tucúa sí cu'naj Leví yo', ne ca'na' ndo'o tuvi' so' sí a'néj puextó do', yo'ó nij sí tumé ndo'o cacun' do', ne catúj nij so' rá ve', ne ca'anj cayáan nij so' ga Jesucristó, ne dan me se man rcua'aan nij sí tucu'yón se-nana Jesucristó do', ne chá cunudanj nij so' chraa a. 'O se que'ee ndo'o nij sí tumé cacun' yo' me canoco' se-nana Jesucristó a. <sup>16</sup> Gaa ne nij sí fariseo naqui'yaj cuu se-tucuanj Moisés rihaan yuvii ro', quene'en nij so' se vaa chá Jesucristó chraa do', co'o Jesucristó do', ga nij sí a'néj puextó do', ga yo'ó nij sí tumé ndo'o cacun' do', gaa ne cataj nij so' rihaan nij sí tucu'yón se-nana Jesucristó, ne:

—Me che'é chá sí nihánj chraa ne co'o so' na ga nij sí a'néj puextó do',

ga yo'ó nij síí tumé cacun' do', ga —taj nij so', xná'anj nij so' man nij síí tucu'yón se-nana Jesucristó a.

<sup>17</sup> Ne cuno Jesucristó nana ca'mii nij so', gaa ne cataj so' rihaan nij so' a:

—Síí vaa nucuaj ro', ne nano' nij so' man doctor ma'. Maan síí ran' ro', me síí nano' man doctor adonj. Gaa ne ase vaa síí ran' ro', danj vaa nij síí nihánj adonj. Ne ca'na' 'unj canacunj 'unj man síí sa' ma'. Che'é nij síí tumé cacun' ca'naj se vaa canoco' nij so' se-nanaj adonj. Tzaj ne sese síí sa' me soj, rá soj, ne nuveé sij canacunj 'unj man me soj ma' —taj Jesucristó rihaan nij so' a.

*Nana nihánj taj xna'anj me che'é ne toco' nij síí tucu'yón se-nana Jesucristó x'naa man ma'an nij so' a*

<sup>18</sup> Ne dan me se toco' nij síí tucu'yón se-nana Juan do', nij síí fariseo do', x'naa man ma'an nij so', ne ca'na' nij so' rihaan Jesucristó, ne xná'anj nij so' man Jesucristó, cataj nij so':

—Me che'é, ne toco' núj sij tucu'yón se-nana Juan do', sij tucu'yón se-nana nij síí fariseo do', x'naa man ma'an núj che'é se aráj guee núj rihaan Diose, tzaj ne nij síí tucu'yón se-nana so' me se ne toco' nij so' x'naa man ma'an nij so' ga —taj nij so', xná'anj nij so' man Jesucristó a.

<sup>19</sup> Gaa ne cataj Jesucristó rihaan nij so' a:

—Ase vaa síí cuchruj sa'anj vaa 'unj, ne asa' ca'vee toco' nij síí man gaj x'naa man ma'an nij so', rá soj ga. Ase vaa síí cataj xcaj man chana ne man tuvi' so' do', danj vaa nij síí man nihánj cuano, ne anuú ndo'o cha'anj man nij so', ne se ca'vee toco' nij so' x'naa man ma'an nij so' cuano ma'.

<sup>20</sup> Tzaj ne vaa güii, ne guun yanj 'unj rihaan nij so', qui'yaj yuvi, gaa ne nana rá nij síí nihánj, gaa ne toco' nij so' x'naa man ma'an nij so' adonj.

*Nana nihánj taj xna'anj se vaa nij síí noco' tucuáán nga ro', se guun nucuaj nij so' cunō nij so' se-nana Jesucristó ma'*

<sup>21</sup> Tzaj ne ase vaa yatzij sin' vaa tucuáán nga noco' soj, ne se guun na'nej ní' mantá naca man yatzij nga yo' ma'. 'O se sese qui'yaj ní' danj, ne güii quinanj yuvi yatzij yo', gaa ne nagüej mantá naca yo', ne sese cuxuun yuvi man yatzij yo', ne quisin' yo', gaa ne cunu xij doj yu'uj taj man yatzij nga yo' nanj adonj. <sup>22</sup> Ne dan me se ase vaa nuj nga nuj araa nii na vinó vaa uún soj ei. Ne se ca'vee tucu'yón 'unj se-tucuanj 'unj rihaan soj ma'. 'O se ase vaa na vinó naca vaa nana tucu'yón 'unj, ne se guun caraa yuvi na vinó naca rque nuj nga ma'. Sese danj qui'yaj yuvi, ne cuyanj na vinó cunu xee na vinó, ne se cacua nuj nga ma'. Che'é dan canu yo', ne cayanj na vinó rihaan yo'ó a. Che'é dan araa nii na vinó naca rque nuj naca, ne 'o man sa' na vinó rque nuj yo' a. Che'é dan inanj rihaan síí naca síí ne noco' tucuáán nga tucu'yón 'unj se-nanaj nanj adonj —taj Jesucristó rihaan nij síí tucu'yón se-nana síí cu'naj Juan do', rihaan nij síí tucu'yón se-nana nij síí fariseo do' a.

*Nana nihánj taj xna'anj che'é güii naránj rá ní' a*

<sup>23</sup> 'O güii naránj rá nij yuvi israelitá cachén Jesucristó ga nij síí tucu'yón se-nana so' rque 'o naa 'núú trigó, ne guun che'e nij síí tucu'yón se-nana so' vaj nij so' ne cuta nij so' doj caa trigó a. <sup>24</sup> Gaa ne cataj nij síí fariseo rihaan Jesucristó a:

—Niyaj so' ei. Me che'é 'yaj nij síí tucu'yón se-nana so' danj ga. Ne nó xcúún ní' qui'yaj ní' danj güii naránj rá ma' —taj nij síí fariseo rihaan Jesucristó a.

<sup>25</sup> Gaa ne cataj Jesucristó rihaan nij so' a:

—Me che'é, ne ne naya soj rihaan danj Diose daj qui'yaj síí cu'naj David gaa naá a. Gaa quina'aa rque nij tuvi' nij so', <sup>26</sup> gaa ne catúj so' rá nuvií gaa cayáán síí cu'naj Abiatar xrej atá suun noco'oj, ne chá so' rachrúún taj rihaan se-mesa Diose a. Ne ne nó xcúún so' chá so' rachrúún yo', maan



orún' nij xrej nó xcúún chá rachrúún yo' a. Ne go' uún síí cu'naj David yo' chá nij tuvi' so' uún a. Tzaj ne ne cataj Diose se vaa tumé síí cu'naj David cacun' ma' —taj Jesucristó rihaan nij síí fariseo, <sup>27</sup> gaa ne cataj uún so' rihaan nij síí fariseo a— Maan che'é rej ca'vee cavii sa' nij yuvii me cuchruj Diose güii naránj rá nanj á. Nuveé che'e rej cataj nij yuvii suun navij rá güii naránj rá me qui'yaj Diose man nij yuvii a ma'. <sup>28</sup> Che'é dan me, 'unj sij ca'neé Diose nica'j yu'unj man yuvii ro', no xcúnj quirii ta'ngaj daj qui'yaj yuvii güii naránj rá nanj adonj —taj Jesucristó rihaan nij síí fariseo a.

### 3

*Nana nihánj taj xna'anj se vaa nahuun sa' 'o síí nacoo ra'a, qui'yaj Jesucristó a*

<sup>1</sup> Gaa ne natúj Jesucristó rá ve' tucu'yón nij síí israelitá se-tucuanj Moisés, ne dan me se yáán 'o snó'o nacoo ra'a rá ve' yo' a. <sup>2</sup> Ne nij síí fariseo me se yáán nij so' rá ve' yo', ne tumé uxrá nij so' man Jesucristó sese nahuun yuvii qui'yaj so' gaa güii naránj rá nij yuvii israelitá a. Danj qui'yaj nij so' che'é rej guun rá nij so' cutá' nij so' cacun' xráá Jesucristó a. <sup>3</sup> Gaa ne cataj Jesucristó rihaan síí nacoo ra'a a:

—Naxumaan so' canicun' cayá so' sca'núj núj á —taj Jesucristó rihaan so' a.

<sup>4</sup> Gaa ne xná'anj Jesucristó man nij síí fariseo yo', cataj so', ne:

—No xcúún ní' racúij ní' man tuvi' ní' güii naránj rá ní' na', ase no xcúún ní' qui'yaj chi'ii ní' man tuvi' ní' xa'. Daj qui'yaj ní' rá soj gaa güii naránj rá ní' ga. Ne nó xcúún ní' tinanii ní' man tuvi' ní' rihaan sayuun gaa güii naránj rá gaa a na'. Ni'yaj uun ní' cavi' so' gaa güii naránj rá gaa a na'. —Danj taj Jesucristó rihaan nij so' a.

Tzaj ne dínj tu'va nij so' a. <sup>5</sup> Gaa ne ca'maan rá Jesucristó, ne ni'yaj so' man nij síí fariseo yo' a. 'O se nanó

ndo'o rá so' che'é nij so' se vaa síí nichraj ndo'o nimán me nij so' a.

Gaa ne cataj Jesucristó rihaan síí nacoo ra'a yo' a:

—Tucuá so' ra'á so' á —taj Jesucristó rihaan so' a.

Ne tucuá so' ra'a so', ne cunuu sa' ra'a so' nanj adonj. <sup>6</sup> Gaa ne curihanj nij síí fariseo yo', ne cunuu chre' nij so' ga nij síí noco' man síí cu'naj Herodes, ne ca'anj nij so' rej yaníj, ne guun rá taran' nij so' daj gaa qui'yaj nij so' ne cavi' Jesucristó a.

*Nana nihánj taj xna'anj se vaa xcaj ndo'o nij yuvii cuentá se vaa síí 'yaj nahuun sa' yuvii me Jesucristó a*

<sup>7</sup> Gaa ne cavii Jesucristó ga nij síí tucu'yón se-nana so' rej yo', ne ca'anj so' tu'va na lacuaná a. Ne canoco' uxrá yuvii man so' a. Dan me se síí man estadó Galilea do', <sup>8</sup> síí man estadó Judea do', síí man chuman' Jerusalén do', síí man estadó Idumea do', síí man rej rnej chráá cu'naj Jordán do', síí man chuman' Tiro do', síí man chuman' Sidón do', cuno nij so' nana daj qui'yaj Jesucristó che'é nij síí ran', ne che'é dan ca'na' ndo'o nij so' rihaan Jesucristó a. <sup>9</sup> Gaa ne cataj Jesucristó rihaan nij síí tucu'yón se-nana so' se vaa qui'yaj chuvii nij so' 'o rihoo chéé rihaan na catuú so', gaa ne se gaa nanj curu'maan nij yuvii man so', taj so' a. <sup>10</sup> 'O se nahuun sa' uxrá yuvii, qui'yaj Jesucristó, ndaa síj, gaa ne taran' nij síí ran' ro', canoco' uxrá nij so' man Jesucristó che'é rej ca'vee cano ra'a nij so' man so' gaa ne nahuun sa' nij so', rá nij so' a. <sup>11</sup> Ne nij síí nuu nana chree nimán ro', gaa quene'en nij so' man Jesucristó, ne ca'anj quina'j nij so' rihaan yo'óo tacóo Jesucristó, ne cataj nij nana chree se vaa:

—So' me ta'núí Diose ya adonj —taj nij nana chree rihaan Jesucristó a.

<sup>12</sup> Gaa ne ca'ne' ndo'o Jesucristó suun rihaan nij nana chree se vaa se guun nata' nij so' rihaan nij yuvii che'é so' a.

*Nana nihánj taj xna'anj se vaa quinarii Jesucristó chuvij sí ca'anj nata' se-nana so' a*

<sup>13</sup> Gaa ne cavii Jesucristó xráá quij, ne canacúun so' man nij sí me rá so' ca'na' rihaan so', gaa ne cavii nij so', ne cuchí' nij so' rihaan Jesucristó a. <sup>14</sup> Gaa ne quinarii Jesucristó man chuvij nij so' se vaa guun nij so' apóstol nata' rihaan yuvij che'é so' a. 'O se guun rá so' se vaa cachee chuvij nij so' ga so', ne guun rá so' ca'nej so' man chuvij nij so' ca'mij natáj nij so' rihaan nij yuvij a. <sup>15</sup> Ne guun rá so' nago' so' suun uun chij ra'a nij so' che'é rej ca'vee nahuun sa' nij sí ran' ne quirij nij so' man nij nana chree nimán nij yuvij a. <sup>16</sup> Dan me se cune' Jesucristó man sí cu'naj Simón, ne tucu'náj so' Pedró man Simón a. <sup>17</sup> Ne cune' so' man sí cu'naj Jacobo ta'ní sí cu'naj Zebedeo, ne cune' so' man tinúu Jacobo sí cu'naj Juan, ne tucu'náj so' Boanerges man roj so', ne nana "Boanerges" ro', taj se vaa ase vaa ta'ní ya'anj tu'vij vaa roj so' a. <sup>18</sup> Ne cune' so' man sí cu'naj Andrés do', man sí cu'naj Felipé do', man sí cu'naj Bartolomé do', man sí cu'naj Mateo do', man sí cu'naj Tomás do', man sí cu'naj Jacobo ta'ní sí cu'naj Alfeo do', man sí cu'naj Tadeo do' a. Ne cune' so' man yo'ó sí cu'naj Simón, ne tuvi' nij sí me rá cunu' ga gobiernó man Romá me so' a. <sup>19</sup> Ne cune' Jesucristó man sí cu'naj Judas Iscariote, ne so' me sí tacuachén man Jesucristó rihaan nij sí taj ri'yun man Jesucristó a.

*Nana nihánj taj xna'anj se vaa cuta' nij sí fariseo cacun' rmi' xráá Jesucristó se vaa ca'mii Jesucristó ga sí chree a*

Gaa ne catúj Jesucristó rá ve' a. <sup>20</sup> Gaa ne cunuu chre' ndo'o uún nij yuvij rihaan so', ne dan me se guun chruj ndo'o rihaan Jesucristó ga nij sí tucu'yón se-nana so', qui'yaj nij yuvij, ne ndaa ne gaa ya'núj rihaan Jesucristó ga nij sí tucu'yón se-nana so' cha nij so' chraa, qui'yaj nij yuvij

a. <sup>21</sup> Gaa ne cuchí' nana rihaan nij tuvi' Jesucristó daj ran' so' 'yaj nij yuvij, ne che'é dan ca'anj nij tuvi' Jesucristó quita'aa nij so' man Jesucristó a. 'O se guun rá nij tuvi' Jesucristó se vaa guun snuj Jesucristó a. <sup>22</sup> Gaa ne nij sí naqui'yaj cuu se-tucuanj Moisés sí cavii chuman' Jerusalén ro', cataj nij so' se vaa sí chree uun chij sí cu'naj Beelzebú nuú nimán Jesucristó, ne che'é dan guun nucuaj Jesucristó quirij Jesucristó nana chree nimán yuvij qui'yaj sí chree uun chij yo', taj nij sí naqui'yaj cuu se-tucuanj Moisés yo' a.

<sup>23</sup> Gaa ne canacúun Jesucristó man nij sí naqui'yaj cuu se-tucuanj Moisés, ne nanó so' doj cuentó rihaan nij so', ne dan me se cataj so', ne:

—Asa' ca'vee quirij sí chree sí cu'naj Satanás man ma'an tuvi' so' nana chree nimán nij yuvij, rá nij soj ga. Daj chihaa mij se ca'vee qui'yaj so' danj a man adonj. <sup>24</sup> Ne'en soj se vaa sese vaa 'o nación, ne sese xra' ta'aj nij sí uun chij rihaan nación yo' ne cunu' ma'an nij so' ga tuvi' nij so', ne vaa güii, ne nu' nación yo' quirij nu' nanj adonj. <sup>25</sup> Ne sese unu' ta'aj nij yuvij man 'o barrio ga tuvi' yuvij sí man ma'an barrio yo', ne vaa güii, ne quirij nu' barrio yo', qui'yaj nij so' nanj adonj. <sup>26</sup> Che'é dan me sese unu' sí chree sí cu'naj Satanás ga tuvi' ma'an so', ne sese racu'ij sí chree man 'unj quirij 'unj nana chree nimán nij yuvij, ne se ca'vee guun chij sí chree yo' sese navij tuvi' so' ma'. Maan se quirij nu' so' nanj adonj.

<sup>27</sup> "Ne sese me rá yo' o so' catuu so' rá ve' tucua' sí ru'vee qui'yaj ituu so' si'yaj sí ru'vee yo', ne asino numij so' man sí ru'vee yo', gaa ne canicaj so' catzj so' tucua' sí ru'vee yo' ei. Ne ase vaa 'yaj sí atúj tucua' sí ru'vee ro', danj 'yaj man sí chree yo' chuguanj. Dan me se numij 'unj man so', ne cuano nihánj a'néj 'unj man nu' nij sí 'nij ra'a so' adonj.

<sup>28</sup> "Cataj xna'anj yá yá 'unj rihaan soj cuano se vaa nu' cacun' tumé yu-

vij do', me ma'an nana chilij ca'mij yuvij do', ca'vee tinavij Diose cacun' yo' che'é nij yuvij a. <sup>29</sup> Tzaj ne sese nachri' yo'o so' ni'yaj so' man Nimán Diose, ne daj chihaa mij se quinavij cacun' yo' xraá so' a ma'. Tananj quitaj cacun' yo' xraá so' nu' cavii nu' ca'anj nanj adonj. <sup>30</sup> —Danj cataj Jesucristó rihaan nij síi naqui'yaj cuu se-tucuanj Moisés, che'é se aj cataj nij so' se vaa nana chree nuú nimán so' a.

*Nana nihánj taj xna'anj se vaa ase vaa nii Jesucristó do', ase vaa tinúú Jesucristó do', ase vaa ra'vij Jesucristó do', vaa nij síi uno rihaan Diose a*

<sup>31</sup> Gaa ne ca'na' nii Jesucristó do', tinúú Jesucristó do', ne nicun' nij so' xe' rihaan ve' nuu Jesucristó, ne ca'née nij so' nana rihaan Jesucristó se vaa curihanj so' ca'na' so' rej nicun' nij so' a. <sup>32</sup> Ne yáán ndo'o yuvij nu' anicaj rej ne Jesucristó, ne cataj nii rihaan Jesucristó a:

—Nicun' ní so' nicun' tinúú so' nicun' xe', ne me rá nij so' quene'en nij so' mán so', Jesús —taj nii rihaan Jesucristó a.

<sup>33</sup> Gaa ne cataj Jesucristó rihaan nij síi nata' rihaan so' se vaa:

—Me chana me níi 'unj, rá soj ga. Me síi me tinúú 'unj, rá soj ga —taj Jesucristó rihaan nij so' a.

<sup>34</sup> Gaa ne ni'yaj Jesucristó man nij síi yanj nu' anicaj rej ne so', ne cataj so' a:

—Ni'yaj soj ei. Ase vaa níi 'unj do', ase vaa tinúú 'unj do', vaa nij síi nihánj adonj. <sup>35</sup> Yuvij uno rihaan Diose ro', ase vaa tinúú 'unj do', ase vaa ra'vij 'unj do', ase vaa níi 'unj do', vaa nij so' adonj —taj Jesucristó a.

#### 4

*Nihánj me cuentó nanó Jesucristó che'é 'núú trigó tix'nuu yo'o so' a*

<sup>1</sup> Gaa ne ca'anj Jesucristó tu'va na lacuaná, ne guun che'e so' tucu'yón so' se-nana so' rihaan yuvij tu'va na lacuaná a. Ne dan me se ca'na' ndo'o yuvij rihaan so', ne che'é dan cavii so' rque 'o rihoo chée rihaan na, ne

ca'anj cane so' rque rihoo yo', ne canicun' nij yuvij rihaan yo'óo tu'va na lacuaná yo' a.

<sup>2</sup> Gaa ne tucu'yón so' man nij yuvij, nanó ndo'o so' cuentó rihaan nij yuvij, ne dan me se cataj so' rihaan nij yuvij a:

<sup>3</sup> —Cuno soj ca'mij á. Dan me se curihanj 'o síi me rá cuchruj naa 'núú trigó, ne tix'nuu so' 'núú trigó yo' rihaan yo'óo, <sup>4</sup> ne cayuu doj 'núú trigó yo' rá chrej chée yuvij, ne ca'na' xtâj chá xtâj man 'núú trigó naj rá chrej yo', ne dan me se navij nu' 'núú trigó yo', qui'yaj nij xtâj nanj adonj. <sup>5</sup> Ne yo'ó ta'aj 'núú trigó yo' ro', cayuu rihaan yuvej rej taj catun' yo'óo a. Che'é dan cuaj xra' stanj le'ej a. <sup>6</sup> Veé dan, ne quisij güii, ne cuchrii naa le'ej, qui'yaj naán, che'é se ne ca'vee ca'anj nij yáá naa le'ej yo' a man adonj. <sup>7</sup> Ne yo'ó ta'aj 'núú trigó yo' ro', cayuu sca'núj coj tanj, ne dan me se yoo doj cachij coj tanj yo' rihaan naa le'ej, ne quinavij nu' naa le'ej, qui'yaj coj tanj yo', ne ne cavii sa' naa yo' a man adonj. <sup>8</sup> Ne yo'ó ta'aj 'núú trigó yo' ro', cayuu rihaan yo'óo sa', ne naa yo' ro', cachij sa' a. Dan me se rihaan ta'aj yo'óo sa' yo' ico chi' ya 'núú cavii, qui'yaj 'o 'o 'núú le'ej nii quinij rihaan yo'óo sa' yo', ne rihaan yo'ó ta'aj yo'óo sa' yo' va'nuj chihaa ya 'núú cavii, qui'yaj 'o 'o 'núú le'ej nii quinij rihaan yo'óo sa' yo', ne rihaan yo'ó ta'aj yo'óo sa' yo' cientó ya 'núú trigó cavii, qui'yaj 'o 'o 'núú le'ej nii cayuu rihaan yo'óo sa' yo' uún nanj adonj —taj Jesucristó, <sup>9</sup> gaa ne cataj uún so' — Sese taj yu'uj xrée soj, ne cuno soj nana nihánj ei. —Veé danj quisij cuentó yo' cuentó nanó Jesucristó a.

*Nana nihánj taj xna'anj me che'é nanó ndo'o Jesucristó cuentó che'é nij rasuun rihaan nij yuvij a*

<sup>10</sup> Gaa ne gaa guun yanj so' rihaan nij yuvij, ne nij síi chée ga so' do', chuvij nij apóstol cune' so' man nata' rihaan yuvij che'é so' do', xna'anj nij

so' man so' che'é nij cuentó nanó so' rihaan nij yuvii a.

<sup>11</sup> Gaa ne cataj Jesucristó rihaan nij so' a:

—Xa' soj, tzaj ne tihaan Diose nana rihaan soj daj qui'yaj Diose gaa guun chij Diose rihaan chumii nihánj adonj. Dan me se nana ne ne'en cunudanj yuvii me nana yo' nana tihaan Diose rihaan soj adonj. Ne rihaan yo'ó nij yuvii man rihaan chumii me se inanj cuentó che'é nij rasuun nanoj rihaan nij yuvii, <sup>12</sup> gaa ne ni'yaj nij so' do', nano xrej nij so' do', tzaj ne se quene'en nij so' do', se xcaj nij so' cuentá do', a ma'. 'O se na'vej uxrá rá nij so' canicaj nimán nij so' ne güej cacun' xráá nij so' a man adonj —taj Jesucristó rihaan nij so' a.

*Nana nihánj taj xna'anj me taj cuentó che'é 'núú trigó yo' a*

<sup>13</sup> Gaa ne cataj uún Jesucristó rihaan nij so' a:

—Ne ne ne'en soj me taj cuentó nihánj cuentó che'é 'núú trigó tix'nuu yo'ó so' na'. Ne asa' ca'vee xcaj soj cuentá che'é yo'ó nij cuentó, rá soj ga.

<sup>14</sup> "Dan me se sí tix'nuu 'núú trigó ro', so' me sí nata' se-nana Diose rihaan yuvii adonj. <sup>15</sup> Ne ase vaa 'núú cayuu rá chrej qui'yaj sí tix'nuu 'núú ro', danj vaa ta'aj nij sí uno se-nana Diose, ne dan me se uno nij so' doj tzin', tzaj ne nu' cuno nij so', ne nu' 'na' sí chree sí cu'naj Satanás, ne a'néj sí chree se-nana Diose nana cayuu rque nimán nij so' a.

<sup>16</sup> "Ne vaa ta'aj 'núú trigó cayuu rihaan yujej uún, ne 'núú trigó yo' ro', ase vaa nij sí uno se-nana Diose vaa yo', ne cuaj uun niha' rá nij so' canoco' nij so' nana yo' a. <sup>17</sup> Tzaj ne ataa xcaj sa' nij so' cuentá, ne gaa uun che'e yuvii 'yaj yuvii sayuun man nij so' che'é nana noco' nij so', ne cuaj nu' uun na'aj nij so', ne tanáj nij so' nana yo' cuaj nanj adonj.

<sup>18</sup> "Ne ase vaa nij 'núú trigó cayuu sca'núj coj tanj ro', danj vaa yo'ó ta'aj nij yuvii uún, ne dan me se uno nij so'

se-nana Diose, <sup>19</sup> tzaj ne nanó ndo'o rá nij so' che'é se man rihaan chumii nihánj, ne me ndo'o rá nij so' qui'yaj canaán nij so' sa'anj, don tiha' yu'unj nij so' man ma'an nij so' che'é sa'anj, ne me ma'an yo'ó nij rasuun nano' ndo'o nij so', ne che'é dan tanáj xco nij so' se-nana Diose, ne ne 'yaj nij so' se sa' a ma'.

<sup>20</sup> "Ne 'núú trigó cayuu rihaan yo'ó sa' ro', ase vaa sí uno se-nana Diose vaa yo', ne uun niha' rá so' uno so' nana yo', ne nuu sa' nimán so' rihaan Diose a. Ne sa' doj tzin' 'yaj ta'aj nij so', ne sa' doj 'yaj yo'ó ta'aj nij so', ne sa' uxrá doj 'yaj yo'ó ta'aj nij so' uún nanj adonj. —Veé danj quisij nana ca'mii Jesucristó che'é cuentó yo' a.

*Nihánj me cuentó nanó Jesucristó che'é aga'ya'an a*

<sup>21</sup> Gaa ne cataj Jesucristó rihaan nij so' a:

—Ne gaa rmi' me se achrón nii ya'an raá aga' ya'an, ne axríj yuve nii aga' ya'an yo' rque 'o chrúun do', rque yuvéé do', rá soj na'. Taj ma'. Sese rmi', ne uta' nii aga' yo' rej xta', gaa ne cuchuguun sa' ndo'o adonj. <sup>22</sup> Dan me se a 'o rasuun caxríj yuve yuvii se qui'nij yuve ma'. Ya nurihanj yo' vaa güii, ne cunudanj yuvii quene'en, vaa güii adonj. Ne cunudanj rasuun 'yaj yuve yuvii quene'en daj a yuvii vaa güii ei.

<sup>23</sup> Sese taj yu'uj xréé soj, ne cuno soj nana nihánj ei —taj Jesucristó rihaan nij so', <sup>24</sup> gaa ne cataj uún so' se vaa— Nuchruj raá soj nana ca'mij nihánj ei. Sese qui'yaj suun uxrá soj nari' soj nana nihánj, ne rque ndo'o Diose doj nana nari' uún soj nanj adonj. <sup>25</sup> 'O se sí nari' nana ro', doj a nari' uún so', qui'yaj Diose nanj adonj. Ne sí na'vej rá nari' sa' nana ro', tananj ca'nee Diose doj nij nana nari' so' man so', ne quinaj uun so' nanj adonj —taj Jesucristó rihaan nij so' a.

*Nihánj me cuentó nanó Jesucristó che'é naa a*

<sup>26</sup> Gaa ne cataj Jesucristó:



—Dan me se ase vaa achij naa cuchruj 'o snó'o ro', danj gaa guun chij Diose rihaan chumiij nihánj, ne snó'o yo' ro', cunô so' 'núú rihaan yo'óó, <sup>27</sup> ne síj cunô so', ne otoj so' rej nij, ne naxagaa so', ne danj 'yaj so' daj a güii, ne dan me se xra' naa le'ej, ne achij naa le'ej, ne ne ne'en uxrá snó'o me che'é me xra' naa ne achij naa a ma'. <sup>28</sup> Achij ma'an naa rihaan yo'óó, ne dan me se asino yaan xra' naa, gaa ne anó tihaj, gaa ne uun xij yumíi naa a. <sup>29</sup> Gaa ne gaa quisíj tan' xráa naa, ne a'née snó'o man nij síj quiríi naa nanj á. 'O se quisíj tió quiríi níi naa nanj adonj —taj Jesucristó a.

*Nihánj me cuentó nanó Jesucristó che'é caân cuêj mostazá xlá a*

<sup>30</sup> Gaa ne cataj uún Jesucristó:

—Daj gaa guun chij Diose rihaan chumiij nihánj, rá soj ga. <sup>31</sup> Dan me se ase vaa achij caân cuêj mostazá xlá ro', danj gaa guun chij Diose rihaan chumiij nihánj adonj. Dan me se axríj níi caân yo' rihaan yo'óó, ne caân yo' me se caân le'ej níi doj vaa caân yo' rihaan cunudanj nij caân man rihaan chumiij nihánj, <sup>32</sup> tzaj ne dan me se gaa axríj níi caân yo' rihaan yo'óó, ne achij caân yo', ne xij doj uun yo' rihaan cunudanj nij coj man tacaan, ne xcaan ndo'o vaa ra'a cuêj yo', ne a'vee 'yaj nij xtâj vaj rej xta' saca' nij xo' raá cuêj yo', ne aráán cachun' xráa nij xo', 'yaj cuêj mostazá xlá yo' nanj adonj —taj Jesucristó a.

*Nana nihánj taj xna'anj se vaa inanjan cuentó nanó Jesucristó rihaan nij yuvíi a*

<sup>33</sup> Dan me se que'ee cuentó vaa danj cuentó che'é nij rasuun nanó Jesucristó rihaan nij yuvíi, nata' so' se-nana Diose rihaan nij yuvíi, ndaa vaa guun nucaj nij yuvíi cunó nij yuvíi a. <sup>34</sup> Taj vaj yo'ó nana nanó Jesucristó rihaan nij yuvíi a ma'. Maan inanjan cuentó che'é nij rasuun nanó Jesucristó rihaan nij so', tzaj ne rihaan ma'an nij síj tucu'yón se-nana so' me se ataj xna'anj so' che'é nij cuentó yo' rihaan nij so' a.

*Nana nihánj taj xna'anj se vaa ca'ne' Jesucristó suun rihaan na do', rihaan nana do', se vaa canicun' yo' a*

<sup>35</sup> Gaa ne rej ti'nuu güii yo' me se cataj Jesucristó rihaan nij síj tucu'yón se-nana so', ne:

—Ca'anj ní' ndaa yo'ó níchrej tu'va na lacuaná á —taj so' rihaan nij so' a.

<sup>36</sup> Gaa ne nij síj tucu'yón se-nana Jesucristó me se ca'anj rihoo nuu nij so' ga Jesucristó, qui'yaj nij so', ne quináj nij yuvíi tu'va na lacuaná, ne vaa doj nij rihoo canoco' xcó nij so' a. <sup>37</sup> Gaa ne cavii uxrá nana yuva rihaan na lacuaná, ne quinaan ndo'o rihaan na, ne catúj uxrá na rque rihoo yo', ne daj doj caraa nu' rque rihoo, qui'yaj na a. <sup>38</sup> Ne Jesucristó me se naj so' rej sihuu rihoo, ne 'nij raá so' camá, otoj so' a. Gaa ne narii nij síj tucu'yón se-nana Jesucristó nej rihaan Jesucristó, ne cataj nij so':

—Nihánj me se daj doj caví' ní', maestro, ne me che'é ne rihuun rá so' ga —taj nij so' rihaan Jesucristó a.

<sup>39</sup> Gaa ne canicun' caya Jesucristó, ne caxríj yuva so' man nana, ne cataj so' rihaan na lacuaná:

—Gaa dínj rihaan so', ne se quinaán so' ma' —taj so', gaa ne nu' canicun' nana, ne canicun' dínj rihaan na lacuaná yo', qui'yaj Jesucristó nanj adonj.

<sup>40</sup> Gaa ne cataj Jesucristó rihaan nij síj tucu'yón se-nana so' a:

—Me che'é chu'vi' ndo'o nimán soj ga. Ataa cuchuman sa' rá soj ní'yaj soj manj na' —taj so' rihaan nij so' a.

<sup>41</sup> Gaa ne kuchu'vi' ndo'o nij so', ne xná'anj nij so' man tuvi' nij so', cataj nij so':

—Daj sij me síj nihánj ga. Ndaa nana do', ndaa na do', uno a'mii so' ason —taj nij so' rihaan tuvi' nij so' a.

## 5

*Nana nihánj taj xna'anj se vaa quiríi Jesucristó man nij nana chree nimán 'o snó'o a*

<sup>1</sup> Gaa ne ca'anj nij so' ndaa níchrej tu'va na lacuaná yo', ndaa rej ne nij

síi man chuman' Gadara a. <sup>2</sup> Ne rej yo' me se taj yu'uj yuvej rej achin' nii xngangá a. Dan me se nanij Jesucristó ga nij síi tucu'yón se-nana so' rque rihoo, ne nu' curihanj 'o snó'o nuu nana chree nimán rque yu'uj yuvej yo', ne cuchi' so' rihaan Jesucristó a.

<sup>3</sup> Ne síi nuu nana chree nimán me se cu'yón so' cayáan so' rque yu'uj yuvej yo', ne ne ca'vee numij nij yuvii man rej yo' aga' ne' man so' a. <sup>4</sup> 'O se aj uun que'ee ndo'o numij nij yuvii ne' do', aga' ne' do', man so', tzaj ne cuxra' so' aga' ne', ne ca'ne' so' ne' do', ne a 'o yuvii taj quisij naqui'yaj camanj man so' a. <sup>5</sup> Ne niganj me se nuvii nigan' cayáan so' rque nij yu'uj yuvej do', vaj so' xráa quij do', ne caguáj ndo'o so', ne nicaj so' yahij sihaa ca'ne' ndo'o so' nee man ma'an so' uun a.

<sup>6</sup> Dan me se gaa quene'en so' man Jesucristó se vaa gan' uxrá vaj Jesucristó, ne cunanj so' ndaa rej vaj Jesucristó, ne na'vij so' rihaan Jesucristó, <sup>7</sup> ne nucuaj ndo'o caguáj so' rihaan Jesucristó, ne cataj so':

—Aj ne'én 'unj se vaa ta'nij Diöse síi sa' ndo'o mé so', Jesús. Me che'é 'ná' so' rej né 'unj ga. Cataj xna'anj sa' 'unj rihaan so' ni'yaj Diöse se vaa se qui'yáa so' sayuun manj ma' —taj síi nuu nana chree nimán rihaan Jesucristó a.

<sup>8</sup> Danj ca'mii so' rihaan Jesucristó che'é se aj cataj Jesucristó rihaan so' se vaa: “Rihaan so' nana chree nuu nimán síi nihánj cataj xna'anj 'unj se vaa curihanj so' nimán síi nihánj á”, taj Jesucristó, tzaj ne ne guun rá nana chree curihanj so' ma'.

<sup>9</sup> Gaa ne xna'anj Jesucristó man nana chree, ne cataj so':

—Daj cu'naj so' ga —taj Jesucristó rihaan so' a.

Ne:

—X'ne' nocoo ndo'o me núj, ne que'ee ndo'o núj á —taj nana chree rihaan Jesucristó, <sup>10</sup> ne cachín ni'yaj nij nana chree yo' rihaan Jesucristó se vaa se ca'neé Jesucristó man nij nana chree ndaa yo'ó rej yanij ma'.

<sup>11</sup> Dan me se rej tacaan rej nicun' nij so' me se chéé 'o x'ne' nocoo xcáa, chá nij xo' coj, <sup>12</sup> gaa ne cachín ni'yaj nij nana chree rihaan Jesucristó, cataj nij so':

—Ca'nej so' man núj catuu núj nimán nij xcáa á —taj nij nana chree rihaan Jesucristó a.

<sup>13</sup> Gaa ne ca'vej rá Jesucristó qui'yaj nij so' danj, gaa ne curihanj nij so' nimán snó'o yo', gaa ne catúj nij so' nimán nij xcáa, ne dan me se ruvaa uxrá tacaan nicun' tu'va na lacuaná rej vaj nij xcáa yo', ne gaa catúj nij nana chree yo' nimán nij xcáa yo', gaa ne cunanj ndo'o nij xo', ca'anj nij xo', ne veé danj vaj nij xo', ne quiniij nij xo' rque na, ne canó xráa nij xo' nanj adonj. Ne dan me se vij míj xcáa me nij xcáa canó xráa rque na a.

<sup>14</sup> "Ne nij síi tumé nij xcáa ro', cunanj nij so' ca'anj cataj xna'anj nij so' rihaan nij yuvii man chuman' do', rihaan nij yuvii man tacaan do' a. Gaa ne dan me se ca'na' ni'yaj nij yuvii se vaa guun, gaa ne ca'na' nij so' rihaan Jesucristó, <sup>15</sup> gaa ne quene'en nij so' man síi curihanj nana chree nimán a. Aj nanuú so' sagan' so', ne dínj ne so' rihaan Jesucristó a. Ne aj ti'inj se snúú so', ne nuu sa' so' a. Gaa ne cuchu'vi' ndo'o nij yuvii se vaa qui'yaj Jesucristó, <sup>16</sup> gaa ne cataj xna'anj nij síi quene'en yo' rihaan nij yuvii daj qui'yaj Jesucristó che'é síi nuu nana chree nimán do', ga nij xcáa do', <sup>17</sup> gaa ne guun che'e nij yuvii cachín ni'yaj nij yuvii rihaan Jesucristó se vaa curihanj so' rej yanj nij so' ca'anj so' rej yanij a.

<sup>18</sup> "Che'é dan cavii Jesucristó rque rihoo chéé rihaan na, gaa ne dan me se cachín ni'yaj síi curihanj nana chree nimán rihaan Jesucristó se vaa ca'vej rá Jesucristó ca'anj so' ga Jesucristó a. <sup>19</sup> Tzaj ne ne ca'vej rá Jesucristó ca'anj so' ga Jesucristó a. Tananj cataj Jesucristó rihaan so' se vaa:

—Cavii so' nán' so' ve' tucua so' rej yanj nij tuví' so', ne cataj xna'anj so' rihaan nij so' nu' se vaa qui'yaj síi 'nij

ra'a man ní che'é so', ne cataj so' se vaa cunuu 'ee rá so' ni'yaj so' mán so' á —taj Jesucristó rihaan sí curihañj nana chree nimán a.

<sup>20</sup> Gaa ne ca'anj sí curihañj nana chree nimán, ne guun che'e so' ca'mii natáj so' rihaan nij yuviñ man rej cu'naj Chi' Chuman', ne cataj xna'anj so' nu' se vaa qui'yaj Jesucristó che'é so' a. Ne ca'anj ndo'o rá cunudanj nij yuviñ cuno se-nana so' a.

*Nana nihánj taj xna'anj che'é chala cunii do', che'é chana hij do', nahuun sa', qui'yaj Jesucristó a*

<sup>21</sup> Dan me se nuu Jesucristó rque rihoo chée rihaan na, ne ca'anj uún so' ndaa níchrej tu'va na lacuaná, gaa ne cunuu chre' ndo'o yuviñ rihaan so', ne vaj so' tu'va na lacuaná a. <sup>22</sup> Gaa ne dan me se ca'na' yo'o nij sí 'nij ra'a ve' tucu'yón nij yuviñ israelitá se-tucuañj Moisés, ne Jairo cu'naj so' a. Dan me se quene'en sí cu'naj Jairo man Jesucristó, gaa ne canicun' ruj so' rihaan Jesucristó, <sup>23</sup> gaa ne cachíñ ni'yaj uxrá so' rihaan Jesucristó, ne dan me se cataj so' se vaa:

—Ta'níj chala cunii ro', ran' ndo'o no', ne daj doj cavi' no', ne me rá 'unj cuchí' so' ve' tucuañj, ne cuta' so' ra'á so' raa no', ne nahuun sa' no', ne se cavi' no', qui'yáá so' ma' —taj sí cu'naj Jairo rihaan Jesucristó a.

<sup>24</sup> Gaa ne ca'anj Jesucristó ga so', ne canoco' uxrá yuviñ xcó roj so', ne ndaa raan ma'an chrej vaj yuviñ ga nij so' a.

<sup>25</sup> Dan me se sca'núj nij so' vaj 'o chana ran' ndo'o, ne quisíj chuvij ya yo' xra' ton man no' a. <sup>26</sup> Ne aj quiran' ndo'o no' sayuun, qui'yaj que'ee nij doctor, ne aj cutun' no' cunudanj sa'anj vaa rihaan no', tzaj ne taj se qui'yá' a doj nahuun sa' no' qui'yaj nij doctor yo' a ma'. Tananj doj a ran' no' nanj adonj. <sup>27</sup> Gaa ne aj cuchí' nana rihaan no' che'é nu' se vaa qui'yaj Jesucristó che'é nij yuviñ, ne che'é dan ca'na' no' sca'núj nij yuviñ rej xcó Jesucristó, gaa ne canó ra'a no' doj tu'va sagan' so' a. <sup>28</sup> 'O se guun rá

no' se vaa: “Sese cano ra'aj sagan' Jesucristó, ne nahuun sa' 'unj nanj adonj”, guun rá no' a. <sup>29</sup> Dan me se síj canó ra'a no' sagan' Jesucristó, gaa ne nu' canicun' ton man no' cuaj a. Ne quene'en no' se vaa nahuun sa' no', qui'yaj Jesucristó a. <sup>30</sup> Dan me se nu' canó ra'a no' sagan' Jesucristó, ne nu' xcaj Jesucristó cuentá se vaa nahuun yuviñ qui'yaj so' a. Che'é dan canicaj so', ne xná'anj so', cataj so':

—Me sí canó ra'a sagan' 'unj ga —taj so' a.

<sup>31</sup> Gaa ne cataj nij sí tucu'yón se-nana Jesucristó se vaa:

—Ne'én so' se vaa raan ndo'o vaj nij yuviñ ga so', ne me che'é xná'anj so' me sí canó ra'a sagan' so' ga —taj nij so', xná'anj nij so' man Jesucristó a.

<sup>32</sup> Gaa ne canicaj Jesucristó, ne quene'en so' man chana canó ra'a tu'va sagan' so' a. <sup>33</sup> Ne dan me se cuchu'vi' ndo'o no' ne ndaa ri'ij man no', ne aj ne'en no' se vaa nahuun sa' no' a. Gaa ne ca'anj no', ne canicun' ruj no' rihaan Jesucristó, ne cataj ya no' rihaan Jesucristó nu' se vaa qui'yaj no' a.

<sup>34</sup> Gaa ne cataj Jesucristó rihaan no' a:

—Nahuún so' che'é se amán rá so' ni'yaj so' manj, nocoj. Ve'é ca'anj so', ne díñj gaa nimán so' ca'anj so' á. Gaa nu'cuáá so', ne aj x'néj nu' chí'ii yo' xráá so' nanj ei —taj Jesucristó rihaan chana yo' a.

<sup>35</sup> Ataa navij ca'mii Jesucristó, ne ca'na' 'o sí cavi' tucua' sí cu'naj Jairo, ne cataj so' rihaan Jairo a:

—Aj cavi' ta'níj so', ne taj che'é caraa chrúú so' rihaan maestró a ma' —taj sí 'na' cataj xna'anj rihaan Jairo a.

<sup>36</sup> Dan me se cuno Jesucristó nana ca'mii sí ca'na', gaa ne cataj so' rihaan sí cu'naj Jairo a:

—Se cuchu'ví' so' ma'. Maan se cuchuman ya rá so' ni'yaj so' manj á —taj Jesucristó rihaan so' a.

<sup>37</sup> Dan me se ne ca'vej rá Jesucristó canoco' a doj nij yuviñ man so', ne maan Pedró do', Jacobo do', Juan

tinúú Jacobo do', ca'vej so' canoco' man so' a. <sup>38</sup> Gaa ne cuchi' so' rihaan ve' tucuá Jairo, ne quene'en Jesucristó se vaa ta'vee uxrá nij yuvij man rá ve' a. <sup>39</sup> Gaa ne catúj Jesucristó rá ve', ne cataj so' rihaan nij yuvij a:

—Me che'é ta'vee ndo'o nij soj ga. Ne cavij chala cunii nihánj ma'. Maan se otoj uun no' nanj á —taj Jesucristó rihaan nij so' a.

<sup>40</sup> Gaa ne ca'nga' nacoj nij yuvij ni'yaj nij yuvij man Jesucristó a. Tzaj ne quirii Jesucristó man cunudanj nij yuvij xe', gaa ne nicaj so' man rej chala cunii do', man nii chala cunii do', man va'núj nij sí ca'na' ga so' do', ne catúj so' rá cuarto naj chala cunii yo' a.

<sup>41</sup> Gaa ne quita'aa Jesucristó ra'a chala cunii, ne cataj so' rihaan chala cunii yo' a:

—Talita, cumi —taj so' rihaan no' xna'ánj a'mii ma'an so' a. Ne se-nana so' taj: “Naxagaa so', chala cunii”, taj nana ca'mii Jesucristó rihaan chala cunii yo' a.

<sup>42</sup> Nu' ca'mii Jesucristó nana dan, ne nu' naxagaa chala cunii yo', chée no' cuaj a. Nahuun i'na' no' a.

Ne chala cunii vaj chujij yo' me no' a.

Ne nij sí quene'en, tzaj ne ca'anj ndo'o rá nij so' a. <sup>43</sup> Gaa ne ca'ne' uxrá Jesucristó suun rihaan nij so' a:

—A 'ó yuvij se cataj xna'anj nij soj rihaan daj qui'yáj che'é chala cunii ma' —taj Jesucristó rihaan nij so', ne cataj so' se vaa rque nii doj se chá cha no' a.

## 6

*Nana nihánj taj xna'anj se vaa ne ca'vej rá nij sí man chiháán Jesucristó chuman' cu'naj Nazaret cunō nij so' nana ca'mii Jesucristó a*

<sup>1</sup> Gaa ne curihanj Jesucristó ve' yo', gaa ne namán so' rej chiháán so', ne canoco' nij sí tucu'yón se-nana so' man so' a. <sup>2</sup> Ne güii naránj rá nij yuvij israelitá me se ca'anj so' ve' tucu'yón nij sí man chiháán so' se-tucuanj Moisés, ne guun che'e so' tucu'yón so'

man nij sí man rá ve' yo' a. Ne ca'anj ndo'o rá nij yuvij gaa cuno nij yuvij se-nana Jesucristó, gaa ne cataj nij yuvij:

—Me rej nari' sí nihánj nana cu avii raá sí nihánj ga. Me rej nari' so' suun sa' 'yaj so' ga. <sup>3</sup> Nuveé sij acój chruun sí ne chiháán ní' me so' na'. Ne ta'ní chana cu'naj Mariá me so' á. Ne tinúú sí cu'naj Jacobo do', sí cu'naj José do', sí cu'naj Judas do', sí cu'naj Simón do', me so' á. Ne nij ra'vij so' me chana ne chiháán ní' á —taj nij sí man chiháán Jesucristó rihaan tuvi' nij so', ne guun nacoj rá nij so' ni'yaj nij so' man Jesucristó a.

<sup>4</sup> Gaa ne cataj Jesucristó rihaan nij so' a:

—Me rej ma'an vaj 'o sí nata' se-nana Diose, ne aráj cochroj nij yuvij rihaan so', tzaj ne nij yuvij man chiháán so' do', nij tuvi' so' do', nij sí yanj tucuá so' do', na'vej rá cara cochroj rihaan so' ma' —taj Jesucristó rihaan nij sí man chiháán so' chuman' cu'naj Nazaret yo' a.

<sup>5</sup> Ne ne guun nucuaj Jesucristó qui'yaj so' a doj suun sa' nocoo chiháán so', maan se doj sí ran' me se cuta' so' ra'a so' raá ne nahuun sa' nij so', qui'yaj so' a. <sup>6</sup> Ne caráya'anj ndo'o so' se vaa ne cuchuman rá nij sí man chiháán so' ni'yaj nij so' man so' a. Ne cavii so' ca'anj so' nij chuman' naj nichrun', tucu'yón so' se-nana so' man nij yuvij a.

*Nana nihánj taj xna'anj se vaa ca'née Jesucristó man chujij nij sí tucu'yón se-nana so' ca'anj ca'mii natáj nij so' a*

<sup>7</sup> Gaa ne canacúun Jesucristó man chujij nij sí tucu'yón se-nana so', ne cuchi' nij so' rihaan so', gaa ne guun che'e so' ca'née so' man vij vij nij so', ne go' so' se nucuaj man nij so', gaa ne ca'vee qui'yaj canaán nij so' rihaan nij nana chree a. <sup>8</sup> Ne ca'ne' so' suun rihaan nij so' se vaa a doj rasuun se nicaj nij so' gaa vaj nij so' chrej; maan orún' chruun garroté me se ca'vee nicaj nij so', tzaj ne rachruún



do', nanj do', se nicaj nij so', ne se ca'vee cunuû sa'anj rque se-caxran' nij so', <sup>9</sup> tzaj ne qui'nij tacóo nij so' canj, ne orún' yatzíj quitaj xráá nij so', taj Jesucristó rihaan nij so', <sup>10</sup> ne:

—Me ma'an ve' caran' soj, ne yo'o cayáán soj ve' yo' ndaa se curihanj soj chuman' yo' á. <sup>11</sup> Ne me rej ma'an se ca'mii sa' nij yuvii ga soj do', se ca'vej rá nij yuvii cunō nij yuvii nana a'mii soj do', ne asa' cavii soj rej yo', ne nacunan' soj tacóo soj tucuayuu soj yo'óo tachruu canó tacóo soj, ne ndaa dan, gaa ne xcay nij sí man rej yo' cuentá se vaa tumé ndo'o nij so' cacun' se vaa ne ca'vej rá nij so' cunō nij so' se-nana soj adonj. Cataj xna'anj yá yá 'unj rihaan soj cuano se vaa doj a quiran' nij so' cacun' rihaan nij yuvii man chuman' Sodoma ga chuman' Gomorra nanj adonj —taj Jesucristó rihaan chuvij nij so' a.

<sup>12</sup> Gaa ne ca'anj nij so', gaa ne ca'mii natáj nij so' rihaan nij yuvii se vaa canicaj rá nij yuvii canoco' nij yuvii chrej sa', <sup>13</sup> ne quirii ndo'o nij so' man nij nana chree nimán nij yuvii, ne cutáj ndo'o nij so' casté raaj nij sí ran', ne nahuun sa' nij sí ran', qui'yaj nij so' a.

*Nana nihánj taj xna'anj se vaa cavi' Juan sí cuta' ne man yuvii, qui'yaj sí nicaj suun cu'naj Herodes a*

<sup>14</sup> Dan me se cuchi' nana rihaan sí nicaj suun rey cu'naj Herodes che'é nu' se vaa qui'yaj nij sí tucu'yón se-nana Jesucristó, ne nu' cachra' cha'nuu ndo'o se-nana Jesucristó a. Gaa ne cataj sí cu'naj Herodes se vaa:

—Cunuu i'na' ya uún sí cu'naj Juan, raj á. Ése sí cu'naj Juan me sí guun nucuj qui'yaj nij suun sa' nocoo yo' nanj adonj —taj sí cu'naj Herodes a.

<sup>15</sup> Ne yo'ó ta'aj nij yuvii me se cataj se vaa sí cu'naj Elías sí nata' se-nana Diose gaa naá me Jesucristó, ne yo'ó ta'aj nij yuvii uún cataj se vaa yo'ó nij sí nata' se-nana Diose gaa naá me Jesucristó a. <sup>16</sup> Dan me se cunō sí

cu'naj Herodes daj guun rá nij yuvii, gaa ne cataj so':

—Sí cu'naj Juan sí ca'ne' nij tanuu cúu yave qui'yáj ro', aj cunuu i'na' ya so' chuguanj —taj Herodes a.

<sup>17</sup> 'O se ma'an sí cu'naj Herodes me sí ca'née man nij tanuu quita'aa nij tanuu man sí cu'naj Juan asij rque doj, ne numíj nij tanuu man sí cu'naj Juan, ne caxríj sí cu'naj Herodes taga' man sí cu'naj Juan, che'é chana cu'naj Herodías nica tinúú Herodes sí cu'naj Felipé a. 'O se xcay sí cu'naj Herodes man chana Herodías yo', <sup>18</sup> gaa ne cataj sí cu'naj Juan rihaan sí cu'naj Herodes se vaa:

—Ne nó xcúún so' xcay so' man choco' so' ma' —taj Juan rihaan Herodes a.

<sup>19</sup> Che'é dan nachri' chana cu'naj Herodías ni'yaj no' man Juan, ne guun ndo'o rá no' cavi' Juan, tzaj ne ne ca'vee ma'. <sup>20</sup> 'O se cuchu'vi' sí cu'naj Herodes ni'yaj so' man Juan, che'é se quene'en Herodes se vaa sí nica rá sí sa' inanj nimán rihaan Diose me Juan, ne che'é dan caráán Herodes rihaan chi'ij che'é Juan a. Dan me se gaa cunō Herodes se-nana Juan, ne quinanó ndo'o rá so', tzaj ne guun niha' rá so' ca'mii Juan rihaan so' a.

<sup>21</sup> Dan me se quisíj 'o güii ca'vee qui'yaj canaán chana cu'naj Herodías yo', ne dan me se se-cha'anj sí cu'naj Herodes me yo', ne ca'ne' so' suun se vaa canuû se-cha'anj so', ne canacúún so' ca'na' nij sí 'yaj suun ga ma'an so' do', nij tanuu uun chij doj do', nij sí uun chij rihaan estadó Galilea do', ca'na' cha ni'yánj nij so' ga so' a. <sup>22</sup> Gaa ne catúj ta'nii chana cu'naj Herodías rej anuû cha'anj, ne ra'ánj no', ne guun niha' uxrá rá Herodes ga nij sí ca'na' cha'anj yo' ni'yaj taran' nij so' man ta'nii Herodías a. Gaa ne cataj Herodes rihaan chana yaan yo':

—Cunō nihánj me se a me ma'an rasuun me rá so' cachinj so' rihanj, ne rque 'unj mán so' ei —taj so', <sup>23</sup> gaa ne cataj uún so'— Cutá' yá 'unj raaj Diose

se vaa a me ma'an rasuun cachinj so' rihanj, ne rque 'unj man so' a. Ndaa yanej yo'óo uun chij 'unj rihaan ro', rque 'unj man so' nanj adonj —taj Herodes rihaan chana yaan yo' a.

<sup>24</sup> Gaa ne curihanj chana yaan, ne xná'anj no' man nii no' chana cu'naj Herodías, ne cataj no':

—Me se cachinj 'unj, ga nahiin —taj no' rihaan nii no' a.

Gaa ne chana cu'naj Herodías cataj:

—Cachinj so' cúu yave sí cu'naj Juan sí cuta' ne man yuvij á —taj no' rihaan ta'níi no' chana yaan yo' a.

<sup>25</sup> Gaa ne nu' catúj ra'yanj chana yaan yo' rej man sí nicaj suun rey cu'naj Herodes, ne cachín ni'yaj no' rihaan so', cataj no':

—Me rá 'unj se vaa maan orá cuano ro', ca'nej so' cúu yave sí cu'naj Juan sí cuta' ne man yuvij rque aga' rco'oo, ne rque so' rihanj cuaj á —taj no' rihaan Herodes a.

<sup>26</sup> Gaa ne nanó ndo'o rá sí nicaj suun rey cu'naj Herodes yo' che'é se aj cuta' so' raá Diose ne aj cuno taran' nij sí yanj rihaan mesá ga so', ne che'é dan ne ca'vej rá so' tari' so' se-nana so' se vaa se qui'yaj so' ndaa vaa taj chana yaan yo' rihaan so' a. <sup>27</sup> Gaa ne nu' ca'née so' man sí ticavi' man sí cu'naj Juan, ne ca'ne' so' suun se vaa nicaj so' cúu yave Juan ca'na' so' a. <sup>28</sup> Gaa ne ca'anj sí ticavi' man Juan taga', ne ca'ne' so' cúu yave Juan, ne ca'née so' cúu yave Juan rque aga' rco'oo, nicaj so', ca'na' so', ne rque so' man chana yaan, ne nago' chana yaan yo' man nii no' a.

<sup>29</sup> Gaa ne gaa cuchil' nana rihaan nij sí tucu'yón se-nana Juan se vaa cavi' Juan, ne ca'na' nij so', ne nicaj nij so' cúu man Juan, cachin' nij so' rque yu'uj yuvej a.

*Nana nihánj taj xna'anj se vaa ca'vee quirii Jesucristó se chá 'un' mjí snó'o a*

<sup>30</sup> Dan me se nij sí ca'née Jesucristó ca'anj nata' rihaan yuvij che'é so' ro', cunuu chre' nij so' ga Jesucristó, ne nata' nij so' rihaan Jesucristó che'é cunudanj nij suun sa' nocoo qui'yaj

nij so' do', che'é cunudanj nij nana tucu'yón nij so' man nij yuvij do' a.

<sup>31</sup> Gaa ne cataj Jesucristó rihaan nij so' a:

—Ca'anj ní' doj rej tacaan rej taj vaj yuvij ne, gaa ne ca'vee naraan rá nij soj doj á —taj Jesucristó rihaan nij so' a.

'O se ca'na' ndo'o yuvij do', ca'anj ndo'o yuvij do', ne ne vaa ya'núj rihaan nij so' chá nij so' a doj chraa a.

<sup>32</sup> Gaa ne cavii nij so' rque rihoo chéé rihaan na, ne ca'anj orún' nij so' rej tacaan a. <sup>33</sup> Tzaj ne quene'en ndo'o nij yuvij se vaa ca'anj nij so', ne xcaj yuvij cuentá se vaa ca'anj nij so', qui'yaj nij sí quene'en, gaa ne chéé tajoj nij yuvij man cunudanj nij chuman' naj rej yo', ne cunanj nij yuvij, cunuu chre' nij yuvij rej ca'anj nij tuvi' Jesucristó, ne asino nij yuvij cuchil', ne na'vij nij yuvij ca'na' Jesucristó a. <sup>34</sup> Ne nanij Jesucristó rá rihoo, ne quene'en so' se vaa aj man uxrá yuvij, ne cunuu 'ee rá so' man nij yuvij a. 'O se ase vaa matzinj nuvi' sí tumé man vaa nij yuvij, ni'yaj Jesucristó, gaa ne guun che'e so' tucu'yón ndo'o so' se-nana so' man nij yuvij a.

<sup>35</sup> Dan me se cachén ndo'o orá, gaa ne ca'na' nij sí tucu'yón se-nana Jesucristó rihaan Jesucristó, gaa ne cataj nij so' se vaa:

—Rco' quij uun me nihánj, ne taj se chá chá nij yuvij nihánj, ne cachén ndo'o orá nanj á. <sup>36</sup> Qui'yáá so' se ndo'o, ne na'nej so' chrej man nij yuvij, ca'anj nij yuvij chuman' naj nichrun' do', nij rancho naj nichrun' do', quiraan nij yuvij se chá chá nij yuvij nanj á —taj nij sí tucu'yón se-nana Jesucristó rihaan Jesucristó a.

<sup>37</sup> Gaa ne cataj Jesucristó rihaan nij so' a:

—Go' ma'an soj se chá chá nij yuvij á —taj so' a.

Gaa ne cataj nij so' rihaan Jesucristó a:

—Ca'anj núj go' núj sa'anj vaa tu'vee yuvij 'yaj suun tunj yavii ne quiraan núj rachrúún, ne rque núj

chá nij yuvij, rá so' na' —taj nij so' rihaan Jesucristó a.

<sup>38</sup> Gaa ne cataj Jesucristó rihaan nij so' a:

—Me daj rachrúun vaa rihaan soj ga. Cavij soj, ne xcaj soj cuentá á —taj so' a.

Gaa ne ca'anj nij so' qui'yaj contá nij so' rachrúun vaa rihaan nij so', gaa ne canicaj nij so', ne cataj nij so':

—Vaa 'un' guee rachrúun ne vij guee xcuaj rihaan núj nanj á —taj nij so' rihaan Jesucristó a.

<sup>39</sup> Gaa ne ca'ne' Jesucristó suun rihaan nij yuvij se vaa ca'anj cayáan cunudanj nij yuvij rihaan coj chrin', ne ca'anj cumán x'ne' nij yuvij rihaan coj chrin', taj Jesucristó rihaan nij yuvij a. <sup>40</sup> Gaa ne naqui'yaj x'ne' nij yuvij man nij yuvij, ne cayáan nij yuvij rihaan coj chrin', ne dan me se cientó yuvij do', vij chihaa chi' yuvij do', me 'o 'o x'ne' nij yuvij a.

<sup>41</sup> Gaa ne quita'aa Jesucristó 'un' nij rachrúun ne vij roj xcuaj, gaa ne ni'yaj so' rej xtá', ne nago' so' graciá rihaan Diose, gaa ne cuxra' ta'aj so' man rachrúun yo', ne caxrij so' ston nij sí tucu'yón se-nana so', che'é rej caxrij nij so' ston nij yuvij a. Gaa ne cuxra' ta'aj so' nee xcuaj chá cunudanj nij yuvij a. <sup>42</sup> Gaa ne chá taran' nij yuvij, ne caraa rque cunudanj nij so', <sup>43</sup> ne ndaa quináj ndo'o se chá, qui'yaj nij yuvij a. Gaa ne naqui'yaj chre' nii se vaa quináj tu'va yuvij, ne caraa yo'ó chuvij ya scaa, ne ta'aj rachrúun do', ta'aj nee xcuaj do', me se chá naqui'yaj chre' nii a. <sup>44</sup> Ne nij snó'o rque Jesucristó chraa me se 'un' mój snó'o me nij so' a.

*Nana nihánj taj xna'anj se vaa cachéé Jesucristó rihaan na a*

<sup>45</sup> Gaa ne ra'yanj ca'ne' Jesucristó suun rihaan nij sí tucu'yón se-nana so' se vaa cavij nij so' rihoo chéé rihaan na ca'anj nij so' rej xco na lacuaná yo' ndaa chuman' cu'naj Bet-saida, quitaj yaan nij so' rihaan Jesucristó, ne dan me se ma'an Jesucristó

na'nej chrej man nij yuvij, taj Jesucristó rihaan nij sí tucu'yón se-nana so' a. <sup>46</sup> Dan me se ca'anj nij so', ne cataj Jesucristó rihaan nij yuvij se vaa ca'vee ca'anj nij yuvij a. Gaa ne cavij so' raa quij, ne cachín ni'yaj so' rihaan Diose a.

<sup>47</sup> Dan me se daj doj cata' güii raa quij, ne vaj rihoo tanuu rihaan na lacuaná, ne orún' Jesucristó me sí nicun' rihaan yo'óo a. <sup>48</sup> Ne quene'en so' man nij sí tucu'yón se-nana so' se vaa güéj ndo'o rihoo yo' rihaan na qui'yaj nana, che'é se go' nana rej rihaan rihoo yo' a. Dan me se yan' si'nu' ca'anj Jesucristó rej vaj nij so', chéé tajoj uun so' rihaan na yo', vaj so' nanj adonj. Ne guun rá so' cachén so' rej x'núj nij so' a. <sup>49</sup> Ne quene'en nij sí tucu'yón se-nana so' man so' se vaa chéé uun so' rihaan na, ne guun rá nij so' se vaa ta'naj me so', ne che'é dan caguáj ndo'o nij so' a. <sup>50</sup> 'O se quene'en cunudanj nij so' man so', ne cuchu'vi' ndo'o nimán nij so' a. Veé dan, ne nu' cataj Jesucristó rihaan nij so' a:

—Naqui'yaj nucuaj soj nimán soj ei. 'Unj 'na' ei. Se cuchu'vi' soj ma' —taj so' rihaan nij so' a.

<sup>51</sup> Gaa ne catúj so' rque rihoo rej nuu nij sí tucu'yón se-nana so', gaa ne canicun' nana yo', ne ca'anj ndo'o rá nij so' a. <sup>52</sup> 'O se ne xcaj sa' nij so' cuentá che'é se nucuaj nicaj Jesucristó gaa cuxra' ta'aj Jesucristó rachrúun chá nij yuvij a. Maan se nichraj ndo'o nimán nij so' a.

*Nana nihánj taj xna'anj se vaa nari' nucuaj nij sí ran' man rej cu'naj Genesaret, qui'yaj Jesucristó a*

<sup>53</sup> Gaa ne cuchi' nij so' tu'va na lacuaná rej cu'naj Genesaret, ne numij nij so' rihoo tu'va na lacuaná a. <sup>54</sup> Gaa ne nanij nij so' rá rihoo, ne nu' cunuu yaan nij sí man rej yo' man Jesucristó, <sup>55</sup> ne yoo ca'anj cunudanj nij sí yanj nu' anicaj, ne guun che'e nij so' cuchruj nij so' tuvi' nij so' sí ran' rihaan yuvéé, ne quitáa chihá nij so' nij sí ran' yo', vaj nij so'

me rej ma'an vaj Jesucristó a. <sup>56</sup> Ne me ma'an chuman' ra'a do', chuman' nocoo do', rancho do', catúj Jesucristó me se cuchruj nij yuvii man nij sí ran' rihaan yu'vee, ne cachíin ni'yaj uxrá nij yuvii rihaan Jesucristó se vaa ca'vej rá Jesucristó cano ra'a nij so' doj tu'va sagan' so' a. Ne nu' nij sí cano ra'a doj man so' ro', nahuun sa' cunudanj nij so' cuaj nanj adonj.

## 7

*Nana nihánj taj xna'anj me che'é ne na'ya' nij sí tucu'yón se-nana Jesucristó gaa chá nij so' chraa a*

<sup>1</sup> Gaa ne quinichrun' sí fariseo do', quinichrun' sí naqui'yaj cuu se-tucuanj Moisés do', rihaan Jesucristó, ne sí cavii chuman' Jerusalén me nij so' a. <sup>2</sup> Ne quene'en nij so' se vaa gaa chá nij sí tucu'yón se-nana Jesucristó chraa, ne ne na'ya' nij so', ne che'é dan ne naruvii ra'a nij sí tucu'yón se-nana Jesucristó ni'yaj Diose, rá nij sí fariseo do', nij sí naqui'yaj cuu se-tucuanj Moisés do' a. <sup>3</sup> O se xa' nij sí fariseo ga cunudanj yo'ó nij sí israelitá, tzaj ne a doj ne chá nij so' chraa sese ataa na'ya' nij so' ma'. Danj 'yaj nij so', che'é se noco' nij so' tucuáán cuchruj nij sí chij cayáán gaa naá a. <sup>4</sup> Ne gaa 'na' nij so' yu'vee, ne ane nij so', ne sese ataa cane nij so', ne ne chá nij so' chraa a ma'. Ne vaa uxrá doj tucuáán nicaj nij so', ne ndaa vaa tucuáán che'é tazá do', che'é xruj do', che'é aga' do', daj qui'yaj nij so' gaa na'nu' nij so' man nij rasuun vaa nacaj do' a.

<sup>5</sup> Gaa ne xna'anj nij sí fariseo ga nij sí naqui'yaj cuu se-tucuanj Moisés man Jesucristó, ne cataj nij so', ne:

—Nij sí tucu'yón se-nana so' me se me che'é ne noco' nij so' tucuáán cuchruj nij sí chij cayáán gaa naá, ne nihánj me se chá nij so' chraa, ne ne naruvii ra'a nij so' ni'yaj Diose a ma' —taj nij so' rihaan Jesucristó a.

<sup>6</sup> Gaa ne cataj Jesucristó rihaan nij so' a:

—Cunaj uxrá vaa nana nata' sí cu'naj Isaías gaa naá gaa ca'mii so'

che'é nij soj sij nucui' rá, ne dan me se ca'mii so' se-nana Diose, ne cataj so' se vaa: “Yuvii nihánj me se gan' uxrá nicun' nimán nij so' ga 'unj nanj adonj. <sup>7</sup> Na'víj rma'an nij so' rihanj, ne dan me se nanj se-nana nij sí man rihaan chumii tucu'yón nij so' rihaan tuvi' nij so', ne taj nij so' se vaa se-nanaj me se-nana nij yuvii yo' a”, taj se-nana Diose nata' sí cu'naj Isaías gaa naá a. <sup>8</sup> O se aj tanáj xco soj nana cataj xna'anj Diose rihaan ní', ne nanj tucuáán cuchruj yuvii uun noco' soj nanj ei —taj Jesucristó, <sup>9</sup> ne cataj uún so' se vaa— Cunaj uxrá vaa 'yaj soj, ne uta' yanij soj nana cataj xna'anj Diose rihaan ní', che'é rej ca'vee canoco' soj se-tucuanj ma'an soj asan.

<sup>10</sup> O se ca'ne' Moisés suun se vaa: “Caraa cochróo so' rihaan rée so' do', rihaan nii so' do' á”. Tzaj ne: “Sí a'mii chree rihaan rej do', rihaan nii do', me se vaj so' ne nu' che'e cavii so' á”. Danj vaa cataj xna'anj Moisés rihaan ní' a. <sup>11</sup> Tzaj ne taj soj se vaa sese cataj yo'ó so' rihaan rej so' do', rihaan nii so' do', se vaa aj rqué so' nu' si'yaj so' rihaan Diose ne che'é dan se ca'vee racuíj so' man rej so' do', man nii so' do', taj soj a. <sup>12</sup> Ne ne ca'vej soj racuíj so' man rej so' do', man nii so' do' a. <sup>13</sup> Dan me se danj inan' a'mii soj gaa tucu'yón soj se-nana nij sí man gaa naá, ne axríj yuve soj man se-nana Diose nanj adonj —taj Jesucristó rihaan nij sí fariseo do', rihaan nij sí naqui'yaj cuu se-tucuanj Moisés rihaan yuvii do' a.

<sup>14</sup> Gaa ne canacúun uún Jesucristó man nij yuvii ca'na' nij yuvii rihaan so', gaa ne cataj so' rihaan nij yuvii a:

—Cuno taran' soj nana nihánj, ne xcaj soj cuentá nedi'. <sup>15</sup> A doj rasuun atúj tu'va yuvii se ca'vee qui'yaj chi'ii man yuvii ma'. Se avii tu'va yuvii ro', 'yaj chi'ii man yuvii adonj. <sup>16</sup> Sese taj yu'uj xrée soj, ne cuno soj nana nihánj ei —taj Jesucristó rihaan nij yuvii a.



<sup>17</sup> Dan me se corá ca'anj yanij Jesucristó ga nij sí tucu'yón se-nana so' rihaan nij yuvii, ne catúj nij so' rá ve', gaa ne xna'anj nij sí tucu'yón se-nana Jesucristó man so' me taj nana ca'mii so' che'é se atúj tu'va yuvii gaa. <sup>18</sup> Gaa ne cataj Jesucristó rihaan nij so' a:

—Vaa soj vaa, ne ne xcaj ma'an soj do' cuentá a na'. Ne ne'en soj se vaa nu' se atúj tu'va yuvii ro', se ca'vee qui'yaj chi'ii yo' man yuvii a. <sup>19</sup> 'O se ne atúj yo' ndaa nimán yuvii ma'. Tananj achén yo' rque yuvii, ne urihanj yo' gaa re'é yuvii nanj á —taj Jesucristó, ne nana yo' taj se vaa ca'vee cha yuvii me ma'an rasuun ne nuveé cacun' me yo' rihaan Diose a. <sup>20</sup> Ne cataj uún so' a— Tzaj ne se urihanj tu'va yuvii ro', yo' me nana avii nimán yuvii, ne nana yo' me 'yaj chi'ii ndo'o man yuvii adonj. <sup>21</sup> 'O se nihánj me se chi'ii avii nimán yuvii a. Se chi'ii do', che'é yan qui'yaj ituu si'yaj tuvi' do', yan cotoj ga nica tuvi' do', yan ticavi' man tuvi' do', <sup>22</sup> yan guun rá nicaj si'yaj tuvi' do', yan tiha' yu'unj man tuvi' do', yan ni'yaj ndo'o man yo'ó chana do', yan guun xcoj ruvaa rá ni'yaj tuvi' do', che'é yan nachri' ni'yaj man tuvi' do', yan ca'mii xta' do', yan qui'yaj rma'an náa guun se nij do', me nu' se avii nimán yuvii, <sup>23</sup> ne nu' yo' me se avii nimán yuvii ne 'yaj chi'ii man yuvii nanj adonj —taj Jesucristó rihaan nij sí tucu'yón se-nana so' a.

*Nana nihánj taj xna'anj se vaa cuchumán rá 'o chana sirofenicia se vaa racuúj Jesucristó man no' a*

<sup>24</sup> Gaa ne canicun' Jesucristó, ne curihanj so' rej yo', ne ca'anj so' rej naj chuman' cu'naj Tiro a. Ne catúj so' rá 'o ve', ne ne ca'vej rá so' quene'en nij yuvii me rej vaj so' a. Tzaj ne ne ca'vee qui'nij yuve so' ma'. <sup>25</sup> Tananj ra'yanj cuhi' nana rihaan 'o chana se vaa yanj so', ne ta'níi chana ro', me níi nuu nana chree nimán, ne ca'na' chana, ne

canicun' ruj chana yo' rihaan Jesucristó a. <sup>26</sup> Dan me se chana sirofenicia a'mii xna'anj griego me chana yo', ne cachíin ni'yaj no' rihaan Jesucristó se vaa quirii Jesucristó nana chree nimán ta'níi no' a. <sup>27</sup> Gaa ne cataj Jesucristó rihaan no' a:

—Dan me se canicun' so' doj, ne cha asino nij xnii tucua, ne ne'en so' se vaa se ca'vee cata'aa ní' co'oo man rihaan nij xnii ne go' ní' cha nij chuvee ma'. Dan me se ndaa síj chá nij xnii tucua, gaa ne sese náj se chá tu'va nij xnii yo', gaa ne ca'vee go' cha chuvee nanj adonj. Che'é dan ase vaa ne nó xcúun yuvii ca'nee yuvii rachruún tu'va ta'níi yuvii go' yuvii rachruún yo' cha chuvee ro', danj vaa ne nó xcúnj racuúj man soj sij yanij a man adonj. Maan inanj ma'an nij yuvii israelitá me no xcúun 'unj racuúj 'unj nanj adonj —taj Jesucristó rihaan chana yo' a.

Gaa ne cataj no':

<sup>28</sup> —Veé dan vaa guee, Señor. Tzaj ne nij chuvee nicun' rque chruun mesá ro', chá nij xo' tachruu ayuu tu'va nij xnii nanj á. Ne ase vaa chuvee chá tachruu vaa 'unj rihaan so' nanj adonj. Che'é dan me ndo'o raj racuúj so' doj manj, raj nanj adonj —taj chana yo' rihaan Jesucristó a.

<sup>29</sup> Gaa ne cataj Jesucristó:

—Che'é nana ca'mii so' nihánj ro', ca'vee cavii so' ca'anj so', ne aj curihanj nana chree nimán ta'níi so' nanj ei —taj so' rihaan no' a.

<sup>30</sup> Gaa ne ca'anj chana, catúj chana rá ve' tucua chana, ne quene'en chana se vaa díj naj ta'níi chana rihaan yuveé, ne aj curihanj nana chree nimán ta'níi chana adonj.

*Nana nihánj taj xna'anj che'é sí naxra' tu'va do', nachuguun xrée do', qui'yaj Jesucristó a*

<sup>31</sup> Gaa ne curihanj uún Jesucristó rej naj chuman' Tiro, ne cachén so' sca'núj chuman' cu'naj Sidón, ca'anj uún so' tu'va na lacuaná cu'naj Galilea, ne cachén so' sca'núj rej cu'naj Chi' Chuman' a. <sup>32</sup> Ne nicaj

nij yuvij man 'o sí so'o ya'mij ca'na' nij yuvij rihaan Jesucristó, ne cachín ni'yaj uxrá nij yuvij rihaan Jesucristó se vaa cutá' ra'a Jesucristó xráá sí so'o ya'mij yo' a. <sup>33</sup> Gaa ne nicaj Jesucristó man sí so'o ya'mij ca'anj yanij so' rihaan yo'ó nij yuvij, gaa ne tucua'anj Jesucristó ra'a Jesucristó yu'uj xréé sí so'o ya'mij, gaa ne quirii talúj Jesucristó ra'a Jesucristó, ne canó ra'a Jesucristó daa sí so'o ya'mij yo' a. <sup>34</sup> Gaa ne ni'yaj Jesucristó rej xta', gaa ne caráchej Jesucristó, ne cataj Jesucristó:

—Efata —taj Jesucristó, ne nana “Efata” taj: “Nachuguun xréé so' á”, me nana ca'mii Jesucristó rihaan sí so'o ya'mij yo' a.

<sup>35</sup> Gaa ne nachuguun xréé so', ne nahuun sa' daa so', gaa ne ca'mii sa' so' a. <sup>36</sup> Gaa ne ca'ne' Jesucristó suun rihaan nij sí quene'en daj qui'yaj Jesucristó che'é sí so'o ya'mij se vaa se guun cataj xna'anj nij so' rihaan a 'ó yuvij a. Dan me se doj a na'vej rá Jesucristó cataj xna'anj nij so' rihaan tuvi' nij so', tzaj ne doj a nata' nij so' rihaan tuvi' nij so' a. <sup>37</sup> Gaa ne ca'anj uxrá rá nij yuvij xcaj cuentá daj qui'yaj Jesucristó, ne cataj nij yuvij se vaa sa' uxrá vaa nu' se vaa qui'yaj Jesucristó, ne ndaa nachuguun xréé nij sí so'o do', ndaa a'mii sa' nij sí ya'mij do', 'yaj Jesucristó, taj nij yuvij yo' a.

## 8

*Nana nihánj taj xna'anj se vaa go' Jesucristó se chá rihaan ca'anj mij snó'o a*

<sup>1</sup> Ne güii dan me se vaj uún que'ee yuvij ga Jesucristó, ne nuvi' uún se chá rihaan nij yuvij, gaa ne canacúun Jesucristó man nij sí tucu'yón se-nana so' se vaa ca'na' nij so' rihaan so', gaa ne cataj so' rihaan nij so' a:

<sup>2</sup> —'Ee rá 'unj man nij yuvij nihánj, ne nihánj me se sij va'núj ya güii 'o vaj nij yuvij ga 'unj, ne taj vaj se chá rihaan nij yuvij cuano a ma'. <sup>3</sup> Ne sese na'nej 'unj chrej man nij yuvij cuano

quinan' nij so' gaa na'aan rque nij so', ne ninaj nij so' rá chrej, ne dan me se ta'aj nij so' me sí yanj rej gan' ndo'o nanj adonj —taj Jesucristó rihaan nij sí tucu'yón se-nana so' a.

<sup>4</sup> Gaa ne cataj nij so' rihaan Jesucristó a:

—Tzaj ne rej tacaan uun me nihánj, ne nuvi' rachrúun nihánj go' ní chá nij yuvij a ma' —taj nij sí tucu'yón se-nana Jesucristó a.

<sup>5</sup> Gaa ne xna'anj Jesucristó man nij so', cataj so':

—Me daj rachrúun vaa rihaan soj ga —taj so', xna'anj so' man nij sí tucu'yón se-nana so' a.

—Chij rachrúun vaa rihaan núj nanj á —taj nij so' rihaan Jesucristó a.

<sup>6</sup> Gaa ne ca'ne' Jesucristó suun rihaan nij yuvij se vaa ca'anj cayáan nij yuvij rihaan yo'ó a. Gaa ne nicaj so' chij nij rachrúun, ne nago' so' graciá rihaan Diose, gaa ne cuxra' ta'aj so' rachrúun yo', ne caxrij so' ston nij sí tucu'yón se-nana so', ne tucuachén nij so' rihaan nij yuvij, ne dan me se rque nij so' rachrúun yo' rihaan nij yuvij a. <sup>7</sup> Ne nicaj Jesucristó doj xcuj le'ej uún, ne nago' so' graciá rihaan Diose che'é nij xcuj le'ej, ne cataj so' rihaan nij sí tucu'yón se-nana so' se vaa tucuachén nij so' nee xcuj le'ej uún rihaan nij yuvij uún a. <sup>8</sup> Gaa ne chá cunudanj nij yuvij, ne ndaa caraa rque nij so' a. Gaa ne naqui'yaj chre' nii se vaa quináj tu'va nij yuvij, ne quisij 'o cunú' chij ya scaa caraa qui'yaj se quináj tu'va nij yuvij yo' a. <sup>9</sup> Dan me se cunudanj nij so' chá, ne quisij ndaa ca'anj mij yuvij chá nanj adonj.

Gaa ne na'née Jesucristó chrej man nij yuvij, <sup>10</sup> gaa ne nu' cavii Jesucristó ga nij sí tucu'yón se-nana so' rá rihoo chée rihaan na, ne ca'anj nij so' rej cu'naj Dalmanuta a.

*Nana nihánj taj xna'anj se vaa cachín nij sí fariseo se vaa qui'yaj Jesucristó 'o suun sa' nocoo quene'en nij so' a*

11 Dan me se curihanj doj nij sí fariseo, gaa ne guun che'e nij so' canó tuvi' nij so' ga Jesucristó, ne dan me se cachín ni'yaj nij so' rihaan Jesucristó se vaa racúij Diose man Jesucristó, ne qui'yaj Jesucristó 'o suun sa' nocoo quene'en nij so', gaa ne guun ya rá nij so' se vaa sí ca'née ya Diose me Jesucristó, rá nij so' a.

12 Gaa ne nucaj ndo'o caráchej Jesucristó, ne cataj so' rihaan nij so' a:

—Ne me che'é me rá soj sij israelitá qui'yáj suun sa' nocoo quene'en soj ga. Dan me se daj chihaa mój se qui'yáj suun sa' nocoo che'é soj a ma' —taj Jesucristó rihaan nij sí fariseo yo' a.

13 Gaa ne tanáj Jesucristó man nij so', gaa ne cavii uún so' rque rihoo chée rihaan na, ne ca'anj so' rej xco na lacuaná a.

*Nana nihánj taj xna'anj se vaa ne ca'vej rá Jesucristó cunó nij sí tucuyón se-nana so' man nana tucuyón nij sí fariseo do', sí cu'naj Herodes do' a*

14 Dan me se quini'yón nij sí tucuyón se-nana Jesucristó nicaj nij so' rachrúun cha nij so', ne vaa orún' rachrúun rá rihoo vaj ga nij so' a. 15 Gaa ne ca'ne' Jesucristó suun rihaan nij so', cataj Jesucristó:

—Cutumé soj man soj se gaa nanj quiran' soj sayuun, qui'yaj se-levadura nij sí fariseo do', sí cu'naj Herodes do' á —taj Jesucristó no nij so' a.

16 Ne nuchruj raa ndo'o nij sí tucuyón se-nana Jesucristó che'é nana ca'mii so', ne:

—Che'é se taj rachrúun nicaj ní, ne che'é dan a'mii so' che'é levadura se 'yaj naraa nana rque rachrúun nanj adonj —taj nij so' a.

17 Ne aj ne'en Jesucristó daj uun nimán nij so', ne che'é dan cataj so':

—Me che'é nanó ndo'o rá soj se vaa taj rachrúun rihaan soj ga. Me che'é ataa xcaj soj cuentá ga. 'O se vaa nichraj ndo'o nimán soj nanj adonj. 18 'O se vaa rlij rihaan soj, tzaj ne ne

ni'yaj soj a ma'. Vaa xrée soj, tzaj ne ne uno soj a ma'. 19 Ne ne nuú rá soj gaa vaa daj 'o 'un' guee rachrúun cuxra' ta'aj 'unj tzaj ne quisíj chá cunu' 'un' mój snó'o, qui'yáj a. Ne me daj scaa se chá quináj tu'va yuvii naqui'yaj chre' soj, rá soj ga —taj Jesucristó, xná'anj Jesucristó man nij so' a.

Gaa ne:

—Chuvij a —taj nij so' rihaan Jesucristó a.

20 Gaa ne cataj uún Jesucristó:

—Ne ne nuú rá soj gaa vaa daj 'o chij guee rachrúun cuxra' ta'aj 'unj tzaj ne quisíj chá cunu' ca'anj mój yuvii, qui'yáj a. Ne me daj scaa se chá quináj tu'va yuvii naqui'yaj chre' soj, rá soj ga —xná'anj uún Jesucristó man nij so' a.

Gaa ne:

—Chij a —taj nij so' rihaan Jesucristó a.

21 Gaa ne cataj Jesucristó rihaan nij so' a:

—Ne me che'é me ataa xcaj soj cuentá se vaa ca'vee rque 'unj nu' se vaa achiin man soj ne nuveé inanj che'é rej nano rá soj che'é rachrúun me ca'mij rihaan soj che'é se-levadura nij sí fariseo do', sí cu'naj Herodes do' ma' —taj Jesucristó rihaan nij so' a.

*Nana nihánj taj xna'anj se vaa naxra' rihaan 'o sí tuchrii, qui'yaj Jesucristó a*

22 Gaa ne catúj Jesucristó ga nij sí tucuyón se-nana so' rá chuman' cu'naj Betsaida a. Gaa ne nicaj yuvii 'o sí tuchrii ca'na' nij yuvii rihaan Jesucristó, ne cachín ni'yaj nij yuvii rihaan Jesucristó se vaa cuta' Jesucristó ra'a Jesucristó raa sí tuchrii che'é rej naxra' rihaan sí tuchrii yo' a. 23 Gaa ne quita'aa Jesucristó ra'a sí tuchrii yo', ne curihanj so' rej tu'va chuman' ga sí tuchrii, ne quirii talúj Jesucristó rihaan sí tuchrii yo', ne cuta' ra'a Jesucristó xráá so', gaa ne xná'anj Jesucristó man so' a:

—Ruví' rihaan so' na' —taj Jesucristó, xná'anj so' man síí tuchrii yo' a.

<sup>24</sup> Gaa ne ni'yaj síí tuchrii yo' doj, gaa ne cataj so':

—Ne'én 'unj nij snó'o, ne ase vaa chruun vaa nij so', tzaj ne chéé nij so' ni'yaj 'unj nanj asanj —taj so' rihaan Jesucristó a.

<sup>25</sup> Gaa ne cuta' ra'a uún Jesucristó rihaan síí tuchrii yo', gaa ne ni'yaj ni'yaj síí tuchrii, ne dan me se nahuun sa' nu' rlij rihaan so', ne curuvi' sa' cunudanj rasuun ni'yaj so' nanj adonj. <sup>26</sup> Gaa ne ca'née Jesucristó man so' quinanj so', tzaj ne cataj Jesucristó rihaan so' se vaa:

—A doj se catúj so' rá chuman', ne se cataj so' rihaan a 'ó nij yuvii, gaa ne se gaa nanj xcaj nij yuvii cuentá daj qui'yáj che'é so' á —taj Jesucristó rihaan so' a.

*Nana nihánj taj xna'anj se vaa cataj xna'anj Pedró me síí me Jesucristó a*

<sup>27</sup> Gaa ne curihanj Jesucristó ga nij síí tucu'yón se-nana so' chuman' Bet-saida yo', ne ca'anj nij so' nij chuman' ra'a noco' man chuman' cu'naj Cesarea de Filipo do' a.

Dan me se vaj nij so', ne xná'anj Jesucristó man nij síí tucu'yón se-nana so', ne cataj so':

—Daj taj nij yuvii che'é 'unj ga. Ne me síí mé 'unj, taj nij yuvii ga —taj Jesucristó, xná'anj so' man nij so' a.

<sup>28</sup> —Vaa síí taj se vaa síí cu'naj Juan síí cuta' ne man yuvii mé so' ei. Ne vaa síí taj uún se vaa síí cu'naj Elías síí nata' se-nana Diose gaa naá me uún so' chuguanj. Ne vaa síí taj uún se vaa yo'ó síí nata' se-nana Diose gaa naá me uún so' chihá'. 'O se danj taj 'o 'o nij yuvii che'é so' nanj adonj —cataj nij so' rihaan Jesucristó a.

<sup>29</sup> —Ne ma'an soj, gaa ne me síí mé 'unj, rá ma'an soj ga —taj Jesucristó, xná'anj so' man nij síí tucu'yón se-nana so' a.

Gaa ne cataj síí cu'naj Pedró:

—Síí ca'née Diose tinanii man yuvii rihaan sayuun mé so' ei —taj so' rihaan Jesucristó a.

<sup>30</sup> Gaa ne cataj xna'anj Jesucristó rihaan nij síí tucu'yón se-nana so' se vaa se nata' nij so' rihaan a 'ó yuvii me síí me so', taj so' a.

*Nana nihánj taj xna'anj se vaa cataj xna'anj Jesucristó se vaa cavi' so' ne cunuu i'na' uún so' a*

<sup>31</sup> Gaa ne guun che'e Jesucristó tucu'yón so' man nij síí tucu'yón se-nana so' se vaa che'é se síí ca'née Diose nicaj yu'unj man yuvii me so' ro', che'é dan no' xcúún so' quiranj ndo'o so' sayuun, qui'yaj nij síí uun chij do', nij xrej ata suun noco' doj do', nij síí naqui'yaj cuu se-tucuanj Moisés rihaan nij yuvii do', ne nachri' nij so' ni'yaj nij so' man so', ne ticavi' nii man so', ne cachén va'nuj güii, gaa ne cunuu i'na' uún so', cataj so' a.

<sup>32</sup> Ne nucuaj ndo'o nata' so' nana yo' rihaan nij síí tucu'yón se-nana so' a. Gaa ne quirii yanj síí cu'naj Pedró man Jesucristó, ne guun che'e so' cataj so' se vaa ne nó xcúún Jesucristó ca'mii Jesucristó nana vaa danj a. <sup>33</sup> Gaa ne canicaj Jesucristó, ne ni'yaj so' man nij síí tucu'yón se-nana so', ne cataj so' rihaan Pedró se vaa ne nó xcúún uxrá ma'an Pedró ca'mii Pedró danj, ne cataj so':

—Naxuun so' mán so' rihanj á. Na'vej raj quene'enj mán so' a ma'. 'O se ase tu'va síí chree síí cu'naj Satanás ro', danj tu'vá so' ei. Danj tu'vá so', che'é se ne acaj so' cuentá daj me rá Diose adonj. Maan se inanj acaj so' cuentá daj me rá yuvii nanj adonj —taj Jesucristó rihaan síí cu'naj Pedró a.

<sup>34</sup> Gaa ne canacúún Jesucristó man nij yuvii ca'na' nij yuvii rej nicun' so' ga nij síí tucu'yón se-nana so', gaa ne cataj so' rihaan taran' nij so' a:

—Sese me rá yo'o so' canoco' so' manj, ne se guun rá so' qui'yaj so' se vaa me rá ma'an so' qui'yaj so' ma'. Ne ca'vee se quiranj uxrá so' sayuun do', ca'vee se ndaa cachron nii man so' rihaan rcutze do', tzaj ne yo'o qui'yaj suun so' che'ej, ne yo'o canoco' raan so' manj adonj. <sup>35</sup> Tzaj



ne sese vaa 'o síi me rá tinanii man ma'an rihaan sayuun, ne vaa güii, ne yo'lo cavi' nimán so' adonj. Tzaj ne sese cavi' yo'lo so' che'é se vaa me so' síi noco' manj do', che'é se nata' so' se-nanaj nana sa' do', ne vaa güii, ne cunuu i'na' uún so' adonj. <sup>36</sup> Ne a me se quirí' 'o so' sese qui'yaj canaán so' nu' rasuun man rihaan chumi' nihánj ne ca'anj ni'ya nimán so', rá soj ga. Daj chihaa mij se ca'vee cavii sa' so', qui'yaj rasuun man rihaan chumi' nihánj a ma'. <sup>37</sup> Tzaj ne ca'vee se navij nu' si'yaj yo'lo so' rihaan chumi' nihánj, tzaj ne sese gaa i'na' nimán so' nu' cavii nu' ca'anj, ne quinano rá so', rá soj na'. Daj chihaa mij se quinano rá so' a ma'. 'O se cavii sa' uxrá so' nanj adonj.

<sup>38</sup> "Dan me se xa' síi uun na'aj ni'yaj manj ne uun na'aj ni'yaj se-nanaj ro', ase vaa nij síi chi'ii tumé ndo'o cacun' man rihaan chumi' nihánj cuano vaa so' adonj. Ne vaa güii guun na'aj 'unj sij ca'née Diose nicaj yu'unj man yuvi' ni'yaj 'unj man so' asa' ca'na' uún 'unj rihaan chumi' nihánj, ne dan me se uxrá ve'é gaa 'unj, qui'yaj Réé 'unj, ne ca'na' nij se-mozó so' ga 'unj asa' ca'ná' 'unj nanj adonj —taj Jesucristó rihaan nij so'a.

## 9

<sup>1</sup> Gaa ne cataj uún so' se vaa:

—Ya ya cataj xna'anj 'unj rihaan soj cuano se vaa xa' ta'aj soj sij nicun' nihánj cuano, me se gaa ataa a cavi' ta'aj soj, ne ya quene'en ta'aj soj asa' guun che'e Diose nucuaj ndo'o guun chij Diose rihaan chumi' nihánj nanj adonj —taj Jesucristó rihaan taran' nij so' a.

*Nana nihánj taj xna'anj se vaa chuguun ndo'o man Jesucristó ni'yaj nij síi tucu'yón se-nana so' a*

<sup>2</sup> Cachén vatan' güii, gaa ne nicaj Jesucristó man síi cu'naj Pedró do', síi cu'naj Jacobo do', síi cu'naj Juan do', ca'anj so' raá 'o quij xcaan rej taj vaj a 'o yuvi' ne a. Gaa ne yo'lo cunuu ino cunudanj man Jesucristó ni'yaj

nij síi tucu'yón se-nana so' yo' a. <sup>3</sup> Ne dan me se cunuu catzii ndo'o sagan' so', ne ndaa raan lá ma'an sagan' so' ni'yaj nij so' a. Ne taj vaj a yo'lo síi man rihaan chumi' nihánj ca'vee qui'yaj catzii yatzij ndaa rá se vaa sagan' Jesucristó a. <sup>4</sup> Ne ni'yaj va'nuj nij so', ne dan me se naqui'yaa síi cu'naj Elías síi cane gaa naá ga síi cu'naj Moisés rihaan nij so', ne nanó roj so' cuentó ga Jesucristó ni'yaj nij so' a. <sup>5</sup> Gaa ne cataj Pedró rihaan Jesucristó a:

—Cunaj uxrá vaa man núj nihánj ga so', maestro. Ne qui'yaj núj va'nuj ve' yacataj cane soj nanj á. 'O ve' cané so', ne yo'lo ve' cane síi cu'naj Moisés, ne yo'lo ve' cane síi cu'naj Elías ei —taj Pedró rihaan Jesucristó a.

<sup>6</sup> 'O se ne quene'en uxrá Pedró daj me che'é ca'mii so' rihaan Jesucristó danj a ma'. 'O se cuchu'vi' ndo'o va'nuj nij so' che'é se vaa quene'en nij so' nanj adonj.

<sup>7</sup> Gaa ne ca'na' 'o ngaa, ne caráan ngaa man taran' nij so' a. Gaa ne Diose ro', ca'mii nana cuno nij so' rque ngaa yo', ne cataj Diose a:

—Síi nihánj me ta'nij adonj. 'Ee raj man so' adonj. Cuno soj rihaan so' ei —taj Diose cuno nij so' a.

<sup>8</sup> Gaa ne nu' ni'yaj nij so', ne daj orún' Jesucristó nicun' ga nij so', quene'en nij so' nanj adonj.

*Nana nihánj taj xna'anj se vaa ase vaa síi cu'naj Elías ro', danj vaa síi cu'naj Juan síi cuta' ne man yuvi' a*

<sup>9</sup> Gaa ne gaa nanij nij so' tacóo quij yo' me se ca'ne' Jesucristó suun rihaan nij so' se vaa se nata' nij so' rihaan a doj yuvi' che'é se vaa quene'en nij so' a. Yo'lo dínj gaa tu'va nij so' che'é rasuun quene'en nij so' a. Ndaa quisij cavi' so' ne cunuu i'na' uún so', gaa ne ca'vee nata' nij so' se vaa quene'en nij so' daj quiran' so' síi ca'née Diose nicaj yu'unj man yuvi', taj Jesucristó rihaan nij so' a. <sup>10</sup> Ne yo'lo nuú rá nij so' nana yo', ne xna'anj ndo'o nij so' man tuvi' ma'an nij so' me che'é me cataj Jesucristó se vaa cavi' so' ne cunuu i'na' uún

so' a. <sup>11</sup> Gaa ne xná'anj nij so' man Jesucristó, cataj nij so':

—Me che'é taj nij sí naqui'yaj cuu se-tucuanj Moisés rihaan yuvii se vaa asino ca'na' sí cu'naj Elías sí nata' se-nana Diose gaa naá, gaa ne ca'vee ca'ne' Diose cacun' che'é yuvii ga —taj nij sí tucu'yón se-nana Jesucristó, xná'anj nij so' man Jesucristó a.

<sup>12</sup> Gaa ne cataj Jesucristó rihaan nij so' a:

—Ya a'mii nij sí naqui'yaj cuu se-tucuanj Moisés, taj nij so' se vaa asino ca'na' sí cu'naj Elías, gaa ne naqui'yaj sa' so' nu' rasuun adonj. Ne me che'é taj danj Diose se vaa sí ca'neé Diose nicaj yu'unj man yuvii me se quirán' ndo'o so' sayuun ne nachri' nij yuvii ni'yaj nij yuvii man so', rá soj ga. <sup>13</sup> Tzaj ne cataj xna'anj 'unj rihaan soj se vaa aj ca'na' ya sí cu'naj Elías, tzaj ne qui'yaj ya yuvii ndaa vaa me rá ma'an nij yuvii man so' ndaa vaa taj danj Diose che'é so' nanj adonj. Che'é dan ca'vee xcaj soj cuentá daj quirán' 'unj qui'yaj uún nij yuvii adonj —taj Jesucristó rihaan nij sí tucu'yón se-nana so' a.

*Nana nihánj taj xna'anj se vaa nahuun sa' 'o xnii nuu nana chree nimán, qui'yaj Jesucristó a*

<sup>14</sup> Dan me se cuchi' nij so' rej nicun' yo'ó nij sí tucu'yón se-nana Jesucristó, ne quene'en nij so' se vaa mán que'ee yuvii anicaj rej nicun' nij so', ne nicun' doj nij sí naqui'yaj cuu se-tucuanj Moisés, ne ca'mii cunu' uxrá nij so' ga nij sí tucu'yón se-nana Jesucristó yo' a. <sup>15</sup> Ne nu' quene'en nij yuvii man Jesucristó, ne nu' ca'anj ndo'o rá nij yuvii, ne cunánj nij yuvii ndaa rej vaj Jesucristó ca'mii nij so' ga so' a. <sup>16</sup> Gaa ne xná'anj Jesucristó man nij yuvii a:

—Me che'é me ca'mii cunu' nij soj ga nij sí tucu'yón se-nana ga —taj so' rihaan nij yuvii a.

<sup>17</sup> Gaa ne yo'ó nij yuvii cataj rihaan Jesucristó a:

—'Unj me se nicaj 'unj ta'níj ca'ná' 'unj nano' 'unj mán so', maestro. Ne

ta'níj me se ya'mii so' che'é se nuu nana chree nimán so', <sup>18</sup> ne me rej ma'an me rá nana chree quita'aa nana chree man so', ne cagan' nana chree man so' rihaan yo'ó, ne avii yatan' tu'va so', ne chá ruj so' cúu yan' so', ne nuu chrúnj nu' so' nanj adonj. Ne cataj 'unj rihaan nij sí tucu'yón se-nana so' se vaa quirii nij so' man nana chree nimán ta'níj, tzaj ne ne ca'vee qui'yaj canaán nij so' ma' —taj snó'o yo' rihaan Jesucristó a.

<sup>19</sup> Gaa ne cataj Jesucristó rihaan nij yuvii a:

—Dan me se sí ne amán rá me soj sij man rihaan chumii nihánj cuano, ne a me daj cachej ga soj, ne a me daj gaa naj nimanj ni'yaj 'unj man soj, gaa ne ca'vee qui'yaj canaán soj ga. Nicaj soj man xnii ca'na' soj rihanj cuaj á —taj Jesucristó a.

<sup>20</sup> Gaa ne nicaj nij yuvii man xnii ca'na' nij yuvii rihaan Jesucristó a. Ne dan me se gaa quene'en nana chree man Jesucristó, ne nu' snúu xnii, ne naxru' xnii, qui'yaj nana chree yo', ne natúj rmii xnii, ne cavii yatan' tu'va xnii a. <sup>21</sup> Gaa ne xná'anj Jesucristó man rej xnii, cataj Jesucristó:

—Me daj güii ran' ta'níj so' danj ga —taj Jesucristó rihaan rej xnii a.

<sup>22</sup> Gaa ne cataj rej xnii:

—Danj ran' so' asij ne'ej me so', ne que'ee ndo'o cagan' nana chree man so' rihaan ya'an do', rihaan na do', qui'yaj nana chree, che'é rej me rá nana chree caví' so', tzaj ne sese ca'vee, ne cunu' 'ee rá so' manj ne racuj so' man núj ruguanj —taj rej xnii yo' rihaan Jesucristó a.

<sup>23</sup> Gaa ne cataj Jesucristó rihaan so' a:

—Taj che'é cataj so' nana “sese ca'vee” ma'. 'O se sí amán rá ni'yaj man Diose ro', ca'vee qui'yaj so' cunudanj nanj adonj —taj Jesucristó rihaan so' a.

<sup>24</sup> Nu' ca'mii Jesucristó danj, ne nu' caguáj rej xnii, cataj so':

—Amán rá 'un̄j ni'yaj 'un̄j Diose á. Raçuíj so' manj cuchuman raj doj, Señor —taj so' rihaan Jesucristó a.

<sup>25</sup> Dan me se quene'en Jesucristó se vaa cunánj ndo'o yuvij ca'na' nij yuvij rej nicun' so', ne che'é dan ca'ne' Jesucristó suun rihaan nana chree yo', ne cataj Jesucristó:

—Rihaan so' nana chree qui'yaj ya'mij ne qui'yaj so'o man xnii nihánj a'mij, ne cataj xna'an̄j 'un̄j rihaan so' se vaa curihan̄j so' cuaj nimán so' cuano, ne daj chihaa míj se catúj uún so' nimán so' mei —taj Jesucristó rihaan nana chree yo' a.

<sup>26</sup> Gaa ne caguáj nana chree, ne guun snuj ndo'o xnii naxru' xnii, qui'yaj nana chree, ne dan me se curihan̄j nana chree nimán xnii yo' a. Gaa ne ase vaa sí cavi' ro', danj vaa xnii, naj xnii rihaan yo'óó, ne cataj nij yuvij se vaa ya ya cavi' so' a. <sup>27</sup> Tzaj ne quita'aa Jesucristó ra'a xnii, ne naxcaj Jesucristó man xnii, ne naxagaa so' a.

<sup>28</sup> Dan me se corá catúj Jesucristó rá ve', ne inanj nij ma'an̄j nij sí tucu'yón se-nana so' ro', man rá ve' ga so', ne xna'an̄j nij so' man so', ne cataj nij so':

—Me che'é ne guun nucuaj núj quirij núj man nana chree yo' ga —taj nij so' rihaan Jesucristó a.

<sup>29</sup> Gaa ne cataj Jesucristó rihaan nij so' se vaa:

—Xa' nana chree vaa danj ro', se ca'vee qui'yaj ní' curihan̄j nij so' nimán yuvij sese ne achín ni'yaj ndo'o ní' rihaan Diose ma'. Dan me se cachinj ni'yaj uxrá', ne caraa guee ndo'o', gaa ne ca'vee adonj —taj Jesucristó rihaan nij sí tucu'yón se-nana so' a.

*Nana nihánj taj xna'an̄j se vaa cataj xna'an̄j uún Jesucristó se vaa cavi' so' ne cunuu i'na' uún so' a*

<sup>30</sup> Gaa ne cavij Jesucristó ga nij sí tucu'yón se-nana so' rej yo', ne ca'an̄j nij so' estadó Galilea, ne ne ca'vej rá Jesucristó xcaj nij yuvij cuentá me rej vaj so' a. <sup>31</sup> 'O se tucu'yón so' man nij sí tucu'yón se-nana so', ne dan me se cataj so' rihaan nij so' se vaa:

—'O se sí ca'née Diose nicaj yu'unj man yuvij mej, ne vaa güii, ne nago' nii manj rihaan yuvij adonj. Dan me se ticavi' nij yuvij manj, gaa ne cachén va'nuj güii, gaa ne cunuu i'na' uún 'un̄j nan̄j adonj —taj Jesucristó rihaan nij sí tucu'yón se-nana so' a.

<sup>32</sup> Tzaj ne ne cunoo nij so' nana ca'mii Jesucristó, ne chu'vi' nij so' xna'an̄j nij so' man Jesucristó me taj nana yo' a.

*Nana nihánj taj xna'an̄j me sí me sí guun chij doj asa' guun chij Diose rihaan chumij nihánj a*

<sup>33</sup> Gaa ne catúj Jesucristó ga nij sí tucu'yón se-nana so' chuman' cu'naj Capernaum a.

Dan me se gaa man̄j nij so' rá ve', ne xna'an̄j Jesucristó man nij sí tucu'yón se-nana so', ne cataj so':

—Me che'é me canó tuvi' nij soj gaa vaj ní' chrej asij cua'aa ga —taj Jesucristó, xna'an̄j so' man nij so' a.

<sup>34</sup> Gaa ne cunuu díj tu'va nij so' a. 'O se gaa vaj nij so' chrej, ne canó tuvi' nij so' ga ma'an̄j tuvi' nij so' se vaa cataj nij so' me nij so' me sí guun chij doj a.

<sup>35</sup> Gaa ne ca'an̄j quitaj Jesucristó chruun xlá, ne canacúún so' man chuvij nij so' se vaa ca'na' nij so' rihaan so', gaa ne cataj so' rihaan nij so' a:

—Me ma'an̄j 'o sí me rá guun chij doj, ne so' me sí guun sí noco', ne ndaa guun so' mozó rihaan daj a tuvi' so' adonj —taj Jesucristó rihaan chuvij nij so' a.

<sup>36</sup> Gaa ne nicaj Jesucristó man 'o ne'ej, ne cachrón so' man ne'ej yo' tanuu nij sí tucu'yón se-nana so', ne na'yaan so' man ne'ej, ne cataj so' rihaan nij sí tucu'yón se-nana so' a:

<sup>37</sup> —Me ma'an̄j 'o sí aráj cochroj ne a'mii sa' so' ga 'o ne'ej nihánj che'ej, ne adi' ma'an̄j me aráj cochroj ne a'mii sa' so' ga vaa nan̄j adonj. Dan me se sí a'mii sa' ga 'un̄j me se nuveé orún' 'un̄j me a'mii sa' so' ga ma'. Maan̄j Diose ya sí ca'née man̄j 'un̄j rihaan chumij nihánj me aráj cochroj

ya so' ne a'mii sa' ya so' ga vaa nanj adonj —taj Jesucristó rihaan nij sí tucu'yón se-nana so' a.

*Nana nihánj taj xna'anj se vaa cataj xna'anj Jesucristó se vaa me ma'an sí ne unu' ga so' me tuvi' so' a*

<sup>38</sup> Cataj sí cu'naj Juan rihaan Jesucristó a:

—Quene'en núj man 'o sí ata' tu'va se-chuvií so', ne urihanj nana chree nimán nij yuvií, 'yaj so', nanj maestro. Tzaj ne caráán núj chrej ca'mii so' ne se qui'yaj so' danj, che'é se nuveé sij chéé ga ní' me so', taj núj, nanj maestro —taj Juan rihaan Jesucristó a.

<sup>39</sup> Gaa ne cataj Jesucristó rihaan chujij nij sí tucu'yón se-nana so' a:

—Ca'ne' sa' guee rá soj qui'yaj ma'an so' danj ei. 'O se taj a 'ó sí ata' tu'va se-chuvií 'unj ne qui'yaj so' suun sa' nocoo che'é se-chuvií 'unj, ne síj, gaa ne canicaj so' ne ca'mii chree so' che'é 'unj ma'. <sup>40</sup> 'O se xa' sí ne unu' ga ní', tzaj ne tuvi' ní' me so' adonj. <sup>41</sup> 'O se a me ma'an yo' sí rqué doj na co'o nij soj che'é se-chuvií 'unj, ne ya ya cataj xna'anj 'unj rihaan soj se vaa daj chihaa míj se quinavij se sa' naru'vee Diose rihaan sí rqué doj na yo' co'o soj ma'.

*Nana nihánj taj xna'anj daj quiran' sí qui'yaj chi'ii nimán 'o sí cuchumán rá ni'yaj man Jesucristó a*

<sup>42</sup> "Dan me se me ma'an 'o sí qui'yaj chi'ii nimán 'o sí le'ej amán rá ni'yaj manj, ne ca'vee a doj cavii sa' sí qui'yaj danj sese toco' nii 'o yuvej xij váj 'núú trigó gaán chihá so' ne tagüéj nii man so' rque na ya'anj nanj adonj. Dan me se doj a sayuun quiran' so', sese qui'yaj chi'ii so' nimán 'o sí le'ej amán rá ni'yaj manj adonj.

<sup>43</sup> "Dan me se sese ra'á so' me rá qui'yaj cacun', ne táá a se ca'ne' so' man yo', gaa ne se gaa nanj ca'anj so' rihaan ya'an qui'yaj yo' ei. Taj se 'yaj se nuj se taj yan vaj ra'á so', tzaj ne ca'vee cayáán so' ga Diose gaa ei. Tzaj ne sese quitaj ra'á so' ne qui'yaj

yo' cacun', ne ca'anj so' rihaan ya'an, qui'yaj yo', ne dan me se ya'an yo' me se daj chihaa míj se quina'áj ya'an yo' nuvií nigan' a mei. <sup>44</sup> Ne nij sí man rihaan ya'an yo' me se se ca'vee caví' xluú chá man nij so', ne daj chihaa míj se quina'áj ya'an rej cunuú nij so' cacaa nij so' a man adonj.

<sup>45</sup> "Ne sese tacóó so' me rá qui'yaj cacun', ne táá a se ca'ne' so' man yo', gaa ne se gaa nanj ca'anj so' rihaan ya'an qui'yaj yo' nanj ei. Taj se 'yaj se nuj se taj yan vaj tacóó so', tzaj ne ca'vee cayáán so' ga Diose ei. Tzaj ne sese quitaj tacóó so' ne qui'yaj yo' cacun', ne ca'anj so' rihaan ya'an, qui'yaj yo' ei. <sup>46</sup> Ne nij sí man rihaan ya'an yo' me se se ca'vee caví' xluú chá man nij so', ne daj chihaa míj se quina'áj ya'an rej cunuú nij so' cacaa nij so' a man adonj.

<sup>47</sup> "Veé danj uún sese me rá rlij rihaan so' qui'yaj yo' cacun', ne táá a se quirii so' man yo', ne sí rihaan canuu gaa so', tzaj ne ca'vee catuu so' rej guun chij Diose ei. Tzaj ne sese cunuú rlij rihaan so' ne qui'yaj yo' cacun', ne ca'anj so' rihaan ya'an, qui'yaj yo' ei. <sup>48</sup> Ne nij sí man rihaan ya'an yo' me se se ca'vee caví' xluú chá man nij so', ne daj chihaa míj se quina'áj ya'an rej cumán nij so' cacaa nij so' a man adonj.

<sup>49</sup> "'O se vaa sayuun quiran' cunudanj nij rasuun man rihaan chumii nihánj, qui'yaj Diose, ne dan me se ase vaa nuu sa' nee 'yaj yaan ro', danj gaa cunuú sa' nij sí man rihaan chumii nihánj, qui'yaj ya'an ei.

<sup>50</sup> "Ne ase vaa yaan ga chraa ro', danj vaa nij soj sij tucu'yón se-nanaj ga chumii nihánj, ne vaa se uun ndo'o yaan ei. Dan me se sese ne 'ne' chá yaan yo', gaa ne taj se qui'yá' cunuú sa' yaan gaa a ma'. Che'é dan, ase vaa yaan 'ne' sa' ro', danj gaa soj, ne dínj cayáán soj ga tuvi' soj, ne ca'vee cunuú sa' chumii nihánj qui'yaj soj nanj adonj —taj Jesucristó rihaan nij sí tucu'yón se-nana so' a.



## 10

*Nana nihánj taj xna'anj se vaa ne nó xcúún yuvií quirí'ij yuvií man nica yuvií a*

<sup>1</sup> Gaa ne curihanj Jesucristó rej yo', ne ca'anj so' ndaa rnej tu'va chráa cu'naj Jordán, ndaa estadó Judea a. Gaa ne cunuu chre' uún que'ee yuvií rihaan so', ne tucu'yón uún so' se-nana so' rihaan nij yuvií, ndaa vaa u'yón so' 'yaj so' a. <sup>2</sup> Gaa ne ca'na' doj sí fariseo rihaan so', ne xná'anj nij so' man Jesucristó sese no xcúún snó'o quirí'ij snó'o man nica so' a. Danj cataj nij sí fariseo, che'é se guun rá nij so' cuta' nij so' cacun' xráa Jesucristó che'é nana ca'mii Jesucristó a. <sup>3</sup> Gaa ne cataj Jesucristó rihaan nij so' a:

—Ne daj cataj sí cu'naj Moisés qui'yaj soj ga —taj Jesucristó, xná'anj so' man nij sí fariseo a.

<sup>4</sup> Gaa ne cataj nij so' se vaa:

—Ca'ne' sí cu'naj Moisés suun se vaa naxcaj yuvií yanj rihaan nij sí nica suun, ne ca'vee quirí'ij yuvií man nica yuvií á —taj nij sí fariseo a.

<sup>5</sup> Gaa ne cataj Jesucristó rihaan nij so' a:

—Maan che'é se sí nichraj ndo'o rá me nij soj ro', che'é dan cachrón Moisés nana yo' rihaan yanj cunó soj a. <sup>6</sup> Tzaj ne asij qui'yaj Diose chumii, ne qui'yaj Diose snó'o, ne qui'yaj Diose chana, ne vij roj so' me yuvií, qui'yaj Diose a. <sup>7</sup> Che'é dan tanáj snó'o man rej so', man nii so' do', <sup>8</sup> ne ase vaa orún' yuvií ro', danj gaa snó'o ga nica snó'o, taj danj Diose a. Dan me se nuveé vij ran' yuvií me roj so' asij xcaj tuvi' roj so' a ma'. 'O se ase vaa orún' yuvií ro', vaa roj so' nanj adonj. <sup>9</sup> Dan me se Diose me sí qui'yaj xcaj tuvi' roj so', ne che'é dan ne nó xcúún a 'o yuvií ca'ne' tanuu yuvií man roj so' ma' —taj Jesucristó rihaan nij sí fariseo yo' a.

<sup>10</sup> Dan me se gaa man nij sí tucu'yón se-nana Jesucristó rá 'o ve' ga so', gaa ne xná'anj nij so' man so' che'é nana ca'mii so' rihaan nij sí

fariseo a. <sup>11</sup> Ne cataj Jesucristó rihaan nij so' a:

—Me ma'an 'o sí ri'ij man nica ne xcaj so' man yo'ó chana, ne tumé ndo'o so' cacun', ne nij qui'yaj so' rihaan nica so' ei. <sup>12</sup> Tzaj ne sese cunanj chana rihaan nica no', ne xcaj no' man yo'ó chii, ne tumé ndo'o no' cacun' uún adonj —taj Jesucristó rihaan nij sí tucu'yón se-nana so' a.

*Nana nihánj taj xna'anj me che'é caran'rá Jesucristó ni'yaj so' man ne'ej a*

<sup>13</sup> Gaa ne nicaj nij yuvií man nij ne'ej ca'na' nij yuvií rihaan Jesucristó, che'é rej cuta' Jesucristó ra'a so' raaj nij ne'ej a. Tzaj ne nij sí tucu'yón se-nana Jesucristó me se cataj xna'anj nij so' rihaan nij yuvií se vaa ne nó xcúún nij ne'ej ca'na' nij ne'ej rihaan Jesucristó, taj nij so' a. <sup>14</sup> Tzaj ne xcaj Jesucristó cuentá daj qui'yaj nij sí tucu'yón se-nana so', gaa ne ca'maan rá Jesucristó, ne cataj so' rihaan nij sí tucu'yón se-nana so' a:

—Ca'ne' rá soj ca'na' nij ne'ej rihanj á. Se caráan soj chrej rihaan nij ne'ej mei. 'O se tucua nij sí vaa danj ro', me rej yanj Diose uun chij Diose nanj adonj. <sup>15</sup> Ya ya cataj xna'anj 'unj rihaan soj se vaa me ma'an 'o sí na'vej rá guun chij Diose nimán, ndaa vaa uun chij Diose nimán ne'ej, ne daj chihaa míj se ca'vee cayáan so' ga Diose asa' guun chij Diose rihaan chumii nihánj ma' —taj Jesucristó rihaan nij sí tucu'yón se-nana so' a.

<sup>16</sup> Gaa ne na'yaan Jesucristó man nij ne'ej, ne uta' so' ra'a so' raaj nij ne'ej, ne achíin ni'yaj so' rihaan Diose che'é nij ne'ej a.

*Nana nihánj taj xna'anj che'é yo'ó sí me rá cayáan ga Diose nu' cavii nu' ca'anj a*

<sup>17</sup> Dan me se gaa nayón Jesucristó chrej, ne dan me se cunanj 'o sí tachruu yo' ca'na' so' rihaan Jesucristó, ne canicun' ruj sí tachruu yo' rihaan Jesucristó, ne xná'anj so' man Jesucristó, cataj so', ne:

—Maestro. Síi sa' uxrá mé so' adonj. Daj qui'yáj ne ca'vee cayánj ga Diose nu' cavii nu' ca'anj ga —taj síi tachruu yo', xná'anj so' man Jesucristó a.

<sup>18</sup> Gaa ne cataj Jesucristó rihaan so' a:

—Me che'é cataj so' se vaa síi sa' uxrá mej ga. 'O se orún' Diose me síi sa' ei. <sup>19</sup> Ne aj ne'én so' nij nana nocoo ya ya nana cataj xna'anj Diose se vaa canoco' ní' á. Dan me se taj nana yo': “Se ticaví' so' yuvii ma'. Se cotoj so' ga chana nica yo'ó yuvii ma'. Se qui'yaj ituu so' si'yaj yo'ó yuvii ma'. Se nanó so' cuentó ne che'é yuvii ma'. Se tiha' yu'unj so' man yuvii che'é sa'anj ma'. Caraa cochróo so' rihaan rée so' do', rihaan níi so' do' á” —taj Jesucristó rihaan síi tachruu yo' a.

<sup>20</sup> —Asij gaa mej xnii me ve'é unó 'unj nu' nij nana yo', nanj maestro —taj so' rihaan Jesucristó a.

<sup>21</sup> Gaa ne ni'yaj uxrá Jesucristó man so', ne cunuu 'ee rá Jesucristó man so', ne cataj Jesucristó rihaan so' a:

—Daj orún' rasuun achiin ya mán so' nanj ei. Cavii so' ca'anj so', ne cutu'vee so' nu' si'yáa so', ne sa'anj quirí' so' ro', caxrii so' ston nij síi nique, ne cumán ndo'o si'yáa so' rej xta', qui'yaj Diose nanj ei. Ne dan me se ca'na' so', ne canocó' so' manj, ca'anj ní' á —taj Jesucristó a.

<sup>22</sup> Gaa ne quirí' ndo'o rá síi tachruu, qui'yaj se-nana Jesucristó, ne ca'anj uun so', ne nanó ndo'o rá so' a. 'O se síi ru'vee me so', ne vaa ndo'o si'yaj so' a.

<sup>23</sup> Gaa ne ni'yaj Jesucristó, ne cataj so' rihaan nij síi tucuyón se-nana so' a:

—Sayuun uxrá vaa quisij nij síi vaa ndo'o sa'anj rihaan cayáan ga Diose asa' guun chij Diose rihaan chumii nihánj nanj adonj —taj Jesucristó rihaan nij síi tucuyón se-nana so' a.

<sup>24</sup> Gaa ne ca'anj ndo'o rá nij so' gaa cuno nij so' nana yo' nana ca'mii Jesucristó a. Gaa ne cataj uún Jesucristó rihaan nij so' a:

—Sayuun uxrá vaa quisij yuvii cayáan nij yuvii ga Diose asa' guun chij Diose rihaan chumii nihánj nanj chuguanj. <sup>25</sup> Dan me se ne'en soj se vaa sayuun ndo'o vaa cachén xcuu camelló rihaan yu'uj taj tacúún cúu nuvá, tzaj ne cuano nihánj me se cataj xna'anj 'unj rihaan soj se vaa ca'vee a doj cachén xcuu yo' yu'uj taj tacúún cúu nuvá, ndaa rá se vaa síi ru'vee, ne se guun cachén so' cayáan so' ga Diose asa' guun chij Diose rihaan chumii nihánj a ma' —taj Jesucristó rihaan nij so' a.

<sup>26</sup> Gaa ne ca'anj ndo'o rá nij so', ne cataj nij so' rihaan Jesucristó a:

—Che'é dan me se me síi guun nucuj quinanii rihaan sayuun ga —taj nij so', xná'anj nij so' man so' a.

<sup>27</sup> Ni'yaj Jesucristó man nij so', ne cataj so':

—Se guun nucuj yuvii quinanii ma'an nij yuvii rihaan sayuun ma'. Sayuun uxrá vaa rihaan nij so' nanj adonj. Tzaj ne xa' rihaan Diose me se ne sayuun a doj vaa rihaan so' a ma'. Canó rasuun ca'vee qui'yaj so' nanj adonj —taj Jesucristó a.

<sup>28</sup> Gaa ne guun che'e Pedró cataj Pedró:

—Aj tanáj núj nu' si'yaj núj, ne canoco' núj mán so' á —taj Pedró rihaan Jesucristó a.

<sup>29</sup> Gaa ne cataj Jesucristó:

—Ya ya cataj xna'anj 'unj rihaan nij soj se vaa síi tanáj ve' tucua tanáj tinúú tanáj ra'vij tanáj nii tanáj rej tanáj ta'níi tanáj to'óo tanáj che'é se me rá so' canoco' so' manj ne nata' so' se-nanaj nana sa' rihaan yuvii, <sup>30</sup> ne cientó doj a rasuun quirí' uún so' gaa vaa i'na' so' rihaan chumii nihánj cuano adonj. Dan me se cumán que'ee ve' tucua so' do', tinúú so' do', ra'vij so' do', nii so' do', ta'níi so' do', to'óo so' do', rihaan so' gaa vaa i'na' so' rihaan chumii nihánj, tzaj ne vaa sayuun quiran' so' che'é 'unj adonj.

Ne asa' guun chij Diose rihaan chumii nihánj me se yo'o cayáan so' ga Diose nu' cavii nu' ca'anj nanj adonj.

<sup>31</sup> Tzaj ne que'ee nij síi guun chij

ndo'o rihaan chumiġ nihánj ro', guun nij so' sí noco' ei. Ne que'ee nij sí ne guun chij rihaan chumiġ nihánj me se guun chij nij so', qui'yaj Diose nanj adonj —taj Jesucristó rihaan nij sí tucu'yón se-nana so' a.

*Nana nihánj taj xna'anj se vaa síj va'nuj cataj xna'anj Jesucristó se vaa cavi' so' ne cunu u'na' uún so' a*

<sup>32</sup> Dan me se vaj nij so' chrej avii nij so' chuman' Jerusalén, ne táa yaan Jesucristó rihaan nij sí tucu'yón se-nana so', ne ma'anj ndo'o rá nij so', ne nij sí noco' xcó nij so' me se cuchu'vi' ndo'o nij so' a. Dan me se narii Jesucristó man chuvij nij sí tucu'yón se-nana so', ne guun che'e so' cataj xna'anj so' rihaan nij so' daj quiran' so' a. <sup>33</sup> Dan me se cataj Jesucristó rihaan nij so', ne:

—Nihánj me ca'anj ní' chuman' Jerusalén, ne quita'aa nii manj sij ca'née Diose nġcaj yu'unj man yu-vij, ne nago' nii manj rihaan nij xrej ata suun noco'oj doj do', rihaan nij sí naqui'yaj cuu se-tucuanj Moisés rihaan yuvij do' a. Ne cuta' nij so' cacun' xráj, ne cataj nij so' se vaa cavi' 'unj a. Gaa ne nago' nij so' manj rihaan nij sí yanj, <sup>34</sup> ne ca'nga' naco'oj nij sí yanj quene'en nij so' manj, ne quirij talúj nij so' rihanj, ne go' nij so' quartá xráj, ne ticavi' nij so' manj a. Gaa ne cachén va'nuj güii, gaa ne cunu u'na' uún 'unj, qui'yaj Diose ei —taj Jesucristó rihaan chuvij nij sí tucu'yón se-nana so' a.

*Nana nihánj taj xna'anj se vaa achún ni'yaj síj cu'naj Jacobo do', síj cu'naj Juan do', se vaa cata roj so' suun sa' doj qui'yaj Jesucristó a*

<sup>35</sup> Gaa ne cuchil' síj cu'naj Jacobo do', síj cu'naj Juan do', rihaan Jesucristó, ne ta'níj síj cu'naj Zebedeo me roj so' a. Gaa ne cataj roj so' rihaan Jesucristó a:

—Me rá rój se vaa qui'yáa so' ndaa vaa cachinj ni'yaj rój rihaan so' che'e rój, maestro —taj roj so' rihaan Jesucristó a.

<sup>36</sup> Gaa ne cataj Jesucristó rihaan roj so' a:

—Daj qui'yáj che'é roj soj, rá roj soj ga —taj so', xná'anj so' man roj so' a.

<sup>37</sup> Gaa ne cataj roj so' rihaan Jesucristó a:

—Cataj xna'anj so' se vaa asa' guun chij so' rihaan chumiġ nihánj, ne quitaj rój x'núú so', ne cata rój suun sa' doj, qui'yáa so' á. Dan me se yo'o rój cayáán rej nuva' so', ne yo'ó rój cayáán rej nichruún so', ne quirij ta'nga' rój ga so', cataj so', rá rój a —taj roj síj cu'naj Jacobo ga Juan rihaan Jesucristó a.

<sup>38</sup> Gaa ne cataj Jesucristó rihaan roj tinuj roj so' a:

—Ne ne'en roj soj me rasuun cachún ni'yaj roj soj rihanj nihánj a ma'. 'O se guun nucuaj roj soj quiran' roj soj sayuun ndaa vaa quiran' 'unj na' —taj Jesucristó, xná'anj Jesucristó man roj so' a.

<sup>39</sup> —Guun nucuaj rój ei —taj roj so' a.

Gaa ne cataj Jesucristó rihaan roj so' a:

—Ya ya quiran' roj soj sayuun gaj nanj á. <sup>40</sup> Tzaj ne ne nó xcúnj cataj xna'anj 'unj me síj cayáán x'núú 'unj rej nuva' 'unj do', rej nichrunj do', ma'. Orún' Diose me síj cataj xna'anj me síj quirij ta'nga' gaj nanj adonj —taj Jesucristó a.

<sup>41</sup> Gaa ne cuno yo'ó chí' nij síj tucu'yón se-nana Jesucristó se vaa ca'mii roj síj cu'naj Jacobo ga Juan rihaan Jesucristó, gaa ne guun che'e nij so' ca'maan rá nij so' ni'yaj nij so' man roj so' a.

<sup>42</sup> Gaa ne canacúun Jesucristó man cunudanj nij so' se vaa ca'na' nij so' rihaan so' a. Ne cataj so':

—Ne'en soj se vaa nij síj ata suun man rihaan chumiġ nihánj me se riġ ta'nga' uxrá nij so' rihaan tuvi' nij so' nanj adonj. <sup>43</sup> Tzaj ne se gaa danj se a nuj ní' qui'yaj ní' ma'. 'O se sese me rá ní' guun chij ní' rihaan tuvi' ní', ne guun ní' síj qui'yaj suun rihaan taran' tuvi' ní', <sup>44</sup> ne ase vaa mozó ro', danj gaa xa' ní' rihaan tuvi' ní' nanj adonj.

<sup>45</sup> Dan me se ca'néé Diose manj nıcaj yu'unj 'unj man yuvii, tzaj ne ne ca'na' 'unj ne guun nij yuvii mozó rihanj ma'. 'O se ca'ná' 'unj qui'yaj suun ma'anj rihaan nij yuvii nanj adonj. Ne ca'ná' 'unj nayon ma'anj rihaan yuvii ne cavi' 'unj che'é cacun' ata nij so', gaa ne cavi' sa' uxrá nij so', qui'yáj nanj adonj —taj Jesucristó a.

*Nana nihánj taj xna'anj se vaa naxra' rihaan síi cu'naj Bartimeo, qui'yaj Jesucristó a*

<sup>46</sup> Gaa ne catúj nij so' chuman' Jericó a. Gaa ne curihanj Jesucristó do', nij síi tucu'yón se-nana so' do', que'ee yuvii do', chuman' Jericó, ne dan me se yáán 'o síi tuchrii cu'naj Bartimeo tu'va chrej, ne ta'níi síi cu'naj Timeo me so', ne síi achíin caridad me so' a. <sup>47</sup> Gaa ne xcaj so' cuentá se vaa Jesucristó síi cavii chuman' Nazaret me síi cachén rej ne so', ne che'é dan guun che'e so' caguáj so', ne cataj so':

—Ya ya ta'níi ta'nij si'no síi cu'naj David síi cane gaa naá mé so', Jesús. Cunuu 'ee rá so' manj ei —taj so' a.

<sup>48</sup> Tzaj ne:

—Dínj tu'vá so' á —taj que'ee nij yuvii rihaan so' a.

Tzaj ne doj a nucuaj caguáj so', cataj so':

—Ta'níi ta'nij si'no síi cu'naj David síi cane gaa naá ei. Cunuu 'ee rá so' manj ei —taj uún so' a.

<sup>49</sup> Gaa ne canicun' Jesucristó, ne ca'ne' Jesucristó suun rihaan nij síi nicun' ga so' se vaa ca'anj nacaj nij so' man síi tuchrii yo' ne ca'na' so' rihaan Jesucristó a. Gaa ne ca'anj canacunj nij so' man síi tuchrii, ne cataj nij so':

—Yo'o ca'nej nucuaj nimán so' ei. Nacúun so' mán so', ne naxumaan so', ca'anj ní' á —taj nij so' rihaan síi tuchrii cu'naj Bartimeo a.

<sup>50</sup> Gaa ne tanáj so' yatzíj taj xráa so', ne güéj so', ne ca'na' so' rihaan Jesucristó a.

<sup>51</sup> Gaa ne xná'anj Jesucristó man so', cataj Jesucristó:

—Daj qui'yáj mán so', rá so' ga —taj Jesucristó a.

Ne:

—Cunuu sa' rihanj, raj, maestro —taj so' rihaan Jesucristó a.

<sup>52</sup> Gaa ne cataj Jesucristó rihaan so' a:

—Ca'vee ca'anj so' á. Maan che'é se amán rá so' ni'yaj so' manj ro', che'é dan cunuu sa' rihaan so' ei —taj Jesucristó rihaan so' a.

Nu' ca'mii Jesucristó danj, ne nu' curuvi' rihaan síi tuchrii yo', ne ca'anj so' ga Jesucristó chrej vaj Jesucristó a.

## 11

*Nana nihánj taj xna'anj daj qui'yaj Jesucristó gaa catúj Jesucristó chuman' Jerusalén a*

<sup>1</sup> Gaa ne quinichrun' Jesucristó ga nij síi tucu'yón se-nana so' roj chuman' cu'naj Betfagé ga Betania, ne roj chuman' yo' ro', naj nichrun' tu'va chuman' Jerusalén, ne tacóo quij cu'naj Quij man Chruun Olivó naj roj chuman' yo' a. Gaa ne ca'néé Jesucristó man vij tuvi' nij síi tucu'yón se-nana so' ca'anj rque chuman' Betfagé yo', <sup>2</sup> ne cataj so' rihaan roj so' a:

—Cavii roj soj ca'anj soj, ne catuu roj soj chuman' nihánj chuman' naj rihaan ní', ne nu' catúj roj soj, ne nu' nari' roj soj man yo'o burró le'ej ya'anj numii a. Dan me se nache roj soj man xo', ne nıcaj roj soj ca'na' roj soj rihanj nihánj á. <sup>3</sup> Ne sese xna'anj nii man roj soj me che'é 'yaj roj soj danj ga burró, ne cataj roj soj: “Síi 'nij ra'a man ní' achiin xcuu nihánj rihaan chuguanj. Ne nu' navij suun rihaan burró nihánj, ne nu' ca'nej uún so' man núj ca'na' tanáj uún núj man burró nihánj ei”, cataj roj soj á —taj Jesucristó rihaan roj síi tucu'yón se-nana so' a.

<sup>4</sup> Dan me se ca'anj roj so', ne catúj roj so' chuman', ne nari' roj so' man burró le'ej, ne nicun' xo' rá 'o callé rihaan ta'yaa, ne numii xo' a. Dan me se nache roj so' man xo' a. <sup>5</sup> Ne nicun' doj nij yuvii rej yo', ne xná'anj nij so' man roj so', ne cataj nij so':



—Me che'é nache roj soj burró ga —taj nij sí nicun' rej yo' a.

<sup>6</sup> Ne ca'mii roj sí tucu'yón se-nana Jesucristó ndaa vaa ca'ne' Jesucristó suun rihaan roj so', gaa ne ca'vej rá nij sí nicun' rej yo' nicaj roj so' burró ca'na' roj so' a.

<sup>7</sup> Dan me se nicaj roj so' burró ca'na' uún roj so' rej nicun' Jesucristó, ne cuta' roj so' sagan' roj so' xraá burró, ne cavii Jesucristó xraá burró yo' a. <sup>8</sup> Dan me se uchruj ndo'o nij yuvii yatzíj sagan' nij so' rá chrej, ne achén Jesucristó ga burró yo' rihaan yatzíj a. Ne yo'ó ta'aj nij yuvii ro', a'ne' nij so' rcoj ra'a chruun do', coj man tacaan do', uchruj nij so' rá chrej, ne achén Jesucristó ga burró le'ej a.

<sup>9</sup> Ne vaj yuvii taj yaan rihaan Jesucristó, ne 'na' yuvii noco' rej xco Jesucristó, ne caguáj nij yuvii, cataj nij yuvii:

—Caraa guee ní' rihaan Diose ei. 'Na' sí ca'née sí 'nij ra'a man ní' ei. Se luj ndo'o me 'yaj Diose che'é ní' ei. <sup>10</sup> Cuna'j uxrá vaa 'na' sí guun chij ndaa vaa guun chij xii ní' sí cu'na'j David gaa naá ei. Caraa guee ní' rihaan Diose sí nicun' xta' ei —taj nij yuvii yo', caguáj nij so' a.

<sup>11</sup> Gaa ne catúj taran' nij so' rihaan nuvií noco ne chuman' Jerusalén, ne ni'yaj Jesucristó man cunudan' nij rasuun man anicaj rihaan nuvií noco, ne maan che'é se nichrun' guun rmi', ne che'é dan curihan' uún Jesucristó ga chuvij nij sí tucu'yón se-nana so', ne nanicaj so' ca'an' so' chuman' Betania a.

*Nana nihánj taj xna'an'j daj ca'mii Jesucristó rihaan chruun nuvi' chruj raq a*

<sup>12</sup> Ne yo'ó güii me se curihan' uún nij so' chuman' Betania, ne na'aan rque Jesucristó a. <sup>13</sup> Gaa ne gan' nicun' 'o chruun man chruj higó quene'en Jesucristó, ne taj coj raq chruun yo' a. Ne cuchi' so' tacóo chruun, ne ni'yaj so', ne taj vaj a doj chruj man raq chruun a. Maan nanj

coj uun táa raq chruun yo' a. 'O se nuveé tiq man chruj higó me yo' a. <sup>14</sup> Gaa ne cataj Jesucristó rihaan chruun a:

—Daj chihaa míj se cumán chruj raá so' cha yuvii a ma' —taj so' rihaan chruun man chruj higó yo' a.

Ne cuno nij sí tucu'yón se-nana so' se vaa ca'mii so' danj rihaan chruun yo' a.

*Nana nihánj taj xna'an'j se vaa quirii Jesucristó man nij yuvii tu'vej rasuun man rá nuvií noco a*

<sup>15</sup> Gaa ne catúj Jesucristó ga nij sí tucu'yón se-nana so' chuman' Jerusalén, gaa ne catúj Jesucristó rá nuvií noco, gaa ne guun che'e so' quirii so' man nu' nij sí tu'vej rasuun do', man nij sí quiránj rasuun man rá nuvií noco do' a. Ne tiguíj ra'a so' nij chruun mesá natuná nii sa'an'j rihaan, ne tiguíj ra'a so' chruun xlá taj nij sí tu'vej cha'aan a. <sup>16</sup> Ne caráan so' chrej se cata' nij yuvii rasuun 'ee cachén nij so' rque nuvií a. <sup>17</sup> Gaa ne tucu'yón so' man nij sí man rihaan nuvií, ne cataj so':

—Ya uxrá danj Diose taj se vaa tucua' Diose rej na'víj ndaa nij yuvii yaníj rihaan Diose me nihánj á. Tzaj ne guun tucua' sí ituu man tucua' Diose nihánj, qui'yaj soj nanj á —taj Jesucristó a.

<sup>18</sup> Ne cuno nij xrej do', nij sí naqui'yaj cuu se-tucuan'j Moisés rihaan yuvii do', se-nana Jesucristó, gaa ne nano' uxrá nij so' daj qui'yaj nij so' ne ca'vee caví' Jesucristó a. 'O se chu'vi' nij so' ni'yaj nij so' man Jesucristó, che'é se ca'an'j ndo'o rá cunudan' nij yuvii cuno nij yuvii nana tucu'yón Jesucristó a. <sup>19</sup> Tzaj ne ca'an'j güii, ne nichrun' guun rmi', ne curihan' uún Jesucristó ga nij sí tucu'yón se-nana so' chuman' Jerusalén ca'an'j nij so' a.

*Nana nihánj taj xna'an'j daj quiran' chruun man chruj higó raq a*

<sup>20</sup> Gaa ne rej na'yaan yo'ó güii me se vaj Jesucristó ga nij sí tucu'yón se-nana so' chrej, ne cachén nij so' rej

nicun' chruun higó ca'mii Jesucristó rihaan gaa güii quii, ne dan me se yo'o nacoó ndaa yáa nu' chruun yo' a. <sup>21</sup> Dan me se nanuj rá sí cu'naj Pedró daj ca'mii Jesucristó rihaan chruun yo', ne che'é dan cataj so' rihaan Jesucristó a:

—Ní'yaj so', maestro. Nacoó nu' chruun ca'mii chreé so' rihaan gaa quii nanj á —taj Pedró rihaan Jesucristó a.

<sup>22</sup> Gaa ne cataj Jesucristó rihaan taran' nij so' a:

<sup>23</sup> —Cuchuman rá soj ní'yaj soj Diose ei. Ya ya cataj xna'anj 'unj rihaan soj se vaa me ma'an 'o sí cataj rihaan ndaa quij xcaan yo' se vaa curihanj quij rej nicun' quij ne ca'anj nij quij rque na ya'anj, ne sese se guun vij rá so' ne cuchuman ya rá so' se vaa guun nu' ndaa vaa cataj so', ne ya guun ndaa vaa cataj so' adonj. <sup>24</sup> Che'é dan cataj xna'anj 'unj rihaan soj se vaa nu' se vaa cachinj ní'yaj soj rihaan Diose ro', sese cuchuman rá soj se vaa aj qui'yaj Diose danj che'é soj, ne ya ya guun ndaa vaa cachín ní'yaj soj adonj. <sup>25</sup> Ne gaa nicun' soj achín ní'yaj soj rihaan Diose, ne sese vaa cacun' qui'yaj yo'o so' rihaan soj, ne caraá x'naa soj che'é cacun' tumé tuvi' soj, gaa ne ca'vee caraá x'naa Rej soj sí nicun' xta' ní'yaj so' cacun' tumé ma'an soj adonj. <sup>26</sup> Tzaj ne sese se ca'vej rá soj caraá x'naa soj che'é cacun' qui'yaj tuvi' soj rihaan soj, ne daj chihaa míj se tinavij Rej soj sí nicun' xta' cacun' tumé ma'an soj a ma' —taj Jesucristó rihaan nij sí tucu'yón se-nana so' a.

*Nana nihánj taj xna'anj se vaa xna'anj nii man Jesucristó me sí ca'ne' suun rihaan so' qui'yaj so' ndaa vaa 'yaj so' a*

<sup>27</sup> Gaa ne catúj uún Jesucristó ga nij sí tucu'yón se-nana so' rque chuman' Jerusalén, gaa ne chéé Jesucristó rá nuvíi nocoo, ne cuchí' nij xrej ata suun nocoo doj do', nij sí naqui'yaj cuu se-tucuanj Moisés rihaan yuvii do', nij sí uun chij rihaan nij yuvii

do', rihaan so', <sup>28</sup> gaa ne cataj nij so' rihaan so' a:

—Me sí ca'ne' suun rihaan so' qui'yáa so' ndaa vaa 'yáa so' ga —taj nij so' a.

<sup>29</sup> Gaa ne cataj Jesucristó rihaan nij so' a:

—Ne vaa yo'o nana xna'anj 'unj man nij soj, ne sese ya cataj xna'anj nij soj nana yo' rihanj, ne cataj xna'anj 'unj rihaan soj me sí ca'ne' suun rihanj a. <sup>30</sup> Dan me se me sí ca'ne' suun rihaan sí cu'naj Juan cuta' ne so' man yuvii, rá soj ga. Ma'an Juan cavii raa na'. Ase Diose cataj xna'anj rihaan so' xa'. Cataj xna'anj nij soj rihanj á —taj Jesucristó a.

<sup>31</sup> Gaa ne nuchruj raa ndo'o nij so' ga tuvi' nij so', ne cataj nij so':

—Sese cataj ní' se vaa Diose ca'ne' suun rihaan sí cu'naj Juan cuta' ne so' man yuvii, ne cataj Jesucristó rihaan ní' me che'é ne cuchuman rá ní' nana ca'mii Juan, cataj so' a. <sup>32</sup> Tzaj ne daj chihaa míj se ca'vee cataj ní' se vaa ma'an Juan cavii raa qui'yaj danj ma' —taj nij so' rihaan tuvi' nij so', che'é se cuchu'vi' nij so' ní'yaj nij so' man nij yuvii a.

'O se nij yuvii me se sí ca'néé Diose nata' se-nana Diose rihaan yuvii me ya sí cu'naj Juan, rá cunudanj nij yuvii a.

<sup>33</sup> Gaa ne cataj nij so' rihaan Jesucristó a:

—Ne ne'en núj me sí ca'ne' suun rihaan sí cu'naj Juan cuta' ne so' man yuvii ma' —taj nij so' a.

—Che'é dan se cataj xna'anj 'unj rihaan nij soj me sí ca'ne' suun rihanj qui'yáj ndaa vaa 'yá ma' —taj Jesucristó rihaan nij so' a.

## 12

*Nana nihánj me cuentó nanó Jesucristó che'é yuvii chí'ii 'yaj suun rihaan yo'óo a*

<sup>1</sup> Gaa ne guun che'e Jesucristó nanó so' cuentó rihaan nij so' a:

—Dan me se cuchruj yo'o so' naa chruj uvá, ne qui'yaj so' chingá nu'

anicaj tu'va naa yo', gaa ne gaán so' yu'uj rej xtun' chruj uvá ne cavij na, ne cune' so' 'o ve' nata' cayáan nij sí cutumé naa yo' a. Gaa ne tanáj so' naa yo' rihaan sí qui'yaj suun naa yo', ne curihanj so' ca'anj so' gan' a. <sup>2</sup> Cachén doj yavii, ne quisij yavii cuta nii chruj uvá, ne ca'née sí xnaa yo' man yo'o se-mozó so' rihaan nij sí nuu tumé xnaa so' a. Me rá so' ca'na' nica' se-mozó so' doj chruj uvá rihaan ma'an so' a. <sup>3</sup> Gaa ne quita'aa nij sí nuu tumé naa man se-mozó sí xnaa, ne go' uxrá nij so' chruun xraá so', ne ca'née nij so' man so' rihaan sí xnaa a. Tzaj ne a doj chruj uvá ne nica' so' ca'anj so', qui'yaj nij so' a ma'. <sup>4</sup> Gaa ne ca'née sí xnaa man yo'ó mozó rihaan nij sí nuu tumé xnaa so' uún a. Tzaj ne go' nij so' raa so', ne qui'yaj chi'ij nij so' man so' a. <sup>5</sup> Gaa ne ca'née sí xnaa yo'ó mozó uún, ne ticavi' nij sí nuu tumé naa man so', ne que'ee doj mozó ca'née uún sí xnaa, ne ta'aj nij so' go' nij sí nuu tumé naa xraá, ne yo'ó ta'aj nij so' ticavi' nij sí nuu tumé naa, <sup>6</sup> ne daj orún' so' quináj, ne sí quináj me ta'ní sí xnaa, ne 'ee ndo'o rá sí xnaa man ta'ní so' a. Tzaj ne ca'née sí xnaa yo' man ta'ní so' rihaan nij sí tumé xnaa so' a. “Caraa cochroj nij sí tumé naa rihaan ta'nij sese ca'anj ta'nij saj xee”, taj sí xnaa yo' a.

<sup>7</sup> ”Tzaj ne cataj nij sí tumé naa rihaan tuvi' nij so': “Sí nihánj me sí guun xnaa naa nihánj vaa güi ei. Che'é dan ticavi' ní man so', ne vaa güi, ne guun xnaa ma'an ní man naa nihánj chuguanj”, taj nij so' ni'yaj nij so' man ta'ní sí xnaa a. <sup>8</sup> Gaa ne quita'aa nij so' man ta'ní sí xnaa yo', ne ticavi' nij so' man so', ne quirij'ij nij so' man so' xe' a.

<sup>9</sup> ”Ne daj qui'yaj sí xnaa man nij sí tumé xnaa so', rá soj ga. Dan me se ca'na' so', ne ticavi' so' man nij so', ne tucuchén so' xnaa so' rihaan yo'ó sí tumé xnaa so' a. <sup>10</sup> Ne me che'é ne naya' nij soj nana nihánj nana no rihaan danj Diose ga: “Yuvej quirij'ij nij sí cune' ve' ro', guun yuvej sa'

doj rihaan cunudanj nij yuvej man tacóo ve' yo' nanj adonj. <sup>11</sup> Ma'an sí 'nij ra'a man ní qui'yaj yo', ne cunaj uxrá vaa yo', rá ní á”, taj danj Diose a —taj Jesucristó rihaan nij sí uun chij rihaan nij yuvij israelitá a.

<sup>12</sup> Gaa ne nanó rá nij so' daj gaa quita'aa nij so' man Jesucristó, tzaj ne kuchu'vi' nij so' ni'yaj nij so' man nij yuvij a. Ése che'e ma'an nij so' me cuentó nanó Jesucristó a. Ase vaa nij sí nuu tumé naa vaa ma'an nij so' ni'yaj Jesucristó, ne quene'en nij so' se vaa che'é dan nanó Jesucristó cuentó yo' a. Gaa ne tanáj nij so' man Jesucristó, ne ca'anj nij so' a.

*Nana nihánj taj xna'anj che'é puextó go' ní rihaan gobiernó ne che'é se rque ní rihaan Diose do' a*

<sup>13</sup> Gaa ne ca'née nij sí uun chij yo' doj sí fariseo do', doj sí noco' man sí cu'naj Herodes do', rihaan Jesucristó, che'é rej cuta' nij so' cacun' xraá Jesucristó che'é nana ca'mij Jesucristó a. <sup>14</sup> Dan me se cuchí' nij sí tiha' yu'unj yo' rihaan Jesucristó, ne cataj nij so' rihaan so' a:

—Ne'en núj se vaa nana ya inan' a'mij so', maestro. Ne ne chu'ví' so' ni'yaj so' man nij yuvij daj cataj nij yuvij ma'. Ne 'o cyaan vaa nu' yuvij rihaan so' chuguanj. Maan se ya tucu'yón so' rihaan yuvij daj qui'yaj yuvij canoco' yuvij man Diose adonj. Ne no xcúun yuvij go' yuvij puextó rihaan sí nica' suun gobiernó na'. Ase se go' yuvij xa'. Dan me se go' núj na'. Se go' núj xa' —taj nij so', xna'anj nij so' man Jesucristó a.

<sup>15</sup> Dan me se aj ne'en Jesucristó se vaa sí nucui' rá me nij sí xna'anj nana yo' man so', ne che'é dan cataj so' rihaan nij so' a:

—Me che'é me rá soj tiha' yu'unj soj manj ne cuta' soj cacun' xraj ga. Tihaan soj 'o sa'anj aga' rihanj ni'yaj á —taj Jesucristó rihaan nij sí me rá tiha' yu'unj man so' a.

<sup>16</sup> Ne tihaan nij so' 'o sa'anj aga' rihaan so', ne xna'anj so' man nij so', cataj so':

—Me sí nó rihaan sa'anj aga' nihánj ga. Ne me sí se-chuvii nó rihaan sa'anj aga' nihánj ga —taj Jesucristó, xná'anj so' man nij sí me rá tihá' yu'unj yo' a.

—Sí nicañ suun gobiernó me nó rihaan sa'anj aga' yo', ne nó se-chuvii so' rihaan sa'anj ei —taj nij so' a.

<sup>17</sup> Gaa ne catañ Jesucristó:

—Go' soj si'yaj sí nicañ suun rihaan ma'an so', ne rque soj si'yaj Diose rihaan Diose á —taj Jesucristó a.

Gaa ne ca'anj ndo'o rá nij sí me rá tihá' yu'unj yo' ni'yaj nij so' man Jesucristó a.

*Nana nihánj taj xna'anj se vaa ya cunuu i'na' uún nij sí cavi' a*

<sup>18</sup> Gaa ne cuchí' doj sí saduceo rihaan Jesucristó a. Nij sí saduceo ro', a'mii nana nihánj se vaa daj chihaa míj se cunuu i'na' uún yuvii asa' cavi' yuvii, taj nij so' a. Dan me se xná'anj nij so' man Jesucristó, ne catañ nij so' nana nihánj a:

<sup>19</sup> —Cachrón sí cu'naj Moisés nana nihánj rihaan yanj cunó ní' a: “Sese cavi' yo'o so', ne sese quináj uun nica so', ne sese taj vaj ta'níi so', ne no xcúun tinúú so' xcañ tinúú so' man chocó' so' chana quináj, ne cotoj tinúú sí cavi' ga chocó' so', ne cuchruj no' ne'ej, ne guun ta'nij sí cavi' man ne'ej yo' ne cunuú ne'ej yo' rihaan to'óo sí cavi' yo' a”, me nana cachrón sí cu'naj Moisés rihaan yanj gaa naá, maestro. <sup>20</sup> Dan me se vaa chij nij tinuj 'o nij so', ne sí chava' me se xcañ so' chana, gaa ne cavi' so', ne taj vaj ne'ej cuchruj chana nica so', qui'yaj so' a. <sup>21</sup> Gaa ne xcañ scue'ee sí cavi' man chocó' so' chana cavi' nica, gaa ne cavi' so' uún, ne taj vaj ne'ej cuchruj chana yo', qui'yaj so', ne veé danj xcañ scue'ee so' uún man chana, ne so' cavi' uún, ne veé danj qui'yaj cunudanñ chij nij tinuj nij so', ne xcañ cunudanñ nij so' man orún' chana yo', tzaj ne cavi' cunudanñ nij so', ne taj vaj a 'o ne'ej cuchruj chana yo' a man adonj. <sup>22</sup> Ndaa síj, gaa ne cavi' ma'an chana uún, <sup>23</sup> ne dan me se asa' cunuu

i'na' uún nij sí cavi', gaa ne me tuvi' nij so' nicañ man chana yo', rá so' ga. 'O se gaa vaa i'na' nij so', ne nica taran' nij tinuj nij so' guun orún' no' a —taj nij sí saduceo, xná'anj nij so' man Jesucristó a.

<sup>24</sup> Gaa ne catañ Jesucristó rihaan nij so' a:

—Ne ne'en uxrá soj ma'. 'O se ne ne'en soj me taj danj Diose, ne ne ne'en soj sese nucuaj ndo'o Diose a.

<sup>25</sup> 'O se asa' cunuu i'na' uún nij sí cavi', ne se xcañ tuvi' nij so' a ma'. 'O se ase vaa yáan nij se-mozó Diose rej xta' ro', danj gaa cayáan nij so' nanj adonj. <sup>26</sup> Gaa ne catañ xna'anj 'unj rihaan soj daj gaa quene'en soj se vaa ya ya cunuu i'na' uún yuvii asa' cavi' yuvii ei. Ataa nayaa soj nana nihánj nana no rihaan danj Moisés nana che'é coj aco' ya'an raá na'. Ne dan me se gaa quene'en Moisés coj yo', ne catañ Diose rihaan Moisés: “Diose sí noco' nij sí man gaa naá sí cu'naj Abraham do', sí cu'naj Isaac do', sí cu'naj Jacobo do', mej a”. Danj catañ Diose che'é nij sí man gaa naá yo' a.

<sup>27</sup> Dan me se nuveé se-Diose nij xnangá me Diose ma'. Inanj nij sí vaa i'na' a'vee noco' man Diose nanj adonj. Che'é dan, nda' se sí cane gaa naá me va'nuj nij so', tzaj ne vaa i'na' nij so' rihaan Diose nanj ei. Ne ne'en uxrá soj a ma' —taj Jesucristó rihaan nij sí saduceo yo' a.

*Nana nihánj taj xna'anj me nana me nana noco' doj cunó ní' a*

<sup>28</sup> Gaa ne yo'o nij sí naqui'yaj cuu se-tucuanñ Moisés cuchí' rihaan Jesucristó, ne so' ro', me sí cunó daj ca'mii Jesucristó ga nij sí saduceo yo', ne quene'en so' se vaa sa' uxrá ca'mii Jesucristó, ne che'é dan xná'anj so' man Jesucristó, ne catañ so':

—Me nana me nana noco' doj rihaan cunudanñ nij nana catañ xna'anj Diose rihaan ní' cunó ní' ga —taj so', xná'anj so' man Jesucristó a.

<sup>29</sup> Gaa ne catañ Jesucristó rihaan so' a:



—Nana nocoo doj rihaan cunudanj nij nana cuno ní' me nana nihánj, ne: “Cuno soj sij israelitá, ne Diose síi 'nij ra'a man ní' me se oruun so', <sup>30</sup> ne ndaa nimán yá so' guun rá so' ni'yaj so' man Diose síi 'nij ra'a man ní', ne yo'o ndaa cúu yave yá so' cuchuman yá rá ni'yaj man Diose, ne ndaa nu' se nucuaj yá so' caraá cochroj rihaan Diose nanj adonj”. Ne nihánj me ya nana uun chij ya nanj ei. <sup>31</sup> Ne vaa yo'ó nana nihánj nana me rá Diose cuno uún ní' a: “Adi' se 'ee rá so' man ma'án so' ro', danj gaa 'ee rá so' man tuví' so' á”. Taj vaj yo'ó nana nocoo doj rihaan roj nana nihánj nana cataj xna'anj Diose rihaan ní' a man adonj —taj Jesucristó rihaan síi naqui'yaj cuu se-tucuanj Moisés yo' a.

<sup>32</sup> Gaa ne cataj síi naqui'yaj cuu se-tucuanj Moisés yo' rihaan Jesucristó a:

—Cunaj uxrá ca'mii so', maestro, ne ya uxrá vaa nana ca'mii so', se vaa oruun Diose, ne taj vaj tuvi' Diose, maan se oruun so' nicun', <sup>33</sup> ne ya uxrá vaa nana se vaa sese ndaa nimán ya ní' guun rá ní' ni'yaj ní' man Diose do', sese yo'o cuchuman rá ndaa cúu yave ya ní' ni'yaj ní' man Diose do', sese ndaa nu' se nucuaj man ní' caraá cochroj rihaan Diose do', sese gaa 'ee rá ní' man tuvi' ní' ndaa se 'ee rá ní' man ma'an ní' do', ne sa' doj vaa tucuaán nihánj rihaan nu' tucuaán nago' que'ee scúj cacaa rihaan Diose nanj chuguanj —taj síi naqui'yaj cuu se-tucuanj Moisés yo' rihaan Jesucristó a.

<sup>34</sup> Gaa ne quene'en Jesucristó se vaa ya cavii raá síi ca'mii danj rihaan so', ne che'é dan cataj Jesucristó rihaan so':

—So' me se nichrun' ya guun chij Diose nimán so' nanj ei —taj Jesucristó rihaan so' a.

Ne taj vaj síi quisíj rá xna'anj yo'ó nana man Jesucristó a ma'.

*Nana nihánj taj xna'anj se vaa síi ca'née Diose tinanii man yuvii rihaan sayuun ro', nuveé nanj yuvii me so' ma'*

<sup>35</sup> Dan me se gaa tucu'yón Jesucristó se-nana so' man nij yuvii rá nuvii nocoo, ne cataj so':

—Nij síi naqui'yaj cuu se-tucuanj Moisés rihaan yuvii ro', me che'é taj nij so' se vaa nanj ta'núí ta'nij si'no síi cu'naj David síi cane gaa naá me síi ca'na' tinanii man yuvii rihaan sayuun, rá soj ga. <sup>36</sup> O se nuú Nimán Diose nimán síi cu'naj David, ne cataj síi cu'naj David: “Ca'mii Diose síi 'nij ra'a man ní' rihaan síi 'nij ra'a manj, cataj so' se vaa cayáán síi 'nij ra'a manj x'núú Diose rej nuva' Diose ndaa se quisíj qui'yaj canaán Diose rihaan taran' nij síi taj ri'yunj man síi 'nij ra'a manj ne quirii ta'nga' síi 'nij ra'a manj rihaan nij so' nanj adonj”, taj síi cu'naj David yo' a. <sup>37</sup> Dan me se síi 'nij ra'a man síi cu'naj David me síi ca'nej Diose tinanii man yuvii rihaan sayuun, taj síi cu'naj David yo' a. Sese 'nij ra'a so' man David, ne me che'é taj nij síi naqui'yaj cuu se-tucuanj Moisés se vaa nanj ta'núí ta'nij si'no David me so' ga. Taj che'é cataj nij so' se vaa nanj yuvii me so' ma' —taj Jesucristó rihaan nij yuvii man rá nuvii nocoo a.

Que'ee nij yuvii cuno se-nana Jesucristó, ne guun niha' rá nij so' cuno nij so' se-nana so' a.

*Nana nihánj taj xna'anj che'é cacun' tumé nij síi naqui'yaj cuu se-tucuanj Moisés rihaan yuvii a*

<sup>38</sup> Dan me se gaa tucu'yón Jesucristó se-nana so' man nij yuvii, ne cataj so':

—Xcaj nij soj cuentá daj 'yaj nij síi naqui'yaj cuu se-tucuanj Moisés rihaan yuvii, ne tumé soj man soj se gaa nanj qui'yaj soj ndaa vaa 'yaj nij so' á. Dan me se niha' rá nij so' cunuú nij so' yatzíj sa' xcaan cachee nij so' rej quene'en yuvii man nij so', ne me rá nij so' ca'mii sa' yuvii ga nij so' gaa chée nij so' rihaan yu'vee a. <sup>39</sup> Ne uun rá nij so' quitaj nij so' chruun xlá sa' doj gaa 'anj nij so' ve' nuu chre' ní' tucu'yón ní' se-tucuanj Moisés do', gaa 'anj nij so' cha'anj

do' a. <sup>40</sup> Ne a'néj nij so' ve' tucua chana cavi' nica, ne yuun che'e guun tucua nij so' man ve' yo', ne 'yaj xcaan ndo'o nij so' cuentó achín ni'yaj nij so' rihaan Diose, che'é rej sa' doj guun nucuaj nij so' tihá' yu'unj nij so' man yuvií a. Xa' nij so', tzaj ne che'é se vaa 'yaj nij so' ro', che'é dan doj a gaa sayuun quiran' nij so' qui'yaj Diose, asa' ca'ne' Diose cacun' che'é yuvií adonj —taj Jesucristó rihaan nij yuvií a.

*Nana nihánj taj xna'anj che'é chana nique cavi' nica qui'yaj sa' doj rihaan nij ru'vee, ni'yaj Diose a*

<sup>41</sup> Dan me se taj Jesucristó rej taj chrúun sa'anj taj rihaan nuvíí nocoo, ne ne'en so' daj qui'yaj nij yuvií gaa araa nij yuvií sa'anj aga' rque chrúun sa'anj yo' che'é Diose, ne dan me se man ndo'o sí ru'vee araa uxrá sa'anj rque chrúun yo' a. <sup>42</sup> Ne dan me se ca'na' 'o chana cavi' nica chana nique, ne caraa no' vij guee sa'anj aga' le'ej rque chrúun yo' a. <sup>43</sup> Gaa ne canacúun Jesucristó man nij sí tucu'yón se-nana so' ca'na' nij so' rihaan so', gaa ne cataj so' rihaan nij so' a:

—Cataj xna'anj yá yá 'unj rihaan nij soj cuano se vaa xa' chana cavi' nica chana nique nihánj, tzaj ne doj a caraa no' sa'anj rque chrúun yo' rihaan sa'anj caraa cunudanj yo'ó nij yuvií nanj adonj. <sup>44</sup> 'O se nij so', daj doj sa'anj quináj raá se-sa'anj nij so' ro', caraa nij so' rque chrúun, ne xa' no', tzaj ne nda' se achiin ndo'o sa'anj rihaan no', tzaj ne rque no' rihaan Diose cunudanj sa'anj nicaj no' sa'anj quiraan no' se cha no' nanj adonj —taj Jesucristó rihaan nij sí tucu'yón se-nana so' a.

### 13

*Nana nihánj taj xna'anj se vaa canee nu' nuvíí nocoo ne chuman' Jerusalén a*

<sup>1</sup> Gaa ne curihanj Jesucristó rá nuvíí nocoo, gaa ne yo' o tuvi' nij sí tucu'yón se-nana so' cataj rihaan so' a:

—Ni'yaj so', ne yuvej sa' inanj me yuvej guun nuvíí nocoo, ne ve'é ndo'o vaa nu' nij ve' man nuvíí nocoo, maestro —taj yo' o tuvi' nij sí tucu'yón se-nana Jesucristó a.

<sup>2</sup> Gaa ne cataj Jesucristó rihaan so' a:

—Ne'én so' nu' nij ve' nocoo man nuvíí nihánj na'. Vaa güii, ne canee nu' nuvíí nocoo nihánj, ne a 'o yuvej se quitáá xráá tuvi' yuvej nihánj a ma' —taj Jesucristó rihaan sí tucu'yón se-nana so' a.

*Nana nihánj taj xna'anj che'é sayuun guun rihaan chumií nihánj vaa güii a*

<sup>3</sup> Dan me se ca'anj cayáan Jesucristó raá quij cu'naj Quij man Chruun Olivó, ne ni'yaj so' nuvíí nocoo, ne cuchi' orún' ca'anj nij sí cu'naj Pedró do', Jacobo do', Juan do', Andrés do', rihaan so', ne xná'anj nij so' man so', cataj nij so':

<sup>4</sup> —Cataj xna'anj so' rihaan núj aman canee nu' nuvíí nocoo yo' do', a me rasuun ca'na' qui'yáá so' asa' quisíj ca'na' nu' nij sayuun ndaa vaa cataj xna'anj so' rihaan núj, maestro —taj ca'anj tuvi' nij sí tucu'yón se-nana Jesucristó rihaan Jesucristó a.

<sup>5</sup> Gaa ne guun che'e Jesucristó cataj xna'anj Jesucristó rihaan nij so', ne:

—Cutumé ndo'o soj man soj se gaa nanj tihá' yu'unj yuvií man soj á. <sup>6</sup> 'O se ca'na' uxrá yuvií cataj: “'Unj me sí na'vij soj, ne Cristó mej á”, cataj nij so', ne dan me se tihá' yu'unj uxrá nij so' man tuvi' nij so' nanj á.

<sup>7</sup> ”Dan me se asa' quene'en soj se vaa unu' uxrá chuman' ga tuvi' chuman', ne asa' cuno uxrá soj nana se vaa unu' chuman' man gan' ga tuvi' chuman' yo', ne cutumé soj man soj se cuchu'vi' nimán soj ma'. Maan se vaa che'é guun sayuun yo' rihaan chumií nihánj adonj. Tzaj ne asa' quisíj guun danj, gaa ne se ca'anj ni'ya chumií nihánj nu' orá ma'. 'O se quináj chumií nihánj doj adonj. <sup>8</sup> Dan me se cunu' uxrá yuvií man chuman' nocoo ga yo' o chuman' nocoo,

ne cunu' gobiernó ga tuvi' gobiernó a. Ne cachén yuún noco que'ee chuman', ne cachén ndo'o x'naa uún a. Nu' sayuun nihánj ro', ase vaa guun che'e 'o chana que'ee rque no' cuchruj no' ne'ej ro', danj gaa nu' sayuun nihánj nanj ei. Dan me se nu' ne'en chana ve'ee rque no', ne ne'en no' doj a quirán' no' sayuun rej rihaan no', ne ase uun rá chana yo', danj guun rá soj gaa ca'na' sayuun yo', guun rá soj se vaa daj doj guun uxrá sayuun rihaan chumii nihánj nanj adonj.

9 "Ne tadó soj che'é sayuun quirán' ma'an soj ei. 'O se tacuachén nii man soj rihaan nij sí uun chij rihaan ní' sij israelitá, ne tacuachén nii man soj rihaan nij sí man rá ve' tucu'yón ní' se-tucuanj Moisés, ne maan yo' go' nii cuartá xráá soj a. Ne tacuachén nii man soj canicun' soj rihaan sí nicaj suun do', rihaan sí nicaj suun rey do', che'é se me soj sí noco' manj a. Ne cataj xna'anj soj rihaan nij sí nicaj suun che'ej a. 10 Ne asino ca'mii natáj soj se-nanaj nana sa' rihaan cunudanj nij sí yaníj, gaa ne ca'vee quinavj chumii nihánj adonj.

11 "Dan me se asa' ca'anj nicaj nii man soj rihaan nij sí nicaj suun, ne se nanó rá soj daj ca'mii soj rihaan nij so' ma'. Maan Nimán Diose rque nu' nana ca'mii soj man orá yo' nanj adonj. 'O se nuveé ma'an soj me nij sí ca'mii rihaan nij so' ma'. 'O se Nimán Diose me sí ca'mii rihaan nij so' nanj adonj. 12 Dan me se ca'anj nicaj snó'o man tinúú snó'o rihaan yuvii, ne ticavi' nii man tinúú snó'o yo', qui'yaj ma'an so' nanj adonj. Ne ca'anj nicaj snó'o man ta'níí snó'o rihaan yuvii, ne ticavi' nii man ta'níí snó'o yo', qui'yaj so' ei. Ne cunu' xnii ga rej xnii, ne ca'anj nicaj xnii man rej xnii rihaan yuvii, ne ticavi' nii man rej xnii yo', qui'yaj so' ei. 13 Ne nachri' cunudanj nij yuvii man rihaan chumii ni'yaj nij so' man soj, che'é se me soj sí noco' manj adonj. Tzaj ne sí noco' raan manj ndaa

se ca'anj ni'ya chumii nihánj ro', so' me sí quinanii rihaan sayuun adonj —taj Jesucristó rihaan ca'anj tuvi' nij sí tucu'yón se-nana so' a.

14 Ne soj sij nayaa nana nihánj ro', xcaj uxrá soj cuentá me taj nana nihánj nana ca'mii Jesucristó che'é se chi'ii á.

Dan me se cataj uún Jesucristó:

—Aj ne'en soj se vaa vaa 'o se chi'ii qui'yaj ndo'o sayuun man yuvii, ne dan me se güii quene'en soj man se chi'ii yo' rej ne nó xcúún yo' nicun' yo', ne yo'o cunanj nij sí man estadó Judea ca'anj nij so' raa quij á. 15 Ne sí taj xráá ve' tucúá ro', se catúj so' rá ve' tucúá so' quirii so' si'yaj so' ma'. 16 Ne sí 'yaj suun tacaan ro', se canicaj so' nano' so' sagan' so' se vaa tanáj so' rihaan yo'óo ma'. Se guun raan nij so' ma'. Maan se yo'o cunanj nij so' á. 17 Nique nij chana nuu rque do', chana vaa ta'níí ne'ej utzii do', güii ca'na' sayuun yo' a. 'O se se guun nucuj chana yo' cunanj chana yo' ma'. 18 Cachinj ni'yaj soj rihaan Diose se vaa se ca'na' sayuun yo' güii gaa maan ma'.

19 "O se güii yo' me se ca'na' uxrá sayuun, ne quij doj gaa sayuun yo' rihaan nu' nij sayuun quirán' yuvii asij qui'yaj Diose chumii, ne daj chihaa míj se quirán' uún yuvii sayuun vaa danj ma'. 20 Sese que'ee uxrá güii guun sayuun, ne se quinanii yuvii rihaan sayuun yo' ma'. Tzaj ne vaa güii quisij sayuun, qui'yaj sí 'nij ra'a man ní', che'é rej quinanii nij sí narii so' canoco' man so' adonj.

21 "Ne güii yo' me se sese cataj yuvii rihaan soj: "Ni'yaj soj ei. Nihánj 'na' sí tinanii man ní' rihaan sayuun á", ne se cuchumán rá soj ma'. 22 'O se ca'na' uxrá sí ne sí cataj se vaa sí tinanii man yuvii rihaan sayuun me nij so', ne ca'na' uxrá sí ne sí cataj se vaa nata' nij so' se-nana Diose, ne qui'yaj nij so' suun sa' noco, ne tihá' yu'unj nij so' man cunudanj nij yuvii man rihaan chumii nanj adonj. Ndaa nij sí narii Diose man ro', sese taj vaj Diose tumé man nij so', ne cuchuman

rá nij so' n̄i'yaj nij so' man sí tihá' yu'unj yo' nanj adonj. <sup>23</sup> Tadó uxrá soj á. Nihánj me se cataj xna'anj 'unj rihaan soj daj guun rihaan chumiij nihánj nanj á.

<sup>24</sup> "Tzaj ne güii yo' me se asa' navij quisij sayuun yo', gaa ne guun rmi' güii guun rmi' yavii guun rmi', <sup>25</sup> ne cayuu nij yati' xta', ne quinaan taran' nij rasuun nucuaj man rej xta' a. <sup>26</sup> Gaa ne quene'en nii man 'unj sij ca'née Diose n̄icaj yu'unj man yuvii á. Dan me se xraá ngaa quitaj 'unj ca'na' 'unj, ne guun nucuaj ndo'oj quirij ta'ngaj, ne ve'é uxrá curuvij ca'naj a. <sup>27</sup> Gaa ne ca'nej 'unj man nij se-mozó 'unj cuchij' nij so' rihaan chumiij nihánj, ne dan me se naqui'yaj chre' 'unj man nij sí narij Diose man canoco' manj a. Dan me se cachee nij se-mozó 'unj rihaan nu' chumiij nihánj, nano' nij so' taran' nij sí cunu chre' ga 'unj nanj adonj.

*Nana nihánj taj xna'anj se vaa ya quene'en ní se vaa nichrun' ca'na' uún Jesucristó a*

<sup>28</sup> "Tucu'yón soj nana nihánj nana che'é chruun man chruj higó raá á. Gaa quisij guun laruu ra'a chruun, ne naca coj ya'lij ra'a chruun, ne ne'en soj se vaa nichrun' 'na' tió naman maan a. <sup>29</sup> Dan me se xcaj uún soj cuentá se vaa asa' quene'en soj nu' se vaa cataj xna'anj 'unj rihaan soj cuano, ne nichrun' ca'na' uún 'unj nanj adonj. Dan me se ase vaa sí nicun' ta'yaa ro', gaa 'unj ei. <sup>30</sup> Ya ya cataj xna'anj 'unj rihaan soj cuano se vaa quene'en ta'aj soj sij vaa i'na' rihaan chumiij nihánj cuano se vaa quisij ya 'unj nu' rasuun nihánj nu' se vaa cataj xna'anj 'unj rihaan soj cuano ei. Ne ya quene'en soj nu' nihánj gaa ataa cavij' soj ei. <sup>31</sup> Vaa güii ca'anj ni'ya yo'óo do', xta' do', tzaj ne se-nanaj me se daj chihaa míj se quinavij yo' ma'.

*Nana nihánj taj xna'anj se vaa ne ne'en ní me güii ca'na' uún Jesucristó ma'*

<sup>32</sup> "Nihánj me cataj xna'anj 'unj rihaan soj se vaa a 'ó sí ne ne'en me güii ca'na' uún 'unj rihaan chumiij nihánj ma'. Ca'vee se ndaa se-mozó Diose 'yaj suun rej xta', ca'vee se ndaa ma'anj ta'nij Diose, tzaj ne ne ne'en núj me güii me yo' ma'. Orún' Réj me sí ne'en nanj adonj. <sup>33</sup> Yo'o n̄i'yaj soj, ne se guun cotoj soj ma'. 'O se ne ne'en uxrá soj me güii me ca'naj ma'. <sup>34</sup> Dan me se ase vaa sí ca'anj yo'óo chuman' naj gan' vaa 'unj, ne aj tanáj 'unj ve' tucuaj, ne ca'né' 'unj suun rihaan 'o 'o nij mozó nuu rihanj se vaa ve'é cutumé nij so' nu' si'yáj, ne ase vaa sí tumé ta'yaa vaa nij soj, ne aj cataj xna'anj 'unj rihaan nij soj se vaa n̄i'yaj soj a. <sup>35</sup> Che'é dan tumé uxrá soj man soj, ne n̄i'yaj soj á. 'O se ne ne'en soj aman ca'na' 'unj sij tucua ve' ma'. Ca'vee ca'naj rej ti'nuu, ca'vee rej yan', ca'vee orá aguáj to'loo ca'vee rej na'yaan ca'vee, <sup>36</sup> ne tadó soj se guun taj ni'yón ca'naj ne narij' 'unj man soj ne xcaj 'unj cuentá se vaa otoj rma'an soj ei. <sup>37</sup> Ne nana nihánj nana taj xna'anj 'unj rihaan nij soj ro', veé nana nihánj taj xna'anj 'unj rihaan cunudanj nij yuvii, se vaa tumé soj man soj se gaa nanj cotoj rma'an soj a —taj Jesucristó rihaan ca'anj tuvi' nij sí tucu'yón se-nana so' a.

## 14

*Nana nihánj taj xna'anj se vaa 'o guun rá nij xrej ata suun nocoo doj do', nij sí naqui'yaj cuu se-tucuanj Moisés rihaan yuvij do', se vaa cavij' Jesucristó a*

<sup>1</sup> Dan me se rque vij güii canuú cha'anj pascuá cha'anj chá nij yuvij israelitá chraa yo'óo trigó, ne dan me se 'o guun rá nij xrej ata suun nocoo doj ga nij sí naqui'yaj cuu se-tucuanj Moisés rihaan yuvij se vaa tihá' yu'unj nij so' man Jesucristó, ne quita'aa yuve nij so' man Jesucristó, ne cavij' Jesucristó, qui'yaj nij so', rá nij so' a. <sup>2</sup> Ne cataj nij so':

—Se quita'aa ní' man so' gaa aman anuú cha'anj ma'. Sese danj qui'yaj



ní', ne ca'maan rá nij yuvii, ne guun sayuun, qui'yaj nij yuvii nanj adonj —taj nij so' a.

*Nana nihánj taj xna'anj se vaa caxrj' o' chana casté raq Jesucristó a*

<sup>3</sup> Dan me se yáan Jesucristó chuman' cu'naj Betania, ne ne so' rá 'o ve' tucua' s'í cu'naj Simón s'í canó luj ri'yuj man, ne yáan Jesucristó rihaan mesá, ne cuchí' yo'o chana rihaan so', ne nicaj chana yo'o aga' catzii nuu casté gun' daj rii nii man coj cu'naj nardo, ne casté tu'vee ndo'o me yo' a. Naxra' chana yo' aga', ne caxrj' chana casté raq Jesucristó a. <sup>4</sup> Ne ca'maan rá ta'aj nij s'í quene'en, ne cataj nij so' rihaan tuvi' nij so':

—Me che'é tiri' rma'an chana nihánj casté sa' ga. <sup>5</sup> Me che'é ne cutu'vee no' casté, ne quirí' no' sa'anj ase vaa 'yaj canaán yuvii rque 'o yo', ne go' no' sa'anj yo' man nij s'í nique ga —taj nij so' rihaan tuvi' nij so', gaa ne guun che'e nij so' caxrj' yuvaa nij so' man chana yo' a.

<sup>6</sup> Gaa ne cataj Jesucristó rihaan nij so' a:

—Me che'é a'mii soj danj ni'yaj soj man chana ga. Ca'ne' guee rá nij soj doj nanj á. 'O se ve'é uxrá qui'yaj no' manj ei. <sup>7</sup> 'O se s'í nique me se daj a güii mán nij s'í nique ga soj, ne me ma'an güii guun rá soj, ne ca'vee qui'yaj soj se luj ga nij s'í nique ei. Tzaj ne 'unj me se vaa güii ca'anj 'unj, ne quinaj uun soj, ne se ca'vee qui'yaj soj se luj che'ej ma'. <sup>8</sup> Ne chana nihánj me se qui'yaj ma'an no' nu' ndaa vaa ca'vee qui'yaj no', ne dan me se gaa ataa cavi' 'unj ne aj caxrj' no' casté gun' daj manj che'é rej xcaj soj cuentá se vaa cachin' nii manj adonj. <sup>9</sup> Ne cataj yá yá 'unj rihaan nij soj cuano se vaa me rej ma'an ca'mii natáj yuvii se-nanaj nana sa' rihaan nij yuvii man rihaan nu' chumii nihánj ro', ne cataj xna'anj uún yuvii rihaan tuvi' yuvii che'é se vaa qui'yaj chana nihánj manj, ne se quini'yón yuvii man chana nihánj ma'—taj Jesucristó a.

*Nana nihánj taj xna'anj se vaa cutu'vej s'í cu'naj Judas man Jesucristó rihaan nij s'í taj ri'yunj man Jesucristó a*

<sup>10</sup> Gaa ne s'í cu'naj Judas Iscariote yo'o tuvi' chuvij nij s'í tucuyón se-nana Jesucristó me se cavii so' ca'anj so' rihaan nij xrej ata suun nocoo doj, che'é rej racu'ij so' man nij so' quita'aa nij so' man Jesucristó a. <sup>11</sup> Ne gaa cuno nij xrej ata suun nocoo doj, ne guun niha' uxrá rá nij so', ne cata' tu'va nij so' se vaa nago' nij so' sa'anj man s'í cu'naj Judas a. Gaa ne guun che'e s'í cu'naj Judas nuchruj raq so' aman ca'vee racu'ij so' man nij xrej ata suun nocoo doj quita'aa nij so' man Jesucristó a.

*Nana nihánj taj xna'anj se vaa ma'an Jesucristó taj xna'anj se vaa tacuachén yo'o tuvi' nij s'í tucuyón se-nana so' man so' rihaan nij s'í taj ri'yunj man so' a*

<sup>12</sup> Dan me se quisj' güii yaan canuú cha'anj chá nij yuvii israelitá chraa yo'óo trigó, ne güii ticavi' nij so' matz-inj le'ej che'é Diose me yo', ne dan me se nij s'í tucuyón se-nana Jesucristó me se xná'anj nij so' man Jesucristó, cataj nij so':

—Me rej ca'anj núj qui'yaj chuvii núj cha xti'no ní' cha'anj pascuá, rá so' ga —taj nij so' rihaan Jesucristó a.

<sup>13</sup> Gaa ne ca'née Jesucristó man vij tuvi' nij s'í tucuyón se-nana so', ne cataj so' rihaan roj so' a:

—Cavii roj soj, ne catuu roj soj chuman' Jerusalén nihánj, ne nari' tuvi' roj soj ga 'o s'í ata 'o cacuaj na, <sup>14</sup> ne canoco' roj soj man so', ne rihaan s'í tucua ve' catuu so' me se cataj soj: “Xná'anj maestró mán so' se vaa me rej ne ve' cha xti'no maestró chraa ga nij s'í tucuyón se-nana so' che'é cha'anj pascuá, taj so' a”, cataj roj soj rihaan s'í tucua ve' yo' á. <sup>15</sup> Gaa ne tihaan so' 'o ve' nata' xij rihaan roj soj, ne aj vaa chuvii rá ve' yo', ne man chruun mesá man chruun xlá man rá ve' yo' a. Yo' me rej qui'yaj chuvii roj soj á —taj Jesucristó rihaan roj so' a.

16 Gaa ne curihanj roj sí tucu'yón se-nana Jesucristó, ne catúj roj so' chuman' Jerusalén, ne nari' roj so' nu' ndaa vaa cataj xna'anj Jesucristó rihaan roj so', gaa ne qui'yaj chujij roj so' chá xti'nó nij so' chraa che'é cha'anj pascuá a. 17 Ne rej ti'nuu, ne ca'na' Jesucristó ga yo'ó chí' nij sí tucu'yón se-nana so' a.

18 Dan me se yáán nij so' rihaan mesá, chá nij so' chraa, ne cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa yo'ó tuvi' nij soj me sí tacuachén manj rihaan nij sí taj ri'yunj manj, ne sí chá chraa ga 'unj cuano me sí qui'yaj danj ei —taj Jesucristó a.

19 Gaa ne guun che'e nij sí tucu'yón se-nana so' quinanó ndo'o rá nij so', ne guun che'e nij so' ndaa 'o 'o nij so' xna'anj man Jesucristó, cataj 'o 'o nij so':

—'Unj me sí qui'yaj danj na' —taj 'o 'o nij so' a.

20 Gaa ne cataj Jesucristó rihaan nij so' a:

—Yo'ó tuvi' chujij nij soj sij tucu'yón se-nana me sí tacuachén manj rihaan nij sí taj ri'yunj manj, ne sí tiguíj rachrúún ga 'unj rá co'oo me so' adonj. 21 'O se taj danj Diose se vaa ca'anj 'unj cavi' 'unj sij ca'née Diose nicaj yu'unj man yuvij, ne ya danj quirán' 'unj adonj. Tzaj ne nique ndo'o sí tacuachén manj rihaan nij sí taj ri'yunj manj nanj á. Quiran' uxrá so' sayuun nanj á. Snó'o yo' me se sese ne ca'ngaa so', ne cavii sa' so' doj tzaj adonj —taj Jesucristó a.

*Nana nihánj taj xna'anj che'é rachrúún rqué Jesucristó rihaan nij sí tucu'yón se-nana so' chá nij so' do', che'é na vinó rqué so' co'ó nij so' do' a*

22 Ne gaa chá nij so' chraa, ne quita'aa Jesucristó yo'ó rachrúún, ne nago' so' graciá rihaan Diose, ne cuxra' ta'aj so' rachrúún, ne rqué so' rihaan nij sí tucu'yón se-nana so', ne cataj so':

—Quita'aa soj rachrúún nihánj á. Ne manj me rachrúún nihánj ei —taj so' a.

23 Gaa ne quita'aa Jesucristó aga' tazá nuu na vinó, ne nago' so' graciá rihaan Diose, ne tacuachén so' aga' nuu na vinó rihaan nij so', ne co'oo cunudanj nij so' na vinó yo' a. 24 Gaa ne cataj so' rihaan nij so' a:

—Ton manj me na nihánj, ne che'é ton manj ro', rqué Diose 'o nana rihaan soj daj qui'yaj Diose ga soj a. Dan me se cayanj ton manj che'é que'ee yuvij adonj. 25 Ne cataj yá yá 'unj rihaan soj cuano se vaa veé doj nihánj me co'oj, ne se co'oj yaj a ma'. Tzaj ne asa' quisíj güii guun chíj Diose rihaan chumij nihánj, ne cunuu naca chumij nihánj, gaa ne co'oj na vinó naca ei —taj Jesucristó rihaan nij sí tucu'yón se-nana so' a.

26 Gaa ne cachráá taran' nij so' chra' rihaan Diose, ne cavii nij so', ca'anj nij so' quij cu'naj Quij man Chruun Olivó a.

*Nana nihánj taj xna'anj se vaa cataj xna'anj Jesucristó se vaa guun na'aj sí cu'naj Pedró, ne cataj so' se vaa nuveé sij noco' man Jesucristó me so' a*

27 Gaa ne cataj Jesucristó rihaan nij so' a:

—Danj Diose taj se vaa go' Diose man sí tumé matzinj, ne cunanj nij matzinj cha'nuu nij xo' a. Ne ya ase vaa daán 'unj matzinj vaa soj, ne guun na'aj taran' soj, ne se canoco' soj manj a ma'. 28 Tzaj ne asa' quisíj cunuu i'na' uún 'unj, ne quitaj yaan 'unj rihaan soj ca'anj 'unj estadó Galilea, ne nari' tuvi' ní' estadó Galilea nanj adonj —taj Jesucristó rihaan nij sí tucu'yón se-nana so' a.

29 Gaa ne cataj sí cu'naj Pedró rihaan so' a:

—Ca'vee se tanáj taran' nij so' mán so', tzaj ne daj chihaa míj se tanáj 'unj mán so' ma' —taj Pedró a.

30 Ne cataj Jesucristó:

—Ya ya cataj xna'anj 'unj rihaan so' cuano se vaa aj ne'én 'unj se vaa nij cuan' gaa ataa quisij vij caguáj to'loo, ne va'nuj ya cataj so' rihaan yuvij se

vaa nuveé sij noco' manj mé so' a —taj Jesucristó rihaan Pedró a.

<sup>31</sup> Gaa ne nucuaj uxrá cataj Pedró rihaan Jesucristó, ne:

—Taj ma'. Ca'vee se ticavi' yuvi man ní', tzaj ne daj chihaa mǐj se cataj 'unj se vaa nuveé sij noco' mán so' mej ma' —taj Pedró rihaan Jesucristó a.

Ne ase vaa cataj Pedró ro', danj cataj taran' nij sí tucu'yón se-nana Jesucristó a.

*Nana nihánj taj xna'anj daj qui'yaj Jesucristó gaa cachín ni'yaj Jesucristó rihaan Diose a*

<sup>32</sup> Gaa ne ca'anj Jesucristó ga nij so' ndaa yo'ó rej cu'naj Getsemaní, ne cataj xna'anj Jesucristó rihaan nij so' a:

—Cane soj nihánj, na'vij soj mán 'unj, ne ca'anj 'unj, cachínj ni'yaj rihaan Réj a —taj Jesucristó a.

<sup>33</sup> Ne nicaj Jesucristó man Pedró do', man Jacobo do', man Juan do', ca'anj so', ne guun che'e so' quinanó ndo'o rá so' a. <sup>34</sup> Gaa ne cataj so' rihaan va'núj nij sí ca'anj ga so' a:

—Naná uxrá raj adonj. Maan che'é rej nanó ndo'o raj, qui'yaj cavi' 'unj, raj a. Qui'yaj soj se ndo'o quinaj soj nihánj, ne se cotoj soj ma' —taj Jesucristó rihaan va'núj nij so' a.

<sup>35</sup> Gaa ne cavii so' yaníj doj tzin', ne ca'anj cayáán rno so' rihaan yo'óo, ne cachín ni'yaj so' rihaan Diose se vaa sese ca'vee, ne caráán ra'a Diose xráa so', se gaa nanj quirán' so' sayuun a. <sup>36</sup> Dan me se cataj so':

—Ca'vee qui'yáa so' cunudanj, Ataj. Caráán ra'á so' xráj, se gaa nanj quirán' uxrá 'unj sayuun, tzaj ne sese ma'án so' me rá quirán' 'unj sayuun, ne qui'yáa so' ndaa vaa me rá ma'án so', ne se qui'yáa so' ndaa vaa me rá ma'anj ma' —taj Jesucristó, cachín ni'yaj so' rihaan Diose a.

<sup>37</sup> Gaa ne canicaj uún so' ca'na' so' rihaan va'núj nij sí tucu'yón se-nana so', ne quene'en so' se vaa cotoj cunudanj nij so' a. Gaa ne cataj so' rihaan Pedró a:

—Otoj so', nanj Pedro. A 'ó orá ne guun nucuáa so' ni'yaj so' a ma'. Ya na'. <sup>38</sup> Maan se ni'yaj soj, ne cachínj ni'yaj soj rihaan Diose se vaa caráán Diose rihaan sí chree se caxrǐj sí chree chrej chí'ij rque soj á. 'O se niha' rá soj qui'yaj soj se sa', tzaj ne ne uun nucuaj soj ma' —taj Jesucristó rihaan nij so' a.

<sup>39</sup> Gaa ne cavii uún Jesucristó, ca'anj so', ne cachín ni'yaj uún so' rihaan Diose, ne cuyaan vaa nana ca'mii so' rihaan Diose ga nana ca'mii so' asij cua'aa doj a. <sup>40</sup> Gaa ne canicaj uún so' ca'na' so', ne quene'en so' se vaa cotoj uún va'núj nij sí tucu'yón se-nana so' a. 'O se ca'na' ndo'o nej rihaan nij so' a. Ne ne nari' nij so' nana ca'mii nij so' rihaan so' a.

<sup>41</sup> Gaa ne corá me se ca'na' uún so' rej man va'núj nij sí tucu'yón se-nana so', ne cataj so':

—Ca'vee cotoj soj ca'vee naraan rá soj ca'vee sese vaa ya'núj rihaan soj á. Ni'yaj soj, ne nihánj me se quisǐj orá tacuachén yo'ó so' manj rihaan sí tumé ndo'o cacun', che'é se mé 'unj sí ca'née Diose nicaj yu'unj man yuvi adonj. <sup>42</sup> Naxagaa soj, ca'anj ní' nanj ei. Ni'yaj soj nedǐ'. 'Na' sí tacuachén manj rihaan sí taj ri'yunj manj nanj chuguanj —taj Jesucristó a.

*Nana nihánj taj xna'anj daj qui'yaj nii gaa quita'aa nii man Jesucristó a*

<sup>43</sup> Dan me se nicun' Jesucristó ca'mii so', ne nu' ca'na' sí cu'naj Judas yo'ó tuvi' chuvij nij sí tucu'yón se-nana Jesucristó, ne ca'na' uxrá yuvi ga so', ne nicaj nij yuvi neé espadá do', chruun do' a. Dan me se nij yuvi ca'née nij xrej ata suun noco doj do', nij yuvi ca'née nij sí naqui'yaj cuu se-tucuanj Moisés do', nij yuvi ca'née nij sí uun chij rihaan nij yuvi israelitá do', me nij yuvi ca'na' a. <sup>44</sup> Ne sí cu'naj Judas cataj xna'anj rihaan nij yuvi se vaa daj qui'yaj so' ga Jesucristó, gaa ne cunuu yaan nij yuvi man Jesucristó, ne cataj so':

—Síi r̄utu'vaj ro', so' me síi quita'aa soj cuaj á. Raan cano soj man so', ca'anj soj á —taj síi cu'naj Judas a.

<sup>45</sup> Gaa ne nu' cuhi' so' cuaj rihaan Jesucristó, ne cataj so':

—Maestro —taj so', ne nu' cachrón tu'va so' xruu Jesucristó a.

<sup>46</sup> Gaa ne cuhi' nij yuvij rihaan Jesucristó, ne quita'aa nij yuvij man Jesucristó a.

<sup>47</sup> Ne yo'o síi nicun' ga Jesucristó me se quirii so' taneé so' neê espadá, ne go' so' neê espadá yo' raa yo'o se-mozó xrej at̄a suun nocoo doj, ne veé dan güéj nu' xréé mozó yo', qui'yaj so' a.

<sup>48</sup> Gaa ne cataj Jesucristó rihaan nij yuvij a:

—Me che'é nicaj soj neê espadá nicaj soj chruun nicaj soj, ca'na' soj ga. Síi ituu mé 'unj, rá soj na'. <sup>49</sup> Ne 'o se guun que'ee güii cayáan 'unj rá nuvií nocoo, tucu'yón 'unj se-nanaj rihaan soj, tzaj ne ne quita'aa soj manj ma'. Tzaj ne nihánj me se quirán' 'unj nu' se vaa taj nana no rihaan danj Diose a —taj Jesucristó a.

<sup>50</sup> Gaa ne tanáj cunudanj nij síi tucu'yón se-nana Jesucristó man so', ne cunánj nij so', ca'anj nij so' a.

<sup>51</sup> Ne vaa 'o síi tachruu noco' xcó Jesucristó, ne orún' yatzíj mantá niquee so', ne quita'aa nij yuvij man so',

<sup>52</sup> gaa ne tanáj so' yatzíj mantá ra'a nij yuvij, cunánj so', ne cánj un vaa so', cunánj so' a.

*Nana nihánj taj xna'anj daj qui'yaj nii gaa cuta' nii cacun' xráa Jesucristó a*

<sup>53</sup> Dan me se nij síi quita'aa man Jesucristó me se nicaj nij so' man Jesucristó ca'anj nij so' rihaan síi yanj xrej at̄a suun nocoo doj, gaa ne cunuu chre' yo'ó nij xrej at̄a suun nocoo doj do', nij síi naqui'yaj cuu se-tucuanj Moisés rihaan nij yuvij do', nij síi uun chij do', rej mán nij so' a. <sup>54</sup> Ne gan' gan' canoco' síi cu'naj Pedró xcó Jesucristó, ne cuhi' so' rihaan ve' yanj xrej at̄a suun nocoo doj yo', ne catúj so' rá ve', ne ca'anj cayáan so' ga nij

se-mozó xrej man rá ve', tinaguun so' ra'a so' rihaan ya'an a.

<sup>55</sup> Dan me se nano' nij xrej at̄a suun nocoo doj nano' nij cuese nano' man yuvij cataj xna'anj che'é cacun' tumé Jesucristó a. Me rá nij so' nari' nij so' cacun' cuta' nij so' xráa Jesucristó, ne cavi' Jesucristó, rá nij so' a. Tzaj ne nuvi' cacun' tumé Jesucristó nari' nij so' ma'. <sup>56</sup> 'O se cuhi' uxrá síi ne rihaan nij cuese ca'mii ne nij so', tzaj ne ino vaa nana ca'mii 'o 'o nij so' a. <sup>57</sup> Gaa ne canicun' yo'ó doj síi ne uún, ne guun rá nij so' cuta' nij so' cacun' xráa Jesucristó, ne dan me se cataj nij so':

<sup>58</sup> —Cuno núj se vaa cataj Jesucristó se vaa: “'Unj me síi tacuanee nuvií nocoo nihánj nuvií cune' yuvij, ne rque va'nuj güii cune' 'unj yo'oj uún, tzaj ne nuveé nuvií cune' ma'an yuvij me nuvií cune' 'unj a man adonj”, taj Jesucristó cuno núj ei —taj síi ne ni'yaj nij so' man Jesucristó, <sup>59</sup> tzaj ne ndaa se-nana nij so' me se ne 'o cuyaan vaa nana ca'mii 'o 'o nij so' a ma'. <sup>60</sup> Gaa ne canicun' xrej at̄a suun nocoo doj tanuu yo'ó nij síi man rá ve' yo', ne xná'anj so' man Jesucristó, cataj so':

—Me che'é ne a'mii so' ga. Daj vaa nana nihánj nana a'mii roj síi nihánj che'é so' ga —taj so', xná'anj so' man Jesucristó a.

<sup>61</sup> Tzaj ne dínj táa Jesucristó, ne ca'mij so' a doj nana a. Gaa ne xná'anj uún xrej at̄a suun nocoo doj man Jesucristó, ne:

—So' me ta'níi Diose síi tinanii man yuvij rihaan sayuun na' —taj so', xná'anj so' man Jesucristó a.

<sup>62</sup> Gaa ne cataj Jesucristó rihaan so' a:

—Veé danj vaa ya ei. Ne quene'en soj se vaa quitaj 'unj rej nuva' Diose síi nucuaj ndo'o á. Ne quene'en uún soj se vaa ca'na' uún 'unj rihaan chumij nihánj, ne quitaj 'unj xráa ngaa xta' ca'naj adonj —taj Jesucristó rihaan xrej at̄a suun nocoo doj yo' a.



<sup>63</sup> Gaa ne ca'maan rá xrej yo', ne cutzin' xrej yo' sagan' ma'an xrej, ne cataj xrej rihaan tuvi' xrej a:

—Nj'yaj soj vij. Se cachiin doj sí ca'na' cataj xna'anj rihaan ní che'é cacun' tumé sí nihánj a ma'. <sup>64</sup> Ne cuno soj nana quij ca'mii so' se vaa quitaj ma'an so' rej x'nuj Diose na'. Aj cuno soj chuguanj. Ne daj qui'yaj ní man so', rá soj ga —taj xrej, xna'anj xrej man nij tuvi' xrej a.

Gaa ne cunudanj nij so' cuta' cacun' xráá Jesucristó se vaa no xcúun Jesucristó caví Jesucristó a. <sup>65</sup> Gaa ne guun che'e ta'aj nij so' quirii talúj nij so' man Jesucristó, ne caráán nij so' yatzíj rihaan Jesucristó, ne go' nij so' man Jesucristó, ne cataj nij so':

—Raquíj Diose mán so' cataj xna'anj so' rihaan núj me sí go' mán so' vij —taj nij so', tiha' yu'unj nij so' man Jesucristó a.

Ne nicaj nij tanuu man so', ne go' nij tanuu chruun xráá so' a.

*Nana nihánj taj xna'anj daj qui'yaj sí cu'naj Pedró gaa cataj so' se vaa nuveé sij noco' man Jesucristó me so' a*

<sup>66</sup> Veé dan, ne yanj Jesucristó ga yo'ó nij so' rá ve', ne yanj sí cu'naj Pedró rej rque doj rej rihaan ve' yo' a. Gaa ne ca'na' yo'ó mozó chana nuu rihaan xrej atá suun noco' doj, <sup>67</sup> ne quene'en no' man Pedró gaa tinaguun Pedró ra'a Pedró rihaan ya'an a. Gaa ne ni'yaj uxrá mozó chana yo' man Pedró, gaa ne cataj no':

—Ne ma'an so' me yo'ó sí cachéé ga Jesucristó sí cavii chuman' Nazaret á —taj mozó chana yo' rihaan Pedró a.

<sup>68</sup> —Taj ma'. Ne unó 'unj me taj so' ma' —taj Pedró rihaan mozó chana, gaa ne curihanj so', ne canicun' so' rihaan chingá a.

<sup>69</sup> Gaa ne quene'en mozó chana se vaa nicun' Pedró rihaan chingá, ne guun che'e no' ca'mii no' rihaan nij yuvij nicun' rihaan chingá ga Pedró, cataj no':

—Sí nihánj me yo'ó nij sí cachéé ga Jesucristó asuun asán —taj mozó chana yo' a.

<sup>70</sup> Gaa ne cataj uún Pedró se vaa ne ne'en so' man Jesucristó a.

Dan me se corá nii me se cataj nij sí nicun' ga Pedró rihaan Pedró a:

—Ya ya yo'ó sí cachéé ga Jesucristó mé so' ei. 'O se sij cavii estadó Galilea mé so' chuguanj —taj nij so' rihaan Pedró a.

<sup>71</sup> Gaa ne guun che'e Pedró nucaj doj ca'mii Pedró, cataj Pedró se vaa ca'vee qui'yaj Diose sayuun man so' sese nuveé nana ya me nana a'mii so', ne cataj so':

—Ne ne'enj man snó'o nihánj sí a'mii soj che'é a ma' —taj uún Pedró, <sup>72</sup> gaa ne nu' quisíj vij caguáj to'loo a.

Gaa ne nanuj rá Pedró ndaa vaa cataj Jesucristó rihaan so' quii se vaa gaa ataa quisij vij caguáj to'loo, ne va'nuj cataj Pedró se vaa nuveé sij noco' man Jesucristó me ma'an Pedró a. Gaa ne guun che'e Pedró ta'vee ndo'o Pedró a.

## 15

*Nana nihánj taj xna'anj daj ca'mii sí cu'naj Pilato ga Jesucristó a*

<sup>1</sup> Gaa ne rej ranga' cunuu chre' nij xrej atá suun noco' doj do', nij sí uun chij do', nij sí naqui'yaj cuu se-tucuanj Moisés do', cunudanj nij cuesé do', qui'yaj nij so' junta, gaa ne numíj nij so' man Jesucristó, ne nicaj nij so' man Jesucristó ca'anj nij so' rihaan sí cu'naj Pilato, ne tacuachén nij so' man Jesucristó rihaan so' a.

<sup>2</sup> Gaa ne xna'anj sí cu'naj Pilato man Jesucristó, cataj so':

—So' me sí nicaj suun rey uun chij rihaan nij yuvij israelitá na' —taj so', xna'anj so' man Jesucristó a.

—Vejei —taj Jesucristó rihaan so' a.

<sup>3</sup> Ne cuta' ndo'o nij xrej atá suun noco' doj cacun' xráá Jesucristó a.

<sup>4</sup> Gaa ne xna'anj uún sí cu'naj Pilato man Jesucristó, cataj so':

—Me che'é ne a'mii so' ga. Nihánj me se uta' uxrá nii cacun' xráá so'

ei —taj sí cu'naj Pilato rihaan Jesucristó a.

<sup>5</sup> Tzaj ne yuun che'e ne ca'mii Jesucristó a doj nana rihaan so', ne caráya'anj uxrá sí cu'naj Pilato che'é yan qui'yaj so' danj a.

*Nana nihánj taj xna'anj se vaa cataj xna'anj sí cu'naj Pilato se vaa cavi' Jesucristó rihaan rcutze a*

<sup>6</sup> Ne vaa yo'o tucuáan noco' sí cu'naj Pilato se vaa rii so' man yo'o yo'o sí 'nij taga' 'o 'o cha'anj pascuá, ne tinavij uun so' cacun' tumé sí urihanj taga' yo' a. Me ma'an 'o sí 'nij taga' achín nij yuvii se vaa quirii so', ne ca'vee qui'yaj so' ndaa vaa taj nij yuvii a. <sup>7</sup> Dan me se vaa 'o sí cu'naj Barrabás 'nij taga' ga yo'ó nij sí guun rá cunu' ga gobiernó, ne nij so' me se ga cunu' nij so' ga gobiernó ne ticavi' ndo'o nij so' yuvii a. <sup>8</sup> Dan me se cavii nij yuvii israelitá, ne guun che'e nij so' cachín nij so' man sí cu'naj Pilato se vaa quirii so' man 'o sí 'nij taga' ndaa vaa u'yón so' 'yaj so' che'é nij so' a. <sup>9</sup> Gaa ne xna'anj sí cu'naj Pilato man nij yuvii, cataj so':

—Ne me rá soj quirii 'unj man sí nicaj suun rey uun chij rihaan soj sij israelitá na' —taj so', xna'anj so' man nij yuvii a.

<sup>10</sup> Danj ca'mii so', ne'en so' se vaa maan che'é se guun xcoj ruvaa rá nij xrej atá suun noco'oj doj me tacuachén nij xrej man Jesucristó rihaan so' a.

<sup>11</sup> Tzaj ne nij xrej atá suun noco'oj doj me se cataj xna'anj nij so' rihaan nij yuvii se vaa quirii sí cu'naj Pilato man sí cu'naj Barrabás taga' qui'yaj nij yuvii a.

<sup>12</sup> Gaa ne xna'anj uún sí cu'naj Pilato man nij yuvii, cataj so':

—Che'é se me rá soj quirii 'unj man sí cu'naj Barrabás rihaan soj, ne che'é dan daj qui'yáj man sí tucu'náj soj sí nicaj suun rey uun chij rihaan soj ga —taj so', xna'anj so' man nij yuvii a.

<sup>13</sup> Gaa ne caguáj uún nij yuvii, cataj nij yuvii:

—Cavi' so' rihaan rcutze, qui'yáá so' ei —taj nij yuvii a.

<sup>14</sup> —Tzaj ne me cacun' tumé so' ga —taj sí cu'naj Pilato, xna'anj so' man nij yuvii a.

Tzaj ne doj a caguáj nij yuvii, cataj nij yuvii:

—Cavi' so' rihaan rcutze, qui'yáá so' cuaj ei. —Danj inanj caguáj nij yuvii a.

<sup>15</sup> Ne sí cu'naj Pilato me se guun rá so' qui'yaj so' ndaa vaa no xcúun so' qui'yaj so' che'é nij yuvii, ne che'é dan quirii so' man sí cu'naj Barrabás taga' che'é nij yuvii, ne go' nij tanuu cuartá xráá Jesucristó, qui'yaj so', ne tacuachén so' man Jesucristó rihaan nij tanuu che'é rej cachron nij tanuu man Jesucristó rihaan rcutze a.

*Nana nihánj taj xna'anj se vaa ca'nga' naco'oj nij tanuu ni'yaj nij tanuu man Jesucristó a*

<sup>16</sup> Gaa ne ca'anj nicaj nij tanuu man Jesucristó rá ve' tucuá sí nicaj suun gobernador, gaa ne canacúun nij tanuu man taran' nij tuvi' tanuu nij so' cunu chre' taran' nij so' a. <sup>17</sup> Gaa ne nanuú Jesucristó sagan' rey yatzíj tintá, qui'yaj nij tanuu, ne qui'yaj nij so' cachriin tanj, cuta' nij so' raá Jesucristó a. <sup>18</sup> Gaa ne guun che'e nij tanuu caguáj nij tanuu rihaan Jesucristó, cataj nij tanuu:

—Ya ya sij nicaj suun rey rii ta'nga' rihaan nij yuvii israelitá mé so' ei —taj nij so', tiha' nij so' man Jesucristó a.

<sup>19</sup> Gaa ne go' nij so' vará raá Jesucristó, ne quirii talúj nij so' man Jesucristó, ne canicun' ruj nij so' rihaan Jesucristó, ne qui'yaj nij so' ndaa vaa 'yaj yuvii na'vív rihaan ya'anj a. <sup>20</sup> Sij ca'nga' naco'oj nij so' ni'yaj nij so' man Jesucristó, gaa ne quirii uún nij so' sagan' rey yatzíj tintá nuu Jesucristó, ne na'née uún nij so' sagan' uún Jesucristó man uún so', gaa ne nicaj nij so' man Jesucristó cavii nij so' ca'anj nij so' yan cachron nij so' man Jesucristó rihaan rcutze a.

*Nana nihánj taj xna'anj daj qui'yaj  
nij yuvii gaa cachrón nij tanuu man  
Jesucristó rihaan rcutze a*

<sup>21</sup> Dan me se gaa vaj nij tanuu ga Jesucristó, ne 'na' nique yo'o sís cu'naj Simón sís cavii chuman' Cirene rej tacaan, ne so' me se rej roj sís cu'naj Alejandro ga Rufo me so', ne dan me se quita'aa nij tanuu man so', ne qui'yaj uxrá nij tanuu fuerzá man sís cu'naj Simón yo' cata so' rcutze cano Jesucristó rihaan a. <sup>22</sup> Dan me se nicaj nij tanuu man Jesucristó ca'anj nij tanuu tacaan cu'naj Gólgota, ne nana “Gólgota” ro', taj Tacaan Cúu Yave Xnangá a. <sup>23</sup> Gaa ne rque nij tanuu doj na vinó nachej ga na e' cu'naj mirra man Jesucristó co'o so' a. Tzaj ne ne co'o so' ma'. <sup>24</sup> Veé dan, ne cachrón nij tanuu man Jesucristó rihaan rcutze, ne tico tixaj nij so' che'é sagan' Jesucristó me sís qui'yaj canaán 'o 'o ta'aj sagan' so' a.

<sup>25</sup> Dan me se aga' uun rej xta' güii me cachrón nij tanuu man Jesucristó rihaan rcutze a. <sup>26</sup> Ne cachrón nij tanuu letrá rihaan 'o rcuchra', ne taj xna'anj letrá yo' me che'é cavi' Jesucristó, ne: “Sís nihánj me sís nicaj suun rey uun chij rihaan nij yuvii israelitá a”, taj letrá yo' a. <sup>27</sup> Gaa ne cachrón nij tanuu man yavíj snó'o rihaan yavíj rcutze yo', ne yavíj roj so' me sís ituu a. Dan me se nicun' yo'o so' rej nuva' Jesucristó, ne nicun' yo'ó so' rej nichruun Jesucristó a. <sup>28</sup> Ne veé danj quisíj ya nu' nana no rihaan danj Diose nana taj: “Guun rá nii se vaa yo'o tuvi' nij sís tumé cacun' me so', rá nii a”, taj se-nana Diose yo' a. <sup>29</sup> Gaa ne cachén yuvii rej nicun' Jesucristó, ne ca'mii chí'ii ndo'o nij yuvii ni'yaj nij yuvii man Jesucristó a. Dan me se tucunó nij yuvii raaj nij yuvii, cataj nij yuvii:

—Nihánj táá so' sij guun rá tacuane man nuvíi nocoo ne cune' yo'ó nuvíi nocoo rque va'núj güii na'. <sup>30</sup> Tinanii so' mán so' rihaan rcutze, ne nanij so' rihaan yo'óo yaj víj —taj nij yuvii rihaan Jesucristó a.

<sup>31</sup> Ne ase vaa qui'yaj nij yuvii ro', danj qui'yaj uún nij xrej ata suun nocoo doj do', nij sís naqui'yaj cuu se-tucuanj Moisés do', ca'mii chí'ii nij so' rihaan tuvi' nij so' ni'yaj nij so' man Jesucristó, ne cataj nij so':

—Tinanii sís nihánj man yo'ó yuvii rihaan sayuun, rá so', tzaj ne ne guun nucuaj so' tinanii so' man ma'an so' rihaan rcutze danj. <sup>32</sup> Sese ya ya sij ca'née Diose tinanii man yuvii rihaan sayuun me so' do', sese ya ya sij nicaj suun rey uun chij rihaan ní' sij israelitá me so' do', ne nanij so' cuano rihaan yo'óo, ne quene'en ní', ne cuchuman rá ní' ni'yaj ní' man so' adonj —taj nij so', chí'ii ndo'o ca'mii nij so' ni'yaj nij so' man Jesucristó a.

Ne roj sís ituu nicun' rihaan rcutze rej x'núj Jesucristó me se ca'mii roj so' nana nij rihaan Jesucristó a.

*Nana nihánj taj xna'anj daj guun  
gaa cavi' Jesucristó a*

<sup>33</sup> Veé dan, ne caxuj, ne yuun che'e guun rmi' rihaan chumii, ne yo'o guun rmi' chumii ndaa quisíj aga' va'núj rej anoco' güii a. <sup>34</sup> Veé dan, ne quisíj aga' va'núj, gaa ne nucuaj ndo'o caguáj Jesucristó, cataj so':

—Eloi, Eloi, lama sabactani —taj so', caguáj so' xna'ánj a'mii ma'an so' a. Ne nana caguáj so' taj: “Diose sís nocoo 'unj mé so' á. Me che'é tanáj uun so' mán 'unj ga”, taj nana caguáj Jesucristó a.

<sup>35</sup> Ne cuno ta'aj nij sís nicun' rej x'núj Jesucristó nana caguáj so', tzaj ne ne cunó nij so' me taj Jesucristó a ma'. Maan se:

—Ni'yaj so' ei. Nacúun sís nihánj man sís cu'naj Elías tadonj —taj nij so' rihaan tuvi' nij so' a.

<sup>36</sup> Gaa ne cunánj yo'o so', ne caraa so' na vinó yuu rque 'o yataan esponja, ne cuta' so' raaj yo'o vará, ne ru'maan so' yataan tu'va Jesucristó, ne co'o Jesucristó na yuu yo', qui'yaj so', ne cataj sís qui'yaj danj:

—Dínj qui'yaj soj á. Quene'en ní' sese ca'na' sís cu'naj Elías tananij sís

cu'naj Elías man so' rihaan yo'óo ei —taj so' rihaan tuvi' so' a.

<sup>37</sup> Gaa ne sca' caguáj Jesucristó, ne cavi' so' a. <sup>38</sup> Gaa ne quisin' yatzíj mantá cortiná noco' rá nuvií noco' yo' ndaa rej raa, ne 'o quini' ca'anj ndaa tacóo yo' a.

<sup>39</sup> Veé dan, ne nicun' tanuu capitán rihaan Jesucristó, ne quene'en so' nu' se vaa guun gaa cavi' Jesucristó, ne ndaa dan asuun gaa xcaj so' cuentá se vaa ya uxrá ta'nij Diose me Jesucristó, ne dan me se cataj so':

—Ya ta'nij Diose me snó'o nihánj tadonj —taj tanuu capitán yo' a.

<sup>40</sup> Ne gan' doj nicun' que'ee chana, ni'yaj uun nij chana man Jesucristó a. Yo'o no' me chana cu'naj Mariá Magdalena, ne yo'ó no' me chana cu'naj Mariá nii sí cu'naj Jacobo Cunij ga sí cu'naj José a. Ne yo'ó no' me chana cu'naj Salomé a. <sup>41</sup> Dan me se gaa vaj Jesucristó estadó Galilea, ne qui'yaj suun nij chana che'é Jesucristó a. Ne vaa que'ee doj chana uún ní ca'anj chuman' Jerusalén ga Jesucristó a.

*Nana nihánj taj xna'anj se vaa cachin' nii man Jesucristó rque yu'uj yuvej a*

<sup>42</sup> Dan me se rej ata' güii me yo', ne güii no' xcúún nij yuvij israelitá qui'yaj chuvij nij so' che'é güii a'yuj güii naránj rá nij so' me yo', <sup>43</sup> ne che'é dan ca'na' yo'o sí cu'naj José sí ne chuman' Arimatea, ne yo'o sí sa' uun chij rihaan nij yuvij israelitá me so', ne sí me ndo'o rá guun chij Diose rihaan chumij nihánj me uún so' a. Dan me se quisíj rá so', ne catúj so' rihaan sí cu'naj Pilato, ne cachín ni'yaj so' rihaan sí cu'naj Pilato se vaa ca'vej sí cu'naj Pilato cachin' so' man Jesucristó a. <sup>44</sup> Dan me se caráya'anj ndo'o sí cu'naj Pilato nana se vaa aj cavi' Jesucristó, gaa ne canacúún so' ca'na' tanuu capitán rihaan so', ne xná'anj so' man tanuu capitán sese ya ya cavi' Jesucristó a. <sup>45</sup> Gaa ne cataj tanuu capitán se vaa ya ya cavi' Jesucristó, ne che'é dan ca'vej rá sí cu'naj Pilato nica'j sí cu'naj José man

Jesucristó ca'anj cachin' so' a. <sup>46</sup> Gaa ne xcaj sí cu'naj José yatzíj mantá, gaa ne tananij so' man Jesucristó, ne nacutáj so' yatzíj mantá xráá Jesucristó, ne caxríj so' man Jesucristó rque yu'uj gáán nii rque yuvej, ne caráán so' yuvej xij tu'va yu'uj yo' a. <sup>47</sup> Ne quene'en chana cu'naj Mariá Magdalena do', chana cu'naj Mariá nii sí cu'naj José do', rej cachin' so' man Jesucristó a.

## 16

*Nana nihánj taj xna'anj se vaa cunuu i'na' uún Jesucristó a*

<sup>1</sup> Ne ti'nuu güii naránj rá nij yuvij israelitá me se quiránj chana cu'naj Mariá Magdalena do', chana cu'naj Mariá nii Jacobo do', chana cu'naj Salomé do', yo'óo gun' daj, che'é rej ca'anj caxrii' nij no' yo'óo gun' daj man Jesucristó a. <sup>2</sup> Gaa ne taxrej cotungó me se ca'anj va'núj nij chana rej cachin' nii man Jesucristó, ne dan me se aj quisíj güii, <sup>3</sup> ne cataj nij chana rihaan tuvi' chana, ne:

—Me sí quirii' yanij yuvej aráán tu'va yu'uj gaa ne catuu ní ga —taj nij no', xná'anj nij no' man tuvi' nij no' a.

<sup>4</sup> Gaa ne ni'yaj nij chana, ne quene'en nij chana se vaa aj naj yanij yuvej, ne dan me se yuvej xij ndo'o me yo' a. <sup>5</sup> Gaa ne catúj nij chana rque yu'uj, gaa ne quene'en nij chana se vaa yanj 'o sí yaan rej nuva' nij chana, ne nuú so' yatzíj xcaan catzii, ne ca'anj ndo'o rá nij chana a.

<sup>6</sup> Gaa ne cataj sí yaan rihaan nij chana a:

—Taj che'é ca'anj rá nij soj ma'. Nihánj me nano' nij soj man Jesucristó sí cavi' chuman' Nazaret sí cachrón nii rihaan rcutze, ne so' me se aj cunuu i'na' uún so' ei. Ne ni'yaj soj rej cuchruj nii man so', ne xcaj soj cuentá se vaa nuvi' so' naj nihánj a man adonj. <sup>7</sup> Tananj cavi' soj cataj soj rihaan nij sí tucu'yón se-nana so' do', ndaa rihaan Pedró do', cataj soj: “Táa yaan Jesucristó rihaan soj 'anj so' estadó Galilea, ne yo' me rej quene'en nij soj man so' ndaa vaa cataj ma'an



so' rihaan soj á", cataj nij soj rihaan Pedró gá yo'ó nij sí tucu'yón se-nānā so' á —taj sí yaan rihaan va'nūj nij chana a.

<sup>8</sup> Gaa ne curihanj nij chana rque yu'uj, ne cunanj nij chana, ca'anj nij no' a. 'O se ca'anj ndo'o rá nij chana, ne ndaa ri'ij man nij chana a. Ne ne ca'vee ca'mii nij no' a doj nana rihaan a 'ó yuvi, che'é se cuchu'vi' ndo'o nij no' a.

*Nana nihánj taj xna'anj se vaa quene'en chana cu'naj Mariá Magdalena man Jesucristó a*

<sup>9</sup> Dan me se cunuu i'na' uún Jesucristó taxrej cotungó, gaa ne curuvi' so' asino yaan rihaan chana cu'naj Mariá Magdalena, ne no' me chana quirii so' chij nana chree nimán asij rque doj a. <sup>10-11</sup> Dan me se ca'anj no' rej man nij sí chéé gá Jesucristó, ne dan me se nanó ndo'o rá nij so', ne ta'vee nij so', ne dan me se cataj xna'anj no' rihaan nij so' se vaa vaa i'na' Jesucristó ne quene'en no' man Jesucristó, taj no', tzaj ne ne cuchuman rá nij so' a ma'.

*Nana nihánj taj xna'anj se vaa curuvi' Jesucristó rihaan vij tuvi' nij sí tucu'yón se-nānā so' gaa vaj roj so' rej tacaan a*

<sup>12</sup> Cachén doj, gaa ne dan me se chéé vij tuvi' nij sí tucu'yón se-nānā Jesucristó rej tacaan, ne curuvi' Jesucristó rihaan roj so', tzaj ne ino doj vaa so', ruvi' so', ni'yaj roj so' a. <sup>13</sup> Gaa ne cavii roj so' uún, nata' roj so' rihaan yo'ó nij sí tucu'yón se-nānā Jesucristó, tzaj ne nij so' me se ne cuchuman rá nij so' se-nānā roj so' a.

*Nana nihánj taj xna'anj se vaa curuvi' Jesucristó rihaan xaan nij sí tucu'yón se-nānā so' a*

<sup>14</sup> Corá me se gaa yáan xaan nij sí tucu'yón se-nānā Jesucristó rihaan mesá, ne curuvi' ma'an Jesucristó rihaan nij so', ne cuta' so' cacun' xráá nij so' se vaa guun nichraj rá nij so' ne ne cuchuman rá nij so' se-nānā nij sí quene'en man so' gaa cunuu i'na' uún

so' a. <sup>15</sup> Gaa ne cataj Jesucristó rihaan nij so' a:

—Ca'anj nij soj rihaan nu' cachra' chumii, ne ca'mii natáj soj se-nānā nana sa' rihaan cunudanj nij yuvi a. <sup>16</sup> Ne me ma'an 'o sí cuchuman rá se-nānā soj ne cata' ne, ne so' me sí quinanii rihaan sayuun, tzaj ne sí na'vej rá cuchuman rá se-nānā soj me se qui'yaj Diose sayuun man so' che'é cacun' tumé so' adonj. <sup>17</sup> Ne nihánj me suun sa' nocoo qui'yaj nij sí cuchuman ya rá ni'yaj manj, ne dan me se quitaj tu'va nij so' se-chuvi' 'unj, quirii nij so' nana chree nimán yuvi, ne ca'mii nij so' xna'anj naca xna'anj ne ne'en ma'an nij so', <sup>18</sup> ne ma'an ra'a nij so' quita'aa nij so' xcuáá yuvaa, ne ca'vee se co'o nij so' se xnaj, tzaj ne a doj se quiran' nij so' chi'ii ma'. Ne cuta' ra'a nij so' xráá sí ran', ne nahuun sa' nij sí ran' yo' a —taj Jesucristó rihaan xaan nij sí tucu'yón se-nānā so' a.

*Nana nihánj taj xna'anj se vaa cavii Jesucristó xtá' a*

<sup>19</sup> Dan me se quisij ca'mii Jesucristó nana dan rihaan nij sí tucu'yón se-nānā so', gaa ne cavii so' xtá', gaa ne cayáan so' rej nuva' Diose a. <sup>20</sup> Gaa ne nij sí tucu'yón se-nānā so' me se ca'anj ca'mii natáj nij so' se-nānā so' nu' nij chuman', ne racuuj sí 'nij ra'a man ní' man nij so', ne dan me se che'é suun sa' nocoo qui'yaj nij so' me se raan doj canoco' nij yuvi se-nānā Jesucristó a. Veé danj gaa ya ei.

## Nihánj me se-nanā Jesucristó nana sa' cachrón síí cu'naj Lucas rihaan yanj a

*Nana nihánj taj xna'anj se vaa qui'yaj síí cu'naj Lucas yanj nihánj ca'nej so' rihaan síí cu'naj Teófilo a*

<sup>1</sup> Dan me se que'ee uxrá yuvij guun rá cachrón nica nana rihaan yanj che'é nu' se vaa qui'yaj Jesucristó sca'núj ní' asij rque doj a. <sup>2</sup> Dan me se cachrón nij so' nana cataj xna'anj nij síí quene'en cunudanj se vaa qui'yaj Jesucristó asij guun che'e so' cayáán so' rihaan chumij nihánj, ne nij síí quene'en ro', me síí atā suun nata' nana yo' rihaan nu' yuvij a. <sup>3</sup> Ne 'unj nihánj me síí tucu'yón uxrá, don ca'vee naríj cunudanj rasuun yo', ne che'é dan vaa che'é cachrón nica 'unj cunudanj se vaa qui'yaj Jesucristó rihaan yanj nihánj nayaa so' sij cu'naj Teófilo sij sa' ndo'o, raj adonj. <sup>4</sup> Nanj qui'yaj, gaa ne ca'vee guun ya rá so' se vaa ya vaa nu' nana cataj xna'anj nii rihaan so' che'é Jesucristó adonj.

*Nana nihánj taj xna'anj se vaa cataj xna'anj se-mozó Diose se vaa ca'ngaa Juan síí cuta' ne man yuvij a*

<sup>5</sup> Gaa cayáán síí cu'naj Herodes síí nicaj suun rey uun chij rihaan estadó Judea, gaa ne 'o xrej canicun' rihaan yuvij israelitá me 'o síí cu'naj Zacarías, ne cachéé so' ga 'o ta'aj nij xrej, ne ta'níí ta'nij si'no Abías me nij so' a. Ne nica Zacarías me chana cu'naj Elisabet, ne ta'nij 'o xrej me no', <sup>6</sup> ne síí yanj sa' rihaan Diose me roj nica roj so', ne sa' uxrá cuno roj so' nu' nij nana me rá Diose cuno ní', ne nuvi' cacun' tumé roj so' a doj a ma'. <sup>7</sup> Tzaj ne taj vaj ta'níí roj so', che'é se chana ituun me Elisabet adonj. Ne aj cachén ndo'o yo' ne roj nica roj so' nanj á.

<sup>8</sup> Dan me se gaa natúj nij ta'níí ta'nij si'no Abías qui'yaj suun nij so' se-suun Diose, <sup>9</sup> ne 'o güii quiri' ni'yaj Zacarías catuú so' nuvií noco caraa so' squíí xlá rihaan ya'an a. 'O se tucuáán noco' nij xrej me se daj a güii tico tixaj nij so' se-chuvij nij so', se vaa quene'en nij so' a me síí quiri' ni'yaj caraa squíí rihaan ya'an a. <sup>10</sup> Dan me se catúj Zacarías rque nuvií noco, ne xe' nicun' 'o x'ne' yuvij, cachíín ni'yaj nij so' rihaan Diose gaa caraa Zacarías squíí rihaan ya'an a. <sup>11</sup> Dan me se naqui'yaa 'o se-mozó Diose rihaan Zacarías, ne nicun' so' rej nuva' mesá altar acaa squíí a. <sup>12</sup> Dan me se gaa quene'en Zacarías man se-mozó Diose, gaa ne kuchu'vi' ndo'o so' a. <sup>13</sup> Tzaj ne cataj se-mozó Diose rihaan so', ne:

—Se kuchu'ví' so', man Zacarías. 'O se aj cuno Diose nana cachíín ni'yáá so' rihaan so', ne che'é dan kuchruj nica so' Elisabet ta'nij sno'o so' adonj. <sup>14</sup> Juan tucu'náj so' man so' á. Guun niha' ndo'o rá so', ne guun niha' rá que'ee yuvij asa' ca'ngaa so' adonj. <sup>15</sup> 'O se ta'níí so' me síí guun síí sa' ndo'o rihaan Diose nanj adonj. Se co'o so' tzi' se co'o so' rinté se co'o so' ma'. Asij güii ataa ca'ngaa so', ne guun che'e Nimán Diose yo' o cayáán Nimán Diose ga so' nanj á. <sup>16</sup> Ne que'ee síí israelitá canicaj nimán canoco' uún man Diose síí 'nij ra'a man nij so', qui'yaj ta'níí so' adonj. <sup>17</sup> Dan me se guun so' síí ca'anj suun rihaan Diose adonj. Asino ta'níí so' guun che'e ca'mij natáj rihaan yuvij, gaa ne ca'mij síí ca'nej Diose man a. Daj se qui'yaj Nimán Diose, racuj Nimán Diose man síí cu'naj Elías gaa naá ro', danj qui'yaj guee Nimán Diose, racuj ndo'o so' man ta'níí so' a. Ca'mij luj yuvij ga ta'níí yuvij, qui'yaj so', natuna nimán nij síí chi'ij cuno nij so' rihaan Diose, qui'yaj so' nanj á. Juan me síí qui'yaj, ne caraya'anj nu' yuvij che'é se ca'na' síí qui'nij ra'a man ní' adonj. —Nu' nana nihánj cataj xna'anj se-mozó Diose rihaan

Zacarías a.

<sup>18</sup> Gaa ne cataj Zacarías rihaan se-mozó Diose a:

—Asa' ca'vee cuchuman raj se vaa ya ca'mii so' ga. Chii nga mé 'unj nihánj, ne chana chij me nica 'unj nihánj nanj á —taj Zacarías rihaan se-mozó Diose yo' a.

<sup>19</sup> Gaa ne cataj se-mozó Diose rihaan Zacarías a:

—Gabriel síi nicun' rihaan Diose mé 'unj adonj. Ma'an Diose mé síi ca'née manj ca'naj ca'mij ga so' adonj. Ca'ne' so' suun rihanj se vaa cataj xna'anj 'unj nana sa' nihánj rihaan so', <sup>20</sup> tzaj ne ne cuchuman rá so' nana nihánj, ne che'é dan me guun ya'mii so' adonj. A 'ó nana se ca'vee ca'mii so' ndaa quisij güii quisij ya nu' nana nihánj ndaa vaa cataj xna'anj 'unj rihaan so' adonj. Ne ya quisij nana nihánj güii aj cachron Diose adonj. —Danj cataj se-mozó Diose rihaan Zacarías a.

<sup>21</sup> Dan me se xe' mán nij yuvij, na'vij nij yuvij a me orá curihanj Zacarías rque nuvií, ne caráya'anj nij so' se vaa guun raan so' rque nuvií a.

<sup>22</sup> Dan me se gaa curihanj so' rque nuvií, gaa ne ne ca'vee ca'mii so' ga nij so' a ma'. Che'é dan xcaj nij so' cuentá se vaa naqui'yaa 'o rasuun rihaan Zacarías, qui'yaj Diose, gaa nuu so' rque nuvií a. Daj doj ra'a so' tucunó so' che'é se yo'o guun ya'mii so' a.

<sup>23</sup> Gaa cachén Zacarías se-suun Diose, gaa ne quinán so' tucua so' a.

<sup>24</sup> Cachén doj güii, gaa ne nari' nica so' Elisabet 'o ne'ej a. 'Un' yavii cayáán no' tucua no', <sup>25</sup> ne nuchruj raa no' nana nihánj a: “Ga naá guun na'aj uxraj rihaan yuvij che'é se chana ituun mej, tzaj ne ndaa yaj racuj Diose manj á”. Danj guun rá no' a.

*Nana nihánj taj xna'anj se vaa cataj xna'anj se-mozó Diose se vaa ca'ngaa Jesucristó a*

<sup>26</sup> Gaa quisij vatan' yavii cunuú rque Elisabet, gaa ne ca'née Diose man se-mozó so' síi cu'naj Gabriel ca'anj so' ndaa 'o chuman' naj rihaan estadó Galilea chuman' cu'naj

Nazaret a. <sup>27</sup> Ne ca'anj cataj xna'anj so' 'o nana rihaan 'o chana yaan cu'naj Mariá a. Aj guun ya xcaj 'o síi cu'naj José man no', ne 'o ta'níi ta'nij si'no síi guun chij ndo'o gaa naá síi cu'naj David me so' a. <sup>28</sup> Gaa ne dan me se cuchi' se-mozó Diose rihaan Mariá, ne cataj so':

—Racuj Diose mán so' á. 'O se qui'yaj ndo'o Diose se luj che'é so', ne yo'o yáán Diose ga so' á. Sa' doj cavii uruún so' rihaan cunudanj nij chana, qui'yaj Diose a. —Danj cataj se-mozó Diose rihaan Mariá a.

<sup>29</sup> Tzaj ne caráya'anj Mariá nana ca'mii se-mozó Diose, ne ne quene'en no' me che'é ca'mii so' nana vaa danj ma'. <sup>30</sup> Gaa ne cataj uún se-mozó Diose rihaan no' a:

—Se cuhu'ví' so', man Mariá. Aran' rá Diose qui'yaj Diose se luj che'é so' á. <sup>31</sup> Nari' so' 'o ne'ej, ne cuchruj so' 'o ne'ej sno'o adonj. Jesús tucunáj so' man so' á. <sup>32-33</sup> Síi sa' ndo'o guun so', ne ta'níi Diose síi sa' ndo'o me so' adonj. Guun so' síi guun chij rihaan ní', qui'yaj Diose síi 'nij ra'a man ní' a. Ase vaa guun chij xii so' síi cu'naj David rihaan soj sij israelitá gaa naá ro', danj qui'yaj ma'an so' guun chij so' rihaan soj nu' cavii nu' ca'anj adonj. —Danj cataj Gabriel rihaan Mariá a.

<sup>34</sup> Ne cataj Mariá rihaan se-mozó Diose, ne:

—Chana yaan mej á. Asa' ca'vee cuchruj 'unj ne'ej, rá so' ga —taj Mariá, xna'anj no' man se-mozó Diose a.

<sup>35</sup> Gaa ne cataj se-mozó Diose rihaan Mariá a:

—Cayáán Nimán Diose ga so', ne racuj Diose síi nucuaj ndo'o mán so', ne che'é dan cuchruj so' ne'ej sa' rihaan Diose, ne ta'níi Diose me ne'ej cuchruj so' a. <sup>36</sup> Ne xcaj so' cuentá che'é tuvi' chana so' Elisabet se vaa nda' se chana ituun me no', taj nii, ne nda' se chana chij me no', tzaj ne aj quisij vatan' yavii nuú rque no' cuano nanj á. <sup>37</sup> Diose me síi a'vee

'yaj cunudanj a —taj se-mozó Diose rihaan Mariá a.

<sup>38</sup> Ne cataj Mariá rihaan se-mozó Diose a:

—Dan me se nanj chana 'yaj suun che'é sí 'nij ra'a man ní' mej, ne ca'vee qui'yaj so' ndaa vaa cataj so' rihanj á —taj Mariá rihaan se-mozó Diose yo' a.

Gaa ne naxuun se-mozó Diose man so' a.

*Nana nihánj taj xna'anj se vaa ca'anj Mariá ca'mii no' ga Elisabet a*

<sup>39</sup> Cachén doj güii, gaa ne qui'yaj chuvii Mariá si'yaj no', ne yoo ndo'o ca'anj no' 'o chuman' naj estadó Judea, 'o chuman' naj rej xraj a. <sup>40</sup> Ne ca'anj no' tucua Zacarías, ne catúj no' rá ve', ne cataj no': “Vaa nucuáá so' na”, taj no' rihaan Elisabet a.

<sup>41</sup> Nu' cuno Elisabet nana ca'mii Mariá, ne nu' güéj ne'ej rque no' a. Dan me se catúj Nimán Diose nimán Elisabet, <sup>42</sup> ne nucuaj ca'mii no' ga Mariá, cataj no':

—Rqué Diose xna'anj ni'yaj uruún so' rihaan cunu' danj chana a. Ne uxrá rque Diose xna'anj ni'yaj ne'ej cuchruj so' a. <sup>43</sup> Ve'é ndo'o quirán' 'unj se vaa ca'na' roj nii sí qui'nij ra'a man ní' tucuj a. <sup>44</sup> Nu' cunoj nana cataj so' rihanj, ne nu' guun niha' rá ne'ej, ne nu' güéj ne'ej rquej a. <sup>45</sup> Cavii sa' so' che'é se amán rá so' se-nana Diose, se vaa quisij ya nu' nana ca'mii Diose rihaan so' adonj —taj Elisabet rihaan Mariá a.

<sup>46-48</sup> Gaa ne cataj Mariá nana nihánj a:

—Nda' se chana yanj rma'an mé 'unj, tzaj ne cunuu 'ee rá Diose ni'yaj so' manj a. Che'é dan me daj cataj ma'an Diose, ne ca'vee qui'yaj a. Nanuj rá Diose manj, ne che'é dan sa' vaa Diose, rá nimanj, ne guun niha' ndo'o rá nimanj ni'yaj nimanj man Diose sí tinanii manj rihaan sayuun nanj adonj. Ne yaj cataj cunudanj yuvii se vaa chana quiri' ndo'o xna'anj ni'yaj mej a. <sup>49</sup> Danj cataj nij so' che'é se sa' qui'yaj Diose sí nucuaj ndo'o che'ej a. Ne sí vaa sa' inanj me so'

adonj. <sup>50</sup> 'Q 'ee rá so' man taran' nij sí uno rihaan so' a. <sup>51</sup> Qui'yaj Diose suun nocoo uxrá a. Nu' nij sí xta' nimán ro', qui'yaj canaán Diose rihaan nij so', ne quinaavij se-nana nij so' nanj adonj. <sup>52</sup> Nu' nij sí rii ta'nga' ro', ca'nee Diose suun ra'a nij so', ne guun nij so' sí noco' nanj adonj. Ne nu' nij sí noco' ro', guun nij so' sí quirii ta'nga' naca, qui'yaj Diose nanj á. <sup>53</sup> Nu' nij sí na'aan rque ro', rque Diose chraa cha nij so', ne nu' nij ru'vee ro', cunuu nique nij so', qui'yaj Diose a. <sup>54</sup> Quisij ya nu' nana ca'mii Diose rihaan xii ní' nij sí man gaa naá a. Racuj so' man ní' sij israelitá, che'é se sij noco' man so' me ní' adonj. <sup>55</sup> Nanuj rá so' ndaa vaa cataj so' rihaan xii ní' sí cu'naj Abraham, ne che'é dan 'ee rá so' man ní' sij israelitá, che'é se ta'níi ta'nij si'no Abraham me ní' a. —Nu' nana nihánj me nana cataj Mariá a.

<sup>56</sup> Gaa ne va'nuj yavii cayáán Mariá tucua Elisabet, gaa ne quinan' no' tucua no' a.

*Nana nihánj taj xna'anj se vaa ca'ngaa Juan sí cuta' ne man yuvii a*

<sup>57</sup> Gaa quisij güii ca'ngaa ta'níi Elisabet, gaa ne dan me se cuchruj no' 'o ne'ej sno'o cunii a. <sup>58</sup> Cuno nij tuvi' no' se vaa ve'é uxrá qui'yaj Diose ga no', ne guun niha' uxrá rá nij so' che'é no' a. <sup>59</sup> Gaa quisij ne'ej tunj güii, gaa ne dan me seuchi' nij sí cuta' ta'nga' nee man ne'ej ve' a. Ne nij so' me rá tucu'náj Zacarías man ne'ej che'é se Zacarías cu'naj rej ne'ej, <sup>60</sup> tzaj ne ne ca'vej rá nii ne'ej cu'naj ne'ej danj ma'. 'Q se cataj no':

—Juan cu'naj se-chuvii ta'níj á —taj no' rihaan nij so' a.

<sup>61</sup> Tzaj ne cataj nij sí ca'na' rihaan no' a:

—Tzaj ne a 'ó tuvi' soj ne cu'naj Juan ma' —taj nij so' rihaan no' a.

<sup>62</sup> Che'é dan xná'anj nij so' man rej ne'ej, daj doj ra'a nij so' tucunó nij so' a. Guun rá nij so' quene'en nij so' daj quinaj se-chuvii ne'ej, qui'yaj rej ne'ej, rá nij so' a. <sup>63</sup> Cachín Zacarías



yanj gā ra'a so', ne cachrón so' letrá rihaan yanj yo', ne: "Juan cu'naj se-chuvii ne'ej", taj letrá cachrón so' rihaan yanj, ne che'é dan caráya'anj ndo'o nij sí ca'na' a. <sup>64</sup> Nu' cachrón Zacarías letrá, ne nu' ca'vee ca'mii uún so' nanj adonj. Gaa ne guun che'e so' cataj so' se vaa ve'é uxrá qui'yaj Diose a. <sup>65</sup> Ne caráya'anj nij sí yanj nichrun' se vaa quiran' Zacarías se vaa guun ya'mii so', ne ndaa taran' nij sí yanj quij nicun' estadó Judea ro', cuno ndaa vaa quiran' so' a. <sup>66</sup> Taran' nij sí cuno ro', nuchruj raa, ne xná'anj nij so' man tuvi' nij so' me suun çatā Juan asa' cachij so' a. Danj tu'va nij so' che'é se quene'en nij so' se vaa rqué ndo'o Diose xna'anj ni'yaj Juan a.

*Nana nihánj taj xna'anj se vaa cataj xna'anj Zacarías se vaa racuj ndo'o Diose man nij yuvij israelitá a*

<sup>67</sup> Racuj Nimán Diose man rej Juan sí cu'naj Zacarías, ne cataj so':

<sup>68</sup> —Ca'mij sa' ní' che'é Diose sí noco' ní' sij israelitá a. Ése racuj so' man ní' sij noco' man so', ne tinanii so' man ní' rihaan sayuun a. <sup>69</sup> Ca'na' 'o sí nucuaj guun so' sí tinanii sa' man ní' rihaan sayuun, qui'yaj Diose a. 'O ta'ní ta'nij si'no sí guun chij gaa naá sí cu'naj David guun so', <sup>70</sup> ndaa vaa cataj nij sí nata' se-nana Diose, qui'yaj Diose gaa naá, <sup>71</sup> ne dan me se ca'na' sí nucuaj tinanii so' man ní' rihaan nij sí taj ri'yunj man ní', taj nij so', ne se guun nucuaj nij sí taj ri'yunj man ní' qui'yaj chi'ii nij so' man ní' ma', taj nij so' a. <sup>72</sup> Dan me se cunuu 'ee rá so' man ní' ndaa vaa cata' tu'va so' rihaan xii ní', ne yo'o nuú rá so' nu' se vaa cataj xna'anj so' se vaa qui'yaj so' che'é ní' do' a.

<sup>73-74</sup> "Dan me se cataj so' rihaan xii ní' sí cu'naj Abraham se vaa ya ya tinanii so' man ní' rihaan nij sí taj ri'yunj man ní', gaa ne se cuchu'vi' ní' qui'yaj suun ní' che'é so' a. <sup>75</sup> Ne gaa nica nimán ní' rihaan Diose nu' güii gaa i'na' ní' adonj —taj Zacarías, gaa ne ca'mii uún Zacarías rihaan

ma'an ta'ní so'— <sup>76</sup> Ne xa' ma'an so', tzaj ne guún so' sí nata' se-nana Diose, ne Diose me sí sa' ndo'o, rej. Asino so' guun che'e ca'mii natáj, gaa ne ca'na' sí qui'nij ra'a man ní' ei. Dan me se cunuu nica nimán yuvij, qui'yáa so', ne caraya'anj yuvij man sí ca'na' qui'nij ra'a man ní', qui'yáa so', <sup>77</sup> ne so' qui'yaj xcaj nij sí canoco' man Diose cuentá se vaa ca'vee quinavij cacun' tumé nij so' qui'yaj sí ca'na', ne ca'vee quinanj nij so' rihaan sayuun a. <sup>78</sup> Danj qui'yaj Diose che'é nij so' che'é se 'ee uxrá rá Diose man nij so', ne che'é dan ca'nej so' man sí qui'nij ra'a man nij so' asa' quisj güii ca'vee cavij sa' ní' qui'yaj Diose adonj. <sup>79</sup> Gaa ne xa' tuvi' ní' sí ne acaj cuentá do', xa' tuvi' ní' sí chu'vi' ndo'o se vaa cavij' nij so' do', tzaj ne cuchuguun rihaan nimán nij so', gaa ne xcaj nij so' cuentá, gaa ne nari' taran' ní' daj qui'yaj ní', ne cunuu xej nimán ní' adonj —taj Zacarías rihaan ta'ní so' a.

<sup>80</sup> Dan me se cachij xnii cu'naj Juan, ne guun so' sí nucuaj nimán, ne inanj rej tacaan yáan so' ndaa se quisj güii guun che'e so' nata' so' se-nana Diose rihaan nij sí israelitá a.

## 2

*Nana nihánj taj xna'anj se vaa ca'ngaa Jesucristó a*

<sup>1</sup> Maan yo' ca'ngaa Juan ro', cayáan sí cu'naj Augusto sí nica suun emperador, ne ca'neé so' nana rihaan nij sí man taran' nij chuman' rii ta'nga' so' rihaan se vaa me rá so' naxcaj so' 'o yanj documento no se-chuvii 'o 'o nij yuvij a. <sup>2</sup> Ne cayáan sí cu'naj Cirenio sí nica suun gobernador uun chij rihaan estadó Siria gaa naxagaa yanj yo' a. <sup>3</sup> Dan me se ca'anj cunudanj nij yuvij chuman' chiháan xii nij so', gaa ne naxagaa yanj no se-chuvii nij yuvij yo' a.

<sup>4</sup> Cavii sí cu'naj José chuman' Nazaret chuman' naj estadó Galilea, ne ca'anj so' chuman' Belén chuman' naj estadó Judea a. Chuman' ca'ngaa xii so' sí guun chij gaa naá sí cu'naj

David me Belén, ne che'é dan ca'anj José ndaa Belén, che'é se 'o ta'níi ta'nij si'no David me so' a. <sup>5</sup> Nicaj so' chana cu'naj Mariá chana aj guun ya xcaj so' man, ca'anj so' cano se-chuvii roj so' rihaan yanj a. Nuü rque Mariá, <sup>6</sup> ne gaa caran' roj so' Belén, ne quisij güii ca'ngaa ne'ej a. <sup>7</sup> Taj yan vaa ya'núj caran' roj so' ca'ngaa ne'ej a ma'. Dan me se daj doj rej man scúj vaa ya'núj caran' roj so' a. Ne cuchruj no' 'o ne'ej sno'o cunii ta'níi no' síi chava' a. Qui'yaj yanü' no' man ne'ej, ne ca'née no' man ne'ej rá rihoo yan nuü co'yoü chá scúj a.

*Nana nihánj taj xna'anj se vaa curuvi' se-mozó Diose rihaan nij síi tumé matzinj a*

<sup>8</sup> Dan me se mán síi tumé matzinj rej tacaan nichrun' yáj tu'va chuman' Belén, ne nicun' ta'aj nij so' xe' tumé nij so' daán nij so' rej nij a. <sup>9</sup> Gaa ne dan me se naqui'yaa 'o se-mozó Diose rihaan nij so', ne cuchuguun uxrá rihaan nij so', qui'yaj Diose, gaa ne kuchu'vi' ndo'o nij so' a. <sup>10</sup> Gaa ne cataj se-mozó Diose rihaan nij so' a:

—Se kuchu'vi' soj ma'. 'O se ca'ná' 'unj nata' 'unj 'o nana sa' rihaan soj che'é rasuun qui'yaj guun niha' rá taran' nij yuvii ei. <sup>11</sup> 'O se cuan' me se ca'ngaa 'o ne'ej chuman' chiháan David, ne ne'ej yo' ro', me síi ca'née Diose tinanii man yuvii rihaan sayuun, ne síi qui'nij ra'a man ní' me so' ei. <sup>12</sup> Nanj vaa quene'en soj se vaa ya ca'mij rihaan soj a. Ca'anj nij soj chuman' Belén, ne nari' soj 'o ne'ej guun yanü', ne nuü so' rá rihoo chá xcuu co'yoü, ne so' me síi qui'nij ra'a man ní' a. —Danj cataj se-mozó Diose rihaan nij síi tumé matzinj a.

<sup>13</sup> Dan me se nu' navij ca'mii se-mozó Diose ga nij so', gaa ne veé maan orá dan curuvi' que'ee doj nij se-mozó Diose uún, ne ve'é uxrá ca'mii nij so' che'é Diose, cataj nij so':

<sup>14</sup> —Sa' uxrá vaa Diose, síi nicun' xta', ne gaa xej nimán nij yuvii sij sa' nimán a —taj nij se-mozó Diose rihaan nij síi tumé matzinj a.

<sup>15</sup> Dan me se quinan' nij se-mozó Diose xta', gaa ne cataj nij síi tumé matzinj rihaan tuvi' nij so' a:

—Ca'anj ní' Belén quene'en ní' daj guun se vaa cataj xna'anj Diose rihaan ní' ei —taj nij so' rihaan tuvi' nij so' a.

<sup>16</sup> Yoo ca'anj nij so', ne dan me se nu' cuhi' nij so', ne nu' quinari' nij so' man Mariá ga José, ne dan me se quinari' nij so' man ne'ej, nuü ne'ej rá rihoo a. <sup>17</sup> Dan me se gaa quene'en nij síi tumé matzinj man ne'ej, gaa ne cataj xna'anj nij so' nana ca'née Diose rihaan nij so' che'é ne'ej rihaan Mariá ga José do', rihaan nij síi man nichrun' do' a. <sup>18</sup> Gaa ne caráya'anj cunudanj yuvii cuno nana ca'mii nij síi tumé matzinj yo' a. <sup>19</sup> Ne Mariá me se ca'née no' cunudanj nana yo' cúu yave no', ne nuchruj raa no' che'é nana yo' a. <sup>20</sup> Dan me se quinan' nij síi tumé matzinj, gaa ne guun niha' uxrá rá nij so' che'é nu' nana cuno nij so' do', che'é nu' se vaa quene'en nij so' do', ne: “Sa' uxrá qui'yaj Diose á”, taj nij so' a. 'O se ase vaa cataj xna'anj se-mozó Diose rihaan nij so' ro', veé danj vaa guun a.

*Nana nihánj taj xna'anj se vaa caxrj roj nica José ne'ej ston Diose a*

<sup>21</sup> Cachén 'o tunj güii gaa ne cuta' nii ta'nga' nee man ne'ej, ne Jesús cu'naj ne'ej, qui'yaj nii, ndaa vaa cataj xna'anj se-mozó Diose gaa ataa nayon so' rque Mariá a.

<sup>22</sup> Cachén vij chihaa güii, gaa ne quisij güii cunu sa' Mariá rihaan Diose a. Che'é dan nicaj roj so' man ne'ej ca'anj roj so' nuvií nocoo yanj chuman' Jerusalén, ne caxrj roj so' ne'ej ston Diose a. <sup>23</sup> 'O se danj Diose taj se vaa daj a ta'níi nij yuvii israelitá síi chava' guun si'yaj Diose, ne che'é dan qui'yaj roj so' danj a. <sup>24</sup> Dan me se ca'anj roj so' ca'anj go' roj so' xcuu rihaan Diose ndaa vaa taj danj Diose a. Ca'vee go' yuvii vij cha'aa ca'vee go' yuvii vij culuj ca'vee, taj danj Diose a.

<sup>25</sup> Dan me se cayáan 'o chii nga cu'naj Simeón chuman' Jerusalén a. Sij vaa nica nimán me so', ne sij noco' uxrá man Diose me uún so', ne quisíj que'ee yo' na'vij uxrá so' se vaa tinanii Diose man nij yuvij israelitá rihaan sayuun a. Cayáan Nimán Diose ga so', <sup>26</sup> ne aj cataj xna'anj Nimán Diose rihaan so' se vaa se cavi' so' ndaa se aj quene'en ya so' man síi ca'nej Diose a. <sup>27</sup> Dan me se güii cuchi' roj nica José chuman' Jerusalén me se cataj xna'anj Nimán Diose rihaan Simeón se vaa ca'anj so' nuvíi noco, ne che'é dan ca'anj so' catúj so' rque nuvíi a. Gaa ne catúj roj nica José rque nuvíi ga ne'ej che'é se guun rá roj so' qui'yaj roj so' ndaa vaa taj danj Diose a. <sup>28</sup> Gaa ne tara'a síi cu'naj Simeón ne'ej, ne nago' so' graciá rihaan Diose che'é ne'ej a. Ne nihánj me nana ca'mii so' a:

<sup>29</sup> —Quisíj ya nu' ndaa vaa cataj so' rihanj, ne che'é dan ca'vee cavij yaj, ne gaa xej nimanj, Ataj Chij. <sup>30</sup> Quene'en rihanj man síi ca'née so' man tinanii man núj rihaan sayuun, <sup>31</sup> ne quene'en cunudanj yuvij se vaa ca'na' so' qui'yáa so' nanj á. <sup>32</sup> Ase vaa ya'an chuguun gaa so' tihaan so' se-tucuanj so' rihaan nij yuvij yaníj, ne ca'mii sa' nii che'é núj sij israelitá, qui'yaj uún so', ése síi noco' man so' me núj nanj adonj —taj Simeón rihaan Diose a.

<sup>33</sup> Caraya'anj roj nica José se-nana síi cu'naj Simeón se vaa ca'mii so' che'é ne'ej, <sup>34</sup> ne cachíin ni'yaj Simeón rihaan Diose se vaa rque Diose xna'anj ni'yaj roj nica José a. Gaa ne cataj so' rihaan Mariá a:

—Cune' Diose man ne'ej nihánj qui'yaj suun so' rihaan Diose, ne dan me se cavij sa' uxrá que'ee tuvi' ní' sij israelitá, qui'yaj so', tzaj ne que'ee tuvi' ní' tuna, qui'yaj uún so' adonj. Dan me se ca'née Diose man so' che'é rej xcaj yuvij cuentá che'é Diose, tzaj ne ca'mii chí'ii nii ni'yaj nii man so' adonj. <sup>35</sup> Ne xa' so', tzaj ne quinano ndo'o rá ma'an so' che'é so' vaa güii

nanj á. Dan me se ca'vee xcaj ní' cuentá daj vaa nimán que'ee yuvij, qui'yaj so' adonj —taj Simeón rihaan Mariá a.

<sup>36</sup> Ne yáan 'o chana chij cu'naj Ana, ne ní' nata' se-nana Diose me no', ne ta'níi síi cu'naj Fanuel me no', ne ta'níi ta'nij si'no síi cu'naj Aser me roj rej roj no' a. Xcaj chii man no' gaa naá, ne nicaj tuvi' roj so' chij yo', gaa ne cavi' nica no', <sup>37</sup> ne quináj no' ne ma'an no', ne quisíj no' ndaa ca'anj chihaa ca'anj yo' gaa ca'ngaa ne'ej cu'naj Jesús a. Chana noco' uxrá man Diose me no', ne che'é dan yo'o cayáan no' nuvíi noco, ne niganj yaj a'yuj caráj guee no', ne cachíin ni'yaj no' rihaan Diose a. <sup>38</sup> Maan orá ca'mii Simeón che'é ne'ej ro', veé maan orá dan vaj chana chij cu'naj Ana, ne catúj no' rque nuvíi, gaa ne nago' no' graciá rihaan Diose che'é ne'ej, ne cataj xna'anj no' che'é ne'ej rihaan nij yuvij man na'vij güii tinanii Diose man nij síi man Jerusalén rihaan sayuun a.

*Nana nihánj taj xna'anj se vaa canicaj roj nica José quinán roj so' tucúa roj so' a*

<sup>39</sup> Dan me se gaa quisíj qui'yaj roj nica José se vaa taj se-tucuanj Moisés, gaa ne quinán roj so' estadó Galilea a. Quinán roj so' chiháan roj so' chuman' Nazaret a. <sup>40</sup> Cachij ne'ej guun so' síi nucuaj a. Xnii vaa chij rá me so', ne rque uxrá Diose xna'anj ni'yaj so' a.

*Nana nihánj taj xna'anj se vaa ca'mii Jesucristó rihaan nij síi naqui'yaj cuu se-tucuanj Moisés gaa me Jesucristó xnii a*

<sup>41</sup> Daj a yo' ca'anj roj nica José chuman' Jerusalén gaa canuú cha'anj pascuá, <sup>42</sup> ése danj vaa tucúaan noco' nij síi israelitá a. Dan me se gaa quisíj Jesucristó chuvij yo', gaa ne ca'anj roj nii so' cha'anj ga rej so' a. <sup>43</sup> Cachén cha'anj, gaa ne quinán roj nica roj so', tzaj ne xnii ro', quináj Jerusalén, ne ne quene'en roj nica roj so' se vaa quináj xnii a ma'. <sup>44</sup> Quinán xnii ga

tuvi' roj so', rá roj so', ne che'é dan ca'anj roj so' a. Gaa ne rej ti'nuu guun che'e roj so' nano' roj so' man xnii rihaan tuvi' roj so', <sup>45</sup> tzaj ne nuvi' yan vaj xnii a ma'. Che'é dan nanicaj uún roj so' ca'anj uún roj so' Jerusalén, ne nano' uxrá roj so' man xnii a. <sup>46</sup> Quisij va'nuj güii nano' roj so' man xnii, gaa ne ca'anj roj so' rque nuvií nocoo man nij síí naqui'yaj cuu se-tucuanj Moisés, ne maan dan ne xnii nanó xrej xnii nana a'mii nij so', ne achíín na'anj xnii nana cuu man nij so', <sup>47</sup> ne caráya'anj daj a nij síí cuno nana ca'mii xnii, ése sij nicaj uxrá cuentá me xnii, ne sa' uxrá ca'mii xnii, rá nij so' a. <sup>48</sup> Ne caráya'anj roj nica roj so' gaa quene'en roj so' se vaa ne xnii sca'núj nij sij a. Gaa ne cataj nii so' rihaan so' a:

—Ne chihan' qui'yáa di' man núj, man rej. Nanó ndo'o rá rée di' do', nanó ndo'o rá 'unj do', qui'yáa di', che'é se nuvií nano' núj mán di', rej —taj nii so' rihaan so' a.

<sup>49</sup> Tzaj ne cataj Jesucristó rihaan roj so' a:

—Taj che'é nano' roj soj manj ma'. Me che'é ne ne'en roj soj se vaa no xcúún 'unj qui'yaj suun 'unj se-tucuanj Réj ga —taj xnii rihaan roj nica roj so' a.

<sup>50</sup> Tzaj ne ne cunoo roj so' se-nana xnii se vaa no xcúún so' qui'yaj suun so' se-chrej Rej so' Diose a.

<sup>51</sup> Dan me se quinan' Jesucristó chuman' Nazaret ga roj so', ne yo'o yanj uno sa' so' rihaan roj so' a. Ne yo'o nuú rá Mariá nu' ndaa vaa guun che'é so' gaa ca'ngaa so' do', nu' nana cuu sa' a'mii so' do' a. <sup>52</sup> Dan me se cachij Jesucristó guun so' síí cuu raá, ne caran' rá Diose ni'yaj Diose man so', ne caran' rá yuvií uún ni'yaj yuvií man so' nanj adonj.

### 3

*Nana nihánj taj xna'anj se vaa ca'anj Juan síí cuta' ne man yuvií tacaan, ca'mii natáj so' a*

<sup>1-2</sup> Yo' xnu' cayáán síí cu'naj Tiberio síí nicaj suun emperador ro', maan

yo' dan me rqué Diose se-nana Diose rihaan síí cu'naj Juan ta'níí Zacarías gaa cachéé so' tacaan a. Veé maan yo' ca'mii Diose rihaan Juan, dan me cayáán síí cu'naj Poncio Pilato síí nicaj suun gobernador uun chij rihaan estadó cu'naj Judea a. Ne veé maan yo' dan cayáán síí cu'naj Herodes síí nicaj suun tetrarca uun chij rihaan estadó cu'naj Galilea, ne cayáán tinúú so' síí cu'naj Felipé síí nicaj suun tetrarca uun chij rihaan roj estadó cu'naj Iturea ga Tracónite a. Ne veé maan yo' dan cayáán síí cu'naj Lisaniás síí nicaj suun tetrarca uun chij rihaan estadó cu'naj Abilinia, ne cayáán roj síí cu'naj Anás ga Caifás xrej ata suun nocoo doj rihaan nij yuvií israelitá a. Taran' nij so' me síí uun chij gaa cuchi' se-nana Diose rihaan Juan gaa cachéé so' tacaan a.

<sup>3</sup> Dan me se cachéé Juan nu' rej naj nichrun' tu'va chráa cu'naj Jordán, ne guun che'e so' ca'mii natáj so' rihaan yuvií se vaa nuchran' nimán nij yuvií, ne tanáj nij yuvií chrej chi'ii, ne ca'vee tinavij Diose cacun' tumé nij yuvií, taj Juan adonj.

<sup>4</sup> Dan me se qui'yaj Juan nu' ndaa vaa taj nana cachrón síí cu'naj Isaías síí nata' se-nana Diose gaa naá rihaan yanj, ne nihánj me nana cachrón so' a: “Nucuj ndo'o ca'mii natáj 'o so' rej tacaan, ne cataj so' se vaa nuchran' nimán yuvií, ne ve'é ca'mii nij yuvií ga síí 'nij ra'a man ní' asa' ca'na' so' adonj. <sup>5</sup> Dan me se se ca'vee quinaj a doj se chi'ii nimán ní' caráán chrej rihaan síí 'nij ra'a man ní' ca'na' so' ma'. Maan se quirii ní' nu' se chi'ii, ne caraa ní' nu' se sa' cachjin man nimán ní', ne ve'é inanjanj cunuu nica nimán ní', qui'yaj ní' ei. <sup>6</sup> Gaa ne quene'en nu' nij síí man daj a chuman' se vaa ca'vee tinanii Diose man yuvií rihaan sayuun nanj á”. Dan me nana cachrón síí cu'naj Isaías rihaan yanj gaa naá nana taj xna'anj che'é síí cu'naj Juan a.

<sup>7</sup> Dan me se cuchi' que'ee ndo'o yuvií rihaan Juan che'é se guun rá nij



so' cuta' ne Juan man nij so' a. Gaa ne caxríj yuvaa Juan man nij so', cataj so':

—Ase vaa xcuáa yuvaa vaa soj á. Me síi cataj xna'anj rihaan soj cunanj soj, ne quinanií soj rihaan sayuun qui'yaj Diose ga. Asa' ca'vee quinanií soj rihaan sayuun, qui'yaj nanj na cata' ne soj, rá soj ga. <sup>8</sup> Sese ya cunuu sa' nimán soj, ne ca'anj soj qui'yaj soj ndaa vaa 'yaj yuvii cunuu sa' nimán ei. Ne tadó soj sese guun che'e soj cataj soj se vaa ta'ní ta'nij si'no síi cu'naj Abraham síi cane gaa naá me soj, ne ne tumé soj cacun', cataj soj á. Se ca'mii soj daj chihaa míj danj ma'. Maan se cataj xna'anj 'unj rihaan soj se vaa nuvee se ya'anj tiha' ta'ní ta'nij si'no síi cu'naj Abraham me soj a ma'. Maan se sese Diose rá, ne ca'vee nicaj Diose naá guun yahij naj rihaan yo'oo nihánj, ne qui'yaj Diose man 'o ta'ní ta'nij si'no síi cu'naj Abraham adonj. Che'é dan canoco' ya soj man Diose ei. <sup>9</sup> O se nichrun' qui'yaj Diose sayuun man nij síi na'vej rá cunó rihaan so' nanj á. Ase vaa síi oro' aga' a'ne' chruun, ne oro' so' aga' ca'ne' so' chruun ro', danj vaa Diose cuano ei. Che'é dan ase vaa 'yaj nii man chruun ro', ta'nga' danj qui'yaj Diose man nij síi ne uno rihaan so' a. Dan me se a'ne' nii chruun nuvi' chruj sa' raa, ne araa nii man chruun yo' rihaan ya'an a. Ta'nga' danj qui'yaj Diose man nij síi na'vej rá canoco' chrej sa' adonj. —Danj cataj Juan rihaan nij yuvii a.

<sup>10</sup> Gaa ne xna'anj nij yuvii man Juan, cataj nij yuvii:

—Daj qui'yaj núj, rá so' ga —taj nij so' rihaan Juan a.

<sup>11</sup> Gaa ne cataj Juan rihaan nij so' a:

—Síi vaa vij se-cotoó ro', caxrii unun so' 'o cotoó ston síi nuvi' se-cotoó á. Ne síi vaa se chá rihaan ro', go' so' doj se chá man nij síi nuvi' se chá rihaan á. —Danj cataj Juan rihaan nij so' a.

<sup>12</sup> Doj tuvi' nij síi a'néj puextó ro', ca'na' rihaan Juan che'é se guun rá nij so' cuta' ne Juan man nij so' a. Ne xna'anj nij so' man Juan, cataj nij so':

—Daj qui'yaj núj, rá so', ga maestro' —taj nij so' rihaan Juan a.

<sup>13</sup> Ne cataj Juan rihaan nij so' a:

—Inanj sa'anj no xcuún soj ca'nee soj man yuvii ro', ca'vee ca'nee soj á. Se ca'néj soj doj sa'anj man yuvii ma' —taj Juan rihaan nij so' a.

<sup>14</sup> Gaa ne xna'anj doj tanuu man Juan a:

—Daj qui'yaj núj, rá so' ga —taj nij so' rihaan Juan a.

Ne cataj Juan rihaan nij so' a:

—Se qui'yaj soj fuerzá rque yuvii sa'anj rihaan soj a ma'. Se ca'mii ne soj che'é yuvii ne ca'nee soj sa'anj man nij yuvii a ma'. Veé doj sa'anj vaa tu'vee soj ro', guun niha' rá soj nicaj soj nanj á. —Danj cataj Juan rihaan nij tanuu a.

<sup>15</sup> Dan me se nuchruj nij yuvii cuentá sese sij ca'neé Diose tinanií man yuvii rihaan sayuun me Juan, ne che'é dan na'vij ndo'o nij yuvii cataj xna'anj ma'an síi cu'naj Juan daj sij me ma'an so' a. <sup>16</sup> Ne che'é dan cataj Juan rihaan nij so' a:

—Síi uta' ne na unun man soj mej, tzaj ne ca'na' yo'oo síi guun sca' doj rihanj a. Che'é dan me aj ne nó xcúnj nachej nuj correá 'nij tacanj so' ma'. Ne ca'na' so', ne ca'na' Nimán Diose ga so', ne caxrii ya'an so' man soj sij na'vej rá cunó rihaan Diose, ne cacaa soj adonj. <sup>17</sup> Dan me se ase vaa síi oro' chruun palá vaa so' cuano adonj. Dan me se síi nicaj chruun palá ro', rii nu' 'núú trigó naj rihaan yo'oo, ne naqui'yaj chre' so' man 'núú trigó sa', ne araa so' man 'núú trigó sa' rá ve', ne anicaj so' araa so' squij ni'ya xraá trigó rihaan ya'an a. Ne ase vaa síi nicaj palá man cuano ro', danj qui'yaj síi ca'na', ne naqui'yaj chre' so' man cunudanj nij síi cunuu sa' nimán, ne caraa so' man nij síi chi'ii rihaan ya'an, ne cacaa nij so' nu' cavii nu' ca'anj, ne daj chihaa míj se quina'áj ya'an yo' a man adonj. —Danj ca'mii síi cu'naj Juan rihaan nij yuvii yo' a.

<sup>18</sup> Ne vaa uxrá doj chrej sa' nago' so' man nij yuvii, ne ve'é nata' so'

se-nanā Diose nana sa' rihaan nij so' a.

<sup>19</sup> Dan me se cataj Juan se vaa ne chihān' qui'yaj sī nicaj suun rey sī cu'naj Herodes che'é se ca'néj so' nica tinúú so' chana cu'naj Herodías ne xcāj so' man no' do', che'é que'ee ndo'o doj se chi'ij qui'yaj Herodes do' a. <sup>20</sup> Che'é se nij ndo'o qui'yaj Herodes ca'néj so' nica tinúú so' cataj Juan, ne ca'maan ndo'o rá Herodes ni'yaj so' man Juan, ne caxrīj so' taga' man Juan nanj á. Maan ta'nga' doj vaa cacun' tumé so' gaa ataa caxrii so' taga' man Juan, tzaj ne yaj caxrīj so' taga' man Juan, ne doj a tumé so' cacun' adonj.

*Nana nihánj taj xna'anj se vaa cuta' ne Juan man Jesucristó a*

<sup>21</sup> Dan me se gaa ataa catuu Juan taga', ne cata' ne taran' nij yuvij, qui'yaj Juan, gaa ne cata' ne Jesucristó, ne nu' nago' Jesucristó gracia rihaan Diose, gaa ne naxra' rej xta' a. <sup>22</sup> Gaa ne nanij Nimán Diose raa Jesucristó, ne ase vaa ruvi' 'o cha'aan ro', danj vaa curuvi' Nimán Diose a. Gaa ne ca'mii Diose sī nicun' xta', cataj Diose:

—Ta'níi 'unj sī 'ee ndo'o raj man mé so', ne niha' ndo'o raj ni'yaj 'unj mán so' adonj —taj Diose sī nicun' xta' a.

*Nana nihánj taj xna'anj che'é taran' nij xii Jesucristó a*

<sup>23</sup> Ndaa quisij Jesucristó ico chi' yo' ta' asuun, gaa ne guun che'e so' qui'yaj suun so' se-suun so' a. Dan me se guun rej Jesucristó man sī cu'naj José, ne ta'nij José me Jesucristó, rá nij yuvij a. Ne ta'níi Elí me José a. <sup>24</sup> Ta'níi Matat me Elí, ne ta'níi Leví me Matat, ne ta'níi Melqui me Leví, ne ta'níi Jana me Melqui, ne ta'níi José me Jana a. <sup>25</sup> Ta'níi Matatías me José, ne ta'níi Amós me Matatías, ne ta'níi Nahum me Amós, ne ta'níi Esli me Nahum, ne ta'níi Nagai me Esli a. <sup>26</sup> Ta'níi Maat me Nagai, ne ta'níi Matatías me Maat, ne ta'níi Semei me Matatías, ne ta'níi José me Semei, ne

ta'níi Judá me José a. <sup>27</sup> Ta'níi Joana me Judá, ne ta'níi Resa me Joana, ne ta'níi Zorobabel me Resa, ne ta'níi Salatiel me Zorobabel, ne ta'níi Neri me Salatiel a.

<sup>28</sup> Ta'níi Melqui me Neri, ne ta'níi Adi me Melqui, ne ta'níi Cosam me Adi, ne ta'níi Elmodam me Cosam, ne ta'níi Er me Elmodam a. <sup>29</sup> Ta'níi Josué me Er, ne ta'níi Eliezer me Josué, ne ta'níi Jorim me Eliezer, ne ta'níi Matat me Jorim a. <sup>30</sup> Ta'níi Leví me Matat, ne ta'níi Simeón me Leví, ne ta'níi Judá me Simeón, ne ta'níi José me Judá, ne ta'níi Jonán me José, ne ta'níi Eliaquim me Jonán a. <sup>31</sup> Ta'níi Melea me Eliaquim, ne ta'níi Mainán me Melea, ne ta'níi Matata me Mainán, ne ta'níi Natán me Matata a. <sup>32</sup> Ta'níi David me Natán, ne ta'níi Isaí me David, ne ta'níi Obed me Isaí, ne ta'níi Booz me Obed, ne ta'níi Salmón me Booz, ne ta'níi Naasón me Salmón a.

<sup>33</sup> Ta'níi Aminadab me Naasón, ne ta'níi Aram me Aminadab, ne ta'níi Esrom me Aram, ne ta'níi Fares me Esrom, ne ta'níi Judá me Fares a.

<sup>34</sup> Ta'níi Jacob me Judá, ne ta'níi Isaac me Jacob, ne ta'níi Abraham me Isaac, ne ta'níi Taré me Abraham, ne ta'níi Nacor me Taré a. <sup>35</sup> Ta'níi Serug me Nacor, ne ta'níi Ragau me Serug, ne ta'níi Peleg me Ragau, ne ta'níi Heber me Peleg, ne ta'níi Sala me Heber a. <sup>36</sup> Ta'níi Cainán me Sala, ne ta'níi Arfaxad me Cainán, ne ta'níi Sem me Arfaxad, ne ta'níi Noé me Sem, ne ta'níi Lamec me Noé a. <sup>37</sup> Ta'níi Matusalén me Lamec, ne ta'níi Enoc me Matusalén, ne ta'níi Jared me Enoc, ne ta'níi Mahalaleel me Jared, ne ta'níi Cainán me Mahalaleel a. <sup>38</sup> Ta'níi Enós me Cainán, ne ta'níi Set me Enós, ne ta'níi Adán me Set a. Ne Adán ro', me sī qui'yaj ma'an Diose man a. Nu' nij so' me xii Jesucristó cumán gaa naá a.

## 4

*Nana nihánj taj xna'anj se vaa guun ndo'o rá sī chree tiha' yu'unj so' man Jesucristó a*

<sup>1</sup> Dan me se naraa Nimán Diose nū' nimán Jesucristó, gaa ne cavii Jesucristó tu'va chráá cu'naj Jordán, ne ca'anj so', vaj so' rej tacaan, qui'yaj Nimán Diose a. <sup>2</sup> Ne vij chihaa ya güii guun rá sí chree tihá' yu'unj sí chree man Jesucristó, che'é rej guun rá so' canoco' Jesucristó man so' a. Ne a 'ó xco' chraa ne chá Jesucristó cunu' vij chihaa güii ma'. Gaa quisíj nū' vij chihaa güii, gaa ne quina'aan ndo'o rque Jesucristó a. <sup>3</sup> Gaa ne dan me se cataj sí chree rihaan Jesucristó, ne:

—Sese ya ya ta'nij Diose mé so', ne cataj so' rihaan yahij nihánj se vaa guun yo' rachrúun chá so' á —taj sí chree rihaan Jesucristó a.

<sup>4</sup> Gaa ne cataj Jesucristó rihaan so', ne:

—Danj Diose taj: “Nuveé inanj se chá me se achiin rihaan yuvii, ne ca'vee cayáan sa' yuvii ma'”. Inanj danj taj danj Diose —taj Jesucristó rihaan sí chree yo' a.

<sup>5</sup> Gaa ne dan me se nicaj sí chree man Jesucristó cavii so' 'o rej xta' ndo'o, gaa ne tihaan so' man cunudanj nij chuman' naj rihaan chumii rihaan Jesucristó rque orún' orá nii a. <sup>6</sup> Gaa ne cataj so' rihaan Jesucristó, ne:

—Rque 'unj nū' chuman' nihánj do', nū' se sa' man nij chuman' nihánj do', mán so' a. 'O se aj ca'vej Diose guun chij 'unj rihaan nij chuman' yo', ne che'é dan ca'vee qui'yáj guun chij náá guun yuvii rihaan chuman' yo' adonj. <sup>7</sup> Che'é dan sese canicun' ruj so' rihanj, ne guun si'yáá so' man nū' nihánj, qui'yáj adonj. —Danj cataj sí chree rihaan Jesucristó a.

<sup>8</sup> Ne canicaj Jesucristó cataj Jesucristó rihaan sí chree:

—Daj chihaa mój se canicun' ruj 'unj rihaan so' a ma'. 'O se danj Diose taj nana nihánj, se vaa: “Rihaan orún' Diose sí 'nij ra'a man ní' canicun' ruj so', ne a 'ó rihaan tuví' so' se ca'vee na'vij so' ma'”. Danj taj danj Diose adonj —taj Jesucristó rihaan sí chree yo' a.

<sup>9</sup> Gaa ne nicaj sí chree man Jesucristó ca'anj so' chuman' Jerusalén, ne tacavii so' man Jesucristó raá nu'vii nocoo, <sup>10</sup> ne cataj so' rihaan so', ne:

—Sese ya ta'nij Diose mé so', ne güej so', ne nanij guee so' rihaan yo'óó á. 'O se danj Diose taj: “Ca'ne' Diose suun rihaan nij se-mozó so' se vaa cutumé nij so' mán so' a”, taj danj Diose, ne taj uún yo': <sup>11</sup> “Caráán ra'a nij so' mán so', se gaa nanj cano che'é so' yahij ma'”. Danj a'mii danj Diose —taj sí chree rihaan Jesucristó adonj.

<sup>12</sup> Gaa ne cataj Jesucristó rihaan sí chree a:

—Tzaj ne ne nó xcúnj qui'yáj danj ma'. 'O se taj uún danj Diose a: “Se guun qui'ri'yunj so' man Diose sí 'nij ra'a man ní', ne tihá' so' man so' ma'”. Inanj danj a'mii danj Diose rihaan ní' adonj —taj Jesucristó rihaan sí chree a.

<sup>13</sup> Danj qui'yaj sí chree, tzaj ne a doj ne cuchuman rá Jesucristó a man adonj. Gaa ne ca'ne' rá sí chree doj güii ga Jesucristó a.

*Nana nihánj taj xna'anj se vaa guun che'e Jesucristó tucu'yón so' se-nana Diose man nij yuvii man estadó Galilea a*

<sup>14</sup> Dan me se nan' Jesucristó estadó Galilea, ne yo'o racuíj ndo'o Nimán Diose man so', ne cuchi' nana che'é so' rihaan nij yuvii man nū' nij chuman' naj estadó Galilea a. <sup>15</sup> Ca'anj Jesucristó daj a nij ve' tucu'yón nij yuvii israelitá se-tucuanj Moisés, ne tucu'yón so' se-nana Diose man nij yuvii, ne ve'é uxrá ca'mii taran' nij yuvii che'é so' a.

*Nana nihánj taj xna'anj se vaa nucui' Jesucristó chiháán so', ne ca'mii natáj so' a*

<sup>16</sup> Gaa ne dan me se nucui' uún Jesucristó chiháán so' chuman' Nazaret rej cachij so' a. Gaa quisíj güii naranj rá nij yuvii israelitá, ne catúj so' rá ve' tucu'yón nij so' se-tucuanj Moisés, ése danj inanj cu'yón so' qui'yaj so' a. Gaa ne canicun' caya so' nayaa so' danj Diose rihaan nij yuvii a. <sup>17</sup> Sí tumé

yanj quirii yanj nō nana cachrón sí cu'naj Isaías sí nata' se-nana Diose gaa naá, ne caxrj so' ston Jesucristó a. Nacuchra' Jesucristó yanj, ne nari' so' rej nō nana nihánj a: <sup>18</sup> “Yanj Nimán Diose ga 'unj, ne che'é dan narii Diose manj ca'anj ca'mii natáj 'unj nana sa' rihaan nij sí nique a. Ca'née Diose manj ca'mii natáj 'unj rihaan nij sí 'nij taga' cataj 'unj se vaa curihanj nij so' cachee yuun nij so' a. Ne ca'née Diose manj racuj 'unj man nij sí tuchrii naxra' rihaan nij so', ne ca'née Diose manj racuj 'unj man nij sí ran' sayuun uún nanj á. <sup>19</sup> Ca'née Diose manj cataj xna'anj 'unj se vaa yaj ro', me rá Diose cavii sa' nij sí noco' man so' qui'yaj so' adonj.” <sup>20</sup> Nu' nihánj me nana nayaa Jesucristó, gaa ne nacué uún so' yanj ne nago' uún so' man sí tumé yanj, gaa ne ca'anj quitaj so' chruun xlá a. Tzaj ne ni'yaj uxrá cunudanj nij yuvii man rque ve' yo' man so', <sup>21</sup> ne che'é dan ca'mii uún so', cataj so':

—Veé cuano nihánj me se aj quisij ya nu' nana nihánj, ne 'unj sij nayaa nana nihánj cuno soj me sí qui'yaj nu' se vaa taj nana nihánj adonj —taj Jesucristó rihaan nij so' a.

<sup>22</sup> Sa' uxrá ca'mii Jesucristó, cataj nij yuvii, ne caraya'anj nij so' cuno nij so' se vaa ve'é uxrá vaa nana ca'mii Jesucristó a. Gaa ne dan me se xná'anj nij so' man tuvi' nij so' sese nuveé ta'nij José sí ne chiháán ní' me so', xná'anj nij so' man tuvi' nij so' a. <sup>23</sup> Che'é dan me ca'mii Jesucristó nana nihánj rihaan nij so' a:

—Ne'én 'unj se vaa cataj soj nana nihánj rihanj a: “Sese ya sij 'yaj cono'ó mé so', ne qui'yaj cono'ó so' man ma'án so' á”, cataj soj rihanj che'é se cuno soj se vaa que'ee suun sa' nocoo qui'yaj chuman' Capernaum a. Ne cataj soj rihanj se vaa qui'yaj suun sa' nocoo tuvi' yo' chuman' chiháán ní' nihánj uún a. <sup>24</sup> Tzaj ne vaa nana nihánj nana cataj ma'anj rihaan soj uún a: “Xa' sí nata' se-nana Diose, tzaj ne ne amán rá

tuvi' so' ni'yaj nij so' man so' ma'”, me nana taj 'unj no soj a.

<sup>25</sup> “Dan me se cuno soj ca'mij á. Ne'en soj se vaa gaa cayáán sí cu'naj Elías sí nata' se-nana Diose gaa naá, ne cachén va'nuy yo' táá yanée, ne ne caman', ne che'é dan guun uxrá x'naa nu' chiháán nij sí israelitá, ne yo' dan me se cayáán que'ee chana cavi' nica chiháán nij sí israelitá a. <sup>26</sup> Tzaj ne a 'ó chana nique cayáán chiháán nij sí israelitá ro', ne ca'nej Diose man Elías rihaan no', racuj so' man no' ma'. Maan se rihaan orún' chana nique ne chuman' Sarepta chuman' noco' man chuman' Sidón ca'née Diose man Elías, ne nda' se nuveé chana israelitá me no', tzaj ne racuj Elías man no' adonj.

<sup>27</sup> “Ne ne'en soj se vaa que'ee yuvii quiran' ndo'o luj ri'yuj cayáán chiháán nij sí israelitá gaa cayáán sí cu'naj Eliseo sí nata' se-nana Diose gaa naá a. Tzaj ne a 'ó nij so' ne nahuun ma'. Maan se orún' sí cu'naj Naamán sí cavii rej yanj cu'naj Siria nahuun, qui'yaj Eliseo adonj. —Danj cataj Jesucristó rihaan nij sí man rá ve' tucu'yón nii se-tucuanj Moisés ve' ne chiháán nij so' a.

<sup>28</sup> Cuno nij yuvii ndaa vaa cavii sa' nij sí man chuman' yanj, ne guun xcoj ruvaa rá nij so', gaa ne ca'maan rá nij so' ni'yaj nij so' man Jesucristó a. <sup>29</sup> Naxumaan nij so' nicaj nij so' man Jesucristó ca'anj nij so' tu'va chuman' a. Ne dan me se chuman' yo' ro', naj xráá 'o tacaan ruvaa ndo'o a. Ne nicaj nij so' man Jesucristó ca'anj nij so' rej ruvaa, ne guun rá nij so' tanij nij so' man Jesucristó rej ruvaa a. <sup>30</sup> Tzaj ne cachén Jesucristó sca'núj nij yuvii, ne ca'anj so' nanj adonj.

*Nana nihánj taj xna'anj se vaa quirii Jesucristó man yo'o nana chree nimán 'o snó'o a*

<sup>31</sup> Gaa ne ca'anj Jesucristó chuman' Capernaum chuman' naj estadó Galilea, ne güi naránj rá nij yuvii israelitá ca'anj Jesucristó ve' tucu'yón nij so' se-tucuanj Moisés, ne



tucu'yón so' se-nanā Diose man nij yuvii a. <sup>32</sup> Ne caráya'anj nij yuvii se-nanā so', che'é rej ase vaa a'mii 'o síi uun chij ndo'o ro', danj ca'mii so' rihaan nij yuvii a.

<sup>33</sup> Ne dan me se yáán 'o síi nuu nana chree nimán rá ve' yo', ne nucuañ ndo'o caguáj so', ne cataj so' se vaa:

<sup>34</sup> —Me che'é ra'yunj so' man núj, ga Jesús Nazareno'. 'Ná' so' tarí' so' man núj na'. Ne'enj mán so' se vaa síi guee cavii rihaan Diose mé so' adonj —taj síi nuu nana chree nimán rihaan Jesucristó a.

<sup>35</sup> Gaa ne canicaj Jesucristó caxríj yuvaa so' man nana chree nuu nimán snó'o yo', ne cataj so':

—Dínj tu'vá so' curihanj so' cuaj nimán síi nihánj á —taj Jesucristó rihaan nana chree yo' a.

Ndaa naxru' ma'an snó'o rej tanuu nij yuvii, qui'yaj nana chree, gaa ne curihanj nana chree nimán snó'o yo', ne nahuun sa' so', taj a doj chi'ii ran' so' a ma'. <sup>36</sup> Gaa ne ca'anj uxrá rá nij yuvii, ne xná'anj nij so' man tuvi' nij so', cataj nij so':

—Daj sij me síi a'mii nana nihánj, ne uun chij so' rihaan nana chree, ne urihanj nij nana chree nimán yuvii 'yaj síi nihánj ga —taj nij yuvii ni'yaj nij yuvii man Jesucristó a.

<sup>37</sup> Gaa ne cuchi' nana che'é Jesucristó rihaan cunudanj nij yuvii man nichrun' chuman' Capernaum yo' a.

*Nana nihánj taj xna'anj se vaa nahuun nii chej Simón Pedró, qui'yaj Jesucristó a*

<sup>38</sup> Dan me se curihanj Jesucristó rá ve' tucu'yón nii se-tucuanj Moisés, ne ca'anj so' tucua síi cu'naj Simón a. Ne ran' nii chej Simón chi'ii naca yuvaa, ne che'é dan cachín ni'yaj nii rihaan Jesucristó che'é no' a. <sup>39</sup> Gaa ne ca'anj Jesucristó canicun' so' rej tu'va yuvéé naj no', ne ca'ne' so' suun rihaan chi'ii se vaa quix'nee chi'ii xráá no' a. Gaa ne nu' quix'néj chi'ii xráá no', qui'yaj Jesucristó a. Ne veé maan orá dan naxagaa no', ne qui'yaj chuvii no' chá nij so' nanj adonj.

*Nana nihánj taj xna'anj se vaa nahuun que'ee síi ran', qui'yaj Jesucristó a*

<sup>40</sup> Cata' güii, ne nicaj nij yuvii cunudanj tuvi' nij so' síi ran', vaj nij so' rej ne Jesucristó a. Que'ee ndo'o chi'ii ran' nij so' a. Ne ca'anj Jesucristó, cuta' so' ra'a so' raa ndaa 'o 'o nij síi ran', gaa ne nahuun taran' nij so', qui'yaj Jesucristó a. <sup>41</sup> Ne que'ee nij síi ran' ro', curihanj nana chree nimán uún, ne caguáj nij nana chree yo', ne cataj nij so' se vaa ta'nií Diose me Jesucristó a. Tzaj ne caxríj yuvaa Jesucristó man nij nana chree, ne ne ca'vej rá Jesucristó ca'mii nij so' nana vaa danj a. 'O se quene'en nij so' se vaa sij ca'née Diose tinanii man yuvii rihaan sayuun me Jesucristó, ne ne ca'vej rá Jesucristó guun cuentó che'é so' a.

*Nana nihánj taj xna'anj se vaa ca'anj Jesucristó nu' nij ve' tucu'yón nij yuvii israelitá se-tucuanj Moisés, ca'mii natáj so' a*

<sup>42</sup> Rej taxrej cavii Jesucristó chuman' Capernaum ca'anj so' rej tacaan a. Gaa ne nano' nij síi man Capernaum man so', ne gaa nari' nij so' man Jesucristó, gaa ne caráán nij so' chrej rihaan Jesucristó, ne:

—Se ca'vee ca'anj so' rej yaníj ma' —taj nij so' rihaan Jesucristó a.

<sup>43</sup> Tzaj ne cataj Jesucristó rihaan nij so' a:

—Vaa ndo'o suun rihaan 'unj ca'anj 'unj yo'ó nij chuman' uún, ne nata' 'unj nana sa' nihánj rihaan nij síi ne yo'ó chuman' se vaa guun chij Diose rihaan chumii nihánj adonj. 'O se che'é nana sa' nihánj me ca'née Diose manj ca'naj rihaan chumii nihánj ca'mii natáj 'unj rihaan cunudanj nij yuvii adonj —taj Jesucristó rihaan nij síi man Capernaum a.

<sup>44</sup> Gaa ne ca'ne' rá nij so', ne ca'anj Jesucristó nu' nij ve' tucu'yón nij yuvii israelitá se-tucuanj Moisés ve' yanj estadó Judea, ne ca'mii natáj so' nana sa' a.

## 5

*Nana nihánj taj xna'anj se vaa quiri' uxrá nij tuvi' Simón Pedró xcuj, qui'yaj Jesucristó a*

<sup>1</sup> Dan me se 'o güii canicun' Jesucristó tu'va na lacuaná cu'naj Gene-saret, ne cuchi' uxrá yuvij rej nicun' so', ne cunuu chre' ndo'o nij so' che'é se guun rá nij so' cunō nij so' se-nana Diose a. Dan me se ndaa raan ma'an mán nij so' x'núú Jesucristó a. <sup>2</sup> Dan me se quene'en Jesucristó vij rihoo naj tu'va na lacuaná, ne síi uta xcuj me nij síi si'yaj rihoo yo', ne tanáj nij so' se-rihoo nij so' 'o orá nii, ne ca'anj na'nu' nij so' xnánj nij so' a. <sup>3</sup> Dan me se catúj Jesucristó rá 'o rihoo, ne se-rihoo síi cu'naj Simón me yo', ne cachíin ni'yaj Jesucristó rihaan Simón se vaa qui'yaj so' se ndo'o cuxuun so' rihoo ca'anj rihoo yo' doj rihaan na a. Gaa ne cayáán Jesucristó rque rihoo, ne tucu'yón so' se-nana Diose man nij yuvij man tu'va na a. <sup>4</sup> Quisíj tucu'yón Jesucristó man nij yuvij, gaa ne cataj so' rihaan Simón, ne:

—Nijcaj so' rihoo ca'anj so' rej cunuū doj na, gaa ne tiguíj soj nanj rá na á —taj Jesucristó rihaan so' a.

<sup>5</sup> Tzaj ne cataj Simón rihaan Jesucristó, ne:

—Nigān' qui'yaj suun uxrá núj, tiguíj ndo'o núj nanj rá na, tzaj ne a 'o xcuj ne quiri' núj, man maestro. Tzaj ne maan che'é se ma'an so' cataj, ne ca'anj tiguíj uún núj nanj rá na nanj á —taj Simón rihaan Jesucristó a.

<sup>6</sup> Dan me se ca'anj tiguíj uún nij tuvi' Simón nanj rá na, ne quiri' uxrá nij so' xcuj ndaa quisin' ma'an xnánj nij so', qui'yaj xcuj a. <sup>7</sup> Che'é dan canacúun nij so' man tuvi' nij so' síi nuu rque yo'ó rihoo, che'é rej guun rá nij so' račuíj tuvi' nij so' man nij so' a. Dan me se ca'na' nij tuvi' nij so' yan nicun' nij so', ne caraa uxrá nij so' xcuj rque roj rihoo a. Ne uxrá caraa roj rihoo, ne daj doj se ca'anj nij roj rihoo rque na nanj á. <sup>8</sup> Dan me se quene'en Simón Pedró se vaa qui'yaj

Jesucristó, gaa ne ca'anj canicun' ruj so' rihaan Jesucristó, cataj so':

—Nuveé sij canicun' nichrun' rihaan so' mej a ma'. Sij atā ndo'o cacun' mej nanj á —taj Simón rihaan Jesucristó a.

<sup>9</sup> Dan me se ca'anj ndo'o rá nij tuvi' Simón se vaa quiri' uxrá nij so' xcuj a. <sup>10</sup> Ne ca'anj rá síi cu'naj Jacobo do', síi cu'naj Juan do', che'é xcuj a. Ne tuvi' Simón me roj so', ne ta'níi síi cu'naj Zebedeo me roj so' a. Ne dan me se cataj Jesucristó rihaan Simón, ne:

—Se cuchu'ví' so' ma'. 'O se rej rihaan ní' me se guún so' síi naquiyaj chre' yuvij canoco' yuvij manj á —taj Jesucristó rihaan Simón a.

<sup>11</sup> Gaa ne nicaj nij so' se-rihoo nij so' ca'anj nij so' ndaa tu'va na a. Gaa ne tanáj nij so' cunudanj nij rasuun yo', ne canoco' nij so' man Jesucristó, ne ca'anj nij so' ga so' a.

*Nana nihánj taj xna'anj se vaa nahuun sa' 'o síi ran' luj ri'yuj, qui'yaj Jesucristó a*

<sup>12</sup> Dan me se 'o güii caran' Jesucristó 'o chuman', ne cuchi' 'o síi ran' ndo'o luj ri'yuj rihaan so' a. Gaa quene'en síi ran' yo' man Jesucristó, gaa ne canicun' ruj so' rihaan Jesucristó, ne cachíin ni'yaj so' rihaan Jesucristó, cataj so':

—Sese me rá so', ne ca'vee ca'nee so' chi'ii xráj, Señor —taj so' rihaan Jesucristó a.

<sup>13</sup> Gaa ne cuta' Jesucristó ra'a Jesucristó raá síi ran', ne cataj Jesucristó:

—Me raj qui'yáj danj ei. Nahuún so', qui'yáj adonj —taj Jesucristó rihaan so' a.

Nu' danj cataj Jesucristó, ne nu' quinavij luj xráá síi ran' a.

<sup>14</sup> Dan me se ca'ne' Jesucristó suun rihaan síi nahuun yo', ne se cataj xna'anj so' rihaan a 'o yuvij che'é se vaa quiran' so' ma'. Gaa ne cataj uún Jesucristó rihaan so' a:

—Ca'anj so' rihaan xrej, ne tiháan so' mán so' rihaan xrej se vaa nahuún so', ne rque so' rihaan Diose se vaa cataj síi cu'naj Moisés gaa naá ndaa

vaa nō xcúún so' rque so' rihaan Diose che'é yan nahuún so' adonj. Gaa ne xcaj nij xrej cuentá se vaa nahuún so' qui'yáj adonj —taj Jesucristó rihaan síi nahuun yo' a.

<sup>15</sup> Tzaj ne cha'nuu ndo'o nana che'é se vaa quiran' síi nahuun yo', ne che'é dan cunuu chre' ndo'o nij yuviij rej vaj Jesucristó a. Guun rá nij so' cunō nij so' se-nana Jesucristó, ne guun rá nij síi ran' x'nee chi'ij xráá nij so' uún a. <sup>16</sup> Tzaj ne naxuun Jesucristó man so' rihaan nij yuviij, ne ca'anj so' rej tacaan, ne cachíin ni'yaj ndo'o so' rihaan Diose a.

*Nana nihánj taj xna'anj se vaa nahuun sa' 'o síi na'vee cachee, qui'yaj Jesucristó a*

<sup>17</sup> 'O güii me se ne Jesucristó rá 'o ve', ne tucuyón so' se-nana Diose man yuviij, ne ne doj síi fariseo ga síi naqui'yaj cuu se-tucuanj Moisés rá ve' yo', ne mán síi cavii chuman' Jerusalén do', yo'ó nij chuman' naj estadó Judea do', nij chuman' naj estadó Galilea do', mán ga nij so' rá ve' yo' a. Ne Diose síi 'nij ra'a man ní' ro', racuíj ndo'o man Jesucristó, ne nahuun ndo'o nij síi ran', qui'yaj Jesucristó a. <sup>18</sup> Dan me se táá 'o síi na'vee cachee rihaan yuvéé, ne táá chihā nii man so' ca'na' nii rihaan Jesucristó a. Tzaj ne man ndo'o yuviij rá ve' ne Jesucristó, ne nano' nij so' rej catuu nij so' rá ve' cuchruj nij so' man síi ran' rihaan Jesucristó a. <sup>19</sup> Tzaj ne taj se qui'yá' ca'vee cachēn nij so' sca'núj nij yuviij a. Che'é dan cavii nij so' xráá ve', ne caya' nij so' yu'uj xráá ve', che'é rej ca'vee tinanij nij so' man síi ran' rihaan Jesucristó a. <sup>20</sup> Gaa quene'en Jesucristó se vaa cuchumán uxrá rá nij tuvi' síi ran' yo' se vaa ca'vee nahuun so' qui'yaj Jesucristó, gaa ne cataj Jesucristó rihaan síi ran' yo', ne:

—Navij cacun' xráá so', nanj tinuj —taj Jesucristó rihaan so' a.

<sup>21</sup> Ne cuno nij síi fariseo cuno nij síi naqui'yaj cuu se-tucuanj Moisés cuno nana ca'mii Jesucristó, gaa ne

nuchruj raā nij so' nana nihánj ga tuvi' nij so' a:

—Daj sij me síi nihánj, ne a'mii so' nana vaa nij rihaan Diose ga. Orún' Diose uun nucuaj tinavij cacun' xráá yuviij nanj á —taj nij so' ga tuvi' nij so' a.

<sup>22</sup> Quene'en Jesucristó daj nuchruj raā nij so', ne che'é dan cataj so' rihaan nij so' a:

—Me che'é nuchruj raā soj nana nanj ga. <sup>23</sup> Tu'va rma'án 'unj se vaa navij cacun' xráá síi nihánj, rá soj a na'. Ca'vee cataj uun ní' navij cacun' xráá síi nihánj na'. Ase ca'vee doj cataj ní' naxagaa so', ne cachee so' cuaj, cataj ní' xa'. <sup>24</sup> Dan me se me rá 'unj xcaj soj cuentá se vaa síi ca'née Diose nīcā yu'unj man yuviij mej ne nō xcúún 'unj tinavíi 'unj cacun' xráá nij yuviij man rihaan chumiij nihánj adonj —taj Jesucristó rihaan nij so' a.

Dan me se cataj Jesucristó rihaan síi na'vee cachee a:

—Rihaan so' sij na'vee cachee taj 'unj, ne nacue so' tuvée so', ne nán' so' tucua so' á —taj Jesucristó rihaan síi naj rihaan yuvéé yo' a.

<sup>25</sup> Nu' danj tu'va Jesucristó, gaa ne nu' naxagaa síi ran' yo' ni'yaj taran' nij yuviij a. Gaa ne nacué so' tuvée so', gaa ne nan' so' tucua so', ne ve'é uxrá ca'mii so' che'é Diose a.

<sup>26</sup> Dan me se ca'anj rá taran' nij yuviij man rá ve' yo', ne cataj nij yuviij se vaa ve'é uxrá qui'yaj Diose a. Ne chuchu'vi' ndo'o nij yuviij, ne cataj nij yuviij se vaa:

—Niha' uxrá vaa suun sa' nocō quene'en ní' cuan' adonj —taj nij yuviij yo' a.

*Nana nihánj taj xna'anj se vaa nacúún Jesucristó man Leví, ne canoco' Leví man so' a*

<sup>27</sup> Quisíj nahuun síi ran' yo', gaa ne curihanj Jesucristó xe', ne quene'en so' man 'o síi a'néj puextó cu'naj Leví a. Ne ne síi cu'naj Leví 'o ve' a'néj nii puextó man yuviij a. Gaa ne cataj Jesucristó rihaan so', ne:

—Canocó' so' manj, ca'anj ní' á —taj Jesucristó rihaan so' a.

28 Gaa ne tanáj Leví man cunudanj rasuun nicaj so', ne naxumaan so', canoco' so' man Jesucristó, ca'anj so' a.

*Nana nihánj taj xna'anj se vaa me rá Jesucristó racuíj so' man nij síi tumé cacun' a*

29 Gaa ne canuû ndo'o cha'anj nocoo tucúa Leví che'é Jesucristó, qui'yaj Leví a. Ne man que'ee ndo'o tuvi' so' síi a'néj puextó do', que'ee yo'ó yuvij do', man tucúa Leví, ne ne nij so' ga nij tuvi' Jesucristó a.

30 Dan me se man nij síi fariseo do', síi naqui'yaj cuu se-tucuanj Moisés noco' man nij síi fariseo do', gaa ne ca'mii chi'ij nij so' che'é Jesucristó rihaan nij síi tucu'yón se-nana Jesucristó a. Dan me se cataj nij síi fariseo ga nij síi naqui'yaj cuu se-tucuanj Moisés:

—Me che'é chá soj chraa ne 'o soj na ga nij síi a'néj puextó do', ga yo'ó nij síi tumé cacun' do', ga —taj nij so', xná'anj nij so' man nij síi tucu'yón se-nana Jesucristó a.

31 Gaa ne dan me se cataj ma'an Jesucristó rihaan nij so' a:

—Síi vaa nucuaj ro', ne nano' nij so' man doctor ma'. Maan se síi ran' ro', me síi nano' man doctor adonj. Gaa ne ase vaa síi ran' ro', danj vaa nij síi nihánj adonj. 32 'Q se ne ca'na' 'unj canacunj 'unj man síi sa' ma'. Che'e nij síi tumé cacun' ca'naj se vaa canicaj nimán nij so' ne canoco' nij so' se-nanaj adonj. Tzaj ne sese síi sa' me soj, rá soj, ne nuveé sij canacunj 'unj man me soj ma' —taj Jesucristó rihaan nij so' a.

*Nana nihánj taj xna'anj me che'é ne toco' nij síi tucu'yón se-nana Jesucristó x'naa man ma'an nij so' a*

33 Gaa ne nij síi fariseo ga nij síi naqui'yaj cuu se-tucuanj Moisés me se cataj nij so' rihaan Jesucristó a:

—Me che'é, ne nij síi tucu'yón se-nana Juan síi uta' ne man yuvij me se toco' nij so' x'naa man ma'an nij so' do', na'vív nij so' do', ne veé danj 'yaj nij síi tucu'yón se-nana núj sij fariseo

do', tzaj ne nij síi tucu'yón se-nana so' me se ne toco' nij so' x'naa man ma'an nij so' do', ne na'vív nij so' do', rihaan Díose ga —taj nij so' rihaan Jesucristó a.

34 Ne cataj Jesucristó rihaan nij so':

—Ase vaa síi cuchruj sa'anj vaa 'unj, ne asa' ca'vee toco' nij síi man gaj x'naa man ma'an nij so', rá soj ga. Ase vaa síi cataj xcaj man chana ne man tuvi' so' do', danj vaa nij síi man nihánj cuano, ne anuû ndo'o cha'anj man nij so', ne se ca'vee toco' nij so' x'naa man ma'an nij so' cuano ma'.

35 Tzaj ne vaa güii, ne guun yaníj 'unj rihaan nij so', qui'yaj yuvij, gaa ne nano rá nij síi nihánj, gaa ne toco' nij so' x'naa man ma'an nij so' adonj —taj Jesucristó rihaan nij síi fariseo ga nij síi naqui'yaj cuu se-tucuanj Moisés yo' a.

36 Gaa ne ca'mii Jesucristó yo'ó nana rihaan nij so', cataj so':

—Ase vaa yatzíj sin' vaa tucuáan nga noco' soj, ne se guun cusin' ní' yatzíj naca ne na'nej ní' man yatzíj nga ma'. Sese danj qui'yaj ní', gaa ne quirí' nu' yatzíj naca yo', qui'yaj yatzíj nga nanj adonj. Gaa ne ino uxrá gaa yatzíj naca, qui'yaj yatzíj nga yo' nanj adonj. 37 Ne dan me se ase vaa nuj nga nuj araa nii na vinó vaa uún soj a.

Ne se ca'vee tucu'yón 'unj se-tucuanj 'unj man soj ma'. 'Q se ase vaa na vinó naca vaa nana tucu'yón 'unj, ne se guun caraa yuvij na vinó naca rque nuj nga ma'. Sese danj qui'yaj yuvij, ne cuyanj na vinó cunu xee na vinó, ne se cacua nuj nga ma'. Che'é dan canuu yo', ne cayanj na vinó rihaan yo'ó a. 38 Che'é dan araa nii na vinó naca rque nuj naca, ne 'o man sa' na vinó rque nuj yo' a. Che'é dan inanj rihaan síi naca síi ne noco' tucuáan nga tucu'yón 'unj se-nanaj nanj adonj. 39 Ne taj síi guun rá co' na vinó naca, sese aj co' so' na vinó nga ma'. 'Q se sa' doj vaa na nga, cataj so' nanj á. Ne danj vaa guee soj, inanj tucuáan nga noco' soj, ne che'é dan na'vej soj canoco' soj tucuáan naca nanj adonj. —Danj cataj Jesucristó



rihaan nij sí fariseo do', rihaan nij sí naqui'yaj cuu se-tucuanj Moisés do' a.

## 6

*Nana nihánj taj xna'anj che'é güii naránj rá ní' a*

<sup>1</sup> 'O güii naránj rá nij yuvii israelitá cachén Jesucristó ga nij sí tucu'yón se-nana so' rque 'o naa 'núú trigó a. Ne cuta nij sí tucu'yón se-nana Jesucristó doj caa trigó, ne tuguáj ra'a nij so' caa, gaa ne chá nij so' doj trigó a. <sup>2</sup> Gaa ne xná'anj ta'aj sí fariseo man nij so', cataj nij so':

—Me che'é 'yaj soj danj ga. Ne nó xcúún ní' cuta ní' trigó güii naránj rá ma' —taj nij sí fariseo rihaan nij sí tucu'yón se-nana Jesucristó a.

<sup>3</sup> Tzaj ne cataj ma'an Jesucristó rihaan nij sí fariseo a:

—Me che'é, ne ne nayaa soj rihaan danj Diose daj qui'yaj sí cu'naj David gaa naá a. Gaa quina'aan rque nij tuvi' nij so', <sup>4</sup> gaa ne catúj so' rá nuvií, ne chá so' rachrúún taj rihaan se-mesa Diose a. Ne go' uún so' chá nij tuvi' so' uún a. Ne ne nó xcúún nij so' chá nij so' rachrúún yo', maan se orún' nij xrej nó xcúún chá rachrúún yo' a. Tzaj ne maan che'é se rque nij so' na'aan uxrá, gaa ne chá nij so' rachrúún yo' nanj adonj. Tzaj ne ne cataj Diose se vaa tumé sí cu'naj David cacun' ma' —taj Jesucristó rihaan nij sí fariseo a.

<sup>5</sup> Gaa ne canicaj so', cataj uún so' a:

—Sí ca'née Diose nica yu'unj man yuvii mej, ne no xcúnj quirii ta'ngaj daj qui'yaj yuvii güii naránj rá yuvii adonj —taj Jesucristó rihaan nij sí fariseo a.

*Nana nihánj taj xna'anj se vaa nahuun sa' 'o sí nacoo ra'a, qui'yaj Jesucristó a*

<sup>6</sup> Dan me se yo'ó güii naránj rá nij yuvii israelitá ro', catúj Jesucristó rque 'o ve' tucu'yón nij so' se-tucuanj Moisés, ne tucu'yón so' se-nana Diose man nij yuvii a. Ne dan me se yáán 'o snó'o rá ve' yo', ne nacoo ra'a so' rej

nuva' so' a. <sup>7</sup> Ne nij sí naqui'yaj cuu se-tucuanj Moisés rihaan yuvii do', nij sí fariseo do', yáán nij so' rá ve', ne tumé uxrá nij so' man Jesucristó sese nahuun yuvii qui'yaj so' gaa güii naránj rá nij so' a. Danj qui'yaj nij so' che'é rej guun rá nij so' cuta' nij so' cacun' xráá Jesucristó a. <sup>8</sup> Tzaj ne quene'en Jesucristó se vaa guun rá nij so', gaa ne cataj so' rihaan sí nacoo ra'a a:

—Naxumaan so' canicun' cayá so' sca'núj á —taj Jesucristó rihaan so' a.

Gaa ne naxumaan so', ne canicun' caya so' sca'núj nij yuvii a.

<sup>9</sup> Gaa ne cataj Jesucristó rihaan nij sí nanó chi'ii rá a:

—Cuanó nihánj me se xná'anj 'unj man soj che'é güii naránj rá xa'. No xcúún ní' racuj ní' tuvi' ní' na'. Ase no xcúún ní' qui'yaj chi'ii ní' man tuvi' ní' xa'. Daj qui'yaj ní' rá soj gaa güii naránj rá ní' ga. Ne nó xcúún ní' tinanii ní' man tuvi' ní' rihaan sayuun gaa güii naránj rá gaa a na'. Ni'yaj uun ní' cavi' so' gaa güii naránj rá gaa a na'. —Danj taj Jesucristó rihaan nij so' a.

<sup>10</sup> Gaa ne ni'yaj Jesucristó man cunudanj nij yuvii man rque ve' yo', gaa ne cataj so' rihaan sí nacoo ra'a a:

—Tucua so' ra'a so' á —taj Jesucristó rihaan so' a.

Ne tucua so' ra'a so', ne cunuu sa' ra'a so' adonj. <sup>11</sup> Tzaj ne ca'maan ndo'o rá nij sí naqui'yaj cuu se-tucuanj Moisés ga nij sí fariseo, ne guun rá nij so' ga tuvi' nij so' daj gaa qui'yaj chi'ii nij so' man Jesucristó a.

*Nana nihánj taj xna'anj se vaa narii Jesucristó chuvij apóstol ca'anj nata' se-nana so' a*

<sup>12</sup> Dan me se cachén doj güii, gaa ne ca'anj Jesucristó rej quij, ca'anj cachinj ni'yaj so' rihaan Diose a. Nigan' quináj so' quij cachín ni'yaj so' rihaan Diose a. <sup>13</sup> Ranga', gaa ne canacúún Jesucristó man cunudanj nij sí tucu'yón se-nana so' ca'na' nij so' rihaan so', gaa ne narii Jesucristó man chuvij nij so' guun nij so' apóstol

nata' rihaan yuvii che'é so' a. <sup>14</sup> 'O so' me sí cu'naj Simón, ne tucunáj Jesucristó Pedró man so' a. Yo'ó so' me tinúú Pedró sí cu'naj Andrés a. Yo'ó nij so' me Jacobo do', Juan do', Felipé do', Bartolomé do', <sup>15</sup> Mateo do', Tomás do', Jacobo ta'níí Alfeo do' a. Yo'ó so' uún me Simón, ne tuvi' nij sí me rá cunu' ga gobiernó ne Romá me so' a. <sup>16</sup> Yo'ó so' me Judas tinúú Jacobo, ne yo'ó so' uún me Judas Iscariote sí tacuachén man Jesucristó rihaan nij sí taj ri'yunj man Jesucristó a.

*Nana nihánj taj xna'anj se vaa nago' Jesucristó chrej man 'o x'ne' nocoo yuvii a*

<sup>17</sup> Dan me se nanij Jesucristó ga chuvij nij apóstol yo' taa rque doj, ne cuchí' nij so' 'o rej vaa taa, ne nocoo doj sí tucu'yón se-nana so' mán ga so' a. Ne ca'na' ndo'o yuvii cavii chuman' Jerusalén do', yuvii cavii yo'ó nij chuman' naj estadó Judea do', yuvii cavii rej tu'va na ya'anj rej naj chuman' Tiro ga chuman' Sidón do' a. <sup>18</sup> Ne guun rá nij yuvii cunó nij so' se-nana Jesucristó, ne guun rá nij sí ran' nahuun nij so' a. Ne vaa nij yuvii nuu nana chree nimán, ne sayuun ndo'o quiran' nij yuvii, qui'yaj nana chree, tzaj ne quirii Jesucristó nana chree nuu nimán nij so', ne cunuu sa' nij so', qui'yaj Jesucristó a. <sup>19</sup> Gaa ne guun rá cunudanj nij yuvii cano ra'a nij so' xraá Jesucristó che'é se cavii ndo'o se nucuaj man Jesucristó, ne nahuun sa' cunudanj nij yuvii, qui'yaj Jesucristó a.

*Nana nihánj taj xna'anj me yuvii cavii sa' doj ne me yuvii quiran' sayuun a*

<sup>20</sup> Gaa ne naxcaj Jesucristó rihaan so' ni'yaj so' man nij sí tucu'yón se-nana so', gaa ne cataj so':

—Cavii sa' taran' soj sij nique, ne soj me sí cayáan ga Diose gaa güii guun chij Diose rihaan chumii nihánj adonj.

<sup>21</sup> "Cavii sa' taran' soj sij na'aaan rque cuano adonj. Vaa güii quirí' soj se cha soj adonj.

"Cavii sa' taran' soj sij ta'vee cuano adonj. Vaa güii ca'nga' ndo'o soj adonj.

<sup>22</sup> "Ne cavii sa' ndo'o soj sese quitaj ri'yunj yuvii man soj do', sese quirii yanij yuvii man soj do', sese ca'mii yuvii nana nij rihaan soj do', sese nachri' yuvii ni'yaj yuvii man soj se vaa sij chi'ii me soj do', che'é se me soj sí nocó' manj sij ca'née Diose nicaj yu'unj man yuvii adonj. Ne quene'en soj se vaa ya cavii sa' soj adonj. <sup>23</sup> Gaa ne güii quiran' soj danj me se no xcúun soj guun niha' uxrá rá soj ne güej ndo'o soj, che'é se uxrá naru'vee Diose rihaan soj asa' cuchí' soj rej xta' adonj. 'O se ase vaa 'yaj nij yuvii man soj ro', ta'nga' danj qui'yaj xii nij yuvii man nij sí nata' se-nana Diose gaa naá uún adonj.

<sup>24</sup> "Tzaj ne nique ndo'o soj sij ru'vee nanj á. Soj sij ru'vee me se aj quiri' soj nu' se sa' nicaj soj, ne taj vaj doj se sa' rque Diose man soj a ma'.

<sup>25</sup> "Nique soj sij vaa raan rque cuano nanj á. Vaa güii quina'aaan rque soj adonj.

"Nique soj sij a'nga' cuano nanj á. Vaa güii quinano ndo'o rá soj do', ta'vee soj do', adonj.

<sup>26</sup> "Ne nique soj sij ve'é inanj a'mii cunudanj yuvii che'é nanj á. 'O se ase vaa ve'é inanj a'mii nij yuvii che'é soj ro', ta'nga' danj ca'mii xii nij yuvii che'é nij sí tiha' yu'unj se vaa sij nata' se-nana Diose me nij so' gaa naá a —taj Jesucristó rihaan cunudanj nij sí tucu'yón se-nana so' a.

*Nana nihánj taj xna'anj se vaa gaa 'ee rá ní' man nij sí taj ri'yunj man ní' a*

<sup>27</sup> Canicaj Jesucristó, cataj so' a:

—Tzaj ne rihaan soj sij man nanó xrej ro', cataj xna'anj 'unj se vaa gaa 'ee rá soj man nij sí taj ri'yunj ni'yaj man soj, ne qui'yaj soj se luj che'é nij sí nachri' ni'yaj man soj ei. <sup>28</sup> Ve'é

ca'mii soj rihaan nij sí a'mii quij rihaan soj, ne cachinj ni'yaj soj rihaan Diose che'é nij sí 'yaj se nij man soj a. <sup>29</sup> Sese vaa sí coxro nichrej xruú so', ne ca'ne' rá so' coxro so' nichrej xruú so' uún a. Sese vaa sí ca'néj se-roto so', ne ca'ne' rá so' ca'nee so' se-cotoó so' uún a. <sup>30</sup> Ne me ma'an yuvií achíin ni'yaj rasuun rihaan soj, ne go' soj rasuun yo' man nij so' ei. Sese vaa yuvií ca'néj si'yaj soj, ne se nachin' soj si'yaj soj ma'. <sup>31</sup> Dan me se daj se uun rá soj qui'yaj sa' yuvií rihaan soj ro', ta'nga' danj qui'yaj sa' soj rihaan yuvií a.

<sup>32</sup> "Dan me se gaa 'ee rá soj man cunudanj yuvií ei. Sese 'ee rá soj man inanj nij sí 'ee rá man soj, gaa ne me che'é naru'vee Diose rihaan soj, rá soj ga. 'O se ndaa nij sí chi'ii ro', 'ee rá nij so' man nij sí 'ee rá man nij so' nanj á. <sup>33</sup> Ne qui'yaj soj se luj rihaan cunudanj yuvií ei. 'O se sese qui'yaj soj se luj rihaan inanj sí 'yaj se luj rihaan soj, gaa ne me che'é naru'vee Diose rihaan soj, rá soj ga. 'O se ndaa nij sí chi'ii ro', 'yaj nij so' se luj rihaan tuvi' nij so' sij 'yaj se luj rihaan nij so' nanj adonj. <sup>34</sup> Me ma'an yuvií racuíj soj sa'anj, ne se guun rá soj nacaj uún soj se-sa'anj soj ma'. Sese racuíj soj sa'anj man inanj sí naru'vee rihaan soj, gaa ne me che'é naru'vee Diose rihaan soj, rá soj ga. 'O se ndaa ma'an nij sí chi'ii ro', racuíj nij so' sa'anj man nij tuvi' so' sij naru'vee rihaan so' adonj.

<sup>35</sup> "Dan me se gaa 'ee rá soj man nij sí taj ri'yunj ni'yaj man soj, ne qui'yaj soj se luj rihaan nij sí nachri' man soj, ne racuíj soj sa'anj man yuvií, ne se guun rá soj nacaj uún soj se-sa'anj soj ma'. Ne vaa güii, ne narque uxrá Diose se sa' man soj, ne ta'níi Diose sí sa' ndo'o me soj gaa adonj. 'O se Diose me sí 'yaj se luj rihaan ndaa sí ne ne'en me se uun se luj do', rihaan ndaa sí chi'ii do', adonj. <sup>36</sup> Ase vaa 'ee rá Rej ní' Diose man daj a nij yuvií ro', danj gaa 'ee rá soj man daj a nij yuvií uún adonj. —Danj cataj Jesucristó

rihaan nij sí tucu'yón se-nana so' a.

*Nana nihánj taj xna'anj daj qui'yaj ní' gaa ca'mii ní' ga tinúú ní' che'é cacun' tumé tinúú ní' a*

<sup>37</sup> Ne canicaj Jesucristó cataj so' a:

—Se guun niha' rá soj cuta' soj cacun' xráá tinúú soj, gaa ne taj cacun' cuta' Diose xráá ma'an soj man adonj. Maan se caraa x'naa soj rihaan tinúú soj, ne caraa x'naa Diose rihaan ma'an soj uún adonj. <sup>38</sup> Go' soj rasuun man tuvi' soj, ne Diose me sí narque rasuun rihaan soj uún adonj. So' me sí sa' ndo'o rá, ne adi' se 'yaj sí sa' rá tu'vej 'núú ne araa navii so' rihaan tanej ro', danj qui'yaj guee Diose ga soj, ne doj a narque Diose rasuun sa' man soj adonj. Ase vaa 'yaj guee soj ga tuvi' soj ro', danj qui'yaj guee Diose ga soj uún adonj. —Danj cataj Jesucristó rihaan nij sí tucu'yón se-nana so' a.

<sup>39</sup> Gaa ne nanó Jesucristó se-cuento roj sí tuchrii rihaan nij sí tucu'yón se-nana so' a:

—Ne ca'vee tihaa 'o sí tuchrii chrej rihaan tuvi' tuchrii so', rá soj na'. Taj ma'. Sese danj qui'yaj so', gaa ne quinij roj so' rá yu'uj nanj adonj. <sup>40</sup> Danj nanj uún, ne 'o xnii tucu'yón se guun nucuaj so' quene'en so' doj rihaan se-maestro so' ma'. Ne ca'vee se uxrá tucu'yón so', tzaj ne veé ase vaa ne'en se-maestro so' ro', veé danj quene'en ma'an so' nanj adonj. <sup>41</sup> Me che'é guun chree rá so' ni'yaj so' ni'ya nuu rihaan tinúú so' ga. Ne ne ni'yaj so' chruun manj nuu rihaan ma'an so' a. <sup>42</sup> Asa' ca'vee cataj so' rihaan tinúú so': "Rque so' rihaan so' quirii 'unj ni'ya á". Se guun a doj cataj so' danj tihá' so' man tinúú so' ma'. Asino quirii so' chruun manj nuu rihaan so', gaa ne aj ruvi' sa' rihaan so', gaa ne ca'vee quirii so' ni'ya nuu rihaan tinúú so' adonj. Dan me se ase vaa aráán ni'ya rihaan yuvií ro', danj vaa aráán rihaan yuvií 'yaj cacun' ata yuvií ne na'vee xcaj sa' nij yuvií cuentá man adonj —taj Jesucristó rihaan nij sí tucu'yón se-nana so' a.

*Nana nihánj taj xna'anj se vaa ase vaa nimán yuvii ro', danj vaa a'mii yuvii a*

<sup>43</sup> Gaa ne canicaj Jesucristó, cataj so':

—Chruun sa' ro', se guun cumán chruj nij raá ma'. Ne chruun nij ro', se guun cumán chruj sa' raá ma'. Ase vaa chruun yo' ro', danj vaa nimán yuvii, ne ase vaa chruj yo' ro', danj vaa se vaa 'yaj nij yuvii adonj. <sup>44</sup> Maan chruj man raá chruun ro', 'yaj ne'en ní' daj chruun me yo' adonj. Taj rutzi' mán raá chruun tanj yangij ma'. Ne taj rcoo mán raá chruun tanj xcuaa ma'. <sup>45</sup> Dan me se sí sa' ro', man ndo'o se sa' nimán so', ne a'mii so' inanj nana sa' adonj. Sí chi'ii ro', man ndo'o se quij nimán so', ne a'mii so' inanj nana chi'ii adonj. 'O se ase vaa se man nimán yuvii ro', danj vaa nana a'mii yuvii nanj á —taj Jesucristó rihaan nij sí tucu'yón se-nana so' a.

*Nana nihánj taj xna'anj se vaa ase vaa sí 'yaj ve' sa' ro', danj vaa sí uno sa' rihaan Jesucristó a*

<sup>46</sup> Canicaj Jesucristó, cataj so' nana nihánj a:

—Me che'é taj soj se vaa sí 'nij ra'a man soj mej, tzaj ne ne uno soj rihanj ga. Ne chihan' 'yaj soj ma'. <sup>47</sup> Cuanó nihánj me cataj xna'anj 'unj rihaan soj daj sij me sí 'na' nanó xrej nana a'mij, ne 'yaj so' ndaa vaa taj se-nanaj a. <sup>48</sup> Ase vaa 'o sí cune' ve' tucua' rihaan 'o yuvej vaa so' a. Cunuú ndo'o váán so' rej cuchruj so' tacóo ve', ne raan ndo'o yáán ve', 'yaj so' a. Ca'vee se maan nana yuvaa curihanj go' xraá ve', ne ca'vee se cavii chraá, ne ca'na' na xee go' na xee tacóo ve', tzaj ne se naxru' ve', qui'yaj na xee ma'. Danj vaa sí uno se-nanaj a. <sup>49</sup> Tzaj ne ino vaa sí nanó xrej nana a'mij tzaj ne ne 'yaj ndaa vaa taj se-nanaj ma'. Ase vaa 'o sí 'yaj ve' nij vaa so' a. Ne váán cunuú so' rej cuchruj so' tacóo ve' rihaan yo'óo ma'. Che'é dan yáán cuan' uun tucua' so' a. Sese curihanj maan nana yuvaa, ne go' yo' xraá ve', ne sese cavii chraá, ne ca'na' na xee

go' na xee tacóo ve', gaa ne canee guee ve' nanj á. Nu' canee ve' yo', ne daj chihaa míj se cunuú sa' yo' a ma'. Danj vaa sí ne uno se-nanaj adonj —taj Jesucristó rihaan nij sí tucu'yón se-nana so' a.

## 7

*Nana nihánj taj xna'anj se vaa nahuun se-mozó tanuu capitán, qui'yaj Jesucristó a*

<sup>1</sup> Quisij ca'mii Jesucristó nu' nana yo' cuno nij yuvii, gaa ne ca'anj so' chuman' Capernaum a. <sup>2</sup> Dan me se yáán 'o tanuu capitán chuman' yo', ne sí rii ta'nga' rihaan 'o cientó tanuu me so' a. Ne vaa 'o se-mozó so' sí 'ee uxrá rá so' man, ne ran' uxrá mozó yo', ne daj doj caví' so' a. <sup>3</sup> Dan me se cuno tanuu capitán se vaa ca'na' Jesucristó chuman' yo', ne ca'née so' doj sí uun chij rihaan nij yuvii israelitá cuchí' nij so' rihaan Jesucristó, ne cachinj ni'yaj nij so' rihaan Jesucristó se vaa ca'na' so' tinahuun so' se-mozó tanuu capitán yo' a. <sup>4</sup> Dan me se cuchí' nij sí uun chij yo' rihaan Jesucristó, gaa ne cachín ni'yaj uxrá nij so' rihaan Jesucristó, cataj nij so':

—Sí sa' me tanuu capitán yo', ne che'é dan vaa che'é racuíj so' man so' adonj. <sup>5</sup> 'Ee rá so' man ní' sij israelitá, ne ma'an so' qui'yaj ve' nuu chre' núj tucu'yón núj se-tucuanj Moisés adonj —taj nij so' rihaan Jesucristó a.

<sup>6</sup> Ne ca'anj Jesucristó ga nij so', ne daj doj cuchí' nij so' ve', gaa ne ca'née tanuu capitán man tuvi' so' ca'anj caran' man Jesucristó, ne cataj nij so':

—Se caraya'áán so', man maestro. 'O se nuveé sij sa' me so', taj so' ma'. Ne nó xcúún so' catuú so' rá ve' tucua' so', taj so' ma'. <sup>7</sup> Che'é dan ne quisij rá ma'an so' ca'na' so' rihaan so', taj so' ma'. Maan se ca'ne' uun so' suun se vaa nahuun se-mozó so', gaa ne nahuun ma'an se-mozó so', taj so' nanj á. <sup>8</sup> Ne cataj so' se vaa vaa sí rii ta'nga' rihaan so', ne rii ta'nga' so' rihaan tanuu, ne taj xna'anj so' rihaan tanuu se vaa ca'anj nij so', ne 'anj nij so', ne taj xna'anj so' rihaan



nij tanuu se vaa ca'na' nij so', ne 'na' nij so' rihaan so', ne taj xna'anj so' daj qui'yaj nij tanuu, ne veé danj 'yaj nij tanuu adonj. Ne ne'en so' se vaa ase vaa rii ta'nga' so' rihaan nij tanuu noco' man so' ro', danj rii ta'nga' guee so' rihaan chi'ij anó man yuvij, taj so' nanj á —taj nij tuvi' tanuu capitán rihaan Jesucristó a.

<sup>9</sup> Dan me se gaa cuno Jesucristó nana ca'mii tuvi' tanuu capitán yo', ne ca'anj rá Jesucristó, ne canicaj so' cataj so' rihaan nij sí noco' rej xco' so' a:

—Cuanó nihánj me cataj xna'anj 'unj rihaan soj se vaa taj vaj a 'ó rej ne narij man yo'ó sí israelitá síi cuchumán ndo'o rá nana a'mii 'unj ndaa vaa amán rá tanuu capitán nihánj a ma' —taj Jesucristó rihaan nij so' a.

<sup>10</sup> Dan me se canicaj uún nij tuvi' tanuu capitán ca'anj nij so' tucua' so', ne gaa cuchi' nij so', ne aj nahuun se-mozó tanuu capitán yo', qui'yaj Jesucristó a.

*Nana nihánj taj xna'anj se vaa cunuu i'na' uún ta'nii 'o chana cavi' nica, qui'yaj Jesucristó a*

<sup>11</sup> Dan me se cachén doj güii, gaa ne ca'anj Jesucristó chuman' cu'naj Naín ga nij síi tucuyón se-nana so' ga 'o x'ne' nocoo yuvij a. <sup>12</sup> Quinichrun' nij so' tu'va chuman', gaa ne dan me se nari' tuvi' Jesucristó ga nij síi ca'anj cachin' 'o xngá a. Ne síi cavi' me se orún' so' me ta'nii chana cavi' nica, ne vaj 'o x'ne' nocoo yuvij man chuman' yo' ga nii so' rihaan santó a. <sup>13</sup> Dan me se quene'en Jesucristó man chana yo', gaa ne cunuu 'ee rá so' man no', gaa ne cataj so':

—Se ta'veé so' ma' —taj so' a.

<sup>14</sup> Gaa ne dan me se ca'anj Jesucristó canó ra'a so' man chruún taj xngá, gaa ne canicun' nij síi taj chihá xngá a. Gaa ne cataj Jesucristó rihaan síi cavi' a:

—Cunó so' a'mij, ne naxagaa so', xnii —taj Jesucristó rihaan síi cavi' yo' a.

<sup>15</sup> Gaa ne cunuu i'na' ya uún xnii, ne naxagaa so', gaa ne guun che'e xnii ca'mii so' a. Gaa ne:

—Nihánj 'na' ta'nii so' á —taj Jesucristó rihaan nii xnii a.

<sup>16</sup> Gaa ne dan me se ca'anj rá taran' nij yuvij se vaa qui'yaj Jesucristó, gaa ne guun niha' rá nij so' se vaa ve'é qui'yaj Diose, gaa ne canicaj nij so' cataj nij so' se vaa ca'née Diose 'o síi nata' se-nana so' rihaan nij so' a. Ne cataj uún nij so' se vaa ca'na' Diose racuj so' man nij so' sij noco' man Diose a.

<sup>17</sup> Gaa ne cuchi' nana rihaan nij yuvij man estadó Judea do', rihaan nu' nij yuvij man anicaj estadó Judea che'é se vaa qui'yaj Jesucristó a.

*Nana nihánj taj xna'anj che'é nana ca'mii Jesucristó che'é síi cu'naj Juan síi cuta' ne man yuvij a*

<sup>18</sup> Dan me se cuno nij síi tucuyón se-nana Juan nu' se vaa qui'yaj Jesucristó, gaa ne cataj xna'anj nij so' rihaan Juan a. Gaa ne canacúún Juan man vij síi tucuyón se-nana so' ca'na' roj so' rihaan so', gaa ne dan me se ca'née so' man roj so' cuchi' roj so' rihaan síi 'nij ra'a man ní' a. <sup>19</sup> Ne nana nihánj ro', xna'anj roj so' man Jesucristó, taj síi cu'naj Juan rihaan roj so' a: “So' me síi ca'na' tinanii man yuvij rihaan sayuun na'. Ase na'vij ní ca'na' yo'ó so' xa'”. Dan me nana me rá síi cu'naj Juan xna'anj roj so' man Jesucristó a. <sup>20</sup> Dan me se cuchi' roj so' rihaan Jesucristó, ne cataj roj so':

—Vij ran' rój me síi ca'née Juan síi uta' ne man yuvij ca'na' rihaan so' a. Me rá Juan quene'en so' sese ma'an so' me síi ca'na' tinanii man yuvij rihaan sayuun ní', ase na'vij ní ca'na' yo'ó so' a —taj roj so' rihaan Jesucristó a.

<sup>21</sup> Gaa ne veé maan orá ca'na' roj síi ca'née Juan man ro', nahuun que'ee ndo'o síi ran' do', curihanj nana chree nimán que'ee yuvij do', nachuguun rihaan que'ee síi tuchrij do', qui'yaj Jesucristó a. <sup>22</sup> Gaa ne

cataj xna'anj Jesucristó rihaan roj so' a:

—Cavii roj soj cuchii' uún roj soj rihaan síi cu'naj Juan, ne cataj xna'anj roj soj rihaan so' nu' nana cuno roj soj do', nu' se vaa quene'en roj soj do' á. Dan me se nij síi tuchrii ro', naxra' rihaan, ne nij síi na'vee cachee ro', chéé nij so', ne nij síi ran' luj ri'yuj ro', nahuun sa', ne nij síi so'o ro', nachuguun xrée nij so', ne nij síi cavi' ro', cunuu i'na' uún, ne nij síi nique ro', uno nij so' nana sa' a. Nu' nihánj cataj xna'anj roj soj rihaan síi cu'naj Juan yo' á. <sup>23</sup> Ne cataj uún roj soj rihaan síi cu'naj Juan se vaa cavii sa' so' qui'yaj Diose, sese se guun na'aj so' ni'yaj so' manj a. Danj ca'mii roj soj rihaan síi cu'naj Juan yo' ei —taj Jesucristó rihaan roj síi tucu'yón se-nana Juan yo' a.

<sup>24</sup> Dan me se gaa ca'anj roj síi ca'anj suun che'é Juan, gaa ne guun che'e Jesucristó ca'mii so' rihaan cunudanj nij yuvii che'é síi cu'naj Juan síi cuta' ne man yuvii a:

—Asij ca'anj soj rej tacaan quene'en soj man síi cu'naj Juan ro', ne daj gaa so' quene'en soj, rá soj ga. Ase vaa yo'o rcoo naan ndo'o 'yaj nana vaa so', rá soj na'. Guun vij nimán so' che'é tucuaán noco' so', rá soj na'. Taj ma'. <sup>25</sup> Maan se daj gaa so' rá soj, asij ca'anj soj quene'en soj man so' ga. Sij nuu yatzij laruu ndo'o me so', rá soj na'. Taj ma'. 'O se nij síi nuu yatzij sa' ndo'o do', nij síi utun' ndo'o sa'anj do', yanj rá ve' tucua' síi nicaj suun rey adonj. <sup>26</sup> Maan se daj gaa síi cu'naj Juan rá soj, asij ca'anj soj quene'en soj man so' ga. Sij nata' se-nana Diose me so', rá soj na'. Ya uxrá ei. Ne cataj xna'anj 'unj rihaan soj se vaa sa' doj vaa so' rihaan cunudanj nij síi nata' se-nana Diose adonj.

<sup>27</sup> 'O se nana nihánj nana no rihaan danj Diose ro', taj xna'anj che'é síi cu'naj Juan a: “Vaa síi ca'anj suun che'é 'unj, ne ca'nej 'unj man so' quitaj yaan so' rihaan so', ne nuchran' nimán yuvii ve'é ca'mii nij

yuvii ga so', qui'yaj so' a”. Danj taj danj Diose che'é síi cu'naj Juan se vaa nuchran' nimán yuvii ve'é ca'mii nij yuvii ga síi ca'na' tinanii man nij yuvii rihaan sayuun, qui'yaj so' a. Ne danj qui'yaj so' adonj.

<sup>28</sup> ”Cuanō nihánj me se cataj xna'anj 'unj rihaan soj se vaa sij sa' doj rihaan cunudanj nij yuvii man rihaan chumii me síi cu'naj Juan a. A 'ó yuvii ne vaa sa' doj rihaan so' ma'. Tzaj ne cuanō ro', uun chij Diose nimán yuvii man rihaan chumii nihánj, ne naj guun yuvii guun chij Diose nimán ro', me síi sa' doj rihaan síi cu'naj Juan a. —Danj cataj Jesucristó rihaan nij yuvii yo' a.

<sup>29</sup> Dan me se nu' nij yuvii man ne ndaa nij síi a'nej puextó ro', gaa cuno nij so' se-nana Jesucristó, ne cataj nij so' se vaa sa' uxrá qui'yaj Diose a. 'O se sij cata' ne qui'yaj Juan me nij so' a.

<sup>30</sup> Ne nij síi naqui'yaj cuu se-tucuanj Moisés do', nij síi fariseo do', ne ca'vej rá nij so' cuno nij so' daj me rá Diose qui'yaj Diose che'é nij so' ma'. 'O se nuveé sij cata' ne qui'yaj Juan me nij síi na'vej rá ma'.

<sup>31</sup> Gaa ne cataj uún Jesucristó rihaan nij yuvii a:

—Ne daj vaa nij soj sij man rihaan chumii nihánj cuanō, rá soj ga. Dan me se cataj xna'anj 'unj rihaan soj ei.

<sup>32</sup> Ase vaa xnii ca'anj rihaan yu'vee ne tico ga tuvi' ro', vaa soj sij man rihaan chumii nihánj adonj. Dan me se yáan nij xnii yo' rihaan yo'óó, ne aguáj nij xnii rihaan tuvi' xnii, taj nij xnii: “Nicaj núj rihuu núj, go' núj chra' choco', tzaj ne me che'é ne ra'anj soj ga. Ne go' núj chra' xngá, tzaj ne me che'é ne ta'vee soj ga. Me che'é ne tico soj ga núj ga”, taj nij xnii rihaan tuvi' nij so' a. <sup>33</sup> 'O se ca'na' Juan síi cuta' ne man yuvii, gaa ne ne cha' so' chraa do', ne co'o so' na vinó ga tuvi' so' do', gaa ne che'é dan taj soj se vaa nuu nana chree nimán so', taj soj a. <sup>34</sup> Ne ca'ná' 'unj sij ca'neé Diose nicaj yu'unj man yuvii, gaa ne niha' rá 'unj chá 'unj do', co'o 'unj do',

gaa ne che'é dan taj uún soj se vaa síí cachén chá do', síí cachén co'lo do', mé 'unj, taj uún soj a. Ne taj uún soj se vaa tuví' 'unj me síí tiha' yu'unj man yuvií che'é puextó do', yo'ó nij síí tumé cacun' do', taj soj a. Danj tu'va soj, tzaj ne ne ne'en uxrá soj ma'. <sup>35</sup> Sese xcaj soj cuentá daj vaa 'yaj rój, ne guun ya rá soj se vaa sij cuu raá me rój ga síí cu'naj Juan yo' adonj —taj Jesucristó rihaan nij yuvií a.

*Nana nihánj taj xna'anj se vaa na'nu' 'o chana tacóo Jesucristó a*

<sup>36</sup> Dan me se canacúun 'o síí fariseo man Jesucristó chá Jesucristó chraa tucua so', gaa ne ca'anj cayáan Jesucristó tucua so' chá so' chraa a. <sup>37</sup> Ne dan me se yáan 'o chana niha' rá ga chíi chuman' yo', gaa ne cuno no' nana se vaa cuchí' Jesucristó chá so' chraa tucua síí fariseo yo', gaa ne che'é dan nicaj no' 'o aga' catzií ve'é ndo'o vaa nuu casté gun' daj, ca'anj no' tucua síí fariseo yo' a. <sup>38</sup> Gaa ne ca'anj cané ruj no' nichrun' tacóo Jesucristó, ne ta'vee uxrá no', ne na'nu' no' na rihaan no' tacóo Jesucristó a. Gaa ne maan yuvé raá no' na've no' tacóo Jesucristó a. Cachrón tu'va no' tacóo Jesucristó, gaa ne caxrój no' casté gun' daj tacóo so' uún a. <sup>39</sup> Dan me se gaa quene'en síí tucua se vaa qui'yaj chana man Jesucristó, gaa ne guun rá so' nana nihánj ni'yaj so' man Jesucristó a: “Sese ya sij nata' se-nana Diose me síí nihánj, ne aj ne'en so' daj chana me chana nihánj, se vaa chana atá cacun' me no', ne ne ca'vej rá so' qui'yaj no' danj ga so' tzaj man adonj”, guun rá síí tucua yo' a. <sup>40</sup> Gaa ne cataj Jesucristó rihaan so' a:

—Vaa nana me raj cataj 'unj rihaan so', Simón —taj Jesucristó rihaan so' a.

—Ca'mii so', maestro —taj síí tucua yo' a.

<sup>41</sup> Gaa ne nanó Jesucristó se-cuento vij síí 'yaj xcúun a:

—Vij síí 'yaj xcúun sa'anj rihaan 'o ru'vee me roj so' a. 'O so' ro', 'yaj xcúun 'un' cientó sa'anj denario, ne yo'ó so' ro', 'yaj xcúun vij chihaa chí'

sa'anj denario a. <sup>42</sup> Tzaj ne taj sa'anj rihaan roj so' naru'vee roj so' rihaan ru'vee, gaa ne che'é dan cunuu 'ee rá ru'vee man roj so', ne quinavij un xcúun xráá roj so', qui'yaj ru'vee a. Me tuví' roj so' caran' doj rá ni'yaj man ru'vee, rá so' ga —taj Jesucristó, xna'anj so' man síí cu'naj Simón yo' a.

<sup>43</sup> —Caran' doj rá síí navij nocoo doj xcúun xráá ni'yaj so' man ru'vee, che'é rej nocoo doj se luj qui'yaj ru'vee che'é so', raj a —taj síí cu'naj Simón yo' a.

—Veé danj vaa ya —taj Jesucristó rihaan so' a.

<sup>44</sup> Gaa ne canicaj Jesucristó ni'yaj Jesucristó man chana, gaa ne cataj so' rihaan síí cu'naj Simón yo' a:

—Xcaj so' cuentá se vaa qui'yaj chana nihánj ei. Ca'ná' 'unj tucua so', tzaj ne taj na rqué so' na'nuj tacój ma'. Tzaj ne chana nihánj me níí na'nu' na rihaan no' tacój, ne maan yuvé raá no' na've no' tacój nanj á. <sup>45</sup> Ca'naj tucua so', tzaj ne ne cachron tu'vá so' ra'aj ma'. Tzaj ne chana nihánj ro', nu' catúj 'unj rá ve', ne nu' cachrón tu'va no' tacój, ne veé 'o achrón tu'va no' tacój nanj á. <sup>46</sup> Taj vaj casté caxrój so' raj ma'. Tzaj ne chana nihánj me níí caxrój casté gun' daj tacój adonj. <sup>47</sup> Cuno so' ca'mij á. Ase vaa síí navij un xcúun 'un' cientó sa'anj denario xráá ro', danj vaa no' a. 'O se nda' se níí tumé uxrá cacun' me no', tzaj ne che'é se caraya'anj ndo'o no' ni'yaj no' manj ro', che'é dan ne'en ní' se vaa x'néj nu' cacun' xráá no' nanj adonj. Ne xa' síí x'néj doj cacun' xráá, tzaj ne doj araya'anj so' ni'yaj so' manj nanj adonj —taj Jesucristó rihaan síí cu'naj Simón yo' a.

<sup>48</sup> Gaa ne cataj Jesucristó rihaan chana yo' a:

—Navij cacun' tumé so' ei —taj Jesucristó rihaan no' a.

<sup>49</sup> Gaa ne guun che'e nij síí chá chraa tucua Simón ca'mii nij so' ga tuví' nij so', cataj nij so' a:

—Daj sij me síi nihánj, ne sítj rá so' cataj so' se vaa navij cacun' xráá yuvii, rá soj gá —taj nij so', xná'anj nij so' man tuví' nij so' a.

<sup>50</sup> Tzaj ne canicaj uún Jesucristó, cataj so' rihaan chana a:

—Quinaniij so' rihaan sayuun, che'é se amán rá so' ni'yaj so' manj adonj. Ve'é ca'anj so', ne dínj gaa nimán so' á —taj Jesucristó rihaan chana yo' a.

## 8

*Nana nihánj taj xna'anj che'é nij chana racuj man Jesucristó a*

<sup>1</sup> Dan me se cachén doj güii, gaa ne ca'anj Jesucristó que'ee chuman', ca'mii natáj so' rihaan yuvii che'é güii guun chij Diose rihaan chumii nihánj, ne ca'anj chuvij nij síi tucu'yón se-nana so' ga so' a. <sup>2</sup> Ne ca'anj chana nahuun sa' qui'yaj Jesucristó ga nij so' a. Dan me se ta'aj no' me níi nahuun qui'yaj Jesucristó, ne yo'ó ta'aj no' me níi curihanj nana chree nimán qui'yaj Jesucristó a. Chana cu'naj Mariá Magdalena me 'o no', ne no' me níi curihanj chij nana chree nimán qui'yaj Jesucristó a. <sup>3</sup> Ne yo'ó no' ro', me níi cu'naj Juana, ne nica no' ro', me síi cu'naj Chuza síi nicun' rihaan síi nicaj suun rey cu'naj Herodes a. Ne yo'ó chana ca'anj ga Jesucristó ro', me níi cu'naj Susana a. Ne vaa que'ee doj nij chana ca'anj ga nij so' a. Nu' nij chana nihánj ro', me níi racuj man nij tuví' Jesucristó se vaa rqué nij no' si'yaj nij no' rasuun cachiin man nij tuví' Jesucristó a.

*Nihánj me cuentó nanó Jesucristó che'é 'núú trigó tix'nuu yo'o so' a*

<sup>4</sup> Dan me se cavii que'ee ndo'o nij yuvii daj a chuman', ca'anj ni'yaj nij so' man Jesucristó, ne dan me se quisíj cunuu chre' nij yuvii, gaa ne guun che'e Jesucristó nanó so' se-cuento 'núú trigó rihaan nij so' a.

<sup>5</sup> Cataj Jesucristó nana nihánj a:

—Dan me se curihanj 'o síi me rá cuchruj naa 'núú trigó, ne tix'nuu so' 'núú trigó rihaan yo'ó, ne cayuu doj

'núú trigó yo' rá chrej chéé yuvii, ne curu'maan che'é yuvii man yo', ne ca'na' xtâj, chá xtâj man 'núú trigó naj rá chrej yo', ne dan me se navij nu' 'núú trigó yo', qui'yaj nij xtâj nanj adonj. <sup>6</sup> Ne yo'ó ta'aj 'núú trigó yo' ro', cayuu rihaan yuvej rej taj catun' yo'ó a. Xra' 'núú, tzaj ne cuchrii naa le'ej che'é se taj nocoo 'yoo táá xráá yuvej yo' nanj adonj. <sup>7</sup> Ne yo'ó ta'aj 'núú trigó yo' ro', cayuu sca'núj coj tanj, ne dan me se yoo doj cachij coj tanj yo' rihaan naa le'ej, ne quinavij nu' naa le'ej, qui'yaj coj tanj nanj adonj. <sup>8</sup> Ne yo'ó ta'aj 'núú trigó yo' ro', cayuu rihaan yo'ó sa', ne naa yo' ro', cachij sa', ne cientó ya' 'núú cavii, qui'yaj 'o 'o 'núú le'ej nii quiniij rihaan yo'ó sa' yo' nanj adonj. —Danj cataj Jesucristó rihaan nij so' a.

Gaa ne guun che'e so' ca'mii nucuaj so', cataj so':

—Sese taj yu'uj xréé soj, ne cunó soj nana nihánj ei —taj Jesucristó rihaan nij so' a.

*Nana nihánj taj xna'anj me che'é nanó ndo'o Jesucristó cuentó che'é nij rasuun rihaan nij yuvii a*

<sup>9</sup> Gaa ne xná'anj nij síi tucu'yón se-nana Jesucristó man so' me che'é nanó so' cuentó che'é 'núú trigó yo' a. <sup>10</sup> Gaa ne cataj Jesucristó rihaan nij so' a:

—Xa' soj, tzaj ne tihaan Diose nana rihaan soj daj qui'yaj Diose gaa guun chij Diose rihaan chumii nihánj adonj. Tzaj ne rihaan yo'ó nij yuvii me se inanj cuentó che'é nij rasuun nanó 'unj rihaan nij so', gaa ne ni'yaj nij so' do', nana xrej nij so' do', tzaj ne se quene'en nij so' do', se xcaj nij so' cuentá do', a man adonj —taj Jesucristó rihaan nij síi tucu'yón se-nana so' a.

*Nana nihánj taj xna'anj me taj se-cuento 'núú trigó yo' a*

<sup>11</sup> Canicaj Jesucristó, cataj so':

—Nihánj me cataj xna'anj 'unj che'é se-cuento 'núú trigó, ne ase vaa 'núú trigó yo' ro', danj vaa se-nana Diose adonj. <sup>12</sup> Ne ase vaa 'núú



cayuu rá chrej ro', danj vaa ta'aj nij sí uno se-nana Diose, ne dan me se uno nij so' doj tzin', tzaj ne 'na' sí chree, ne a'néj sí chree se-nana Diose nimán nij so' che'é se na'vej rá sí chree cuchuman rá nij so' ne quinaniij nij so' rihaan sayuun qui'yaj Diose adonj. <sup>13</sup> Ne ase vaa ta'aj 'núú trigó cayuu rihaan yuvej ro', danj vaa yo'ó ta'aj nij sí uno se-nana Diose, ne uun niha' rá nij so', ne doj orá nii gaa chumán xa' rá nij so', tzaj ne nu' 'na' sayuun rihaan nij so', ne nu' tanáj nij so' se-nana Diose, ne ne noco' raan nij so' se-nana Diose ma'. <sup>14</sup> Ne ase vaa ta'aj 'núú cayuu sca'núj tanj ro', danj vaa yo'ó ta'aj nij sí uno se-nana Diose uún, ne dan me se achén güii, gaa ne anicaj nij so' niganj nanó rá nij so' che'é rasuun achiin man nij so' do', che'é sa'anj do', che'é se niha' ndo'o vaa rasuun man rihaan chumiij nihánj rá nij so' do', ne che'é dan me tanáj xcó nij so' se-nana Diose, ne ne 'yaj nij so' se sa' a ma'. <sup>15</sup> Ne yo'ó ta'aj nij sí uno se-nana Diose me se ase vaa 'núú cayuu rihaan yo'ó sa' ne sa' uxrá cachij yo' ro', danj vaa sí sa' uno se-nana Diose, ne sa' uxrá vaa nij so', ne ve'é nanó xrej nij so' se-nana Diose, ne noco' raan nij so' se-nana Diose, ne inanj se sa' 'yaj nij so', ne ne a'ne' rá nij so' ga' se-nana Diose ma' —taj Jesucristó rihaan nij sí tucu'yón se-nana so' a.

*Nihánj me cuentó nanó Jesucristó che'é aga' ya'an a*

<sup>16</sup> Dan me se guun che'e Jesucristó cataj so':

—Nuvi' a 'ó sí achrón ya'an raa aga' ya'an, ne axrój yuve so' aga' rque xruj do', rque yuvéé do' ma'. Tananj toco' nii aga' ya'an rej xta', gaa ne chuguun yo' rihaan cunudanj nij sí atúj rá ve' adonj. <sup>17</sup> Dan me se a 'ó rasuun caxrój yuve yuvij se qui'nij yuve ma'. Ya nurihanj yo', vaa güii, ne cunudanj yuvij quene'en, vaa güii adonj. <sup>18</sup> Che'é dan nuchruj raa soj nana ca'mij nihánj ei. 'O se sí nari' nana ro', doj a nari' so', qui'yaj Diose,

ne sí na'vej rá nari' sa' nana ro', tananj doj a ca'nee Diose nana nari' so' man so', ne quinaj uun so' nanj adonj —taj Jesucristó rihaan nij so' a.

*Nana nihánj taj xna'anj se vaa ase vaa nii Jesucristó do', ase vaa tinúú Jesucristó do', vaa nij sí uno se-nana Diose a*

<sup>19</sup> Dan me se cuichi' nii Jesucristó cuichi' nij tinúú Jesucristó cuichi' ndaa rej vaj Jesucristó, tzaj ne ne ca'vee quinichrun' nij so' rihaan Jesucristó, che'é se man ndo'o yuvij a. <sup>20</sup> Ne cataj 'o so' rihaan Jesucristó a:

—Nicun' ní so' nicun' tinúú so' nicun' xe', ne me rá nij so' quene'en nij so' man so', Jesús —taj so', cataj xna'anj so' rihaan Jesucristó a.

<sup>21</sup> Tzaj ne cataj Jesucristó rihaan nij yuvij a:

—Ase vaa ní 'unj do', ase vaa tinúú 'unj do', vaa nij sí nihánj adonj. 'O se nanó xrej nij so' se-nana Diose, ne 'yaj nij so' ndaa vaa taj nana yo' adonj —taj Jesucristó rihaan nij yuvij a.

*Nana nihánj taj xna'anj se vaa ca'ne' Jesucristó suun rihaan na do', rihaan nana do', se vaa canicun' yo' a*

<sup>22</sup> Dan me se 'o güii catúj Jesucristó rque 'o rihoo ga' cunudanj nij sí tucu'yón se-nana so', ne cataj Jesucristó rihaan nij so' se vaa ca'anj cunudanj nij so' ndaa yo'ó níchrej tu'va na lacuaná a. Gaa ne guun che'e rihoo chéé rihoo rihaan na, qui'yaj nij so' a. <sup>23</sup> Doj ca'anj rihoo, ne cotoj Jesucristó a. Cachén 'o orá nii, gaa ne guun che'e nana yuvaá cavii uxrá yo' go' ndo'o yo' rihaan na, ne dan me se catúj ndo'o na rque rihoo, ne daj doj ca'anj nij rihoo rque na a. <sup>24</sup> Gaa ne guun che'e nij sí tucu'yón se-nana Jesucristó narii nij so' nej rihaan so', ne:

—Daj doj cavi' ní, nanj maestro —taj nij so' rihaan Jesucristó a.

Gaa ne canicun' caya so', ne caxrój yuvaá so' man nana do', man na do' a. Gaa ne canicun' nana canicun' na do', ne canicun' dínj rihaan na lacuaná yo', qui'yaj Jesucristó nanj

adonj. <sup>25</sup> Gaa ne xná'anj Jesucristó man nij síi tucu'yón se-nana so', cataj so':

—Me che'é ne amán rá soj ni'yaj soj man Diose ga —taj so' rihaan nij so' a.

Tzaj ne ca'anj rá nij so', ne cuchu'vi' nij so', ne cataj nij so' rihaan tuvi' nij so':

—Daj sij me síi nihánj ga. Ndaa rihaan nana do', ndaa rihaan na do', a'ne' so' suun, ne uno roj yo' a'mii so' ason —taj nij so' rihaan tuvi' nij so' a.

*Nana nihánj taj xna'anj se vaa quirii Jesucristó man nij nana chree nimán 'o snó'o a*

<sup>26</sup> Dan me se guun gan' rihoo nuu Jesucristó ga estadó Galilea, ne cachén yo' ca'anj yo' ndaa níchrej tu'va na lacuaná yo', ndaa rej ne nij síi man chuman' Gadara a. <sup>27</sup> Cuchi' nij so' yo'óo yo', ne nanij Jesucristó rihoo, gaa ne nari' tuvi' so' ga 'o síi chihanj chuman' yo', ne so' me síi nuu nana chree nimán, ne taj yatzíj nuu so' do', na'vej rá so' cayáán so' ve' tucua' so' do', inanj rihaan santó ne so' do' a. <sup>28-29</sup> Dan me se ca'ne' Jesucristó suun rihaan nana chree se vaa curihanj nana chree nimán so' a. 'O se quisíj que'ee canó nana chree man so' a. Dan me se ndaa aga' ne' numíj nii ra'a so' do', tacóo so' do', tzaj ne xuun so', ne x'ne' yo', qui'yaj so', gaa ne nicaj nana chree man so' ca'anj nij so' quij nanj adonj. Dan me se gaa quene'en so' man Jesucristó, ne caguáj so', ne canicun' ruj so' rihaan Jesucristó, ne nucuaj ca'mii so', cataj so':

—Veé ne'én 'unj se vaa ta'nij Diose síi sa' ndo'o mé so', Jesús. Me che'é 'ná' so' rej né 'unj ga. Cataj xna'anj sa' 'unj rihaan so' se vaa se qui'yáa so' sayuun manj ma' —taj so' rihaan Jesucristó a.

<sup>30</sup> Gaa ne xná'anj Jesucristó man nana chree yo', cataj so':

—Daj cu'naj so' ga —taj Jesucristó, xná'anj so' man nana chree a.

Ne dan me se cataj nana chree yo':

—X'ne' nocoo me núj á —taj nij so' che'é rej aj catúj que'ee ndo'o nij so' nimán snó'o yo' a.

<sup>31</sup> Gaa ne cachíin ni'yaj nij nana chree rihaan Jesucristó se gaa nanj ca'nej so' man nij so' rej cunuuj rej nuu ya'an, ne:

—Achíin ni'yaj ndo'o núj rihaan so' se ca'née so' man núj rej nuu ya'an, man Jesús —taj nij so' rihaan Jesucristó a.

<sup>32</sup> Ne dan me se chée 'o x'ne' nocoo xcáa rej tacaan rej yo', chá nij xo' coj, ne dan me se cachíin ni'yaj nij nana chree rihaan Jesucristó se vaa ca'vej rá Jesucristó catuu nij so' nimán xcáa, ne cayáán nij so' nimán xcáa a. Ne ca'vej rá Jesucristó catuu nij so' nimán xcáa a. <sup>33</sup> Che'é dan me curihanj nij nana chree nimán snó'o, ne catúj nij so' nimán xcáa, ne dan me se ruvaa uxrá tacaan nicun' tu'va na lacuaná rej vaj nij xcáa yo', ne gaa catúj nij nana chree nimán xcáa yo', gaa ne cunánj ndo'o nij xo' ca'anj nij xo', ne veé danj vaj nij xo', ne quiniij nij xo' rque na, ne canó xráa nij xo' nanj adonj.

<sup>34</sup> Dan me se quene'en nij síi tumé xcáa se vaa guun, gaa ne cunánj nij so' ca'anj cataj xna'anj nij so' rihaan nij yuviij man chuman' do', rihaan nij yuviij man tacaan do' a. <sup>35</sup> Gaa ne dan me se ca'na' ni'yaj nij yuviij se vaa guun, gaa ne ca'na' nij so' rej nicun' Jesucristó, gaa ne quene'en nij so' man síi curihanj nana chree nimán a. Aj nanuú so' sagan' so', ne dínj ne so' rihaan Jesucristó a. Ne aj tí'inj se snúú so', ne nuu sa' so' a. Gaa ne cuchu'vi' ndo'o nij yuviij se vaa qui'yaj Jesucristó a. <sup>36</sup> Gaa ne cataj xna'anj nij síi quene'en rihaan nij yuviij daj qui'yaj Jesucristó ne nahuun sa' síi nuu nana chree nimán a.

<sup>37</sup> Che'é dan cuchu'vi' ndo'o nij síi man chuman' Gadara, ne che'é dan cachíin ni'yaj taran' nij so' rihaan Jesucristó se vaa ca'anj yaníj Jesucristó rihaan nij so' a. Gaa ne dan me se catúj Jesucristó rque rihoo, ne canicaj so' ca'anj so' a. <sup>38</sup> Gaa ne

dan me se cachíin ni'yaj síi nahuun sa' rihaan Jesucristó se vaa ca'vej rá Jesucristó ca'anj so' ga Jesucristó, tzaj ne ne ca'vej rá Jesucristó ma'.

<sup>39</sup>—Canicaj so' nán' so' tucúa so', ne cataj xna'anj so' rihaan tuví' so' che'é se sa' ndo'o qui'yaj Diose che'é so' á —taj Jesucristó rihaan so' a.

Gaa ne canicaj síi nahuun sa' yo' quinán' so', ne ca'mii natáj so' rihaan taran' nij yuvii yanj chuman' yo' che'é se sa' qui'yaj Jesucristó rihaan so' a.

*Nana nihánj taj xna'anj che'é chala cunii do', che'é chana chij do', nahuun sa', qui'yaj Jesucristó a*

<sup>40</sup> Nanicaj Jesucristó, namán uún so' tu'va na lacuaná a. Gaa ne man ndo'o yuvii na'vij man so', ne guun nihá' rá nij yuvii se vaa namán uún so' a. <sup>41</sup> Gaa ne dan me se ca'na' 'o so' rihaan Jesucristó, ne Jairo cu'naj so', ne so' me síi 'nij ra'a 'o ve' tucuyón nij yuvii israelitá se-tucuanj Moisés, ne dan me se canicun' ruj so' rihaan Jesucristó, ne cachíin ni'yaj so' rihaan Jesucristó se vaa ca'anj Jesucristó tucúa so' a. <sup>42</sup> Ne orún' raá ta'nij chana so' chala cunii vaj chuvij yo', tzaj ne ran' ndo'o yo', ne daj doj cavi' yo', ne che'é dan guun rá so' ca'anj Jesucristó tucúa so' a.

Veé dan me ca'anj Jesucristó ga so', ne ca'anj ndo'o yuvii ga so', ne ndaa raan ma'an chrej vaj yuvii ga so' a.

<sup>43</sup> Dan me se sca'núj nij so' vaj 'o chana ran' ndo'o, ne quisíj chuvij ya yo' xra' ton man no', ne cutun' no' cunudanj sa'anj vaa rihaan no', tzaj ne taj vaj a 'o síi guun nucuaj qui'yaj nahuun sa' no' ma'. <sup>44</sup> Dan me se quinichrun' no' rej xco Jesucristó, ne canó ra'a no' doj tu'va sagan' so' a. Dan me se nu' canó ra'a no' tu'va sagan' so', ne nu' canicun' se xra' ton man no' nanj adonj. <sup>45</sup> Gaa ne xná'anj Jesucristó se vaa me síi canó ra'a sagan' so', tzaj ne a 'o nij yuvii ne canó ra'a sagan' so' ma', taj nu' nij yuvii a. Gaa ne cataj Pedró rihaan Jesucristó:

—Maan che'é se raan vaj nij yuvii, ne canó rma'an ra'a 'o so' sagan' so', maestro —taj Pedró rihaan Jesucristó a.

<sup>46</sup> Tzaj ne cataj Jesucristó rihaan so' a:

—Vaa 'o yuvii canó ra'a sagan' 'unj adonj. Ne'enj se vaa nahuun yuvii qui'yaj adonj —taj Jesucristó rihaan so' a.

<sup>47</sup> Gaa ne xcaj chana cuentá se vaa quene'en Jesucristó se vaa qui'yaj no', gaa ne ri'ij man no', ne ca'na' no', ne canicun' ruj no' rihaan so', gaa ne cataj xna'anj no' rihaan nu' nij yuvii se vaa maan se canó ra'a no' sagan' Jesucristó, ne nu' maan orá dan nahuun sa' no' ne canicun' se xra' ton man no', taj no' rihaan cunudanj nij yuvii a.

<sup>48</sup> Gaa ne cataj Jesucristó rihaan no', ne:

—Nahuún so' che'é se amán rá so' ni'yaj so' manj, nocoj. Ve'é ca'anj so', ne dínj gaa nimán so' ca'anj so' á —taj Jesucristó rihaan no' a.

<sup>49</sup> Ataa navij ca'mii Jesucristó, ne ca'na' 'o síi cavii tucúa Jairo, ne cataj so' rihaan Jairo a:

—Aj cavi' ta'níi so', ne taj che'é caraá chrúu so' rihaan maestró a ma' —taj síi 'na' cataj xna'anj rihaan Jairo a.

<sup>50</sup> Dan me se cuno Jesucristó nana ca'mii síi ca'na', gaa ne cataj so' rihaan síi cu'naj Jairo a:

—Se cuchu'ví' so' ma'. Maan se cuchuman ya rá so' ni'yaj so' manj, ne quinahuun ta'níi so' nanj adonj —taj Jesucristó rihaan so' a.

<sup>51</sup> Dan me se cuchi' Jesucristó tucúa Jairo, ne ne ca'vej Jesucristó catuu nij yuvii rá ve' ga so', ne maan Pedró do', Juan do', Jacobo do', roj nica Jairo do', ca'vej so' catuu rá ve' ga so' a.

<sup>52</sup> Dan me se ta'vee ndo'o nij síi cunuu chre' rá ve' che'é chala cunii cavi', ne nanó uxrá rá nij so', ne go' nij so' cuxru' rucuaa nij so' a. Tzaj ne cataj Jesucristó rihaan nij so':

—Se ta'vee soj ma'. 'O se ne cavi' no' ma'. Maan se otoj uun no' nanj á —taj Jesucristó rihaan nij so' a.

<sup>53</sup> Gaa ne ca'nga' nacoo nij so' ni'yaj nij so' man Jesucristó che'é se aj quene'en nij so' se vaa aj cavi' ya no' a. <sup>54</sup> Tzaj ne catúj Jesucristó rá quartó naj no', ne quita'aa so' ra'a no', ne nacúún so' man no', cataj so':

—Naxagaa so', chala cunii —taj so' rihaan no' a.

<sup>55</sup> Ne cunuu i'na' uún no', gaa ne nu' naxagaa no', ne nu' ca'ne' Jesucristó suun rihaan roj nica Jairo se vaa go' roj so' doj se chá chá chala cunii, taj Jesucristó rihaan roj nica Jairo a.

<sup>56</sup> Dan me se ca'anj rá roj so' se vaa qui'yaj Jesucristó, gaa ne cataj Jesucristó rihaan roj so' a:

—A 'ó yuvii se cataj xna'anj roj soj rihaan daj qui'yáj che'é chala cunii ma' —taj Jesucristó rihaan roj nica roj so' a.

## 9

*Nana nihánj taj xna'anj se vaa ca'née Jesucristó man chuvij nij sí tucu'yón se-nana so' ca'anj ca'mii natáj nij so' a*

<sup>1</sup> Dan me se canacúún Jesucristó man chuvij nij sí tucu'yón se-nana so', ne cunuu chre' nij so', ne go' so' se nucuj man nij so', gaa ne ca'vee qui'yaj canaán nij so' rihaan me ma'an nana chree do', ca'vee ca'nee nij so' chi'ii xráá sí ran' do' a.

<sup>2</sup> Gaa ne ca'née so' man nij so' ca'anj ca'mii natáj nij so' che'é güii guun chij Diose rihaan chumii nihánj, ne ca'nee nij so' chi'ii xráá nij sí ran' do' a. <sup>3</sup> Ne cataj so' rihaan nij so' a:

—A 'ó rasuun se nicaj soj ca'anj soj ma'. Chruun garroté do', nanj do', se chá do', sa'anj do', se nicaj soj ma'. Qrún' niquee yatzíj nuu soj ca'anj ga soj á. <sup>4</sup> Ne me ma'an ve' cuchi' soj ne ca'vej 'o so' cane soj ro', ne veé ve' yo' yo'o cane soj ne veé ve' yo' cavii soj ca'anj soj ca'mii natáj soj se-nana Diose á. <sup>5</sup> Ne me ma'an 'o chuman' se ca'vej rá nij sí chihanj cunó nij so' se-nana soj, tanáj soj chuman' yo', ne cavii soj tu'va chuman' yo', ne nacunan' soj tacóó soj cayuu yo'óó tachruu man chuman' yo' tacóó

soj á. Ndaa dan, gaa ne xcaj nij sí chihanj yo' cuentá se vaa tumé nij so' cacun' se vaa ne ca'vej rá nij so' cunó nij so' se-nana soj man adonj —taj Jesucristó rihaan chuvij nij so' a.

<sup>6</sup> Gaa ne dan me se ca'anj nij so' nij chuman', ne ca'mii natáj nij so' se-nana Diose nana sa', ne me rej ma'an vaj nij so' ca'néj nij so' chi'ii xráá nij sí ran' a.

*Nana nihánj taj xna'anj se vaa xcaj sí nicaj suun cu'naj Herodes cuentá che'é Jesucristó a*

<sup>7</sup> Dan me se cunó sí nicaj suun cu'naj Herodes nu' se vaa qui'yaj Jesucristó, gaa ne guun rá Herodes quene'en so' me sí me Jesucristó a. 'O se ta'aj yuvii cataj se vaa cunuu i'na' uún Juan sí cuta' ne man yuvii, <sup>8</sup> ne yo'ó ta'aj yuvii cataj se vaa curuvi' uún sí cu'naj Elías sí cayáán gaa naá, ne yo'ó ta'aj uún yuvii cataj se vaa cunuu i'na' uún 'o sí nata' se-nana Diose gaa naá a. <sup>9</sup> Tzaj ne ma'an sí cu'naj Herodes cataj, ne:

—Aj cavi' Juan, ne x'ne' chihá Juan, qui'yáj a. Tzaj ne ne ne'enj me yuvii me sí nihánj, ne tu'va nii danj che'é so' rihanj ma' —taj Herodes a.

Gaa ne guun uxrá rá Herodes quene'en so' man Jesucristó a.

*Nana nihánj taj xna'anj se vaa ca'vee quirii Jesucristó se chá 'un' mij snó'o a*

<sup>10</sup> Dan me se namán chuvij nij sí tucu'yón se-nana Jesucristó rihaan Jesucristó, ne nata' nij so' rihaan Jesucristó che'é nu' nij suun sa' nocoo qui'yaj suun nij so' rej ca'anj nij so' a. Gaa ne nicaj Jesucristó man taran' nij so', ca'anj nij so' ndaa tu'va chuman' cu'naj Betsaida rej yaníj a.

<sup>11</sup> Tzaj ne quene'en 'o x'ne' nocoo yuvii rej ca'anj Jesucristó, gaa ne canoco' nij so' man Jesucristó, ca'anj nij so' a. Gaa ne ve'é ca'mii Jesucristó ga x'ne' nocoo yuvii canoco' man so', ne ca'mii natáj so' che'é güii guun chij Diose rihaan chumii nihánj, ne quinahuun nij sí ran', qui'yaj so' do' a. <sup>12</sup> Dan me se nichrun' cata' güii,



ne dan me se quinichrun' chuvij nij sí tucu'yón se-nanā Jesucristó rihaan so', ne cataj nij so':

—Qui'yáá so' se ndo'o, ne na'nej so' chrej man nij yuvij, ca'anj nij so' rej chuman' nocoo chuman' ra'a do', gaa ne man ve' caran' nij so' do', man se chá quiri' nij so' chá nij so' do' a. Tzaj ne rej man ní' nihánj me se rco' quij me nihánj, ne taj rej caran' nij so', taj se chá chá nij so' do', nihánj ma' —taj nij so' rihaan Jesucristó a.

<sup>13</sup> Tzaj ne cataj Jesucristó rihaan nij so' a:

—Go' ma'an soj se chá chá nij yuvij ei —taj Jesucristó rihaan nij so' a.

—Tzaj ne taj se chá rihaan núj ma'. Maan se orún' 'un' rachrúun ne vij guee xcuj ne, vaa rihaan núj nanj á. Tzaj ne ca'vee ca'anj núj, ne quiraan núj se chá chá cunudanj nij yuvij nihánj nanj á —taj nij so' rihaan Jesucristó a.

<sup>14</sup> Dan me se 'un' mój snó'o mán rej yo' ta' asuun, ne ino me chana ga xni adonj. Tzaj ne cataj Jesucristó rihaan nij sí tucu'yón se-nanā so' a:

—Cayáán nij yuvij rihaan yo'óo, qui'yaj soj, ne dan me se cunuu chre' 'o vij chihaa chi' vij chihaa chi' yuvij cane 'o 'o rej, qui'yaj soj á —taj Jesucristó rihaan nij so' a.

<sup>15</sup> Ne veé danj qui'yaj nij so', ne ca'anj cane cunudanj nij yuvij a.

<sup>16</sup> Gaa ne dan me se quita'aa Jesucristó 'un' nij rachrúun ga roj xcuj yo', gaa ne ni'yaj so' rej xta', ne nago' so' graciá rihaan Diose che'é se chá yo', gaa ne cuxra' ta'aj so' rachrúun do', nee xcuj do', ne caxrij so' ston nij sí tucu'yón se-nanā so', che'é rej caxrij nij so' ston nij yuvij a. <sup>17</sup> Gaa ne chá taran' nij yuvij, ne caraa rque nij so' ne ndaa quináj ndo'o se chá a. Gaa ne naqui'yaj chre' nij so' nu' se quináj tu'va yuvij, ne caraa nij so' yo'óo cunuu' chuvij scaa a.

*Nanā nihánj taj xna'anj se vaa cataj xna'anj Pedró me sí me Jesucristó a*

<sup>18</sup> Dan me se 'o güii ca'anj Jesucristó 'o rej yaní cachíin ni'yaj so' rihaan

Diose, ne nij sí tucu'yón se-nanā so' ro', mán rej yo' ga so', ne xná'anj so' man nij so', cataj so', ne:

—Me sij mé 'unj, taj nij yuvij ga —taj Jesucristó, xná'anj so' man nij so' a.

<sup>19</sup> —Vaa sí taj se vaa sí cu'naj Juan sí cuta' ne man yuvij mé so' ei. Ne vaa sí taj uún se vaa sí cu'naj Elías sí nata' se-nanā Diose gaa naá me uún so' chuguanj. Ne vaa sí taj uún se vaa yo'óo sí nata' se-nanā Diose gaa naá me uún so' xa'. Danj taj 'o 'o ta'aj nij yuvij nanj á —taj nij so' a.

<sup>20</sup> Gaa ne cataj Jesucristó rihaan nij so':

—Ne ma'an soj, gaa ne me sij mé 'unj, rá soj uún ga —taj Jesucristó, xná'anj so' man nij sí tucu'yón se-nanā so' a.

Gaa ne cataj Pedró:

—Sí ca'neé Diose tinanii man yuvij rihaan sayuun mé so' ei —taj so' rihaan Jesucristó a.

<sup>21</sup> Gaa ne cataj xna'anj Jesucristó rihaan nij so' a:

—Se cataj nij soj nanā vaa danj rihaan a'óo nij yuvij ma' —taj Jesucristó rihaan nij so' a.

*Nanā nihánj taj xna'anj se vaa cataj xna'anj Jesucristó se vaa cavi' so' ne cunuu i'na' uún so' a*

<sup>22</sup> Gaa ne cataj uún Jesucristó rihaan nij sí tucu'yón se-nanā so' a:

—Xa' 'unj sij ca'neé Diose nijaj yu'unj man yuvij, tzaj ne no xcúun 'unj quiraan' ndo'o 'unj sayuun qui'yaj nij sí uun chij do', qui'yaj nij xrej ata suun nocoo doj do', qui'yaj nij sí naqui'yaj cuu se-tucuanj Moisés rihaan yuvij do', ne nachri' ndo'o nij so' ni'yaj nij so' mán 'unj, ne ticavi' nii mán 'unj, ne cachēn va'núj güii, gaa ne cunuu i'na' uún 'unj adonj —taj Jesucristó rihaan nij so' a.

<sup>23</sup> Gaa ne dan me se cataj so' rihaan cunudanj nij yuvij a:

—Sese me rá yo'óo so' canoco' so' manj, ne se guun rá so' qui'yaj so' se vaa me rá ma'an so' qui'yaj so' ma'. Ne ca'vee se quiraan' uxrá so' sayuun do', ca'vee se ndaa cachron nii man

so' rihaan rcutze do', tzaj ne daj a 'o 'o güii me se yo' o qui'yaj suun so' che'ej, ne yo' o canoco' raan so' manj adonj. <sup>24</sup> Tzaj ne sese vaa 'o síi me rá tinanii man ma'an rihaan sayuun, ne vaa güii yo' o cavi' nimán so' adonj. Tzaj ne sese cavi' yo' o so' che'é se me so' síi noco' manj, ne vaa güii cunuu i'na' uún so' adonj. <sup>25</sup> Ne a me se quirir' 'o so' sese qui'yaj canaán so' nu' rasuun man rihaan chumii nihánj, ne ca'anj ni'ya nimán ma'an so', rá soj ga. Daj chihaa mij se ca'vee cavii sa' so', qui'yaj rasuun man rihaan chumii nihánj a ma'. <sup>26</sup> Dan me se xa' síi uun na'aj ni'yaj manj ne uun na'aj ni'yaj se-nanaj, tzaj ne vaa güii guun na'aj 'unj sij ca'née Diose nicaj yu'unj man yuvii ni'yaj 'unj man so' asa' ca'na' uún 'unj rihaan chumii nihánj adonj. Ne güii yo' me se ve'é ndo'o guun chij 'unj, qui'yaj Réj Diose, ne cavii sa' 'unj, qui'yaj se-mozó Diose nij síi guee adonj. <sup>27</sup> Nihánj me se cataj yá 'unj rihaan soj se vaa xa' ta'aj soj sij nicun' nihánj cuano me se gaa ataa a cavi' ta'aj soj, ne ya quene'en ta'aj soj asa' guun che'e Diose guun chij Diose rihaan chumii nihánj nanj adonj —taj Jesucristó rihaan cunudanj nij so' a.

*Nana nihánj taj xna'anj se vaa chuguun ndo'o man Jesucristó ni'yaj nij síi tucu'yón se-nana so' a*

<sup>28</sup> Quisíj ca'mii Jesucristó nana vaa danj, gaa ne cachén 'o tunj güii ta' asuun, gaa ne nicaj Jesucristó man Pedró ga Juan ga Jacobo, ne cavii so' raá 'o quij xcaan, ca'anj cachinj ni'yaj so' rihaan Diose a. <sup>29</sup> Gaa cachín ni'yaj so' rihaan Diose, ne yo' o cunuu ino rihaan so', ne yuun che'e cunuu catzii sagan' so', ne ndaa raan lá ma'an sagan' so' a. <sup>30</sup> Gaa ne dan me se naqui'yaa vij snó'o rihaan nij so', ne nanó roj so' cuentó ga Jesucristó, ne Moisés do', Elías síi nata' se-nana Diose gaa naá do', me roj so' a. <sup>31</sup> Dan me se ve'é ndo'o curuvi' roj so', ne ca'mii roj so' ga Jesucristó che'é se vaa quiran' Jesucristó

chuman' Jerusalén, ne cavii so' chumii nihánj, ndaa vaa guun rá Diose qui'yaj so' a. <sup>32</sup> Dan me se ca'na' ndo'o nej rihaan nij tuví' Pedró, tzaj ne ne cotoj nij so' ma'. Quene'en nij so' ndaa vaa chuguun sagan' Jesucristó do', ndaa vaa chuguun sagan' roj síi nicun' ga so' do' a. <sup>33</sup> Gaa ne dan me se guun che'e roj síi nicun' ga Jesucristó ca'anj yaníj roj so' ga Jesucristó, gaa ne cataj Pedró rihaan Jesucristó:

—Cunaj uxrá vaa mán núj nihánj ga so', maestro. Ne qui'yaj núj va'nuj ve' yacataj cane soj nanj á. 'O ve' cané so', ne yo' o ve' cané síi cu'naj Moisés, ne yo' o ve' cané síi cu'naj Elías ei —taj Pedró rihaan Jesucristó, tzaj ne ne quene'en uxrá so' daj me che'é ca'mii so' rihaan Jesucristó danj a ma'.

<sup>34</sup> Quisíj ca'mii so' nana vaa danj, gaa ne ca'na' 'o ngaa rej xta', ne caráán ngaa xraá nij so' ne naxíj nij so' rque ngaa, ne kuchu'vi' va'nuj nij síi tucu'yón se-nana Jesucristó yo' a.

<sup>35</sup> Gaa ne Diose ro', ca'mii nana cuno nij so' rque ngaa yo' a. Ne cataj Diose: —Síi nihánj me ta'níj síi 'ee raj adonj. Cuno soj rihaan so' ei —taj Diose cuno nij so' a.

<sup>36</sup> Quisíj ca'mii Diose, gaa ne taj orún' Jesucristó nicun', quene'en nij so' a. Tzaj ne yo' o caráán tu'va nij so' se vaa quene'en nij so', ne güii guun danj me se a 'o yuvii ne cataj xna'anj nij so' rihaan a.

*Nana nihánj taj xna'anj se vaa nahuun sa' 'o xnii nuu nana chree nimán, qui'yaj Jesucristó a*

<sup>37</sup> Dan me se cachén 'o yan', ne quisíj güii, gaa ne ca'anj Jesucristó ga nij síi tucu'yón se-nana so' rej rque a. Gaa ne nari' tuví' nij so' ga 'o x'ne' noco' yuvii a.

<sup>38</sup> Gaa ne dan me se nucuaj ndo'o ca'mii yo' o síi 'na' sca'núj nij yuvii rihaan Jesucristó, ne cataj so':

—Achín ni'yaj rihaan so' se vaa cunuu 'ee rá so' ni'yaj so' ta'níj che'é se orún' raá so' me ta'níj, maestro —taj so' rihaan Jesucristó, ne— <sup>39</sup> Dan me se naruvi' nana chree nimán

ta'níj, ne taj ni'yón snúú so', ne aguáj so', ne avii yatan' tu'va so', 'yaj nana chree yo', ne 'yaj chi'ii ndo'o nana chree yo' man ta'níj, ne sayuun uxrá curihanj nana chree yo' nimán ta'níj adonj. <sup>40</sup> Ne dan me se cachíin ni'yáj rihaan nij sí tucu'yón se-nana so' se vaa quirii nij so' nana chree nimán ta'níj, tzaj ne ne ca'vee quirii nij so' nana chree nimán ta'níj ma'. —Danj cataj snó'o yo' rihaan Jesucristó a.

<sup>41</sup> Gaa ne cataj Jesucristó a:

—Dan me se sí ne amán rá me soj sij man rihaan chumiij nihánj cuano, ne chi'ii vaa nimán soj, ne a me daj cachej ga soj, ne a me daj gaa naj nimanj ni'yaj 'unj man soj, gaa ne ca'vee qui'yaj canaán soj ga. Nicaaj so' man xnii ca'na' so' rihanj cuaj á —taj Jesucristó a.

<sup>42</sup> Dan me se gaa 'na' xnii, ne nu' snúú xnii, ne naxru' xnii, qui'yaj nana chree yo', tzaj ne ca'ne' Jesucristó suun rihaan nana chree se vaa curihanj so' nimán xnii, ne dan me se curihanj nana chree yo' nimán xnii, ne nahuun sa' xnii, qui'yaj Jesucristó, ne nago' Jesucristó man xnii rihaan rej xnii a. <sup>43</sup> Gaa ne quene'en nij yuvi se vaa nucaj ndo'o Diose sí qui'yaj suun sa' nocoo yo', ne caráya'anj nu' nij so' a.

*Nana nihánj taj xna'anj se vaa cataj xna'anj uún Jesucristó se vaa vaa güii cavi' so' a*

Dan me se caráya'anj cunudanj yuvi se vaa qui'yaj Jesucristó a. Gaa ne cataj Jesucristó rihaan nij sí tucu'yón se-nana so' a:

<sup>44</sup> —A 'ó xco' se quini'yón soj nana nihánj nana cataj xna'anj 'unj rihaan soj cuano ma'. Dan me se 'unj sij ca'née Diose nicaaj yu'unj man yuvi me se vaa güii nago' nii mán 'unj rihaan yuvi adonj —taj Jesucristó rihaan nij sí tucu'yón se-nana so' a.

<sup>45</sup> Tzaj ne ne cunoo nij so' nana ca'mii Jesucristó, ne ne ca'vej rá Diose xcaj nij so' cuentá ma'. Ne cuchu'vi' nij so' xna'anj nij so' man Jesucristó che'é nana yo' a.

*Nana nihánj taj xna'anj me sí me sí guun chij doj a*

<sup>46</sup> Dan me se guun che'e nij sí tucu'yón se-nana Jesucristó ca'mii cunu' nij so' me nij so' guun chij doj a. <sup>47</sup> Tzaj ne xcaj Jesucristó cuentá daj vaa nimán nij so', ne che'é dan quita'aa so' ra'a 'o ne'ej, ne nicaaj so' cachrón so' x'núú so', <sup>48</sup> gaa ne cataj Jesucristó rihaan nij so' a:

—Me ma'an 'o sí aráj cochroj ne a'mii sa' so' ga 'o ne'ej nihánj che'ej, ne adi' ma'anj me aráj cochroj ne a'mii sa' so' ga vaa nanj adonj. Dan me se sí a'mii sa' ga 'unj me se nuveé orún' 'unj me a'mii sa' so' ga ma'. Maan Diose ya sí ca'née mán 'unj me aráj cochroj ya so' ne a'mii sa' ya so' ga vaa nanj adonj. 'O se sí nica' doj rihaan taran' soj ro', me sí sa' doj rihaan taran' soj a —taj Jesucristó rihaan nij sí tucu'yón se-nana so' a.

*Nana nihánj taj xna'anj se vaa cataj xna'anj Jesucristó se vaa me ma'an sí ne unu' ga so' me tuvi' so' a*

<sup>49</sup> Gaa ne cataj sí cu'naj Juan rihaan Jesucristó a:

—Quene'en núj man 'o sí ata' tu'va se-chuvií so', ne urihanj nana chree nimán yuvi, 'yaj so', nanj maestro. Tzaj ne caráán núj chrej ca'mii so' ne se qui'yaj so' danj, che'é se nuveé sij chée ga ní' me so', taj núj, nanj maestro —taj Juan rihaan Jesucristó a.

<sup>50</sup> Tzaj ne cataj Jesucristó rihaan so' a:

—Ca'ne' sa' guee rá soj qui'yaj ma'an so' danj ei. 'O se xa' sí ne unu' ga soj, tzaj ne tuvi' soj me so' adonj —taj Jesucristó rihaan Juan do', rihaan yo'ó nij sí tucu'yón se-nana so' do' a.

*Nana nihánj taj xna'anj se vaa cataj xna'anj Jesucristó rihaan sí cu'naj Jacobo do', rihaan sí cu'naj Juan do', se vaa nij ca'mii roj so' a*

<sup>51</sup> Dan me se gaa nichrun' güii quinan' Jesucristó xta', gaa ne yo'oc ca'née nucaj nimán so' ca'anj so' chuman' Jerusalén a. <sup>52</sup> Dan me se

ca'ne' so' suun rihaan doj sí chéé ga so' quitaj yaan nij so' nano' nij so' ve' caran' nij tuvi' nij so', gaa ne ca'anj nij sí ca'anj suun, ne cuchi' nij so' 'o chuman' yanj nij sí samaritano a. <sup>53</sup> Tzaj ne quira'aan nij sí samaritano ve' tucua' nij so' rihaan Jesucristó, che'é se guun rá so' ca'anj so' chuman' Jerusalén a. <sup>54</sup> Dan me se gaa quene'en roj sí tucu'yón se-nana Jesucristó roj sí cu'naj Jacobo ga Juan, se vaa quira'aan nij sí samaritano ve', gaa ne xná'anj roj so' man Jesucristó, cataj roj so':

—Me rá so' cachinj ni'yaj núj rihaan Diose, ne ca'nej Diose ya'an, ne cacaá nij sí samaritano na' —taj roj so', xná'anj roj so' man Jesucristó a.

<sup>55</sup> Tzaj ne ni'yaj Jesucristó man roj so', ne caxrij yuvaá Jesucristó man roj so', ne cataj Jesucristó a:

—Ne ne'en soj daj sij me soj ne guun danj rá soj a. Xa' 'unj, tzaj ne ne ca'na' 'unj ticavi' 'unj man yuvii ma'. Che'é yan tinanii 'unj man yuvii rihaan sayuun ca'ná' 'unj adonj —taj Jesucristó rihaan roj so' a.

<sup>56</sup> Gaa ne ca'anj nij tuvi' Jesucristó yo'ó chuman' caran' nij so' a.

*Nana nihánj taj xna'anj daj ca'mii Jesucristó rihaan va'núj sí tihaj guun rá canoco' man so' a*

<sup>57</sup> Gaa vaj nij so' chrej, gaa ne ca'na' 'o so', ca'mii so' ga Jesucristó a:

—Canoco' 'unj mán so' daj rej ma'an vaj so' ei —taj so' rihaan Jesucristó a.

<sup>58</sup> Gaa ne cataj ya Jesucristó se vaa ran' so' chéé so' a:

—'O se nij chunee ro', otoj sa' nij xo' rá yu'uj taj rque yo'óo, ne nij xtâj chéé xtâ' ro', vaa saca' nij xo' a. Ne xa' 'unj sij ca'née Diose nicaj yu'unj man yuvii, tzaj ne taj a doj rej quináá 'unj cotoj 'unj a ma' —taj Jesucristó rihaan so' a.

<sup>59</sup> Ne dan me se cataj Jesucristó rihaan yo'ó so' a:

—Canoco' so' manj ca'anj ní' á —taj Jesucristó rihaan so' a.

—Ca'vej so' nanj tucuaaj, ne ndaa cavi' réj, gaa ne cachin' 'unj man réj, gaa ne canoco' 'unj mán so' ei —taj so' rihaan Jesucristó a.

<sup>60</sup> Tzaj ne cataj Jesucristó rihaan so' a:

—Ca'ne' rá so' cachin' ma'an nij sí cavi' nimán man tuvi' so' xngá á. Ne ca'anj so', ca'mii natáj so' che'é güi guun chij Diose rihaan chumii nihánj ei —taj Jesucristó rihaan so' a.

<sup>61</sup> Ne dan me se cataj yo'ó so' uún rihaan Jesucristó a:

—Me raj canocoj mán so', Señor. Tzaj ne asino ca'vej so' ca'anj cataj xna'anj 'unj rihaan nij tuvij, gaa ne ca'naj, ne ca'anj ní' ei —taj so' rihaan Jesucristó a.

<sup>62</sup> Tzaj ne cataj Jesucristó rihaan so' a:

—Síi oro' nee ni'yaj rej xco ro', daj chihaa mij se cavii nica tucuaán qui'yaj so' ma'. Ne síi me rá canoco' manj me se se guun canicaj uún so' rej xco so' ma'. Ne sese danj qui'yaj so', ne daj chihaa mij se ca'vee guun chij Diose nimán so' ma'. Ne ase vaa síi oro' nee rii tucuaán ro', vaa síi me rá canoco' manj adonj —taj Jesucristó rihaan so' a.

## 10

*Nana nihánj taj xna'anj se vaa ca'née Jesucristó man va'núj chihaj chi' síi tucu'yón se-nana so' ca'anj ca'mii natáj nij so' a*

1 Cachén doj, gaa ne narii Jesucristó man ya'núj chihaj chi' snó'o, ne ca'née so' man vij vij nij so' quitaj yaan nij so' rihaan Jesucristó ca'anj nij so' daj a chuman' cachin Jesucristó, <sup>2</sup> ne cataj Jesucristó rihaan nij so' a:

—Ya uxrá, ne vaa ndo'o suun rihaan ní', ne nij síi 'yaj suun me se doj nij so' nanj adonj. Ne cachinj ni'yaj ní' doj nij síi qui'yaj suun rihaan Diose síi uun chij 'nij ra'a suun, gaa ne ca'nej so' doj yuvii qui'yaj suun se-suun so' adonj. <sup>3</sup> Dan me se ca'anj ca'mii natáj soj rihaan nij yuvii, tzaj ne xcaj soj cuentá se vaa



ca'na' sayuun rihaan soj ei. 'O se ase vaa matzinj vaj rej man xca'yanj ca'nu' ro', danj gaa soj chuguanj. <sup>4</sup> Se nicaj soj vitó nuu sa'anj se nicaj soj nanj se nicaj soj yo'ó tacoj canj se nicaj soj ca'anj soj ma'. 'O rej ca'anj soj, ne 'o rej canicaj soj, ne se canicun' soj nanó soj cuentó ga yuvij ma'.

<sup>5</sup> "Asa' catúj soj rá 'o ve', ne asino cataj soj rihaan nij sí yanj rá ve' yo' se vaa dínj gaa cumán nij so', qui'yaj Diose a. <sup>6</sup> Ne sese yanj 'o sí cayáán sa' ga Diose rá ve' yo', gaa ne ya ve'é cayáán so', qui'yaj Diose a. Tzaj ne sese nuvi' sí cayáán sa' ga Diose yáán rá ve' yo', ne canicaj uún nana sa' ca'mii soj rihaan ma'an soj, qui'yaj Diose, tzaj ne se cavii sa' nij sí tucua yo' a ma'. <sup>7</sup> Caran' soj ve' yanj sí sa' yo', ne me ma'an se rque sí yanj yo', ne cha soj co'ó soj do', ne no xcúún yuvij rque yuvij chraa cha soj che'é suun sa' 'yaj suun soj a. Se ca'anj soj caran' soj yo'ó yo'ó ve' ma'. <sup>8</sup> Asa' cuchí' soj 'o chuman', ne sese ve'é ca'mii nij sí man chuman' yo' ga soj, gaa ne cha soj me ma'an se cha rque nij so' man nij soj a. <sup>9</sup> Ca'nee soj chí'ii xraá nij sí ran' man chuman' yo', ne ca'mii natáj soj rihaan yuvij se vaa nichrun' guun chij Diose chiháán nij so' a.

<sup>10</sup> "Tzaj ne asa' cuchí' soj 'o chuman', ne sese ne ca'vej rá nij yuvij cunó nij yuvij se-nana soj, gaa ne canicun' soj tanuu rá callé chuman', gaa ne cataj soj rihaan nij yuvij man chuman' yo' a: <sup>11</sup> "Asa' curihanj núj chuman' nihánj, ne nacunán' núj tacóó núj, ne tucuyuu núj yo'ó tachruu avii chiháán soj tacóó núj cayuu yo' rihaan ma'an soj a. Gaa ne xcaj soj cuentá se vaa guun rá Diose guun chij Diose chiháán soj, tzaj ne ne ca'vej rá soj a". Danj cataj soj rihaan nij sí na'vej rá cunó nana ca'mii soj a. <sup>12</sup> Ne cataj xna'anj 'unj rihaan soj cuano se vaa vaa güii ca'ne' 'unj cacun' che'é nij yuvij, gaa ne quiran' nij yuvij man chuman' yo' doj sayuun rihaan nij sí chí'ii man chuman' Sodoma adonj —taj Jesucristó

rihaan nij sí ca'née so' a.

*Nana nihánj taj xna'anj se vaa cataj xna'anj Jesucristó che'é sayuun quiran' yuvij man va'nuj chuman' yuvij ne ca'vej rá cunó se-nana so' a*

<sup>13</sup> Gaa ne dan me se cataj uún Jesucristó a:

—Nique soj sij man chuman' Corazín a. Nique soj sij man chuman' Betsaida a. 'O se quiran' uxrá soj sayuun nanj á. Dan me se nij sí man chuman' Tiro do', nij sí man chuman' Sidón do', me sí chí'ii nimán nanj á. Tzaj ne sese ca'anj 'unj chiháán nij so', ne sese qui'yaj suun sa' nocoo ni'yaj nij so', ne cunó nij so' se-nanaj ne guun ya rá nij so' se vaa tumé nij so' cacun', ne canicaj nimán nij so', ne quinano ndo'o rá nij so' che'é cacun' tumé nij so', ne ndaa yatzíj ya' cunuú nij so', ne ndaa yaj chruun acaa ruvaj caraa nij so' raa nij so', che'é yan quinano rá nij so' che'é cacun' tumé nij so' asuun saj adonj. Nihánj, ne ne ca'anj 'unj ma'. Maan se inanj chiháán soj 'naj, ne qui'yaj suun sa' nocoo quene'en ma'an soj, tzaj ne ne canicaj nimán nij soj a ma'. <sup>14</sup> Dan me se güii ca'ne' 'unj cacun' che'é nij yuvij ro', doj a gaa sayuun quiran' soj rihaan sayuun quiran' nij sí chí'ii man chuman' Tiro do', man chuman' Sidón do' adonj. <sup>15</sup> Ne vaa soj sij man chuman' Capernaum uún a. Ne sí sa' inanj me ma'an soj, rá soj na'. Nuveé sij sa' me soj ma'. Sí ca'anj rihaan ya'an guun soj adonj —taj Jesucristó a.

<sup>16</sup> Ne cataj uún Jesucristó rihaan nij sí tucuyón se-nana so' a:

—Sí nanó xrej se-nana soj ro', so' me sí nanó xrej se-nana ma'anj a. Tzaj ne sí uun nacoo rá ni'yaj man soj ro', so' me sí uun nacoo rá ni'yaj man ndaa ma'anj a. Ne sí uun nacoo rá ni'yaj man ma'anj ro', so' me sí uun nacoo rá ni'yaj man Diose sí ca'née manj adonj —taj Jesucristó rihaan nij sí tucuyón se-nana so' a.

*Nana nihánj taj xna'anj se vaa namán va'nuj chihaa chí' nij síi ca'néé Jesucristó a*

17 Quisíj qui'yaj va'nuj chihaa chí' nij so' ndaa vaa cataj Jesucristó, gaa ne namán uún nij so' a. Niha' rá nij so', ne cataj nij so' rihaan Jesucristó a:

—Ndaa nij nana chree uno rihaan núj, Señor. Che'é se se-chuvií so' táa tu'va núj, ne urihanj nij so' nimán yuvii nanj á —taj nij so' rihaan Jesucristó a.

18 Ne cataj Jesucristó rihaan nij so' a:

—Ne'en yaj cayuu se nucuaj nicaj Satanás, ne ase uun raan ro', me cayuu se nucuaj nicaj Satanás adonj.

19 Cunó soj ca'mij á. 'Unj ro', me síi qui'yaj guun nucuaj soj qui'yaj canaán soj rihaan daj a se chí'ii a. Ca'vee se ru'maan che'é soj 'o xcuáa do', 'o xcuun do', tzaj ne taj se qui'yaj xo' man soj ma'. Qui'yaj canaán soj rihaan nu' se nucuaj nicaj Satanás síi taj ri'yunj ni'yaj man ní', ne a 'ó xco' se qui'yaj chí'ii a 'ó rasuun man soj ma'. 20 Tzaj ne taj che'é guun niha' rá soj che'é se uno nij nana chree rihaan soj ma'. Guun niha' rá soj, tzaj ne che'é se aj cachrón Diose se-chuvií soj rej xta' ro', che'é dan guun niha' rá soj á —taj Jesucristó rihaan va'nuj chihaa chí' nij so' a.

*Nana nihánj taj xna'anj se vaa guun niha' rá Jesucristó, qui'yaj Nimán Diose a*

21 Maan güii yo' ro', guun niha' rá Jesucristó, qui'yaj Nimán Diose, ne cataj Jesucristó rihaan Diose a:

—Síi 'nij ra'a chumii do', síi 'nij ra'a xta' do', mé so', Ataj Chij. Ne sa' uxrá qui'yáa so' caráán so' rihaan nij síi avii raá do', rihaan nij síi acaj cuentá do', se vaa se cuno nij so' se-nanaj ma'. Maan nij síi vaa nica' nimán ro', ve'é cuno nij so', qui'yáa so' a. Danj inanj qui'yáa so', che'é yan danj me rá so' qui'yáa so', Ataj —taj Jesucristó rihaan Rej so' Diose a.

22 Canicaj Jesucristó, ca'mii so' rihaan nij yuvii, cataj so' a:

—Aj rqué Réé 'unj Diose cunudanj rasuun rihanj á. Ne a 'ó síi ne ne'en daj vaa 'unj, maan se orún' Réj ne'en a. 'O se ta'níi so' mej adonj. Ne a 'ó síi ne ne'en daj vaa Réj ma'. Maan se orún' 'unj ne'en daj vaa so' adonj. Ne sese me rá 'unj cataj xna'anj 'unj rihaan yo'ó nij yuvii daj vaa Réj, ne quene'en yo'ó nij so' uún adonj —taj Jesucristó rihaan nij yuvii a.

23 Gaa ne ni'yaj Jesucristó man nij síi tucu'yón se-nana so', ne cataj so' rihaan inanj ma'an nij so' a:

—Vaa che'é gaa niha' rá soj che'é rihaan soj á. 'O se aj quene'en soj se vaa qui'yáj nanj á. 24 'O se cataj xna'anj 'unj rihaan soj cuano se vaa man ndo'o síi man gaa naá síi nata' se-nana Diose do', síi nicaj suun rey do', guun rá quene'en se vaa quene'en nij soj, tzaj ne ne quene'en nij so' ma'.

Ne guun rá nij so' cuno nij so' se vaa cuno nij soj, tzaj ne ne cuno nij so' a man adonj —taj Jesucristó rihaan nij síi tucu'yón se-nana so' a.

*Nana nihánj me cuentó nanó Jesucristó che'é síi samaritano racuíj man síi ran' chí'ii a*

25 Gaa ne dan me se canicun' caya 'o síi naqui'yaj cuu se-tucuanj Moisés rihaan yuvii, ne xná'anj so' 'o nana man Jesucristó, che'é rej guun rá so' quirí' so' rej caraa so' cacun' xráa Jesucristó a.

—Daj qui'yáj, gaa ne ca'vee cayánj ga Diose nu' cavii nu' ca'anj, ga maestro' —taj so' rihaan Jesucristó a.

26 Gaa ne cataj Jesucristó rihaan so' a:

—Ne'én so' me nana no rihaan yanj no se-tucuanj Moisés na'. Daj taj yanj yo' nayaa so' ga —taj Jesucristó, xná'anj Jesucristó man so' a.

27 Gaa ne cataj so' rihaan Jesucristó a:

—“Ndaa nimán yá so' guun rá so' ni'yaj so' man Diose síi 'nij ra'a man ní', ne ndaa nu' se nucuaj yá so' caraa cochroj rihaan Diose, ne yo'ó ndaa cúu yave mán so' cuchuman rá ni'yaj man Diose nanj adonj.” Ne, “Adi' se 'ee rá so' man ma'an so' ro',

danj gaa 'ee rá so' man tuví' so' á", taj se-tucuanj Moisés adonj —taj sí naqui'yaj cuu se-tucuanj Moisés yo' a.

<sup>28</sup> Gaa ne cataj Jesucristó rihaan so' a:

—Ya uxrá a'mii so' á. Danj qui'yáá so', gaa ne cayáán so' ga Dióse nu' cavii nu' ca'anj nanj á —taj Jesucristó rihaan so' a.

<sup>29</sup> Tzaj ne sí sa' inanj me sí tucu'yón se-tucuanj Moisés, rá ma'an so' a. Che'é dan xná'anj so' nana nihánj man Jesucristó a:

—Me sí me tuví' 'unj ga —taj so' a.

<sup>30</sup> Gaa ne canicaj Jesucristó, nanó so' se-cuento sí samaritano a:

—Dan me se cavii 'o sí israelitá chuman' Jerusalén, ca'anj so' chuman' Jericó a. Vaj so' chrej, gaa ne caráán sí ituu man so' chrej, ne go' uxrá nij sí ituu man so', ne quirii nij sí ituu sagan' so', ne daj doj se cavi' so', gaa ne tanáj nij sí ituu man so' a.

<sup>31</sup> Gaa ne dan me se vaj 'o xrej nicun' rihaan ní sij israelitá chrej yo' a. Quene'en so' man sí quiran' chi'ij naj tu'va chrej, tzaj ne cachén yanj so' ca'anj so' a. <sup>32</sup> Gaa ne dan me se vaj 'o ta'ní ta'nij si'no Leví sí racuj man xrej uún a. Quene'en so' man sí quiran' chi'ij yo', tzaj ne cachén yanj so' ca'anj so' uún a.

<sup>33</sup> "Gaa ne dan me se ca'na' 'o sí samaritano uún a. Nuveé sij israelitá me so' ma'. Sij yanj avii rej Samaria me so' a. Quene'en so' man sí quiran' chi'ij yo', gaa ne cunuu 'ee rá so' man sí quiran' chi'ij yo' a.

<sup>34</sup> Ca'anj so' qui'yaj cono'ó so' man sí quiran' chi'ij yo', ne cuta' so' rmedió rej quiran' chi'ij, ne nacutáj so' mantá rej quiran' chi'ij yo' a. Gaa ne cuta' sí samaritano yo' man sí quiran' chi'ij yo' xráá daán so' xcuu vaj ga so', ne ca'anj roj so' ve' aran' yuvij chéé chrej, ne taj ya'anj sí samaritano yo' man sí quiran' chi'ij yo' a. <sup>35</sup> Cachén 'o yan', ne yo'ó güi me se guun rá sí samaritano ca'anj so', ne quirii so' vj sa'anj denario, ne caxrj so' ston sí tucua ve' se vaa taj ya'anj so' man sí ran', gaa ne cataj so' rihaan sí tucua:

“Asa' ca'na' uún 'unj, ne naru'vee 'unj me daj ma'an sa'anj me gaa tu'vee so', rá so'”, taj sí samaritano rihaan sí tucua a. —Veé danj síj cuentó nanó Jesucristó rihaan sí naqui'yaj cuu se-tucuanj Moisés yo' a.

<sup>36</sup> Gaa ne xná'anj Jesucristó nana nihánj man sí naqui'yaj cuu se-tucuanj Moisés yo' a:

—Va'nuj nij sí vaj rá chrej yo', gaa ne me so' me tuví' sí quiran' chi'ij yo', rá so' ga —taj Jesucristó, xná'anj Jesucristó man so' a.

<sup>37</sup> —Sí cunuu 'ee rá man so' ro', me tuví' so', raj a —taj sí naqui'yaj cuu se-tucuanj Moisés rihaan Jesucristó a.

Ne cataj uún Jesucristó rihaan so' a:

—Ase vaa qui'yaj sí cunuu 'ee rá man sí quiran' chi'ij yo' ro', veé danj qui'yaj guee so', ca'anj so' ei —taj Jesucristó rihaan sí naqui'yaj cuu se-tucuanj Moisés yo' a.

*Nana nihánj taj xna'anj se vaa ca'anj Jesucristó tucua roj chu'vij Marta a*

<sup>38</sup> Dan me se vaj Jesucristó chrej ga nij sí tucu'yón se-nana so', ne cuchi' so' 'o chuman', ne dan me se ca'vej rá 'o chana cu'naj Marta yanj chuman' yo' caran' Jesucristó tucua no', <sup>39</sup> ne yáán chu'vij no' chana cu'naj Mariá ga no', ne dan me se ca'anj cayáán chu'vij no' Mariá tacóó Jesucristó, ne nanó xrej no' se-nana so' a. <sup>40</sup> Tzaj ne Marta ro', daj a suun caraya'anj no' a. Dan me se quinichrun' Marta rihaan Jesucristó, ne cataj no' rihaan so' a:

—Me che'é ne rihuun rá so' se vaa dínj ne chu'vij 'unj, ne orún' ma'anj 'yaj chuvii, ga Señor'. Cataj so' rihaan no' se vaa racuj no' manj á —taj Marta rihaan Jesucristó a.

<sup>41</sup> Tzaj ne cataj Jesucristó rihaan no' a:

—Xa' che'é suun man rihaan chumij nihánj, tzaj ne taj che'é caraya'áán so' ndaa vaa 'yáá so', man Marta. Snúú rá so', 'yaj suun vaa rihaan so' á. 'O se taj che'é caraya'anj ní rasuun man rihaan chumij nihánj ma'. <sup>42</sup> 'O se doj a vaa suun achiin

qui'yaj ní, ne vaa orún' suun sa' ya ya achiin rihaan ní' nanj á. Ne Mariá nihánj, tzaj ne cunaj 'yaj no' se vaa me rá no' cunó no' se-nanaj, ne taj che'é cataj ní' se vaa nij 'yaj no' uno no' se-nanaj ma' —taj Jesucristó rihaan Marta a.

## 11

*Nana nihánj taj xna'anj daj ca'mii ní' gaa achín ni'yaj ní' rihaan Diose a*

<sup>1</sup> Gaa ne dan me se cachín ni'yaj Jesucristó rihaan Diose 'o güii, ne gaa quisij cachín ni'yaj so' rihaan Diose, gaa ne cataj 'o sí tucu'yón se-nana so' rihaan so' a:

—Tucu'yón so' man núj daj ca'mii núj gaa cachinj ni'yaj núj rihaan Diose, Señor. 'O se xa' sí cu'naj Juan sí cuta' ne man yuvii, tzaj ne tucu'yón so' rihaan nij sí tucu'yón se-nana so' daj ca'mii nij so' gaa cachinj ni'yaj nij so' rihaan Diose, ne dan inanj qui'yáa so' che'é núj, rá núj a —taj so' rihaan Jesucristó a.

<sup>2</sup> Gaa ne dan me se ca'mii Jesucristó nana nihánj rihaan nij so' a:

—Nanj cataj soj gaa cachinj ni'yaj soj rihaan Diose á: “Ataj Chij, me rá núj xcaj yuvii cuentá se vaa inanj sa' 'yáa so' a. Ne me rá núj quisij güii guun chij so' rihaan chumii nihánj a. <sup>3</sup> Ne 'o 'o güii me se rque so' nu' rasuun achiin man núj cha núj á. <sup>4</sup> Ne caraá x'naa so' che'é cacun' taj xraá núj á. 'O se ma'an núj me sí aráj x'naa che'é cacun' 'yaj tuvi' núj rihaan núj nanj adonj. Dan me se caráan ra'á so' xraá núj rihaan chrej chi'ii á”. Danj cataj soj gaa cachinj ni'yaj soj rihaan Diose ei —taj Jesucristó rihaan nij sí tucu'yón se-nana so' a.

*Nana nihánj taj xna'anj se vaa no xcuún ní' cachinj ni'yaj ní' rihaan Diose che'é rasuun achiin man ní' a*

<sup>5</sup> Gaa ne canicaj Jesucristó, nanó so' 'o se-cuento sí cachín rasuun rihaan tuvi' rej nij a:

—Dan me se cataj ní, ne cuchí' 'o so' tucua tuvi' so' yan', ne cataj so' rihaan tuvi' so': “Qui'yáa so' se ndo'o,

ne racuj so' va'núj chraa manj, tinuj. <sup>6</sup> Ca'na' 'o tuvij sí achén chrej, ne caran' so' tucua, tzaj ne taj vaj chraa rihanj goj cha so' ma'”, cataj so' rihaan tuvi' so' a. <sup>7</sup> Ne daj cataj tuvi' so' rihaan so', rá soj ga. Cataj tuvi' so': “Se narii so' nej rihanj, man tinuj. Aj naqui'yaj raan 'unj ta'yaa, ne aj otoj nij ta'nij núj, ne rmij naxagaj rquej chraa man so' ei”, cataj tuvi' so' rihaan so', rá soj na'. Daj chihaa mij se ca'mii so' danj ma'. <sup>8</sup> Dan me se cataj xna'anj 'unj rihaan soj cuano se vaa sí otoj yo' ro', nda' se na'vej rá so' naxagaa so' go' so' chraa man tuvi' so', tzaj ne che'é se ne uun na'aj tuvi' so' achín achín so' chraa, ne che'é dan guun rmii xréé sí naj otoj, gaa ne naxagaa so', ne go' so' me ma'an rasuun achiin man sí nicun' ta'yaa yo' adonj.

<sup>9</sup> Ne 'unj nihánj me sí cataj xna'anj rihaan soj se vaa cachinj soj se vaa achiin man soj rihaan Diose, ne so' me sí rque man soj, ne nano' soj rasuun achiin man soj, ne nari' soj rasuun yo', ne ase vaa 'yaj sí tica'mii ta'yaa tucua tuvi' ro', danj qui'yaj soj ga Diose, ne ca'nuu Diose ta'yaa yo', ne rque Diose rasuun achiin man soj adonj. <sup>10</sup> 'O se sí achín rasuun rihaan Diose ro', quiri' so' rasuun achiin man so', ne sí nano' rasuun achiin man ro', quiri' so' rasuun yo', ne sí tica'mii ta'yaa rej yanj Diose ro', ca'nuu Diose ta'yaa, ne quiri' sí tica'mii ta'yaa rasuun achiin man so' adonj. <sup>11</sup> Xcaj soj cuentá se vaa ma'an soj, nanj yuvii me soj, tzaj ne sese achín ta'ní yo' tuvi' soj chraa cha yo' man soj, ne se ca'vee nano' soj yahij ne caxrii soj ston yo' ma'. Ne sese achín ta'ní soj nee xcuaj cha yo' man soj, ne se ca'vee nano' soj xcuáa ne caxrii soj ston yo' ma'. <sup>12</sup> Ne sese achín ta'ní soj xruú chuchee cha yo' man soj, ne se ca'vee nano' soj xcuun ne caxrii soj ston yo' ma'. <sup>13</sup> Dan me se danj nanj soj, ne sí chi'ii nimán me soj, tzaj ne ne'en soj rque soj se sa' cha ta'ní soj ei. Che'é dan táa a Rej soj sí nicun' xta', ne sij sa' inanj me so',



ne so' me sí rque ya Nimán man nij sí achíin Nimán Diose rihaan so' nanj adonj. —Danj cataj Jesucristó rihaan nij sí tucuyón se-nana so' a.

*Nana nihánj taj xna'anj se vaa cuta' nij sí fariseo cacun' rmi' xráa Jesucristó se vaa ca'mii Jesucristó ga sí chree a*

<sup>14</sup> Dan me se 'o güii quirii Jesucristó yo' o nana chree nimán 'o sí ya'mii, ne dan me se ya'mii so', qui'yaj nana chree yo', tzaj ne curihanj nana chree nimán so', ne guun che'e so' ca'mii so' adonj. Ne caráya'anj uxrá nij yuvii quene'en nij so' se vaa qui'yaj Jesucristó, <sup>15</sup> ne ta'aj nij yuvii cataj se vaa a'mii Jesucristó ga sí chree cu'naj Beelzebú sí uun chij rihaan nij nana chree, ne che'é dan rii so' man nij nana chree nimán yuvii, taj ta'aj nij yuvii, ni'yaj nij yuvii man Jesucristó a. <sup>16</sup> Ne yo'ó ta'aj nij yuvii guun rá cuta' cacun' xráa Jesucristó, ne che'é dan cachíin ni'yaj nij so' rihaan Jesucristó se vaa qui'yaj so' 'o suun sa' nocoo 'na' rej xta' ni'yaj nij so', taj nij so' a. <sup>17</sup> Dan me se quene'en ma'an Jesucristó daj vaa nimán nij yuvii, ne che'é dan cataj so':

—Ne'en soj se vaa sese vaa 'o nación, ne sese xra' ta'aj nij sí uun chij rihaan nación yo' ne cunu' ma'an nij so' ga tuvi' nij so', ne vaa güii, ne nu' nación yo' quirí' nu' nanj adonj. Ne sese cunu' ta'aj nij yuvii man 'o barrio ga tuvi' yuvii sí man ma'an barrio yo' ro', ne vaa güii, ne quirí' nu' barrio yo', qui'yaj nij so' nanj adonj. <sup>18</sup> Che'é dan me sese racuíj sí chree sí cu'naj Satanás manj rii 'unj man tuvi' so' nana chree nimán nij yuvii, ga ne asa' ca'vee guun chij ndo'o so' rihaan nij yuvii man rihaan chumii nihánj, rá soj ga. Nana nihánj xna'anj 'unj man soj che'é se me rá soj cataj soj se vaa sí chree cu'naj Beelzebú ro', me sí racuíj manj rij man nana chree nimán nij yuvii, rá soj vaa nanj á. <sup>19</sup> Dan me se rii 'unj man nij nana chree nimán nij yuvii, 'yaj sí chree cu'naj Beelzebú, che'é se a'mii 'unj ga

so', rá soj a. Tzaj ne nij sí tucuyón se-nana soj me se veé danj rii uún nij so' man nij nana chree nimán nij yuvii uún ei. Ne asa' a'vee 'yaj nij so' danj, rá soj ga. Ne vaa nij so' vaa, veé danj a'mii nij so' ga sí chree, rá soj ga na'. Che'é nana ca'mii soj me se ma'an nij sí tucuyón se-nana soj cuta' cacun' xráa soj se vaa ca'mii ne soj adonj. <sup>20</sup> Tzaj ne 'unj me se ya ma'an ra'a Diose racuíj manj rii 'unj man nij nana chree nimán nij yuvii adonj. Che'é dan xcaj soj cuentá se vaa aj guun che'e Diose guun chij Diose rihaan chumii nihánj adonj.

<sup>21</sup> "Dan me se sese 'o sí ru'vee yanj rá ve' me se vaa aga' sihaa do', vaa mixté do', rihaan so', ne tumé so' si'yaj so' yáan so', ne taj sí ca'nee si'yaj so' ma'. <sup>22</sup> Tzaj ne sese ca'na' yo'ó sí vaa doj fuerzá rihaan, ga ne qui'yaj canaán so' rihaan sí yanj raan, ga ne ca'nee so' nu' saga' so' do', nu' si'yaj so' do', ne cuxra' ta'aj so' ga tuvi' so' nanj adonj. Ta'nga' danj 'yáa 'unj ga sí chree, ne 'yaj canaán 'unj man so' adonj.

<sup>23</sup> "Naj guun sí na'vej rá qui'yaj suun ga 'unj ro', sí taj ri'yunj manj me so' a. Ne naj guun sí ne racuíj manj naqui'yaj chre' 'unj man yuvii canoco' man Diose ro', so' me sí ticha'nuu man nij yuvii, ne aráan so' rihaan nij yuvii se canoco' nij yuvii man Diose ei —taj Jesucristó rihaan nij yuvii a.

*Nana nihánj taj xna'anj daj 'yaj nana chree ga anicaj uún nana chree nimán yuvii a*

<sup>24-25</sup> Ga ne cataj uún Jesucristó rihaan nij yuvii a:

—Ne ga tihaj avii yuun yo' o nana chree nimán snó'o, ne chéé rma'an nana chree yo' nano' so' rej cayáan so', tzaj ne taj se qui'yá' quirí' nana chree yo' rej cayáan so', ga ne me rá uún nana chree yo' canicaj so' rej cavii so' ga naá a. Dan me se taj nana chree yo': "Canicaj uún 'unj nán' 'unj rej cavii 'unj a. Ve'é nanj vaa tucaj, ne naruvii rá ve' tucuj cuano,

ne uun yâj yanj rá ve' tucuj cuano adonj", taj nana chree yo' a. <sup>26</sup> Gaa ne dan me se anicaj uún nana chree yo' nimán snó'o yo', ne nano' nana chree yo' yo'ó chij tuvi' nana chree yo' sí chi'ii doj, ne 'na' nique uún so' nimán snó'o yo', gaa ne cayáán taran' nij nana chree yo' a. Dan me se gaa naá gaa cayáán orún' nana chree yo', gaa ne maan ta'nga' quij vaa nimán snó'o yo', tzaj gaa namán yo'ó chij nana chree yo', gaa ne doj a tico nana chree man so', ne doj a quij vaa nimán snó'o yo', 'yaj nana chree yo' a adonj —taj Jesucristó rihaan nij yuvii a.

*Nana nihánj taj xna'anj me sí me nij sí cavii sa' ga Diose a*

<sup>27</sup> Dan me se gaa ca'mii Jesucristó nana vaa danj, gaa ne nucuj ca'mii 'o chana nicun' sca'núj nij yuvii, cataj no':

—Cavii sa' ní so', che'é se cuchruj no' mán so', ne tucutzii no' mán so' á —taj chana yo', caguáj no' rihaan Jesucristó a.

<sup>28</sup> Tzaj ne cataj Jesucristó a:

—Sí cavii sa' ya ro', me sí uno se-nana Diose ne 'yaj ndaa vaa taj nu' nana yo' adonj —taj Jesucristó rihaan nij yuvii yo' a.

*Nana nihánj taj xna'anj me suun sa' nocoo me qui'yaj Jesucristó, yan guun ya rá nij yuvii se vaa ya vaa nana ca'mii so' a*

<sup>29</sup> Dan me se cunuu chre' doj yuvii rihaan Jesucristó, ne che'é dan guun che'e so' ca'mii so' nana nihánj a:

—Inanj che'é se yuvii vaa chi'ii nimán me soj ro', che'é dan me rá soj qui'yáj suun sa' nocoo á. Tzaj ne se qui'yáj suun sa' nocoo che'é soj ma'. Maan se quene'en soj se vaa ase vaa quiran' sí cu'naj Jonás gaa naá ro', danj quirán' 'unj, vaa güii nanj á.

<sup>30</sup> Dan me se qui'yaj Diose suun sa' nocoo ga sí cu'naj Jonás quene'en nij sí man chuman' Nínive gaa naá, ne danj inanj qui'yaj uún Diose ga 'unj sij ca'néé so' nicaj yu'unj man yuvii, quene'en soj adonj.

<sup>31</sup> "Ne güii ca'ne' Diose cacun' che'é yuvii ro', cuchí' chana nicaj suun reiná guun chij rihaan chuman' naj gan' ndo'o rej sur, ne canicun' no' rihaan soj, qui'yaj Diose, ne cuta' no' cacun' xráá soj adonj. 'O se gan' ndo'o cachéé no' cuchí' no' rihaan sí cu'naj Salomón, ne cuno no' nana cuu tucu'yón Salomón man no' adonj. Ne xa' 'unj sij nicun' rihaan soj cuano, tzaj ne sa' doj vaa 'unj rihaan sí cu'naj Salomón yo' adonj. Tzaj ne na'vej rá soj cuno soj nana a'mii 'unj rihaan soj a man adonj. <sup>32</sup> Ne nij sí man chuman' Nínive ro', canicun' nij so' ga ma'an soj sij vaa i'na' rihaan chumii nihánj cuano asa' quisij güii ca'ne' Diose cacun' che'é yuvii, ne cuta' nij sí man chuman' Nínive yo' cacun' xráá soj adonj. Cuno nij so' nana ca'mii natáj sí cu'naj Jonás, ne nuchran' nimán nij so', ne canoco' nij so' man Diose adonj. Ne xa' 'unj sij nicun' rihaan soj cuano, tzaj ne sa' doj vaa 'unj rihaan sí cu'naj Jonás yo', tzaj ne taj se qui'yá' naqui'yaj sa' soj nimán soj ma' —taj Jesucristó rihaan nij yuvii yo' a.

*Nana nihánj taj xna'anj se vaa no xcúún ní xcaj ní cuentá daj qui'yaj ní a*

<sup>33</sup> Ne cataj uún Jesucristó rihaan nij so' a:

—Gaa rmi', ne a 'o yuvii ne uta' ya'an raá aga' ya'an ne axríj yuve nij so' rque 'o chrúún ma'. Sese rmi', ne achrón nii ya'an raá aga' ya'an ne uta' nii aga' yo' rej xta', ne daj a nij yuvii atúj rá ve' ro', chuguun ni'yaj nij so' adonj.

<sup>34</sup> "Rlij rihaan ní' me ya'an nicaj yu'unj man ní' ei. Dan me se sese rlij rihaan ní' ro', ni'yaj yo' ne uun sa' rá yo', gaa ne nu' nee man ní' ro', sa' vaa, ne adi' se chuguun aga' ya'an ro', danj chuguun man ní' gaa sa' rihaan ní' adonj. Tzaj ne sese rlij rihaan ní' ro', ni'yaj yo' ne inanj uun chi'ii rá yo', gaa ne nu' nee man ní' ro', uun chi'ii rá, gaa ne adi' sí nicun' yan rmi' ne cunudanj man so' ro', rmi', ne danj vaa sí uun chi'ii rá adonj. <sup>35</sup> Xcaj

ndo'o soj cuentá se gaa nanj quina'aj ya'an nicaj yu'unj man soj ne guun soj 'o se rmi' a. <sup>36</sup> Dan me se sese cunudanj man ní' nuú ya'an, gaa ne taj a doj se rmi' nuu man ní', gaa ne cunudanj man ní' ro', chuguun, ne adi' gaa o' cachun' ya'an xráá nii ne chuguun nu' man nii ro', danj vaa ní' adonj —taj Jesucristó rihaan nij yuvii yo' a.

*Nana nihánj taj xna'anj che'é cacun' tumé nij síí fariseo a*

<sup>37</sup> Dan me se gaa ca'mii Jesucristó rihaan nij yuvii, ne canacúún 'o síí fariseo man so' chá so' chraa tucúa síí fariseo yo', gaa ne dan me se ca'anj cayáán roj so' rihaan mesá a. <sup>38</sup> Dan me se xcaj síí fariseo yo' cuentá se vaa ne noco' Jesucristó se-tucuanj nij síí fariseo se vaa ne na'ya' so' gaa chá so' chraa, gaa ne caráya'anj ndo'o síí fariseo yo' a. <sup>39</sup> Che'é dan cataj síí 'nij ra'a man ní' rihaan so':

—Xa' soj sij fariseo, tzaj ne ase vaa rasuun, ne sa' uxrá na'nu' nii xráá yo', tzaj ne rque yo' ro', me se vaa nacaj guee yo', ta'nga' danj vaa guee soj, ne xráá soj me se ve'é naruvii, tzaj ne nimán soj me quij vaa, ne niha' uxrá rá soj ca'nee soj si'yaj tuvi' soj, ne noco' ndo'o soj chrej chi'ii adonj. <sup>40</sup> Nuveé sij acaj cuentá me soj a ma'. Ne'en soj se vaa Diose ro', me síí qui'yaj ra'a soj, ne na'ya' ndo'o soj, ne veé so' me síí qui'yaj nimán soj uún a. <sup>41</sup> Dan me se go' soj ta'aj se chá do', ta'aj sa'anj do', man nij síí nique, gaa ne xcaj soj cuentá se vaa síí sa' nimán me soj adonj.

<sup>42</sup> "Tzaj ne nique soj sij fariseo nanj á. 'O se quiran' uxrá soj sayuun nanj adonj. 'O se sese vaa nuu xlá do', coj ruda do', me ma'an cuêj do', rihaan soj, ne rque soj 'o nánj rasuun yo' rihaan Diose che'é 'o 'o chi' nánj rasuun vaa rihaan soj nanj á. Tzaj ne ne a'ne' nicaj soj cacun' che'é tuvi' soj ma'. Ne aráj cochroj soj rihaan Diose ma'. Tzaj ne me rá Diose qui'yaj soj nu' nana noco' nihánj, ne na'vej rá

Diose tanáj xco soj yo'ó nana le'ej doj yo' a ma'.

<sup>43</sup> "Nique soj sij fariseo nanj á. Quiran' uxrá nij soj sayuun adonj. 'O se niha' rá soj quitaj soj chruun xlá sa' doj nicun' rá ve' tucu'yón ní' se-tucuanj Moisés, ne niha' rá soj caráya'anj yuvii man soj gaa chéé soj yu'vee a.

<sup>44</sup> "Nique soj che'é sayuun quiran' soj á. Ne ase vaa chraan naj xngá rihaan santó ro', vaa soj, ne xráá soj ro', vaa catzii, tzaj ne nimán soj me se adi' se vaa cúú ri'yuj ro', vaa nimán soj adonj. Ne vaa chraan naj xngá rihaan santó, ne xráá yo' me se sa' uxrá vaa yo', ne rque yo' me se cúú ri'yuj inanj man rque yo', ne nij yuvii me se chéé nij yuvii yo' xráá chraan, ne taj nij so' se vaa sa' ndo'o vaa chraan yo', taj nij so', tzaj ne ne ne'en nij so' se vaa inanj cúú ri'yuj man rque yo' a man adonj. Ta'nga' danj vaa guee soj adonj —taj Jesucristó rihaan nij síí fariseo yo' a.

*Nana nihánj taj xna'anj che'é cacun' tumé nij síí naquiyaj cuu se-tucuanj Moisés rihaan yuvii a*

<sup>45</sup> Gaa ne ca'mii 'o síí naquiyaj cuu se-tucuanj Moisés rihaan yuvii, ne cataj so' rihaan Jesucristó a:

—Tzaj ne nachrí' so' ni'yaj so' man ma'an núj gaa a'mii so' nana vaa danj á —taj so' rihaan Jesucristó a.

<sup>46</sup> Gaa ne cataj Jesucristó rihaan so' a:

—Ne nique ma'an soj sij naquiyaj cuu se-tucuanj Moisés rihaan yuvii a. Ma'an soj uún quiran' uxrá sayuun nanj adonj. 'O se a'ne' uxrá soj suun rihaan yuvii daj qui'yaj nij yuvii canoco' nij yuvii man Diose, tzaj ne dan me se ase vaa yuvii araa ndo'o rasuun 'ee xráá tuvi' vaa nij soj, ne a doj ne racuíj soj man yuvii cata yuvii rasuun 'ee yo' a ma'. A 'ó raa ra'a nij soj ne racuíj soj man yuvii a man adonj.

<sup>47</sup> "Nique soj che'é sayuun quiran' soj a. Ve'é une' soj chraan yan naj cúú man nij síí nata' se-nana Diose gaa

naá, tzaj ne ma'an xii soj ro', me sí ticavi' man nij so' adonj. <sup>48</sup> Dan me se che'é se ne'en ní se vaa 'yaj ma'an soj, ne che'é dan xcaj ní cuentá se vaa 'o vaa rá soj ga xii soj sí man gaa naá, ne cyaan 'yaj soj ga xii soj adonj. Dan me se nij so' ro', ticavi' man nij sí nata' se-nana Diose, ne soj ro', une' chraan yan naj cúu man nij so' adonj.

<sup>49</sup> "Che'é dan cavii 'o nana cuu raa Diose, cataj Diose: "Xa' yuvii nihánj, tzaj ne ca'nej 'unj sí nata' se-nanaj rihaan nij so' a. Dan me se ticavi' nij so' man ta'aj nij sí ca'nej 'unj, ne yo'ó ta'aj nij so' me se me rej ma'an vaj nij so', ne quitaj ri'yunj uxrá nij so' man nij sí ca'nej a. <sup>50</sup> Ndaa síj, gaa ne nu' ton cayanj man nij sí nata' se-nana Diose asij gaa guun che'e chumii ro', nu' cacun' yo' ro', nata' xráa nij so' a. <sup>51</sup> Dan me se asij ton cayanj man sí cu'naj Abel ne ndaa ton cayanj man sí cu'naj Zacarías gaa cavi' so' rihaan nuvi' yan nicun' mesá altar xij ro', nu' cacun' yo' ro', nata' xráa nij so' a", taj Diose a. Dan me se cataj xna'anj 'unj rihaan soj cuano se vaa quiran' ma'an nij tuví' nij soj sayuun che'é nu' cacun' yo' adonj.

<sup>52</sup> "Nique soj sij naqui'yaj cuu se-tucuanj Moisés rihaan yuvii a. Quiran' uxrá soj sayuun adonj. Taj se qui'yá' xcaj yuvii cuentá, 'yaj soj ma'. Dan me se ma'an soj ro', na'vej rá catuu se-tucuanj Diose, ne nij sí me rá catuu me se aráan soj chrej rihaan nij so', ne na'vej rá soj catuu nij so' a man adonj —taj Jesucristó rihaan nij sí naqui'yaj cuu se-tucuanj Moisés rihaan yuvii a.

<sup>53</sup> Dan me se curihanj Jesucristó ve' yo', ne guun che'e nij sí naqui'yaj cuu se-tucuanj Moisés do', nij sí fariseo do', táa ri'yunj uxrá nij so' man Jesucristó, ne guun che'e nij so' xná'anj nij so' man so' che'é que'ee rasuun a. <sup>54</sup> Dan me se nanó xrej uxrá nij so' nana ca'mii Jesucristó che'é rej guun ndo'o rá nij so' cuta' nij so' cacun' xráa Jesucristó che'é nana tu'va so' a.

## 12

*Nana nihánj taj xna'anj se vaa ne ca'vej rá Jesucristó qui'yaj nij sí tucuyón se-nana so' ndaa vaa qui'yaj nij sí fariseo a*

<sup>1</sup> Dan me se cunuu chre' uxrá yuvii rej vaj Jesucristó, ne uxrá chruj nij so', ne ndaa tiguíj tuvi' ma'an nij so' a.

Gaa ne guun che'e Jesucristó ca'mii so' asino yaan ga nij sí tucuyón se-nana so', cataj so':

—Cutumé soj man soj se gaa nanj quiran' soj sayuun, qui'yaj se-levadura nij sí fariseo á. Dan me se taj nij so', ne inanj nana sa' a'mii nij so', taj nij so', tzaj ne taj ma'. Tu'va rma'an nij so' nanj adonj. Nuveé nana sa' a'mii nij so' ma'. Inanj nana nucui' rá a'mii nij so' nanj adonj. <sup>2</sup> Tzaj ne dan me se nu' nana ca'mii yuve nij so' do', nu' rasuun 'yaj yuve nij so' do', nu' yo' ro', nurihanj quene'en cunudanj yuvii vaa güii adonj. <sup>3</sup> Che'é dan nu' nana ca'mii soj rej rmi' ro', vaa güii nurihanj yo' rej chuguun, ne nu' nana ca'mii soj xréé tuvi' soj rej rá ve', ne nurihanj yo' vaa güii ndaa patio rihaan ve' adonj —taj Jesucristó rihaan nij so' a.

*Nana nihánj taj xna'anj se vaa se cuchu'vi' ní quene'en ní yuvii ma'*

<sup>4</sup> Gaa ne cataj uún Jesucristó a:

—Dan me se tuví' 'unj me soj, ne che'é dan cataj xna'anj 'unj rihaan soj se vaa se cuchu'vi' soj quene'en soj nij sí ticavi' man nee man soj ma'. 'O se asa' qui'yaj nij so' danj, gaa ne taj vaj doj se chi'ii qui'yaj nij so' man soj a ma'. <sup>5</sup> Tzaj ne nihánj me se cataj xna'anj 'unj rihaan soj me sí cuchu'vi' soj ni'yaj soj man a. Dan me se vaa che'é cuchu'vi' soj ni'yaj soj Diose adonj. Asa' quisíj ticavi' nü man soj, gaa ne so' me sí ca'nej man soj rihaan ya'an cacaa soj sese tumé soj cacun' adonj. Che'é dan taj 'unj rihaan soj se vaa vaa che'é cuchu'vi' soj ni'yaj soj man so' adonj.

<sup>6</sup> "Ne'en soj daj vaa nij xtâj chrin' se vaa 'un' ya xo' nó chi' guee cha'aa a.



Tzaj ne taj ya'anj uxrá Diose man 'o 'o nij xo' a. <sup>7</sup> Ne Diose me se vaa cuentá yuvé raá soj 'yaj so', ne ne'en so' me daj yuvé raá soj, ne che'é dan se cuchu'vi' soj che'é sayuun qui'yaj yuvi man soj ma'. 'O se uxrá vaa yu'vee doj nó soj rihaan xtâj chrin' yo', 'yaj Diose adonj. <sup>8</sup> Ne cataj xna'anj 'unj rihaan soj cuano se vaa nō xcúún soj nata' ya soj rihaan yuvi se vaa me soj síi noco' manj, ne nu' síi 'yaj danj ro', vaa güii, ne 'unj sij ca'née Diose nicaj yu'unj man yuvi ro', nataj rihaan nij se-mozó Diose se vaa sij noco' manj me so' a. <sup>9</sup> Ne síi taj xna'anj rihaan yuvi se vaa nuveé sij noco' manj me so' ro', vaa güii, ne cataj xna'anj yá 'unj rihaan nij se-mozó Réé 'unj se vaa nuveé sij noco' manj me so' a ma'.

<sup>10</sup> "Dan me se 'unj sij ca'née Diose nicaj yu'unj man yuvi ro', ca'vee se ca'mii yo'o so' nana chi'ii che'ej, ne ca'vee navij cacun' xráá so' qui'yaj Diose, tzaj ne sese ca'mii chi'ii yo'o so' che'é Nimán Diose, ne daj chihaa míj se tinavij Diose cacun' yo' xráá so' a ma'.

<sup>11</sup> "Dan me se asa' tucuatúj nii man soj rá ve' tucu'yón ní' sij israelitá se-tucuanj Moisés ne canicun' soj rihaan nij síi uun chij, ne se nanó rá soj daj ca'mii soj che'é soj rihaan nij so' ma'. <sup>12</sup> 'O se orá yo' ro', ma'an Nimán Diose ro', tucu'yón man soj daj ca'mii soj rihaan nij so' adonj —taj Jesucristó rihaan nij síi tucu'yón se-nana so' a.

*Nihánj me cuentó nanó Jesucristó che'é 'o síi ru'vee caraa sa' que'ee rasuun rihaan chumii nihánj a*

<sup>13</sup> Dan me se cataj yo'o tuvi' nij yuvi yo' rihaan Jesucristó a:

—Cataj so' rihaan tinúú 'unj, ne cuxra' ta'aj so' yo'óo do', rasuun do', gaj, maestro —taj so' rihaan Jesucristó a.

<sup>14</sup> Gaa ne:

—Me che'é guun rá so' se vaa guún 'unj síi a'ne' cacun' che'é soj ga. Me che'é ca'mii 'unj che'é rasuun vaa rihaan roj tinuj soj, rá so', ga tinu' —taj Jesucristó rihaan so' a.

<sup>15</sup> Gaa ne cataj Jesucristó rihaan nij yuvi a:

—Tumé uxrá soj man soj rihaan nij rasuun xcoj ruvaa rá a. Nuveé rasuun man rihaan ní' qui'yaj cavi sa' nimán ní' ma' —taj Jesucristó rihaan nij yuvi a.

<sup>16</sup> Gaa ne dan me se nanó Jesucristó 'o se-cuento 'o síi ru'vee rihaan nij yuvi a:

—'O síi ru'vee me 'o so', ne cavi ndo'o xnaa so', ne man ndo'o rasuun rihaan so', <sup>17</sup> ne dan me se taj so': "A me se qui'yaj ga rasuun man rihanj ne taj rej caraj man rasuun yo' ga", taj so' a. <sup>18</sup> Gaa ne: "Aan a. Aj ne'enj me se qui'yaj á. Tucuanee 'unj man nij cuchruu nii, ne qui'yaj doj ve' xij, ne yo'o caraa chre' 'unj man nij rasuun, ne tinavii 'unj man nij yo' rá nij ve', <sup>19</sup> gaa ne cataj 'unj rihaan nimanj se vaa man ndo'o rasuun rihaan ní' cha ní', ne se nanó rá ní', maan se ve'é cha ní' do', ve'é co'o ní' do', ve'é cayáán ní' do', ve'é cotoj ní' do' a. Danj cataj rihaan nimanj che'é nij rasuun cumán rihanj", taj so' a. <sup>20</sup> Tzaj ne Diose ca'mii rihaan so', cataj Diose: "Síi ni'yon mé so' á. 'O se nij corá me se cavi' so', ne xa' rasuun caraa sa' so', tzaj ne me se guun yo' rihaan so', rá so' ga", taj Diose rihaan ru'vee yo' a. <sup>21</sup> Danj quiran' síi araa sa' rasuun che'é ma'an danj, ne taj vaj a doj rasuun sa' nicaj so', ni'yaj Diose a ma' —taj Jesucristó rihaan nij yuvi a.

*Nana nihánj taj xna'anj se vaa ne nó xcúún ní' nano ndo'o rá ní' che'é se cha ní' do', che'é yatzij cunuú ní' do' a*

<sup>22</sup> Gaa ne cataj Jesucristó rihaan nij síi tucu'yón se-nana so' a:

—Che'é dan cataj xna'anj 'unj rihaan soj se vaa taj che'é nano ndo'o rá soj che'é soj ma'. Ne che'é se cha soj do', ne che'é yan quirí' soj se caráán xráá soj se nanó rá soj ma'. <sup>23</sup> Aj ne'en soj se vaa aj vaa i'na' soj, qui'yaj Diose, ne se guun nucaj Diose rque Diose cha soj, rá soj gaa a na'. Daj chihaa míj se guun danj rá soj ma'. Ne Diose me síi ca'vee rque se cha soj ei.

Ne Diose me sí qui'yaj nee man soj, ne se guun nucaj Diose rque Diose yatzíj caráán xráá soj, rá soj gaa a na'. Daj chihaa míj se guun danj rá soj ma'. Ne Diose me sí ca'vee rque se caráán xráá soj ei.

<sup>24</sup> "Xcaj soj cuentá daj 'yaj nij xcaa, ne ne unô nij xo' 'núú, ne ne rii nij xo' naa, ne taj se-cuchruu nij xo', tzaj ne Diose ro', rque se chá nij xo' adonj. Ne sa' doj vaa soj rihaan xcaa ni'yaj Diose adonj. Ya sa' doj vaa soj chuguanj. <sup>25</sup> Ne nda' se nanó ndo'o rá soj che'é yan chre' vaa soj, tzaj ne a 'ó xco' se guun nucaj soj cachij xcaan soj doj qui'yaj ma'an soj ma'. Maan se Diose ro', me sí ne'en daj gaa cachij soj, ne che'é dan taj che'é nano rá soj a ma'. <sup>26</sup> Dan me se sese se ca'vee qui'yaj soj rasuun le'ej doj, ne asa' ca'vee qui'yaj soj rasuun nocoo doj, rá soj ga. Che'é dan taj che'é nano ndo'o rá soj che'é nij rasuun nocoo doj a ma'.

<sup>27</sup> "O se xcaj soj cuentá ni'yaj soj nij yâj se vaa ve'é ndo'o vaa nij yâj a. Ne 'yaj suun nij yâj, tzaj ne ma'an Diose ro', me sí sa' ndo'o vaa qui'yaj man nij yâj adonj. Ne ne rii nij yâj yu'vej ma'. Tzaj ne adi' se vaa sí rii yu'vej ne sa' uxrá vaa sagan' so' ro', vaa nij yatzíj nuu nij yâj adonj. Dan me se cataj xna'anj 'unj rihaan soj se vaa sí cu'naj Salomón sí cane gaa naá, ne ve'é uxrá vaa yatzíj nuu so', qui'yaj cunudanj sa'anj vaa rihaan so', tzaj ne nij doj vaa yatzíj nuu so' rihaan nij yâj man tacaan yo', qui'yaj Diose adonj. <sup>28</sup> Dan me se danj nanj nij yâj man tacaan yo', tzaj ne sa' uxrá vaa nij yatzíj nuu nij yâj yo', 'yaj Diose, tzaj ne a'yuj ca'ne' nii man nu' coj do', yâj do', ne caraa nii man yo' rihaan ya'an, ne cacaa nu' nij yâj yo' nanj adonj. Ne a' doj yu'vee taj nó yâj yo' a ma'. Táa a soj yuvij, ne se nanó rá soj ma'. Diose me sí rque sagan' soj adonj. Tzaj ne ne guun ya sa' rá soj se vaa Diose me sí racuíj ya man soj man adonj.

<sup>29</sup> "Ne xa' soj, tzaj ne se nano' ndo'o

soj se cha' soj do', se co'o soj do' ma'. Ne se nanó ndo'o rá soj che'é nij yo' ma'. <sup>30</sup> 'O se nij sí man rihaan chumij nihánj sí ne ne'en daj vaa Diose ro', inanj 'yaj suun ndo'o nij so' che'é rasuun man rihaan chumij nihánj adonj. Tzaj ne nu' rasuun achiin man soj ro', aj ne'en Rej soj Diose se vaa achiin rasuun yo' man soj adonj. <sup>31</sup> Tzaj ne nano' soj rej daj qui'yaj soj, ne guun chij Diose nimán soj, gaa ne rque Diose rasuun yo' rihaan soj adonj.

<sup>32</sup> "Se kuchu'vi' soj ma'. Ase vaa daán Diose matzinj vaa soj, ne Diose tumé man soj, ne aj guun rá Rej soj Diose se vaa guun chij soj rihaan chumij nihánj ga so' vaa güii a.

<sup>33</sup> "Cutu'vee soj si'yaj soj, ne go' soj sa'anj man nij sí nique á. Gaa ne vaa güii quirí' soj 'o nanj caraa nu' sa'anj rque, ne xa' nanj yo', tzaj ne daj chihaa míj se xtuu nanj yo', ne xa' sa'anj yo', tzaj ne daj chihaa míj se navij sa'anj yo' a. Yo' me se quirí' soj rej xta', ne rej xta' ro', taj vaj sí ituu ma'. Ne taj vaj xluú chá rasuun ma'. <sup>34</sup> Ne sese inanj che'é rasuun man rihaan chumij nihánj qui'yaj suun soj, gaa ne veé maan rihaan chumij nihánj quinaj nimán soj gaa nanj adonj. Ne sese inanj che'é rasuun man xta' ro', qui'yaj suun soj, gaa ne veé rej xta' ro', ca'anj nimán soj nanj adonj. Me rej ma'an araa soj rasuun, ne veé rej danj vaj nimán soj nanj adonj —taj Jesucristó rihaan nij sí tucu'yón se-nana so' a.

*Nihánj me cuentó nanó Jesucristó che'é mozó na'vij naman ru'vee a*

<sup>35</sup> Ne cataj uún Jesucristó rihaan nij so' a:

—Ase vaa sí 'nij raan nuj catuun ro', danj gaa soj ei. Ase vaa sí nicaj aga' chuguun aco' ya'an ro', danj gaa soj ei. <sup>36</sup> Dan me se qui'yaj soj ndaa vaa 'yaj mozó na'vij so' naman se-ru'vee so' gaa ca'anj se-ru'vee so' cha'anj nara'aa ei. Dan me se asa' namán ru'vee ne nu' tara'a so' ta'yaa, ne nu' ca'nuu mozó yo' ta'yaa, gaa

ne guun niha' rá se-ru'vee mozó yo' adonj. <sup>37</sup> Ne cavii sa' uxrá nij mozó 'yaj danj, che'é se ne cotoj nij so' gaa namán se-ru'vee nij so' a. Dan me se quene'en ya so' se vaa ne cotoj nij so' ma'. Cataj yá 'unj rihaan soj cuano se vaa ma'an ru'vee yo' ro', naqui'yaj sa' so' man so', cayáán se-mozó so' rihaan mesá, qui'yaj so', ne qui'yaj chuvii ma'an so' chá nij se-mozó so' adonj. <sup>38</sup> Dan me se ca'vee se rej yan' naman so' ni', ca'vee se rej taxrej naman so' ni', tzaj ne aj ne'en so' se vaa ve'é inanj na'vij nij mozó yo' man so', ne cavii sa' uxrá nij mozó yo' adonj. Che'é dan qui'yaj soj ndaa vaa 'yaj nij mozó yo' ei. <sup>39</sup> Dan me se sese 'o síi tucua ve' ro', aj ne'en so' me orá ca'na' síi ituu ne qui'yaj ituu síi ituu rasuun man tucua so', ne uxrá cutumé so' tucua so', ne se qui'yaj ituu síi ituu tucua so' tzaj ma'. Maan se ne ne'en so' me orá ca'na' síi ituu man adonj. <sup>40</sup> Dan me se ta'nga' danj vaa guee 'unj sij nicaj yu'unj man yuvii, ne ne ne'en soj me orá ca'na' uún 'unj man adonj. Che'é dan yo'o ni'yaj soj á —taj Jesucristó rihaan nij síi tucu'yón se-nana so' a.

*Nana nihánj taj xna'anj daj quirán' síi ve'é 'yaj suun rihaan Diose do', daj quirán' síi ne 'yaj suun sa' rihaan Diose do' a*

<sup>41</sup> Gaa ne xna'anj síi cu'naj Pedró man Jesucristó, cataj so' a:

—Señor. Che'é ma'an núj me nanó so' cuentó yo' na'. Ase che'é cunudanj yuvii xa' —taj Pedró, xna'anj so' man Jesucristó a.

<sup>42</sup> Gaa ne cataj síi 'nij ra'a man ní' a:

—Che'é dan me sese cune' síi tucua yo'o ve' man yo'o se-mozó so' se vaa cutumé mozó yo' man tuvi' mozó rque so' se chá rihaan nij so' orá chá nij so' chraa, ne daj qui'yaj mozó yo', rá soj ga. Sese ya ya sij ve'é 'yaj suun me so' do', sese ya ya sij avii raá me so' do', ne daj qui'yaj so', rá soj ga. <sup>43</sup> Gaa ne güii naman se-ru'vee mozó ro', sese quene'en se-ru'vee mozó se vaa

ve'é 'yaj suun mozó se-suun ru'vee, ne cavii sa' uxrá mozó yo', qui'yaj se-ru'vee mozó yo' adonj. <sup>44</sup> Ya ya cataj xna'anj 'unj rihaan soj cuano se vaa cune' ru'vee yo' man mozó yo' guun so' síi tumé man cunudanj si'yaj ru'vee yo' a. <sup>45</sup> Tzaj ne sese guun rá mozó yo' se vaa guun raan ndo'o se-ru'vee so', gaa ne guun che'e so' go' so' man yo'o nij mozó do', man nij mozó chana do', ne chá so' co'o so' ne guun xnó so' a. <sup>46</sup> Dan me se ne ne'en so' aman naman se-ru'vee so' a. Ne na'vij so' ca'na' ru'vee a. Tzaj ne síj güii síj orá síj, ne ca'na' ma'an se-ru'vee mozó yo', gaa ne ca'ne' nu' so' man mozó yo', ne cataj so' se vaa ca'anj mozó yo' rihaan ya'an ga yo'o nij síi ne amán rá ni'yaj man Diose a.

<sup>47</sup> "Dan me se xa' mozó ne'en daj me rá se-ru'vee so' qui'yaj so', tzaj ne sese se qui'yaj so' danj, ne qui'yaj so' inanj se vaa rii nimán ma'an so' qui'yaj so', ne cayuun uxrá so' vaa güii adonj. <sup>48</sup> Ne xa' síi ne ne'en daj me rá se-ru'vee so' qui'yaj so', ne qui'yaj so' rasuun na'vej rá se-ru'vee so' qui'yaj so', tzaj ne maan che'é se ne ne'en so' ne qui'yaj so' rasuun chilii ro', maan che'é dan doj cayuun so' adonj.

"Ne síi ata' suun nocoo doj 'yaj Diose ro', doj a guun rá Diose qui'yaj suun so' a. Ne síi tumé doj rasuun che'é Diose ro', doj a gaa rasuun nachin' Diose rihaan so' nanj adonj —taj Jesucristó rihaan nij síi tucu'yón se-nana so' a.

*Nana nihánj taj xna'anj se vaa cunu' ndo'o yuvii ga tuvi' yuvii che'é Jesucristó a*

<sup>49</sup> Gaa ne cataj uún Jesucristó a:

—Ca'ná' 'unj rihaan chumii nihánj che'é rej guun rá 'unj tacuacoj ya'an nimán yuvii, ne guun niha' rá nij yuvii canoco' nij yuvii man Diose adonj. Ne me ndo'o raj se vaa ra'yanj cacó' ya'an yo' nimán nij yuvii adonj. <sup>50</sup> Tzaj ne rej rihaan ní' me se vaa uxrá sayuun quirán' 'unj, se vaa nata' nu' sayuun yo' xraj nanj á. <sup>51</sup> Dan me

se ca'ná' 'un̄j che'é rej dínj doj cayáán nij yuvii man rihaan chumii nihánj ga tuvi' yuvii, rá soj na'. Taj ma'. Cuan̄ nihánj me cataj 'un̄j rihaan soj se vaa ca'ná' 'un̄j che'é rej nata' 'un̄j se-nan̄aj rihaan yuvii, tzaj ne se cuno cunudan̄j nij yuvii rihan̄j ma'. Che'é dan cunu' yuvii ga tuvi' yuvii adon̄j. <sup>52</sup> Dan me se rej rihaan ní' me se, sese cayáán 'un̄' yuvii rá 'o ve', ne cunu' va'n̄uj nij so' ga yavíj nij so', ne cunu' v̄ij nij so' ga ya'n̄új nij so' adon̄j. <sup>53</sup> Dan me se cunu' snó'o ga ta'nij snó'o so', ne cunu' ta'nij snó'o so' ga ma'an so', ne cunu' chana ga ta'nij chana no', ne cunu' ta'nij chana no' ga ma'an no' adon̄j. Ne cunu' chana ga choco' no', ne cunu' choco' no' ga ma'an no', che'é se-nan̄aj adon̄j —taj Jesucristó rihaan nij sí tucu'yón se-nana so' a.

*Nana nihánj taj xna'an̄j se vaa ne quene'en̄ nij yuvii xcaj nij yuvii cuentá che'é sayuun quiran̄' nij yuvii ma'*

<sup>54</sup> Gaa ne cataj Jesucristó rihaan nij yuvii a:

—Dan me se soj me se sa' uxrá ne'en soj xcaj soj cuentá adon̄j. Nu' ne'en soj se vaa gaa avii ngaa rej ata' güii, ne nu' taj soj se vaa caman' uxrá maan, taj soj, ne veé dan̄j 'yaj guee xa' maan, ne aman' ndo'o yo' nan̄j adon̄j. <sup>55</sup> Ne nu' ne'en uún soj se vaa avii nana yuvaá rej rque rej sur, ne nu' taj soj se vaa daj doj ca'na' ndo'o cachi' taj soj, ne veé dan̄j 'yaj xa' cachi', ne maan ndo'o nan̄j adon̄j. <sup>56</sup> Dan me se xa' soj sij nucui' rá me se sí sa' me soj taj soj, tzaj ne tu'va rma'an soj nan̄j adon̄j. 'O se ne'en soj xcaj soj cuentá che'é se vaa rihaan chumii do', che'é se vaa rej xta' do', tzaj ne ne ne'en soj xcaj soj cuentá che'é sayuun quiran' soj sij man rihaan chumii nihánj vaa güii ma'.

<sup>57</sup> "Ne me che'é na'vee xcaj ma'an soj cuentá che'é se vaa no xcúún soj qui'yaj ma'an soj ga. <sup>58</sup> Ne so' me se sese vaa sí me rá cutá' cacun' xráá so' rihaan nij sí nicaj suun, ne gaa tihaj vaj so' chrej ga so', ne ve'é ca'mii

so' ga so', cataj so' rihaan so' se vaa: "Ca'ne' rá so', ne se cutá' so' cacun' xráj ma'", cataj so', ne ve'é ca'mii so' ga so' ei. Ne sese se qui'yáá so' dan̄j ca'mii sa' so' ga so' gaa tihaj vaj roj soj chrej rihaan chumii nihánj, ne nicaj so' man so' ca'an̄j so' rihaan cuese, ne cuese yo' ro', tacuachén man so' ra'a sí tumé taga', ne so' me sí caxrii taga' man so', <sup>59</sup> ne yo' me se guun raan ndo'o so', ne ndaa navij naru'vee so' nu' cacun' qui'yáá so', gaa ne curihan̄j so' taga' nan̄j adon̄j —taj Jesucristó rihaan nij yuvii a.

## 13

*Nana nihánj taj xna'an̄j se vaa quiri' nu' ní' sese se ca'vej rá ní' canicaj nimán ní' tanáj ní' chrej chi'ii a*

<sup>1</sup> Güii dan me se man ta'aj nij yuvii, ne nata' nij so' rihaan Jesucristó che'é daj quiran' ta'aj nij sí man estadó Galilea gaa man nij so' ticavi' nij so' xcuu rihaan Diose gaa ne curihan̄j nij tanuu 'yaj suun rihaan sí cu'naj Pilato, ne ticavi' nij tanuu man nij sí man estadó Galilea yo' a. <sup>2</sup> Gaa ne canicaj Jesucristó cataj so' rihaan nij yuvii nata' nana yo' a:

—Che'é yan quiran' nij so' dan̄j, ne che'é dan sij tumé doj cacun' rihaan cunudan̄j yo'ó nij sí ne estadó Galilea me nij so', rá soj na'. <sup>3</sup> Taj ma'. Tzaj ne cataj xna'an̄j 'un̄j rihaan soj cuan̄o se vaa sese se canicaj nimán soj tanáj soj chrej chi'ii, ne vaa güii quiri' nu' soj ne quiran' soj ndaa vaa quiran' nij so' adon̄j.

<sup>4</sup> "Ne xa' xnu' va'n̄uj nij sí cavi' gaa canee ve' nata' xcaan cu'naj Siloé xráá nij so', gaa ne sij tumé doj cacun' rihaan cunudan̄j nij sí man chuman' Jerusalén me nij so', rá soj gaa na'. <sup>5</sup> Taj ma'. Tzaj ne cataj xna'an̄j 'un̄j rihaan soj cuan̄o se vaa sese se canicaj nimán soj tanáj soj chrej chi'ii, ne vaa güii quiri' nu' soj ne quiran' soj ndaa vaa quiran' nij so' adon̄j —taj Jesucristó rihaan nij yuvii a.



*Nihánj me cuentó nanó Jesucristó se vaa sese se guun rá ní qui'yaj ní ndaa vaa me rá Diose, ne quirí' ní a*

<sup>6</sup> Gaa ne nanó Jesucristó cuentó nihánj a:

—Dan me se 'o snó'o me se naj 'o xnaa so' naa chruj uvá, ne nicun' 'o chruun higó rque naa uvá yo', tzaj ne 'na' so' nano' so' chruj raá yo' chá so', tzaj ne a 'ó chruj ne quirí' so' chá so' raá chruun yo', ne che'é dan quirí' rá so' ni'yaj so' chruun yo' a. <sup>7</sup> Che'é dan cataj so' rihaan sí 'yaj suun rque xnaa so': “Ni'yaj so' ei. Sij va'núj ya yo' 'ná' 'unj nanó' 'unj chruj higó raá chruun nihánj, tzaj ne a 'ó chruj nuvi' raá chruun nihánj chá' ma'. Ca'ne' so' man yo', ne taj che'é canicun' rma'an yo' rihaan to'ój a ma'”, taj so' rihaan sí 'yaj suun rque naa uvá yo' a. <sup>8</sup> Tzaj ne sí 'yaj suun rque naa uvá yo' ro', cataj rihaan so' a: “Qui'yáa so' se ndo'o, ne daj orún' guee yo' cuano tanáj ní' man chruun nihánj, ne canaa 'unj nu' anicaj tacóo chruun yo', ne caraá 'unj ya'luj tacóo chruun yo', señor. <sup>9</sup> Xraj, ne sese yo' natuu ro', ne cumán chruj raá chruun yo', ne quinaj chruun yo', qui'yaj ní' a. Se taj, ne ca'ne' cachrij ní' man chruun yo' ei”, taj sí 'yaj suun naa uvá yo' rihaan sí si'yaj chruun yo' a. —Dan me cuentó nanó Jesucristó rihaan nij yuvi' yo' a.

*Nana nihánj taj xna'anj se vaa nahuun sa' 'o chana guun lacuu xraá, qui'yaj Jesucristó güii naránj rá nij yuvi' israelitá a*

<sup>10</sup> Dan me se 'o güii naránj rá nij yuvi' israelitá me se tucuyón Jesucristó rihaan nij yuvi' cunuu chre' rá ve' tucuyón nii se-tucuanj Moisés, <sup>11</sup> ne dan me se rá ve' yo' ro', nicun' 'o chana guun lacuu xraá, ne nana chree yanj nimán no' ro', me qui'yaj guun lacuu xraá no' a. Ne aj quisij xnu' va'núj yo' quiran' no' danj a. Dan me se ne ca'vee canicun' caya no' a ma'. <sup>12</sup> Dan me se quene'en Jesucristó man no', ne canacúun so' man no', cataj so':

—Cuano nihánj me x'nee chi'ii xraá so', nocoj —taj Jesucristó, <sup>13</sup> ne cuta' so' ra'a so' xraá no' a.

Nu' xcaj chana cuentá se vaa nahuun sa' no', ne nu' guun che'e no' cataj no' se vaa sa' uxrá qui'yaj Diose a.

<sup>14</sup> Tzaj ne ca'maan rá sí 'nij ra'a ve' tucuyón nii se-tucuanj Moisés, che'é se güii naránj rá nij yuvi' israelitá me güii qui'yaj cono'ó Jesucristó man chana yo' a. Che'é dan cataj sí 'nij ra'a ve' yo' rihaan nij yuvi' a:

—Vatan' güii me güii no' xcúun ní' qui'yaj suun ní' 'o 'o smaná a. Ca'na' soj güii yo', ne nahuun sa' soj ei. Se ca'na' soj nahuun sa' soj güii naránj rá ní' ma' —taj so' rihaan nij yuvi' a.

<sup>15</sup> Gaa ne cataj sí 'nij ra'a man ní' rihaan nij tuvi' sí 'nij ra'a ve' a:

—Quij ndo'o vaa nimán soj, ne sí nucui' ndo'o rá me soj adonj. 'O se taran' soj me se ne nache soj daán soj scúj do', daán soj burró do', rej numii xo', ne nicaj soj man xo' 'anj soj rej co'o xo' na güii naránj rá ní' gaa na'. <sup>16</sup> Ne nihánj me nicun' chana nihánj, ne ta'ní' ta'nij si'no' xii ní' sí cu'naj Abraham me no', ne nihánj me quisij xnu' va'núj yo' numij sí cu'naj Satanás man no', ne ca'vee se güii naránj rá ní' me güii cuan', tzaj ne vaa che'é ndo'o nache ní' man no' ra'a sí cu'naj Satanás adonj —taj Jesucristó rihaan sí 'nij ra'a ve' yo' a.

<sup>17</sup> Ne gaa quisij ca'mii so' danj, gaa ne guun na'aj cunudanj nij sí guun rá cunu' ga so', gaa ne guun niha' rá cunudanj nij yuvi' che'é cunudanj nij suun sa' nocoo qui'yaj so' a.

*Nihánj me cuentó nanó Jesucristó che'é caân cuêj mostazá xlá a*

<sup>18</sup> Che'é dan cataj Jesucristó a:

—Daj gaa guun chij Diose rihaan chumi' nihánj, rá soj ga. <sup>19</sup> Dan me se ase vaa achij caân cuêj mostazá xlá ro', danj gaa guun chij Diose rihaan chumi' nihánj adonj. Dan me se nicaj yo'o so' man caân cuêj mostazá xlá ne caxrij so' caân yo' rque to'óo so', ne dan me se xra' caân yo', ne cachij yo', ne asa' cachij yo', ne ase vaa 'o

chruun ro', danj vaa yo' a. Gaa ne cayuu nij xtâj vaj rej xta' raa cuêj yo', ne qui'yaj nij xo' saca' nij xo' raa cuêj yo' adonj. —Danj ca'mii Jesucristó rihaan nij yuvij a.

*Nihánj me cuentó nanó Jesucristó che'é levadura se 'yaj naraa nana rque rachrúún a*

<sup>20</sup> Gaa ne cataj uún Jesucristó a:

—Daj gaa 'o rasuun naqui'yaj ní' rihaan soj, gaa ne quene'en soj daj gaa guun chij Diose rihaan chumij nihánj, rá soj ga. <sup>21</sup> Dan me se naqui'yaj ní' 'o chana caxrj yo'óó levadura rque cunj hariná gaa 'yaj no' rachrúún a. Dan me se ase vaa 'o chana, ne cuxra' ta'aj no' 'o va'nuy ya aga' yo'óó hariná, ne caxrj ndo'o no' yo'óó levadura, ne caxrj yuve no' man yo' ndaa navij naraa ndo'o nana rque yo' a. Ase vaa uun chij yo'óó levadura yo' rihaan cunj hariná ro', danj gaa guun chij Diose rihaan chumij nihánj adonj. —Danj ca'mii Jesucristó rihaan nij yuvij a.

*Nana nihánj taj xna'anj me sí ca'anj cayáán ga Diose ne me sí ca'anj rihaan ya'an a*

<sup>22</sup> Gaa ne vaj Jesucristó cachén so' nij chuman' nocó do', nij chuman' ra'a do', ne tucu'yón so' se-nana so' rihaan nij yuvij a. Ne danj nanj nichrun' so' nichrun' so' chuman' Jerusalén a. <sup>23</sup> Ne xná'anj yo' o so' man Jesucristó, cataj so':

—Ne doj nij sí ca'vee quinanj rihaan sayuun, qui'yaj Diose a na' —taj so', xná'anj so' man Jesucristó a.

Gaa ne cataj Jesucristó rihaan nij yuvij a:

<sup>24</sup> —Ase vaa ta'yaa chruj ndo'o vaa rej cachén yuvij catuu yuvij rihaan Diose adonj. Qui'yaj nucaj soj nimán soj che'é rej catuu soj rej yo' ei. Cataj xna'anj 'unj rihaan soj cuano se vaa guun ndo'o rá nij yuvij catuu nij so' rej yo', tzaj ne se guun nucaj nij so' catuu nij so' ma'. <sup>25</sup> Ne asa' quisj canicun' caya sí tuca ve' yo' ne caráán so' ta'yaa, gaa ne soj ro', canicun' xe', ne guun che'e

soj tica'mii soj ta'yaa, ne cataj soj: “Na'nuu so' ta'yaa catuu núj, Señor”, cataj soj, gaa ne cataj 'unj rihaan soj: “Ne ne'en uxraj me rej cavii soj a ma'”, cataj 'unj rihaan soj gaa nanj adonj. <sup>26</sup> Gaa ne guun che'e soj cataj soj: “Chá núj chraa do', co'o núj na ga so' do', ne tucu'yón so' se-nana so' chiháán núj nanj á”, cataj soj rihanj á. <sup>27</sup> Gaa ne cataj uún 'unj rihaan soj: “Ne ne'en uxraj me rej cavii cunudanj soj sij 'yaj inanj cacun' a ma'. Naxuun soj man soj rihanj á”, cataj 'unj rihaan soj a.

<sup>28</sup> “Ne rej ca'anj soj me se rej ta'vee ndo'o yuvij me yo', ne ndaa chruj ma'an yuvij cúu yan' yuvij, ne quene'en soj man sí cu'naj Abraham do', man sí cu'naj Isaac do', man sí cu'naj Jacob do', man cunudanj nij sí nata' se-nana Diose gaa naá do', se vaa cayáán nij so' ga Diose asa' guun chij Diose rihaan chumij nihánj, ne xa' soj, tzaj ne quene'en soj se vaa aj quiri'lj nii man soj xe' nanj adonj. <sup>29</sup> Ne güi guun chij Diose rihaan chumij nihánj ro', ca'na' ndo'o yuvij man cun' chumij, ne cayáán nij so' rihaan se-mesa Diose, ne cha nij so' chraa adonj. <sup>30</sup> Ne nij sí ne guun chij rihaan chumij nihánj me se xta' ro', guun chij nij so' a. Ne nij sí guun chij ndo'o rihaan chumij nihánj me se rej xta' ro', guun nij so' sí nocó, qui'yaj Diose nanj adonj —taj Jesucristó rihaan nij yuvij yo' a.

*Nana nihánj taj xna'anj se vaa ne cuchu'vi' Jesucristó ni'yaj so' man sí cu'naj Herodes ma'*

<sup>31</sup> Ne güi dan me se cuchi' doj nij sí fariseo rihaan Jesucristó, ne cataj nij so' a:

—Curihanj so' estadó nihánj ca'anj so', ne sí nicaj suun rey cu'naj Herodes me se me ndo'o rá so' ticavj' so' mán so' á —taj nij sí fariseo rihaan Jesucristó a.

<sup>32</sup> Gaa ne cataj Jesucristó rihaan nij so' a:

—Ase vaa chunee avii ndo'o raa qui'yaj sayuun vaa sí cu'naj Herodes

yo', ne ca'anj soj, ne cataj soj rihaan so' se vaa 'unj me se rií 'unj nana chree nimán nij yuvii, ne naqui'yaj sa' 'unj man nij síí ran', ne 'o güii cuan' ne 'o güii a'yuj ne rque va'nuj guee güii qui'yaj suun 'unj se-sunj, ne veé danj quisij se-sunj, qui'yáj nanj adonj. <sup>33</sup> Tzaj ne vaa che'é qui'yaj suun 'unj cuan' ne a'yuj ne yataj, ne rque va'nuj güii qui'yaj suun 'unj che'é xrej 'unj, gaa ne curihanj 'unj estadó nihánj ei. 'O se taj che'é cavi' 'o síí nata' se-nana Diöse rej yaníj yo'ó chuman', ne veé chuman' Jerusalén cavi' so' gaa ca'vee adonj —taj Jesucristó rihaan nij síí fariseo yo' a.

*Nana nihánj taj xna'anj daj quiran' nij síí ne chuman' Jerusalén a*

<sup>34</sup> Gaa ne cataj uún Jesucristó a:

—Nanó uxrá raj che'é soj sij man chuman' Jerusalén nihánj nanj á. Dan me se ticavi' soj man nij síí nata' se-nana Diöse, ne go' soj yahij man nij síí ca'née Diöse cuchí' rihaan soj a. Guun que'ee ndo'o guun rá 'unj naqui'yaj chre' 'unj man soj cutumé 'unj man soj, tzaj ne taj se qui'yá' ca'vee ma'. Dan me se ase vaa 'yaj chuchee naqui'yaj chre' chuchee man ta'níí xo' caráán xo' xcóó xo' xráá ta'níí xo' ro', danj guun raj qui'yáj man soj, tzaj ne ne ca'vej rá soj qui'yáj danj a ma'. <sup>35</sup> Yaj me se cutumé ma'an soj man soj nanj adonj. 'O se cuano nihánj me se cataj xna'anj 'unj rihaan soj se vaa rej rihaan ní' ro', se quene'en uún soj manj ma'. Tzaj ne ndaa güii ca'na' uún 'unj rihaan chumii nihánj quene'en soj manj, ne cataj soj: “Ve'é uxrá 'na' síí a'née síí 'nij ra'a man ní' ei”, cataj soj a —taj Jesucristó ni'yaj so' man nij síí man Jerusalén yo' a.

## 14

*Nana nihánj taj xna'anj se vaa nahuun snó'o quixíj cu'maan man, qui'yaj Jesucristó güii naránj rá nij yuvii israelitá a*

<sup>1</sup> Dan me se 'o güii naránj rá nij yuvii israelitá me se catúj Jesucristó

rá ve' tucua' 'o síí uun chij rihaan nij síí fariseo cha so' chraa, ne nij síí fariseo ro', tumé uxrá man so' daj qui'yaj so' a. <sup>2</sup> Ne veé danj nicun' 'o síí quixíj cu'maan man rihaan Jesucristó a. <sup>3</sup> Gaa ne xná'anj Jesucristó man nij síí naqui'yaj cuu se-tucuanj Moisés rihaan yuvii do', man nij síí fariseo do', cataj so':

—No xcúún ní' ca'nee ní' chi'ii xráá síí ran' güii naránj rá ní', rá soj na'. Ase ne nó xcúún ní' xa' —taj Jesucristó, xná'anj Jesucristó man nij so' a.

Tzaj ne guun dínj tu'va nij so' a.

<sup>4</sup> Gaa ne quita'aa Jesucristó man síí ran' yo', ne nahuun sa' so', qui'yaj Jesucristó, gaa ne na'née Jesucristó chrej man so' a. <sup>5</sup> Gaa ne ni'yaj Jesucristó rihaan nij síí fariseo yo', cataj so' a:

—Ne sese quinij ta'níí 'o tuvi' soj do', 'o daán soj scúj do', rá cuxruj na güii naránj rá ní', ne ra'yanj quirii soj man ta'níí soj do', man daán soj do', rá 'unj ei —taj Jesucristó rihaan nij síí fariseo a.

<sup>6</sup> Veé dan me se a 'o nana ne quirii nij so' ca'mii nij so' rihaan Jesucristó ma'.

*Nana nihánj taj xna'anj se vaa se nano' ní' rej sa' doj quitaj ní' a*

<sup>7</sup> Dan me se quene'en Jesucristó se vaa nij síí 'na' tucua' síí fariseo yo' ro', nano' ndo'o nij so' rej sa' doj quitaj nij so', gaa ne che'é dan tucuyón Jesucristó nana nihánj man nij so', cataj so' a:

<sup>8</sup> —Asa' canacúún ta'aj nii mán so' ca'anj so' cha'anj nara'aa, ne se ca'anj quitaj so' chruun xlá sa' doj ma'. 'O se ne ne'én so' sese canacunj nii man yo'ó síí sa' doj rihaan so' ne quitaj so' chruun xlá taj so' man adonj. <sup>9</sup> Ne síí 'yaj cha'anj ro', cataj so' rihaan so': “Rque so' chruun yo' quitaj síí nihánj á”, cataj so' rihaan so', gaa ne guun na'aj so', ne chruun xlá nij doj ca'anj quitaj so', qui'yaj so' a. <sup>10</sup> Dan me se asa' canacúún nii mán so', ne asa' cuchí' so' rej canuú cha'anj, ne rej nij doj ro', quitaj so' ei. Gaa ne asa' ca'na'

síi canacúun mán so', gaa ne cataj so' rihaan so': "Cavii so' quitaj so' rej sa' doj nihánj, tinuj", cataj so' rihaan so', gaa ne caraya'anj uxrá cunudanj nij síi 'na' cha'anj yo' ni'yaj nij so' mán so' nanj adonj. <sup>11</sup> 'O se xa' síi me rá ticavii sa' man ma'an, tzaj ne quirí' so', ne guun na'aj so' adonj. Ne xa' síi 'yaj nica' nimán, tzaj ne cavii sa' so' adonj —taj Jesucristó rihaan nij síi fariseo do', rihaan nij síi naquiyaj cuu se-tucuanj Moisés rihaan yuvii do' a.

*Nana nihánj taj xna'anj me síi canacunj ní' chá chraa ga ní' a*

<sup>12</sup> Gaa ne cataj Jesucristó rihaan síi canacúun man so' chá so' chraa a:

—Asa' guun rá so' ca'na' yuvii chá yuvii chraa ve' tucua' so', ne se canacúun so' man tuví' so' do', man tinúu so' do', man nij síi ru'vee man chiháan so' do' ma'. Dan me se sese canacunj so' man inan' ma'an nij so', gaa ne vaa güii canacunj nij so' mán so' chá so' chraa ga nij so', gaa ne dan me se aj naru'vee nij so' nu' se chá rihaan so' danj rá se vaa gaa nanj adonj. <sup>13</sup> Tzaj ne asa' canuú cha'anj qui'yáa so', ne canacunj so' man nij síi nique do', man nij síi rengo do', man nij síi tuchrii do', chá nij so' chraa ei. <sup>14</sup> Danj qui'yáa so', gaa ne nij so' me se taj rasuun rihaan nij so' naru'vee nij so' rihaan so' ma'. Gaa ne asa' cunuu i'na' uún nij síi sa' rihaan Diose, ne ma'an Diose naru'vee rihaan so', gaa ne cavii sa' uxrá so' adonj —taj Jesucristó rihaan síi canacúun man so' chá so' chraa a.

*Cuentó nihánj taj xna'anj me síi chá chraa ga Diose asa' guun chij Diose rihaan chumij nihánj a*

<sup>15</sup> Dan me se cuno yo' o' síi chá chraa ga Jesucristó nana ca'mii Jesucristó, gaa ne che'é dan cataj so' rihaan Jesucristó a:

—Cavii sa' cunudanj nij síi chá chraa ga Diose asa' guun chij Diose rihaan chumij nihánj nanj ei —taj so' rihaan Jesucristó a.

<sup>16</sup> Gaa ne cataj Jesucristó rihaan so' a:

—Síi navij rá cha'anj nocoo ndo'o me so', ne nacúun so' ca'na' que'ee yuvii a. <sup>17</sup> Gaa ne dan me se maan ora' chá nij so' chraa me ca'née síi navij rá cha'anj man se-mozó so' ca'anj cataj mozó yo' rihaan nij síi ca'na' se vaa ca'na' nij so' cha'anj chá nij so' chraa a. "Aj quisij guun chuvii, ne ca'anj ní' chá nij soj chraa ei", taj mozó yo' rihaan nij síi ca'na' cha'anj yo' a. <sup>18</sup> Gaa ne guun che'e nij so' cataj 'o 'o' nij so' rihaan mozó yo' se vaa se ca'vee cuchí' nij so' chá nij so' chraa a. Dan me se yo' o' so' cataj: "Tzaj ne 'unj me se tihaj quiránj 'unj 'o yo' o'ó, ne vaa che'é ndo'o ca'anj 'unj quene'én 'unj yo' o'ó yo' a. Ne qui'yáa so' se ndo'o, cataj so' se vaa se ca'vee cuchí' 'unj ma'", taj so' rihaan mozó yo' a. <sup>19</sup> Gaa ne yo' o' so' cataj: "Maan se 'unj me se 'unj yuntá scúj quiránj 'unj, ne cuano nihánj me se ca'anj 'unj quene'én 'unj daj vaa scúj quiránj sese scúj sa' me xo' a. Ne che'é dan qui'yáa so' se ndo'o cataj so' se vaa se ca'vee cuchí' 'unj ma'", taj so' rihaan mozó yo' a. <sup>20</sup> Ne yo' o' so' ro', cataj uún rihaan mozó yo' a: "'Unj me se tihaj xcaj 'unj chana, ne che'é dan se ca'vee cuchí' 'unj ma'", taj so' rihaan se-mozó síi navij rá cha'anj yo' a. Ne veé danj ca'mii cunudanj nij síi aj quirí' ni'yaj ca'anj cha'anj yo' a.

<sup>21</sup> "Dan me se namán mozó, ne nata' mozó nu' se vaa ca'mii 'o 'o' nij so' rihaan se-ru'vee mozó a. Gaa ne ca'maan ndo'o rá síi navij rá cha'anj yo' gaa cuno so' se-nana se-mozó so', ne cataj so' rihaan se-mozó so': "Ra'yanj cavii so' ca'anj so' daj a nij callé, ne nicaj so' man nij síi nique do', man nij síi chée rengo do', man nij síi tuchrii do', ca'na' so' nihánj, ne chá nij so' chraa ga ní' ei", taj so' rihaan se-mozó so' a. <sup>22</sup> Veé danj qui'yaj se-mozó so', ne cuchí' uún mozó yo' rihaan se-ru'vee so', ne cataj so': "Aj qui'yaj nu' se vaa cataj so' rihanj, señor. Tzaj ne vaa rej quisij catuú doj yuvii uún a", taj mozó yo'



rihaan se-ru'vee so' a. <sup>23</sup> Gaa ne cataj ru'vee yo' rihaan mozó a: “Cavii so' ca'anj so' nu' nij chrej ca'aan do', nu' nij chrej catuun do', ne qui'yaá so' fuerzá man nij yuvii se vaa ca'na' nij so' á. Gaa ne caraa nu' ve' tucuj ei. <sup>24</sup> 'O se cuano nihánj me se cataj xna'anj 'unj rihaan so' se vaa xa' nij sí canacúun ní' asino yaan, tzaj ne a 'o' nij so' se ca'vee ca'na' chá chraa ga ní' a man adonj”, taj so' rihaan se-mozó so' a. —Veé danj quisij cuentó nanó Jesucristó a.

*Nana nihánj taj xna'anj se vaayuun che'e ca'nej nimán ní' canoco' ní' man orún' Jesucristó a*

<sup>25</sup> Dan me se que'ee uxrá yuvii vaj ga Jesucristó, ne canicaj so', cataj so' rihaan nij yuvii a:

<sup>26</sup> —Sese me rá 'o so' ca'na' so' rihanj, ne sese guun rá so' se vaa sa' doj vaa rej so' do', nii so' do', nica so' do', ta'nii so' do', tinúú so' do', ra'vij so' do', ndaa nimán ma'an so' do', rihanj, ne se ca'vee guun so' 'o sí tucuyón se-nanaj a ma'. <sup>27</sup> Ne sí na'vej rá quiran' sayuun che'é se me so' sí nocó' manj ro', se ca'vee guun so' 'o sí tucuyón se-nanaj a ma'.

<sup>28</sup> ”Dan me se soj, tzaj ne sese guun rá yo'o tuvi' soj cune' yo'o soj ve' nata' xcaan, ne sí qui'yaj ve' yo' me se asino nuchruj raa so' cuentá sese quisij se-sa'anj so' quisij nu' ve' yo', raj a. <sup>29</sup> Ne sese se qui'yaj so' danj nuchruj so' cuentá asino yaan, gaa ne asa' cuchruj so' tacóo ve', gaa ne se guun nucuaj so' qui'yaj so' nu' ve' a ma'. Ne nij sí ne'en se vaa qui'yaj so' ro', ca'nga' nacoo nij so' ni'yaj nij so' man so', <sup>30</sup> ne cataj nij so': “Sí nihánj me se guun che'e so' cune' so' ve', tzaj ne ne guun nucuaj so' quisij nu' ve' qui'yaj so' a ma'”, cataj nij so' ni'yaj nij so' man sí guun che'e ve' yo' a.

<sup>31</sup> ”Ne dan me se sese vaa 'o sí nicaj suun rey vaa chi' mój tanuu rihaan, ne sese ca'na' yo'ó sí nicaj suun rey vaa ico mój tanuu rihaan cunu' ga so', gaa ne asino yaan xcaj so' cuentá sese guun nucuaj so' qui'yaj canaán

so' rihaan sí vaa ico mój tanuu rihaan yo', ne sese guun nucuaj so' rá so', ne cavii so' cunu' so' ga nij sí 'na' yo' a. <sup>32</sup> Tzaj ne sese se guun nucuaj so' qui'yaj canaán so' rá so', gaa ne ca'nej so' sí ca'anj suun ca'mii ga sí 'na' yo' ndaa vaa se guun cunu' nij so' a. Danj cataj so' gaa tihaj 'na' sí cunu' ga so' gan' a. Gaa ne cachinj ni'yaj sí ca'anj suun yo' rihaan sí 'na', ndaa vaa ca'ne' rá so' ga suun cunu' a.

<sup>33</sup> ”Dan me se ase vaa xcaj sí cune' ve' do', sí cunu' ga tuvi' do', cuentá sese guun nucuaj roj so' qui'yaj roj so' danj ro', veé danj qui'yaj guee soj sij me rá canoco' manj ei. Ne sese se guun rá soj tanáj xco soj nu' si'yaj soj do', nu' tuvi' soj do', canoco' soj manj, ne se ca'vee guun soj sí tucuyón se-nanaj a ma'.

<sup>34</sup> ”’O se ase vaa yaan ga chraa ro', danj vaa nij sí tucuyón se-nanaj ga chumii nihánj, ne vaa se uun ndo'o yaan nanj á. Dan me se sese ne 'ne' chá yaan yo', gaa ne taj se qui'ya' cunu sa' yaan gaa a ma'. <sup>35</sup> Taj se guun yaan yo' rihaan to'óo ní' cunu sa' to'óo ní' ma'. Taj se guun yaan yo' rihaan ya'luj se vaa cunu sa' doj ya'luj ma'. A doj rasuun se cavii sa', qui'yaj yaan yo' ma'. Maan se ri'ij uun nii man yaan vaa danj xe' a.

”Dan me se sese taj yu'uj xrée soj, ne cunó soj nana nihánj ei —taj Jesucristó rihaan nij yuvii yo' a.

## 15

*Nihánj me cuentó che'é matzinj ca'anj ni'ya a*

<sup>1</sup> Dan me se cuchi' que'ee sí a'néj puextó do', que'ee sí tumé cacun' do', rihaan Jesucristó a. 'O se guun rá nij so' cunó nij so' se-nana so' a. <sup>2</sup> Ne xa' nij sí fariseo do', nij sí naqui'yaj cuu se-tucuanj Moisés rihaan yuvii do', tzaj ne ca'maan rá nij so' ni'yaj nij so' man Jesucristó, ne nij ca'mii nij so' che'é so', che'é rej ve'é nicaj tuvi' so' ga nij sí tumé cacun' ne chá so' chraa ga nij so' a. <sup>3</sup> Gaa ne nanó Jesucristó 'o cuentó nihánj rihaan nij so' a:

4 —Dan me se sese yo'q tuvi' nij soj nicaj 'o cientó matzinj, ne sese ca'anj ni'ya orún' guee daán so' matzinj, ne tanáj so' yo'ó ca'anj chihaa xnu' ca'anj daán so' matzinj rej tacaan, ne cavii so' ca'anj nano' so' man orún' daán so' matzinj ca'anj ni'ya á. Ne se ca'ne' rá so' ma'. Tananj ya ca'anj so' nano' so' man daán so' matzinj, gaa ne uun daj nari' so' man yo' adonj. 5 Ne asa' quisij nari' so' man xo', gaa ne cuta' so' man xo' tacaan xcóo so', ne guun niha' ndo'o rá so' a. 6 Ne asa' namán so' tucua' so', gaa ne nacunj so' man nu' tuvi' so' síi ne chiháan so', ne cataj so' rihaan nij tuvi' so': "Guun niha' rá soj gaj ei. 'O se narij danj matzinj ca'anj ni'ya ei", cataj so' rihaan tuvi' so' a. 7 Ne cuano nihánj me cataj xna'anj 'unj rihaan soj se vaa xta' rej ne Diose ro', guun niha' doj rá nij síi man yo' ni'yaj nij so' man orún' síi tumé cacun' gaa canicaj nimán so' canoco' so' chrej sa' a. Tzaj ne se caráya'anj nij so' man ca'anj chihaa xnu' ca'anj, ése sij sa' me nij so', rá nij so' ma', ne taj che'é canoco' nij so' tucuaán naca narqué Diose, rá nij so' ma' —taj Jesucristó rihaan nij so' a.

*Nihánj me cuentó che'é pesó xoo ca'anj ni'ya a*

8 Ne cataj uún Jesucristó a:

—Ne sese nicaj 'o chana' chij' pesó xoo, ne sese ca'anj ni'ya orún' pesó xoo yo', ne tucua' no' ya'an aga' chuguun, ne naca' no' nu' ve' tucua' no', ne uxrá nano' no' pesó xoo yo', ne se ca'ne' rá no' ma'. Tananj uxrá nano' no' man pesó xoo yo', uun daj nari' ya no' man yo', gaa ne ca'ne' rá no' adonj. 9 Ne asa' quisij nari' no' pesó xoo yo', gaa ne canacunj no' man nu' tuvi' chana' no' níi ne x'núu ve' tucua' no', ne cataj no' rihaan nij tuvi' chana' no': "Guun niha' rá soj gaj á. 'O se narij se-sa'anj pesó xoo ca'anj ni'ya ei", cataj no' rihaan tuvi' chana' no' a. 10 Dan me se cataj xna'anj 'unj rihaan soj a. Ndaa rá se vaa guun rá chana' gaa nari' no' se-sa'anj no' ro',

danj guun niha' uxrá rá nij se-mozó Diose ni'yaj nij so' man orún' síi tumé cacun' gaa canicaj nimán so' canoco' so' chrej sa' adonj —taj Jesucristó rihaan nij so' a.

*Nihánj me cuentó che'é síi tumé cacun' canicaj rihaan rej a*

11 Gaa ne cataj uún Jesucristó a:

—'O síi vaa vij ta'níi me so' a. 12 Ne cataj síi cunij rihaan rej so' a: "Me rá 'unj cuxra' ta'aj so' rasuun rque so' manj guun si'yáj, ataj", taj so' rihaan rej so' a. Gaa ne cuxra' ta'aj snó'o yo' nu' si'yaj so', ne rque so' ta'aj si'yaj so' rihaan 'o 'o ta'níi so' a. 13 Dan me se cachén doj güii, gaa ne naqui'yaj chre' síi cunij yo' nu' si'yaj so', ne cavii so' ca'anj so' chuman' naj gan', ne qui'yaj ndo'o so' se nij, ne cutun' rma'an so' nu' se-sa'anj so' a. 14 Quisij cutun' so' nu' se-sa'anj so', gaa ne cachén ndo'o x'naa chuman' yo', ne guun che'e so' quiran' ndo'o so' sayuun, ne quina'aan ndo'o rque so', ne taj vaj a doj se chá rihaan so' cha' so' a. 15 Dan me se catúj so' rihaan 'o síi chihanj chuman' yo', ne ca'ne' síi chihanj chuman' yo' suun rihaan so' ca'anj so' se-rancho síi chihanj yo' cutumé so' xcáa a. 16 Tzaj ne na'aan ndo'o rque so', ne ndaa guun rá so' cha' so' coj go' nii cha' nij xcáa a. Tzaj ne ne rque nii coj yo' cha' so' a ma'.

17 "Dan me se 'o güii ne nahuun sa' ra' so', ne guun che'e so' xcaj so' cuentá, ne nanuj rá so' rej so' a. Ne me rá so': "Nij se-mozó réj, tzaj ne man ndo'o se chá rihaan réj, ne man ndo'o se chá rihaan se-mozó réj a. Ne nihánj me cavi' 'unj qui'yaj x'naa nanj á. 18 Naxumaan 'unj, ne nán' 'unj rej ne réj, cataj 'unj rihaan réj: Tumej cacun' rihaan Diose, ne tumej cacun' rihaan so', ataj. 19 Taj che'é cataj so' se vaa ta'níi so' mej cuano a ma'. Maan se qui'yáa so' se ndo'o, ne guún 'unj mozó rihaan so', qui'yáa so', ruguanj, cataj 'unj rihaan réj", guun rá síi cunij yo' a.

20 "Gaa ne cavii so' ca'anj so' rej ne rej so' a. Dan me se gan' ndo'o

vaj so' chéé so', ne quene'en rej so' man so', ne cunuu 'ee ndo'o rá rej so' man so', ne cunánj rej so' ndaa rej vaj so', ne na'yaan rej so' man so', ne cachrón tu'va rej so' man so' a. <sup>21</sup> Gaa ne cataj síi cunij yo' rihaan rej so' a: "Tumej cacun' rihaan Diose, ne tumej cacun' rihaan so', ataj. Taj che'é cataj so' se vaa ta'níi so' mej cuano a ma'. Maan se qui'yáa so' se ndo'o, ne guún 'unj mozó rihaan so', qui'yáa so', ruguanj", taj so' rihaan rej so' a. <sup>22</sup> Tzaj ne ca'mii rej so' rihaan nij mozó man rihaan rej so', cataj rej so': "Ra'yanj nicaj soj yatzíj sa' ndo'o ca'na' soj cunuú ta'níj, ne ca'na' se'ej sa' cunuú ra'a ta'níj, ne ca'na' canj naca qui'nij tacóo so' á. <sup>23</sup> Ne ticavi' soj man scúj le'ej ramii ndo'o, ne qui'yaj chuvii soj, ne cha ní', ne qui'yaj ní' cha'anj, ne guun niha' uxrá rá ní' ei. <sup>24</sup> 'O se ta'níj nihánj me se ase vaa síi cavi' gaa so' rihanj, tzaj ne nihánj me se cunuu i'na' uún so' rihanj, ne ase vaa síi ca'anj ni'ya gaa so', tzaj ne nihánj me se narij man so' nanj adonj", taj rej so', ne guun che'e nij so' guun niha' uxrá rá nij so' a.

<sup>25</sup> "Tzaj ne vaa síi chava' uún, ne 'yaj suun so' se-rancho rej so' a. Dan me se 'na' nique síi chava' yo', ne gaa quinichrun' so' ve', ne cuno so' se vaa go' ndo'o misca chra' do', se vaa ra'ánj ndo'o yuvi do' a. <sup>26</sup> Gaa ne canacúún síi chava' yo' man 'o mozó, ne ca'na' yo' mozó rihaan so', ne xná'anj so' man mozó, ne: "Me che'é 'yaj nii nu' cha'anj ga", taj so' rihaan mozó yo' a. <sup>27</sup> Gaa ne cataj mozó rihaan so' a: "Namán tinúú so', ne cavi' scúj le'ej ramii ndo'o, qui'yaj rée so', che'é se nari' uún so' ta'níi so' ne vaa nucaj ta'níi so' nari' so' a", taj mozó rihaan síi chava' yo' a.

<sup>28</sup> "Dan me se ca'maan rá síi chava', ne na'vej uxrá rá so' catuu so' rá ve' a. Tzaj ne curihanj rej so', gaa ne canacúún rej so' man so' ca'na' so' a. <sup>29</sup> Tzaj ne cataj so' rihaan rej so' a: "Unj nihánj me se aj quisíj que'ee yo' qui'yaj suun 'unj rihaan so' nihánj,

ne cunudanj nij nana cataj xna'anj so' rihanj ve'é cunoj a. Ne a 'ó güii ne rque so' a 'ó tana le'ej rihanj ne qui'yaj chuvii 'unj ne chaj ga nij tuvij a ma'. <sup>30</sup> Tzaj ne nihánj me se namán ta'níi so' síi chá nu' si'yáa so' gaa chéé so' ga nij chana niha' rá, ne ticavi' so' scúj le'ej ramii che'é so' a", taj síi chava' yo' rihaan rej so' a.

<sup>31</sup> "Gaa ne cataj rej so' rihaan so' a: "Maan se so' me se 'o né so' ga 'unj nihánj, rej. Ne nu' rasuun si'yáj me si'yáa so', rej. <sup>32</sup> Tzaj ne vaa che'é guun niha' rá ní' gaa namán tinúú so', rej. 'O se tinúú so' ro', ase vaa 'o síi cavi' gaa so' rihanj, tzaj ne nihánj me cunuu i'na' uún so', ne ase vaa 'o síi ca'anj ni'ya gaa so' rihanj, tzaj ne cuano nihánj me se aj narij man so' nanj adonj", taj rej so' rihaan síi chava' yo' a. —Veé danj quisíj cuentó nanó Jesucristó rihaan nij so' a.

## 16

*Cuentó nihánj taj xna'anj daj qui'yaj ní' ga si'yaj ní' rihaan chumii nihánj, ne ca'vee cayáan ní' ga Diose asa' guun chij Diose rihaan chumii nihánj a*

<sup>1</sup> Gaa ne cataj Jesucristó rihaan nij síi tucuyón se-nana so' a:

—Síi ru'vee me yo'o so', ne nuu 'o mayordomo rihaan so' síi tumé nu' si'yaj so' a. Dan me se cuta' nii cacun' xráa mayordomo yo' rihaan ru'vee se vaa cutun' ndo'o so' si'yaj ru'vee a. <sup>2</sup> Gaa ne canacúún ru'vee man mayordomo, ne ca'na' mayordomo rihaan so', ne cataj so' rihaan mayordomo yo' a: "Aj ca'na' nana rihanj se vaa cutun' ndo'o so' si'yáj, ne ne'en uxraj me che'é qui'yáa so' danj a ma'. Tzaj ne cataj xna'anj so' rihanj daj qui'yáa so' gaa cutumé so' si'yáj á. 'O se se ca'vee cunuú so' doj rihanj cutumé so' si'yáj a ma'", taj ru'vee rihaan mayordomo yo' a.

<sup>3</sup> "Dan me se curihanj mayordomo, ne guun rá so' a: "Nihánj me se daj qui'yáj, ne ca'nee se-ru'vee 'unj suun ra'aj, ne daj qui'yáj cuano, raj

a. 'Unj me se se guun nucuáj qui'yaj suun 'unj suun 'ee, ne na'aj 'unj cachinj 'unj caridad, na'aj 'unj cachee rma'anj nanj á. <sup>4</sup> Aan a. Nihánj me qui'yáj nanj á. Gaa ne asa' ca'néj ru'vee suun ra'aj gaa ne nuvi' rej ca'anj 'unj, gaa ne canacunj yo'ó nij so' manj ca'anj 'unj tucua' yo'ó nij so' cayánj a", guun rá so' a.

<sup>5</sup> "Gaa ne canacúun so' man nij sí qui'yaj xcúun rihaan se-ru'vee so', ne ca'na' 'o 'o nij so' rihaan so' a. Gaa ne rihaan sí taj yaan rihaan yo'ó nij so' cataj so': "Me daj qui'yaj xcúun so' rihaan se-ru'vee 'unj ga", taj so', xná'anj so' man sí taj yaan yo' a. <sup>6</sup> Gaa ne so' cataj: "Q cientó tambo casté qui'yaj xcúnj rihaan se-ru'vee so' a", taj so' rihaan mayordomo yo' a. Gaa ne cataj mayordomo yo' rihaan so': "Nícaj so' dáan so' yanj cuentá nihánj, tirí' so' man yo', ne ra'yanj cayáan so', ne qui'yáa so' yo'ó yanj naca, ne cachron so' rihaan yanj naca se vaa vij chihaa chi' guee tambo qui'yaj xcúun so' á", taj mayordomo yo' rihaan sí taj yaan yo' a. <sup>7</sup> Gaa ne xná'anj so' man yo'ó so', cataj so': "Ne so' ga. Me daj qui'yaj xcúun so' rihaan se-ru'vee 'unj ga", taj so', xná'anj so' man yo'ó so' yo' a. "Q cientó nanj 'núú trigó a", taj yo'ó so' a. "Nícaj so' dáan so' yanj cuentá nihánj, tirí' so' man yo', ne qui'yáa so' yo'ó yanj naca, ne ca'anj chihaa guee nanj cachron so' rihaan yanj naca yo' á", taj mayordomo rihaan yo'ó so' a.

<sup>8</sup> "Dan me se xcaj se-ru'vee mayordomo yo' cuentá se vaa qui'yaj chi'ij ndo'o mayordomo yo' rihaan so', tzaj ne ca'mii sa' ru'vee che'é mayordomo cataj ru'vee se vaa sij avii ndo'o raa me mayordomo yo' adonj. Danj nanj nij sí man rihaan chumij nihánj cuano, tzaj ne gaa 'yaj suun nij so' ga tuvi' ma'an nij so', ne doj a avii raa nij so' rihaan nij sí noco' se-nana Diose nanj á.

<sup>9</sup> "Gaa ne cuano nihánj me se cataj xna'anj 'unj rihaan soj se vaa nij rasuun man rihaan chumij nihánj,

tzaj ne 'yaj ndo'o nij yuvij cacun' che'é rej qui'yaj canaan nij yuvij rasuun man rihaan chumij nihánj, ne soj ro', vaa che'é nícaj soj si'yaj soj rasuun man rihaan chumij nihánj, ne go' soj man yuvij gaa ne guun tuvi' soj ga nij yuvij, qui'yaj rasuun yo' a. Ne güii navij nu' rasuun man rihaan chumij nihánj me se aj quirí' ndo'o soj tuvi' soj sí cayáan ga soj, gaa ne ve'é ndo'o cayáan soj ga nij tuvi' soj ga Diose rej xta' nu' cavii nu' ca'anj a. <sup>10</sup> 'Q se sí ve'é tumé doj tzin' rasuun ro', so' me sí guun nucuaj cutumé noco rasuun, ne sí 'yaj chi'ij ga doj rasuun ro', chi'ij doj qui'yaj so' ga noco rasuun ei. <sup>11</sup> Che'é dan sese ne guun nucuaj soj cutumé sa' soj nij rasuun chi'ij man rihaan chumij nihánj, gaa ne me sí guun rá rque nij rasuun ya rihaan soj cutumé soj, rá soj ga. Taj vaj sí guun rá qui'yaj danj a ma'. <sup>12</sup> Ne nuveé si'yaj ma'an ya soj me nij rasuun man rihaan chumij nihánj a man adonj. Ne sese ne guun nucuaj soj cutumé sa' soj nij rasuun man rihaan chumij nihánj, ne me sí guun rá rque rihaan soj rasuun guun si'yaj ma'an ya soj rej xta', rá soj ga. Taj sí guun rá qui'yaj danj ma'.

<sup>13</sup> "Taj vaj sí guun nucuaj cutumé sa' si'yaj vij ru'vee ma'. Sese qui'yaj suun ní' rihaan vij ru'vee, ne nachri' ní' ni'yaj ní' man 'o ru'vee yo', ne caran' rá ní' ni'yaj ní' man yo'ó ru'vee yo' a. Se guun nucuaj ní' caran' rá ní' ni'yaj ní' man vij ru'vee ma'. Ne xa' soj, tzaj ne se ca'vee qui'yaj suun soj che'é Diose ne qui'yaj suun soj che'é nij rasuun man rihaan chumij nihánj a ma' —taj Jesucristó rihaan nij sí tucuyón se-nana so' a.

*Nana nihánj taj xna'anj se vaa tumé nij sí fariseo cacun' rihaan se-tucuanj Moisés a*

<sup>14</sup> Dan me se nij sí fariseo ro', me sí aran' ndo'o rá ni'yaj sa'anj, ne gaa cuno nij so' cunudanj se-nana Jesucristó nana che'é rasuun man rihaan chumij nihánj, gaa ne ca'nga' noco nij so' ni'yaj nij so' man Jesucristó a.



15 Gaa ne cataj Jesucristó rihaan nij so' a:

—Xa' soj, tzaj ne nuvi' cacun' tumé soj ni'yaj yuvii, 'yaj soj ma'. Tzaj ne Diosé ro', me síi ne'en daj vaa nimán soj adonj. 'O se sa' uxrá vaa 'yaj yuvii, rá tuvi' yuvii, tzaj ne chi'ii ndo'o 'yaj nij yuvii, rá Diosé nanj adonj.

16 "O se gaa ataa ca'na' síi cu'naj Juan síi cuta' ne man yuvii me se cuno yuvii rihaan inanj se-tucuanj Moisés do', rihaan nij síi nata' se-nana Diosé gaa naá do', tzaj ne yaj me se uno ndo'o yuvii nana sa' nana che'é güii guun chij Diosé nimán yuvii man rihaan chumii nihánj, ne me inanj rá cunudanj nij yuvii cataj ma'an nij yuvii daj qui'yaj Diosé asa' guun chij Diosé adonj. 17 Tzaj ne ne nó xcúún ní' tanáj ní' a 'o nana rqué Diosé rihaan ní' canoco' ní' ma'. 'O se ca'vee a doj quinavij rej xta' do', ca'vee a doj quinavij chumii nihánj do', tzaj ne se ca'vee quinavij a doj nana rqué Diosé rihaan ní' canoco' ní' ma'. 18 Dan me se sese quiri'ij yo'o so' man nica so', ne sese xcaj so' man yo'ó chana, ne cutumé so' cacun', ne sese xcaj yo'o so' man chana quiri'ij chii man, ne cutumé so' cacun' uún adonj —taj Jesucristó rihaan nij síi fariseo yo' a.

*Nihánj me cuentó nanó Jesucristó che'é ru'vee ne che'é 'o síi nique cu'naj Lázaro a*

19 Gaa ne nanó Jesucristó cuentó nihánj a:

—Ru'vee me yo'o so', ne yatzíj sa' inanj cunuú so', ne daj a güii uun ndo'o nihaa sa' tucua' so', ne guun niha' uxrá rá so' rihaan chumii nihánj a. 20 Ne naj 'o síi nique cu'naj Lázaro rihaan yo'óo ta'yaa ve' tucua' ru'vee yo', ne man ndo'o luj xráa síi nique yo', 21 ne guun rá síi cu'naj Lázaro cha so' se quini'ij rihaan yo'óo rej chá ru'vee yo' chraa, tzaj ne daj doj chuvee ca'na' chavé luj xráa so' a.

22 "Dan me se gaa quisíj güii cavi' síi nique yo', gaa ne nica'ij nij se-mozó Diosé man so' ca'anj so' rej sa', ne na'yaan síi cu'naj Abraham man so'

a. Ne cavi' ru'vee uún, ne cachin' nii man so' a. 23 Dan me se ca'anj so' rihaan ya'an, ne quiran' uxrá so' sayuun rihaan ya'an yo', gaa ne naxcaj so' rihaan so', ne quene'en so' se vaa gan' ndo'o ne síi cu'naj Abraham, ne na'yaan Abraham man síi cu'naj Lázaro yo' a. 24 Gaa ne canacúún so' man síi cu'naj Abraham, cataj so': "Cunuu 'ee rá so' manj, ataj Abraham. Ne ca'nej so' man síi cu'naj Lázaro se vaa ca'na' so' ne tiguíj so' ra' ra'a so' rque na, ne tucua'chree so' ra'a so' daa 'unj, gaa ne cunuu cu'ij doj raj qui'yaj so', ataj. 'O se na'aaan ndo'o manj, 'yaj ya'an nihánj nanj á", taj ru'vee yo' rihaan síi cu'naj Abraham a.

25 "Tzaj ne cataj Abraham rihaan so': "Tzaj ne nanuj rá so', ta'nij, se vaa gaa gaa i'na' so' rihaan chumii ne nica'ij so' inanj rasuun sa', ne Lázaro me se inanj rasuun chi'ii nica'ij so' nanj á. Ne cuano nihánj me se uun niha' nimán so', ne ma'an so' me se ran' sayuun a. 26 Ne danj inanj uún, ne nuu 'o yu'uj cunuu ndo'o rej ne ní', ne veé danj se ca'vee cuch'i' yuvii man nihánj ndaa rej ne nij soj yo', ne síi man yo' se ca'vee ca'na' rej nihánj a ma'", taj Abraham rihaan ru'vee yo' a.

27 "Ne cataj ru'vee yo' rihaan Abraham a: "Che'é dan qui'yáa so' se ndo'o, ataj, ne ca'nej so' man síi cu'naj Lázaro ca'anj so' tucua' réj, 28 ne vaa 'un' tinúj, ne me rá 'unj cataj xna'anj so' rihaan nij so' daj rán' 'unj nihánj, ne se ca'na' nij so' uún rej rán' 'unj sayuun nihánj a ma'", taj ru'vee rihaan Abraham a. 29 Gaa ne cataj Abraham rihaan so' a: "Vaa se-nana síi cu'naj Moisés do', se-nana nij síi nata' se-nana Diosé gaa naá do', nica'ij nij so' á. Ca'vee cuno nij so' nana yo' ei", taj Abraham rihaan ru'vee a. 30 "Se cuno nij so', man ataj Abraham. Tzaj ne sese ca'anj 'o síi cavi' rihaan nij so', gaa ne canica'ij nimán nij so' canoco' nij so' chrej sa', raj a", taj ru'vee rihaan Abraham a.

31 "Tzaj ne cataj Abraham rihaan

so' a: “Sese se ca'vej rá nij so' cunō nij so' rihaan síi cu'naj Moisés do', rihaan nij síi nata' se-nānā Diose gaa naá do', ne ca'vee se cunūu i'na' uún 'o síi cavi', tzaj ne se cuchumán rá nij so' nī'yaj nij so' man so' a ma'”, taj Abraham rihaan ru'vee yo' a. —Veé danj quisij cuentó nanó Jesucristó a.

## 17

*Nana nihánj taj xna'anj se vaa no xcuún ní' racuj ní' man tinúú ní' se qui'yaj tinúú ní' cacun' a*

<sup>1</sup> Gaa ne cataj Jesucristó rihaan nij síi tucu'yón se-nānā so' a:

—Xa' chumij nihánj, tzaj ne man ndo'o chrej chi'ii canoco' yuvii, ne vaa ya'núj uxrá rihaan nij yuvii canoco' nij yuvii chrej chi'ii adonj. Tzaj ne nique síi 'yaj anoco' yuvii chrej chi'ii yo' adonj. <sup>2</sup> Daj chihaa mǐj se cavii sa' so' ma'. Ne'en soj se vaa sese toco' vaj nii yuvej xij váj 'núú trigó man chihá yo'o so', ne sese tagüéj nii man so' rque na ya'anj, ne nij uxrá vaa ran' síi 'anj nij rque na ya'anj yo' nanj adonj. Tzaj ne nij doj quirán' síi qui'yaj chi'ii nimán yo'o tuvi' soj síi nica' nimán nanj á. 'O se quirán' so' sayuun nu' cavii nu' ca'anj nanj adonj.

<sup>3</sup> ”Tumé uxrá soj man soj daj qui'yaj soj á. Sese qui'yaj tinúú so' cacun', ne cataj so' rihaan so' se vaa nij ndo'o qui'yaj so', ne sese canicaj nimán so' tanáj so' chrej chi'ii, ne caraá x'naa so' che'é cacun' tumé so' ei. <sup>4</sup> Dan me se ca'vee se chij ya qui'yaj so' cacun' rihaan so' rque orún' güii, tzaj ne sese chij cuchj' so' rihaan so' ne cataj so' se vaa canicaj nimán so' ne nij vaa cacun' qui'yaj so' rá so', ne caraá x'naa so' rihaan so' ei —taj Jesucristó rihaan nij síi tucu'yón se-nānā so' a.

*Nana nihánj taj xna'anj che'é rasuun guun nucuaj ní' qui'yaj ní' sese cuchuman rá ní' nī'yaj ní' man Diose a*

<sup>5</sup> Gaa ne nij apóstol cune' Jesucristó man ro', cataj chuvij nij so' rihaan

ma'an Jesucristó sij 'nij ra'a man ní' a:

—Cataj xna'anj so' rihaan núj daj qui'yaj núj, gaa ne doj a cuchuman rá núj nī'yaj núj Diose á —taj nij so' rihaan Jesucristó a.

<sup>6</sup> Gaa ne cataj síi 'nij ra'a man ní' rihaan nij so' a:

—Sese daj se 'o snij cuchuman rá soj nī'yaj soj man Diose, ne sese ase vaa caân cuéj mostazá xlá gaa cuchuman rá soj, ne cataj soj rihaan chruun se vaa curihanj chruun yo'óó rej nicun' chruun ne ca'anj chruun canicun' chruun rque na ya'anj, ne cunō chruun rihaan soj ei —taj Jesucristó rihaan nij so' a.

*Nana nihánj taj xna'anj se vaa se ca'mii xta' ní' che'é suun qui'yaj suun ní' che'é Diose ma'*

<sup>7</sup> Gaa ne cataj uún Jesucristó rihaan nij apóstol cune' so' a:

—Sese vaa mozó nuu rihaan 'o tuvi' soj, ne sese 'yaj suun uxrá mozó uxrá mozó yo' yo'óó do', sese tumé mozó yo' daán soj xcuu do', ne daj cataj soj rihaan mozó nuu rihaan soj asa' namán mozó yo' ca'anj qui'yaj suun mozó tacaan ga. Ne se cataj soj rihaan mozó yo' se vaa nu' naman mozó ne nu' cayáán mozó cha mozó chraa ma'. Daj chihaa mǐj se tu'va soj danj a ma'. <sup>8</sup> Maan se cataj soj: “Qui'yaj chuvii so' cha 'unj chraa, ne cuta' so' chraa do', na do', rihaan mesá rej cha 'unj chraa, ne rque so' nij rasuun achiin manj, ne asa' quisij chaj chraa gaa ne ca'vee cha so' chraa ne co'o so' na á”. Danj ca'mii soj rihaan se-mozó soj nanj á. <sup>9</sup> Ne se caráya'anj soj man mozó sese qui'yaj suun ndo'o mozó yo' suun ca'ne' soj rihaan mozó yo' ma'. <sup>10</sup> Ne ase vaa mozó nuu rihaan Diose vaa soj, ne che'é dan asa' quisij qui'yaj suun soj nu' suun ca'ne' Diose rihaan soj, ne cataj soj se vaa mozó rmii me soj, ne inanj do' suun ataj Diose rihaan soj qui'yaj suun soj nanj adonj —taj Jesucristó rihaan nij so' a.

*Nana nihánj taj xna'anj che'é sí samaritano sí nago' graciá rihaan Diose a*

<sup>11</sup> Dan me se vaj Jesucristó chrej ca'anj chuman' Jerusalén, ne cachée so' chrej uun ran' estadó Samaria ga estadó Galilea, <sup>12</sup> ne dan me se daj doj catuú so' 'o chuman', ne nari' tuvi' so' ga chi' sí ran' luj ri'yuj a. Ne gan' canicun' nij so', <sup>13</sup> ne nucaj canacúun nij so' man Jesucristó, ne cataj nij so':

—Cunuu 'ee rá so' man núj, maestró Jesucristó —taj nij so', caguá nij so' a.

<sup>14</sup> Gaa ne quene'en Jesucristó man nij so', gaa ne cataj Jesucristó rihaan nij so' a:

—Cavii soj ca'anj soj, ne tihaa soj man soj rihaan nij xrej á —taj Jesucristó rihaan nij so' a.

Dan me se cuno nij so' nana ca'mii Jesucristó, ne cavii nij so', ca'anj nij so', ne gaa vaj nij so' chrej, ne nahuun sa' cunudanj nij so' ta'aj chrej a. <sup>15</sup> Ne yo'o tuvi' nij so' ro', xcaj cuentá se vaa nahuun sa' so', gaa ne canicaj so' ca'anj so' rej vaj Jesucristó, ne nucaj ndo'o caguá so' cataj so' se vaa sa' uxrá qui'yaj Diose ga so' a. <sup>16</sup> Ne gaa cuchí so' rihaan Jesucristó, gaa ne canicun' ruj so' ne nago' so' graciá rihaan Jesucristó a. Ne sí samaritano sí yaníj ga nij yuvii israelitá me so' a.

<sup>17</sup> Gaa ne cataj Jesucristó rihaan nij sí chée ga so' a:

—Chí' ya yuvii nahuun sa', qui'yáj, raj a. Ne me rej vaj yo'ó uun nij sí nahuun sa', rá soj ga. <sup>18</sup> Ne a 'o nij so' ne canicaj cataj se vaa sa' uxrá qui'yaj Diose che'é so' a ma'. Orún' sí yaníj nihánj me sí guun rá cataj daj qui'yaj Diose ga so' na' —taj Jesucristó, xná'anj so' man nij yuvii chée ga so' a.

<sup>19</sup> Gaa ne canicaj Jesucristó cataj Jesucristó rihaan sí samaritano yo':

—Naxumaan so', ne ca'anj so' á. Che'é se amán rá so' ni'yaj so' Diose ro', che'é dan aj nahuun sa' so' ei —taj Jesucristó rihaan so' a.

*Nana nihánj taj xna'anj che'é güii guun che'e Diose guun chij Diose rihaan chumii nihánj a*

<sup>20</sup> Dan me se xná'anj nij sí fariseo man Jesucristó me güii guun chij Diose rihaan chumii nihánj a. Gaa ne cataj so' rihaan nij sí fariseo a:

—Taj che'é ni'yaj ndo'o soj ma'. Ca'vee se guun chij Diose rihaan chumii nihánj, tzaj ne se quene'en yuvii ma'. <sup>21</sup> Ne se cataj nii: “Ni'yaj so' ei. Nihánj me guun chij Diose á. Yo' me rej guun chij Diose á”. Se ca'mii yuvii danj ma'. 'O se sca'núj ma'an soj vaj 'o sí 'yaj uun chij Diose adonj —taj Jesucristó rihaan nij sí fariseo a.

<sup>22</sup> Gaa ne canicaj Jesucristó cataj so' rihaan nij sí tucu'yón se-nana so' a:

—Vaa güii guun ndo'o rá soj quene'en soj güii nihánj güii vaj 'unj sij ca'née Diose nica yu'unj man yuvii rihaan chumii nihánj, tzaj ne se ca'vee quene'en soj manj ma'. <sup>23</sup> Gaa ne cataj yuvii rihaan soj: “Ni'yaj so' ei. Yo' me rej vaj Jesucristó ei”. Ne cataj uún yuvii: “Ni'yaj so' ei. Nihánj me rej vaj Jesucristó ei”, cataj yuvii rihaan soj a. Tzaj ne se cavii soj nano' soj manj ma'. <sup>24</sup> Dan me se ndaa rá se uun gaa raan rihaan chumii nihánj, ne 'o chuguun nu' rihaan chumii nihánj ro', ne ne'en cunudanj yuvii se vaa raan rihaan chumii á. Ne ase uun rá soj ne'en soj gaa raan ro', danj guun rá soj asa' ca'ná' 'unj sij nica yu'unj man yuvii, ne quene'en nu' yuvii man rihaan chumii nihánj se vaa ca'ná' 'unj adonj. <sup>25</sup> Tzaj ne vaa che'é quirán' 'unj que'ee sayuun asino yaan, gaa ne vaa che'é nachri' nij sí man rihaan chumii nihánj ni'yaj nij so' manj a.

<sup>26</sup> Ne ase vaa qui'yaj yuvii gaa cayáan sí cu'naj Noé rihaan chumii ro', danj gaa qui'yaj uún yuvii asa' ca'na' uún 'unj sij ca'née Diose nica yu'unj man yuvii rihaan chumii nihánj adonj. <sup>27</sup> Dan me se chá yuvii do', co'o yuvii do', ne xcaj tuvi' nij yuvii do', inanj danj qui'yaj nij yuvii ndaa quisíj güii catúj nij tuvi'

sí cu'naj Noé rque rihoo xij chéé rihaan na a. Gaa ne taj ni'yón caman' ndo'o, ne ca'na' na ya'anj, ne caráán na ya'anj xráá cunudanj nij so', ne cavi' nij so' a. <sup>28</sup> Ne ase vaa qui'yaj nij yuvii man chuman' cu'naj Sodoma gaa cayáán sí cu'naj Lot ro', danj qui'yaj uún yuvii asa' ca'na' uún 'unj rihaan chumii nihánj adonj. Dan me se chá nij so' do', co'o nij so' do', quiránj nij so' rasuun cutu'vej nij so' do', cunô nij so' naa do', cune' nij so' ve' do', <sup>29</sup> ne nu' curihanj sí cu'naj Lot chuman' Sodoma, ne nu' cavii ya'an rej xta' ga yo'óó azufre, cayuu yo' rihaan chuman' yo', ne cacaa nu' chuman' yo', ne cavi' cunudanj nij sí man chuman' yo' a. <sup>30</sup> Ne ase vaa ne xcaj nij yuvii man gaa naá cuentá se vaa quirán' nij so' sayuun ro', danj gaa uún yuvii asa' quisíj ca'na' uún 'unj sij nicaj yu'unj man yuvii rihaan chumii nihánj adonj. 'O se ndaa síj güii quene'en nij so' manj, gaa ne xcaj nij so' cuentá a.

<sup>31</sup> "Ne güii guun danj me se xa' sí taj xráá ve' tucua' me se se ca'vee catuu so' rá ve' tucua' so' quirii so' si'yaj so' ma'. Ne sí nuy tacaan 'yaj suun tacaan ro', se canicaj so' nano' so' si'yaj so' ma'. Maan se yo'o cunanj nij so' á. <sup>32</sup> Vaa che'é nanuj rá soj daj quirán' nica' sí cu'naj Lot gaa canicaj no' ni'yaj no' rej xcó no', ne cavi' no' a.

<sup>33</sup> "Sí chu'vi' ndo'o cavi' rihaan chumii nihánj ro', cavi' nu' so', ne sí cavi' ro', so' me sí gaa i'na' nimán nu' cavii nu' ca'anj adonj.

<sup>34</sup> "Cuanó nihánj me se cataj xna'anj 'unj rihaan soj a: Ne güii guun danj me se rej nij ro', quitaj roj nica' roj so' cotoj roj so', ne nacaj se-mozó Diose man yo'o so', ne quinaj yo'ó so' a. <sup>35</sup> Ne cunuû vj roj chana' gaj roj no' 'núú trigó, ne nacaj se-mozó Diose man yo'o no', ne quinaj yo'ó no' a. <sup>36</sup> Ne cunuû vj roj snó'o qui'yaj suun roj so' yo'óó, ne nacaj se-mozó Diose man yo'o so', ne quinaj yo'ó so' nanj adonj —taj Jesucristó rihaan nij so' a.

<sup>37</sup> Gaa ne xná'anj nij sí tucuyón se-nana Jesucristó man so', ne:

—Ne me rej ca'na' so', ga Señor —taj nij so', xná'anj nij so' a.

Gaa ne cataj Jesucristó rihaan nij so' a:

—Aj ne'en soj daj 'yaj yachruú vaj rej xta', ne ne'en ma'an xo' me rej naj nee chá xo' a. Taj sí nata' rihaan xo' me rej naj nee yo' ma'. Ne ase uun rá yachruú ro', danj guun rá ma'an soj asa' ca'na' uún 'unj rihaan chumii nihánj adonj. Quene'en ma'an soj sij man rihaan chumii nihánj me rej ca'na' 'unj adonj —taj Jesucristó rihaan nij so' a.

## 18

*Nihánj me cuentó che'é chana' cavi' nica' cachíin ni'yaj ndo'o rihaan cuese a*

<sup>1</sup> Ne nanó Jesucristó cuentó nihánj rihaan nij sí tucuyón se-nana so', che'é rej guun rá so' xcaj nij sí tucuyón se-nana so' cuentá se vaa no xcúun nij so' niganj cachinj ni'yaj nij so' rihaan Diose, ne se guun rmii nij so' ma'. <sup>2</sup> Dan me se cataj Jesucristó a:

—'O cuese cayáán rque 'o chuman' me yo'o so', ne nuveé sij amán rá ni'yaj man Diose do', nuveé sij aráj cochroj rihaan yuvii do', me cuese yo' a. <sup>3</sup> Ne yáán 'o chana' cavi' nica' chuman' yo', ne guun che'e no' cachíin ni'yaj no' rihaan so' se vaa qui'yaj so' sayuun man sí qui'yaj sayuun man no' a. <sup>4</sup> Ne a doj ne ca'vej rá so' racuuj so' man no' a. Tzaj ne 'o güii me se guun rá ma'an cuese yo', ne: "Ca'vee se ne amán raj ni'yaj 'unj Diose do', ca'vee se ne aráj cochroj rihaan yuvii do', <sup>5</sup> tzaj ne che'é se guun rmii ndo'oj 'yaj chana' cavi' nica' nihánj, ne che'é dan ca'ne' cachríi 'unj cacun' che'é sí 'yaj sayuun man no', ne ca'vee a. Se taj, ne guun rmii xréé 'unj, qui'yaj no' vaa güii adonj", guun rá cuese yo' a <sup>6</sup> —taj sí 'nij ra'a man ní', ne cataj uún so'— Xcaj soj cuentá daj ca'mii cuese vaa qui' nimán yo' á. <sup>7</sup> Ne dan me se táá a nij sí narii Diose, ne



nuvii nigan' aguáj ndo'o nij so', achíin ni'yaj nij so' rihaan Diose, ne Diose, tzaj ne se ca'ne' Diose cacun' che'é nij sí 'yaj sayuun man nij so', rá soj na'. Guun raan ndo'o Diose ca'ne' so' cacun', rá soj na'. Se guun danj rá soj ma'. <sup>8</sup> 'O se cataj xna'anj 'unj rihaan soj cuano se vaa ra'yanj uxrá ca'ne' Diose cacun' che'é nij sí 'yaj sayuun man nij sí narij so' man adonj. Tzaj ne dan me se asa' ca'na' uún 'unj sij nicaj yu'unj man yuvii rihaan chumii nihánj, ne me daj yuvii amán rá ni'yaj man Diose narij ga —taj Jesucristó rihaan nij sí tucu'yón se-nana so' a.

*Nihánj me cuentó nanó Jesucristó che'é vij sí cachíin ni'yaj rihaan Diose a*

<sup>9</sup> Gaa ne nanó Jesucristó cuentó nihánj rihaan ta'aj yuvii guun rá se vaa sij sa' inanj me ma'an nij so' ne nachri' nij so' ni'yaj nij so' man yo'ó yuvii a:

<sup>10</sup> —Canicun' vij snó'o rá nuvíi nocoo, cachíin ni'yaj roj so' rihaan Diose a. Yo'ó so' ro', me sí fariseo, ne yo'ó so' ro', me sí tiha' yu'unj man yuvii che'é puextó a.

<sup>11</sup> "Dan me se canicun' sí fariseo yo', ne cachíin ni'yaj so', ne cataj so' nana nihánj rihaan Diose a. 'O se ne ca'mii nucuaj so' ma'. Maan se rihaan ma'an so' ca'mii so', cataj so': "Guun ni'yaj uxrá ní', Ataj Diose. Guun ni'yaj uxrá ní' se vaa ne 'yáa 'unj ndaa vaa 'yaj yo'ó nij yuvii ma'. Dan me se xa' nij so', tzaj ne sij tiha' yu'unj do', sij tumé cacun' do', sij otoj ga nica yo'ó yuvii do', me nij so', ne ne 'yáa 'unj danj ma'. Ne guun ni'yaj ní' se vaa ne 'yáa 'unj ndaa vaa 'yaj sí nihánj sí tiha' yu'unj man yuvii che'é puextó a. <sup>12</sup> Ne vij ya aráj guee 'unj che'é se chá 'o 'o tunj güii, ne rqué 'unj 'o peso rihaan daj a chi' peso 'yaj canaán 'unj rihaan so' ei", taj sí fariseo yo' rihaan Diose a.

<sup>13</sup> "Ne gan' doj tzin' nicun' sí a'néj puextó man yuvii yo', ne guun na'aj ndo'o so' ni'yaj so' man so' rihaan Diose, ne ne ca'vej rá so' naxcaj so' rihaan so' ni'yaj so' rej nicun' Diose

a. Tzaj ne go' so' se-cuxru' so' rucuaa ma'an so', ne cataj so': "Cunuu 'ee rá so' ni'yaj so' manj, Ataj Diose. 'O se sij tumé cacun' mej adonj", taj so' rihaan Diose a.

<sup>14</sup> "Ne cuano nihánj me se cataj xna'anj 'unj rihaan soj se vaa gaa quinan' sí tiha' yu'unj man yuvii che'é puextó yo' tucua so', gaa ne aj cunuu sa' so' rihaan Diose nanj á. Tzaj ne yo'ó so' ro', taj ma'. 'O se xa' sí me rá tacavii sa' man ma'an, tzaj ne quirí' so', ne guun na'aj so' a. Ne xa' sí naquiyaj nica' nimán, tzaj ne cavii sa' ndo'o so' adonj —taj Jesucristó rihaan nij yuvii yo' a.

*Nana nihánj taj xna'anj me che'é caran' rá Jesucristó ni'yaj so' man ne'ej a*

<sup>15</sup> Gaa ne nicaj nij yuvii man nij ne'ej ca'na' nij yuvii rihaan Jesucristó a. 'O se me rá nij yuvii cuta' Jesucristó ra'a so' raaj nij ne'ej che'é rej quirí' ne'ej xna'anj ni'yaj ne'ej a. Tzaj ne quene'en nij sí tucu'yón se-nana Jesucristó daj qui'yaj nij yuvii, gaa ne cataj xna'anj nij so' rihaan nij yuvii se vaa ne nó xcúún nij ne'ej ca'na' nij ne'ej rihaan Jesucristó a. <sup>16</sup> Tzaj ne canacúún Jesucristó man nij sí tucu'yón se-nana so', ne cataj Jesucristó rihaan nij so' a:

—Ca'ne' rá soj ca'na' nij ne'ej rihanj á. Se caráán soj chrej rihaan nij ne'ej mei. 'O se tucua nij sí vaa danj ro', me rej yanj Diose uun chij Diose nanj adonj. <sup>17</sup> Ya ya cataj xna'anj 'unj rihaan soj cuano se vaa sí na'vej rá guun chij Diose nimán, ndaa vaa a'vej rá ne'ej guun chij Diose nimán ne'ej ro', daj chihaa mij se cayáán so' ga Diose asa' guun chij Diose rihaan chumii nihánj ma' —taj Jesucristó rihaan nij sí tucu'yón se-nana so' a.

*Nana nihánj taj xna'anj che'é 'o sí me rá cayáán ga Diose nu' cavii nu' ca'anj a*

<sup>18</sup> Dan me se xna'anj 'o sí nicaj suun yo' man Jesucristó, cataj so' rihaan Jesucristó a:

—Maestro. Síi sa' uxrá mé so' adonj. Daj qui'yáj, ne ca'vee cayánj ga Diose nu' cavii nu' ca'anj ga —taj síi nicaj suun yo', xná'anj so' man Jesucristó a.

<sup>19</sup> Gaa ne cataj Jesucristó rihaan so' a:

—Me che'é cataj so' se vaa síi sa' uxrá mej ga. 'O se orún' Diose me síi sa' á. <sup>20</sup> Ne aj ne'én so' nij nana nocoo ya ya nana cataj xna'anj Diose se vaa canoco' ní' á. Dan me se taj nana yo': "Se cotoj so' ga chana nica yo'ó yuvii ma'. Se ticavi' so' yuvii ma'. Se qui'yaj ituu so' si'yaj yo'ó yuvii ma'. Se nanó so' cuentó ne che'é yuvii ma'. Caraa cochroó so' rihaan rée so' do', rihaan níi so' do' á". Yo' me nana cunó so' ei —taj Jesucristó rihaan síi nicaj suun yo' a.

<sup>21</sup> —Asij gaa mej xnii me ve'é unó 'unj nu' nij nana yo' nanj á —taj so' rihaan Jesucristó a.

<sup>22</sup> Gaa ne cataj Jesucristó rihaan so' a:

—Daj orún' rasuun achiin ya mán so' nanj ei. Dan me se cutu'vee so' cunudanj si'yáa so', ne sa'anj quirí' so' ro', caxrii so' ston nij síi nique, ne cumán ndo'o si'yáa so' rej xta', qui'yaj Diose nanj ei. Ne dan me se ca'na' so', ne canocó' so' manj, ca'anj ní' á —taj Jesucristó rihaan so' a.

<sup>23</sup> Dan me se cuno síi nicaj suun yo' nana nihánj, gaa ne quinano' ndo'o rá so' a. 'O se síi ru'vee ndo'o me so' a.

<sup>24</sup> Dan me se ni'yaj Jesucristó man so', ne cataj Jesucristó:

—Sayuun uxrá vaa quisij nij síi vaa ndo'o sa'anj rihaan cayáan nij so' ga Diose asa' guun chij Diose rihaan chumii nihánj nanj adonj. <sup>25</sup> Dan me se ne'en soj se vaa sayuun ndo'o vaa cachén xcuu camelló yu'uj taj tacúun cúu nuvá, tzaj ne ca'vee a doj cachén xcuu yo' yu'uj taj tacúun cúu nuvá, ndaa rá se vaa síi ru'vee, ne se guun cachén ma'an síi ru'vee cayáan so' ga Diose asa' guun chij Diose rihaan chumii nihánj a ma' —taj Jesucristó a.

<sup>26</sup> Gaa ne xná'anj nij síi cuno nana nihánj man Jesucristó, cataj nij so':

—Che'é dan me se me síi guun nu-cuaj quinanii rihaan sayuun ga —taj nij so', xná'anj nij so' man Jesucristó a.

<sup>27</sup> Gaa ne cataj Jesucristó rihaan nij so' a:

—Xa' rasuun na'vee qui'yaj ma'an inanj yuvii, tzaj ne Diose me síi uun nucuaj qui'yaj nu' rasuun yo' adonj —taj Jesucristó rihaan nij so' a.

<sup>28</sup> Gaa ne cataj Pedró rihaan so' a:

—Ne núj ga. Aj tanáj núj nu' si'yaj núj, ne canoco' núj mán so' á —taj Pedró rihaan Jesucristó a.

<sup>29</sup> Gaa ne cataj Jesucristó rihaan nij so' a:

—Cuanó nihánj me se cataj yá 'unj rihaan soj se vaa síi tanáj ve' tucua tanáj nica tanáj tinúu tanáj tuvi' tanáj ta'níi tanáj, che'é rej guun chij Diose rihaan chumii nihánj ro', <sup>30</sup> uxrá doj a rasuun quirí' uún so' gaa vaa i'na' so' rihaan chumii nihánj, ne asa' guun chij Diose rihaan chumii nihánj me se yo'ó cayáan so' ga Diose nu' cavii nu' ca'anj nanj adonj —taj Jesucristó rihaan nij so' a.

*Nana nihánj taj xna'anj se vaa síi va'núj cataj xna'anj Jesucristó se vaa cavi' so' ne cunu i'na' uún so' a*

<sup>31</sup> Dan me se nicaj Jesucristó chujij nij síi tucu'yón se-nana so' ca'anj so', ne cataj so' rihaan nij so':

—Nihánj me ca'anj ní' chuman' Jerusalén, ne asa' cuchi' ní', ne quisij ya nu' nana cataj xna'anj nij síi nata' se-nana Diose gaa naá che'é 'unj sij ca'neé Diose nicaj yu'unj man yuvii, <sup>32</sup> ne dan me se tacuachén nii manj rihaan nij síi yaníj, ne ca'nga' nacoó nij so' quene'en nij so' manj, ne qui'yaj chi'ii nij so' manj, ne quirii talúj nij so' manj, <sup>33</sup> ne go' nij so' cuartá xráj, gaa ne ticavi' nij so' manj a. Gaa ne cachén va'núj güii, gaa ne cunu i'na' uún 'unj, qui'yaj Diose ei —taj Jesucristó rihaan nij so' a.

<sup>34</sup> Ne ne quene'en uxrá nij so' me che'é ca'mii Jesucristó danj ma'. 'O se ne ca'vee xcaj nij so' cuentá che'é nana yo' ma'.

*Nana nihánj taj xna'anj se vaa naxra' rihaan 'o sí tuchrii, qui'yaj Jesucristó a*

<sup>35</sup> Dan me se gaa quinichrun' Jesucristó chuman' Jericó, ne yáán 'o sí tuchrii tu'va chrej, ne achíin so' caridad rihaan yuvií a. <sup>36</sup> Dan me se cuno sí tuchrii yo' se vaa cachén ndo'o yuvií chrej rej ne so', ne che'é dan xná'anj so' man yuvií che'é rej vaj ndo'o yuvií chrej yo' a. <sup>37</sup> Gaa ne cataj xna'anj nii rihaan so' se vaa Jesucristó sí cavii chuman' Nazaret me sí achén rej ne nij so' a. <sup>38</sup> Gaa ne dan me se caguáj sí tuchrii yo', cataj so':

—Ya ya ta'níi ta'nij si'no sí cu'naj David sí cane gaa naá mé so', Jesús. Cunuu 'ee rá so' manj ei —taj so', caguáj so' a.

<sup>39</sup> Gaa ne cataj nij sí racuíj man so' chéé so' se vaa se tu'va so' danj, maan se:

—Dínj gaa tu'vá so' á —taj nij so' rihaan sí tuchrii, tzaj ne doj a nucuaj caguáj so', cataj so':

—Ta'níi ta'nij si'no sí cu'naj David mé so' ei. Cunuu 'ee rá so' manj ei —taj so', caguáj so' rihaan Jesucristó a.

<sup>40</sup> Canicun' Jesucristó, ne canacúun Jesucristó man sí tuchrii se vaa racuíj nii man so' ca'na' so' rihaan Jesucristó a. Ne gaa quinichrun' sí tuchrii yo' rihaan Jesucristó, ne xná'anj Jesucristó man so', cataj Jesucristó rihaan so' a:

<sup>41</sup> —Daj qui'yáj mán so', rá so' ga —taj Jesucristó, xná'anj Jesucristó man so' a.

—Curuvi' rihanj raj, Señor —taj so' rihaan Jesucristó a.

<sup>42</sup> Gaa ne cataj Jesucristó rihaan so':

—Ca'vee curuvi' rihaan so' á. Maan che'é se amán rá so' ni'yaj so' manj ro', che'é dan nahuun sa' so' ei —taj Jesucristó a.

<sup>43</sup> Ne nu' curuvi' rihaan so', gaa ne canoco' so' xcó Jesucristó, ne nata' so' se vaa sa' uxrá qui'yaj Diose ga so' a. Ne nu' nij yuvií quene'en daj quiran'

so' cataj se vaa sa' uxrá qui'yaj Diose a.

## 19

*Nana nihánj taj xna'anj daj qui'yaj sí cu'naj Zaqueo gaa guun rá so' quene'en so' man Jesucristó a*

<sup>1</sup> Dan me se catúj Jesucristó chuman' Jericó, ne cachén so' chuman' yo', <sup>2</sup> ne yáán 'o sí cu'naj Zaqueo chuman' yo', ne so' me sí uun chij rihaan nij sí tiha' yu'unj man yuvií che'é puextó, ne ru'vee ndo'o so' a. <sup>3</sup> Dan me se guun rá so' quene'en so' me sí me Jesucristó, tzaj ne ne ca'vee quene'en so', che'é se man ndo'o yuvií, ne sí chre' nii vaa sí cu'naj Zaqueo a. <sup>4</sup> Che'é dan yoo cunánj so' quitáa yaan so' rihaan nij yuvií, gaa ne cavii so' raá 'o chruun man chruj higó raá, che'é yan me rá so' quene'en so' man Jesucristó a. 'O se cachén Jesucristó tacóo chruun yo' a. <sup>5</sup> Dan me se gaa cuchi' Jesucristó tacóo chruun taj Zaqueo, ne ni'yaj Jesucristó raá chruun, ne cataj so' rihaan Zaqueo a:

—Nanj so' cuaj rihaan yo'óo, Zaqueo. 'O se vaa che'é ndo'o carán' 'unj ve' tucúa so' cuan' á —taj Jesucristó rihaan Zaqueo a.

<sup>6</sup> Gaa ne yoo nanij Zaqueo rihaan yo'óo, ne guun niha' uxrá rá so' se vaa carán' Jesucristó tucúa so' a.

<sup>7</sup> Dan me se cuno nij yuvií daj cataj Jesucristó, gaa ne nij ca'mii nij yuvií ni'yaj nij so' man Jesucristó a. Ne cataj nij so' che'é Jesucristó a:

—Nihánj me se carán' so' tucúa 'o sí tumé ndo'o cacun' adonj —taj nij yuvií ni'yaj nij so' man Jesucristó a.

<sup>8</sup> Tzaj ne canicun' ma'an Zaqueo, cataj so' rihaan sí 'nij ra'a man ní' a:

—Cuanó nihánj me se rque 'unj yanéj si'yáj rihaan nij sí nique, ne nij sí tiha' yu'unj 'unj man, tzaj ne naqui'yáj 'o cunu' ca'anj narque 'unj rihaan nij so' se vaa ca'néj 'unj man nij so', Señor —taj so' rihaan Jesucristó a.

<sup>9</sup> Gaa ne cataj Jesucristó rihaan so' a:

—Cuan' me se aj cavii sa' nij tucua síi nihánj, ndaa rá se vaa 'o ta'níi síi cu'naj Abraham gaa naá ro', danj vaa ma'an so' cuano a. <sup>10</sup> 'O se ca'ná' 'unj sij nicaj yu'unj man yuvij che'é rej ca'vee nano' 'unj man nij síi ca'anj ni'ya, ne cavii sa' nij so' qui'yáj adonj —taj Jesucristó rihaan nij so' a.

*Nana nihánj me cuentó nanó Jesucristó che'é síi racuáj sa'anj rihaan se-mozó so' a*

<sup>11</sup> Dan me se cuno nij síi man chuman' Jericó se-nana Jesucristó, tzaj ne guun rá nij so' se vaa che'é se nichrun' Jesucristó chuman' Jerusalén, che'é dan ra'yanj guun chij Diosé rihaan chumij nihánj adonj, rá nij so', ne che'é dan guun che'e Jesucristó naqui'yaj Jesucristó yo'o cuentó nihánj, gaa ne ca'vee xcaj nij yuvij cuentá a. <sup>12</sup> Dan me se cataj so' a:

—Yo'o síi xna'anj ru'vee guun rá quinaj suun uun chij chiháán, ne guun rá so' ca'anj so' chuman' raa ne nata suun so' suun guun chij chiháán so', gaa ne canicaj so' naman so' chiháán so', rá so' a. <sup>13</sup> Gaa ne canacúun so' man chi' nij se-mozó so' ca'na' rihaan so', gaa ne rqué so' 'o sa'anj mina rihaan 'o 'o nij so', ne cataj xna'anj so' rihaan nij so' se vaa qui'yaj suun nij so' ga sa'anj, ne tanaca nij so' man sa'anj, ne ndaa quisij güii naman uún so', gaa ne nuchruj nij so' cuentá, taj so' a. Danj ca'mii so', gaa ne cavii so' ca'anj so' a.

<sup>14</sup> "Tzaj ne nij síi man chiháán so' ro', quitáa ri'yunj man so', ne che'é dan ca'néé nij so' síi ca'anj suun ca'anj cataj xna'anj rihaan síi nicaj suun rej ca'anj síi xna'anj ru'vee yo' se vaa ne ca'vej rá nij so' guun chij síi xna'anj ru'vee yo' rihaan nij so' a.

<sup>15</sup> "Dan me se ya qui'yaj canaán síi xna'anj ru'vee yo' guun chij so' chiháán so', gaa ne gaa namán so', ne cataj xna'anj so' se vaa nacunj nii man chi' nij se-mozó so' nij síi rqué so' sa'anj rihaan a. 'O se guun rá so'

xcaj so' cuentá me daj sa'anj qui'yaj canaán nij so' a.

<sup>16</sup> "Dan me se síi ca'na' asino yaan rihaan so' ro', cataj: "Xa' sa'anj mina rqué so' manj, tzaj ne qui'yaj canaán 'unj 'ó chi' sa'anj mina uún, qui'yaj sa'anj yo', señor", taj so' rihaan síi xna'anj ru'vee yo' a. <sup>17</sup> Gaa ne cataj síi xna'anj ru'vee yo' rihaan mozó yo': "Cunaj uxrá qui'yáa so' á. Mozó sa' inanj mé so' ei. Che'é dan guun chij so' rihaan chi' ya chuman', qui'yáa", taj síi xna'anj ru'vee rihaan mozó sa' yo' a.

<sup>18</sup> "Dan me se ca'na' uún yo'ó mozó, cataj so': "Xa' sa'anj mina rqué so' manj, tzaj ne qui'yaj canaán 'unj yu'un' sa'anj mina uún, qui'yaj sa'anj yo', señor", taj so' rihaan síi xna'anj ru'vee yo' a. <sup>19</sup> Ne cataj síi xna'anj rihaan so': "Gaa ne guun chij so' rihaan 'un' ya chuman' nanj ei", taj so' rihaan yo'ó mozó yo' a.

<sup>20</sup> "Dan me se ca'na' yo'ó so' uún, ne cataj so': "Nihánj me nacaj so' se-sa'anj so', señor. 'O se caraa sa' 'unj man yo' rque 'o vitó, <sup>21</sup> ne cuchu'ví' 'unj ni'yaj 'unj mán so', che'é se sij sca'ndo'o nimán mé so', ne naxcaj so' rasuun rej nuvi' rasuun cutá' so', ne yo'ó yuvij unô caân, ne so' me se, ne ma'án so', ne rii so' naa adonj", taj mozó yo' rihaan síi xna'anj ru'vee yo' a.

<sup>22</sup> "Gaa ne cataj síi xna'anj ru'vee rihaan mozó yo': "Mozó chi'ii nimán mé so' ei. Cutá' 'unj cacun' xráa so' che'é nana tu'va ma'án so' á. 'O se quene'én so' se vaa sij sca'ndo'o nimán mej, ne quene'én so' se vaa naxcaj 'unj rasuun rej nuvi' rasuun cutaj, ne quene'én so' se vaa yo'ó yuvij unô caân ne 'unj rii naa nanj á. <sup>23</sup> Che'é dan me che'é ne tacuachén so' se-sa'anj 'unj rihaan nij síi nuta' sa'anj ga. Gaa ne gaa ca'ná' 'unj, ne nacaj 'unj se-sa'anj 'unj ga sa'anj nata' raa yo' ga", taj síi xna'anj ru'vee yo' rihaan mozó rmij yo' a. <sup>24</sup> Gaa ne cataj so' rihaan yo'ó nij síi nicun' ga so' a: "Ca'nee soj sa'anj nicaj mozó chi'ii nihánj, ne tacuachén soj rihaan



sí nicaj chí' sa'anj mina yo' á”, taj sí xna'anj ru'vee yo' rihaan yo'ó nij so' a. <sup>25</sup> “Tzaj ne aj nicaj so' 'o chí' vaa gueé á”, cataj nij so' rihaan sí xna'anj ru'vee yo' a. <sup>26</sup> “Taj se 'yaj ma'. Cuaño nihánj me se cataj xna'anj 'unj rihaan soj se vaa sí ne'en sa' qui'yaj suun rihanj ro', ne vaa güii, ne doj a guun nucuaj so' qui'yaj suun so' adonj. Ne sí ne ne'en qui'yaj suun rihanj ro', ca'neé 'unj suun le'ej nii ata so', ne quinaj uun so' adonj”, taj sí xna'anj ru'vee yo' rihaan nij so' a. <sup>27</sup> Gaa ne cataj uún so': “Tzaj ne xa' nij sí taj ri'yunj manj sí ne ca'vej rá guun chíj 'unj rihaan, tzaj ne nicaj soj man nij so' ca'na' soj rihanj, gaa ne ticaví' soj man nij so' rihanj nihánj ei”, taj uún so' a. <sup>28</sup> —Veé danj quisíj cuentó nanó Jesucristó a.

Gaa ne cavii so' ca'anj so' chuman' Jerusalén, ne táa yaan so' rihaan nij sí tucu'yón se-nana so' a.

*Nana nihánj taj xna'anj daj qui'yaj Jesucristó gaa catúj Jesucristó chuman' Jerusalén a*

<sup>29</sup> Dan me quinichrun' Jesucristó roj chuman' cu'naj Betfagé ga Betania a. Naj roj chuman' yo' tacóo quij cu'naj Quij man Chruun Olivó a. Gaa ne ca'neé Jesucristó man vij tuvi' nij sí tucu'yón se-nana so' ca'anj rque chuman' Betfagé, <sup>30</sup> ne cataj so' rihaan roj so' a:

—Cavii roj soj ca'anj soj, ne catuu roj soj chuman' nihánj chuman' naj rihaan ní, ne asa' catúj roj soj, ne nari' roj soj man yo'ó burró le'ej ya'anj numii a. Dan me se nache roj soj man xo', ne nicaj roj soj ca'na' roj soj rihanj nihánj á. <sup>31</sup> Ne sese xna'anj nii man roj soj me che'é nache roj soj burró, ne cataj roj soj: “Sí 'nij ra'a man ní' achiin xcuu nihánj rihaan chuguanj”, cataj roj soj á —taj Jesucristó rihaan roj sí tucu'yón se-nana so' a.

<sup>32</sup> Dan me se ca'anj roj so', ne catúj roj so' chuman' yo', ne nari' roj so' man burró le'ej, ndaa vaa cataj xna'anj Jesucristó rihaan roj so' a.

<sup>33</sup> Ne gaa nache roj so' man burró, ne xna'anj nij sí daan burró man roj so' a:

—Me che'é nache soj burró ga —taj nij so', xna'anj nij so' man roj so' a.

<sup>34</sup> Gaa ne cataj roj so' rihaan nij sí daan burró a:

—Sí 'nij ra'a man ní' achiin xcuu nihánj rihaan chuguanj —taj roj so' a.

<sup>35</sup> Gaa ne nicaj roj so' xcuu ca'na' roj so' rihaan Jesucristó, ne cuta' roj so' sagan' roj so' xráá burró, ne tacavii roj so' man Jesucristó xráá burró yo', <sup>36</sup> ne gaa vaj Jesucristó, ne cuchruj ndo'o nij yuvii yatzíj sagan' nij so' rá chrej, ne achén Jesucristó ga burró yo' rihaan yatzíj a. <sup>37</sup> Dan me se quinichrun' Jesucristó chuman' Jerusalén, ne vaj so' tacóo Quij man Chruun Olivó rej vaj nij chrej, ne guun che'e que'ee nij sí tucu'yón se-nana so' guun niha' rá nij so', ne aguáj nij so', ca'mii sa' nij so' che'é Diose che'é nu' nij suun sa' nocoo qui'yaj Jesucristó quene'en nij so' a. <sup>38</sup> Dan me se cataj nij so':

—Cunaj uxrá vaa ca'na' sí ca'neé sí 'nij ra'a man ní' ei. Sí nicaj suun rey uun chíj rihaan ní' me so' ei. Ve'é cayáán Diose sí nicun' xta' á. Cunaj uxrá 'yaj so' ei —taj nij yuvii, caguáj nij so' a.

<sup>39</sup> Dan me se ta'aj nij sí chéé ga Jesucristó me sí fariseo, ne ta'aj nij so' cataj rihaan Jesucristó a:

—Cataj xna'anj so' rihaan nij sí tucu'yón se-nana so' se vaa ca'ne' rá nij so' ga nana vaa danj á —taj nij so' rihaan Jesucristó a.

<sup>40</sup> Gaa ne cataj so' rihaan nij so' a:

—Cataj xna'anj 'unj rihaan soj cuaño se vaa sese dínj gaa tu'va nij sí aguáj nana vaa danj, ne ma'an nij yahij naj rihaan yo'óo nihánj caguaj nana vaa danj asuun nanj adonj —taj Jesucristó rihaan nij sí fariseo yo' a.

<sup>41</sup> Ne gaa quinichrun' Jesucristó chuman' Jerusalén yo', ne ta'vee Jesucristó che'é chuman' yo', <sup>42</sup> ne cataj so':

—Güii cuan' me se me inan raj quene'en soj sij man chuman'

Jerusalén daj qui'yaj soj ne ca'vee dínj cayáan soj, tzaj ne cuano nihánj me se se ca'vee xcaj soj cuentá ma'.  
<sup>43</sup> Dan me se quisij ya güii, ne ca'na' nij síi taj ri'yunj man soj, ne cune' nij so' chingá nu' anicaj chiháan soj, ne tucuachriin nij so' man soj, ne se ca'vee curihanj soj, qui'yaj nij so' ma'.  
<sup>44</sup> Ne tucuanee nij so' nu' chiháan soj, ne cavi' soj, ne a 'ó yuvej se quitáá xráa tuvi' yuvej, qui'yaj nij so' ma'. Danj quiran' soj, che'é se gaa guun rá Diose racuíj Diose man soj, ne ne xcaj soj cuentá ma' —taj Jesucristó ni'yaj so' man nij síi man chuman' Jerusalén yo' a.

*Nana nihánj taj xna'anj se vaa quirii Jesucristó man nij yuvii tu'vej rasuun rá nuvií nocoo a*

<sup>45</sup> Gaa ne catúj Jesucristó rá nuvií nocoo, gaa ne guun che'e so' quirii so' man nu' nij yuvii tu'vej rasuun man rá nuvií nocoo a. <sup>46</sup> Ne cataj so' rihaan nij so' a:

—Danj Diose taj se vaa tucua Diose me rej na'víj yuvii rihaan Diose á. Tzaj ne guun tucua síi ituu man tucua Diose nihánj, qui'yaj soj nanj á —taj Jesucristó rihaan nij yuvii quirii so' a.

<sup>47</sup> Ne dan me se daj a güii nicun' Jesucristó rá nuvií nocoo, tucu'yón Jesucristó se-nana so' rihaan yuvii, tzaj ne nij xrej atá suun nocoo doj do', nij síi naqui'yaj cuu se-tucuanj Moisés rihaan yuvii do', nij síi uun chij rihaan nij yuvii israelitá do', nano' uxrá nij so' daj qui'yaj nij so' gaa ne ca'vee cavi' Jesucristó a. <sup>48</sup> Tzaj ne ne nari' nij so' daj qui'yaj nij so' cavi' Jesucristó ma'. 'O se guun niha' uxrá rá nij yuvii cuno nij so' se-nana Jesucristó a.

## 20

*Nana nihánj taj xna'anj se vaa xna'anj nii man Jesucristó me síi ca'ne' suun rihaan so' qui'yaj so' ndaa vaa yaj so' a*

<sup>1</sup> Dan me se 'o güii nicun' Jesucristó rá nuvií nocoo, tucu'yón Jesucristó rihaan yuvii, ne nata' so' se-nana

so' nana sa', ne nicun' xrej atá suun nocoo doj nicun' síi naqui'yaj cuu se-tucuanj Moisés nicun' síi uun chij nicun' rej tucu'yón Jesucristó a. <sup>2</sup> Gaa ne cataj nij so' rihaan Jesucristó a:

—Me síi ca'ne' suun rihaan so' qui'yáa so' ndaa vaa 'yáa so' ga —taj nij so', xna'anj nij so' man Jesucristó a.

<sup>3</sup> Gaa ne cataj Jesucristó rihaan nij so' a:

—Ne vaa yo'o nana me raj xna'anj 'unj man nij soj, ne cataj soj rihanj á. <sup>4</sup> Dan me se me síi ca'ne' suun rihaan síi cu'naj Juan cuta' ne so' man yuvii, rá soj ga. Ma'an Juan cavii raá na'. Ase Diose cataj xna'anj rihaan so' xa'. Cataj xna'anj nij soj rihanj ei —taj Jesucristó rihaan nij so' a.

<sup>5</sup> Gaa ne nuchruj raá ndo'o nij so' ga tuvi' nij so' a:

—Ne sese cataj ní' se vaa Diose ca'ne' suun rihaan síi cu'naj Juan cuta' ne so' man yuvii, ne cataj Jesucristó rihaan ní' me che'é ne cuchuman rá ní' nana ca'mii Juan, cataj so' a. <sup>6</sup> Tzaj ne sese cataj ní' se vaa nuveé sij ca'ne' Diose suun rihaan me síi cu'naj Juan, ne go' cunudanj nij yuvii yahij man ní' a. 'O se cuchuman rá nij yuvii se vaa síi nata' se-nana Diose me síi cu'naj Juan a —cataj nij so' ga tuvi' ma'an nij so' a.

<sup>7</sup> Gaa ne cataj nij so' rihaan Jesucristó se vaa ne ne'en nij so' me síi ca'ne' suun rihaan síi cu'naj Juan cuta' ne so' man yuvii a.

<sup>8</sup> Gaa ne cataj Jesucristó rihaan nij so' a:

—Che'é dan se cataj xna'anj 'unj rihaan nij soj me síi ca'ne' suun rihanj qui'yáj ndaa vaa 'yá ma' —taj Jesucristó rihaan nij so' a.

*Nana nihánj me cuentó nanó Jesucristó che'é yuvii chi'ii yaj suun rihaan yo'óo a*

<sup>9</sup> Gaa ne guun che'e Jesucristó nanó so' cuentó nihánj rihaan nij yuvii a.

—Dan me se cuchruj yo'o so' yo'o naa chruj uvá a. Gaa ne tanáj so' man naa yo' rihaan síi qui'yaj suun naa yo', ne curihanj so' ca'anj so' gan'

que'ee yavii a. <sup>10</sup> Ne 'o güii ca'née so' man yo'ó se-mozó so' ca'anj so' rihaan nij sí nuu tumé xnaa so' a. 'O se me rá so' rque nij sí nuu tumé naa doj chruj uvá rihaan yo'ó mozó yo', tzaj ne a doj chruj ne rque nij sí nuu tumé naa rihaan yo'ó mozó yo' ma'. Maan se go' ndo'o nij so' xraá so', ne quirii nij so' man so' rque naa yo' a. <sup>11</sup> Che'é dan ca'née sí to'oj naa yo' man yo'ó mozó uún, tzaj ne nij sí nuu tumé naa ro', go' uún nij so' xraá mozó uún, ne nij uxrá qui'yaj nij so' man so', ne quirii nij so' man so' rque naa, ne a doj chruj ne rque nij so' man mozó yo' a ma'. <sup>12</sup> Gaa ne ca'née uún sí xnaa yo' yo'ó mozó uún, tzaj ne quiran' chi'ij ndo'o so', qui'yaj nij sí nuu tumé naa, ne quirii nij so' man so' xe' a.

<sup>13</sup> "Gaa ne guun rá sí xnaa yo': "Daj qui'yaj yaj ga. 'O se ca'nej 'unj ma'an ta'nij sí 'ee raj man á. Caraa cochroj nij so' rihaan ta'nij sese ca'anj ta'nij saj xee", guun rá sí xnaa, ne ca'née so' man ta'ní ma'an so' ca'anj a. <sup>14</sup> Dan me se quene'en nij sí nuu tumé naa se vaa 'na' ta'ní sí xnaa, gaa ne nuchruj raaj nij so' ga tuvi' nij so' daj qui'yaj nij so', taj nij so' a: "Sí nihánj me sí guun xnaa man naa nihánj vaa güii ei. Che'é dan ticavi' ní' man so', ne vaa güii, ne guun xnaa ma'an ní' man naa nihánj chuguanj", taj nij so' rihaan tuvi' nij so' a. <sup>15</sup> Gaa ne quirii nij so' man ta'ní sí xnaa yo' xe', ne ticavi' nij so' man ta'ní sí si'yaj naa nanj adonj. Che'é dan daj qui'yaj sí si'yaj naa yo' man nij sí nuu tumé xnaa so', rá nij soj ga. <sup>16</sup> 'O se ca'na' so' vaa güii, ne ticavi' so' man nij sí nuu tumé naa yo', ne tacuachén so' xnaa so' rihaan yo'ó sí tumé man xnaa so' nanj adonj —taj Jesucristó rihaan nij yuvi' a.

Gaa cuno nij yuvi' nana nihánj, ne cuchu'vi' ndo'o nij so', ne cataj nij so':

—Orún' raaj Diose me sí nacaj man núj rihaan sayuun yo' nanj chuguanj —taj nij so' rihaan Jesucristó a.

<sup>17</sup> Gaa ne ni'yaj Jesucristó man nij so', ne xná'anj Jesucristó man nij so'

a:

—Che'é dan me se me che'é nó nana nihánj rihaan danj Diose, rá nij soj ga: "Yuvej quiri'ij nij sí cune' ve' ro', guun yuvej sa' doj rihaan cunudanj nij yuvej man tacóo ve' yo' nanj adonj", taj danj Diose a. <sup>18</sup> Ne yuvej yo' me se ase vaa yuvej yo' vaa 'unj, ne ase vaa yuvi' tixé yuvej yo' vaa yuvi' na'vej rá cuno rihaan 'unj, ne uxrá quiran' nij so' sayuun nanj adonj. Ne ase vaa yuvi' quinij yuvej yo' xraá vaa nij yuvi' qui'yáa 'unj sayuun man, ne yuun che'e quinavij nij so' nu' cavii nu' ca'anj nanj adonj —taj Jesucristó a.

<sup>19</sup> Gaa ne guun rá nij sí naqui'yaj cuu se-tucuanj Moisés rihaan yuvi' guun rá nij xrej ata suun nocoo doj guun rá quita'aa ra'yanj man Jesucristó, tzaj ne chu'vi' nij so' ni'yaj nij so' man nij yuvi' a. Quene'en nij so' se vaa che'e ma'an nij so' me cuentó nanó Jesucristó a. Ase vaa nij sí nuu tumé naa vaa ma'an nij so' rihaan Jesucristó, ne quene'en nij so' se vaa che'é dan nanó Jesucristó cuentó yo' a.

*Nana nihánj taj xna'anj che'é puextó go' ní' rihaan gobiernó do', che'é se rque ní' rihaan Diose do' a*

<sup>20</sup> Dan me se cutumé ndo'o nij sí naqui'yaj cuu se-tucuanj Moisés rihaan yuvi' do', nij xrej ata suun nocoo doj do', man Jesucristó daj ca'mij so' a. Ne go' nij so' sa'anj rihaan doj tuvi' nij so' sí tiha' yu'unj cuchij' nij so' rihaan Jesucristó, ne qui'yaj nij so' ndaa vaa 'yaj sí vaa sa' sí me rá xna'anj nana man so' a. 'O se guun rá nij so' cuta' nij so' cacun' xraá Jesucristó che'é nana ca'mij so', gaa ne ca'vee tacuachén nij so' man Jesucristó rihaan sí nicaj suun procurador a. <sup>21</sup> Dan me se xná'anj nij sí tiha' yu'unj yo' man Jesucristó a:

—Ne'en núj se vaa nana nica inanj a'mii so' ne tucu'yón so' do', maestro. Ne 'o cyaan vaa cunudanj yuvi' rihaan so' chuguanj. Ne ya tucu'yón so' rihaan yuvi' daj qui'yaj yuvi' canoco'

yuvij man Diose, maestro. <sup>22</sup> Dan me se nŕ xcúún ní' go' ní' puextó rihaan síí nicaj suun gobiernó na'. Ase se go' ní' xa' —taj nij síí tiha' yu'unj, xná'anj nij so' man Jesucristó a.

<sup>23</sup> Tzaj ne caxrj rá Jesucristó se vaa me rá nij so' tiha' yu'unj nij so' man so' a. Che'é dan cataj Jesucristó nana nihánj rihaan nij so' a:

<sup>24</sup> —Tihaan soj sa'anj aga' n'iyaj ní' á —taj Jesucristó rihaan nij so' a.

Gaa ne gaa tihaan nij so' sa'anj aga' yo' rihaan Jesucristó, gaa ne cataj Jesucristó:

—Me síí nó rihaan sa'anj aga' nihánj ga. Ne me síí se-chuvij nó rihaan sa'anj aga' nihánj ga —taj Jesucristó, xná'anj so' man nij síí me rá tiha' yu'unj yo' a.

—Síí nicaj suun gobiernó me nó rihaan sa'anj aga' yo', ne nó se-chuvij so' rihaan sa'anj ei —taj nij so' a.

<sup>25</sup> Gaa ne cataj Jesucristó rihaan nij so' a:

—Che'é dan go' soj si'yaj síí nicaj suun gobiernó rihaan ma'an so', ne rque soj si'yaj Diose rihaan Diose á —taj Jesucristó a.

<sup>26</sup> Gaa ne ne guun nucuj nij síí tiha' yu'unj yo' cuta' nij so' cacun' xráá Jesucristó che'é se-nana so' ma'. 'O se cuno cunudanj nij yuvij daj ca'mii nij so', gaa ne ca'anj ndo'o rá nij yuvij cuno nij so' se-nana Jesucristó, ne ca'ne' rá nij so' nanj adonj.

*Nana nihánj taj xna'anj se vaa ya cunuu i'na' uún nij síí cavi' a*

<sup>27</sup> Dan me se cuchi' doj nij síí saduceo rihaan Jesucristó a. Nij síí saduceo ro', a'mii nana nihánj se vaa daj chihaa míj se cunuu i'na' uún yuvij asa' cavi' yuvij, taj nij so' a. <sup>28</sup> Dan me se xná'anj nij so' man Jesucristó, ne cataj nij so' nana nihánj a:

—Cachrón síí cu'naj Moisés nana nihánj rihaan yanj, che'é rej cuno ní' nana nihánj a: “Sese cavi' yo'o síí vaa nica, ne sese taj vaj ta'níí so', ne nŕ xcúún tinúú so' xcaj tinúú so' man choco' so' chana quináj, ne cotoj tinúú síí cavi' ga choco' so', ne

cuchruj no' ne'ej, ne guun ta'nij síí cavi' man ne'ej yo', ne cunuú ne'ej yo' rihaan to'óó síí cavi' yo' a”, taj síí cu'naj Moisés gaa naá, maestro. <sup>29</sup> Dan me se vaa chij nij tinuj 'o nij so' a. Síí chava' ro', xcaj man chana, tzaj ne cavi' so', ne taj vaj ne'ej cuchruj chana nica so', qui'yaj so', <sup>30</sup> ne che'é dan xcaj scue'ee síí cavi' yo' man choco' so' chana quináj, tzaj ne cavi' so' uún, ne xcaj scue'ee so' uún man chana, tzaj ne cavi' so' uún, <sup>31</sup> ne dan me se quisij xcaj nu' chij nij tinuj nij so' man orún' chana yo', tzaj ne taj vaj a 'ó ne'ej cuchruj chana yo', qui'yaj nij so' ma'. Ne cavi' taran' nij so' nanj adonj. <sup>32</sup> Síj, gaa ne cavi' ma'an chana yo' uún, <sup>33</sup> ne dan me se asa' cunuu i'na' uún nij síí cavi', gaa ne me nij tinuj nij so' nicaj man chana yo', rá so' ga. 'O se gaa vaa i'na' nij so', ne nica taran' nij tinuj nij so' guun orún' no' a —taj nij síí saduceo, xná'anj nij so' man Jesucristó a.

<sup>34</sup> Gaa ne cataj Jesucristó rihaan nij so' a:

—Xa' nij yuvij man rihaan chumij nihánj cuano, tzaj ne uchruj nij so' sa'anj do', xcaj tuvi' nij so' do', <sup>35</sup> tzaj ne ino qui'yaj nij yuvij cunuu i'na' uún cayáan ga Diose asa' cunuu naca uún chumij nihánj nanj á. 'O se rej yanj Diose me se taj yan vaj síí xcaj tuvi' yo' ma'. <sup>36</sup> 'O se danj nanj uún, ne taj yan vaj síí cavi' uún rej yo' ma'. 'O se ase vaa nij se-mozó Diose ro', danj gaa nij so', ne cyaan gaa nij so' ga nij se-mozó Diose, ése ta'nij Diose me nij so', ne sij aj cavi' ne cunuu i'na' uún me nij so' adonj.

<sup>37</sup> Ne ma'an síí cu'naj Moisés me síí cataj xna'anj asino yaan se vaa ca'vee cunuu i'na' uún nij síí cavi' ndaa vaa nari' so' gaa canicun' so' rihaan yan nicun' 'o coj aco' ya'an raa a. Dan me se cataj so' se vaa síí 'nij ra'a man ní' ro', me Diose síí noco' nij síí man gaa naá síí cu'naj Abraham do', síí cu'naj Isaac do', síí cu'naj Jacobo do' a. <sup>38</sup> Dan me se nuveé se-Diose nij xngá me Diose ma'. Inanj nij síí vaa i'na' a'vee noco' man Diose nanj



adonj. Che'é dan, nda' se sí cane gaa naá me va'núj nij so', tzaj ne vaa i'na' nij so' rihaan Diose nanj ei. 'O se vaa i'na' cunudanj yuvii ni'yaj Diose nanj adonj —taj Jesucristó rihaan nij so' a.

<sup>39</sup> Gaa ne ta'aj nij sí naqui'yaj cuu se-tucuanj Moisés rihaan yuvii ro', cataj rihaan Jesucristó a:

—Cunaj uxrá ca'mii so', maestro —taj nij so' a.

<sup>40</sup> 'O se ne quisij rá nij so' xna'anj nij so' doj nana man Jesucristó a ma'.

*Nana nihánj taj xna'anj se vaa sí ca'nej Diose tinanii man yuvii rihaan sayuun ro', nuveé nanj yuvii me so' ma'*

<sup>41</sup> Gaa ne cataj Jesucristó rihaan nij so' a:

—Me che'é taj nij soj se vaa nanj ta'ní ta'nij si'nó sí cu'naj David sí cane gaa naá me sí ca'nej Diose tinanii man yuvii rihaan sayuun ga.

<sup>42</sup> 'O se nó se-nana ma'an sí cu'naj David rihaan yanj no chra' qui'yaj so', se vaa cataj so': <sup>43</sup> “Ca'mii Diose sí 'nij ra'a man ní rihaan sí 'nij ra'a manj, cataj so' se vaa cayáán sí 'nij ra'a manj x'núú Diose rej nuva' Diose ndaa se quisij qui'yaj canaán Diose rihaan taran' nij sí taj ri'yunj man sí 'nij ra'a manj ne quirii ta'nga' sí 'nij ra'a manj rihaan nij so' adonj”, taj sí cu'naj David yo' a. <sup>44</sup> Dan me se sí 'nij ra'a man sí cu'naj David me sí ca'nej Diose tinanii man yuvii rihaan sayuun, taj sí cu'naj David yo' a. Sese 'nij ra'a so' man David, gaa ne me che'é taj soj se vaa nanj ta'ní ta'nij si'nó David me so' ga. Taj che'é cataj soj se vaa nanj yuvii me so' ma' —taj Jesucristó rihaan nij sí naqui'yaj cuu se-tucuanj Moisés a.

*Nana nihánj taj xna'anj che'é cacun' tumé nij sí naqui'yaj cuu se-tucuanj Moisés rihaan yuvii a*

<sup>45</sup> Gaa ne ca'mii so' nana nihánj rihaan nij sí tucu'yón se-nana so', ne cuno cunudanj nij yuvii daj ca'mii so' a:

<sup>46</sup> —Xcaj nij soj cuentá daj 'yaj nij sí naqui'yaj cuu se-tucuanj Moisés rihaan yuvii, ne tumé soj man soj

se gaa nanj qui'yaj soj ndaa vaa 'yaj nij so' á. Dan me se niha' rá nij so' cunuú nij so' yatzíj sa' xcaan cachee nij so' rej quene'en yuvii man nij so', ne aran' rá nij so' se vaa ca'mii sa' yuvii ga nij so' gaa chéé nij so' rihaan yu'vee a. Ne uun rá nij so' quitaj nij so' chruun xlá sa' doj gaa 'anj nij so' ve' nuu chre' ní tucu'yón ní se-tucuanj Moisés do', gaa 'anj nij so' cha'anj do' a. <sup>47</sup> Ne a'néj nij so' ve' tucua chana cavi' nica, ne yuun che'e guun tucua nij so' man ve' yo', ne 'yaj xcaan ndo'o nij so' cuentó achíin ni'yaj nij so' rihaan Diose, che'é rej sa' doj guun nucuaj nij so' tiha' yu'unj nij so' man yuvii a. Xa' nij so', tzaj ne che'é se vaa 'yaj nij so' ro', che'é dan doj a gaa sayuun quiran' nij so' qui'yaj Diose, asa' ca'ne' Diose cacun' che'é yuvii adonj —taj Jesucristó rihaan nij sí tucu'yón se-nana so' a.

## 21

*Nana nihánj taj xna'anj che'é chana nique cavi' nica qui'yaj sa' doj rihaan nij ru'vee, ni'yaj Diose a*

<sup>1</sup> Dan me se ni'yaj Jesucristó, ne quene'en so' se vaa araa ndo'o nij sí ru'vee sa'anj rque chrúun taj rihaan nuvií nocoo che'é Diose a. <sup>2</sup> Ne quene'en so' 'o chana cavi' nica chana nique se vaa caraa no' vij guee sa'anj aga' le'ej rque chrúun yo', <sup>3</sup> ne cataj so':

—Cataj xna'anj yá yá 'unj rihaan nij soj cuano se vaa xa' chana cavi' nica chana nique nihánj, tzaj ne doj a caraa no' sa'anj rque chrúun yo' rihaan sa'anj caraa cunudanj yo'ó nij yuvii nanj adonj. <sup>4</sup> 'O se nij so', daj doj sa'anj quináj raá se-sa'anj nij so' ro', caraa nij so' rque chrúun, ne xa' no', tzaj ne nda' se achiin ndo'o sa'anj rihaan no', tzaj ne rque no' rihaan Diose cunudanj sa'anj nicaj no' sa'anj quiraan no' se cha no' nanj adonj —taj Jesucristó a.

*Nana nihánj taj xna'anj se vaa canee nu' nuvií nocoo ne chuman' Jerusalén a*

<sup>5</sup> Dan me se cataj ta'aj yuvij se vaa xa' nuvií nocoo, tzaj ne yuvej sa'inanj me yuvej guun nuvií nocoo, ne me doj uxrá sa'anj go' nij yuvij rihaan Diose che'é rej ca'vee cune' nii nuvií nocoo yo' a. <sup>6</sup> Gaa ne cataj Jesucristó rihaan nij so' a:

—Xa' nu' nuvií nocoo ni'yaj soj nihánj, tzaj ne vaa güii canee nu' nuvií nocoo nihánj, ne a 'ó yuvej se quitáa xráa tuvi' yuvej nihánj a ma' —taj Jesucristó a.

*Nana nihánj taj xna'anj che'é sayuun guun rihaan chumij nihánj vaa güii a*

<sup>7</sup> Dan me se xná'anj nii man Jesucristó, ne cataj nii rihaan so' a:

—Che'é dan cataj xna'anj so' rihaan núj aman canee nu' nuvií nocoo nihánj do', a me rasuun ca'na' qui'yáa so' asa' quisíj ca'na' sayuun yo', señor —taj nii, xná'anj nii man so' a.

<sup>8</sup> Gaa ne cataj so' rihaan nii:

—Tumé ndo'o soj man soj se gaa nanj tiha' yu'unj yuvij man soj á. 'O se ca'na' uxrá yuvij cataj: “Unj me sí na'vij soj, ne Cristo mej á”, cataj nij yuvij, ne cataj uún nij yuvij: “Aj quisíj güii ca'anj ni'ya chumij nanj á”, cataj uún nij yuvij rihaan soj a. Tzaj ne se cuchumán rá soj, ne se canoco' soj man yuvij a'mii danj ma'.

<sup>9</sup> “Dan me se ca'vee se cunó soj nana se vaa unu' uxrá chuman' ga tuvi' chuman' do', ca'vee se cunó soj nana se vaa tucuáa ndo'o yuvij rihaan gobiernó do', tzaj ne se cuchu'vi' soj ma'. Maan se vaa che'é guun sayuun yo' rihaan chumij nihánj asino yaan adonj. Tzaj ne asa' quisíj guun danj, gaa ne se ca'anj ni'ya chumij nihánj nu' orá ma'. 'O se quinaj chumij nihánj doj adonj —taj so' rihaan nij so' a.

<sup>10</sup> Gaa ne cataj uún Jesucristó rihaan nij so' a:

—Dan me se cunú' uxrá yuvij man chuman' nocoo ga yo'ó chuman' nocoo, ne cunú' gobiernó ga tuvi' gobiernó a. <sup>11</sup> Ne cachén ndo'o yuún nocoo, ne que'ee chuman' me se

cachén ndo'o chilij cachén ndo'o x'naa cachén ndo'o a. Ne quene'en ndo'o yuvij rasuun nocoo nij ndo'o rej xta', ne cuchu'vi' nij yuvij, qui'yaj rasuun yo' a.

<sup>12</sup> “Tzaj ne asa' ataa guun nu' sayuun yo', ne quitaj ri'yunj nii man soj, ne quita'aa nii man soj, ne canoco' nii man soj qui'yaj nii sayuun man soj, ne tacuachén nii man soj rihaan nij sí man rá ve' nuu chre' ní tucu'yón ní se-tucuanj Moisés, ne caxrij nii taga' man soj, ne tacuachén nii man soj rihaan nij sí nicaj suun, che'é se sij noco' manj me soj a. <sup>13</sup> Síj, gaa ne quirí' soj cataj xna'anj soj rihaan nij so' che'é 'unj a. <sup>14</sup> Ne asa' nicun' soj rihaan nij so', ne yo'o ca'nej nimán soj se nanó rá soj che'é nana ca'mij ma'an soj rihaan nij so' ma'. <sup>15</sup> 'O se ma'anj me sí rque nana cuu cavij tu'va soj nanj á. Ne taj sí guun nucuaj qui'yaj canaan rihaan se-nana soj ma'. <sup>16</sup> Dan me se ndaa ma'an rej soj do', ndaa ma'an tuvi' soj do', ndaa ma'an tinúu soj do', ndaa ma'an nij sí man chiháan soj do', me nij sí tacuachén man soj rihaan nij sí qui'yaj sayuun man soj, gaa ne ticavi' nii man ta'aj soj, <sup>17</sup> ne nachri' cunudanj nij yuvij man rihaan chumij ni'yaj nij so' man soj, che'é se me soj sí noco' manj adonj. <sup>18</sup> Tzaj ne daj chihaa míj se ca'anj ni'ya a doj yuvé raa soj ma'. <sup>19</sup> 'O se che'é se noco' raan soj manj ro', che'é dan yo'o gaa i'na' soj nu' cavij nu' ca'anj adonj.

<sup>20</sup> “Dan me se asa' quene'en soj se vaa tucuachriin tanuu nu' chuman' Jerusalén, ne xcaj soj cuentá se vaa daj doj quirí' nu' chuman' yo', ne quinavij nu' chuman' yo' nanj adonj. <sup>21</sup> Ne güii dan me se yo'o cunanj nij sí man estadó Judea ca'anj nij so' raa quij, ne nij sí vaj rque chuman' Jerusalén me se ra'yanj curihanj nij so', ne nij sí vaj rej tacaan me se se catúj nij so' chuman' yo' daj chihaa míj ma'. <sup>22</sup> 'O se yo' me güii naru'vee Diose sayuun rihaan nij sí ne estadó

Judea yo' che'é cacun' tumé nij so', ne ya danj guun, gaa ne quisij ya nu' nana no rihaan danj Diose che'é nij so' a. <sup>23</sup> Nique chana nuu rque do', chana vaa ta'nii ne'ej utzii do', güii ca'na' sayuun yo' a. 'O se se guun nucuaj chana yo' cunanj chana yo' ma'. 'O se guun ndo'o sayuun rej yo', ne caxrii yuvaa Diose man yuvii yo', <sup>24</sup> ne cavi' que'ee nij so' raa nee espadá, ne quita'aa nii man que'ee nij so' ca'anj nicaaj nii rej ne nij síi yanij a. Ne cachee nij síi yanij xraá nu' chuman' Jerusalén, ndaa se quisij güii ca'nee Diose suun ra'a nij so' a —taj Jesucristó a.

*Nana nihánj taj xna'anj daj gaa ca'na' uún Jesucristó rihaan chumii nihánj a*

<sup>25</sup> Ne cataj uún Jesucristó a:

—Gaa ne quene'en yuvii se vaa cunu ino güii do', yavii do', nij yati' do', ne rihaan ma'an chumii me se cuchu'vi' ndo'o cunudanj nij yuvii cunó nij so' daj gaa cariin ndo'o na ya'anj do', quene'en nij so' daj gaa quinaan rihaan na ya'anj do' a. <sup>26</sup> Ne cuchu'vi' ndo'o nij yuvii, che'é yan quinano rá nij so' daj gaa quiran' nu' chumii nihánj a. Ne quinaan taran' nij rasuun nucuaj man rej xta' a. <sup>27</sup> Gaa ne quene'en nij so' man 'unj sij ca'neé Diose nicaaj yu'unj man yuvii á. Dan me se xraá ngaa quitaj 'unj ca'na' 'unj, ne guun nucuaj ndo'oj quirii ta'ngaj, ne ve'é uxrá curuvij ca'naj ei. <sup>28</sup> Dan me se asa' guun che'e nu' rasuun nihánj guun yo' danj, ne canicun' soj, ne ni'yaj soj xta', ne daj doj nacaaj 'unj man soj rihaan chumii nihánj gaa nanj adonj —taj Jesucristó rihaan nij so' a.

*Nana nihánj taj xna'anj se vaa ya quene'en ní' se vaa daj doj ca'na' uún Jesucristó a*

<sup>29</sup> Gaa ne nanó Jesucristó cuentó nihánj a:

—Xcaj soj cuentá daj 'yaj chruun man chruj higó raa do', daj 'yaj me ma'an chruun do' á. <sup>30</sup> Gaa naca coj ya'lij ra'a nij chruun, ne ni'yaj soj

man nij chruun, ne ne'en soj se vaa daj doj 'na' tió naman maan a. <sup>31</sup> Dan me se xcaj uún soj cuentá se vaa asa' quene'en soj nu' se vaa cataj xna'anj 'unj rihaan soj cuano, ne daj doj guun che'e Diose guun chij Diose rihaan chumii nihánj nanj adonj. <sup>32</sup> Ya ya cataj xna'anj 'unj rihaan soj cuano se vaa quene'en ta'aj soj sij vaa i'na' rihaan chumii nihánj cuano quisij nu' rasuun nihánj nu' se vaa cataj xna'anj 'unj rihaan soj cuano ei. Ne ya quene'en soj nu' nihánj gaa ataa cavi' soj ei. <sup>33</sup> Vaa güii ca'anj ni'ya yo'óo do', xta' do', tzaj ne se-nanaj me se daj chihaa mij se quinavij yo' ma' —taj Jesucristó rihaan nij so' a.

*Nana nihánj taj xna'anj se vaa tumé ní' man ní' daj qui'yaj ní', gaa ne ca'vee canicun' ní' rihaan Jesucristó a*

<sup>34</sup> Ne cataj uún Jesucristó a:

—Dan me se cutumé soj man soj se gaa nanj yo'o guun rá soj rasuun man rihaan chumii nihánj, ne guun rá soj guun xno soj do', guun rá soj ca'mii sca' soj do', guun rá soj guun si'yaj soj nu' rasuun man rihaan chumii nihánj do' a. Se qui'yaj soj danj, tóse taj ni'yón ca'naj, ne se quene'en soj ca'naj a. <sup>35</sup> 'O se ndaa rá se vaa 'o lazo ne' ta'aa man nii ro', danj gaa ca'na' xraá cunudanj chumii nihánj adonj. <sup>36</sup> Che'é dan yo'o ni'yaj soj, ne xcaj soj cuentá nu' güii, ne inanj cachinj ni'yaj soj rihaan Diose se vaa ca'vee quinanii soj rihaan nu' sayuun nihánj asa' guun danj rihaan chumii nihánj, gaa ne ca'vee canicun' soj rihaan 'unj sij ca'neé Diose nicaaj yu'unj man yuvii ei —taj Jesucristó a.

<sup>37</sup> Dan me se rej ranga' ro', ne Jesucristó rá nuvií nocoo, ne tucu'yón so' man nij yuvii, ne rej ti'nuu me se curihanj so', ne rej cu'naj Quij man Chruun Olivó aran' so' a. <sup>38</sup> Ne taxrej uchi' cunudanj nij yuvii cunó nij so' se-nana Jesucristó a.

## 22

*Nana nihánj taj xna'anj daj qui'yaj síi cu'naj Judas gaa cutu'vej yuve so'*

*man Jesucristó a*

<sup>1</sup> Dan me se daj doj canuû cha'anj pascuá cha'anj chá nij yuviî israelitá chraa yo'óó trigó a. <sup>2</sup> Ne nano' nij xrej atá suun nocoo doj do', nij sí naqui'yaj çu se-tucuanj Moisés rihaan yuviî do', daj qui'yaj nij so' ne cavi' Jesucristó, che'é se man ndo'o yuviî noco' man Jesucristó a.

<sup>3</sup> Ne catúj sí chree cu'naj Satanás nimán sí cu'naj Judas Iscariote, ne so' me se yo'o tuvi' ma'an chuvij nij sí tucu'yón se-nana Jesucristó me so' a. <sup>4</sup> Dan me se cavii so' ca'anj so', ne ca'mii so' ga nij xrej atá suun nocoo doj do', ga tanuu uun chij rihaan nij tanuu tumé nuvií do', gaa ne cataj so' daj qui'yaj so' ne tacuachén so' man Jesucristó rihaan nij so' a. <sup>5</sup> Gaa ne guun niha' rá nij so' gaa cuno nij so' se-nana Judas, ne guun ya ca'mii nij so' ga Judas se vaa rque nij so' sa'anj man Judas a. <sup>6</sup> Dan me se cata' tu'va sí cu'naj Judas se vaa tacuachén so' man Jesucristó rihaan nij so', gaa ne nuchruj raá Judas aman ca'vee tacuachén so' man Jesucristó rihaan nij so', gaa ne se gaa nanj quene'en nij yuviî a.

*Nana nihánj taj xna'anj che'é rachrúún rque Jesucristó rihaan nij sí tucu'yón se-nana so' cha nij so' do', che'é na vinó rque so' co'o nij so' do' a*

<sup>7</sup> Dan me se quisíj güii canuû cha'anj chá nii chraa yo'óó trigó, ne güii dan me güii ticavi' nij yuviî israelitá matzinj le'ej che'é Diose a. <sup>8</sup> Dan me se ca'née Jesucristó man Pedró do', man Juan do', ne cataj so' rihaan roj so':

—Ca'anj roj soj qui'yaj chuvii roj soj çá ní' ne navij rá ní' cha'anj pascuá ei —taj so' rihaan roj so' a.

<sup>9</sup> Gaa ne xna'anj roj so' man Jesucristó a:

—Me rej qui'yaj chuvii núj çá ní' ga —taj roj so' a.

<sup>10</sup> Gaa ne cataj Jesucristó rihaan roj so' a:

—Cuno roj soj nana nihánj, se vaa asa' catúj roj soj chuman' yo', ne nari'

tuvi' roj soj ga 'o sí táá chiha 'o cacuañ na, ne canoco' roj soj man so', catuú roj soj rá ve' catuú so', <sup>11</sup> ne cataj roj soj rihaan sí tucua ve' yo': “Xna'anj maestró mán so' se vaa me rej ne ve' çá xti'no maestró chraa ga nij sí tucu'yón se-nana so' che'é cha'anj pascuá, taj so' a”, cataj roj soj rihaan sí tucua ve' yo' a. <sup>12</sup> Gaa ne tihaan so' 'o ve' nata' xij rihaan roj soj, ne aj vaa chuvii rá ve' yo', ne man chruun mesá man chruun xlá man rá ve' yo' a. Yo' me rej qui'yaj chuvii roj soj á —taj Jesucristó rihaan roj so' a.

<sup>13</sup> Dan me se cavii roj so' ca'anj roj so', ne nari' roj so' nu' ndaa vaa cataj xna'anj Jesucristó rihaan roj so', gaa ne qui'yaj chuvii roj so' çá xti'no nij so' chraa che'é cha'anj pascuá a. <sup>14</sup> Ne quisíj orá çá xti'no nij so', ne ca'na' Jesucristó ga yo'óo nij apóstol cune' so' man nata' rihaan yuviî che'é so', gaa ne ca'anj çayáán taran' nij so' rihaan mesá a. <sup>15</sup> Gaa ne cataj Jesucristó rihaan nij so' a:

—Guun ndo'o raj çá xti'no 'unj che'é cha'anj pascuá nihánj ga nij soj cuano nihánj gaa ataa quirán' 'unj sayuun a. <sup>16</sup> 'O se cataj xna'anj 'unj rihaan soj cuano se vaa se çá xti'no uún 'unj ga soj a 'o cha'anj nihánj ndaa se quisij güii canuû cha'anj pascuá naca asa' guun chij Diose rihaan chumiî nihánj a man adonj —taj Jesucristó rihaan nij so' a.

<sup>17</sup> Gaa ne nicaj so' 'o aga' tazá na vinó, ne nago' so' graciá rihaan Diose, gaa ne cataj so':

—Quita'aa soj na nihánj, cuxra' ta'aj soj, ne co'o cunudanj soj á. <sup>18</sup> 'O se cataj xna'anj 'unj rihaan soj cuano se vaa veé doj nihánj me co'oj, ne se co'oj yaj a ma'. Tzaj ne asa' quisíj güii guun chij Diose rihaan chumiî nihánj, ne co'oj adonj —taj Jesucristó rihaan nij so' a.

<sup>19</sup> Gaa ne nicaj so' rachrúún, ne nago' so' graciá rihaan Diose, gaa ne cuxra' so' rachrúún, ne rque so' man nij so', ne cataj so':



—Nee manj me rachrúun nihánj nanj á. Ca'vej rá 'unj caví' nee manj che'é soj, ne chá soj man nihánj, gaa ne yo'o cunuû rá soj manj ei —taj so' rihaan nij apóstol a.

<sup>20</sup> Gaa ne ase vaa qui'yaj so' ga rachrúun ro', danj qui'yaj uún so' ga aga' nuu na vinó gaa quisíj chá xti'no nij so', ne cataj so':

—Na vinó nihánj ro', me ton manj a. Che'é ton manj ro', rqué Diose 'o nana rihaan soj daj qui'yaj Diose ga soj a. Dan me se che'é se cayanj ton manj ro', che'é dan me caraa x'naa Diose ni'yaj Diose cacun' tumé yuviij nanj adonj —taj Jesucristó rihaan nij so' a.

*Nana nihánj taj xna'anj se vaa ma'an Jesucristó cataj xna'anj se vaa tacuachén yo'o sí tucu'yón se-nana so' man so' rihaan nij sí taj ri'yunj man so' a*

<sup>21</sup> Ne cataj uún Jesucristó a:

—Tzaj ne xcaj soj cuentá se vaa vaa 'o sí tacuachén manj rihaan nij sí taj ri'yunj manj, ne táa ra'a so' rihaan chruun mesá taj ra'aj nihánj cuano ei. <sup>22</sup> 'O se xa' 'unj sij ca'neé Diose nicaj yu'unj man yuviij, tzaj ne ca'anj 'unj caví' 'unj ndaa vaa cataj xna'anj ma'an Diose a. Tzaj ne nique ndo'o sí tacuachén manj rihaan nij sí taj ri'yunj manj nanj á. Quiran' uxrá so' sayuun adonj —taj Jesucristó rihaan nij so' a.

<sup>23</sup> Gaa ne guun che'e nij sí tucu'yón se-nana Jesucristó nuchruj raa nij so' ga tuvi' nij so' me tuvi' nij so' me sí qui'yaj danj man Jesucristó, rá nij so' a.

*Nana nihánj taj xna'anj daj qui'yaj ní' sese me rá ní' guun ní' sí guun chij doj rihaan tuvi' ní' a*

<sup>24</sup> Gaa ne ca'mii cunu' cunudanj nij sí tucu'yón se-nana Jesucristó me tuvi' nij so' me sí guun chij doj a. <sup>25</sup> Gaa ne cataj Jesucristó rihaan nij so' a:

—Nij sí nicaj suun rey uun chij rihaan nij yuviij yaníj ro', rii ta'nga' uxrá nij so' rihaan tuvi' nij so', ne tucu'náj nii “sí 'nij ra'a man ní'” man

nij so' nanj á. <sup>26</sup> Tzaj ne se guun soj sí vaa danj ma'. Maan se tuvi' soj sí guun rá se vaa guun chij so' doj rihaan soj ro', vaa che'é guun so' sí nocó' doj rihaan soj, ne guun so' ase vaa 'o se-mozó soj a. <sup>27</sup> Dan me se me sí me sí uun chij doj, rá soj ga: sí anicaj co'oo rihaan mesá na', ase sí yanj rihaan mesá xa'. Veé sí yanj rihaan mesá me sí uun chij doj, rá soj a. Tzaj ne nihánj me se vaj ma'an 'unj sca'núj nij soj, ne aj guún 'unj mozó rihaan soj vaa nanj adonj.

<sup>28</sup> "Ne xa' soj, tzaj ne nij soj me nij sí cachéé ga 'unj gaa quirán' 'unj sayuun, <sup>29</sup> ne ase vaa cune' Réj Diose manj se vaa guun chij 'unj ro', danj gaa cune' 'unj man soj cuano <sup>30</sup> se vaa cayáan soj rihaan xrúun 'unj chruun mesá asa' guun chij ma'anj, ne chá soj chraa ne co'o soj na ga 'unj adonj. Ne quitaj soj chruun xlá sa' ndo'o, ne ca'ne' soj cacun' che'é chuvij nij x'ne' yuviij israelitá adonj —taj Jesucristó rihaan nij sí tucu'yón se-nana so' a.

*Nana nihánj taj xna'anj daj ca'mii Jesucristó ga sí cu'naj Simón Pedró a*

<sup>31</sup> Gaa ne cataj Jesucristó rihaan sí cu'naj Simón Pedró a:

—Cunó so' nana nihánj ca'mij rihaan so', Simón. 'O se aj cachíin ni'yaj sí cu'naj Satanás rihaan Diose se vaa ca'vej rá Diose qui'yaj so' sayuun man nij soj a. Dan me se ase vaa 'yaj nii man 'núú trigó gaa tixrin' nii 'núú trigó rihaan rcuaa ro', danj qui'yaj sí chree man soj, che'é se guun rá so' quirí' soj adonj. <sup>32</sup> Tzaj ne aj cachíin ni'yáa 'unj rihaan Diose che'é so', se vaa se ca'ne' rá so' ga suun amán rá ni'yaj manj a ma'. Gaa ne asa' nanicaj nimán so' canoco' uún so' manj ro', ne racuíj so' man nij tinúú so' se vaa cunu sca' doj nimán nij so' uún á —taj Jesucristó rihaan sí cu'naj Simón Pedró yo' a.

<sup>33</sup> Gaa ne cataj so' rihaan Jesucristó a:

—Tzaj ne aj ca'neé nimanj yo'o cachee 'unj ga so', Señor. Ca'vee se caxrii nii taga' mán so' ca'vee se

ticavi' nii mán so' ca'vee se, tzaj ne se tanáj xco 'unj mán so' ma' —taj so' rihaan Jesucristó a.

<sup>34</sup> Tzaj ne cataj Jesucristó rihaan Pedró a:

—Nihánj me cataj 'unj rihaan so' daj qui'yáa so', Pedró. Ne'én 'unj se vaa asa' ataa caguaj to'loo nij corá, ne va'nuj cataj so' se vaa ne ne'én so' manj ma' —taj Jesucristó rihaan Pedró a.

*Nana nihánj taj xna'anj se vaa quirán' nij sí tucu'yón se-nana Jesucristó sayuun a*

<sup>35</sup> Gaa ne cataj Jesucristó rihaan nij sí tucu'yón se-nana so' a:

—Gaa ca'née 'unj man soj ca'mii natáj soj se-nanaj rihaan nij yuvii israelitá ne taj nanj taj vitó taj canj taj ca'anj nicaj soj gaa ca'anj soj, tzaj ne taj vaj rasuun cachiin man soj gaa ca'anj soj, rá 'unj a —taj Jesucristó rihaan nij so' a.

—Taj vaj a doj rasuun ne cachiin man núj ma' —taj nij so' rihaan Jesucristó a.

<sup>36</sup> Gaa ne cataj Jesucristó rihaan nij so' a:

—Yaj me se sese vaa xnánj soj do', se-vitó soj do', ne nicaj soj ca'anj soj á. Ne sese taj yan vaj neê espadá rihaan soj, ne quiráan soj 'o taneê soj neê espadá á. Ne sese nuvi' sa'anj rihaan yo'o tuvi' soj, ne vaa che'é cutu'vee so' se-roto so', ne quiráan so' neê espadá ei. <sup>37</sup> 'O se vaa nana no rihaan danj Diose taj: “Cataj nii se vaa sij 'yaj cacun' me so'”, taj danj Diose che'é 'unj, ne vaa che'é quisij ya nu' nana yo' che'ej a. 'O se daj doj quinavij se vaa 'yáa 'unj rihaan chumi' nihánj nanj adonj —taj Jesucristó rihaan nij so' a.

<sup>38</sup> Gaa ne cataj nij so' rihaan Jesucristó a:

—Ni'yaj so' ei. Vaa vij neê espadá rihaan ní' nihánj, Señor —taj nij so' a.

—Veé danj me se danj nanj á —taj Jesucristó rihaan nij so' a.

*Nana nihánj taj xna'anj daj qui'yaj Jesucristó gaa cachín ni'yaj Jesucristó rihaan Diose a*

<sup>39</sup> Gaa ne cavii so' ca'anj so' qui' cu'naj Quij man Chruun Olivó, ndaa vaa cu'yón inanj so' qui'yaj so' a. Ne canoco' nij sí tucu'yón se-nana so' rej xco so' a. <sup>40</sup> Ne gaa cuchí' nij so' rej yo', ne cataj Jesucristó rihaan nij so' a:

—Cachinj ni'yaj soj rihaan Diose se vaa caráan Diose chrej rihaan sí chree se gaa nanj guun rá soj qui'yaj soj cacun' qui'yaj sí chree á —taj Jesucristó rihaan nij sí tucu'yón se-nana so' a.

<sup>41</sup> Gaa ne naxuun so' man so' rihaan nij sí tucu'yón se-nana so', ne ca'anj so' rej yaníj doj, ne canicun' ruj so', ne cachín ni'yaj so' rihaan Diose, <sup>42</sup> ne cataj so' rihaan Diose a:

—Sese ca'vee, ne caráan ra'á so' xráj, se gaa nanj quirán' uxrá 'unj sayuun, tzaj ne sese ma'án so' me rá quirán' 'unj sayuun, ne qui'yáa so' ndaa vaa me rá ma'án so', ne se qui'yáa so' ndaa vaa me rá ma'anj ma' —taj Jesucristó, cachín ni'yaj so' rihaan Diose a.

<sup>43</sup> Gaa ne curuvi' yo'o se-mozó Diose cavii rej xta' rihaan so', ne nari' nucuaj nimán so', qui'yaj se-mozó Diose yo' a. <sup>44</sup> Ne nanó ndo'o rá so', ne nucuaj ndo'o cachín ni'yaj so' rihaan Diose, ne cavii ndo'o nihaa rihaan so', ne ase vaa ton vaa nihaa cavii rihaan so' cayanj rihaan yo'óo a. <sup>45</sup> Ne canicun' caya so', ne ca'anj so' rej ne nij sí tucu'yón se-nana so', tzaj ne quene'en so' se vaa cotoj nu' nij so', che'é se nanó ndo'o rá nij so' a. <sup>46</sup> Gaa ne cataj Jesucristó rihaan nij so' a:

—Me che'é otoj soj ga. Naxumaan soj cachinj ni'yaj soj rihaan Diose se gaa nanj guun rá soj qui'yaj soj cacun' qui'yaj sí chree á —taj so' rihaan nij sí tucu'yón se-nana so' a.

*Nana nihánj taj xna'anj daj qui'yaj nii gaa quita'aa nii man Jesucristó a*

<sup>47</sup> Dan me se nicun' Jesucristó ca'mii so', ne nu' ca'na' que'ee yuvij, ne sí cu'naj Judas yo'o tuvi' chuvij nij sí tucu'yón se-nana Jesucristó me sí táa yaan rihaan nij yuvij, ne quinichrun' sí cu'naj Judas rihaan

Jesucristó, che'é rej guun rá so' cachron tu'va so' xruu Jesucristó a. <sup>48</sup> Gaa ne cataj Jesucristó rihaan Judas a:

—Ne chihan' uxrá 'yáá so', se vaa tacuachén so' manj sij ca'née Diöse nicaj yu'unj man yuviij gaa cachron tu'vá so' xruj, man Judas —taj so' rihaan Judas yo' a.

<sup>49</sup> Dan me se quene'en nij síí nicun' ga Jesucristó daj qui'yaj nij yuviij man Jesucristó, ne che'é dan xná'anj nij so' man Jesucristó a:

—Go' núj neê espadá raá nij so', rá so' na' —taj nij so' rihaan Jesucristó a.

<sup>50</sup> Ne yo'ó tuvi' nij so' ro', go' taneê so' neê espadá raá se-mozó xrej ata suun nocoo doj, ne güéj nu' xrée yo' rej nuva' yo', qui'yaj so' a. <sup>51</sup> Gaa ne cataj Jesucristó rihaan so' a:

—Ca'ne' rá soj ga suun 'yaj danj á —taj Jesucristó rihaan nij so' a.

Gaa ne cuta' Jesucristó ra'a Jesucristó rej quiran' chi'ij xrée mozó yo', ne nu' orá nahuun sa' xrée mozó yo', qui'yaj Jesucristó a. <sup>52</sup> Gaa ne cataj Jesucristó rihaan nij xrej ata suun nocoo doj do', rihaan tanuu uun chij rihaan nij tanuu tumé nuvií do', rihaan nij síí uun chij rihaan nij yuviij israelitá do' a:

—Me che'é 'na' neê espadá 'na' chruun 'na' ga soj ga. Síí ituu mé 'unj, rá soj na'. <sup>53</sup> 'O se daj a güii yáán 'unj ga nij soj rá nuvií nocoo, tzaj ne ne guun rá soj quita'aa soj mán 'unj ma'. Tzaj ne cuano nihánj me se aj quisij orá ca'vee qui'yaj soj ndaa vaa me rá soj qui'yaj soj, ne nihánj me se ca'vee guun nucuaj soj sij vaj rej rmi' a —taj Jesucristó rihaan nij so' a.

*Nana nihánj taj xna'anj daj qui'yaj síí cu'naj Pedró gaa cataj so' se vaa nuveé sij noco' man Jesucristó me so' a*

<sup>54</sup> Dan me se quita'aa nij so' man Jesucristó, ne ca'anj nicaj nij so' man Jesucristó rá ve' tucua' xrej ata suun nocoo doj, ne gan' gan' canoco' síí cu'naj Pedró rej xco Jesucristó, 'na' so' a. <sup>55</sup> Dan me se naran' nii ya'an rá ve', ne yáán tacuachriin taran' nii

rihaan ya'an, ne yáán síí cu'naj Pedró sca'núj nij so' a. <sup>56</sup> Dan me se yáán so' rej chuguun ya'an rihaan nij tuvi' xrej, ne quene'en yo'ó mozó chana man so', ne ni'yaj uxrá chana yo' man so' a. Gaa ne cataj mozó chana yo' rihaan tuvi' no' síí man ga no' a:

<sup>57</sup> —Síí nihánj ro', me yo'ó síí cachéé ga Jesucristó a —taj chana yo', ni'yaj yo' man Pedró a.

Gaa ne cataj Pedró rihaan chana yo' a:

—Ne ne'én 'unj man so', man nocoj —taj so' a.

<sup>58</sup> Ne yo'ó orá nii me se quene'en yo'ó so' man Pedró uún a:

—Yo'ó tuvi' nij síí chéé ga so' mé so' ei —taj so' rihaan Pedró a.

—Taj ma'. Nuveé sij chéé ga so' mé 'unj, man tinuj —taj Pedró yo' a.

<sup>59</sup> Dan me se cachén yo'ó orá uún, gaa ne nucuaj ca'mii yo'ó so' a:

—Ya uxrá sij cachéé ga Jesucristó me síí nihánj nanj ei. 'O se sij cavii estadó Galilea me roj so' ga Jesucristó chuguanj —taj yo'ó so' a.

<sup>60</sup> Gaa ne cataj Pedró rihaan síí tu'va danj a:

—Ne uno uxraj me taj so', man tinuj —taj so' rihaan nij so' a.

Ne dan me se nu' ca'mii so' danj, ne nu' caguáj to'loo a. <sup>61</sup> Gaa ne canicaj síí 'nij ra'a man ní', ne ni'yaj so' man Pedró, gaa ne nanuj rá Pedró se-nana síí 'nij ra'a man ní' gaa cataj síí 'nij ra'a man ní' rihaan so': “Ne'én 'unj se vaa asa' ataa caguaj to'loo nij corá, ne va'nuj cataj so' se vaa ne ne'én so' manj ma'”, cataj síí 'nij ra'a man ní' rihaan so' quii a. <sup>62</sup> Dan me se gaa ni'yaj síí 'nij ra'a man ní' man Pedró, gaa ne curihanj Pedró xe', ne ta'vee ndo'o so' a.

*Nana nihánj taj xna'anj daj qui'yaj nii gaa cuta' nii cacun' xráá Jesucristó a*

<sup>63</sup> Gaa ne nij síí quita'aa man Jesucristó ro', tiha' ndo'o nij so' man so', ne go' nij so' xráá so' a. <sup>64</sup> Ne gaa go' nij so' xráá so' me se caráán nij

so' rihaan Jesucristó, ne cataj nij so' rihaan so' a:

—Cataj so' rihaan núj me sí go' mán so' á —taj nij so', <sup>65</sup> ne que'ee doj nana nij a'mii uún nij so' rihaan Jesucristó a.

<sup>66</sup> Ne gaa quisíj güii, ne cunuu chre' nij sí uun chij rihaan nij yuvií israelitá, ne dan me se nij xrej atá suun nocoo doj do', nij sí naqui'yaj cuu se-tucuanj Moisés do', cunuu chre', ne ca'anj nicaj nij so' man Jesucristó rá ve' a'ne' nij so' cacun' che'é yuvií a. Gaa ne xná'anj nij so' man Jesucristó, ne cataj nij so':

<sup>67</sup> —Sese ya sij ca'née Diose tinanii man yuvií rihaan sayuun mé so', rá so', ne cataj xna'anj so' rihaan núj á —taj nij so' a.

Gaa ne cataj Jesucristó rihaan nij so' a:

—Ca'vee se cataj xna'anj 'unj rihaan soj, tzaj ne se cuchumán rá soj se-nanaj ma'. <sup>68</sup> Ne sese xná'anj 'unj 'o nana man soj, tzaj ne se cataj xna'anj soj rihanj ma'. <sup>69</sup> Tzaj ne rej rihaan ní' me se xa' 'unj sij ca'née Diose nicaj yu'unj man yuvií, tzaj ne cayáán 'unj rej nuva' Diose sí nucuj ndo'o a —taj Jesucristó rihaan nij so' a.

<sup>70</sup> Gaa ne xná'anj cunudanj nij so' man Jesucristó, cataj nij so':

—Che'é dan me ta'nij Diose mé so', rá so' na' —taj nij so' rihaan so' a.

Gaa ne cataj Jesucristó rihaan nij so' a:

—Veé ya ndaa vaa cataj soj ro', veé danj vaa nanj á —taj so' a.

<sup>71</sup> Gaa ne cataj nij so' rihaan tuvi' nij so' a:

—Se cachiin doj sí ca'na' cataj xna'anj rihaan ní' che'é cacun' tumé sí nihánj a ma'. 'O se ma'an ní' me sí cuno daj tu'va so' nihánj nanj adonj —taj nij so' rihaan tuvi' nij so' a.

## 23

*Nana nihánj taj xna'anj daj ca'mii sí cu'naj Pilato ga Jesucristó a*

<sup>1</sup> Dan me se que'ee nij so', ne naxumaan taran' nij so', ne ca'anj

nicaj nij so' man Jesucristó rihaan sí cu'naj Pilato a. <sup>2</sup> Gaa ne cuta' nij so' cacun' xráá so' rihaan sí cu'naj Pilato, ne cataj nij so' rihaan sí cu'naj Pilato a:

—Sí nihánj ro', me sí tucu'yón tucuaán ne rihaan tuvi' núj sij israelitá, ne cataj so' se vaa se go' yuvií puextó rihaan sí nicaj suun cu'naj César, ne taj so' se vaa sij ca'née Diose guun sí nicaj suun rey me ma'an so', taj so' adonj —taj nij so' rihaan sí cu'naj Pilato, ni'yaj nij so' man Jesucristó a.

<sup>3</sup> Gaa ne xná'anj sí cu'naj Pilato man Jesucristó a:

—So' me sí nicaj suun rey uun chij rihaan nij yuvií israelitá na' —taj so', xná'anj so' man Jesucristó a.

—Vej á —taj Jesucristó rihaan so' a.

<sup>4</sup> Gaa ne cataj sí cu'naj Pilato rihaan nij xrej atá suun nocoo doj do', rihaan nij yuvií do' a:

—Nuvi' cacun' tumé sí nihánj narij ma' —taj so' a:

<sup>5</sup> Tzaj ne nucuj doj ca'mii nij so', cataj nij so':

—Tzaj ne que'ee yuvií uno se-nana so', ne vaa güii qui'yaj nij so' sayuun nanj á. Ne vaj so' tucu'yón so' se-nana so' nu' estadó Judea nihánj, ne guun che'e so' tucu'yón so' se-nana so' estadó Galilea, ne 'na' so' ndaa nihánj tucu'yón so' nanj adonj —taj nij so' rihaan Pilato a.

<sup>6</sup> Dan me se cuno Pilato se-nana nij so', gaa ne xná'anj Pilato man nij so' sese sij cavii estadó Galilea me Jesucristó a. <sup>7</sup> Gaa ne quene'en so' se vaa ya cavii Jesucristó estadó Galilea rej uun chij sí cu'naj Herodes a. Che'é dan cataj so' se vaa ca'anj nicaj nij so' man Jesucristó rihaan sí cu'naj Herodes yo' a. 'O se güii dan me se nuú ma'an sí cu'naj Herodes chuman' Jerusalén a.

*Nana nihánj taj xna'anj daj ca'mii sí cu'naj Herodes ga Jesucristó a*

<sup>8</sup> Gaa quene'en sí cu'naj Herodes man Jesucristó, gaa ne guun niha' uxrá rá so' a. 'O se asij rque ndo'o me se guun rá so' quene'en so' man



Jesucristó, che'é se aj cuchi' nana rihaan so' daj 'yaj Jesucristó a. Ne guun rá so' se vaa qui'yaj Jesucristó 'o suun sa' nocoo ni'yaj so' a. <sup>9</sup> Dan me se xná'anj ndo'o so' nana man Jesucristó, tzaj ne a 'ó nana ne ca'mii Jesucristó rihaan so' a ma'. <sup>10</sup> Tzaj ne nicun' nij xrej atā suun nocoo doj nicun' nij sí naqui'yaj cuu se-tucuanj Moisés rihaan nij yuvii nicun', ne nucuaj ndo'o cuta' nij so' cacun' xráá Jesucristó a. <sup>11</sup> Gaa ne nachri' Herodes do', nij tanuu nuu rihaan so' do', ni'yaj nij so' man Jesucristó, ne ca'nga' nacoo nij so' ni'yaj nij so' man Jesucristó a. Gaa ne na'née nij so' yatzíj sedá man Jesucristó qui'yaj Herodes, ne veé dan na'née uún Herodes man so' rihaan Pilato a. <sup>12</sup> Ne güii dan me se guun che'e Herodes ga Pilato na'mii sa' roj so' ga tuvi' roj so' a. 'O se asij rque doj me se sij taj ri'yunj man tuvi' me roj so' a.

*Nana nihánj taj xna'anj se vaa cataj xna'anj sí cu'naj Pilato se vaa cavi' Jesucristó rihaan rcutze a*

<sup>13</sup> Dan me se canacúun sí cu'naj Pilato man nij xrej atā suun nocoo doj do', man nij sí uun chij rihaan nij yuvii israelitá do', man ma'an nij yuvii do', se vaa ca'na' nij so' cunu chre' nij so' rihaan so' a. <sup>14</sup> Gaa ne cataj Pilato rihaan nu' nij yuvii a:

—Dan me se nicaj soj man snó'o nihánj ca'na' soj rihanj, ne cataj soj se vaa so' me sí me rá qui'yaj nij yuvii sayuun a. Ne veé xná'anj 'unj man so' cuno taran' soj daj 'yaj so', ne xa' cacun' cuta' soj xráá so', tzaj ne taj vaj cacun' vaa danj tumé sí nihánj narij ma'. <sup>15</sup> Ne sí cu'naj Herodes ro', ne nari' so' cacun' tumé sí nihánj a ma'. Maan se na'née uun sí cu'naj Herodes man sí nihánj rihaan ní nanj á. Ne xcaj soj cuentá se vaa taj cacun' qui'yaj sí nihánj, ne ne nó xcúun so' cavi' so' ma'. <sup>16</sup> Che'é dan qui'yáj doj sayuun man so', ne ca'anj uun so', qui'yaj ní nanj á —taj Pilato rihaan taran' nij yuvii a.

<sup>17</sup> 'O se maan güii dan me se daj a cha'anj pascuá na'née nij so' man 'o yuvii 'nij taga' a.

<sup>18</sup> Gaa ne caguáj cunudanj nij so', cataj nij so' a:

—Ticavi' soj man sí nihánj ei. Ticavi' soj man sí nihánj ei. Ne quirii so' man sí cu'naj Barrabás taga' che'é núj á —taj nij so', caguáj nij so' rihaan Pilato a.

<sup>19</sup> Ne xa' sí cu'naj Barrabás, tzaj ne sij qui'yaj cunu' nij yuvii man chuman' Jerusalén me so', ne sij ticavi' man yuvii me so', ne che'é dan caxrj nii taga' man so' a.

<sup>20</sup> Gaa ne ca'mii uún Pilato rihaan nij yuvii a. 'O se guun rá so' quirii so' man Jesucristó ca'anj Jesucristó a.

<sup>21</sup> Gaa ne caguáj nu' nij yuvii, cataj nij so':

—Canō ya so' rihaan rcutze ei —taj nij yuvii, caguáj nij yuvii a.

<sup>22</sup> Gaa ne quisj va'núj cataj so' rihaan nij yuvii:

—Tzaj ne taj vaj se chi'ii qui'yaj so' ma'. Taj vaj cacun' tumé so', ne ne nó xcúun so' cavi' so' ma'. Dan me se qui'yáj doj sayuun man so', ne ca'anj uun so' qui'yáj nanj á —taj uún Pilato rihaan nij yuvii a.

<sup>23</sup> Tzaj ne caguáj ndo'o nij yuvii, ne uxrá ca'ne' nij yuvii suun rihaan Pilato se vaa ya cavi' Jesucristó rihaan rcutze qui'yaj so', ne guun nucuaj doj se-nana nij yuvii yo' a. <sup>24</sup> Gaa ne guun ya rá Pilato se vaa qui'yaj so' ndaa vaa cataj nij yuvii rihaan so' a. <sup>25</sup> Dan me se sí 'nij taga' tumé cacun' se vaa cunu' yuvii qui'yaj do', se vaa ticavi' yuvii do', quirii Pilato man so' ca'anj uun so', ndaa vaa cataj nij yuvii a. Ne Jesucristó ro', ca'vej rá Pilato quiran' so' ndaa vaa guun rá nij yuvii quiran' so' nanj adonj.

*Nana nihánj taj xna'anj daj qui'yaj nij yuvii gaa cachrón nij yuvii man Jesucristó rihaan rcutze a*

<sup>26</sup> Dan me se nicaj nii man Jesucristó ca'anj nii, gaa ne quita'aa nii man yo'o sí cu'naj Simón sí cavii chuman' Cirene gaa 'na' nique so' rej

tacaan, ne cuta' nii rcutze xraá so' ata so' rcutze 'na' so' rej xco Jesucristó a. <sup>27</sup> Ne noco' que'ee yuvii man Jesucristó, ne ta'aj nij yuvii me chana, ne dan me se go' nij chana se-cuxru' nij no' rucuaa nij no', ne ta'ee ndo'o nij chana ni'yaj nij chana man Jesucristó a. <sup>28</sup> Gaa ne canicaj Jesucristó, cataj Jesucristó rihaan nij chana yo':

—Cuno soj chana ta'nij chuman' Jerusalén ca'mij á. Se ta'ee nij soj ni'yaj soj man 'unj a ma'. Tzaj ne ta'ee soj ni'yaj soj man ma'an soj do', man ma'an ta'nií soj do' á. <sup>29</sup> 'O se vaa güii cataj nii se vaa aj cavii sa' doj nij chana ituun do', nij chana ne nari' ne'ej do', nij chana ne tucutzii ne'ej do' a. <sup>30</sup> 'O se güii dan me se guun che'e yuvii nacunj yuvii nij quij se vaa canee nij quij caráan nij quij xraá ma'an nij so' a. <sup>31</sup> 'O se ase vaa chruun maree vaa i'na' vaa 'unj nihánj, tzaj ne danj nanj ticavi' nii manj a. Táa a nij síi ne chuman' Jerusalén, ne ase vaa chruun nacoq cavi' vaa nij síi tumé cacun' ne chuman' Jerusalén, ne che'é dan chi'ii uxrá doj quiran' nij so' nanj adonj —taj Jesucristó rihaan nij chana a.

<sup>32</sup> Ne nicaj nii man yavíj roj síi tumé cacun', ca'anj nii rej cavi' roj so' ga Jesucristó a. <sup>33</sup> Ne gaa cuchi' taran' nij so' rej cu'naj Tacaan Cúu Yave Xnangá, ne cachrón nii man Jesucristó ga roj síi tumé cacun' rihaan va'núj rcutze, ne dan me se yo'ó so' ro', cachrón nii rej nuva' Jesucristó, ne yo'ó so' ro', cachrón nii rej nichruun Jesucristó a. <sup>34</sup> Gaa ne cachíin ni'yaj Jesucristó rihaan Diose, cataj so':

—Caraa x'naa so', ne se qui'yáa so' sayuun man nij so', man Ataj Chij. 'O se ne ne'en nij so' daj 'yaj nij so' ma' —taj so', cachíin ni'yaj so' rihaan Rej so' Diose a.

Gaa ne tico tixaj nij tanuu che'é sagan' Jesucristó a.

<sup>35</sup> Ne canicun' que'ee yuvii ni'yaj daj quiran' Jesucristó a. Dan me se ca'nga' nacoq nij síi uun chij, cataj nij so':

—Aj tinanii so' man yo'ó yuvii rihaan sayuun, rá so' á. Ca'vee tinanii so' man ma'an so' yaj ei. Sese sij narii Diose me so' do', sese sij ca'née Diose tinanii man yuvii rihaan sayuun me so' do', ne ca'vee tinanii ma'an so' man so' a —taj nij síi uun chij ni'yaj nij so' man Jesucristó a.

<sup>36</sup> Ne nij tanuu, tzaj ne ca'nga' nacoq uún nij tanuu ni'yaj nij tanuu man Jesucristó, ne ru'maan nij tanuu na vinó yuu tu'va Jesucristó, <sup>37</sup> ne cataj nij so':

—Sese so' me síi nicaj suun rey uun chij rihaan nij yuvii israelitá, ne tinanii so' man ma'an so' rihaan sayuun yaj vij —taj nij tanuu rihaan Jesucristó a.

<sup>38</sup> Ne vaa rcuchra' nó rihaan rcutze yo', ne nó nana rihaan rcuchra' yo' se vaa: “Sij nicaj suun rey uun chij rihaan nij yuvii israelitá me síi nihánj a”, taj nana yo' a.

<sup>39</sup> Ne yo'ó tuvi' roj síi tumé cacun' noco' rihaan rcutze rej x'nuj Jesucristó ro', nij ca'mii so' rihaan Jesucristó, cataj so':

—Sij ca'née Diose tinanii man yuvii rihaan sayuun mé so', rá so' na'. Me che'é ne tinanii so' man taran' ní' ga —taj so' rihaan Jesucristó a.

<sup>40</sup> Tzaj ne yo'ó síi tumé cacun' ro', cataj so' rihaan tuvi' so':

—Nihánj me se cuyaan vaa sayuun ran' ní' ga sayuun ran' síi nihánj nanj á. Ne me che'é ne chu'ví' so' a doj ni'yaj so' Diose ga. <sup>41</sup> Dan me se xa' ní', tzaj ne vaa che'é cavi' ní', ne ran' ní' sayuun che'é cacun' tumé ní', tzaj ne xa' síi nihánj, tzaj ne taj vaj a doj se chi'ii ne qui'yaj síi nihánj a ma' —taj yo'ó síi tumé cacun' yo' rihaan tuvi' so' a.

<sup>42</sup> Gaa ne cataj so' rihaan Jesucristó a:

—Se quini'yón so' racuíj so' manj, asa' guun che'e so' guun chij so' a ma' —taj so' rihaan Jesucristó a.

<sup>43</sup> Gaa ne cataj Jesucristó rihaan so' a:

—Ya ya cataj xna'anj 'unj rihaan so' cuano se vaa güii cuan' me se cayáan

so' ga 'unj rej sa' ndo'o rej ne nij síi sa' rihaan Diose ei —taj Jesucristó rihaan so' a.

<sup>44</sup>Veé dan, ne caxuj me yo', ne guun rmi' rihaan nu' chumii, ne yo'o guun rmi' rihaan chumii ndaa quisij aga' va'nuj rej anoco' güii a. <sup>45</sup>Ne guun rmi' rihaan güii, ne sin' nu' yatzij cortiná nocó' rá nuvíi nocoo a. <sup>46</sup>Gaa ne nucuaj ndo'o caguáj Jesucristó, cataj so':

—Nacaj so' nimanj, Ataj Chij —taj so', ne veé dan cavi' so' a.

<sup>47</sup>Dan me se quene'en tanuu capitán se vaa guun, gaa ne ve'é uxrá ca'mii so' che'é Diose, ne cataj so':

—Xa' síi nihánj, tzaj ne ya ya síi sa' me so' nanj á —taj tanuu yo' ni'yaj so' man Jesucristó a.

<sup>48</sup>Dan me se quene'en taran' nij yuvii cunuu chre' rej yo' se vaa guun, gaa ne go' nij so' se-cuxru' nij so' rucuaa nij so' che'é se nanó ndo'o rá nij so', gaa ne canicaj nij so' ca'anj nij so' chuman' a. <sup>49</sup>Ne canicun' cunudanj nij tuvi' Jesucristó rej gan' doj, ne ta'aj nij so' me chana cuno se-nana Jesucristó asij cavii Jesucristó estadó Galilea a. Ne ni'yaj taran' nij so' man Jesucristó a.

*Nana nihánj taj xna'anj se vaa cachin' nii man Jesucristó rque yu'uj yuvej a*

<sup>50</sup>Ne vaa 'o síi cu'naj José, ne yo'o tuvi' nij síi uun chij rihaan nij yuvii israelitá me so' a. Ne síi sa' me so', ne síi nica nimán me so', <sup>51</sup>ne ne vaa rá so' daj se vaa rá yo'ó nij síi uun chij rihaan nij yuvii israelitá ma'. Ne guun rá so' qui'yaj so' ndaa vaa qui'yaj yo'ó nij so' ma'. Ne síi cavii chuman' Arimatea yo'o chuman' naj estadó Judea me so' a. Ne so' me síi me ndo'o rá guun chij Diose rihaan chumii nihánj a.

<sup>52</sup>Dan me se ca'anj so' rihaan síi cu'naj Pilato, ne cachín ni'yaj so' rihaan síi cu'naj Pilato se vaa ca'vej rá síi cu'naj Pilato cachin' so' man Jesucristó a. Dan me se ca'vej síi cu'naj Pilato, <sup>53</sup>gaa ne ca'anj síi cu'naj José, tinanij so' man Jesucristó, ne nacutáj

so' yatzij mantá xráá Jesucristó, ne caxrij so' man Jesucristó rque yu'uj yuvej rej nuvi' a 'o xnganá naj a.

<sup>54</sup>Veé danj qui'yaj nij so' güii 'yaj chuvii nij yuvii israelitá che'é güii naraan rá nij so', ne veé danj quisij güii naránj rá nij so' a. <sup>55</sup>Ne canoco' nij chana cavii estadó Galilea ga Jesucristó rej xco síi cu'naj José, ne quene'en nij chana yu'uj rej caxrij síi cu'naj José man Jesucristó, <sup>56</sup>gaa ne canicaj nij chana chuman' Jerusalén, ne qui'yaj chuvii nij chana yo'óó gun' daj do', squíi xlá mirra do', caxrii nij chana man Jesucristó rá nij chana a.

*Nana nihánj taj xna'anj se vaa cunuu i'na' uún Jesucristó a*

Dan me se ma'an güii naránj rá nij yuvii israelitá me se naránj rá nij chana a.

## 24

<sup>1</sup>Ne taxrej güii cotungó, gaa ataa doj quisij güii, me se ca'anj nij chana rej taj yu'uj, ne nicaj nij chana nij rasuun gun' daj se vaa aj qui'yaj chuvii nij no' a. <sup>2</sup>Gaa ne quene'en nij chana se vaa naj yanij yuvej aráan tu'va yu'uj naj Jesucristó a. <sup>3</sup>Ne gaa catúj nij chana rá yu'uj, ne ne nari' nij chana man Jesucristó sij 'nij ra'a man ní a ma'. <sup>4</sup>Dan me se caráya'anj ndo'o nij chana, ne nicun' vij snó'o rihaan nij chana, ne roj snó'o yo' me se yatzij chuguun uxrá nuú roj so' a. <sup>5</sup>Dan me se kuchu'vi' uxrá nij chana, ne ca'anj cayáan ruj nij chana, ne cuchruj nij chana rihaan nij chana rihaan yo'óó a. Gaa ne cataj roj snó'o rihaan nij no':

—Taj che'é nana' soj man síi vaa i'na' rej naj nij síi cavi' ma'. <sup>6</sup>'O se nuvi' so' naj nihánj a ma'. 'O se cunuu i'na' uún so' nanj á. Dan me se nanuj rá soj se vaa cataj so' gaa vaj nij soj estadó Galilea, ne cataj xna'anj so' rihaan soj se vaa <sup>7</sup>xa' so' sij ca'née Diose nicaj yu'unj man yuvii, tzaj ne vaa che'é tacuachén nii man so' rihaan síi tumé cacun', ne cachron nij so' man so' rihaan rcutze, ne cachén va'nuj güii, gaa ne cunuu i'na' uún so',

taj so' a —taj roj snó'o yo' rihaan nij chana a.

<sup>8</sup> Dan me se nanuj rá nij chana nana ca'mii Jesucristó a. <sup>9</sup> Gaa ne curihanj nij chana yu'uj yuvej, ne canicaj nij chana yo' chuman' Jerusalén, ne cataj xna'anj nij chana nu' se vaa quene'en nij no' rihaan xaan nij apóstol cune' Jesucristó man do', rihaan yo'ó nij sí tucu'yón se-nana Jesucristó uún do' a. <sup>10</sup> Dan me se va'nuj nij chana me ní cu'naj Mariá Magdalena do', ní cu'naj Juana do', ní cu'naj María nii Jacobo do', ne va'nuj nij no' ga yo'ó nij chana ro', cataj xna'anj rihaan nij apóstol che'é nu' se vaa quene'en nij no' a. <sup>11</sup> Ne gaa cuno nij apóstol cune' Jesucristó man se-nana nij chana, gaa ne nana snúú rma'an me nana yo', rá nij apóstol cune' Jesucristó man, ne ne cuchuman rá nij so' se-nana nij chana a. <sup>12</sup> Tzaj ne naxumaan sí cu'naj Pedró, ne cavii so' cunanj so' ca'anj so' ndaa yu'uj yo', ni'yaj so' a. Dan me se canicun' nituu so', ni'yaj so' rque yu'uj, tzaj ne nuvi' Jesucristó naj rque yu'uj quene'en so' a. Maan yatzíj mantá uun naj, ni'yaj so' a. Gaa ne cavii so' quinan' so', ne caráya'anj so' che'é nu' se vaa guun a.

*Nana nihánj taj xna'anj se vaa ca'mii Jesucristó ga vij tuvi' nij sí tucu'yón se-nana so' gaa vaj roj so' chrej ndaa chuman' cu'naj Emaús a*

<sup>13</sup> Dan me se vij tuvi' nij sí tucu'yón se-nana Jesucristó ro', vaj roj so' chrej veé maan güii cotungó yo', ca'anj roj so' ndaa 'o chuman' naj xaan kilómetro ga chuman' Jerusalén, ne Emaús cu'naj chuman' yo' a. <sup>14</sup> Ne nanó roj so' cuentó che'é nu' se vaa quiran' nij tuvi' Jesucristó a. <sup>15</sup> Dan me se nanó roj so' cuentó, ne nuchruj raaj roj so' daj quiran' Jesucristó, gaa ne ma'an Jesucristó quinichrun' rihaan roj so', ne chéé Jesucristó ga roj so' a. <sup>16</sup> Tzaj ne ne ca'vee cunuu yaan roj so' man Jesucristó ma'. <sup>17</sup> Gaa ne cataj Jesucristó rihaan roj so' a:

—Chéé roj soj nanó roj soj cuentó, ne me che'é nanó roj soj cuentó ga tuvi' roj soj, ne me che'é nanó ndo'o rá roj soj ga —taj so', xna'anj so' man roj so' a.

Ne dan me se canicun' roj so', ne nanó ndo'o rá roj so' a. <sup>18</sup> Dan me se yo'o so' me sí cu'naj Cleofas, ne cataj so' rihaan Jesucristó a:

—Cunudanj nij sí aran' chuman' Jerusalén ne'en daj vaa guun chuman' Jerusalén güii cachén nihánj ei. Ne me che'é daj 'o ruún so' me sí ne ne'en daj vaa guun güii cachén nihánj ga —taj so', xna'anj so' man Jesucristó a.

<sup>19</sup> Gaa ne:

—Daj guun chuman' Jerusalén ga —taj Jesucristó, xna'anj so' man roj so' a.

Gaa ne cataj roj so' rihaan Jesucristó a:

—Nu' se vaa quiran' Jesucristó sí cavii chuman' Nazaret a. Ne so' me sí guun sí nata' se-nana Diose rihaan nij yuvii, ne sí uun nucuaj ndo'o qui'yaj suun me so', ne sí cavii ndo'o nana sa' che'é Diose tu'va me so' rihaan cunudanj nij yuvii a. <sup>20</sup> Ne dan me se ca'ne' nij xrej ata suun nocoo doj ca'ne' nij sí nicaj suun ca'ne' suun se vaa cavi' so', gaa ne cachrón nii man so' rihaan rcutze, <sup>21</sup> ne dan me se guun rá núj se vaa so' me sí tinanii man ní' sij israelitá rihaan sayuun, tzaj ne quiran' so' cunudanj, ne nihánj me se sij va'nuj güii cavi' so' adonj. <sup>22</sup> Tzaj ne caráya'anj ndo'o núj, qui'yaj chana tuvi' núj a. 'O se taxrej cuan' me se ca'anj ni'yaj nij chana yu'uj cachin' nii man so', <sup>23</sup> tzaj ne dan me se ne nari' nij chana man so' a ma'. Che'é dan ca'na' uún nij chana rihaan núj, ne cataj nij chana se vaa ndaa vij se-mozó Diose naqui'yaa rihaan nij no', ne cataj roj se-mozó Diose se vaa vaa i'na' Jesucristó, taj nij chana rihaan núj nanj adonj. <sup>24</sup> Dan me se cavii 'o vij tuvi' núj ca'anj ni'yaj roj so' yu'uj yo', tzaj ne quene'en roj so' nu' ndaa vaa cataj xna'anj nij chana rihaan núj, tzaj ne



ne nari' roj so' man ma'an Jesucristó a ma' —taj roj so' rihaan Jesucristó a.

<sup>25</sup> Gaa ne ma'an Jesucristó cataj rihaan roj so' a:

—Dan me se síi ne acaj cuentá me soj, ne síi ne niha' rá cuchuman rá nu' se-nana nij síi nata' se-nana Diose gaa naá me soj nanj á. <sup>26</sup> 'O se ne ne'en soj se vaa xa' síi ca'neé Diose tinanii man yuvi rihaan sayuun, tzaj ne vaa che'é ndo'o quiran' so' sayuun ne catuu so' rej guun chij ndo'o so' a —taj Jesucristó rihaan roj so' a.

<sup>27</sup> Gaa ne dan me se guun che'e so' ca'mii so' che'é se-nana síi cu'naj Moisés do', che'é se-nana cunudanj nij síi nata' se-nana Diose do', gaa ne cataj xna'anj so' rihaan roj so' daj taj nu' danj Diose che'é ma'an so' a.

<sup>28</sup> Dan me se quinichrun' nij so' tu'va chuman' rej ca'anj roj so', gaa ne Jesucristó me se ndaa rá se 'yaj síi ca'anj chuman' naj gan' doj ro', qui'yaj so' a. <sup>29</sup> Gaa ne terquee roj so' man Jesucristó a:

—Quinaj cahríi so' ga rój, ne aj ca'anj güii, ne vaj so' chrej, ne guun rmi' nanj á —taj roj so' rihaan Jesucristó a.

Gaa ne quináj so' ga roj so', ne catúj so' chuman' caran' so' ga roj so' a.

<sup>30</sup> Dan me se yáan nij so' cha xti'no nij so', ne nicaj Jesucristó rachrúun, ne nago' so' graciá rihaan Diose che'é rachrúun, gaa ne cuxra' ta'aj so' rachrúun, rqué so' cha roj so' a.

<sup>31</sup> Dan me se caxrój rá roj so', ne cunuu yaan roj so' man Jesucristó, ne veé dan nu' ca'anj ni'ya Jesucristó rihaan roj so', ne ne ca'vee quene'en roj so' man so' a ma'. <sup>32</sup> Gaa ne cataj roj so' rihaan tuvi' roj so' a:

—Veé ya ma'an Jesucristó me yo' asan. 'O se gaa ca'mii so' ga ní' gaa vaj ní' chrej do', gaa cataj xna'anj so' che'é danj Diose do', gaa ne guun niha' uxrá nimán ní', ne ndaa tiquisii ma'an nimán ní', qui'yaj so' a —taj roj so' rihaan tuvi' roj so' a.

<sup>33</sup> Gaa ne maan orá dan naxumaan roj so', ne canicaj roj so' ca'anj uún roj so' chuman' Jerusalén, gaa ne cuchí'

roj so' yo', gaa ne aj cunuu chre' xaan nij síi tucu'yón se-nana Jesucristó ga yo'ó tuvi' nij so', <sup>34</sup> ne nij so' ro', cataj rihaan roj so' se vaa ya aj cunuu i'na' uún síi 'nij ra'a man ní', ne síi cu'naj Simón me síi quene'en man so', taj nij so' rihaan roj so' a. <sup>35</sup> Gaa ne roj so' ro', cataj xna'anj daj guun gaa quene'en roj so' man Jesucristó gaa vaj roj so' chrej, ne cataj xna'anj roj so' se vaa ndaa cuxra' ta'aj so' rachrúun gaa cunuu yaan roj so' man Jesucristó, taj roj so' a.

*Nana nihánj taj xna'anj se vaa curuvi' Jesucristó rihaan xaan nij síi tucu'yón se-nana so' ga tuvi' nij so' a*

<sup>36</sup> Dan me se gaa nanó nij so' cuentó che'é nu' rasuun dan, ne nu' curuvi' Jesucristó tanuu sca'núj nij so', ne:

—Dínj gaa nimán soj á —taj so' rihaan nij so' a.

<sup>37</sup> Gaa ne kuchu'vi' ndo'o nij so', ne ta'naj me síi nicun' rihaan nij so', rá nij so' a. <sup>38</sup> Gaa ne cataj Jesucristó rihaan nij so' a:

—Me che'é nanó ndo'o rá soj, ne me che'é uun vij rá soj ga. <sup>39</sup> Ni'yaj soj ra'aj ni'yaj soj tacój ni'yaj soj, ne xcaj soj cuentá se vaa ma'anj me á. Xa' ta'naj, tzaj ne taj nee man so' do', taj cúu man so' do' ma' —taj Jesucristó rihaan nij so', <sup>40</sup> ne tihaan so' ra'a so' do', tacóo so' do', rihaan nij so' a.

<sup>41</sup> Dan me se ne ca'vee cuchuman rá nij so' se vaa ma'an Jesucristó me a. 'O se guun niha' uxrá rá nij so', ne ca'anj uxrá rá nij so' a. Che'é dan cataj Jesucristó rihaan nij so' a:

—Vaa doj se chá rihaan soj na' —taj so', xna'anj so' man nij so' a.

<sup>42</sup> Gaa ne rqué nij so' 'o xco' nee xcuj ri'ya do', doj scuú xtaan do', man so', <sup>43</sup> gaa ne nicaj so', ne chá so' ni'yaj nij so' a. <sup>44</sup> Gaa ne cataj so' rihaan nij so' a:

—Nihánj me nana ca'mii 'unj rihaan nij soj gaa vaj 'unj ga soj, se vaa cataj 'unj vaa che'é quisij ya 'unj nu' nana a'mii che'é 'unj nana no rihaan yanj no se-tucuanj Moisés do', yanj no se-nana nij síi nata' se-nana Diose

gaa naá do', yanj no nij chra' salmo do' a —taj so' rihaan nij so' a.

<sup>45</sup> Gaa ne guun nucuaj nij so' xcaj nij so' cuentá che'é nu' danj Diose, qui'yaj so', <sup>46</sup> ne cataj so' rihaan nij so':

—Veé danj taj danj Diose se vaa xa' 'unj sij ca'née Diose tinanii man yuvii rihaan sayuun, tzaj ne quiran' ma'anj sayuun, ne cavi' 'unj, ne cachēn va'nuj güii, gaa ne cunu i'na' uún 'unj a. <sup>47</sup> Gaa ne ca'mii natáj nii rihaan cunudanj nij yuvii man rihaan chumii se vaa che'é se vaa ca'ná' 'unj ro', che'é dan sese canicaj nimán nij yuvii canoco' nij yuvii chrej sa', gaa ne tinavij Diose cacun' tumé nij so' a. Dan me se asino ca'mii natáj nii nana dan chuman' Jerusalén, gaa ne ca'mii natáj nii nu' rihaan chumii adonj. <sup>48</sup> Ne nij soj ro', me nij sí quene'en nu' rasuun qui'yáj ne testigó guun soj, <sup>49</sup> ne nihánj me se rque 'unj Nimán Diose rihaan soj ndaa vaa cata' tu'va ma'an Diose gaa naá a. Dan me se yo'o cayáan soj chuman' Jerusalén nihánj ndaa se nari' nucuaj nimán soj qui'yaj Diose á —taj Jesucristó rihaan nij so' a.

*Nana nihánj taj xna'anj se vaa cavii Jesucristó xta' a*

<sup>50</sup> Gaa ne nicaj Jesucristó man nij so', ca'anj so' ndaa tu'va chuman' Betania, gaa ne naxcaj so' ra'a so', ne cachín ni'yaj so' rihaan Diose se vaa ve'é raçuíj Diose man nij so', ne cavii sa' nij so' a. <sup>51</sup> Ne nu' ca'mii so' danj che'é nij so', ne nu' cavii so' xta' ca'anj so' a. <sup>52</sup> Dan me se na'víj nij so' rihaan so', gaa ne canicaj nij so' ca'anj uún nij so' ndaa chuman' Jerusalén, ne guun niha' uxrá rá nij so', <sup>53</sup> ne yo'o ca'anj nij so' nuví nocoo, ne nata' nij so' rihaan nij yuvii se vaa sa' uxrá qui'yaj Diose a. Veé danj gaa ya ei.

## Nihánj me se-nana Jesucristó nana sa' cachrón síí cu'naj Juan rihaan yanj a

*Nana nihánj taj xna'anj se vaa guun yuvij man se-nana Diose a*

<sup>1</sup> Asij ataa qui'yaj Diose chumij, ne aj vaa se-nana Diose, ne se-nana Diose ro', canicun' so' rihaan ma'an Diose, ne Diose me so' a. <sup>2</sup> Dan me se asij ataa qui'yaj Diose chumij, ne canicun' se-nana Diose rihaan Diose, <sup>3</sup> ne ca'ne' Diose suun rihaan so' qui'yaj so' nu' rasuun a. Ne sese taj se-nana Diose, ne taj vaj a doj rasuun man nihánj cuano ne guun ma'. <sup>4</sup> So' me síí qui'yaj cunuu i'na' rasuun, ne che'é se cunuu i'na' yuvij qui'yaj so', che'é dan guun nucuaj yuvij xcaj yuvij cuentá a. Dan me se ase vaa ya'an chuguun vaa so' rihaan yuvij, <sup>5</sup> ne qui'yaj so' chuguun rej rmi' rej man ní' sij man rihaan chumij nihánj sij ataa xcaj cuentá, ne ne qui'yaj canaán rej rmi' yo' rihaan so' a man adonj.

<sup>6</sup> Ne curihanj yo'o snó'o, ne dan me se síí ca'neé Diose me so', ne Juan cu'naj so', <sup>7</sup> ne ca'na' so' cataj xna'anj so' che'é ya'an chuguun yo', ne me rá so' cuchuman rá cunudanj yuvij ni'yaj nij yuvij man ya'an chuguun yo' a. <sup>8</sup> Nuveé ma'an so' me ya'an chuguun yo'; maan se ca'na' so' cataj xna'anj so' che'é ya'an chuguun yo' a.

<sup>9</sup> Ne ya'an chuguun ya yo' ro', yo' me síí 'yaj chuguun rihaan cunudanj yuvij, che'é rej guun nucuaj nij yuvij xcaj nij yuvij cuentá a. Ne ca'na' so' rihaan chumij nihánj, <sup>10</sup> ne cayáán so' rihaan chumij nihánj, ne ma'an so' me síí qui'yaj chumij nihánj, qui'yaj Diose, tzaj ne ne xcaj nij síí man rihaan chumij nihánj cuentá me síí me so' a ma'.

<sup>11</sup> Ndaa rihaan ma'an nij tuvi' so' cuchí' so', tzaj ne ne ca'mii sa' nij so' ga so' a ma'. <sup>12</sup> Tzaj ne xa' taran' nij

síí ca'mii sa' ga so', tzaj ne síí amán rá ni'yaj man so' me nij so', ne danj nanj rque so' guun nij so' ta'nii ma'an ya Diose a. <sup>13</sup> Ne nij síí guun ta'nij Diose man, tzaj ne nuveé che'e se nayón nij so' rque nii nij so' me guun ta'nij Diose man nij so' ma'. Ne nuveé che'e se guun rá ma'an rej nij so' nayón nij so' rque nii nij so' me guun ta'nij Diose man nij so' ma'. Nuveé che'e se guun rá rej nij so' ca'ngaa nij so' me guun ta'nij Diose man nij so' ma'. Maan se ma'an Diose me síí qui'yaj guun ta'nij Diose man nij so' adonj.

<sup>14</sup> Gaa ne guun se-nana Diose yo' yuvij, ne cayáán so' ga ní', ne quene'en núj se vaa ve'é inanj qui'yaj so', ne dan me se taj vaj yo'ó ta'nii Rej so' Diose ma'. Tananj orún' so' me síí qui'yaj ndaa vaa qui'yaj so', ne se luj ndo'o qui'yaj so' che'é ní', ne inanj nana ya ca'mii so' adonj.

<sup>15</sup> Ne síí cu'naj Juan me síí cataj xna'anj rihaan yuvij che'é Jesucristó, ne nucuaj ca'mii so', cataj so':

—Síí nihánj ro', aj cataj xna'anj 'unj rihaan soj che'é so' gaa rque á. Dan me se cataj xna'anj 'unj rihaan soj se vaa nda' se síí ca'na' rej rihanj me so', tzaj ne 'o se sij uun chij ndo'o doj me so' rihanj nanj á. 'O se asij ataa ca'ngaa 'unj, ne aj nicun' so' nanj adonj —taj síí cu'naj Juan yo' a.

<sup>16</sup> Danj ca'mii síí cu'naj Juan che'é se Jesucristó me síí nicaj nu' rasuun sa', ne so' me síí rque se sa' man taran' ní', ne dan me se nuveé orún' se luj 'yaj so' che'é ní' ma'. 'O se que'ee se luj 'yaj so' che'é ní' adonj. <sup>17</sup> 'O se rque Diose se-tucuanj Moisés rihaan xii ní' gaa naá, tzaj ne Jesucristó me síí tacuachén nana luj do', nana ya do', rihaan ní' a. <sup>18</sup> Ne xa' Diose, tzaj ne taj vaj a doj síí ne'en rihaan man Diose ma'. Tzaj ne xa' Jesucristó, tzaj ne orún' so' me ta'nii Diose, ne nicun' so' rihaan Diose, ne so' me síí tihaan rihaan ní' daj vaa Diose adonj.

*Nihánj me se-nana síí cu'naj Juan síí cuta' ne man yuvij a*

<sup>19</sup> Ne nij síi uun chij rihaan nij yuvii israelitá síi man chuman' Jerusalén me se ca'néé nij so' man xrej do', man doj tuvi' síi cu'naj Leví síi cayáan gaa naá do', se vaa ca'anj nij so' xna'anj nij so' man síi cu'naj Juan me síi me Juan a. Dan me se ca'anj nij so' xna'anj nij so' man Juan, gaa ne Juan yo' ro', ca'mii so' nana nihánj rihaan nij so' a. <sup>20</sup> Dan me se yo'o cataj xna'anj síi cu'naj Juan rihaan nij so' daj sij me so', ne ne ca'mii ne so' ma'. 'O se ca'mii ya so', cataj so':

—Nuveé sij ca'néé Diose tinanii man yuvii rihaan sayuun mé 'unj ma' —taj síi cu'naj Juan yo' a.

<sup>21</sup> Gaa ne xna'anj uún nij so' man so', cataj nij so':

—Che'é dan me síi mé so' ga. Síi cu'naj Elías síi nata' se-nana Diose gaa naá mé so' na' —taj uún nij so', xna'anj nij so' man Juan a.

—Taj ma'. Nuveé so' mé 'unj ma' —taj uún síi cu'naj Juan yo' a.

—Ne'en núj se vaa vaa güii ca'na' yo'o síi nata' se-nana Diose, ne sij nata' yo' mé so' na' —taj uún nij so', xna'anj nij so' man Juan a.

—Taj ma' —taj síi cu'naj Juan yo' a.

<sup>22</sup> Che'é dan cataj nij so':

—Tzaj ne cataj ya so' me sij mé so', gaa ne ca'vee cataj xna'anj núj rihaan nij síi ca'néé man núj ca'na' núj daj sij mé so' a. Me sij mé so' ga. Daj vaa yo', rá so' ga —taj uún nij so', xna'anj nij so' man Juan a.

<sup>23</sup> Ne cataj síi cu'naj Juan:

—Síi cu'naj Isaías síi nata' se-nana Diose gaa naá ro', cataj xna'anj so' che'é suun 'yaj sunj a. Dan me se 'unj me síi nucuaj ndo'o a'mii rej tacaan, ne taj 'unj rihaan yuvii se vaa nuchran' nimán yuvii, ne ve'é ca'mii nij yuvii ga síi 'nij ra'a man ní' asa' ca'na' so' a —taj síi cu'naj Juan yo' a.

<sup>24</sup> Ne ta'aj nij síi ca'na' rihaan síi cu'naj Juan me síi fariseo, <sup>25</sup> ne cataj nij so' rihaan síi cu'naj Juan a:

—Dan me se nuveé sij ca'néé Diose tinanii man yuvii rihaan sayuun mé so' ma'. Nuveé sij cu'naj Elías mé so'

ma'. Nuveé sij nata' se-nana Diose yo' mé so' ma'. Che'é dan ne nó xcuún so' cuta' ne so' man yuvii —taj nij síi fariseo yo' rihaan síi cu'naj Juan a.

<sup>26</sup> Ne cataj xna'anj síi cu'naj Juan rihaan nij so', cataj so':

—'Unj me síi uta' ne uun man yuvii a. Tzaj ne vaa yo'ó síi nicun' sca'núj soj, ne ne ne'en soj man so' ma'. <sup>27</sup> Ne so' me síi 'na' rej xcoj, ne sij sa' uxrá doj me so' rihanj, ne daj chihaa mij se quisij raj quirij canj 'nij tacóo so' ma' —taj síi cu'naj Juan rihaan nij síi fariseo yo' a.

<sup>28</sup> Danj guun rej Betania rej rej rnej tu'va chráa cu'naj Jordán, rej vaj síi cu'naj Juan gaa cuta' ne so' man yuvii a.

<sup>29</sup> Dan me se yo'ó güii, ne quene'en síi cu'naj Juan se vaa ca'na' Jesucristó rihaan so', ne cataj so':

—Ni'yaj soj ei. Ase vaa matzinj cavi' rihaan Diose vaa síi nihánj, ne dan me se síi nihánj me síi ca'nee cacun' tumé yuvii man rihaan chumii nihánj, <sup>30</sup> ne síi nihánj ro', cataj xna'anj 'unj rihaan soj che'é so' gaa rque, ne cataj 'unj se vaa ca'vee se sij 'na' rej xcoj me so', tzaj ne sij uun chij doj rihaan 'unj me so' a. 'O se asij ataa ca'ngaa 'unj, ne aj nicun' so' nanj adonj. <sup>31</sup> Dan me se gaa rque ro', ne quene'en ma'anj sese sij nihánj me so' ma'. Tzaj ne maan che'é se me rá 'unj quene'en nij yuvii israelitá man so' ro', che'é dan ca'ná' 'unj, ne che'é dan cuta' ne 'unj man yuvii nanj á —taj síi cu'naj Juan yo' a.

<sup>32</sup> Gaa ne cataj xna'anj ya síi cu'naj Juan che'é se vaa quene'en ma'an so', cataj so':

—Quene'én 'unj se vaa nanij Nimán Diose rej xta', ne ase vaa 'o cha'aan vaa Nimán Diose yo', ne ca'na' yo', quitáa yo' raá Jesucristó ei. <sup>33</sup> Gaa ne nu' xcaj 'unj cuentá se vaa ma'an so' me síi ca'néé Diose á. 'O se síi ca'néé mán 'unj cuta' ne 'unj man yuvii me se ma'an so' cataj rihaan 'unj se vaa sese quene'én 'unj nanij Nimán Diose raá yo'o so', ne sese quitaj Nimán Diose yo' raá so', ne so' me síi ca'néé



Diose, ne cayáan uxrá Nimán Diose ga yuvi, qui'yaj so' a, taj sí ca'néé manj adonj. <sup>34</sup> Gaa ne quene'en ma'án 'unj man Jesucristó nihánj, se vaa nani Nimán Diose raá so', ne aj cataj yá 'unj rihaan soj se vaa ta'nij Diose me so' ei —taj sí cu'naj Juan yo' a.

*Nana nihánj taj xna'anj se vaa guun che'e va'nuj nij snó'o canoco' nij so' man Jesucristó a*

<sup>35</sup> Güii a'yuj me se canicun' uún sí cu'naj Juan ga vij tuvi' nij sí tucu'yón se-nana so' a. <sup>36</sup> Ne ni'yaj uxrá sí cu'naj Juan man Jesucristó gaa chéé Jesucristó, ne cataj sí cu'naj Juan:

—Ni'yaj roj soj ei. Ase vaa matzinj caví' rihaan Diose vaa sí nihánj á —taj sí cu'naj Juan a.

<sup>37</sup> Dan me se cuno roj sí tucu'yón se-nana Juan nana ca'mii so', ne canoco' roj so' man Jesucristó a. <sup>38</sup> Gaa ne canicaj Jesucristó, ne quene'en so' se vaa canoco' roj so' man so', ne cataj Jesucristó rihaan roj so' a:

—Vaa se achiin man roj soj na' —taj Jesucristó, xna'anj Jesucristó man roj so' a.

Gaa ne xna'anj roj so', cataj roj so':

—Me rej né so', rabbí —cataj roj so', xna'anj roj so' man Jesucristó, ne nana “rabbí” yo' taj “maestró” a.

<sup>39</sup> Gaa ne cataj Jesucristó rihaan roj so' a:

—Ca'anj ní', ne quene'en soj á —taj Jesucristó a.

Che'é dan me ca'anj roj so', ne quene'en roj so' rej ne Jesucristó, ne cunuú roj so' tucua' so' cunu' güii yo' a. Dan me se aga' ca'anj rej anoco' güii me orá ca'mii roj so' ga Jesucristó a.

<sup>40</sup> Dan me se yo' o tuvi' roj sí cuno nana ca'mii sí cu'naj Juan ne canoco' man Jesucristó ro', me sí cu'naj Andrés, ne tinúú sí cu'naj Simón Pedró me uún so' a. <sup>41</sup> Asino yaan nari' sí cu'naj Andrés man tinúú so' sí cu'naj Simón, ne cataj so' rihaan tinúú so':

—Nari' núj man Mesías ei —taj so' rihaan tinúú so' a. Ne nana “Mesías”

taj “sí ca'néé Diose tinanii man yuvi rihaan sayuun” a.

<sup>42</sup> Ne ca'anj nicaj so' man tinúú so' rihaan Jesucristó, gaa ne ni'yaj uxrá Jesucristó man sí cu'naj Simón yo', ne cataj so':

—Sí cu'naj Simón mé so', ne ta'ní sí cu'naj Juan mé so' á. Tzaj ne ndaa yaj, ne Cefas cu'naj so' á —taj Jesucristó rihaan so' a. Ne nana “Cefas” ro', xna'anj hebreo me yo', ne 'o cyaan vaa yo' ga nana “Pedró”, ne taj yo' se vaa ase vaa 'o yuvej vaa sí cu'naj Pedró, ne sca' nimán so' a.

*Nana nihánj taj xna'anj se vaa canacúun Jesucristó man sí cu'naj Felipé do', man sí cu'naj Natanael do', se vaa canoco' roj so' man so' a*

<sup>43</sup> Dan me se yo' o güii uún me rá Jesucristó cavii so' ca'anj so' estadó Galilea, ne nari' Jesucristó man sí cu'naj Felipé, ne dan me se cataj Jesucristó rihaan so' a:

—Canocó' so' manj, ca'anj ní' á —taj Jesucristó rihaan so' a.

<sup>44</sup> Ne Felipé ro', me sí ne chuman' Betsaida, ne Betsaida me chiháan sí cu'naj Andrés do', sí cu'naj Pedró do', uún a. <sup>45</sup> Veé dan, ne nari' sí cu'naj Felipé yo' man sí cu'naj Natanael, ne cataj so':

—Aj nari' núj man sí ca'néé Diose tinanii man yuvi rihaan sayuun, ne dan me se sí ca'mii Moisés che'é gaa cuchruj so' se-tucuanj so' me so', ne nij sí nata' se-nana Diose gaa naá ro', nata' uún nij so' che'é so' nanj adonj. Ne dan me se Jesús ta'ní sí cu'naj José, sí ne chuman' Nazaret me so' ei —taj Felipé rihaan Natanael yo' a.

<sup>46</sup> Ne cataj Natanael yo':

—Taj vaj sí sa' avii chuman' Nazaret ma' —taj Natanael yo' a.

Ne cataj Felipé:

—Ca'anj ní', quene'en so' man so', sese me rá so' á —taj Felipé rihaan so' a.

<sup>47</sup> Veé dan, ne quene'en Jesucristó se vaa ca'na' Natanael rihaan so', ne ca'mii so' 'o nana che'é Natanael, cataj so':

—Nij'yaj soj ei. Ya sij israelitá me síi 'na' cuano ei. Nicá a'mii so', ne a'mii so' nana tiha' yu'unj ma' —taj Jesucristó ni'yaj so' man Natanael yo' a.

<sup>48</sup> Gaa ne xná'anj Natanael yo' man Jesucristó, cataj so':

—Asá' a'vee ne'én so' manj ga —taj so', xná'anj so' man Jesucristó a.

Ne cataj Jesucristó:

—Asij ataa ca'mii Felipé rihaan so' do', asij cayáán so' tacóo chruun man chruj higó raá do', ne aj quene'én 'unj mán so' ei —taj Jesucristó rihaan so' a.

<sup>49</sup> Gaa ne cataj Natanael:

—Ta'nij Diose mé so', maestro. Sij nicaj suun rey uun chij rihaan ní' sij israelitá mé so' á —taj Natanael a.

<sup>50</sup> Gaa ne cataj Jesucristó rihaan so':

—Che'é se cataj 'unj rihaan so' se vaa quene'én 'unj mán so' gaa cayáán so' tacóo chruun man chruj higó ro', maan che'é dan amán rá so' ni'yaj so' manj na'. Tzaj ne quene'én so' que'ee doj rasuun nocoo doj uún a á. <sup>51</sup> Ya ya cataj xna'anj 'unj rihaan nij soj cuano se vaa quene'en soj naxra' rej xta', ne quene'en soj man nij se-mozó Diose, ne cavii nij so' xta', ne nanij uún nij so' rihaan 'unj sij ca'née Diose nicaj yu'unj man yuvii adonj —taj Jesucristó rihaan taran' nij so' a.

## 2

*Nana nihánj taj xna'anj se vaa naquiyaj Jesucristó na vinó man na uun gaa canuû cha'anj nara'aa chuman' Caná a*

<sup>1</sup> Cachén yavij güii, gaa ne canuû cha'anj nara'aa chuman' Caná chuman' naj estadó Galilea, ne ca'anj nii Jesucristó cha'anj yo' a. <sup>2</sup> Dan me se nacúún nii man Jesucristó do', man nij síi tucu'yón se-nana so' do', ca'na' nij so' cha'anj yo' a. <sup>3</sup> Veé dan, ne navij na vinó man nij síi navij rá cha'anj yo', ne che'é dan cataj nii Jesucristó rihaan Jesucristó a:

—Taj vaj na vinó rihaan nij síi navij rá cha'anj ma' —taj no' a.

<sup>4</sup> Gaa ne cataj Jesucristó rihaan nii so' a:

—Taj che'é ca'mii so' danj rihanj ma'. Nij'yaj so', ne ataa quisij güii qui'yáj suun sa' nocoo á —taj so' no nii so' a.

<sup>5</sup> Gaa ne cataj xna'anj nii Jesucristó rihaan nij mozó a:

—Cunó nij soj nu' se vaa cataj xna'anj ta'nij rihaan soj, ne qui'yaj soj nu' se vaa cataj so' á —taj no' rihaan nij mozó a.

<sup>6</sup> Veé dan, ne ne vatan' xruj yahij xij a. Xruj nicaj ca'anj chihaa litró na me xruj yo', ne xruj araa nij yuvii israelitá na rasuun nij so' na'ya' nij so' ndaa vaa taj se-tucuanj Moisés me xruj yo' a. <sup>7</sup> Ne ca'ne' Jesucristó suun rihaan nij mozó, cataj so':

—Caraa soj na rque nij xruj yahij yo' á —taj so' rihaan nij mozó yo' a.

Gaa ne caraa nij mozó na, ne yo'o caraa ndaa tu'va xruj yo', qui'yaj nij so' a. <sup>8</sup> Gaa ne cataj xna'anj uún Jesucristó rihaan nij mozó yo', cataj so':

—Yaj ro', quirii soj doj na nuu rque xruj, ne ca'anj nicaj soj na yo' rihaan síi uun chij rihaan nij mozó anicaj co'oo rihaan nij yuvii á —taj Jesucristó a.

Ne danj qui'yaj nij so' a.

<sup>9</sup> Veé dan, ne síi uun chij rihaan nij mozó anicaj co'oo rihaan yuvii me se co'o so' doj tzin' na yo', tzaj ne nuveé na uun me yo' a ma'. Nu' guun na yo' na vinó nanj adonj. Ne ne quene'en so' me rej cavii na vinó yo' a ma'. 'O se maan inanj nij mozó quirii na yo' rque xruj ro', orún' nij so' me síi quene'en me rej cavii na yo' a. Veé dan, ne nacúún síi uun chij yo' man síi nara'aa ca'na' síi nara'aa rihaan so', <sup>10</sup> ne cataj so':

—Tucuáán 'yaj ní' ro', me se nanj vaa yo' nanj á. Asino yaan go' ní' na vinó sa' doj co'o nij síi tihaj 'na' cha'anj, gaa ne ndaa quisij guun xno yuvii asuun, gaa ne go' ní' na vinó nij doj co'o nij so' a. Tzaj ne so' me se ino qui'yáá so' chuguanj. Dan me se ndaa yaj quirii so' na vinó sa' doj yo' asanj

—taj sí uun chij yo' rihaan sí nara'aa yo' a.

<sup>11</sup> Nihánj me se guun che'e Jesucristó qui'yaj Jesucristó suun sa' nocoo, ne nu' nihánj me se vaa qui'yaj so' chuman' Caná chuman' naj estadó Galilea a. Che'é dan xcaj nij yuvij cuentá se vaa sij sa' uxrá me so', qui'yaj so', ne cuchumán rá nij sí tucu'yón se-nana so' ni'yaj nij so' man so' a.

<sup>12</sup> Gaa quisij canuú cha'anj nara'aa yo', gaa ne ca'anj Jesucristó do', nii so' do', nij tinúú so' do', nij sí tucu'yón se-nana so' do', chuman' Capernaum, ne doj güii cayáán nij so' chuman' yo' a.

*Nana nihánj taj xna'anj daj qui'yaj Jesucristó gaa quirii so' man sí chi'ii rá nuvií nocoo a*

<sup>13</sup> Dan me se ataa doj quisij cha'anj pascuá cha'anj navij rá nij yuvij israelitá, gaa ne cavij Jesucristó ca'anj so' chuman' Jerusalén a. <sup>14</sup> Gaa ne rá nuvií nocoo ro', naj 'o yu'vee nocoo 'yaj nij yuvij israelitá, ne maan dan mán nij so' tu'vej nij so' scúj do', matzinj do', cha'aan do' a. Ne vaa sí ne rihaan chruun mesá, ne sí natuná sa'anj che'é yuvij atúj rque nuvií me nij so' a. <sup>15</sup> Gaa ne nicaj Jesucristó ne', qui'yaj so' quartá, go' so' man nij sí tu'vej xcuu do', man nij sí natuná sa'anj do', ne quirii so' xe' man taran' nij so' a. Ne rano so' man nij scúj do', man nij matzinj do', quirii so' xe' a. Ne ticha'nuu so' se-sa'anj sí natuná sa'anj rihaan yo'óo, ne tinaxru' so' nij chruun mesá a. <sup>16</sup> Gaa ne cataj so' rihaan nij sí tu'vej cha'aan a:

—Quirii soj rasuun nihánj xe' cuaj ei. Se guun qui'yaj soj yu'vee tucúa Réj ma' —taj so' rihaan nij sí tu'vej cha'aan man rá nuvií yo' a.

<sup>17</sup> Gaa ne ninuj rá nij sí tucu'yón se-nana Jesucristó se vaa nó nana nihánj rihaan danj Diose a: “Che'é se 'ee ndo'o raj ve' tucúa so', che'é dan ca'née nimanj qui'yaj sunj che'é yo' a”. Yo' me nana nó rihaan danj Diose a.

*Nana nihánj taj xna'anj se vaa ca'mii Jesucristó che'é güii cunuu i'na' uún so' a*

<sup>18</sup> Quene'en nij sí uun chij rihaan nij yuvij israelitá se vaa qui'yaj Jesucristó rá nuvií yo', gaa ne che'é dan cataj nij so' rihaan Jesucristó a:

—Ne nó xcúun so' quirii so' man sí tu'vej xcuu man rá nuvií nocoo, rá núj ma'. Maan se qui'yáa so' 'o suun sa' nocoo quene'en núj, gaa ne guun ya rá núj se vaa no xcúun so' qui'yáa so' danj ei —taj nij so' rihaan Jesucristó a.

<sup>19</sup> Ne cataj Jesucristó rihaan nij so' a:

—Tiri' soj man nuvií nihánj, ne rque va'núj güii, ne cunuu sa' uún nuvií nihánj, qui'yáj ei —taj Jesucristó a.

<sup>20</sup> Che'é dan cataj nij sí uun chij yo' rihaan Jesucristó a:

—Vij chihaa vatan' ya yo' qui'yaj suun nij sí cune' nuvií nihánj, tzaj ne asa' ca'vee naqui'yaj sa' so' nuvií nihánj rque va'núj güii, rá so' ga —taj nij so' rihaan Jesucristó a.

<sup>21</sup> Tzaj ne ne ca'mii Jesucristó che'é maan nuvií nocoo yo' ma'. Maan se ca'mii so' che'é ma'an yan cunuu i'na' uún so' rque va'núj güii a. <sup>22</sup> Che'é dan, gaa quisij cavi' so' ne cunuu i'na' uún so', gaa ne nanuj rá nij sí tucu'yón se-nana so' nana nihánj nana aj ca'mii so', ne cuchumán rá nij so' nana no rihaan danj Diose nana taj xna'anj daj quiran' sí ca'nej Diose tinanii man yuvij rihaan sayuun, ne cuchumán rá nij so' nana ca'mii ma'an Jesucristó uún a.

*Nana nihánj taj xna'anj se vaa ne'en Jesucristó daj vaa nimán yuvij a*

<sup>23</sup> Dan me se nu' nihánj qui'yaj Jesucristó chuman' Jerusalén gaa canuú cha'anj pascuá, ne che'é dan que'ee ndo'o nij yuvij cuchumán rá se vaa sij ca'née Diose me so' a. 'O se quene'en nij yuvij nij suun sa' nocoo qui'yaj suun so' a. <sup>24</sup> Tzaj ne ma'an Jesucristó, ne gaa nucuaj rá so' man nij yuvij yo' ma'. 'O se so' me sí ne'en

cunudanj, <sup>25</sup> ne ne cachiin yo'õ sîi cataj xna'anj rihaan Jesucristó ðaj vaa nimán yuvii ma'. 'O se ma'an so' me sîi quene'en ðaj vaa nimán nu' nij yuvii adonj.

### 3

#### *Nana nihánj taj xna'anj ðaj ca'mii Jesucristó ga sîi cu'naj Nicodemo a*

<sup>1</sup> Dan me se vaa yo'õ sîi fariseo cu'naj Nicodemo, ne sîi uun chij rihaan nij yuvii israelitá me so' a. <sup>2</sup> Dan me se rej niñ ca'na' so' rihaan Jesucristó, ne cataj so':

—Ne'en núj se vaa sij ca'née Diose tucu'yón man yuvii mé so', maestro. 'O se sese nuvi' Diose racuíj mán so', ne ne guun nu'cuáa so' qui'yáa so' ndaa vaa 'yáa so' nihánj cuano asuun ma' —taj so' rihaan Jesucristó a.

<sup>3</sup> Gaa ne cataj Jesucristó rihaan so' a:

—Ya ya cataj xna'anj 'unj rihaan so' cuano se vaa sîi se ca'ngaa naca uún ro', ðaj chihaa mij se guun nu'cuaj so' quene'en so' man Diose asa' guun chij Diose rihaan chumii nihánj a ma' —taj Jesucristó rihaan so' a.

<sup>4</sup> Dan me se xná'anj sîi cu'naj Nicodemo man Jesucristó, cataj so':

—Asa' ca'vee ca'ngaa uún 'õ sîi aj cachij ga. Ca'vee xa' catuu uún so' rque nii so' ne ca'ngaa naca uún so' gaa a na' —taj Nicodemo, xná'anj so' man Jesucristó a.

<sup>5</sup> Gaa ne cataj uún Jesucristó:

—Ya ya cataj xna'anj 'unj rihaan so' se vaa sese se ca'ngaa yo'õ so' qui'yaj na ne qui'yaj Nimán Diose, ne se guun nu'cuaj so' catuu so' rihaan Diose asa' guun chij Diose rihaan chumii nihánj ma'. <sup>6</sup> 'O se sese nanj yuvii qui'yaj ca'ngaa ní', ne nanj yuvii man rihaan chumii nihánj me ní', tzaj ne sese ca'ngaa ní' qui'yaj Nimán Diose, ne ase vaa sa' Nimán Diose ro', ðanj gaa sa' nimán ní' nanj adonj. <sup>7</sup> Se caraya'anj tihá' so' se vaa cataj 'unj rihaan so' ma'. 'O se no xcúun nij soj ca'ngaa ya uún nij soj adonj. <sup>8</sup> Dan me se xcaj so' cuentá ni'yaj so' nana a. Avii nana yo', ne

cayuj 'yaj yo', tzaj ne ne ne'én so' me rej avii yo' 'na' yo', ne ne ne'én so' me rej ca'anj yo' ma'. Ne ase vaa nana ro', ðanj vaa Nimán Diose, ne dan me se sese cunuu sa' nimán yo'õ so' qui'yaj Nimán Diose, ne taj ne'én' asa' ca'vee cunuu sa' nimán so' qui'yaj Nimán Diose ma' —taj Jesucristó rihaan sîi cu'naj Nicodemo yo' a.

<sup>9</sup> Veé dan, ne xná'anj sîi cu'naj Nicodemo, cataj so':

—Asa' ca'vee qui'yaj yuvii ðanj ga —taj so', xná'anj so' a.

<sup>10</sup> Gaa ne xná'anj uún Jesucristó man so', cataj Jesucristó:

—'O se me che'é sij uun chij sij tucu'yón se-nana Diose rihaan nij yuvii israelitá mé so', tzaj ne ne ne'én so' nana nihánj nana cataj 'unj rihaan so' ga. <sup>11</sup> Ya ya cataj xna'anj 'unj rihaan so' se vaa xa' núj, tzaj ne che'é inanj se vaa ne'en núj a'mii núj ne che'é se vaa quene'en núj nata' núj adonj. Tzaj ne ne amán rá nij soj nana a'mii núj ma'. <sup>12</sup> Dan me se nanj che'é rasuun man rihaan chumii nihánj cataj xna'anj 'unj rihaan soj, tzaj ne ne cuchuman rá soj ma'. Asa' ca'vee cuchuman rá soj sese cataj xna'anj 'unj rihaan soj che'é rasuun man rej xta' ga. <sup>13</sup> 'O se taj vaj sîi cavii rej xta' nanij rihaan yo'óo cataj xna'anj rihaan soj ðaj vaa nij rasuun man rej xta' ma'. Maan orún' 'unj sij ca'née Diose nîcay yu'unj man yuvii ro', me sîi 'na' rej xta' nanij rihaan yo'óo nihánj, ne che'é dan ma'anj me sîi guun nu'cuaj cataj xna'anj rihaan soj che'é rej xta' adonj. <sup>14</sup> Dan me se ase vaa tacavii sîi cu'naj Moisés xcuáa aga' raá chruun rej tacaan ro', ðanj qui'yaj nii manj sij ca'née Diose nîcay yu'unj man yuvii, ne tacavii nii manj raá 'õ chruun, <sup>15</sup> ne ndaa síj, gaa ne taran' nij sîi cuchuman rá ni'yaj manj ro', cayáan nij so' ga Diose nu' cavii nu' ca'anj nanj adonj —taj Jesucristó rihaan sîi cu'naj Nicodemo a.

*Nana nihánj taj xna'anj me che'é ca'na' Jesucristó rihaan chumii nihánj a*



<sup>16</sup> Dan me se 'ee uxrá rá Diose ni'yaj Diose man ní' sij man rihaan chumií nihánj, ne nda' se orún' ta'níí Diose, tzaj ne rqué uun Diose ta'níí so' yo', ca'na' ta'níí so' rihaan chumií nihánj, ne cataj Diose se vaa nij yuvií amán rá ni'yaj man ta'níí so' ro', se cavi' nij so' daj chihaa míj ma'. Tananj cane nij so' ga Diose nu' cavii nu' ca'anj nanj adonj. <sup>17</sup> 'O se ne ca'nej Diose ta'níí so' che'é rej cuta' ta'níí so' cacun' xráá nij yuvií man rihaan chumií nihánj ma'. Tananj ca'née Diose man ta'níí so' rihaan chumií nihánj che'é rej tinanii ta'níí so' man nij yuvií rihaan chrej chi'ii uun chij nimán nij so' adonj. <sup>18</sup> Ní' sij amán rá ni'yaj man ta'níí Diose me se taj vaj sayuun quiran' ní' ma'. Tzaj ne síí ne amán rá ni'yaj man so' ro', aj cataj Diose se vaa ya quiran' so' sayuun nanj á. Che'é se ne cuchuman ya rá so' ni'yaj so' orún' ya ta'níí Diose ro', che'é dan quiran' ya so' sayuun adonj.

<sup>19</sup> Dan me se nihánj me cacun' tumé nij síí quiran' sayuun yo' a. 'O se aj ca'na' Jesucristó rihaan chumií nihánj, ne ase vaa 'o ya'an chuguun vaa so', tzaj ne caran' inanj rá nij síí man rihaan chumií nihánj cachee nij so' rej rmi', ne ne ca'vej rá nij so' quinichrun' nij so' rihaan ya'an chuguun yo' a. 'O se chi'ii ndo'o vaa se qui'yaj nij so' adonj. <sup>20</sup> Dan me se nu' yuvií 'yaj se chi'ii ro', taj ri'yunj nij so' ni'yaj nij so' ya'an chuguun yo', ne ne 'na' nij so' rihaan ya'an chuguun yo' ma'. 'O se na'vej rá nij so' curuvi' se vaa 'yaj nij so' ma'. <sup>21</sup> Tzaj ne nij síí me rá canoco' nana ya ro', 'na' nij so' rihaan ya'an chuguun yo', ne dan me se gaa 'yaj nij so' danj, ne ruvi' se vaa 'yaj nij so', ne síí noco' man Diose me nij so', ne Diose racuí man nij so' nu' se vaa 'yaj nij so' a.

*Nana nihánj taj xna'anj se vaa sij sa' doj rihaan síí cu'naj Juan me Jesucristó, taj ma'an Juan yo' a*

<sup>22</sup> Dan me se gaa quisíj nu' se vaa qui'yaj Jesucristó chuman' Jerusalén, gaa ne curihanj Jesucristó do', nij

síí tucu'yón se-nana so' do', chuman' Jerusalén, ne ca'anj nij so' ne nij so' chuman' le'ej nii naj estadó Judea, ne veé dan vaj nij so' cuta' ne nij so' man yuvií do' a. <sup>23</sup> Ne síí cu'naj Juan ro', ne chuman' cu'naj Enón, ne uta' ne so' man yuvií uún a. 'O se nichrun' naj chuman' Enón ga chuman' Salim, ne man uxrá na cata' ne yuvií rej yo', ne ca'na' uxrá yuvií, ne ata' ne nij yuvií adonj. <sup>24</sup> 'O se ataa doj caxrii nii taga' man síí cu'naj Juan yo' gaa ei. <sup>25</sup> Veé dan, ne guun che'e nij síí tucu'yón se-nana Juan ca'mii cunu' nij so' ga 'o síí uun chij rihaan nij yuvií israelitá che'é nana cataj xna'anj síí cu'naj Moisés, se vaa daj qui'yaj yuvií na'ya' yuvií, gaa ne ca'vee guun niha' rá Diose ni'yaj Diose man nij so' a. <sup>26</sup> Veé dan, ne cuchi' nij síí tucu'yón se-nana Juan rihaan ma'an Juan, ne cataj nij so':

—Síí chée ga so' gaa vaj ní' rej rnej tu'va chráá cu'naj Jordán ro', síí natá' so' che'é ro', uta' ne so' man yuvií cuano, ne 'anj taran' nij yuvií rej vaj so', maestro —taj nij síí tucu'yón se-nana Juan rihaan Juan a.

<sup>27</sup> Gaa ne cataj Juan:

—A 'ó yuvií na'vee canoco' daj chihaa míj man so', sese nuveé Diose me síí ca'vej rá ma'. <sup>28</sup> 'O se aj cuno ma'an soj nana cataj xna'anj 'unj rihaan soj se vaa nuveé sij ca'née Diose tinanii man yuvií rihaan sayuun mej a. Maan se 'unj me síí ca'née Diose ca'na' asino yaan rihaan síí tinanii man yuvií rihaan sayuun ei. <sup>29</sup> Ase vaa síí xcaj man chana ne nara'aa ro', vaa so', ne ase vaa tuvi' síí nara'aa ro', danj vaa 'unj, ne nicún' 'unj unó 'unj se vaa a'mii so', ne uun niha' uxrá raj, 'yaj nana a'mii síí nara'aa, ne che'é dan me uun niha' uxrá raj adonj. <sup>30</sup> 'O se no xcúún so' guun chij so' doj, ne 'unj me se no xcúnj gunj síí nica' doj rihaan so' adonj —taj síí cu'naj Juan yo' a.

*Nana nihánj taj xna'anj se vaa no xcúún ní' cuchuman rá ní' ni'yaj ní' man Jesucristó a*

31 Sí nanij rihaan chumiñ nihánj ro', so' me sí uun chij rihaan cunudanj rasuun adonj. Nij sí man rihaan chumiñ nihánj, tzaj ne che'é inanj rasuun man rihaan chumiñ nihánj a'mii nij so', ne taj vaj yo'ó rasuun ne'en nij so' ma'. Tzaj ne sí nanij rej xta' ro', 32 so' me sí a'mii che'é se vaa quene'en so' rej xta' do', che'é nana cuno so' rej xta' do', ne taj vaj sí amán rá uno se-nana so' ma'. 33 Tzaj ne sí amán rá se-nana so' ro', so' me sí taj se vaa nana ya me se-nana Diose adonj. 34 Sí ca'neé Diose man ro', me sí a'mii se-nana Diose á. 'Q se rqué ndo'o Diose Nimán Diose rihaan so' adonj. 35 'Ee rá Rej so' man so', che'é yan ta'nij Rej so' me so', ne rqué Rej so' cunudanj rasuun man so', che'é rej guun chij so' rihaan cunudanj nij rasuun yo' adonj. 36 Sí amán rá ni'yaj man ta'ní Diose ro', so' me sí ve'é cayáan ga Diose nu' cavii nu' ca'anj, tzaj ne sí na'vej rá cuno rihaan ta'ní Diose ro', daj chihaa mǐj se cayáan so' ga Diose ma'. Tananj yo'ó ca'maan rá Diose ni'yaj Diose man so', ne yo'ó quiran' so' sayuun, qui'yaj Diose adonj.

#### 4

*Nana nihánj taj xna'anj che'é nana ca'mii Jesucristó ga 'o chana samaritana a*

1 Dan me se xcaj Jesucristó cuentá se vaa cuchí' nana rihaan nij sí fariseo se vaa doj a vaa nij sí tucu'yón se-nana Jesucristó rihaan nij sí tucu'yón se-nana Juan, ne nocoo doj nij yuvii cata' ne qui'yaj Jesucristó rihaan nij yuvii cata' ne qui'yaj Juan a. 2 Tzaj ne nuveé ma'an Jesucristó me sí cuta' ne man nij yuvii ma'. Maan nij sí tucu'yón se-nana so' cuta' ne man nij yuvii a. 3 Dan me se xcaj Jesucristó cuentá se vaa cuchí' nana yo' rihaan nij sí fariseo, gaa ne cavii so' estadó Judea ca'anj so' estadó Galilea a. 4 'Q se ya cachén so' estadó Samaria yo', 5 ne cuchí' so' tu'va yo'ó chuman' naj estadó Samaria, ne Sicar cu'naj chuman' yo'

a. Dan me se nichrun' naj chuman' yo' tu'va yo'ó rqué sí cu'naj Jacob rihaan ta'ní so' sí cu'naj José gaa naá, 6 ne tu'va chuman' yo' nuú yo'ó na yu'uj qui'yaj sí cu'naj Jacob gaa naá a. Dan me se xe' man Jesucristó che'é yan cachéé uxrá so' ca'na' so' chuman' yo', ne che'é dan ca'anj cane so' tu'va na yu'uj yo', ne caxuj me yo' a.

7 Dan me se ca'na' 'o chana samaritana na yu'uj quirii no' na, ne cataj Jesucristó rihaan chana yo' a:

—Qui'yáa so' se ndo'o, ne rque so' doj na co'oj rguanj —taj Jesucristó no chana yo' a.

8 Ne taj vaj nij sí tucu'yón se-nana Jesucristó nicun' ga so' gaa ma'. 'Q se ca'anj nij so' chuman' quiraan nij so' se chá a.

9 Veé dan, ne cataj chana samaritana yo' rihaan Jesucristó a:

—Me che'é cachín so' na rihanj, co'ó so', ne ni'yaj so', ne sij israelitá mé so', ne chana samaritana mej ga —taj chana yo', xná'anj no' man Jesucristó a.

'Q se ne a'mii sa' nij sí israelitá ga nij sí samaritano ma'.

10 Gaa ne cataj Jesucristó rihaan no' a:

—Sese xcaj so' cuentá che'é se luj qui'yaj Diose che'é so' ne sese quene'én so' me sí achín na mán so' cuano, ne cachín so' na 'yaj vaa i'na' yuvii man so' co'ó so', ne rqué so' na yo' co'ó so' saj adonj —taj Jesucristó no chana yo' a.

11 Gaa ne cataj chana rihaan Jesucristó a:

—Tzaj ne taj vaj sihuu rihaan so' quirii so' na nihánj ma'. Ne cunuú ndo'o nuú na rá yu'uj nihánj, señor. Me rej quirii so' na 'yaj vaa i'na' yuvii rque so' co'oj ga. 12 Dan me se xii ní sí cu'naj Jacob ro', so' me sí co'ó na nuu na yu'uj nihánj, ne veé dan me co'ó ta'ní so' do', daán so' xcuu do', ne rqué so' na nihánj co'ó núj a. Ne sij sa' doj rihaan so' mé so', rá so' na' —taj chana yo' rihaan Jesucristó a.

13 Gaa ne cataj Jesucristó rihaan no':

—Cunudanj nij sí co'ō na nuu rá yu'uj nihánj ro', canacoō uún nij so' na vaa güii, ne ca'na' uún nij so' quirii nij so' doj na a adonj. <sup>14</sup> Tzaj ne sí co'ō na rque 'unj nihánj me se daj chihaa mǐj se canacoō uún so' na yo' a ma'. Ase vaa rej ve'é uxrá avii na ro', danj gaa nimán so', ne cunuû uxrá se luj nimán so', ne gaa i'na' so' ga Diose nu' cavii nu' ca'anj, qui'yaj na rquej adonj —taj Jesucristó rihaan chana yo' a.

<sup>15</sup> Ne cataj chana rihaan so':

—Rque so' doj na yo' co'oj, señor. Ne se canacoó 'unj na, ne se ca'na' uún 'unj quirij na nihánj a ma' —taj chana rihaan Jesucristó a.

<sup>16</sup> Ne cataj Jesucristó rihaan no' a:

—Ca'anj nacunj so' man nica so', ne ca'na' so' nihánj á —taj so' rihaan no' a.

<sup>17</sup> Ne cataj chana rihaan so':

—Taj vaj nicaj ma' —taj chana yo' a.

Ne cataj Jesucristó rihaan no' a:

—Cunaj uxrá ca'mii so', cataj so' se vaa taj vaj nica so' ei. <sup>18</sup> 'O se asij rque me se quisíj ya 'un' snó'o xcaj so', tzaj ne tanáj so' man nij so', ne yaj nihánj me se nicaj so' man 'ó so', tzaj ne nuveé nica so' me so' ma'. Che'é dan ya uxrá ca'mii so' ei —taj Jesucristó no chana yo' a.

<sup>19</sup> Ne cataj chana rihaan so':

—Cuanō nihánj xcaj 'unj cuentá se vaa sij nata' se-nana Diose mé so', señor. <sup>20</sup> Dan me se xii núj ro', quina'vǐj nij so' xráá quij nihánj, tzaj ne soj sij israelitá taj se vaa orún' chuman' Jerusalén me rej no xcúún ní' na'vǐj ní' rihaan Diose, taj soj adonj —taj chana yo' rihaan Jesucristó a.

<sup>21</sup> Gaa ne cataj Jesucristó rihaan chana a:

—Cuchuman rá so' nana nihánj nana cataj xna'anj 'unj rihaan so', nocoj. Dan me se vaa güii, ne se cavii nij soj raá quij nihánj do', se ca'anj nij soj chuman' Jerusalén do', na'vǐj soj rihaan Rej ní' Diose ma'. <sup>22</sup> Dan me se ne ne'en nij soj man sí na'vǐj soj rihaan ma'. Tzaj ne xa' núj sij israelitá, tzaj ne ne'en núj man sí na'vǐj

núj rihaan a. 'O se núj sij israelitá me nij sí qui'yaj quinanii yuvii rihaan sayuun a. <sup>23</sup> Tzaj ne vaa güii, ne nij sí na'vǐj sa' rihaan Rej ní' Diose ro', guun inanj rá nij so' na'vǐj nij so' rihaan Diose, ne me rej ma'an vaj nij so' na'vǐj ya nij so' rihaan Diose nanj adonj. Ne cuano nihánj me aj guun che'e yuvii qui'yaj yuvii danj adonj. 'O se me ndo'o rá Rej ní' Diose na'vǐj ya yuvii rihaan so' ei. <sup>24</sup> Dan me se me ma'an rej vaj ní' nicun' Diose, ne che'é dan ní' sij na'vǐj rihaan Diose ro', me ma'an rej mán ní', ne no xcúún ní' guun niha' rá ní' na'vǐj ya ní' rihaan so' adonj —taj Jesucristó rihaan chana yo' a.

<sup>25</sup> Gaa ne cataj chana rihaan Jesucristó a:

—Ne'én 'unj se vaa vaa güii, ne ca'na' sí ca'nej Diose tinanii man ní' rihaan sayuun, ne asa' ca'na' so', ne cataj xna'anj ma'an so' che'é cunudanj rasuun rihaan ní' nanj á —taj chana rihaan Jesucristó a.

<sup>26</sup> Gaa ne canicaj Jesucristó cataj Jesucristó rihaan no', ne:

—'Unj sij a'mii rihaan so' cuano nihánj ro', me sí ca'née Diose adonj —taj Jesucristó rihaan chana yo' a.

<sup>27</sup> Veé dan, ne nu' 'na' nique nij sí tucu'yón se-nana Jesucristó, ne caraya'anj nij so' se vaa ca'mii Jesucristó ga chana yo' a. Tzaj ne a 'ó nij so' ne xna'anj man so' daj qui'yaj so' do', me che'é ca'mii so' ga chana yo' do' a ma'. <sup>28</sup> Gaa ne tanáj chana se-sihuu chana, ne cavii chana quinan' chana chuman', gaa ne cataj chana rihaan nij yuvii man chuman' a:

<sup>29</sup> —Ca'anj ní', ne quene'en soj 'o snó'o sí cataj xna'anj rihanj che'é nu' se vaa qui'yaj gaa rque á. Nuveé sij ca'née Diose tinanii man ní' rihaan sayuun me so', rá soj na' —taj chana rihaan nij snó'o man chuman' yo' a.

<sup>30</sup> Gaa ne curihanj nij so' chuman', ne ca'na' nij so' rihaan Jesucristó a.

<sup>31</sup> Dan me se gaa ca'mii chana ga nij sí man chuman' yo', ne guun

che'e nij sí tucu'yón se-nana Jesucristó rquee nij so' chraa man Jesucristó, cataj nij so':

—Cha so' doj chraa, maestro —taj nij so' a.

<sup>32</sup> Tzaj ne cataj Jesucristó rihaan nij so' a:

—Vaa se chá rihanj, tzaj ne ne ne'en soj ma' —taj Jesucristó rihaan nij so' a.

<sup>33</sup> Gaa ne xná'anj nij so' man tuvi' nij so', cataj nij so':

—Vaa sí ca'na' rqué se chá so', rá soj na' —taj nij so' rihaan tuvi' nij so' a.

<sup>34</sup> Gaa ne cataj Jesucristó rihaan nij so' a:

—Sese 'yáá 'unj ndaa vaa me rá sí ca'née manj qui'yáj, ne sese navij quisíj suun ca'ne' so' rihanj, ne ase vaa se chá vaa yo' rihanj adonj. Dan me se nuu xej nimanj gaa 'yaj sunj suun yo' ei. <sup>35</sup> Se guun cataj soj se vaa cachén yo'ó ca'anj yavii, gaa ne quirii ní' naa, cataj soj ma'. Maan se cuano nihánj cataj xna'anj 'unj rihaan soj se vaa naxcaj soj rihaan soj, ni'yaj soj nij yuvii, se vaa ase vaa naa 'núú trigó vaa nij yuvii, ne catzii ndo'o vaa naa 'núú trigó yo', cachij yo', ne cuano nihánj me se no xcúún ní' quirii ní' 'núú trigó yo' adonj. Dan me se aj guun che'e <sup>36</sup> Diose naru'vee Diose rihaan nij sí rii naa yo', ne naqui'yaj chre' ndo'o nij so' man nij sí cayáán ga Diose nu' cavii nu' ca'anj, ne rej rihaan guun niha' rá sí cunô naa ga sí rii naa adonj. <sup>37</sup> 'O se ya uxrá vaa nana nihánj se vaa ino vaa sí cunô naa ga sí rii naa, <sup>38</sup> ne aj ca'née 'unj man soj quirii soj naa rej ne qui'yaj suun soj ma'. Yo'ó yuvii me nij sí qui'yaj suun naa yo' gaa rque, ne catúj soj qui'yaj suun soj ga nij so' adonj —taj Jesucristó rihaan nij sí tucu'yón se-nana so' a.

<sup>39</sup> Dan me se che'é se nata' chana yo' rihaan nij yuvii samaritana man chuman' yo' se vaa cataj xna'anj Jesucristó rihaan no' nu' se vaa qui'yaj no' gaa rque ro', che'é dan me cuchumán rá que'ee nij yuvii man chuman' yo' ni'yaj nij yuvii man Jesucristó a.

<sup>40</sup> Dan me se cuchi' nij sí man chuman' yo' rihaan Jesucristó, ne cachíin ni'yaj uxrá nij so' rihaan so' se vaa caran' so' doj tucúa nij so', ne che'é dan vij güii quináj so' chuman' yo' a.

<sup>41</sup> Ne guun rií doj nij sí cuchumán rá cuno se-nana Jesucristó a. <sup>42</sup> Ne nij yuvii amán rá ni'yaj man Jesucristó ro', cataj nij so' rihaan chana yo' a:

—Nuveé che'e doj nana natá' so' rihaan núj me cuchumán rá núj ni'yaj núj man so' ma'. Maan se cuno ma'an núj se-nana so', ne xcaj núj cuentá se vaa ya sí tinanii man yuvii man rihaan chumii nihánj rihaan sayuun me sí nihánj nanj adonj —taj nij so' rihaan chana yo' a.

*Nana nihánj taj xna'anj se vaa nahuun sa' ta'níi yo'o sí nicaj suun, qui'yaj Jesucristó a*

<sup>43</sup> Dan me se quisíj vij güii caran' Jesucristó chuman' yo', gaa ne cavii so' ca'anj so' estadó Galilea a. <sup>44</sup> Dan me se ma'an Jesucristó me sí cataj xna'anj se vaa nij sí man chiháán 'o sí a'mii natáj se-nana Diose me se ne aráj cochroj nij sí man ma'an dan rihaan so' ma'.

<sup>45</sup> Gaa ca'na' Jesucristó estadó Galilea, gaa ne ve'é uxrá ca'mii nij sí man estadó yo' che'é suun sa' nocoo qui'yaj so' cha'anj canuú chuman' Jerusalén a. 'O se ma'an nij so' ca'anj cha'anj yo' a.

<sup>46</sup> Dan me se ca'anj uún so' chuman' Caná chuman' naj estadó Galilea a. Chuman' yo' me chuman' naqui'yaj so' na vinó man na uun gaa rque a. Ne chuman' Capernaum ro', ne yo'o sí nicaj suun rihaan rey a. Ne canó chi'ii man ta'níi so' 'o snó'o cunii a. <sup>47</sup> Dan me se cuchi' nana rihaan sí nicaj suun yo' se vaa cavii Jesucristó estadó Judea ca'na' Jesucristó estadó Galilea, gaa ne ca'anj so' cuchi' so' rihaan Jesucristó, ne cachíin ni'yaj uxrá so' rihaan Jesucristó se vaa ca'anj Jesucristó qui'yaj cono'ó Jesucristó man ta'níi so' a. Dan me se daj doj cavii ta'níi so', taj



so' a. <sup>48</sup> Gaa ne cataj Jesucristó rihaan so' a:

—Sese se qui'yáj suun sa' nocoo quene'en soj, ne daj chihaa míj se cuchumán rá soj ni'yaj soj manj ma' —taj Jesucristó rihaan so' a.

<sup>49</sup> Gaa ne cataj sí nicaj suun yo' rihaan Jesucristó a:

—Daj doj cavi' ta'níj, nanj señor. Qui'yáá so' se ndo'o uxrá, ne ca'anj ní' doj ruguanj —taj so', cachín ni'yaj so' rihaan Jesucristó a.

<sup>50</sup> Ne cataj Jesucristó rihaan so' a:

—Ca'vee ca'anj so' á. 'O se aj nahuun sa' ta'níi so' nanj adonj —taj Jesucristó rihaan so' a.

Gaa ne cuchumán rá snó'o yo' nana cataj xna'anj Jesucristó rihaan so', ne cavii so' ca'anj so' a.

<sup>51</sup> Veé dan, ne tihaj nan' so' chrej, ne ca'anj caran' nij se-mozó so' man so', ne cataj xna'anj nij yo' rihaan so' se vaa aj nahuun sa' ta'níi so' nanj adonj. <sup>52</sup> Veé dan, ne xná'anj so' man nij mozó yo':

—Me orá me guun che'e ta'níj nahuun sa' yo' ga —cataj so' rihaan nij mozó yo' a.

Gaa ne cataj nij mozo yo' rihaan so':

—Quii aga' 'o me na'maân cachi' man xnii nanj á —taj nij mozó yo' rihaan so' a.

<sup>53</sup> Che'é dan me xcaj snó'o yo' cuentá se vaa maan orá cataj xna'anj Jesucristó rihaan so' se vaa nahuun sa' ta'níi so' ro', maan orá dan me nahuun sa' ya ta'níi so' a. Gaa ne cuchumán rá nij tucua so' se vaa sij ca'néé Diöse me Jesucristó a. <sup>54</sup> Dan me se quisíj vij suun sa' nocoo qui'yaj Jesucristó gaa quisíj cavii so' estadó Judea ca'anj so' estadó Galilea a.

## 5

*Nana nihánj taj xna'anj se vaa nahuun sa' 'o sí ninaj cunu' icó xnu' va'nuy yo', qui'yaj Jesucristó a*

<sup>1</sup> Veé dan, ne canuú cha'anj navij rá nij sí israelitá, gaa ne cavii Jesucristó ca'anj so' chuman' Jerusalén a. <sup>2</sup> Dan me se chuman' Jerusalén ro', vaa 'o

na cu'naj Betesda xna'ánj a'mii nij sí israelitá a. Nichrun' naj na yo' ga ta'yaa atúj matzinj, ne vaa 'un' ve' ne nu' anicaj tu'va na yo' a. <sup>3</sup> Rá ve' yo' mán ndo'o sí ninaj do', sí tuchrii do', sí rengó do', sí nuu chrúnj ra'a do' a. <sup>4</sup> Dan me se ndaa vaa orá nanij yo'o se-mozó sí 'nij ra'a man ní' rá na yo', ne tanicaj so' na yo', taj nij yuvii yo' a. Ne gaa anicaj na yo', ne sí nanij asino yaan rque na ro', orún' so' güej naj guun chi'ii xráá, taj uún nij yuvii yo' a. <sup>5</sup> Ne naj yo'o snó'o tu'va na yo', ne síj icó xnu' va'nuy ya yo' ran' so' a. <sup>6</sup> Dan me se quene'en Jesucristó man so' se vaa naj so' rej yo', ne aj quene'en Jesucristó se vaa guun que'ee yo' ran' so', ne xná'anj Jesucristó man so', cataj Jesucristó a:

—Nahuun sa' so', rá so' na' —taj Jesucristó rihaan so' a.

<sup>7</sup> Ne cataj sí ran' yo' rihaan Jesucristó a:

—Nahuún 'unj raj, tzaj ne taj vaj tuví' 'unj sí tinanij mán 'unj rá na gaa anicaj na, man señor. Che'é dan me gaa 'anj 'unj tu'va na yo', ne guun yucuan' yo'ó so', ne asino so' atúj rque na rihanj nanj adonj —taj so' rihaan Jesucristó a.

<sup>8</sup> Gaa ne cataj Jesucristó rihaan so':

—Naxagaa so', ne naxcaj so' tuvée so', cachee so' á —taj Jesucristó rihaan so' a.

<sup>9</sup> Gaa ne nu' nahuun sa' snó'o yo', ne naxcaj so' tuvée so', ne ca'anj so' a.

*Nana nihánj taj xna'anj me che'é no' xcúún Jesucristó qui'yaj cono'ó so' man yuvii güii naránj rá nij yuvii israelitá a*

Ne güii nahuun sa' snó'o yo' me güii naránj rá nij yuvii israelitá a. <sup>10</sup> Che'é dan me nij sí uun hij rihaan nij yuvii israelitá me se cataj nij so' rihaan sí nahuun sa' yo':

—Güii naránj rá ní' me nihánj á. Ne nó xcúún so' catá so' tuvée so' cuan' ma' —taj nij so' rihaan so' a.

<sup>11</sup> Gaa ne cataj so' rihaan nij so' a:

—Tzaj ne sí qui'yaj nahuun sa' 'unj ro', so' me sí ca'ne' suun rihanj

naxcaj 'unj tuvée 'unj ne cachee 'unj adonj —taj so' rihaan nij so' a.

<sup>12</sup> Gaa ne xná'anj nij so' man so', cataj nij so':

—Me síi cataj rihaan so' naxcaj so' tuvée so' ne cachee so' ga —taj nij so' rihaan so' a.

<sup>13</sup> Tzaj ne ne quene'en síi nahuun sa' me síi qui'yaj danj ma'. 'O se gaa quisíj nahuun sa' so', ne naxuun Jesucristó man ma'an so' cachén Jesucristó sca'núj nij yuvij man anicaj ni'yaj man síi nahuun sa' yo', ca'anj so' a. <sup>14</sup> Veé dan, ne nari' Jesucristó man síi nahuun sa' yo' rá nuvíi nocoo, ne cataj Jesucristó rihaan so' a:

—Ya nahuun sa' so' á. Tanáj so' chrej chí'ij á. Sese taj, ne canicaj uún chí'ij mán so', ne doj a quirán' so' nanj adonj —taj Jesucristó rihaan so' a.

<sup>15</sup> Dan me se cavii snó'o yo', ne nata' so' rihaan nij síi uun chij rihaan nij yuvij israelitá se vaa Jesucristó me síi qui'yaj nahuun sa' so' a. <sup>16</sup> Che'é dan guun rá nij síi uun chij yo' qui'yaj nij so' sayuun man Jesucristó, che'é se güii naránj rá nij so' me güii nahuun snó'o yo', qui'yaj Jesucristó a.

<sup>17</sup> Gaa ne cataj Jesucristó rihaan nij so' a:

—Réj me se ne anicun' so' ga suun ma'. Che'é dan yo'o 'yaj suun ma'anj adonj —taj Jesucristó rihaan nij so' a.

<sup>18</sup> Che'é dan doj a nano' nij so' daj qui'yaj nij so', gaa ne ca'vee cavi' Jesucristó a. 'O se nuveé che'e inanj tinavij Jesucristó tucuáán noco' nij so' che'é güii naránj rá nij so' me guun rá nij so' cavi' Jesucristó ma'. 'O se che'é se cataj so' se vaa Rej ma'an so' me Diose, che'é dan guun doj rá nij so' cavi' Jesucristó nanj adonj. Dan me se ase vaa Diose vaa ma'an so', taj so' a. <sup>19</sup> Che'é dan cataj Jesucristó rihaan nij so' a:

—Dan me se cataj xna'anj yá yá 'unj rihaan soj a. Dan me se ase vaa xnii rihaan rej xnii ro', danj vaa 'unj sij ta'nij Diose nihánj rihaan Réj Diose, ne ne uun nucuáá 'unj 'yáá 'unj se vaa rii nimán ma'anj ma'. 'O se inanj 'yáá

'unj ndaa vaa 'yaj Réj Diose ne'enj a. Ne ase vaa 'yaj guee so' ro', veé danj vaa guee 'yáá 'unj uún adonj. <sup>20</sup> 'O se 'ee ndo'o rá Réj Diose ni'yaj so' manj che'é se ta'nij so' mej, ne tihaan so' manj nu' se vaa 'yaj so' a. Ne suun sa' doj rihaan suun sa' qui'yá quene'en soj cuano ro', tihaan so' manj a. Yo' me se doj a caraya'anj soj ni'yaj soj suun sa' yo' ei. <sup>21</sup> Dan me se ase vaa nuu i'na' uún nij síi cavi' 'yaj Réj ro', danj qui'yáá 'unj uún adonj. Dan me se cunuu i'na' uún naj guun yuvij qui'yáá 'unj, sese guun rá 'unj cunuu i'na' uún nij so' adonj. <sup>22</sup> Dan me se ne a'ne' Réj Diose cacun' che'é a doj yuvij ma'. 'O se aj ca'ne' so' suun rihanj sij ta'nij so' se vaa ca'ne' ma'anj cacun' che'é cunudanj yuvij, <sup>23</sup> ne ase vaa aráj cochroj yuvij rihaan so' ro', danj gaa caraa cochroj yuvij rihanj adonj. Dan me se síi na'vej rá caraa cochroj rihanj sij ta'nij Diose me se so' me síi se guun rá caraa cochroj rihaan ndaa Réj Diose síi ca'née manj a.

<sup>24</sup> “Ya ya cataj xna'anj 'unj rihaan soj cuano se vaa síi uno se-nanaj ne amán rá ni'yaj man síi ca'née manj ro', se cuta' Diose cacun' xráá so' ma'. Dan me se daj chihaa mij se cavi' nu' so' ma'. Tananj gaa i'na' so' nu' cavii nu' ca'anj ga Diose adonj. <sup>25</sup> Ya ya cataj xna'anj 'unj rihaan soj cuano se vaa vaa güii, ne nij síi man rihaan chumiij nihánj nij síi cavi' vaa güii ro', ca'mij sij ta'nij Diose rihaan nij so', ne nu' nij síi cunoo nana ca'mij ro', cunuu i'na' ya nimán nij so', ne cuano nihánj me güii a'mij rihaan nij so', sese me rá nij so' cunoo nij so' adonj. <sup>26</sup> 'O se ase vaa vaa i'na' ma'an Diose, ne vaa i'na' taran' nij rasuun 'yaj Diose ro', danj vaa vaa i'na' ma'anj sij ta'nij Diose uún, 'yaj Diose, ne cunuu i'na' yuvij, qui'yáá 'unj, <sup>27</sup> ne 'unj me síi nicaj suun, ne ca'ne' 'unj cacun' che'é yuvij, che'é yan síi ca'née Diose nicaj yu'unj man yuvij mej adonj.

<sup>28</sup> “Se caraya'anj soj nana nihánj ma'. 'O se vaa güii cunoo taran' nij síi cavi' naj rihaan santó se-nanaj,

<sup>29</sup> ne curihanj nij so' rque yo'óo nanj adonj. Dan me se, nij sí qui'yaj se sa' gaa vaa i'na' ro', curihanj nij so', ne cunu i'na' uún nij so' canē nij so' ga Diose adonj. Tzaj ne nij sí qui'yaj se chi'ij ro', curihanj nij so', tzaj ne 'o quiran' ndo'o nij so' sayuun che'é cacun' tumé nij so' nanj adonj. <sup>30</sup> Dan me se a doj ne uun nucuaj ma'anj qui'yaj sunj a ma'. Maan se ase vaa taj xna'anj Réj Diose rihanj ro', veé danj vaa 'yáj gaa a'né' 'unj cacun' che'é nij yuvii, ne 'o nica a'né' 'unj cacun' che'é nij yuvii nanj adonj. 'O se ne 'yáj inanj se me raj qui'yáj ma'. Tananj inanj se ataj xna'anj sí ca'néé manj me se vaa 'yáj adonj.

<sup>31</sup> “Sese orún' 'unj me sí cataj xna'anj rihaan soj daj sij mej, ne taj che'é cataj soj se vaa ya vaa se-nanaj ma'. <sup>32</sup> Tzaj ne vaa yo'ó sí cataj xna'anj daj sij mej, ne ne'én 'unj se vaa so' me sí cataj xna'anj ya che'é 'unj ei.

<sup>33</sup> “Dan me se ca'néé soj sí cu'ni rihaan sí cu'naj Juan che'é rej nari' nij so' se-nanaj sí cu'naj Juan, ne cataj xna'anj so' nanaj ya rihaan nij soj a. <sup>34</sup> (Dan me se ca'vee se ca'mii ve'é yuvii che'ej ca'vee se se ca'mii ve'é yuvii che'ej, taj se 'yaj ma'. Maan se nanj taj 'unj rihaan soj che'é se me raj quinanj soj rihaan sayuun nanj adonj.) <sup>35</sup> Dan me se sí cu'naj Juan ro', ase vaa aga' ya'an vaa so', ne ase vaa ruvi' sa' rihaan yuvii gaa chuguun aga' ya'an yo' ro', danj vaa ruvi' sa' tucuáan ya rihaan soj qui'yaj so' nanj adonj. Tzaj ne nij soj ro', guun rá soj cunō soj se-nanaj so' 'o orá nii, che'é se guun rá soj guun niha' rá soj, qui'yaj se-nanaj so', tzaj ne qui'yaj rma'an soj doj tzin', ne tanáj uún soj se-nanaj so' a.

<sup>36</sup> “Ne xa' 'unj nihánj, tzaj ne sa' doj vaa sí taj xna'anj che'é 'unj rihaan sí cu'naj Juan a. Dan me se vaa suun ca'ne' Réj rihanj se vaa ya quisij suun yo' qui'yáj, ne che'é dan me 'yaj suun 'unj nij suun yo' a. Che'é ma'an suun sa' yo' ca'vee xcaj soj cuentá se vaa sij ca'néé Réj Diose mej adonj. <sup>37</sup> Ne

Réj sí ca'néé manj ro', ma'an so' cataj xna'anj daj sij mej, tzaj ne taj se-nanaj so' cunō soj ma'. Ne ne ne'en soj daj vaa Réj ma'. <sup>38</sup> Ne taj se-nanaj so' nayón nimán soj a ma'. Danj vaa soj, che'é yan ne cuchuman rá soj ni'yaj soj manj sij ca'néé so' rihaan chumii nihánj man adonj. <sup>39</sup> Dan me se nayaa uxrá soj danj Diose, che'é se me rá soj xcaj soj cuentá daj qui'yaj soj ne ca'vee cayáan soj ga Diose nu' cavii nu' ca'anj ei. Ne veé ma'an danj Diose ataj xna'anj che'é 'unj a. <sup>40</sup> Tzaj ne na'vej rá soj ca'na' soj rihanj, yan ca'vee canē soj ga Diose nu' cavii nu' ca'anj qui'yáj ma'.

<sup>41</sup> “Taj se 'yaj sese na'vej rá yuvii ca'mii yuvii nanaj sa' che'ej ma'.

<sup>42</sup> Tzaj ne ne'én 'unj daj vaa rá soj, se vaa ne niha' rá soj ni'yaj soj Diose ma'. <sup>43</sup> Dan me se ca'néé Réj manj ca'naj rihaan chumii nihánj ca'mij se-nanaj Réj Diose rihaan soj, tzaj ne ne aran' rá soj ca'mij rihaan soj ma'. Tzaj ne sese ca'na' me ma'an yo'ó so' ca'mii so' nanaj avii raaj ma'an so', ne ve'é cunō soj se-nanaj so' ei.

<sup>44</sup> Daj chihaa mij se guun nucuaj soj cuchuman rá soj ni'yaj soj manj a ma'. 'O se me rá soj ve'é ca'mii nij tuvi' soj che'é soj, tzaj ne ne nanó rá soj daj qui'yaj soj, ne ve'é ca'mii Diose che'é soj ma'. <sup>45</sup> Se guun rá soj se vaa 'unj me sí cuta' cacun' xráa soj rihaan Réj Diose ma'. Maan se vaa sí cu'naj Moisés, ne nucuaj ndo'o rá soj man so' se vaa ca'vee cavii sa' soj rihaan Diose qui'yaj so', tzaj ne ma'an so' me sí cuta' cacun' xráa soj adonj. <sup>46</sup> 'O se sese ya amán rá soj ni'yaj soj man sí cu'naj Moisés, ne cuchuman rá uún soj ni'yaj soj manj, gaa ne ca'vee ei. 'O se so' me sí cachrón nanaj rihaan yanj nanaj taj xna'anj che'é 'unj adonj. <sup>47</sup> Tzaj ne sese ne amán rá soj nanaj cachrón so' rihaan yanj, gaa ne asa' ca'vee cuchuman rá soj cunō soj se-nanaj ga —taj Jesucristó rihaan nij sí uun chij rihaan nij yuvii israelitá a.

## 6

*Nana nihánj taj xna'anj se vaa go' Jesucristó se chá rihaan 'un' mǐj snó'o a*

<sup>1</sup> Veé dan, ne cavii Jesucristó ca'anj Jesucristó rej xco na lacuaná cu'naj Galilea a. Tiberias cu'naj yo'ó se-chuvii na lacuaná yo' a. <sup>2</sup> Dan me se rij uxrá yuvii canoco' rej xco so', che'é yan aj quene'en nij yuvii nu' nij suun sa' nocoo qui'yaj suun Jesucristó, se vaa nahuun sa' ndo'o síi ran', qui'yaj so' a. <sup>3</sup> Dan me se cavii so' raá quij, ne ca'anj cane so' rihaan yo'óo ga nij síi tucu'yón se-nana so', <sup>4</sup> ne dan me se daj doj güii achiin canuú cha'anj pascuá cha'anj navij rá nij yuvii israelitá a. <sup>5</sup> Dan me se naxcaj Jesucristó rihaan Jesucristó, ne quene'en so' se vaa ca'na' ndo'o yuvii rihaan so', ne cataj so' rihaan síi cu'naj Felipé a:

—Me rej quiraan ní' rachrúun chá taran' nij yuvii nihánj, rá so' ga —taj so', xná'anj so' man síi cu'naj Felipé yo' a.

<sup>6</sup> Danj ca'mii so' rihaan síi cu'naj Felipé, che'é se me rá so' quene'en so' daj cataj síi cu'naj Felipé a. Tzaj ne aj ne'en so' daj qui'yaj ma'an so' nanj adonj.

<sup>7</sup> Dan me se cataj síi cu'naj Felipé rihaan Jesucristó:

—A' sa'anj vaa tu'vee yuvii 'yaj suun tunj yavii se quisij quirí' nij so' doj rachrúun chá nij so' a ma' —taj so' a.

<sup>8</sup> Dan me se 'o síi tucu'yón se-nana so' síi cu'naj Andrés tinúú síi cu'naj Simón Pedró me so' a. Cataj so' rihaan Jesucristó a:

<sup>9</sup> —Nihánj me nicun' 'o xnii, ne nicaj xnii nihánj 'un' guee rachrúun 'núú cebada, ne vij guee xcuaaj nicaj so', tzaj ne asa' ca'vee quisij doj tzin' nihánj chá taran' nij yuvii nihánj ga —taj síi cu'naj Andrés yo' a.

<sup>10</sup> Gaa ne cataj Jesucristó:

—Ca'anj cane nij yuvii rihaan coj chrin', qui'yaj nij soj ei —taj Jesucristó rihaan nij síi tucu'yón se-nana so' a.

Dan me se man uxrá coj chrin' rej yo', ne ca'anj cane nij yuvii rihaan coj chrin' yo', ne 'un' mǐj snó'o me nij so' a.

<sup>11</sup> Dan me se quita'aa Jesucristó rachrúun, ne nago' so' graciá rihaan Diose, ne cuxra' ta'aj so' rachrúun caxrij so' ston nij síi tucu'yón se-nana so', ne nij síi tucu'yón se-nana so' ro', rque' nij so' chá taran' nij síi ne rihaan coj chrin' yo' a. Ne ase vaa qui'yaj so' ga rachrúun ro', danj qui'yaj uún so' ga ne xcuaaj yo', rque' so' nu' se vaa me rá nij yuvii chá nij yuvii yo' a. <sup>12</sup> Gaa quisij caraa rque' nij yuvii, ne cataj Jesucristó rihaan nij síi tucu'yón se-nana so' a:

—Naqui'yaj chre' nij soj se quináj tu'va nij yuvii, ne se guun quirí' uún yo' ma' —taj Jesucristó rihaan nij so' a.

<sup>13</sup> Che'é dan naqui'yaj chre' nij so' nu' se quináj tu'va nij yuvii, ne caraa cunu' chuvij ya scaa, qui'yaj nij xco' nii rachrúun quináj tu'va nij yuvii gaa quisij chá nij yuvii yo' 'un' rachrúun yo' nanj adonj. <sup>14</sup> Dan me se gaa quene'en nij snó'o suun sa' nocoo qui'yaj suun Jesucristó, ne cataj nij so':

—Síi nihánj ro', ya uxrá síi nata' se-nana Diose me so', ne síi na'vij ní' ca'na' ya rihaan chumii nihánj me so' ei —taj nij snó'o yo' a.

<sup>15</sup> Tzaj ne aj ne'en Jesucristó se vaa ca'na' nij so', ne quita'aa nij so' man so', ne cune' nij so' man Jesucristó guun so' síi nicaj suun rey guun chij rihaan nij so', ne che'é dan naxuun so' man so', ne cavii uún orún' so' ca'anj so' quij a.

*Nana nihánj taj xna'anj se vaa cachéé Jesucristó rihaan na a*

<sup>16</sup> Dan me se rej ti'nuu, ne nanij nij síi tucu'yón se-nana Jesucristó tu'va na lacuaná, <sup>17</sup> gaa ne catúj nij so' rihoo, gaa ne cavii nij so' ca'anj nij so' chuman' Capernaum a. Dan me se quisij guun rmi' rihaan na lacuaná yo', ne ataa naman Jesucristó rihaan nij so' a. <sup>18</sup> Ne cavii nana yuvaa, ne uxrá nari' nucuaaj ndo'o na lacuaná



yo', <sup>19</sup> ne dan me se 'un' kilómetro ca'anj nij so', gaa ne quene'en nij so' se vaa chéé Jesucristó rihaan na 'na' so', ne gaa quinichrun' so' rihaan rihoo yo', ne cuchu'vi' nij so' a. <sup>20</sup> Tzaj ne cataj Jesucristó rihaan nij so' a:

—'Unj me yo' ei. Se chu'vi' soj ma' —taj Jesucristó a.

<sup>21</sup> Che'é dan guun niha' uxrá rá nij so', ne nu' catúj Jesucristó rá rihoo, ne nu' cuchí' rihoo tu'va na lacuaná rej vaj nij so' a.

*Nana nihánj taj xna'anj se vaa cataj Jesucristó se vaa ase vaa se chá vaa Jesucristó rihaan nimán ní' a*

<sup>22</sup> Dan me se yo'ó güii me se quene'en nij yuvii quináj rej xco na lacuaná yo' se vaa taj vaj yo'ó rihoo chéé rihaan na rej yo', maan se oruun rihoo catúj nij síi tucu'yón se-nana Jesucristó gaa ca'anj nij so' a. Tzaj ne ne catuú Jesucristó rá rihoo yo' ga nij síi tucu'yón se-nana so', ni'yaj nij yuvii a. Che'é dan ne quene'en uxrá nij yuvii me rej ca'anj Jesucristó a. <sup>23</sup> Tzaj ne ca'na' doj rihoo cavii chuman' Tiberias tu'va na lacuaná nichrun' rej nago' síi 'nij ra'a man ní' graciá rihaan Diose che'é rachruún ne chá nij yuvii rachruún yo' a. <sup>24</sup> Che'é dan gaa quene'en nij yuvii se vaa taj vaj Jesucristó ga nij síi tucu'yón se-nana so' chéé ga nij so', gaa ne catúj nij yuvii rque nij rihoo yo', ne ca'anj nij yuvii chuman' Capernaum, nano' nij yuvii man Jesucristó a. <sup>25</sup> Dan me se nari' nij so' man Jesucristó chuman' Capernaum, gaa ne xná'anj nij so' man so', cataj nij so':

—Me aman ca'ná' so' nihánj, ga maestro' —taj nij yuvii, xná'anj nij so' man Jesucristó a.

<sup>26</sup> Gaa ne cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa nuveé che'e se quene'en soj nij suun sa' nocoo qui'yáá 'unj me nano' soj manj ma'. Maan che'é se chá soj rachruún yo' ne caraa rque soj ro', che'é dan nano' soj manj ei.

<sup>27</sup> “Se guun qui'yaj suun soj che'é inanj se cha soj ma'. 'O se vaa güii, ne quinavij nu' nij rasuun yo' nanj adonj. Che'é dan qui'yaj suun soj che'é se vaa qui'yaj cavii sa' nimán soj, gaa ne gaa i'na' ya nimán soj nu' cavii nu' ca'anj ei. 'Unj sij ca'née Diose nıcaj yu'unj man yuvii me síi rque se sa' yo' rihaan soj ei. 'O se Réj Diose me síi cataj se vaa ca'vee qui'yáj danj che'é soj adonj —taj Jesucristó rihaan nij yuvii a.

<sup>28</sup> Che'é dan cataj nij yuvii rihaan so' a:

—Me suun qui'yaj suun núj, rá Diose ga —taj nij yuvii a.

<sup>29</sup> Gaa ne cataj Jesucristó rihaan nij yuvii:

—Nihánj me suun me rá Diose qui'yaj suun soj, se vaa cuchuman rá soj ni'yaj soj man 'unj sij ca'née so' rihaan soj adonj —taj Jesucristó rihaan nij yuvii a.

<sup>30</sup> Che'é dan cataj nij yuvii rihaan so' a:

—Sese danj vaa, ne me suun sa' nocoo qui'yáá so' quene'en núj, gaa ne cuchuman rá núj ni'yaj núj man so' ga. <sup>31</sup> Dan me se qui'yaj Diose suun sa' nocoo gaa naá, ne xii ní' me se chá nij so' se cu'naj maná gaa chéé nij so' rej tacaan, qui'yaj Diose gaa naá, ne dan me se danj Diose taj se vaa nani se chá rihaan nij so', qui'yaj Diose, ne chá nij so' se chá nani rej xta' adonj —taj nij so' rihaan Jesucristó a.

<sup>32</sup> Che'é dan cataj Jesucristó rihaan nij so' a:

—Ya ya cataj xna'anj 'unj rihaan soj cuano, ne xa' se rqué Moisés chá soj, tzaj ne nuveé se chá 'yaj vaa i'na' yuvii nu' cavii nu' ca'anj me yo' ma'. Xa' se rqué Réj Diose cha soj, tzaj ne se qui'yaj gaa i'na' soj me ya yo' adonj. <sup>33</sup> 'O se se chá rqué Réj Diose rihaan soj mé 'unj sij cavii rej xta', ne 'unj me síi rqué se vaa ca'vee gaa i'na' ya soj sij man rihaan chumii nihánj nu' cavii nu' ca'anj adonj —taj Jesucristó rihaan nij yuvii a.

<sup>34</sup> Che'é dan cataj nij yuvii rihaan Jesucristó a:

—Rque so' se chá yo' rihaan núj nu' cavii nu' ca'anj, señor —taj nij yuvij a.

<sup>35</sup> Gaa ne cataj Jesucristó rihaan nij yuvij a:

—'Unj nihánj me se chá, ne a'vee 'yáj vaa i'na' ya yuvij ei. Sese ca'na' soj rihanj, ne yo'o gaa xej nimán soj, sese ya uxrá amán rá soj ni'yaj soj manj á. <sup>36</sup> Tzaj ne aj cataj 'unj rihaan soj se vaa nda' se quene'en soj manj, tzaj ne ne cuchuman rá soj ni'yaj soj manj a ma'. <sup>37</sup> Xa' nij sí rque Réj Diose manj, tzaj ne ca'na' nij so' rihanj, ne ve'é ca'mij 'unj ga nij so', ne xa' nij sí 'na' rihanj, tzaj ne daj chihaa míj se quirij yanij 'unj man nij so' ma'. <sup>38</sup> Dan me se ca'na' 'unj rihaan chumij nihánj, tzaj ne se guun qui'yáa 'unj ndaa vaa me rá ma'anj qui'yáj ma'. Tananj che'é rej qui'yáa 'unj se vaa me rá Diose sí ca'née mán 'unj qui'yáa 'unj ro', che'é dan nanij 'unj rihaan chumij nihánj adonj. <sup>39</sup> Ne nihánj me se vaa me rá Diose qui'yáj ei. Dan me se na'vej uxrá rá Diose ca'anj ni'ya a 'ó nij sí rque so' manj ma'. Dan me se me rá Diose cunuu i'na' uún taran' nij so', qui'yáj, asa' quisíj güii ca'anj ni'ya chumij nihánj adonj. <sup>40</sup> 'O se nihánj me se vaa me rá Réj Diose ei. Me rá so' yo'o gaa i'na' taran' nij sí amán rá ni'yaj manj nu' cavii nu' ca'anj ga so', ne 'unj me sí qui'yaj cunuu i'na' uún nij so' asa' quisíj güii ca'anj ni'ya chumij nihánj adonj —taj Jesucristó rihaan nij yuvij a.

<sup>41</sup> Dan me se, che'é se cataj Jesucristó se vaa ma'an so' me se chá nanij rej xta' rihaan chumij nihánj, ne che'é dan ca'mii nij sí uun chij rihaan nij yuvij israelitá nana nij ni'yaj nij so' man Jesucristó, <sup>42</sup> cataj nij so':

—Nuveé sij cu'naj Jesús me sí nihánj na'. Nuveé ta'nij sí cu'naj José me so' na'. Nuveé sij ne'en ní' me rej so' me nii so' do' na'. Me che'é guun rá so' cataj so' cuano se vaa me so' sí nanij rej xta' rihaan chumij nihánj ga —taj nij sí uun chij ni'yaj nij so' man Jesucristó a.

<sup>43</sup> Gaa ne cataj Jesucristó rihaan nij so' a:

—Se ca'mii soj nana nij ga tuvi' soj ma'. <sup>44</sup> Dan me se ca'née Réj Diose manj, ne a 'ó yuvij se ca'vee ca'na' rihanj sese nuveé Réj Diose qui'yaj ca'na' so' rihanj a. Ne xa' sí 'na' rihanj, tzaj ne cunuu i'na' uún so' qui'yáj asa' quisíj güii ca'anj ni'ya chumij nihánj adonj. <sup>45</sup> Dan me se vaa 'o sí nata' se-nana Diose cachrón nana nihánj rihaan yanj gaa naá a: “Ne ma'an Diose tucu'yón man taran' nij so' adonj”, taj sí nata' yo' a. Dan me se taran' nij sí uno rihaan Réj ne nari' se-nana Réj me sí 'na' rihanj ei. <sup>46</sup> Taj vaj yo'ó sí quene'en man Réj a ma'. Tzaj ne orún' 'unj me sí quene'en man so', che'é se sij cavii rihaan so' mej adonj.

<sup>47</sup> “Ya ya cataj xna'anj 'unj rihaan soj cuano se vaa sí amán rá ni'yaj manj me se yo'o cayáan so' ga Diose nu' cavii nu' ca'anj ei. <sup>48</sup> Dan me se ase vaa i'na' nee man soj 'yaj se chá soj ro', danj gaa i'na' nimán soj qui'yáa 'unj adonj. <sup>49</sup> Xa' xii soj sí man gaa naá, tzaj ne chá nij so' se cu'naj maná gaa chée nij so' rej tacaan, gaa ne cavi' nij so', <sup>50</sup> tzaj ne vaa 'unj nihánj, ne ase vaa se chá cu'naj maná cavii rej xta' nanij rihaan xii soj vaa 'unj, ne sese chá soj mán 'unj ne daj chihaa míj se cavi' nimán soj ma'. <sup>51</sup> Dan me se 'unj me se chá vaa i'na' ya nanij rej xta', ne sese chá yo'o so' man se chá nanij rej xta' nihánj, ne yo'o gaa i'na' so' ei. Tzaj ne se chá rque 'unj chá yuvij ro', nee manj me yo' ei. Ne yo' me qui'yáj, gaa ne ca'vee gaa i'na' ya cunudanj soj sij man rihaan chumij nihánj ei —taj Jesucristó rihaan nij sí uun chij rihaan nij yuvij israelitá a.

<sup>52</sup> Dan me se nuchruj raa ndo'o nij sí uun chij yo' ga tuvi' nij so', ne xná'anj nij so' man tuvi' nij so', ne:

—Asa' ca'vee rque sí nihánj nee man ma'an so' chá yuvij ga —taj nij so', xná'anj nij so' man tuvi' nij so' a.

<sup>53</sup> Che'é dan cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa sese se chá soj nee manj, ne sese se co'o soj ton manj, ne se ca'vee gaa i'na' nimán soj a ma'.<sup>54</sup> Tzaj ne sí chá nee manj ne co'o ton manj me se yo'o gaa i'na' so' nu' cavii nu' ca'anj, ne asa' quisíj güii ca'anj ni'ya chumii nihánj, ne cunu u i'na' uún so', qui'yáj adonj.<sup>55</sup> Xa' nee manj, tzaj ne nee chá ya ya me yo', ne ton manj me se na co'o ya me yo' ei.<sup>56</sup> Ne sí chá nee manj ne co'o ton manj me se yo'o cayáán so' ga 'unj, ne yo'o cayáán 'unj ga so' chuguanj.<sup>57</sup> Ase vaa vaa i'na' Réé 'unj sí ca'neé mán 'unj rihaan chumii nihánj ro', danj vaa vaa i'na' 'unj, 'yaj Réé 'unj a. Ne xa' sí chá mán 'unj, tzaj ne yo'o gaa i'na' nimán so', qui'yáá 'unj a.<sup>58</sup> 'Unj nihánj me se se chá 'na' rej xta' nanij rihaan yo'óo nihánj mé 'unj ei. Tzaj ne ino uxrá vaa 'unj ga se cu'naj maná chá xij soj gaa naá ei. 'O se cavi' cunudanj nij so' nanj á. Tzaj ne sí chá manj me se yo'o gaa i'na' nimán so' nu' cavii nu' ca'anj adonj.<sup>59</sup> —Nana nihánj me nana tucu'yón Jesucristó rihaan nij yuvii cunu chre' rá ve' tucu'yón nij sí israelitá se-tucuanj Moisés ve' ne chuman' Capernaum a.

*Nana nihánj taj xna'anj daj ca'mii sí tanáj xco man Jesucristó ne daj ca'mii sí noco' raan man Jesucristó a*

<sup>60</sup> Que'ee nij sí tucu'yón se-nana Jesucristó cuno nana nihánj nana ca'mii Jesucristó, gaa ne cataj nij so':

—Sayuun uxrá vaa nana nihánj chuguanj. Daj chihaa míj se cuno ní' doj nana tu'va so' a ma' —taj nij so' rihaan tuvi' nij so' a.

<sup>61</sup> Quene'en ma'an Jesucristó se vaa nana nij yo' ca'mii ta'aj nij sí tucu'yón se-nana so', gaa ne cataj Jesucristó rihaan nij so':

—Guun na'aj soj, qui'yaj nana nihánj ei.<sup>62</sup> Che'é dan sese quene'en soj mán 'unj sij ca'neé Diose nica'j yu'unj man yuvii se vaa cavii uún 'unj quinán' 'unj rej cayáán 'unj asij rque, ne daj guun rá soj ga. 'O se doj a guun na'aj soj che'é se ne cuno soj se-nanaj

chuguanj.<sup>63</sup> Dan me se Nimán Diose me se vaa 'yaj vaa i'na' nimán yuvii ei. Tzaj ne taj se gún' man nee man yuvii qui'yaj yo' gaa i'na' yuvii a ma'. Xa' nana ca'mij rihaan soj, tzaj ne nana cavii Nimán Diose me nana yo', ne ca'vee gaa i'na' nimán soj, qui'yaj se-nanaj ei.<sup>64</sup> Tzaj ne ta'aj soj me sí ne amán rá uno se-nanaj a man adonj —taj Jesucristó rihaan nij sí tucu'yón se-nana so' a.

'O se asij guun che'e Jesucristó tucu'yón so' se-nana so' man yuvii, ne aj ne'en so' me sí me sí cuchumán rá ni'yaj man so', ne aj ne'en so' me sí me sí tacuachén man so' rihaan nij sí taj ri'yunj man so' adonj.<sup>65</sup> Gaa ne cataj uún Jesucristó:

—Che'é se ne cuchuman rá soj ro', che'é dan cataj xna'anj 'unj rihaan soj se vaa a 'ó sí se guun nucuaj ca'na' rihaan 'unj, sese nuveé Réj Diose me sí qui'yaj ca'na' so' rihaan 'unj ma' —taj uún Jesucristó a.

<sup>66</sup> Che'é dan canicaj que'ee nij sí tucu'yón se-nana so', ne ca'ne' rá nij so' ga suun chéé ga Jesucristó a.

<sup>67</sup> Che'é dan xna'anj Jesucristó man chuvij nij sí tucu'yón se-nana so', cataj so':

—Soj do' me rá tanáj manj na' —taj Jesucristó, xna'anj so' man chuvij nij sí tucu'yón se-nana so' a.

<sup>68</sup> Gaa ne cataj sí cu'naj Simón Pedró rihaan so' a:

—Taj yo'óo sí cuchí' núj rihaan, man Señor. 'O se so' me sí a'mii nana qui'yaj gaa i'na' núj rihaan Diose nu' cavii nu' ca'anj,<sup>69</sup> ne amán rá núj ni'yaj núj mán so', ne aj ne'en núj se vaa mé so' sí guee sí ca'neé ma'an Diose rihaan chumii nihánj adonj —taj Simón Pedró rihaan Jesucristó a.

<sup>70</sup> Gaa ne cataj Jesucristó rihaan chuvij nij so' a:

—Dan me se 'unj me sí narii man chuvij nij soj se vaa canoco' soj manj, tzaj ne ase vaa ma'an sí chree vaa yo'o tuvi' soj adonj —taj Jesucristó rihaan chuvij nij so' a.

<sup>71</sup> Nana yo' ca'mii Jesucristó ni'yaj Jesucristó man sí cu'naj Judas ta'nú

sí cu'naj Simón Iscariote a. 'O se sí cu'naj Judas yo', tzaj ne yo'o tuvi' chujij nij sí tucu'yón se-nana Jesucristó me so', tzaj ne me so' sí tacuachén man Jesucristó rihaan nij sí taj ri'yunj man Jesucristó a.

## 7

*Nana nihánj taj xna'anj che'é nana ca'mii Jesucristó ga nij tinúú so' a*

<sup>1</sup> Quisij ca'mii Jesucristó nu' nana dan, gaa ne cachéé Jesucristó estadó Galilea a. 'O se ne ca'vej rá so' cachéé so' estadó Judea, che'é se nano' nij sí uun chij rihaan nij yuvij israelitá man so', ne ticavi' nij so' man Jesucristó, rá nij so' a.

<sup>2</sup> Dan me se daj doj quisij cha'anj navij rá nij yuvij israelitá cha'anj une' nij so' ve' yacataj a. <sup>3</sup> Che'é dan cataj nij tinúú Jesucristó rihaan so' a:

—Cavij so' ca'anj so' estadó Judea, gaa ne quene'en nij sí tucu'yón se-nana so' nij suun sa' nocoo 'yáá so', tinuj. <sup>4</sup> 'O se sese me rá so' qui'yáá so' suun sa' nocoo, ne ca'anj so' rej quene'en nij sí man rihaan chumij nihánj man so' á —taj nij tinúú ma'an Jesucristó rihaan so' a.

<sup>5</sup> 'O se ndaa ma'an nij tinúú Jesucristó ne cuchuman rá ni'yaj man Jesucristó a ma'. <sup>6</sup> Che'é dan cataj Jesucristó rihaan nij so':

—Ataa quisij güii no xcuún 'unj qui'yaj suun 'unj á. Se-suun ma'an soj me se a me ma'an güii ca'vee qui'yaj suun soj se-suun soj ei. <sup>7</sup> Taj che'é quitaj ri'yunj nij sí man rihaan chumij nihánj man soj ma'. 'Unj ro', vaa che'é quitaj ri'yunj nij so', ese 'unj me sí taj xna'anj rihaan nij so' se vaa chi'ii ndo'o vaa 'yaj nij so' adonj. <sup>8</sup> Ca'anj soj cha'anj xraj ei. Xa' 'unj, tzaj ne se ca'anj 'unj cha'anj ma'. 'O se ataa quisij güii qui'yaj sunj nanj adonj <sup>9</sup> —taj Jesucristó rihaan nij so', gaa ne quináj so' estadó Galilea a.

*Nana nihánj taj xna'anj daj qui'yaj Jesucristó gaa canuú cha'anj une' nii ve'yacataj a*

<sup>10</sup> Dan me se gaa quisij cavii nij tinúú Jesucristó ca'anj nij so' cha'anj, gaa ne cavii ma'an Jesucristó ca'anj so' cha'anj uún a. Tzaj ne ca'anj yuve so' a. <sup>11</sup> Che'é dan me nano' nij sí uun chij rihaan nij yuvij israelitá man Jesucristó rej canuú cha'anj yo' a. Ne xná'anj nij so' man tuvi' nij so', cataj nij so':

—Me rej vaj so' ga —taj nij so', xná'anj nij so' man tuvi' nij so' a.

<sup>12</sup> Ne nanó yuve ndo'o nij yuvij cuentó che'é Jesucristó a. Dan me se ta'aj nij yuvij cataj:

—Sí sa' me so' á —taj ta'aj nij yuvij a.

Tzaj ne yo'ó ta'aj nij yuvij cataj:

—Taj ma'. Sí tiha' yu'unj man nij yuvij me so' ei —taj yo'ó ta'aj nij yuvij yo' a.

<sup>13</sup> Tzaj ne a 'ó nij yuvij ne ca'mii ranga' che'é Jesucristó ma'. 'O se cuchu'vi' nij yuvij ni'yaj nij yuvij man nij sí uun chij rihaan nij so' a.

<sup>14</sup> Dan me se gaa anuú cha'anj, ne cavii Jesucristó rá nuvií nocoo, ne tucu'yón so' man nij yuvij a. <sup>15</sup> Che'é dan caráya'anj nij sí uun chij rihaan nij yuvij israelitá, ne cataj nij so':

—Nuveé sij tucu'yón me sí nihánj ma'. Me rej nari' so' se-nana Diose ga —taj nij sí uun chij yo' ni'yaj nij so' man Jesucristó a.

<sup>16</sup> Che'é dan cataj Jesucristó rihaan nij so' a:

—Xa' se-nanaj, tzaj ne nuveé nana cavii raá 'unj me nana nihánj ma'. 'O se se-nana Diose sí ca'néé manj me nana nihánj ei. <sup>17</sup> Dan me se sese me rá yo'o so' cunó so' rihaan Diose, ne quene'en so' se vaa nuveé nana avii raá 'unj me nana tucu'yón 'unj ma'. 'O se quene'en so' se vaa se-nana Diose me nana yo' a. <sup>18</sup> Xa' sí a'mii se-nana ma'an, tzaj ne inanj me rá so' ca'mii sa' yuvij che'é ma'an so', ne me rá so' cavij sa' ma'an so' ei. Tzaj ne sese me rá yo'o so' ca'mii sa' yuvij che'é sí ca'néé man so', ne inanj nana ya che'é sí ca'néé man so' a'mii so', ne ne nano' so' chrej chi'ii ma'. <sup>19</sup> Ya uxrá rqué sí cu'naj Moisés



se-tucuanj so' rihaan soj, tzaj ne a 'ó tuvi' soj na'vej rá qui'yaj tucuáan yo' a ma'. Me che'é nano' soj daj qui'yaj soj, ne cavi' 'unj ga —taj Jesucristó rihaan nij síi uun chij rihaan nij yuvii israelitá a.

<sup>20</sup> Gaa ne cataj nij yuvii rihaan Jesucristó a:

—Nuü nana chree nimán so' á. Me síi me rá ticavi' mán so', rá so' ga —taj nij yuvii rihaan Jesucristó a.

<sup>21</sup> Gaa ne cataj Jesucristó rihaan nij so' a:

—Gaa rque me se orún' suun sa' nocoo qui'yáj, ne caráya'anj taran' nij soj se vaa qui'yáá 'unj suun sa' nocoo güii naránj rá ní' a. <sup>22</sup> Dan me se ya uxrá cataj xna'anj Moisés rihaan ní' se vaa ca'ne' ní' ta'nga' man snó'o che'é rej ca'vee cunu sa' ní' rihaan Diose adonj. Tzaj ne nuveé tucuanj cuchruj ma'an Moisés me yo' ma'. 'O se se-tucuanj xii ní' nij síi man gaa naá me yo' adonj. Ne ndaa güii naránj rá a'ne' soj ta'nga' man snó'o ei. <sup>23</sup> Dan me se che'é se me rá soj qui'yaj soj nu' se-tucuanj Moisés, che'é dan a'vej rá soj cata' ta'nga' man snó'o güii naránj rá soj, tzaj ne me che'é axrij yuvaá soj manj che'é yan cunu sa' nu' nee man yo'q snó'o qui'yáj güii naránj rá soj ga. <sup>24</sup> Se guun xcaj soj cuentá che'é se vaa 'yaj yuvii ni'yaj soj che'é inanj tucuáan nocó' soj ma'. 'O se xcaj soj cuentá daj me rá Diose, ne cunu cuu soj doj, qui'yaj soj ei —taj Jesucristó rihaan nij yuvii a.

<sup>25</sup> Che'é dan cataj ta'aj nij síi ne chuman' Jerusalén:

—Ne sij nihánj, nuveé sij nano' nii ticavi' nii man me so' na'. <sup>26</sup> Ne veé a'mii ranga' so' nihánj, ne a 'ó nana ne a'mii nij so' rihaan so' man asanj. Ya ya síi ca'née Diose tinanii man yuvii rihaan sayuun me so', rá nij xrej ata suun sa' doj na'. <sup>27</sup> Tzaj ne ne'en ní' me rej cavii síi nihánj ei. Tzaj ne taj síi ne'en me rej cavii síi ca'nej Diose tinanii man yuvii rihaan sayuun asa' ca'na' so' man asanj —taj nij síi ne chuman' Jerusalén yo' a.

<sup>28</sup> Che'é dan sca' ndo'o ca'mii Jesucristó, cataj so':

—Ne'en soj manj, ne ne'en soj me rej cavii 'unj ei. Tzaj ne ne ca'na' ma'anj ma'. 'O se ya a'mii síi ca'née manj, tzaj ne ne ne'en uxrá soj man so' a ma'. <sup>29</sup> 'Unj me síi ne'en man so', che'é se cavii 'unj rihaan so', ne so' me síi ca'née manj adonj —taj Jesucristó rihaan nij yuvii a.

<sup>30</sup> Che'é dan nano' nij so' daj qui'yaj nij so' ne quita'aa nij so' man Jesucristó, tzaj ne a 'ó nij so' ne quisij rá quita'aa man so' a ma'. 'O se ataa quisij güii ca'vee qui'yaj nij so' danj man so' a.

<sup>31</sup> Ne que'ee nij yuvii cuchumán rá ni'yaj man so', ne cataj nij síi cuchumán rá ni'yaj man so':

—Ca'vee se ca'na' yo'ó so' cataj so' se vaa tinanii so' man ní' rihaan sayuun, tzaj ne daj chihaa mij se quisij so' qui'yaj so' doj suun sa' nocoo rihaan suun sa' nocoo qui'yaj síi nihánj a ma'. Ya ya sij tinanii man ní' rihaan sayuun me síi nihánj adonj —taj nij yuvii ni'yaj nij so' man Jesucristó a.

<sup>32</sup> Dan me se gaa cuno nij síi fariseo se vaa ca'mii yuve nij yuvii nana dan che'é Jesucristó, gaa ne ca'née nij xrej ata suun nocoo doj ca'née nij síi fariseo man tanuu ca'anj nij tanuu quita'aa nij tanuu man Jesucristó a.

<sup>33</sup> Che'é dan cataj Jesucristó:

—Doj güii cayáan 'unj ga nij soj, ne cavii 'unj quinán' 'unj rihaan síi ca'née manj 'na' 'unj nanj ei. <sup>34</sup> Nano' soj manj, tzaj ne se nari' soj manj a ma'. Ne se guun nucuj soj cuchí' soj rej cayáan 'unj a ma' —taj Jesucristó a.

<sup>35</sup> Che'é dan nij síi uun chij rihaan nij yuvii israelitá cataj rihaan tuvi' nij so' a:

—Me rej ca'anj síi nihánj, ne se nari' ní' man so' ga. Ca'anj so' rihaan tuvi' ní' síi ne chiháan nij yuvii yanj na'. Tucuyón so' se-nana so' rihaan nij yuvii yanj na'. <sup>36</sup> 'O se cataj so' nana nihánj se vaa: “Nano' soj manj, tzaj ne se nari' soj manj a ma'. Ne se guun

nucuaꝝ soꝝ cuchíꝝ soꝝ rej cayáán 'unꝝ a ma'". Me che'é tu'va so' danꝝ, rá soꝝ ga —taj nij síꝝ uun chij yo', xná'anꝝ nij so' man tuvi' nij so' a.

<sup>37</sup> Dan me se daj yo'ó güii navij cha'anꝝ nocoo sa' ndo'o yo', ne güii yo' canicun' Jesucristó, ne cataꝝ so':

—Sese ase vaa síꝝ nacoo ndo'o na vaa soꝝ, ne ca'na' soꝝ rihanꝝ, ne rqueꝝ na achiin ya man soꝝ á. <sup>38</sup> Xa' síꝝ amán rá ni'yaj manꝝ, tzaj ne quiríꝝ so' se vaa taj danꝝ Diose rihaan ní', ne dan me se ase vaa 'o chraá sa' ndo'o nuu na sa' inanj ro', danꝝ gaa se sa' cunuú nimán síꝝ amán rá ni'yaj manꝝ, ne ca'vee gaa i'na' nimán so' adonꝝ. <sup>39</sup> —Danꝝ taj Jesucristó, ca'mii so' che'é Nimán Diose cunuú nimán nij síꝝ cuchumán rá ni'yaj man so' a. 'O se ataa ca'na' Nimán Diose rihaan yuviꝝ, ese ataa quisij güii cavi' so' rihaan rcutze a.

<sup>40</sup> Che'é dan ta'aj nij yuviꝝ cuno nana nihánꝝ cataꝝ:

—Ya ya sij nata' se-nana Diose gaa naá sij ca'na' uún rihaan chumiꝝ nihánꝝ me síꝝ nihánꝝ nanꝝ á —taj ta'aj nij yuviꝝ a.

<sup>41</sup> Yo'ó ta'aj nij yuviꝝ cataꝝ:

—Sij ca'née Diose tinanii man ní' rihaan sayuun me síꝝ nihánꝝ ei —taj yo'ó ta'aj nij so' a.

Tzaj ne yo'ó ta'aj nij yuviꝝ cataꝝ:

—Xa' síꝝ ca'nej Diose tinanii man ní' rihaan sayuun, tzaj ne nuvee sij cavii estadó Galilea me so' ma'. <sup>42</sup> 'O se danꝝ Diose taj se vaa ta'níꝝ ta'nij síꝝ no síꝝ cu'naj David síꝝ cane gaa naá me síꝝ ca'nej Diose, ne sij cavii chiháán síꝝ cu'naj David chuman' Belén me uún so' adonꝝ —taj yo'ó ta'aj nij yuviꝝ uún a.

<sup>43</sup> Che'é dan guun vij ca'mii nij yuviꝝ, ni'yaj nij yuviꝝ man Jesucristó a.

<sup>44</sup> Ne guun rá ta'aj nij so' quita'aa nij so' man Jesucristó, tzaj ne taj vaj síꝝ quisij rá quita'aa man so' a ma'.

<sup>45</sup> Che'é dan canicaj nij tanuu ca'anꝝ uún nij tanuu rihaan nij xrej ata suun nocoo doj do', rihaan nij síꝝ fariseo do', gaa ne cataꝝ nij xrej do', nij síꝝ fariseo do', rihaan nij tanuu:

—Me che'é ne ca'na' Jesucristó ga soꝝ, qui'yaj soꝝ ga —taj nij so', xná'anꝝ nij so' man nij tanuu yo' a.

<sup>46</sup> Gaa ne cataꝝ nij tanuu:

—Tzaj ne cunaj uxrá vaa nana a'mii so', ne taj vaj yo'ó yuviꝝ ne'en ca'mii nana a'mii so' a ma' —taj nij tanuu yo' a.

<sup>47</sup> Che'é dan cataꝝ nij síꝝ fariseo rihaan nij tanuu a:

—Tiha' yu'unꝝ so' man soꝝ do' nanꝝ ei. <sup>48</sup> 'O se a 'ó nij síꝝ uun chij do', a 'ó nij síꝝ fariseo do', ne cuchuman rá se vaa sij ca'née Diose me so' a ma'. <sup>49</sup> Ne xa' nij yuviꝝ, tzaj ne ne ne'en nij yuviꝝ se-tucuanꝝ Moisés, ne inanj sayuun quiran' nij yuviꝝ yo', qui'yaj Diose chuguanꝝ —taj nij síꝝ fariseo rihaan nij tanuu yo' a.

<sup>50</sup> Dan me se nicun' síꝝ cu'naj Nicodemo ga nij so', ne yo'ó tuvi' nij so' me so', ne síꝝ ca'anꝝ nanꝝ cuentó ga Jesucristó rej nij gaa rque doj me so', ne cataꝝ so':

<sup>51</sup> —Tzaj ne se-tucuanꝝ Moisés taj se vaa ne nó xcúún ní' ca'ne' ní' cacun' che'é yo'ó so', sese ataa cunꝝ ní' nana a'mii so' ne sese ataa xcaꝝ ní' cuentá daj 'yaj so' ma' —taj síꝝ cu'naj Nicodemo rihaan yo'ó nij síꝝ fariseo yo' a.

<sup>52</sup> Gaa ne cataꝝ nij so' rihaan síꝝ cu'naj Nicodemo a:

—Me che'é me rá so' ca'mii sa' so' che'é Jesucristó ga. 'O se sij cavii estadó Galilea mé so' ga so' na'. Tucuyón so', ne xcaꝝ so' cuentá se vaa a 'ó síꝝ nata' se-nana Diose ne avii estadó Galilea, 'yaj Diose ma' —taj nij síꝝ fariseo rihaan síꝝ cu'naj Nicodemo yo' a. <sup>53</sup> Dan me se cavii nij so', ne quinan' 'o 'o nij so' tucua' nij so' a.

## 8

<sup>1</sup> Tzaj ne cavii Jesucristó xraá quiꝝ cu'naj Quiꝝ man Chruun Olivó a.

*Nana nihánꝝ taj xna'anꝝ daj ca'mii Jesucristó ga nij síꝝ me rá go'yahij man chana tumé cacun' a*

<sup>2</sup> Dan me se rej síꝝ güii me se ca'anꝝ uún Jesucristó rá nuvíꝝ nocoo a. Gaa ne cuchíꝝ cunudanꝝ nij yuviꝝ rihaan

so', ne ca'anj quitaj so' chruun xlá, ne tucu'yón so' man nij yuvii yo' a. <sup>3</sup> Veé dan, ne ca'na' nij sí naqui'yaj cuu se-tucuanj Moisés rihaan yuvii ca'na' nij sí fariseo do', ne nicaj nij so' man 'o chana a. Ne chana nicaj nij so' me se aj nari' nii man chana yo' gaa cotoj no' ga snó'o, tzaj ne nuveé nica no' me snó'o cotoj ga no' a. Che'é dan quita'aa nij so' man no', ne nicaj nij so' man no' ca'na' nij so' rihaan Jesucristó, ne cachrón nij so' man chana tanuu ma'an nij so' ga Jesucristó a. <sup>4</sup> Gaa ne cataj nij so' rihaan Jesucristó a:

—Chana nihánj me se maan orá cotoj no' ga yo'ó snó'o, ne nari' nii man no', ne quita'aa nii man no', maestro. <sup>5</sup> Dan me se se-tucuanj Moisés taj se vaa no xcuún ní' go' ní' yahij man chana vaa danj ndaa se cavi' no', taj tucuaán yo' nanj á. Che'é dan me, daj qui'yaj ní', rá so' ga —taj nij so', xná'anj nij so' man Jesucristó a. <sup>6</sup> 'O se guun rá nij so' ca'mii Jesucristó yo'o nana vaa nij che'é se-tucuanj Moisés, gaa ne ca'vee cuta' nij so' cacun' xráá Jesucristó che'é nana ca'mii so' a.

Dan me se ca'anj cane ruj Jesucristó, ne cachrón ra'a so' letrá rihaan yo'ó a. <sup>7</sup> Tzaj ne yo'o tirquee nij so' xná'anj nij so' man so' a. Che'é dan canicun' caya uún so', ne cataj so' rihaan nij so' a:

—Sese danj me rá soj, ne ca'vee, tzaj ne a me ma'an 'o soj taj a doj cacun' tumé ro', ca'vee go' yahij man no' asino yaan ei —taj Jesucristó rihaan nij so', tzaj ne aj ne'en Jesucristó se vaa taran' nij so' atá cacun' a.

<sup>8</sup> Gaa ne ca'anj cane ruj uún Jesucristó, ne cachrón uún so' letrá rihaan yo'ó yo' a.

<sup>9</sup> Veé dan, gaa ne guun na'aj nij so' gaa cuno nij so' se-nana Jesucristó, ne nayón nij so' chrej, ne ca'anj nij so' a. Dan me se ndaa 'o 'o nij so' nayón chrej, ne asino yaan ca'anj nij sí cachij doj, gaa ne canoco' nij sí tachruu doj xcó nij so', ne ca'anj cunudanj nij so' nanj adonj. Ndaa

sij, gaa ne quináj uun Jesucristó, ne nicun' orún' chana yo' rihaan so' a. <sup>10</sup> Gaa ne canicun' caya uún Jesucristó, ne cataj so' rihaan chana yo':

—Ca'anj taran' nij so', nanj nocoj. Me rej vaj nij sí cuta' cacun' xráá so' ga. A 'ó nij so' ne quisij rá cavi' so' a na' —taj Jesucristó, xná'anj so' man chana yo' a.

<sup>11</sup> Gaa ne cataj chana yo':

—Taj vaj a 'ó sí me rá ca'mii danj, a man Señor —taj chana yo' rihaan Jesucristó a.

Gaa ne cataj Jesucristó rihaan no' a:

—A 'unj se cataj se vaa qui'yaj nii sayuun mán so' a ma'. Dan me se ca'anj so', ne se qui'yáá so' a doj cacun' rej rihaan so' a ma' —taj Jesucristó rihaan chana yo' a.

*Nana nihánj taj xna'anj se vaa cataj Jesucristó se vaa ya vaa se-nana so' a*

<sup>12</sup> Gaa ne cataj uún Jesucristó rihaan nij xrej atá suun nocoj doj do', rihaan nij sí fariseo do' a:

—Ase vaa ya'an chuguun vaa 'unj rihaan soj sij man rihaan chumii nihánj adonj. Dan me se sí noco' manj ro', se cachéé so' rej rmi' ma'. 'Unj ro', me ya'an chuguun cachee ga so', ne xcaj so' cuentá me rej vaj so', qui'yáj, ne che'é dan gaa i'na' ya nimán so' nu' cavii nu' ca'anj adonj —taj Jesucristó no nij so' a.

<sup>13</sup> Che'é dan cataj nij sí fariseo rihaan so' a:

—Tzaj ne inanj ma'an so' me sí taj xna'anj che'é ma'an so' á. Nuveé nana ya me nana a'mii so' che'é ma'an so' a ma' —taj nij sí fariseo rihaan Jesucristó a.

<sup>14</sup> Gaa ne cataj Jesucristó rihaan nij so' a:

—Nda' se ma'anj me sí a'mii che'ej, tzaj ne ya vaa se-nanaj ei. 'O se 'unj me sí ne'en me rej cavij, ne 'unj me sí ne'en me rej ca'anj 'unj ei. Ne xa' soj, tzaj ne ne ne'en soj me rej cavij ne ne'en soj me rej ca'anj 'unj a ma'. <sup>15</sup> Xa' soj, tzaj ne inanj uta' soj cacun' xráá yuvii che'é inanj se vaa ruvi' rihaan soj nanj ei. Tzaj ne

'unj me se ne utá' 'unj cacun' xráa a 'ó yuvii ma'. <sup>16</sup> Tzaj ne ca'vee se xcaj 'unj cuentá che'é yuvii daj vaa yuvii, tzaj ne ya xcaj 'unj cuentá che'é yuvii ei. Dan me se nuveé orún' 'unj me síi xcaj cuentá che'é yuvii ma'. 'O se vaa Réj síi ca'née manj rihaan chumii nihánj, ne so' me síi racuíj manj adonj. <sup>17</sup> Ne se-tucuanj Moisés tucuáan noco' soj me se nana yo' taj se vaa sese cuyaan vaa nana a'mii vij roj so', ne ya vaa se-nana roj so', taj nana yo' ei. <sup>18</sup> Dan me se 'unj me síi taj xna'anj che'é ma'anj, ne taj xna'anj Réj síi ca'née manj uún adonj —taj Jesucristó rihaan nij so' a.

<sup>19</sup> Che'é dan xná'anj nij so' man Jesucristó, cataj nij so':

—Me rej ne rée so' ga —taj nij so' a.

Gaa ne cataj Jesucristó:

—Ne ne'en uxrá soj manj do', man Réj do' ma'. 'O se sese ne'en ya soj manj, ne ne'en soj man Réj uún adonj —taj Jesucristó rihaan nij so' a.

<sup>20</sup> Nu' nihánj me nana tucu'yón Jesucristó gaa canicun' so' rá nuvií nocoj rej rqué yuvii sa'anj rihaan Diose a. Ne taj vaj yuvii quita'aa man so' a ma'. 'O se ataa quisij güii ca'vee qui'yaj nii sayuun man Jesucristó nanj adonj.

*Nana nihánj taj xna'anj se vaa cataj Jesucristó se vaa daj chihaa mój se guun nucuaj nij síi uun chij rihaan nij yuvii israelitá cuchí' nij so' rihaan so' a ma'*

<sup>21</sup> Che'é dan cataj uún Jesucristó rihaan nij síi uun chij rihaan nij yuvii israelitá a:

—'Unj nihánj me se cavii 'unj ca'anj 'unj, gaa ne nano' soj manj, tzaj ne asa' cavi' soj, ne yo'o quitaj nu' cacun' tumé soj xráa soj, ne se guun nucuaj soj cuchí' soj rej ca'anj 'unj ma' —taj Jesucristó rihaan nij so' a.

<sup>22</sup> Che'é dan xná'anj nij síi uun chij rihaan nij yuvii israelitá man tuvi' nij so', cataj nij so':

—Ticavi' so' man ma'an so', rá soj na'. Che'é dan cataj so' se vaa se guun nucuaj ní' cuchí' ní' rej ca'anj so', rá

soj na' —taj nij so', xná'anj nij so' man tuvi' nij so' a.

<sup>23</sup> Gaa ne cataj Jesucristó rihaan nij so':

—Dan me se xa' soj, tzaj ne nanj sij man rihaan chumii nihánj me soj, ne 'unj, tzaj ne sij cavii rej xta' mej nanj á. <sup>24</sup> Che'é dan cataj xna'anj 'unj rihaan soj se vaa asa' cavi' soj, ne yo'o quitaj nu' cacun' tumé soj xráa soj nanj ei. 'O se sese se cuchumán rá soj se vaa Diose mé 'unj, ne asa' cavi' soj, ne yo'o quitaj nu' cacun' tumé soj xráa soj nanj adonj —taj Jesucristó rihaan nij so' a.

<sup>25</sup> Che'é dan xná'anj nij so' man Jesucristó, cataj nij so':

—Me síi mé so' ga —taj nij so', xná'anj nij so' man Jesucristó a.

Gaa ne cataj Jesucristó rihaan nij so' a:

—Aj cataj xna'anj 'unj rihaan soj asino yaan me sij mej ei. <sup>26</sup> Vaa ndo'o nana no xcúnj ca'mij che'é soj, ne no xcúun uxraj ya ca'ne' 'unj cacun' che'é soj ei. Dan me se síi ca'née manj, tzaj ne so' me síi a'mii ya uxrá, ne inanj nana ca'mii so' cunoj me nana taj xna'anj 'unj rihaan soj sij man rihaan chumii nihánj adonj —taj Jesucristó rihaan nij so' a.

<sup>27</sup> Tzaj ne ne quene'en nij so' se vaa ca'mii Jesucristó che'é Rej so' Diose síi ca'née man Jesucristó a ma'. <sup>28</sup> Che'é dan cataj Jesucristó rihaan nij so' a:

—Asa' quisij cavii 'unj xta' qui'yaj soj, gaa ne xcaj ya soj cuentá se vaa ya ya sij ca'née Diose nicaj yu'unj man yuvii mej ei. Ne ne 'yáa 'unj se vaa avii inanj raa ma'anj ma'. 'O se a'mii 'unj ndaa vaa tucu'yón Réj manj adonj. <sup>29</sup> Ne so' me síi ca'née manj rihaan soj, ne yo'o nicun' so' ga 'unj, ne a doj ne tanáj yaníj so' manj a ma'. 'O se 'yáa 'unj se inanj me rá ma'an so' qui'yaj adonj —taj Jesucristó rihaan nij so' a.

<sup>30</sup> Gaa quisij ca'mii Jesucristó nana vaa danj, gaa ne cuchumán rá que'ee nij síi uun chij rihaan nij yuvii israelitá ni'yaj nij so' man Jesucristó a.



*Nana nihánj taj xna'anj daj ca'mii Jesucristó ga nij sí uun chij rihaan nij yuvií israelitá sí cuchumán rá ni'yaj man so' a*

<sup>31</sup> Che'é dan cataj Jesucristó rihaan nij sí uun chij rihaan nij yuvií israelitá sí cuchumán rá ni'yaj man so' a:

—Sese yo' o canoco' soj se-nanaj, ne sij ya ya tucuyón se-nanaj me soj, <sup>32</sup> ne quene'en soj nu' nana ya, ne quinanií soj rihaan suun uun mozó, qui'yaj nana ya yo' chuguanj —taj Jesucristó rihaan nij so' a.

<sup>33</sup> Gaa ne cataj nij so' rihaan Jesucristó:

—'O se ta'ní ta'nij si'no sí cu'naj Abraham sí cane gaa naá me núj, ne daj chihaa míj ne guun núj mozó a ma'. Me che'é cataj so' se vaa quinanií núj rihaan suun uun mozó ga —taj nij so', xna'anj nij so' man Jesucristó a.

<sup>34</sup> Gaa ne cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa sí 'yaj cacun' ro', me sí uun mozó rihaan cacun' yo' ei. <sup>35</sup> Ne xa' mozó, tzaj ne se ca'vee guun chij mozó, ne se ca'vee cane so' nu' cavii nu' ca'anj ma'. Ne xa' ta'ní sí tucua ve', tzaj ne so' me sí ca'vee cane rá ve' nu' cavii nu' ca'anj adonj. <sup>36</sup> Che'é dan me sese tinanií ta'ní Diose man soj rihaan suun uun mozó, ne ya ya nuveé sij uun mozó me soj a ma'.

<sup>37</sup> “Aj ne'enj se vaa ta'ní ta'nij si'no sí cu'naj Abraham me soj á. Tzaj ne nano' uxrá soj daj qui'yaj soj ne cavi' 'unj ei. Danj 'yaj soj che'é rej na'vej rá soj nari' soj canoco' soj se-nanaj ei. <sup>38</sup> Dan me se a'mii 'unj inanj se vaa quene'enj qui'yaj Réj a. Tzaj ne nij soj me sí 'yaj ndaa vaa cataj rej soj rihaan soj adonj —taj Jesucristó rihaan nij so' a.

<sup>39</sup> Gaa ne cataj nij so' rihaan Jesucristó a:

—Xii núj me sí cu'naj Abraham gaa naá adonj —taj nij so' a.

Gaa ne cataj Jesucristó rihaan nij so' a:

—Sese ya ya ta'ní ta'nij si'no sí cu'naj Abraham me soj, ne qui'yaj soj ndaa vaa qui'yaj sí cu'naj Abraham yo' asuun tzaj a. <sup>40</sup> Tzaj ne cuano nihánj me se nano' soj daj qui'yaj soj ne cavi' 'unj, ne 'unj me sí cataj xna'anj rihaan soj nu' nana ya cataj xna'anj Réj Diose rihanj adonj. Dan me se ino uxrá vaa 'yaj soj ga sí cu'naj Abraham adonj. <sup>41</sup> Maan se 'yaj soj inanj se vaa 'yaj rej soj nanj á —taj Jesucristó rihaan nij so' a.

Che'é dan cataj nij so' rihaan Jesucristó a:

—Nuveé ta'nij cacun' me núj ma'. 'O se oruun Rej núj, ne Diose me so' nanj á —taj nij so' a.

<sup>42</sup> Gaa ne cataj Jesucristó rihaan nij so' a:

—Sese Diose me Rej soj, ne cunuu 'ee rá soj manj se danj ei. 'O se 'unj me sí cavii rej nicun' Diose, ne ca'ná' 'unj nihánj chuguanj. Dan me se ne ca'na' ma'anj nihánj ma'. 'O se so' me sí ca'néé manj ca'naj nihánj adonj.

<sup>43</sup> “Che'é se na'vej rá soj cunó soj se-nanaj, che'é dan sayuun uxrá vaa nana a'mij rihaan soj adonj. <sup>44</sup> 'O se ta'ní sí chree me soj, ne me rá soj qui'yaj soj inanj ndaa vaa me rá rej soj sí chree qui'yaj soj adonj. Ne xa' so', tzaj ne sí ticavi' man yuvií me so' asij guun che'e chumií nihánj, ne daj chihaa míj ne ne'en so' ca'mii nica so' nana ya ma'. 'O se ne aran' rá so' ca'mii so' nana ya a man adonj. Danj inanj vaa so', a'mii ne so', che'é se sí ne inanj me so', ne sí tucuyón man yuvií ca'mii ne yuvií me uun so' adonj.

<sup>45</sup> “Ne xa' 'unj, tzaj ne che'é se nana ya a'mij rihaan soj, che'é dan ne amán rá soj uno soj se-nanaj a ma'. <sup>46</sup> A 'ó tuvi' soj se ca'vee quirii cacun' cuta' xraj a ma'. Inanj nana ya a'mij rihaan soj ei. Me che'é ne cuchuman rá soj cunó soj se-nanaj ga. <sup>47</sup> 'O se sí noco' ya man Diose me sí uno se-nana Diose adonj. Tzaj ne nuveé sij noco' man Diose me soj a ma'. Che'é dan ne uno soj a man

adonj —taj Jesucristó rihaan nij sí uun chij rihaan nij yuvij israelitá a.

<sup>48</sup> Gaa ne cataj nij sí uun chij rihaan nij yuvij israelitá a:

—Ya uxrá vaa nana ca'mii núj se vaa nuveé tuví' núj mé so' a ma'. 'O se síi cavii estadó Samaria mé so' chuguanj. Nuú nana chree nimán so' ei —taj nij so' rihaan Jesucristó a.

<sup>49</sup> Gaa ne cataj Jesucristó:

—Taj vaj nana chree nuú nimanj ma'. 'O se aráj cochróo 'unj rihaan Réj Diose, tzaj ne ne aráj cochroj soj rihanj a ma'. <sup>50</sup> Ne 'yaj suun 'unj che'é yan cataj yuvij se vaa sij sa' mej ma'. Tzaj ne vaa Diose, ne so' me síi me rá cataj yuvij se vaa sij sa' mé 'unj, ne so' me síi ca'ne' cacun' che'é yuvij adonj.

<sup>51</sup> Ya ya cataj xna'anj 'unj rihaan soj cuano se vaa sese cunō soj se-nanaj, ne daj chihaa míj se cavi' soj a ma' —taj Jesucristó a.

<sup>52</sup> Che'é dan nij síi uun chij rihaan nij yuvij israelitá cataj rihaan so' a:

—Cuanō nihánj me se ne'en ya núj se vaa nuú nana chree nimán so' á. 'O se cavi' síi cu'naj Abraham cavi' nij síi nata' se-nana Diose gaa naá cavi', ne nihánj me taj so' se vaa sese cunō núj se-nana so', ne daj chihaa míj se cavi' núj, taj so' man asanj. <sup>53</sup> Dan me se gaa naá me se cavi' xii núj síi cu'naj Abraham, ne sij sa' doj mé so' rihaan so', rá so' na'. Ne cavi' nij síi nata' se-nana Diose uún a. Daj sij mé so', rá so' ga —taj nij so' rihaan Jesucristó a.

<sup>54</sup> Gaa ne cataj Jesucristó rihaan nij so' a:

—Sese cataj 'unj se vaa sij sa' me ma'anj, ne taj yu'vee nó se-nanaj a ma'. Tzaj ne vaa Réj, ne so' me síi taj se vaa sa' 'yaj adonj. Dan me se Diose me Réj, ne nij soj me síi taj se vaa nocō' soj man so', <sup>55</sup> tzaj ne ne ne'en uxrá soj man so' a ma'. Tzaj ne 'unj me síi ne'en man so' adonj. Dan me se sese cataj 'unj se vaa ne ne'enj man so', ne tuví' soj síi ne mej nanj á. Tzaj ne ya ya ne'enj man so', ne nocō' 'unj se-nana so' chuguanj.

<sup>56</sup> “Dan me se guun niha' uxrá rá xii soj síi cu'naj Abraham che'é se

quene'en so' se vaa vaa güii quene'en so' se vaa ca'na' 'unj rihaan chumij nihánj a. Dan me se quene'en so' se vaa ca'na' 'unj, gaa ne guun niha' ya uxrá rá so' ei —taj Jesucristó rihaan nij so' a.

<sup>57</sup> Che'é dan nij síi uun chij rihaan nij yuvij israelitá cataj rihaan Jesucristó a:

—Ataa quisij so' vij chihaa chí' yo' a. Asa' a'vee taj so' se vaa quene'en so' man Abraham ga —taj nij so', xna'anj nij so' man Jesucristó a.

<sup>58</sup> Gaa ne cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa asij ataa ca'ngaa síi cu'naj Abraham, ne aj nej nanj adonj —taj Jesucristó rihaan nij so' a.

<sup>59</sup> Che'é dan quita'aa nij so' yahij, ne go' nij so' man Jesucristó, rá nij so' a. Tzaj ne curihanj yuve so' rá nuvií nocōo yo', ne ca'anj so' a. Dan me se maan tanuu sca'núj nij so' cachén Jesucristó, ca'anj so' a.

## 9

*Nana nihánj taj xna'anj se vaa naxra' rihaan 'o síi tuchrii, qui'yaj Jesucristó a*

<sup>1</sup> Dan me se cavii Jesucristó ca'anj so', gaa ne quene'en so' 'o síi tuchrii a. Dan me se síi tuchrii yo' me se tuchrii so' asij ca'ngaa so' a. <sup>2</sup> Gaa ne xna'anj nij síi tucu'yón se-nana Jesucristó man Jesucristó, cataj nij so':

—Me che'é tuchrii síi nihánj, ga man maestro'. Ma'an so' qui'yaj cacun' na'. Ase rej so' qui'yaj cacun' xa' —taj nij so', xna'anj nij so' man Jesucristó a.

<sup>3</sup> Gaa ne cataj Jesucristó:

—Nuveé ma'an so', nuveé rej so' ga nii so' do', me síi tumé cacun' ma'. Maan se Diose me rá quene'en ní' daj qui'yaj Diose che'é so' adonj. <sup>4</sup> 'O se nō xcúún ní' qui'yaj suun ní' se-suun síi ca'neé manj rihaan chumij nihánj adonj. Ase vaa rej ranga' vaa yo' yaj, ne ca'vee qui'yaj suun ní' yaj ei. Tzaj ne quisij güii ca'ne' rá ní', ne ase vaa rej ni ro', gaa güii yo', ne se ca'vee

qui'yaj suun ní' doj a ma'. <sup>5</sup> Tzaj ne cuano nihánj me se vaj 'unj rihaan chumií nihánj, ne ase vaa ya'an chuguun ro', danj vaa 'unj rihaan chumií nihánj adonj —taj Jesucristó rihaan nij sí tucu'yón se-nana so' a.

<sup>6</sup> Quisíj ca'mii so' danj, gaa ne quirii talúj so' rihaan yo'óó, gaa ne qui'yaj so' doj sigui' man yo'óó yo', ne caxríj so' sigui' yo' rihaan sí tuchrii yo' a.

<sup>7</sup> Gaa ne cataj so' rihaan sí tuchrii yo' a:

—Ca'anj so' na'nu' so' rihaan so' rá na Siloé á —taj Jesucristó rihaan so' a.

Dan me se cuyaán vaa nana “Siloé” yo' ga nana “rasuun ca'née nii man” a.

Veé dan me se ca'anj sí tuchrii yo', ne na'nu' so' rihaan so' rá na yo', gaa ne canicaj so' ca'na' uún so', ne curuvi' rihaan so' a.

<sup>8</sup> Dan me se nij sí yanj nichrun' yan yanj so' do', nij sí aj ne'en man so' gaa tuchrii so' do', cataj nij so':

—Ne sí nihánj me sí cane cachíin caridad gaa rque, rá soj na' —taj nij so' ni'yaj nij so' man sí naxra' rihaan yo' a.

<sup>9</sup> —Danj asanj. Veé ya so' ei —taj ta'aj nij so' a.

Ne yo'ó ta'aj nij so' cataj:

—Taj ma'. Maan se ase ni'yaj guee sí cachíin caridad ro', danj ni'yaj guee sí nihánj, tzaj ne nuveé so' ma' —taj yo'ó ta'aj nij so' a.

Tzaj ne ma'an sí naxra' rihaan yo' cataj:

—'Unj me sí cachíin caridad yo' ei —taj so' a.

<sup>10</sup> Che'é dan xná'anj nij yuvii man so', cataj nij yuvii:

—Daj qui'yáá so', ne ca'vee naxra' rihaan so' ga —taj nij yuvii, xná'anj nij so' man sí tuchrii yo' a.

<sup>11</sup> Gaa ne cataj so':

—Sí cu'naj Jesucristó ro', qui'yaj sigui', ne caxríj so' sigui' rihanj, gaa ne cataj xna'anj so' rihanj se vaa ca'anj 'unj na'nu' 'unj rihanj rá na Siloé a. Gaa ne gaa quisíj ca'anj na'nu' 'unj rihanj rá na yo', ne naruvi' rihanj

nánj á —taj sí naxra' rihaan yo' rihaan nij yuvii a.

<sup>12</sup> Gaa ne xná'anj nij yuvii man so', cataj nij yuvii:

—Me rej vaj so' cuano ga —taj nij yuvii, xná'anj nij yuvii man sí tuchrii yo' a.

—Ne ne'enj me rej vaj so' cuano a ma' —taj sí tuchrii yo' rihaan nij yuvii a.

*Nana nihánj taj xna'anj se vaa ca'maan rá nij sí fariseo ni'yaj nij so' man sí naxra' rihaan yo' a*

<sup>13</sup> Dan me se ca'anj nicaj nii man sí naxra' rihaan yo' rihaan nij sí fariseo a. <sup>14</sup> Dan me se güii naránj rá nij yuvii israelitá me güii qui'yaj Jesucristó sigui' ne naxra' rihaan sí tuchrii yo' qui'yaj Jesucristó a. <sup>15</sup> Che'é dan xná'anj uún nij sí fariseo man sí naxra' rihaan yo' daj qui'yaj so' ne naxra' rihaan so' a.

Gaa ne cataj sí naxra' rihaan yo':

—Qui'yaj so' sigui', ne caxríj so' rihanj, gaa ne na'núj rihanj, ne cuano nihánj ruvi' rihanj nánj á —taj so' rihaan nij sí fariseo a.

<sup>16</sup> Che'é dan cataj ta'aj nij sí fariseo:

—Nuveé sij ca'née Diose rihaan ní' me sí qui'yaj naxra' rihaan sí nihánj a ma'. 'O se 'yaj suun so' güii no xcúun ní' naraan rá ní' adonj —taj ta'aj nij sí fariseo yo' a.

Tzaj ne yo'ó ta'aj nij so' cataj:

—Tzaj ne nuveé sij tumé cacun' me so' a ma'. 'O se nij sí tumé cacun' me se daj chihaa míj se guun nucuj nij sí tumé cacun' qui'yaj nij so' suun sa' nocoo ndaa vaa qui'yaj sí qui'yaj naxra' rihaan sí nihánj a adonj —taj yo'ó ta'aj nij sí fariseo yo' a.

Dan me se cuxra' ta'aj nij sí fariseo man nij so', ne ino guun rá nij so' ga tuvi' nij so' ni'yaj nij so' man Jesucristó a. <sup>17</sup> Che'é dan cataj uún nij so' rihaan sí naxra' rihaan yo' a:

—Daj uun rá ma'an so' che'é sí qui'yaj naxra' rihaan so' ga —taj nij sí fariseo, xná'anj nij so' man sí naxra' rihaan yo' a.

Ne cataj so':

—Sij nata' se-nana Diose me so', rá yá 'unj adonj —taj sí naxra' rihaan yo' che'é Jesucristó a.

<sup>18</sup> Tzaj ne ne cuchuman rá nij sí uun chij rihaan nij yuvij israelitá se vaa ya ya tuchrii me so' gaa rque ne naxra' rihaan so' a. Che'é dan ca'née nij so' nana se vaa ca'na' rej so' do', nii so' do', ga sí naxra' rihaan yo' rihaan nij so' a. <sup>19</sup> Veé dan cuchí' roj so', gaa ne xná'anj nij sí uun chij rihaan nij yuvij israelitá man roj so', cataj nij so':

—Ya ya ta'níi roj soj me sí nihánj na'. Ya ya tuchrii me so' gaa ca'ngaa so' na'. Asa' ca'vee naxra' rihaan so' cuano, rá roj soj ga —taj nij so', xná'anj nij so' man roj nica so' a.

<sup>20</sup> Gaa ne cataj roj so':

—Ta'nij ya rój me sí nihánj, ne tuchrii ya me so' asij ca'ngaa so', <sup>21</sup> tzaj ne ne ne'en uxrá rój asa' ca'vee naxra' rihaan so' cuano a ma'. Ne ne ne'en uxrá rój me sí qui'yaj naxra' rihaan so' a ma'. Xna'anj soj man so' á. 'O se sí aj nocoo me so', ca'mii so' che'é ma'an so' nanj á —taj roj so' a.

<sup>22</sup> Danj ca'mii roj nica rej sí naxra' rihaan yo' do', nii so' do', che'é se cuchu'vi' roj so' ni'yaj roj so' man nij sí uun chij rihaan nij yuvij israelitá a. Dan me se aj guun ya ca'mii nij sí uun chij rihaan nij yuvij israelitá se vaa sese cataj yo' o so' se vaa sij ca'née Diose tinanii man yuvij rihaan sayuun me Jesucristó, ne quirii nij so' xe' man sí a'mii danj sca'núj nij yuvij israelitá a. <sup>23</sup> Che'é dan cataj rej sí naxra' rihaan do', nii so' do', se vaa sí aj nocoo me so', ne xná'anj nij so' man ma'an so' a.

<sup>24</sup> Che'é dan nacúun uún nij so' man sí naxra' rihaan yo', ne cataj nij so' rihaan so' a:

—Ve'é cataj yá so' rihaan Diose daj quirán' so' á. 'O se aj ne'en núj se vaa xa' snó'o ca'mii ga so', tzaj ne sij tumé cacun' me so' ei —taj nij so' rihaan sí naxra' rihaan yo' a.

<sup>25</sup> Che'é dan cataj sí naxra' rihaan yo':

—Ne ne'en uxraj sese sij tumé cacun' me so' ma'. Maan se orún' rasuun ne'én 'unj se vaa gaa rque, ne sí tuchrii mej, tzaj ne cuano nihánj me se ruvi' rihanj adonj —taj sí naxra' rihaan yo' a.

<sup>26</sup> Che'é dan xná'anj nij so' man so', cataj nij so':

—Ne xa' sí ca'mii ga so', tzaj ne daj qui'yaj so', gaa ne naxra' rihaan so' qui'yaj so' ga —taj nij so', xná'anj nij so' man so' a.

<sup>27</sup> Gaa ne cataj sí naxra' rihaan yo' rihaan nij so' a:

—Aj cataj xna'anj 'unj rihaan soj, tzaj ne ne cunō soj a ma'. Me che'é me rá soj cataj xna'anj uún 'unj rihaan soj ga. Guun ma'an soj sí tucuyón se-nana so', rá soj na' —taj sí naxra' rihaan yo' rihaan nij so' a.

<sup>28</sup> Gaa ne nij ca'mii nij so' ga sí naxra' rihaan yo', ne cataj nij so':

—Ma'an so' me sí tucuyón se-nana so', ne xa' núj, tzaj ne sij tucuyón se-nana Moisés me núj ei. <sup>29</sup> Ne'en núj se vaa ca'mii ma'an Diose ga sí cu'naj Moisés, tzaj ne ne ne'en núj me rej cavii sí ca'mii ga so' a ma' —taj nij so' rihaan sí naxra' rihaan yo' a.

<sup>30</sup> Gaa ne cataj so' rihaan nij so' a:

—Niha' uxrá vaa se-nana soj chiha'. Ne ne'en soj me rej cavii so', tzaj ne sí nacuchra' rihanj me so' nanj adonj. <sup>31</sup> 'O se ne'en ní' se vaa ne uno Diose rihaan nij sí tumé cacun' a ma'. Tzaj ne sese aráj cochroj ní' rihaan Diose, ne sese 'yaj ní' se vaa me rá Diose, ne qui'yaj Diose se vaa achín ni'yaj ní' rihaan Diose nanj á. <sup>32</sup> Dan me se sí tuchrii mej gaa ca'ngaj, ne nu' ca'na' me se ne ca'na' nana rihaan ní' se vaa nacuchra' yo' o so' rihaan sí vaa danj a ma'. Tananj orún' so' me sí qui'yaj danj ei. <sup>33</sup> Dan me se sese nuveé sij ca'née Diose rihaan ní' me so', ne daj chihaa míj se guun nucaj so' qui'yaj so' danj ma' —taj sí naxra' rihaan yo' rihaan nij so' a.

<sup>34</sup> Gaa ne cataj nij so' rihaan so' a:

—Nanj sí tumé cacun' mé so' asij ca'ngaa so' ei. Ne nó xcúun so'



tucu'yón so' a 'ó nana rihaan núj a ma' —taj nij so' rihaan so' a.

Gaa ne quirii nij so' man so' xe' a. <sup>35</sup> Dan me se cuchii' nana rihaan Jesucristó se vaa quirii nij so' man síi naxra' rihaan yo' xe' a. Che'é dan nano' Jesucristó man so', gaa ne cataj Jesucristó rihaan so' a:

—So' me síi amán rá ni'yaj man síi ca'néé Diose nıcaj yu'unj man yuviı na' —taj Jesucristó rihaan síi naxra' rihaan yo' a.

<sup>36</sup> Gaa ne cataj so':

—Ne me síi me síi ca'néé Diose nıcaj yu'unj man yuviı, señor'. Cataj xna'anj so' noj, gaa ne cuchuman raj ni'yaj man so' ei —taj síi naxra' rihaan yo' rihaan Jesucristó a.

<sup>37</sup> Gaa ne cataj Jesucristó rihaan so':

—Aj quene'én so' man so', ne 'unj sij a'mii ga so' cuano me so' adonj —taj Jesucristó rihaan so' a.

<sup>38</sup> Gaa ne cataj so':

—Cuanó nihánj me se chumán raj ni'yaj mán so', Señor —taj so' a.

Gaa ne canicun' ruj so' rihaan Jesucristó a. <sup>39</sup> Gaa ne cataj Jesucristó:

—Ca'ná' 'unj rihaan chumiı nihánj che'é se no xcúún 'unj ca'ne' 'unj cacun' che'é yuviı adonj. Dan me se xa' nij síi ne ne'en, tzaj ne quene'én nij so', qui'yáj, ne xa' nij síi guun rá se vaa aj quisıj xcaj nij so' cuentá, tzaj ne ase vaa síi aráán rihaan ro', danj gaa nij so' se vaa se ca'vee xcaj nij so' cuentá ma' —taj Jesucristó a.

<sup>40</sup> Dan me se cachéé ta'aj nij síi fariseo ga Jesucristó, ne cuno nij so' nana ca'mii Jesucristó a. Che'é dan xná'anj nij so' man Jesucristó, cataj nij so':

—Ne ase vaa síi aráán rihaan vaa núj, rá so' na' —taj nij so', xná'anj nij so' man Jesucristó a.

<sup>41</sup> Gaa ne cataj Jesucristó rihaan nij so' a:

—Sese sij ne ne'en me soj, ne taj vaj cacun' tumé soj ma'. Tzaj ne cuano nihánj me se cataj soj se vaa aj ne'en soj a. Che'é dan yo'q tumé soj cacun'

adonj —taj Jesucristó rihaan nij síi fariseo yo' a.

## 10

*Nana nihánj taj xna'anj se vaa ase vaa síi tumé matzinj ro', danj vaa Jesucristó, tumé so' man ní' a*

<sup>1</sup> Gaa ne cataj uún Jesucristó rihaan nij so' a:

—Ya ya cataj xna'anj 'unj rihaan soj cuano se vaa xa' síi ne atúj ta'yaa rej nuu nij matzinj ne avii raa chingá rej nuu nij xo', tzaj ne síi ituu me so' adonj. <sup>2</sup> Tzaj ne síi atúj ta'yaa ro', so' me síi daan matzinj yo' adonj. <sup>3</sup> Dan me se x'núj ta'yaa rihaan so', 'yaj síi tumé ta'yaa, gaa ne uno nij matzinj se-nana so', gaa ne nacúún so' man nij matzinj a'mii so' se-chuviı 'o 'o nij xo', gaa ne 'anj nıcaj so' man nij xo' xe' adonj. <sup>4</sup> Gaa quisıj quirii so' man nij xo' xe', ne noco' nij matzinj xcó so', che'é se u'yón nij xo' se-nana so' ei. <sup>5</sup> Tzaj ne yo'ó yuviı me se se canoco' nij xo' man yo'ó so', maan se cunanj nij xo' rihaan yo'ó so', che'é se ino ca'mii yo'ó so' xréé nij xo', ne se cu'yón uxrá nij xo' se-nana yo'ó so' a ma' —taj Jesucristó a.

<sup>6</sup> Dan me se ase vaa 'o cuentó vaa nana nihánj nana ca'mii Jesucristó rihaan nij so', tzaj ne ne xcaj nij so' cuentá me taj nana nihánj a ma'. <sup>7</sup> Che'é dan cataj uún Jesucristó:

—Ya ya cataj xna'anj 'unj rihaan soj cuano se vaa ase vaa ta'yaa rej atúj nij matzinj ro', danj vaa 'unj a. <sup>8</sup> Dan me se xa' taran' nij síi ca'na' gaa rque doj, tzaj ne ase vaa síi ituu vaa nij so' a. Tzaj ne ne cuno nij matzinj rihaan nij so' a ma'. <sup>9</sup> Dan me se ase vaa ta'yaa yo' vaa 'unj, ne síi atúj rej nicun' 'unj ro', so' me síi amán rá ni'yaj manj, ne quinaniı so' rihaan sayuun, ne ve'é catuu so', ne ve'é curihanj so', ne nari' so' coj chrın' cha so' nanj adonj.

<sup>10</sup> “Xa' síi ituu, tzaj ne me inanj rá so' qui'yaj ituu so' matzinj do', ticavi' so' matzinj do', tinavij so' matzinj do' ei. Che'é dan atúj so' rej nuu nij matzinj a. Tzaj ne 'unj me se ca'ná'

'unj che'é se me rá 'unj yo'ó gaa i'na' nij xo', ne ve'é uxrá cayáán nij xo', qui'yáj chuguanj.

11 “Ne 'unj ro', me síi daan ya ya nij matzinj, ne tumé sa' yá 'unj man nij matzinj, ne ca'nej nimanj cavij che'é nij xo' adonj. 12 Xa' mozó, tzaj ne nuveé sij daan matzinj me so' ma'. Sij 'yaj canaán sa'anj uun me so', ne che'é dan sese ne'en so' xcuu ca'yánj ca'nu', ne chu'vi' so', ne tanáj so' matzinj yo', ne unánj so' a. Gaa ne tanáj ma'an so' man nij matzinj, gaa ne quita'aa ca'yánj yo' man nij matzinj, ne ticha'nuu ca'yánj yo' man nij xo' nanj adonj. 13 Danj 'yaj mozó yo', che'é se mozó uun me so', ne ne rihuun rá so' sese quiran' nij matzinj sayuun ma'.

14 “Ne xa' 'unj, tzaj ne sij tumé sa' man nij matzinj mej, ne ne'enj man nij matzinj nocó' manj, ne ne'enj nij xo' manj ei. 15 Dan me se ne'en Réj Diose manj, ne ne'enj man Réj, ne ase vaa 'unj ga Réj ro', danj vaa daán 'unj matzinj gaj chuguanj. Ne a'neé nimanj cavij che'é nij xo' adonj. 16 Ne vaa doj daán 'unj matzinj uún, tzaj ne nuvi' nij xo' rej nuu matzinj nihánj ma'. Ne vaa che'é ca'na' yo'ó matzinj yo' uún, qui'yáj, ne cunó' nij xo' se-nanaj, gaa ne cunuu chre' nij xo' ga matzinj nihánj, gaa ne cutumé 'unj man cunudanj nij xo' adonj.

17 “Dan me se ca'neé nimanj cavij, ne cunuu i'na' uún 'unj, ne che'é dan 'ee rá Réj Diose manj adonj. 18 Taj vaj síi 'yaj fuerzá manj cavij ma'. 'O se ma'anj a'neé nimanj cavij nanj á. Dan me se no' xcúnj ca'nej nimanj cavij, ne no' xcúnj cunuu i'na' uún 'unj adonj. Nihánj me suun ca'ne' Réj Diose rihanj nanj adonj —taj Jesucristó rihaan nij so' a.

19 Gaa ne cuxra' ta'aj uún nij síi uun chij rihaan nij yuvij israelitá man nij so', gaa cuno nij so' nana yo' a. 20 Dan me se ta'aj nij so' cataj:

—Nuu nana chree nimán so', ne snúu so' nanj á. Taj che'é cunó' soj

se-nana so' ma' —taj ta'aj nij so' rihaan tuvi' nij so', ni'yaj nij so' man Jesucristó a.

21 Gaa ne yo'ó ta'aj nij so' cataj:

—Nuveé nana chree nuú nimán síi nihánj a ma'. 'O se se guun nucuj síi nuu nana chree nimán nacuchra' so' rihaan síi tuchrii a ma' —taj yo'ó ta'aj nij so' a.

*Nana nihánj taj xna'anj se vaa guun rá nij síi uun chij rihaan nij yuvij israelitá go' nij so' yahij man Jesucristó a*

22 Güii dan me se canuú cha'anj che'é nuvi' nocoo chuman' Jerusalén, ne yavii ayuu yu've' me yo' a. 23 Gaa ne chéé Jesucristó rá chingá cu'naj Corredor Salomón rá nuvi' nocoo yo', 24 ne che'é dan cunuu chre' nij síi uun chij rihaan nij yuvij israelitá, ne yo'ó tucuchriin nij so' nu' anicaj man Jesucristó a. Gaa ne cataj nij so':

—Ndaa aman me quisij güii guun ya ya rá núj ni'yaj núj mán so' ga. 'O se cataj xna'anj yá yá so' rihaan núj sese ya sij ca'neé Diose tinanii man yuvij rihaan sayuun me yá so' ei —taj nij so' rihaan Jesucristó a.

25 Gaa ne cataj Jesucristó rihaan nij so' a:

—Aj cataj xna'anj 'unj rihaan soj, tzaj ne na'vej rá soj cuchuman rá soj a ma'. Ne xa' suun sa' nocoo 'yáá 'unj che'é Réj Diose, tzaj ne ma'an nij suun sa' nocoo yo' taj xna'anj daj sij mej adonj. 26 Tzaj ne ne cuchuman rá soj ni'yaj soj manj man asanj. 'O se nuveé daan 'unj matzinj me soj a ma'. 27 Xa' daán 'unj matzinj, tzaj ne uno nij xo' se-nanaj, ne ne'enj man nij xo', ne nocó' nij xo' xcoj a. 28 Gaa ne cunuu i'na' nij xo' cayáán nij xo' ga Diose nu' cavii nu' ca'anj, qui'yáá 'unj, ne daj chihaa mij se cavi' nij xo' a ma'. Ne taj vaj síi ca'nee man nij xo' ra'aj ma'. 29 'O se Réj Diose me síi rqué man nij xo' rihanj, ne sij uun chij ya me so' rihaan cunudanj, ne che'é dan taj vaj síi guun nucuj ca'nee man nij xo' ra'a Réj Diose a ma'. 30 'O se ase vaa orún' yuvij vaa 'unj ga Réj adonj —taj Jesucristó rihaan nij so' a.

<sup>31</sup> Gaa ne quita'aa uún nij síi uun chij rihaan nij yuvií israelitá yahij go' nij so' man Jesucristó a.

<sup>32</sup> Gaa ne cataj Jesucristó rihaan nij so' a:

—Quisíj qui'yaj uxraj suun sa' nocoo quene'en nij soj, ne guun nucaáj qui'yáj danj, qui'yaj Réj Diose, ne che'é me suun sa' nocoo me rá soj go' soj yahij manj ga —taj Jesucristó, xna'anj so' man nij so' a.

<sup>33</sup> Gaa ne cataj nij síi uun chij rihaan nij yuvií israelitá:

—Se go' núj yahij mán so' che'é suun sa' nocoo qui'yáa so' a ma'. 'O se go' núj yahij mán so' che'é se ca'mii so' nana nij che'é Diose adonj. Dan me se nanj yuvií uun mé so', ne me che'é cataj so' se vaa Diose mé so' ga —taj nij so' rihaan Jesucristó a.

<sup>34</sup> Gaa ne cataj Jesucristó:

—Maan se vaa nana no rihaan yanj no tucuaán nocoo soj, ne nana ca'mii ma'an Diose me nana yo', ne dan me se cataj Diose: “Unj me síi cataj xna'anj se vaa diose me soj á”, taj Diose rihaan nij síi ca'mii se-nana so' gaa naá a. <sup>35</sup> Dan me se sese ma'an Diose cataj se vaa nij síi ca'mii se-nana so' me ma'an uún diose, gaa ne daj chihaa mij se ca'vee tanáj xco ní' se-nana Diose nana no rihaan yanj gaa ma'. <sup>36</sup> Ne veé dan me ca'ne' Diose suun guee rihanj, ne ca'née so' manj rihaan chumii nihánj ne maan che'é se cataj 'unj se vaa ta'nij Diose mej, che'é dan cataj soj se vaa nana nij ca'mij che'é Diose á. Taj che'é ca'mii nij soj danj, raj ma'. <sup>37</sup> 'O se sese ne 'yaj suun 'unj se-suun Réj Diose, ne ca'vee ca'ne' rá soj ga suun amán rá ni'yaj manj chuguanj. <sup>38</sup> Tzaj ne sese ya 'yaj suun 'unj se-suun Réj Diose, ne ca'vee se ne amán rá soj ni'yaj soj man ma'anj, tzaj ne vaa che'é cuchuman rá soj ni'yaj soj man nij suun sa' nocoo qui'yáj ei. Ndaa síj, gaa ne xcaj soj cuentá, gaa ne yo'oc quene'en soj se vaa ne Réj Diose gaj, ne nej ga Réj Diose uún adonj —taj Jesucristó a.

<sup>39</sup> Che'é dan guun rá uún nij so' quita'aa nij so' man so' a. Tzaj ne quinanii so' rihaan nij so' a.

*Nana nihánj taj xna'anj daj guun rá nij síi cuchumán rá ni'yaj man Jesucristó a*

<sup>40</sup> Gaa ne cavii uún Jesucristó ca'anj so' rej rej tu'va chraá cu'naj Jordán ndaa rej cuta' ne síi cu'naj Juan man yuvií gaa chéé so' a. Gaa ne guun raan so' rej yo' a. <sup>41</sup> Gaa ne cuchi' uxrá yuvií rihaan so', ne cataj nij yuvií se vaa síi cu'naj Juan síi cuta' ne man yuvií me se a doj suun sa' nocoo ne qui'yaj so', tzaj ne quisíj ya nu' nana cataj xna'anj síi cu'naj Juan che'é Jesucristó a. Danj cataj nij yuvií, ni'yaj nij yuvií nij suun sa' nocoo qui'yaj Jesucristó a. <sup>42</sup> Gaa ne cuchumán rá que'ee nij so' ni'yaj nij so' man Jesucristó gaa vaj so' rej yo' a.

## 11

*Nana nihánj taj xna'anj che'é se vaa guun gaa cavi' síi cu'naj Lázaro gaa ne cunuu i'na' uún so', qui'yaj Jesucristó a*

<sup>1</sup> Dan me se vaa 'o síi ran', ne síi cu'naj Lázaro me so', ne síi ne chuman' Betania me so' a. Ne chuman' Betania yo' me se chiháan chana cu'naj Mariá ga chu'vij Mariá chana cu'naj Marta me chuman' Betania yo' a. <sup>2</sup> Ne chana cu'naj Mariá yo' me se no' me chana caxríj casté gun' daj tacóo síi 'nij ra'a man ní', ne yuvé raá ma'an no' tanacoo no' tacóo so' a. Dan me se ra'vij no' me síi cu'naj Lázaro síi ran' yo' a. <sup>3</sup> Dan me se ca'née roj ra'vij síi cu'naj Lázaro yo' nana rihaan Jesucristó, cataj roj no': “Xa' síi 'ee rá so' man, tzaj ne ran' so', a Señor”, vaa nana ca'née roj no' rihaan Jesucristó a. <sup>4</sup> Dan me se cuchi' nana yo' rihaan Jesucristó, gaa ne cataj so':

—Nuveé che'e rej yo'oc cavi' síi cu'naj Lázaro me quiran' so' a ma'. 'O se quiran' so' che'é rej ve'é doj xcaj yuvií cuentá che'é Diose adonj. Dan me se ve'é doj xcaj yuvií cuentá che'é ma'anj ta'nij Diose, che'é se quiran'

sí cu'naj Lázaro yo' nanj adonj —taj Jesucristó rihaan nij síí nata' nana yo' rihaan so' a.

<sup>5</sup> Ne Jesucristó me se 'ee ndo'o rá Jesucristó man chana cu'naj Marta do', man chu'vij no' chana cu'naj Mariá do', man síí cu'naj Lázaro do' a. <sup>6</sup> Dan me se gaa cuno Jesucristó nana se vaa ran' síí cu'naj Lázaro, ne ne cavii ra'yanj so' ca'anj so' a ma'. 'O se guun raan so' yavij güii rej vaj so' a. <sup>7</sup> Dan me se cachén yavij güii yo', gaa ne cataj Jesucristó rihaan nij síí tucu'yón se-nana so' a:

—Cavii ní' ca'anj uún ní' estadó Judea ei —taj so' rihaan nij so' a.

<sup>8</sup> Gaa ne cataj nij síí tucu'yón se-nana so' rihaan so' a:

—Cuanó nihánj me se guun ndo'o rá nij síí uun chij rihaan nij yuvi israelitá go' nij so' yahij mán so' ne cavi' so' á. Se guun ca'anj so' yo' ma' —taj nij so' rihaan Jesucristó a.

<sup>9</sup> Gaa ne cataj Jesucristó:

—Ne'en soj se vaa chuvij orá ranga' rihaan chumii nihánj 'o 'o güii, ne dan me se sese cachee yo'o so' rej ranga', ne se naxru' so' ma'. 'O se curuvi' sa' rihaan so', qui'yaj güii chuguun rihaan chumii nihánj adonj. <sup>10</sup> Tzaj ne sese cachee yo'o so' rej nij, ne naxru' so', che'é se taj vaj ya'an chuguun nicaj so' adonj —taj Jesucristó a. <sup>11</sup> Dan me se quisíj ca'mii so' danj, gaa ne cataj uún so'— Ne xa' tuvi' ní' síí cu'naj Lázaro, tzaj ne otoj so' ei. Tzaj ne ca'anj yaj, che'é rej narii 'unj nej rihaan so' a —taj Jesucristó rihaan nij síí tucu'yón se-nana so' a.

<sup>12</sup> Che'é dan cataj nij síí tucu'yón se-nana so' rihaan so':

—'O se sese otoj so', ne cunuu sa' ma'an so', Señor —taj nij so' rihaan Jesucristó a.

<sup>13</sup> Dan me se nana dan ca'mii Jesucristó che'é se aj cavi' síí cu'naj Lázaro, tzaj ne nij síí tucu'yón se-nana Jesucristó me se guun rá nij so' se vaa ya ya otoj uun Lázaro, taj Jesucristó, rá nij so' a. <sup>14</sup> Che'é dan ca'mii nica Jesucristó rihaan nij so', cataj so':

—Aj cavi' síí cu'naj Lázaro, <sup>15</sup> ne guun niha' rá 'unj se vaa nuvi' 'unj ne ga so' gaa cavi' so' a. 'O se che'é se cavi' so' ro', che'é dan cuchuman doj rá soj ni'yaj soj manj adonj. Tzaj ne cavii ní' ca'anj ní' rej naj so' ei —taj Jesucristó rihaan nij so' a.

<sup>16</sup> Che'é dan cataj síí cu'naj Tomás Dídimó rihaan yo'ó nij síí tucu'yón se-nana Jesucristó:

—Cavii ní' ca'anj ní' ga so', gaa ne cavi' ní' ga so' á —taj so' ni'yaj so' man Jesucristó a.

<sup>17</sup> Veé dan me se cuchi' Jesucristó chuman' Betania, gaa ne cataj xna'anj nii rihaan so' se vaa aj quisíj ca'anj güii cachin' nii man síí cu'naj Lázaro rque yu'uj yuvej a. <sup>18</sup> Dan me se nichrun' naj chuman' Betania ga chuman' Jerusalén, ne orún' va'núj kilómetro naj chuman' Jerusalén yo' a. <sup>19</sup> Ne aj cavii que'ee nij yuvi israelitá chuman' Jerusalén, ne cuchi' nij so' rihaan chana cu'naj Marta do', rihaan chana cu'naj Mariá do', che'é rej se nanó rá roj no', che'é se aj cavi' ra'vij roj no' a.

<sup>20</sup> Dan me se gaa cuno chana cu'naj Marta se vaa ca'na' Jesucristó, ne curihanj no' nari' tuvi' no' ga Jesucristó, tzaj ne chana cu'naj Mariá me se quináj no' rá ve' yo' a. <sup>21</sup> Gaa ne cataj chana cu'naj Marta rihaan Jesucristó a:

—Sese cané so' nihánj, ne ne cavi' ra'vij asuun saj, man Señor. <sup>22</sup> Tzaj ne cuanó nihánj me se ne'enj se vaa me ma'an rasuun cachinj so' rihaan Dióse, ne qui'yaj so' nanj á —taj chana cu'naj Marta rihaan Jesucristó a.

<sup>23</sup> Gaa ne cataj Jesucristó rihaan no' a:

—Cunuu i'na' uún ra'vij so' —taj so' rihaan no' a.

<sup>24</sup> Gaa ne cataj chana cu'naj Marta rihaan so':

—Aj ne'enj se vaa asa' quisíj güii ca'anj ni'ya chumii nihánj, ne cunuu i'na' uún so' ga yo'ó nij yuvi cunuu i'na' uún ei —taj no' rihaan Jesucristó a.



<sup>25</sup> Gaa ne cataj Jesucristó rihaan no' a:

—Xa' 'un̄j, tzaj ne sij 'yaj nuu i'na' uún yuvii mej, ne 'un̄j me síi qui'yaj gaa i'na' yuvii cayáan yuvii ga Diose nu' cavii nu' ca'an̄j adon̄j. Ne xa' síi amán rá ni'yaj manj, tzaj ne ca'vee se cavi' so', tzaj ne yo'o gaa i'na' nimán so' chuguan̄j. <sup>26</sup> Che'é se amán rá so' ni'yaj so' manj, ne che'é dan vaa i'na' nimán so', ne daj chihaa m̄j se cavi' nimán so' a ma'. Amán rá so' nana nihánj na' —taj Jesucristó, xná'an̄j so' man chana cu'naj Marta yo' a.

<sup>27</sup> Gaa ne cataj no':

—Chumán raj, Señor. Dan me se aj cuchumán raj se vaa sij ca'neé Diose tinanii man núj rihaan sayuun mé so', ne ta'nij Diose mé so', ne ca'ná' so' rihaan chumii nihánj a —taj no' rihaan Jesucristó a.

<sup>28</sup> Dan me se quisíj ca'mii no' danj, gaa ne ca'an̄j no', ne canacúun yuve no' man chu'vij no' chana cu'naj Mariá, cataj no':

—Aj ca'na' maestró, ne nacúun so' mán so' a —taj no' rihaan chana cu'naj Mariá a.

<sup>29</sup> Ne gaa cuno chana cu'naj Mariá nana yo', gaa ne ra'yan̄j cavii no', ne ca'an̄j no' rej nicun' Jesucristó a.

<sup>30</sup> Dan me se ataa catū Jesucristó rque chuman' yo', ne nicun' so' rej nari' tuvi' chana cu'naj Marta ga so' a.

<sup>31</sup> Dan me se nij yuvii israelitá yuvii cane rá ve' nanó cuentó ga chana cu'naj Mariá me se quene'en nij so' se vaa ra'yan̄j canicun' no' ne curihan̄j no' xe', ne canoco' nij so' xcó no', ne curihan̄j nij so' xe' a. 'O se guun rá nij so' se vaa ca'an̄j chana cu'naj Mariá rihaan yu'uj yuvej che'é rej ta'vee no', rá nij so' a.

<sup>32</sup> Dan me se gaa cuhi' chana cu'naj Mariá rej nicun' Jesucristó, gaa ne quene'en no' man so', gaa ne canicun' ruj no' rihaan Jesucristó, gaa ne cataj no':

—Sese cané so' nihánj, ne ne cavi' ra'vij asuun saj, man Señor —taj no' rihaan Jesucristó a.

<sup>33</sup> Dan me se quene'en Jesucristó se vaa ta'vee no', se vaa ta'vee nij yuvii israelitá ca'na' ga no' do', gaa ne quinanó ndo'o rá so', <sup>34</sup> gaa ne cataj so':

—Me rej cachin' soj man so' ga —taj so', xná'an̄j so' man nij so' a.

Gaa ne cataj nij so' rihaan so' a:

—Ca'an̄j ní', gaa ne quene'én so' á —taj nij so' rihaan so' a.

<sup>35</sup> Gaa ne ta'vee Jesucristó a. <sup>36</sup> Che'é dan cataj nij yuvii israelitá rihaan tuvi' nij so' a:

—Ni'yaj soj ei. 'O se ta'vee so', che'é se 'ee uxrá rá so' ni'yaj so' man síi cavi' yo' a —taj nij yuvii ni'yaj nij yuvii man Jesucristó a.

<sup>37</sup> Gaa ne ta'aj nij yuvii cataj:

—'O se sij ne'en nacuchra' rihaan síi tuchrii me síi nihánj á. Che'é dan uun nucuaj so' naqui'yaj sa' so' man síi cu'naj Lázaro, ne sese cane so' nihánj, ne ne cavi' síi cu'naj Lázaro asuun saj ma' —taj ta'aj nij yuvii yo' a.

<sup>38</sup> Dan me se quinanó uún rá Jesucristó, ne cuhi' so' rej cachin' nii man síi cu'naj Lázaro yo' a. Dan me se yu'uj yuvej me yo', ne caráan yahij rihaan yu'uj yo' a. <sup>39</sup> Gaa ne cataj Jesucristó:

—Naxuun soj yahij rihaan yu'uj á —taj Jesucristó a.

Gaa ne cataj ra'vij síi cavi' chana cu'naj Marta rihaan so':

—Tzaj ne gun' ri'yuj man so' yaj, Señor. 'O se quisíj ca'an̄j ya güii naj so' nan̄j adon̄j —taj no' rihaan so' a.

<sup>40</sup> Gaa ne cataj Jesucristó rihaan no' a:

—Aj cataj xna'an̄j 'un̄j rihaan so' se vaa sese cuchuman rá so' ni'yaj so' manj, gaa ne quene'én so' se vaa nucuaj uxrá Diose á —taj Jesucristó rihaan chana cu'naj Marta yo' a.

<sup>41</sup> Che'é dan naxuun nij so' yahij yo' a. Gaa ne naxcaj Jesucristó rihaan so', ne cataj so':

—Guun ni'yaj ní' se vaa cunó so' se-nanaj, Ataj Chij. <sup>42</sup> Aj ne'enj se vaa nigan̄j unó so' se-nanaj, tzaj ne a'mij nana nihánj che'é rej cunó nij

yuvii nicun' nihánj gaj a. 'O se me raj cuchuman rá nij yuvii se vaa so' me sí ca'neé manj rihaan chumii nihánj nanj adonj —taj Jesucristó, cachíin ni'yaj so' rihaan Diose a.

<sup>43</sup> Quisíj cataj so' danj, gaa ne nu-cuaj ndo'o caguáj so', cataj so':

—Lázaro. Cavii so' ca'na' so' nihánj ei —taj so', caguáj so' rihaan sí cu'naj Lázaro yo' a.

<sup>44</sup> Gaa ne curihanj sí cavi' yo' rque yu'uj, ne nacutáj yatzíj nu' man so', ne caráán yatzíj rihaan so' uún a. Gaa ne cataj Jesucristó rihaan nij yuvii a:

—Nache soj man so', ne cachee so' ca'anj so' á —taj Jesucristó rihaan nij yuvii a.

*Nana nihánj taj xna'anj se vaa guun ndo'o rá nij xrej atá suun nocoo doj do', nij sí fariseo do', cavi' Jesucristó a*

<sup>45</sup> Dan me se ca'na' nij yuvii israelitá ga chana cu'naj Mariá yo', ne quene'en nij so' daj qui'yaj Jesucristó a. Che'é dan cuchumán rá que'ee nij yuvii se vaa sí ca'neé Diose me Jesucristó a. <sup>46</sup> Tzaj ne cavii yo'ó ta'aj nij so' ca'anj nij so' rihaan nij sí fariseo, gaa ne cataj xna'anj nij so' rihaan nij sí fariseo nu' se vaa qui'yaj Jesucristó a. <sup>47</sup> Che'é dan cunuu chre' nij xrej atá suun nocoo doj do', nij sí fariseo do', qui'yaj nij so' juntá, gaa ne cataj nij so':

—Daj qui'yaj ní', rá soj ga. 'O se xa' snó'o nihánj, tzaj ne 'yaj suun uxrá so' suun sa' nocoo adonj. <sup>48</sup> Sese yo'ó tanáj ní' man so' qui'yaj so' danj, ne cuchuman rá cunudanj nij yuvii ni'yaj nij yuvii man so', gaa ne ca'na' nij tanuu 'yaj suun rihaan gobiernó man Romá, gaa ne tiri' nij tanuu man ní' do', man chiháán ní' do', man nu' tuvi' ní' do' á —taj nij so' rihaan tuvi' nij so' a.

<sup>49</sup> Gaa ne ca'mii yo'ó tuvi' nij so', sí cu'naj Caifás, ne so' me xrej atá suun nocoo doj yo' yo' a. Dan me se cataj so' rihaan nij so' a:

—Ne ne'en uxrá nij soj a ma'. <sup>50</sup> 'O se ataa xcaj soj cuentá se vaa xa' soj, tzaj ne cavii sa' doj soj sese cavi' orún'

snó'o che'é nij yuvii, gaa ne veé danj me se quiri' nu' ní' sij israelitá ma' —taj sí cu'naj Caifás rihaan yo'ó nij so' a.

<sup>51</sup> Dan me se nuveé inanj nana cavii raa ma'an sí cu'naj Caifás me nana nihánj ma'. 'O se xrej atá suun nocoo doj me so' yo' yo', ne che'é dan ma'an Diose me sí rque nana ca'mii so', ne che'é dan me ya vaa se-nana so' gaa cataj so' se vaa cavi' Jesucristó che'é taran' nij yuvii israelitá yo' a.

<sup>52</sup> Ne nuveé inanj che'é nij yuvii israelitá me cavi' Jesucristó ma'. 'O se cavi' so' che'é rej naquiyaj chre' so' man cunudanj nij ta'nii Diose nij sí man nu' rihaan chumii nihánj, gaa ne cunuu tuvi' cunudanj nij so' adonj.

<sup>53</sup> Dan me se maan güii dan me se guun che'e nij sí fariseo do', nij xrej atá suun nocoo doj do', nuchruj raa nij so' daj qui'yaj nij so', gaa ne cavi' Jesucristó a. <sup>54</sup> Che'é dan me ne ca'vee cachee ranga' so' estadó Judea ma'. Gaa ne cavii so' ca'anj so' tu'va rej taj vaj yuvii man, gaa ne catúj so' yo'ó chuman' cu'naj Efraín, gaa ne caran' so' chuman' yo' ga nij sí tucuyón se-nana so' a.

<sup>55</sup> Dan me se daj doj quisij cha'anj pascuá cha'anj navij rá nij yuvii israelitá, ne che'é dan cavii nij yuvii ne chuman' le'ej, ne ca'anj nij so' chuman' Jerusalén, che'é rej qui'yaj nij so' tucuaán nocoo' nij so' ne cunuu guee nij so' rihaan Diose a. <sup>56</sup> Gaa ne nano' ndo'o nij yuvii man Jesucristó a. Dan me se canicun' nij yuvii rá nuvi' nocoo, ne xná'anj nij yuvii man tuvi' yuvii, cataj nij yuvii:

—Daj uun rá soj ga. Ca'na' so' rej canuú cha'anj, rá soj na' —cataj nij yuvii, xná'anj nij yuvii man tuvi' yuvii yo' a.

<sup>57</sup> Ne xa' nij xrej atá suun nocoo doj do', nij sí fariseo do', tzaj ne cataj xna'anj nij so' se vaa sese quene'en nij yuvii me rej vaj Jesucristó, gaa ne cataj xna'anj nij yuvii rihaan ma'an nij so' a. 'O se guun rá nij so' quita'aa nij so' man Jesucristó adonj.

## 12

*Nana nihánj taj xna'anj se vaa caxrj chana cu'naj Mariá casté tacóo Jesucristó a*

<sup>1</sup> Dan me se achiin yatan' güii canuü cha'anj pascuá, ne ca'anj Jesucristó chuman' Betania a. Chuman' Betania ro', ne síí cu'naj Lázaro síí cunuu i'na' uún qui'yaj Jesucristó a.

<sup>2</sup> Dan me se qui'yaj chuvii nii cha ni'yánj Jesucristó, ne chana cu'naj Marta me chana rque chá ni'yánj nij síí 'na', ne ne síí cu'naj Lázaro rihaan mesá ga Jesucristó gaa chá so' chraa a. <sup>3</sup> Dan me se nicaj chana cu'naj Mariá yo'o aga' xij casté gun' daj tu'vee ndo'o, ne caxrj no' tacóo Jesucristó, gaa ne yuvé raá ma'an no' tanacoó no' tacóo Jesucristó a. Gaa ne nasj toto' nu' rá ve' yo', qui'yaj casté caxrj chana cu'naj Mariá tacóo Jesucristó a.

<sup>4</sup> Dan me se ne síí cu'naj Judas Iscariote, ne yo'o síí tucu'yón se-nana Jesucristó me so', ne síí tacuachén man Jesucristó rihaan nij síí taj ri'yunj man Jesucristó me so' a. Dan me se cataj so':

<sup>5</sup> —Me che'é ne cutu'vee nii casté nihánj ne quirj' uxrá nii sa'anj ga. 'O se ase vaa sa'anj 'yaj canaán yuvii rque 'o yo' nó casté nihánj, ne vaa che'é rque ní' sa'anj yo' rihaan nij síí nique nanj á —taj síí cu'naj Judas yo' a.

<sup>6</sup> Dan me se danj tu'va ma'an síí cu'naj Judas yo', tzaj ne a doj ne nanó rá Judas yo' che'é nij síí nique a ma'. Maan se sij tumé se-chrunj nij tuvj' Jesucristó chrúun sa'anj me so', tzaj ne síí ituu me so', ne qui'yaj ituu ndo'o so' sa'anj man rque chrúun yo', ne che'é dan ca'mii so' danj nanj ei.

<sup>7</sup> Dan me se cataj Jesucristó rihaan so' a:

—Ca'ne' rá so' qui'yaj ma'an no' ei. Che'é yan quisj güii cachin' nii manj ro', che'é dan caxrj no' casté tu'vee ndo'o manj nanj á. <sup>8</sup> Xa' nij síí nique, tzaj ne nu' güii man nij síí nique ga soj, ne xa' ma'anj, tzaj ne se canicún' 'unj rihaan soj nu' cavii nu' ca'anj

ni'yaj soj ma' —taj Jesucristó rihaan síí cu'naj Judas yo' a.

*Nana nihánj taj xna'anj se vaa guun rá nij xrej ata suun nocoo doj se vaa cavj' uún síí cu'naj Lázaro yo' a*

<sup>9</sup> Dan me se xcaj ndo'o nij yuvii israelitá cuentá se vaa ne Jesucristó chuman' Betania, ne che'é dan ca'anj uxrá nij so' chuman' yo' a. Dan me se nuveé inanj che'é ma'an Jesucristó me ca'anj nij so' ma'. 'O se me rá nij so' quene'en nij so' man síí cu'naj Lázaro síí cunuu i'na' uún qui'yaj Jesucristó a. <sup>10</sup> Gaa ne guun 'o rá nij xrej ata suun nocoo doj se vaa cavj' síí cu'naj Lázaro uún, qui'yaj nij so' a.

<sup>11</sup> 'O se che'é síí cu'naj Lázaro me se cavii ndo'o nij yuvii israelitá canoco' nij so' man Jesucristó, ne cuchumán rá nij yuvii israelitá ni'yaj nij so' man Jesucristó a.

*Nana nihánj taj xna'anj daj qui'yaj nij yuvii gaa canicaj uún Jesucristó ca'anj so' chuman' Jerusalén a*

<sup>12</sup> Gaa ne güii a'yuj me se cuchi' nana rihaan taran' nij yuvii israelitá navij rá cha'anj pascuá se vaa catuu Jesucristó chuman' Jerusalén a.

<sup>13</sup> Che'é dan me cuta nij yuvii ra'a chruun yuun, ne curihanj nij yuvii tu'va chuman' nari' tuvi' nij so' ga Jesucristó a. Gaa ne caguáj nij yuvii, cataj nij yuvii:

—Caraa guee ní' rihaan Diose ei. Cunaj ndo'o vaa ca'na' síí ca'neé síí 'nij ra'a man ní' adonj. Síí uun chij rihaan ní' sij israelitá me so' chuguanj —taj nij yuvii, caguáj nij yuvii a.

<sup>14</sup> Gaa ne nari' Jesucristó yo'o burró, gaa ne cavii so' xráá burró a. Dan me se cuyaan qui'yaj so' ga nana nihánj nana no' rihaan danj Diose a:

<sup>15</sup> “Soj sij man chuman' Jerusalén me se se kuchu'vi' soj ma'. 'O se xcaj soj cuentá se vaa 'na' síí guun chij rihaan soj nanj adonj. Dan me se síí nica' nimán me so', ne táá so' xráá burró le'ej ta'níí xcuu burró chana adonj”, taj nana no' rihaan danj Diose yo' a. <sup>16</sup> Dan me se nij síí tucu'yón se-nana Jesucristó me se gaa güii

catúj Jesucristó chuman' Jerusalén, ne ne xcaj nij so' cuentá, ne ne caxrii rá nij so' se vaa qui'yaj so' ndaa vaa cataj nana no rihaan yanj yo' ma'. Tzaj ne ndaa quisíj cavii sa' Jesucristó qui'yaj Diose, gaa ne ninuj rá nij so' nana no rihaan danj Diose, ne ninuj rá nij so' se vaa guun che'é Jesucristó a.

<sup>17</sup> Dan me se nij yuvii cumán ga Jesucristó me se cataj xna'anj nij so' nu' se vaa guun gaa canacúun Jesucristó man síi cu'naj Lázaro se vaa curihanj so' yu'uj yuvej ne cunuu i'na' uún ya síi cu'naj Lázaro qui'yaj Jesucristó a. <sup>18</sup> Gaa ne che'é se cuno nij yuvii man chuman' Jerusalén se vaa qui'yaj so' suun sa' nocoo yo', gaa ne che'é dan ca'na' nari' nij so' man Jesucristó a. <sup>19</sup> Che'é dan cataj nij síi fariseo rihaan tuvi' nij so' a:

—Ní'yaj soj ei. 'O se ne qui'yaj canaán uxrá ní', qui'yaj soj a ma'. 'O se veé danj ya canoco' cunudanj nij yuvii man rihaan chumii se-nana so' nanj adonj —taj nij so' rihaan tuvi' nij so' ni'yaj nij so' man Jesucristó a.

*Nana nihánj taj xna'anj se vaa ca'na' doj síi a'mii xna'ánj griego ca'mii nij so' ga Jesucristó a*

<sup>20</sup> Dan me se mán ta'aj nij síi a'mii xna'ánj griego, ne sij cuchí' chuman' Jerusalén gaa anuú cha'anj pascuá me nij so', ne cuchí' nij so' na'vij nij so' rihaan Diose a. <sup>21</sup> Dan me se cuchí' nij so' rihaan síi cu'naj Felipé síi cavii chuman' Betsaida chuman' naj estadó Galilea, gaa ne xna'anj nij so' man so', ne cataj nij so':

—Me rá núj ca'mii núj doj ga Jesucristó, señor —taj nij so' rihaan síi cu'naj Felipé yo' a.

<sup>22</sup> Gaa ne ca'anj síi cu'naj Felipé cataj xna'anj so' rihaan síi cu'naj Andrés se vaa cataj nij síi a'mii xna'ánj griego yo' rihaan so' a. Gaa ne ca'anj cataj xna'anj roj so' rihaan Jesucristó, ne cataj roj so' rihaan Jesucristó se vaa ca'na' nij síi a'mii xna'ánj griego ne me rá nij so' ca'mii nij so' ga Jesucristó a. <sup>23</sup> Gaa ne cataj Jesucristó rihaan roj so' a:

—'Unj sij ca'néé Diose nicaj yu'unj man yuvii, tzaj ne cuano nihánj me se quisíj güii cavii sa' 'unj, ne guun chij 'unj, qui'yaj Diose ei. <sup>24</sup> Ya ya cataj xna'anj 'unj rihaan soj cuano se vaa ase vaa 'núú vaa ní', ne sese se quini' 'núú yaan rihaan yo'óo ne cavi' ma'an 'núú yaan yo', ne quinavij uun 'núú yaan, tzaj ne sese cavi' 'núú yaan yo', ne quisij que'ee doj 'núú qui'yaj yo' nanj adonj. <sup>25</sup> Dan me se xa' síi me rá gaa i'na' rihaan chumii nihánj, tzaj ne yo'ó cavi' so', ne xa' síi a'vej rá cavi' rihaan chumii nihánj che'é se me so' síi nocoo' manj, tzaj ne yo'ó gaa i'na' nimán so' nu' cavii nu' ca'anj adonj. <sup>26</sup> Che'é dan me sese vaa 'o so' nuu rihanj 'yaj suun rihanj, ne canoco' so' manj cuaj ei. Ne me rej ma'an canicun' ma'anj ro', maan dan canicun' síi nuu rihanj uún nanj ei. Gaa ne cavii sa' uxrá síi 'yaj suun rihanj, qui'yaj Réj adonj.

<sup>27</sup> “Cuano nihánj me se nanó ndo'lo raj chuguanj. Ne daj qui'yaj a ranj a. Cachinj ni'yaj rihaan Réj se vaa tinanii so' manj rihaan sayuun quiranj cuano, rá soj na'. Taj che'é qui'yaj danj ma'. Che'e yan quirán' 'unj sayuun ca'naj adonj —taj Jesucristó rihaan roj so' a.

<sup>28</sup> Gaa ne cachín ni'yaj Jesucristó rihaan Diose, cataj so':

—Cavii sa' doj ma'an so' rihaan chumii nihánj, qui'yáa so', Ataj —taj Jesucristó, cachín ni'yaj so' a.

Gaa ne cavii 'o nana rej xta' ca'mii Diose cuno nij so', ne nana cavii rej xta' me:

—Aj cavii sa' 'unj, qui'yaj, tzaj ne cavii sa' 'unj doj, qui'yaj adonj —taj nana yo' nana cavii rej xta' ca'mii Diose cuno nij so' a.

<sup>29</sup> Dan me se nicun' uxrá yuvii ga Jesucristó, ne cuno nij so' nana yo', ne cataj nij so' se vaa caguáj tu'vii rej xta' a. Ne yo'ó ta'aj nij so' cataj se vaa ca'mii yo'ó se-mozó Diose nana yo' rihaan Jesucristó a. <sup>30</sup> Gaa ne cataj Jesucristó rihaan nij yuvii:

—Nuveé che'e orún' 'unj me ca'mii Diose nana yo' ma'. 'O se ca'mii Diose



nana yo', che'é rej xcaj soj cuentá ei. <sup>31</sup> Che'é se vaa quíranj cuano ca'ne' Diose cacun' che'é nij yuvií man rihaan chumií nihánj, ne quirií yaníj Diose man síi chree síi uun chij rihaan chumií nihánj chuguanj. <sup>32</sup> Gaa ne asa' quisíj naxcaj nii manj rihaan chumií nihánj cachron nii manj rihaan rcutze, gaa ne guun rá cunudanj nij yuvií canoco' nij yuvií manj, qui'yáj adonj —taj Jesucristó rihaan nij yuvií a.

<sup>33</sup> Ne ma'an nana nihánj nana ca'mii Jesucristó ro', taj xna'anj daj qui'yáj nii man so' ne cavi' so' a.

<sup>34</sup> Gaa ne cataj nij yuvií rihaan Jesucristó a:

—Aj ne'en núj nana no rihaan danj Diose se vaa síi ca'nej Diose tinanii man yuvií rihaan sayuun me se sij cayáan nu' cavii nu' ca'anj me so' a. Ne me che'é cataj so' nihánj se vaa naxcaj nii man síi ca'née Diose nica'j yu'unj man yuvií rihaan chumií nihánj ga. Me che'é cavi' so' ga. Daj sij me síi ca'nej Diose nica'j yu'unj man yuvií, rá so' ga —taj nij yuvií, xná'anj nij yuvií man Jesucristó a.

<sup>35</sup> Che'é dan cataj Jesucristó rihaan nij so' a:

—Cuanó nihánj me se vaj soj rej chuguun sa' ya'an, tzaj ne daj doj quisíj orá quina'aj ya'an yo', ne se guun nucaj soj xcaj soj cuentá ma'. Che'é dan vaa che'é xcaj soj cuentá ndaa vaa 'yaj nij síi vaj rej chuguun ya'an ei. Sese taj, ne guun soj síi chée rej rmi', ne xa' síi chée rej rmi', tzaj ne ne ne'en so' me rej vaj so' ma'. <sup>36</sup> Dan me se vaj soj rej chuguun ya'an, ne che'é dan cuchuman rá soj ni'yaj soj ya'an sa' ei. Quisíj qui'yaj soj danj, gaa ne guun soj ta'nii ya'an chuguun, ne sij xcaj cuentá guun soj adonj —taj Jesucristó rihaan nij yuvií a.

Quisíj ca'mii Jesucristó nana nihánj, gaa ne ca'anj Jesucristó, ne caxríj yuve so' man so', che'é se na'vej rá so' quene'en nij yuvií man so' a.

*Nana nihánj taj xna'anj se vaa ne cuchuman rá nij síi israelitá ni'yaj nij so' man Jesucristó ma'*

<sup>37</sup> Nda' se uxrá qui'yaj Jesucristó suun sa' noco ni'yaj nij yuvií, qui'yaj Diose, tzaj ne ne cuchuman rá nij yuvií se vaa sij ca'née Diose me so' a ma'.

<sup>38</sup> Ne veé danj quisíj ya nu' se-nana síi cu'naj Isaías síi nata' se-nana Diose gaa naá a. Dan me se cataj síi cu'naj Isaías:

—Ataj síi chij. Doj yuvií cuchumán rá cuno nana ca'mii núj, ne doj yuvií xcaj cuentá se vaa nucaj ndo'o so' sij 'nij ra'a man núj ei —taj síi cu'naj Isaías yo' a.

<sup>39</sup> Ne vaa doj nana nihánj nana ca'mii Diose ne cachron síi cu'naj Isaías rihaan yanj, ne dan me se cataj xna'anj Diose me che'é ne guun nucaj nij yuvií israelitá cuchuman rá nij so' ni'yaj nij so' man Jesucristó a:

<sup>40</sup> —Síi ca'née 'unj me se nata' uxrá so' se-nanaj rihaan yuvií nihánj ndaa se caráan rihaan nij yuvií, ne se ca'vee quene'en nij so' doj ma'. Ne ne ca'vee catuu doj se-nanaj nimán nij so' ma'. 'O se na'vej uxrá rá nij so' xcaj nij so' cuentá ne canica'j nimán nij so' ne nahuun sa' nij so' qui'yáa 'unj ma' —taj Diose ne cachron síi cu'naj Isaías rihaan yanj gaa naá a.

<sup>41</sup> Danj ca'mii Isaías che'é se aj quene'en so' se vaa sa' uxrá qui'yaj Jesucristó, ne che'é dan ca'mii so' danj che'é Jesucristó a.

<sup>42</sup> Tzaj ne cuchumán rá que'ee nij síi uun chij rihaan nij yuvií israelitá ni'yaj nij so' man Jesucristó a. Tzaj ne ne cataj xna'anj nij so' se vaa cuchumán rá nij so' ma'. 'O se cuhu'vi' nij so' ni'yaj nij so' man nij síi fariseo, se vaa cuta' nij síi fariseo cacun' xraá nij so', gaa ne quirií yaníj nij síi fariseo man nij so' rque nij yuvií israelitá yo' a. <sup>43</sup> Dan me se niha' rá nij so' doj cuno nij so' ca'mii sa' yuvií che'é nij so', ne ne caraya'anj nij so' se vaa ve'é ca'mii Diose che'é nij so' a ma'.

*Nana nihánj taj xna'anj che'é cacun' tumé síí na'vej rá cunō se-nana Jesucristó a*

<sup>44</sup> Ne sca' ndo'o ca'mii Jesucristó, cataj so':

—Xa' síí amán rá ni'yaj manj, tzaj ne nuveé inanj ma'anj me síí amán rá so' ni'yaj so' man ma'. 'O se amán rá so' ni'yaj so' man síí ca'néé manj rihaan chumii nihánj adonj. <sup>45</sup> Ne xa' síí acaj cuentá che'ej, tzaj ne so' me síí acaj cuentá che'é síí ca'néé manj rihaan chumii nihánj adonj. <sup>46</sup> Xa' ma'anj, tzaj ne chuguun ya'an rihaan chumii nihánj qui'yáj gaa ca'naj rihaan chumii nihánj, che'é rej se quináj nij síí amán rá ni'yaj manj rej rmi' man chuguanj.

<sup>47</sup> “Ne ca'vee se se ca'vej rá yo'o so' cunō so' se-nanaj nana catúj xréé so', tzaj ne nuveé 'unj me síí cutá' cacun' xráá so' a ma'. 'O se nuveé che'e se cutá' 'unj cacun' xráá yuvi me ca'ná' 'unj rihaan chumii nihánj ma'. Tananj ca'ná' 'unj rihaan chumii nihánj che'é rej tinanii 'unj man nij yuvi man rihaan chumii nihánj rihaan chrej chi'ii uun chij nimán nij so' adonj. <sup>48</sup> Dan me se síí tanáj xcō manj ne na'vej rá cunō se-nanaj me se quitaj cacun' xráá so' ei. 'O se che'é se ne cunō so' nana ca'mij rihaan so' ro', che'é dan quitaj cacun' xráá so' asa' quisíj güii ca'ne' Diose cacun' che'é yuvi chuguanj. <sup>49</sup> Ne 'unj nihánj me se nuveé inanj nana cavii raj me nana ca'mij ma'. 'O se Réj síí ca'néé manj me síí cataj xna'anj rihanj daj ca'mij ei. <sup>50</sup> Ne aj ne'enj se vaa sese cunō ní' se vaa cataj xna'anj so' rihaan ní', ne cayáán ní' ga so' nu' cavii nu' ca'anj a. Che'é dan nana a'mij me se ma'an nana ca'mii Réj rihanj me nij nana a'mij adonj. —Danj cataj Jesucristó a.

### 13

*Nana nihánj taj xna'anj se vaa na'nu' Jesucristó tacóó nij síí tucuyón se-nana so' a*

<sup>1</sup> Dan me se gaa ataa quisij cha'anj pascuá, ne quene'en Jesucristó se vaa nichrun' quisij orá tanáj so' chumii nihánj ne quinān' so' rihaan Rej so' Diose a. Dan me se 'ee rá so' man nij síí cachéé ga so' rihaan chumii nihánj, ne yo'o 'ee rá so' man nij so' ndaa se cavi' so' a. <sup>2</sup> Dan me se quisij orá chá xti'no nij so', ne aj guun rá síí chree se vaa síí cu'naj Judas Iscariote ta'níí Simón me síí t̄acuachén man Jesucristó rihaan nij síí taj ri'yunj man Jesucristó a. <sup>3</sup> Ne aj quene'en Jesucristó se vaa quisij guun chij ma'an so' rihaan cunudanj rasuun, qui'yaj Diose, ne aj quene'en so' se vaa sij cavii rej yanj Diose me so' ne quinān' uún so' rihaan Diose a. <sup>4</sup> Dan me se gaa quisij chá xti'no nij so', ne quirii Jesucristó cotoó nuu so', ne cata'aa so' 'o yatzíj toalla, ne tumíj so' catuun so' a. <sup>5</sup> Veé dan, gaa ne caraa so' na rque rco'oo, gaa ne guun che'e so' na'nu' so' tacóó nij síí tucuyón se-nana so', ne nachen so' yatzíj toalla numii catuun so', ne tinacoó so' tacóó nij síí tucuyón se-nana so' a. <sup>6</sup> Dan me se cuchi' so' rihaan síí cu'naj Simón Pedró, ne cataj Pedró rihaan so' a:

—Señor. Ma'an so' na'nu' tacój aj na' —taj Pedró, xná'anj so' man Jesucristó a.

<sup>7</sup> Gaa ne cataj Jesucristó rihaan so' a:

—Ne ne'én so' me che'é 'yáj danj cuano ma'. Tzaj ne vaa güii, ne xcāj so' cuentá adonj —taj Jesucristó rihaan Pedró a.

<sup>8</sup> —Daj chihāā míj se guun na'nu' so' tacój a ma' —taj Pedró rihaan Jesucristó a.

Gaa ne cataj Jesucristó rihaan so' a:

—Tzaj ne sese se na'nú' 'unj tacóó so', ne se ca'vee guún so' tui' 'unj ma' —taj Jesucristó rihaan Pedró a.

<sup>9</sup> Gaa ne cataj Simón Pedró rihaan Jesucristó a:

—Se na'nú' so' inanj tacój, man Señor. Ndaa nu' ra'aj do', nu' raj do', na'nu' so' ei —taj Pedró rihaan Jesucristó a.

<sup>10</sup> Gaa ne cataj Jesucristó rihaan so' a:

—Xa' síi aj cane, tzaj ne taj che'é na'nu' nii man nu' nee man so' ma'. 'O se aj vaa cuj man so' nanj á. Maan se inanj tacóo so' na'nu' nii nanj adonj. Ne nda' se aj vaa cuj man ta'aj soj, tzaj ne nuveé taran' soj me síi vaa cuj man ma' —taj Jesucristó a.

<sup>11</sup> 'O se aj quene'en Jesucristó se vaa tacuachén yo'o tuvi' nij so' man so' rihaan nij síi taj ri'yunj man so', ne che'é dan cataj so' se vaa nuveé cunudanj nij so' me síi vaa cuj man a.

<sup>12</sup> Dan me se gaa quisij na'nu' Jesucristó tacóo nij so', ne nanuú so' se-cotoó so', ne ca'anj cane uún so' rej ne nij so', gaa ne xná'anj so' man nij so', cataj so':

—Ne'en soj me che'é qui'yáj danj man soj na'. <sup>13</sup> Xa' soj, tzaj ne ve'é a'mii soj rihanj, taj soj se vaa sij tucu'yón man soj mej, ne sij uun chij rihaan soj mej, ne cunaj uxrá a'mii soj ei. 'O se veé yá 'unj nanj á. <sup>14</sup> Dan me se 'unj me síi tucu'yón man soj ne 'unj me síi uun chij rihaan soj, tzaj ne guún 'unj mozó rihaan soj ne na'nú' 'unj tacóo soj ei. Che'é dan xcaj soj cuentá se vaa no xcúun soj cunu nica' nimán soj ne guun soj mozó rihaan tuvi' soj ne na'nu' soj tacóo tuvi' soj nanj adonj. <sup>15</sup> Danj inanj qui'yáj, che'é rej me raj quene'en soj manj, ne xcaj soj cuentá daj qui'yaj ma'an soj uún adonj. <sup>16</sup> Cuanó nihánj me cataj xna'anj yá 'unj rihaan soj se vaa nuveé sij uun chij doj me mozó rihaan se-ru'vee mozó ma'. Ne nuveé sij uun chij doj me síi ca'anj suun rihaan síi ca'née man so' ma'. Ne ase vaa mozó do', ase vaa síi ca'anj suun do', vaa soj rihanj a. Che'é dan daj se qui'yáá 'unj ro', danj gaa qui'yaj soj, qui'yaj suun soj che'é tuvi' soj ei. <sup>17</sup> Ne aj cuno soj nana nihánj, ne sese qui'yaj soj nu' nana nihánj, ne vaa che'é guun niha' rá soj, ne ya cavii sa' soj adonj. <sup>18</sup> Tzaj ne ne ca'mij nana nihánj che'é taran' nij soj ma'. Dan me se aj ne'enj man soj sij narii 'unj canoco' manj, tzaj ne vaa che'é quisij guee nana nihánj

nana no rihaan danj Diose adonj: “Síi chá rachrúun gaj ro', me síi guun rá tiguúj che'é manj adonj”, me nana no rihaan danj Diose a.

<sup>19</sup> “Asij cuanó nihánj nu' rej rihaan cataj xna'anj 'unj rihaan soj daj guun rej rihaan, ne cuanó nihánj me se ataa quiranj se vaa quiranj, tzaj ne asa' quisij quiranj yo', gaa ne cuchuman rá soj daj sij mej ei. <sup>20</sup> Ya ya cataj xna'anj 'unj rihaan soj se vaa xa' síi ve'é nicaj tuvi' ga síi ca'nej 'unj rihaan chumií nihánj, tzaj ne so' me síi ve'é nicaj tuvi' ga ma'anj, ne xa' síi ve'é nicaj tuvi' ga ma'anj, tzaj ne so' me síi ve'é nicaj tuvi' ga síi ca'née manj nanj adonj —taj Jesucristó rihaan nij síi tucu'yón se-nana so' a.

*Nana nihánj taj xna'anj se vaa cataj xna'anj Jesucristó che'é síi tacuachén man so' rihaan nij síi taj ri'yunj man so' a*

<sup>21</sup> Sij ca'mii Jesucristó nana nihánj, gaa ne quinanó ndo'o rá so', gaa ne guun che'e so' cataj xna'anj so' daj qui'yaj yo'o so' man so', cataj so':

—Cuanó nihánj me se cataj yá 'unj rihaan soj se vaa yo'o tuvi' nij soj me síi tacuachén manj rihaan nij síi taj ri'yunj manj adonj —taj Jesucristó rihaan nij síi tucu'yón se-nana so' a.

<sup>22</sup> Gaa ne ni'yaj taran' nij so' man tuvi' nij so' a. 'O se ne quene'en nij so' me che'é ca'mii Jesucristó nana vaa danj a ma'. <sup>23</sup> Dan me se yanj yo'o so' x'núú Jesucristó, ne nichrun' uxrá ne so' ga Jesucristó, ne síi 'ee rá Jesucristó man me so' a. <sup>24</sup> Che'é dan ticun' Simón Pedró raá Simón Pedró rihaan so', che'é rej xná'anj so' man Jesucristó me síi che'e a'mii Jesucristó a. <sup>25</sup> Che'é dan xná'anj tuvi' so' man Jesucristó, cataj so':

—Me síi qui'yaj danj, ga Señor' —taj so', xná'anj so' man Jesucristó a.

<sup>26</sup> Gaa ne cataj Jesucristó:

—Tiguúj 'unj doj rachrúun candó nuu rque co'oo, ne rquej man síi qui'yaj danj manj a —taj Jesucristó a.

Gaa ne tiguúj Jesucristó yo'o xco' rachrúun rque candó nuu rque co'oo,

ne go' so' man sí cu'naj Judas ta'níi sí cu'naj Simón Iscariote a. <sup>27</sup> Ne gaa quisíj quita'aa sí cu'naj Judas rachrúun yo', gaa ne catúj Satanás nimán so' a. Che'é dan cataj Jesucristó rihaan so' a:

—Cavii so' ca'anj so' cuaj qui'yáá so' ndaa vaa me rá so' á —taj Jesucristó rihaan Judas yo' a.

<sup>28</sup> Tzaj ne a 'ó nij so' ne quene'en me che'é ca'mii Jesucristó nana vaa danj rihaan sí cu'naj Judas a ma'. <sup>29</sup> Dan me se che'é se sij tumé chrúun sa'anj me sí cu'naj Judas, che'é dan guun rá ta'aj nij so' se vaa ca'ne' Jesucristó suun rihaan so' quiraan so' se vaa cachiin rihaan nij so' che'é cha'anj do', se vaa go' so' doj sa'anj rihaan nij sí nique do' a.

<sup>30</sup> Dan me se nicaj Judas rachrúun yo', ne nu' quita'aa so' nu' curihanj so' xe', ne rej nij me yo' a.

*Nana nihánj taj xna'anj che'é suun ca'ne' Jesucristó rihaan ní' a*

<sup>31</sup> Che'é dan gaa quisíj curihanj Judas, ne cataj Jesucristó rihaan yo'ó nij so' a:

—Daj doj quene'en yuvii se vaa sij sa' uxrá mej sij ca'née Diöse nicaj yu'unj man yuvii, ne che'é dan quene'en nij yuvii se vaa sij sa' uxrá me ma'an Diöse adonj.

<sup>32</sup> Ne che'é dan quene'én' se vaa sij sa' me ma'anj, qui'yaj Diöse, ne nichrun' qui'yaj so' danj nanj adonj.

<sup>33</sup> Nichrun' quinavij orá chée 'unj ga soj, nanj rej. Dan me se aj cataj 'unj rihaan nij sí uun chij rihaan nij yuvii israelitá se vaa cavii 'unj ca'anj 'unj, ne se guun nucaj nij so' cuchí' nij so' rej ca'anj 'unj ma'. Ne xa' ma'an soj, tzaj ne nano' ma'an soj manj, ne nihánj me cataj xna'anj 'unj rihaan soj se vaa se guun nucaj ma'an soj cuchí' ma'an soj rej ca'anj 'unj a ma'. <sup>34</sup> Ne nihánj me suun naca a'nej rihaan soj, se vaa yo'ó gaa 'ee rá soj man tuvi' soj ei. Dan me se daj se cunuu 'ee raj ni'yaj man soj ro', danj gaa qui'yaj soj, gaa 'ee rá soj man tuvi' soj a. <sup>35</sup> Sese gaa 'ee

rá soj man tuvi' soj, ne quene'en nu' yuvii man rihaan chumii se vaa sij tucu'yón se-nanaj me soj nanj adonj —taj Jesucristó rihaan nij sí tucu'yón se-nana so' a.

*Nana nihánj taj xna'anj che'é nana nij ca'mii Pedró che'é Jesucristó a*

<sup>36</sup> Gaa ne cataj Simón Pedró rihaan Jesucristó a:

—Me rej ca'anj so', ga Señor' —taj Pedró, xna'anj so' man Jesucristó a.

Gaa ne cataj Jesucristó:

—Xa' rej ca'anj 'unj, tzaj ne se guun nucaá so' canocó' so' manj cuano ma'. Tzaj ne vaa güii, ne canocó' so' manj adonj —taj so' rihaan Pedró a.

<sup>37</sup> Gaa ne cataj Pedró rihaan so' a:

—Me che'é se guun nucaj canocoj mán so' cuano, Señor'. 'O se ca'nej nimanj cavij che'é so' á —taj Pedró rihaan Jesucristó a.

<sup>38</sup> Gaa ne cataj Jesucristó rihaan so' a:

—Ya ya ca'nej nimán so' cavii so' che'ej, rá so' na'. Cuano nihánj me se cataj yá 'unj rihaan so' se vaa gaa ataa caguaj to'loo, ne va'nuj ya cataj so' se vaa ne ne'én so' manj chuguanj —taj Jesucristó rihaan Pedró a.

## 14

*Nana nihánj taj xna'anj che'é nu' se vaa qui'yaj Jesucristó che'é ní' a*

<sup>1</sup> Gaa ne cataj Jesucristó rihaan taran' nij so' a:

—Ca'ne' rá soj ga suun guun vij rá á. Cuchuman rá soj ni'yaj soj Diöse, ne cuchuman rá soj ni'yaj soj manj ei. <sup>2</sup> Tucuá Réj me se vaa ndo'o rej cane yuvii ei. Sese ne vaa danj, ne me che'é cataj xna'anj 'unj rihaan soj se vaa ca'anj 'unj naqui'yaj sa' 'unj rej cane ma'an soj, rá soj ga. <sup>3</sup> Ne che'é se ca'anj 'unj naqui'yaj sa' 'unj rej cane soj, che'é dan ne'en soj se vaa ca'na' uún 'unj rihaan soj, ne naca' 'unj man soj; ndaa síj, gaa ne cane rcua'aan taran' ní' yo' ei. <sup>4</sup> Ne aj ne'en soj chrej uchi' ndaa rej ca'anj 'unj nanj adonj —taj Jesucristó rihaan nij sí tucu'yón se-nana so' a.



<sup>5</sup> Gaa ne cataj síi cu'naj Tomás rihaan Jesucristó a:

—Ne ne'en núj rej ca'anj so', man Señor. Asa' ca'vee quene'en núj chrej uchi' ndaa rej ca'anj so' ga —taj síi cu'naj Tomás, xná'anj so' man Jesucristó a.

<sup>6</sup> Gaa ne cataj Jesucristó rihaan so' a:

—Ma'anj me guun chrej rihaan soj, ne ma'anj me nana ya cunō soj, ne ma'anj me síi qui'yaj gaa i'na' nimán soj adonj. Sese se ca'vej rá yo'o so' canoco' so' manj, ne daj chihaa mǐj se cuchí' so' rihaan Réj Diose a ma'.  
<sup>7</sup> Sese ne'en ya soj manj, ne aj ne'en soj man Réj Diose adonj. Dan me se asij cuano ro', ne'en soj man so' nanj adonj —taj Jesucristó rihaan Tomás a.

<sup>8</sup> Gaa ne cataj síi cu'naj Felipé:

—Tihaán so' man Réé so' rihaan núj, ne guun ya rá núj, Señor —taj Felipé rihaan Jesucristó a.

<sup>9</sup> Gaa ne cataj Jesucristó rihaan Felipé a:

—Sij que'ee ndo'o güii cachéé 'unj ga nij soj, ne me che'é ne quene'én so' manj, ga Felipé'. Xa' síi ne'en manj, tzaj ne so' me síi ne'en Réj Diose adonj. Asa' ca'vee cataj so' se vaa me rá so' tihaán 'unj man Réj Diose rihaan so' ga. <sup>10</sup> Ne cuchumán ya rá so' se vaa cyaan vaa rá 'unj ga Réj Diose a. 'O se xa' nana a'mij, tzaj ne nuveé nana avii raá ma'anj me nana yo' ma'. 'O se nuu Réj Diose nimanj, ne so' me síi 'yaj suun nu' suun 'yaj sunj adonj. <sup>11</sup> Cuchuman rá soj se vaa cyaan vaa rá 'unj ga Réj ei. Ca'vee se ne amán rá soj ni'yaj soj man ma'anj, tzaj ne cuchuman rá soj se-nanaj che'é suun 'yaj sunj ei. <sup>12</sup> Ne cuano nihánj me se cataj ya 'unj rihaan soj se vaa síi amán rá ni'yaj manj me se ase vaa suun 'yaj suun ma'anj ro', danj gaa suun qui'yaj suun ma'an so' uún nanj adonj. Tzaj ne suun sa' doj qui'yaj suun so', che'é se nucuí' 'unj rihaan Réj Diose ei. <sup>13</sup> Ne me ma'an rasuun cachinj soj rihanj che'é se me soj síi noco' manj, ne nu' yo' qui'yaj che'é soj adonj. Ndaa síj, gaa ne ve'é

ca'mii nii che'é Réj Diose, qui'yaj ei. <sup>14</sup> Sese cachinj soj yo'o rasuun rihanj che'é se me soj síi noco' manj, ne veé danj qui'yaj adonj.

<sup>15</sup> “Sese ya aráj cochroj soj rihanj, ne cunō soj nij nana cataj xna'anj 'unj rihaan soj a. <sup>16</sup> Gaa ne cachinj ni'yaj ma'anj rihaan Réj Diose, gaa ne ca'nej so' yo'ó síi cuchí' rihaan soj, ne racuíj ndo'o so' man soj, ne canē so' ga soj nu' cavii nu' ca'anj a. <sup>17</sup> Dan me se Nimán Diose me síi cuchí' rihaan soj, ne inanj nana ya rque so' man soj a. Tzaj ne se guun nucuaj nij yuvii man rihaan chumii nihánj nacaj nij so' man Nimán Diose a ma'. 'O se ne ne'en nij so' man so' ma'. Tzaj ne soj me se ne'en soj man so', che'é se ne so' ga soj, ne yo'o canē so' nimán soj adonj. <sup>18</sup> Se quináj ma'an soj ma'. 'O se ca'na' uún 'unj rihaan soj ei. <sup>19</sup> Nichrun' ca'anj 'unj, ne se quene'en uún nij síi man rihaan chumii nihánj manj ma'. Tzaj ne quene'en ma'an soj manj, che'é se yo'o vaa i'na' 'unj ga Diose, ne gaa i'na' nimán soj ga Diose adonj. <sup>20</sup> Asa' quene'en soj manj ne quene'en soj se vaa cyaan vaa rá 'unj ga Réj, ne cyaan gaa rá soj ga 'unj nanj adonj. <sup>21</sup> Síi nari' se-nanaj ne uno nana yo' ro', síi yo' me síi ya ya aráj cochroj rihanj chuguanj. Ne cunu 'ee rá Réj Diose man síi aráj cochroj rihanj, ne gaa 'ee rá ma'anj man so', ne quene'en so' manj, qui'yaj ei —taj Jesucristó rihaan nij síi tucuyón se-nana so' a.

<sup>22</sup> Dan me se ca'mii síi cu'naj Judas rihaan so' a. Tzaj ne nuveé sij cu'naj Judas Iscariote me so' ma'. Yo'ó síi cu'naj Judas me a. Dan me se xná'anj so' man Jesucristó, cataj so':

—Me che'é cataj so' cuano nihánj se vaa quene'en núj mán so' qui'yáa so', tzaj ne se quene'en nij síi man rihaan chumii nihánj mán so' ga. Me che'é ca'mii so' danj ga —taj Judas, xná'anj so' man Jesucristó a.

<sup>23</sup> Gaa ne cataj Jesucristó rihaan so' a:

—Sese aráj cochroj yo'q so' rihanj, ne sese cunq so' se-nanaj, gaa ne cunu 'ee rá Réj Diose man so', gaa ne cuchí' núj rihaan so', ne yo'q cayáan núj ga so' adonj. <sup>24</sup> Xa' síi ne aráj cochroj rihanj, tzaj ne ne uno so' se-nanaj ma'. Ne nana ca'mij cuno soj me se nuveé inanj se-nanaj me nana yo' ma'. Se-nana Réj síi ca'neé manj rihaan chumií nihánj me nana ca'mij cuno soj nanj adonj.

<sup>25</sup> “Dan me se se cuano yaj ne ma'anj ga soj, ne ca'mij nu' nana nihánj rihaan soj adonj. <sup>26</sup> Tzaj ne vaa güii ca'nej Réj Diose man Nimán so' cuchí' Nimán so' rihaan soj, ne racuíj ndo'o Nimán so' man soj, gaa ne tucu'yón Nimán so' nu' nana man soj, ne ninuj rá soj nu' nana ca'mij rihaan soj, qui'yaj Nimán Diose yo' ei.

<sup>27</sup> “Dan me se se xej nuu nimán 'unj tanáj 'unj rihaan soj, ne se xej nuu nimán 'unj rquej man soj, ne se tiha' yu'unj 'unj man soj, ndaa vaa 'yaj nij síi man rihaan chumií nihánj ma'. Ya ya gaa xej nimán soj, qui'yaj yá 'unj adonj. Taj che'é quinano rá soj ma'. Se kuchu'vi' nimán soj ma'. <sup>28</sup> Aj cuno soj nana ca'mij, se vaa cavii 'unj quinán' 'unj, tzaj ne ca'na' uún 'unj rihaan soj adonj. Sese sij aráj cochroj rihanj me soj, ne guun niha' rá soj cuno soj nana se vaa cavii 'unj quinán' 'unj yan yanj Réj Diose ei. Uun chij doj Réj rihanj nanj adonj.

<sup>29</sup> “Cuanq nihánj me se cataj xna'anj 'unj rihaan soj daj quirán' 'unj rej rihaan ní', ne asa' quisíj quirán' 'unj danj, gaa ne me rá 'unj cuchuman rá soj ni'yaj soj manj chuguanj. <sup>30</sup> Se ca'mij que'ee doj nana rihaan soj a ma'. 'Q se daj doj ca'na' síi chree síi guun chij rihaan chumií nihánj, ne a doj se ca'vee guun chij so' rihanj a ma'. <sup>31</sup> Tzaj ne me rá 'unj quene'en nij síi man rihaan chumií nihánj se vaa aráj cochróo 'unj rihaan Réj Diose, ne che'é dan qui'yaj ndaa vaa cataj xna'anj so' rihanj adonj. Canicun' caya soj, ne cavii ní' ca'anj ní' ei —taj Jesucristó

rihaan nij síi tucu'yón se-nana so' a.

## 15

*Nana nihánj taj xna'anj se vaa ase vaa yo'q ya'aa coj chruj uvá ro', danj vaa Jesucristó, ne ase vaa ya'aa ra'a avii xraá ya'aa manj ro', danj vaa ní' a*

<sup>1</sup> Gaa ne cataj uún Jesucristó a: —Ase vaa yo'q ra'a manj chruun uvá ro', danj vaa yá 'unj, ne Réj Diose me síi tumé chruun uvá yo' chuguanj. <sup>2</sup> Ne a me ma'an 'o ra'a chruun yo' ne rii chruj uvá, ne a'nej so' man ra'a yo' nanj adonj. Tzaj ne ra'a chruun man chruj uvá raq me se ve'é a'ne' so' man yo', gaa ne cumán doj chruj uvá raq yo' uún ei. <sup>3</sup> Dan me se ra'a chruun cachij sa' me soj, che'é se aj cuno soj nana ca'mij rihaan soj ei. <sup>4</sup> 'Q nuú rá soj manj, ne 'o nuú 'unj nimán soj a. Dan me se xa' ra'a chruun uvá, tzaj ne se ca'vee cumán chruj raq yo' sese ma'an inanj yo' a ma'. Ne ase vaa ra'a chruun chruj uvá ro', danj vaa soj, ne sese se cuno sa' soj rihanj, ne sese ca'anj yaníj soj rihanj, ne se ca'vee qui'yaj soj ndaa vaa me rá Réj Diose qui'yaj soj ma'.

<sup>5</sup> “Dan me se 'unj nihánj me ma'an ra'a manj coj chruj uvá, ne soj me ra'a catuun avii xraá ra'a manj ei. Ne sese yo'q cuno soj rihanj, ne sese yo'q cunuú 'unj nimán soj, ne qui'yaj uxrá soj se vaa me rá Diose qui'yaj soj chuguanj. 'Q se sese se racuíj 'unj man soj, ne se guun nucuaaj soj qui'yaj suun soj a doj suun sa' ma'. <sup>6</sup> Sese se ca'vej rá yo'q so' quinaj so' ga 'unj, ne quiri'ij nii man so', ndaa vaa 'yaj nii man ra'a chruun yo', ne canacoq yo', ne naqui'yaj chre' nii man nij ra'a chruun yo', ne quiri'ij nii man nij yo' rihaan ya'an ei. Dan me se cacaa nu' nij síi vaa danj nanj adonj.

<sup>7</sup> “Tzaj ne sese yo'q cuno soj rihanj, ne sese yo'q cunuú se-nanaj nimán soj, ne ca'vee se me ma'an rasuun guun rá soj cachinj soj rihanj, ne rquej man soj chuguanj. <sup>8</sup> Che'é se uno soj rihanj, che'é dan a'mii sa' yuvii che'é Réj Diose, ne che'é dan

guun nucuaj soj qui'yaj suun ndo'o soj suun sa', ne sese cunō sa' soj rihanj, ne sī tucu'yón se-nanaj me soj adonj. <sup>9</sup> Dan me se daj se 'ee rá Réj manj ro', danj vaa 'ee raj man soj chuguanj. Ne yo'o gaa 'ee raj ni'yaj 'unj man soj, qui'yaj soj ei. <sup>10</sup> Sese a'neé sa' soj suun a'nej rihaan soj, ne yo'o gaa 'ee raj man soj a. Veé danj 'yáá 'unj, ne a'neé sa' 'unj suun a'ne' Réj Diose rihanj, ne yo'o 'ee rá so' manj adonj.

<sup>11</sup> “Nu' nana nihánj cataj xna'anj 'unj rihaan soj che'é se me raj gaa niha' uxrá raj ni'yaj 'unj man soj, ne me raj gaa niha' uxrá rá ma'an soj uún a. <sup>12</sup> Nihánj me suun sa' ya a'nej rihaan soj cunō soj ei. Nda' rá se vaa 'ee raj ni'yaj 'unj man soj ro', danj gaa 'ee rá soj ni'yaj soj tuvi' soj ei. <sup>13</sup> Dan me se sese ca'vej rá yo'o so' nayon so' rihaan tuvi' so' cavi' so' che'é tuvi' so', ne sij 'ee ya rá man tuvi' me so', ne taj vaj a doj sī 'ee doj rá man tuvi' rihaan sī ca'vej cavi' che'é tuvi' a ma'. <sup>14</sup> Ne nij soj me se tuvij me soj sese qui'yaj soj ndaa vaa cataj xna'anj 'unj rihaan soj nanj adonj. <sup>15</sup> Rej rihaan ní me se se cataj 'unj se vaa se-mozó 'unj me soj a ma'. 'O se mozó me se ne ne'en so' daj 'yaj sī uun chij rihaan so' ma'. Xa' soj, tzaj ne aj cataj 'unj se vaa tuvij me soj, che'é se aj cataj xna'anj 'unj rihaan soj nu' se vaa cataj Réj Diose rihanj adonj. <sup>16</sup> Ne quinarij soj manj a ma'. Tananj ma'an 'unj nihánj quinarij man soj ne cuné' 'unj man soj, yan cavij soj qui'yaj ndo'o soj se vaa me rá Diose qui'yaj soj, ne se quinavij suun sa' 'yaj suun soj daj chihaa míj ma'. Ne che'é se cuné' 'unj man soj, che'é dan me ma'an rasuun cachinj soj rihaan Réj Diose che'é se me soj sī noco' manj, ne rque so' rasuun yo' man soj adonj. <sup>17</sup> Nihánj me se vaa cataj xna'anj 'unj rihaan soj, se vaa gaa 'ee rá soj man tuvi' soj ei —taj Jesucristó rihaan nij sī tucu'yón se-nana so' a.

*Nana nihánj me taj xna'anj Jesucristó se vaa nij ndo'o qui'yaj nij sī*

*man rihaan chumij nihánj man ní a*

<sup>18</sup> Gaa ne cataj uún Jesucristó a:

—Sese quitaj ri'yunj nij sī man rihaan chumij nihánj ni'yaj nij so' man soj, ne xcaj soj cuentá se vaa asino yaan quitáá ri'yunj nij so' man ma'anj a. <sup>19</sup> Sese sij man rihaan chumij nihánj uun me ma'an soj, ne gaa niha' rá yo'ó nij sī man rihaan chumij nihánj ni'yaj nij so' man soj asuun, tzaj ne narii 'unj man soj se vaa tanaj soj chumij nihánj ne canoco' soj manj, ne che'é dan nuveé sij man rihaan chumij nihánj me soj cuano ma'. Che'é dan táá ri'yunj nij sī man rihaan chumij nihánj ni'yaj nij so' man soj ei.

<sup>20</sup> “Yo'o cunuú rá soj nana nihánj nana cataj xna'anj 'unj rihaan soj se vaa nuveé sij uun chij doj me mozó rihaan se-ru'vee mozó ma'. Che'é se canoco' nij sī taj ri'yunj manj qui'yaj nij so' sayuun manj ro', che'é dan ne'en soj se vaa ndaa ma'an soj do', canoco' nij so' qui'yaj nij so' sayuun nanj adonj. Ne che'é se ne cunō nij so' se-nanaj, ne che'é dan ne'en soj se vaa se cunō nij so' se-nana soj a man adonj. <sup>21</sup> Dan me se qui'yaj nij so' nu' se nij yo' man soj, che'é se me soj sī noco' manj, che'é se ne ne'en nij so' man sī ca'neé manj chuguanj. <sup>22</sup> Sese ne ca'na' 'unj, ne sese ne ca'mij ga nij so', ne taj vaj cacun' tumé nij so' saj ma'. Tzaj ne cuano nihánj me se natá' 'unj se-nana Diose rihaan nij so', ne se ca'vee cataj nij so' se vaa nuveé sij taj ri'yunj man Diose me nij so' ma'. <sup>23</sup> 'O se sī taj ri'yunj manj ro', so' me sī taj ri'yunj man Réj Diose ei. <sup>24</sup> Ne suun sa' noco' qui'yaj sunj quene'en nij so' me se ne qui'yaj a yo'ó yuvij suun sa' noco' vaa danj ma'. Ne sese ne qui'yaj suun sa' noco' yo' quene'en nij so', ne ne tumé nij so' cacun' saj ma'. Tzaj ne yaj me se aj quene'en nij so' nij suun sa' noco' qui'yaj sunj, ne quitáá ri'yunj nij so' man 'unj, man Réj Diose do', nanj adonj. <sup>25</sup> Tzaj ne nihánj me se quisij ya nu' nana nihánj nana nō rihaan

se-tucuanj Moisés nana nayaa ma'an nij so' se vaa, "Quitáa ri'yunj rma'an nij so' manj", taj se-tucuanj Moisés yo', ne veé danj qui'yaj guee nij so' nanj adonj.

<sup>26</sup> "Dan me se ca'nej 'unj Nimán Diose cavií so' rej ne Diose ca'na' so' rihaan soj, ne racuíj so' man soj, ne inanj nana ya rque so' man soj, ne asa' ca'na' Nimán Diose rihaan soj, gaa ne cataj xna'anj so' rihaan soj che'ej ei. <sup>27</sup> Ne cataj xna'anj ma'an soj che'ej, che'é rej asij guun che'ej cachéé 'unj rihaan chumii nihánj, cachéé soj gaj ei.

## 16

<sup>1</sup> "Nihánj me quisíj cataj xna'anj 'unj nu' nana nihánj rihaan soj, che'é rej na'vej raj guun na'aj soj che'é se vaa quiran' soj a. <sup>2</sup> 'O se se ca'vej rá nij sí israelitá cunu chre' soj ga nij so' rá ve' tucu'yón nij so' se-tucuanj Moisés ma'. Ne quisíj güii guun rá nij so' se vaa nuveé sij noco' man Diose me soj, ne guun rá sí ticavi' man soj se vaa ve'é uxrá 'yaj suun so' rihaan Diose gaa ticavi' so' man soj a. <sup>3</sup> Danj qui'yaj nii, che'é rej ne ne'en uxrá nii man Réj Diose do', man ma'anj do' a. <sup>4</sup> Tzaj ne nihánj me cataj xna'anj 'unj nu' nana nihánj rihaan soj, che'é rej asa' quiran' soj nu' sayuun nihánj, ne ninuj rá soj se vaa aj cataj xna'anj 'unj rihaan soj che'é nu' nihánj nanj adonj —taj Jesucristó rihaan nij sí tucu'yón se-nana so' a.

*Nana nihánj me taj xna'anj Jesucristó se vaa ca'anj so' ne ca'na' Nimán Diose rihaan ní' a*

Gaa ne cataj uún Jesucristó a:

—Ne cataj xna'anj 'unj nu' nana nihánj rihaan soj gaa guun che'e soj cachéé soj gaj, che'é se cachéé ma'anj ga soj, ne che'é dan ne cachiiin nana vaa danj rihaan soj ma'. <sup>5</sup> Tzaj ne cuano nihánj me se quinán' uún 'unj rihaan sí ca'néé manj rihaan chumii nihánj, ne me che'é ne xná'anj soj manj me rej ca'anj 'unj ga. <sup>6</sup> Tzaj ne che'é se cataj xna'anj 'unj rihaan

soj se vaa ca'anj 'unj ro', che'é dan nanó ndo'o rá soj ne nuu xru' rá soj chuguanj. <sup>7</sup> Tzaj ne ya vaa nana nihánj nana cataj xna'anj 'unj rihaan soj, se vaa cavií sa' soj doj che'é se ca'anj 'unj adonj. 'O se sese se ca'anj 'unj, ne se ca'na' Nimán Diose rihaan soj ma'. Tzaj ne sese ca'anj 'unj, ne ca'nej 'unj man so' rihaan soj adonj. <sup>8</sup> Ne asa' quisíj ca'na' so', ne cuta' so' cacun' xráá nij sí man rihaan chumii nihánj se vaa tumé nij so' cacun' do', se vaa ataa cunu sa' nij so' rihaan Diose do', se vaa ca'ne' ya Diose cacun' che'é nij so' do' a. <sup>9</sup> Dan me se che'é se ne cuchuman rá nij yuvií ni'yaj nij so' manj ro', che'é dan cataj Nimán Diose se vaa tumé nij so' cacun' a. <sup>10</sup> Che'é se cavií 'unj quinán' 'unj rej yanj Réj Diose ne se quene'en soj doj manj ro', che'é dan cataj Nimán Diose se vaa ataa cunu sa' nij yuvií rihaan Diose a. <sup>11</sup> Che'é se aj ca'ne' Diose cacun' che'é sí chree sí uun chij rihaan chumii nihánj ro', che'é dan cataj Nimán Diose se vaa ca'ne' Diose cacun' che'é ma'an nij yuvií uún adonj.

<sup>12</sup> "Dan me se vaa uxrá doj nana me raj cataj xna'anj 'unj rihaan soj, tzaj ne se guun nucuaj soj cunō soj nana yo' cuano a ma'. <sup>13</sup> Tzaj ne asa' quisíj ca'na' Nimán Diose yo', ne tucu'yón so' nu' nana ya rihaan soj nanj ei. 'O se sij a'mii inanj nana ya me so' adonj. 'O se se ca'mii so' nana cavií raá so' ma'. Tananj ca'mii so' inanj nana cataj xna'anj Diose cunō so', ne dan me se cataj xna'anj so' che'é se vaa ca'na' rihaan soj rej rihaan soj nanj adonj. <sup>14</sup> Ca'mii sa' so' che'é 'unj, che'é se nicaj so' se-nanaj, ne nicaj so' nu' si'yáj, ne cataj xna'anj so' nana yo' rihaan soj chuguanj. <sup>15</sup> Nu' se nicaj Réj Diose me se si'yáj me yo' ei. Che'é dan cataj 'unj se vaa nicaj so' si'yáj, ne tijaan so' rihaan soj a —taj Jesucristó rihaan nij sí tucu'yón se-nana so' a.

*Nana nihánj me taj xna'anj Jesucristó che'é güii guun niha' rá nij sí tucu'yón se-nana so' a*



16 Gaa ne cataj uún Jesucristó:

—Cachen doj, gaa ne se quene'en soj manj ma'. Gaa ne cachēn doj uún, gaa ne quene'en uún soj manj chuguanj —taj Jesucristó rihaan nij sí tucu'yón se-nānā so' a.

17 Che'é dan xná'anj nij sí tucu'yón se-nānā so' man tuvi' nij so', cataj nij so':

—Me che'é ca'mii so' nana vaa danj se vaa, “Cachen doj, gaa ne se quene'en soj manj, ne cachēn doj uún, gaa ne quene'en uún soj manj, che'é se cavii 'unj quínán' 'unj rej yanj Réj Diose a”. Me che'é tu'va so' danj, rá soj ga —taj nij sí tucu'yón se-nānā Jesucristó, xná'anj nij so' man tuvi' nij so' a.

18 Che'é dan xná'anj uún nij so', cataj nij so':

—Me che'é ca'mii so' nana “cachen doj” ga. 'O se ne ne'en uxrá núj daj taj so' a ma' —taj nij so' rihaan tuvi' nij so' a.

19 Quene'en Jesucristó se vaa me rá nij so' xná'anj nij so' man so', ne che'é dan xná'anj ma'an so' man nij so', cataj so':

—Me che'é xná'anj ndo'o soj man tuvi' soj che'é nana ca'mij, se vaa cachēn doj, gaa ne se quene'en uún soj manj, gaa ne cachēn doj uún, gaa ne quene'en uún soj manj ga.

20 Cuanō nihánj me cataj yá yá 'unj rihaan soj se vaa ta'vee soj ne quinanō ndo'o rá soj, tzaj ne guun niha' rá nij sí man rihaan chumij nihánj adonj. Nda' se quinanō ndo'o rá soj, tzaj ne cachēn doj, gaa ne guun niha' uxrá nimán soj nanj ei. 21 Dan me se chana uchruj ne'ej me se nanó ndo'o rá no', che'é se daj doj quisij orá cuchruj no' ne'ej, tzaj ne gaa quisij ca'ngaa ne'ej, ne ni'yón no' nu' sayuun quiran' no' nanj ei. 'O se uun niha' ndo'o rá no' che'é se ca'ngaa yuvij rihaan chumij nanj adonj. 22 Ne xa' soj, tzaj ne cuanō nihánj me se nanó rá soj, tzaj ne vaa güii quene'en uún 'unj man soj, gaa ne guun niha' uxrá rá soj, ne taj vaj a doj sí ca'nee se niha' nimán soj a ma'. 23 Ne güii dan me se se xná'anj

soj a doj nana manj a ma'. Ya ya cataj xna'anj 'unj rihaan soj cuanō se vaa me ma'an rasuun cachinj ni'yaj soj rihaan Réj Diose ne cata' tu'va soj se-chuvij, ne rque so' nu' yo' man soj adonj. 24 Dan me se nda' se sij noco' manj me soj, tzaj ne gaa rque me se ne cachinj ni'yaj soj a doj rasuun rihaan Diose ma'. Cachinj ni'yaj soj, ne quirí' soj ei. Ndaa síj, gaa ne gaa niha' uxrá rá soj adonj —taj Jesucristó rihaan nij sí tucu'yón se-nānā so' a.

*Nana nihánj me taj xna'anj Jesucristó se vaa quinan' so' rihaan Rej so' Diose ne ca'na' uún so' rihaan chumij a*

25 Gaa ne cataj uún Jesucristó a:

—Dan me se aj ca'mii cachrón ndo'oj rihaan soj che'é rasuun nihánj, tzaj ne vaa güii, ne se ca'mii cachronj doj rihaan soj a ma'. Tananj nana nica nata' 'unj rihaan soj che'é Réj Diose a. 26 Ne güii dan me se cachinj ni'yaj soj rasuun rihaan Réj Diose, ne cata' tu'va soj se-chuvij, ne taj che'é cataj 'unj rihaan soj se vaa ma'anj cachinj ni'yaj rihaan Réj che'é soj a ma'. 27 'O se ma'an Réj Diose 'ee rá man soj, che'é se sij aráj cochroj rihanj me soj, ne amán rá soj se vaa cavii 'unj rihaan Réj Diose nanj á. 28 Dan me se cavii 'unj rihaan Réj Diose, ne ca'ná' 'unj rihaan chumij nihánj, gaa ne cavii uún 'unj rihaan chumij nihánj, ne nucui' uún 'unj rihaan Réj Diose adonj —taj Jesucristó rihaan nij sí tucu'yón se-nānā so' a.

29 Gaa ne cataj nij sí tucu'yón se-nānā so' a:

—Cuanō nihánj me se nana nica a'mii so' no núj, ne a doj ne ca'mij cachrón so' ma'. 30 Nihánj me se ne'en núj se vaa ne'én so' cunudanj, ne ndaa ne'én so' me nana uun rá yuvij xna'anj yuvij mán so' a. Che'é dan amán rá núj se vaa cavii so' rihaan Diose nanj á —taj nij sí tucu'yón se-nānā Jesucristó a.

31 Gaa ne xná'anj Jesucristó man nij so', cataj so':

—Ndaa yaj cuchumán ya rá soj na'. 32 Dan me se quisij güii, ne veé aj

quisíj güii yo', ne cha'nuu soj, ne ino rej cunanj 'o 'o soj, ca'anj soj, ne tanáj soj man orún' 'unj nanj á. Tzaj ne se quináj orún' 'unj ma'. 'O se nicun' Réj Diose gaj adonj. <sup>33</sup> Nu' nana nihánj ca'mij rihaan soj, che'é se me raj gaa xej nimán soj che'é rej noco' soj manj, tzaj ne quiran' soj sayuun rihaan chumij nihánj, tzaj ne vaa che'é guun niha' rá soj, ne guun ya ya rá soj se vaa 'unj nihánj qui'yaj canaán ya rihaan chumij nihánj ei —taj Jesucristó rihaan nij sí tucu'yón se-nana so' a.

## 17

*Nana nihánj taj xna'anj daj ca'mii Jesucristó gaa cachín ni'yaj so' rihaan Rej so' Diose a*

<sup>1</sup> Quisíj ca'mii Jesucristó nana dan rihaan nij sí tucu'yón se-nana so', gaa ne naxcaj rihaan so', ni'yaj so' rej xta', ne cataj so':

—Aj quisíj orá yo', Ataj. Ve'é cavii 'unj sij ta'nij so', qui'yáa so', gaa ne ve'é ca'mii yuvii che'é so', qui'yáj, <sup>2</sup> che'é se guun chij 'unj rihaan cunudanj yuvii, qui'yáa so' a. Ne che'é dan nu' nij sí rqué so' manj me se gaa i'na' nij so' nu' cavii nu' ca'anj, qui'yáj a. <sup>3</sup> Ne sí gaa i'na' nu' cavii nu' ca'anj me se so' me sí ne'en mán so' do', mán 'unj do' a. Dan me se orún' so' me Diose ya, ne 'unj Jesucristó me sí ca'née so' rihaan chumij nihánj adonj. <sup>4</sup> Dan me se aj qui'yaj sunj nu' suun ca'né so' rihanj, ne che'é dan aj ca'mii sa' nij yuvii man rihaan chumij nihánj che'é so' nanj adonj. <sup>5</sup> Ne cuano nihánj me se qui'yáa so' cavii sa' 'unj ga ma'án so', Ataj Chij, ndaa vaa cavii sa' 'unj ga so' asij ataa guun chumij nihánj a.

<sup>6</sup> “Ne xa' nij sí rqué so' manj sí cavii rihaan chumij nihánj, tzaj ne cataj xna'anj 'unj se-nana so' rihaan nij so', ne sij cuno rihaan so' me nij so', ne rqué so' man nij so' rihanj, ne aj canoco' nij so' se-nana so' nanj á. <sup>7</sup> Nihánj me se ne'en nij so' se vaa nij rasuun nicaj 'unj me se ma'án so'

me sí rqué nu' rasuun yo' manj nanj adonj. <sup>8</sup> 'O se cataj xna'anj 'unj nu' nana rqué so' manj rihaan nij so', ne cuno nij so', ne ne'en ya nij so' se vaa cavii 'unj rihaan so', ne amán rá nij so' se vaa ca'née so' manj rihaan chumij nihánj a.

<sup>9</sup> “Nihánj me se achín ni'yáa 'unj rihaan so' che'é nij so' a. Ne xa' che'é nij sí man rihaan chumij nihánj, tzaj ne se cachín ni'yáa 'unj che'é cunudanj nij so' ma'. Maan inanj che'é nij sí rqué so' manj me cachinj ni'yáa 'unj rihaan so' adonj. 'O se sij uno rihaan so' me nij so' nanj á. <sup>10</sup> Ne nij sí noco' manj me se noco' nij so' mán so', ne nij sí noco' mán so' ro', noco' manj, ne aj cavii sa' 'unj, qui'yaj nij so' nanj á. <sup>11</sup> Ne nihánj me se nuví 'unj yáan rihaan chumij nihánj a ma'. 'O se nij sí nihánj yáan rihaan chumij nihánj adonj. 'Unj me se quinán' 'unj rej yanj so' nanj adonj. Dan me se nij sí rqué so' manj me se qui'yáa so' se ndo'o, ne cutumé so' man nij so', che'é rej yo'o cuno nij so' rihaan so', Ataj Chij. Ne cyaan gaa rá nij so' ga ní ei. <sup>12</sup> Gaa cayáan 'unj ga nij so' me se tumej man nij so' cuno nij so' rihaan so' a. Che'é se rqué so' man nij so' rihanj ro', che'é dan ve'é tumej man nij so' a. Ne cunaj cutumej man nij so' adonj. Ne a 'o nij so' ne ca'anj ni'ya, qui'yáj ma'. Tzaj ne quene'én so' se vaa ca'anj ni'ya yo'o tuvi' nij so', ne orún' so' ca'anj ni'ya, ne dan me se quisij ya nu' nana no rihaan daán so' adonj.

<sup>13</sup> “Nihánj me se quinán' 'unj rej yanj so', ne a'mii 'unj nu' nana nihánj gaa vaj 'unj rihaan chumij nihánj, che'é se me raj gaa niha' uxrá rá nij so' ndaa se vaa niha' rá ma'anj adonj. <sup>14</sup> Aj rquej se-nana so' rihaan nij so', ne che'é dan táa ri'yunj nij sí man rihaan chumij nihánj ni'yaj nij so' man nij sí rqué so' manj a. 'O se ase vaa 'unj ro', danj vaa nij sí rqué so' manj, ne nuveé sij man rihaan chumij nihánj me nij so' a ma'.

<sup>15</sup> “'O se se cachín ni'yáa 'unj se vaa ca'neé so' man nij so' rihaan chumij

nihánj ma'. 'O se me rá 'unj cutumé so' man nij so' se cunuu chí'ii nimán nij so' a man adonj. <sup>16</sup> Dan me se ase vaa 'unj vaa nij so', ne nuveé sij man rihaan chumiij nihánj me nij so' ma'. <sup>17</sup> Inañj nana ya cunō nij so', qui'yáá so', gaa ne sa' inañj gaa nij so' rihaan so' á. Ne se-nana ma'án so' me nana ya yo' ei. <sup>18</sup> Dan me se ca'néé 'unj man nij so' rihaan chumiij nihánj, ndaa vaa ca'néé so' man ma'anj rihaan chumiij nihánj a. <sup>19</sup> Ne nihánj me se inañj qui'yaj sunj rihaan so' cavi' 'unj che'é nij so', che'é rej cunuu sa' ya nij so' rihaan so' adonj.

<sup>20</sup> “Ne nuveé inañj che'é nij sí nihánj me achíin nì'yáj rihaan so' a ma'. Tanañj achíin nì'yáá 'unj che'é nij sí cunō se-nana so' ne cuchuman rá nì'yaj manj vaa güii, qui'yaj nij sí nihánj sí nata' se-nana so' nanj adonj. <sup>21</sup> Dan me se, né so' ga 'unj, Ataj Chij, ne né 'unj ga so' a. Ne 'o rcua'aan ní', ne dan me se achíin nì'yáá 'unj che'é taran' nij so' se vaa cyaan gaa rá taran' nij so' uún, ne yo'ō noco' nij so' man ní', ne che'é dan cuchuman rá nij sí man rihaan chumiij nihánj se vaa ca'néé so' manj rihaan chumiij nihánj a. <sup>22</sup> Ne ase vaa cavii sa' 'unj qui'yáá so' ro', danj cavii sa' nij so', qui'yáj, che'é se me rá 'unj cyaan gaa rá nij so' ndaa rá se vaa 'yaj ma'an ní' a. <sup>23</sup> Dan me se cayáán 'unj ga nij so' ndaa vaa yáán so' ga 'unj, gaa ne quisij nij so' narí' nij so' nu' nana ya, ne ase vaa orún' yuvi ro', danj gaa nij so' a. Ndaa síj, gaa ne quene'en nij sí man rihaan chumiij nihánj se vaa ca'néé so' manj ne 'ee rá so' man nij sí rqué so' manj ndaa vaa 'ee rá so' manj adonj.

<sup>24</sup> “Ne xa' nij sí rqué so' manj, tzaj ne me rá 'unj cayáán nij so' ga 'unj rej cayáán 'unj, Ataj. 'O se me rá 'unj quene'en nij so' se vaa cavii sa' 'unj qui'yáá so' á. 'O se asij ataa qui'yáá so' chumiij nihánj me se aj 'ee rá so' manj, ne cavii sa' 'unj, qui'yáá so' ei. <sup>25</sup> Ataj Chij, sa' inañj 'yáá so' ei. Tzaj ne ne'en nij sí man rihaan chumiij

nihánj mán so' ma'. Tzaj ne 'unj me se quene'en mán so', ne quene'en nij sí nihánj se vaa ca'néé so' manj rihaan chumiij nihánj a. <sup>26</sup> Ne cataj xna'anj 'unj rihaan nij so' daj sij mé so', ne cataj 'unj doj rihaan nij so', che'é rej gaa 'ee rá so' man nij so' ndaa vaa 'ee rá so' manj, ne cayáán 'unj ga nij so' a —taj Jesucristó, cachíin nì'yaj so' rihaan Díose a.

## 18

*Nana nihánj taj xna'anj daj guun gaa quita'aa nij tanuu man Jesucristó a*

<sup>1</sup> Gaa quisij ca'mii Jesucristó nu' nana vaa danj, gaa ne cavii so' ga nij sí tucuyón se-nana so', ne ca'anj nij so' rej xco chráá cu'naj Cedrón, ne cuchí' nij so' 'o naa chruun, ne catúj taran' nij so' a. <sup>2</sup> Ne sí cu'naj Judas sí tacuachén man Jesucristó rihaan nij sí taj ri'yunj man Jesucristó me se aj quene'en so' rej yo' a. 'O se aj guun que'ee ndo'o cunuu chre' Jesucristó rej yo' ga nij sí tucuyón se-nana so' a. <sup>3</sup> Dan me se nicaj Judas man nij tanuu do', man nij se-mozó nij xrej ata suun nocōo doj do', man nij se-mozó nij sí fariseo do', ca'anj so' rej yo' a. Ne nicaj nij so' aga' ya'an do', ca' acaa do', neé espadá do', nicaj nij so' vaj nij so' rej yanj Jesucristó ga nij sí tucuyón se-nana so' a. <sup>4</sup> Dan me se quene'en Jesucristó nu' se vaa quiran' so', tzaj ne curihanj so', ne cataj so' rihaan nij so' a:

—Me sí nano' soj ga —taj so', xná'anj so' man nij so' a.

<sup>5</sup> Gaa ne cataj nij so' rihaan so' a:

—Nano' núj man Jesús sí cavii chuman' Nazaret a —taj nij so' rihaan Jesucristó a.

—'Unj me so' ei —taj Jesucristó rihaan nij so' a.

Dan me se canicun' sí cu'naj Judas ga nij so' 'na' so' ga nij so' a. <sup>6</sup> Dan me se gaa cataj Jesucristó se vaa ma'an so' me sí nano' nij so', gaa ne nu' naxuun nij so' man nij so', ne naxru' nij so' rihaan yo'óo a. <sup>7</sup> Gaa ne xná'anj uún Jesucristó man nij so', cataj so' a:

—Me síi nano' soj ga —taj uún Jesucristó a.

Gaa ne cataj uún nij so':

—Jesús síi cavii chuman' Nazaret a —taj uún nij so' a.

<sup>8</sup> Gaa ne cataj Jesucristó:

—Aj cataj xna'anj 'unj rihaan soj se vaa 'unj me so' ei. Sese 'unj me síi nano' soj, ne ca'ne' rá soj ca'anj nij síi nihánj á —taj Jesucristó rihaan nij so' a.

<sup>9</sup> Danj ca'mii so' rihaan nij tanuu che'é rej ca'vee quisij ya nu' nana ca'mii so' rihaan Diose se vaa ne ca'anj ni'ya a 'ó nij síi rqué Diose man so' a.

<sup>10</sup> Dan me se nicaj síi cu'naj Simón Pedró neê espadá, ne quirii so' taneê so', ne go' so' raá se-mozó xrej atá suun nocoo doj, ne veé danj güej nuj xréé so' rej nuva' so', qui'yaj Pedró a. Ne mozó yo' ro', cu'naj Malco a.

<sup>11</sup> Dan me se cataj Jesucristó rihaan Pedró a:

—Na'nej sa' so' taneê so' rque nuj á. Dan me se ase vaa 'o tazá nuu na vinó rqué Réj Diose manj co'oj ro', danj vaa sayuun nihánj rihanj, ne me che'é na'vej rá so' co'oj man yo' ga —taj Jesucristó, xná'anj so' man Pedró a.

*Nana nihánj taj xna'anj se vaa ca'anj nicaj nii man Jesucristó rihaan síi cu'naj Anás a*

<sup>12</sup> Dan me se quita'aa nij tanuu do', síi uun chij rihaan nij tanuu do', nij se-mozó nij síi uun chij rihaan nij yuvii israelitá do', man Jesucristó, ne numíj nij so' ra'a so', <sup>13</sup> ne asino yaan ca'anj nicaj nij so' man so' rihaan síi cu'naj Anás a. Dan me se síi cu'naj Anás yo' me se rej chej síi cu'naj Caifás me so', ne Caifás me síi guun xrej atá suun nocoo doj yo' yo' a. <sup>14</sup> Ma'an síi cu'naj Caifás me síi narqué chrej rihaan nij síi uun chij rihaan nij yuvii israelitá se vaa che'é caví' 'o snó'o che'é cunudanj nij yuvii israelitá yo' a.

*Nana nihánj taj xna'anj se vaa cataj síi cu'naj Pedró se vaa nuveé sij nocoo man Jesucristó me so' a*

<sup>15</sup> Dan me se canoco' Simón Pedró do', yo'ó síi tucu'yón se-nana Jesucristó do', rej xco Jesucristó a. Ne yo'ó so' me se sij ne'en xrej atá suun nocoo doj man me so', ne catúj so' ga Jesucristó ta'yaa tucua' xrej atá suun nocoo doj a. <sup>16</sup> Ne Pedró me se quináj so' xe' rej nichrun' ta'yaa a. Che'é dan curihanj yo'ó síi tucu'yón se-nana Jesucristó yo', ne ca'mii so' ga chana tumé ta'yaa, ne catúj Pedró uún, qui'yaj so' a. <sup>17</sup> Dan me se xná'anj chana tumé ta'yaa man Pedró, cataj no':

—Ne nuvé so' me síi tucu'yón se-nana síi nihánj na' —taj no', xná'anj no' man Pedró a.

Ne cataj so':

—Taj ma' —taj Pedró yo' a.

<sup>18</sup> Ne nicun' nij mozó do', nij tanuu do', rej nachráj nii ya'an a. 'Q se acoj tiha' rej man nij so', ne cunuu guun nij so' ya'an a. Ne ca'anj Pedró uún cunuu guun ma'an so' ya'an a.

*Nana nihánj taj xna'anj daj ca'mii Jesucristó rihaan síi cu'naj Anás a*

<sup>19</sup> Dan me se síi cu'naj Anás síi cayáan xrej atá suun nocoo doj asij rque doj ro', xná'anj so' man Jesucristó che'é nij síi tucu'yón se-nana Jesucristó do', che'é ma'an nana tucu'yón Jesucristó man nij so' do' a. <sup>20</sup> Gaa ne cataj Jesucristó rihaan nij so' a:

—'Unj ro', ca'mii ranga' rihaan cunudanj nij yuvii a. Nu' güii tucu'yón 'unj se-nanaj rá ve' tucu'yón ní' se-tucuanj Moisés do', rá nuvíi nocoo do', ne yo' me rej nuu chre' taran' soj sij uun chij rihaan nij yuvii israelitá a. Ne taj vaj nana ne ca'mii yuve 'unj ma'. <sup>21</sup> Me che'é xná'anj soj manj ga. Xna'anj soj man nij yuvii cuno nana ca'mij á. Veé nij so' ne'en ya daj ca'mii 'unj nanj ei —taj Jesucristó rihaan síi cu'naj Anás yo' a.

<sup>22</sup> Quisij ca'mii Jesucristó danj, gaa ne coxro yo'q mozó nicun' rej yo' xruu Jesucristó, ne cataj so':



—Me che'é ca'mii so' danj rihaan xrej atā suun nocoo doj —taj so', guun yuvaa so' man Jesucristó a.

<sup>23</sup> Gaa ne cataj Jesucristó rihaan so' a:

—Sese ca'mii chi'ii 'unj, ne cataj so' me nana chi'ii ca'mij á. Tzaj ne sese ca'mii sa' 'unj, ne me che'é coxro so' manj ga —taj Jesucristó rihaan mozó coxro man so' a.

<sup>24</sup> Veé yo', gaa ne ca'née síí cu'naj Anás man Jesucristó rihaan síí cu'naj Caifás síí cayáan xrej atā suun nocoo doj, ne veé 'o danj numii so' ca'anj so' a.

*Nana nihánj taj xna'anj se vaa yavíj cataj Pedró se vaa nuveé sij nocoo' man Jesucristó me so' ma'*

<sup>25</sup> Dan me se nicun' Simón Pedró cunuu guun so' ya'an a. Gaa ne cataj 'o yuvii rihaan so':

—Nuveé yo'o síí nocoo' man so' mé so' na' —taj yuvii, xná'anj yuvii man so' a.

Ne cataj Pedró:

—Taj ma' —taj so' a.

<sup>26</sup> Gaa ne xná'anj yo'o se-mozó xrej atā suun nocoo doj man so', ne tuví' síí güéj xrée qui'yaj Pedró me so', ne cataj so':

—Nuveé so' me síí vaj ga Jesucristó rque naa chruun quene'enj na' —taj so', xná'anj so' man Pedró a.

<sup>27</sup> Gaa ne cataj uún Pedró se vaa nuveé tuví' Jesucristó me so' a. Ne nu' ca'mii so' danj, gaa ne nu' caguá'j to'loo a.

*Nana nihánj taj xna'anj che'é nana ca'mii Jesucristó ga síí cu'naj Pilato a*

<sup>28</sup> Dan me se nicaj nij mozó do', nij tanuu do', man Jesucristó curihanj nij so' rej ne síí cu'naj Caifás, ne ca'anj nij so' tucua suun a. Na'yaan uxrá me yo' a. Ne ne catuu nij síí israelitá rá tucua suun a ma'. 'O se me rá nij so' cha nij so' cha'anj pascuá, ne che'é dan ne ca'vej rá nij so' guun chi'ii nij so' rihaan Diose qui'yaj tucua suun yo' a. <sup>29</sup> Che'é dan curihanj ma'an síí cu'naj Pilato rej nicun' nij so' a. Ne xná'anj síí cu'naj Pilato man nij so', cataj so':

—Me cacun' cuta' soj xráá snó'o nihánj, rá soj ga —taj so' rihaan nij yuvii ca'na' ga Jesucristó a.

<sup>30</sup> Gaa ne cataj nij so' rihaan síí cu'naj Pilato a:

—Sese nuveé sij 'yaj chi'ii me síí nihánj, ne ne tacuachén núj man so' ndaa rihaan so' tzaj ma' —taj nij yuvii rihaan síí cu'naj Pilato a.

<sup>31</sup> Che'é dan cataj síí cu'naj Pilato rihaan nij so' a:

—Nícaj soj man so', ne ca'ne' soj cacun' che'é so', qui'yaj soj ndaa vaa tucuaán nocoo' ma'an soj á —taj síí cu'naj Pilato rihaan nij so' a.

—Tzaj ne no xcúun so' cavi' so', rá núj, tzaj ne na'vej rá soj sij cavii chuman' Romá ticavi' núj man a 'ó yuvii a ma' —taj nij so' rihaan Pilato a.

<sup>32</sup> Che'é se ca'mii nij so' danj ro', che'é dan quisíj ya nu' se-nana Jesucristó nana a'mii che'é daj qui'yaj nii man so' ticavi' nii man so' a. 'O se orún' nij yuvii man chuman' Romá cachrón rihaan rcutzé man yuvii tumé cacun' a.

<sup>33</sup> Dan me se catúj uún síí cu'naj Pilato tucua suun, ne canacúun so' ca'na' Jesucristó, ne xná'anj so' man Jesucristó, cataj so':

—Ma'an so' me síí nicaj suun rey uun chij rihaan nij yuvii israelitá na' —taj síí cu'naj Pilato rihaan Jesucristó a.

<sup>34</sup> Gaa ne xná'anj Jesucristó man so', cataj Jesucristó:

—Ma'an so' cavii raa nana vaa danj ca'mii so' na'. Ase yo'ó yuvii cataj xna'anj rihaan so' che'ej xa' —taj Jesucristó, xná'anj so' man síí cu'naj Pilato a.

<sup>35</sup> Gaa ne xná'anj síí cu'naj Pilato man so', cataj so':

—Sij israelitá mé 'unj, rá so' na'. Ne'én 'unj se-tucuanj soj, rá so' na'. 'O se nij tuví' so' do', ma'an nij xrej atā suun nocoo doj do', tacuachén man so' rihanj á. Me cacun' tumé so' ga —taj síí cu'naj Pilato, xná'anj so' man Jesucristó a.

<sup>36</sup> Gaa ne cataj Jesucristó:

—'O se nuveé rihaan chumiij nihánj me rej uun chij 'unj ma'. Sese rihaan chumiij nihánj me rej uun chij 'unj, ne gaa tanuu 'yaj suun rihanj, ne cavii nij tanuu, cunu' nij tanuu, che'é rej se cata'aa nij síi uun chij rihaan nij yuvii israelitá manj tzaj adonj. Tzaj ne nuveé rihaan chumiij nihánj me rej guun chij 'unj ma' —taj Jesucristó a.

<sup>37</sup> Gaa ne xná'anj síi cu'naj Pilato man so', cataj so':

—Che'é dan síi nicaj suun rey mé so' na'. Yá na' —taj Pilato, xná'anj so' man Jesucristó a.

Gaa ne cataj Jesucristó rihaan so' a:

—Yá uxrá vaa nana ca'mii ma'án so' se vaa sij nicaj suun rey mej á. Ne nihánj me cataj xna'anj 'unj rihaan so' me che'é ca'ngaa 'unj ne me che'é ca'ná' 'unj rihaan chumiij nihánj ei. Dan me se ca'ná' 'unj cataj xna'anj 'unj nana ya rihaan yuvii a. Ne cunudanj nij síi ya ro', uno nana ya a'mij adonj —taj Jesucristó rihaan Pilato a.

<sup>38</sup> Ne cataj Pilato rihaan so':

—A me nana cu'naj nana ya ga —taj Pilato, xná'anj Pilato man Jesucristó a.

*Nana nihánj taj xna'anj daj qui'yaj síi cu'naj Pilato gaa ca'ne' so' cacun' che'é Jesucristó a*

Ne gaa quisij ca'mii síi cu'naj Pilato nana vaa danj ga Jesucristó, ne curihanj uún so' rej nicun' nij síi uun chij rihaan nij yuvii israelitá, ne cataj so' rihaan nij so' a:

—Taj vaj a doj cacun' tumé so' narí' 'unj a ma'. <sup>39</sup> Tzaj ne vaa yo'o tucuáán noco' ní' se vaa rii 'unj 'o tuvi' soj síi 'nij taga' 'o 'o cha'anj pascuá a. Ne me rá soj quirii 'unj man ma'an síi nihánj síi nicaj suun rey uun chij rihaan soj sij israelitá na' —taj síi cu'naj Pilato, xná'anj so' man nij yuvii a.

<sup>40</sup> Che'é dan caguáj uún nij yuvii, cataj nij so':

—Se quirii so' man síi nihánj a ma'. Tananj síi cu'naj Barrabás quirii so' ei —taj nij yuvii, caguáj nij yuvii a.

Ne síi cu'naj Barrabás me se sij guun rá cunu' ga gobiernó me so' a.

## 19

<sup>1</sup> Dan me se nicaj síi cu'naj Pilato man Jesucristó, ne go' nij tanuu quartá xráá so', qui'yaj Pilato yo' a.

<sup>2</sup> Ne qui'yaj nij tanuu cachriin tanj, ne cuta' nij so' raá Jesucristó, ne na'néé nij so' yatzíj tintá sa' ndo'o man Jesucristó a. <sup>3</sup> Gaa ne cuchi' ndo'o nij so' rihaan Jesucristó, ne cataj nij so':

—Veé síi nicaj suun rey uun chij rihaan nij yuvii israelitá mé so' á —taj nij so', ca'mii tico nij so', ne coxro nij so' xruu Jesucristó a.

<sup>4</sup> Gaa ne curihanj uún síi cu'naj Pilato xe', ne cataj so' rihaan nij yuvii a:

—Ni'yaj soj ei. Curihanj uún so' rihaan soj, qui'yáj, che'é rej xcaj soj cuentá se vaa taj vaj cacun' tumé so' narí' 'unj a man chuguanj —taj Pilato rihaan nij yuvii a.

<sup>5</sup> Gaa ne curihanj Jesucristó xe', ne 'nij raá so' cachriin tanj, ne nuu so' yatzíj tintá sa' yo' a. Ne cataj Pilato rihaan nij yuvii a:

—Ni'yaj soj man snó'o nihánj vij —taj Pilato rihaan nij yuvii a.

<sup>6</sup> Dan me se gaa quene'en nij xrej atá suun noco' doj do', nij se-mozó nij so' do', man Jesucristó, ne caguáj nij so', cataj nij so':

—Cavi' so' rihaan rcutze, qui'yáá so' ei —taj nij so', caguáj nij so' a.

Gaa ne cataj Pilato rihaan nij so' a:

—Nícaj ma'an soj man so' cachron soj man so' rihaan rcutze, sese me rá soj ei. Xa' 'unj, tzaj ne taj vaj a doj cacun' tumé so' narí' 'unj a ma' —taj Pilato rihaan nij so' a.

<sup>7</sup> Gaa ne cataj nij síi uun chij rihaan nij yuvii israelitá no síi cu'naj Pilato:

—Vaa tucuáán noco' núj, ne tucuáán noco' núj taj se vaa no xcúún so' cavi' so', che'é rej cataj so' se vaa ta'nij Diose me so' adonj —taj nij so' rihaan Pilato a.

<sup>8</sup> Dan me se gaa cuno síi cu'naj Pilato nana vaa danj, gaa ne doj a cuchu'vi' so', <sup>9</sup> gaa ne catúj uún so' tucuá suun, ne xná'anj so' man Jesucristó, cataj so':

—Me rej cavii so' ga —taj so', xná'anj so' man Jesucristó a.

Tzaj ne ne ca'mii Jesucristó a 'ó nana rihaan so' a. <sup>10</sup> Che'é dan cataj Pilato rihaan so' a:

—Me che'é ne a'mii so' ga. Ne ne'én so' sese 'un̄j ro', me síi n̄o xcúún quirii mán so' taga', ne vej nó xcúún qui'yaj cachron̄ nij tanuu mán so' rihaan rcutze á. Me che'é ne acaj so' cuentá ga —taj Pilato, xná'anj so' man Jesucristó a.

<sup>11</sup> Gaa ne cataj Jesucristó rihaan so' a:

—Sese nuveé Dioḡe me síi cune' mán so' catá so' suun nihánj, ne ne guun nucuáá so' qui'yáá so' a doj rasuun asuun tzaj ma'. Che'é dan síi tacuachén manj rihaan so' me síi tumé doj cacun' rihaan so' adonj —taj Jesucristó rihaan Pilato yo' a.

<sup>12</sup> Quisij cuno Pilato nana dan, gaa ne nano' so' daj qui'yaj so', gaa ne ca'vee tinanii so' man Jesucristó a. Tzaj ne doj a caguáj nij síi uun chij rihaan nij yuvii israelitá, cataj nij so':

—Sese ca'anj uun síi nihánj, qui'yáá so', ne nuveé tuv̄i' síi nicaj suun cu'naj César mé so' ma'. 'O se síi nihánj me se sij me rá guun síi nicaj suun rey me so', ne dan me se ca'nee so' suun man síi cu'naj César, rá so', ne sij taj ri'yun̄j man síi cu'naj César me so' adonj —taj nij so', caguáj nij so' a.

<sup>13</sup> Dan me se gaa cuno Pilato nana vaa danj, gaa ne ca'anj nicaj so' man Jesucristó xe', ne ca'anj cayáán so' rihaan xrúún so' chruun xlá rej ca'ne' so' cacun' che'é yuvii a. Ne rej ne chruun xlá yo' ro', me rej cu'naj Litóstratos xna'ánj griego, ne Gabata cu'naj rej yo' xna'ánj hebreo a. <sup>14</sup> Dan me se güii 'yaj chuvii nii che'é cha'anj pascuá me yo', ne rej caxuj me yo' a. Ne cataj Pilato rihaan nij síi uun chij rihaan nij yuvii israelitá a:

—N̄i'yaj soj ei. Nihánj me síi nicaj suun rey uun chij rihaan soj chuguanj —taj so' rihaan nij yuvii a.

<sup>15</sup> Gaa ne caguáj nij yuvii, cataj nij so':

—Nicaj so' man so', ne ca'anj tanuu cachron̄ nij tanuu man so' rihaan

rcutze, qui'yáá so' cuaj ei —taj nij so' rihaan Pilato a.

Ne xná'anj Pilato man nij so', cataj so':

—Ma'an síi nicaj suun rey uun chij rihaan soj cachron̄ rihaan rcutze, rá soj a na' —taj so', xná'anj so' man nij so' a.

—Taj vaj 'ó rey ma'. Orún' síi cu'naj César me síi uun chij rihaan núj ei —taj nij xrej at̄a suun nocoo doj a.

<sup>16</sup> Gaa ne tacuachén Pilato man Jesucristó rihaan nij so' cachron̄ nij so' man so' rihaan rcutze a.

*Nana nihánj taj xna'anj daj guun gaa cachron̄ nij tanuu man Jesucristó rihaan rcutze a*

Dan me se ca'anj nicaj nij so' man Jesucristó, <sup>17</sup> ne ma'an so' catá rcutze, ne cavii so' ca'anj so' rej cu'naj tacaan cúu yave, ne rej yo' ro', cu'naj Gólgota xna'ánj hebreo a. <sup>18</sup> Ne gaa cuchi' nij so' rej yo', gaa ne cachron̄ nij tanuu man so' rihaan rcutze, ne yavij roj so' cachron̄ uún nij tanuu rihaan yavij rcutze uún, ne yo' o so' ro', nicun' rej nuva' Jesucristó, ne yo' o so' ro', nicun' rej nichruun Jesucristó, ne tanuu nicun' ma'an Jesucristó a. <sup>19</sup> Ne ca'ne' síi cu'naj Pilato suun, se vaa cano letrá rihaan 'o rcuchra', ne cano rcuchra' yo' raá rcutze, ne letrá yo' taj xna'anj me che'é cav̄i' Jesucristó a. Ne nihánj me se taj letrá n̄o rihaan rcuchra' yo', se vaa “Síi nihánj me Jesucristó síi cavii chuman' Nazaret, ne síi nicaj suun rey me so', uun chij so' rihaan nij yuvii israelitá”, taj letrá yo' a. <sup>20</sup> Dan me se nayaa que'ee nij síi israelitá nana yo' a. 'O se nichrun' naj rej cachron̄ nii man Jesucristó rihaan rcutze ga ma'an chuman' Jerusalén yo' a. Ne cachron̄ nii nana yo' xna'ánj hebreo do', xna'ánj latín do', xna'ánj griego do' a.

<sup>21</sup> Che'é dan nij xrej at̄a suun nocoo doj che'é nij yuvii israelitá ro', cataj nij ro' rihaan síi cu'naj Pilato a:

—Se guun cano letrá se vaa síi nicaj suun rey uun chij rihaan núj sij israelitá me so' ma'. Maan se cataj letrá

se vaa ma'an so' cataj se vaa sí nicaj suun rey uun chij rihaan nij yuvi israelitá me so' á —taj nij so' rihaan sí cu'naj Pilato a.

<sup>22</sup> —Aj quisíj cachrón 'unj nana cachronj nanj á —taj Pilato rihaan nij so' a.

<sup>23</sup> Dan me se gaa quisíj cachrón nij tanuu man Jesucristó rihaan rcutze, ne nicaj nij so' sagan' Jesucristó, ne cuxra' ta'aj nij so' sagan' Jesucristó, ne nicaj 'o 'o tanuu ta'aj sagan' Jesucristó yo' a. Ne vaa se-cotoó Jesucristó uún a. Ne xa' se-cotoó so', tzaj ne taj rej nuva nii se-cotoó so' ma'. Maan se orún' yatzíj me yo' gaa canánj nii man yo' a. <sup>24</sup> Che'é dan cataj nij tanuu rihaan tuvi' nij so' a:

—Se cuxra' ta'aj ní' man cotoó nihánj ma'. Maan se tico tixaj ní' se-suerté ní' che'é nihánj, ne quene'en ní' me sí nacaj man cotoó yo' ei —taj nij so' a.

Danj qui'yaj nij so', ne quisíj ya nu' nana nihánj nana no rihaan danj Diose a: “Cuxra' ta'aj nii sagan' 'unj, ne tico tixaj nii che'é se-cotoó 'unj a”, taj danj Diose a. Dan me se nij tanuu me nij sí qui'yaj danj adonj.

<sup>25</sup> Ne nichrun' nicun' nii Jesucristó do', chu'vij nii so' do', chana cu'naj Mariá nica sí cu'naj Cleofas do', chana cu'naj Mariá Magdalena do', rihaan rcutze no Jesucristó a. <sup>26</sup> Dan me se quene'en Jesucristó man nii so' do', man sí tucu'yón se-nana so' sí 'ee rá so' man do', se vaa nicun' rcua'aan roj so' rihaan so', ne cataj so' rihaan nii so':

—Sí nihánj guun ta'ní so', nahiin —taj Jesucristó no nii so' a.

<sup>27</sup> Gaa ne cataj so' rihaan sí tucu'yón se-nana so' yo' a:

—Chana nihánj guun ní so' á —taj so' rihaan sí tucu'yón se-nana so' yo' a.

Ne maan orá dan guun nii sí tucu'yón se-nana Jesucristó yo' man nii Jesucristó, ne ca'anj nicaj so' man no' ve' tucua' ma'an so' a.

*Nana nihánj taj xna'anj daj guun gaa cavi' Jesucristó a*

<sup>28</sup> Quisíj qui'yaj nij so' danj, gaa ne quene'en Jesucristó se vaa aj quisíj ya nu' se vaa taj danj Diose che'é so' a. Che'é dan cataj so':

—Nacoó 'unj na nanj á —taj so' a.

<sup>29</sup> Yanj 'o xruj nuu na vinó yuu rihaan yo'óó, ne nicaj nij so' 'o yataan esponja, ne tucua'anj nij so' yataan rque na vinó yuu yo', ne cuta' nij so' raa 'o coj hisopo, ne cachrón nij so' yataan yo' tu'va Jesucristó a. <sup>30</sup> Ne gaa quisíj co'o Jesucristó na vinó yuu nuu rque yataan yo', ne cataj so':

—Veé danj navij suun, qui'yáj a —taj so', ne ni'naa raa so', ne ca'ne' rá so', ne cavi' so' a.

*Nana nihánj taj xna'anj se vaa cho'oj 'o tanuu chruun lanzá x'núú Jesucristó a*

<sup>31</sup> Dan me se güii 'yaj chuvii nij sí israelitá cha nij so' cha'anj pascuá me yo', ne güii guee ndo'o me cuetan' a'yuj, 'yaj nij yuvi israelitá, ne ne ca'vej rá nij yuvi yo' canoco' xngá rihaan rcutze güii guee yo' a. Che'é dan me cachín ni'yaj nij sí uun chij rihaan nij yuvi israelitá rihaan sí cu'naj Pilato se vaa ca'ne' so' suun tucuachran' nii tacóo nij sí noco' rihaan rcutze yo' che'é rej ra'yanj doj cavi' nij so', gaa ne quirii yanj nii man nij sí cavi' yo' a. <sup>32</sup> Qui'yaj Pilato ndaa vaa cachín ni'yaj nij so' rihaan so', ne ca'anj nij tanuu, ne asino tucuachran' nij tanuu tacóo yo' sí noco' rej x'nuj Jesucristó, gaa ne tucuachran' uún nij tanuu tacóo sí noco' níchrej x'núú Jesucristó uún a. <sup>33</sup> Tzaj ne gaa cuchi' nij so' rej noco' ma'an Jesucristó, gaa ne xcaj nij so' cuentá se vaa aj cavi' so', ne che'é dan ne tucuachran' nij so' tacóo so' ma'.

<sup>34</sup> Tzaj ne yo' o tuvi' nij tanuu nicaj xruún so' chruun taj aga' sihaa raa, ne cho'oj so' x'núú Jesucristó, ne nu' qui'yaj so' danj, ne nu' cavi ndo'o ton do', na do', rej catúj aga' sihaa yo' a.

<sup>35</sup> Ne sí taj xna'anj nana nihánj me se sij quene'en nu' se vaa guun me so', ne ya vaa se-nana so', ne ne'en so' se vaa ya a'mii so', ne taj xna'anj so'



nu' nana nihánj che'é rej cuchuman rá soj sij nayaá nana nihánj ni'yaj soj Jesucristó a.

<sup>36</sup> 'O se guun nu' nihánj che'é rej quisij ya nu' nana nihánj nana no rihaan danj Diose, se vaa taj yo': "Se cachran' a 'ó cúu man so' ma'", taj nana no rihaan danj Diose a. <sup>37</sup> Ne yo'ó nana ro', taj: "Ni'yaj nij so' man síi cho'oj ma'an nij so' aga' man a", taj yo'ó nana no uún rihaan danj Diose a.

*Nana nihánj taj xna'anj daj guun gaa cachin' nii man Jesucristó rque yu'uj yuvej a*

<sup>38</sup> Quisij qui'yaj nij tanuu danj, gaa ne cachín ni'yaj síi cu'naj José síi cavii chuman' Arimatea rihaan síi cu'naj Pilato se vaa ca'vej rá síi cu'naj Pilato quirij yanij so' man Jesucristó a. Ne xa' síi cu'naj José yo', tzaj ne sij tucu'yón se-nana Jesucristó me so', tzaj ne maan se noco' yuve so' man Jesucristó, che'é se cuchu'vi' so' ni'yaj so' man nij síi uun chij rihaan nij yuvii israelitá a. Dan me se ca'vej rá síi cu'naj Pilato, ne che'é dan quirii yanij síi cu'naj José man Jesucristó a. <sup>39</sup> Ne vaa síi cu'naj Nicodemo uún, ne sij cuchu' rihaan Jesucristó rej nii asij rque doj me so', ne ca'anj so' ga síi cu'naj José yo', ne cata so' ico chi' kiló taj doj squíi cu'naj mirra nachej ga se cu'naj áloe a. <sup>40</sup> Dan me se tananij roj so' man Jesucristó, ne nucutáj roj so' mantá sa' man nu' nee man Jesucristó, ne caraa roj so' mirra do', áloe do', rque mantá yo' a. Dan me se tucuaán noco' nij yuvii israelitá gaa achin' nij so' man nij síi cavi' qui'yaj roj so' a.

<sup>41</sup> Dan me se nichrun' rej cachrón nii man Jesucristó rihaan rcutze ro', naj 'o naa chruun, ne rque naa yo' ro', táa yu'uj rque yuvej rej achin' nii xngá a. Tzaj ne yu'uj naca me yo', ne a 'ó xngá ne cachin' nii rque yu'uj yo' ma'. <sup>42</sup> Dan me se güii 'yaj chuvii nij síi israelitá cha' nij so' cha'anj pascuá me yo', ne nichrun' naj rej taj yu'uj yo' ga rej nicun'

rcutze yo', ne che'é dan cachin' roj so' man Jesucristó rque yu'uj yo' a.

## 20

*Nana nihánj taj xna'anj daj guun gaa quisij cunuu i'na' uún Jesucristó a*

<sup>1</sup> Dan me se taxrej cotungó vaa rmi' doj, ne ca'anj chana cu'naj Mariá Magdalena rej taj yu'uj rque yuvej yo', ne quene'en no' se vaa taj yanij yuvej aráan rihaan yu'uj yo' a. <sup>2</sup> Che'é dan cunanj no', ne cuchu' no' rihaan síi cu'naj Simón Pedró do', rihaan yo'ó síi tucu'yón se-nana Jesucristó síi 'ee rá Jesucristó man do' a. Ne cataj no' rihaan roj so':

—Quirii nii man síi 'nij ra'a man ní' rque yu'uj nanj á. Ne ne me rej ca'anj nicaj nii man so' a ma' —taj no' rihaan roj so' a.

<sup>3</sup> Che'é dan cavii síi cu'naj Pedró ga yo'ó síi tucu'yón se-nana Jesucristó yo', ne ca'anj roj so' rej taj yu'uj yo', <sup>4</sup> ne cunanj roj so', ne ra'yanj doj cunanj yo'ó so' rihaan síi cu'naj Pedró, ne so' me síi cuchu' asino yaan doj tu'va yu'uj yo' a. <sup>5</sup> Gaa ne ni'yaj so' rque yu'uj yo', ne quene'en so' rej naj nij yatzíj, tzaj ne ne catuu so' ma'. <sup>6</sup> Dan me se cuchu' síi cu'naj Pedró síi noco' xcó so', gaa ne catúj ma'an Pedró rque yu'uj yo', ne quene'en so' rej naj nij yatzíj, <sup>7</sup> ne quene'en so' vitó aráan raá Jesucristó, tzaj ne nuvi' yo' naj rcua'aan ga yo'ó nij yatzíj a ma'. Tananj rej yanij quinaj orún' yo', ne naculu' yo' a. <sup>8</sup> Dan me se catúj uún yo'ó síi tucu'yón se-nana Jesucristó síi cuchu' asino yaan, ne quene'en so' nij yatzíj yo', gaa ne cuchuman' rá so' se-nana chana cu'naj Mariá Magdalena yo' a. <sup>9</sup> 'O se ataa nari' roj so' nana no rihaan danj Diose se vaa cavi' Jesucristó gaa ne cunuu i'na' uún so' a. <sup>10</sup> Dan me se cavii uún roj síi tucu'yón se-nana Jesucristó yo', quinan' roj so' a.

*Nana nihánj taj xna'anj se vaa quene'en chana cu'naj Mariá Magdalena man Jesucristó a*

11 Ne canicun' chana cu'naj Mariá nichrun' tu'va yu'uj yo', ne ta'vee ndo'o no' a. 12 Ne quene'en no' vij se-mozó Diose nuu yatzíj catzii, ne ne roj so' rej cachin' nii man Jesucristó a. Yo'o so' ne rej raá Jesucristó, ne yo'ó so' ne rej tacoj Jesucristó a. 13 Gaa ne xná'anj roj so' man chana cu'naj Mariá, cataj roj so':

—Me che'é ta'veé so', ga man nocoj —taj roj so' no no' a.

—Ta'veé 'unj che'é se quirii nii man cúu man síi 'nij ra'a manj, ne ne me rej ca'anj nicaj nii man so' a ma' —taj no' rihaan roj so' a.

14 Síj ca'mii no' danj, gaa ne canicaj no' rej xco no', ne quene'en no' man Jesucristó, nicun' so' rihaan no' a. Tzaj ne ne cunu yaan no' man Jesucristó a. 15 Gaa ne xná'anj Jesucristó man no', cataj so':

—Me che'é ta'veé so', ga man nocoj. Me síi nanó' so' ga —taj Jesucristó no no' a.

Dan me se guun rá no' se vaa sij tumé naa naj yo' me síi ca'mii ga no', rá no', ne che'é dan cataj no':

—Sese quirii yaníj so' man so', ne cataj xna'anj so' rihanj me rej ca'anj nicaj so' man so', ne nicaj 'unj man so' ca'anj 'unj á —taj no' rihaan síi nicun' rihaan no' a.

16 Gaa ne cataj Jesucristó:

—Mariá —taj so' a.

Canicaj no', cataj no':

—Raboni —taj no' rihaan so' xna'ánj hebreo, ne dan me se “maestró” me se taj nana ca'mii no' rihaan so' a.

17 Gaa ne cataj Jesucristó rihaan no' a:

—Ca'ne' rá so', se catzíj so' doj manj ma'. 'O se ataa cavii uún 'unj quínán' 'unj rihaan Réj Diose, ne me rá 'unj ca'anj so' rihaan nij tinúu 'unj ne cataj xna'anj so' rihaan nij so' se vaa cavii 'unj quínán' 'unj rihaan Réj, ne so' me se Rej soj me uún so', ne Diose síi noco' 'unj me so', ne Diose síi noco' soj me uún so' adonj —taj Jesucristó rihaan chana cu'naj Mariá a.

18 Dan me se ca'anj chana cu'naj Mariá Magdalena, ne nata' no' rihaan nij síi tucu'yón se-nana Jesucristó se vaa quene'en no' man síi 'nij ra'a man ní', ne nata' no' nij nana cataj Jesucristó rihaan no' a.

*Nana nihánj taj xna'anj daj guun gaa cuchí' Jesucristó rihaan nij síi tucu'yón se-nana so' a*

19 Dan me se rej ti'nuu ma'an güii cotungó yo' me se caráán nij síi tucu'yón se-nana Jesucristó ta'yaa rihaan ve' man nij so', che'é se cuchu'vi' nij so' ni'yaj nij so' nij síi uun chij rihaan nij yuvií israelitá a. Gaa ne ca'na' Jesucristó, ne canicun' so' tanuu rej man nij so', ne cataj so':

—Gaa díj nimán soj ei —taj Jesucristó rihaan nij so' a.

20 Quisíj ca'mii so' danj, gaa ne tihaan so' ra'a so' tihaan so' x'núu so' tihaan so' rihaan nij so' a. Gaa quene'en nij so' nu' yo', gaa ne guun niha' uxrá rá nij síi tucu'yón se-nana so' ni'yaj nij so' man síi 'nij ra'a man ní' a.

21 Dan me se yuún ca'mii Jesucristó rihaan nij so', cataj so':

—Gaa díj nimán soj ei. Ase vaa ca'neé Réj manj ro', danj gaa ca'nej 'unj man soj nu' rihaan chumii nihánj adonj —taj Jesucristó rihaan nij so' a.

22 Quisíj ca'mii Jesucristó danj, gaa ne ca'yánj Jesucristó rihaan nij so', ne cataj so':

—Nícaj soj Nimán Diose nihánj á.

23 Ne sese cataj soj se vaa navij cacun' tumé me ma'an yuvií, ne quinavij nu' cacun' tumé so' a. Ne sese cataj soj se vaa se quinavij cacun' tumé me ma'an yuvií, ne veé danj gaa quitaj nu' cacun' tumé so' xráa so' nu' cavii nu' ca'anj uún a —taj Jesucristó rihaan nij síi tucu'yón se-nana so' a.

*Nana nihánj taj xna'anj daj guun gaa quene'en síi cu'naj Tomás man Jesucristó a*

24 Dan me se yo'o tuvi' chuvij nij síi tucu'yón se-nana Jesucristó me síi cu'naj Tomás, ne yo'ó se-chuvii so' me Dídimó a. Ne nuvi' so' ne ga yo'ó nij

so' gaa cuchi' Jesucristó rihaan yo'ó nij so' ma'. <sup>25</sup> Che'é dan cataj xna'anj yo'ó nij sí tucu'yón se-nana Jesucristó rihaan Tomás se vaa quene'en nij so' man sí 'nij ra'a man ní' a. Tzaj ne cataj Tomás rihaan nij so' a:

—Sese se quene'en ma'anj rej catúj caquí ra'a so', ne sese se cutaj ra'aj rej catúj caquí ra'a so' do', sese se cutaj ra'aj rej quiran' chi'ij x'núú so' do', ne daj chihaa mǐj se cuchumán raj se vaa cunuu i'na' uún so' ma' —taj sí cu'naj Tomás rihaan nij so' a.

<sup>26</sup> Dan me se cachén tunj güii, ne mán uún nij sí tucu'yón se-nana Jesucristó, ne ne sí cu'naj Tomás ga nij so', ne dan me se raan nij ta'yaa, tzaj ne taj ni'yón, ne naruvi' Jesucristó tanuu yan man nij so' a. Ne cataj so':

—Gaa díj nimán soj ei —taj so' rihaan nij so' a.

<sup>27</sup> Gaa ne cataj so' rihaan sí cu'naj Tomás a:

—Tucua'anj so' ra'á so' nihánj, gaa ne xcaj so' cuentá daj vaa ra'aj, ne cuta' so' ra'á so' x'núú 'unj nihánj rej catúj chruun lanzá, gaa ne guun ya ya rá so' se vaa cunuu i'na' uún 'unj á. Cuchuman rá so', ni'yaj so' manj á —taj so' rihaan sí cu'naj Tomás a.

<sup>28</sup> Gaa ne cataj sí cu'naj Tomás rihaan so' a:

—So' me sí 'nij ra'a manj, ne so' me Diose sí nocoj adonj —taj so' rihaan Jesucristó a.

<sup>29</sup> Gaa ne cataj Jesucristó rihaan so' a:

—Uun daj quene'en yá so' manj, gaa ne amán rá so' ni'yaj so' manj nanj á. Tzaj ne vaa che'é guun niha' rá nij sí ne quene'en manj ne amán rá ni'yaj manj ei. 'Q se cavij sa' ya nij so' adonj —taj Jesucristó rihaan sí cu'naj Tomás a.

*Nana nihánj taj xna'anj me che'é cachrón sí cu'naj Juan yanj nihánj a*

<sup>30</sup> Dan me se vaa uxrá yo'ó nij suun sa' noco qui'yaj suun Jesucristó quene'en nij sí tucu'yón se-nana so', tzaj ne taj vaj nana che'é yo'ó nij suun sa' noco yo' nó rihaan yanj nihánj, <sup>31</sup> tzaj ne no nana nihánj rihaan

yanj nihánj che'é rej yo'ó cuchuman rá soj sij nayaa nana nihánj se vaa Jesucristó ro', me sí ca'neé Diose tinanii man yuvi' rihaan sayuun, ne ta'nij Diose me ya uún so' ei. Ne che'é se amán rá soj ni'yaj soj man so' ro', che'é dan gaa i'na' nimán soj rihaan Diose nu' cavii nu' ca'anj che'é ma'an Jesucristó chuguanj.

## 21

*Nana nihánj taj xna'anj se vaa nari' tuvi' uún Jesucristó ga chij nij sí tucu'yón se-nana so' a*

<sup>1</sup> Cachén doj, gaa ne cuchi' uún Jesucristó rihaan nij sí tucu'yón se-nana so' rej nuu na lacuaná cu'naj Tiberias a. Ne nihánj me se vaa qui'yaj so' a. <sup>2</sup> Aj cunuu chre' sí cu'naj Simón Pedró do', sí cu'naj Tomás Dídimó do', Natanael sí cavii chuman' Caná chuman' naj estadó Galilea do', roj ta'ní sí cu'naj Zebedeo do', yavij sí tucu'yón se-nana Jesucristó do' a. <sup>3</sup> Gaa ne cataj Simón Pedró rihaan yo'ó nij so' a:

—Ca'anj 'unj tiguíj 'unj nanj rque na quirij xcuaj, raj chuguanj —taj so' rihaan nij so' a.

—Ca'anj ní' chihá' —taj yo'ó nij so' rihaan Simón Pedró a.

Gaa ne cavii nij so' catúj nij so' rque rihoo chéé rihaan na, ne nigan' qui'yaj suun nij so', tzaj ne a 'ó xcuaj ne quirij' nij so' a ma'.

<sup>4</sup> Dan me se taxrej yo'ó güii me se nicun' Jesucristó tu'va na lacuaná yo' a. Tzaj ne ne quene'en nij sí tucu'yón se-nana so' se vaa ma'an so' me yo' a ma'. <sup>5</sup> Dan me se cataj Jesucristó rihaan nij so' a:

—Vaa doj se chá rihaan soj na' —taj Jesucristó, xna'anj so' man nij so' a.

Taj ma' —taj nij so' a.

<sup>6</sup> Gaa ne cataj Jesucristó rihaan nij so' a:

—Tiguíj soj nanj rque na rej x'núj rihoo rej nuva' rihoo, ne quirij' soj xcuaj ei —taj Jesucristó rihaan nij so' a.

Che'é dan tiguíj nij so' nanj ndaa vaa cataj Jesucristó, ne caraa nu' nanj, qui'yaj xcuaj, ne ne guun nu-cuaj nij so' cuxuun nij so' nanj a ma'. <sup>7</sup> Che'é dan ca'mii 'o sí tucu'yón se-nana Jesucristó sí 'ee rá Jesucristó man rihaan Pedró, cataj so':

—Sí 'nij ra'a man ní' me yo' ei —taj so' a.

Dan me se cuno Simón Pedró nana se vaa sí 'nij ra'a man ní' me yo', gaa ne che'é se aj quirii so' se-cotoó so', che'é dan nanuú ra'yaj so' se-cotoó so', gaa ne tagüej so' man so' rihaan na yo' a.

<sup>8</sup> Tzaj ne yo'ó nij so' ro', quináj rque rihoo yo', ne tiguíj nij so' chruun man rihoo yo', ne nicaj nij so' rihoo ca'anj nij so' ndaa tu'va na lacuaná yo', ne orún' cientó metró tiguíj ra'a nij so' man rihoo rque na, ne cuxuun nij so' nanj caraa xcuaj yo' rej tu'va na a. <sup>9</sup> Ne nu' cuchi' nij so' rihaan yo'óó, ne quene'en nij so' 'o ya'an nachráj Jesucristó, ne táa nee xcuaj do', rachrúún do', ruvaj yo' a. <sup>10</sup> Gaa ne cataj Jesucristó rihaan nij so' a:

—Nıcaj soj doj xcuaj quirii soj ca'na' soj ei —taj Jesucristó rihaan nij so' a.

<sup>11</sup> Che'é dan cavii Simón Pedró, ne cuxuun so' nanj yo' rihaan yo'óó a. Ne caraa 'o cientó táa yavíj chihaa cha'nuj xcuaj rque nanj yo' a. Ne nda' se 'ee ndo'o nij xcuaj, tzaj ne ne şın' nanj ma'.

<sup>12</sup> Gaa ne cataj Jesucristó rihaan nij so' a:

—Cuva' soj, cha ruvá soj ei —taj so' rihaan nij so' a.

Ne a 'ó nij sí tucu'yón se-nana Jesucristó ne quisij rá xna'anj man so' me sí me so' a. 'O se aj quene'en nij so' se vaa sí 'nij ra'a man ní' me yo' a. <sup>13</sup> Gaa ne ca'na' Jesucristó, ne nicaj so' rachrúún do', nee xcuaj do', rque so' man nij so' a.

<sup>14</sup> Dan me se quisij va'nuj nari' tuvi Jesucristó ga nij sí tucu'yón se-nana so' gaa cunuu i'na' uún so' a.

<sup>15</sup> Dan me se gaa quisij chá ruvá nij so', ne xna'anj Jesucristó man Simón Pedró, cataj so':

—Cunó so' ca'mij, Simón ta'núí Jonás. Doj a 'ee rá so' manj rihaan nij sí nihánj na' —taj Jesucristó, xna'anj so' man Pedró a.

—Ne'en ma'án so' se vaa 'ee raj mán so', Señor —taj Pedró rihaan Jesucristó a.

—Ve'é rque so' cha daán 'unj matzinj á —taj Jesucristó ni'yaj Jesucristó nu' nij sí noco' man so' a.

<sup>16</sup> Gaa ne xna'anj uún Jesucristó man Pedró, cataj so':

—Cunó so' ca'mij, Simón ta'núí Jonás. 'Ee rá so' manj na' —taj uún Jesucristó rihaan Pedró a.

—Ne'en ma'án so' se vaa 'ee raj mán so', Señor —taj uún Pedró rihaan Jesucristó a.

—Ve'é tumé so' man daán 'unj matzinj á —taj uún Jesucristó, ni'yaj so' nu' nij sí noco' man so' a.

<sup>17</sup> Gaa ne cataj uún Jesucristó rihaan Pedró:

—Cunó so' ca'mij, Simón ta'núí Jonás. 'Ee rá so' manj na' —taj uún Jesucristó, ne veé danj quisij va'nuj xna'anj so' danj man Pedró a.

Dan me se quinanó rá Pedró che'é se quisij va'nuj xna'anj Jesucristó danj man so' a. Gaa ne cataj uún so' rihaan Jesucristó a:

—Ne'én so' cunudanj, Señor. Ma'án so' ne'en se vaa 'ee raj mán so' ei —taj Pedró rihaan Jesucristó a.

—Ve'é rque so' cha daán 'unj matzinj á. <sup>18</sup> Cuanó nihánj me se cataj yá yá 'unj rihaan so' se vaa gaa mé so' sí tachruu, ne numíj ma'án so' yatzi'j catuún so', ne chéé so' me rej me ma'an guun rá so', tzaj ne asa' guun chij so', ne ticún' so' ra'á so', ne yo'ó so' numíj catuún so', ne nicaj so' mán so' ca'anj so' me rej me ma'an rá so' ca'anj so', ne nda' se na'vej rá so' ca'anj so', tzaj ne vaj so' ei —taj Jesucristó rihaan Pedró a.

<sup>19</sup> Ne nana cataj Jesucristó rihaan Pedró, tzaj ne nana yo' taj xna'anj se



vaa ticavi' nii man so', ne ca'mii sa' yuvi che'é Diose, qui'yaj so' a.

nij yanj libró yo' rihaan chumii nihánj, rá 'unj a ma'.

Gaa ne cataj uún Jesucristó rihaan Pedró a:

—Yo' o canocó' so' manj ei —taj Jesucristó rihaan so' a.

<sup>20</sup> Gaa ne canicaj Pedró, ne quene'en so' man yo'ó sí tucu'yón se-nana Jesucristó sí 'ee rá Jesucristó man a. So' ro', me sí cayáan rej x'nuj Jesucristó gaa chá xti'no nij so' gaa rque, ne so' me sí xná'anj man Jesucristó me sí taquachén man Jesucristó rihaan nij sí taj ri'yunj man Jesucristó gaa chá xti'no nij so' gaa rque a. <sup>21</sup> Dan me se gaa quene'en Pedró man sí 'ee rá Jesucristó man yo', ne xná'anj so' man Jesucristó, cataj so':

—Daj quiran' sí nihánj ga, Señor' —taj so' rihaan Jesucristó a.

<sup>22</sup> Gaa ne cataj Jesucristó rihaan so' a:

—Ne sese me rá 'unj yo' o gaa i'na' so' rihaan chumii ndaa se ca'na' uún 'unj rihaan chumii nihánj, ne nuveé se-suun ma'án so' me yo' ma'. Yo' o canoco' ma'án so' manj ei —taj Jesucristó rihaan Pedró a.

<sup>23</sup> Che'é dan cha'nuu nana nihánj sca'núj nij tinuj nij so', ne guun rá nij so' se vaa daj chihaa míj se cavi' sí tucu'yón se-nana Jesucristó yo' a. Tzaj ne ne cataj Jesucristó se vaa ya ya se cavi' so' ma'. Maan se cataj uun so' nana: “Sese me rá 'unj yo' o gaa i'na' so' rihaan chumii ndaa se ca'na' uún 'unj rihaan chumii nihánj”, me nana ca'mii Jesucristó a.

<sup>24</sup> Dan me se sí tucu'yón se-nana Jesucristó nihánj me se so' me sí cataj xna'anj che'é nu' rasuun no rihaan yanj nihánj, ne so' me sí cachrón nana rihaan yanj che'é rasuun nihánj, ne ne'en núj se vaa ya uxrá nu' vaa nana cataj xna'anj so' ei. <sup>25</sup> Ne vaa que'ee doj rasuun qui'yaj uún Jesucristó, tzaj ne sese cachrón nii nu' nana che'é 'o 'o nij rasuun rihaan yanj nihánj, ne se quisíj chumii nihánj cumañ cunudanj

## Yanj nihánj taj xna'anj daj qui'yaj nij apóstol cune' Jesucristó man nata' se nana so' rihaan yuvij a

*Nana nihánj taj xna'anj taj ca'mii  
Jesucristó rihaan nij apóstol cune' so'  
man nata' se nana so' rihaan yuvij gaa  
ataa quinán' Jesucristó xta' a*

1-2 Dan me se yanj ca'née 'unj rihaan so' asij rque me se rihaan yo' cachrón 'unj nana che'é nu' se vaa qui'yaj Jesucristó do', che'é nu' nana tucu'yón Jesucristó do', asij tacoo, ndaa se quinán' so' xta', qui'yaj Diose a. Dan me se asino ca'ne' so' suun rihaan nij apóstol cune' so' man nata' se nana so' rihaan yuvij, ndaa vaa cataj Nimán Diose rihaan so', gaa ne quinán' so' xta', ne dan me se nu' nana che'é yo' me cachronj rihaan yanj ca'nej rihaan so', Teófilo. <sup>3</sup> Dan me se gaa quisij cavi' Jesucristó rihaan rcutze, gaa ne guun que'ee tihaan so' man so' rihaan nij apóstol yo', che'é rej guun ya rá nij so' se vaa ya cunuu i'na' uún so' a. Dan me se vij chihaa ya güii quene'en nij apóstol man so', ne ca'mii ndo'o so' ga nij apóstol che'é rej guun chij Diose rihaan chumij nihánj a. <sup>4</sup> Ne gaa vaj so' ga nij apóstol, ne cataj xna'anj so' rihaan nij so' se vaa:

—Yo'q cumán soj chuman' Jerusalén nihánj, ne se cavii soj ca'anj soj ma'. Maan se na'vij soj ca'na' se vaa cata' tu'va Réj Diose se vaa rque so' man soj, ndaa vaa cataj xna'anj ma'anj rihaan soj a. <sup>5</sup> 'O se Juan ro', me sí cuta' ne man yuvij na uun, ne xa' soj, tzaj ne ma'an Nimán Diose catuu nimán soj rque doj güii adonj —taj Jesucristó rihaan nij apóstol cune' so' man nata' se nana so' rihaan yuvij a.

<sup>6</sup> Ne dan me se cunuu chre' nij apóstol rihaan Jesucristó, ne xna'anj nij so' man Jesucristó a:

—Ne yaj me se guun chij uún ní' sij israelitá rihaan chiháán ní', qui'yáá so' na'. Cataj so' rihaan núj, Señor —taj nij so' rihaan Jesucristó a.

<sup>7</sup> Tzaj ne cataj Jesucristó rihaan nij so' a:

—Diose ro', me sí no xcúun cachron güii qui'yaj so' se vaa qui'yaj so' ei. Nuveé se suun soj me suun yo' ma'. <sup>8</sup> Tzaj ne asa' catúj Nimán Diose nimán soj, ne quiri' ndo'o soj rej nucuaj, gaa ne guun soj sí nata' se nanaj rihaan yuvij adonj. Dan me se nu' chuman' Jerusalén do', nu' estadó Judea do', ndaa chuman' Samaria do', ca'vee se ndaa chuman' gan' doj naj rihaan chumij nihánj, tzaj ne ca'anj soj nata' soj se nanaj adonj —taj Jesucristó rihaan nij so' a.

<sup>9</sup> Dan me se quisij ca'mii Jesucristó danj rihaan nij so', gaa ne ni'yaj nij so' man so', ne dan me se cavii so' xta', qui'yaj Diose, ne catúj so' rque ngaa, ne ne ca'vee quene'en nij so' man so' a ma'. <sup>10</sup> Dan me se ni'yaj uxrá nij apóstol rej xta' rej vaj Jesucristó, tzaj ne ne ne'en nij so' daj guun, ne aj nicun' vij sí nuu yatzij catzii x'núú nij so' nanj ei. <sup>11</sup> Gaa ne cataj roj snó'o yo' a:

—Me che'é yo'q nicun' soj sij cavii estadó Galilea ni'yaj soj xta' ga. Jesucristó me se ne'en soj se vaa cavii so' quinán' so' xta', qui'yaj Diose, ne ase vaa cavii so' xta' ro', danj qui'yaj uún so' nanj so' ca'na' so' rihaan chumij nihánj adonj —taj roj sí nuu yatzij catzii rihaan nij apóstol yo' a.

*Nana nihánj taj xna'anj taj qui'yaj  
nii gaa narii nii 'o sí nayan rihaan sí  
cu'naj Judas a*

<sup>12</sup> Dan me se tanáj nij apóstol qui cu'naj Quij man Chruun Olivó, ne ca'anj nij so', ne namán uún nij so' chuman' Jerusalén a. Dan me se 'o kilómetro ca'anj nij so', <sup>13</sup> ne gaa catúj nij so' chuman', ne cavii nij so' xta' ve' tucua' nij so' ve' nata' a. Ne nij

so' ro', me Pedró do', Juan do', Jacobo do', Andrés do', Felipé do', Tomás do', Bartolomé do', Mateo do', Jacobo ta'níi Alfeo do', Simón síi guun tuvi' ga nij síi me rá cunu' ga gobiernó man Romá do', Judas tinúu Jacobo do' a. <sup>14</sup> Dan me se yo'o vaa rá taran' nij so', ne yo'o achíin ni'yaj nij so' rihaan Diose a. Danj qui'yaj nij so' ga nij chana do', ga Mariá nii Jesucristó do', ga nij tinúu Jesucristó do' a.

<sup>15</sup> Ne güii dan me se canicun' Pedró tanuu nij tinuj nij so', ne ca'mii so' rihaan nij so' a. Dan me se cientó táá 'ó ico yuvi' me nij yuvi' cunuu chre' rej man nij so' a. <sup>16</sup> Dan me se cataj Pedró rihaan nij so' a:

—Aj quisíj ya nu' nana no rihaan danj Diose nana rque Nimán Diose ca'mii síi cu'naj David nana a'mii che'é síi cu'naj Judas, tinuj, nocoj. Ne dan me se ya ya guun so' síi racuij man nij síi quita'aa man Jesucristó se vaa ca'vee nari' nij so' man Jesucristó, qui'yaj Judas a. <sup>17</sup> Ne yo'o tuvi' núj apóstol guun so', ne cata so' se suun núj a.

<sup>18</sup> "Dan me se nicaj so' sa'anj cacun' qui'yaj canaán ma'an so', ne quiri' so' 'o yo'óo, qui'yaj yo' a. Gaa ne dan me se naxru' so' rihaan yo'óo, ne canuu rque so', ne cavii xri' so' cayuu yo' rihaan yo'óo a. <sup>19</sup> Ne nihánj me nana cachén nu' rque chuman' Jerusalén, ne che'é dan tucu'náj nij síi man Jerusalén Acéldama man yo'óo yo' a —taj Pedró rihaan nij so', ne nana Acéldama ro', me se xna'anj nij so', ne nana yo' taj Yo'óo Ton a. Dan me se cataj uún Pedró— <sup>20</sup> 'O se rihaan yanj chra' nó nana taj se vaa: "Cunuu tacaan rej cane so', ne se cayáan a doj yuvi' rej yo' ma'", taj yanj chra' yo', ne taj uún yo': "Se suun so' ro', nacaj yo' so' á", taj uún yanj yo' a.

<sup>21-22</sup> "Che'é dan vaa che'é cata yo'ó tinúu ní' suun ga núj se vaa nata' so' rihaan yuvi' se vaa ya cunuu i'na' uún Jesucristó, ndaa vaa 'yaj núj a. Tzaj ne inanj síi chée ga núj sij apóstol gaa vaj Jesucristó ga núj me síi no

xcúun cata suun yo' a. Dan me se síi quene'en asij cuta' ne Juan man Jesucristó ndaa se cavii Jesucristó xta' qui'yaj Diose do', me síi no xcúun guun tuvi' núj sij apóstol adonj —taj Pedró rihaan cunudan' nij síi cunuu chre' a.

<sup>23</sup> Gaa ne dan me se narii nij so' man vij snó'o, ne yo'o so' ro', me síi cu'naj José, ne Barsabás cu'naj uún so', ne Justo tucu'náj nii man so' a. Ne yo'ó so' ro', me síi cu'naj Matías a. <sup>24</sup> Gaa ne cachíin ni'yaj taran' nij so' rihaan Diose, cataj nij so':

—Ne'én so' daj vaa nimán cunudan' yuvi', Señor. Che'é dan tijaán so' me roj tuvi' síi nihánj narii so' <sup>25</sup> se vaa cata so' suun nihánj ne guun so' apóstol nata' se nana Jesucristó rihaan yuvi' a. 'O se ca'anj yanij síi cu'naj Judas, tanáj xco so' suun nihánj, ne ca'anj so' ndaa rej no xcúun so' ca'anj so' a —taj nij yuvi', cachíin ni'yaj nij yuvi' rihaan Diose a.

<sup>26</sup> Gaa ne tico tixaj nij so' me roj so' qui'yaj canaán, ne síi cu'naj Matías me síi qui'yaj canaán, ne che'é dan guun tuvi' so' ga yo'ó xaan nij apóstol cune' Jesucristó man nata' se nana so' rihaan cunudan' nij yuvi' man rihaan chumij a.

## 2

*Nana nihánj taj xna'anj se vaa ca'na Nimán Diose rihaan nij síi noco' man Jesucristó a*

<sup>1</sup> Dan me se cachén cha'anj pascuá, ne cachén yavíj chihaa chi' güii, ne quisíj cha'anj Pentecostés a. Ne güii dan me se cunuu chre' cunudan' nij síi noco' man Jesucristó rá 'o ve', <sup>2</sup> ne taj ni'yón cuno taran' nij síi ne rá ve' se vaa nayuu rá ve', ne daj se uun rá' unó' nana yuvaá avii rej xta' ro', danj guun rá nij so' gaa nayuu rá ve' a. <sup>3</sup> Gaa ne quene'en nij so' rasuun, ne ase vaa yaa ya'an cuxra' ta'aj vaa rasuun quene'en nij so', ne quitáa rasuun yo' raa 'o 'o nij so' a. <sup>4</sup> Gaa ne dan me se caraa Nimán Diose nimán taran' nij so', gaa ne guun che'e nij so'

nucuj ca'mii nij so' xna'ánj ino vaa, ne ndaa vaa xna'ánj ca'vee ca'mii 'o 'o nij so' qui'yaj Nimán Diose, danj inanj ca'mii nij so' a.

<sup>5</sup> Dan me se güii dan cumán ndo'o yuvij israelitá chuman' Jerusalén, ne síi me ya rá canoco' man Diose me nij yuvij israelitá yo', ne síi cavii nu' chuman' naj rihaan chumij me uún nij so' a. <sup>6</sup> Dan me se cuno nij yuvij israelitá yo' se vaa cuno nij síi noco' man Jesucristó ne rá ve' yo', ne che'é dan cunuu chre' nij yuvij israelitá rihaan ve' yo', ne ca'anj ndo'o rá nij so' se vaa guun a. 'O se 'o 'o nij yuvij israelitá yo' ro', cuno se vaa ca'mii nij síi noco' man Jesucristó xna'ánj a'mii 'o 'o nij yuvij israelitá yo' a. <sup>7</sup> Dan me se caráya'anj uxrá nij yuvij, ne cataj nij yuvij yo':

—Nij'yaj soj ei. Xa' nij síi nicun' a'mii nihánj, tzaj ne sij cavii estadó Galilea me cunudanj nij so' á. <sup>8</sup> Ne asa' a'vee uno 'o 'o ní' se vaa a'mii nij so' xna'ánj a'mii ma'an nii ní' rihaan ní' ga. <sup>9</sup> Dan me se ma'an ní' me síi cavii Partia do', Media do', Elam do', Mesopotamia do', Judea do', Capadocia do', Ponto do', Asia do', <sup>10</sup> Frigia do', Panfilia do', Egiptó do', rej Libia naj nichrun' Cirene do', ne ta'aj ní' me síi ne chuman' Romá uún a. 'O se ta'aj ní' me yuvij israelitá, ne yo'ó ta'aj ní' me nij síi yanj guun tuvi' ga nij síi israelitá a. <sup>11</sup> Ne vaa síi cavii Creta do', Arabia do', uún a. Ne nihánj me se ndaa uno 'o 'o ní' se xna'anj ní', 'yaj nij so' a'mii nij so', ne nata' ndo'o nij so' se vaa sa' uxrá vaa Diose á —taj cunudanj nij yuvij yo' a.

<sup>12</sup> Dan me se caráya'anj uxrá cunudanj nij yuvij israelitá yo', ne ne ca'vee xcaj nij so' cuentá daj me che'é guun danj a. Ne ta'aj nij so' xná'anj man tuvi', cataj nij so':

—Me che'é guun nu' danj ga —taj ta'aj nij so' a.

<sup>13</sup> Ne yo'ó ta'aj nij so' ca'nga' naco, ne cataj nij so':

—Cachén ndo'o co'o nij síi nihánj na vinó naca nanj chuguanj —taj nij síi

ca'nga' naco yo' a.

*Nihánj me nana nata' Pedró rihaan nij yuvij a*

<sup>14</sup> Gaa ne dan me se canicun' síi cu'naj Pedró ga yo'ó xaan nij apóstol cune' Jesucristó man nata' se nana so' rihaan yuvij, ne nucuj ndo'o ca'mii Pedró ne nata' so' nana nihánj a:

—Soj sij israelitá do', cunudanj soj sij ne chuman' Jerusalén nihánj do', nana xrej soj nana ca'mij rihaan soj, ne xcaj soj cuentá che'é rasuun nihánj ei. <sup>15</sup> Ne guun xno núj ndaa vaa guun rá ta'aj soj ma'. 'O se xcaj soj cuentá, ne tihaj aga' uun rej na'yaan me nihánj ei. <sup>16</sup> Tzaj ne nu' nihánj ro', me se vaa cataj síi cu'naj Joel síi nata' se nana Diose gaa naá qui'yaj Diose a. Dan me se cataj síi cu'naj Joel: <sup>17</sup> “Nihánj me a'mii ma'an Diose rihaan soj, ne taj Diose se vaa asa' nichrun' ca'anj ni'ya chumij nihánj, ne ca'nej ndo'o 'unj Nimán 'unj nimán yuvij man rihaan nu' chumij, ne ta'níi soj ro', nata' nana rque 'unj man ma'an nij so' a. Ne nij síi tachruu ro', naqui'yaa ndo'o rasuun rihaan nij so', qui'yaj, ne nij chii nga ro', ca'mii ndo'o nej rihaan nij so', qui'yaj adonj. <sup>18</sup> Dan me se güii yo' caraj Nimanj nimán nij síi nuu rihanj do', nimán nij chana nuu rihanj do', ne nata' nij so' se nanaj adonj. <sup>19</sup> Dan me se gaa ndo'o rasuun noco quene'en soj rej xta', qui'yaj, ne gaa ndo'o rasuun noco quene'en soj rihaan yo'óo, qui'yaj, ne quene'en soj ton do', ya'an do', catze' do' a. <sup>20</sup> Ne guun rmi' rihaan güii, ne rihaan yavii ro', guun ton, asa' nichrun' quisij güii sa' güii ca'ne' 'unj sij 'nij ra'a man soj cacun' che'é yuvij a. <sup>21</sup> Ne me ma'an síi cachinj ni'yaj rihaan 'unj, ne quinani so' rihaan sayuun adonj”. Nihánj me se nana Diose nana ca'mii síi cu'naj Joel gaa naá ei.

<sup>22</sup> “Ne cuano nihánj me se cuno soj sij israelitá nana nihánj ei. Dan me se aj ne'en nij soj daj qui'yaj Jesucristó síi cavii chuman' Nazaret, se vaa guun nucuj so' qui'yaj ndo'o so'



suun sa' nocoo quene'en soj, qui'yaj Diose adonj. Ne dan me se xcaj soj cuentá daj sij me so', qui'yaj Diose á. <sup>23</sup> Dan me se tucuachén nii man so' rihaan nij sí taj ri'yunj man so', gaa ne dan me se cachrón nij sí ne noco' man Diose man so' rihaan rcutze, ne cavi' so', qui'yaj ma'an soj a. Ne nu' nihánj me se vaa 'o guun rá Diose quirán' so', ne aj quene'en Diose se vaa quirán' so' danj ei. <sup>24</sup> Tzaj ne qui'yaj Diose se vaa ne ca'vee yuun che'e cavi' so', ma'. Tzaj ne cunuu i'na' uún so', qui'yaj Diose, che'é se ne ca'vee yuun che'e cavi' so' daj chihaa mǐj a man adonj.

<sup>25</sup> "O se nihánj me nana ca'mii sí cu'naj David che'é Jesucristó a: "Quene'én 'unj daj quiranj rej rihanj, ne xcaj 'unj cuentá se vaa yo'o canicún' sí 'nij ra'a manj rihanj nanj á. 'O se nicún' so' rej x'núj, ne se ca'vee naxruj, qui'yaj so' ma'. <sup>26</sup> Che'é dan guun niha' ndo'o nimanj, ne ca'mij nana niha' cavii nimanj a. 'O se yo'o guun ya raj se vaa ya cavii sa' 'unj nanj adonj. <sup>27</sup> 'O se se tanáj so' nimanj rej man nij sí cavi' ma'. Ne se quiriyuj nee man sí vaa sa' rihaan so', qui'yáa so' ma'. <sup>28</sup> Dan me se tijaán so' rihanj tucuáan canocoj ne ca'vee gaa i'na' 'unj a. Ne guun niha' ndo'o raj, qui'yáa so', asa' canicún' 'unj rihaan so' adonj". Nihánj me se nana sí cu'naj David yo' a.

<sup>29</sup> "Nuveé nana naca me nana nihánj nana cataj 'unj rihaan nij soj cuano, man tinuj. Dan me se xii ní' sí cu'naj David me se cavi' so', gaa ne cachin' nii man so', ne yaj me se ne'en ní' me rej cachin' nii man so' nanj á. <sup>30</sup> Tzaj ne sí nata' se nana Diose me so' gaa cayáan so', ne quene'en so' se vaa cata' tu'va Diose rihaan so' se vaa guun chij yo'o ta'níi ta'nij si'no so', ndaa vaa guun chij ma'an so' a. <sup>31</sup> Ne che'é dan cataj so' se vaa se quináj Jesucristó rej man nij sí cavi', ne se quixtun' nu' nee man so' ma'. Danj ca'mii so' ni'yaj so' güii cunuu i'na' uún Jesucristó a.

<sup>32</sup> "Gaa ne dan me se ya ya cunuu

i'na' uún Jesucristó, qui'yaj Diose, ne taran' núj me sí quene'en se vaa cunuu i'na' uún so' adonj. <sup>33</sup> Gaa ne cavii Jesucristó ndaa x'núu Diose rej nuva' Diose, ya gaa nacaj Jesucristó Nimán Diose gaa narqué Diose Nimán so' man Jesucristó, danj vaa cata' tu'va so' a. Ne qui'yaj Jesucristó ga núj sij apóstol ndaa vaa ne'en soj se vaa ran' núj, ne dan me se qui'yaj Jesucristó ca'mii núj sij apóstol nu' xna'ánj a'mii soj ndaa vaa cuno soj ca'mii núj ei.

<sup>34</sup> "Dan me se ne cavii ma'an sí cu'naj David rej xta' ma'. Tzaj ne cataj so': "Ca'mii Diose sí 'nij ra'a man ní' rihaan sí 'nij ra'a manj, cataj so' se vaa cayáan sí 'nij ra'a manj x'núu Diose rej nuva' Diose <sup>35</sup> ndaa se quisij qui'yaj canaán Diose rihaan taran' nij sí taj ri'yunj man sí 'nij ra'a manj ne quirii ta'nga' sí 'nij ra'a manj rihaan nij so' adonj", taj sí cu'naj David yo' a. <sup>36</sup> Che'é dan vaa che'é ndo'o xcaj ya taran' soj sij israelitá cuentá se vaa xa' Jesucristó sí cachrón ma'an soj rihaan rcutze, tzaj ne sí 'nij ra'a man ní' me so', ne sí ca'neé Diose tinanii man ní' rihaan sayuun me uún so', qui'yaj Diose adonj —taj Pedró rihaan nij yuvii cunuu chre' yo' a.

<sup>37</sup> Dan me se gaa cuno nij yuvii nana yo', ne quinano ndo'o rá nij so', ne xná'anj nij so' man Pedró ga yo'ó nij apóstol cune' Jesucristó man nata' se nana so' rihaan yuvii, cataj nij so' a:

—Ne daj qui'yaj núj, ga tinu' —taj nij so', xná'anj nij so' man nij tuvii Pedró a.

<sup>38</sup> Gaa ne cataj Pedró rihaan nij so' a:

—Canicaj nimán soj canoco' soj chrej sa', ne cata' ne cunudanj soj che'é yan quene'en yuvii se vaa nocoo soj man Jesucristó, gaa ne tinavij Diose cacun' tumé soj, ne rque Diose Nimán Diose catuu yo' nimán soj ei.

<sup>39</sup> Dan me se cata' tu'va Diose se vaa qui'yaj so' danj che'é nij soj do', che'é ta'níi soj do', che'é nij sí ne gan' do' a. Dan me se me ma'an sí nacunj

Diose sís 'nij ra'a man ní' canoco' man so' me se qui'yaj Diöse danj che'é so' adonj —taj Pedró rihaan nij yuvii israelitá yo' a.

<sup>40</sup> Gaa ne nata' so' que'ee doj nana rihaan nij so', gaa ne nago' so' chrej nucujaj man nij so', cataj so':

—Curihanj soj sca'núj tuvi' ní' sís noco' tucuáan chi'ij, gaa ne quinanj soj rihaan sayuun ei —taj Pedró rihaan nij yuvii israelitá a.

<sup>41</sup> Che'é dan me nij sís cuchumán rá se nana so' ro', cata' ne nij so', ne güii yo' me se canoco' naca va'núj mǐj yuvii man Jesucristó ta' asuun a.

*Nana nihánj taj xna'anj daj qui'yaj nij sís noco' man Jesucristó a*

<sup>42</sup> Dan me se yo'o canoco' raan nij sís noco' man Jesucristó nana tucu'yón nij apóstol rihaan nij so', ne yo'o guun tuvi' cunudanj nij so' a. Ne yo'o cuxra' ta'aj nij so' rachrúún chá nij so', ne yo'o chre' cachíin ni'yaj nij so' rihaan Diöse a. <sup>43</sup> Ne cunudanj nij yuvii ro', chucu'vi' ndo'o nij so' ni'yaj nij so' nij suun sa' noco' qui'yaj nij apóstol yo' a.

<sup>44</sup> Tzaj ne nij sís cuchumán rá ni'yaj man Jesucristó me se 'o rej man chre' cunudanj nij so', ne naqui'yaj rcua'aan nij so' nu' si'yaj nij so', ne si'yaj taran' nij so' me cunudanj nij rasuun yo' a. <sup>45</sup> Ne tu'vej nij so' to'óo nij so' do', si'yaj nij so' do', ne rque' nij so' se sa'anj nij so' rihaan tuvi' nij so' sís achiin rasuun man a. <sup>46</sup> Dan me se daj a güii 'anj nij so' nuvií noco' cachinj ni'yaj nij so' rihaan Diöse, ndaa vaa guun rá taran' nij so' a. Ne 'o nuu chre' nij so' 'o ve', ne uxra' ta'aj nij so' rachrúún chá nij so' a. Ne dan me se ndaa niha' ndaa cochroj rá taran' nij so' chá nij so' chraa a.

<sup>47</sup> Ne cataj nij so' se vaa sa' uxrá qui'yaj Diöse che'é nij so', ne ca'mii sa' cunudanj nij yuvii ne chuman' Jerusalén ni'yaj nij yuvii man nij so' gaa ve'é mán chre' nij so' a. Ne daj a güii cunu chre' doj sís vaj nanii rihaan sayuun ga' nij so', qui'yaj Diöse a.

### 3

*Nana nihánj taj xna'anj se vaa nahuun sa' 'o sís rengo, qui'yaj Pedró ga' Juan a*

<sup>1</sup> Dan me se aga' va'núj rej anoco' güii me se cuchi' sís cu'naj Pedró do', sís cu'naj Juan do', nuvií noco', che'é se orá achíin ni'yaj nii rihaan Diöse me yo' a. <sup>2</sup> Ne maan orá dan nicaj nii man 'o sís rengo cuchi' nii rihaan nuvií noco' yo', ne sís rengo me so' asij ca'ngaa so' a. Ne dan me se daj a güii uchruj nii man so' rihaan yo'óo rej x'núj ta'yaa cu'naj Ta'yaa Ve'é Ndo'o Vaa a. Ne yo' me rej achíin so' caridad man nij yuvii atúj nuvií yo' a. <sup>3</sup> Dan me se quene'en so' man Pedró do', man Juan do', se vaa catuuj roj so' rá nuvií noco', gaa ne cachíin so' caridad man roj so' a. <sup>4</sup> Gaa ne ni'yaj uxrá Pedró do', Juan do', man so', ne cataj Pedró rihaan so' a:

—Ni'yaj so' man rój á —taj so' rihaan sís rengo yo' a.

<sup>5</sup> Gaa ne ni'yaj sís rengo man roj so', che'é se guun rá so' se vaa rque' roj so' sa'anj man so' a. <sup>6</sup> Gaa ne cataj Pedró rihaan so' a:

—Taj vaj a doj sa'anj rihaan 'unj ma'. Tzaj ne rque' 'unj se vaa rihaan 'unj mán so' ei. Dan me se che'é ma'an Jesucristó sís cavii chuman' Nazaret taj xna'anj 'unj rihaan so' se vaa naxumaan so' ne cachee' so' á —taj Pedró rihaan so' a.

<sup>7</sup> Gaa ne quita'aa Pedró ra'a so' rej nuva' so', ne cachrón caya Pedró man so', ne nu' nari' nucujaj tacóo so' do', xtucua' so' do' a. <sup>8</sup> Gaa ne dan me se güej so', ne canicun' caya so', ne cachée' so', ne dan me se catúj so' rá nuvií noco' ga' roj so', ne cachée' ndo'o so', ne güej so', ne cataj so' se vaa sa' uxrá qui'yaj Diöse che'é so' a. <sup>9</sup> Gaa ne quene'en cunudanj nij yuvii se vaa cachée' so' ne cataj so' se vaa sa' uxrá qui'yaj Diöse a. <sup>10</sup> Ne quene'en nij yuvii se vaa ma'an so' me sís yáan rihaan ta'yaa nuvií noco' cu'naj Ta'yaa Ve'é Ndo'o Vaa ne achíin so' caridad, ne ca'anj ndo'o

rá nij yuvij che'é se vaa nahuun sa' sí rengō yo' a.

*Nihánj me nana nata' Pedró rihaan nij yuvij a*

11 Dan me se quita'aa sí nahuun sa' yo' man sí cu'naj Pedró do', man sí cu'naj Juan do', ne che'é se ca'anj ndo'o rá nij yuvij, che'é dan cunánj nij yuvij cunuu chre' nij yuvij rihaan roj so' rque chingá cu'naj Corredor Salomón a. 12 Ne gaa quene'en Pedró man nij yuvij, ne cataj so' rihaan nij yuvij a:

—Cuno soj sij israelitá ca'mij á. Me che'é ca'anj ndo'o rá soj se vaa chéé sí nihánj ga. Me che'é ni'yaj ndo'o soj man rój ga. Nuveé ma'an rój me sí guun nucuj qui'yaj cachéé so' ma'. Nuveé che'e se sij noco' sa' ndo'o man Diose me rój, ne cachéé so' qui'yaj rój ma'. 13 Dan me se Diose sí noco' xii ní' sí cu'naj Abraham do', sí cu'naj Isaac do', sí cu'naj Jacob do', me sí qui'yaj cavii sa' ndo'o ta'nú ma'an so' Jesucristó nanj adonj. Tzaj ne nij soj me nij sí tucuachén man Jesucristó rihaan nij sí taj ri'yunj man Jesucristó, ne nda' se guun ya rá sí cu'naj Pilato se vaa ca'anj uun Jesucristó, tzaj ne cataj soj rihaan sí cu'naj Pilato se vaa guun rá soj cavi' Jesucristó adonj.

14 "Dan me se cataj soj se vaa ne guun rá soj ni'yaj soj man sí sa' nimán yo' ma'. Maan se cachín ni'yaj soj rihaan sí cu'naj Pilato se vaa quirij so' taga' man 'o sí ticavi' man yuvij a. 15 Ne ticavi' soj man Jesucristó sí guun nucuj qui'yaj gaa i'na' nimán ní' a. Ne Diose ro', qui'yaj cunuu i'na' uún Jesucristó, ne ma'an núj me sí quene'en se vaa cunuu i'na' uún so' nanj adonj. 16 Ne che'é se cuchumán rá sí nihánj ni'yaj so' man Jesucristó ro', che'é dan nari' nucuj so', qui'yaj Jesucristó adonj. Ne dan me se nahuun sa' nu' so', ne aj ne'en taran' soj daj quiran' so', ne aj cuno soj daj taj ma'an so' nanj á.

17 "Ne nihánj me se ne'én 'unj se vaa che'é se ne quene'en soj daj sij

me Jesucristó, ne che'é dan cavi' so' qui'yaj soj ga nij sí uun chij rihaan soj nanj ei. 18 Tzaj ne Diose ro', me sí cataj xna'anj asij naá ndo'o gaa rqué so' nana nata' nij sí nata' se nana so', ne dan me se cataj xna'anj Diose se vaa sí ca'nej so' tinanii man yuvij rihaan sayuun me se quiran' ndo'o so' sayuun a. Ne nihánj me se quisij ya nu' ndaa vaa cataj Diose se vaa qui'yaj ma'an Diose nanj ei.

19 "Che'é dan canicaj nimán soj canoco' soj chrej sa', gaa ne ca'vee tinavij Diose cacun' tumé soj á. 20 Gaa ne ca'vee quisij güii cunuu cuj rá taran' ní' sij israelitá, qui'yaj sí 'nij ra'a man ní', ne dan me se Jesucristó sí cune' Diose man tinanii man ní' rihaan sayuun me se ca'nej Diose man so' ca'na' uún so' rihaan ní' a.

21 Cuno nihánj me se me rá Diose cayáán so' rej xta' ndaa se quisij güii naqui'yaj sa' Diose nu' nij rasuun ndaa rá se vaa nij rasuun asij naá ndo'o ndaa vaa cataj xna'anj nij sí sa' sí nata' se nana Diose gaa naá a. 22 Dan me se sí cu'naj Moisés cataj rihaan xii ní': "Diose sij 'nij ra'a man ní' me se cavii yo'o tinúú nij soj, qui'yaj Diose, ne guun so' sí nata' se nana Diose ndaa vaa 'yaj ma'anj a. Ne cuno soj nu' nana nata' so' rihaan soj á. 23 Ne dan me se a me ma'an sí na'vej rá cuno se nana sí nata' se nana Diose yo', ne nu' quirij yanij nii man so' sca'núj ní' sij israelitá, ne quirij nu' so' nanj adonj", taj sí cu'naj Moisés gaa naá a. 24 Ne dan me se sí cu'naj Samuel do', cunudanj yo'ó nij sí nata' se nana Diose do', cataj xna'anj taran' uún nij so' uún che'é güii yaj ei.

25 "Ne rihaan ma'an nij soj ca'mii nij sí nata' se nana Diose, ne ma'an nij soj me nij sí cavii sa' qui'yaj Diose, ndaa vaa cata' tu'va Diose rihaan xii ní' gaa naá ei. Dan me se rihaan xii ní' sí cu'naj Abraham cataj Diose: "Dan me se cavii sa' nij yuvij man cunudanj nij chuman' naj rihaan chumij, qui'yaj ta'nú ta'nij si'no so' a", taj Diose rihaan Abraham a.

26 Gaa ne aj ca'née Diose man ta'níí Diose rihaan chumii, ne cuchi' ta'níí Diose asino yaan rihaan ma'an soj, qui'yaj Diose, che'é rej canicaj nimán 'o 'o nij soj, ne tanáj xcō nij soj tucúáán chí'íi, ne ca'vee qui'yaj ndo'o Diose se luj che'é taran' nij soj ei —taj Pedró rihaan nij yuvii cunuu chre' rá nuvíí nocōo yo' a.

## 4

*Nana nihánj taj xna'anj daj ca'mii síí cu'naj Pedró ga Juan rihaan nij síí uun chij rihaan nij yuvii israelitá a*

1 Dan me se gaa ca'mii síí cu'naj Pedró ga Juan rihaan nij yuvii, ne cuchi' nij xrej do', tanuu uun chij rihaan nij tanuu 'yaj suun rá nuvíí nocōo do', nij síí saduceo do', rihaan roj so' a. 2 'O se ne guun niha' rá nij so' gaa cuno nij so' nana tucuyón Pedró ga Juan man nij yuvii nana se vaa Jesucristó me 'o síí cunuu i'na' uún gaa cavi' so' a. 3 Ne dan me se quita'aa nij so' man roj so', ne caxrój nij so' taga' man roj so' 'o yan' a. 'O se aj ti'nuu me orá yo' a. 4 Ne que'ee nij síí cuno se nana roj so' ro', cuchumán rá nana yo', ne veé danj quisíj 'un' mój snó'o canoco' man Jesucristó ta' asuun a.

5 Ne yo'ó güii me se cunuu chre' nij síí nicaj suun do', nij síí uun chij do', nij síí naqui'yaj cūu se tucuanj Moisés rihaan nij yuvii do', chuman' Jerusalén ga 6 síí cu'naj Anás síí guun xrej atā suun nocōo doj do', síí cu'naj Caifás do', síí cu'naj Juan do', síí cu'naj Alejandro do', taran' nij tuví' nij xrej atā suun nocōo doj do' a. 7 Dan me se canicun' caya síí cu'naj Pedró ga Juan tanuu ve' man nij xrej, qui'yaj nij xrej, ne xná'anj nij xrej man roj so', cataj nij xrej a:

—Me rej quiri' roj soj rej nucuaj do', me síí ca'ne' suun rihaan roj soj do', ne qui'yaj roj soj danj ga —taj nij so', xná'anj nij so' man roj so' a.

8 Gaa ne caraa ndo'o Nimán Diose nimán Pedró, ne cataj Pedró rihaan nij so' a:

—Cuno nij soj sij nicaj suun rii ta'nga' rihaan nij yuvii do', cuno soj sij uun chij cuno nana cataj xna'anj 'unj rihaan nij soj á. 9 Nihánj me se naqui'yaj cūu nij soj man rój che'é se cunuu 'ee rá rój ni'yaj rój 'o síí rengo, ne me rá nij soj quene'en soj asa' ca'vee nahuun sa' síí rengo nihánj a. 10 Che'é dan xcaj nij soj do', taran' nij yuvii israelitá do', cuentá se vaa Jesucristó síí cavii chuman' Nazaret me síí qui'yaj ca'vee naxcaj rój man síí rengo nihánj, ne 'o vaa nucuaj so' a. Ne nij soj ro', me nij síí qui'yaj cachrón nii man Jesucristó rihaan rcutze, tzaj ne cunuu i'na' uún so', qui'yaj Diose a. 11 Ne xa' Jesús, tzaj ne so' me yuvej quiri'íj nij soj sij cune' ve', ne yaj me se guun so' yuvej sa' doj rihaan taran' nij yuvej man tacóo ve' yaj nanj adonj. 12 Ne taj vaj a doj yo'ó síí guun nucuaj qui'yaj cavii sa' ní' a ma'. Orún' so' me síí vaa rihaan chumii nihánj síí ca'née Diose, ne orún' so' me síí ca'vee tinanii man ní' rihaan sayuun nanj adonj —taj Pedró rihaan nij síí uun chij yo' a.

13 Dan me se quene'en nij so' se vaa ne cucu'vi' Pedró ga Juan ne sca' uxrá ca'mii roj so', ne xcaj nij so' cuentá se vaa nuveé sij tucuyón yanj me roj so', tzaj ne sa' uxrá nari' roj so' a. Che'é dan caráya'anj nij so' a. Ne quene'en nij so' se vaa roj so' me síí cachée ga Jesucristó a. 14 Ne quene'en nij so' man síí nahuun sa' yo' nicun' ga roj so' a. Gaa ne ne quiri' nij so' nana ca'mii nij so' ma'.

15 Gaa ne ca'ne' nij síí uun chij suun rihaan Pedró ga Juan ga síí nahuun sa' yo' se vaa curihanj va'nuj nij so' xe', gaa ne ca'vee nuchruj raā nij tuví' nij síí uun chij daj qui'yaj nij so' ga síí cu'naj Pedró ga Juan yo', rá nij so' a. 16 Dan me se cataj nij so':

—Daj qui'yaj ní' ga roj síí nihánj ga. 'O se xcaj taran' nij síí ne chuman' Jerusalén nihánj cuentá se vaa ranga' qui'yaj suun roj so' suun sa' nocōo, ne se ca'vee cataj ní' se vaa ne qui'yaj roj so' danj ma'. 17 Tzaj ne tuchu'vi' ní'



man roj so' ne ca'ne' ní' suun rihaan roj so' se vaa se ca'mii roj so' che'é Jesucristó rihaan a 'ó yuvii a. Gaa ne se cha'nuu doj nana nihánj sca'núj nij yuvii a —taj taran' nij so' a. <sup>18</sup> Gaa ne canacúun nij so' catuú uún Pedró ga Juan rej nuu nij so', gaa ne nago' nij so' chrej nucuj man roj so' se vaa se ca'mii roj so' che'é Jesucristó ne se tucu'yón roj so' se nana Jesucristó a.

<sup>19</sup> Gaa ne canicaj sí' cu'naj Pedró ga Juan cataj roj so' rihaan nij so' a:

—Nuchruj raa nij soj sese guun rá Diose cunó núj rihaan soj ne tanáj xco núj se nana Diose ei. <sup>20</sup> Se ca'vee ca'ne' rá núj ga suun a'mii che'é rasuun quene'en núj do', che'é nana cuno núj do' a ma' —taj roj so' rihaan nij so' a.

<sup>21</sup> Gaa ne doj a ca'mii yuvaa nij sí' uun chij yo' rihaan roj so', tzaj ne ne quirí' nij sí' uun chij yo' daj qui'yaj nij so' sayuun man roj so' a ma'. Che'é dan na'neé nij so' chrej man roj so' a. 'O se nij yuvii me se cunudanj nij so' cataj se vaa sa' uxrá qui'yaj Diose che'é sí' nahuun sa' yo' a. <sup>22</sup> Ne sí' nahuun sa' qui'yaj suun sa' nocoo yo' me se vaj so' vij chihaa yo' táa doj a.

*Nana nihánj taj xna'anj daj ca'mii nij sí' nocoo' man Jesucristó gaa cachíin ni'yaj nij so' rihaan Diose a*

<sup>23</sup> Dan me se na'neé nii man Pedró ga Juan, ne cuchí' roj so' rihaan tinúú roj so', gaa ne nata' roj so' nu' nana cataj nij xrej ata' suun nocoo doj do', nij sí' uun chij do', se vaa cataj nij so' rihaan roj so' a. <sup>24</sup> Gaa ne dan me se gaa cuno nij so' se nana roj so', gaa ne nu' guun rá taran' nij so' cachíin ni'yaj nij so' rihaan Diose, ne che'é dan nucuj ca'mii nij so', cataj nij so' a:

—Ma'an so' me sí' qui'yaj nu' rej xta' nu' chumii nu' na ya'anj nu' rasuun nu' a. <sup>25</sup> Ne so' ro', ca'neé Nimán so' rihaan xii núj sí' cu'naj David sí' qui'yaj suun che'é so', ne Nimán so' ro', rque nana rihaan so' ca'mii so', ne dan me se cataj so': “Me che'é ca'maan ndo'o rá nij sí' yaníj, ne me che'é guun nij rma'an

rá nij yuvii ga. <sup>26</sup> Dan me se cavii nij sí' nicaj suun rey uun chij rihaan chumii nihánj, gaa ne cunuu chre' nij so', che'é rej qui'yaj nij so' sayuun man sí' 'nij ra'a man ní' do', man sí' ca'neé so' tinanii man yuvii rihaan sayuun do' a”, taj sí' cu'naj David yo' gaa naá a. <sup>27</sup> Dan me se ya ya cunuu chre' sí' cu'naj Herodes do', sí' cu'naj Poncio Pilato do', nij sí' yaníj do', nij yuvii israelitá do', rque chuman' nihánj, che'é rej qui'yaj nij so' sayuun man ta'níi so' sí' cu'naj Jesucristó sí' cuné' so' man tinanii man núj rihaan sayuun a. <sup>28</sup> Tzaj ne qui'yaj nij so' inanj se vaa guun rá ma'an so' asij naá se vaa qui'yaj nij so', ne ma'an so' me sí' qui'yaj guun nu' nihánj a.

<sup>29</sup> “Ne nihánj me se xcaj so' sij 'nij ra'a man núj cuentá se vaa ca'mii yuvaa ndo'o nij so' rihaan núj a. Ne racuíj so' man núj sij 'yaj suun che'é so' se vaa guun nucuj núj nata' sca' núj se nana so' rihaan yuvii a. <sup>30</sup> Dan me se racuíj so' man núj qui'yaj núj suun sa' nocoo, ne nahuun sa' yuvii, qui'yaa so', che'é rej xcaj yuvii cuentá se vaa sij nucuj ndo'o mé so' che'é ta'níi so' Jesucristó sí' guee á —taj taran' nij so', cachíin ni'yaj nij so' rihaan Diose a.

<sup>31</sup> Dan me se quisíj cachíin ni'yaj nij so' rihaan Diose, gaa ne quinaan nu' rej man nij so', ne caraa ndo'o Nimán Diose nimán cunudanj nij so', gaa ne sca' ndo'o ca'mii nij so' se nana Diose a.

*Nana nihánj taj xna'anj che'é yan yo'o chre' man nij sí' nocoo' man Jesucristó a*

<sup>32</sup> Dan me se yo'o cyaan vaa rá cunudanj nij sí' cuchumán rá ni'yaj man Jesucristó, ne a 'ó nij sí' nocoo' man Jesucristó ne taj se vaa se si'yaj orún' me rasuun ma'. Tananj nu' rasuun man rihaan 'o 'o nij so' ro', me si'yaj taran' nij so', taj nij so', ne 'o chre' man nij so', ne 'o chre' a'mii nij so', ne orún' rasuun si'yaj cunudanj nij so' a. <sup>33</sup> Ne nij apóstol cune' Jesucristó man nata' se nana so' rihaan yuvii me se nucuj ndo'o nata' nij so'

se vaa cunuu i'na' uún Jesucristó sij 'nij ra'a man ní' a. Ne qui'yaj ndo'o Diose se luj che'é cunudanj nij so' a.

<sup>34</sup> Ne taj vaj a 'ó sí achiin rasuun man 'nij sca'núj nij so' ma'. 'O se cunudanj tinúú nij so' sí vaa to'óo do', sí vaa ve' tucua' do', cutu'véj nij so' si'yaj nij so', ne nicaj nij so' sa'anj quiri' nij so', <sup>35</sup> ne caxrij nij so' sa'anj yo' ston nij apóstol cune' Jesucristó man nata' se nana so' rihaan yuvii a. Ne sese cachiin rasuun rihaan 'o tinúú nij so', ne nij apóstol me nij sí rqué nu' se vaa cachiin rihaan so' a.

<sup>36</sup> Ne yo'o so' ro', me sí cu'naj José, ne tucunáj nij apóstol Bernabé man so' a. Ne nana Bernabé taj se vaa sí 'yaj nari' nucuj ní' me so' a. Ne 'o ta'núú ta'nij si'no sí cu'naj Leví sí cane gaa naá me so', ne cavii so' rej cu'naj Chipre a. <sup>37</sup> Dan me se vaa 'o to'óo so', ne cutu'véj so' man yo', ne nicaj so' sa'anj quiri' so' che'é yo'óo yo', ne caxrij so' ston nij apóstol yo' a.

## 5

*Nana nihánj taj xna'anj che'é cacun' qui'yaj sí cu'naj Ananías do', nica so' chana cu'naj Safira do' a*

<sup>1</sup> Dan me se vaa yo'o sí cu'naj Ananías, ne vaa nica so' chana cu'naj Safira, ne cutu'véj roj nica roj so' 'o yo'óo, <sup>2</sup> ne quiri' roj so' sa'anj, gaa ne quita'aa sí cu'naj Ananías ta'aj sa'anj yo', ne ca'vej rá nica so' quita'aa so' sa'anj yo' a. Gaa ne daj 'ó ta'aj sa'anj ca'anj nicaj so', caxrij so' ston nij apóstol cune' Jesucristó man a. Ne ca'mii ne so' rihaan nij apóstol se vaa nu' sa'anj quiri' so' che'é yo'óo cutu'véj so' me yo', cataj so' a. <sup>3</sup> Gaa ne ca'mii Pedró rihaan sí cu'naj Ananías, cataj so', ne:

—Me che'é catúj sí chree nimán so', ne ca'mii ne so' ndaa rihaan Nimán Diose, ne quita'aa so' ta'aj sa'anj quiri' so' gaa cutu'véj so' yo'óo yo' ga. <sup>4</sup> Dan me se daj guun rá so', ne ca'mii ne so' ga. Nuveé to'oj ma'án so' cutu'véj so' ne gaa cutu'véj so' man yo' ne ne nó xcuún so' qui'yáa so'

ndaa vaa me rá ma'án so' qui'yáa so' ga se sa'anj so' na'. Me che'é cavii raá so' qui'yáa so' se vaa qui'yáa so' nihánj ga. Nuveé rihaan yuvii uun ca'mii ne so' ma'. Ndaa rihaan ma'án ya Diose ca'mii ne so' nanj adonj —taj Pedró rihaan Ananías yo' a.

<sup>5</sup> Gaa cuno Ananías nana ca'mii Pedró rihaan so', ne naxru' so', ne cavi' so' a. Gaa ne cuchu'vi' ndo'o cunudanj nij sí cuno ndaa vaa quiran' so' a. <sup>6</sup> Gaa ne canicun' nij sí tachruu, ne caráán nij so' yatzij xráa sí cavi', gaa ne ca'anj nicaj nij so' man so' xe', gaa ne cachin' nij so' man so' a.

<sup>7</sup> Dan me se cachén va'núj orá ta' asuun, gaa ne catúj nica sí cavi' yo' rá ve', ne ne quene'en no' daj quiran' nica no' ma'. <sup>8</sup> Gaa ne cataj Pedró rihaan no' a:

—Cataj xna'anj so' rihanj sese nu' sa'anj quita'aa roj soj che'é yo'óo cutu'véj roj soj me nihánj á —taj Pedró rihaan no' a.

—Veé cunudanj ya sa'anj quita'aa roj che'é yo'óo me yo' ei —taj no' a.

<sup>9</sup> Gaa ne cataj Pedró rihaan no' a:

—Me che'é cuyaan guun rá roj soj tiha' yu'unj roj soj man Nimán sí 'nij ra'a man ní' ga. Ni'yaj so' ei. Nij sí cachin' man nica so' ro', nicun' ta'yaa, ne nihánj me se cataj nij so' mán so', ca'anj nicaj nij so' mán so' xe' cuano ei —taj Pedró rihaan no' a.

<sup>10</sup> Gaa ne taj ni'yón naxru' no' rihaan yo'óo rej nicun' Pedró, ne nu' cavi' no' a. Gaa ne dan me se catúj uún nij sí tachruu rá ve', ne quene'en nij so' se vaa aj cavi' no', gaa ne ca'anj nicaj nij so' man no' xe', gaa ne cachin' nij so' man no' uún x'núú nica no' a. <sup>11</sup> Gaa ne cuchu'vi' ndo'o cunudanj nij sí cuchumán rá ni'yaj man Jesucristó do', cunudanj nij sí cuno nana daj quiran' roj nica roj so' a.

*Nana nihánj taj xna'anj che'é suun sa' nocoo qui'yaj nij apóstol cune' Jesucristó man nata' se nana so' a*

<sup>12</sup> Gaa ne qui'yaj ndo'o nij apóstol cune' Jesucristó man suun sa' nocoo

ni'yaj nij yuvii ne chuman' Jerusalén a. Ne yo'o vaa rá nij síi noco' man Jesucristó, ne cunuu chre' nij so' rá nuvíi noco' rá chingá cu'naj Corredor Salomón a. <sup>13</sup> Tzaj ne yo'ó nij yuvii ro', ne quisij rá nij so' cunuu chre' nij so' gá nij síi noco' man Jesucristó ma'. Tzaj ne cunudanij nij yuvii cataj se vaa sa' qui'yaj nij síi noco' man Jesucristó a. <sup>14</sup> Tzaj ne cuchumán rá que'ee nij snó'o do', nij chana do', ni'yaj nij so' man síi 'nij ra'a man ní', ne che'é dan guun riij doj nij yuvii noco' man so' a. <sup>15</sup> Ne dan me se rihaan chruun do', rihaan yuvéé do', táá nij síi ran', riij nij yuvii man nij síi ran' yo' xe' a. Cuchruj niij man nij síi ran' rá callé rej cachén Pedró, che'é se sese se cachun' Pedró cano xráá nij síi ran' ne nahuun so', rá nij yuvii a. <sup>16</sup> Gaa ne ca'na' ndo'o yuvii cavii nij chuman' naj nichrun' chuman' Jerusalén, ne nuu chre' nij so' a. Dan me se atá nij so' síi ran' do', síi nuu nana chree nimán do', ne nahuun sa' cunudanij nij so' a.

*Nana nihánj taj xna'anj che'é sayuun qui'yaj niij man nij apóstol cune' Jesucristó man nata' se nana so' rihaan yuvii a*

<sup>17</sup> Dan me se guun xcoj ruvaa rá nij tuvii' xrej atá suun noco' doj ni'yaj nij so' man nij apóstol cune' Jesucristó man nata' se nana so' rihaan yuvii a. Dan me se nij tuvii' xrej me se síi saduceo me nij so' a. <sup>18</sup> Dan me se ca'née nij so' tanuu quita'aa man nij apóstol, gaa ne caxrój nij so' taga' man nij so' a. <sup>19</sup> Tzaj ne rej niij me se ca'na' yo'o se mozó síi 'nij ra'a man ní', ne ca'núj so' ta'yaa taga' yo', ne ca'anj nicaj so' man nij apóstol xe' a. Gaa ne cataj se mozó Diose yo' rihaan nij apóstol:

<sup>20</sup> —Cavii soj, ne ca'anj soj canicun' soj rá nuvíi noco', ne nata' soj rihaan nij yuvii nu' nana nihánj nana taj xna'anj daj qui'yaj nij yuvii ne ca'vee gaa i'na' nimán nij yuvii rihaan Diose á —taj se mozó Diose yo' rihaan nij so' a.

<sup>21</sup> Síj cuno nij so' nana vaa danj, gaa ne rej síj güii catúj nij so' rá nuvíi noco', ne tucu'yón nij so' se nana Jesucristó rihaan nij yuvii a. Maan orá dan canacúun nij tuvii' xrej atá suun noco' doj, ne cunuu chre' cunudanij nij síi uun chij rihaan nij yuvii israelitá, qui'yaj nij so' juntá a. Gaa ne ca'née nij so' síi ca'anj taga', ne ca'na' nicaj nij so' man nij apóstol rihaan nij so', rá nij so' a. <sup>22</sup> Dan me se cuchii' nij mozó ca'née nij síi uun chij yo' taga', gaa ne ne nari' mozó man nij apóstol rque taga' a ma'. Che'é dan me canicaj nij mozó yo' rej mán nij síi uun chij yo', ne nata' nij mozó yo' se vaa guun taga' a. <sup>23</sup> Dan me se cataj nij mozó yo' a:

—Dan me se gaa cuchii' núj taga', ne vaa raan taga', ne nicun' nij tanuu rihaan ta'yaa, tumé nij tanuu ta'yaa a. Tzaj ne gaa ca'núj núj ta'yaa, ne ne nari' núj á 'ó yuvii rá taga' a ma' —taj nij mozó rihaan nij síi uun chij yo' a.

<sup>24</sup> Dan me se gaa cuno tanuu uun chij rihaan nij tanuu tumé nuvíi noco' do', gaa cuno nij xrej atá suun noco' doj do', nana vaa danj, gaa ne dan me se kuchu'vi' nij so', ne ne quene'en nij so' daj guun rej rihaan nij so' qui'yaj nij síi noco' man Jesucristó a. <sup>25</sup> Gaa ne dan me se cuchii' yo'o so' rihaan nij síi uun chij, gaa ne nata' so' rihaan nij so', cataj so':

—Xa' nij síi caxrój nij soj taga' man, tzaj ne cuano nihánj me se nicun' nij so' rá nuvíi noco', tucu'yón uxrá nij so' rihaan nij yuvii nanj á —taj síi ca'na' rihaan nij so' a.

<sup>26</sup> Gaa ne cavii tanuu uun chij rihaan nij tanuu tumé nuvíi noco' cavii nij mozó cavii, ca'anj nij so' nuvíi noco', ne ca'anj nacaj nij so' man nij apóstol cune' Jesucristó man rihaan nij síi uun chij yo' a. Tzaj ne ne qui'yaj nij so' fuerzá man nij síi cune' Jesucristó man ma'. 'Q se kuchu'vi' tanuu do', nij mozó do', ni'yaj nij so' man nij yuvii se vaa go' nij yuvii yahij xráá ma'an nij so' a.

<sup>27</sup> Dan me se ca'na' nicaj nij so' man nij apóstol rej cunuu chre' cunudanj nij sí uun chij rihaan nij yuvii israelitá a. Gaa ne xná'anj xrej ata suun nocoo doj man nij so', <sup>28</sup> cataj so' a:

—Né se aj cataj xna'anj núj rihaan nij soj se vaa ca'ne' rá soj ga suun tucu'yón rihaan nij yuvii che'é sí nata' soj che'é a. Tzaj ne cuano nihánj me se aj cuchí' se nana soj rihaan cunudanj nij sí man chuman' Jerusalén nihánj, qui'yaj soj, ne me rá soj caraa soj cacun' xráá núj se vaa cavi' snó'o noco' soj qui'yaj núj á —taj so' rihaan nij apóstol a.

<sup>29</sup> Gaa ne cataj Pedró do', yo'ó nij apóstol cune' Jesucristó man do' a:

—Tzaj ne 'o se no xcúún ní' cuno ní' asino yaan nana a'mii Diose rihaan nana a'mii yuvii a. <sup>30</sup> 'O se nij soj me sí toco' man Jesucristó rihaan rcutze, ne cavi' so', qui'yaj soj, ne Diose noco' xii ní' asij naá ro', me sí qui'yaj cunuu i'na' uún so' adonj. <sup>31</sup> Gaa ne ma'an Diose qui'yaj cavii Jesucristó xta', ne nicun' Jesucristó rej x'núj Diose rej nuva' Diose, ne guun Jesucristó sí uun chij ndo'o, ne sí tinanii man ní' rihaan sayuun guun so', che'é rej ca'vee canicaj nimán ní' sij israelitá gaa ne quinavij cacun' tumé ní' adonj. <sup>32</sup> Ne núj me sí nata' nana nihánj rihaan yuvii ei. Ne ne'en Nimán Diose uún se vaa ya ya vaa nana nihánj, ne rqué Diose Nimán Diose rihaan núj sij uno rihaan Diose a —taj nij so' rihaan nij sí uun chij rihaan nij yuvii israelitá a.

<sup>33</sup> Dan me se gaa cuno nij sí uun chij nana nihánj, gaa ne ca'maan uxrá rá nij so', gaa ne guun rá nij so' ticavi' nij so' man nij apóstol yo' a. <sup>34</sup> Tzaj ne canicun' caya yo'o tuvi' nij so' 'o sí fariseo sí cu'naj Gamaliel, ne sí naqui'yaj cuu se tucuanj Moisés me so', ne caráj cochroj cunudanj nij yuvii ni'yaj nij yuvii man so' a. Gaa ne ca'ne' so' suun se vaa curihanj nij apóstol doj 'o orá nii xe' a. <sup>35</sup> Gaa ne cataj Gamaliel rihaan yo'ó nij sí uun chij yo' a:

—Cuno soj sij israelitá nana ca'mij rihaan nij soj cuano á. Dan me se tadó soj daj qui'yaj soj ga nij snó'o ca'na' rihaan ní' nihánj á. <sup>36</sup> 'O se asij rque doj me se nachumaan 'o sí cu'naj Teudas, ne so' ro', me sí cataj se vaa sij sa' uxrá me ma'an so', ne canoco' 'o ca'anj cientó yuvii xcó so' ta' asuun a. Gaa ne ticavi' nii man so', ne cha'nuu cunudanj nij sí cuno se nana so', ne navij nu' se nana so' nanj adonj. <sup>37</sup> Gaa ne dan me se cachén doj, gaa ne cavii yo'ó sí cu'naj Judas sí cavii estadó Galilea, ne nachumaan so' gaa güii cachrón gobiernó se chuvii cunudanj nij yuvii rihaan yanj a. Gaa ne tiha' yu'unj so' man yuvii, ne canoco' nij yuvii xcó so' a. Gaa ne cavi' so' uún, gaa ne cunudanj nij yuvii cuno se nana so' cha'nuu uún a.

<sup>38</sup> Ne cuano nihánj me se cataj xna'anj 'unj rihaan nij soj se vaa se qui'yaj nij soj a doj sayuun man nij sí ca'na' rihaan ní' cuan' ma'. 'O se sese tucuaán cuchruj yuvii uun me se tucuanj nij so', ne sese 'yaj nij so' ndaa vaa avii raá ma'an nij so', ne quirí' nu' se vaa 'yaj nij so' nanj adonj. <sup>39</sup> Tzaj ne sese Diose me sí rqué se nana nij so', ne sese 'yaj suun nij so' se suun Diose, ne daj chihaa mij se ca'anj ni'ya se nana nij so' qui'yaj soj ma'. Sese danj guun qui'yaj nij soj, ne sí unu' ga ma'an Diose me nij soj adonj —taj sí cu'naj Gamaliel cuno yo'ó nij sí uun chij rihaan nij yuvii israelitá a.

Dan me se cuchumán rá nij so' se nana sí cu'naj Gamaliel yo', <sup>40</sup> gaa ne canacúún nij so' man nij apóstol, ne catúj nij so' rej mán nij so', gaa ne go' nii rutzii xráá nij apóstol, qui'yaj nij sí uun chij, ne ca'ne' nij so' suun rihaan nij apóstol se vaa se ca'mii nij so' a 'o nana che'é Jesucristó rihaan nij yuvii, gaa ne na'née nij sí uun chij yo' chrej man nij apóstol a. <sup>41</sup> Dan me se curihanj nij apóstol rej mán nij sí uun chij rihaan nij yuvii israelitá, ne guun niha' rá nij apóstol che'é se sij vaa sa' me nij so' ni'yaj Diose ne che'é dan



ca'vee quiran' nij so' sayuun che'é Jesucristó qui'yaj Diose a. <sup>42</sup> Ne daj a güii me se cunuu chre' nij apóstol rá nuvíi nocoo do', rá ve' tucúa nij so' do', ne yo'ó tucu'yón nij so' man nij yuvii, ne nata' nij so' se nana Jesucristó nana sa' rihaan nij yuvii a.

## 6

*Nana nihánj taj xna'anj daj cune' nii man chij síi 'yaj suun che'é nij síi cuchumán rá ni'yaj man Jesucristó a*

<sup>1</sup> Ne güii dan me se guun rii doj nij síi tucu'yón se nana Jesucristó, ne dan me se ta'aj nij so' me síi a'mii xna'ánj griego, ne yo'ó ta'aj nij so' me síi a'mii xna'ánj hebreo a. Ne dan me se nij ca'mii nij síi a'mii xna'ánj griego ni'yaj nij so' man nij síi a'mii xna'ánj hebreo, che'é se chá go' nij síi a'mii xna'ánj hebreo yo' rihaan nij chana nique cavi' nica daj a güii a. Ne rihaan nij chana nique cavi' nica níi a'mii xna'ánj griego me se ne cuyaan go' nij so' se chá cha nij no' a ma'. Ne che'é dan a'maan rá nij síi a'mii xna'ánj griego a. <sup>2</sup> Che'é dan chuvij nij apóstol cune' Jesucristó man ro', canacúun nij so' man nij síi tucu'yón se nana Jesucristó cunuu chre' nij so', ne cataj chuvij nij so' a:

—Nij uxrá vaa sese tanáj xco núj suun nata' se nana Diose rihaan yuvii che'é rej qui'yaj chuvii núj co'oo rihaan nij chana cavi' nica adonj. <sup>3</sup> Che'é dan narii nij soj chij tinúú ní' síi ve'é a'mii nii ni'yaj nii man, tinuj. Dan me se nano' soj síi nuu ndo'o Nimán Diose nimán, ne síi cuu raá nano' soj, ne cune' ní' man nij so' se vaa qui'yaj suun nij so' suun nihánj á. <sup>4</sup> Ne xa' núj, tzaj ne inanj suun yo'ó cachinj ni'yaj rihaan Diose qui'yaj suun núj, ne nata' núj se nana Diose nanj á —taj chuvij nij apóstol cune' Jesucristó man nata' se nana so' a.

<sup>5</sup> Dan me se guun niha' rá cunudanj nij yuvii gaa cuno nij yuvii nana yo', ne narii nij yuvii man chij tinúú nij so', ne yo'ó so' me síi cu'naj Esteban, ne so' ro', me síi nucaj uxrá

rá ni'yaj man Diose, ne nuu ndo'o Nimán Diose nimán so' a. Ne narii uún nij so' man síi cu'naj Felipé do', Prócoro do', Nicanor do', Timón do', Parmenas do', Nicolás do' a. Ne nuveé sij israelitá me Nicolás, maan ne síi guun rá canoco' se tucuanj nij síi israelitá guun so', ne síi cavii chuman' Antioquía me so' uún a. <sup>6</sup> Ne dan me se nicaj nij yuvii man chij nij so' ca'anj nij so' rihaan chuvij nij apóstol cune' Jesucristó man, ne nij apóstol me se cachín ni'yaj nij so' rihaan Diose, gaa ne cuta' nij so' ra'a nij so' raá chij nij so' che'é yan go' nij so' se chá rihaan nij chana nique cavi' nica a.

<sup>7</sup> Dan me se cha'nuu uxrá se nana Diose, ne guun rii ndo'o doj nij síi tucu'yón se nana Jesucristó chuman' Jerusalén yo', ne ndaa que'ee uxrá nij xrej israelitá cuchumán rá se nana Jesucristó ne cuno rihaan Jesucristó a.

*Nana nihánj taj xna'anj daj qui'yaj nii gaa quita'aa nii man síi cu'naj Esteban a*

<sup>8</sup> Dan me se síi cu'naj Esteban me se racuíj ndo'o Diose man so', ne guun nucaj ndo'o so', ne dan me se qui'yaj ndo'o so' suun sa' nocoo ni'yaj nij síi man rej chuman' Jerusalén a. <sup>9</sup> Tzaj ne canicun' que'ee yuvii, ne ta'aj nij so' me síi 'anj ve' tucu'yón rej nuu chre' nij síi qui'yaj canaán curihanj rihaan se ru'vee nij so', ne yo'ó ta'aj nij so' me síi cavii chuman' Cirene, ne yo'ó ta'aj nij so' me síi cavii chuman' Alejandría, ne yo'ó ta'aj nij so' me síi cavii rej cu'naj Cilicia do', rej cu'naj Asia do' a. Dan me se canó tuvi' taran' nij so' ga' síi cu'naj Esteban, <sup>10</sup> tzaj ne ne ca'vee qui'yaj canaán se nana nij so' rihaan se nana Esteban a ma'. 'O se racuíj ndo'o Nimán Diose man síi cu'naj Esteban, ne cavii ndo'o nana cuu raá so', qui'yaj Nimán Diose a. <sup>11</sup> Gaa ne caxri'j nij so' chrej rque yo'ó ta'aj snó'o uún, ne snó'o yo' cataj:

—Cuno núj se vaa ca'mii síi cu'naj Esteban yo' nana nij che'é síi cu'naj

Moisés gā ma'an Diose á —taj nij snó'o yo', ca'mii ne nij so' a.

<sup>12</sup> Gaa ne ca'maan rá nij yuvii do', nij síi uun chij rihaan nij yuvii israelitá do', nij síi naqui'yaj cuu se tucuanj Moisés rihaan yuvii do', gaa cuno nij so' se nana nij síi ne yo' a. Gaa ne cavii nij so', quita'aa cunudanj nij so' man Esteban, ne ca'anj nicaj nij so' man so' rá ve' nuu chre' nij so', qui'yaj nij so' juntá a. <sup>13</sup> Gaa ne canicun' doj síi ca'mii ne síi caraa cacun' xráá Esteban, ne cataj nij so' a:

—Síi nihánj ro', ne a'ne' rá so' gā suun a'mii quij che'é rej guee nihánj do', che'é tucuaán noco' ní' do', a ma'. <sup>14</sup> O se cuno núj se vaa cataj so' se vaa Jesucristó síi cavii chuman' Nazaret me síi tiri' nu' nuvií noco' nihánj, ne natuná so' tucuaán cuchruj síi cu'naj Moisés che'é ní' adonj —taj nij so', ca'mii ne nij so' ni'yaj nij so' man Esteban yo' a.

<sup>15</sup> Gaa ne ni'yaj uxrá cunudanj nij síi yanj rá ve' yo' man Esteban yo', ne ase vaa rihaan se mozó Diose ro', danj vaa rihaan so', ni'yaj nij so' a.

## 7

<sup>1</sup> Gaa ne xná'anj xrej ata suun noco' doj man síi cu'naj Esteban, cataj xrej:

—Yá uxrá danj ca'mii so' dan tu'va nij so' danj che'é so' na' —taj so', xná'anj so' man Esteban a.

*Nana nihánj taj xna'anj daj ca'mii natáj síi cu'naj Esteban rihaan nij síi uun chij rihaan nij yuvii israelitá a*

<sup>2</sup> Gaa ne cataj síi cu'naj Esteban yo': —Cuno soj ca'mij rihaan soj, tinuj, ta'nuj. Dan me se gaa ataa cayáán xii ní' síi cu'naj Abraham chuman' Harán, ne ni'ndaj ya ve'é vaa Diose curuvi' rihaan so' rej vaj so' rej cu'naj Mesopotamia, <sup>3</sup> ne cataj Diose rihaan so': “Curihanj so' chiháán so' rej ne nij tuví so', ne cavii so' ca'anj so' 'o rej tiháán 'unj mán so' á”, taj Diose rihaan Abraham a. <sup>4</sup> Gaa ne dan me se curihanj so' rej ne nij síi caldeo, ne

ca'anj so' cayáán so' chuman' Harán a. Gaa ne quisij cavi' rej so', ne cavii uún so', ca'anj so' cayáán so' yo'óo nihánj rej ne ma'an nij soj cuano a. <sup>5</sup> Tzaj ne a doj yo'óo ne rque Diose rihaan síi cu'naj Abraham ma'. Ne a 'ó ta'níi Abraham ne ca'ngaa gaa cata' tu'va Diose rihaan so' se vaa guun si'yaj nij ta'níi ta'nij si'no Abraham man yo'óo nihánj nanj á.

<sup>6</sup> ”Gaa ne cataj uún Diose rihaan so' se vaa ca'anj cayáán nij ta'níi ta'nij si'no so' to'óo yo'ó yuvii, ne guun nij so' mozó cunuú rihaan yo'óo nij yuvii yo', ne tucuxru' yo'óo nij yuvii man nij so' cunu' ca'anj cientó yo' a. <sup>7</sup> Ne xa' nij yuvii guun nij so' mozó rihaan, tzaj ne ma'an Diose qui'yaj sayuun man nij yuvii yo', gaa ne curihanj nij ta'níi ta'nij si'no Abraham rej yo', ne naman nij so' cayáán nij so' rej nihánj, ne canoco' nij so' man Diose, ne qui'yaj suun nij so' che'é Diose, taj Diose rihaan Abraham gaa naá a.

<sup>8</sup> ”Dan me se cata' tu'va Diose se vaa qui'yaj Diose danj che'é nij tuvi' Abraham, gaa ne ca'ne' Diose suun se vaa cutá' taran' nij tuvi' Abraham ta'nga' man nij so', che'é se yuvii 'nij ra'a Diose man me nij so' a. Ne dan me se ca'ngaa ta'níi Abraham síi cu'naj Isaac, ne cuta' Abraham ta'nga' man so' gaa vaj so' tunj güii a. Ne danj qui'yaj Isaac uún che'é ta'níi so' síi cu'naj Jacob, ne danj qui'yaj uún Jacob che'é nij ta'níi so' chuvij nij xii ní' nij síi cayáán gaa naá a.

<sup>9</sup> ”Gaa ne dan me se guun xcoj ruvaá rá nij xii ní' ni'yaj nij so' man tinúú nij so' José, gaa ne cutu'vej nij so' man so' rihaan síi ca'anj nicaj man so' ndaa rej yo'óo cu'naj Egiptó a. Ne Diose vaj gā so', <sup>10</sup> ne tinanii Diose man so' rihaan nu' sayuun quiran' so' a. Gaa ne guun rá síi nicaj suun rey síi cu'naj Faraón ni'yaj so' man José, ne síi sa' ndo'o avii raá guun José rihaan Faraón, qui'yaj Diose a. Gaa ne cune' Faraón man José se vaa guun chij José rihaan rej Egiptó, ne ndaa rihaan nu' ve' tucua' Faraón guun chij José a.

11 "Gaa ne cachén ndo'o x'naa nu' rej Egiptó do', rej yo'ó cu'naj Canaán do', ne quiran' ndo'o nij yuvi' sayuun, ne xii ní' ro', ne guun nucaj nij so' quirí' nij so' se cha' nij so' ma'. 12 Gaa ne cuno Jacob nana se vaa vaa 'núú trigó ane' rej Egiptó, ne che'é dan tihaj yuun ca'née so' man nij ta'níi so' ca'anj nij so' nano' nij so' 'núú trigó a. 13 Dan me se quisíj vij ca'anj nij so' rej Egiptó, gaa ne cataj xna'anj José rihaan nij so' se vaa tinúú nij so' me so', gaa ne dan me se xcaj Faraón cuentá me rej cavii José a.

14 "Gaa ne ca'née José nana rihaan rej so' Jacob se vaa ca'anj nij tuvi' Jacob cayáán nij so' rej Egiptó, ne dan me se va'nuj chihaa xnu' yuvi' me nij tuvi' Jacob yo' a. 15 Gaa ne dan me se ca'anj Jacob rej Egiptó a. Cachén doj, gaa ne cavi' so', ne cavi' nij ta'níi so' xii ní', 16 gaa ne ca'anj nicaj nii man cúu man nij so' ndaa chuman' cu'naj Siquem, ne dan me se cachin' nii man cúu man nij so' rque yu'uj yuvej aj quiránj Abraham rihaan nij ta'níi síi cu'naj Hamor rej chuman' Siquem yo' a.

17 "Dan me se gaa quinichrun' güii quisij ya nu' nana aj cata' tu'va Diose rihaan Abraham gaa naá, ne dan me se xna'anj nij yuvi' israelitá yo' rej Egiptó, ne guun ri' ndo'o doj nij so' a. 18 Danj qui'yaj nij so' ndaa se catúj yo'ó síi nicaj suun rey yo'ó Egiptó, ne ne ne'en so' a doj che'é síi cu'naj José a ma'. 19 Ne so' me síi tiha' yu'unj man tuvi' ní' nij yuvi' israelitá, ne tucuxru' so' man xii ní' nij yuvi' israelitá yo' a. Dan me se ca'ne' so' suun se vaa quirí'ij nii man ta'níi nij yuvi' israelitá ne'ej leé no xe', che'é rej cavi' ta'níi nij so' a. 20 Ne maan tió dan me se ca'ngaa síi cu'naj Moisés, ne caran' rá Diose ni'yaj so' man Moisés, ne rque va'nuj yavii tucuchij rej so' ga' nii so' man so' tucua' rej so' a. 21 Gaa ne caxríj yuve roj so' man ne'ej cu'naj Moisés xe' yo'ó rej yaníj, gaa ne dan me se nacaj ma'an ta'nij chana' Faraón man ne'ej cu'naj

Moisés yo', ne tucuchij no' man so' ase 'yá' ga' ta'níi ma'an' qui'yaj no' a. 22 Gaa ne tucuyón nii nu' se nana nij síi man Egiptó nana cu' man síi cu'naj Moisés, ne sca' a'mii so' ne sca' 'yaj suun so' a.

23 "Dan me se quisíj síi cu'naj Moisés vij chihaa yo', gaa ne guun rá so' ca'anj ni'yaj so' daj ran' nij tuvi' so' nij yuvi' israelitá a. 24 Ne dan me se quene'en so' se vaa tucuxru' yo'ó síi man yo'ó Egiptó man 'o' síi israelitá a. Che'é dan guun rá síi cu'naj Moisés yo' nayo' cuentá che'é tuvi' so' síi israelitá, ne che'é dan go' so' man síi man yo'ó Egiptó yo' a. 25 Gaa ne guun rá síi cu'naj Moisés se vaa xcaj nij tuvi' so' síi israelitá cuentá se vaa Diose racuíj man so' tinanii so' man nij so' rihaan nij síi man Egiptó, tzaj ne ne xcaj nij so' cuentá ma'.

26 "Dan me se yo'ó güii me se cuchi' so' rej man nij yuvi' israelitá, ne dan me se vij tuvi' nij so' cunu', ne guun rá so' na'mii sa' uún roj so', ne che'é dan cataj so': "Tinuj. Me che'é unu' roj tinuj roj soj ga'", taj so' rihaan roj so' a. 27 Ne síi tucuxru' man tuvi' ro', tigu'j ra'a so' man Moisés, ne cataj so': "Taj vaj síi cune' man so' guun chij so' rihaan núj ne ca'ne' so' cacun' che'é núj ma'. 28 Ne nihánj me se guun rá so' ticaví' so' manj, ndaa vaa ticaví' so' man síi man yo'ó Egiptó quii na'", taj síi tucuxru' man tuvi' rihaan síi cu'naj Moisés yo' a. 29 Gaa ne che'é se xcaj síi cu'naj Moisés cuentá se vaa cha'nuu ndo'o nana se vaa ticaví' so' man 'o' síi man yo'ó Egiptó, gaa ne che'é dan cunanj so', ne ca'anj so' cayáán so' rej cu'naj Madián a. Ne xcaj so' chana, ne ca'ngaa vij ta'níi so' snó'o cunii a.

30 "Dan me se cachén vij chihaa yo', gaa ne rej tacaan nichrun' quij cu'naj Sinaí me se quene'en so' 'o' coj aco' ya'an raá, ne curuvi' yo'ó se mozó Diose rque ya'an yo' quene'en so' a. 31 Ne ca'anj rá Moisés gaa quene'en so' rasuun ya'anj yo', ne guun rá so' quinichrun' so' rihaan coj yo' ni'yaj so' man yo', tzaj ne cuno so' ca'mii

sí 'nij ra'a man ní', <sup>32</sup> ne dan me se cataj sí 'nij ra'a man ní': "Unj ro', me Diose noco' nij xii so' gaa naá a. Dan me se Diose noco' sí cu'naj Abraham do', sí cu'naj Isaac do', sí cu'naj Jacob do', mé 'unj á", taj Diose sí 'nij ra'a man ní' cuno Moisés a. Gaa ne cuchu'vi' Moisés ne quiril'ij man so', ne ne quisij rá so' ni'yaj so' coj aco' ya'an raá yo' a. <sup>33</sup> Gaa ne cataj sí 'nij ra'a man ní' rihaan so' a: "Quirij so' canj 'nij tacóo so' á. 'O se yo'óo nicun' so' cuano ro', me yo'óo guee ndo'o adonj. <sup>34</sup> Dan me se ni'yaj 'unj, ne quene'én 'unj sayuun ran' nij yuvi' noco' manj rej Egipto, ne cunoj daj rnúj nij so' che'é sayuun ran' nij so', ne nihánj me se nanij 'unj che'é se me raj tinanii 'unj man nij so' rihaan sayuun ran' nij so' a. Che'é dan cuva' so', ne ca'nej 'unj mán so' rej Egipto á", taj sí 'nij ra'a man ní' rihaan Moisés a.

<sup>35</sup> "Dan me se xa' Moisés, tzaj ne so' me sí quiril'ij yanij nij yuvi' israelitá man gaa cataj nij so' se vaa taj vaj sí cune' man so' guun chij so' rihaan nij so' ne ca'ne' so' cacun' che'é nij so' ma'. Tzaj ne so' me sí ca'née ma'an Diose se vaa guun chij so' rihaan nij yuvi' israelitá ne quirij so' man nij yuvi' israelitá rej guun nij so' mozó rihaan yo'ó yuvi' a. Danj qui'yaj Diose ga Moisés gaa quene'en Moisés se mozó Diose yo' rque coj aco' ya'an raá yo' a. <sup>36</sup> Dan me se curihanj nij yuvi' israelitá rej cu'naj Egipto, qui'yaj Moisés, ne qui'yaj ndo'o so' suun sa' nocoo Egipto do', rej naj na ya'anj cu'naj Na Ya'anj Maree do', rej tacaan vaj nij so' vij chihaa yo' do' a. <sup>37</sup> Ne ma'an Moisés yo' me sí cataj rihaan nij sí israelitá: "Vaa güii, ne yo'o tuvi' soj ro', guun sí nata' se nana Diose, qui'yaj Diose, ne ase vaa 'yáa 'unj ro', danj qui'yaj so' uún a", taj Moisés rihaan nij yuvi' israelitá a.

<sup>38</sup> "Ne Moisés me sí vaj ga cunudanj nij yuvi' israelitá rej tacaan, ne cachée so' ga se mozó Diose sí ca'mii rihaan so' rej tacaan nichrun' quij cu'naj Sinaí, ne cachée

so' ga nij xii ní' uún, ne so' me sí nata' Diose se nana Diose nana nucuaj rihaan, che'é rej tacuachén so' nana yo' ndaa rihaan ní' a. <sup>39</sup> Tzaj ne ca'vej rá nij xii ní' cuno nij so' rihaan Moisés ma'. 'O se tanáj xco nij so' se nana so', ne guun inanj rá nij so' qui'yaj nij so' ndaa vaa 'yaj nij so' rej Egipto a. <sup>40</sup> Dan me se cataj nij xii ní' rihaan sí cu'naj Aarón, ne: "Qui'yáa so' ya'anj canoco' ní', gaa ne quitaj yaan ya'anj yo' rihaan ní' cachee ní' á. 'O se xa' Moisés sí qui'yaj curihanj ní' rej cu'naj Egipto, tzaj ne ne ne'en uxrá núj daj quiran' so' a ma'", taj nij yuvi' rihaan Aarón a. <sup>41</sup> Ne güii dan me se qui'yaj nij yuvi' israelitá 'o scúj le'ej, ne guun yo' ya'anj noco' nij so', ne rque ndo'o nij so' rasuun rihaan ya'anj yo', gaa ne guun niha' rá nij so' ni'yaj nij so' ya'anj qui'yaj ma'an nij so' a.

<sup>42</sup> "Che'é dan guun yanij Diose rihaan nij yuvi' israelitá, ne ca'née ra'a Diose man nij so' na'vij nij so' rihaan nij rasuun vaa rej xta', ne dan me se na'vij nij so' rihaan güii do', rihaan yavii do', rihaan nij yati' do' a. Dan me se danj inanj taj nana no rihaan yanj qui'yaj nij sí nata' se nana Diose gaa naá, ne nana yo' taj: "Taj vaj rasuun rque nij soj sij israelitá rihanj gaa vaj soj rej tacaan vij chihaa yo' ma'. Taj vaj xcuu ca-caa rihanj, qui'yaj soj ma'. <sup>43</sup> Tananj cata soj ve' mantá nuu ya'anj cu'naj Moloc, ne cata soj yati' chraan, ne guun yo' ya'anj cu'naj Renfán rihaan soj nanj adonj. Dan me se ya'anj qui'yaj ma'an soj na'vij soj rihaan me roj ya'anj yo', ne che'é dan nonaj rej cane soj, ne rej xco chuman' Babilonia cayáan soj, qui'yaj adonj", taj Diose rihaan nij xii ní' a.

<sup>44</sup> "Dan me se nicaj xii ní' nuvi' mantá, ne ve' nata' ma'an Diose nana rihaan nij xii ní' gaa vaj nij so' rej tacaan me ve' yo' a. Ne nuvi' mantá yo' ro', qui'yaj Moisés man yo' ndaa vaa cataj xna'anj Diose rihaan so' a. Dan me se ase vaa nuvi' mantá tihaan Diose rihaan Moisés, danj vaa



qui'yaj so' a. <sup>45</sup> Ne ca'anj nicaj nij xii ní' ga síi cu'naj Josué man nuvíi mantá yo' ndaa to'óo yuvii yaníj, ne dan me se quirii yaníj Diose man nij yuvii yaníj rihaan to'óo nij so', ne catúj nij xii ní', qui'yaj Diose a. Ne nuvíi mantá yo' me rej quina'víj nij xii ní' rihaan Diose ndaa se cayáán síi cu'naj David síi nicaj suun rey a.

<sup>46</sup> "Ne David ro', guun niha' rá Diose ni'yaj Diose man so', ne cachíin ni'yaj so' rihaan Diose se vaa ca'vej rá Diose cune' so' nuvíi nocoo rej na'víj nii rihaan ta'anj síi cu'naj Jacob a. <sup>47</sup> Ne síi cu'naj Salomón me síi cune' nuvíi yo' a. <sup>48</sup> Tzaj ne nuveé sij ne rá ve' une' yuvii me Diose síi 'nij ra'a nu' chumií ma'. 'O se cataj xna'anj síi nata' se nana Diose se vaa ma'an Diose cataj: <sup>49</sup> "Rej xta' ro', me chruun xlá sa' táa 'unj, ne yo'óo ro', me rej taj tacój adonj. Che'é dan taj che'é cune' nij soj ve' cané 'unj ma', taj síi 'nij ra'a man ní', ne taj uún so': Taj rej qui'yaj soj naraan rá 'unj ma'. <sup>50</sup> 'O se ma'anj ra'aj qui'yaj nu' nij rasuun nihánj adonj", taj ma'an Diose a.

<sup>51</sup> "Dan me se nichraj ndo'o rá soj, ne nuveé sij niha' rá xcaj cuentá che'é tucuáán sa' me soj ma'. Tananj niganj anó tuvi' soj ga Nimán Diose adonj. Ase vaa qui'yaj xii soj ro', danj 'yaj guee ma'an soj uún nanj á. <sup>52</sup> Dan me se canoco' xii soj man cunudanj nij síi nata' se nana Diose, ne guun rá nij so' qui'yaj nij so' sayuun man nij so', ne ndaa ticavi' nij so' man nij síi nata' che'é síi sa' ca'nej Diose rihaan chumií nihánj tinanii man yuvii rihaan sayuun ei. Ne síi sa' yo' me se guun nij soj síi tacuachén man so' rihaan nij síi taj ri'yunj man ní', ne ndaa ticavi' nij soj man so' vaa ei. <sup>53</sup> Dan me se soj me síi guun rá se vaa se tucuanj Diose ro', me nana cataj xna'anj nij se mozó Diose rihaan soj, tzaj ne ne uno soj nana yo' ma' —taj síi cu'naj Esteban rihaan nij síi uun chij rihaan nij yuvii israelitá a.

*nii gaa ticavi' nii man síi cu'naj Esteban a*

<sup>54</sup> Dan me se gaa cuno nij síi uun chij rihaan nij yuvii israelitá nana vaa danj, gaa ne cuyanj rá nij so', ne ndaa chá ruj ma'an nij so' tu'va nij so' ni'yaj nij so' man Esteban a.

<sup>55</sup> Tzaj ne Esteban ro', caraa ndo'o Nimán Diose nimán so', ne dan me se ni'yaj so' rej xta', ne quene'en so' rej ve'é ndo'o vaa rej nicun' Diose, ne quene'en so' se vaa nicun' Jesucristó rej x'nuú Diose rej nuva' Diose a. <sup>56</sup> Gaa ne cataj síi cu'naj Esteban a: —Nihánj me se nax'núj rej xta' ni'yaj 'unj, ne ne'én 'unj man síi ca'née Diose nica' yu'unj man yuvii se vaa nicun' so' rej x'nuú Diose rej nuva' Diose á —taj so' no nij síi uun chij a.

<sup>57</sup> Gaa ne nucuaj ndo'o caguáj nij so', ne caráán ra'a nij so' xreé nij so', che'é rej ne ca'vej daj chihaa míj rá nij so' cunoo nij so' a doj se nana Esteban a ma'. Gaa ne cunanj cunudanj nij so' ndaa rej nicun' Esteban, ne quita'aa cunudanj nij so' man so', <sup>58</sup> ne quirii nij so' man Esteban rque chuman' Jerusalén yo', ne guun che'e nij so' go' nij so' yahij man Esteban a. Dan me se nij síi caraa cacun' xráá Esteban me se cuchruj nij so' sagan' nij so' rihaan yo'óo rej nicun' 'o síi tachruu cu'naj Saulo a. <sup>59</sup> Gaa ne go' ndo'o nij so' yahij man Esteban, ne cachíin ni'yaj so' rihaan Jesucristó, ne cataj so':

—Nihánj me se nacaj so' nimanj, Jesucristó Síi Chij —taj so', cachíin ni'yaj so' rihaan Jesucristó a.

<sup>60</sup> Gaa ne canicun' ruj so', ne nucuaj ndo'o caguáj so', cataj so':

—Se caraá so' cacun' nihánj xráá nij so', man Síi Chij —taj so', gaa ne cavi' so' a.

## 8

<sup>1</sup> Ne síi cu'naj Saulo yo' ro', cunaj quiran' Esteban rá so' a.

*Nana nihánj taj xna'anj che'é sayuun qui'yaj síi cu'naj Saulo man*

*nij yuvii cuchumán rá ni'yaj man Jesucristó a*

Ne güii dan me se guun che'e nii qui'yaj ndo'o nii sayuun man nij síi cuchumán rá ni'yaj man Jesucristó síi ne chuman' Jerusalén a. Dan me se cunánj nij so' chuman' Jerusalén, ne ca'anj nij so' ndaa nu' estadó Judea do', estadó cu'naj Samaria do' a. Tzaj ne orún' ma'an nij apóstol cune' Jesucristó man nata' se nana so' ro', me nij síi yo'o quináj chuman' Jerusalén a. <sup>2</sup> Ne dan me se ta'aj nij síi sa' nimán cachin' man Esteban, ne ta'vee uxrá nij so' che'é se vaa cavi' so' a. <sup>3</sup> Tzaj ne síi cu'naj Saulo me se síi taj ri'yunj man nij síi cuchumán rá ni'yaj man Jesucristó me so', ne ticavi' so' man nij síi noco' man Jesucristó a. Dan me se cuchí' so' ve' ne 'o 'o nij síi noco' man Jesucristó, ne quita'aa so' man nij so', ne dan me se nu' snó'o nu' chana nu' quita'aa so', ne caxrj so' taga' man nij so' a.

*Nana nihánj taj xna'anj se vaa cuchí' se nana Diose chuman' cu'naj Samaria a*

<sup>4</sup> Dan me se nij síi cunánj me se chéé ndo'o nij so' nata' nij so' se nana Diose nana sa' rihaan yuvii a. <sup>5</sup> Ne síi cu'naj Felipé ca'anj chuman' Samaria, ne ca'mii natáj so' se nana Jesucristó rihaan nij yuvii man chuman' yo' a. <sup>6</sup> Gaa ne cuno nij síi man chuman' Samaria se nana Felipé, ne quene'en nij so' nij suun sa' noco qui'yaj so', ne che'é dan guun niha' ndo'o rá cunudanj nij so' cuno nij so' se nana Felipé a. <sup>7</sup> Dan me se que'ee nij nana chree curihanj nimán yuvii, qui'yaj so', ne nucuaj caguáj nij nana chree yo' gaa curihanj nij yo' a. Ne quinahuun que'ee nij síi ran' do', que'ee nij síi rengo do', <sup>8</sup> ne che'é dan guun niha' uxrá rá nij síi ne chuman' Samaria yo' a.

<sup>9</sup> Ne dan me se gaa ataa cuchí' Felipé chuman' Samaria, ne vaa 'o snó'o cu'naj Simón chuman' yo', ne Simón me se qui'yaj chruun ndo'o so', ne ca'anj rá nij síi ne Samaria, qui'yaj

so' a. Ne cataj so' rihaan nij yuvii se vaa síi sa' uxrá me ma'an so', <sup>10</sup> ne cunudanj nij yuvii caraya'anj uxrá se vaa qui'yaj so', ne dan me se nu' nij síi noco' do', nu' nij síi uun chij do', cataj se vaa me so' síi ata ndo'o rej nucuaj, qui'yaj ma'an Diose, taj nij so', ni'yaj nij so' man Simón a. <sup>11</sup> Dan me se sa' ndo'o nanó xrej nij yuvii daj taj so', che'é se sa' ndo'o qui'yaj chruun so', ne ca'anj rá nij so', qui'yaj Simón a. <sup>12</sup> Dan me se gaa nata' Felipé se nana Diose nana sa' che'é suun uun chij Diose rihaan chumii nihánj do', nana che'é Jesucristó do', ne cuchumán rá nij yuvii nana yo', ne cata' ne snó'o do', chana do', che'é Jesucristó a. <sup>13</sup> Ne ndaa ma'an Simón cuchumán rá nana yo', ne cata' ne so', ne canoco' so' xcó Felipé, ne ca'anj rá ma'an so' uun gaa quene'en so' nij suun sa' noco qui'yaj suun Felipé a.

<sup>14</sup> Dan me se cuchí' nana rihaan nij apóstol síi cune' Jesucristó man nata' se nana so' síi ne chuman' Jerusalén se vaa cuchumán rá nij síi man chuman' Samaria se nana Diose, ne che'é dan ca'née nij so' man Pedró do', man Juan do', se vaa cuchí' roj so' rihaan nij síi ne chuman' Samaria, <sup>15</sup> ne dan me se cuchí' roj so', gaa ne cachín ni'yaj roj so' rihaan Diose che'é nij síi cuchumán rá ni'yaj man Jesucristó yanj chuman' Samaria se vaa catuú Nimán Diose nimán nij so' qui'yaj Diose a. <sup>16</sup> 'O se ataa catuú Nimán Diose nimán nij so' a. Maan se tihaj cata' ne uun nij so' che'é Jesucristó sij 'nij ra'a man ní' a. <sup>17</sup> Dan me se cuta' ra'a Pedró ga Juan raa nij síi cuchumán rá ni'yaj man Jesucristó yanj chuman' Samaria, gaa ne catúj Nimán Diose nimán nij so' a.

<sup>18</sup> Dan me se quene'en síi chruun cu'naj Simón se vaa gaa cuta' ra'a Pedró ga Juan raa yuvii, ne catúj Nimán Diose nimán nij yuvii yo', ne che'é dan rquee so' sa'anj rihaan roj so', <sup>19</sup> ne cataj so':

—Rque 'unj sa'anj man roj soj, ne rque roj soj rej nucuaj nicaj roj soj mán 'unj, ne me ma'an 'o síi cuta'

'unj ra'aj raá, ne ca'vee catuu Nimán Diose nimán nij so', qui'yaj roj soj á —taj so' rihaan roj so' a.

<sup>20</sup> Gaa ne cataj Pedró rihaan so' a:

—Tadó so' se cacaá so' rihaan ya'an ga se sa'anj so' á. Me che'é guun rá so' se vaa ane' se rque uun Diose ga.

<sup>21</sup> Daj chihaa mǐj se ca'vee qui'yáá so' danj ma'. Ne vaa nica a doj nimán so' rihaan Diose a man adonj. <sup>22</sup> Vaa che'é canicaj nimán so' tanáj so' tu-cuáán chi'ii noco' so' nihánj, gaa ne cachinj ni'yáá so' rihaan Diose síi 'nij ra'a man ní' sese ca'vee caraá x'naa so' ndaa vaa guun rá so' á. <sup>23</sup> 'O se cuano nihánj me se xcaj 'unj cuentá se vaa vaa chi'ii nu' nimán so' ei —taj Pedró rihaan Simón yo' a.

<sup>24</sup> Gaa ne cataj Simón:

—Cachinj ni'yaj roj soj rihaan Diose síi 'nij ra'a man ní' che'é 'unj se gaa nanj quirán' 'unj a doj se vaa cataj roj soj ruguanj —taj so' rihaan roj so' a.

<sup>25</sup> Dan me se nata' ndo'o roj so' se nana Diose síi 'nij ra'a man ní', gaa ne quinan' roj so' chuman' Jerusalén, ne nata' roj so' se nana Diose nana sa' rque que'ee chuman' naj estadó cu'naj Samaria a.

*Nana nihánj taj xna'anj se vaa cuchumán rá 'o síi eunuco cavii rej cu'naj Etiopía ni'yaj so' man Jesucristó a*

<sup>26</sup> Gaa ne ca'mii yo'o se mozó Diose rihaan síi cu'naj Felipé, cataj so':

—Cavii so', ca'anj so' rej sur ndaa chrej avii chuman' Jerusalén 'anj ndaa chuman' Gaza á —taj se mozó Diose rihaan Felipé a.

Dan me se chrej vaj rej tacaan inanj me chrej yo' a.

<sup>27</sup> Dan me se cavii Felipé, ca'anj so', ne gaa vaj so' chrej yo', ne quene'en so' 'o síi eunuco cavii yo'óó cu'naj Etiopía, ne síi nuu rihaan chana reiná cu'naj Candace uun chij rihaan nu' yo'óó Etiopía me síi eunuco yo' a. Ne síi tumé nu' se sa'anj chana reiná yo' me so' a. Dan me se aj ca'anj so' chuman' Jerusalén na'vij so' rihaan

Diose, <sup>28</sup> ne nihánj me se nan' so' chiháán so', ne táá so' cuchri' nucuaj cuayó, ne nayaa so' nana cachrón síi cu'naj Isaías síi nata' se nana Diose gaa naá rihaan yanj a. <sup>29</sup> Gaa ne dan me se cataj Nimán Diose rihaan Felipé a:

—Cuchi' so' rihaan cuchri' nucuaj cuayó 'na' nihánj, ne cachee so' rej x'núú cuchri' yo' á —taj Nimán Diose rihaan Felipé a.

<sup>30</sup> Dan me se cunanj Felipé rej x'núú cuchri', gaa ne cuno so' se vaa nayaa síi taj cuchri' se nana síi cu'naj Isaías síi nata' se nana Diose gaa naá a. Ne xná'anj Felipé man so', cataj Felipé:

—Ne ya uxrá unó so' nana nayaa so' na' —taj Felipé, xná'anj so' man síi eunuco yo' a.

<sup>31</sup> —'O se asa' ca'vee cunoj nana nihánj rá so', ne nuvi' síi tucu'yón nana nihánj manj ga —taj síi eunuco yo' rihaan Felipé, gaa ne canacúún síi eunuco man Felipé se vaa cavii Felipé cuchri' ne quitaj so' rej x'núú síi eunuco yo' a.

<sup>32</sup> Dan me se nana nayaa síi eunuco yo' ro', me nana nihánj a: “Ase vaa dǐnj tu'va matzinj gaa uchi' xo' rihaan síi ticavi' man xo' do', ase vaa dǐnj tu'va matzinj le'ej gaa uchi' xo' rihaan síi caca cachij xráá xo' do', danj qui'yaj so', ne a doj nana ne ca'mii so' ma'. <sup>33</sup> Dan me se caxrij na'aj ndo'o nii man so', ne maan che'é se naqui'yaj nica' so' nimán so', ne taj ca'ne' sa' cacun' che'é so' ma'. Tzaj ne a doj yuvii se guun nucuaj cataj xna'anj che'é cunudanj nij síi noco' xna'anj tuvi' ga so', che'é se ne xna'anj so' a ma'. 'O se ne vaj so' rihaan chumii nihánj cuano ma'”, taj se nana síi cu'naj Isaías nana nayaa síi eunuco yo' a.

<sup>34</sup> Dan me se xná'anj síi eunuco yo' man Felipé, cataj so':

—Me síi me síi quirán' nu' ndaa vaa taj xna'anj síi nata' se nana Diose nihánj ga. Ma'an síi nata' se nana Diose quirán' danj na'. Yo'ó so' xa'

—taj sí eunuco, xná'anj so' man Felipé a.

<sup>35</sup> Gaa ne guun che'e Felipé cataj xna'anj so' daj taj ma'an nana yo' nana nayaa sí eunuco yo', gaa ne nata' so' nu' se nana Jesucristó nana sa' rihaan sí eunuco yo' a. <sup>36</sup> Dan me se gaa vaj roj so' chrej, ne cuchí roj so' rej nuu doj na, gaa ne cataj sí eunuco:

—Ni'yaj so' ei. Nihánj me nuu na á. Ne ca'vee cata' ne 'unj na' —taj so', xná'anj so' man Felipé a.

<sup>37</sup> Gaa ne cataj Felipé rihaan so' a:

—Sese ya ya amán rá so' ni'yaj so' man Jesucristó, ne ca'vee a —taj Felipé rihaan so' a.

Gaa ne cataj sí eunuco rihaan Felipé a:

—Amán rá 'unj se vaa ta'ní Diose me Jesucristó ei —taj so' rihaan Felipé a.

<sup>38</sup> Gaa ne ca'ne' sí eunuco suun se vaa canicun' cuchri', gaa ne nani roj so' rihaan yo'óo, gaa ne ca'anj roj so' rej nuu na, gaa ne cuta' ne Felipé man sí eunuco yo' a. <sup>39</sup> Dan me se gaa curihanj roj so' rá na, gaa ne naxcaj Nimán Diose man Felipé, ne ne quene'en uún sí eunuco yo' man Felipé a ma'. 'O se cavii sí eunuco yo', quinan' so', ne guun niha' rá so' a. <sup>40</sup> Ne Felipé me se aj nuu so' chuman' Azoto a. Gaa ne nu' nij chuman' naj rej vaj so' ro', nata' so' se nana Diose nana sa' rihaan nij sí ne nu' nij chuman' yo', ne danj qui'yaj so' ndaa se cuchí so' chuman' Cesarea a.

## 9

*Nana nihánj taj xna'anj daj quiran' sí cu'naj Saulo gaa canicaj nimán so' qui'yaj Jesucristó a*

<sup>1</sup> Dan me se sí cu'naj Saulo me se 'o guun rá so' qui'yaj so' sayuun man nij sí noco' se nana Diose sij 'nij ra'a man ní ne ndaa guun rá so' caví' nij so', ne che'é dan canoco' uxrá so' man nij sí noco' man Jesucristó a. Ne ca'anj so' rej ne xrej ata suun noco'oj, <sup>2</sup> ne naxcaj so' yanj actá rihaan

xrej, ne yanj actá yo' ro', ca'anj chuman' Damasco rihaan nij sí 'nij ra'a ve' tucu'yón nij yuvi israelitá se tucuanj Moisés a. Ne taj xna'anj yanj yo' rihaan nij so' se vaa sese nari' Saulo man nij sí noco' man Jesucristó, ne se snó'o se chana se no xcuún so' numíj so' man nij so' ne ca'anj nicaj so' man nij so' ndaa chuman' Jerusalén caxrii so' man nij so' taga' a. <sup>3</sup> Dan me se nicaj Saulo yanj, ne vaj so' chrej, ne quinichrun' so' chuman' Damasco yo', ne taj ni'yón cuchuguun nu' xta' nu' anicaj rej nicun' so' a. <sup>4</sup> Gaa ne quini so' rihaan yo'óo, ne dan me se cuno Saulo se vaa cataj yo'o so' rihaan so':

—Cunó so' ca'mij, Saulo. Me che'é 'yáá so' sayuun manj ga —taj nana cuno Saulo a.

<sup>5</sup> Gaa ne xná'anj Saulo man sí ca'mii rihaan so', cataj so':

—Sí Chij, me sí mé so' ga —taj so', xná'anj so' a.

Gaa ne sí ca'mii rihaan so' cataj:

—'Unj ro', me Jesús, ne 'yaj ndo'o so' sayuun manj adonj. <sup>6</sup> Tzaj ne naxagaa so' ca'anj so' ndaa chuman' Damasco, gaa ne cataj nii rihaan so' daj qui'yáá so' á —taj Jesucristó rihaan Saulo a.

<sup>7</sup> Ne nij snó'o vaj chrej ga Saulo me se canicun' nij so', ne a doj nana ne ca'mii nij so' a ma'. Ne cuno nij so' nana yo', tzaj ne taj a 'o rasuun ne quene'en nij so' a ma'. <sup>8</sup> Ne Saulo me se naxumaan so', ne nuxra' so' rihaan so', tzaj ne taj se qui'yá' quene'en so' ma'. Yuun che'e caráan rihaan so' nanj adonj. Gaa ne quita'aa yo'óo nij so' ra'a so', ne racuíj nij so' man Saulo chéé Saulo, ne ca'anj nij so' chuman' Damasco a. <sup>9</sup> Ne quisíj va'nuj güii ne ca'vee quene'en so' ma'. Ne ne cha so' ne ne co'o so' na a ma'.

<sup>10</sup> Dan me se chuman' Damasco ro', yáan 'o sí tucu'yón se nana Jesucristó, ne Ananías cu'naj so' a. Ne naquiyaa Diose sij 'nij ra'a man ní rihaan so', ne cataj so' a:

—Cunó so' ca'mij, Ananías —taj Diose sij 'nij ra'a man ní no so' a.



—Nihánj né 'un̄j unó 'un̄j a'mii so' á —taj Ananías rihaan Diose sij 'nij ra'a man ní' a.

<sup>11</sup> Gaa ne cataj Diose sij 'nij ra'a man ní' rihaan Ananías a:

—Canicun' cayá so' ca'an̄j so' callé cu'naj Callé Nica, ne cuchí' so' ve' tu-cuá síi cu'naj Judas, ne nano' so' 'o síi cu'naj Saulo síi cavii chuman' Tarso á. 'O se cuano nihánj me se achíin ni'yaj so' rihanj, <sup>12</sup> ne dan me se gaa cachíin ni'yaj so' ne naqui'yaa 'o síi cu'naj Ananías rihaan so', qui'yáj adonj. Ne catúj Ananías yo' rihaan so', ne cuta' ra'a so' raá Saulo, che'é rej ca'vee curuvi' uún rihaan so' qui'yáj a —taj Diose sij 'nij ra'a man ní' rihaan Ananías a.

<sup>13</sup> Gaa ne cataj Ananías rihaan Diose sij 'nij ra'a man ní' a:

—Tzaj ne aj cataj xna'an̄j ndo'o nii rihanj che'é síi nihánj, Síi Chij. 'O se aj qui'yaj chi'ii ndo'o so' man nij síi sa' nocó' mán so' nij síi yan̄j chuman' Jerusalén, <sup>14</sup> ne nihánj me se veé dan̄j nicaj so' yan̄j actá che'é rej numíj so' man cunudanj núj sij achíin ni'yaj rihaan so', qui'yaj nij xrej atá suun nocoo doj adonj —taj Ananías a.

<sup>15</sup> Gaa ne cataj Diose sij 'nij ra'a man ní' rihaan so' a:

—Ca'an̄j so' cuaj ei. 'O se aj narii 'un̄j man so' qui'yaj suun so' rihanj, ne xcaj nij síi yan̄j do', nij síi nicaj suun rey do', ma'an̄j nij síi israelitá do', cuentá che'é 'un̄j, qui'yaj so' adonj. <sup>16</sup> 'O se 'un̄j me síi cataj xna'an̄j rihaan so' che'é nu' sayuun no xcuún so' quiran' so', che'é yan nata' so' rihaan yuvii che'ej adonj —taj Diose sij 'nij ra'a man ní' rihaan Ananías a.

<sup>17</sup> Dan me se ca'an̄j Ananías, ne catúj so' rá ve' yo', ne cuta' ra'a so' raá Saulo, ne cataj so':

—Diose sij 'nij ra'a man ní' ca'née manj ca'naj rihaan so' nihánj, tinuj. Ne so' ro', me Jesucristó síi quene'én so' gaa vaj so' chrej gaa ca'ná' so' nihánj ei. Ne me rá so' curuvi' uún rihaan so' ne catuú ndo'o Nimán Diose nimán so' ei —taj Ananías rihaan so' a.

<sup>18</sup> Nu' ca'mii so' danj, ne nu' cayuu 'o rasuun rihaan Saulo, ne ase vaa 'o nuj catun' ro', danj vaa se cayuu rihaan so', ne curuvi' rihaan Saulo, ne canicun' cayá so', ne cata' ne so' a. <sup>19</sup> Ne chá so' chraa, ne nari' nucuaj rá so' a.

*Nana nihánj taj xna'an̄j se vaa ca'mii natáj Saulo se nana Jesucristó chuman' Damasco a*

Dan me se cayáan Saulo doj güii ga nij síi tucu'yón se nana Jesucristó yan̄j chuman' Damasco, <sup>20</sup> ne nu' ca'an̄j so' nij ve' tucu'yón nij yuvii israelitá se tucuanj Moisés, ne ca'mii natáj so' rihaan nij so' se vaa Jesucristó ro', ta'níi ya Diose me so' a.

<sup>21</sup> Ne cunudanj nij síi cuno se nana Saulo ro', caráya'an̄j ndo'o nij so' se nana so', ne cataj nij so':

—Tzaj ne nuveé sij nihánj me síi taj ri'yun̄j man nij síi yan̄j chuman' Jerusalén achíin ni'yaj rihaan Jesucristó, ne ca'na' so' ndaa nihánj che'é rej me rá so' numíj so' man nij so' ne ca'an̄j nicaj so' man nij so' rihaan nij xrej atá suun nocoo doj, rá so' na' —taj nij síi cuno se nana Saulo rihaan tuvi' nij so' a.

<sup>22</sup> Tzaj ne doj a nucuaj nata' so' se nana Jesucristó rihaan nij yuvii israelitá yan̄j chuman' Damasco, ne ve'é tihaan so' rihaan nij so' se vaa Jesucristó me síi ca'née Diose tinanii man yuvii rihaan sayuun, ne ndaa cunuu dínj tu'va nij so', qui'yaj so' a.

*Nana nihánj taj xna'an̄j se vaa quinanii Saulo rihaan nij yuvii israelitá guun rá ticavi' man so' a*

<sup>23</sup> Dan me se cachén que'ee güii, gaa ne cavii raá nij yuvii israelitá daj qui'yaj nij so' ne ca'vee ticavi' nij so' man Saulo a. <sup>24</sup> Tzaj ne xcaj Saulo cuentá daj guun rá nij so' qui'yaj nij so' man so', ne dan me se nuvii nigan' tumé ndo'o nij yuvii israelitá ta'yaa chingá yahij taj rej atúj yuvii chuman' yo', che'é rej me rá nij so' nari' nij so' man Saulo ne ticavi' nij so' man Saulo, rá nij so' a. <sup>25</sup> Che'é dan nij síi tucu'yón se nana Saulo

ro', ca'néé nij so' man Saulo rá 'o scaa xij, ne rej nij tacuachén nij so' man Saulo rque ta'yaa le'ej taj chingá yahij aráán tu'va chuman', ne tananij nij so' man Saulo rihaan yo'óó xe', ne dan me se quinanii so' a.

*Nana nihánj taj xna'anj se vaa ve'é ca'mii nij sí tucu'yón se nana Jesucristó yanj chuman' Jerusalén ga Saulo a*

<sup>26</sup> Dan me se cuchí' Saulo chuman' Jerusalén, ne guun rá so' cunuu chre' so' ga nij sí tucu'yón se nana Jesucristó, tzaj ne cuchu'vi' cunudanj nij so' ni'yaj nij so' man Saulo a. 'O se ne cuchuman rá nij so' ni'yaj nij so' se nana Saulo se vaa sij tucu'yón se nana Jesucristó me so' a. <sup>27</sup> Che'é dan nicaj sí cu'naj Bernabé man so', ca'anj so' rihaan ma'an nij apóstol cune' Jesucristó man nata' se nana so', ne nata' Bernabé rihaan nij so' daj guun ga quene'en Saulo man Jesucristó sij 'nij ra'a man ní' ga vaj so' chrej ne ca'mii so' ga Jesucristó sij 'nij ra'a man ní', ne nata' uún Bernabé daj qui'yaj Saulo chuman' Damasco ga ca'mii natáj so', ne ne cuchu'vi' so' a doj ca'mii natáj so' rihaan nij yuvij che'é Jesucristó, taj Bernabé a.

<sup>28</sup> Dan me se guun che'e nij so' ve'é ca'mii nij so' ga Saulo, ne 'o vaj so' ga nij so' a. Ne ca'mii natáj so' se nana Jesucristó sí 'nij ra'a man ní' rihaan nij sí man chuman' Jerusalén, ne a doj ne cuchu'vi' so', ne nucuaj ca'mii natáj so' rihaan nij yuvij a. <sup>29</sup> Dan me se ca'mii so' ga nij sí israelitá a'mii xna'ánj griego, ne canó tuvi' nij so' ga so' a. Tzaj ne nij so' ro', guun rá ticavi' man so' a. <sup>30</sup> Dan me se xcaj nij tinuj nij sí noco' man Jesucristó cuentá se vaa guun rá yo'óó nij sí israelitá ticavi' nij so' man Saulo, ne che'é dan ca'anj nicaj nij so' man Saulo ndaa chuman' Cesarea, ga ne ca'néé nij so' man so' ndaa chuman' Tarso a.

<sup>31</sup> Veé dan me se dínj yáán cunudanj nij sí cuchumán rá ni'yaj man Jesucristó yanj nu' estadó Judea do', Galilea do', Samaria do' a. Dan me se caráj cochroj ndo'o nij so' rihaan

Diose sij 'nij ra'a man ní', ne che'é dan ve'é doj nari' nij so' canoco' nij so' se tucuanj so' a. Ne Nimán Diosé tucu'yón man nij so' daj qui'yaj nij so', ne che'é dan guun rij ndo'o nij so' doj a.

*Nana nihánj taj xna'anj se vaa quinahuun sa' sí cu'naj Eneas, qui'yaj Jesucristó, ga ca'mii Pedró ga so' a*

<sup>32</sup> Dan me se chéé sí cu'naj Pedró nu' rej ne nij sí sa' noco' man Diosé, ne dan me se cuchí' so' ndaa rihaan tinúú nij so' ne chuman' Lida, <sup>33</sup> ne chuman' Lida ro', nari' so' 'o sí cu'naj Eneas, ne so' me se aj quisj tunj ya yo' yo'o naj so' rihaan yuvéé, ne 'o sí taj se 'yá' cachee me so', <sup>34</sup> ne dan me se cataj Pedró rihaan so':

—Cuanó nihánj me se nahuun sa' so', 'yaj Jesucristó, Eneas. Naxagaa so' cuaj, ne nacue so' tuvée so' cuaj ei —taj Pedró rihaan so', ne nu' ca'mii Pedró danj, ne nu' naxumaan caya so' canicun' so' a.

<sup>35</sup> Ga ne quene'en cunudanj nij sí yanj chuman' Lida do', nij sí yanj taa cu'naj Sarón do', ndaa vaa nahuun sa' sí cu'naj Eneas yo', ga ne che'é dan canicaj nimán nij so' canoco' nij so' man Diosé sij 'nij ra'a man ní' a.

*Nana nihánj taj xna'anj se vaa cunuu i'na' uún chana cu'naj Dorcas, qui'yaj Pedró a*

<sup>36</sup> Dan me se chuman' Jope yáán 'o chana tucu'yón se nana Jesucristó, ne Tabita cu'naj no' xna'ánj hebreo, ne Dorcas me se chuvij no' xna'ánj griego a. Ne chana qui'yaj inanj sa' me no', ne rqué ndo'o no' rasuun man nij sí nique, <sup>37</sup> ne güii dan me se canó chi'ij man no', ne quiran' ndo'o no', ne cavi' no' a. Ne tucuanee nii man no', ne cuchruj nii man no' rque ve' nata', <sup>38</sup> ne dan me se nichrun' naj chuman' Lida ga chuman' Jope, ne cuchí' nana rihaan nij sí tucu'yón se nana Jesucristó yanj chuman' Jope se vaa vaj Pedró chuman' Lida yo', ne che'é dan ca'néé nij so' man vij snó'o cuchí' roj so' rihaan Pedró a. Dan me

se cuchi' roj so' rihaan Pedró, ne cataj roj so':

—Se guun raan so' cuchi' so' rihaan nuj sij yanj chuman' Jope ma' —taj roj so' rihaan Pedró a.

<sup>39</sup> Gaa ne naxumaan Pedró, ne ca'anj so' cuaj ga roj so' a. Ne gaa cuchi' nij so' chuman' Jope, ne ca'anj nicaj nij so' man Pedró rá ve' nata' naj chana cavi' cu'naj Dorcas, ne ca'na' cunudanij nij chana cavi' nica rihaan Pedró, ne ta'vee nij no', ne tihaan nij chana rihaan Pedró cunudanij nij yatzij qui'yaj Dorcas gaa vaa i'na' no' a. <sup>40</sup> Dan me se quirii Pedró man cunudanij nij no' xe', gaa ne canicun' ruj so', ne cachín ni'yaj ndo'o so' rihaan Diose a. Gaa ne canicaj so', cataj so' rihaan cúu man chana a:

—Naxagaa so', Tabita —taj so' rihaan no' a.

Gaa ne naxra' rihaan no', ne gaa quene'en no' man Pedró, ne ca'anj cané caya no', <sup>41</sup> ne quita'aa Pedró ra'a no', ne naxumaan no', qui'yaj so' a. Gaa ne canacúun so' ca'na' nij chana cavi' nica do', yo'ó nij sí sa' noco' man Diose do', ne tihaan so' man ní cu'naj Dorcas rihaan nij so' se vaa cunuu i'na' uún no' a. <sup>42</sup> Dan me se cuchi' nana che'é Dorcas rihaan cunudanij nij sí ne chuman' Jope, ne che'é dan que'ee nij sí man Jope cuchumán rá ni'yaj man Diose sij 'nij ra'a man ní' a. <sup>43</sup> Dan me se guun raan Pedró que'ee güii chuman' Jope, ne dan me se tucua' 'o sí cu'naj Simón caran' so' que'ee güii, ne sí naqui'yaj laruu nuj xcuu me Simón yo' a.

## 10

*Nana nihánj taj xna'anj se vaa cuchi' se nana Jesucristó rihaan nij tui' sí yanij cu'naj Cornelio a*

<sup>1</sup> Dan me se yáan 'o sí cu'naj Cornelio chuman' Cesarea, ne sí 'nij ra'a 'o ta'aj x'ne' tanuu cu'naj italiano me so' a. Dan me se nuveé sij israelitá me so', maan se sij yanij me so', <sup>2</sup> ne sij ve'é ndo'o noco' man Diose me so', ne aráj cochroj ndo'o so' rihaan

Diose, ne ase vaa 'yaj so' ro', danj 'yaj nij tucua' so' uún a. Ne rque ndo'o so' caridad rihaan nij yuvii, ne niganj cachín ni'yaj so' rihaan Diose a. <sup>3</sup> Dan me se aga' va'núj rej ca'anj güii ta' asuun me se naqui'yaa ranga' yo'o se mozó Diose rihaan so', ne catúj se mozó Diose yo' rej nicun' so', ne cataj se mozó Diose:

—Cornelio —taj se mozó Diose no so' a.

<sup>4</sup> Gaa ne ni'yaj uxrá Cornelio man se mozó Diose yo', ne cuchu'vi' ndo'o so', ne cataj so':

—Me che'é nacúun so' manj, ga —taj so', xná'anj so' man se mozó Diose yo' a.

Gaa ne cataj se mozó Diose rihaan so' a:

—Aj xcaj Diose cuentá che'é nana achín ni'yáa so' rihaan Diose, ne aj xcaj Diose cuentá che'é caridad 'yáa so' a. Che'é dan nuu rá Diose man so' a. <sup>5</sup> Ne nihánj me se ca'nej so' snó'o ca'anj chuman' Jope, ne nacunij nij so' ca'na' 'o sí cu'naj Simón Pedró nihánj á. <sup>6</sup> Ne so' me se aran' so' ve' tucua' yo'ó sí cu'naj Simón sí naqui'yaj laruu nuj xcuu sí ne tu'va na ya'anj a —taj se mozó Diose rihaan Cornelio a.

<sup>7</sup> Dan me se ca'anj uún se mozó Diose yo', gaa ne canacúun Cornelio ca'na' vij se mozó ma'an so' do', yo'o tanuu noco' man Diose ga so' do', <sup>8</sup> ne ca'na' va'núj nij so', ne cataj xna'anj so' rihaan nij so' se vaa cataj se mozó Diose rihaan so', gaa ne ca'née so' man nij so' ca'anj nij so' chuman' Jope nana' nij so' man sí cu'naj Simón Pedró a.

<sup>9</sup> Ne yo'ó güii me se vaj va'núj nij so' chrej, ne maan orá quinichrun' nij so' chuman' Jope me se cavii Pedró xráa ve' caran' so', cachinj ni'yaj so' rihaan Diose, ne caxuj me yo', <sup>10</sup> ne dan me se quina'aan rque so', ne guun rá so' cha so' chraa a. Ne tihaj 'yaj chuvii nij sí man rá ve' cha so', ne maan orá dan naqui'yaa 'o rasuun rihaan Pedró a. <sup>11</sup> Dan me se quene'en so' se vaa naxra' rej xta', ne nanij yo'o

rasuun rihaan yo'óó, ne ase vaa 'o yatzíj mantá caxra' ndo'o vaa yo', ne vaa ca'anj scúj yatzíj mantá yo' a. <sup>12</sup> Ne nuu cunudanj nij xcuu vaa ca'anj tacóó do', nij xcuu nucuaj rij man do', nij xtâj do', yo'ó nij xcuu vaa tachrij xráá do', nuu rque yatzíj mantá yo' a. <sup>13</sup> Gaa ne cuno Pedró nana ca'mii yo'o so' rihaan so' a:

—Naxumaan so', Pedró. Ticavi' so' man nij xcuu yo', ne cha so' nee á —taj nana yo' cuno Pedró a.

<sup>14</sup> Gaa ne cataj Pedró:

—Se guun ma'. Daj chihaa mój se guun quí'yáj danj, man Síi Chij. 'O se nuveé xcuu chá me yo' rihaan núj sij israelitá ma'. Maan se xcuu vaa chi'ii me nij xo' rihaan núj nanj á. 'O se nu' ca'na' a doj ne cha 'unj nee xcuu vaa danj a ma' —taj Pedró a.

<sup>15</sup> Gaa ne ca'mii uún síi ca'mii rihaan Pedró, cataj so':

—Ne sese Diose me síi cataj se vaa cunuu sa' 'o rasuun, ne se guun cataj so' se vaa chi'ii vaa rasuun yo' rihaan so' ma' —taj uún so' rihaan Pedró a.

<sup>16</sup> Gaa ne dan me se quisíj va'núj cuno Pedró nana vaa danj nana ca'mii Diose rihaan so', gaa ne nu' cavii uún nu' yatzíj mantá man xcuu yo' rej xtá' a.

<sup>17</sup> Dan me se quinanó ndo'o rá Pedró che'é rasuun naqui'yaa rihaan so', ne maan orá dan nari' nij snó'o ca'néé síi cu'naj Cornelió ve' tucúa Simón, ne dan me se canicun' nij so' ta'yaa rihaan ve' yo', <sup>18</sup> ne canacúún nij so', xná'anj nij so' sese aran' 'o síi cu'naj Simón Pedró ve' yo' a. <sup>19</sup> Dan me se Pedró ro', nuchruj raa che'é nij rasuun naqui'yaa rihaan so', ne dan me se cataj Nimán Diose rihaan so':

—Nihánj me se ca'na' va'núj snó'o nano' mán so', <sup>20</sup> ne cuaj naxumaan so', nanij so', ne ca'anj so' ga nij so' á. Ne se guun vij rá so', ne se cataj so' se vaa ne nó xcúún so' ca'anj so' ga nij so' ma'. 'O se 'unj nihánj me síi ca'néé man nij so' ca'na' nij so' adonj —taj Nimán Diose rihaan Pedró a.

<sup>21</sup> Gaa ne nanij Pedró ndaa rej nicun' va'núj nij snó'o, ne cataj so' rihaan nij so':

—'Unj nihánj me síi nano' nij soj ei. Ne me che'é ca'na' soj nihánj ga —taj Pedró, xná'anj so' man nij so' a.

<sup>22</sup> Gaa ne cataj nij so':

—Ca'mii 'o se mozó Diose mozó guee rihaan 'o síi cu'naj Cornelió, ne so' ro', me síi 'nij ra'a 'o ta'aj x'ne' tanuu, ne cunudanj nij yuvij israelitá taj se vaa síi vaa nica nimán me so' ne síi aráj cochroj ndo'o rihaan Diose me uún so', ne dan me se cataj xna'anj se mozó Diose rihaan so' se vaa nacunj so' mán so' cuchí' so' ve' tucúa so' ne cuno so' nana nata' so' rihaan so' a —taj nij so' rihaan Pedró a.

<sup>23</sup> Che'é dan cataj Pedró se vaa catuu nij so' rá ve', ne ve'é ca'mii so' ga nij so' a. Ne ranga' yo'ó güii me se naxagaa nij so', ne ca'anj Pedró ga ya'núj nij so', ne ca'anj doj nij tinuj nij síi cuchumán rá ni'yaj man Jesucristó yanj chuman' Jope do', ga Pedró a. <sup>24</sup> Ne yo'ó güii uún me se catúj nij so' chuman' Cesarea, ne síi cu'naj Cornelió me se na'vij ndo'o so' ca'na' nij so', ne aj canacúún so' man nij tuvi' so' do', man nij síi ca'mii sa' ga so' do', se vaa cunuu chre' nij so' rá ve' tucúa so' a.

<sup>25</sup> Dan me se gaa guun rá Pedró catuu Pedró rá ve', ne nari' tuvi' Cornelió ga so', ne canicun' ruj Cornelió rihaan Pedró, ne caráj guee Cornelió rihaan so' a. <sup>26</sup> Tzaj ne cataj Pedró rihaan Cornelió:

—Naxumaan so' ei. Taj che'é caraa guee so' rihanj ma'. 'O cyaan yuvii uun me ní' nanj á —taj Pedró rihaan Cornelió a.

<sup>27</sup> Dan me se nanó Pedró cuentó ga Cornelió, ne catúj Pedró rá ve', gaa ne quene'en so' se vaa aj nuu chre' que'ee yuvii rá ve' yo' a. <sup>28</sup> Gaa ne cataj Pedró rihaan nij yuvii:

—Aj ne'en nij soj se tucuanj núj sij israelitá se vaa ne nó xcúún núj catuu núj rej man soj sij yanj, ne ne nó xcúún núj cunuu chre' núj ga soj ma'. Tzaj ne Diose tihaan rihaan ma'anj se



vaa se ca'vee cataj 'unj se vaa nij vaa ta'aj yuvij rihaan so' ma'. <sup>29</sup> Che'é dan gaa canacúun Cornelió nihánj manj, ne ne cataj 'unj se vaa se ca'anj 'unj ma'. Tananj ca'ná' 'unj cuaj nanj ei. Ne nihánj me se cataj xna'anj nij soj rihanj daj me che'é canacúun nij soj manj ca'naj ei —taj Pedró rihaan nij tuvi' Cornelió a.

<sup>30</sup> Gaa ne cataj Cornelió rihaan so':

—Cachén ca'anj güii ne maan orá nihánj me ta' asuun, ne aga' va'núj me yo', ne cachíin ni'yáá 'unj rihaan Diose rá ve' tucuaaj, ne taj ni'yón naqui'yaa 'o snó'o nicun' rihanj, ne yatzi'j catzii chuguun ma'an nuú so', <sup>31</sup> ne cataj so' rihanj a: “Cunó so' ca'mij, Cornelio. Aj cuno Diose nana achíin ni'yáá so' rihaan so', ne Diose me síi nuu rá se vaa rqué ndo'o so' caridad rihaan nij síi nique, <sup>32</sup> ne dan me se ca'nej so' nana ndaa chuman' Jope, ne canacunj so' ca'na' 'o síi cu'naj Simón Pedró nihánj á. Ne so' ro', aran' ve' tucua' 'o síi cu'naj Simón síi naqui'yaj laruu nuj xcuu síi ne tu'va na ya'anj a”, taj snó'o yo' rihanj adonj. <sup>33</sup> Che'é dan me ra'yanj ca'née 'unj nana rihaan so', ne so' ro', qui'yaj ndo'o se luj che'é núj se vaa ca'ná' so' rihaan núj nihánj ne che'é dan me mán taran' núj rihaan Diose nihánj cuano, che'é rej me rá núj cuno núj nu' nana cataj xna'anj Diose síi 'nij ra'a man ní' rihaan so' ei —taj Cornelió rihaan Pedró a.

<sup>34</sup> Gaa ne guun che'e Pedró ca'mii so' rihaan nij so' a:

—Ndaa yaj me se xcaj 'unj cuentá se vaa ya 'o cyaan vaa cunudanj yuvij rihaan Diose á. <sup>35</sup> Ne síi yanj me ma'an chuman' síi aráj cochroj rihaan Diose ne noco' tucuaán sa' ro', ca'vee nacaj Diose man so' adonj. <sup>36</sup> Aj ne'en nij soj nana sa' ca'née Diose rihaan núj sij israelitá se vaa ve'é nacaj Diose man núj che'é se vaa qui'yaj Jesucristó che'é núj, ne Jesucristó ro', me síi 'nij ra'a man cunudanj yuvij adonj. <sup>37</sup> Dan me se nana yo' ro', me nana cuchi' nu' chuman' chiháán núj sij israelitá, ne dan

me se gaa quisij ca'mii natáj síi cu'naj Juan se vaa no' xcúun yuvij cata' ne yuvij, ne guun che'e Jesucristó nata' so' se nana so' rihaan núj sij man estadó Galilea, <sup>38</sup> ne nana yo' ro', me se nana Jesucristó síi cavii chuman' Nazaret ei. Ne nana yo' taj se vaa cune' Diose man so' qui'yaj suun so' rihaan Diose, ne rqué ndo'o Diose Nimán Diose man so', ne rqué ndo'o Diose rej nucuaj man so', ne dan me se cachée Jesucristó, ne qui'yaj suun ndo'o so' suun sa', ne cunudanj nij síi ran' sayuun 'yaj síi chree che'é se quirii ta'nga' síi chree rihaan nij so' ro', quinahuun sa' nij so', qui'yaj Jesucristó a. 'O se Diose ro', racuij ndo'o man Jesucristó 'yaj so' danj adonj.

<sup>39</sup> Ne ma'an núj me síi quene'en nu' se vaa qui'yaj so' gaa vaj so' nu' rej ne núj sij israelitá do', ndaa ma'an chuman' Jerusalén do' ei. Ne dan me se cachrón nii man so' rihaan rcutze, ne cavi' so', qui'yaj nii ei. <sup>40</sup> Gaa ne quisij va'núj güii cavi' so', gaa ne cunuu i'na' uún so', qui'yaj Diose, ne curuvi' so' rihaan núj, qui'yaj uún Diose adonj. <sup>41</sup> Dan me se ne curuvi' so' rihaan cunudanj nij yuvij ma'. Tananj curuvi' so' rihaan núj sij aj narii Diose nata' rihaan yuvij daj vaa so', ne núj me síi chá chraa ne co'o na ga so' gaa cunuu i'na' uún so' gaa cavi' so' adonj. <sup>42</sup> Gaa ne ca'ne' so' suun rihaan núj ca'mii natáj núj rihaan nij yuvij ne nata' núj nana se vaa ma'an so' me síi cune' Diose ca'ne' cacun' che'é nij yuvij vaa i'na' do', che'é nij yuvij cavi' do' adonj. <sup>43</sup> Ne cunudanj nij síi nata' se nana Diose gaa naá ro', cataj xna'anj nij so' che'é so', ne cataj nij so' se vaa caraá x'naa Diose ni'yaj Diose cunudanj nij síi amán rá ni'yaj man Jesucristó a —taj Pedró rihaan nij tuvi' Cornelió a.

<sup>44</sup> Dan me se ataa a doj quisij ca'mii Pedró nu' se nana so', gaa ne catúj ndo'o Nimán Diose nimán cunudanj nij síi cuno nana yo' a. <sup>45</sup> Gaa ne nij síi israelitá cuchumán rá ni'yaj man Jesucristó ca'na' ga Pedró ro',

caráya'anj nij so' se vaa qui'yaj Diose se luj che'é nij yuvií yaníj ne ndaa nimán nij yuvií yaníj catúj Nimán Diose, qui'yaj Diose a. <sup>46</sup> 'O se cuno nij so' se vaa ca'mii nij tuvi' Cornelió xna'ánj naca, cataj nij so' se vaa sa' uxrá vaa Diose á. Gaa ne cataj Pedró rihaan tuvi' ma'an so':

<sup>47</sup> —Nihánj me se ve'é nacaj Nimán Diose man síi nihánj ndaa vaa nacaj so' man ma'an ní' adonj. Se ca'vee caráán ní' chrej rihaan nij so' cata' ne nij so' ma' —taj Pedró rihaan nij tuvi' so' a.

<sup>48</sup> Gaa ne ca'ne' Pedró suun rihaan nij so' se vaa cata' ne nij so', che'é se sij noco' man Jesucristó me nij so' a. Danj qui'yaj nij so', gaa ne cachíin ni'yaj nij so' rihaan Pedró se vaa guun raan so' que'ee doj güii ga nij so' a.

## 11

*Nana nihánj taj xna'anj daj guun rá nij síi israelitá cuchumán rá ni'yaj man Jesucristó ga cuno nij so' nana se vaa cuchumán rá nij síi yaníj ni'yaj nij so' man Jesucristó a*

<sup>1</sup> Dan me se cuno nij síi cune' Jesucristó man nata' se nana so' cuno yo'ó nij tinuj nij síi cuchumán rá ni'yaj man Jesucristó yanj estadó Judea cuno nana se vaa ndaa nij síi yaníj canoco' se nana Diose a.

<sup>2</sup> Ne gaa cavii Pedró ca'anj so' chuman' Jerusalén, ne nij síi israelitá cuchumán rá ni'yaj man Jesucristó ro', cuta' cacun' xráá so', <sup>3</sup> cataj nij so':

—Me che'é catúj so' rá ve' tucua' síi yaníj ga. Me che'é chá so' chraa ga nij so' ga —taj nij so' rihaan Pedró a.

<sup>4</sup> Gaa ne guun che'e Pedró cataj xna'anj nica so' rihaan nij so' daj me che'é qui'yaj so' danj a. Dan me se cataj so':

<sup>5</sup> —Chuman' Jope vaj 'unj, ne cachíin ni'yáá 'unj rihaan Diose, ne dan me se naqui'yaa 'o rasuun rihanj, qui'yaj Diose a. Ne dan me se nanij 'o rasuun, ne ase vaa 'o yatzíj mantá caxra' vaa rasuun yo', ne vaa ca'anj scúj yatzíj yo' a. Ne cavii yatzíj yo' rej

xta', ne quinaniy yo' rej nicun' 'unj a. <sup>6</sup> Dan me se ni'yaj uxraj yatzíj yo', ne quene'enj se vaa man cunudanj nij xcuu vaa ca'anj tacóo do', ndaa xcuu quij do', xcuu nucuaj rii man do', xtâj do', nu' xcuu vaa tachrii xráá do', man rque yatzíj yo' a. <sup>7</sup> Gaa ne cuno 'unj se vaa ca'mii yo' o so' rihanj, cataj so': “Naxumaan so', Pedró. Ticavi' so' man nij xcuu yo', chá so' á”, taj so' cunoj a. <sup>8</sup> Gaa ne cataj 'unj: “Daj chihaa mij se guun qui'yaj danj, man Síi Chíj. 'O se nuveé xcuu chá me nij xo' rihaan núj sij israelitá ma'. Maan xcuu vaa chi'ii me nij xo' rihaan núj nanj á. Nu' ca'na' me se ne catuu nee xcuu vaa danj tu'vaj ma'”, cataj 'unj rihaan síi ca'mii rihanj a. <sup>9</sup> Gaa ne ca'mii uún so' rihanj, cataj so': “Ne sese Diose me síi cataj se vaa cunuu sa' 'o rasuun, ne se guun cataj so' se vaa chi'ii vaa rasuun yo' rihaan so' ma'”, cataj so' rihanj a. <sup>10</sup> Dan me se quisíj va'núj ca'mii so' nana vaa danj rihanj, gaa ne cavii uún nu' rasuun yo' rej xta', ca'anj yo' a.

<sup>11</sup> “Ne nu' cavii rasuun yo' rej xta', ne nu' cuchi' va'núj snó'o rihaan ve' carán' 'unj, ne nij síi ca'née 'o síi ne chuman' Cesarea me va'núj nij so', nano' nij so' manj a. <sup>12</sup> Gaa ne cataj xna'anj Nimán Diose rihanj se vaa ca'anj 'unj ga nij so', ne se guun rá 'unj se vaa yuvií nij doj rihaan ní' sij israelitá me nij so', taj Nimán Diose rihanj a. Che'é dan ca'anj 'unj ga va'núj nij so', ne vatan' tinúú ní' síi nihánj ro', me síi ca'anj ga 'unj a. Gaa ne catúj núj rá ve' tucua' síi canacúun manj, <sup>13</sup> gaa ne nata' síi ne ve' yo' rihaan 'unj se vaa aj quene'en so' 'o se mozó Diose rá ve' tucua' so', ne dan me se curuvi' se mozó Diose yo' rihaan so', ne cataj se mozó Diose yo' rihaan so': “Ca'nej so' nana chuman' Jope rihaan 'o síi cu'naj Simón Pedró, ne nacunj so' man so' ca'na' so' nihánj rihaan so' á. <sup>14</sup> Ne so' me síi nata' nana rihaan so', ne sese cuno nu' nij tucua' soj nana yo', ne ca'vee quinanii taran' soj rihaan sayuun adonj”, taj se mozó Diose rihaan síi ne ve' yo', taj

so' rihanj nanj á.

<sup>15</sup> ”Dan me se guun che'ej nataj se nana Jesucristó rihaan nij so', gaa ne catúj Nimán Diose nimán nij so' ndaa vaa catúj Nimán Diose nimán ma'an ní' gaa asino yaan nanj ei. <sup>16</sup> Gaa ne ninuj rá 'unj se nana Diose sij 'nij ra'a man ní' gaa cataj so': “Juan ro', na uun cata' ne so' man yuvij, tzaj ne xa' soj, tzaj ne Diose cutaj ne nimán soj ga ma'an Nimán Diose nanj adonj”, taj sí 'nij ra'a man ní' a. <sup>17</sup> Dan me se cyaan vaa se luj qui'yaj Diose che'é ma'an ní' sij amán rá ni'yaj man Jesucristó sij 'nij ra'a man ní' nanj adonj. Ne sese Diose me sí guun rá qui'yaj danj, ne asa' ca'vee caráan 'unj chrej rihaan Diose se vaa se qui'yaj so' se vaa me rá so' qui'yaj so', rá soj ga —taj Pedró rihaan nij sí israelitá cuchumán rá ni'yaj man Jesucristó a.

<sup>18</sup> Dan me se qui'yaj canaán se nana Pedró rihaan se nana yo'ó nij so', gaa ne cataj nij so' se vaa sa' uxrá qui'yaj Diose a. Ne cataj uún nij so':

—Che'é dan me ndaa nij sí yanj canicaj nimán canoco' chrej sa', qui'yaj Diose, ne che'é dan cayáan nij sí yanj rihaan Diose nu' cavii nu' ca'anj adonj —taj cunudanj nij sí israelitá a.

*Nana nihánj taj xna'anj che'é nij sí cuchumán rá ni'yaj man Jesucristó yanj chuman' Antioquía a*

<sup>19</sup> Dan me se che'é se nana sí cu'naj Esteban me se qui'yaj ndo'o nii sayuun man nij sí israelitá cuchumán rá ni'yaj man Jesucristó a. Che'é dan tanáj nij so' chuman' Jerusalén, ne cunanj nij so' ca'anj nij so' ndaa estadó cu'naj Fenicia do', ndaa yo'óó taj rihaan na ya'anj cu'naj Chipre do', ndaa chuman' Antioquía do' a. Tzaj ne inanj rihaan nij yuvij israelitá nata' nij so' se nana Jesucristó, ne ne ca'mij nij so' ga nij sí yanj ma'. <sup>20</sup> Tzaj ne doj tuvi' nij so' me sí cavii Chipre do', estadó Cirene do', ne nij so' ro', ca'anj chuman' Antioquía, ne ndaa rihaan nij sí yanj

sí a'mii xna'ánj griego nata' nij so' nana sa' se nana Jesucristó sij 'nij ra'a man ní' a. <sup>21</sup> Ne racuj ndo'o Diose sij 'nij ra'a man ní' man nij sí nata' se nana so', ne que'ee nij sí yanj yo' cuchumán rá cuno nana sa' yo', ne canoco' nij so' man Jesucristó sij 'nij ra'a man ní' a.

<sup>22</sup> Dan me se cuhi' nana rihaan nij sí cuchumán rá ni'yaj man Jesucristó yanj chuman' Jerusalén se vaa cuchumán rá nij sí yanj yanj chuman' Antioquía ni'yaj nij so' man Jesucristó a. Che'é dan ca'née nij so' man sí cu'naj Bernabé cuhi' so' chuman' Antioquía a. <sup>23</sup> Dan me se cuhi' so', gaa ne quene'en so' se vaa qui'yaj ndo'o Diose se luj ga nij sí yanj yo', ne guun niha' uxrá rá so', ne narqué so' chrej sa' rihaan nij sí yanj yo' se vaa ca'nej nimán nij so' yo'o canoco' raan nij so' man Diose sij 'nij ra'a man ní' a. <sup>24</sup> 'O se sí vaa sa' nimán me sí cu'naj Bernabé yo', ne nuu ndo'o Nimán Diose nimán so', ne sí nucuaj ndo'o rá man Diose me uún so' a. Gaa ne dan me se guun rij doj yuvij canoco' man sí 'nij ra'a man ní', <sup>25</sup> ne ca'anj Bernabé chuman' Tarso, nano' so' man sí cu'naj Saulo, <sup>26</sup> ne nari' Bernabé man Saulo, gaa ne nicaj Bernabé man Saulo ca'na' so' chuman' Antioquía a. Ne dan me se 'o yo' ro', yáan roj so' ga nij sí cuchumán rá ni'yaj man Jesucristó yanj chuman' Antioquía, ne tucu'yón roj so' se nana Diose man que'ee ndo'o nij yuvij man yo' a. Ne nij sí man chuman' Antioquía me nij sí guun che'e tucu'náj “cristiano” man nij sí tucu'yón se nana Jesucristó a. 'O se nana “cristiano” me rá cataj nij sí chéé stucuanj Cristo a.

<sup>27</sup> Ne güii yo' me se cavii doj sí nata' se nana Diose chuman' Jerusalén, ne ca'anj nij so' chuman' Antioquía a. <sup>28</sup> Ne canicun' yo'o tuvi' nij sí nata' se nana Diose yo', ne sí cu'naj Agabo me so' a. Ne nata' so' nana rqué Nimán Diose rihaan so' se vaa vaa güii, ne cachén x'naa nu' chuman' naj rihaan

chumii a. Ne gaa cayáán síi cu'naj Claudio síi nicaj suun emperador, ne cachén ya x'naa ndaa vaa cataj síi cu'naj Agabo a. <sup>29</sup> Dan me se nij síi tucu'yón se nana Jesucristó ro', gaa cuno nij so' se nana síi cu'naj Agabo, ne nuchruj raa 'o 'o nij so' se vaa me daj sa'anj rque so' man tinúú nij so' síi yanj estadó Judea ne racuúj man nij so' a. Ne síi ru'vee doj rque noco doj sa'anj, ne síi nique doj ro', rque doj sa'anj a. <sup>30</sup> Gaa ne go' nij so' sa'anj yo' man Bernabé ga Saulo, caxrii roj so' ston nij síi uun chij rihaan nij síi cuchumán rá ni'yaj man Jesucristó yanj chuman' Jerusalén a.

## 12

*Nana nihánj taj xna'anj daj guun gaa tinanii Diose man Pedró rihaan síi cu'naj Herodes a*

<sup>1</sup> Dan me se güii dan me se guun rá síi nicaj suun rey cu'naj Herodes qui'yaj chí'ii so' man nij síi cuchumán rá ni'yaj man Jesucristó a. Che'é dan ca'ne' so' suun rihaan tanuu quita'aa nij tanuu man ta'aj nij so' a. <sup>2</sup> Ne raa neé espadá ticavi' tanuu man síi cu'naj Jacobo tinúú síi cu'naj Juan, qui'yaj Herodes a. <sup>3</sup> Dan me se xcaj Herodes cuentá se vaa guun niha' rá nij yuvii israelitá se vaa cavi' Jacobo, ne che'é dan quita'aa nij tanuu man Pedró, qui'yaj uún so' a. Gaa canuú cha'anj nanuj rá nij síi israelitá güii nu' curihanj xii nij so' yo'óó Egipto gaa naá me qui'yaj Herodes danj a. <sup>4</sup> Dan me se caxrii nij tanuu taga' man Pedró, ne ca'ne' Herodes suun rihaan xnu' yaan tanuu se vaa cutumé nij tanuu man Pedró, ne ca'anj ya x'ne' me nij tanuu yo' a. 'O se guun rá Herodes se vaa ndaa cachén cha'anj pascuá, gaa ne quirii so' man Pedró ne tihaan so' man Pedró rihaan nij yuvii israelitá, rá so' a. <sup>5</sup> Dan me se Pedró ro', 'nij so' taga' rej cutumé nij tanuu man so', tzaj ne nucuaj ndo'o cachín ni'yaj nij síi cuchumán rá ni'yaj man Jesucristó rihaan Diose che'é so' a.

<sup>6</sup> Dan me se rej nij me yo', ne a'yuj me güii quirii Herodes man Pedró taga' rihaan nij yuvii a. Dan me se otoj Pedró naj so' rá taga', ne naj so' sca'núj vij tanuu, ne vij aga' ne' numii so' naj so' a. Ne nicun' yavij tanuu tumé ta'yaa taga' a. <sup>7</sup> Ne dan me se curuvi' yo'o se mozó Diose rá ve' naj Pedró, ne chuguun ndo'o rá ve' yo' a. Gaa ne go' se mozó Diose x'núú Pedró, ne cataj so':

—'O naxagaa so' cuaj, Pedró —taj so' rihaan Pedró a.

Dan me se naxagaa Pedró, ne aga' ne' numii ra'a so' ro', naxra' yo', ne quiniy yo' rihaan yo'óó a. <sup>8</sup> Gaa ne cataj se mozó Diose rihaan Pedró a:

—Naqui'yaj raan so' catuún so', ne caxrii so' canj tacóó so' á —taj se mozó Diose rihaan so', ne qui'yaj Pedró ndaa vaa cataj se mozó Diose rihaan so' a.

Gaa ne cataj uún se mozó Diose a:

—Niquee so' roto so', ne canocó' so' manj á —taj uún se mozó Diose rihaan so' a.

<sup>9</sup> Dan me se canoco' Pedró man se mozó Diose, ne curihanj so' taga', tzaj ne ne quene'en so' sese ya curihanj so' taga' qui'yaj se mozó Diose yo' ma'. 'O se maan se qui'yaj ma'an rihaan so' qui'yaj Diose nu' se vaa qui'yaj se mozó Diose yo', rá so' a.

<sup>10</sup> Dan me se cachén roj so' vij rej nicun' tanuu tumé ta'yaa, gaa ne cuchi' roj so' ta'yaa aga' taga' yo', ne rej xco ta'yaa yo' ro', naj ma'an chuman' a. Gaa ne quix'núj ma'an ta'yaa yo', ne curihanj roj so', ne cachén roj so' 'o scúj callé, gaa ne ca'anj ni'ya se mozó Diose yo' rihaan Pedró a.

<sup>11</sup> Dan me se caxrii rá Pedró se vaa ya curihanj so' taga', gaa ne cataj so':

—Ndaa yaj guun ya ya raj se vaa Diose sij 'nij ra'a mán 'unj ro', ya ca'neé so' man se mozó so', ne tinanii so' mán 'unj rihaan síi cu'naj Herodes, ne nihánj me se se quirán' 'unj ndaa vaa me rá nij yuvii israelitá quirán' 'unj yaj a ma' —taj Pedró a.

<sup>12</sup> Dan me se quisij guun ya ya rá so', gaa ne ca'anj so' ve' tucua' chana



cu'naj Mariá nii sí cu'naj Juan Marcos a. Ne ve' yo' me rej aj nuu chre' que'ee nij sí cuchumán rá ni'yaj man Jesucristó, ne achíin ni'yaj nij so' rihaan Diose a. <sup>13</sup> Dan me se cuchi' Pedró tica'mii so' ta'yaa chingá nuu rihaan ve', gaa ne ca'na' 'o mozó chana cu'naj Rode ta'yaa xcaj no' cuentá me sí ca'na' a. <sup>14</sup> Gaa ne cunuu yaan Rode se nana Pedró a. Tzaj ne che'é se guun niha' ndo'o rá no', gaa ne che'é dan ne ca'nuu no' ta'yaa ma'. Maan se cunanj no' catúj no' rá ve', ne nata' no' rihaan yo'ó nij yuvij se vaa nicun' Pedró ta'yaa a. <sup>15</sup> Tzaj ne nij sí man rá ve' taj rihaan no':

—Snúú so' á —taj ta'aj nij so' rihaan no' a.

Tzaj ne taj se qui'yá' ca'ne' rá no' a. 'O se yo' cataj no' se vaa ya nicun' Pedró ta'yaa a. Gaa ne cataj yo'ó nij so' rihaan no':

—Nanj se mozó Diose tumé man Pedró me sí nicun' rihaan ta'yaa nanj á —taj yo'ó nij so' rihaan no' a.

<sup>16</sup> Ne Pedró ro', yo' nicun' so' xe' tica'mii so' ta'yaa a. Gaa ne ca'na' nij so', ne ca'núj nij so', ne quene'en nij so' man Pedró, gaa ne ca'anj ndo'o rá nij so' ni'yaj nij so' man Pedró a. <sup>17</sup> Gaa ne naxcaj Pedró ra'a Pedró, che'é se guun rá so' gaa dínj tu'va nij so' a. Gaa ne cataj xna'anj so' rihaan nij so' nu' se vaa qui'yaj Diose sij 'nij ra'a man ní' gaa tinanii so' man Pedro taga' a. Gaa ne cataj so':

—Cataj xna'anj nij soj rihaan tinú' Jacobo ga yo'ó nij tinúú ní' daj quiranj á —taj so' a.

Gaa ne cavii so' ca'anj so' yo'ó rej yanj a.

<sup>18</sup> Dan me se gaa quisj güii, ne quinano' ndo'o rá nij tanuu nicun' taga', che'é se ne quene'en uxrá nij so' me rej vaj Pedró a ma'. <sup>19</sup> Gaa ne ca'ne' Herodes suun rihaan tanuu ca'na' Pedró rihaan so' qui'yaj tanuu, tzaj ne ne ca'vee nari' nij tanuu man Pedró ma'. Che'é dan xna'anj Herodes man nij tanuu tumé man Pedró me rej ca'anj Pedró, tzaj ne ne quene'en nij so' a ma'. Che'é dan

ca'ne' Herodes suun se vaa ticavi' nii man nij tanuu tumé man Pedró, gaa ne curihanj Herodes estadó Judea, ca'anj so' chuman' Cesarea, cayáan so' a.

*Nana nihánj taj xna'anj se vaa cavi' Herodes, qui'yaj xluú chá nee man so' a*

<sup>20</sup> Dan me se ca'maan rá sí cu'naj Herodes ni'yaj so' man nij sí man chuman' Tiro do', chuman' Sidón do', ne che'é dan ca'na' cunudanj nij so' rej ne Herodes, ne ca'mii nij so' ga sí cu'naj Blastó sí tumé nu' ve' tucua' Herodes, ne dan me se ca'vej rá sí cu'naj Blastó racuj so' man nij so' cunuu rcua'aan nij so' ga Herodes, che'é se caxrj yuve nij so' doj sa'anj ston Blastó a. 'O se nucua'j rá nij so' man Herodes se vaa cuchi' se chá avii rej uun chij so' ndaa chiháan nij so' chá nij so' a. <sup>21</sup> Ne güii cachrón Blastó ca'mii nij so' ga Herodes me se nanuú Herodes yatzj nuu sí nicaj suun rey, ne táa so' chruun xlá sa', ne ca'mii natáj ndo'o so' rihaan nij sí man Tiro do', man Sidón do' a. <sup>22</sup> Gaa ne caguáj cunudanj nij so', cataj nij so':

—Nuveé se nana yuvij me nana avii raá sí nihánj a ma'. 'O se se nana ya'anj avii tu'va so' nanj á —taj nij yuvij, ni'yaj nij yuvij man Herodes a.

<sup>23</sup> Gaa ne cuaj caxrj 'o se mozó Diose chi'ij man Herodes, che'é se ne cataj so' se vaa orún' Diose me sí 'yaj avii raá so' a. Maan se ca'vej rá so' cataj nij yuvij se vaa ya'anj me ma'an so' a. Gaa ne dan me se cunu' nee man so' chá xluú, ne cavi' so', qui'yaj xluú a.

<sup>24</sup> Tzaj ne se nana Diose me se ra'yanj achij yo' ne naxna'anj yo' cuaj cuaj a. Ne uun rij ndo'o doj nij yuvij canoco' nana yo' a. <sup>25</sup> Ne Bernabé ga Saulo me se quisj roj so', ne caxrj roj so' sa'anj ston nij sí uun chij rihaan nij sí cuchumán rá ni'yaj man Jesucristó yanj chuman' Jerusalén, ne canicaj roj so', ca'anj roj so' chuman' Antioquía, ne ca'anj sí cu'naj Juan Marcos ga roj so', qui'yaj roj so' a.

## 13

*Nana nihánj taj xna'anj se vaa cune' nii man sí cu'naj Bernabé do', man sí cu'naj Saulo do', ca'anj nata' roj so' se nana Diose rihaan yuvii a*

<sup>1</sup> Dan me se chuman' Antioquía ro', ta'aj nij sí cuchumán rá ni'yaj man Jesucristó me sí nata' se nana Diose, ne yo'ó ta'aj nij so' me sí tucu'yón se nana Diose rihaan yuvii a. Ne sí cu'naj Bernabé do', sí cu'naj Simón Negro do', sí cu'naj Lucio sí cavii estadó Cirene do', sí cu'naj Manaén sí cachij tucua' sí cu'naj Herodes do', sí cu'naj Saulo do', me nij sí cata roj suun sa' yo' a. <sup>2</sup> Dan me se na'víj nij so' rihaan Diose sij 'nij ra'a man ní', ne toco' nij so' x'naa man ma'an nij so' che'é se aráj guee nij so' rihaan Diose, ne dan me se cataj Nimán Diose rihaan nij so' a:

—Cune' nij soj man sí cu'naj Bernabé ga sí cu'naj Saulo se vaa qui'yaj suun roj so' rihanj ndaa vaa cataj xna'anj 'unj rihaan roj so' á —taj Nimán Diose rihaan nij so' a.

<sup>3</sup> Gaa ne toco' nij so' x'naa man ma'an nij so', ne cachín ni'yaj ndo'o nij so' rihaan Diose, gaa ne cuta' nij so' ra'a nij so' ra' roj so', gaa ne dan me se ca'née nij so' man roj so' ca'anj nata' roj so' se nana Jesucristó rihaan yuvii a.

*Nana nihánj taj xna'anj daj quiran' 'o sí guun rá caráán chrej rihaan se nana Diose estadó Chipre a*

<sup>4</sup> Dan me se gaa ca'née Nimán Diose man roj so' ca'anj roj so', ne ca'anj roj so' chuman' Seleucia, gaa ne cavii roj so' rihoo chée rihaan na ca'anj roj so' ndaa estadó cu'naj Chipre a. <sup>5</sup> Gaa ne gaa cuchí' roj so' chuman' Salamina, ne nata' roj so' se nana Diose rá nij ve' nuu chre' nij yuvii israelitá tucu'yón nij so' se tucuanj Moisés, ne sí cu'naj Juan Marcos me sí vaj racuíj man roj so' a. <sup>6</sup> Dan me se yo'óó taj rihaan na ya'anj me estadó Chipre yo', ne va'núj nij so' chée nu' yo'óó yo' ndaa se cuchí' nij so' chuman' Pafos a. Ne chuman' Pafos nari' nij so' man 'o

sí chruun sí tu'va rma'an se vaa sij nata' se nana Diose me so', ne sí israelitá me so', ne Barjesús cu'naj so' a. <sup>7</sup> Ne so' me sí u'yón inanj chée ga sí nicaj suun gobernador cu'naj Sergio Paulo, ne sí cavii ndo'o ra' me sí cu'naj Sergio Paulo yo' a. Ne sí cu'naj Sergio Paulo canacúún man roj sí cu'naj Bernabé ga Saulo se vaa ca'na' roj so' rihaan so', ne guun ndo'o rá so' cunō so' se nana Diose, ne danj qui'yaj roj so' a. <sup>8</sup> Dan me se sí chruun cu'naj Barjesús, tzaj ne yo'ó se chuvii so' me Elimas, ne nana “Elimas” taj se vaa sí chruun me so' a. Dan me se caráán Elimas chrej rihaan se nana Bernabé ga Saulo a. 'O se guun rá so' ca'anj yanij sí cu'naj Sergio Paulo ne se cuchumán rá so' nana ya yo' a.

<sup>9</sup> Ne xa' sí cu'naj Saulo, tzaj ne yo'ó se chuvii so' me Pabló, ne dan me se caraa ndo'o Nimán Diose nimán so', ne ni'yaj uxrá so' man sí cu'naj Elimas yo', <sup>10</sup> ne cataj so':

—So' ro', me sí nuu nana tiha' yu'unj nimán, ne sij snúú rma'an mé so' nanj ei. Ta'nii ya sí chree mé so' á. Sij nachri' ni'yaj cunudanj se sa' mé so' a. Vaa güii tanáj tí'ín so' suun tanachej nana ya a'mii Diose sij 'nij ra'a man ní' na'. <sup>11</sup> Ne nihánj me se qui'yaj sí 'nij ra'a man ní' sayuun mán so', ne caráán rihaan so' doj güii, qui'yaj so', ne ndaa naán güii se curuvi' rihaan so' ma' —taj Pabló rihaan Elimas yo' a.

Ne taj ni'yón caráán rihaan Elimas, ne adi' se ran' sí chée rque ngaa rej rmí' ro', danj quiran' so', chée so', vaj so', nano' so' man sí corō' ra'a so' racuíj man so' cachee so' a.

<sup>12</sup> Ne gaa quene'en sí nicaj suun gobernador yo' daj quiran' sí chruun cu'naj Elimas yo', gaa ne caráya'anj ndo'o so' se tucuanj sí 'nij ra'a man ní', ne cuchumán rá so' ni'yaj so' man Jesucristó a.

*Nana nihánj taj xna'anj se vaa cuchumán rá que'ee ndo'o yuvii yanij yanj chuman' Antioquía naj estadó*

*Pisidia cuno nij so' nana ca'mii natáj Pabló rihaan nij so' a*

<sup>13</sup> Dan me se cavii nij tuvi' Pabló chuman' Pafos, ne cavii nij so' rque rihoo chéé rihaan na, ne ca'anj nij so' ndaa chuman' Perge chuman' naj estadó Panfilia a. Tzaj ne síi cu'naj Juan Marcos me se tanáj so' man yavíj roj so', ne canicaj so' nan' so' chuman' Jerusalén a. <sup>14</sup> Gaa ne yavíj roj so' me se curihanj roj so' chuman' Perge, ne ca'anj roj so' chuman' Antioquía naj estadó Pisidia a. Ne güii naránj rá nij yuvij israelitá me güii yo', ne catúj roj so' rá ve' tucu'yón nij yuvij israelitá se tucuanj Moisés, ne ca'anj cayáán roj so', <sup>15</sup> ne quisij nayaa nii se tucuanj Moisés do', se nana nij síi nata' se nana Diose gaa naá do', ne ca'née nij síi 'nij ra'a ve' yo' nana rihaan roj so', ne nana ca'née nij so' me nana nihánj a: “Sese vaa chrej nucuaj me rá roj soj nago' roj soj rihaan nij yuvij nuu chre' nihánj, ne ca'mii roj soj, tinuj”, taj síi 'nij ra'a ve' yo' rihaan síi cu'naj Pabló ga síi cu'naj Bernabé a. <sup>16</sup> Gaa ne canicun' caya Pabló, ne naxcaj so' ra'a so', ne cataj so' a:

—Cuno soj sij israelitá do', soj sij aráj cochroj rihaan Diose do', ca'mij rihaan soj á. <sup>17</sup> Dan me se Diose síi noco' ní' sij israelitá ro', me síi narii man xii ní', ne tinaxcaj Diose man nij xii ní' gaa cayáán nij so' rej cu'naj Egiptó, ne Diose me síi guun nucuaj quirii uún man nij so' rej Egiptó a. <sup>18</sup> Gaa ne nda' se tucuáá ndo'o nij so' rihaan Diose, tzaj ne yo'o racuúj Diose man nij so' gaa vaj nij so' rej tacaan nacoó vij chihaa ya yo' a. <sup>19</sup> Gaa ne tinavij Diose man chij x'ne' yuvij yanj rej cu'naj Canaán, gaa ne cuxra' ta'aj Diose nu' rej yo' guun yo' to'óó nij xii ní', qui'yaj Diose a. <sup>20</sup> Ne rej yo' guun to'óó nij so' 'o ca'anj cientó táá vij chihaa chí' yo' a. Ne gaa quisij catúj nij so' rej cu'naj Canaán, gaa ne cune' Diose man nij síi raa rii ta'nga' rihaan nij so', ne danj inanj cayáán nij so' ndaa se cayáán síi cu'naj Samuel síi nata' se nana Diose rihaan yuvij a.

<sup>21</sup> “Ne güii cayáán Samuel me se guun che'e nij xii ní' cachíin nij so' 'o síi nicaj suun rey guun chij rihaan nij so', gaa ne cune' Diose man síi cu'naj Saúl ta'níi síi cu'naj Cis se vaa guun chij so' rihaan nij so' ndaa vaa guun rá ma'an nij so' a. So' ro', me ta'níi ta'nij si'no síi cu'naj Benjamín, ne vij chihaa ya yo' cayáán so' síi nicaj suun rey a. <sup>22</sup> Gaa ne quirii yanij Diose man Saúl, gaa ne cune' Diose man síi cu'naj David se vaa guun David síi nicaj suun rey uun chij rihaan nij yuvij israelitá a. Ne ca'mii Diose che'é so', cataj Diose: “Nihánj me se nari' 'unj man David ta'níi Isaí, ne so' me síi qui'yaj nu' ndaa vaa me raj qui'yaj so' nanj á”, taj Diose ni'yaj Diose man David a.

<sup>23</sup> “Ne sca'núj nij ta'níi ta'nij si'no David ro', rqué Diose 'o síi tinanii man ní' sij israelitá rihaan sayuun, ndaa vaa cata' tu'va Diose asij naá, ne Jesucristó me so' a. <sup>24</sup> Dan me se asino ca'mii natáj síi cu'naj Juan rihaan cunudanj nij yuvij israelitá se vaa canicaj nimán nij so' canoco' nij so' tucuáán sa', ne cata' ne nij so', gaa ne ca'na' Jesucristó a. <sup>25</sup> Dan me se gaa ataa doj tzín' quisij ca'mii natáj Juan nu' se vaa guun rá Diose cataj so', gaa ne cataj so': “Me síi mé 'unj, rá nij soj ga. 'O se nuveé sij nano' soj man mej ma'. Tzaj ne vaa síi noco' xcó 'unj, ne sij sa' uxrá doj me so' rihanj, ne ne nó xcúnj nachej canj 'nij tacóó so' ma'”, taj síi cu'naj Juan rihaan nij yuvij ni'yaj so' man Jesucristó a.

<sup>26</sup> “Cuno soj ta'nij ta'nij si'no Abraham do', soj sij aráj cochroj rihaan Diose do', ca'mij rihaan soj cuano, tinuj. Aj ca'na' nana nihánj rihaan ní', qui'yaj Diose, ne nana nihánj taj xna'anj daj qui'yaj ní' gaa ne ca'vee quinanii ní' rihaan sayuun ei. <sup>27</sup> 'O se tuvi' ní' síi yanj chuman' Jerusalén do', nij síi uun chij rihaan nij so' do', ne xcaj nij so' cuentá che'é Jesucristó ma'. Ne cuta' nij so' cacun' xráá Jesucristó se vaa no xcúún so' ticavi' nii man so', ne dan me se quisij ya nu'

se nana nij sí nata' se nana Diose gaa naá nana nayaa ní' daj a güii naránj rá ní', qui'yaj nij so' nanj á. <sup>28</sup> Dan me se taj vaj a doj cacun' tumé so', tzaj ne rquee nij so' rihaan Pilato se vaa cavi' so' qui'yaj Pilato a. <sup>29</sup> Dan me se gaa quisíj qui'yaj nij so' nu' ndaa vaa nó rihaan danj Diose che'é Jesucristó, gaa ne tananij nii man so' rihaan rcutze, ne cachin' nii man so' rque yu'uj yuvej a. <sup>30</sup> Tzaj ne Diose me sí qui'yaj cunuu i'na' uún so' adonj. <sup>31</sup> Gaa ne que'ee güii curuvi' so' rihaan nij sí cavii ga so' estadó Galilea ca'anj chuman' Jerusalén ga so' a. Ne yaj me se guun ma'an nij so' sí nata' che'é so' rihaan nij yuvi adonj.

<sup>32</sup> "Ne nihánj me se nata' núj nana sa' rihaan nij soj se vaa aj qui'yaj Diose nu' ndaa vaa cata' tu'va so' rihaan xii ní' gaa naá a. <sup>33</sup> Dan me se cunuu i'na' uún Jesucristó, qui'yaj Diose che'é ní', ne dan me se quisíj ya nu' nana cata' tu'va so' gaa naá, ne cavii sa' ní' ta'nij nij sí cane gaa naá, qui'yaj so' adonj. Ne ase vaa nana nihánj nana natá' 'unj rihaan nij soj ro', danj vaa nana no rihaan chra' Salmo número vij, ne taj yo': "Ta'nij mé so' á. Cuanó nihánj me se quene'en yuvi se vaa ta'nij mé so', qui'yaj nanj á", taj se nana Diose no rihaan chra' Salmo yo' a. <sup>34</sup> Dan me se naxagaa so' ne cunuu i'na' uún so', ne se ri'yuj nee man so' daj chihaa míj ma'. Ne dan me se ma'an Diose ca'mii nana nihánj adonj: "Ase vaa rqué 'unj nu' se luj rihaan David, ta'nga' danj gaa rque 'unj nu' se luj rihaan so', ne daj chihaa míj se navij se luj yo' rihaan so' ma'", taj uún Diose rihaan Jesucristó a. <sup>35</sup> Che'é se qui'yaj Diose danj che'é Jesucristó rá David ro', che'é dan cachrón David rihaan yo'ó salmo nana nihánj a: "Daj chihaa míj se ri'yuj nee man sí vaa sa' rihaan so', qui'yáa so' ma'", taj David rihaan Diose ni'yaj David man Jesucristó a. <sup>36</sup> Dan me se xa' ma'an David, tzaj ne gaa quisíj qui'yaj so' nu' ndaa vaa guun rá Diose qui'yaj

so' che'é nij tuvi' so', gaa ne cavi' so', gaa ne cachin' nii man so' rej naj nij xii so', gaa ne ri'yuj nee man so' a. <sup>37</sup> Ne xa' Jesucristó sí cunuu i'na' uún qui'yaj Diose, tzaj ne ne ri'yuj nee man so' ma'.

<sup>38</sup> "Xcaj nij soj cuentá se vaa cuano nihánj me se nata' núj nana rihaan soj se vaa che'é se vaa qui'yaj Jesucristó ro', che'é dan ca'vee caraá x'naa Diose ni'yaj Diose cacun' tumé ní', tinuj. Dan me se daj chihaa míj se navij nu' cacun' tumé soj, qui'yaj se tucuanj Moisés ma'. <sup>39</sup> Tzaj ne cunudanj nij soj sij amán rá ni'yaj man Jesucristó me se x'nej uun cacun' yo' xraá soj, ne nuu sa' soj rihaan Diose adonj. <sup>40</sup> Che'é dan tadó nij soj se quiran' soj ndaa vaa taj se nana Diose nana no rihaan danj nij sí nata' se nana Diose nana nihánj á: <sup>41</sup> "Ne soj sij a'nga' nacoo ni'yaj manj, tzaj ne ni'yaj soj ei. Ca'anj rá soj, ne quirí' nu' soj nanj ei. 'O se gaa vaa i'na' soj nihánj, ne qui'yaj suun nocoo, ne ca'vee se cataj xna'anj yo' so' rihaan soj che'é se vaa qui'yaj, tzaj ne se ca'vee cuchuman rá soj se nana so' asuun ma'", taj Diose rihaan soj a —taj Pabló rihaan nij yuvi cunuu chre' rá ve' yo' a.

<sup>42</sup> Dan me se gaa me rá roj so' ca'anj roj so', ne cachín ni'yaj nij yuvi rihaan roj so' se vaa cachén yo' tunj güii, ne ca'na' uún roj so' ne ca'mii uún roj so' nana vaa danj rihaan nij so' a. <sup>43</sup> Gaa ne gaa quisíj tucu'yón nij so' ne curihanj nij yuvi xe', ne que'ee nij sí israelitá do', nij sí yanij nocoo' xraan se tucuanj nij sí israelitá do', canoco' man roj sí cu'naj Pabló ga Bernabé a. Gaa ne ca'mii ndo'o roj so' ga nij so', gaa ne guun ya rá nij so' se vaa yo' nica'j nij so' tucuaán sa' ga se luj 'yaj Diose che'é nij so' a.

<sup>44</sup> Dan me se cachén tunj güii ne nasíj yo'ó güii naránj rá nij yuvi israelitá, gaa ne cunuu chre' cunudanj nij yuvi yanj chuman' ta' asuun, che'é rej cunó nij so' se nana Diose sij 'nij ra'a man ní' a. <sup>45</sup> Tzaj ne quene'en nij yuvi israelitá se vaa cuchi' ndo'o



yuvij rihaan Pabló, gaa ne che'é dan guun xcoj ruvaa rá nij yuvij israelitá, ne nij ca'mii nij so' che'é Pabló, cataj nij so' se vaa inanj nana ne ca'mii Pabló a. <sup>46</sup> Tzaj ne ne cuhu'vi' ya roj sí cu'naj Pabló ga Bernabé ni'yaj roj so' man nij yuvij israelitá a ma'. Ne cataj roj so':

—No xcúún núj nata' núj se nana Diose rihaan nij soj sij israelitá asino yaan adonj. Tzaj ne che'é se quirí'ij yaníj soj nana yo', ne che'é se nuveé sij no xcúún cayáán ga Diose nu' cavii nu' ca'anj me soj rá soj, ne che'é dan nihánj me se canicaj núj, ne nata' núj nana yo' rihaan nij sí yaníj ei. <sup>47</sup> 'O se Diose sij 'nij ra'a man ní' me sí ca'ne' suun rihaan núj qui'yaj núj danj adonj. Dan me se cataj sí 'nij ra'a man ní': “Aj cuné' 'unj mán so' se vaa guún so' ya'an chuguun rihaan nij sí yaníj ne ca'vee xcaj nij so' cuentá, qui'yáá so', gaa ne quinanii yuvij yanj chuman' naj nu' rihaan chumij rihaan sayuun, qui'yáá so' á”. Nihánj me se nana Diose nana cataj Diose rihaan núj nanj á —taj roj so' rihaan nij yuvij israelitá yo' a.

<sup>48</sup> Dan me se gaa cuno nij sí yaníj se nana Pabló, ne guun niha' uxrá rá nij so', ne ve'é ca'mii nij so' che'é se nana Diose sij 'nij ra'a man ní' a. Ne cunudanj nij sí cune' Diose cayáán rihaan Diose nu' cavii nu' ca'anj ro', cuchumán rá nij so' cuno nij so' nana yo' a. <sup>49</sup> Gaa ne cuhi' se nana Diose sij 'nij ra'a man ní' daj a nij chuman' naj rihaan yo'óó rej yo' a. <sup>50</sup> Tzaj ne caxríj nij sí israelitá chrej rque nij chana yaníj noco' xraan man Diose chana xna'anj do', rque nij sí nicaj suun uun chij rihaan chuman' yo' do', ne táa ri'yunj nij so' man Pabló ga Bernabé a. Gaa ne tucunánj nij so' man roj so' rej yo' a. <sup>51</sup> Gaa ne nacun' roj so' tacóó roj so' tucuyuu roj so' yo'óó tachruu cavii chuman' yo' rihaan yo'óó, che'é rej xcaj nij sí man chuman' yo' cuentá se vaa ma'an nij so' tumé cacun' se vaa ne cunó nij so' se nana Diose a. Gaa ne ca'anj

roj so' chuman' Iconio a. <sup>52</sup> Ne nij sí cuchumán rá ni'yaj man Jesucristó yanj chuman' Antioquía yo' me se 'o guun niha' uxrá rá nij so', ne 'o cunuu Nimán Diose nimán nij so' a.

## 14

*Nana nihánj taj xna'anj daj guun rá nij sí man chuman' Iconio gaa cuhi' se nana Diose chiháán nij so' a*

<sup>1</sup> Dan me se gaa cuhi' sí cu'naj Pabló ga sí cu'naj Bernabé chuman' Iconio, ne catúj roj so' rá ve' tucuyón nij yuvij israelitá se tucuanj Moisés, ne che'é se ve'é ndo'o nata' roj so' se nana Diose, che'é dan cuchumán rá que'ee ndo'o yuvij israelitá do', yuvij yaníj a'mii xna'ánj griego do', ni'yaj nij so' man Jesucristó a. <sup>2</sup> Tzaj ne nij yuvij israelitá na'vej rá cunó se nana Jesucristó me se caxríj nij so' chrej rque nij yuvij yaníj yanj chuman' yo' che'é rej nachri' nij so' ni'yaj nij so' man nij tinuj nij sí cuchumán rá ni'yaj man Jesucristó, ne danj guun a. <sup>3</sup> Dan me se que'ee güii sca' nanj ca'mii natáj roj sí cu'naj Pabló ga Bernabé se nana Diose sij 'nij ra'a man ní', ne sí 'nij ra'a man ní' ro', racuíj man roj so' se vaa guun nucuj roj so' qui'yaj suun roj so' suun sa' nocoo ni'yaj nij yuvij, che'é rej cuchuman rá nij yuvij se vaa ya ya vaa se nana roj so' nana che'é se luj qui'yaj sí 'nij ra'a man ní' che'é ní' a.

<sup>4</sup> Gaa ne xra' ta'aj nij yuvij man chuman' yo', ne ta'aj nij so' ro', canoco' se nana nij sí israelitá sí na'vej rá cunó se nana Diose, ne yo'ó ta'aj nij so' ro', canoco' se nana roj sí cune' Jesucristó man nata' se nana so' a. <sup>5</sup> Gaa ne guun rá nij yuvij yaníj do', nij yuvij israelitá do', nij sí uun chij rihaan nij so' do', qui'yaj chi'ij nij so' man roj sí cu'naj Pabló ga Bernabé ne ndaa guun rá nij so' go' nij so' yahij man roj so' ndaa se cavi' roj so' a. <sup>6</sup> Tzaj ne xcaj roj so' cuentá, gaa ne che'é dan cunánj roj so', ca'anj roj so' chuman' Listra chuman' naj estadó Licaonia do', chuman' Derbe

yo'ó chuman' naj estadó Licaonia do', yo'ó nij chuman' ra'a naj nichrun' ga roj chuman' yo' do', <sup>7</sup> ne vaj roj so' nata' roj so' se nana Diose nana sa' rihaan nij yuvii yanj nij chuman' yo' a.

*Nana nihánj taj xna'anj se vaa guun rá nij síi ne chuman' Listra se vaa ya'anj me síi cu'naj Pabló do', síi cu'naj Bernabé do' a*

<sup>8</sup> Dan me se chuman' Listra ro', ne 'o síi rengo ne síi rengo me so' asij ca'ngaa so', ne veé 'o danj vaa so', ne daj chihaa míj taj se qui'ya' cachee so' ma'. <sup>9</sup> Ne yaán so' cuno so' se nana Pabló a. Dan me se ni'yaj uxrá Pabló man so', ne xcaj Pabló cuentá se vaa síi rengo yo' nucuaj ndo'o rá se vaa ca'vee nahuun sa' so', qui'yaj Diose a. <sup>10</sup> Che'é dan nucuaj ca'mii Pabló, cataj Pabló rihaan so' a:

—Naxumaan so', canicun' cayá so' ei. —taj Pabló rihaan so' a.

Gaa ne güej síi rengo yo', ne cachée so' a. <sup>11</sup> Dan me se quene'en nij yuvii se vaa qui'yaj Pabló, ne che'é dan caguáj nij yuvii se xna'anj ma'an nij so', cataj nij so':

—Nahuun nij ya'anj yuvii, ne naniij nij so' rihaan yo'óo chuguanj —taj nij yuvii ni'yaj nij yuvii man Pabló ga Bernabé a.

<sup>12</sup> Gaa ne cataj nij yuvii se vaa ya'anj cu'naj Júpiter me Bernabé, ne Pabló me se ya'anj cu'naj Mercurio me so', che'é se so' me síi ca'mii doj a. <sup>13</sup> Ne dan me se rihaan tu'va chuman' yo' ne 'o nuvíi rej na'víj nij yuvii rihaan ya'anj Júpiter, ne xrej ne nuvíi yo' ro', ca'ne' suun se vaa ca'na' scúj toró ca'na' cachriin yâj ca'na' ta'yaa rej atúj yuvii chuman' yo', ne guun rá so' ga nij yuvii ticavi' nij so' scúj yo' rihaan Pabló ga Bernabé che'é se ya'anj me roj so' rá nij yuvii a.

<sup>14</sup> Dan me se xcaj Bernabé ga Pabló cuentá daj guun rá nij yuvii, ne che'é dan cutzin' roj so' sagan' roj so', che'é se chi'ii ndo'o qui'yaj nij yuvii rá roj so' a. Gaa ne cunánj roj so' sca'núj nij yuvii, ne caguáj roj so', <sup>15</sup> cataj roj so':

—Se guun qui'yaj nij soj danj ma'. 'O se cyaan yuvii me ní, ne nihánj me se xa' núj, tzaj ne 'na' núj nata' núj se nana Diose nana sa' rihaan nij soj, che'é rej tanáj soj tucuáan ni'yon rma'an noco' soj cuano nihánj ne canicaj soj canoco' soj Diose síi vaa i'na' ya ei. Ne so' ro', me síi qui'yaj nu' rej xta' do', nu' rihaan yo'óo do', nu' na ya'anj do', ne nu' rasuun qui'yaj so' adonj. <sup>16</sup> Ne asij rque me se ca'neé ra'a Diose canoco' cunudanj nij x'ne' yuvii tucuáan cuchruj xii nij so' a. <sup>17</sup> Tzaj ne se guun cataj soj se vaa a doj ne ca'vee xcaj soj cuentá che'é Diose ma'. 'O se ve'é ndo'o qui'yaj Diose che'é soj adonj. Dan me se aman' maan avii rej xta', qui'yaj Diose che'é soj, ne síj dió avii naa, qui'yaj uún Diose, ne dan me se araa rque soj, ne uun niha' rá soj, qui'yaj Diose adonj —taj roj so' rihaan nij yuvii yo' a.

<sup>18</sup> Dan me se daj doj se ticavi' nij yuvii scúj rihaan roj so', tzaj ne ca'ne' rá nij yuvii ga suun yo', qui'yaj se nana roj so' a.

*Nana nihánj taj xna'anj che'é sayuun qui'yaj nij síi israelitá cavii chuman' Antioquía do', chuman' Iconio do', man síi cu'naj Pabló ga Bernabé a*

<sup>19</sup> Tzaj ne cavii síi israelitá chuman' Antioquía do', chuman' Iconio do', ca'na' nij so' chuman' Listra, ne caxrij nij so' chrej rque nij yuvii man chuman' Listra, ne che'é dan go' ndo'o nij yuvii yahij man Pabló, ne cuxuun nij yuvii man so' ndaa tu'va chuman', ne ri'ij nij yuvii man so' a. Ne guun rá nij yuvii se vaa cavi' so' a. <sup>20</sup> Tzaj ne cunuu chre' nij síi cuchumán rá se nana Jesucristó ne chuman' yo', ne tucuachriin nij so' nu' anicaj rej naj Pabló rihaan yo'óo, ne naxagaa so', ne catúj uún so' chuman' ga nij so' a. Gaa ne yo'ó güii me se curihanj roj so' ga Bernabé ca'anj roj so' chuman' Derbe a.

*Nana nihánj taj xna'anj se vaa canicaj síi cu'naj Pabló ga Bernabé chuman' Antioquía naj estadó Siria a*

21 Dan me se nata' ndo'o síi cu'naj Pabló ga Bernabé se nana Diose nana sa' rihaan nij yuvii man chuman' Derbe yo', ne cavii ndo'o síi tucu'yón se nana Jesucristó chuman' Derbe yo', qui'yaj roj so' a. Gaa ne canicaj roj so', ca'anj roj so' chuman' Listra do', chuman' Iconio do', chuman' Antioquía naj estadó Pisidia do' a. 22 Ne nari' nucuj nimán cunudanj nij síi tucu'yón se nana Jesucristó, qui'yaj roj so' a. Ne narqué roj so' chrej man nij síi tucu'yón se nana Jesucristó se vaa daj chihaa míj se ca'ne' rá nij so' ga suun noco' se tucuanj Jesucristó a. Ne cataj roj so' se vaa asino quiran' ndo'o ní' sayuun, gaa ne ca'vee cayáan ní' ga Diose asa' guun chij Diose rihaan chumii nihánj, taj roj so' a. 23 Ne cune' roj so' man síi guun chij rihaan nij síi cuchumán rá ni'yaj man Jesucristó 'o 'o nij chuman' a. Gaa ne toco' roj so' x'naa man ma'an roj so', ne cachín ni'yaj roj so' rihaan Diose sij 'nij ra'a man ní' che'é nij síi cuchumán rá ni'yaj man so' se vaa racuíj so' man nij so' a.

24 Dan me se cachén roj so' nu' estadó Pisidia, gaa ne cuchi' roj so' estadó Panfilia a. 25 Gaa ne ca'mii natáj roj so' se nana Diose rihaan nij síi man chuman' Perge, gaa ne ca'anj roj so' chuman' Atalia a. 26 Gaa ne chuman' Atalia ro', cavii roj so' rihoo chéé rihaan na, quinan' roj so' ndaa chuman' Antioquía naj estadó Siria a. Ne chuman' Antioquía ro', me rej cavii roj so' asino yaan gaa cachín ni'yaj nij síi cuchumán rá ni'yaj man Jesucristó rihaan Diose se vaa racuíj Diose man roj so' qui'yaj suun roj so' ca'mii natáj roj so' se nana Diose rihaan yuvii a. Ne nihánj me se quisíj suun yo', qui'yaj roj so' nanj adonj. 27 Dan me se gaa nucui' roj so', ne canacúún roj so' man nij síi cuchumán rá ni'yaj man Jesucristó se vaa cunu chre' nij so', gaa ne cataj xna'anj roj so' nu' se vaa qui'yaj Diose ga roj so', ne cataj roj so' se vaa ya x'núj rihaan nij yuvii yaníj cuchuman rá nij so' ni'yaj nij so' man

Jesucristó, qui'yaj Diose, ne ca'vee cavii sa' nij yuvii yaníj yo' a. 28 Gaa ne guun raan ndo'o roj so' ga nij síi tucu'yón se nana Jesucristó yanj chuman' Antioquía yo' a.

## 15

*Nana nihánj taj xna'anj che'é junta qui'yaj nij síi cuchumán rá ni'yaj man Jesucristó man chuman' Jerusalén gaa ca'mii nij so' che'é se tucuanj Moisés a*

1 Dan me se ta'aj nij síi cuchumán rá ni'yaj man Jesucristó cavii chuman' Jerusalén, ne ca'anj nij so' tucu'yón nij so' rihaan yo'ó tinúú nij so' se vaa sese se cata' ta'nga' man yo' o so' ndaa vaa taj se tucuanj Moisés, ne daj chihaa míj se ca'vee nanii so' rihaan sayuun qui'yaj Diose ma'. 2 Gaa ne ca'mii canó tuvi' ndo'o síi cu'naj Pabló do', síi cu'naj Bernabé do', ga nij síi tucu'yón nana yo', gaa ne che'é dan cune' nij síi cuchumán rá ni'yaj man Jesucristó yanj chuman' Antioquía man roj so' ga yo'ó doj tinúú nij so' se vaa ca'anj nij so' chuman' Jerusalén nano nij so' cuentó ga nij apóstol cune' Jesucristó man nata' se nana so' do', ga yo'ó nij síi uun chij rihaan nij so' do', che'é nana a'mii nij yuvii yo' a.

3 Dan me se cavii nij so', ca'anj nij so', ne cachén nij so' estadó Fenicia do', estadó Samaria do', ne cataj xna'anj nij so' rihaan nij tinúú nij so' che'é nij yuvii yaníj se vaa cuchumán rá ta'aj nij so' ni'yaj nij so' man Jesucristó, gaa ne guun niha' uxrá rá cunudanj nij síi cuno nana yo' a. 4 Dan me se cuchi' nij so' chuman' Jerusalén, gaa ne ve'é ca'mii nij síi cuchumán rá ni'yaj man Jesucristó do', nij apóstol cune' Jesucristó man nata' se nana so' do', yo'ó nij síi uun chij do', ga nij so' a. Gaa ne cataj xna'anj nij so' rihaan nij síi yanj chuman' Jerusalén yo' che'é nu' se vaa qui'yaj Diose ga nij tinuj nij so' a.

5 Tzaj ne canicun' doj síi fariseo síi cuchumán rá ni'yaj man Jesucristó, ne cataj nij so' se vaa no xcuún nij

tuví' Pabló cutá' nij so' ta'nga' man nij síí yaníj yo', ne cataj xna'anj nij so' rihaan nij síí yaníj yo' se vaa no xcúun nij so' qui'yaj nij so' nu' se tucuanj Moisés a.

<sup>6</sup> Dan me se cunuu chre' nij apóstol cune' Jesucristó man nata' se nana so' rihaan yuvií ga yo'ó nij síí uun chij rihaan nij yuvií cuchumán rá ni'yaj man Jesucristó, qui'yaj nij so' juntá, ca'mii nij so' che'é se nana nij síí fariseo yo' a. <sup>7</sup> Dan me se ca'mii ca'mii nij so', gaa ne canicun' síí cu'naj Pedró, ne cataj so':

—Cuno soj ca'mij, tinuj. Aj ne'en soj se vaa asij naá ndo'o guun rá Diose cunó nij síí yaníj se nana Diose nana sa', ne cuchuman rá nij síí yaníj ni'yaj nij so' man nana sa' yo' a. Gaa ne narii Diose man yo'o tuvi' ní', ne 'unj me síí narii Diose nata' se nana Diose rihaan nij yuvií yaníj yo' chuguanj. <sup>8</sup> Ne Diose ro', me síí ne'en daj vaa nimán yuvií, ne Diose me síí rqué Nimán Diose man nij síí yaníj yo' ndaa vaa qui'yaj so' che'é ma'an ní', che'é rej ca'vee guun ya rá ní' se vaa ya tinúú ní' me nij síí yaníj nanj adonj. <sup>9</sup> Dan me se cunuu sa' nimán nij síí yaníj rihaan Diose che'é se cuchumán rá nij so' ni'yaj nij so' man Jesucristó, ne cuano nihánj me se 'o cyaan vaa nij so' ga ní' rihaan Diose nanj adonj.

<sup>10</sup> "Ne tadó soj sese guun rá soj quene'en soj sese ca'vee ca'maan rá Diose qui'yaj soj ne qui'yaj Diose sayuun man soj á. 'O se xa' se tucuanj Moisés, tzaj ne ase vaa icón 'ee taj raá yuntá scúj ro', danj vaa se tucuanj Moisés rihaan xii ní' do', rihaan ma'an ní' do', ne ne ca'vee qui'yaj ní' nu' tucuaán yo' ma'. Ne nihánj me se me rá soj cuchruj soj tucuaán yo' rihaan yo'ó nij tinúú ní' síí tucu'yón se nana Jesucristó, <sup>11</sup> tzaj ne amán rá ní' se vaa che'é inanj se luj qui'yaj Jesucristó sij 'nij ra'a man ní' ro', che'é dan nanii ní' rihaan sayuun ei. Nuveé se tucuanj Moisés me se vaa qui'yaj nanii ní' rihaan sayuun ma'. Ne ase vaa ní' ro', danj vaa

nij tinúú ní' síí yaníj uún adonj —taj Pedró rihaan cunudanj nij so' a.

<sup>12</sup> Dan me se ca'ne' rá nij so', ne a doj ne ca'mii nij so' a ma'. Maan se sa' uxrá nanó xrej nij so' gaa cataj xna'anj Bernabé ga Pabló che'é nij suun sa' nocoo guun nucuaj roj so' qui'yaj roj so' sca'núj nij síí yaníj qui'yaj Diose a. <sup>13</sup> Dan me se gaa quisíj ca'mii roj so', gaa ne ca'mii síí cu'naj Santiagó, cataj so':

—Cuno nij soj ca'mij, tinuj. <sup>14</sup> Nihánj me se cataj xna'anj tinú' Simón rihaan ní' se vaa asino yaan narii Diose man ta'aj nij yuvií yaníj guun nij so' 'o se chuman' Diose a. <sup>15</sup> Ne 'o cyaan vaa se nana nij síí nata' se nana Diose gaa naá ga se nana tinú' Simón nihánj a. Dan me se vaa nana no rihaan danj Diose taj: <sup>16</sup> "Asa' quisíj, gaa ne canicaj 'unj, ne naquiyaj sa' 'unj rej ne síí cu'naj David a. Dan me se canee nu' ve' ne so', ne quiri' ndo'o ve', tzaj ne nacune' caya uún 'unj man nu' ve' yo', gaa ne cunuu sa' cunudanj yo' a. <sup>17</sup> Danj qui'yaj che'é rej ca'vee nano' yo'ó nij yuvií yaníj mán 'unj sij 'nij ra'a man nij so' a. Danj qui'yaj cunudanj nij yuvií yaníj nocoo' manj, taj 'unj sij 'nij ra'a man soj, <sup>18</sup> ne asij naá cataj 'unj se vaa qui'yaj danj adonj", taj se nana Diose nana cachrón síí nata' se nana Diose gaa naá rihaan yanj a.

<sup>19</sup> "Che'é dan 'unj me síí guun rá se vaa se qui'yaj ní' sayuun man nij síí yaníj canicaj nimán canoco' man Diose ma'. Se cataj ní' se vaa canoco' nij so' nu' se tucuanj Moisés ma'. <sup>20</sup> Maan se qui'yaj ní' yanj ca'nej ní' rihaan nij so', ne cataj xna'anj ní' rihaan nij so' se vaa se guun cha' nij so' rasuun rqué yuvií rihaan ya'anj cacój yuvií ma'. Ne snó'o do', chana do', se cotoj nij so' ga yo'ó yuvií sese ne nica' nij so' me yo' ma'. Ne se chá nij so' nee xcuu tuguáj nii gaán chihá ma'. Ne se chá nij so' ton ma'. <sup>21</sup> 'O se daj a güii cuetan' naránj rá ní' me se man ndo'o tuvi' ní' sij israelitá nayaa se nana Moisés, ne a'mii natáj nii che'é se tu-



cu'anj so' rá ve' tucu'yón ní' tucuáán yo' daj a chuman' a. Ne danj 'yaj inanj ní' sij israelitá asij naá ndo'o a —taj sí' cu'naj Santiagó rihaan yo'ó nij so' a.

*Nana nihánj taj xna'anj che'é yanj cartá qui'yaj nij sí' man Jerusalén ca'néé nij so' rihaan nij yuvii yanj cuchumán rá ni'yaj man Jesucristó a*

<sup>22</sup> Gaa ne guun rá nij apóstol cune' Jesucristó man nata' se nana so' do', yo'ó nij sí' uun chij do', cunudanj nij yuvii cuchumán rá ni'yaj man Jesucristó yanj chuman' Jerusalén do', narii nij so' doj tuvi' ma'an nij so' ca'anj nij so' ndaa chuman' Antioquía ga roj sí' cu'naj Pabló do', Bernabé do' a. Gaa ne narii nij so' man sí' cu'naj Judas Barsabás do', man sí' cu'naj Silas do', se vaa ca'anj roj so' a. 'O se sí' sa' me roj so', rá nij tinúú roj so' a. <sup>23</sup> Gaa ne qui'yaj cunudanj nij so' yanj cartá ca'anj nica'j nij sí' ca'anj chuman' Antioquía, ne nihánj me se vaa taj yanj cartá yo' a: "Nihánj me yanj cartá 'yaj núj sij apóstol cune' Jesucristó man nata' se nana so' do', sij uun chij rihaan nij sí' amán rá ni'yaj man Jesucristó do' a. Tinúú soj me núj, ne ca'nej núj yanj nihánj rihaan nij soj sij yanj amán rá ni'yaj man Jesucristó yanj chuman' Antioquía do', estadó Siria do', estadó Cilicia do' a. <sup>24</sup> Dan me se ca'na' nana rihaan núj se vaa doj tuvi' núj me sí' ca'mii nana qui'yaj sayuun rihaan soj, ne quiri' rá soj, qui'yaj nij sí' ca'mii nana yo' rihaan nij soj a. Tzaj ne nuveé núj ca'néé man nij so' ma'. <sup>25</sup> Tzaj ne che'é se qui'yaj nij so' danj ro', che'é dan cuya'an guun rá núj narii núj doj tinúú núj cuchí' rihaan soj ga roj tinúú ní' sí' 'ee ndo'o rá núj sí' cu'naj Bernabé ga Pabló adonj. <sup>26</sup> Ne xa' roj so', tzaj ne sij ca'néé nimán cunuú rihaan Jesucristó sij 'nij ra'a man ní' me roj so', ne ndaa ne chu'vi' roj so' caví' roj so' ma'. <sup>27</sup> Dan me se ca'néé núj man sí' cu'naj Judas do', man sí' cu'naj Silas do', se vaa ca'anj roj so' ga sí' cu'naj Bernabé ga Pabló, ne ma'an

roj so' nata' rihaan soj ndaa vaa taj nana no' rihaan yanj nihánj ei.

<sup>28</sup> "Dan me se ne guun rá Nimán Diose do', ma'an núj do', cuchruj ndo'o núj tucuáán canoco' soj ma'. Tzaj ne vaa che'é cunō soj ca'anj guee nana nihánj, rá núj nanj adonj. <sup>29</sup> Dan me se se guun cha soj rasuun rque yuvii rihaan ya'anj cacój yuvii ma'. Se guun cha soj ton ma'. Se guun cha soj nee xcuu tuguáj nii gaán chihá ma'. Ne snó'o do', chana do', se cotoj soj ga yo'ó yuvii sese ne nica soj me yo' ma'. Ne sese qui'yaj soj nu' ndaa vaa taj nana nihánj, ne ve'é 'yaj soj, rá núj nanj adonj. Ne me rá núj se vaa ve'é cayáán soj adonj", taj yanj cartá qui'yaj nij sí' man chuman' Jerusalén yo' a.

<sup>30</sup> Dan me se ca'néé nij so' man ca'anj nij sí' ca'anj chuman' Antioquía, gaa ne gaa cuchí' nij so', ne canacúún nij so' cunu chre' cunudanj nij sí' cuchumán rá ni'yaj man Jesucristó, gaa ne caxrij nij so' yanj cartá yo' ston nij sí' yanj chuman' Antioquía a. <sup>31</sup> Gaa ne nayaa nij sí' man Antioquía yanj cartá, gaa ne guun niha' uxrá rá nij so' che'é nana sa' cataj xna'anj nij sí' man Jerusalén rihaan nij so' a. <sup>32</sup> Ne sí' cu'naj Judas do', sí' cu'naj Silas do', sí' nata' se nana Diose me roj so', ne a'mii a'mii roj so' nago' roj so' chrej man nij sí' man Antioquía yo', ne nari' nucua'j nimán nij so', qui'yaj roj so' a. <sup>33</sup> Dan me se quisij caran' roj so' chuman' Antioquía, gaa ne ve'é cataj nij tinuj nij sí' man Antioquía rihaan roj so' se vaa dínj gaa nimán roj so' ca'anj roj so' a. Gaa ne dan me se quinan' roj so' rihaan nij sí' ca'néé man roj so' ca'na' roj so' a. <sup>34</sup> Tzaj ne guun rá sí' cu'naj Silas quina'j so' chuman' Antioquía a. <sup>35</sup> Ne guun raan sí' cu'naj Pabló do', sí' cu'naj Bernabé do', chuman' Antioquía, ne tucu'yón roj so' se nana Diose sij 'nij ra'a man ní' nana sa' rihaan yuvii a. Ne que'ee ndo'o yo'ó nij yuvii nata' nana sa' yo' ga roj so' a.

*Nana nihánj taj xna'anj se vaa ca'anj uún Pabló tucu'yón so' se nana Diose rihaan yuvi, ne ca'anj Bernabé yo'ó rej yaníj a*

<sup>36</sup> Dan me se cachén doj güii, gaa ne cataj Pabló rihaan Bernabé a:

—Canicaj ní' ca'anj uún ní' cunudanj nij chuman' yanj nij tinúú ní' nij síí nata' ní' se nana Diose nana sa' rihaan, gaa ne quene'en ní' daj vaa mán nij so' ei —taj Pabló rihaan Bernabé a.

<sup>37</sup> Tzaj ne Bernabé ro', guun rá so' se vaa ca'anj uún síí cu'naj Juan Marcos ga roj so' a. <sup>38</sup> Tzaj ne ne ca'vej rá Pabló ca'anj uún Juan Marcos ga roj so', che'é se gaa rque me se tanáj Juan Marcos man roj so' estadó Panfilia, ne ne ca'anj so' qui'yaj suun nij so' che'é Diose ma'. <sup>39</sup> Che'é dan guun vij nana ca'mii roj so' che'é Juan Marcos, ne che'é dan ca'anj yaníj roj so', ne Bernabé ro', nicaj síí cu'naj Marcos, ne cavii roj so' rihoo chéé rihaan na, ne ca'anj roj so' estadó Chipre a. <sup>40</sup> Ne Pabló ro', narii so' man síí cu'naj Silas se vaa ca'anj so' ga Pabló a. Ne cachíin ni'yaj nij tinúú roj so' nij síí man chuman' Antioquía rihaan Diose se vaa qui'yaj Diose se luj ne racuíj so' man roj so' chrej ca'anj roj so', ne dan me se ca'anj roj so' a. <sup>41</sup> Gaa ne cachén roj so' nu' estadó Siria do', nu' estadó Cilicia do', ne nari' nucuj nimán nij x'ne' nij síí cuchumán rá ni'yaj man Jesucristó man cunudanj nij chuman' naj roj estadó yo', qui'yaj roj so' a.

## 16

*Nana nihánj taj xna'anj se vaa cachéé síí cu'naj Timoteo ga síí cu'naj Pabló ga Silas a*

<sup>1</sup> Dan me se cuchi' síí cu'naj Pabló ga Silas chuman' Derbe do', chuman' Listra do' a. Ne chuman' Listra ro', yáán 'o síí tucu'yón se nana Jesucristó, ne Timoteo cu'naj so' a. Ne nii Timoteo me chana israelitá cuchumán rá ni'yaj man Jesucristó, ne rej Timoteo me síí yaníj a'mii

xna'anj griego a. <sup>2</sup> Ne síí sa' me Timoteo, taj nij tinúú so' síí ne chuman' Listra do', chuman' Iconio do' a. <sup>3</sup> Dan me se guun rá Pabló se vaa ca'anj Timoteo ga so' a. Ne cuta' Pabló ta'nga' man so', che'é se ne'en cunudanj nij síí israelitá yanj rej yo' se vaa sij yaníj me rej so' ne che'é dan nuvi' ta'nga' cata' man so' ma'. <sup>4</sup> Dan me se gaa cachén nij so' nu' nij chuman', ne cataj xna'anj nij so' rihaan nij yuvi cuchumán rá ni'yaj man Jesucristó se vaa cunó nij yuvi se nana nij apóstol cune' Jesucristó man do', yo'ó nij síí uun chij yanj chuman' Jerusalén do', nana naqui'yaj cuu nij so' che'é nij síí yaníj a. <sup>5</sup> Ne xa' nij x'ne' nij síí cuchumán rá ni'yaj man Jesucristó, tzaj ne doj a canoco' nij so' se tucuanj Jesucristó, ne doj a cunuu rij nij x'ne' daj a güii a.

*Nana nihánj taj xna'anj se vaa naqui'yaa 'o síí ne estadó Macedonia rihaan Pabló, qui'yaj Diose a*

<sup>6</sup> Dan me se caráán Nimán Diose chrej rihaan nij so' nata' nij so' se nana Diose estadó cu'naj Asia, ne che'é dan cachén nij so' rej cu'naj Frigia do', rej cu'naj Galacia do' a. <sup>7</sup> Gaa ne vaj nij so' chrej ndaa rej cu'naj Misia, gaa ne guun rá nij so' ca'anj nij so' estadó cu'naj Bitinia a. Tzaj ne ne ca'vee qui'yaj nij so' danj, qui'yaj Nimán Diose ma'. <sup>8</sup> Che'é dan cachén nij so' rej cu'naj Misia, ne nanij nij so' ndaa chuman' Troas a. <sup>9</sup> Ne dan me se rej nij naqui'yaa 'o rasuun rihaan Pabló, qui'yaj Diose a. Ne dan me se nicun' 'o síí ne estadó Macedonia ni'yaj Pabló, ne canacúun snó'o yo' man Pabló, cataj so':

—Ca'na' so' ndaa estadó Macedonia nihánj, ne racuíj so' man núj á —taj so' rquee so' man Pabló a.

<sup>10</sup> Gaa ne nu' nanó rá ca'anj ran' núj daj gaa qui'yaj núj ne ca'vee ca'anj núj ndaa estadó Macedonia a. 'O se cachríj rá ya núj se vaa Diose me síí ca'ne' suun rihaan núj nata' núj se nana Diose nana sa' rihaan nij síí ne estadó Macedonia yo' a.

*Nana nihánj taj xna'anj che'é chana cu'naj Lidia chana cuchumán rá ni'yaj man Jesucristó a*

<sup>11</sup> Dan me se chuman' Troas ro', cavii núj rihoo chéé rihaan na, ne 'o chrej ca'anj núj cuchí' núj ndaa rej cu'naj Samotracia a. Ne yo'ó güii ca'anj núj rque rihoo ndaa chuman' cu'naj Neápolis a. <sup>12</sup> Gaa ne cavii núj chuman' yo', ca'anj núj chuman' cu'naj Filipos a. Ne chuman' Filipos ro', me chuman' nocoo naj estadó Macedonia, ne chuman' cuchruj nij síi cavii Romá me yo' a. Dan me se guun raan núj doj güii chuman' Filipos yo', <sup>13</sup> ne güii naránj rá nij yuvii israelitá curihanj núj ta'yaa xij rej atúj yuvii chuman' yo', ne ca'anj núj tu'va 'o chráa a. 'O se guun rá núj se vaa rej yo' me rej cunuu chre' nij yuvii israelitá cachinj ni'yaj nij so' rihaan Diose a. Dan me se cayáán núj rihaan yo'óo, ne ca'mii núj ga nij chana cunuu chre' rej yo', <sup>14</sup> ne yáán 'o chana cu'naj Lidia, ne no' ro', me chana ránj natu'vej yatzij mantá tinta sa' inanj, ne chana cavii chuman' Tiatira me no', ne chana yanij aráj guee rihaan Diose me no' a. Dan me se cuno no' se nana Pabló, ne racuíj ndo'o Diose sij 'nij ra'a man ní' man no' se vaa ca'vee cuchumán rá no' se nana Pabló yo' a. <sup>15</sup> Gaa ne cata' ne nij tucua no' a. Gaa ne canacúún no' man núj, cataj no':

—Sese 'unj me chana amán ya rá ni'yaj man Diose sij 'nij ra'a man ní', rá nij soj, ne caran' soj ve' tucuj doj güii á —taj chana cu'naj Lidia rihaan núj a.

Ne rquee ndo'o no' man núj, ne caran' núj ve' tucua no' a.

*Nana nihánj taj xna'anj se vaa catúj roj síi cu'naj Pabló ga Silas taga' che'é se quirii roj so' nana chree nimán 'o chana yaan rii suerté, tzaj ne racuíj Diose man roj so' a*

<sup>16</sup> Dan me se yo'óo güii ca'anj uún núj rej cachinj ni'yaj núj rihaan Diose, ne nari' tuvi' 'o chana yaan ga núj, ne nuu 'o nana chree nimán no',

ne qui'yaj canaán ndo'o nij síi uun chij rihaan no' sa'anj, qui'yaj no' gaa quirii no' suerté che'é yuvii a. <sup>17</sup> Dan me se canoco' ndo'o no' man núj ga Pabló, ne caguáj no', cataj no':

—Nij síi nihánj ro', me síi nuu rihaan Diose síi nicun' xta', ne nata' nij so' rihaan soj me tucuaán canoco' soj ne ca'vee nanii soj rihaan sayuun ei —taj no', ni'yaj no' man núj a.

<sup>18</sup> Dan me se guun que'ee güii qui'yaj no' danj, gaa ne guun rmii Pabló, qui'yaj no', ne che'é dan canicaj so' ca'mii so' rihaan nana chree nuu nimán no', cataj so':

—Nihánj me se che'é suun nucuaj rque Jesucristó manj a'ne' 'unj suun rihaan so' se vaa curihanj so' nimán chana nihánj á —taj Pabló rihaan nana chree yo' a.

Gaa ne nu' curihanj nana chree nimán no' a.

<sup>19</sup> Dan me se nij síi uun chij rihaan chana yaan yo' me se xcaj nij so' cuentá se vaa che'é se curihanj nana chree nimán chana yo' ro', che'é dan se ca'vee qui'yaj canaán nij so' doj sa'anj qui'yaj chana yaan yo', rá nij so' a. Che'é dan quita'aa nij so' man Pabló ga Silas, ne nucuaj rii nii man roj so' ca'anj nij so' yu'vee ndaa rihaan nij síi nicaj suun uun chij rihaan chuman' yo' a. <sup>20</sup> Gaa ne ca'anj nicaj nij so' man roj síi cu'naj Pabló ga Silas rihaan roj cuese uun chij rihaan chuman' yo', gaa ne cataj nij so' a:

—Roj síi nihánj me se nanj yuvii israelitá me roj so', ne uun rmii rá nu' nij síi man chiháán ní' 'yaj roj so' nanj á. <sup>21</sup> 'O se nata' roj so' tucuaán naca rihaan núj, ne nuveé tucuanj no' xcúún ní' nicaj ní' me tucuaán yo' che'é se síi nocó' gobiernó ne Romá me ní' á —taj nij so' rihaan roj cuese uun chij rihaan chuman' yo' a.

<sup>22</sup> Gaa ne 'o cunihaan guun rá nij yuvii man chuman' yo', ne caxrij yuvaa ndo'o nij so' man Pabló ga Silas a. Gaa ne nucuaj cuxuun roj cuese sagan' Pabló ga Silas ndaa se quitzin' yatzéj, ne ca'ne' roj cuese suun rihaan nij tanuu se vaa go' ndo'o nij

tanuu rutzii xráá roj so' a. <sup>23</sup> Ne gaa quisij cayuun roj so', ne tagüej nij tanuu man roj so' rá taga', ne ca'ne' roj cuese yo' suun rihaan síí tumé taga' se vaa cutumé uxrá so' man roj so' a. <sup>24</sup> Dan me se gaa cuno síí tumé taga' nana yo', ne canu' so' man roj so' rá 'o ve' rej rque taga' yo', ne caxrij so' tacóo roj so' rque yu'uj taj rque caj a.

<sup>25</sup> Dan me se rej nij yan' achíin ni'yaj ndo'o roj síí cu'naj Pabló ga Silas ne achráá roj so' chra' rihaan Diose, ne uno nij síí man taga' se vaa 'yaj roj so', <sup>26</sup> ne dan me se cachén ndo'o yuún, ne ndaa nasqui' ndo'o tacóo ve' taga' yo', ne x'núj nu' nij ta'yaa taj rihaan taga' yo', ne nache nu' aga' ne' nuu chihá ra'a cunudanj nij síí 'nij taga' yo' a. <sup>27</sup> Ne nanuú rá síí tumé taga', ne quene'en so' se vaa táá ya'núj uun nij ta'yaa, gaa ne guun rá so' se vaa aj cunánj nij síí man taga', ne che'é dan quirii so' taneé so' neé espadá, ne daj doj se ticavj' so' man ma'an so' a. <sup>28</sup> Tzaj ne nucuaj ndo'o caguáj síí cu'naj Pabló rihaan so', cataj Pabló:

—Se guun qui'yaj chi'ii so' man ma'an so' ma'. 'O se man chre' cunudanj núj nihánj nanj ei —taj Pabló, caguáj so' a.

<sup>29</sup> Gaa ne canacúun síí tumé taga' se vaa ca'na' nicaj nii ya'an chuguun rihaan so', ne yoo ndo'o catúj so' rá taga', ne ri'lj ndo'o man so' che'é se chu'vi' so', ne cayáan ruj so' ndaa canó tu'va so' rihaan yo'óo rihaan roj síí cu'naj Pabló ga Silas a. <sup>30</sup> Dan me se ca'anj nicaj so' man roj so' xe', ne xná'anj so' man roj so', cataj so':

—Daj qui'yáj, gaa ne ca'vee nanij 'unj rihaan sayuun quirán' 'unj nihánj ga —taj so', xná'anj so' man roj so' a.

<sup>31</sup> Gaa ne cataj roj so':

—Cuchuman rá so' ni'yaj so' man Jesucristó sij 'nij ra'a man ní', gaa ne nanij so' rihaan sayuun nihánj do', rihaan chrej chi'ii uun chij nimán so' do' a. Ne danj inanj qui'yaj nij tuvi'

soj, gaa ne cavii sa' cunudanj soj rihaan Diose á —taj roj so' rihaan síí tumé taga' yo' a.

<sup>32</sup> Gaa ne nata' roj so' se nana Diose sij 'nij ra'a man ní' rihaan nu' nij tucua so' a. <sup>33</sup> Dan me se rej nij me yo', ne maan orá dan nicaj síí tumé taga' yo' man roj so', ne na'nu' so' xráá roj so' rej canó rutzii, ne nu' qui'yaj so' danj, ne nu' cata' ne nu' nij tucua so' a. <sup>34</sup> Gaa ne ca'anj nicaj so' man roj so' rej xraj rej ne ma'an so', ne go' so' se chá chá roj so' a. Gaa ne dan me se guun niha' uxrá rá nij tucua so', che'é se cuchumán rá nij so' ni'yaj nij so' man Diose a.

<sup>35</sup> Gaa ne rej ranga' me se ca'neé roj cuese man misión taga', ne cataj nij misión rihaan síí tumé taga' a:

—Na'nej so' man roj snó'o yo' á —taj nij so' a.

<sup>36</sup> Gaa ne cuchí' síí tumé taga' yo' rihaan Pabló, ne nata' so' se nana nij misión rihaan Pabló, cataj so':

—Ca'neé roj cuese nana se vaa na'nej 'unj man roj soj nanj á. Che'é dan cuano nihánj me se ca'vee ca'anj roj soj, ne gaa xej nimán roj soj á —taj so' rihaan Pabló a.

<sup>37</sup> Gaa ne cataj Pabló rihaan nij misión a:

—Dan me se roj cuese yo' ro', nda' se sij romanó me rój, tzaj ne ne naqui'yaj cuu roj so' che'é rój, ne maan se go' rma'an nii rutzii xráá rój, qui'yaj roj so', ne quene'en cunudanj nij yuvii man rój se vaa cayuun rój, gaa ne caxrij roj so' taga' man rój a. Ne nihánj me se uun rá roj so' quirii yuve roj so' man rój xe', tzaj ne se guun danj ma'. Tananj ca'na' ma'an roj so' nihánj, gaa ne ve'é quitaj yaan roj so' rihaan rój curihanj rój taga' nihánj á —taj Pabló rihaan nij misión ca'na' taga' a.

<sup>38</sup> Dan me se nata' nij misión se nana Pabló rihaan roj cuese yo', gaa ne kuchu'vi' ndo'o roj so' gaa cuno roj so' nana se vaa sij romanó me Pabló ga Silas a. <sup>39</sup> Gaa ne cuchí' roj cuese taga', gaa ne ca'mii sa' roj so' ga roj síí cu'naj Pabló ga Silas a. Gaa ne quitáa



yaan roj cuese rihaan roj so' curihanj roj so' taga', ne ve'é cachíin ni'yaj roj cuese rihaan Pabló ga Silas se vaa qui'yaj roj so' se ndo'o, curihanj roj so' chuman' yo' a. <sup>40</sup> Dan me se gaa quisíj curihanj roj so' taga', gaa ne ca'anj roj so' tucua chana cu'naj Lidia a. Gaa ne gaa quene'en roj so' man nij tinúú nij so' sí noco' man Jesucristó, ne ca'mii roj so' ga nij so', ne cunuu xej nimán nij so' qui'yaj se nana roj so', gaa ne curihanj roj so' chuman' yo', ne ca'anj roj so' a.

## 17

*Nana nihánj taj xna'anj se vaa ca'maan rá nij sí man chuman' Tesalónica ni'yaj nij so' man Pabló ga Silas a*

<sup>1</sup> Dan me se cachén roj so' chuman' Anfípolis do', chuman' Apolonia do', gaa ne catúj roj so' chuman' Tesalónica a. Ne chuman' Tesalónica ro', ne 'o ve' tucuyón nij yuvi israelitá se tucuanj Moisés a. <sup>2</sup> Dan me se catúj Pabló rá ve' yo' rej nuu chre' nij yuvi israelitá yo', ndaa vaa u'yón inanj so' qui'yaj so' a. Ne va'nuj ya güii cuetan' naránj rá nij so' nanó Pabló cuentó ga nij so' che'é nana no rihaan danj Diose a. <sup>3</sup> Dan me se cataj xna'anj Pabló rihaan nij so' se vaa sí ca'née Diose tinanii man yuvi rihaan sayuun me se no xcúún so' quirán' so' sayuun ne caví' so' ne cunuu i'na' uún so', ne cataj Pabló se vaa ma'an Jesucristó sí nata' Pabló che'e rihaan nij so' ro', ma'an ya so' me sí ca'née Diose tinanii man yuvi rihaan sayuun a. <sup>4</sup> Gaa ne ta'aj nij sí israelitá cuno se nana Pabló ro', cuchumán rá nij so' ni'yaj nij so' man Jesucristó, ne guun tuví' nij so' ga Pabló ne ga Silas a. Ne cuchumán rá que'ee ndo'o nij sí yaníj a'mii xna'ánj griego aráj guee inanj rihaan Diose do', que'ee nij chana raa doj ne chuman' yo' do', cuchumán rá a.

<sup>5</sup> Tzaj ne guun xcoj ruvaa rá yo'ó nij yuvi israelitá ni'yaj nij so' man roj sí cu'naj Pabló ga Silas, ne che'é dan nano' nij so' doj sí chi'ii man

yu'vee, ne cunuu chre' ndo'o yuvi, qui'yaj nij sí chi'ii yo', gaa ne naxumaan ndo'o sayuun chuman' yo', qui'yaj nij so' a. Gaa ne cuchí' nij yuvi yo' rihaan ve' tucua sí cu'naj Jasón ve' caran' sí cu'naj Pabló ga Silas, ne guun rá nij yuvi quirí' nij so' man roj so' ndaa rihaan yuvi cunuu chre' a. <sup>6</sup> Dan me se nuvi' roj so' ne rá ve' yo' gaa cuchí' nij yuvi nano' man roj so' ma'. Che'é dan quirí' nij yuvi man ma'an sí cu'naj Jasón do', man yo'ó nij tinúú ní' sí noco' man Jesucristó do', ne nucuj rii nij yuvi man nij so' ndaa rihaan nij sí uun chij rihaan chuman' yo' a. Gaa ne caguáj nij yuvi, cataj nij yuvi:

—Nij sí nihánj 'yaj natuná tucuaán naj rihaan yuvi man nu' caxra' rihaan chumii, tzaj ne nihánj me se ndaa chiháán ní' 'na' nij so' tirí' nij so' yaj nanj chuguanj. <sup>7</sup> Ne sí cu'naj Jasón nihánj me se taj ya'anj so' man roj so' adonj. Ne cunudanj nij so' ro', inanj se vaa na'vej rá sí cu'naj César qui'yaj yuvi 'yaj nij so' nanj á. 'O se tucuyón nij so' rihaan yuvi se vaa Jesucristó me yo'ó sí nicaj suun rey uun chij rihaan ní' nanj ei —taj nij yuvi israelitá, caguáj nij so', cuno nij sí uun chij rihaan chuman' Tesalónica yo' a.

<sup>8</sup> Dan me se cuyan ndo'o rá nij sí uun chij do', yo'ó nij yuvi ne chuman' yo' do', gaa cuno nij so' nana yo', <sup>9</sup> gaa ne cata' tu'va nij tuví' sí cu'naj Jasón se vaa se guun qui'yaj nij so' doj sayuun, ne ndaa cuchruj nij so' sa'anj, ne na'née nij sí uun chij yo' chrej man nij so' a.

*Nana nihánj taj xna'anj se vaa ca'mii natáj sí cu'naj Pabló ga Silas se nana Diose rihaan nij sí man chuman' Berea a*

<sup>10</sup> Dan me se maan orá rej nij güii yo' ca'née nij tinúú ní' sí man chuman' Tesalónica man sí cu'naj Pabló ga Silas ca'anj roj so' ndaa chuman' Berea a. Gaa ne cuchí' roj so', ne catúj roj so' rá ve' tucuyón nij yuvi israelitá se tucuanj Moisés a. <sup>11</sup> Ne nij

sí israelitá yanj chuman' Berea me se sa' doj vaa nimán nij so' rihaan nij sí israelitá yanj chuman' Tesalónica yo' a. 'O se aran' rá nij so' cunō nij so' se nana Diosē, ne daj a nij güii yanj ndo'o nayaa nij so' danj Diosē, che'é se guun rá nij so' xcaj nij so' cuentá sese ya ya cuyaan vaa se nana Pabló ga nana nō rihaan danj Diosē a. <sup>12</sup> Che'é dan que'ee ndo'o nij so' cuchumán rá ni'yaj man Jesucristó a. Ne nij sí yanj a'mii xna'ánj griego me se que'ee tuvi' nij so' chana ni'yanj nimán do', snó'o do', cuchumán rá ni'yaj man Jesucristó a.

<sup>13</sup> Dan me se xcaj nij sí israelitá yanj chuman' Tesalónica cuentá se vaa ndaa chuman' Berea nata' uún sí cu'naj Pabló se nana Diosē rihaan nij yuvij a. Che'é dan ca'anj nij so' chuman' Berea yo', ne ca'mii ne nij so' che'é Pabló, ne cuyanj rá nij sí man Berea ni'yaj nij so' man sí cu'naj Pabló ga Silas, qui'yaj nij sí man Tesalónica yo' a. <sup>14</sup> Gaa ne nu' ca'neé nij tinúú ní' man Pabló ca'anj so' ndaa tu'va na ya'anj, tzaj ne quináj sí cu'naj Silas do', sí cu'naj Timoteo do', chuman' Berea yo' a. <sup>15</sup> Ne ta'aj nij sí man Berea yo' me se ca'anj tacuachéé man Pabló, ne ca'anj nicaj nij so' man so' ndaa chuman' Atenas a. Gaa ne rqué Pabló nana rihaan nij sí man Berea nata' nij so' rihaan sí cu'naj Silas ga Timoteo se vaa cuaj ca'na' roj so' rihaan Pabló a. Gaa ne canicaj nij sí man Berea yo' quinan' nij so' chiháán nij so' a.

*Nana nihánj taj xna'anj che'é nij nana ca'mii natáj Pabló rihaan nij sí man chuman' Atenas a*

<sup>16</sup> Dan me se gaa na'vij Pabló ca'na' roj sí cu'naj Silas ga Timoteo chuman' Atenas, ne ve'ee ndo'o nimán Pabló gaa quene'en so' se vaa man ndo'o ya'anj qui'yaj ra'a nij sí man Atenas yo' rque chuman' yo', <sup>17</sup> ne che'é dan nanó ndo'o so' cuentó ga nij yuvij israelitá do', ga nij sí yanj aráj guee rihaan Diosē do', rá ve' tucu'yón nij so' se tucuanj Moisés a. Ne daj

a güii ca'anj so' yu'vee, ne nanó so' cuentó ga me ma'an sí chéé yu'vee yo' a. <sup>18</sup> Dan me se man ndo'o sí chruun yanj ne chuman' Atenas yo', ne ta'aj nij so' me sí tucu'yón se nana sí cu'naj Epicuro, ne yo'ó ta'aj nij so' cu'naj estoico a. Ne doj tuvi' nij so' nanó cuentó ga Pabló a. Dan me se ta'aj nij so' cataj:

—Me taj sí nihánj tu'va rma'an so' danj, rá soj ga —taj nij so', xná'anj nij so' man tuvi' nij so', ni'yaj nij so' man Pabló a.

Ne yo'ó ta'aj nij so' cataj:

—Sí nata' se nana ya'anj curuvi' naca me so' nanj á —taj yo'ó ta'aj nij yuvij, ese nata' Pabló se nana Jesucristó nana sa' rihaan nij so', ne nata' Pabló se vaa ca'vee cunu i'na' uún nij sí cavi' a.

<sup>19</sup> Dan me se ca'anj nicaj nij so' man Pabló ra' o' quij le'ej cu'naj Areópago, ne cataj nij so' rihaan Pabló:

—Qui'yáá so' se ndo'o cataj xna'anj so' rihaan núj daj vaa nij nana naca nana tucu'yón so' rihaan yuvij á. <sup>20</sup> 'O se caráya'anj ndo'o núj ta'aj nij nana ca'mii so' cuno núj, ne che'é dan me rá núj xcaj núj cuentá daj vaa tucuáán tucu'yón so' a —taj nij sí man Atenas rihaan sí cu'naj Pabló a.

<sup>21</sup> 'O se nij sí man chuman' Atenas do', nij sí 'na' aran' chuman' Atenas do', inan' uun rá nij so' nata' nij so' nana naca do', nari' nij so' nana naca do', nanj adonj.

<sup>22</sup> Dan me se canicun' Pabló tanu sca'núj nij so' ra' quij cu'naj Areópago, gaa ne cataj so' rihaan nij so':

—Cunō soj sij man chuman' Atenas nihánj ca'mij á. Aj ne'enj se vaa sij aran' ndo'o rá na'vij rihaan nij ya'anj me nij soj adonj. <sup>23</sup> 'O se gaa cachenj chuman' man soj, ne quene'én 'unj nij rej na'vij soj rihaan nij ya'anj noco' soj, ne quene'én 'unj yo' o' chraan altar, ne nana nō rihaan chraan altar yo' cataj, “Rej na'vij ní' rihaan ya'anj ne ne'en ní' man a”, taj nana nō rihaan chraan altar yo' a. Ne xa' 'unj, tzaj ne nihánj me se nata'

'unj rihaan nij soj che'é ma'an ya'anj yo' ya'anj na'víj soj rihaan, ya'anj ne ne'en soj man nanj adonj.

<sup>24</sup> "Dan me se Diose ro', me ya'anj qui'yaj nu' chumií do', nu' rasuun man rihaan chumií do', ne se ca'vee guun tucua so' ve' une' yuvií cane so' che'é se so' me sí 'nij ra'a nu' rej xta' nu' yo'óo nu' a. <sup>25</sup> 'O se so' me sí 'yaj vaa i'na' ní', ne so' me sí 'yaj naránj ní' nana, ne dan me se rque so' nu' rasuun achiin man ní' adonj. Ne che'é dan taj vaj rasuun achiin man so', ne se ca'vee racuíj yuvií man so' ma'. <sup>26</sup> Ne orún' snó'o qui'yaj so' asij rque ro', veé ton dan qui'yaj so' man daj a x'ne' nij yuvií, che'é rej cayáán nij yuvií rihaan nu' cachra' chumií adonj. Ne aj ne'en Diose me daj yo' cayáán 'o 'o x'ne' nij yuvií rihaan chumií, ne aj ne'en Diose me rej guun ran' to'óo 'o 'o x'ne' nij yuvií ei. <sup>27</sup> 'O se guun rá Diose se vaa xcaj nij yuvií cuentá che'é Diose ne nari' nij yuvií man Diose chuguanj. 'O se nuveé sij ne gan'ndo'o rihaan 'o 'o ní' me Diose ma'. <sup>28</sup> 'O se vaa i'na' ní', 'yaj so', ne chéé ní', 'yaj so', ne vaa ní' rihaan chumií nihánj, 'yaj so' adonj. 'O se ta'aj tuvi' nij soj sí chruun yanj cachrón nana nihánj rihaan yanj se vaa: "'O se ndaa ta'níí so' me ní' adonj", taj ta'aj tuvi' ma'an soj nanj ei. <sup>29</sup> Ne che'é se ta'nij Diose me ní' ro', che'é dan ne nó xcuún ní' guun rá ní' se vaa ase vaa Diose ro', danj vaa nij aga' oró míí titaa ní' do', nij aga' plata catzii titaa ní' do', nij yahij acó jí ní' do' ma'. 'O se inanjan rasuun avii raá ma'an ní' yuvií me nij rasuun vaa danj ei.

<sup>30</sup> "Dan me se asij rque me se ne qui'yaj Diose sayuun man nij sí na'víj rihaan aga' do', rihaan yahij do' ma'. 'O se ne ca'vee xcaj nij yuvií cuentá ma'. Tzaj ne yaj me se cataj xna'anj Diose rihaan nij yuvií man cunudanjan nij chuman' naj rihaan chumií se vaa canicaj nimán nij yuvií canoco' nij yuvií tucuaán sa' adonj. <sup>31</sup> Ne dan me se cachrón Diose 'o güii ca'ne' nica so' cacun'

che'é cunudanjan nij yuvií man rihaan chumií a. Ne aj cune' so' man 'o snó'o guun sí ca'ne' cacun' che'é yuvií a. Ne che'é se cunuu i'na' uún snó'o yo', qui'yaj Diose, gaa cavi' so', ne che'é dan no xcuún cunudanjan yuvií cuchuman rá nij yuvií se vaa veé ya snó'o yo' me so' adonj —taj Pabló rihaan nij sí man Atenas yo' a.

<sup>32</sup> Dan me se gaa cuno nij sí man Atenas nana se vaa cunuu i'na' uún 'o sí cavi', ne ta'aj nij so' ca'nga' nacoó, ne yo'ó ta'aj nij so' cataj:

—Ndaa yo'ó güii uún me se ca'na' núj cunó núj se nana so' nanj ei —taj yo'ó ta'aj nij sí man chuman' Atenas yo' a.

<sup>33</sup> Veé dan, ne curihanjan Pabló sca'núj nij so' a. <sup>34</sup> Tzaj ne doj nij yuvií guun tuvi' ga Pabló, ne cuchumán rá nij so' ni'yaj nij so' man Jesucristó a. Ne yo'ó so' me 'o sí uun chij cu'naj Dionisio, ne yo'ó no' me chana cu'naj Dámaris, ne vaa doj yuvií ga nij so' uún a.

## 18

*Nana nihánj taj xna'anj che'é suun qui'yaj suun Pabló chuman' Corinto a*

<sup>1</sup> Cachén doj, gaa ne cavii Pabló chuman' Atenas, ca'anjan so' ndaa chuman' Corinto a. <sup>2</sup> Tihaj yuun nari' tuvi' so' ga 'o sí israelitá cu'naj Aquila, ne xa' so', tzaj ne sij cavii rej cu'naj Ponto me so', ne gaa cayáán so' chuman' Romá, ne ca'ne' síí nicaj suun emperador cu'naj Claudio suun se vaa cavii cunudanjan nij yuvií israelitá chuman' Romá ca'anjan yaníj nij so' a. Che'é dan cavii so' ga nica so' chana cu'naj Priscila yo'óo nocoo cu'naj Italia, ne che'é dan sij ca'na' naca chuman' Corinto me roj so' a. Dan me se cuhi' Pabló rihaan roj so', <sup>3</sup> ne che'é se cyaan vaa suun 'yaj suun Pabló ga suun 'yaj suun roj so' ro', che'é dan caran' Pabló ga roj so', ne qui'yaj suun so' ga roj so' a. <sup>4</sup> Ne daj a nij güii cuetan' naránj rá nij yuvií israelitá me se ca'mii so' ga nij yuvií cunuu chre' rá ve' tucu'yón nij yuvií israelitá se tucuanjan Moisés, ne

cuchumán rá doj sí israelitá do', doj sí yanj a'mii xna'anj griego do', gaa cuno nij so' se nana so' a.

<sup>5</sup> Dan me se gaa cavii sí cu'naj Silas ga Timoteo estadó Macedonia ca'na' roj so' chuman' Corinto, ne yo'q ca'neé nimán Pabló nata' so' se nana Diose rihaan nij yuvij, ne inanj cataj xna'anj so' rihaan nij yuvij israelitá se vaa Jesucristó me sí ca'neé Diose tinanii man yuvij rihaan sayuun a. <sup>6</sup> Tzaj ne ca'mii canó tuvi' nij yuvij israelitá ga Pabló, ne quij ca'mii nij so' che'é Pabló a. Che'é dan tucuayuu so' yo'óo tachruu no rihaan sagan' so', gaa ne cataj so' rihaan nij yuvij a:

—Ma'an inanj soj me rá ca'anj rihaan ya'an nanj á. Ne tumé 'unj cacun' se vaa quiran' soj sayuun qui'yaj Diose ma'. Ne yaj me se rej rihaan nihánj me se ca'anj 'unj nata' 'unj se nana Diose rihaan nij sí yanj nanj á —taj Pabló rihaan nij so' a.

<sup>7</sup> Gaa ne cavii so' rej mán nij so', ne ca'anj so' ve' tucua' 'o sí cu'naj Titó Justo, ne so' ro', me 'o sí yanj ne 'o sí aráj guee rihaan Diose me so', ne ve' tucua' so' ro', ne rej x'nuj ve' tucu'yón nij yuvij israelitá se tucuanj Moisés a.

<sup>8</sup> Dan me se 'o sí cu'naj Crispo sí 'nij ra'a ve' tucu'yón nij yuvij israelitá se tucuanj Moisés ro', me 'o so', ne cuchumán rá nu' nij tucua' so' ni'yaj nij so' man Diose sij 'nij ra'a man ní' a. Gaa ne cuchi' nana rihaan nij sí man Corinto se vaa sí cu'naj Crispo me sí cuchumán rá ni'yaj man Diose sij 'nij ra'a man ní', ne che'é dan cuchumán rá uún que'ee nij so' ni'yaj nij so' man Jesucristó, ne cata' ne cunudanj nij so' a.

<sup>9</sup> Ne rej nij me se naqui'yaa Diose sij 'nij ra'a man ní' rihaan Pabló, ne cataj so' a:

—Se chuhu'ví so' ma'. Yo'q ca'mij so' se nanaj, ne se gaa dínj tu'vá so' ma'. <sup>10</sup> 'O se vaj 'unj ga so', ne taj vaj sí go' mán so' ne qui'yaj chi'ii mán so' ma'. 'O se man uxrá yuvij man chuman' nihánj canoco' manj adonj

—taj Diose sij 'nij ra'a man ní' rihaan Pabló a.

<sup>11</sup> Gaa ne dan me se quináj Pabló 'o yo' táá yanéé, tucu'yón so' se nana Diose rihaan nij sí man chuman' Corinto yo' a.

<sup>12</sup> Dan me se yo' dan me se sí cu'naj Galión me sí nicaj suun gobernador uun chij rihaan chuman' Corinto yo' a. Ne naxumaan yuvij israelitá, ne yo'q me nimán nij so' ni'yaj nij so' man Pabló, ne ca'anj nicaj nij so' man Pabló rihaan sí nicaj suun cu'naj Galión yo', che'é rej naqui'yaj cuu so' che'é Pabló a. <sup>13</sup> Gaa ne cataj nij so':

—Sí nihánj ro', 'yaj tanáj xco yuvij se tucuanj núj che'é suun na'víj nij yuvij rihaan Diose, ne ino doj na'víj nij yuvij rihaan Diose, 'yaj sí nihánj ei —taj nij yuvij israelitá yo', ni'yaj nij so' man Pabló a.

<sup>14</sup> Daj doj tzín' se cavii nana tu'va Pabló, tzaj ne ma'an sí cu'naj Galión me sí ca'mii rihaan nij yuvij israelitá yo', ne cataj so':

—Cuno soj sij israelitá ca'mij á. Sese vaa cacun' chi'ii qui'yaj sí nihánj, ne no xcúnj cunoj se vaa taj soj saj á. <sup>15</sup> Sese taj, gaa ne che'é inanj se nana soj do', che'é se tucuanj soj do', araa soj cacun' xráá so', gaa ne che'é dan ma'an soj no xcúun ca'ne' cacun' che'é so' nanj adonj. 'O se xa' 'unj nihánj, tzaj ne na'vej uxrá raj naqui'yaj cuu 'unj che'é rasuun vaa danj ma' —taj sí cu'naj Galión rihaan nij yuvij israelitá yo' a.

<sup>16</sup> Gaa ne quirii so' man cunudanj nij so' tucua' suun a. <sup>17</sup> Gaa ne quita'aa cunudanj nij yuvij man sí cu'naj Sóstenes sí 'nij ra'a man ve' tucu'yón nij so' se tucuanj Moisés, ne go' nij so' chruun xráá so' rihaan tucua' suun a. Tzaj ne ne rihun rá sí cu'naj Galión yo' gaa qui'yaj nij so' danj a ma'.

*Nana nihánj taj xna'anj se vaa nanicaj Pabló nan' so' chuman' Antioquia a*

<sup>18</sup> Dan me se guun que'ee doj güii guun raan Pabló ga nij tinúú ní' sí ne chuman' Corinto, gaa ne cataj so' se



vaa ca'anj so', ne cavii so' rque rihoo chéé rihaan na, ne ca'anj so' ndaa estadó cu'naj Siria, ne ca'anj chana cu'naj Priscila do', sí cu'naj Aquila do', ga so' a. Tzaj ne asino yaan caca caan nii raá Pabló, qui'yaj Pabló, gaa vaj nij so' chuman' Cencrea, che'é se aj cata' tu'va so' 'o nana rihaan Diose a. <sup>19</sup> Dan me se cuchii' nij so' chuman' Efeso, ne tanáj Pabló man roj so' chuman' yo' a. Gaa ne catúj ma'an so' rá ve' tucu'yón nij yuvii israelitá se tucuanj Moisés, ne ca'mii so' ga nij yuvii che'é se nana Diose a. <sup>20</sup> Ne cachín ni'yaj nij sí man chuman' Efeso se vaa guun raan so' doj chiháán nij so', tzaj ne ne ca'vej so' a. <sup>21</sup> Tzaj ne cataj so':

—Ca'anj 'unj nanj ei. Vaa che'é ndo'o canicún' 'unj 'o cha'anj canuú chuman' Jerusalén, tzaj ne sese Diose ca'vej, ne ndaa yuún xe ca'na' uún 'unj a —taj so', ne cavii so' rque rihoo chéé rihaan na, ne tanáj so' man chuman' Efeso yo' a.

<sup>22</sup> Dan me se ca'anj so' ndaa chuman' Cesarea, ne cavii so' ca'anj ni'yaj so' man x'ne' nij sí amán rá ni'yaj man Jesucristó yanj chuman' Jerusalén a. Gaa ne nanij so' ndaa chuman' Antioquía a. <sup>23</sup> Ne guun raan so' doj chuman' Antioquía, gaa ne ca'anj so' ndaa vaa naj 'o 'o chuman' naj estadó Galacia do', estadó Frigia do', ne nari' nucuj rá cunudanj nij sí tucu'yón se nana Jesucristó yanj nij chuman' yo', qui'yaj so' a.

*Nana nihánj taj xna'anj che'é sí cu'naj Apolos a*

<sup>24</sup> Dan me se vaa 'o sí israelitá cu'naj Apolos, ne sij cavii chuman' Alejandría me so', ne sij ve'é ndo'o a'mii me so', ne sa' uxrá nari' so' danj Diose a. Dan me se ca'anj so' ndaa chuman' Efeso a. <sup>25</sup> Ne aj nari' so' se tucuanj Diose sij 'nij ra'a man ní', ne guun ndo'o rá nimán so', ne che'é dan nica nata' so' ne tucu'yón so' se nana Jesucristó rihaan nij yuvii a. Tzaj ne ataa xcaj so' cuentá se vaa no xcúún

yuvii cata' ne yuvii che'é Jesucristó, ne inanj quene'en so' daj qui'yaj sí cu'naj Juan gaa cuta' ne Juan man yuvii a. <sup>26</sup> Dan me se guun che'e so' ve'é ca'mii natáj so' rá ve' tucu'yón nij yuvii israelitá man chuman' Efeso se tucuanj Moisés a. Ne cuno chana cu'naj Priscila do', sí cu'naj Aquila do', gaa ne nicaj tuvi' roj so' ga so', ne nica doj ne sa' doj tucu'yón roj so' se tucuanj Diose man Apolos a.

<sup>27</sup> Dan me se guun rá sí cu'naj Apolos cachén so' ndaa estadó Acaya, gaa ne doj a nari' nucuj so' qui'yaj nij tinúú ní' sí man chuman' Efeso, ne qui'yaj nij so' yanj cartá nayaa nij sí tucu'yón se nana Jesucristó man estadó Acaya, ne cataj nij so' se vaa ve'é nicaj tuvi' nij sí man Acaya ga sí cu'naj Apolos yo' a. Gaa ne gaa cuchii' sí cu'naj Apolos ndaa estadó Acaya, ne racuj ndo'o so' man nij tinúú ní' sí cuchumán rá ni'yaj man Jesucristó che'é se luj qui'yaj Diose a. <sup>28</sup> 'O se cunaj uxrá tihaan so' rihaan nij yuvii israelitá ne amán rá ni'yaj man Jesucristó se vaa taj danj Diose se vaa Jesucristó me sí ca'née Diose tinanii man yuvii rihaan sayuun, ne ca'mii canó tuvi' so' ga nij so' rej man ndo'o nij yuvii, ne qui'yaj canaán se nana sí cu'naj Apolos rihaan se nana nij sí israelitá yo' a.

## 19

*Nana nihánj taj xna'anj se vaa ca'na' Nimán Diose rihaan nij sí tucu'yón se nana Jesucristó yanj chuman' Efeso a*

<sup>1</sup> Dan me se gaa cayáán sí cu'naj Apolos chuman' Corinto, ne cachén Pabló rej xraj doj cuchii' so' chuman' Efeso, ne nari' so' doj sí tucu'yón se nana Jesucristó a. <sup>2</sup> Gaa ne xná'anj Pabló man nij so' a:

—Ne catúj Nimán Diose nimán nij soj gaa cuchumán rá soj ni'yaj soj man Jesucristó na' —taj Pabló, xná'anj so' man nij so' a.

Gaa ne cataj nij so':

—Taj ma'. 'O se a ne cunō nūj nana se vaa vaa 'o Nimán Diose a ma' —taj nij so' rihaan Pabló a.

<sup>3</sup> Gaa ne xná'anj Pabló man nij so' a:

—Ne me síi che'e cata' ne nij soj ga —taj so', xná'anj so' man nij so' a.

Gaa ne cataj nij so':

—'O se cata' ne nūj ndaa vaa cataj xna'anj síi cu'naj Juan nanj á —taj nij so' rihaan Pabló a.

<sup>4</sup> Gaa ne cataj Pabló rihaan nij so' a:

—Xa' Juan, tzaj ne cuta' ne so' man yuvii che'é yan canicaj nimán nij yuvii canoco' nij yuvii tucuáan sa' a. Ne cataj Juan rihaan nij yuvii se vaa síi ca'na' rej xco Juan ro', me síi no xcuún nij yuvii cuchuman rá nij so' ni'yaj nij so' man, ne síi ca'na' rej xco Juan ro', me Jesucristó a —taj Pabló rihaan nij síi ne chuman' Efeso a.

<sup>5</sup> Dan me se gaa cuno nij so' nana vaa danj, gaa ne cata' ne nij so' che'é Jesucristó sij 'nij ra'a man ní' a. <sup>6</sup> Gaa ne cuta' Pabló ra'a so' raaj nij so', ne catúj Nimán Diose nimán nij so', ne ca'mii nij so' xna'ánj naca, ne nata' nij so' nana rqué Diose rihaan ma'an nij so' nata' nij so' a. <sup>7</sup> Ne cunudanj nij snó'o me se quisij ya 'o chuvij nij so' ta' asuun a.

*Nana nihánj taj xna'anj se vaa ca'anj Pabló ca'mii so' ga yuvii man rá escuela' 'nij ra'a síi cu'naj Tiranno a*

<sup>8</sup> Gaa ne catúj Pabló rá ve' tucu'yón nij yuvii israelitá man chuman' Efeso se tucuanj Moisés, ne va'nuj yavii 'o rihaan inanj ca'mii so' ga nij so' che'é se me rá so' cuchuman rá nij so' nana che'é suun uun chij Diose nimán yuvii do', rihaan chumii nihánj vaa güii do' a. <sup>9</sup> Tzaj ne nichraj ndo'o rá ta'aj nij so', ne ne ca'vej rá nij so' cuchuman rá nij so' nana sa' yo' ma'. Gaa ne quij ca'mii nij so' che'é tucuáan nocó' ní' cuno cunudanj nij yuvii man rá ve' yo', gaa ne che'é dan tanáj Pabló man nij síi nichraj rá yo', ne ca'anj yanij nij síi tucu'yón se nana Jesucristó rihaan nij so', qui'yaj Pabló, ne ca'anj so' ve' escuela' 'nij ra'a 'o síi cu'naj Tiranno, ne daj a güii

ca'mii so' ga yuvii rá ve' escuela' yo' a. <sup>10</sup> Ne quisij vij ya yo' qui'yaj so' danj, ne che'é dan cunudanj nij síi israelitá ga nij síi yanij a'mii xna'ánj griego yanj estadó Asia xcaj cuentá che'é se nana Jesucristó sij 'nij ra'a man ní' a.

*Nana nihánj taj xna'anj se vaa quiran' nij ta'nii síi cu'naj Esceva sayuun, qui'yaj 'o nana chree a*

<sup>11</sup> Dan me se guun nucuaj Pabló qui'yaj so' suun sa' nocoo, qui'yaj Diose, <sup>12</sup> ne ndaa nicaj nii se vitó Pabló do', yatzij numii catuun Pabló do', ca'anj nii cuta' nii raaj nij síi ran', ne nahuun sa' nij síi ran', ne curihanj nana chree nimán nij síi ran' yo', qui'yaj Diose a. <sup>13</sup> Ne vaa doj síi israelitá chée canó chuman', ne nij so' me síi uta' ra'a raaj síi ran' ne urihanj nana chree nimán nij síi ran' yo', 'yaj nij so' a. Ne cata' tu'va nij so' se chuvii Jesucristó sij 'nij ra'a man ní' se vaa guun rá nij so' raaj so' man nij so' qui'yaj nij so' ndaa vaa 'yaj Pabló a. Dan me se cataj nij so' rihaan nana chree a: “Nihánj me se a'ne' 'unj suun rihaan nij soj nana chree se vaa curihanj soj nimán síi ran' nihánj che'é Jesucristó síi a'mii natáj síi cu'naj Pabló che'é á”, taj nij so' a. <sup>14</sup> Ne vaa chij ta'nii 'o síi israelitá cu'naj Esceva, ne xrej ata' suun nocoo doj me so', ne chij nij ta'nii so' ro', ca'mii danj rihaan 'o nana chree nuu nimán 'o so' a. <sup>15</sup> Gaa ne nana chree yo' ro', ca'mii rihaan nij so', ne cataj yo':

—Ne 'unj me se ne'enj man Jesucristó, ne ne'enj daj sij me Pabló a. Tzaj ne soj me se ne ne'en uxrá 'unj man soj a ma' —taj nana chree yo' rihaan chij nij so' a.

<sup>16</sup> Gaa ne síi nuu nana chree yo' nimán ro', güej so', ne tuguaj tuvi' so' ga nij so', ne nucuaj so' doj rihaan nij so', ne qui'yaj canaán so' man cunu' chij nij so' a. Dan me se cunanj nij so', curihanj nij so' rá ve' yo', ne cánj uun vaa nij so', ne quiran' ndo'o nij so' sayuun, qui'yaj síi nuu nana chree nimán yo' a.

17 Gaa ne xcaj cunudanj nij yuviij israelitá ga nij yuviij yanij a'mii xna'ánj griego yanj chuman' Efeso yo' cuentá se vaa quiran' chij nij so', ne che'é dan cuchu'vi' ndo'o cunudanj nij so', ne cataj nij so' se vaa sa' uxrá vaa Jesucristó sij 'nij ra'a man ní' a. 18 Ne que'ee nij síi cuchumán rá ni'yaj man Jesucristó me se naxra' tu'va nij so', ne nata' ya nij so' che'é cacun' qui'yaj nij so' a. 19 Ne que'ee nij síi qui'yaj chree gaa rque doj ro', naqui'yaj chre' nij so' danj nij so' yanj libró no nana chree, ne caxrij ya'an nij so' man nij yanj yo', ni'yaj cunudanj nij yuviij a. Gaa ne narii nij so' cuentá me daj sa'anj nó nij yanj yo', ne quisij vij chihaa chi' mij sa'anj platá catzii nó nij yanj tucuacaa nij so' a. 20 Veé dan me se cha'nuu uxrá se nana Jesucristó sij 'nij ra'a man ní', ne nari' nucaj doj se nana so' a.

*Nana nihánj taj xna'anj se vaa ca'maan rá nij síi 'yaj ya'anj aga' yanj chuman' Efeso ni'yaj nij so' man Pabló a*

21 Veé dan gaa ne ca'née nimán Pabló cachén so' estadó cu'naj Macedonia ga Acaya ne ca'anj so' ndaa chuman' Jerusalén, ne cataj so' se vaa asa' quisij ca'anj so' ndaa chuman' Jerusalén, ne no xcúún so' ca'anj ni'yaj so' ndaa chuman' Romá, taj so' a. 22 Gaa ne ca'née so' vij tuvi' nij síi 'yaj suun ga so' catuu roj so' rej Macedonia a. Dan me se síi cu'naj Timoteo do', síi cu'naj Erasto do', me roj síi ca'née so', ne ma'an so' guun raan doj güii estadó Asia a. 23 Ne güii dan me se guun ndo'o sayuun che'é se tucuanj ní' sij nocó' man Jesucristó a. 24 Dan me se vaa 'o síi cu'naj Demetrio ne síi 'yaj suun aga' me so', ne nij tuvi' nij so' nicaj aga' platá catzii ne 'yaj nij so' nuvií le'ej nii, ne ase vaa ma'an nuvií na'vij yuviij rihaan ya'anj chana cu'naj Diana vaa yo' a. Ne 'yaj canaán ndo'o nij so' sa'anj a. 25 Dan me se canacúún síi cu'naj Demetrio man cunudanj nij síi 'yaj suun ase vaa suun 'yaj suun

ma'an so' ne chuman' Efeso yo', ne ca'mii natáj so' rihaan nij so', cataj so':

—Cuno nij soj nana ca'mij rihaan soj, tinuj. Dan me se aj ne'en soj se vaa che'é suun 'yaj suun ní' ro', che'é dan 'yaj canaán ndo'o ní' sa'anj á. 26 Ne nihánj me se aj ne'en ní' daj 'yaj síi cu'naj Pabló yo', ne ca'na' nana rihaan ní' se vaa vaj so' nata' so' se nana so' se vaa xa' ya'anj 'yaj yuviij, tzaj ne nuveé ya'anj ya me ya'anj vaa danj ma'. Ne nuveé inanj chuman' Efeso nihánj me rej tu'va so' danj ma'. Tananj vaj so' ndaa nu' estadó Asia nihánj ta' asuun, ne cuchumán rá que'ee ndo'o yuviij man estadó Asia nihánj cuno nij so' se nana Pabló, ne tanáj nij so' se tucuanj ní' qui'yaj Pabló adonj. 27 Dan me se xraj ne vaa güii nachri' yuviij ni'yaj yuviij se suun ní', gaa ne dan me se guun rá uún nij yuviij se vaa taj se gún' nuvií na'vij ní' rihaan ya'anj chana sa' ndo'o cu'naj Diana a ma'. Ne cataj nij yuviij se vaa nuveé ya'anj sa' me no' ma'. Ne xa' no', tzaj ne nu' ní' sij man estadó Asia nihánj do', ndaa yuviij man rihaan nu' chumij do', na'vij rihaan no' ei —taj síi cu'naj Demetrio cuno nij tuvi' so' a.

28 Dan me se gaa cuno nij so' se nana Demetrio, ne cuyanj uxrá rá nij so', ne caguáj nij so', cataj nij so':

—Guee uxrá Diana ta'anj ní' sij man Efeso ei —taj nij so', caguáj nij so' a.

29 Gaa ne yo'o nachej raaj cunudanj nij yuviij man chuman' Efeso yo', ne quita'aa nij yuviij man síi cu'naj Gayo ga síi cu'naj Aristarco che'é se sij chée ga Pabló me roj so', ne sij cavii estadó Macedonia me roj so' a. Dan me se nicaj cunudanj nij yuviij man roj so', ca'anj nij yuviij, ne cunánj nij so' catúj nij so' rej estadió nuu chre' que'ee ndo'o yuviij a. 30 Ne guun rá Pabló catuu so' rej man nij yuviij, tzaj ne ne ca'vej rá yo'ó nij síi tucuyón se nana Jesucristó ca'anj so', ne ne ca'vee catuu Pabló rej yo' qui'yaj tuvi' so' a ma'. 31 Ne ta'aj nij síi uun chij

rihaan nu' estadó Asia ro', me tuvi' Pabló, ne ca'neé nij so' nana rihaan Pabló se vaa daj chihaa míj se guun catuu Pabló rej cunuu chre' nij yuvii a.

<sup>32</sup> Dan me se ino' doj vaa nana caguáj 'o 'o ta'aj nij yuvii, che'é se nachej se nana nij so' a. Ne me doj uxrá doj nij so' ne ne'en daj me che'é cunuu chre' nij so' ma'. <sup>33</sup> Dan me se tiguíj ra'a nii man síi cu'naj Alejandro, ne canicun' so' rihaan nij yuvii, qui'yaj nij yuvii israelitá, ne guun rá ta'aj nij yuvii se vaa ca'mii Alejandro rihaan nij so' a. Gaa ne tucunó ra'a so' rihaan nij yuvii se vaa dínj gaa tu'va nij yuvii, gaa ne ca'vee ca'mii nacaj so' rihaan chuman' a. <sup>34</sup> Tzaj ne xcaj nij yuvii cuentá se vaa sij israelitá me síi canicun' rihaan nij so', ne che'é dan yo'o caguáj cunudanj nij yuvii, cataj nij so':

—Guee uxrá Diana ta'anj ní' sij man Efeso ei —taj taran' nij yuvii, ne cunu' vij ya orá caguáj nij so' danj a.

<sup>35</sup> Ndaa síj, gaa ne ca'ne' rá nij yuvii caguáj nij so', qui'yaj síi uta' yanj tucua' suun, ne cataj ma'an so' rihaan nij yuvii a:

—Cuno' soj sij man chuman' Efeso ca'mij á. Ya ya cunudanj yuvii man rihaan chumii ne'en se vaa chuman' Efeso nihánj me chuman' na'víj rihaan ya'anj guee cu'naj Diana ga yahij quini' rej xta' cuyaan vaa ga no' adonj. <sup>36</sup> Che'é se ya vaa nu' nana nihánj ro', che'é dan no' xcúun nij soj dínj cumán soj, ne xcaj soj cuentá, ne se guun qui'yaj soj a doj se nij ma'. <sup>37</sup> 'Q se ca'na' roj snó'o nihánj, qui'yaj soj, ne nuveé sij qui'yaj se nij rque nuvií me roj so', ne nuveé sij ca'mii nana nij che'é ya'anj na'víj ní' rihaan me roj so' ma'. <sup>38</sup> Dan me se xa' nij tuvi' síi cu'naj Demetrio, tzaj ne sese me rá nij tuvi' nij so' cuta' nij so' cacun' xráá 'o yuvii, ne vaa ya'núj rihaan nij so' ca'anj nij so' rihaan cuese, ne ca'vee cuta' nij so' cacun' xráá tuvi' nij so' nanj á. <sup>39</sup> Ne sese me rá soj naqui'yaj cuu soj doj che'é yo'ó rasuun, ne güii nuu chre'

ní' ndaa vaa tucuaán noco' ní' ro', güii dan me ca'vee qui'yaj soj danj ei. <sup>40</sup> 'Q se nihánj me se ca'vee cuta' nii cacun' xráá ní' se vaa qui'yaj rma'an ní' sayuun cuan', ne se guun nucuj ní' cataj xna'anj ní' me che'é me ca'na' ní' ne caguáj ndo'o ní' nihánj ma' —taj síi uta' yanj tucua' suun rihaan nij yuvii, <sup>41</sup> gaa ne na'neé so' chrej man taran' nij so' a.

## 20

*Nana nihánj taj xna'anj se vaa ca'anj Pabló estadó cu'naj Macedonia ga Grecia a*

<sup>1</sup> Dan me se gaa cha'nuu nij yuvii yo', gaa ne canacúun Pabló man nij síi tucuyón se nana Jesucristó se vaa cunuu chre' nij so' ga so', ne nago' so' chrej nucuj man nij so' a. Gaa ne quita'aa so' ra'a cunudanj nij so', ne cataj so' se vaa ca'anj so', ne veé dan cavii so' ne ca'anj so' ndaa estadó Macedonia a. <sup>2</sup> Dan me se cachén so' nu' estadó Macedonia yo', ne nago' ndo'o so' chrej nucuj man nij síi noco' man Jesucristó ne chuman' yo', gaa ne ca'anj so' ndaa estadó cu'naj Grecia a. <sup>3</sup> Dan me se quisíj va'núj yavii guun raan so' estadó Grecia yo', gaa ne guun rá so' cavii so' rque rihoo chéé rihaan na ne ca'anj so' estadó cu'naj Siria, tzaj ne xcaj so' cuentá se vaa guun rá nij yuvii israelitá qui'yaj nij so' sayuun man so', ne che'é dan ca'neé nimán so' asino yaan cachee tacoj so' cachén so' sca'núj estadó Macedonia gaa ne canicaj so' ndaa estadó Siria a. <sup>4</sup> Ne yo'o tuvi' nij síi cachéé ga Pabló ro', me síi cu'naj Sópater, ne ta'níi síi cu'naj Piro me so', ne síi cavii chuman' Berea me so' a. Ne yavíj tuvi' nij so' me síi cavii chuman' Tesalónica, ne Aristarco do', Segundo do', cu'naj roj so' a. Ne yo'ó so' me síi cu'naj Gayo, ne síi cavii chuman' Derbe me so' a. Ne vaa síi cu'naj Timoteo, ne yavíj tuvi' nij so' me síi cavii estadó Asia, ne Tíquico do', Trófimo do', cu'naj roj so' a. <sup>5</sup> Dan me se guun yaan nij so' rihaan núj, ca'anj nij so' chuman' Troas, gaa ne na'víj



nij so' man núj rej yo' a. <sup>6</sup> Gaa ne gaa cachén cha'anj chá nij yuvií israelitá chraa yo'óo trigó, ne cavii núj 'o rihoo chéé rihaan na, ne cavii núj chuman' Filipos, ca'anj núj, ne cachén 'un' güii, gaa ne cuchí' núj rihaan nij so' chuman' Troas yo' a. Gaa ne guun raan núj yo'óo chíj güii chuman' yo' a.

*Nana nihánj taj xna'anj se vaa cunuu i'na' uún 'o síi cavi', qui'yaj Pabló a*

<sup>7</sup> Dan me se güii cotungó me se gaa cunuu chre' taran' núj cuxra' ta'aj núj rachrúún, ne ca'mii natáj Pabló nana rihaan yo'óo nij tinúú ní' a. 'O se guun rá so' cavii so' ranga' yo'óo güii ca'anj so' níchrej, ne che'é dan yo'óo ca'mii so' ndaa guun ta'aj yan' a. <sup>8</sup> Ne ve' nata' rej nuu chre' nij so' me se man ndo'o aga' ya'an chuguun rá ve' yo' a. <sup>9</sup> Dan me se táá 'o síi tachruu cu'naj Eutico 'o ta'yaa le'ej, ne che'é se xcaan ndo'o ca'mii Pabló, gaa ne che'é dan ca'na' ndo'o nej rihaan Eutico, ne yuun che'e cotoj so', ne quiniij so' ca'anj so' rej taj xe' a. Dan me se ndaa rej nata' va'núj raá ve' táá so' gaa quiniij so' a. Gaa ne naniij yo'óo nij so' rihaan yo'óo, ne naxcaj nij so' man so', tzaj ne aj cavi' un' so' nanj á. <sup>10</sup> Gaa ne naniij Pabló, ne ca'anj quinaj Pabló rihaan nee man síi cu'naj Eutico yo', ne na'yaan Pabló man so', ne cataj Pabló rihaan yo'óo nij so' a:

—Se kuchu'vi' soj ma'. 'O se vaa i'na' so' ei —taj Pabló rihaan nij so' a.

<sup>11</sup> Gaa ne cavii uún Pabló ga yo'óo nij so' rá ve' nata' yo', ne cuxra' ta'aj so' rachrúún chá nij so', ne dan me se gaa quisíj chá nij so', gaa ne ca'mii natáj so' doj rihaan nij so' ndaa se quisíj güii a. Gaa ne curihañj Pabló, ca'anj so' a. <sup>12</sup> Dan me se cunuu i'na' uún xnii quiniij, ne ca'anj nicañj nii man so', ne guun xej ndo'o nimán taran' nij so' a.

*Nana nihánj taj xna'anj se vaa cavii nij tuvi' Pabló chuman' Troas, ne ca'anj nij so' ndaa chuman' Mileto a*

<sup>13</sup> Dan me se cavii núj rque rihoo chéé rihaan na, ne táá yaan núj rihaan Pabló, ca'anj núj chuman' cu'naj Asón a. 'O se guun rá Pabló cachee tacoj so' ca'anj so' chuman' Asón, ne che'é dan guun ya ca'mii Pabló ga núj se vaa nari' tuvi' núj ga so' chuman' Asón ne ca'anj taran' núj a. <sup>14</sup> Dan me se gaa nari' tuvi' núj ga Pabló chuman' Asón, ne cavii so' rque rihoo ga núj, ne ca'anj taran' núj ndaa chuman' Mitilene a. <sup>15</sup> Gaa ne cavii rihoo chuman' Mitilene, qui'yaj núj, ne yo'óo güii me se cachén núj nichrun' rej naj chuman' cu'naj Quío a. Ne yo'óo güii uún me se cuchí' núj ndaa rej cu'naj Samos, ne yo'óo güii uún me se ca'anj núj ndaa chuman' cu'naj Mileto a. <sup>16</sup> 'O se guun ya rá Pabló se vaa se cachén so' chuman' Efeso, che'é se na'vej rá so' guun raan so' estadó Asia ma'. Tanañj guun rá so' cuchí' ra'yanj so' chuman' Jerusalén che'é cha'anj Pentecostés canuû a.

*Nana nihánj taj xna'anj daj ca'mii Pabló ga nij síi chíj nicañj yu'unj man x'ne' nij síi cuchumán rá ni'yaj man Jesucristó yanj chuman' Efeso a*

<sup>17</sup> Dan me se gaa caran' Pabló chuman' Mileto, ne ca'neé so' nana rihaan nij síi chíj nicañj yu'unj man x'ne' nij yuvií cuchumán rá ni'yaj man Jesucristó yanj chuman' Efeso se vaa ca'na' nij so' rihaan so' a. <sup>18</sup> Dan me se gaa ca'na' nij so' rihaan Pabló, ne cataj Pabló rihaan nij so' a:

—Aj ne'en nij soj daj vaa 'unj daj a güii canej ga soj asij naca ca'ná' 'unj estadó Asia nihánj ndaa cuano a. <sup>19</sup> 'O vaa nica' nimán 'unj nuu 'unj rihaan Diöse sij 'nij ra'a man ní', ne ne'en soj daj vaa ta'veé 'unj, ne daj vaa quirán' 'unj sayuun che'é se nuchruj raá nij síi israelitá qui'yaj nij so' sayuun manj a. <sup>20</sup> Dan me se ne a'ne' rá 'unj ga suun natá' 'unj rihaan soj nu' nana qui'yaj cavii sa' soj doj, ne tucu'yón 'unj nana yo' rihaan soj rej cuno que'ee yuvií ca'mij do', ndaa rá ve' tucua' ma'an soj do', tucu'yonj man soj a. <sup>21</sup> Ne 'o xraan inañj

cataj xna'anj 'unj rihaan nij yuvij israelitá do', rihaan nij yuvij yaníj a'mii xna'ánj griego do', se vaa no xcúun nij so' canicaj nimán nij so' canoco' nij so' man Diose ne cuchuman rá nij so' ni'yaj nij so' man Jesucristó sij 'nij ra'a man ní' a.

22 "Ne nihánj me se guun ya raj se vaa no xcúnj ca'anj 'unj chuman' Jerusalén, qui'yaj Nimán Diose, tzaj ne ne ne'enj daj quiranj sese cuchij yo' ma'. 23 Tzaj ne ne'én 'unj se vaa me ma'an chuman' vaj 'unj, ne Nimán Diose 'o xraan inanj taj xna'anj rihaan 'unj se vaa vaa güii, ne caxrii nii taga' manj ne qui'yaj nii sayuun manj nanj adonj. 24 Tzaj ne a doj ne chu'ví' 'unj sese ndaa ticavi' nii mán 'unj rihaan chumii nihánj a ma'. Tzaj ne ve'é inanj me raj tisíj suun ca'ne' Jesucristó sij 'nij ra'a man ní' rihanj, ne che'é dan 'o xraan inanj taj xna'anj 'unj nana sa' rihaan yuvij che'é se luj qui'yaj Diose che'é taran' ní' a. 25 Ne nihánj me se ne'én 'unj se vaa nij soj sij cuno nana ca'mii natáj 'unj che'é suun uun chij Diose nimán yuvij do', rihaan chumii nihánj vaa güii do', a 'o soj se quene'en uún manj daj chihaa míj a ma'. 26 Che'é dan me cuano yaj me se cataj yá 'unj rihaan soj se vaa nuveé 'unj me síi tumé cacun' sese ca'anj ni'ya 'o tuvi' soj rihaan Diose ma'. 27 'O se ne a'ne' rá 'unj ga suun taj xna'anj 'unj rihaan cunudanj soj nu' se vaa me rá Diose cunō soj ma'.

28 "Dan me se ase vaa tumé yuvij man daán yuvij matzinj ro', danj qui'yaj soj, tumé soj man ma'an soj do', man x'ne' nij síi amán rá ni'yaj man Jesucristó do' á. Dan me se Nimán Diose me síi cune' man soj nicaj yu'unj soj man x'ne' nij síi amán rá ni'yaj man Jesucristó a. Ne dan me se quiránj Jesucristó man cunudanj nij síi noco' x'ne' yo' che'é ton cavii man ma'an so' adonj. 29 Dan me se ne'enj se vaa asa' ca'anj 'unj, ne catuū síi chí'ii sca'núj soj, ne ase vaa xca'yanj ca'nu' yuvaa ro', danj gaa nij síi chí'ii yo', ne se caráj x'naa nij so'

man nij tinúú ní' nij síi noco' man Jesucristó, ne qui'yaj ndo'o nij síi chí'ii yo' sayuun man nij so' a. 30 Ne ndaa tuvi' ma'an ya soj me síi guun che'e tuguáj nij so' nana ya, che'é se guun rá nij so' canoco' nij síi tucu'yón se nana Jesucristó man ma'an nij so' a. 31 Che'é dan yo'o ni'yaj soj, ne xcaj soj cuentá á. 'O inanj nanuj rá soj se vaa rque va'nuj ya yo' me se ne ca'ne' raj ga suun narqué chrej nucuaj man 'o 'o nij soj nuvii nigan' ma'. Ne ndaa ta'veé 'unj che'é soj adonj.

32 "Ne cuano nihánj me se nucuaj rá 'unj man ma'an Diose se vaa tumé Diose man soj, ne nucuaj rá 'unj man se nana Diose se vaa cunō soj nana yo' ne ca'vee qui'yaj ndo'o Diose se luj che'é soj a. Dan me se sa' doj canoco' soj man Diose, qui'yaj se nana Diose yo', ne guun tuvi' soj ga cunudanj yo'ó nij síi cunuu sa' rihaan Diose, ne ca'vee quirí' soj xna'anj ni'yaj cata' tu'va Diose gaa rque adonj.

33 "Dan me se ne sij uun ne rá guun si'yaj si'yaj yo'ó yuvij, se aga' platá catzii do', se aga' oró míi do', se yatzíj sa' do', mé 'unj ma'. 34 Ne aj ne'en ma'an nij soj se vaa ma'anj ra'aj nihánj qui'yaj suun che'é rej ca'vee quirí' 'unj nij rasuun achiin manj do', achiin man nij síi chéé gaj do' a. 35 Cunudanj qui'yaj suun 'unj, che'é se guun raj xcaj soj cuentá se vaa no xcúun soj qui'yaj suun ma'an soj, che'é rej ca'vee racuúj soj man tinúú ní' síi achiin rasuun man a. Ne yo'o cunuú rá soj nana nihánj nana ca'mii ma'an Jesucristó sij 'nij ra'a man ní' a: "Síi rqué rasuun rihaan tuvi' ro', uun niha' rá so' doj rihaan síi ri' rasuun yo' ra'a tuvi' a", taj síi 'nij ra'a man ní' a —taj Pabló rihaan nij síi chij nicaj yu'unj man x'ne' nij síi cuchumán rá ni'yaj man Jesucristó yanj chuman' Efeso a.

36 Dan me se gaa quisíj ca'mii Pabló nu' nana yo', gaa ne canicun' ruj so' ga nij so', ne cachín ni'yaj Pabló rihaan Diose ga taran' nij so' a. 37 Gaa ne ta'vee uxrá cunudanj nij so', ne na'yaan nij so' man Pabló, ne cachrón

tu'va nij so' xruu Pabló a. <sup>38</sup> 'O se quinano doj rá nij so' che'é se nana Pabló nana se vaa daj chihaa mǐj se quene'en uún nij so' man Pabló ma'. Gaa ne ca'anj tanáj nij so' man Pabló ndaa rej cavii so' rque rihoo chée rihaan na a.

## 21

### *Nana nihánj taj xna'anj daj guun gaa ca'anj Pabló ndaa chuman' Jerusalén a*

<sup>1</sup> Dan me se gaa tanáj xcō nǐj man nij síi man chuman' Efeso, ne ca'anj nǐj vaj nǐj rque rihoo, ne yo'ō chrej ca'anj nǐj, cuchi' nǐj rej cu'naj Cos, ne yo'ō güii me se cuchi' nǐj ndaa rej cu'naj Rodas, ne ca'anj uún nǐj, cuchi' nǐj ndaa chuman' cu'naj Pátara a. <sup>2</sup> Gaa ne nari' nǐj yo'ō rihoo ca'anj ndaa rej cu'naj Fenicia a. Gaa ne cavii nǐj rque rihoo, ne ca'anj nǐj a. <sup>3</sup> Gaa ne quene'en nǐj yo'óo taj rihaan na ya'anj cu'naj Chipre, ne tanáj xcō nǐj Chipre rej nichruun nǐj, ne cachén nǐj ca'anj nǐj ndaa estadó Siria a. Dan me se cuchi' nǐj chuman' Tiro, ne 'o se yo' me rej guun rá nij síi tumé rihoo tucuayuu nij so' cargá man rque rihoo rihaan yo'óo yo' a.

<sup>4</sup> Dan me se nano' nǐj man nij síi tucu'yón se nana Jesucristó yanj chuman' Tiro yo', ne nari' nǐj man nij so', ne chij güii caran' nǐj chuman' yo' a. Dan me se gaa nari' tuvi' nǐj, ne dan me se nata' nij so' nana rqué Nimán Diose rihaan nij so' rihaan Pabló se vaa se guun ca'anj Pabló chuman' Jerusalén a. <sup>5</sup> Dan me se gaa quisij chij güii yo', ne curihanj nǐj ca'anj nǐj rej taj rihoo rihaan na, ne cachée cunudanj nij tucua nij síi tucu'yón se nana Jesucristó ga nǐj ndaa se cuchi' nǐj tu'va chuman' a. Gaa ne canicun' ruj nǐj rihaan yo'óo chruu naj tu'va na ya'anj rej yo', ne cachín ni'yaj nǐj rihaan Diose, <sup>6</sup> ne cataj nǐj rihaan tuvi' nǐj se vaa ca'anj nǐj, ne dan me se cavii nǐj rque rihoo, ne canicaj nij so' quinan' nij so' tucua nij so' a.

<sup>7</sup> Dan me se tanáj nǐj chuman' Tiro yo', ne ca'anj uún nǐj rque rihoo, ne cuchi' nǐj ndaa chuman' cu'naj Tolemaida, ne nanó nǐj cuentó ga nij tinúú ní' síi yanj chuman' yo', ne quináj nǐj orún' güii ga nij so' a. <sup>8</sup> Ne yo'ó güii me se cavii uún nǐj rque rihoo ga Pabló, ca'anj nǐj, ne cuchi' nǐj chuman' Cesarea, gaa ne catúj nǐj ndaa chuman' Cesarea, ne ca'anj nǐj ve' tucua síi cu'naj Felipé síi nata' se nana Diose nana sa' rihaan yuvii a. Ne so' ro', me 'o tuvi' chij nij síi rqué se chá rihaan nij chana cavi' nica yanj chuman' Jerusalén gaa rque doj a. Ne caran' nǐj tucua so' a. <sup>9</sup> Ne vaa ca'anj ta'níi so' chana yaan, ne ca'anj nij no' me níi nata' nana rqué Diose rihaan a. <sup>10</sup> Dan me se gaa guun raan nǐj que'ee güii tucua síi cu'naj Felipé, ne nanij 'o síi cavii estadó Judea, ne síi nata' nana rqué Diose rihaan me so', ne Agabo cu'naj so' a. <sup>11</sup> Dan me se ca'na' so' rihaan nǐj, ne nicaj so' marque 'nij catuun Pabló, numij so' tacóo Pabló do', ra'a Pabló do' a. Gaa ne cataj so':

—Síi si'yaj yatzij nihánj me se ase vaa qui'yáa 'unj cuano nihánj ro', danj gaa qui'yaj nij síi israelitá man chuman' Jerusalén, numij nij so' man so', ne tacuachén nij so' man so' ra'a nij síi yanij adonj —taj síi cu'naj Agabo yo' a.

<sup>12</sup> Dan me se gaa cuno nǐj nana yo', ne rquee uxrá nǐj ga nij síi yanj chuman' Cesarea yo' rihaan Pabló se vaa se cavii so' ca'anj so' ndaa chuman' Jerusalén ma'. <sup>13</sup> Gaa ne cataj Pabló:

—Taj che'é ta'vee soj ne quinano rá 'unj qui'yaj soj ma'. 'O se 'unj nihánj me se a'vej raj numij nii manj ne ndaa ticavi' nii manj rej Jerusalén che'é se síi nata' che'é Jesucristó sij 'nij ra'a man ní' mej chuguanj —taj Pabló rihaan nij so' a.

<sup>14</sup> Ne taj se qui'yá' cuno so' se nana nǐj a ma'. Che'é dan ca'ne' rá nǐj, ne cataj nǐj:

—Qui'yaj Diose sij 'nij ra'a man ní' ndaa vaa me rá ma'an so' qui'yaj so' á

—taj núj a.

<sup>15</sup> Dan me se quisíj caran' núj chuman' Cesarea yo', gaa ne qui'yaj chuvii núj, ne cavii núj ca'anj núj ndaa chuman' Jerusalén a. <sup>16</sup> Ne chéé ta'aj nij síi tucu'yón se nana Jesucristó yanj chuman' Cesarea ga núj, ne táa yaan nij so' rihaan núj ca'anj núj ve' tucua' 'o síi cu'naj Mnasón, caran' núj a. Ne síi cu'naj Mnasón me se sij cavii yo'óo taj rihaan na ya'anj cu'naj Chipre me so', ne aj quisíj que'ee yo' tucu'yón so' se nana Jesucristó a.

*Nana nihánj taj xna'anj se vaa cuchi' Pabló chuman' Jesusalén a.*

<sup>17</sup> Dan me se gaa cuchi' núj chuman' Jerusalén, ne guun niha' ndo'o rá nij tinúú ní' síi man Jerusalén nano nij so' cuentó ga núj a. <sup>18</sup> Ne yo'ó güii me se ca'anj ni'yaj núj ga Pabló man síi cu'naj Santiagó ne catúj núj rque 'o ve' ne so', ne nari' chre' núj man nu' nij síi chij nicaj yu'unj man nij yuvii cuchumán rá ni'yaj man Jesucristó ga Santiagó a. <sup>19</sup> Dan me se ve'é ca'mii sa' taran' núj, gaa ne cataj xna'anj Pabló rihaan nij síi chij nuu chre' ga Santiagó ndaa 'o 'o se vaa qui'yaj Diose ga nij síi yaníj gaa nata' Pabló se nana Diose rihaan nij síi yaníj yo' a. <sup>20</sup> Ne gaa cuno nij síi chij se nana Pabló, ne cataj nij so' se vaa sa' uxrá qui'yaj Diose ga nij síi yaníj a. Gaa ne cataj nij tuví' Santiagó rihaan Pabló a:

—Aj ne'én so' se vaa que'ee míj tuví' ní' sij israelitá amán rá ni'yaj man Jesucristó, tinuj. Ne nij so' ro', me síi yanj uxrá qui'yaj nu' ndaa vaa taj se tucuanj Moisés a. <sup>21</sup> Ne cuchi' nana ne rihaan nij so' se vaa tucu'yón so' man cunudanj nij yuvii israelitá yanj chiháan nij síi yaníj se vaa tanáj xco nij so' se nana Moisés, ne cataj so' se vaa ca'ne' rá nij so' ga suun uta' ta'nga' man ta'níi do', ga suun noco' se tucuanj Moisés do' a. <sup>22</sup> Me se no xcúún ní' qui'yaj ní', rá so' ga. 'O se ya cunuu chre' yuvii gaa xcaj cunudanj

nij so' cuentá se vaa ca'ná' so' nihánj adonj.

<sup>23</sup> "Che'é dan me rá núj qui'yáa so' ndaa vaa cataj núj rihaan so' á. Dan me se vaa ca'anj tinúú ní', ne aj cata' tu'va ma'an nij so' rihaan Diose che'é 'o rasuun qui'yaj nij so' rihaan Diose a. <sup>24</sup> Ne me rá núj nicaj tuví' so' ga nij so', ne cunuu guee so' rihaan Diose ga nij so', gaa ne naru'vee so' che'é xcuu nago' nij so' rihaan Diose, gaa ne ca'vee caca caan nii raaj nij so' ne quisíj nu' se vaa cata' tu'va nij so' rihaan Diose á. Gaa ne xcaj nij tinúú ní' cuentá se vaa xa' nana cuno nij so' che'é so', tzaj ne ne ya vaa nana yo' ma'. Ne ma'án so' me síi noco' raan man se tucuanj Moisés a.

<sup>25</sup> "Ne xa' nij síi yaníj amán rá ni'yaj man Jesucristó, tzaj ne aj ca'née núj yanj cartá rihaan nij so', ne cataj xna'anj núj rihaan nij so' se vaa taj che'é canoco' ma'an nij so' se tucuanj Moisés ma'. Maan se xcaj nij so' cuentá, ne se chá nij so' rasuun rque yuvii rihaan ya'anj cacój yuvii ma'. Ne se chá nij so' ton ma'. Ne se chá nij so' nee xcuu tuguáj nii gaán chihá ma'. Ne snó'o do', chana do', se cotoj nij so' ga yo'ó yuvii sese ne nica' nij so' me yo' ma'. Danj taj yanj ca'née núj rihaan nij so' adonj —taj nij síi chij yo' rihaan Pabló a.

<sup>26</sup> Gaa ne nicaj tuví' Pabló ga ca'anj nij snó'o yo', ne yo'ó güii me se cunuu guee so' ga nij so' rihaan Diose, ne catúj so' rá nuví' noco, ne nata' so' rihaan xrej me güii quisíj cunuu guee nij so' rihaan Diose ne ca'na' nicaj nij so' nij rasuun guee nago' 'o 'o nij so' rihaan Diose a.

*Nana nihánj taj xna'anj daj guun gaa quita'aa nii man Pabló rá nuví' noco' a*

<sup>27</sup> Dan me se gaa nichrun' quisíj chij nij güii nuu guee 'un' nij so' rihaan Diose, ne nij síi israelitá cavii estadó Asia ro', quene'en nij so' man Pabló rá nuví' noco, ne naxumaan cunudanj nij yuvii man rej yo', qui'yaj nij so', ne quita'aa nij



so' man Pabló a. <sup>28</sup> Ne caguáj nij sí cavii estadó Asia, cataj nij so':

—Cuno soj sij israelitá ca'mij núj, ne racuíj soj man núj á. 'O se sí nihánj ro', me sí tucu'yón man nij yuvij yanj cunudanj chuman' se vaa nij vaa ní' sij israelitá do', se vaa nij vaa tucuáán noco' ní' do', se vaa nij vaa nuví nocoo nihánj do', taj so' a. Ne ndaa yuvij yanj catúj nuví nocoo nihánj, ne quirí' rej guee nihánj, qui'yaj so' nanj á —taj nij so', ni'yaj nij so' man Pabló a.

<sup>29</sup> 'O se aj quene'en nij so' man sí cu'naj Trófimo sí yanj cavii chuman' Efeso se vaa vaj so' ga Pabló rque chuman' Jerusalén, ne guun rá nij so' se vaa catúj sí cu'naj Trófimo yo' rá nuví nocoo, qui'yaj Pabló a.

<sup>30</sup> Dan me se naxumaan cunudanj nij yuvij man chuman' Jerusalén yo', ne cunánj nij so' ndaa nuví nocoo, gaa ne quita'aa nij yuvij man Pabló, ne nucuaj rij nij so' man so' xe', ne nu' naráán nii nij ta'yaa rihaan nuví nocoo yo' a. <sup>31</sup> Dan me se guun rá nij yuvij ticavi' nij yuvij man Pabló, ne cuchi' nana rihaan sí 'nij ra'a man cunudanj nij tanuu romanó man chuman' Jerusalén se vaa ca'maan ndo'o rá nij sí man chuman' Jerusalén ne naxumaan ndo'o sayuun a. <sup>32</sup> Ne nicaj so' tanuu nicaj so' sí 'nij ra'a 'o cientó tanuu, ne cunánj so' ndaa rej man nij yuvij yo' a. Ne gaa quene'en nij yuvij se vaa ca'na' sí uun chij rihaan cunudanj nij tanuu do', se vaa ca'na' nij tanuu do', gaa ne ca'ne' rá nij so' ga suun o' man Pabló a. <sup>33</sup> Gaa ne cuchi' sí 'nij ra'a man nij tanuu yo' rihaan Pabló, ne quita'aa so' man Pabló, ne ca'ne' so' suun se vaa numíj nij tanuu vij aga' ne' man Pabló, ne xná'anj so' man nij yuvij me sí me Pabló ne daj qui'yaj so' a.

<sup>34</sup> Ne ino vaa nana caguáj 'o 'o nij yuvij a. Dan me se ne ca'vee xcaj so' cuentá daj me che'é me ca'maan rá nij yuvij ma'. 'O se caguáj ndo'o nij yuvij, ne ne ca'vee cuno so' se nana nij yuvij ma'. Che'é dan ca'ne' so'

suun rihaan nij tanuu se vaa ca'anj nicaj nij tanuu man Pabló rá cuarteé man nij tanuu a. <sup>35</sup> Ne gaa cuchi' nij tanuu cuarteé, gaa ne che'é se man ndo'o nij yuvij a'maan rá ni'yaj man Pabló, gaa ne ndaa ata xta' ma'an nij tanuu man Pabló, che'é se guun ndo'o rá nij yuvij quirij nij so' man Pabló go' nij so' man so' a.

<sup>36</sup> 'O se canoco' raan nij yuvij man nij tanuu, ne caguáj nij yuvij, cataj nij yuvij:

—Ticavi' soj man so' cuaj ei —taj nij yuvij, caguáj nij yuvij, ni'yaj nij yuvij man Pabló a.

*Nana nihánj taj xna'anj se vaa guun che'e Pabló nacaj so' man so' rihaan nij sí israelitá a*

<sup>37</sup> Dan me se daj doj catuu Pabló cuarteé man nij tanuu, qui'yaj nij tanuu, gaa ne cataj Pabló rihaan sí 'nij ra'a man cunudanj nij tanuu a:

—Ne ca'vee ca'mij 'o nana rihaan so' na' —taj so', xná'anj so' man sí 'nij ra'a man nij tanuu a.

Ne so' cataj:

—Ne'én so' ca'mij so' xna'anj griego na'. <sup>38</sup> Ne nuveé so' me sí cavii rej cu'naj Egiptó sí me rá cunu' ga gobiernó ne ca'anj nicaj ca'anj míj nij sí me rá ticavi' man yuvij ndaa rej tacaan asij rque doj na' —taj sí 'nij ra'a man nij tanuu, xná'anj so' man Pabló a.

<sup>39</sup> Gaa ne cataj Pabló rihaan so' a:

—'Unj ro', me 'o sí israelitá cavii chuman' Tarso chuman' naj estadó Cilicia, ne chuman' vaa suun ndo'o me chihánj á. Rqueé 'unj rihaan so', ne ca'vej rá so' ca'mij doj ga nij yuvij á —taj Pabló rihaan sí 'nij ra'a man nij tanuu a.

<sup>40</sup> Dan me se ca'vej rá so', ne che'é dan canicun' Pabló rej xta' rej atúj nii cuarteé, ne tucunó ra'a so', che'é rej cunu dínj tu'va nij yuvij a.

Dan me se cunuu dínj tu'va nij yuvij, gaa ne guun che'e Pabló ca'mij so' xna'anj hebreo rihaan nij yuvij, ne cataj so':

## 22

<sup>1</sup> —Cuno soj ca'mij, tinuj, ta'nuj. Ne nano xrej soj se vaa ca'mii nacaj 'unj manj —taj Pabló rihaan nij sí israelitá a.

<sup>2</sup> Dan me se xcaj nij yuvij israelitá cuentá se vaa ca'mii Pabló xna'ánj hebreo, ne che'é dan ndaa dínj ma'an mán nij so' a. Gaa ne cataj uún Pabló a:

<sup>3</sup> —Dan me se ya sí israelitá mé 'unj, ne ca'ngaa 'unj chuman' Tarso chuman' naj estadó Cilicia a. Tzaj ne cachij 'unj chuman' Jerusalén nihánj, ne nari' 'unj noco' 'unj nu' se tucuanj xii ní', qui'yaj maestró Gamaliel a. Ne cuano nihánj me se sij yanj qui'yaj nu' ndaa vaa me rá Diose mé 'unj ase vaa 'yaj ma'an soj güii cuan' adonj.

<sup>4</sup> Ne qui'yaj ndo'oj sayuun man nij yuvij noco' se tucuanj Jesucristó yo', ne guun ndo'o raj cavi' nij so' a. Dan me se snó'o do', chana do', numíj, ne canú' 'unj man nij so' taga', <sup>5</sup> ne xrej ata suun noco'o doj do', nij sí uun chij rihaan ní' do', me sí cataj se vaa ya vaa nana nihánj nana natá' 'unj rihaan soj adonj. 'O se ma'an nij so' rqué yanj cartá rihaan 'unj nayaa tuvi' ní' sí man chuman' Damasco, gaa ne ca'anj 'unj chuman' Damasco, ne guun rá 'unj cunumíj 'unj man nij yuvij noco' man Jesucristó yanj chuman' Damasco, che'é rej ca'na' nij so' chuman' Jerusalén nihánj ne quiran' nij so' sayuun, qui'yáj adonj.

<sup>6</sup> "Dan me se vaj 'unj chrej, ne caxuj me ta' asuun, ne nichrún' 'unj chuman' Damasco, gaa ne taj ni'yón cuchuguun nu' xta' nu' anicaj rej nicun' 'unj a. <sup>7</sup> Gaa ne quini' 'unj rihaan yo'óo, ne cunó 'unj se vaa ca'mii 'o so' rihanj, ne cataj so': "Saulo, Saulo, me che'é 'yáa so' sayuun manj, ga", taj sí ca'mii rihanj, xna'anj so' manj a. <sup>8</sup> Gaa ne: "Me sí mé so', Señor", cataj 'unj rihaan so', xna'anj 'unj man so' a. Gaa ne cataj so': "Unj ro', me Jesús sí cavii chuman' Nazaret, ne sí 'yaj ndo'o so' sayuun man mej adonj", taj so' rihanj a. <sup>9</sup> Gaa ne dan me se nij sí vaj ga 'unj ro',

ya quene'en nij so' ya'an chuguun rej nicun' 'unj, tzaj ne ne cunó nij so' nana ca'mii Jesús rihanj a ma'. <sup>10</sup> Gaa ne cataj 'unj rihaan so' a: "Daj qui'yáa 'unj, rá so' ga", taj 'unj, xna'anj 'unj man so' a. Gaa ne sí 'nij ra'a man ní' ro', cataj: "Naxumaan so', ne ca'anj so' chuman' Damasco, gaa ne asa' cuchí' so' yo', ne cataj xna'anj nii rihaan so' che'é nu' se vaa no xcúún so' qui'yáa so' á", taj sí 'nij ra'a man ní' rihanj a. <sup>11</sup> Dan me se che'é se nucuaj ndo'o chuguun ya'an yo' ro', che'é dan ne ca'vee curuvi' rlij rihanj, ne che'é dan nij sí chéé gaj ro', quita'aa nij so' ra'aj, racuíj nij so' manj, ne ca'anj 'unj catúj 'unj chuman' Damasco a.

<sup>12</sup> "Dan me se chuman' Damasco ro', yáan 'o sí cu'naj Ananías, ne sí ve'é noco' man Diose me so', ne sí qui'yaj nu' se tucuanj Moisés me so', ne cunudanj nij yuvij israelitá yanj chuman' Damasco taj se vaa sij sa' me so' a. <sup>13</sup> Dan me se ca'na' so' rihanj ne canicun' so' x'núj, ne cataj so': "Nachuguun rihaan so', gaa ne ni'yaj so', tinuj Saulo", taj so' rihanj a. Ne maan orá dan nachuguun rihanj, ne quene'enj man so' a. <sup>14</sup> Gaa ne cataj sí cu'naj Ananías: "Diose sí noco' xii ní' gaa naá ro', narii so' mán so' che'é rej xcaj so' cuentá daj me rá so' qui'yaj so' che'é yuvij, ne guun rá so' quene'én so' man Jesucristó sí sa' inanj ne cunó so' nana ca'mii so' rihaan so' á. <sup>15</sup> Gaa ne guún so' sí ne'en che'é so', ne dan me se ca'anj so', ne nata' so' rihaan nu' nij yuvij che'é se vaa quene'én so' do', che'é nij nana cunó so' do' a. <sup>16</sup> Ne nihánj me se se guun raan so' doj a ma'. Maan se naxumaan so', ne cata' ne so', ne cachinj ni'yáa so' rihaan Jesucristó che'é rej tinaruvii Diose nu' cacun' xráa so' á", taj sí cu'naj Ananías yo' rihanj a.

<sup>17</sup> "Dan me se nanicaj 'unj ca'ná' 'unj chuman' Jerusalén nihánj, ne gaa cachín ni'yáa 'unj rihaan Diose, ne naqui'yaa 'o rasuun rihaan 'unj, <sup>18</sup> ne dan me se quene'én 'unj man Jesu-

crístó, ne cataj so' rihanj a: “Yoó so' cuaj, curihanj so' rque chuman' Jerusalén nihánj á. 'O se se cuno nij síi man chuman' Jerusalén nana nata' so' rihaan nij so' che'é 'unj ma'”, taj so' rihanj a. <sup>19</sup> Gaa ne cataj 'unj rihaan so' a: “Tzaj ne aj ne'en nij so' se vaa 'unj me síi catúj daj a nij ve' tucu'yón nij so' se tucuanj Moisés, ne quita'aa 'unj nij síi cuchumán rá ni'yaj mán so', ne canú' 'unj man nij so' taga' ne gó' 'unj cuartá xráá nij so', Señor. <sup>20</sup> Ne aj ne'en nij so' se vaa gaa cavi' síi cu'naj Esteban síi nata' rihaan yuvii che'é so', ne 'unj me síi 'o vaa rá ga nij síi ticavi' man so', ne dan me se cutumej sagan' nij so' gaa go' nij so' yahij man Esteban adonj. Che'é dan cuno nij so' se nanaj nanj á”, taj 'unj rihaan Jesucristó a. <sup>21</sup> Gaa ne cataj so': “Ca'anj so' á. 'O se 'unj ca'nej mán so' ca'anj so' gan' rihaan nij síi yaníj a”, taj so' rihanj a —taj Pabló rihaan nij síi israelitá yo' se xna'anj nij so' a.

<sup>22</sup> Dan me se ndaa dan ca'mii Pabló nana yo', ne nanó xrej nij síi israelitá se nana so' a. Tzaj ne gaa canicaj so' ca'mii so' che'é nij síi yaníj, gaa ne canicaj uún nij so', nucuaj caguáj nij so', cataj nij so':

—Cavi' síi nihánj á. Ne nó xcúún síi nihánj gaa i'na' so' rihaan chumii nihánj a ma' —taj nij so', caguáj nij so' a.

<sup>23</sup> Dan me se caguáj ndo'o nij so', ne quirii nij so' roto nij so', ne taman' ndo'o nij so' yo'óo tachruu xta' che'é se ca'maan ndo'o rá nij so' a. <sup>24</sup> Gaa ne ca'ne' síi uun chij suun rihaan nij tanuu se vaa ca'anj nicaj nij so' man Pabló rá cuarteé ne nij so', gaa ne go' nij so' cuartá xráá Pabló, che'é rej cataj xna'anj so' me che'é caguáj nij yuvii danj ni'yaj nij so' man Pabló a. <sup>25</sup> Dan me se nicaj nij tanuu nuj xcaan, numíj nij tanuu man Pabló, ne gaa qui'yaj nij so' danj, gaa ne ca'mii Pabló rihaan 'o síi nicun' rej nicun' so', ne tanuu uun chij rihaan 'o cientó tanuu me so', ne dan me se cataj Pabló rihaan so' a:

—Nó xcúún soj go' soj cuartá xráá 'o síi guun chihanj Romá gaa ataa ca'ne' nii cacun' che'é so' axe —taj so' rihaan tanuu yo' a. '

<sup>26</sup> Gaa cuno tanuu yo' nana ca'mii Pabló rihaan so', ne ca'anj so' cataj xna'anj so' rihaan síi uun chij rihaan cunudanj nij tanuu, ne cataj so':

—Ya me rá so' go' ní' cuartá xráá so' na'. 'O se sij romanó me snó'o nihánj ei —taj so' rihaan tuvi' tanuu so' tanuu uun chij rihaan cunudanj nij tanuu a.

<sup>27</sup> Gaa ne cuchi' tanuu uun chij yo' rihaan Pabló, ne xna'anj so' man Pabló, cataj so':

—Cataj so' 'o nana rihanj á. Ya ya sij romanó mé so' na' —taj so', xna'anj so' man Pabló a.

—Vej adonj —taj Pabló rihaan so' a.

<sup>28</sup> Gaa ne cataj tanuu uun chij yo' rihaan Pabló a:

—'Unj nihánj, tzaj ne nocoo ndo'o sa'anj gó' 'unj che'é rej ca'vee guún 'unj 'o síi romanó nanj á —taj so' rihaan Pabló a.

Gaa ne cataj Pabló:

—Tzaj ne 'unj ro', me síi romanó asij ca'ngaa 'unj adonj —taj so' rihaan tanuu uun chij yo' a.

<sup>29</sup> Nu' ca'mii so' danj, ne nu' ca'anj yaníj nij tanuu guun rá go' cuartá xráá Pabló a. Ne ma'an tanuu uun chij rihaan nij so' cuchu'vi', che'é se xcaj so' cuentá se vaa sij romanó me Pabló ne aj numíj so' man Pabló a.

*Nana nihánj taj xna'anj daj ca'mii Pabló gaa canicun' so' rihaan juntá qui'yaj nij síi uun chij rihaan nij yuvii israelitá a*

<sup>30</sup> Ne ranga' yo'ó güii me se tanuu uun chij rihaan cunudanj nij tanuu ro', guun ya rá so' xcaj so' cuentá me che'é guun rá nij síi israelitá cuta' nij so' cacun' xráá Pabló a. Che'é dan ca'ne' so' suun se vaa naché nij tanuu man Pabló, ne ca'ne' so' suun se vaa cunuu chre' nij xrej atá suun nocoo doj do', nu' nij síi uun chij rihaan nij yuvii israelitá do', qui'yaj nij so' juntá a. Gaa ne catúj Pabló rej man nij so',

qui'yaj so', ne canicun' Pabló tanuu rihaan nij so' a.

## 23

<sup>1</sup> Dan me se ni'yaj uxrá Pabló man taran' nij síi uun chij yo', ne cataj so':

—Cuno nij soj ca'mij, tinuj. Nu' cavii nu' ca'na' ro', inanj sa' uxrá 'yáa 'unj rihaan Diose, raj a. Taj cacun' tumej ma' —taj Pabló rihaan nij so' a.

<sup>2</sup> Gaa ne xrej ata suun nocoo doj síi cu'naj Ananías ro', ca'ne' so' suun rihaan nij síi nicun' rej x'núu Pabló se vaa coxró nij so' tu'va Pabló, gaa ne danj qui'yaj nij so' a. <sup>3</sup> Gaa ne cataj Pabló rihaan síi cu'naj Ananías yo' a:

—Vaa güii coxró Diose tu'vá so' á. 'O se síi nucui' rá mé so' á. 'O se táa so' naqui'yaj cuú so' che'ej sese qui'yáa 'unj cacun' rihaan se tucuanj Moisés, rá so' a. Tzaj ne nihánj me se tananj ca'né' so' suun se vaa coxró nii tu'vaj, ne se tucuanj Moisés taj se vaa ne nó xcúun so' a 'ó xco' qui'yáa so' danj ma' —taj Pabló rihaan síi cu'naj Ananías a.

<sup>4</sup> Gaa ne nij síi nicun' rej x'núu Pabló ro', cataj nij so' rihaan Pabló a:

—Ne nó xcúun so' caxrii yuvaa so' man síi cune' Diose guun xrej ata suun nocoo doj ma' —taj nij so' rihaan Pabló a.

<sup>5</sup> Gaa ne cataj Pabló:

—Ne quene'én 'unj se vaa xrej ata suun nocoo doj me síi tu'va danj, man tinuj. 'O se danj Diose taj se vaa se ca'mii chi'ij ní' ni'yaj ní' síi uun chij rihaan nij tuv'í' ní' a ma' —taj Pabló rihaan nij so' a.

<sup>6</sup> Dan me se xcaj Pabló cuentá se vaa ta'aj nij síi uun chij yo' me síi saduceo ne yo'ó ta'aj nij so' me síi fariseo, ne che'é dan caguáj so', cataj so' rihaan cunudanj nij so' a:

—Síi fariseo mej, ne ta'níi síi fariseo mej, tinuj. Ne nihánj me se cuta' nii cacun' xraj che'é se 'unj me síi amán rá se vaa cunuu i'na' uún nij síi cavi' vaa güii, tinuj —taj Pabló rihaan cunudanj nij so' a.

<sup>7</sup> Dan me se gaa ca'mii Pabló danj, ne ca'maan rá nij síi fariseo do', nij

síi saduceo do', ni'yaj nij so' tuvi' nij so', ne xra' ta'aj nij so' a. <sup>8</sup> 'O se nij síi saduceo ro', taj se vaa se ca'vee cunuu i'na' uún nij síi cavi' ma'. Ne se mozó Diose do', nimán yuvii do', taj vaj ma', taj nij síi saduceo yo' a. Tzaj ne nij síi fariseo ro', taj se vaa ya ya cunuu i'na' uún nij síi cavi' vaa güii, ne vaa se mozó Diose, ne vaa nimán yuvii, taj nij so' a.

<sup>9</sup> Dan me se caguáj ndo'o cunudanj nij síi uun chij yo', ne canicun' ta'aj nij síi fariseo ata suun naqui'yaj cuu se tucuanj Moisés rihaan yuvii, ne ca'mii canó tuvi' nij so' ga' nij síi saduceo, cataj nij so':

—Nuvi' cacun' tumé síi nihánj, rá nuj ma'. 'O se ca'vee se aj ca'mii 'o nimán rihaan so' ca'vee se aj ca'mii 'o se mozó Diose rihaan so' ca'vee nanj á —taj nij so', ca'mii nacaj nij so' man Pabló a.

<sup>10</sup> Gaa ne ca'maan uxrá rá cunudanj nij so', ne che'é dan cuchu'vi' tanuu uun chij doj se vaa cutun' nij so' man Pabló, ne che'é dan ca'ne' so' suun rihaan nij tanuu se vaa ca'anj nij tanuu quita'aa nij tanuu man Pabló ne quirii nij tanuu man Pabló sca'núj nij síi uun chij rihaan nij yuvii israelitá yo' ne ca'anj nica'j nij tanuu man Pabló rá cuartee man nij tanuu a.

<sup>11</sup> Ti'nuu yo'ó güii me se curuvi' ma'an Jesucristó sij 'nij ra'a man ní' rihaan Pabló, ne cataj so' rihaan Pabló a:

—Gaa nucuaj nimán so' á. 'O se ase vaa 'o xraan taj xna'anj so' rihaan nij síi man chuman' Jerusalén nihánj che'é 'unj ro', danj gaa cataj xna'anj so' rihaan nij síi man chuman' Romá uún che'é 'unj adonj —taj síi 'nij ra'a man ní' rihaan Pabló a.

*Nana nihánj taj xna'anj se vaa guun rá nij síi israelitá ticavi' nij so' man Pabló a*

<sup>12</sup> Dan me se yo'ó güii cunuu chre' nij síi israelitá che'é rej qui'yaj nij so' sayuun man Pabló, ne cataj nij so' rihaan Diose a:



—Sese chá núj do', sese co'ō núj na do', gaa ataa cavi' Pabló qui'yaj núj, ne ca'vee qui'yáá so' sayuun man núj á —taj nij so' rihaan Diose a.

<sup>13</sup> Ne vij chihaa táá doj nij so' me nij síi guun 'ō rá qui'yaj danj man Pabló a.

<sup>14</sup> Gaa ne nij síi me rá ticavi' man Pabló ro', cuchi' nij so' rihaan nij xrej atā suun nocōo doj do', rihaan nij síi uun chij do', ne cataj nij so' a:

—Aj cata' tu'va núj rihaan Diose se vaa ca'vej rá núj qui'yaj Diose sayuun man núj sese chá núj me ma'an rasuun gaa ataa cavi' Pabló qui'yaj núj a. <sup>15</sup> Che'é dan soj ga yo'ó nij síi uun chij ro', cataj xna'anj soj rihaan tanuu uun chij doj se vaa me rá soj ca'na' uún Pabló rihaan soj che'é se me rá soj xcaj sa' soj doj cuentá che'é Pabló, cataj soj rihaan tanuu yo' a. Tzaj ne cuman núj rá chrej, caráán núj chrej man Pabló, ne se gaa i'na' Pabló cuchi' Pabló rihaan soj, qui'yaj núj a man adonj —taj nij so' rihaan xrej atā suun nocōo doj do', rihaan tuvi' nij so' síi uun chij do' a.

<sup>16</sup> Tzaj ne cuno xticun' Pabló se vaa ca'mii nij so' che'é rej caráán nij so' chrej man Pabló, ne che'é dan ca'anj so' catúj so' rá cuarteé, gaa ne nu' tacuachén so' nana rihaan Pabló a. <sup>17</sup> Gaa ne canacúún Pabló ca'na' yo'ō nij tanuu uun chij rihaan 'ō cientó tanuu rihaan so', ne cataj so' rihaan tanuu yo' a:

—Catuu síi tachruu nihánj nata' so' rihaan tanuu uun chij doj, qui'yáá so' á. 'O se vaa nana me rá so' nata' so' rihaan tanuu uun chij doj a —taj Pabló rihaan tanuu yo' a.

<sup>18</sup> Che'é dan nicaj tanuu yo' man xticun' Pabló, ca'anj so' rihaan tanuu uun chij rihaan cunudanj nij tanuu, ne cataj so' rihaan tanuu a:

—Síi cu'naj Pabló síi 'nij taga' ro', canacúún so' manj cuchij rihaan so', ne cachín ni'yaj so' rihanj se vaa ca'na' síi tachruu nihánj rihaan so' qui'yáj a. 'O se vaa nana me rá síi tachruu nihánj nata' so' rihaan so', taj

Pabló a —taj tanuu yo' rihaan tanuu uun chij doj a.

<sup>19</sup> Dan me se coro' tanuu uun chij yo' ra'a xticun' Pabló, gaa ne ca'anj yaníj roj so', gaa ne xna'anj tanuu yo' man so', cataj so':

—Me nana nata' so' rihanj, rá so' ga —taj so' rihaan síi tachruu yo' a.

<sup>20</sup> Gaa ne so' cataj:

—Nij síi israelitá ro', cuyaun guun rá nij so' se vaa cachinj ni'yaj nij so' rihaan so' se vaa a'yuj ca'anj nicaj so' man Pabló rej cunuu chre' nij síi uun chij rihaan nij so' a. 'O se cataj nij so' se vaa me rá nij so' xcaj nij so' cuentá sa' doj che'é Pabló a. <sup>21</sup> Tzaj ne se cuchumán rá so' se nana nij so' ma'. 'O se vaa vij chihaa tuvi' nij so' táá doj caráán chrej man Pabló, ne aj cata' tu'va nij so' rihaan Diose se vaa se chá nij so' do', se co'ō nij so' na do', gaa ataa cavi' Pabló qui'yaj nij so', ne sese se cavi' Pabló qui'yaj nij so', ne ca'vee qui'yaj Diose sayuun man nij so', taj nij so' nanj á. Ne cuano nihánj me se me ndo'ō rá nij so' se vaa cata' tu'vá so' se vaa ya ca'anj nicaj so' man Pabló rihaan nij síi uun chij yo' adonj —taj xticun' Pabló rihaan tanuu uun chij doj a.

<sup>22</sup> Ne tanuu yo' ro', na'née so' chrej man síi tachruu yo', ne ca'ne' so' suun rihaan síi tachruu se vaa se cataj xna'anj so' rihaan a 'ó yuvi se vaa aj nata' so' nana vaa danj rihaan tanuu yo' ma'.

*Nana nihánj taj xna'anj se vaa ca'née tanuu uun chij doj man Pabló rihaan síi nicaj suun gobernador cu'naj Félix a*

<sup>23</sup> Dan me se canacúún tanuu uun chij yo' man vij nij tanuu uun chij rihaan 'ō cientó tanuu, ne cataj so' rihaan roj so' a:

—Nicaj roj soj vij cientó tanuu chéé tacoj do', va'nuj chihaa chi' tanuu taj xráá cuayó do', vij cientó tanuu nicaj chruun lanzá do', ne cuman chruun soj cavi soj aga' uun nii corá, ca'anj soj chuman' Cesarea á. <sup>24</sup> Ne quirii soj 'ō cuayó quitaj síi cu'naj Pabló, gaa

ne cuchij' Pabló rihaan síi nicaj suun gobernador cu'naj Félix, qui'yaj soj, ne dan me se quinaniij so' rihaan nij síi israelitá a —taj tanuu uun chij doj cuno roj so' a.

<sup>25</sup> Gaa ne qui'yaj so' 'o yanj cartá, ne ase vaa nana nihánj ro', danj vaa nana cachrón so' rihaan yanj cartá yo' a: <sup>26</sup> “Unj sij cu'naj Claudio Lisias ro', 'yáa 'unj yanj cartá nihánj ca'nej 'unj rihaan so' sij nicaj suun gobernador cu'naj Félix sij sa' ndo'o a. Ve'é cayáán so' á. <sup>27</sup> Xa' síi ca'nej 'unj rihaan so' nihánj, tzaj ne quita'aa nij síi israelitá man so', ne guun rá nij so' ticavij' nij so' man so' a. Gaa xcaj 'unj cuentá, ne nacaj núj ga nij tanuu man so', che'é se xcaj 'unj cuentá se vaa sij romanó me so' a. <sup>28</sup> Dan me se guun rá 'unj xcaj 'unj cuentá me che'é me guun rá nij síi israelitá cuta' nij so' cacun' xráa so', ne che'é dan ca'anj nicaj 'unj man so' rihaan nij síi uun chij rihaan nij so' a. <sup>29</sup> Ne xcaj 'unj cuentá se vaa inanj che'é tucuáán noco' ma'an nij so' me cuta' nij so' cacun' xráa so' a. Tzaj ne taj vaj cacun' chij'ij tumé so' ma'. Taj che'é cavij' so' do', taj che'é quij'ij so' taga' do' ma'. <sup>30</sup> Tzaj ne cataj xna'anj nii rihanj se vaa guun rá ta'aj nij síi israelitá ticavij' nij so' man so', ne che'é dan ca'nej 'unj man so' rihaan so', ne cataj 'unj rihaan nij síi me rá cuta' cacun' xráa so' se vaa cuchij' nij so' rihaan so' ne ca'mij'ij nij so' ga so' a”, taj nana cachrón tanuu uun chij doj rihaan yanj cartá ca'neé so' rihaan síi nicaj suun gobernador cu'naj Félix a.

<sup>31</sup> Dan me se qui'yaj nij tanuu ndaa vaa cataj xna'anj so' rihaan nij so', ne rej nij ca'anj nicaj nij so' man Pabló ndaa chuman' cu'naj Antípatris a. <sup>32</sup> Gaa ne yo'ó güii me se cavii nij tanuu taj xráa cuayó, ca'anj nij so' ga Pabló, ne yo'ó nij tanuu ro', canicaj nij so' chuman' Jerusalén ndaa cuarteé a. <sup>33</sup> Dan me se gaa catúj nij tanuu taj xráa cuayó ga Pabló chuman' Cesarea, ne nago' nij so' yanj cartá yo' ra'a síi nicaj suun gobernador, ne

tacuachén nij so' man Pabló rihaan so' uún a. <sup>34</sup> Gaa quisij' nayaa so' yanj cartá, ne xna'anj so' me estadó cavii Pabló, ne cataj xna'anj nii rihaan so' se vaa cavii Pabló estadó Cilicia a. <sup>35</sup> Gaa ne cataj so' rihaan Pabló a:

—Naqui'yaj cuú 'unj che'é so' asa' ca'na' nij síi cuta' cacun' xráa so' á —taj so' rihaan Pabló a.

Gaa ne ca'ne' so' suun rihaan nij tanuu se vaa ca'anj nicaj nij tanuu man Pabló rá tucuá suun noco' cune' síi cu'naj Herodes ne tumé nij tanuu man so' a.

## 24

*Nana nihánj taj xna'anj che'é cacun' cuta' nii xráa Pabló a*

<sup>1</sup> Dan me se cachén 'un' güii, gaa ne nanij xrej atá suun noco' doj cu'naj Ananías ndaa chuman' Cesarea, ne ca'anj ta'aj nij síi uun chij rihaan nij yuvij' israelitá do', 'o síi a'mii natáj cu'naj Tértulo do', ga so', ne cuta' nij so' cacun' xráa Pabló rihaan síi nicaj suun gobernador a. <sup>2</sup> Dan me se gaa canacúún nii ca'na' síi cu'naj Pabló, ne ca'na' Pabló, ne guun che'e síi cu'naj Tértulo cuta' so' cacun' xráa Pabló rihaan síi cu'naj Félix, cataj so':

—Che'é se so' me síi acaj ndo'o cuentá ro', che'é dan dínj mán núj sij israelitá, ne naxcaj ndo'o chiháán núj, <sup>3</sup> ne cunudanj núj me síi taj se vaa inanj sa' uxrá qui'yáa so', Félix sij sa' ndo'o a. Ne: “O guun ni'yaj ndo'o ní”, taj taran' núj rihaan so' me rej ma'an vaj núj a. <sup>4</sup> Tzaj ne taj che'é guun rmij'ij so' doj quij'ij ma'. Ne che'é dan rqueé 'unj rihaan so' se vaa veé danj gaa inaj nimán so', ne cunó so' doj tzin' se nana núj nanj adonj.

<sup>5</sup> Dan me se xcaj núj cuentá se vaa xa' síi nihánj, tzaj ne ase vaa yu-vee xij man naa vaa so', ne so' me síi 'yaj se vaa ino vaa rá cunudanj nij síi israelitá yanj rihaan chumij'ij nihánj ne xra' ta'aj nij so', ne so' me síi uun chij rihaan nij síi noco' 'o tucuáán ne se tucuanj síi cavii chuman' Nazaret a. <sup>6</sup> Ne ndaa guun

rá so' qui'yaj chi'ii so' man nuvií nocoo, ne che'é dan quita'aa núj man so', ne guun rá núj ca'ne' núj cacun' che'é so' ndaa vaa a'mii tucuáán nocoo' ma'an núj a. <sup>7</sup> Tzaj ne síi cu'naj Lisias tanuu uun chij rihaan taran' nij tanuu man chuman' Jerusalén ro', ca'néj yuvaá so' man síi nihánj ra'a núj, <sup>8</sup> ne cataj xna'anj so' rihaan nij síi me rá cuta' cacun' xráá Pabló se vaa ca'na' nij so' rihaan so' nihánj a. Ne dan me se ma'an so' me síi guun nu-cuaj naqui'yaj cuu che'é nu' rasuun nihánj, ne xcaj ma'an so' cuentá che'é cacun' cuta' núj xráá Pabló nanj adonj —taj síi cu'naj Tértulo cuno síi cu'naj Félix a.

<sup>9</sup> Gaa ne yo'ó nij yuvii israelitá ro', caraa ndo'o nij so' cacun' xráá Pabló, ne cataj nij so' se vaa ya vaa se nana síi cu'naj Tértulo yo' a.

*Nana nihánj taj xna'anj che'é nana ca'mii ma'an Pabló rihaan síi nicaj suun gobernador cu'naj Félix yo' a*

<sup>10</sup> Gaa ne guun ra'a síi nicaj suun gobernador cataj so' se vaa ca'vee ca'mii Pabló, ne che'é dan cataj Pabló a:

—Ne'én 'unj se vaa quisij que'ee yo' guún so' síi a'ne' cacun' che'é nij síi man chiháán núj, ne che'é dan uun niha' raj ca'mii nacaj 'unj che'é ma'anj rihaan so' á. <sup>11</sup> Ne guun nu-cuaj ma'an so' xcaj so' cuentá se vaa ataa quisij chuvij güii asij cavii 'unj chuman' Jerusalén caraa guee 'unj rihaan Diose a. <sup>12</sup> Ne rá nuvií nocoo do', rá nij ve' tucu'yón núj sij israelitá se tucuanj Moisés do', rque chuman' do', ne cano tuví 'unj ga yuvii ma'. Ne a doj ne ca'maan rá nij yuvii qui'yáá 'unj ma'. <sup>13</sup> Ne se ca'vee tihaan nij síi nihánj se vaa vaa che'é cuta' nij so' cacun' xráj ma'.

<sup>14</sup> "Tzaj ne cataj ya 'unj rihaan so' se vaa xa' tucuáán tucu'náj nij síi nihánj tucuáán ne ro', danj 'yáá 'unj aráj guee 'unj rihaan Diose sij nocoo' nij xií 'unj a. 'O se amán raj nu' nana no rihaan yanj no se tucuanj Moisés do', se nana nij síi nata' se nana Diose

gaa naá do' a. <sup>15</sup> Ne nucuaj rá 'unj man Diose ndaa vaa 'yaj ma'an nij síi nihánj se vaa vaa güii cunuú i'na' uún nij síi sa' cavi' do', nij síi chi'ii cavi' do' a. <sup>16</sup> Che'é dan nu' se vaa 'yáj, tzaj ne ve'é inanj 'yáj che'é rej se guun quitaj cacun' xráj rihaan Diose do', rihaan yuvii do' ma'.

<sup>17</sup> "Dan me se cachén que'ee yo', gaa ne guun rá 'unj rque 'unj caridad rihaan tuví' 'unj síi nique ne rque 'unj rasuun guee rihaan Diose, ne che'é dan ca'anj 'unj ndaa chuman' Jerusalén a. <sup>18</sup> Ne gaa qui'yáá 'unj danj, ne nari' doj síi israelitá cavii estadó Asia mán 'unj rá nuvií nocoo, ne aj cunuú sa' 'unj rihaan Diose daj vaa taj se tucuanj núj a. Tzaj ne taj vaj yuvii vaj ga 'unj, ne taj vaj sayuun chi'ii qui'yáá 'unj gaa nari' nij so' manj ma'. <sup>19</sup> Ne xa' nij so', tzaj ne sese vaa cacun' tumé 'unj rá nij so', ne no xcúún nij so' ca'na' ma'an nij so' canicun' nij so' nihánj rihaan so' á. <sup>20</sup> Ne sese taj, ne no xcúún ma'an nij síi nihánj cataj xna'anj nij so' rihaan so' me cacun' tumé 'unj nari' nij so' gaa canicún' 'unj rihaan juntá qui'yaj nij síi ata suun rihaan núj á. <sup>21</sup> 'O se vaa orún' nana caguáj 'unj gaa canicún' 'unj rihaan nij síi uun chij rihaan nij yuvii israelitá yo', ne dan me se cataj 'unj danj: "Maan che'é se 'unj me síi amán rá se vaa vaa güii cunuú i'na' uún nij síi cavi' qui'yaj Diose ro', che'é dan naqui'yaj cuu nij soj che'ej cuan' a", cataj 'unj rihaan nij so' a —taj Pabló rihaan síi nicaj suun gobernador cu'naj Félix a.

<sup>22</sup> Ese síi cu'naj Félix ro', me síi quene'en sa' daj vaa se tucuanj ní' sij nocoo' man Jesucristó, gaa ne cataj so' se vaa guun raan doj, gaa ne ca'ne' so' cacun' che'é Pabló a. Che'é dan cataj so':

—Asa' ca'na' tanuu uun chij cu'naj Lisias nihánj, ne naqui'yaj cuú 'unj che'é nij soj á —taj síi cu'naj Félix a.

<sup>23</sup> Ne ca'ne' síi cu'naj Félix suun rihaan tanuu uun chij rihaan 'o cientó tanuu se vaa cutumé tanuu man Pabló, tzaj ne ca'vee cachee uun

Pabló doj, ne ca'vee ca'na' nij tuvi' Pabló racuj' nij so' doj man Pabló, qui'yaj tanuu, taj sí cu'naj Félix yo' a.

*Nana nihánj taj xna'anj se vaa yo'oj 'nij Pabló taga', qui'yaj sí cu'naj Félix a*

<sup>24</sup> Dan me se cachén doj güii, gaa ne ca'na' sí cu'naj Félix ga nica so' chana israelita cu'naj Drusila, ne canacúun so' se vaa ca'na' Pabló rihaan so', ne cuno so' nana ca'mii Pabló rihaan so' che'é tucuáan noco' ní' sij amán rá ni'yaj man Jesucristó a. <sup>25</sup> Dan me se cataj xna'anj Pabló rihaan sí cu'naj Félix se vaa no xcúun ní' cunu sa' ní' rihaan Diosé ne no xcúun ní' cutumé ní' man ma'an ní' se vaa ve'é inanj qui'yaj ní' a. Ne ca'mii so' che'é güii ca'ne' Diosé cacun' che'é yuvij a. Gaa ne chucu'vi' ndo'o sí cu'naj Félix, ne cataj so':

—Cuanó nihánj me se ca'anj so' yaj, tzaj ne asa' vaa i'núj rihanj, ne canacunj uún 'unj mán so' á —taj so' rihaan Pabló a.

<sup>26</sup> Danj cataj Félix che'é se me rá so' caráan Pabló sa'anj rihaan ma'an so' che'é rej quirii so' taga' man Pabló, rá so' a. Che'é dan que'ee güii canacúun so' man Pabló ca'na' Pabló rihaan so', ne ca'mii so' ga Pabló a.

<sup>27</sup> Dan me se quisij vij ya yo' 'nij Pabló taga', gaa ne x'néj suun ra'a sí cu'naj Félix, ne catúj sí cu'naj Porcio Festo a. Ne guun rá sí cu'naj Félix qui'yaj so' se luj che'é nij yuvij israelita, ne che'é dan tanáj so' man Pabló taga' a.

## 25

*Nana nihánj taj xna'anj se vaa cataj Pabló se vaa guun rá so' naqui'yaj cuu sí nicaj suun emperador che'é so' a*

<sup>1</sup> Quisij va'nuj güii yáan sí cu'naj Festo sí nicaj suun gobernador, gaa ne curihanj so' chuman' Cesarea cavii so' ndaa chuman' Jerusalén a.

<sup>2</sup> Gaa ne nij xrej atá suun noco'o doj do', nij sí raá doj rihaan nij yuvij israelita do', cuta' nij so' cacun' xráa Pabló rihaan sí cu'naj Festo a. Gaa ne nucaj <sup>3</sup> cachín ni'yaj nij sí israelita

rihaan sí cu'naj Festo se vaa ca'ne' so' suun se vaa ca'na' Pabló ndaa chuman' Jerusalén a. 'O se guun rá nij so' caráan nij so' chrej ne ticavi' nij so' man Pabló a. <sup>4</sup> Che'é dan cataj sí cu'naj Festo se vaa tumé nij tanuu man Pabló chuman' Cesarea a. 'O se rque doj güii nucaj' so' chuman' Cesarea, taj so' a. <sup>5</sup> Gaa ne cataj uún sí cu'naj Festo rihaan nij sí israelita a:

—Che'é dan sese nij tuvi' soj sí guun nucaj ca'anj ndaa chuman' Cesarea ga 'unj ro', ca'anj nij so', ne sese vaa se chi'ii qui'yaj sí cu'naj Pabló, ne cuta' nij so' cacun' xráa Pabló á —taj sí cu'naj Festo rihaan nij so' a.

<sup>6</sup> Dan me se guun raan sí cu'naj Festo 'o tunj güii chuman' Jerusalén ta' asuun, gaa ne nanii so' ndaa chuman' Cesarea, gaa ne yo'ó güii me se ca'anj quitaj so' chruun xlá sa' rej naqui'yaj cuu so' che'é yuvij, gaa ne ca'ne' so' suun rihaan nij tanuu se vaa ca'na' Pabló rihaan so' qui'yaj nij tanuu a. <sup>7</sup> Gaa ne gaa ca'na' Pabló rihaan so', ne man nij sí israelita nanij ndaa chuman' Jerusalén, ne canicun' nij so' nu' anicaj rej x'nuj Pabló, ne caraa ndo'o nij so' cacun' noco'o xráa Pabló, tzaj ne ne ca'vee tijaan nij so' se vaa ya ya qui'yaj so' cacun' yo' ma'. <sup>8</sup> Gaa ne canicaj Pabló, ca'mii nacaj so' che'é ma'an so', cataj so':

—Taj cacun' qui'yáa 'unj rihaan se tucuanj nij sí israelita do', rihaan nuvi' noco'o do', rihaan sí nicaj suun emperador cu'naj César do' a ma' —taj Pabló rihaan sí cu'naj Festo yo' a.

<sup>9</sup> Dan me se guun rá sí cu'naj Festo qui'yaj so' se luj che'é nij yuvij israelita, ne che'é dan cataj so' rihaan Pabló a:

—Ne me rá so' ca'anj so' ndaa chuman' Jerusalén ne ndaa ti'yaj ca'ne' 'unj cacun' che'é so' che'é nij rasuun nihánj na' —taj so', xná'anj so' man Pabló a.

<sup>10</sup> Gaa ne cataj Pabló rihaan so' a:

—Nihánj me nicún' 'unj rihaan so', sij cune' sí nicaj suun emperador cu'naj César se vaa ca'ne' so' cacun'



che'é yuvij á. Ne che'é dan no xcúun so' ca'ne' so' cacun' che'é 'unj nanj adonj. Ne qui'yáá 'unj cacun' rihaan a 'ó nij sí israelitá ma'. Ne aj ne'én so' se vaa ya vaa nana nihánj nana a'mii 'unj rihaan so' chuguanj. <sup>11</sup> Dan me se sese vaa cacun' qui'yáá 'unj ne sese vaa che'é ticavi' nii mán 'unj, ne a'vej 'unj cavi' 'unj á. Tzaj ne sese cacun' rmi' inanj me se nana nij sí nihánj, ne taj a 'ó sí no xcúun tacuachén mán 'unj rihaan nij so' ma'. Cuanó nihánj me se achíin ni'yáá 'unj rihaan sí nicaj suun emperador cu'naj César se vaa ma'an so' ca'ne' cacun' che'é 'unj adonj —taj Pabló rihaan sí cu'naj Festo a.

<sup>12</sup> Dan me se nuchruj raá sí cu'naj Festo ga nij sí narqué chrej man so' daj qui'yaj nij so', gaa ne cataj so' rihaan Pabló a:

—Aj cachíin ni'yáá so' rihaan sí cu'naj César se vaa ma'an so' ca'ne' cacun' che'é so' á. Che'é dan ca'anj so' rihaan so' adonj —taj so' rihaan Pabló a.

*Nana nihánj taj xna'anj daj guun gaa ca'na' Pabló rihaan sí nicaj suun rey cu'naj Agripa do', rihaan ra'vij so' chana cu'naj Berenice do' a*

<sup>13</sup> Dan me se cachén doj güii, gaa ne sí nicaj suun rey cu'naj Agripa do', chana cu'naj Berenice do', ca'na' chuman' Cesarea, ca'na' ni'yaj roj so' sí nicaj suun gobernador cu'naj Festo a. <sup>14</sup> Ne guun raan roj so' que'ee güii chuman' Cesarea a. Che'é dan cataj xna'anj sí cu'naj Festo rihaan sí nicaj suun rey yo' che'é Pabló a. Dan me se cataj so':

—Dan me se sí quináj taga' nihánj qui'yaj sí cu'naj Félix me yo'o so', <sup>15</sup> ne gaa nuu 'unj chuman' Jerusalén, ne nij xrej ata suun nocoo doj do', nij sí uun chij rihaan nij yuvij israelitá do', cataj xna'anj nij so' rihaan 'unj che'é so', ne guun rá nij so' se vaa nari' 'unj cacun' xráá so' ne qui'yáá 'unj sayuun man so' a. <sup>16</sup> Gaa ne cataj xna'anj 'unj rihaan nij so' se vaa nuveé se tucuanj núj sij romanó me tacuachén un ní' man 'o so' ticavi'

nii man so' ma'. Tananj asino yaan quene'en sí ata' cacun' man nij sí cuta' cacun' xráá so', gaa ne ca'mii nacaj so' che'é ma'an so', cataj 'unj rihaan nij so' a.

<sup>17</sup> "Dan me se ca'na' nij so' chuman' Cesarea nihánj, ne ne guun raan 'unj ma'. Tzaj ne yo'ó güii me se quitáá 'unj chruun xlá sa' rej a'ne' 'unj cacun' che'é yuvij, gaa ne ca'ne' 'unj suun rihaan nij tanuu se vaa ca'na' sí 'nij taga' yo' rihaan 'unj qui'yaj nij so' a. <sup>18</sup> Ne gaa ca'na' so', ne nij sí guun rá cuta' cacun' xráá so' ro', canicun' nij so' ne cuta' ndo'o nij so' cacun' xráá so', tzaj ne nuveé cacun' chí'ij me cacun' cuta' nij so' xráá so', rá 'unj ma'. <sup>19</sup> 'O se ino doj vaa rá nij so' ga sí 'nij taga' yo', ni'yaj nij so' tucuáán nocoo ma'an nij so' do', 'o sí cavi' cu'naj Jesús do' a. 'O se vaa i'na' sí cu'naj Jesús, cataj sí 'nij taga' cu'naj Pabló yo' a.

<sup>20</sup> "Dan me se ne quene'én 'unj daj naqui'yaj cuj che'é rasuun vaa danj ma'. Che'é dan xná'anj 'unj man sí cu'naj Pabló yo' sese guun rá so' ca'anj so' chuman' Jerusalén, ne ca'vee ca'ne' 'unj cacun' che'é so' che'é nij rasuun yo', taj 'unj rihaan so' a. <sup>21</sup> Tzaj ne cachíin ni'yaj Pabló se vaa yo'o qui'nij so' taga' nihánj ndaa se ca'vee naqui'yaj cuu sí nicaj suun emperador che'é so' a. Che'é dan ca'ne' 'unj suun rihaan nij tanuu se vaa yo'o cutumé nij so' man Pabló taga' ndaa se ca'nej 'unj man so' rihaan sí cu'naj César yo' a —taj sí cu'naj Festo rihaan sí cu'naj Agripa a.

<sup>22</sup> Gaa ne cataj sí cu'naj Agripa rihaan sí cu'naj Festo a:

—Me rá 'unj cunó ma'an 'unj ca'mii snó'o yo' á —taj so' rihaan sí cu'naj Festo a.

—A'yuj me se cunó so' ca'mii so' adonj —taj sí cu'naj Festo rihaan sí cu'naj Agripa a.

<sup>23</sup> Ne yo'ó güii me se ve'é ndo'o qui'yaj nij yuvij gaa ca'na' sí nicaj suun rey cu'naj Agripa do', chana cu'naj Berenice do', ne catúj roj so' rá

ve' 'yaj nii juntá a. Ne ca'na' tanuu uun chij rihaan 'o mǐj tanuu ca'na' nij sǐi raa man chuman' Cesarea yo' ca'na' gaa roj so' a. Gaa ne ca'ne' sǐi cu'naj Festo suun rihaan nij tanuu se vaa ca'na' Pabló rihaan nij so' qui'yaj nij tanuu a. <sup>24</sup> Ne gaa catúj Pabló, ne cataj sǐi cu'naj Festo rihaan sǐi cu'naj Agripa a:

—Cunó so', sij nicaj suun rey Agripa. Cunó soj sij cunuu chre' ga núj nihánj á. Nihánj me se ni'yaj nij soj man sǐi nihánj á. 'O se rque chuman' Jerusalén do', ndaa ma'an chuman' nihánj do', ca'na' ndo'o nij yuvi israelitá rihanj ne caguáj nij so' cataj nij so' se vaa ne nó xcúun so' gaa i'na' so' doj a ma'. <sup>25</sup> Tzaj ne xcaj 'unj cuentá se vaa taj se chi'ij qui'yaj so', ne taj che'é ticavi' nii man so' qui'yáa 'unj ma'. Tzaj ne ma'an so' cachún ni'yaj rihaan sǐi nicaj suun emperador se vaa ca'ne' ma'an emperador cacun' che'é so', ne che'é dan guun raj se vaa ca'nej 'unj man so' rihaan sǐi nicaj suun emperador adonj. <sup>26</sup> Tzaj ne ne cavii raá 'unj me nana cachron 'unj rihaan yanj ca'nej 'unj rihaan sǐi nicaj suun emperador yo' che'é cacun' tumé sǐi nihánj ma'. Che'é dan ca'na' so' rihaan so' sij nicaj suun rey Agripa do', rihaan yo'ó nij soj do', che'é rej naqui'yaj cuu nij soj che'é so' ne cataj xna'anj nij soj rihaan 'unj me nana cachron 'unj rihaan yanj che'é so' á. <sup>27</sup> 'O se snúú rma'an 'unj, sese ca'nej 'unj man 'o sǐi 'nij taga' rihaan sǐi nicaj suun emperador, sese nuvi nana cataj xna'anj 'unj rihaan so' che'é cacun' tumé sǐi 'nij taga' yo', rá 'unj a —taj sǐi cu'naj Festo rihaan yo'ó nij so' a.

## 26

*Nana nihánj taj xna'anj daj ca'mii Pabló rihaan sǐi nicaj suun rey cu'naj Agripa a*

<sup>1</sup> Gaa ne cataj sǐi cu'naj Agripa rihaan Pabló a:

—Ca'vee ca'mii so' che'é so' á —taj so' rihaan Pabló a.

Gaa ne ticun' ra'a Pabló, ne ca'mii nacaj so' che'é ma'an so', cataj so':

<sup>2</sup> —Aj cavii sa' uxrá 'unj nihánj, che'é se vaa i'núj rihanj ca'mii nacaj 'unj manj rihaan so' cuan', sij nicaj suun rey cu'naj Agripa. Ne nihánj me se ca'mij che'é nu' cacun' cuta' yo'ó nij sǐi israelitá xráj a. <sup>3</sup> 'O se ne'én 'unj se vaa so' me sǐi nicaj cuentá che'é nu' se tucuanj ní' sij israelitá, ne ne'én so' daj vaa nu' nana noco' ní' a. Che'é dan achín ni'yáa 'unj rihaan so' se vaa qui'yáa so' se ndo'o, ne gaa inaj nimán so', ne cunó so' nana a'mij á.

<sup>4</sup> ”Dan me se gaa sǐi tachruu mé 'unj, ne cayáan 'unj chuman' Jerusalén ga yo'ó nij sǐi israelitá, ne aj ne'en cunudanj nij sǐi israelitá se vaa qui'yaj gaa mej sǐi tachruu a. <sup>5</sup> Ne sese guun rá nij so', ne guun nucuaj nij so' cataj xna'anj ma'an nij so' se vaa sij fariseo mé 'unj asino yaan, ne qui'yáa 'unj nu' ndaa vaa 'yaj nij sǐi fariseo, ne nij sǐi fariseo ro', me sǐi nica doj noco' se tucuanj ní' nanj á. <sup>6</sup> Ne nihánj me se cuta' nij sǐi israelitá cacun' xráj, ne nicún' 'unj nihánj rihaan so', che'é se guun ya raj se vaa qui'yaj Diose nu' ndaa vaa cata' tu'va so' rihaan xii ní' gaa naá a. <sup>7</sup> Ne nuvi nigan' yo'ó na'vij cunu' chuvij nij x'ne' nij sǐi israelitá rihaan Diose, che'é se guun ya rá ma'an nij so' se vaa qui'yaj Diose nu' danj che'é nij so' a. Ne che'é rasuun yo' rasuun qui'yaj Diose che'é ní' ro', che'é dan cuta' nij so' cacun' xráj, nanj rey Agripa. <sup>8</sup> Ne me che'é ne amán rá soj se vaa ca'vee cunuu i'na' uún nij sǐi cavi' qui'yaj Diose ga.

<sup>9</sup> ”Dan me se 'unj nihánj me se gaa rque me se guun ya ya rá 'unj qui'yaj ndo'o 'unj sayuun man nij sǐi noco' man Jesucristó sǐi cavii chuman' Nazaret a. <sup>10</sup> Ne danj qui'yáa 'unj rque chuman' Jerusalén nanj á. 'O se 'unj me sǐi canu' man que'ee nij sǐi sa' noco' man Diose taga', ne rque nij xrej ata suun noco' doj se nucuaj rihanj se vaa qui'yaj danj a. Ne gaa ca'ne' núj cacun' che'é nij so'

se vaa cavi' nij so', ne ndaa 'unj me sí cataj se vaa no xcuún nij so' cavi' nij so' adonj. <sup>11</sup> Ne guun que'ee ndo'o ca'anj 'unj cunudanj nij ve' tucu'yón ní' sij israelitá se tucuanj Moisés, ne qui'yáá 'unj sayuun man nij sí noco' man Jesús, ne ndaa rqueé 'unj man nij so' ca'mii chi'ii nij so' che'é Jesucristó, ne che'é se ca'maan ndo'o rá 'unj ni'yaj 'unj man nij so', ne ndaa canocó' 'unj man nij so' ndaa yo'ó chuman' naj gan' che'é rej qui'yáá 'unj doj sayuun man nij so' adonj.

<sup>12</sup> "Dan me se gaa qui'yáj danj, ne 'o güii me se ca'anj 'unj chuman' Damasco, ne aj rqueé nij xrej atá suun noco'o doj rej nucuaj, ne ca'née nij so' mán 'unj ca'anj 'unj qui'yáá 'unj sayuun man nij sí noco' man Jesucristó yanj chuman' Damasco yo' a. <sup>13</sup> Cunó so' nana ca'mij rihaan so' nihánj, nanj rey. 'O se caxuj me yo', ne vaj 'unj chrej, ne rej xta' ro', cuchuguun 'o ya'an nu' anicaj rej nicun' 'unj ga nij sí vaj chrej ga 'unj, ne nucuaj doj ya'an yo' rihaan naán güii á. <sup>14</sup> Dan me se quinij taran' núj rihaan yo'óo, ne cunó 'unj ca'mii yo'o so' rihaan 'unj, ne xna'ánj hebreo ca'mii so', cataj so': "Me che'é 'yáá so' sayuun manj, ga Saulo'. 'O se me rá so' qui'yáá so' sayuun manj, tzaj ne man ma'án so' 'yáá so' sayuun ase 'yaj scúj o' tacanj rihaan chruun sihaa nicaj sí 'yaj suun ga yuntá nanj á", taj sí ca'mii rihanj a. <sup>15</sup> Gaa ne taj 'unj: "Me sí mé so', Señor!", taj 'unj, xna'anj 'unj man so' a.

"Gaa ne cataj sí 'nij ra'a man ní': "Unj ro', me Jesús, ne sij 'yáá so' sayuun man mej adonj. <sup>16</sup> Tzaj ne naxagaa so', canicun' cayá so' á. 'O se nihánj me se curuvi' 'unj rihaan so' che'é se narii 'unj mán so' qui'yaj suun so' rihanj ne nata' so' rihaan yuvii che'é nij rasuun nari' so' cuano do', che'é rej quene'én so' manj do', che'é nij rasuun nari' so' asa' curuvi' uún 'unj rihaan so' rej rihanj doj do' a. <sup>17</sup> Dan me se tinanii 'unj mán so' rihaan nij sí man chiháán so' yuvii

israelitá do', rihaan nij sí yanj do', ne yaj ca'nej 'unj mán so' rihaan nij so', <sup>18</sup> che'é rej naxra' rihaan nij so' ne xcaj nij so' cuentá qui'yáá so', gaa ne tanáj xco nij so' rej rmi' rej uun chij sí chree rihaan nij so', ne canicaj nij so' rihaan Diose rej ranga' rej guun nucuaj nij so' xcaj nij so' cuentá a. Gaa ne ca'vee quinavij nu' cacun' tumé nij so', ne ca'vee cavi sa' nij so' ga nij sí cunuu sa' nimán rihaan Diose, sese cuchuman rá nij so' ni'yaj nij so' mán 'unj, qui'yáá so' á", taj sí 'nij ra'a man ní' rihanj a.

<sup>19</sup> "Ne xcaj so' cuentá, sij nicaj suun rey Agripa. 'O se ne guun nichraj nimanj ma'. Tananj qui'yáá 'unj nu' ndaa vaa cataj Jesucristó rihanj gaa curuvi' so' rihanj rej xta' a. <sup>20</sup> Asino yaan natá' 'unj chuman' Damasco do', chuman' Jerusalén do', nu' estadó Judea do', gaa ne natá' 'unj ndaa rej man nij sí yanj uún a. Natá' 'unj rihaan cunudanj nij yuvii se vaa canicaj nimán nij yuvii canoco' nij so' Diose, ne ve'é qui'yaj nij so' ndaa vaa 'yaj sí canicaj ya nimán nanj adonj. <sup>21</sup> Che'é dan quita'aa nij yuvii israelitá mán 'unj rá nuvií noco'o, ne guun rá nij so' ticavi' nij so' manj a.

<sup>22</sup> "Che'é dan nicun' 'unj rihaan nij soj cuano, ne ta'aj soj me sí yanj uun ne ta'aj soj me sí raa atá suun, tzaj ne Diose me sí racuj manj ndaa cuano nihánj, ne che'é dan natá' 'unj se nana Diose rihaan nij soj a. Tzaj ne ne ino vaa nana natá' 'unj rihaan nij soj cuano ga se nana nij sí nata' se nana Diose gaa naá do', se nana ma'an sí cu'naj Moisés do', gaa cataj xna'anj nij so' daj guun rej rihaan nij so' ma'. <sup>23</sup> Dan me se ma'an nij so' cataj se vaa sí ca'nej Diose tinanii man yuvii rihaan sayuun me se quiran' so' sayuun, ne guun so' sí cunuu i'na' uún asino yaan rihaan yo'óo nij sí cavi', ne nata' so' nana ya rihaan nij yuvii israelitá do', rihaan nij yuvii yanj do' a —taj Pabló rihaan sí cu'naj Agripa yo' a.

<sup>24</sup> Dan me se gaa ca'mii so' danj

rihaan sí cu'naj Agripa, ne caguáj sí cu'naj Festo, cataj so':

—Snúú so', Pablo. Che'é se tucu'yón ndo'o so' yanj ro', che'é dan guun snuj raá so' nanj á —taj so' rihaan Pabló a.

<sup>25</sup> Gaa ne cataj Pabló rihaan sí cu'naj Festo yo' a:

—Ne snuj 'unj, man Festo sij uun chij. Tananj ya vaa nana natá' 'unj, ne nana ve'é vaa no xcuún ní' cuno ní' me nij nana yo' a. <sup>26</sup> 'O se sij nicaj suun rey me sí nihánj, ne so' me sí ne'en daj vaa nu' rasuun natá' 'unj rihaan nij soj cuano á. Ne ne chu'ví' 'unj natá' 'unj nu' nana nihánj rihaan so' ma'. 'O se aj xcaj sí cu'naj Agripa nihánj cuentá che'é nu' rasuun nihánj, rá 'unj á. 'O se nuveé rasuun 'nij yuve me rasuun nihánj a man adonj —taj Pabló rihaan sí cu'naj Festo a.

<sup>27</sup> Ne cataj so' rihaan sí cu'naj Agripa a:

—Ne cataj so' 'o nana rihanj, Agripa. Amán rá so' daj taj se nana nij sí nata' se nana Diose gaa naá na'. Aj ne'én 'unj se vaa amán rá so' nanj adonj —taj Pabló rihaan sí cu'naj Agripa yo' a.

<sup>28</sup> Gaa ne cataj Agripa rihaan so' a:

—Ca'mii so' doj rihanj, gaa ne cuaj guún 'unj sí noco' man Jesucristó, rá so' na' —taj Agripa rihaan Pabló a.

<sup>29</sup> Gaa ne cataj Pabló rihaan so' a:

—Achíin nì'yáá 'unj rihaan Diose se vaa, ca'vee se doj nana ca'mij, ca'vee se noco ndo'o ca'mij, tzaj ne nuveé curuún so' cuchuman rá se nanaj ma'. Tananj me rá 'unj cuchuman rá cunudanj soj sij uno nana a'mij cuano, ne ase vaa 'unj ro', danj gaa soj uún nanj adonj. Tzaj ne se cunumii soj ga aga' ne' nihánj, rá 'unj ma' —taj Pabló rihaan nij so' a.

<sup>30</sup> Gaa ne canicun' caya sí nicaj suun rey do', sí nicaj suun gobernador do', chana cu'naj Berenice do', yo'ó nij sí yanj ga nij so' do', <sup>31</sup> ne curihanj nij so', ne cataj nij so' rihaan tuvi' nij so' se vaa taj vaj cacun'

qui'yaj Pabló, ne ne nó xcuún so' cavi' so' do', qui'nij so' taga' do' ma'.

<sup>32</sup> Gaa ne cataj sí cu'naj Agripa rihaan sí cu'naj Festo a:

—Sese ne cachinj ni'yaj sí nihánj se vaa ca'ne' César cacun' che'é so', ne ca'vee curihanj so' taga' asuun saj á —taj sí cu'naj Agripa rihaan sí cu'naj Festo a.

## 27

*Nana nihánj taj xna'anj se vaa ca'neé sí cu'naj Festo man Pabló ca'anj Pabló chuman' Romá a*

<sup>1</sup> Dan me se guun ya rá sí cu'naj Festo se vaa ca'anj núj ndaa yo'óo nocoo Italia rej ne sí nicaj suun emperador cu'naj César a. Gaa ne tacuachén so' man Pabló do', man yo'ó doj sí 'nij taga' do', rihaan 'o tanuu uun chij rihaan 'o cientó tanuu, ne Julio cu'naj tanuu yo', ne sí nuu rihaan ma'an sí nicaj suun emperador me so' a. <sup>2</sup> Dan me se cavii núj ga tinú' Aristarco sí cavii chuman' Tesalónica chuman' naj estadó Macedonia rque 'o rihoo chéé rihaan na a. Ne xa' rihoo yo', tzaj ne rihoo cavii chuman' Adramitio me yo', ne ca'anj yo' ndaa nij chuman' naj tu'va na ya'anj estadó Asia a. <sup>3</sup> Ne yo'ó güii me se cuchí' núj chuman' cu'naj Sidón, ne ve'é inanj qui'yaj sí cu'naj Julio ga Pabló, ne ca'vej rá so' ca'anj Pabló rihaan nij tuvi' Pabló sí yanj chuman' Sidón yo', che'é rej taj ya'anj nij so' man Pabló a.

<sup>4</sup> Gaa ne cavii uún núj rque rihoo, ne ca'anj uún rihoo, ne cachén núj rej sur rej nichrun' yo'óo taj rihaan na ya'anj cu'naj Chipre a. 'O se go' ndo'o nana rej rihaan rihoo yo' a. <sup>5</sup> Gaa ne cachén uún núj rihaan na ya'anj, ne cachén núj tu'va estadó Cilicia do', estadó Panfilia do', ne cuchí' núj ndaa chuman' Mira chuman' naj estadó Lisia a. <sup>6</sup> Ne chuman' yo' ro', nari' tanuu yo' 'o rihoo cavii chuman' Alejandría, ne rihoo ca'anj ndaa Italia me yo' a. Che'é dan cavii núj rque rihoo yo' qui'yaj tanuu yo' a. <sup>7</sup> Dan



me se nanaj ndo'o cachéé rihoo yo' rque que'ee güii, ne che'é dan sayuun ndo'o vaa cuchi' núj rihaan chuman' Gnido a. Ne ne ca'vee ca'anj núj a doj, qui'yaj nana ma'. Che'é dan cachén núj nichrun' yo'óó taj rihaan na ya'anj cu'naj Creta, ne nichrun' rej cu'naj Salmón rej naj yo'óó Creta cachén núj a. <sup>8</sup> Ne sayuun uxrá vaa cachén núj rej yo', ne cuchi' núj ndaa 'o rej cu'naj Buenos Puertos, ne nichrun' naj chuman' yo' ga chuman' cu'naj Lasea a.

<sup>9</sup> Dan me se aj cachén ndo'o güii, qui'yaj rihoo yo', ne aj cachén güii toco' nij yuvií israelitá x'naa man ma'an nij so' che'é se aráj guee nij so' rihaan Diose, ne nichrun' quisij dió avii nana yuvaa rihaan na ya'anj a. Che'é dan kuchu'vi' núj se vaa quiran' núj sij man rque rihoo yo' sayuun a. Che'é dan narqué Pabló chrej rihaan nij síí man rque rihoo yo', <sup>10</sup> ne cataj so' rihaan nij so' a:

—Ne'én 'unj se vaa xa' rihoo nihánj, tzaj ne sese yo'o ca'anj rihoo nihánj, ne quiran' ndo'o nij rasuun man rque rihoo nihánj do', ma'an rihoo nihánj do', sayuun, ne quirí' ndo'o nij yo', qui'yaj nana yuvaa, ne ndaa cavi' ma'an ní' adonj —taj Pabló rihaan nij so' a.

<sup>11</sup> Tzaj ne tanuu uun chij rihaan 'o cientó tanuu yo' ro', ne cuchuman rá so' se nana Pabló ma'. Tananj cuchumán rá so' se nana síí tuguáj rihoo do', síí si'yaj rihoo do' a. <sup>12</sup> Dan me se rej cu'naj Buenos Puertos yo' ro', nuveé rej sa' quinaj rihoo nu' dió avii nana yuvaa me rej yo' a. Che'é dan nocoo doj ta'aj nij síí man rque rihoo cataj se vaa guun rá nij so' curihanj rihoo rej yo', ne guun rá nij so' se vaa cuchi' rihoo chuman' Fenice ne guun raan rihoo chuman' yo' nu' dió avii nana yuvaa a. Ne chuman' Fenice ro', me chuman' naj yo'óó cu'naj Creta, ne caráán quij rihaan nana yuvaa rej chuman' Fenice, rá nij so' a.

*Nana nihánj taj xna'anj che'é*

*sayuun quiran' nij so' rihaan naya'anj, qui'yaj nana yuvaa a*

<sup>13</sup> Dan me se cavii 'o nana catun' rej rque tu'va na ya'anj, ne guun rá nij so' se vaa guun nucuaj nij so' qui'yaj nij so' ndaa vaa guun rá nij so' a. Che'é dan guun che'e rihoo ca'anj rihoo, ne nichrun' yo'óó cu'naj Creta vaj nij so' qui'yaj nana a. <sup>14</sup> Dan me se doj orá vaj rihoo, gaa ne taj ni'yón cavii 'o nana yuvaa rej xraj rihaan na ya'anj, ne go' uxrá nana yuvaa rihaan rihoo, ne nana cu'naj Euroclidón me yo' xna'ánj griego a. <sup>15</sup> Ne ne guun nucuaj rihoo ca'anj rihoo rej rihaan rihoo ne qui'yaj canaán rihoo rihaan nana yuvaa ma'. Che'é dan ca'ne' rá núj, ne canicaj rihoo ne vaj rma'an rihoo, qui'yaj nana yo' a. <sup>16</sup> Ne cachén núj nichrun' yo'o yo'óó nii taj rihaan na ya'anj, ne yo'óó cu'naj Clauda me yo' a. Ne sayuun uxrá guun nucuaj núj naxcaj núj rihoo cunii nocoo rej xcó rihoo xij ne naqui'yaj raan núj man rihoo cunii yo' rque rihoo xij yo' a. <sup>17</sup> Ne gaa quisij naxcaj núj man rihoo cunii yo', ne numíj nij so' ne' naqui'yaj raan nij so' man rihoo xij yo' a. Dan me se kuchu'vi' ndo'o nij so' se vaa cano rihoo rihaan yo'óó chruu naj rque na ya'anj rej cu'naj Sirte ne quirí' nu' rihoo yo' a. Che'é dan nacué nij so' mantá o' nana rihaan, che'é rej se ca'anj yoo rihoo ma'. Ne me rej ma'an go' nana ro', ca'anj rihoo uún adonj.

<sup>18</sup> Ne yo'ó güii me se che'é se go' uxrá nana rihaan núj, ne che'é dan quirí'íj nij so' nij rasuun man rque rihoo rque na ya'anj, <sup>19</sup> ne güii va'nuj me se ma'an nij so' ra'a nij so' ri'íj nij so' nij rasuun rasuun ma'an yuvií tuguáj rihoo rque na ya'anj, che'é rej cunu yoo rihoo ne nij so' a. <sup>20</sup> Ne güii do', yati' do', ne curuvi' ni'yaj núj que'ee güii a ma'. Ne yo'o go' nana yuvaa rihaan núj, ne che'é dan guun ya rá núj se vaa daj chihaa míj se ca'vee quinanií núj rihaan sayuun yo' a ma'. <sup>21</sup> Dan me se a 'o' nij síí man rque rihoo ne cha' nij so', ne che'é dan

canicun' Pabló sca'núj nij so', ne cataj so':

—Ve'é doj sese cuno nij soj se nanaj, tinuj. 'O se sese ne cavii ní yo'óo cu'naj Creta, ne ne quiran' ní sayuun nihánj, ne ne ca'anj ni'ya cunudanj nij rasuun asuun saj ma'. <sup>22</sup> Ne nihánj me se cuno soj chrej nago' 'unj man soj, ne naqui'yaj niha' soj nimán soj á. 'O se a 'o tuvi' nij soj se cavi' ma'. Maan orún' rihoo nihánj ca'anj ni'ya a. <sup>23</sup> 'O se 'unj me sí noco' man Diose, ne 'yaj suun 'unj che'é so', ne nii cua'aa ro', canicun' yo'o se mozó Diose rihanj, <sup>24</sup> ne cataj so': "Se cuchu'ví so', man Pablo. 'O se no xcúun so' canicún' so' rihaan sí cu'naj César, ne nihánj me se cataj xna'anj 'unj rihaan so' se vaa aj guun rá Diose se vaa caráan Diose rihaan sayuun che'é so' ga cunudanj nij sí nuu rque rihoo nihánj adonj", taj se mozó Diose rihanj a. <sup>25</sup> Che'é dan naqui'yaj niha' soj nimán soj, tinuj. 'O se 'unj me sí amán ya rá ni'yaj Diose se vaa qui'yaj Diose nu' ndaa vaa cataj xna'anj se mozó Diose rihanj adonj. <sup>26</sup> Tzaj ne 'o se cataj se mozó Diose rihanj se vaa ya quiri' rihoo nihánj tu'va 'o yo'óo taj rihaan na ya'anj adonj —taj Pabló rihaan yo'óo nij so' a.

<sup>27</sup> Dan me se quisíj xca'anj güii vaj núj rihaan na ya'anj cu'naj Adria, qui'yaj nana a. Ne rej yan' ro', guun rá nij sí tuguáj rihoo se vaa daj doj cuchí' núj rihaan 'o yo'óo a. <sup>28</sup> Che'é dan xcaj ta'nga' nij so' me daj metró cunuú nuú na, ne xcaj nij so' cuentá se vaa ico xnu' yaan metró nuú na rej yo' a. Gaa ne na'vij nij so' 'o orá nii, ne xcaj ta'nga' uún nij so', ne xcaj nij so' cuentá se vaa ico chij guee metró cunuú nuú na a. <sup>29</sup> Che'é dan cuchu'vi' nij so' se vaa cano rihoo yo' rihaan yujej naj rque na ya'anj ne cachran' rihoo a. Che'é dan ca'anj nij so' rej xco rihoo, ne tananij nij so' ca'anj aga' ganchó rque na ya'anj, che'é rej nucu'lu' aga' yo' rque nij yujej naj rque na ya'anj, ne canicun' rihoo yo' a. Ne guun ndo'o rá nij so'

se vaa cuaj cuaj quisij güii ne guun nucuaj nij so' quene'en nij so' me rej vaj nij so' a. <sup>30</sup> Gaa ne nij sí tuguáj rihoo ro', guun rá nij so' cunanj ma'an inanj nij so', ne quinaniij nij so' rihaan sayuun quiran' tuvi' nij so' qui'yaj rihoo yo', rá nij so' a. Che'é dan tu'va rma'an nij so' cataj nij so' se vaa ca'anj nij so' tananij nij so' doj aga' ganchó rque na ya'anj rej tacúun rihoo, ne ca'anj tananij nij so' rihoo cunii yo' rihaan na ya'anj catuu nij so' a. <sup>31</sup> Tzaj ne ca'mii Pabló rihaan tanuu uun chij rihaan 'o cientó tanuu do', rihaan yo'óo nij tanuu do', cataj so':

—Sese se quináj nij sí nihánj rque rihoo nihánj, ne se ca'vee quinaniij ma'an soj rihaan sayuun a ma' —taj Pabló rihaan nij so' a.

<sup>32</sup> Gaa ne ca'anj nij tanuu, ca'ne' nij tanuu ne' numii rihoo cunii yo', ne quinij ma'an rihoo cunii yo' rihaan na ya'anj, ca'anj ni'ya ma'an yo' a.

<sup>33</sup> Ne nichrun' rá ranga', ne nago' Pabló chrej man yo'óo nij so' se vaa cha nij so' doj se chá a. Ne cataj so':

—Cuan' me síj 'o xnu' güii quinano ndo'o rá nij soj, ne a doj ne cha soj se chá ma'. <sup>34</sup> Che'é dan narque 'unj chrej man nij soj cuano se vaa cha soj á. Gaa ne guun nucuaj soj quinaniij soj rihaan sayuun nanj á. 'O se a 'o yuvé raa a 'o nij soj se ca'anj ni'ya a ma' —taj so' rihaan yo'óo nij so' a.

<sup>35</sup> Síj ca'mii so' danj, gaa ne nicaj so' rachrúun, ne nago' so' gracia rihaan Diose che'é rachrúun ni'yaj cunudanj nij so', gaa ne cuxra' ta'aj so' rachrúun, ne guun che'e so' chá so' a. <sup>36</sup> Gaa ne guun niha' rá cunudanj nij so', ne ndaa ma'an nij so' chá uún a. <sup>37</sup> Ne cunudanj núj sij vaj rque rihoo yo' ro', me vij cientó táa va'núj chihaa xnu' yaan ya yuvii a. <sup>38</sup> Ne gaa quisíj caraa rque nij so', ne quiri'ij nij so' nu' 'núú trigó rihaan na ya'anj, che'é rej gaa yoo doj rihoo a.

<sup>39</sup> Dan me se quisíj güii, ne quene'en núj yo'óo, tzaj ne ne cunuú yaan núj yo'óo yo' a ma'. Tzaj ne quene'en nij so' 'o rej atúj yanij doj

tzin' na ya'anj, ne naj yo'óo chruu tu'va na ya'anj rej yo' a. Ne guun rá nij so' ca'anj rihoo rej yo' sese ca'vee ca'anj rihoo a. <sup>40</sup> Che'é dan ca'ne' nij so' ne' noco' nij aga' ganchó, ne quináj nij aga' ganchó rque na ya'anj, qui'yaj nij so' a. Ne nache nij so' ne' numii chruun tuguáj rihoo, ne naxumaan mantá rej tacúún rihoo, qui'yaj nij so', ne guun rá nij so' go' nana rihaan mantá ne ca'anj rihoo rej naj yo'óo chruu yo', rá nij so' a. <sup>41</sup> Tzaj ne ca'anj rihoo canó rihoo xráá 'o tacaan yo'óo chruu naj rque na, ne raan canó tacúún rihoo yo'óo chruu, ne ne ca'vee curihanj yo' a ma'. Ne nucuaj ndo'o go' na rej xco rihoo, ne daj doj quirí' rej xco rihoo, qui'yaj na yo' a. <sup>42</sup> Ne guun rá nij tanuu ticavi' nij so' man nij sí 'nij taga' tumé nij so', che'é rej se ca'vee go' nij so' xtáj rihaan na ne cunanj nij so' rihaan nij tanuu a. <sup>43</sup> Tzaj ne tanuu uun chij rihaan 'o cientó tanuu ro', ne ca'vej rá so' cavi' Pabló ma'. Che'é dan caráán so' chrej se qui'yaj yo'óo nij tanuu danj ma'. Ne ca'ne' so' suun se vaa nij sí ne'en go' xtáj rihaan na ro', güej asino nij so' rihaan na go' nij so' xtáj rihaan na ca'anj nij so' rihaan yo'óo a. <sup>44</sup> Ne yo'óo nij so' ro', cano' nij so' rcuchra' do', chruun cavii rihoo yo' gaa cachran' rihoo do', ne ca'anj nij so' rihaan yo'óo yo', taj so' a. Ne danj qui'yaj nij so', ne cuchi' cunudanj nij so' rihaan yo'óo, ne quinanii cunudanj nij so' a.

## 28

*Nana nihánj taj xna'anj daj qui'yaj Pabló yo'óo cu'naj Malta a*

<sup>1</sup> Dan me se gaa cuchi' sa' núj yo'óo taj rihaan na ya'anj yo', ne xcaj núj cuentá se vaa yo'óo cu'naj Malta me yo' a. <sup>2</sup> Ne nij sí chihanj yo'óo yo' ro', ve'é uxrá qui'yaj nij so' ga núj a. 'O se nicaj tuvi' ndo'o nij so' ga núj, ne che'é se caman' maan ne acoj tiha', ne che'é dan naran' nij so' ya'an cunuun guun núj a. <sup>3</sup> Gaa ne naran' Pabló 'o nánj rca', ne cuta' so' rihaan ya'an

a. Ne che'é se ya'aan ndo'o ya'an, ne che'é dan curihanj 'o xcuáá yuvaa rque rca' yo', ne canó xo' ra'a Pabló a. <sup>4</sup> Ne gaa quene'en nij sí man rej yo' se vaa noco' xcuáá ra'a Pabló, ne cataj nij so' rihaan tuvi' nij so' a:

—Ya ya sij ticavi' yuvij me sí nihánj nanj á. 'O se nda' se quinanii so' rihaan na ya'anj, tzaj ne che'é se tumé so' cacun', ne che'é dan ne no xcúún so' gaa i'na' so' ma' —taj nij so' rihaan tuvi' nij so' a.

<sup>5</sup> Tzaj ne nacunan' Pabló ra'a so', ne quinij xcuáá rihaan ya'an, ne ne qui'yaj chi'ii xcuáá a doj man Pabló a ma'. <sup>6</sup> Tzaj ne nij sí man yo'óo yo' ro', guun rá nij so' se vaa caraa cu'maan ra'a so', ase taj ni'yón cavi' so' ne naxru' so' rihaan yo'óo, tzaj ne gaa guun raan na'vij nij so' quiran' so' danj, ne gaa quene'en nij so' se vaa ne quiran' so' a doj se chi'ii, ne noná nij so' se nana' nij so', ne cataj nij so' se vaa 'o ya'anj me Pabló a.

<sup>7</sup> Dan me se nichrun' rej yo' me se naj to'óo sí uun chij doj rihaan yo'óo taj rihaan na ya'anj yo', ne Publio cu'naj so' a. Ne nicaj tuvi' so' ga núj, ne va'núj güii ve'é taj ya'anj so' man núj a. <sup>8</sup> Dan me se naca' ndo'o rej Publio yo', ne naj so' rihaan yuvéé, ne ran' ndo'o so' chi'ii ton a. Gaa ne catúj Pabló rej naj so', ne cachúún ni'yaj Pabló rihaan Diose che'é so', gaa ne cuta' Pabló ra'a Pabló xráá so', ne dan me se nahuun sa' so', qui'yaj Pabló a. <sup>9</sup> Gaa quisíj qui'yaj Pabló danj, ne yo'óo nij sí anó chi'ii yanj yo'óo yo' ro', ca'na' nij so' uún rihaan Pabló, ne nahuun sa' nij so', qui'yaj Pabló a. <sup>10</sup> Gaa ne caráj cochroj uxrá nij so' rihaan núj, ne gaa curihanj núj yo'óo yo', ne rque' nij so' rihaan núj cunudanj nij rasuun cachiin man núj a.

*Nana nihánj taj xna'anj se vaa cuchi' Pabló chuman' Romá a*

<sup>11</sup> Dan me se cachén va'núj yavii, gaa ne cavii núj rque yo'óo rihoo chéé rihaan na ca'anj núj a. Ne xa' rihoo yo', tzaj ne rihoo quináj sa' tu'va yo'óo taj rihaan na ya'anj yo' nu' nij

yavii avii nana yuvaa me yo', ne rihoo cavii chuman' Alejandria me yo', ne no se tinanga' roj ya'anj cuaté cu'naj Cástor ga Pólux rihaan rihoo yo' a. <sup>12</sup> Dan me se cuchí' núj chuman' cu'naj Siracusa, ne va'núj güii caran' núj chuman' yo' a. <sup>13</sup> Gaa ne cavii uún rihoo chuman' Siracusa, ne cachén rihoo nichrun' tu'va na ya'anj, ne cuchí' rihoo ndaa chuman' Regio a. Gaa ne cachén 'o güii, gaa ne cavii 'o nana rej rque rihaan na ya'anj, ne ca'anj rihoo, ne rque vij güii cuchí' núj ndaa chuman' cu'naj Puteoli a. <sup>14</sup> Ne chuman' Puteoli ro', nari' núj doj tinúú ní', ne cachín ni'yaj nij so' rihaan núj se vaa caran' núj chij güii ga nij so' a. Ne gaa quisíj chij nij güii, ne nayón núj chrej, ne ca'anj núj chrej vaj ndaa chuman' Romá a. <sup>15</sup> Ne cuchí' nana che'é núj rihaan nij tinúú ní' sí yanj chuman' Romá, ne ca'na' nij so' nari' tuvi' nij so' ga núj chuman' cu'naj Foro de Apio do', chuman' cu'naj Tres Tabernas do' a. Ne gaa quene'en Pabló man nij so', ne nago' so' graciá rihaan Diose, ne nari' nucuj nimán so' a.

<sup>16</sup> Ne gaa quisíj catúj núj chuman' Romá, ne tacuachén tanuu uun chij rihaan 'o cientó tanuu man nij sí 'nij taga' rihaan yo'ó tanuu uun chij doj, ne ca'vej rá nij sí nicaj suun caran' Pabló rá 'o ve' ne cayáán orún' so' ga tanuu tumé man so' a.

*Nana nihánj taj xna'anj daj ca'mii Pabló ga nij sí uun chij rihaan nij yuvii israelitá yanj chuman' Romá a*

<sup>17</sup> Dan me se cachén va'núj güii, gaa ne canacúún Pabló man nij sí uun chij rihaan nij yuvii israelitá yanj chuman' Romá se vaa cunuu chre' nij so' ga so' a. Ne gaa quisíj cunuu chre' nij so', ne cataj so' rihaan nij so' a:

—Xa' 'unj nihánj, tzaj ne taj vaj cacun' qui'yáa 'unj rihaan tuvi' ní' sij israelitá do', rihaan se tucuanj xii ní' do' man tinuj. Tzaj ne tuvi' ní' sí yanj chuman' Jerusalén ro', numíj nij so' manj ne tacuachén nij so' manj rihaan nij sí romanó adonj. <sup>18</sup> Ne

nij sí romanó ro', taj se vaa taj che'é caví' 'unj rá nij so' gaa naqui'yaj cuu nij so' che'ej ma'. Ne guun rá nij so' quirii nij so' taga' manj a. <sup>19</sup> Tzaj ne cuta' ndo'o nij sí israelitá yo' cacun' xráj, ne che'é dan nó xcúnj cachinj ni'yáj rihaan sí cu'naj César se vaa ca'ne' so' cacun' che'ej a. Tzaj ne taj a 'ó cacun' cuta' 'unj xráá soj sij man chiháán 'unj ma'. <sup>20</sup> Che'é dan canacúún 'unj man nij soj ca'na' soj, che'é se guun rá 'unj quene'én 'unj man soj do', ca'mii 'unj ga soj do' a. 'O se che'é sí ca'vee qui'yaj cavii sa' ní' sij israelitá me se numii 'unj 'yaj aga' ne' nihánj adonj —taj Pabló rihaan yo'ó nij sí israelitá yo' a.

<sup>21</sup> Gaa ne cataj nij so' rihaan Pabló a:

—Xa' nij tuvi' ní' sí yanj estadó Judea, tzaj ne taj yanj cartá ca'neé nij so' rihaan núj nayaa núj ma'. Ne a 'ó tinúú ní' ne ca'na' rihaan núj nata' nana chi'ii che'é so' rihaan núj ma'. <sup>22</sup> Ne vaa che'é cataj ma'án so' rihaan núj daj uun rá so', rá núj a. 'O se tucuaán ino noco' nij tuvi' nij soj me se ne'en núj se vaa me rej ma'an a'mii chi'ii yuvii che'é tucuaán yo' nanj á —taj nij so' rihaan Pabló a.

<sup>23</sup> Dan me se cachrón nij so' güii ca'na' uún nij so' ve' yanj Pabló, ne güii yo' me se ca'na' que'ee tuvi' nij so' a. Gaa ne nata' Pabló rihaan nij so' che'é suun uun chij Diose nimán yuvii do', rihaan chumii nihánj vaa güii do' a. Ne nayaa so' se tucuanj sí cu'naj Moisés do', nana cachrón nij sí nata' se nana Diose rihaan yanj gaa naá do', ne cataj xna'anj so' me che'é no xcúún nij so' cuchuman rá nij so' cunó nij so' se nana Jesucristó a. Dan me se asij na'yaan guun che'e so' ca'mii so' rihaan nij so', ne ndaa ca'anj güii navij ca'mii so' a. <sup>24</sup> Ne ta'aj nij so' ro', cuchumán rá se nana so', ne yo'ó ta'aj nij so' ne cuchuman rá nana yo' ma'. <sup>25</sup> Ne ne guun cyaan rá cunudanj nij so' a ma'. Ne guun che'e nij so' ca'anj nij so' a. Tzaj ne gaa ataa ca'anj nij so', ne ca'mii Pabló orún' nana rihaan nij so', cataj so':



—Cunaj uxrá vaa nana nihánj nana rqué Nimán Diose rihaan xii ní' gaa ca'mii sí cu'naj Isaías sí nata' se nana Diose gaa naá rihaan nij so' a. <sup>26</sup> Nana ca'mii Isaías rihaan nij so' me nana ca'mii ma'an Diose rihaan so' a: “Cuchí' so' rihaan nij so' ne cataj xna'anj so' rihaan nij so' se vaa catuu uxrá nana xréé nij so', tzaj ne se xcaj nij so' cuentá ma'. Ne ni'yaj uxrá nij so', tzaj ne se quene'en nij so' ma'. <sup>27</sup> 'O se caráán ma'an nij yuvií nihánj rihaan nij so' che'é rej na'vej rá nij so' quene'en ma'an nij so', ne caráán nij so' xréé nij so', che'é rej na'vej rá nij so' cunō nij so' uún a. Ne ne atúj nana nimán nij so', 'yaj nij so', che'é yan na'vej rá nij so' xcaj nij so' cuentá ne canicaj nimán nij so' ma'. 'O se na'vej rá nij so' nahuun sa' nimán nij so' qui'yáá 'unj a man adonj”, me se nana Diose ca'mii sí cu'naj Isaías gaa naá a. <sup>28</sup> Che'é dan xcaj soj cuentá se vaa aj ca'anj nana nihánj rihaan nij sí yaníj, ne nij so' me sí cuchuman rá se vaa tinanii Diose man nij so' rihaan chrej chi'ii uun chij nimán nij so' a. 'O se nij so' me sí cunō ya nana nihánj nanj á —taj Pabló rihaan nij sí uun chij rihaan nij yuvií israelitá yanj chuman' Romá yo' a.

<sup>29</sup> Síj ca'mii so' danj, gaa ne cavii nij yuvií israelitá yo' ca'anj nij so', ne ca'mii canó tuvi' ma'an nij so' ga tuvi' nij so' a.

<sup>30</sup> Dan me se vij ya yo' cayáán Pabló chuman' Romá yo', ne ma'an so' go' tu'vee ve' ne so' a. Ne ve'é ca'mii so' ga cunudanj nij sí ca'na' ni'yaj man so' a. <sup>31</sup> Ne ca'mii natáj so' che'é suun uun chij Diose nimán yuvií do', rihaan chumií nihánj vaa güii do', ne tucu'yón so' se nana Jesucristó sij 'nij ra'a man ní', ne a doj ne cuhu'vi' so', ne ne caráán nii chrej rihaan so' qui'yaj so' danj a ma'.

**Nihánj me 'o yanj  
cartá qui'yaj síí cu'naj  
Pablo ca'néé so'  
rihaan nij yuvii noco'  
man Diose yanj  
chuman' cu'naj Romá  
a**

<sup>1</sup> 'Unj me síí cu'naj Pablo, ne 'yaj sunj rihaan Jesucristó a. Dan me se canacúún Jesucristó mán 'unj guún 'unj apóstol che'é rej nata' 'unj se-nanā Diose nana sa' rihaan yuvii, <sup>2</sup> ne dan me se gaa naá cataj Diose rihaan nij síí nata' se-nanā Diose gaa naá, ne vaa güii tinanii ya Diose man yuvii rihaan sayuun, ne cuno nij síí nata' se-nanā Diose, ne cachrón nij so' nana ca'mii Diose rihaan yanj cu'naj danj Diose nanj adonj.

<sup>3-4</sup> Dan me se cataj xna'anj Diose che'é Jesucristó sij 'nij ra'a man ní', ne dan me se ta'níí Diose me Jesucristó, ne sij noco' xna'anj tuvi' ga síí cu'naj David síí cane gaa naá me so', ne dan me se ase vaa nee man síí cu'naj David ro', danj vaa nee man so' uún, tzaj ne cavi' so', gaa ne cunuu i'na' uún so', ne che'é dan me ne'en ní' se vaa ya ta'nij Diose me so' ne síí sa' nimán me uún so' a.

<sup>5</sup> Inanj che'é Jesucristó me qui'yaj Diose se luj che'ej se vaa cune' Diose manj ca'anj 'unj rihaan nij yuvii yaníj a. Dan me se ne ca'anj 'unj rihaan nij yuvii israelitá ma'. Tzaj ne ca'anj 'unj rihaan nij yuvii yaníj, ne dan me se me rá Diose cataj xna'anj 'unj se-nanā Diose rihaan nij yuvii yaníj yo', che'é rej cuchuman rá nij so' nana sa' yo', gaa ne cuno nij so' rihaan Diose adonj. <sup>6</sup> Ne yuvii yaníj me ta'aj nij soj uún, ne canacúún Jesucristó man ma'an soj sij yaníj canoco' soj man so' adonj.

<sup>7</sup> Dan me se 'yáá 'unj yanj nihánj ca'nej 'unj rihaan nij soj sij yanj chuman' Romá sij 'ee ndo'o rá Diose man,

ne dan me se canacúún Diose man soj guun soj síí gaa sa' nimán, ne me raj qui'yaj Rej ní' Diose qui'yaj Jesucristó sij 'nij ra'a man ní' qui'yaj se luj che'é soj, ne me raj gaa xej nimán soj, qui'yaj uún roj so' adonj.

*Nana nihánj taj xna'anj se vaa me ndo'o rá síí cu'naj Pablo cuchí' so' chuman' Romá a*

<sup>8</sup> Cuno yuvii man nu' cachra' rihaan chumii se vaa amán rá nij soj ni'yaj soj Diose, ne che'é dan me nagó' 'unj graciá rihaan Diose, ne racuúj Jesucristó mán 'unj nago' 'unj graciá rihaan Diose che'é cunudanj soj ei. <sup>9</sup> Dan me se 'yaj suun 'unj rihaan Diose, ne natá' 'unj nana sa' se-nanā ta'níí Diose síí cu'naj Jesucristó, ne che'é dan ne'en Diose se vaa ya ya niganj achíín ni'yáj rihaan Diose che'é soj ei. <sup>10</sup> Ne gaa achíín ni'yáj rihaan Diose, ne achíín ni'yáj che'é soj, ne dan me se achíín ni'yáj rihaan Diose se vaa ca'vej so' cuchij chiháán soj vaa güii, <sup>11</sup> ne me raj quene'enj man soj, ne me raj narquej chrej nucuaj man soj, che'é rej quinari' nucuaj nimán soj a. <sup>12</sup> Dan me se nucuaj ndo'o rá cunudanj ní' man tuvi' ní', ne che'é dan me asa' nari' tuvi' ní', ne narque ní' chrej nucuaj man tuvi' ní' á. <sup>13</sup> Ne me raj quene'en soj se vaa guun que'ee güii cachronj cuchij chiháán soj, tinuj, nocoj. Tzaj ne ne ca'vee cuchij, che'é se vaa ndo'o suun rihanj, tzaj ne ase vaa natá' 'unj rihaan yo'ó nij yuvii yaníj ro', danj gaa guee nata' 'unj rihaan soj a. Ndaa síj, gaa ne cunuu rii doj tuvi' ní', qui'yaj ní' adonj. <sup>14</sup> Dan me se che'é se no' xcúún 'unj nata' 'unj rihaan cunudanj nij yuvii yaníj ro', che'é dan nata' 'unj rihaan soj, ne dan me se rihaan nij síí man chuman' noco' do', rihaan nij síí yanj quij do', rihaan nij síí avii raá do', rihaan nij síí ne nica' cuentá do', rihaan cunudanj nij so' natá' 'unj a. <sup>15</sup> Che'é dan niha' ndo'o raj cuchij chuman' Romá ca'mii natáj 'unj se-nanā Diose nana sa' rihaan soj uún adonj.

*Nana nihánj taj xna'anj se vaa vaa ndo'o yu'vee nó se-nana Diose nana sa' a*

<sup>16</sup> Taj a doj chrej na'aj nó rihañj ca'mij se-nana Diose nana sa' ma'. 'O se nana nucuaj uxrá me se-nana Diose, ne dan me se ca'mii Diose se-nana Diose cunõ yuvii, ne cuchuman rá nij yuvii cunõ nij yuvii nana, ne tinanii Diose man nij yuvii rihaan sayuun, ne dan me se asino yaan me rá Diose tinanii Diose man nij yuvii israelitá rihaan sayuun, ne me rá uún Diose tinanii Diose man nij yuvii yaníj rihaan sayuun uún adonj. <sup>17</sup> Dan me se cataj se-nana Diose rihaan ní' se vaa ca'vee cunuu sa' nimán ní' rihaan Diose, qui'yaj Diose, gaa ne amán rá ní' ni'yaj ní' Diose, ne che'é dan cunuu sa' nimán ní' rihaan Diose a. Ndaa síj, gaa ne cuchuman doj rá ní' ni'yaj ní' man Diose a. Veé 'o cuyaan vaa nana nihánj ga nana no rihaan danj Diose, taj yo' se vaa: "Maan che'é se amán rá ní' ni'yaj ní' man Diose, che'é dan cunuu sa' nimán ní', ne gaa i'na' ní' rihaan Diose nu' cavii nu' ca'anj adonj", taj danj Diose a.

*Nana nihánj taj xna'anj che'é cacun' qui'yaj yuvii a*

<sup>18-19</sup> Aj cataj xna'anj Diose síi nicun' xta' rihaan ní' se vaa a'maan rá Diose ni'yaj Diose cunudanj se chi'ii 'yaj nij yuvii, ne me rá Diose xcaj nij yuvii cuentá se vaa síi uun chij sa' me so', ne che'é dan qui'yaj Diose daj a rasuun man rihaan chumii nihánj ni'yaj yuvii a. Aj ne'en yuvii rasuun, ne xcaj nij yuvii cuentá se vaa síi uun chij sa' ndo'o me Diose, tzaj ne inanj cacun' 'yaj nij yuvii, ne che'é dan taj se 'yá' cunõ nij yuvii nana ya a ma'. Che'é dan me a'maan rá Diose ni'yaj Diose man nij yuvii a. <sup>20</sup> Dan me se gaa qui'yaj Diose chumii, ne curuvi' nu' rasuun qui'yaj Diose ni'yaj yuvii, ne nuvi' ma'an Diose ni'yaj yuvii, tzaj ne ne'en yuvii nij rasuun qui'yaj Diose, ne xcaj nij yuvii cuentá se vaa síi uun chij ndo'o me Diose, ne dan me se xcaj nij yuvii cuentá se vaa ya

orún' so' me Diose, ne xcaj nij yuvii cuentá se vaa gaa nucuaj ndo'o Diose nu' cavii nu' ca'anj, rá Diose a. Che'é dan sese cataj nij yuvii se vaa ne ne'en nij yuvii daj vaa Diose, ne síi ne me nij yuvii nanj adonj. 'O se aj quene'en nij yuvii nu' rasuun qui'yaj Diose adonj.

<sup>21</sup> Dan me se aj quene'en nij yuvii daj vaa Diose, tzaj ne ne cataj nij yuvii se vaa sa' vaa Diose ma'. Ne nago' nij yuvii graciá rihaan Diose ma'. Me rá nij yuvii cavii raá ma'an nij so' daj vaa Diose, tzaj ne se guun nucuaj nij so' qui'yaj nij so' danj ma'. Che'é dan inanj raá ma'an nij so' vaj nij so', ne ne ca'vee xcaj nij so' cuentá a ma'.

<sup>22</sup> Síi cuu raá me nij so', taj ma'an nij so', tzaj ne ca'mii ne nij so', ne tananj nahuun nij so' síi ni'yon doj a.

<sup>23</sup> Diose me síi ve'é ndo'o vaa, ne daj chihaa míj ne avi' so', ne che'é dan no xcúun yuvii canoco' yuvii man so' adonj. Tzaj ne na'vej rá nij yuvii canoco' nij yuvii Diose ya ma'. Maan se yuvii do', xtâj do', xcuu do', xcuáa do', tinanga' nij yuvii, ne yo'ó rasuun 'anj ni'ya uun rihaan yo'óo nihánj tinanga' nij so', ne taj nij so' se vaa ya'anj me tinanga' nij so', taj nij so' nanj adonj.

<sup>24</sup> Che'é dan ca'ne' rá Diose ga nij so' qui'yaj nij so' me se nij me rá ma'an nij so' qui'yaj nij so', ne inanj se nij ndo'o qui'yaj nij so' nanj adonj. Dan me se qui'yaj ndo'o nij so' cacun' man ma'an nij so', ne inanj se nij qui'yaj nij so' ga tuvi' nij so', <sup>25</sup> ne se-nana Diose nana ya ne ca'vej nij so' cunõ nij so' a ma'. Maan se nana ne cuno nij so' nanj adonj. Ne na'víj nij so' rihaan nij rasuun qui'yaj Diose, tzaj ne rihaan ma'an Diose ne na'vij nij so' ma'. Ne Diose me síi guun chij uxrá rihaan cunudanj rasuun nu' cavii nu' ca'anj adonj. Veé danj gaa ya ei.

<sup>26</sup> Che'é dan ca'ne' rá Diose ga nij yuvii qui'yaj ma'an nij yuvii se nij, ne nij chana me se ne ca'vej rá nij chana cotoj nij no' ga nicá nij no' a ma'. 'O

se naqui'yaj nij ta'aj nij chana chii man nij chana, ne otoj nij no' ga tuvi' chana ma'an nij no' nanj adonj. <sup>27</sup> Ne adi' se 'yaj nij chana ga tuvi' chana nij no' ro', danj qui'yaj guee nij snó'o uún ga tuvi' sno'o so' uún nanj adonj. Dan me se síj cotoj nij snó'o ga nica nij so', ne guun rá nij so' cotoj nij so' ga tuvi' sno'o nij so', ne nij ndo'o qui'yaj nij snó'o, ne quiran' nij so' sayuun che'é se nij qui'yaj nij so' adonj.

<sup>28</sup> Ne ca'vej rá nij yuvii quene'en nij yuvii daj vaa Diose a ma'. Che'é dan ca'ne' rá Diose ga nij yuvii, ne navij raá nij yuvii snúú nanj á. Ndaa síj, gaá ne inanj se nij 'yaj nij yuvii, ne dan me se 'yaj nij so' inanj se na'vej rá Diose qui'yaj nij so' nanj adonj. <sup>29</sup> Quij vaa nimán nij yuvii a. Inanj me rá nij yuvii guun nij yuvii sí ru'vee doj, ne uun xcoj ruvaa rá nij yuvii ni'yaj nij so' tuvi' nij so' a. Ticavi' nij yuvii tuvi' nij yuvii, gaá ne anicaj nij yuvii unu' nij so' a. Nano' ndo'o nij yuvii daj qui'yaj nij yuvii, qui'yaj chi'ii nij yuvii man tuvi' nij yuvii a. Nanó nij so' cuentó ne che'é tuvi' nij so', <sup>30</sup> ne nij a'mii nij so' che'é tuvi' nij so' a. Na'vej uxrá rá nij so' ne'en nij so' Diose a ma'. Inanj nana xcoj ruvaa a'mii nij so' ga tuvi' nij so' a. Síj sa' uxrá me nij so', rá nij so', ne che'é dan guun chij nij so', rá nij so' a. Niganj yaj a'yuj nuchruj raá nij so' daj gaá qui'yaj nij so', qui'yaj chi'ii nij so' man tuvi' nij so' a. Ne uno nij so' a'mii rej nij so' a'mii nii nij so' a'mii a ma'. <sup>31</sup> Síj ni'yon me nij so', ne a'ó tuvi' nij so' ne nucuaj rá ni'yaj man nij so' a ma'. Ne 'ee rá nij so' tuvi' nij so' ma'. <sup>32</sup> Ne'en nij so' se vaa quiran' nij so' sayuun, qui'yaj Diose, tzaj ne ne acaj nij so' cuentá ni'yaj nij so' nana a'mii Diose a ma'. Maan se inanj cacun' 'yaj nij so', ne ndaa niha' rá nij so' ni'yaj nij so' man yo'ó yuvii 'yaj cacun' adonj.

## 2

*Nana nihánj taj xna'anj daj qui'yaj Diose asa' ca'ne' Diose cacun' che'é 'o*

### *'o yuvii a*

<sup>1</sup> Me che'é taj so' se vaa orún' tuvi' so' tumé cacun' ga. 'O se 'o cuyaan vaa cacun' 'yaj ma'án so' ga cacun' 'yaj tuvi' so', ne sese cuta' so' cacun' xráá tuvi' so', ne cuta' uún nii cacun' xráá ma'án so' adonj. <sup>2</sup> Ya uxrá Diose me sí ca'ne' cacun' che'é cunudanj sí 'yaj danj adonj. Dan me se inanj nana ya ca'mii Diose güii ca'ne' so' cacun' che'é yuvii, ne nu' sí chi'ii ro', quiran' ndo'o nij so' sayuun, qui'yaj Diose ei. <sup>3</sup> Dan me se utá' so' cacun' xráá tuvi' so', ne 'o cuyaan vaa cacun' 'yaj ma'án so' uún a. Asa' ca'vee quinanii so' rihaan sayuun asa' ca'ne' Diose cacun' che'é cunudanj yuvii, rá so' ga. <sup>4</sup> Me che'é ne guun ya rá so' se vaa me rá Diose qui'yaj sa' Diose che'é so' ga. Ne me rá uún Diose caraá x'naa Diose che'é so' adonj. Na'vej rá Diose qui'yaj Diose sayuun man so' ma'. Ne ne'en so' ase Diose me sí 'ee rá ni'yaj man so' a. Ne me rá Diose canicaj nimán so' canocó so' man so' adonj.

<sup>5</sup> Tzaj ne veé dan me se na'vej uxrá rá so' tanáj so' chrej noco' so', ne na'vej rá so' canicaj nimán so' canocó so' man Diose ma'. Ne vaa güii ca'ne' Diose cacun' che'é yuvii, ne ca'mii ya Diose, ne caxrii yuvaa Diose man cunudanj nij sí tumé cacun', ne dan me se caxrii yuvaa Diose man ma'án so' uún adonj. Ma'án so' qui'yaj caxrii yuvaa Diose man so' nanj á. <sup>6</sup> Dan me se ca'ne' Diose cacun' che'é 'o 'o yuvii, ne sese sa' qui'yaj yo'o so', ne sa' qui'yaj Diose ga so', ne sese yo'o so' qui'yaj cacun', ne ca'anj so' rihaan ya'an, qui'yaj Diose a. Danj gaá qui'yaj Diose adonj.

<sup>7</sup> Dan me se ta'aj yuvii racuíj man tuvi' nij so', ne inanj 'yaj nij so' se sa' che'é tuvi' nij so', che'é rej cataj Diose se vaa sa' qui'yaj nij so' a. Me rá nij so' cayáán nij so' ga Diose nu' cavii nu' ca'anj, ne ya uxrá danj gaá qui'yaj Diose á. Cayáán nij so' ga Diose nu' cavii nu' ca'anj, qui'yaj Diose adonj. <sup>8</sup> Xcoj ruvaa ndo'o rá yo'ó ta'aj yuvii, ne ne uno nij so' nana ya ma'. Maan se tucuaán chi'ii inanj noco' nij



so', ne che'é dan caxrii yuvaa Diose man nij so' a. <sup>9</sup> Qui'yaj Diose sayuun man cunudanj nij síi qui'yaj se nij, ne quiran' ndo'o nij so' sayuun, qui'yaj Diose, ne asino ca'ne' Diose cacun' che'é nij síi israelitá, gaa ne guun che'e so' ca'ne' so' cacun' che'é nij yuvii yaníj a.

<sup>10</sup> Tzaj ne sa' uxrá qui'yaj Diose ga nij yuvii qui'yaj se sa', ne Diose me síi cataj se vaa sa' qui'yaj nij so', ne gaa xej nimán nij so', ne se cuchu'vi' nij so', qui'yaj Diose ma'. Danj qui'yaj uún Diose che'é nij yuvii israelitá qui'yaj se sa', gaa ne danj qui'yaj uún so' che'é nij yuvii yaníj a. <sup>11</sup> Veé 'o cyaan vaa cunudanj ní' rihaan Diose, ne 'o cyaan qui'yaj Diose che'é 'o 'o ní', ne dan me se ase vaa qui'yaj ní' gaa cayáán ní' rihaan chumii nihánj ro', danj gaa guee qui'yaj Diose ga ní' adonj.

<sup>12</sup> Yuvii noco' se-tucuanj Moisés me nij yuvii israelitá, ne che'é dan, sese ne 'yaj nij yuvii israelitá nu' se-tucuanj Moisés, ne qui'yaj Diose sayuun man nij so' a. Ne noco' nij yuvii yaníj se-tucuanj Moisés, tzaj ne ne'en ma'an nij so' daj me rá Diose qui'yaj nij so', ne che'é dan quiran' nij so' sayuun sese se ca'vej rá nij so' qui'yaj nij so' ndaa vaa taj Diose adonj. <sup>13</sup> Ca'vee se ne'en uxrá ní' daj vaa se-tucuanj Moisés, tzaj ne sese se qui'yaj ní' ndaa vaa taj tucuáán yo', ne se cunuu sa' nimán ní' rihaan Diose ma'. Tzaj ne sese qui'yaj ní' ndaa vaa taj tucuáán yo', ne ya cunuu sa' nimán ní' rihaan Diose adonj.

<sup>14</sup> Nda' se ne ne'en nij yuvii yaníj se-tucuanj Moisés, tzaj ne avii inanj raá ma'an nij so' qui'yaj ma'an nij so' ndaa vaa me rá Diose qui'yaj yuvii adonj. Ne'en ní' se vaa 'yaj ma'an nij so' se vaa me rá Diose qui'yaj nij so', ne xcaj ní' cuentá se vaa nicaj nij so' tucuáán me rá Diose canoco' yuvii, <sup>15</sup> ne che'é se vaa 'yaj nij so' ro', che'é dan ne'en ní' se vaa ne'en ma'an nij so' daj me rá Diose qui'yaj yuvii, ne dan me se sese 'yaj nij so' se nij, ne ne'en ma'an nij so' se vaa na'vej Diose

qui'yaj nij so' danj a. Ne nuchruj raá nij tuví' nij so' me tucuáán sa' qui'yaj nij so', ne che'é dan ne'en ní' se vaa ya ne'en nij so' daj me rá Diose qui'yaj nij so' adonj. <sup>16</sup> Ne danj gaa ca'ne' Diose cacun' che'é nij so' güii ca'ne' Diose cacun' che'é nimán yuvii á. Danj a'mii se-nana Jesucristó nana sa' a'mij rihaan yuvii ei.

*Nana nihánj taj xna'anj se vaa ne noco' sa' nij yuvii israelitá se-tucuanj Moisés ma'*

<sup>17</sup> Tzaj ne ya yuvii israelitá mé so', rá so' á. Nucuaj rá so' se vaa cavii sa' so', qui'yaj se-tucuanj Moisés, ne ne'en so' Diose, rá so' á. <sup>18</sup> Ne'en so' daj me rá Diose qui'yáá so', ne tucu'yón so' se-tucuanj Moisés, ne inanj sa' 'yáá so', rá ma'an so' á. <sup>19</sup> Ne'en ma'an so' tihaán so' chrej man nij yuvii aráán rihaan, rá so' á. <sup>20</sup> Ne'en so' tucu'yón so' man nij yuvii ni'yón do', man nij xnii do', rá so' á. Che'é se tucu'yón so' se-tucuanj Moisés, ne che'é dan ne'en so' nu' nana ya, rá so' á. <sup>21</sup> Sese ne'en so' tucu'yón so' man yo'ó yuvii ro', me che'é na'vej rá so' tucu'yón so' man ma'an so' ga. A'mii natáj so' rihaan yuvii se vaa se qui'yaj ituu yuvii ma'. Tzaj ne ma'an so' me síi ituu, ne me che'é 'yaj ituu so' ga. <sup>22</sup> Se cotoj yuvii ga nica tuvi' yuvii, taj so', tzaj ne me che'é otoj so' ga nica tuví' so' ga. Nij ndo'o vaa ya'anj acóy yuvii, rá so', tzaj ne me che'é 'yaj ituu so' sa'anj nuu tacóo nij ya'anj yo' ga. <sup>23</sup> Sa' uxrá 'yáá so' unó so' nu' se-tucuanj Moisés, taj so', tzaj ne veé dan me se 'yaj ndo'o so' cacun' na'vej rá Diose qui'yáá so', ne che'é dan a'nga' nacoó yuvii ni'yaj nij yuvii Diose, 'yáá so' adonj. <sup>24</sup> 'O se aj qui'yaj soj ndaa vaa taj nana no rihaan danj Diose adonj. Nanj taj danj Diose, ne: "Ma'an soj sij israelitá 'yaj a'mii yuvii yaníj nana nij che'é Diose á". Nihánj me nana ca'mii Diose che'é ma'an soj adonj.

*Nana nihánj taj xna'anj se vaa me rá Diose canoco' nimán yuvii man Diose a*

<sup>25</sup> Cuta' nii ta'nga' man nee mán so' asanj. Cunaj vaa yo', sese ya unó so' nana ca'mii Diose, tzaj ne sese ne unó so' se-nana Diose, ne taj se gún' man ta'nga' yo' ma'. <sup>26</sup> Ne xa' sí yaníj, tzaj ne sese 'yaj so' se vaa me rá Diose qui'yaj yuvii, ne ase vaa sí taj ta'nga' man ro', danj vaa guee so' rihaan Diose adonj. <sup>27</sup> Dan me se ne'én so' sij israelitá nu' se-tucuanj Moisés, ne cuta' nii ta'nga' mán so', tzaj ne sese se cunó so' rihaan Diose, ne cuta' nii cacun' xráa so', cataj nii se vaa sa' doj 'yaj sí yaníj ase 'yáa so' á. Nda' se taj ta'nga' táa man sí yaníj, tzaj ne 'yaj so' ndaa vaa me rá Diose qui'yaj so' a, cataj nii a.

<sup>28</sup> Tzaj ne ca'vee se qui'yaj yo' so' nu' se-tucuanj nij yuvii israelitá, tzaj ne nuveé sij israelitá ve'é noco' man Diose me so', qui'yaj tucuaán yo', ni'yaj Diose ma'. Ca'vee se cuta' nii ta'nga' nee man yo' so', tzaj ne se ca'vee guun so' sí sa' uno rihaan Diose, qui'yaj ta'nga' yo' ma'. <sup>29</sup> Ca'vee se nu' nana no rihaan yanj noco' yo' so', tzaj ne nuveé sij israelitá ve'é noco' man Diose me so', qui'yaj yanj yo', ni'yaj Diose ma'. Tzaj ne me ma'an sí noco' ya man Diose ne nahuun sa' nimán, ne ase vaa yo' yuvii israelitá ro', danj gaa so' rihaan Diose, ne ca'vee se ca'mii yuvii nana chi'ii che'é so', tzaj ne ne rihuun rá so' ma'. 'O se ma'an Diose cataj se vaa sa' uxrá qui'yaj so' adonj.

### 3

*Nana nihánj taj xna'anj se vaa sa' uxrá qui'yaj Diose che'é nij yuvii israelitá a*

<sup>1</sup> A me se ca'vee doj qui'yaj canaán ní' sij israelitá, rá so' ga. Ne a me rasuun quirí' ní' qui'yaj yan ata' ní' ta'nga' ga. <sup>2</sup> 'O se vaa se uun ya ní' sij israelitá ei. Dan me se asino cataj xna'anj Diose nu' se-nana Diose rihaan xii ní' gaa naá, ne nucuaj rá Diose man ní' se vaa cutumé sa' ní' se-nana so', ne se quini'yón ní' man yo', rá Diose a. <sup>3-4</sup> Ta'aj tuvi' ní' ne cuchuman rá ni'yaj se-nana Diose

ma'. Tzaj ne taj se 'yaj ma'. A 'ó güii se quini'yón Diose nana ca'mii so' rihaan ní' sij israelitá ma'. Nucuaj rá ní' man so' se vaa qui'yaj so' cunudanj se vaa cata' tu'va so', ne dan me se ca'vee se nana ne a'mii nu' yuvii, tzaj ne ya vaa cunudanj nana ca'mii Diose adonj. Danj Diose taj se vaa sese cunó yuvii nana a'mii Diose, ne xcaj yuvii cuentá se vaa ya a'mii so', ne sese nano' nij yuvii cacun' xráa Diose, ne a 'ó cacun' se nari' yuvii xráa Diose ma'. Danj a'mii danj Diose che'é ma'an Diose nanj adonj.

*Nana nihánj taj xna'anj se vaa sa' uxrá 'yaj Diose axrj yuvaq Diose man yuvii tumé cacun' a*

<sup>5</sup> Vaa ta'aj nij yuvii cataj: "Me che'é yuvaq Diose man ní' gaa 'yaj ní' cacun' ga. Nese tananj sa' 'yaj ní', gaa ne ca'vee xcaj nii cuentá, gaa ne quene'en nii se vaa ní' ro', me sí chi'ii ne orún' raa Diose ro', me sí sa', cataj nii a". Danj cataj ta'aj nij yuvii, <sup>6</sup> tzaj ne ne chihan' uxrá tu'va nij so' danj a ma'. 'O se sa' uxrá vaa 'yaj Diose axrj yuvaq Diose man yuvii tumé cacun', ne dan me se no xcúun Diose ca'ne' Diose cacun' che'é cunudanj yuvii, ne che'é dan no xcúun so' qui'yaj so' sayuun man yuvii qui'yaj cacun' adonj. <sup>7</sup> Ne vaa ta'aj nij yuvii cataj uún a: "Sese a'mii ne 'unj, ne sa' 'yá, gaa ne doj xcaj nii cuentá se vaa Diose me sí a'mii nana ya a. Sa' uxrá vaa Diose, cataj nii a. Yuvii ro', me sí a'mii ne, ne orún' Diose me sí a'mii nana ya, cataj nii a. Che'é dan me taj che'é cuta' Diose cacun' xrá ma'". Danj a'mii uún ta'aj nij yuvii, <sup>8</sup> ne taj uún nij so', ne: "Sa' doj qui'yaj ndo'o ní' cacun', gaa ne cavií sa' Diose doj, qui'yaj ní' á", taj uún nij yuvii a. Ne a'mii nij so' nana nij che'é núj, ne taj nij so' se vaa 'o cuyaán vaa nana a'mii núj ga nana a'mii nij so', taj nij so', a'mii ne nij so' a. Ve'é uxrá qui'yaj Diose, sese qui'yaj Diose sayuun man nij sí ne yo' nanj adonj.

*Nana nihánj taj xna'anj se vaa cunudanj yuvii tumé cacun' a*

9 Me nana ca'mii ní' che'é ní' sij israelitá ga. Sa' doj vaa ní' rihaan nij yuvii yaníj na'. Taj ma'. Maan se aj cataj 'unj se vaa 'o cuyaan vaa se quij qui'yaj ní' sij israelitá ga se quij qui'yaj nij yuvii yaníj, ne cunudanj ní' tumé cacun' a. 10 Ase vaa nana taj 'unj ro', danj vaa nana no rihaan danj Diose a. Taj yo': "Taj yan vaj a yo'ó yuvii sa' ma'. 11 A 'ó yuvii ne ne'en daj vaa Diose ma'. A 'ó yuvii ne tucu'yón daj vaa Diose ma'. 12 Tanáj cunudanj yuvii se-tucuanj Diose, ne taj se gún' man nij yuvii a ma'. A 'ó yuvii ne 'yaj se sa' ma'. 13 Ase vaa ri'yuj nee man xngá naj rihaan santó ro', danj vaa ri'yuj nana a'mii nij sí' tumé cacun' yo' adonj. 'O se nana tiha' yu'unj a'mii nij so', ne dan me se ase vaa na xnaj man tu'va xcuáá ro', danj vaa nana tu'va nij so', ne 'yaj chi'ii nij so' man nimán yuvii adonj. 14 Dan me se inan' a'mii chree nij so' che'é tuvi' nij so' a. 15 Chéé ndaa unánj nij so' ga tacóo nij so', che'é rej ticavi' nij so' tuvi' nij so' a. 16 Doj a rá' vaj nij so' 'yaj nij so' sayuun a. 17 Doj a rá' vaj nij so', ne unu' nij so' ga tuvi' nij so' a. Ne a 'ó tucuáán sa' ne ne'en nij so' nicaj nij so' ma'. 18 Ne chu'vi' nij so' qui'yaj Diose sayuun man nij so' ma'". Danj vaa taj danj Diose che'é cunudanj yuvii nanj adonj.

19 Dan me se yuvii noco' se-tucuanj Moisés me ní' sij israelitá, ne dan me se ne'en ní' se vaa nu' nana yo' nana no rihaan danj Diose ro', taj xna'anj rihaan ní' daj vaa ma'an ní' a. Ndaa síj, gaa ne guun na'aj ní' ga yo'ó nij yuvii man rihaan chumii nihánj, ne quene'en cunudanj ní' se vaa vaa che'é qui'yaj Diose sayuun man ní' nanj adonj. 20 'O se taj a yo'ó yuvii ne quisij qui'yaj nu' ndaa vaa taj se-tucuanj Moisés, ne che'é dan taj se 'yá' cunuu sa' a doj yuvii rihaan Diose qui'yaj tucuáán yo' a ma'. Maan se nari' yuvii se-tucuanj Moisés, ne xcaj yuvii cuentá se vaa ya ya sij tumé cacun' me ma'an nij yuvii rihaan Diose ei.

*Nana nihánj taj xna'anj se vaa cunudanj yuvii cuchumán rá ni'yaj man Jesucristó ro', cunuu sa' nij so' rihaan Diose a*

21 Ne yaj me se tihaan Diose rihaan yuvii daj qui'yaj so' ne tinavij so' cacun' che'é yuvii a. Dan me se se cunuu sa' yuvii qui'yaj inan' nana ca'mii Diose rihaan sí' cu'naj Moisés ma'. 'O se cataj danj Diose cataj nij sí' nata' se-nana Diose gaa naá cataj se vaa 22 cuchuman rá yuvii ni'yaj yuvii Jesucristó, gaa ne tinavij Diose cacun' che'é nij yuvii, ne cunuu sa' nij yuvii rihaan Diose a. Taj a 'ó yuvii ino vaa rihaan Diose ma'. 23 'O se cunudanj yuvii tumé cacun' nanj adonj. Ne quisij uxrá nij yuvii cunuu sa' inan' nij yuvii ndaa vaa Diose a ma'. 24 'O se maan che'é rej cunuu 'ee rá Diose man cunudanj yuvii ne qui'yaj ma'an Diose se luj che'é nij yuvii me ca'vee tinavij Diose cacun' che'é nij yuvii adonj. Dan me se ca'neé Diose man Jesucristó rihaan chumii, che'é rej ca'nee so' cacun' xráá nij sí' amán rá ni'yaj man so', 25 ne dan me se ca'neé Diose man Jesucristó nayon Jesucristó rihaan yuvii tumé cacun', ne cuchuman rá nij sí' tumé cacun' se vaa cavi' Jesucristó che'é nij so', ne quinanii nij so' rihaan sayuun nanj adonj. Dan me se ne'en ní' se vaa tinavij Diose cacun' che'é yuvii, ne xcaj ní' cuentá se vaa vaa nica rá Diose gaa tinavij Diose cacun' che'é nij yuvii cane gaa naá a. Yuvii cane gaa naá ro', ne quiran' nij so' sayuun che'é cacun' tumé nij so' ma'. 26 Maan se caráj x'naa Diose, ne na'vij Diose ndaa se cavi' Jesucristó, gaa ne quinavij cacun' che'é nij sí' cane gaa naá sí' amán rá ni'yaj man Diose a. Ne xcaj uún ní' cuentá se vaa vaa nica rá Diose gaa a'ne' so' cacun' che'é yuvii yanj rihaan chumii cuano a. Dan me se nica vaa rá Diose, ne un nucuaj Diose tinavij so' cacun' tumé cunudanj ní' sij amán rá ni'yaj man Jesucristó, gaa ne guun ní' sí' sa' rihaan Diose adonj.

27 Se-tucuanj Moisés me se taj se

'yaj tucuáán yo' che'é cacun' tumé yuvij ma'. Dan me se nuveé che'e suun sa' qui'yaj suun ní' me navij cacun' xráá ní' ma'. Maan se che'é se amán rá ní' ne'en ní' Jesucristó, che'é dan navij cacun' tumé ní' adonj. Che'é dan se guun cataj ní' maan che'é se cuno ní' nu' nana cataj xna'anj Diose rihaan Moisés, che'é dan guun ní' sí sa' ma'. Se ca'mii ní' danj ma'. Maan se inanj che'é Jesucristó me quinanii ní' rihaan sayuun nanj adonj. <sup>28</sup> Dan me se cuchuman rá yuvij ni'yaj yuvij man Jesucristó, ne quinavij cacun' xráá yuvij yo' a. Taj se 'yaj ase ca'vee daj a se luj qui'yaj nij yuvij ma'. Maan se inanj che'é Jesucristó navij cacun' xráá yuvij nanj adonj. Dan me nana guun ya rá ní' cuno ní' adonj. <sup>29</sup> Ne nuveé se-Diose inanj ní' sij israelitá me Diose ma'. 'O se se-Diose taran' nij yuvij man rihaan chumii me Diose nanj adonj. <sup>30</sup> Orún' Diose nicun', ne sese cuchuman rá nij yuvij israelitá ni'yaj nij yuvij Diose, ne cataj Diose se vaa sa' qui'yaj nij so', ne sese cuchuman rá yuvij yanj ni'yaj nij so' Diose, ne cataj uún Diose se vaa sa' qui'yaj nij so' uún nanj adonj.

<sup>31</sup> Dan me se aj cataj núj se vaa taj se gún' man nana cataj xna'anj Diose gaa naá, rá soj na'. Daj chihaa míj se guun danj rá soj ma'. Vaa se gún' man yo' ei. Vaa che'é ndo'o cuchruj Moisés tucuáán ca'mii Diose che'é ní' ei. Inanj danj a'mii núj nanj adonj.

#### 4

*Nana nihánj taj xna'anj daj qui'yaj sí cu'naj Abraham, ne cunuu sa' so' rihaan Diose a*

<sup>1</sup> Sí cu'naj Abraham me se xii ní' sij israelitá me so' gaa naá, ne ne'en ní' se vaa nuveé che'e se vaa qui'yaj ma'an so' me cavii sa' so' ma'. <sup>2</sup> 'O se ne nó xcúún Abraham cataj Abraham se vaa maan che'é se sa' qui'yaj so', che'é dan guun niha' rá Diose ni'yaj Diose man so' ma'. Taj che'é ca'mii so' danj ma'. Ne'en Diose se vaa ne ya vaa nana yo' ma'. <sup>3</sup> Maan se ma'an danj Diose taj: "Cuchumán rá

sí cu'naj Abraham ni'yaj so' Diose, ne che'é dan cataj Diose se vaa sij sa' me Abraham a. Danj ca'mii Diose che'é so' a". Inanj danj a'mii danj Diose nanj adonj.

<sup>4</sup> Dan me se sese yo'o mozó 'yaj suun rihaan 'o ru'vee, ne naru'vee ru'vee rihaan mozó yo', ne no xcúún mozó yo' qui'yaj canaán so' tu'vee so' a. <sup>5</sup> Tzaj ne ino qui'yaj Diose ga Abraham, ne dan me se ne qui'yaj suun Abraham rihaan Diose ma'. Ne nó xcúún Diose naru'vee Diose rihaan Abraham ma'. Maan che'é se xcaj Abraham cuentá se vaa ca'vee tinavij Diose cacun' tumé yuvij ro', che'é dan cuchumán rá Abraham ni'yaj so' Diose, ne che'é dan cataj Diose se vaa sij sa' me so', ne danj qui'yaj uún Diose se luj che'é so' nanj adonj.

<sup>6</sup> 'O cuyaán vaa nana a'mij nihánj ga nana ca'mii sí cu'naj David gaa naá gaa cataj xna'anj David se vaa niha' rá yuvij tinavij ma'an Diose cacun' xráá, yuvij ne nó xcúún qui'yaj suun rihaan Diose a. Cataj sí cu'naj David a: <sup>7</sup> "Cavii sa' sí x'néj cacun' xráá qui'yaj Diose á. Nu' se nij qui'yaj so' ro', navij cuano á. <sup>8</sup> Cavii sa' so', ne ne'en so' se vaa a doj cacun' se cuta' uún Diose xráá so' daj chihaa míj ma'".

<sup>9</sup> Ne orún' nij yuvij israelitá yuvij ata' ta'nga' man me avii sa' rihaan Diose, rá soj na'. Ndaa nij yuvij yanj yuvij nuvi' ta'nga' ata' man avii sa' uún rihaan Diose, rá soj xa'. Cunudanj yuvij me ca'vee cavii sa' rihaan Diose ei. 'O se aj ne'en ní' se vaa taj danj Diose: "Cuchumán rá sí cu'naj Abraham ni'yaj so' Diose, ne che'é dan cataj Diose se vaa sij sa' me so' a". Danj taj danj Diose a.

<sup>10</sup> Dan me se cataj Diose se vaa navij cacun' tumé sí cu'naj Abraham yo', che'é se cuchumán rá so' ni'yaj so' Diose, ne daj sij me Abraham gaa ca'mii Diose danj, rá soj ga. Sij cata' ta'nga' man me so', rá soj na'. Taj ma'. 'O se danj ca'mii Diose gaa ataa cata' ta'nga' man so' nanj adonj. <sup>11</sup> Cachén xca'anj yo' ca'mii Diose danj che'é so',



gaa ne cuta' ma'an so' ta'nga' man so', ne tihaan so' rihaan nij yuvij man rihaan chumii se vaa aj tinavij ya Diose cacun' xraa' so', ne dan me se guun so' xii cunudanj nij yuvij nuu sa' rihaan Diose yuvij ne ata' ta'nga' man, ne ase vaa qui'yaj sii cu'naj Abraham ro', danj 'yaj uun nij so' a. Dan me se cuchuman ra' sii cu'naj Abraham ni'yaj so' Diose gaa ataa cata' ta'nga' man so', ne danj 'yaj uun nij sii yanij a. <sup>12</sup> Ne xii nij yuvij ata' ta'nga' man me uun so', sese ya noco' nij so' tucuaan noco' ma'an so', ne dan me se cuchuman ra' nij so' ni'yaj nij so' Diose, ne tuvi' sii cu'naj Abraham guun nij so' a. Dan me se xii ni' me sii cu'naj Abraham, sese qui'yaj ni' ndaa vaa qui'yaj so' adonj.

*Nana nihanj taj xna'anj se vaa cuchuman ra' sii cu'naj Abraham cuno so' nana ca'mii Diose rihaan so' a*

<sup>13</sup> Dan me se ne'en ni' se vaa cata' tu'va Diose rihaan sii cu'naj Abraham se vaa vaa guii, ne nicaj yu'unj ma'an Abraham do', nicaj yu'unj nij ta'ni' ta'nij si'no Abraham do', man cunudanj chumii, ne dan me se ya ya guun yo' to'oo' nij so', cataj Diose rihaan sii cu'naj Abraham, ne nuvee che'e se canoco' Abraham nu' se-tucuanj Moises me ca'mii Diose danj rihaan Abraham ma'. 'O se aj cuchuman ra' so' cuno so' nana ca'mii Diose rihaan so', ne che'e dan cunuu sa' so' rihaan Diose, ne che'e dan me cataj xna'anj Diose rihaan so' se vaa ya ya nicaj yu'unj so' man cunudanj chumii yo' adonj. <sup>14</sup> 'O se sese inanj nij sii guun nucuaj qui'yaj nu' se-tucuanj Moises me nij sii nicaj yu'unj chumii, ne taj che'e cuchuman ra' ni' nana cata' tu'va Diose rihaan Abraham a ma'. <sup>15</sup> 'O se xa' se-tucuanj Moises, taj ne taj a yo'oo' sii uun nucuaj qui'yaj nu' tucuaan yo', ne che'e dan axrij yuvaa uun Diose rihaan yuvij, 'yaj tucuaan yo' adonj. (Taj ne sese nuvi' tucuaan vaa danj noco' yuvij, ne taj cacun' tumé nij yuvij che'e tucuaan yo' ma'.)

<sup>16</sup> Che'e dan cunudanj ni' sij aman ra' ni'yaj man Diose ro', me nij sii nicaj yu'unj man chumii, ne ve'e dan me se luj qui'yaj Diose che'e ni' me yo', gaa ne ca'vee quisij ya nu' nana cata' tu'va Diose che'e taran' ni' a. Dan me se nuvee inanj nij sii guun nucuaj qui'yaj nu' se-tucuanj Moises me nij sii cavii sa' danj ma'. Tananj cavii sa' taran' ni' sij aman ra' ni'yaj man Diose, ndaa vaa qui'yaj Abraham adonj. 'O se xii taran' ni' me so' adonj. <sup>17</sup> 'O se danj Diose taj se vaa cune' Diose man so' guun so' xii yuvij man que'ee ndo'o chuman' a. Danj taj danj Diose che'e so', ne dan me se xii ni' me so' rihaan Diose a. 'O se cuchuman ra' so' ni'yaj so' Diose, ne Diose ro', me sii 'yaj nuu i'na' uun nij sii cavi', ne Diose me sii a'mii che'e rasuun ataa curuvi' rihaan chumii nihanj, ne taj so' se vaa aj nicun' nij rasuun nanj adonj.

<sup>18</sup> Ne nucuaj ra' sii cu'naj Abraham man Diose se vaa gaa ta'ni' so', qui'yaj Diose, taj ne ne quene'en so' daj me qui'yaj Diose ne gaa ta'ni' so' ma'. Maan se cuchuman ra' so' cuno so' nana ca'mii Diose rihaan so', gaa ne guun so' xii yuvij man que'ee ndo'o chuman' adonj. 'O se aj cataj Diose rihaan so' se vaa gaa ndo'o ta'ni' ta'nij si'no so', ne ve'e danj qui'yaj guee Diose ga' so' adonj. <sup>19</sup> Dan me se quisij so' 'o cientó yo', ne taj vaj ta'ni' so', taj ne ne quir' ra' so' che'e rej chii nga' me so' ne chana ituun me nica' so' chana cu'naj Sara ma'. 'O se yo'o' cuchuman ra' so' ne'en so' Diose nanj adonj. <sup>20</sup> Ne ca'vej ra' so' cataj so' se vaa se ca'vee qui'yaj Diose ndaa vaa cataj Diose rihaan so' ma'. Tananj cuchuman ndo'o doj ra' so' ni'yaj so' Diose, gaa ne nari' nucuaj doj man so' a. Cataj so' se vaa sa' uxrá vaa Diose, <sup>21</sup> ne guun ya ra' so' se vaa guun nucuaj Diose qui'yaj Diose cunudanj se vaa cataj Diose a.

<sup>22</sup> Che'e dan me cataj Diose: "Sij sa' me Abraham a". Danj ca'mii Diose che'e so', <sup>23</sup> taj ne nuvee che'e orun' sii cu'naj Abraham a'mii nana yo'

nana nō rihaan danj Diose ma'. <sup>24</sup> 'Q se che'é ma'an ní' nō nana yo' rihaan danj Diose uún, che'é rej sĭj amán rá ni'yaj man Diose me ní' uún, ne dan me se aj cataj Diose se vaa sĭj sa' me ma'an ní' uún adonj. Veé dan me se amán rá ní' se vaa cunuu i'na' uún Jesucristó sĭj 'nij ra'a man ní' qui'yaj Diose á. <sup>25</sup> Dan me se ca'vej rá Diose cavi' Jesucristó che'é cacun' qui'yaj ní', ne cunuu i'na' uún so', qui'yaj Diose, che'é yan me rá Diose cunuu sa' ní' rihaan ma'an Diose adonj.

## 5

*Nana nihánj taj xna'anj se vaa cavi' sa' uxrá ní' che'é se cunuu sa' nimán ní' rihaan Diose a*

<sup>1</sup> Dan me se amán rá ní' quene'en ní' Diose, ne che'é dan navij cacun' tumé ní', ne cunuu sa' nimán ní' rihaan Diose, ne che'é dan me ne chu'vi' ní' yaj, ne vaa dĭnj nimán ní' che'é Jesucristó sĭj 'nij ra'a man ní' adonj. Ne yuvaá Diose man ní' ma'. <sup>2</sup> Dan me se amán rá ní' ni'yaj ní' man Jesucristó, ne che'é dan cavi' sa' uxrá ní', qui'yaj Diose, ne yaj ro', vaa che'é guun niha' ndo'o rá ní' cataj xna'anj ní' rihaan yo'ó yuvi' se vaa vaa güii ca'anj ní' cayáán ní' rej sa' ndo'o rej yanj ma'an Diose adonj. <sup>3</sup> Ne vaa che'é guun niha' rá ní' che'é sayuun ran' ní', ne dan me se ne'en ní' se vaa che'é sayuun ran' ní' me se nari' nucuaj doj nimán ní', <sup>4</sup> ne che'é dan uun niha' rá Diose ni'yaj Diose man ní', ne che'é dan uun ya' rá ní' se vaa vaa güii cayáán ní' ga' so' a. <sup>5</sup> Che'é dan se guun na'aj ní' ma'. 'Q se rqué Diose Nimán Diose man ní', ne Nimán Diose taj xna'anj rihaan ní' se vaa 'ee rá Diose man ní' adonj.

<sup>6</sup> 'Q se Jesucristó me se gaa ne guun nucuaj ma'an ní' sĭj man rihaan chumij nihánj qui'yaj sa' ní' do', gaa nuveé sĭj noco' man Diose me ní' do', ne cavi' Jesucristó che'é ma'an ní', gaa güii cachrón ma'an Diose cavi' so' ei. <sup>7</sup> Dan me se taj vaj yuvi' ca'vej rá nayon rihaan tuvi' cavi' ma'. Ca'vee se sí' ne tumé cacun' me tuvi' yuvi,

tzaj ne se ca'vej rá yuvi' cavi' yuvi' che'é so' ma'. Ca'vee se ndaa sí' sa' uxrá nimán me tuvi' yuvi, tzaj ne doj yuvi' quisij rá cavi' che'é tuvi' nanj adonj. <sup>8</sup> Tzaj ne ino' vaa Diose ga' yuvi' ei. Dan me se nda' se tumé ní' cacun', tzaj ne cavi' Jesucristó che'é ní', ne nayón so' rihaan ní', qui'yaj Diose, ne veé dan me se tihaan Diose rihaan ní' se vaa 'ee ndo'o rá Diose man ní' adonj.

<sup>9</sup> Dan me se aj cunuu sa' ní' rihaan Diose cuano, che'é se cavi' Jesucristó, ne che'é dan ne'en ní' se vaa a 'ó güii se caxrij yuvaá Diose man ní' che'é cacun' tumé ní' ma'. 'Q se tinanii Jesucristó man ní' rihaan sayuun qui'yaj Diose man ní' a. <sup>10</sup> Dan me se asino yaan yuvaá Diose man cunudanj yuvi' che'é cacun' tumé nij yuvi, tzaj ne ca'neé Diose ta'ní' Diose cavi' so' che'é yuvi, ne guun tuvi' ní' ga' Diose, qui'yaj so' a. Ne cunuu i'na' uún Jesucristó, ne che'é dan ne'en ní' se vaa ya' quinani' ní' rihaan sayuun asa' ca'ne' Diose cacun' che'é cunudanj yuvi' man rihaan chumij nihánj ei. <sup>11</sup> Ne uun niha' rá ní' cataj xna'anj ní' rihaan tuvi' ní' che'é se vaa qui'yaj Diose che'é ní', ne danj 'yaj ní' che'é Jesucristó sĭj 'nij ra'a man ní' ei. 'Q se so' me sí' qui'yaj guun tuvi' ní' ga' Diose adonj.

*Nana nihánj taj xna'anj se vaa qui'yaj canaán Jesucristó rihaan cacun' xna'anj rihaan chumij nihánj a*

<sup>12</sup> Dan me se orún' snó'o cu'naj Adán me sí' guun yaan qui'yaj cacun' asino yaan, ne dan me se xii cunudanj nij yuvi' man rihaan chumij me so', ne qui'yaj so' cacun', ne tanáj so' cacun' rihaan cunudanj nij yuvi' man rihaan chumij, ne che'é dan ase vaa tumé Adán cacun' ro', danj vaa tumé cunudanj nij yuvi' cacun' rihaan Diose a. 'Q se che'é cacun' qui'yaj Adán me se ya' guun che'e yuvi' qui'yaj yuvi' cacun', gaa ne guun che'e nij yuvi' cavi' nimán nij yuvi, ne che'é dan nu' 'na' avi'

nimán cunudanj nij yuvij man rihaan chumij nihánj cuano adonj. <sup>13</sup> Dan me se asij ataa ca'mij Diose tucuaán cuchruj Moisés ro', asij danj me qui'yaj yuvij cacun', tzaj ne taj vaj se-tucuanj Moisés cuno nij yuvij ma'. Che'é dan ne qui'yaj nij yuvij cacun' rihaan se-tucuanj Moisés ma'. <sup>14</sup> 'O se cavi' nimán sí cu'naj Adán cavi' nimán cunudanj tuvi' so' cavi' nimán, ne ndaa yuvij ne qui'yaj cacun' ndaa vaa qui'yaj sí cu'naj Adán ro', ndaa nimán nij so' cavi' gaa ataa quinaj se-tucuanj Moisés ne gaa cuchruj Diose se-tucuanj Moisés uún a.

Dan me se ase vaa quiran' cunudanj nij yuvij man rihaan chumij sayuun, qui'yaj orún' sí cu'naj Adán ro', danj vaa cavii sa' que'ee nij yuvij man rihaan chumij, qui'yaj orún' Jesucristó uún a. <sup>15</sup> Dan me se ne'en ní' se vaa orún' sí cu'naj Adán qui'yaj cacun' rihaan Diose, ne quisij cacun' yo' tiri' yo' man nimán cunudanj nij yuvij man rihaan chumij cuano, ne che'é dan nu' 'na' avi' nimán nij yuvij nanj adonj. Tzaj ne doj a nucuaj Diose rihaan Adán ei. Che'é dan guun ya rá ní' se vaa doj a guun nucuaj Diose racuíj Diose man me ma'an yuvij, ne doj a ca'vee cavii sa' nij yuvij che'é se luj qui'yaj Jesucristó che'é nij so' nanj adonj. <sup>16</sup> Dan me se gaa qui'yaj orún' sí cu'naj Adán cacun', ne quitáa cacun' xráa nij yuvij, tzaj ne ino uxrá vaa se luj qui'yaj Jesucristó che'é ní', ne dan me se gaa quisij qui'yaj ndo'o ní' cacun' ne cavi' so' che'é ní', ne dan me se güej cacun' xráa ní', qui'yaj so' adonj. <sup>17</sup> 'O se ne'en ní' se vaa gaa qui'yaj orún' sí cu'naj Adán cacun' yo', ne quiran' cunudanj nij yuvij man rihaan chumij sayuun se vaa nu' 'na' avi' nimán cunudanj nij yuvij a. Che'é dan ní' sij cunuu sa' rihaan Diose che'é se luj qui'yaj orún' Jesucristó che'é ní' me se doj a ne'en ní' se vaa gaa i'na' nimán ní' ne guun chij ní' rihaan chumij nihánj che'é so' adonj.

<sup>18</sup> Dan me se che'é orún' cacun' qui'yaj Adán me táa cacun' xráa cunudanj nij yuvij man rihaan chumij, tzaj ne orún' suun sa' ndo'o qui'yaj suun Jesucristó, ne che'é dan ca'vee güej cacun' xráa cunudanj nij yuvij, qui'yaj so', ne ca'vee yo'o gaa i'na' nimán nij yuvij a. <sup>19</sup> Dan me se sí cu'naj Adán ro', orún' so' ne ca'vej rá cuno rihaan Diose, ne che'é dan que'ee ndo'o yuvij tumé cacun', tzaj ne cuno orún' sí cu'naj Jesucristó rihaan Diose, ne che'é dan cunuu sa' que'ee yuvij rihaan Diose adonj.

<sup>20</sup> Dan me se cataj xna'anj Diose daj gaa se-tucuanj Moisés rihaan Moisés gaa naá, tzaj ne quene'en Diose se vaa sí se cuno rihaan Diose me yuvij ne tananj guun que'ee doj cacun' qui'yaj yuvij che'é se-tucuanj Moisés a. Dan me se quisij cataj xna'anj Diose daj gaa se-tucuanj Moisés rihaan so', gaa ne doj a guun rá yuvij qui'yaj yuvij se chi'ij á. Tzaj ne gaa xna'anj doj cacun' tumé yuvij, ne Diose me sí quirii nimán qui'yaj doj se luj che'é nij yuvij, ne dan me se tinavij Diose cacun' tumé nij yuvij, gaa ne qui'yaj canaán se luj yo' rihaan cacun' yo' a. <sup>21</sup> Dan me se asino guun chij ndo'o cacun' rihaan nimán yuvij, gaa ne guun che'e yuvij cavi' nimán yuvij che'é cacun', ne quiran' nij yuvij sayuun nu' cavii nu' ca'anj a. Tzaj ne qui'yaj ndo'o Diose se luj che'é nij yuvij, che'é rej qui'yaj canaán se luj yo' rihaan cacun', ne guun chij ndo'o se luj yo' rihaan nimán nij yuvij, ne che'é dan nuu sa' nimán nij yuvij rihaan Diose, ne cayáán nij yuvij ga Diose nu' cavii nu' ca'anj a. Danj qui'yaj Diose che'é ní' gaa cavi' Jesucristó sij 'nij ra'a man ní' rihaan rcutze adonj.

## 6

*Nana nihánj taj xna'anj se vaa ní' sij amán rá ni'yaj man Jesucristó me se se ca'vee canoco' ní' chrej chi'ij yaj ma'*

<sup>1</sup> Daj qui'yaj ní', rá soj ga. 'O qui'yaj ní' cacun', ne qui'yaj Diose doj se luj che'é ní', rá soj na'. <sup>2</sup> Taj ma'. Se guun

qui'yaj ní' danj ma'. 'O se aj tanáj ní' chrej chi'ii á. Asa' ca'vee canoco' uún ní' chrej chi'ii, rá soj ga. <sup>3</sup> 'O se aj ne'en ya soj se vaa gaa cata' ne ní' che'é Jesucristó, ne ase vaa cavi' so' rihaan chumii nihánj ro', danj cavi' ní' rihaan tucuáán chi'ii, ne se ca'vee canoco' ní' tucuáán chi'ii cuano a ma'. <sup>4</sup> Dan me se ase vaa quiran' Jesucristó gaa cachin' nii man so' rque yo'óo ro', danj quiran' ní' gaa cata' ne ní', ne dan me se gaa cachin' nii man so' rque yo'óo, ne va'nuj güii ne cachee so' rihaan yo'óo ma'. Ne ase vaa ne cachee so' rihaan yo'óo ro', danj gaa ní' cuano che'é se cata' ne ní', ne se cachéé ní' chrej chi'ii cuano ma'. Gaa ne ase vaa cunuu i'na' uún Jesucristó gaa cavi' so', qui'yaj Diose ro', danj gaa cunuu naca nimán ní', ne ve'é uxrá qui'yaj ní' cayáán ní' ga tuvi' ní', qui'yaj Diose ei. 'O se síi sa' nucaj me Diose ei. <sup>5</sup> Dan me se sese ya ya tanáj ní' chrej chi'ii che'é so' ro', ne ya ya cunuu sa' nimán ní' che'é so' adonj.

<sup>6</sup> Ne'en ní' se vaa vaa chi'ii nimán ní' gaa ataa cavi' Jesucristó che'é ní', tzaj ne cavi' so' rihaan rcutze che'é ní', ne veé dan me se navij se chi'ii man nimán ní', qui'yaj so' gaa cavi' so', ne taj che'é qui'yaj ní' se chi'ii ne guun ní' se-mozó cacun' yaj a ma'. <sup>7</sup> 'O se ase vaa na'vee qui'yaj xangá cacun' ro', danj vaa ní', ne se ca'vee canoco' ní' chrej chi'ii yaj a ma'. <sup>8</sup> Dan me se cavi' Jesucristó, ne canoco' ní' man so', ne dan me se cavi' se chi'ii man nimán ní' ei. Ne cunuu i'na' uún so', ne che'é dan amán rá ní' se vaa ca'vee cayáán sa' nimán ní' ga so' nanj adonj. <sup>9</sup> Dan me se ne'en ní' se vaa cunuu i'na' uún Jesucristó, ne daj chihaa mój se ca'vee cavi' uún so' a man adonj. <sup>10</sup> 'O se síi cavi' ro', daj chihaa mój se ca'vee qui'yaj so' cacun', ne síi cunuu i'na' uún me se che'é orún' Diose ne so' ei. <sup>11</sup> Ne che'é dan cataj ma'an soj se vaa aj cavi' se chi'ii man nimán nij soj, ne se qui'yaj uún nij soj cacun' a ma'. 'O se canoco' nij soj man Jesucristó, ne

daj se 'yaj guee so', yanj so' che'é rej qui'yaj suun so' rihaan Diose ro', danj qui'yaj ní' uún a.

<sup>12-13</sup> Che'é dan se ca'vej rá soj guun chij cacun' rihaan nee man soj ma'. Ne'en soj se vaa vaa güii cavi' nee man soj, ne che'é dan se guun ca'vej rá soj qui'yaj nee man soj náá guun se nij ma'. Dan me se ase vaa síi cavi' vaa soj gaa rque, tzaj ne racuíf Diose man soj, ne che'é dan ase vaa síi cunuu i'na' uún vaa soj, ne che'é dan nu' nee man soj qui'yaj suun che'é Diose, qui'yaj soj, ne inanjan suun sa' qui'yaj suun soj che'é Diose á. <sup>14</sup> Se guun chij cacun' rihaan soj yaj a ma'. 'O se ne'en soj se vaa se cuta' Diose cacun' xráá soj sese se canoco' soj nu' se-tucuanj Moisés ma'. Tzaj ne me rá Diose qui'yaj Diose se luj che'é soj, ne quinavij cacun' tumé soj, ne cavi' sa' soj, qui'yaj ma'an Diose, ne che'é dan taj che'é guun chij cacun' rihaan soj a man adonj.

*Nana nihánj taj xna'anj se vaa qui'yaj suun ní' rihaan inanjan Diose a*

<sup>15</sup> Ta'aj yuvii cataj: "Sese danj vaa, ne sese se cuta' Diose cacun' xráá ní' che'é se-tucuanj Moisés, ne sese qui'yaj Diose se luj che'é ní', ne ca'vee qui'yaj ndo'o ní' cacun' nanj á". Danj cataj ta'aj yuvii, tzaj ne quij ndo'o vaa nana yo' nana tu'va nij yuvii ei. <sup>16</sup> Ne acaj soj cuentá se vaa sese chrej chi'ii canoco' soj, ne guun soj se-mozó cacun' a. Danj inanjan guun chij cacun' rihaan soj, ne inanjan uun cacun' qui'yaj soj, qui'yaj cacun', gaa ne quirí' nimán soj, qui'yaj cacun' tumé soj a. Tzaj ne sese cunó soj rihaan Diose, ne cunuu soj rihaan Diose, ne cunuu sa' nimán soj rihaan Diose nanj ei. <sup>17</sup> Gaa rque me se se-mozó cacun' me soj, tzaj ne guun rá ma'an soj cunó soj nana tucu'yón núj rihaan soj che'é Diose, ne che'é dan nagó' 'unjan graciá rihaan Diose adonj. <sup>18</sup> Dan me se quinanii soj rihaan cacun', ne inanjan se sa' uun rá Diose 'yaj soj a. <sup>19</sup> (Dan me se nana nica achrón 'unjan rihaan yanjan nihánj



nayaa soj a. Ne'én 'unj se vaa se guun nucuaj soj cunō soj nana nachran' ma'.) Dan me se gaa rque me se ca'vej rá soj qui'yaj nee man soj se chi'ii, ne qui'yaj soj inanj cacun' rihaan Diose, gaa ne guun niha' rá soj qui'yaj soj doj cacun' uún a. Tzaj ne cuano nihánj me se ca'vej soj qui'yaj soj inanj se sa' ndaa vaa uun rá Diose, gaa ne guun soj síi sa' nimán rihaan Diose á.

<sup>20</sup> Dan me se gaa se-mozó cacun' me soj, ne guun rá soj se vaa ne nó xcuún soj qui'yaj soj se sa' ma'. <sup>21</sup> Che'é dan me cavii sa' soj gaa canoco' soj chrej chi'ii, rá soj na'. Taj ma'. Maan se uun na'aj soj cuano che'é cacun' aj qui'yaj soj gaa rque, ne che'é cacun' yo' me se quirí' nimán soj, ne ca'anj soj rihaan ya'an nu' cavii nu' ca'anj adonj. <sup>22</sup> Tzaj ne yaj ro', aj quinanii soj rihaan cacun', ne nuveé se-mozó cacun' me soj, tananj rihaan Diose nu' soj, ne che'é suun sa' 'yaj suun soj rihaan Diose ro', che'é dan cunuu sa' nimán soj, gaa ne cayáán soj ga Diose nu' cavii nu' ca'anj ei. <sup>23</sup> Dan me se che'é cacun' 'yaj yuvij me se yo'o guun yanij nimán nij yuvij rihaan Diose nu' cavii nu' ca'anj, tzaj ne qui'yaj ma'an Diose se luj che'é ní' sij 'nij ra'a Jesucristó man se vaa ca'vee cayáán ní' ga so' nu' cavii nu' ca'anj adonj.

## 7

*Nana nihánj taj xna'anj se vaa quisíj canoco' ní' se-tucuanj Moisés, ne cuano nihánj ca'nej nimán ní' qui'yaj suun ní' che'é Diose a*

<sup>1</sup> Dan me se aj ne'en nij soj daj vaa se-tucuanj Moisés, tinuj, nocoj. Che'é dan ne'en soj se vaa ne nó xcuún nij síi cavi' canoco' nij so' tucuaán yo' ma'. <sup>2</sup> Ne dan me se sese vaa nica chana, ne cano no' ga nica no', taj nana cataj xna'anj Diose rihaan Moisés gaa naá yo' a. Tzaj ne sese cavi' nica chana, ne ca'vee ca'anj no' xcaj no' yo'ó snó'o a. <sup>3</sup> Tzaj ne sese yanj nica chana ne xcaj chana

yo'ó snó'o, ne tumé ndo'o no' cacun', tzaj ne sese cavi' nica chana, ne ca'vee xcaj chana yo'ó snó'o, ne nuveé cacun' me yo' gaa ma'.

<sup>4</sup> Ne ase vaa chana cavi' nica ro', danj vaa ma'an ní', tinuj, nocoj. 'O se che'é se cavi' Jesucristó ro', che'é dan quisíj canoco' ní' se-tucuanj Moisés nanj á. Ne cunuu i'na' uún Jesucristó, ne canoco' ní' man so', ne che'é dan guun nucuaj ní' qui'yaj suun ní' suun sa' che'é Diose a. <sup>5</sup> Asij rque me se qui'yaj suun ndo'o ní' che'é se-tucuanj Moisés, ne guun ndo'o rá ní' cunō ní' rihaan Diose, tzaj ne ne guun nucuaj ní' cunō ní' ma'. Maan se tananj a guun doj rá ní' qui'yaj ní' cacun', gaa ne doj a vaa cacun' qui'yaj nee man ní', ne che'é dan vaa güii cavi' nu' nimán ní' ei. <sup>6</sup> Dan me se gaa naá canoco' uxrá ní' tucuaán yo' tucuaán no' rihaan yanj, ne no' xcuún ní' canoco' ní' tucuaán yo', rá ní' gaa rque, tzaj ne yaj nihánj me se taj che'é canoco' ní' tucuaán yo' a ma'. 'O se aj cunuu sa' nimán ní', ne a'neé nimán ma'an ní' qui'yaj suun ní' che'é Diose cuano adonj.

*Nana nihánj taj xna'anj se vaa che'é se-tucuanj Moisés xcaj ní' cuentá se vaa tumé ní' cacun', tzaj ne taj se 'yá' cunuu sa' nimán ní' rihaan Diose qui'yaj tucuaán yo' ma'*

<sup>7</sup> Guun rá ní' se vaa tucuanj chi'ii me se-tucuanj Moisés na'. Taj a doj ma'. 'O se se-tucuanj Moisés yo' qui'yaj don ca'vee xcaj 'unj cuentá me se uun cacun' a. Dan me se gaa naá cataj Diose se vaa na'vej rá Diose guun rá ní' si'yaj tuvi' ní', ne veé dan me se xcaj 'unj cuentá se vaa tananj a guun ndo'o raj si'yaj tuvij gaa quene'én 'unj tucuaán yo', ne danj inanj vaa nimanj nanj á. <sup>8</sup> Veé dan me se xcaj 'unj cuentá daj vaa se-tucuanj Moisés, gaa ne guun che'ej guun ndo'o raj qui'yaj cacun' uún a. Sese nuvi' tucuaán canoco' ní' ne ne uun rá ní' qui'yaj ní' cacun' asuun saj ma'. <sup>9</sup> Ne asij ataa nari' 'unj se-tucuanj Moisés, ne guun raj se vaa sa' qui'yaj, tzaj ne narij

se-tucuanj Moisés, gaa ne guun che'ej guun raj qui'yáj cacun' se vaa na'vej rá Diose, <sup>10</sup> ndaa síj, gaa ne quiri' nu' nimanj nanj adonj. Sese cunō yuvii nu' se-tucuanj Moisés, ne ve'é uxrá cayáán nij yuvii, ne che'é dan vaa tucuáán yo', tzaj ne 'unj nihánj me se daj doj se quiri' nu' nimanj, qui'yaj tucuáán yo' adonj. <sup>11</sup> Dan me se gaa narij se-tucuanj Moisés, ne guun raj canocoj nu' tucuáán yo', ne cavii sa' 'unj, qui'yaj tucuáán yo', raj a. Tzaj ne tananj a guun chi'ii ndo'o raj doj, qui'yaj cacun' 'nij nimanj, ne tiha' yu'unj cacun' yo' manj, ne che'é dan doj a qui'yáj cacun', ne quiri' nu' nimanj a adonj.

*Nana nihánj taj xna'anj se vaa na'vee canoco' ní se-tucuanj Moisés, che'é se uun chij cacun' rihaan nee man ní a*

<sup>12</sup> Dan me se guee uxrá se-tucuanj Moisés nanj á. 'O gaa nica nimán ní', sese cunō ní' man yo' ei. Ne cunaj uxrá vaa yo' ei. <sup>13</sup> 'Unj me se quiri' nimanj qui'yaj se-tucuanj Moisés tucuáán sa', rá nij soj na'. Taj ma'. Maan se che'é cacun' qui'yáá 'unj me quiri' nimanj nanj á. Gaa cunoj se-tucuanj Moisés, ne guun che'ej qui'yáj cacun', ne que'ee ndo'o cacun' qui'yáj, gaa ne xcaj 'unj cuentá se vaa man ndo'o cacun' nimanj a.

<sup>14</sup> Ne'en ní' se vaa nana ca'mii Nimán Diose me se-tucuanj Moisés, tzaj ne yuvii uun mej, ne inanj cacun' ne'enj qui'yáj a. <sup>15</sup> Ne ne'enj daj me che'é me 'yáá 'unj danj ma'. Dan me se me raj qui'yáj se sa', tzaj ne inanj cacun' 'yáj, ne se chi'ii na'vej raj qui'yáj, tzaj ne inanj se chi'ii 'yáj nanj adonj. <sup>16</sup> Chi'ii vaa cacun' qui'yáj, raj, ne dan me se ne'én 'unj se vaa sa' vaa se-tucuanj Moisés a. <sup>17</sup> Dan me se ne qui'yaj ma'anj cacun' ma'. Tzaj ne uun chij ndo'o cacun' rque nee manj, ne che'é dan nee manj qui'yaj cacun' a.

<sup>18-19</sup> Ne'enj se vaa taj se 'yá' qui'yaj nee manj se sa' ma'. Dan me se me raj qui'yáj se sa', tzaj ne na'vee qui'yaj nee manj se sa' ma'. Ne se

chi'ii na'vej raj qui'yáj, tzaj ne dan me se inanj se chi'ii 'yáj, 'yaj nee manj adonj. <sup>20</sup> Che'é dan me taj 'unj se vaa ne 'yaj ma'anj se chi'ii ma'. 'O se uun chij ndo'o cacun' rque nee manj, ne che'é dan inanj nee manj 'yaj se chi'ii yo' a. <sup>21</sup> Me raj qui'yáj se sa' uun rá Diose, tzaj ne na'vee qui'yáj danj ma'. 'O se tananj inanj 'na' cacun' rihanj a.

<sup>22</sup> Ne'enj se vaa sa' vaa se-tucuanj Moisés, <sup>23</sup> tzaj ne me ndo'o rá nee manj qui'yaj yo' cacun', ne na'vej nee manj cunō yo' rihaan Diose ma'. Inanj tucuáán chi'ii me rá nee manj canoco' yo' adonj. Dan me se na'vej raj qui'yáj cacun', tzaj ne nee manj inanj me rá se vaa qui'yáj cacun' a.

<sup>24</sup> Dan me se niquej, raj nanj ei. Inanj cacun' 'yaj nee manj, ne che'é dan quiri' nu' nimanj, ne vaa güii ca'anj 'unj rihaan ya'an, qui'yaj nee manj asuun nanj adonj. <sup>25</sup> Ne me síi tinanii manj rihaan nee manj, rá soj ga. 'O se guun ni'yaj ndo'o ní' rihaan Diose se vaa tinanii Jesucristó sij 'nij ra'a man ní' manj rihaan sayuun yo' adonj.

Dan me se xa' ma'anj, tzaj ne noco' uxrá ma'anj se-tucuanj Diose, tzaj ne xa' nee manj, tzaj ne inanj se chi'ii 'yaj nee manj a.

## 8

*Nana nihánj taj xna'anj se vaa xcaj ní' cuentá che'é inanj Nimán Diose, ne cavii sa' nimán ní a*

<sup>1</sup> Yaj me se daj chihaa míj se cuta' Diose cacun' xráá ní' sij noco' man Jesucristó ma'. <sup>2</sup> 'O se 'unj nihánj me se che'é se canocó' 'unj man Jesucristó, ne che'é dan Nimán Diose me síi guun chij rihaan nimanj, gaa ne dan me se cunuu sa' nimanj, ne che'é dan quinanii 'unj rihaan cacun', ne se cavi' nu' nimanj qui'yaj cacun' a man adonj. <sup>3</sup> Ne guun nucuaj nee man ní' canoco' nee man ní' nu' se-tucuanj Moisés, ne che'é dan se guun nucuaj ní' quinanii ma'an ní' rihaan cacun' tumé ní' ma'. Tzaj ne

Diose me sí tinanii man ní' rihaan cacun' yo', ne ca'néé Diöse ma'an ta'níí Diöse rihaan chumii, ne ase vaa nee man ní' ro', danj vaa nee man so' uún a. Xa' nee man ní', tzaj ne tumé ní' cacun', qui'yaj nee man ní', ne che'é dan ca'na' so', ne cayáán so' ga ní', ne cavi' so' che'é ní' a. Tzaj ne taj cacun' tumé ma'an so', ne che'é dan taj che'é qui'yaj ní' cacun' yaj ma'. <sup>4</sup> Cuanō yaj me se taj che'é qui'yaj ní' inanj se vaa me rá nee man ní' qui'yaj ní' ma'. Inanj rihaan orún' Nimán Diöse cunō ní', ne qui'yaj ma'an ní' ndaa vaa me rá Diöse qui'yaj ní' a. Dan me se Nimán Diöse 'yaj uno ma'an ní' se-tucuanj Moisés adonj.

<sup>5</sup> Dan me se ta'aj yuvij xcaj cuentá inanj che'é nee man nij so', tzaj ne inō doj vaa yuvij noco' man Nimán Diöse, ne dan me se che'é inanj se vaa me rá Nimán Diöse xcaj nij so' cuentá adonj. <sup>6</sup> Sese inanj che'é nee man ní' xcaj ní' cuentá, ne cavi' nu' nimán ní' a. Tzaj ne sese che'é Nimán Diöse xcaj ní' cuentá, ne cavii sa' ní', ne ca'vee cayáán ní' ga Diöse nu' cavii nu' ca'anj, ne gaa xej nimán ní', qui'yaj Nimán Diöse adonj. <sup>7</sup> Sese inanj che'é nee man ma'an ní' xcaj ní' cuentá, ne taj ri'yunj ní' man Diöse vaa gaa adonj. Se guun nucuaj ma'an ní' cunō ní' se-tucuanj Diöse vaa gaa ma'. <sup>8</sup> Ne aran' rá Diöse ni'yaj Diöse man nij yuvij acaj cuentá che'é nee man ma'an nij yuvij a man adonj.

*Nana nihánj taj xna'anj se vaa sese yanj Nimán Diöse ga ní', ne sa' doj gaa ní' a*

<sup>9</sup> Tzaj ne inō doj vaa nij soj sese yanj Nimán Diöse ga soj á. Che'é dan ne 'yaj soj ndaa vaa me rá nee man soj qui'yaj soj ma'. Tzaj ne inanj rihaan Nimán Diöse uno soj, ne dan me se sese nuvi' Nimán Jesucristó yáán ga yo'o so', ne nuveé sji 'nij ra'a Jesucristó man me so' ma'. <sup>10</sup> Ne'en soj se vaa cavi' nee man ní' che'é cacun' qui'yaj nee man ní', tzaj ne sese yanj Jesucristó ga ní', ne 'o vaa sa' ní' rihaan Diöse, ne che'é dan 'o vaa i'na'

nimán ní' adonj. <sup>11</sup> Ne ne'en soj se vaa cunuu i'na' uún Jesucristó gaa cavi' so', qui'yaj Diöse, ne ma'an Nimán Diöse nuú nimán soj, ne che'é dan cunuu naca nee man soj asa' cavi' soj, qui'yaj uún Diöse a.

*Nana nihánj taj xna'anj se vaa yuvij uno a'mii Nimán Diöse me ta'níí Diöse a*

<sup>12</sup> Che'é dan ne nó xcúún ní' qui'yaj ní' ndaa vaa me rá nee man ní' ma'. Se racuíj ní' man nee man ní', man tinuj, man nocoj. <sup>13</sup> 'O se sese aráya'anj ndo'o soj man nee man soj, ne ca'anj yanj soj rihaan Diöse, qui'yaj ma'an soj adonj. Tzaj ne sese cunō soj nana a'mii Nimán Diöse, ne se ca'vej rá soj qui'yaj nee man soj cacun', gaa ne yo'o gaa i'na' nimán soj adonj. <sup>14</sup> 'O se yuvij uno a'mii Nimán Diöse me ta'níí Diöse ei. <sup>15</sup> Ne'en soj se vaa chu'vi' mozó ne'en so' se-ru'vee so', tzaj ne na'vej rá Diöse qui'yaj soj danj rihaan Diöse ma'. Se cuhu'vi' nimán soj ne'en soj Diöse ma'. 'O se nicaj yu'unj Diöse man soj, ne guun ta'nij Diöse man soj, ne che'é dan me gaa niha' rá soj cataj soj: "Ataj" rihaan Diöse á. <sup>16</sup> Dan me se yo'o a'mii Nimán Diöse ga nimán ní', ne taj Nimán Diöse se vaa ta'níí Diöse me ní' a. <sup>17</sup> Che'é dan vaa güii rque ndo'o Diöse se sa' rihaan ní' ga Jesucristó, ne 'o cuyaán gaa se sa' rihaan Jesucristó ga ní' a. Veé dan me che'é se ran' ní' sayuun ndaa vaa quiran' Jesucristó ro', che'é dan cavii sa' ní' ga so', ne guun chij ní' ga so' vaa güii adonj.

*Nana nihánj taj xna'anj se vaa vaa güii, ne ve'é ndo'o gaa cunudanj chumii, qui'yaj Diöse che'é ní' a*

<sup>18</sup> Veé dan me se ran' xa' ní' sayuun cuano, tzaj ne vaa güii, ne doj a cavii sa' ní' rihaan sayuun ran' ní' cuano adonj. 'O se ataa cataj xna'anj Diöse rihaan ní' che'é nu' se sa' nicaj ní', tzaj ne asa' rque Diöse nu' se sa' rihaan ní', ne quini'yon ní' nu' sayuun quiran' ní' ei. Danj vaa rajnanj adonj. <sup>19</sup> Na'vij uxrá cunudanj nij rasuun

man rihaan chumij nihánj quisij güii tihaañ Diose man nij ta'níí Diose rihaan chumij, gaa ne quene'en chumij daj gaa nij so' a. <sup>20</sup> Cuanō ro', taj yu'vee nó nij rasuun man rihaan chumij ma'. Gaa qui'yaj Diose chumij, ne vaa sa' cunudanj nij rasuun yo', tzaj ne quiri' nij rasuun che'é cacun' qui'yaj yuvij, ne ca'vej rá Diose quiri' nu' nij rasuun yo', tzaj ne ne'en Diose <sup>21</sup> se vaa vaa güii cunuu sa' cunudanj nij rasuun yo' rihaan chumij, ne asa' quisij güii yo', ne taj rasuun quiri' taj rasuun cuchruu ma'. 'O se ve'é ndo'o gaa nu' nij rasuun yo' ei. Dan me se ase vaa ma'an nij ta'níí Diose ro', danj gaa uún nij rasuun uún, ne ve'é ndo'o gaa nij yo' adonj.

<sup>22</sup> Dan me se ne'en ní' se vaa ran' uxrá nu' rasuun man rihaan chumij sayuun cuano, ne me uxrá rá yo' cunuu naca uún yo', ne na'vij yo' quisij güii cunuu sa' yo' adonj. <sup>23</sup> Vaj a doj, ne ráchej ma'an ní' uún, ne na'vij ní' cunuu naca ma'an ní' uún a. Dan me se yanj Nimán Diose ga ní', ne sa' uxrá vaa Nimán Diose, ne che'é dan ne'en ní' se vaa rque Diose se sa' doj rihaan ní', ne ne'en ní' se vaa vaa güii, ne quene'en yuvij se vaa guun ta'nij Diose man ma'an ní', ne cunuu sa' nu' nee man ní' a. <sup>24</sup> Dan me se tinanii Diose man ní' rihaan chrej chi'ii uun chij nimán ní', ne che'é dan guun ya rá ní' se vaa cavii sa' ní', tzaj ne ataa quene'en ní' nu' se vaa qui'yaj Diose che'é ní', ne che'é dan nucuaj ndo'o rá ní' man Diose se vaa ya ya qui'yaj so' che'é ní' a. <sup>25</sup> Ne ne'en ní' daj qui'yaj Diose che'é ní' ma'. Maan se nucuaj rá ní' man Diose, ne che'é dan se gaa ra'yanj nimán ní' ma'. Maan se gaa nanaj nimán ní', ne na'vij ní' ndaa se cavii sa' ní' qui'yaj Diose adonj.

*Nana nihánj taj xna'anj se vaa racuíj ndo'o Diose man ní' a*

<sup>26</sup> Sese ne ne'en ní' qui'yaj ní' nu' se vaa no xcuún ní' qui'yaj ní', ne Nimán Diose racuíj man ní', ne guun nucuaj ní' a. Ne ne'en ní' daj ca'mii ní' gaa achíín ni'yaj ní' rihaan Diose

ma'. Che'é dan achíín ni'yaj Nimán Diose che'é ní', ne taj xna'anj Nimán Diose rihaan Diose nana me rá ma'an ní' ca'mii ní' a. <sup>27</sup> Dan me se Nimán Diose ne'en daj me rá ní' cataj xna'anj ní' rihaan Diose, ne uno Diose a'mii Nimán Diose che'é ní' ei. Ne'en Nimán Diose me se achiin man ní', ne achíín ni'yaj Nimán Diose rihaan Diose se vaa rque Diose se vaa achiin man ní' a. Dan me se ne'en Diose se vaa inanj se vaa a'vej rá Diose nicañ ní' achíín ni'yaj Nimán Diose, ne danj 'yaj Nimán Diose che'é cunudanj ní' sij cunuu sa' nimán rihaan Diose adonj.

<sup>28</sup> Dan me se ne'en ní' se vaa racuíj ndo'o Diose man ní' sij aráj cochroj rihaan Diose ei. 'O se canacúún Diose man ní' cayáán ní' ga Diose nu' cavii nu' ca'anj, ne che'é dan me avii sa' nu' suun 'yaj suun ní' ga Diose adonj. <sup>29</sup> Gaa naá me se quene'en Diose se vaa canoco' ní' man so' vaa güii, gaa ne yo'o guun rá Diose se vaa naqui'yaj sa' Diose nimán ní', ne ase vaa ta'níí Diose síí cu'naj Jesucristó ro', danj gaa ní' uún, ne vaa güii cumán ndo'o tinúú Jesucristó do', ra'vij Jesucristó do', ne so' guun síí chava' rihaan cunudanj ní' a. <sup>30</sup> Gaa ne canacúún Diose man ní', gaa ne cunuu sa' ní' rihaan Diose, qui'yaj Diose, gaa ne ya guun chij ní' ga Diose, qui'yaj ma'an Diose adonj.

*Nana nihánj taj xna'anj se vaa daj chihaa mij se guun tanáj Diose man ní' ma'*

<sup>31</sup> Dan me se Diose me tuvi' ní', ne che'é dan taj síí quisij qui'yaj sayuun man ní' ma'. <sup>32</sup> 'O se ne cuchu'vij' Diose rque Diose ma'an ta'níí Diose cavi' che'é ní', ne che'é dan guun ya rá ní' se vaa rque Diose nu' se sa' rihaan ní', ne cavii sa' ní' adonj. <sup>33</sup> Ní' sij narii Diose man me se se guun cuta' yuvij cacun' xráá ní' rihaan Diose ma'. 'O se ma'an Diose cataj se vaa cunuu sa' ní' rihaan so' a. <sup>34</sup> Taj yuvij cuta' cacun' xráá ní' sij narii Diose man ma'. 'O se cavi' Jesucristó che'é ní', ne cunuu i'na' uún



Jesucristó, ne cuano nicun' so' x'núú Diose, ne ma'an so' me síí achíín ni'yaj rihaan Diose che'é ní' adonj.

<sup>35</sup> A 'ó güii se guun yaníj Jesucristó rihaan ní', qui'yaj nij yuvií ma'. Yo'ó 'ee rá Jesucristó man ní' ei. Ca'vee se quiran' ní' sayuun do', ca'vee se quinanó ndo'o rá ní' do', ca'vee se quitaj ri'yun yuvií man ní' do', ca'vee se quina'aan rque ní' do', ca'vee se quinavij sa'anj rihaan ní' do', ca'vee se cavi' ní' do', tzaj ne daj chihaa míj se guun yaníj Jesucristó rihaan ní' ma'. <sup>36</sup> Nō nana rihaan danj Diose se vaa che'é se noco' ní' man Diose, che'é dan me rá yuvií ticavi' yuvií man ní' daj a orá, ne ase vaa ticavi' nii man matzinj ro', danj me rá nii ticavi' nii man ní', taj danj Diose a. <sup>37</sup> Tzaj ne ca'vee se daj a sayuun ran' ní', tzaj ne taj se 'yaj ma'. 'O se Jesucristó me síí 'ee rá man ní', ne che'é dan qui'yaj canaán uxrá ní' rihaan sayuun adonj.

<sup>38-39</sup> 'O se guun ya raj se vaa a 'ó rasuun se ca'vee qui'yaj guun yaníj Diose rihaan ní' ma'. Ca'vee se gaa i'na' ní' do', ca'vee se cavi' ní' do', tzaj ne yo'ó 'ee rá Diose man ní' a. Ca'vee se ma'an nij se-mozó Diose me rá qui'yaj guun yaníj Diose rihaan ní', tzaj ne se ca'vee qui'yaj canaán nij so' ma'. Ca'vee se daj a sayuun quiran' ní', tzaj ne se tanáj Diose man ní' ma'. Se guun yaníj Diose rihaan ní' qui'yaj yuvií do', qui'yaj síí chree do', qui'yaj nana chree do', qui'yaj naj guun rasuun do' ma'. Se guun nucuaj nij so' qui'yaj nij so' danj ma'. Taj a 'ó rasuun man xta' taj a 'ó rasuun man rej rque yo'óo qui'yaj ca'vee guun yaníj Diose rihaan ní' ma'. A 'ó rasuun qui'yaj Diose se ca'vee qui'yaj danj ma'. Yo'ó 'ee rá Diose man ní', ne che'é dan ca'née so' man Jesucristó rihaan ní', ne 'nij ra'a Jesucristó man ní', ne 'ee rá so' man ní' adonj.

## 9

*Nana nihánj taj xna'anj se vaa nanó ndo'o rá síí cu'naj Pablo che'é tuvi' so' nij yuvií israelitá a*

<sup>1</sup> Noco' nu' ní' man Jesucristó, ne se ca'mii ne 'unj rihaan nij soj ma'. 'O se yanj Nimán Diose ga 'unj, ne ma'an Nimán Diose cataj rihanj se vaa nana ya ca'mij á. <sup>2-3</sup> Dan me se inanj nanó ndo'o raj che'é nij tuvij nij yuvií israelitá, ne me raj nayonj rihaan nij so', ne ndaa ca'née nimanj quinaj ma'anj rihaan sayuun, qui'yaj Diose, ne yo'ó nacaj Diose man nij so' rihaan sayuun quiran' nij so', ne ca'née nimanj tanáj Jesucristó manj, ne nacaj Jesucristó man nij so' a. <sup>4</sup> Dan me se yuvií israelitá me nij so', ne guun ta'nij Diose man nij so', rá Diose á. Quene'en nij so' se vaa chuguun ndo'o Diose gaa canicun' ma'an Diose ga nij so' gaa naá, ne cataj xna'anj Diose rihaan nij so' daj qui'yaj Diose che'é nij so', ne cataj xna'anj Diose rihaan nij so' daj qui'yaj ma'an nij so' a. Tucu'yón Diose man nij so' daj qui'yaj nij so' gaa na'víj nij so' rihaan Diose, ne cataj Diose rihaan nij so' se vaa ya ca'nej Diose 'o síí tinanii man nij so' rihaan sayuun a. <sup>5</sup> Xii nij yuvií israelitá me nij síí man gaa naá síí cu'naj Abraham do', síí cu'naj Isaac do', síí cu'naj Jacob do' a. Yo'ó tuvi' nij so' me Jesucristó síí ca'née Diose tinanii man yuvií rihaan sayuun, ne Jesucristó me se Diose me so', ne uun chij so' rihaan cunudanj a. Ve'é ca'mii ní' che'é so' nu' cavii nu' ca'anj ei. Veé danj gaa ya ei.

*Nana nihánj taj xna'anj se vaa inanj nij yuvií israelitá narii Diose me ya ya yuvií israelitá rihaan Diose a*

<sup>6</sup> Dan me se gaa naá cataj Diose se vaa ya canoco' nij yuvií israelitá man so' nu' cavii nu' ca'anj, ne me che'é ne noco' nij yuvií israelitá man Diose cuano, rá soj ga. 'O se quisij ya ndaa vaa ca'mii Diose, tzaj ne ne narii ya Diose man cunudanj nij yuvií israelitá ma'. Nuveé ya ya yuvií israelitá me cunudanj nij so' rihaan Diose ma'. <sup>7</sup> Abraham síí cayáan gaa naá ro', doj ta'níí ta'nij si'no so' guun ta'níí Diose, ne dan me se cataj danj Diose se vaa orún' nij ta'níí ta'nij si'no

sí cu'naj Isaac me ya ya ta'ní ta'nij si'no sí cu'naj Abraham rihaan Diose á. Danj ca'mii Diose rihaan sí cu'naj Abraham gaa naá a. <sup>8</sup> Dan me se cataj Diose se vaa se guun ta'nij Diose man cunudanj nij ta'ní ta'nij si'no sí cu'naj Abraham ma'. Maan se ta'aj nij so' narii Diose, ne inanj che'é nij sí narii Diose ca'mii Diose, gaa cata' tu'va Diose se vaa ya canoco' nij so' man so' a. <sup>9</sup> Dan me se gaa ataa ca'ngaa sí cu'naj Isaac sí narii Diose man, ne ca'mii Diose che'é so', cataj Diose se vaa nasij 'o yo', gaa ne ca'na' uún Diose rihaan Abraham, ne ya gaa 'o ta'nij sno'o chana cu'naj Sara a. Ne sno'o cunii yo' ro', me Isaac a. Danj cataj Diose rihaan Abraham a.

<sup>10</sup> Ne vaa chana cu'naj Rebeca uún, ne cotoj no' ga orún' nica no' sí cu'naj Isaac, ne nari' no' ndaa ne'ej cuaté nuu rque no' a. <sup>11-12</sup> Gaa ataa ca'ngaa ne'ej, ne cataj xna'anj Diose rihaan no' se vaa qui'yaj suun ne'ej taj yaan ca'ngaa rihaan ne'ej noco' xco, cataj Diose a. 'O se ataa ca'ngaa ne'ej, ne taj a 'ó roj so' qui'yaj sa' do', qui'yaj chi'ii do' ma'. Taj se sa' qui'yaj sí guun chij rihaan tinúú, ne taj cacun' tumé sí qui'yaj suun che'é tinúú ma'. Maan se inanj danj qui'yaj Diose narii Diose man yo'o so' guun chij so' rihaan tinúú so', che'é rej aj guun rá Diose daj gaa suun cata 'o 'o so' rihaan Diose nanj ei. <sup>13</sup> Dan me se taj danj Diose se vaa cunuu 'ee rá Diose ne'en Diose man nij tuvi' sí cu'naj Jacob sí noco' xco, tzaj ne quiri' nij tuvi' sí cu'naj Esau rihaan Diose, taj danj Diose adonj.

*Nana nihánj taj xna'anj se vaa ca'vee narii Diose naj guun yuvii a*

<sup>14</sup> Dan me se nij qui'yaj Diose rihaan sí cu'naj Esau, rá soj na'. Taj a doj ma'. <sup>15</sup> 'O se gaa naá ca'mii Diose rihaan sí cu'naj Moisés, cataj Diose a:

—No xcúún 'unj gaa 'ee rá 'unj ne'én 'unj naj guun yuvii a. —Danj ca'mii Diose rihaan Moisés gaa naá a.

<sup>16</sup> Dan me se ca'vee se daj a me rá yuvii, ca'vee se daj a qui'yaj yuvii,

tzaj ne se ca'vee qui'yaj nij yuvii se vaa me rá ma'an nij yuvii ma'. Orún' Diose me sí cataj me sí cunuu 'ee rá so' man adonj.

<sup>17</sup> Ne rihaan danj Diose nó nana ca'mii Diose rihaan sí cu'naj Faraón gaa cataj Diose:

—Guún so' sí nicaj suun, qui'yáj, gaa ne quene'en yuvii daj quirán' so', qui'yáj, ne xcaj nij yuvii cuentá se vaa Diose sí nucuaj mej a. —Nanj cataj Diose rihaan sí cu'naj Faraón gaa naá a.

<sup>18</sup> Dan me se ne'en ní' se vaa sese me rá Diose cunuu 'ee rá Diose man 'o so', ne cunuu 'ee rá Diose man so', ne sese me rá Diose guun nichraj rá 'o so', ne guun nichraj rá so', qui'yaj uún Diose a.

<sup>19</sup> Vaa yuvii cataj: “Che'é dan, me che'é uta' Diose cacun' xraá yuvii ga. 'O se inanj se me rá Diose qui'yaj ní' 'yaj ní' á”. Danj cataj ta'aj yuvii a. <sup>20</sup> Tzaj ne ne nó xcúún ní' cataj ní' se vaa ne nó xcúún Diose qui'yaj so' ndaa vaa 'yaj so' ma'. 'O se Diose me sí qui'yaj man ní', ne ne nó xcúún ní' cachinj na'anj ní' man Diose me che'é cavii nij ta'aj ní' ma'. <sup>21</sup> Dan me se sí 'yaj xruj me se doj yo'óo niqiii gaa rihaan so', gaa ne ca'vee qui'yaj so' xruj a. Doj yo'óo niqiii nicaj so' qui'yaj so' xruj ve'é ndo'o vaa, gaa ne doj yo'óo niqiii nicaj so' qui'yaj so' xruj nij doj a. Ca'vee qui'yaj so' daj me rá ma'an so' á. <sup>22</sup> Ne ase vaa 'yaj sí 'yaj xruj ro', danj vaa 'yaj Diose, ne dan me se quiri' ndo'o ta'aj yuvii qui'yaj Diose, ne vaa güii ca'anj nij so' rihaan ya'an a. Uun yuvaá Diose man nij so' che'é cacun' 'yaj nij so', ne me rá Diose caxrii yuvaá Diose man nij so', ne me rá Diose tihaaan Diose se vaa nucuaj ndo'o Diose, tzaj ne aráj x'naa uxrá Diose ni'yaj Diose man nij yuvii, <sup>23</sup> che'é rej guun rá Diose tihaaan Diose rihaan nij yuvii nu' ndaa vaa qui'yaj so' che'é yo'óo nij yuvii, ne yo'óo nij so' me se aj guun rá Diose se vaa guun chij nij so' ga so', ne che'é dan cunuu 'ee rá so' man nij so', gaa ne xcaj cunudanj nij yuvii cuentá

se vaa síi uun chij sa' ndo'o me Diose ei. <sup>24</sup> Ma'an ní' me nij yuvii guun chij ga Diose, ne dan me se ta'aj ní' me yuvii israelitá, ne yo'ó ta'aj ní' me yuvii yaníj, tzaj ne canacúun Diose man 'o 'o ní' guun chij ní' ga so' adonj.

<sup>25</sup> Ase vaa nana a'mij nihánj ro', danj vaa nana ca'mii Diose gaa naá nana cachrón síi cu'naj Oseas rihaan yanj a. Dan me se cataj Diose a:

—Yuvii ne noco' manj me se ne 'ee raj man nij so' ma'. Tzaj ne vaa güii guun nij so' tuvij, ne vaa güii cunuu 'ee raj man nij so' adonj. <sup>26</sup> Dan me se maan rej nicun' 'unj gaa cataj 'unj se vaa nuveé tuví' 'unj me nij yuvii ro', maan dan canicún' 'unj cataj 'unj se vaa ta'nij ma'anj me nij so' a. 'O se Diose vaa i'na' mej adonj. —Danj ca'mii Diose gaa naá a.

<sup>27</sup> Ne nucuaj ca'mii síi cu'naj Isaías gaa naá che'é nij yuvii israelitá a. Cataj so':

—Ca'vee se guun que'ee uxrá nij síi israelitá, ne ndaa ase uun rá' ne'én' yo'óo chruu naj tu'va na ya'anj guun rá' quene'én' man nij tuví' nij so', tzaj ne taj que'ee nij so' cavii sa' ma'. 'O se doj tuví' nij so' cavii sa' nanj adonj. <sup>28</sup> Orá le'ej nii qui'yaj suun Diose nu' suun vaa rihaan so' ca'ne' so' cacun' che'é nu' yuvii man rihaan chumii adonj. —Danj ca'mii síi cu'naj Isaías a. <sup>29</sup> Veé dan ca'mii uún síi cu'naj Isaías che'é nij yuvii israelitá, ne cataj uún so'— Guun nucuaj ndo'o Diose guun chij Diose á. Ne ní' me se avi' ní' che'é cacun' tumé ní', tzaj ne tinanii Diose man doj tuví' ní' sij israelitá rihaan sayuun a. Sese taj tuví' ní' quinanii rihaan sayuun, ne caví' cunudanj nij yuvii man chiháán ní', ne quinavij chiháán ní', ne ase vaa navij chuman' Sodoma do', ase vaa navij chuman' Gomorra do', danj gaa quinavij chiháán ní' nanj adonj. —Veé danj ca'mii síi cu'naj Isaías che'é nij yuvii israelitá gaa naá a.

*Nana nihánj taj xna'anj se vaa ne cunuu sa' nij yuvii israelitá rihaan*

*Diose, che'é se ne cuchuman rá nij so' ni'yaj nij so' man Jesucristó a*

<sup>30</sup> Xcaj ní' cuentá daj qui'yaj nij yuvii israelitá do', daj qui'yaj nij yuvii yaníj do', rihaan Diose á. Dan me se nuveé yuvii israelitá me nij yuvii yaníj, ne ne guun rá nij so' qui'yaj suun nij so' yan cunuu sa' ma'an nij so' rihaan Diose, tzaj ne ta'aj nij so' me síi amán rá ni'yaj man Diose, ne che'é dan 'o cunuu sa' nij so' rihaan Diose ei. <sup>31</sup> Ino qui'yaj que'ee nij yuvii israelitá a. Dan me se qui'yaj suun uxrá nij so' nano' nij so' chrej cunuu sa' ma'an nij so' rihaan Diose, tzaj ne ne nari' nij so' chrej sa' ma'. <sup>32</sup> Dan me se ne nari' nij so', che'é se ne cuchuman rá nij so' ni'yaj nij so' man Jesucristó ma'. Ne guun ya rá nij so' se vaa racuíj Diose man nij so' cunuu sa' nij so' rihaan Diose ma'. Maan se cunuu sa' ma'an nij so', rá nij so', ne qui'yaj suun uxrá nij so' che'é rej ca'vee cunuu sa' ma'an nij so', rá nij so' a. Ne ca'vej rá nij so' cuchuman rá nij so' ni'yaj nij so' man Jesucristó, ne dan me se ase vaa 'o yuvej aráán chrej ro', danj vaa Jesucristó rihaan nij so', ne ase vaa uun na'aj yuvii naxru' rihaan yuvej ro', danj vaa guun na'aj nij yuvii israelitá che'é se ne ca'vej rá nij so' cuchuman rá nij so' ni'yaj nij so' man Jesucristó adonj.

<sup>33</sup> 'O cuyaan vaa nana a'mij ga nana a'mii danj Diose che'é Jesucristó, ne dan me se gaa naá cataj Diose a:

—Ni'yaj so' ei. Aj cuné' 'unj yo'o yuvii chuman' cu'naj Jerusalén, ne ase vaa 'o yuvej vaa so', nucuaj ndo'o so' a. Naxru' yuvii, qui'yaj yuvej yo', ne guun na'aj nij yuvii quene'en nij yuvii man so', tzaj ne sese cuchuman rá yo'o so' quene'en so' man síi cuné' 'unj, ne se guun na'aj so' ma'. Tananj cavii sa' so' adonj. —Dan me nana ca'mii Diose che'é Jesucristó a.

## 10

<sup>1</sup> Dan me se achíin ni'yaj ndo'oj rihaan Diose che'é nij tuví' 'unj nij yuvii israelitá, tinuj, nocoj. 'Ee rá 'unj man nij so', ne che'é dan me ndo'o

raj quinaniij nij so' rihaan sayuun a. <sup>2</sup> Dan me se sa' qui'yaj nij so' gaa guun ndo'o rá nij so' cunu sa' nij so' rihaan Diose, tzaj ne ne ne'en nij so' daj qui'yaj nij so' ne ca'vee cunu sa' nij so' rihaan Diose ma'. <sup>3</sup> Ne xcaj nij so' cuentá che'é se vaa aj qui'yaj Diose che'é nij so', ne ne xcaj nij so' cuentá se vaa ca'vee cunu sa' nij so' rihaan Diose, qui'yaj ma'an Diose ma'. Maan se nano' ma'an nij so' chrej cunu sa' ma'an nij so' rihaan Diose, ne che'é dan ataa qui'yaj nij so' ndaa vaa me rá Diose qui'yaj nij so', ne che'é dan ataa cunu sa' nij so' adonj. <sup>4</sup> Gaa naá, ne canoco' yuvii se-tucuanj Moisés, ne veé dan me se cunu sa' nij so' rihaan Diose, rá nij so', tzaj ne yaj nihánj me se aj quisij se-tucuanj Moisés, qui'yaj Jesucristó, ne 'o se yo'o aman rá ní' ni'yaj ní' man Jesucristó, gaa ne cunu sa' ní' rihaan Diose nanj adonj.

*Nana nihánj taj xna'anj se vaa quinaniij cunudanj nij yuvii cuchumán rá ni'yaj man Jesucristó rihaan sayuun a*

<sup>5</sup> Gaa naá cachrón síi cu'naj Moisés nana rihaan yanj, ca'mii so' che'é se-tucuanj ma'an so', ne cataj so' se vaa sese guun nucuaj yuvii cunoyuvii nu' tucuáan cuchruj ma'an so', ne cayáan nij yuvii rihaan Diose nu' cavii nu' ca'anj a. Danj ca'mii Moisés gaa naá a. <sup>6</sup> Tzaj ne cuano nihánj me se aj xcaj ní' cuentá se vaa nuu sa' ní' rihaan Diose che'é yan cuchumán rá ní' cuno ní' nana ca'mii so', ne che'é dan yo'o a'mii ní' ga síi cu'naj Moisés gaa naá, taj ní' se vaa taj che'é cavii yuvii rej xta' do', nano' nij yuvii man síi tinanii man nij so' rihaan sayuun, <sup>7</sup> ne taj che'é ca'anj yuvii rej rque yo'óo do', nano' nij yuvii man so' rej man nimán ma'. Danj taj ní' ga síi cu'naj Moisés a.

<sup>8</sup> Ne cataj uún síi cu'naj Moisés se vaa nana achiin mán so' ro', nuveé nana ca'na' rej gan' me nana yo' ma'. Tananj ndaa tu'va ma'an so' do', ndaa nimán ma'an so' do', nuú nana yo'

nanj adonj, taj Moisés, ne nana yo' me nana a'mii yuvii taj yuvii se vaa amán rá yuvii ni'yaj yuvii man Jesucristó, ndaa vaa a'mii natáj núj rihaan yuvii ei. <sup>9</sup> 'O se sese ca'mii yá so' cataj so' rihaan tuví' so' se vaa Jesucristó 'nij ra'a mán so', ne sese guun ya rá so' se vaa cunu i'na' uún Jesucristó, qui'yaj Diose, gaa cavi' so', ne quinaniij so' rihaan sayuun a. <sup>10</sup> 'O se nimán ní' me se yo' me cuchuman rá ní' ne'en ní' Jesucristó, ne ca'vee cunu sa' ní' rihaan Diose, ne tu'va ní' me se yo' me ca'mii ya ní' cataj ní' se vaa noco' ní' man Jesucristó, ne ca'vee quinaniij ní' rihaan sayuun adonj.

<sup>11</sup> Dan me se taj uún danj Diose se vaa xa' síi amán rá ni'yaj man Jesucristó, tzaj ne se guun na'aj so' ma'. Ya cavii sa' so' adonj. Danj taj danj Diose a. <sup>12</sup> 'O se 'o cyaan vaa cunudanj yuvii rihaan Jesucristó, ne dan me se yuvii israelitá do', yuvii yanij do', 'o cyaan vaa nij so' rihaan Jesucristó, tzaj ne 'nij ra'a Jesucristó man cunudanj nij so', ne uun nucuaj uxrá Jesucristó racuij so' man cunudanj yuvii achiin ni'yaj rihaan so' a. <sup>13</sup> Dan me se taj uún danj Diose a: "Yuvii achiin ni'yaj rihaan síi 'nij ra'a man ní' ro', quinaniij cunudanj nij so' rihaan sayuun, ne cavii sa' nij so' adonj". Danj taj danj Diose a.

*Nana nihánj taj xna'anj se vaa achiin ca'mii natáj nii che'é Jesucristó rihaan yuvii ataa cunoyuvii nana che'é so' a*

<sup>14</sup> Tzaj ne taj che'é cachinj ni'yaj yuvii rihaan Jesucristó, sese ataa cuchuman rá nij yuvii ni'yaj nij yuvii man Jesucristó ma'. Ne se ca'vee cuchuman rá nij yuvii ni'yaj nij yuvii man so', sese ataa cunoyuvii se-nana so' ma'. Ne se ca'vee cunoyuvii, sese taj síi a'mii natáj rihaan nij yuvii ma'. <sup>15</sup> Ne se cuchi' síi a'mii natáj rihaan yuvii, sese se ca'née nii man so' ma'. Dan me se a'mii uún danj Diose, taj yo': "Ve'é ndo'o 'yaj síi ca'anj ca'mii natáj nana sa' ei". Danj taj danj Diose a.



16 Tzaj ne vaa yuvii na'vej rá cuno nana sa' ma'. Inanj danj ca'mii síí cu'naj Isaías gaa cachín ni'yaj so' rihaan Diose, ne cataj so':

—Ataj síí chij. Doj yuvii amán rá cuno nana ca'mii núj a —taj so' rihaan Diose a.

17 Tzaj ne veé dan me se asino a'mii natáj nii rihaan yuvii che'é Jesucristó, gaa ne uno nij yuvii, ne xcaj nij yuvii cuentá che'é se vaa taj xna'anj Diose rihaan nij yuvii, gaa ne chumán rá nij yuvii ni'yaj nij yuvii man Diose nanj adonj.

*Nana nihánj taj xna'anj se vaa na'vej rá nij yuvii israelitá cunó nij so' se-nana Jesucristó nana sa' ma'*

18 Tzaj ne cataj ta'aj yuvii se vaa ataa cuchí' nana sa' rihaan nij yuvii israelitá a. Danj ca'mii ta'aj nij so', tzaj ne aj cuchí' nana sa' rihaan nij yuvii israelitá ei. Dan me se taj danj Diose se vaa aj quene'en cunudanj nij yuvii man rihaan chumii se-nana Diose nana sa' a. Danj a'mii danj Diose á.

19 Tzaj ne yo'ó ta'aj yuvii cataj se vaa ne ne'en ya nij yuvii israelitá se vaa tinanii Diose man cunudanj nij yuvii man rihaan chumii rihaan sayuun ma'. Danj cataj uún nij yuvii yo', tzaj ne taj ma'. Maan se aj ne'en nij yuvii israelitá ei. 'O se gaa naá cachrón síí cu'naj Moisés nana ca'mii Diose rihaan nij yuvii israelitá rihaan yanj, gaa cataj Diose se vaa vaa güii xcaj nij yuvii israelitá cuentá se vaa cavii sa' nij yuvii yaníj, qui'yaj Diose, ne che'é dan guun xcoj ruvaa rá nij yuvii israelitá quene'en nij so' nij yuvii yaníj yo' a. 'O se nuveé yuvii acaj cuentá me yuvii yaníj, ne che'é dan guun xcoj ruvaa rá nij yuvii israelitá che'é se vaa cavii sa' nij yuvii yaníj qui'yaj Diose ei. Danj ca'mii Diose gaa naá a.

20 Ne 'o cyaan vaa nana nihánj ga nana cachrón uún síí cu'naj Isaías rihaan yanj gaa naá, ne dan me se quisíj rá so' cataj so' se vaa nij yuvii yaníj me se ne nano' nij so' man

Diose, tzaj ne nari' nij yuvii yaníj man Diose, ne nda' se ne guun rá nij so' quene'en nij so' me rej vaj Diose, tzaj ne curuvi' Diose rihaan nij so' a. Danj taj síí cu'naj Isaías gaa naá a.

21 Tzaj ne ino vaa nana ca'mii Diose rihaan nij yuvii israelitá gaa naá, taj síí cu'naj Isaías a. Dan me se cataj Diose rihaan nij yuvii israelitá se vaa 'o me rá Diose nacaj Diose man nij yuvii israelitá, tzaj ne ne ca'vej rá nij so' cunó nij so' rihaan Diose ma'. Inanj tucuáá nij so' rihaan Diose nanj á. Danj taj Diose, ne cachrón síí cu'naj Isaías rihaan yanj a.

## 11

*Nana nihánj taj xna'anj se vaa cunuu 'ee rá Diose ni'yaj Diose ta'aj nij yuvii israelitá a*

1 Che'é se tucuáá nij yuvii israelitá rihaan Diose, che'é dan quiri'íj yaníj Diose man nij so', rá soj na'. Taj ma'. 'O se ma'anj me síí israelitá uún ei. Ne dan me se xií 'unj me síí cu'naj Abraham gaa naá, ne xií 'unj me síí cu'naj Benjamín uún ei. 2 Ne quiri'íj yaníj Diose man nij yuvii israelitá ma'. 'O se gaa ataa qui'yaj Diose chumii, ne 'o quene'en Diose se vaa canoco' nij so' man Diose a.

Ne'en nij soj daj taj danj Diose che'é síí cu'naj Elías gaa naá a. Dan me se cuta' Elías cacun' xráá nij yuvii israelitá, 3 ne cataj so':

—Ataj síí chij. Ticavi' nij yuvii israelitá man nij síí nata' se-nana so' rihaan yuvii che'é so' á. Tiri' nij so' rej quina'víj yuvii rihaan so' á. Taj orunj quináj nanj á. Ne me rá nij so' ticavi' nij so' mán 'unj uún adonj. —Danj ca'mii síí cu'naj Elías rihaan Diose a.

4 Gaa ne ca'mii uún Diose rihaan so', cataj Diose:

—Taj ma'. Ne taj oruún so' ma'. Tzaj ne vaa 'o cunú' chij míj yuvii israelitá nocó' manj, ne a 'o nij so' ne na'víj rihaan ya'anj cu'naj Baal ya'anj ne vaa i'na' ma'. —Danj ca'mii Diose rihaan síí cu'naj Elías a.

<sup>5</sup> Ne veé danj vaa uún nij yuvii israelitá sítí man cuano, ne cunuu 'ee rá Diose man nij yuvii israelitá, ne narii Diose man doj tui' nij so' ei. <sup>6</sup> Inanj danj qui'yaj ma'an Diose che'é ta'aj nij yuvii israelitá, tzaj ne nuveé che'e se sa' qui'yaj ma'an nij so' me narii Diose man nij so' ma'. Sese che'e se sa' qui'yaj nij so' narii Diose man nij so', ne taj che'é cataj ní' se vaa cunuu 'ee rá uún Diose man nij so' ma'.

*Nana nihánj taj xna'anj se vaa vaa güii cunuu sa' uún nij yuvii israelitá rihaan Diose a*

<sup>7</sup> Cuanó ro', cunudanj nij yuvii israelitá me rá cunuu sa' rihaan Diose, tzaj ne ne guun nucuaj cunudanj nij so' cunuu sa' ma'an nij so' ma'. Tzaj ne narii Diose man ta'aj nij so', ne cunuu sa' ta'aj nij so' rihaan Diose, ne quináj uún yo'ó ta'aj nij yuvii israelitá yo' a. Ne xa' nij sítí quináj me se ne guun nucuaj nij so' daj chihaa míj xcaj nij so' cuentá che'é Diose ma'. <sup>8</sup> Dan me se nanj taj uún danj Diose, taj yo': "Ne ca'vee xcaj nij so' cuentá, qui'yaj Diose ma'. 'Q se ase vaa sítí tuchrii do', ase vaa sítí so' do', danj vaa nij so', ne danj vaa nij so' ndaa cuano nanj adonj". Danj ca'mii danj Diose che'é nij yuvii israelitá a. <sup>9</sup> 'Q cuyaán vaa nana nihánj ga nana ca'mii sítí cu'naj David gaa naá uún, ne cataj so' se vaa ase ran' xcuu ata' ra'nga' ro', danj quiran' nij yuvii israelitá a. Dan me se cavii sa' uxrá nij so' rihaan chumii nihánj, tzaj ne taj ni'yón quiran' nij so' sayuun, ne quiran' nij so' sayuun che'é nu' sayuun qui'yaj nij so' a. <sup>10</sup> Se guun nucuaj nij so' xcaj nij so' cuentá, maan se quinano ndo'o rá nij so' che'é sayuun quiran' nij so' a. Danj ca'mii sítí cu'naj David che'é se vaa quiran' nij yuvii israelitá, ne ya danj quiran' guee nij so' nanj adonj.

<sup>11</sup> Dan me se ne cuchuman rá nij yuvii israelitá nana ca'mii Diose, gaa ne quirir' nij so' rihaan Diose, ne veé danj gaa nij so' nu' cavii nu' ca'anj, rá nij soj na'. Taj ma'. 'Q se che'é

se vaa qui'yaj nij yuvii israelitá, che'é dan vaa ya'núj rihaan nij yuvii yaníj quinanii nij so' rihaan sayuun, gaa ne guun xcoj ruvaa rá nij yuvii israelitá quene'en nij so' nij yuvii yaníj a. <sup>12</sup> Gaa ne canicaj rá nij yuvii israelitá, ne canoco' nij so' Diose adonj. Dan me se che'é se quirir' nij so' rihaan Diose, ne che'é dan cavii sa' cunudanj nij yuvii man rihaan chumii, ne ndaa nij yuvii yaníj cavii sa', tzaj ne asa' nuu sa' nij yuvii israelitá rihaan Diose, ne doj a cavii sa' uún cunudanj nij yuvii man rihaan chumii adonj.

*Nana nihánj taj xna'anj se vaa se guun ca'mii xta' nij yuvii yaníj rihaan nij yuvii israelitá ma'*

<sup>13</sup> Cuanó ro', ca'mij rihaan nij soj sij yaníj, ne aj cune' Jesucristó man 'unj guún 'unj apóstol nata' se-nana so' rihaan nij soj sij yaníj adonj. Ne aj guun que'ee ndo'o ca'mij rihaan nij yuvii israelitá che'é suun ca'ne' Jesucristó rihanj, ne dan me se aj guun que'ee ndo'o cataj xna'anj 'unj rihaan nij so' se vaa a'mii natáj 'unj se-nana Diose rihaan nij soj sij yaníj a. <sup>14</sup> 'Q se me raj guun xcoj rá nij so' ni'yaj nij so' man soj sij yaníj, gaa ne canoco' ta'aj nij so' nana noco' soj, gaa ne quinanii nij so' rihaan sayuun, raj a. <sup>15</sup> Gaa quirir'íj yaníj Diose man nij yuvii israelitá, ne cunuu rcua'aaan yo'ó nij yuvii man rihaan chumii ga Diose, ne che'é dan asa' nacaj uún Diose man nij yuvii israelitá, ne cavii sa' uxrá ma'an nij yuvii israelitá uún a. Dan me se ase vaa sítí cavi' vaa nij so' cuano ei. Na'vee quinanii nij so' rihaan sayuun, tzaj ne asa' nacaj uún Diose man nij so', ne ase vaa sítí na'núj ro', danj gaa nij so', cavii sa' uxrá nij so' ei. <sup>16</sup> Ya nacaj uún Diose man nij yuvii israelitá nanj á. 'Q se ne'en ní' se vaa sese go' nii ta'aj tan' rihaan Diose, ne cunuu guee ya stan' nii rihaan Diose, ne sese sa' vaa yáa chruun rihaan Diose, ne sa' vaa cunu' chruun yo' rihaan Diose ei. Che'é dan ne'en ní' se vaa sese cunuu sa' ta'aj nij

yuvii israelitá rihaan Diose, ne gaa sa' cunudanj nij yuvii israelitá rihaan Diose adonj.

<sup>17</sup> Ne'en soj se vaa ne cuchuman rá ta'aj nij yuvii israelitá ni'yaj nij so' Diose ma'. Che'é dan, ase vaa 'yaj nii man ta'aj nij ra'a chruun olivó ne rii chruj ro', danj vaa qui'yaj Diose man nij so', ne quiri'ij yanij Diose man nij síi ne cuchuman rá yo', gaa ne nacaj Diose man soj sij yanij, ne dan me se ase vaa ra'a chruun olivó nicun' rco' quij vaa soj, tzaj ne nacaj Diose man soj, caxrij Diose man soj tacóo chruun olivó sa', ne guun soj 'o chruun sa' vaa, ne vaa i'na' soj, 'yaj yáa chruun yo' nanj ei. <sup>18</sup> Tzaj ne se guun cataj soj se vaa sa' doj vaa soj rihaan ra'a chruun ca'anj yanij qui'yaj Diose ma'. Dan me se sese vaa se uun uxrá ma'an soj rá soj, ne me ma'an rá soj nanj ei. Dan me se xcaj soj cuentá se vaa taj se uun soj rihaan yáa chruun yo' mei. 'O se ma'an yáa chruun yo' 'yaj don 'vee vaa i'na' soj sij uun ra'a chruun chuguanj. Xa' soj, tzaj ne maan chruun le'ej nata' nayón uun me soj nanj ei. <sup>19</sup> Xraj, ne cataj yo'o tuvi' soj: "Tzaj ne quiri'ij yanij Diose man yo'ó nij ra'a chruun yo' che'é rej ca'vee caxrij so' mán 'unj tacóo chruun yo' ei", rá yo'o tuvi' soj a. <sup>20</sup> Tzaj ne maan che'é se nuveé sij amán rá ni'yaj Diose me ta'aj nij yuvii israelitá yo' me quiri'ij yanij Diose man nij so', ne maan che'é se amán rá soj ni'yaj soj Diose me nicun' soj rihaan Diose cuano chuguanj. Tzaj ne se guun cataj soj se vaa vaa se uun ndo'o soj ma'. 'O se cuchu'vi' nimán soj ei.

<sup>21</sup> Dan me se nda' se chruun cavii man raá chruun ya me nij síi israelitá, tzaj ne ne caraá x'naa Diose man nij so', ne quiri'ij yanij Diose man ma'an ya nij so', ne che'é dan táa a soj, ne se cuchu'vi' Diose quiri'ij yanij Diose man soj sij ra'a chruun cavii quij a mei. <sup>22</sup> Dan me se xcaj soj cuentá, ne nda' se yuvaa ya Diose ne ne'en Diose qui'yaj Diose sayuun man nij yuvii 'yaj se nij rihaan Diose,

tzaj ne cunuu 'ee rá Diose man soj, ne ve'é ndo'o qui'yaj Diose rihaan soj ei. Ne ve'é qui'yaj Diose rihaan soj nu' cavii nu' ca'anj, sese se ca'anj yanij soj rihaan Diose ei. Sese ca'anj yanij soj, ne quiri'ij yanij Diose man soj nanj adonj. <sup>23</sup> Ne 'o rasuun uún me se nij yuvii quiri'ij yanij Diose me se sese ca'ne' rá nij so' ga suun ne amán rá ni'yaj man Diose, ne ca'vee caxrij uún Diose man nij so' tacóo chruun sa' yo' uún ei. 'O se guun nucuaj Diose qui'yaj Diose danj ei. <sup>24</sup> Tananj soj, ne chruun le'ej cavii raá chruun olivó man rco' me soj, tzaj ne ca'vee ca'na' soj naxij soj tacóo chruun sa', ne táa a nij síi israelitá, ne maan ra'a chruun sa' me nij so', ne taj sayuun ca'vee ca'na' uún nij so' nano uún so' tacóo chruun sa' cavii nij so' a ma'.

*Nana nihánj taj xna'anj se vaa me rá Diose gaa 'ee rá Diose man cunudanj yuvii a*

<sup>25</sup> Dan me se me raj xcaj soj cuentá che'é nana cataj xna'anj Diose rihaan ní, tinuj, nocoj. Sij cuno soj nana nihánj, gaa ne se guun ca'mii xta' soj ma'. Cuanó nihánj me se na'vee xcaj nij yuvii israelitá cuentá che'é se vaa qui'yaj Diose che'é nij so' ma'. Che'é dan vaa ya'núj catuu soj sij yanij canoco' soj man Diose adonj. Ne xa' nij síi yanij narii Diose, tzaj ne vaa güii canoco' cunudanj nij so' man Diose, gaa ne cuchuman rá nij yuvii israelitá ni'yaj nij so' man Diose, <sup>26</sup> gaa ne tinanii Diose man cunudanj nij yuvii israelitá rihaan sayuun ei. Danj a'mii danj Diose ei. Dan me se taj yo': "Chuman' Jerusalén cavii 'o síi tinanii man yuvii, ne tinavij so' se chi'ij man nimán nij yuvii israelitá a. <sup>27</sup> Danj qui'yaj yá 'unj che'é nij so' güii tinavíi 'unj cacun' che'é nij so' adonj". Dan me nana ca'mii Diose, nana no rihaan danj Diose a. <sup>28</sup> Dan me se ne guun ya rá nij yuvii israelitá se-nana Diose nana sa' ma'. Che'é dan guun yanij nij so' rihaan Diose, ne vaa ya'núj rihaan Diose catuu soj sij yanij a. Tzaj ne asij naá narii

Diose man xii nij yuvii israelitá, ne che'é dan yo'ò 'ee rá Diose man nij so' ndaa cuano adonj. <sup>29</sup> Daj chihaa míj se natuná Diose se-nana Diose ma'. Se ca'vee ca'nee uún Diose se vaa go' Diose rihaan yuvii ma'. 'O se gaa naá narii Diose man nij yuvii israelitá canoco' nij so' man so', ne se ca'vee cataj uún Diose se vaa se ca'vej rá so' nacaj so' man nij so' ma'.

<sup>30</sup> Dan me se asino yaan ne cunò nij soj sij yaníj rihaan Diose ma'. Tzaj ne ne cuchuman rá que'ee nij yuvii israelitá ni'yaj nij so' man Diose, ne che'é dan cunuu 'ee rá Diose man soj a. <sup>31</sup> Veé dan me se cunuu 'ee rá Diose man soj cuano, tzaj ne ne uno nij yuvii israelitá rihaan Diose ma'. Inanj danj vaa nij so' cuano, qui'yaj Diose, gaa ne vaa güii cunuu 'ee rá uún Diose man nij so' adonj. <sup>32</sup> Dan me se 'ò cyaan vaa nij yuvii israelitá ga nij yuvii yaníj, qui'yaj Diose, ne cunudanj nij yuvii na'vej rá cunò rihaan Diose, ne che'é dan vaa ya'núj rihaan Diose cunuu 'ee rá Diose man cunudanj nij yuvii, ne racuíj uun Diose man cunudanj nij yuvii yo' adonj.

*Nana nihánj taj xna'anj se vaa sa' uxrá vaa Diose adonj*

<sup>33</sup> Inanj sa' uxrá avii raá Diose nanj á. Sa' uxrá ne'en so', ne se guun nucuaj yuvii naqui'yaj cuu yuvii nu' se vaa 'yaj Diose ma'. Veé danj ca'mii 'ò síí nata' se-nana Diose gaa naá, cataj so': <sup>34</sup> "Taj vaj yuvii quisij nari' nana avii raá Diose ma'. Me yuvii ca'vee nago' nana cuu man Diose, rá soj ga. <sup>35</sup> Me rasuun ca'vee rque yuvii man Diose, rá soj ga. 'O se ne achiin si'yaj yuvii man Diose ma'. Ne 'yaj xcúún Diose rihaan yuvii ma'". Danj taj síí nata' se-nana Diose gaa naá yo' a. <sup>36</sup> Dan me se ma'an Diose qui'yaj cunudanj rasuun, ne che'é ma'an Diose mán rasuun rihaan chumii, ne se rasuun Diose me cunudanj rasuun a. Ve'é uxrá ca'mii ní' che'é Diose nu' cavii nu' ca'anj adonj. Veé danj gaa ya ei.

## 12

*Nana nihánj taj xna'anj se vaa ve'é qui'yaj suun ní' rihaan Diose a*

<sup>1</sup> Nuú 'ee ndo'o rá Diose man ní', tinuj, nocój. Che'é dan cataj xna'anj 'unj rihaan soj nihánj cuano se vaa qui'yaj suun soj rihaan Diose yaj gaa vaa i'na' soj á. Inanj suun sa' che'é Diose qui'yaj suun soj, gaa ne guun niha' rá Diose, qui'yaj soj ei. Ne'en soj se vaa nò xcúún soj qui'yaj soj danj ei. <sup>2</sup> Se cataj soj se vaa sa' ndo'o vaa tucuáán nocó' cunudanj nij yuvii man chiháán soj ma'. Tzaj ne ca'vej rá soj cunuu sa' nimán soj qui'yaj Diose, ne xcaj naca soj cuentá daj qui'yaj soj gaa yáán soj rihaan chumii nihánj, gaa ne nari' soj daj me rá Diose qui'yaj soj, ne xcaj soj cuentá me se me se sa' ni'yaj Diose á. Dan me se xcaj soj cuentá daj qui'yaj soj ne guun niha' rá Diose, ne xcaj soj cuentá me suun sa' qui'yaj suun soj ne cavii sa' soj doj nu' cavii nu' ca'anj adonj.

<sup>3</sup> Dan me se qui'yaj Diose se luj rihanj, ca'ne' Diose suun rihanj tucu'yonj man nij soj, ne che'é dan cataj xna'anj 'unj rihaan 'ò 'ò soj daj qui'yaj soj qui'yaj suun soj rihaan Diose á. Dan me se inò gaa suun qui'yaj suun 'ò 'ò soj rihaan Diose, ne che'é dan xcaj 'ò 'ò soj cuentá me suun qui'yaj suun 'ò 'ò soj, ne racuíj Diose man soj se vaa guun ya rá 'ò 'ò soj, ne a me suun guun nucuaj 'ò 'ò soj qui'yaj suun soj suun rque Diose man soj a. Tzaj ne se nanó rá soj, ne se guun rá soj cata soj suun nocoo doj ma'. Maan se xcaj soj cuentá, ne cataj soj se vaa sa' vaa suun vaa rihaan soj ei.

<sup>4</sup> 'O se aj ne'en ní' se vaa vaa ndo'o nee man ní', ne dan me se vaa ra'a ní' vaa tacóó ní' vaa, ne vaa que'ee doj nee man ní', ne inò vaa suun 'yaj suun ra'a ní' do', tacóó ní' do', xréé ní' do', tu'va ní' do', ne inò doj vaa suun 'yaj suun yo'ò yo'ò nee man ní' a. <sup>5</sup> Dan me se aj canoco' cunudanj ní' man Jesucristó, ne che'é dan ase vaa nu' nee man 'ò yuvii ro', danj vaa



nu' ní, ne ino vaa suun vaa rihaan 'o 'o ní, tzaj ne racu'j tuvi' ní, <sup>6</sup> gaa ne guun nucuaj 'o 'o ní qui'yaj suun 'o 'o ní suun vaa rihaan 'o 'o ní a. Danj 'yaj Diose che'é 'o 'o ní, tzaj ne ino vaa suun ne'en 'o 'o ní qui'yaj suun ní, qui'yaj Diose a. Che'é dan sese vaa suun rihaan yo'o ní ca'mii natáj ní rihaan yuvii che'é Diose, ne sese uun ya rá ní se vaa ya vaa nana nari' ní, ne ca'mii natáj ní á. <sup>7</sup> Sese ca'ne' Diose suun rihaan yo'ó ní suun racu'j ní man yuvii, ne danj qui'yaj ní qui'yaj suun ní che'é tuvi' ní uún á. Sese vaa suun rihaan yo'ó ní suun tucu'yón ní se-nana Diose, ne danj qui'yaj uún ní, tucu'yón ní se-nana Diose á. <sup>8</sup> Sese vaa suun rihaan yo'ó ní nago' ní chrej nucuaj, ne danj qui'yaj ní á. Sese vaa suun rihaan yo'ó ní go' ní rasuun rihaan nij sí nique, ne guun niha' rá ní qui'yaj ní danj á. Sese vaa suun rihaan yo'ó ní guun chij ní rihaan tuvi' ní, ne qui'yaj suun uxrá ní nicaj yu'unj ní man tuvi' ní á. Sese vaa suun rihaan ní cunu 'ee rá ní tuvi' ní do', racu'j ní tuvi' ní do', ne gaa niha' rá ní qui'yaj ní danj á.

*Nana nihánj taj xna'anj daj qui'yaj ní rihaan tuvi' ní a*

<sup>9</sup> Se cataj soj se vaa 'ee rá soj man tinúú soj, sese ne ya 'ee rá soj tinúú soj ma'. Se tu'va rma'an soj danj ma'. Tzaj ne ya gaa 'ee rá soj tinúú soj, ne se ca'vej rá soj qui'yaj soj se chi'ii ma'. Tzaj ne inanj se sa' qui'yaj soj á. <sup>10</sup> Gaa 'ee ndo'o rá soj man tinúú soj sí noco' man Jesucristó, ne guun niha' rá soj caraa cochroj soj rihaan tinúú soj á. <sup>11</sup> Se gaa rmii soj ma'. Tzaj ne gaa niha' rá soj qui'yaj suun soj che'é sí 'nij ra'a man ní ei. <sup>12</sup> Ne'en soj se vaa vaa güii cavii sa' ndo'o soj, qui'yaj Diose, ne che'é dan gaa niha' rá soj á. Ca'nej nucuaj soj nimán soj quiran' soj sayuun me rá yuvii qui'yaj yuvii man soj, ne se ca'ne' rá soj ga suun achín ni'yaj rihaan Diose ma'. <sup>13</sup> Sese vaa se achiin rihaan tinúú soj sí sa' noco' man Diose ro', ne racu'j

soj si'yaj soj rihaan nij so' a. Ne ve'é qui'yaj soj ca'vej soj caran' yuvii tucúá soj do', cha yuvii chraa ga soj do' á.

<sup>14</sup> Xa' sí 'yaj sayuun man soj, tzaj ne ve'é qui'yaj soj rihaan nij so', ne se ca'mii chree soj che'é nij so' ma'. Tzaj ne cachinj ni'yaj soj rihaan Diose se vaa cavii sa' nij so' qui'yaj Diose a. <sup>15</sup> Guun niha' rá soj ga nij yuvii niha' rá, ne ta'vee soj ga sí ta'vee, <sup>16</sup> ne ve'é qui'yaj soj rihaan tinúú soj nij sí amán rá ni'yaj man Jesucristó a. Se guun rá soj cata ma'an soj suun sa' doj ma'. Maan se nano' soj man nij yuvii uun taj suun ata, ne canicun' soj ga nij so' a. Se cataj soj se vaa sij avii ndo'o raá me soj ma'.

<sup>17</sup> Sese qui'yaj yuvii se chi'ii man soj, ne se guun rá soj qui'yaj soj se chi'ii man nij yuvii ma'. Tananj ve'é qui'yaj soj rihaan cunudanj yuvii, ne inanj se sa' qui'yaj soj ni'yaj cunudanj yuvii á. <sup>18</sup> Ve'é cuman soj ga cunudanj yuvii, sese ca'vej rá nij yuvii, ne se cunu' ma'an soj ga yuvii ma'. <sup>19</sup> Se qui'yaj soj sayuun man yuvii 'yaj sayuun man soj ma'. Maan se ca'ne' rá soj, ne Diose me sí naru'vee rihaan nij yuvii qui'yaj sayuun, ne vaa güii caxrii yuvaa Diose man nij so' a. Danj me raj qui'yaj nij soj, tinuj, nocoj. 'O se danj Diose taj se vaa no xcuún Diose naru'vee ma'an Diose, ne vaa güii naru'vee Diose che'é sayuun nanj á. Danj taj danj Diose a. <sup>20</sup> Tzaj ne ino qui'yaj soj rihaan yuvii taj ri'yunj man ní cuano, taj danj Diose a. Nihánj me nana a'mii danj Diose a: “Sese na'aan rque sí taj ri'yunj man soj, ne go' soj chraa cha so' á. Sese naco so' na, ne go' soj na co'o so' á. Danj qui'yaj soj, ne guun na'aj sí taj ri'yunj man soj, ne quinano rá so' che'é sayuun qui'yaj so' ei”. Danj taj danj Diose a. <sup>21</sup> Se guun qui'yaj canaán chi'ii rihaan soj ma'. Se guun guun ma'an soj sí noco' chrej chi'ii ma'. Maan se inanj se sa' qui'yaj soj rihaan sí chi'ii, gaa ne qui'yaj canaán soj rihaan sí chi'ii, ne canoco' so' chrej sa' nicaj soj adonj.

## 13

*Nana nihánj taj xna'anj se vaa cunō ní' rihaan nij sí' nicaj suun a*

<sup>1</sup> Cunō cunudanj nij soj rihaan nij sí' nicaj suun man tucúa suun chíháan soj ei. 'O se sese nuveé Diose rá, ne se guun nucuaj nij so' quirii ta'nga' nij so' ma'. Diose me sí' cune' man nij sí' nicaj suun adonj. <sup>2</sup> Che'é dan cunō soj rihaan nij sí' nicaj suun, ese danj me rá Diose qui'yaj soj, ne sese tucúáá soj rihaan nij sí' nicaj suun, ne cuta' Diose cacun' xráá soj adonj. <sup>3</sup> Yuvii ne 'yaj sayuun ro', taj che'é cuchu'vi' nij so' rihaan nij sí' nicaj suun ma'. Maan se inanj sí' 'yaj sayuun cuchu'vi' rihaan nij so', ne che'é dan sese na'vej rá soj cuchu'vi' soj rihaan nij sí' nicaj suun, ne ve'é qui'yaj soj, ne ve'é ca'mii nij sí' nicaj suun che'é soj adonj. <sup>4</sup> Dan me se 'yaj suun nij sí' nicaj suun rihaan ma'an Diose, ne vaa suun rihaan nij sí' nicaj suun racuíj nij so' man soj, ne cavi sa' soj ei. Tzaj ne sese qui'yaj soj cacun', ne cuchu'vi' soj rihaan nij so' á. 'O se ne ata rma'an nij so' suun ma'. 'Yaj suun nij so' che'é Diose, ne racuíj nij so' man Diose axríj yuvaa Diose man nij sí' 'yaj cacun' adonj. <sup>5</sup> Che'é dan cunō soj rihaan nij sí' nicaj suun, ne cuchu'vi' soj qui'yaj nij so' sayuun man soj sese qui'yaj soj cacun', ne xcaj soj cuentá se vaa me rá Diose qui'yaj soj á. <sup>6</sup> 'O se o' soj sa'anj ata' rihaan nij sí' nicaj suun, ne ne'en soj se vaa 'yaj suun nij so' rihaan Diose, <sup>7</sup> ne dan me se no xcúún soj naru'vee soj sa'anj ata' ei. Caraa cochroj soj rihaan nij sí' nicaj suun, ne ve'é ca'mii soj rihaan nij so' ei.

*Nana nihánj taj xna'anj se vaa gaa 'ee rá ní' tuvi' ní' a*

<sup>8</sup> Se gaa xcúún rihaan nij soj ga tuvi' soj ma'. Tzaj ne vaa 'o xcúún rihaan soj ga tuvi' soj adonj. Nihánj ro', me xcúún vaa rihaan soj ga tuvi' soj adonj. No xcúún soj gaa 'ee rá soj tuvi' soj, ne sese ya 'ee rá soj tuvi' soj, ne ase vaa sí' qui'yaj nu' ndaa vaa taj se-tucuanj Moisés ro', danj gaa soj

uún adonj. <sup>9</sup> Dan me se aj ne'en soj nu' nana cataj xna'anj Diose rihaan Moisés gaa naá, ne dan me se na'vej rá Diose cotoj yuvii ga nica tuvi' yuvii, ne na'vej rá Diose ticavi' yuvii man tuvi' yuvii, ne na'vej rá Diose qui'yaj ituu yuvii, ne na'vej rá Diose guun rá yuvii ni'yaj yuvii si'yaj tuvi' yuvii man adonj. Nihánj me nana cataj xna'anj Diose gaa naá, ne vaa uxrá doj nana cataj xna'anj uún Diose, tzaj ne vaa orún' nana achiin uxrá qui'yaj ní' cuano, ne nana yo' taj: "A se 'ee rá so' man ma'an so' ro', danj gaa 'ee rá so' man tuvi' so' á". Nihánj me nana achiin uxrá cunō ní', ne sese cunō ní' ne qui'yaj ní' ndaa vaa taj nana nihánj, ne sij 'yaj nu' nana cataj xna'anj Diose rihaan Moisés gaa naá me ní' ei. <sup>10</sup> Sese 'ee rá soj tuvi' soj, ne se qui'yaj chi'ii soj man tuvi' soj, ne che'é dan sese 'ee rá soj tuvi' soj, ne sij uno nu' nana cataj xna'anj Diose rihaan Moisés gaa naá me ma'an soj adonj.

*Nana nihánj taj xna'anj se vaa ase vaa qui'yaj Jesucristó ro', danj gaa qui'yaj ní' uún a*

<sup>11</sup> Danj qui'yaj nij soj, gaa 'ee rá nij soj tuvi' soj ei. 'O se ne'en soj daj vaa chumii nihánj cuano nanj á. Xcaj soj cuentá á. Dan me se asij naca cuchumán rá ní' ni'yaj ní' man Jesucristó, ne nichrun' güii cavi sa' ní' cayáán ní' ga Diose, rá ní', tzaj ne cuano nihánj me se ya nichrun' güii cavi sa' ní' cayáán ní' ga Diose ei. <sup>12</sup> Dan me se ase vaa chumii gaa vaa rmi' ro', danj vaa cunudanj nij yuvii man rihaan chumii nihánj cuano, ne vaa rmi' rihaan nij so', ne ne ne'en nij so' a doj ma'. Tzaj ne daj doj quisij güii ca'na' Jesucristó, ne che'é dan ca'ne' rá ní' ga cacun', ne se qui'yaj ní' ndaa vaa 'yaj yuvii chéé rej ni' ma'. 'O se adi' se chuguun rej ranga' ro', danj gaa chuguun nimán ní', qui'yaj ní', ne yo'o gaa nucuaj ní' qui'yaj suun ní' che'é Diose á. <sup>13</sup> Che'é se chuguun nimán ní', che'é dan inanj ve'é qui'yaj ní', ne se cachéé ní' cha'anj snúú

rma'an, se guun xno ní, ne se qui'yaj ní cacun' ga chana, ne se cunu' ní, ne se guun xcoj ruvaa rá ní ne'en ní tuvi' ní a. <sup>14</sup> Se guun rá ní qui'yaj ní ndaa vaa me rá nee man ní ma'. Se ca'vej rá ní qui'yaj ní cacun' ma'. Tzaj ne tucu'yón ní ndaa vaa qui'yaj Jesucristó, ne ase vaa qui'yaj so' ro', danj gaa qui'yaj uún ní nanj adonj.

## 14

*Nana nihánj taj xna'anj se vaa se cuta' ní cacun' xráá tinúú ní sítá náj guun rasuun, ne se nachri' ní ni'yaj ní man tinúú ní sítá na'vej rá chá rasuun a*

<sup>1-2</sup> Ta'aj yuvij guun ya rá se vaa a'vej rá Diose chá yuvij naj guun rasuun, tzaj ne yo'ó ta'aj yuvij ro', chu'vi' nij so' chá nij so' nee a. Na'vej rá Diose chá nij so' nee, rá nij so', ne che'é dan inanj cuêj chá nij so' a. Dan me se se nachri' nij soj ni'yaj nij soj man nij yuvij na'vej rá chá naj guun rasuun ma'. Sese danj vaa rá nij so', ne se ca'mii cunu' nij soj ga nij so' ma'. <sup>3</sup> Se guun nachri' sítá náj guun rasuun ni'yaj so' man sítá inanj cuêj ma'. Se cuta' sítá inanj cuêj cacun' xráá sítá náj guun rasuun ma'. 'O se quene'en so' se vaa 'nij ra'a Diose man sítá náj guun rasuun do' nanj adonj. <sup>4</sup> Xa' sítá náj guun rasuun, tzaj ne ne 'yaj suun so' rihaan sítá chá inanj cuêj ma'. 'O se rihaan Jesucristó 'yaj suun so', ne che'é dan ne nó xcúún sítá inanj cuêj cuta' so' cacun' xráá so' ma'. Tzaj ne ma'an Jesucristó ca'ne' cacun' che'é so', ase cavij sa' so' ni', ase quiran' so' sayuun ni', ne dan me se ne ne'en ní ma'. Dan me se nucaj Jesucristó sij 'nij ra'a man ní tucu'yón so' man sítá náj guun rasuun daj qui'yaj so', ne cavij sa' so', qui'yaj Jesucristó adonj.

<sup>5</sup> Dan me se ta'aj yuvij taj se vaa guee ta'aj güii, ne yo'ó ta'aj yuvij taj se vaa 'o cuyaan vaa nij güii, ne taj güii guee rihaan yo'ó ta'aj nij so' a. Ino vaa rá 'o 'o ta'aj nij yuvij, ne che'é dan me xcaj yo'ó yo'ó nij soj cuentá daj vaa rá yo'ó yo'ó soj, ne guun ya rá

yo'ó yo'ó soj daj vaa rá soj ei. <sup>6</sup> Xa' sítá taj se vaa vaa güii guee, tzaj ne danj vaa rá so' che'é sítá 'nij ra'a man ní, ne danj nanj sítá chá naj guun rasuun, ne danj 'yaj so' che'é sítá 'nij ra'a man ní uún a. Danj 'yaj yo'ó yo'ó nij so', ne nago' nij so' graciá rihaan Diose a. Ne xa' sítá na'vej rá chá naj guun rasuun, tzaj ne veé danj vaa rá so' che'é sítá 'nij ra'a man ní uún, ne dan me se nago' so' graciá rihaan Diose uún a. <sup>7</sup> 'O se nuveé che'e orún' ní vaa i'na' 'o 'o ní ma'. Nuveé che'e orún' ní cavij 'o 'o ní ma'. <sup>8</sup> 'O se sese vaa i'na' ní, ne vaa i'na' ní qui'yaj suun ní rihaan sítá 'nij ra'a man ní, ne ca'vee se cavij ní, tzaj ne yo'ó qui'nij ra'a so' man ní nanj adonj. <sup>9</sup> Dan me se me rá Jesucristó nijaj yu'unj so' man yuvij vaa i'na' do', man yuvij cavij do', ne che'é dan cavij so', ne che'é dan cunu i'na' uún so' a.

<sup>10</sup> Dan me se taj che'é cuta' ní cacun' xráá tinúú ní, ne taj che'é nachri' ní ni'yaj ní man tinúú ní ma'. 'O se canicun' cunudanj ní rihaan Diose vaa güii, ne ca'ne' ma'an Diose cacun' che'é ní nanj adonj. <sup>11</sup> Dan me se danj Diose taj se vaa ya ya canicun' ruj cunudanj yuvij rihaan Diose vaa güii, ne ve'é ndo'o ca'mii cunudanj yuvij che'é Diose a. Danj a'mii danj Diose a. <sup>12</sup> Dan me se vaa güii nata' 'o 'o ní rihaan Diose che'é se vaa qui'yaj ní gaa cayáán ní rihaan chumij nihánj nanj adonj.

*Nana nihánj taj xna'anj se vaa se ca'vej rá ní quiran' tinúú ní cacun' che'é se vaa 'yaj ní a*

<sup>13</sup> Che'é dan quisij cataj ní se vaa tumé tinúú ní cacun' á. Tzaj ne cataj ya nij soj se vaa se qui'yaj tinúú soj cacun', qui'yaj ma'an soj a. <sup>14</sup> Gaa canocó' 'unj Jesucristó sij 'nij ra'a man ní, ne guun ya raj se vaa a 'o rasuun ne yu'va' quita'a' ma'. Tzaj ne sese vaa yo'ó so' uun rá se vaa cacun' chá 'o rasuun, ne ya uxrá cacun' chá so' a. <sup>15</sup> Sese yu'va' chá yo'ó rasuun rá tinúú so', ne sese chá so' maan, ne guun rá so' chá so' uún, ne dan me se chá so' maan, gaa ne quiran'

so' cacun', qui'yáá so' á. Sese danj qui'yáá so', ne nuveé sij 'ee rá man tinúú mé so' gaa a ma'. Se ca'vej rá so' quiran' tinúú so' cacun' che'é se chá so' ma'. 'O se ne'én so' se vaa cavi' Jesucristó che'é ma'an tinúú so' adonj. <sup>16</sup> Ne se guun qui'yaj soj ca'mii yuvii nana nij che'é tucuaán sa' noco' soj ma'.

<sup>17</sup> 'O se nicaj yu'unj Diose man ní', ne che'é dan se nanó rá ní' che'é se chá ní' do', che'é se co'o ní' do' ma'. Tzaj ne xcaj ní' cuentá che'é tinúú ní' á. 'O se che'é rej uun chij Diose, tzaj ne nuveé che'e se chá ní' do', nuveé che'e se co'o ní' do', me yo' ma'. Maan se che'é rej cunuu sa' nimán ní' ne che'é rej guun niha' rá ní' ne che'é rej gaa xej nimán ní' qui'yaj Nimán Diose me yo' a. <sup>18</sup> Dan me se sese xcaj ní' cuentá che'é tinúú ní', ne ya sij noco' man Jesucristó me ní', ne guun niha' rá Diose ne'en Diose man ní', ne cataj yuvii ne amán rá ni'yaj man Jesucristó se vaa ve'é 'yaj ní' a.

<sup>19</sup> Che'é dan danj inanj qui'yaj ní', gaa ne gaa dínj cumán ní', ne racuíj ní' tinúú ní', gaa ne sa' doj cumán ní', ne sa' doj canoco' ní' man Jesucristó adonj. <sup>20</sup> Dan me se qui'yaj suun Diose nimán tinúú so', ne che'é dan se ca'vej rá so' quirí' rá tinúú so' che'é se chá ma'. Ne'en ní' se vaa sa' vaa daj a rasuun qui'yaj Diose chá yuvii do', co'o yuvii do', tzaj ne sese yu'va' chá 'o rasuun rá yo'o so', ne cacun' chá so' man yo' adonj. <sup>21</sup> Sese yu'va' chá 'o rasuun rá tinúú so', ne se chá so' maan, ne cunaj qui'yáá so' á. Sese yu'va' co'o 'o na rá tinúú so', ne se co'o so' maan, ne cunaj qui'yáá so' á. Tadó so' se quiran' tinúú so' cacun' che'é se vaa qui'yáá so' á.

<sup>22</sup> Sese guun rá so' se vaa a'vej rá Diose chá so' naj guun rasuun, ne inanj danj gaa rá ma'an so' rihaan Diose á. Se natá so' danj rihaan yuvii ma'. Guun niha' rá so' rihaan Diose sese ne'én so' se vaa sa' vaa rá so', ne'én so' me se a'vej rá Diose qui'yáá so' nanj á. <sup>23</sup> Tzaj ne sese ne ne'en yo'ó so' sese ca'vej Diose chá so' 'o

rasuun ní', sese se ca'vej Diose chá so' ní', ne se chá so' ma'. Sese chá so', ne tumé so' cacun' rihaan Diose che'é se ne guun ya rá so' se vaa a'vej Diose chá so', maan se chá ma'an so', ne che'é dan tumé so' cacun' adonj. Veé danj inanj vaa nu' se vaa qui'yaj ní' ei. Sese ne guun ya rá ní' se vaa a'vej rá Diose qui'yaj ní' 'o rasuun, ne se qui'yaj ní' danj ma'. Sese qui'yaj ní' danj, ne tumé ní' cacun' rihaan Diose nanj adonj.

## 15

*Nana nihánj taj xna'anj se vaa no xcuún ní' racuíj ní' tinúú ní' a*

<sup>1</sup> Xa' ní' sij amán rá se vaa a'vej rá Diose chá ní' naj guun rasuun, tzaj ne no xcuún ní' racuíj ní' man nij yuvii na'vee cuchuman rá se vaa a'vej rá Diose chá nij so' naj guun rasuun a. Ne racuíj ní' man yuvii na'vee cuchuman rá se vaa 'o cyaan vaa nu' güii rihaan Diose á. Se qui'yaj ní' se inanj me rá ní' qui'yaj ní' ma'. <sup>2</sup> Tzaj ne racuíj 'o 'o ní' tinúú ní', ne guun niha' rá tinúú ní', ne sa' doj gaa tinúú ní', ne sa' doj quene'en tinúú ní' canoco' tinúú ní' Diose a. <sup>3</sup> 'O se ne qui'yaj Jesucristó se me rá ma'an Jesucristó qui'yaj so' ma'. 'O se danj Diose taj se vaa nana nij ca'mii yuvii che'é Diose ro', ca'mii uún yuvii che'é Jesucristó, ne ca'vej rá Jesucristó ca'mii nij yuvii nana nij che'é ma'an so' a. Danj a'mii danj Diose che'é ma'an Jesucristó a. <sup>4</sup> Gaa naá me se cachrón nii nana rihaan danj Diose yan quinari' ma'an ní' daj qui'yaj ní' gaa ne guun nucuj ní' qui'yaj canaán ní' rihaan sayuun ne quinari' nucuj nimán ní' gaa ne ca'vee guun ya rá ní' se vaa vaa güii cavii sa' ní' a. <sup>5</sup> Dan me se Diose me sí 'yaj uun nucuj nimán ní', ne sí noco' man Jesucristó me nij soj, ne che'é dan me raj yo'o cyaan gaa rá taran' nij soj, qui'yaj Diose a. <sup>6</sup> Gaa ne 'o cyaan ca'mii nij soj che'é Diose, ne ve'é ca'mii nij soj che'é Diose Rej Jesucristó sij 'nij ra'a man ní' adonj.



*Nana nihánj taj xna'anj che'é se vaa qui'yaj Jesucristó che'é nij yuvii israelitá do', che'é nij yuvii yaníj do' a*

<sup>7</sup> Che'é dan ve'é ca'mii soj gā tinúú soj gāa 'na' tinúú soj rihaan soj á. Danj qui'yaj Jesucristó, ve'é ca'mii so' gā ní' ei. Che'é dan danj qui'yaj guee ní', ve'é ca'mii ní' gā tinúú ní', ne ve'é ca'mii tinúú ní' che'é Diose á. <sup>8</sup> Dan me se cataj xna'anj 'unj rihaan nij soj che'é suun qui'yaj suun Jesucristó che'é nij yuvii israelitá, ne gāa naá me se cataj xna'anj Diose rihaan xii nij yuvii israelitá daj qui'yaj Diose che'é nij so', ne quisíj ya nu' nana yo', qui'yaj Jesucristó a. <sup>9</sup> Ne gāa ca'na' Jesucristó, ne ve'é ca'mii nij yuvii yaníj che'é Diose, qui'yaj so' a. 'O se che'é se vaa qui'yaj Jesucristó, che'é dan xcaj nij yuvii yaníj cuentá se vaa cunuu 'ee rá Diose ne'en Diose man nij so' gā nij yuvii israelitá, ne che'é dan ve'é ca'mii nij yuvii yaníj che'é Diose a. Danj a'mii danj Diose a.

Taj xna'anj danj Diose nana ca'mii síi cu'naj David rihaan Diose gāa naá, gāa cataj so':

—Che'é dan ve'é ca'mij rihaan nij yuvii yaníj che'é so', ne cachraj chra' rihaan so' a. —Danj ca'mii síi cu'naj David gāa naá a.

<sup>10</sup> Ne taj uún danj Diose se vaa guun niha' rá nij yuvii yaníj gā nij yuvii israelitá a. <sup>11</sup> Ne taj uún danj Diose se vaa ve'é ca'mii cunudanj nij yuvii yaníj che'é Diose a. <sup>12</sup> Ne cataj uún síi cu'naj Isaías gāa naá se vaa cumān yo'o ta'níi ta'nij si'no síi cu'naj Isaí rej síi cu'naj David gāa naá, ne ca'na' so', ne guun chij so' rihaan nij yuvii yaníj a. Gāa ne gāa nucuaj rá nij yuvii yaníj man so' se vaa tinanii so' man nij so' rihaan sayuun a. Danj taj síi cu'naj Isaías che'é Jesucristó a. <sup>13</sup> Dan me se nucuaj rá ní' ne'en ní' Diose, ne ne'en ní' se vaa vaa güii cavii sa' ní', qui'yaj Diose á. Dan me se amán rá nij soj ni'yaj soj Diose, ne che'é dan me raj guun niha' ndo'o rá soj, ne gāa xej nimán soj, qui'yaj Diose, gāa ne guun

ya doj rá soj se vaa cavii sa' soj vaa güii, qui'yaj Nimán Diose adonj.

*Nana nihánj taj xna'anj che'é suun qui'yaj suun Pablo rihaan Diose a*

<sup>14</sup> Veé dan me se guun ya raj se vaa síi sa' me ma'an soj, tinuj, nocoj. Xcaj ndo'o soj cuentá, ne ne'en soj nago' soj chrej sa' man tinúú soj ei. <sup>15-16</sup> Tzaj ne ca'ne' ndo'oj suun rihaan soj gāa qui'yaj yanj cartá nihánj nanj á. 'O se ne'en soj se vaa sa' uxrá qui'yaj Diose che'ej, ne ase vaa 'yaj suun xrej rihaan Diose ro', danj vaa 'yaj suun ma'anj rihaan Jesucristó, ne dan me se 'yaj sunj tucu'yonj se-nana Diose nana sa' man soj sij yaníj, ne vaa güii nacaj Diose man soj, ne che'é dan tucu'yonj man soj, ne me raj ca'vej Diose nacaj Diose man soj, ne me raj cunuu sa' nimán soj rihaan Diose ei. Dan me se gāa sa' soj, qui'yaj Nimán Diose, ne che'é dan ca'ne' ndo'oj suun rihaan soj, ne nu' nana nihánj cachronj rihaan yanj cartá nihánj a. <sup>17</sup> Dan me se racuíj ndo'o Jesucristó manj, ne che'é dan niha' raj che'é nu' se vaa 'yáj rihaan Diose ei.

<sup>18</sup> Dan me se se ca'mij che'é se vaa aj qui'yaj yo'ó yuvii ma'. 'O se ne nó xcúnj qui'yáj danj ma'. Maan se cataj xna'anj 'unj che'é inanj se vaa qui'yaj Jesucristó gāa racuíj so' manj se vaa guun nucuáj cataj xna'anj 'unj rihaan soj sij yaníj che'é ma'an so', ne che'é dan cuno soj sij yaníj se-nana Diose, ne dan me se Jesucristó me síi racuíj manj narij nu' nana nihánj ca'mij rihaan soj, ne veé so' racuíj manj 'yaj sunj nu' suun 'yaj sunj nanj adonj. <sup>19</sup> Dan me se suun sa' nocoj 'yáj, 'yaj Jesucristó, ne Nimán Diose racuíj manj ca'mij se-nana Diose, 'yaj uún Jesucristó, gāa ne xcaj yuvii yanj nu' anicaj chuman' Jerusalén cuentá che'é se-nana Jesucristó nana sa', ne ndaa yuvii yanj yo'ó chuman' gan' doj ndaa estadó cu'naj Ilírico do', xcaj cuentá che'é se-nana Jesucristó nana sa', ne dan me se cuno nij so' nana, qui'yáj a. <sup>20</sup> 'O se inanj me raj cataj

xna'anj 'unj che'é Jesucristó rihaan yuvií ataa quene'en nana che'é so', ne se tucu'yonj man yuvií aj nari' nana che'é so' ma'. <sup>21</sup> Veé danj a'mii uún danj Diose, taj yo': "Yuvií ataa quene'en se-nana so' ro', xcaj nij so' cuentá a". Danj taj danj Diose nanj adonj.

*Nana nihánj taj xna'anj se vaa ca'anj Pablo chuman' Jerusalén, ne ca'anj uún so' chuman' Romá a*

<sup>22</sup> Che'é dan ne ca'vee cuchij rihaan nij soj a. Quisíj que'ee güii cachronj se vaa cuchij rihaan nij soj, tzaj ne ne ca'vee cuchij rihaan soj ma'. <sup>23</sup> Tzaj ne cuano nihánj me se navij suun rihanj chuman' nihánj, ne guun que'ee guun raj cuchij rihaan nij soj, <sup>24</sup> ne che'é dan me quene'én 'unj man soj gaa ca'anj 'unj rej cu'naj España, raj a. Me rá 'unj carán' 'unj chiháán soj doj güii, ne niha' raj cayánj ga soj, ne nano ní' cuentó, gaa ne ca'anj ta'aj soj gaj rej cu'naj España, raj a.

<sup>25</sup> Dan me se ca'anj 'unj chuman' Jerusalén cuano, ne qui'yaj sunj rihaan nij sí amán rá ni'yaj man Jesucristó yanj chuman' yo' adonj. <sup>26</sup> 'O se nij sí amán rá ni'yaj man Jesucristó yanj estadó cu'naj Macedonia do', estadó cu'naj Acaya do', me se me ndo'o rá nij so' rque nij so' doj sa'anj rihaan nij sí nique amán rá ni'yaj man Jesucristó yanj chuman' Jerusalén ei. <sup>27</sup> Danj me rá ma'an nij so' qui'yaj nij so', ne cataj xna'anj ma'an nij so' rihanj se vaa me ndo'o rá nij so' racuíj nij so' man nij sí nique yanj chuman' Jerusalén yo' adonj. 'O se yuvií israelitá me nij sí man Jerusalén, ne nij yuvií israelitá qui'yaj nari' yuvií yaníj se-nana Diose, ne che'é dan cunuu sa' nimán nij yuvií yaníj, taj nij sí yaníj man roj estadó yo' adonj. Che'é dan no xcúún nij yuvií yaníj racuíj nij so' man nij yuvií amán rá ni'yaj man Jesucristó man Jerusalén, rá nij so' a. 'O se sa'anj achiin man nij so', ne che'é dan rque nij yuvií yaníj doj sa'anj man nij so' adonj. <sup>28</sup> Che'é dan vaa suun rihanj tacuachenj sa'anj rihaan

nij sí amán rá ni'yaj man Jesucristó yanj chuman' Jerusalén, ne dan me se nagoj sa'anj rihaan nij so', ne x'nuu rihanj, ne asa' ca'anj 'unj yo'óo nocoo cu'naj España ne vaj 'unj chrej, ne carán' 'unj chiháán soj a. <sup>29</sup> 'O se ne'enj se vaa me rá Jesucristó cuchij rihaan soj, ne racuíj so' manj cuchij chiháán soj ei.

<sup>30</sup> Dan me se che'é se canoco' nu' ní' man sí cu'naj Jesucristó sij 'nij ra'a man ní', che'é dan 'ee rá ní' tinúú ní', 'yaj Nimán Diose, ne che'é dan cataj xna'anj 'unj rihaan nij soj se vaa racuíj soj manj cachinj ni'yaj ní' rihaan Diose che'ej á. <sup>31</sup> Cachinj ni'yaj soj se vaa quinanj rihaan nij sí israelitá yanj estadó Judea sí ne amán rá ni'yaj man Jesucristó a. Cachinj ni'yaj nij soj se vaa ve'é nacaj nij sí man chuman' Jerusalén sa'anj ra'aj nagoj man nij so' a. Dan me se me raj gaa nica' nimán nij so', ne ca'vej rá nij so' nacaj nij so' sa'anj rque nij yuvií yaníj a. <sup>32</sup> Gaa ne guun niha' uxrá raj asa' cuchij chiháán soj, ne cuchí' yá 'unj chiháán soj, sese ca'vej Diose, gaa ne cunuu cuj rá taran' ní' ei. <sup>33</sup> 'O se me raj gaa xej nimán soj, qui'yaj Diose adonj. Veé danj gaa ya ei.

## 16

*Nana nihánj taj xna'anj se vaa ve'é cumán nij sí amán rá ni'yaj man Jesucristó nij sí yanj chuman' Romá, rá Pablo a*

<sup>1</sup> Cuchí' chana cu'naj Febe rihaan nij soj, ne dan me se ra'vij ní' ní' nocoo' man Jesucristó me no', ne 'yaj suun ndo'o no' rihaan nij yuvií amán rá ni'yaj man Jesucristó nij sí yanj chuman' cu'naj Cencrea a. <sup>2</sup> Sij nocoo' man Diose me soj, ne che'é dan ve'é ca'mii soj ga no' á. 'O se racuíj no' man que'ee yuvií, ne racuíj no' man ma'anj, ne che'é dan sese vaa se cachin man no', ne racuíj soj man no' ei.

<sup>3</sup> Cataj soj rihaan chana cu'naj Priscila do', rihaan sí cu'naj Aquila do', se vaa ve'é cayáán roj so', raj á.

'Q se qui'yaj suun roj so' gaj che'é Jesucristó a. <sup>4</sup> Dan me se ca'née nimán roj so' caví' roj so' che'ej, ne che'é dan nagó' 'unj graciá rihaan roj so', ne nago' núj ga nij sí yaníj graciá rihaan roj so' a. <sup>5</sup> Cataj uún soj rihaan nij yuvij noco' man Jesucristó yuvij nuu chre' tucua' roj so' se vaa ve'é cumán nij so', raj á. Ne danj cataj uún soj rihaan sí cu'naj Epeneto á. 'Q se 'ee raj man so', ne so' me sí cuchumán rá ni'yaj man Jesucristó asino yaan rihaan cunudanj nij yuvij man estadó cu'naj Asia a.

<sup>6</sup> Ne cataj soj rihaan chana cu'naj Mariá se vaa ve'é cayáán no' á. 'Q se que'ee ndo'o qui'yaj suun no' che'é soj a. <sup>7</sup> Ne cataj soj rihaan sí cu'naj Andrónico do', rihaan sí cu'naj Junias do', se vaa ve'é cayáán roj so', raj á. 'Q se yuvij israelitá me roj so' gaj, ne qui'nij roj so' taga' gaj uún a. Nij apóstol cune' Jesucristó man nata' se-nana so' rihaan yuvij ro', ne'en man roj so', ne gaa asij ataa cuchumán raj ni'yaj 'unj man Jesucristó, ne cuchumán rá roj so' ni'yaj roj so' man Jesucristó a. <sup>8</sup> Ne cataj soj rihaan sí cu'naj Amplias se vaa ve'é cayáán so', raj á. 'Q se noco' núj man Jesucristó, ne che'é dan 'ee raj man so' a. <sup>9</sup> Ne cataj soj rihaan sí cu'naj Urbano se vaa ve'é cayáán so' á. 'Yaj suun so' gaj che'é Jesucristó a. Ne cataj uún soj rihaan sí cu'naj Estaquis se vaa ve'é cayáán so', raj, che'é rej 'ee raj man so' a.

<sup>10</sup> Ne cataj soj rihaan sí cu'naj Apelles se vaa ve'é cayáán so', raj á. Ne'en ní' se vaa sí noco' raan man Jesucristó me so' a. Cataj soj rihaan nij tuvi' sí cu'naj Aristóbulo se vaa ve'é cumán nij so', raj á. <sup>11</sup> Ne cataj soj rihaan sí cu'naj Herodión se vaa ve'é cayáán so' á. 'Q se sí israelitá me so' gaj a. Ne cataj soj rihaan nij sí noco' man Jesucristó nij tuvi' sí cu'naj Narciso se vaa ve'é cumán nij so', raj á. <sup>12</sup> Ne cataj soj rihaan chana cu'naj Trifena do', rihaan chana cu'naj Trifosa do', se vaa ve'é cayáán roj no',

raj á. 'Q se 'yaj suun ndo'o roj chana yo' che'é sí 'nij ra'a man ní' a. Ne cataj soj rihaan chana cu'naj Pérsida se vaa ve'é cayáán no', raj á. 'Ee rá ní' man no', ne que'ee ndo'o qui'yaj suun no' che'é sí 'nij ra'a man ní' a. <sup>13</sup> Ne cataj soj rihaan sí cu'naj Rufo se vaa ve'é cayáán so', raj, che'é se sa' uxrá noco' so' man sí 'nij ra'a man ní' a. Cataj uún soj rihaan ní so' se vaa ve'é cayáán no', raj á. 'Q se ase vaa ve'é 'yaj chana rihaan ta'níi chana ro', danj 'yaj no' rihanj a.

<sup>14</sup> Ne cataj soj rihaan sí cu'naj Asíncrito do', rihaan sí cu'naj Flegonte do', rihaan sí cu'naj Hermas do', rihaan sí cu'naj Patrobas do', rihaan sí cu'naj Hermes do', rihaan cunudanj yo'ó nij tinúú ní' sí yanj ga nij so' do', se vaa ve'é cumán nij so' á. <sup>15</sup> Cataj soj rihaan sí cu'naj Filólogo do', rihaan chana cu'naj Julia do', rihaan sí cu'naj Nereo do', rihaan ra'vij so' do', rihaan sí cu'naj Olimpas do', rihaan cunudanj yo'ó nij sí sa' noco' man Diose yanj ga nij so' do', se vaa ve'é cumán cunudanj nij so', raj á. <sup>16</sup> Gaa nari' tuvi' nij soj, ne ve'é ndo'o ca'mii soj ga tinúú soj á. Danj qui'yaj nij soj, tihaan nij soj se vaa 'ee rá nij soj tinúú soj ei. Ne cunudanj nij sí amán rá ni'yaj man Jesucristó yanj nu' rihaan chumij me se ve'é cumán nij soj, rá nij so' nanj adonj.

*Nana nihánj taj xna'anj se vaa guun yaníj ní' rihaan nij sí qui'yaj quixra' ta'aj ní' ga tinúú ní' a*

<sup>17</sup> Chrej nucuaj me narquej rihaan soj nihánj, tinuj, nocoj. Dan me se vaa yuvij me rá cunu' soj ga tinúú soj che'é nana aj nari' soj, ne guun na'aj soj che'é se-nana Diose, qui'yaj nij so', ne che'é dan guun yaníj soj rihaan yuvij 'yaj danj á. <sup>18</sup> Ne 'yaj suun nij so' rihaan Jesucristó sij 'nij ra'a man ní' ma'. Maan se 'yaj suun nij so' che'é ma'an nij so' adonj. 'Q se ve'é ndo'o vaa nana a'mii nij so' che'é yuvij, ne danj 'yaj nij so', tiha' yu'unj nij so'

man yuvij, ne ndaa yuvij ne tumé cacun' tiha' yu'unj nij so' man ei. <sup>19</sup> Dan me se aj cuno cunudanj yuvij se vaa sa' uxrá cuno soj se-nana Diose, ne che'é dan guun niha' raj che'é soj, ne me raj xcaj soj cuentá, ne qui'yaj soj se sa' ni'yaj Diose a. Tzaj ne na'vej raj nari' soj qui'yaj soj tucuáan chi'ij mei. <sup>20</sup> Dan me se vaa xej nimán ní', 'yaj Diose á. Ra'yanj qui'yaj canaán soj rihaan síi cu'naj Satanás, qui'yaj Diose, ne me raj qui'yaj Jesucristó sij 'nij ra'a man ní' se luj che'é soj nanj adonj.

*Nana nihánj taj xna'anj se vaa ve'é cumán nij síi cuchumán rá ni'yaj man Jesucristó yanj chuman' Romá, rá nij tuvi' Pabló a*

<sup>21</sup> Dan me se ve'é cumán nij soj, rá síi cu'naj Timoteo síi 'yaj suun gaj a. Ne síi cu'naj Lucio do', síi cu'naj Jasón do', síi cu'naj Sosípater do', nu' nij so' me síi taj se vaa ve'é cumán soj, rá nij so' a. Yuvij israelitá me nij so' gaj a. <sup>22</sup> Síi cu'naj Tercio mej, ne 'unj me síi achrón se-nana síi cu'naj Pabló rihaan yanj nihánj, ne ve'é cumán nij soj, raj a. <sup>23</sup> Ne me rá síi cu'naj Gayo se vaa ve'é cumán nij soj, ne ve' tucúa so' yáan 'unj, ne nuu chre' cunudanj nij síi amán rá ni'yaj man Jesucristó ve' tucúa so' a. Ne ve'é cumán soj, taj síi cu'naj Erasto, ne síi atá sa'anj rihaan chuman' nihánj me so' a. Ne ve'é cumán soj, rá tinúú ní' síi cu'naj Cuarto a. <sup>24</sup> Dan me se me raj qui'yaj Jesucristó sij 'nij ra'a man ní' se luj che'é cunudanj nij soj a. Veé danj gaa ya ei.

*Nana nihánj taj xna'anj se vaa sa' uxrá vaa Diose a*

<sup>25</sup> Guun nucuaj Diose racuíj Diose man soj nari' soj nu' nana sa' ca'mij rihaan soj a. Nana sa' che'é Jesucristó me nana yo' a. Dan me se gaa naá me se ne ca'vee xcaj yuvij cuentá che'é se-nana Diose ma'. Tzaj ne yaj ro', ne tihaan Diose se-nana Diose rihaan ní' a. <sup>26</sup> Dan me se ca'ne' Diose suun rihaan nij síi nata' se-nana Diose gaa naá, cachron nij so' se-nana Diose

rihaan yanj, ne danj qui'yaj nij so', ne xcaj cunudanj nij yuvij cuentá che'é se-nana Diose, ne me rá Diose cuchuman rá nij yuvij se-nana Diose, ne canoco' nij yuvij man Diose, ne Diose me se daj chihaa míj se cavi' so' ma'.

<sup>27</sup> Ne Diose me se oruun Diose, ne raá orún' so' avij cunudanj nana cuu sa' a. Sa' uxrá qui'yaj ta'níi so' Jesucristó che'é ní', ne che'é dan ve'é ca'mij ní' che'é Diose nu' cavii nu' ca'anj a. Sa' uxrá qui'yaj so' adonj. Ya danj guun adonj.



**Nihánj me 'o yanj  
cartá qui'yaj sítu cu'naj  
Pabló ca'neé so'  
rihaan nij yuvij noco'  
man Diose yanj  
chuman' cu'naj  
Corinto a**

<sup>1</sup> 'Unj ro', me sítu cu'naj Pabló, ne me rá Diose cataj xna'anj 'unj rihaan yuvij che'é Jesucristó, ne che'é dan cune' Jesucristó mán 'unj guún 'unj apóstol nata' se-nana so' rihaan yuvij a. Ne vaa tinúú ní' sítu cu'naj Sóstenes, ne ne so' gaj nihánj, <sup>2</sup> ne 'yaj núj yanj nihánj ca'nej núj rihaan nij soj sij amán rá ni'yaj man Diose yanj chuman' Corinto sij naqui'yaj guee nimán che'é Jesucristó a. Dan me se canacúún Diose man soj guun soj sítu naqui'yaj guee nimán, ne veé ca'nej yanj nihánj cachee rihaan cunudanj yo'ó nij sítu yanj me rej ma'an sítu táa tu'va se-chuvij Jesucristó sij 'nij ra'a man ní' a. Dan me se sítu 'nij ra'a man nij so' ne sítu 'nij ra'a man ma'an ya ní' me ya so' a. <sup>3</sup> Me rá núj qui'yaj Rej ní' Diose qui'yaj Jesucristó sij 'nij ra'a man ní' qui'yaj ndo'o se luj che'é soj, ne me rá núj gaa xej nimán soj, qui'yaj roj so' adonj.

*Nana nihánj taj xna'anj se vaa nago' sítu cu'naj Pabló graciá rihaan Diose che'é nij sítu cuchumán rá ni'yaj man Jesucristó yanj chuman' cu'naj Corinto a*

<sup>4</sup> Niganj nagó' 'unj graciá rihaan Diose che'é nij soj che'é se luj qui'yaj Diose che'é soj che'é se noco' soj man Jesucristó adonj. <sup>5</sup> 'O se che'é Jesucristó ro', cavii sa' uxrá soj, qui'yaj Diose á. Dan me se uxrá xcaj soj cuentá, ne uxrá nari' soj nana sa', qui'yaj Diose, <sup>6</sup> ne danj qui'yaj soj che'é se sa' uxrá nari' soj se-nana Jesucristó nana tucu'yón 'unj man soj a. <sup>7</sup> Ne a' ó se sa' rqué Nimán Diose

rihaan ní' ne achiin man soj a ma'. 'O se aj vaa nu' yo' rihaan soj, ne na'vij ndo'o soj ca'na' uún Jesucristó sij 'nij ra'a man ní' rihaan chumij nihánj nanj adonj. <sup>8</sup> Ne so' me sítu racuj ndo'o man soj, ne guun nucuaj soj canoco' raan soj man so' ndaa güii ca'ne' so' cacun' che'é yuvij, ne se tumé soj cacun', qui'yaj so' a ma'. <sup>9</sup> Vaa che'é gaa nucuaj rá ní' man Diose, ne Diose me sítu canacúún man soj guun tuvij' soj ga ta'níi so' Jesucristó sij 'nij ra'a man ní' adonj.

*Nana nihánj taj xna'anj se vaa nij qui'yaj nij sítu cuchumán rá ni'yaj man Jesucristó yanj chuman' Corinto, naqui'yaj nij so' que'ee x'ne' man nij so' a*

<sup>10</sup> Dan me se cunó soj ca'mij, tinuj, nocoj. Ne che'é se-chuvij ya Jesucristó sij 'nij ra'a man ní' ro', me achín ni'yáj yaj rihaan nij soj se vaa yo'o cuyaan gaa rá taran' soj do', yo'o cuyaan ca'mij soj do', yo'o rcua'aaan gaa soj do', raj chuguanj. <sup>11</sup> Dan me se cataj xna'anj nij tuvi' sítu cu'naj Cloé rihanj se vaa unu' soj ga tinúú soj ne unun vij ndo'o soj, nanj tinuj, nocoj. <sup>12</sup> Dan me se ta'aj nij soj taj: "'Unj me sítu noco' se-nana sítu cu'naj Pabló a". Yo'ó ta'aj nij soj taj: "'Unj me sítu noco' se-nana sítu cu'naj Apolos a". Yo'ó ta'aj nij soj taj: "'Unj me sítu noco' se-nana sítu cu'naj Pedró a". Yo'ó ta'aj nij soj taj: "'Unj me sítu noco' se-nana Jesucristó a". Dan me se danj vaa 'o 'o ta'aj soj a. <sup>13</sup> Ne me che'é 'yaj soj danj ga. 'O se nuvi' que'ee Jesucristó vaa ma'. Taj che'é gaa que'ee x'ne' soj ma'. Cavi' ma'an 'unj rihaan rcutze che'é soj na'. Cata' ne soj che'é ma'an 'unj na'. Taj ma'. Che'é dan, me che'é taj ta'aj soj se vaa sij noco' manj me ta'aj soj ga.

<sup>14-15</sup> Dan me se ne cuta' ne 'unj man soj ma'. Maan se orún' sítu cu'naj Crispo do', sítu cu'naj Gayo do', cata' ne qui'yáj, ne che'é dan se ca'vee cataj soj se vaa che'ej cata' ne soj ma'. Danj gaa, ne guun niha' raj á. 'O se cata' ne soj che'é Jesucristó, cataj soj, ne

ca'mii ya soj á. <sup>16</sup> Cuta' ne uún 'unj man nij tucua sí cu'naj Estéfanos, tzaj ne ne nuú sa' raj sese cuta' ne 'unj man yo'ó ta'aj yuvii a ma'. <sup>17</sup> 'O se nuvi' suun cuta' ne yuvii ataj ma'. 'O se ca'née xa' Jesucristó manj nataj se-nana Diose nana sa' rihaan yuvii, tzaj ne na'vej rá so' cavii raá 'unj nana cuu nachran' ca'mii 'unj ma'. Maan se nana nica inanjanj ca'mii 'unj, gaa ne ca'vee xcaj yuvii cuentá se vaa nuveé nana avii raá yuvii me nana yo', maan ne se-nana Jesucristó ya me yo' adonj. Dan me se ya xcaj nij yuvii cuentá se vaa ya cavi' Jesucristó rihaan rcutze che'é nij so', ne ca'vee cuchuman rá nij yuvii cunō nij yuvii nana nica ca'mii 'unj adonj.

*Nana nihánj taj xna'anj se vaa che'é se ca'née Diose man Jesucristó rihaan chumii nihánj, che'é dan ne'en ní' se vaa avii ndo'o raá Diose a*

<sup>18</sup> Dan me se vaa yuvii cacaa nu' cavii nu' ca'anj, ne nata' nii nana se vaa cavi' Jesucristó rihaan rcutze uno nij yuvii yo', tzaj ne taj se 'yá' cuchuman rá nij yuvii ma'. Nana snúú rma'an me nana yo' rihaan nij so' nanj adonj. Tzaj ne ino vaa rá ní' sij cavii sa', ne ne'en ní' se vaa che'é nana yo' ro', guun nucuaj Diose tinanii Diose man ní' rihaan sayuun adonj. <sup>19</sup> Ne danj Diose taj: "Nij sí avii ndo'o raá ro', guun nij so' sí ni'yon, qui'yaj, ne se guun nucuaj nij so' xcaj nij so' cuentá che'é nana sa', qui'yaj ma'", taj nana no rihaan danj Diose á. <sup>20</sup> Ne daj ran' nu' nij sí avii ndo'o raá man rihaan chumii nihánj cuano, rá soj ga. Yaj nihánj me se nana snúú rma'an avii raá nij so', qui'yaj Diose nanj adonj. <sup>21</sup> 'O se nij sí man rihaan chumii nihánj ro', ne cavii raá nij so' daj vaa Diose ma'. Tzaj ne sí cuu raá me Diose, ne ma'an Diose caráan chrej rihaan nij so', gaa ne se gaa nanj xcaj nij so' cuentá che'é so' adonj. 'O se me rá Diose cunō nij yuvii nana a'mii natáj núj, ne sese cunō nij yuvii, ne tinanii Diose man nij yuvii rihaan sayuun, ne dan me

se nda' se nana snúú rma'an me nana a'mii núj, rá ta'aj nij yuvii ro', tzaj ne orún' nana yo' me nana tinanii man yuvii rihaan sayuun nanj adonj.

<sup>22</sup> Ne xa' nij yuvii israelitá, tzaj ne me uxrá rá nij so' qui'yaj Diose suun sa' nocoo quene'en nij so', ne xa' nij yuvii yaníj, tzaj ne me rá nij so' cunō nij so' nana cuu á. <sup>23</sup> Tzaj ne a'mii natáj núj nana se vaa cavi' Jesucristó rihaan rcutze che'é yuvii, ne na'aj nij yuvii israelitá cunō nij so' nana yo', ne nij yuvii yaníj taj se vaa nana snúú rma'an me nana yo' uún adonj. <sup>24</sup> Tzaj ne aj canacúun Diose man ta'aj nij yuvii israelitá do', man ta'aj nij yuvii yaníj do', se vaa canoco' nij so' man so', ne gaa uno nij so' nana a'mii natáj núj, ne uun ya rá nij so' se vaa sí ca'née Diose tinanii man yuvii rihaan sayuun me Jesucristó, ne xcaj nij so' cuentá se vaa ya nucuaj ndo'o Diose ne ya avii ndo'o raá Diose, che'é se ca'née Diose man Jesucristó rihaan chumii nihánj adonj. <sup>25</sup> Dan me se nda' se nana snúú rma'an me nana rqué Diose, rá ta'aj nij yuvii, tzaj ne nuveé nana snúú rma'an me nana yo' ma'. 'O se avii doj raá Diose rihaan nij yuvii nanj ei. Ne nda' se ninaj ndo'o Diose, rá ta'aj nij yuvii, tzaj ne ne ninaj Diose ma'. 'O se Diose ro', me sí nucuaj ndo'o doj rihaan nij yuvii nucuaj ndo'o adonj.

*Nana nihánj taj xna'anj se vaa che'é se sí ni'yon me ní', che'é dan ne'en ní' se vaa inanjanj che'é Jesucristó me cavii sa' ní' a*

<sup>26</sup> Dan me se xcaj nij soj cuentá daj qui'yaj Diose gaa canacúun Diose man ma'an soj, tinuj, nocoj. Doj vaa nij sí avii ndo'o raá 'nij sca'núj soj á. Doj vaa nij sí nucuaj 'nij sca'núj soj á. Doj vaa nij sí xna'anj 'nij sca'núj soj á. Nuveé yuvii sa' doj rihaan yo'ó yuvii me ma'an soj ma'. <sup>27</sup> Maan se inanjanj sí ni'yon narii Diose, ne dan me se nacaj Diose man nij sí ni'yon, che'é rej me rá Diose guun na'aj nij sí avii ndo'o raá nanj á. Ne sí uun narii Diose, ne dan me se nacaj Diose man

nij so', che'é rej me rá Diose guun na'aj nij sí vaa suun nanj adonj. <sup>28</sup> Ne taj yu'vee nó nij sí narii Diose man ma', taj nij yuvii man rihaan chumii nihánj, tzaj ne nacaj Diose man nij so', ne qui'yaj canaán nij so' rihaan nij sí guun chij doj man rihaan chumii nihánj adonj. <sup>29</sup> Dan me se asa' quisíj, gaa ne a 'ó yuvii se quisíj rá ca'mii sa' che'é ma'an rihaan Diose se vaa sij sa' uxrá me ma'an a. <sup>30</sup> Dan me se Diose me sí 'yaj 'nij ra'a Jesucristó man soj, ne che'é orún' Jesucristó avii raá ní', qui'yaj Diose á. Che'é orún' Jesucristó cunuu sa' nimán ní' rihaan Diose á. Che'é Jesucristó me ní' sí sa' rihaan Diose, qui'yaj Diose á. Che'é Jesucristó quinanii ní' rihaan sayuun, qui'yaj Diose á. <sup>31</sup> Che'é dan no xcuún ní' qui'yaj ní' ndaa vaa taj danj Diose á. Dan me se taj danj Diose: “Se ca'mii sa' ní' che'é ma'an ní' ma'. Inanj che'é ma'an Diose guun rá ní' ca'mii sa' ní' á”. Danj taj danj Diose adonj.

## 2

*Nana nihánj taj xna'anj se vaa ne ca'mii Pabló nana nachran' rihaan nij sí man Corinto ma'. Maan se inanj cataj xna'anj so' se vaa cavi' Jesucristó rihaan rcutze che'é ní' a*

<sup>1</sup> Ne'en nij soj se vaa gaa cuchí' 'unj chiháán soj, ne natá' 'unj se-nana Diose rihaan soj, ne ne guun rá 'unj ca'mii 'unj nana nachran' ndo'o rihaan soj, man tinuj, man nocoj. 'O se ne guun rá 'unj cataj soj se vaa avii ndo'o raá 'unj ma'. <sup>2</sup> Tananj yo'o guun rá 'unj cataj xna'anj 'unj che'é orún' Jesucristó se vaa cavi' so' rihaan rcutze che'é soj a. <sup>3</sup> Dan me se gaa cuchí' 'unj rihaan soj, ne guun na'aj 'unj ca'mii 'unj, ne cuchu'vi' nimanj, ne quiri'ij ndo'o manj nanj á. <sup>4</sup> Ne xa' nana natá' 'unj rihaan nij soj, tzaj ne nuveé nana cavii raá yuvii me nana yo' ma'. Tzaj ne cuno nij soj nana, ne guun ya rá soj se vaa Nimán Diose rqué nana yo' manj, ne guun ya rá soj se vaa ma'an Diose rqué se

nucuj manj ca'mij nana yo' rihaan soj adonj. <sup>5</sup> Che'é dan nuveé che'e se cavii ndo'o raá 'unj me cuchumán rá soj cuno soj nana yo' ma'. Tananj che'é se vaa rqué Diose se nucuj man ní' me cuchumán rá soj adonj.

*Nana nihánj taj xna'anj se vaa ino uxrá vaa nana avii raá nij sí man rihaan chumii nihánj ga se-nana Diose nana sa' a*

<sup>6</sup> Dan me se nana cuu a'mii núj rihaan nij yuvii vaa chij rá, tzaj ne nuveé nana avii raá yuvii man rihaan chumii nihánj cuano me nana a'mii núj ma'. Ne a'mii núj nana avii raá nij sí uun chij rihaan chumii nihánj ma'. 'O se ne'en núj se vaa nichrun' ca'nee Diose suun uun chij ata' nij so' nanj adonj. <sup>7</sup> Tzaj ne a'mii núj se-nana Diose nana cuu adonj. Dan me se gaa ataa qui'yaj Diose chumii, ne yo'o guun rá Diose se vaa cuno yuvii nana cuu yo', ne cavii sa' yuvii, ne ve'é ndo'o gaa yuvii, tzaj ne nij sí man gaa naá ro', ne quene'en nij so' nana yo' ma'. Ndaa yaj me tihaan naca Diose nana yo' rihaan yuvii nanj adonj. <sup>8</sup> Ne quene'en nij sí uun chij man rihaan chumii nihánj se-nana Diose nana cuu ma'. Dan me se Jesucristó me sí guun chij ndo'o rej xta', ne sese quene'en nij sí uun chij man rihaan chumii nihánj se-nana Diose, ne ne cachron nij so' man Jesucristó rihaan rcutze asuun saj ma'.

<sup>9</sup> Tzaj ne danj Diose taj se vaa a 'ó yuvii ne guun nucuj xcay cuentá che'é se vaa qui'yaj Diose che'é ní' sij aráj cochroj rihaan Diose a. Danj taj danj Diose á. <sup>10</sup> Tzaj ne tihaan Nimán Diose man núj che'é nij rasuun qui'yaj Diose che'é ní' sij aráj cochroj rihaan Diose, ne dan me se tihaan Nimán Diose rasuun yo' man núj, qui'yaj ma'an Diose á. Dan me se nuchruj raá Nimán Diose cunudanj rasuun, ne sa' uxrá nuchruj raá Nimán Diose daj vaa ma'an Diose adonj.

<sup>11</sup> 'O se a 'ó yuvii ne ne'en daj vaa rasuun 'nij yuve nimán yo'ó yuvii

ma'. 'O se orún' nimán yuvii ne'en daj vaa nimán ma'an yuvii nanj adonj. Ne danj vaa Diose uún a. A 'ó ní' se ca'vee xcaj cuentá daj vaa Diose ma'. Maan se orún' Nimán Diose me sí ne'en daj vaa Diose nanj adonj. <sup>12</sup> Ne ino uxrá vaa nimán núj ga nimán nij yuvii man rihaan chumii nihánj, ne xa' núj, tzaj ne nuu Nimán Diose nimán núj, ne che'é dan me xcaj núj cuentá daj vaa nij se sa' rqué Diose rihaan ní' adonj. <sup>13</sup> Dan me se gaa nata' núj rihaan yuvii che'é nij se sa' rqué Diose rihaan ní', ne ne a'mii núj nana avii raá yuvii ma'. Maan se a'mii núj nana tucu'yón Nimán Diose man núj, ne tucu'yón núj nana yo' rihaan yuvii nuu Nimán Diose nimán adonj.

<sup>14</sup> 'O se na'vej rá yuvii man rihaan chumii nihánj cunō nij so' nana a'mii Nimán Diose ma'. 'O se snúú rma'an nana a'mii Nimán Diose, rá nij so', ne ne racuíj Nimán Diose man nij so' naqui'yaj cuu nij so' nana yo' a man adonj. Che'é dan taj se 'yá' cunō nij so' ma'. <sup>15</sup> Xa' sí racuíj Nimán Diose man, tzaj ne ne'en so' naqui'yaj cuu so' cunudanj rasuun, tzaj ne se ca'vee naqui'yaj cuu yo'ó yuvii man so' ma'. Se guun nucuaj nij yuvii xcaj nij yuvii cuentá daj vaa rá so' ma'. <sup>16</sup> Dan me se danj Diose taj: "A 'ó yuvii ne ne'en daj vaa rá sí 'nij ra'a man ní' ma'. Se guun nucuaj yuvii nago' yuvii chrej man sí 'nij ra'a man ní' ma'". Danj taj danj Diose á. Ne ase vaa rá Jesucristó ro', danj vaa rá ma'an núj, ne che'é dan se guun nucuaj yuvii naqui'yaj cuu yuvii man núj a man adonj.

### 3

*Nana nihánj taj xna'anj che'é suun qui'yaj suun Pabló rihaan Diose se vaa tucu'yón so' se-nana Diose rihaan nij sí man Corinto a*

<sup>1</sup> Dan me se ase vaa yuvii tihaj guun che'e canoco' man Jesucristó ro', danj vaa nij soj gaa cuchí' 'unj rihaan soj, tinuj, nocoj. 'O se vaa ni'yón doj rá soj, ne ataa doj nari'

soj cunō soj rihaan Nimán Diose, ne qui'yaj ndo'o soj se vaa me rá nee man soj qui'yaj soj, ne che'é dan ne ca'vee ca'mij nana chij rihaan soj a ma'. <sup>2</sup> Ne guun nucuaj soj cunō soj nana chij a'mii Nimán Diose a ma'. Maan se inanj nana tucu'yón nii man xnii ca'mii 'unj rihaan soj, ne veé danj vaa soj ndaa se cuano nihánj, ne ne guun nucuaj soj cunō soj nana chij a man adonj. <sup>3</sup> Dan me se 'yaj ndo'o soj se vaa me rá inanj nee man soj qui'yaj soj, ne dan me se uun xcoj ruvaa ndo'o rá soj ni'yaj soj tinúú soj, ne che'é dan unu' soj ga tinúú soj, ne che'é dan me ne'en núj se vaa ne uno soj a'mii Nimán Diose a man chuguanj. Maan se ase vaa naj guun yuvii man rihaan chumii nihánj ro', danj vaa soj adonj.

<sup>4</sup> Dan me se taj yo'o tuvi' soj: "Sij noco' man sí cu'naj Pabló mej á". Ne yo'ó so' ro', taj: "Sij noco' man sí cu'naj Apolos mej á". Danj a'mii 'o 'o ta'aj soj, ne che'é dan ase vaa naj guun yuvii man rihaan chumii nihánj vaa soj, rá 'unj nanj á. <sup>5</sup> Daj sij me sí cu'naj Apolos, ne daj sij mej, rá soj ga. Maan se sí 'yaj suun uun rihaan sí 'nij ra'a man ní' me núj, ne ino vaa suun ata 'o 'o núj, qui'yaj so', ne che'é suun qui'yaj suun núj ro', che'é dan amán rá soj ni'yaj soj man sí 'nij ra'a man ní' a. <sup>6</sup> Dan me se asino yaan cataj xna'anj 'unj se-nana Diose rihaan soj, gaa ne cuchí' sí cu'naj Apolos uún rihaan soj, gaa ne sa' doj tucu'yón so' nu' se-nana Diose rihaan soj, tzaj ne ma'an Diose me sí qui'yaj canoco' sa' nimán soj man so', <sup>7</sup> ne che'é dan taj che'é canoco' soj manj do', man sí cu'naj Apolos do' ma'. Maan se no xcúún soj canoco' soj man orún' Diose adonj. <sup>8</sup> Ne 'o cuyaan vaa 'unj ga sí cu'naj Apolos, ne vaa güii naru'vee Diose rihaan núj che'é suun 'yaj suun núj, <sup>9</sup> ne dan me se 'yaj suun núj che'é Diose, ne ca'ne' Diose suun rihaan núj tucu'yón núj se-nana Diose rihaan soj nanj adonj.

*Nana nihánj taj xna'anj se vaa no*



*xcúún 'o 'o sí me rá tucu'yón se-nana Diose tumé so' man ma'an so', gaa ne sa' tucu'yón so' a*

<sup>10</sup> Dan me se ase vaa sí ve'é uchruj ta'nga' chihón cayáán ve' ro', vaa 'unj, ne ve'é cuchruj 'unj tucuáán canoco' soj, che'é yan ca'ne' Diose suun yo' rihanj, ne cuano ro', tucu'yón yo'ó so' nana rihaan soj a. Dan me se no xcúún 'o 'o sí tucu'yón nana rihaan soj tumé so' man ma'an so', ne sa' gaa nana tucu'yón so' rihaan soj á. <sup>11</sup> Se guun cuchruj nii yo'ó tucuáán rihaan soj ma'. 'O se se-tucuanj Jesucristó me tucuáán cuchruj 'unj rihaan soj, ne ne nó xcúún nii cuchruj nii yo'ó tucuáán rihaan soj man adonj. <sup>12</sup> Ne ve'é ndo'o tucu'yón ta'aj nij yuvii se-tucuanj Jesucristó rihaan soj, ne nana nij doj tucu'yón yo'ó ta'aj nij yuvii rihaan soj, <sup>13</sup> tzaj ne vaa güii quene'en ní' daj vaa nana tucu'yón 'o 'o so' rihaan soj, ne dan me se ca'na' uún Jesucristó rihaan chumii nihánj, ne xa' suun qui'yaj suun 'o 'o núj sij tucu'yón se-nana Diose, tzaj ne cachén suun yo' rque ya'an, qui'yaj Jesucristó, ne quene'en núj daj vaa nana tucu'yón 'o 'o núj nanj adonj.

<sup>14</sup> Dan me se sese se cacaa nana tucu'yón yo'ó so', ne quene'en ní' se vaa ve'é tucu'yón so' se-nana Diose, ne naru'vee Diose rihaan so', <sup>15</sup> tzaj ne sese cacaa nu' nana tucu'yón so', ne quene'en ní' se vaa taj yu'vee nó nana tucu'yón so' rihaan yuvii, ne a 'o xco' se naru'vee Diose rihaan so' nu' che'é suun qui'yaj suun so' a ma'. Dan me se quinanii ma'an so' rihaan sayuun, tzaj ne nana tucu'yón so' cacaa, ne orún' so' quinanii rihaan sayuun nanj adonj. <sup>16-17</sup> Ne ne'en soj se vaa sese tirí' yo'ó so' man ve' na'víj yuvii rihaan Diose ro', ne tirí' Diose man so' uún, ne ase vaa ve' na'víj yuvii rihaan Diose ro', ta'nga' danj vaa ma'an soj rihaan Diose, ne yanj Nimán Diose ga soj, ne che'é dan ne nó xcúún yuvii tucunu' yuvii man soj ma'. 'O se sese cunu' soj ga tinúú soj, ne quirí' soj, ne tirí' Diose man

sí qui'yaj danj man soj, ne cacaa so' adonj.

<sup>18</sup> Sese vaa yo'ó tuvi' soj avii ndo'o raá nana cuu chij nana uno yuvii man rihaan chumii nihánj cuano, ne dan me se ca'ne' rá so' ga rej a'mii danj nanj ei. Se guun tiha' yu'unj so' man ma'an so' ma'. Maan se xcaj so' cuentá ne naqui'yaj so' sí snúú rma'an man so', gaa ne ca'vee quisij so' guun so' sí avii ndo'o raá doj chuguanj. Dan me se tananj a nari' so' nana ya, ne yá nu' cavii sa' so' doj nanj adonj. <sup>19</sup> Nana avii raá yuvii man rihaan chumii nihánj cuano ro', daj chihaa míj taj se uun nana yo' rihaan Diose ma'. 'O se danj Diose taj se vaa yuvii avii raá ro', me rá nij so' tiha' yu'unj nij so' tuvi' nij so', tzaj ne nicaj Diose nana avii raá nij so', ne tiha' yu'unj Diose man ma'an nij so' nanj adonj. Danj taj danj Diose ei. <sup>20</sup> Ne taj uún danj Diose se vaa ne'en Diose se vaa taj yu'vee nó nana avii raá yuvii man rihaan chumii nihánj a ma'. Danj taj danj Diose a.

<sup>21</sup> Che'é dan ne nó xcúún ní' ca'mii xta' ní' che'é nana avii raá yo'ó yuvii ma'. Se guun cataj ní' se vaa sa' doj avii raá yo'ó so', ne yo'ó so' nij 'yaj, cataj ní' ma'. Tzaj ne xcaj ní' cuentá daj a'mii 'o 'o nij so' á. 'O se nana a'mii yuvii do', nu' rasuun man rihaan chumii nihánj do', ca'vee cavii sa' doj ma'an soj qui'yaj me ma'an rasuun yo', ne vaa se uun nana a'mii nij snó'o do', rasuun man rihaan chumii nihánj do', rihaan soj ei. <sup>22</sup> Dan me se nana a'mij do', nana a'mii sí cu'naj Apolos do', nana a'mii sí cu'naj Pedró do', vaa se uun nana yo' rihaan soj, ne rasuun man rihaan chumii nihánj ro', vaa se uun yo' rihaan soj á. Ne sese vaa i'na' soj, ne cavii sa' soj, che'é se vaa i'na' soj a. Sese cavii soj, ne ca'vee cavii sa' soj uún a. Ne sese ran' soj cuano nihánj do', sese quiran' soj rej rihaan ní' do', ne nu' nij rasuun yo' me vaa se uun rihaan soj á. <sup>23</sup> 'O se sí noco' man Jesucristó me soj, ne ta'nij Diose me Jesucristó uún a.

## 4

*Nana nihánj taj xna'anj se vaa síi 'nij ra'a man ní' me síi naqui'yaj cuu man ní' vaa güii a*

<sup>1</sup> Dan me se me rá núj xcaj cunudanj yuvii cuentá se vaa sji 'yaj suun rihaan Jesucristó me núj, ne no xcúún núj nata' núj nana me rá Diose tihaaan naca Diose man yuvii nanj á. <sup>2</sup> Dan me se no xcúún núj qui'yaj suun núj nu' suun ca'ne' Diose rihaan núj, ne se ca'vee ca'ne' rá núj ga suun yo' a ma'. <sup>3</sup> Tzaj ne ca'vee se naj guun cuese naqui'yaj cuu che'ej do', tzaj ne taj se 'yaj ma'. 'O se a ma'an 'unj ne naqui'yaj cuu 'unj daj 'yaj ma'. <sup>4</sup> A 'ó cacun' ne tumé 'unj cuano, rá 'unj, tzaj ne dan me se ne ne'en 'unj daj vaa man ma'anj ma'. 'O se orún' síi 'nij ra'a man ní' me síi no xcúún naqui'yaj cuu che'ej nanj adonj. <sup>5</sup> Che'é dan se guun naqui'yaj cuu soj cacun' che'é yuvii ma'. Maan se na'vij soj ca'na' uún síi 'nij ra'a man ní' rihaan chumii nihánj ei. Cuanó nihánj me se ne ne'en sa' ní' daj vaa 'yaj 'o 'o yuvii, tzaj ne asa' ca'na' síi 'nij ra'a man ní', ne tihaaan so' rihaan ní' daj vaa 'yaj 'o 'o yuvii man rihaan chumii nihánj, ne sese sa' qui'yaj yo'o so', ne ma'an Diose cataj se vaa sa' qui'yaj so' adonj.

*Nana nihánj taj xna'anj se vaa ne noco' sa' nij síi man Corinto nana tucu'yón Pabló man nij so' a*

<sup>6</sup> Dan me se aj cataj xna'anj 'unj rihaan soj se vaa ma'an Jesucristó naqui'yaj cuu che'é núj ga síi cu'naj Apolos, ne me raj quene'en soj man núj, ne xcaj soj cuentá se vaa no xcúún soj cunó soj nana aj cataj xna'anj Diose rihaan ní' nana no rihaan yanj á. Dan me se se cataj soj se vaa sa' doj vaa yo'o tuvi' núj rihaan yo'ó tuvi' núj ma'. <sup>7</sup> Sa' doj vaa so' rihaan yo'ó yuvii, rá so' na'. Me síi cataj rihaan so' se vaa sa' doj vaa so' ga, man tinuj, man nocoj. Si'yáa so' ro', me se me síi rqué yo' rihaan so' ga. Ma'an so' qui'yaj na'. Ase Diose

qui'yaj xa'. Sese rqué Diose nu' si'yáa so' rihaan so', ne taj che'é ca'mii xta' so' a doj ma'. <sup>8</sup> Ne xa' soj, tzaj ne a 'ó rasuun ne achiin man soj, rá soj, ne ru'vee me soj, rá soj, ne rii ta'nga' ndo'o soj, rá soj a. Ne xa' núj, tzaj ne a doj ne rii ta'nga' núj, rá soj a. Sese ya rii ta'nga' soj, ne guun niha' uxrá raj, ne ndaa a núj quirii ta'nga' ga soj ei.

<sup>9</sup> Ne xa' núj apóstol cune' Jesucristó man nata' se-nana so' rihaan cunudanj nij yuvii man rihaan chumii nihánj, tzaj ne ase vaa síi naj rma'an ro', danj vaa núj rihaan chumii nihánj, ne sji daj doj cavi' me núj, qui'yaj Diose, raj a. Che'é dan ni'yaj ndo'o nij síi man rihaan chumii nihánj ni'yaj ma'an nij se-mozó Diose ni'yaj ndo'o man núj, che'é se vaa síi yanj rma'an me núj a. <sup>10</sup> Dan me se ase vaa síi ni'yon vaa núj rihaan chumii nihánj, che'é Jesucristó, tzaj ne síi cuu raá me soj che'é Jesucristó, rá soj a. Ne síi nucuaj ndo'o me soj, rá soj, tzaj ne núj me se síi inaj me núj a. Ne ve'é ndo'o aráj cochroj yuvii rihaan soj, tzaj ne xa' ma'an núj, tzaj ne tananj a nachri' yuvii ni'yaj yuvii man núj a.

<sup>11</sup> Nu' ca'na' me se achiin se chá rihaan núj do', achiin se co'o núj do', achiin yatzij quitaj xráa núj do' á. Tucuxru' ndo'o nii man núj, ne ne'en nii se vaa taj vaj to'óo núj a. <sup>12</sup> Dan me se 'yaj suun ndo'o núj, ga ne a'vee ri' núj se achiin man núj a. Nachri' nii ni'yaj nii man núj, tzaj ne a'mii núj nana luj rihaan nij síi nachri' ni'yaj man núj, ne 'yaj nii sayuun man núj, tzaj ne ne a'ne' rá núj ga suun vaa rihaan núj a man adonj. <sup>13</sup> Nana nij a'mii nii rihaan núj, tzaj ne nana sa' a'mii núj ga nij síi a'mii nij che'é núj a. Ase vaa nacaj na'nu' nii rihaan cunudanj rasuun man rihaan chumii ro', danj vaa núj rihaan chumii nihánj nu' ca'na', ne veé danj vaa núj ndaa cuano nihánj nanj adonj.

<sup>14</sup> Dan me se quisij cachron 'unj nana nihánj nayaa soj, ne nuveé che'ee se me raj guun na'aj soj me cachronj

nana nihánj ma'. 'O se ase vaa ta'níj vaa soj rihanj, tinuj, nocoj, ne che'é se 'ee raj man soj, che'é dan me raj narquej chrej sa' man soj ei. <sup>15</sup> Ca'vee se cuchí' chí' míj síi tucu'yón che'é Jesucristó rihaan soj, tzaj ne asinoj me síi cataj xna'anj se-nana Diose nana sa' rihaan soj á. Canoco' soj man Jesucristó ga 'unj, ne che'é dan ase vaa rej soj vaa 'unj, tinuj, nocoj. <sup>16</sup> Che'é dan me cataj xna'anj 'unj rihaan soj se vaa ase vaa 'yáa 'unj ro', danj gaa qui'yaj guee soj uún a. <sup>17</sup> Che'é dan ca'nej 'unj man síi cu'naj Timoteo cuchí' so' rihaan soj, ne síi noco' man síi 'nij ra'a man ní' me so' ga 'unj, ne che'é dan ase vaa ta'níj vaa so' a. 'Ee raj man so', ne nucaj raj man so' nanj adonj. Cataj xna'anj uún so' rihaan soj nu' tucuaán noco' 'unj che'é Jesucristó, ne 'o cyaan vaa nana tucu'yón so' ga nana tucu'yón 'unj rihaan nij síi amán rá ni'yaj man Jesucristó man cunudanj nij chuman' rej vaj 'unj a.

<sup>18</sup> Guun che'e ta'aj nij soj ca'mii xta' ta'aj nij soj, ne xa' nij síi a'mii xta', tzaj ne se cuchí' ma'anj rihaan soj, rá nij so' a. <sup>19</sup> Tzaj ne ra'yanj ya cuchí' ma'anj rihaan soj, sese ca'vej síi 'nij ra'a man ní', gaa ne nuveé inanj che'é nana a'mii xta' nij so' xcaj 'unj cuentá ma'. 'O se xcaj 'unj cuentá sese ya quisij nij so' qui'yaj nij so' ndaa vaa taj nij so' adonj. <sup>20</sup> 'O se se guun chij ní' ga Diose qui'yaj nana tu'va uún ní' ma'. 'O se guun chij ní' ga Diose, qui'yaj suun guun nucaj ní' qui'yaj suun ní' che'é Diose adonj. <sup>21</sup> Me se me rá soj qui'yaj ga soj asa' cuchí' 'unj rihaan soj ga. Me rá soj qui'yáa 'unj sayuun man soj na'. Ase me rá soj gaa 'ee rá 'unj man soj ne ve'é ca'mij ga soj xa'.

## 5

*Nana nihánj taj xna'anj se vaa a'ne' Pablo suun rihaan nij síi man Corinto se vaa quirii yaníj nij so' man 'o síi tumé cacun' 'nij sca'núj nij so' a*

<sup>1</sup> Dan me se nata' nii rihanj se vaa 'nij 'o síi tumé ndo'o cacun' sca'núj nij soj, ne cacun' chi'ii ndo'o me yo', ne a nij síi ne noco' man Diose ne 'yaj danj ma'. Dan me se vaa yo'o síi otoj ga nica rej 'nij sca'núj soj, taj nii ei. <sup>2</sup> Me che'é a'mii xta' soj ga. Me che'é ne nanó rá soj ga. Me che'é ne quirii yaníj soj man síi tumé cacun' 'nij sca'núj soj ga. <sup>3-4</sup> Nuvi' ya xa' 'unj ne ga soj cuano, tzaj ne nuchruj raa ndo'oj che'é soj, ne nana nihánj ro', a'mii 'unj, ne ase uun rá soj gaa nej ga soj ro', danj guun rá soj cunó soj nana nihánj á. Che'é dan asa' cunuu chre' soj, ne xcaj soj cuentá che'é rej ya nicun' nimán 'unj sca'núj soj, qui'yaj Jesucristó sij 'nij ra'a man ní', ne che'é Jesucristó sij 'nij ra'a man ní' taj xna'anj 'unj rihaan soj se vaa ya tumé ndo'o snó'o yo' cacun', <sup>5</sup> ne taj xna'anj 'unj rihaan soj se vaa tacuachén soj man síi tumé cacun' yo' rihaan síi chree cu'naj Satanás, gaa ne quiran' ndo'o nee man so' sayuun, qui'yaj síi chree, gaa ne sese xcaj sa' so' cuentá, ne gaa asa' ca'na' síi 'nij ra'a man ní' ca'ne' so' cacun' che'é yuvii, gaa ne quinanjii nimán so', qui'yaj síi 'nij ra'a man ní' a.

<sup>6</sup> Ne chihan' uxrá vaa gaa a'mii xta' soj, man tinuj, man nocoj. Ne'en soj se vaa yo'óo cu'naj levadura 'yaj naraa nana rque rachrúun a. Doj tzin' yo'óo cu'naj levadura 'yaj naraa nana rque nocoo ndo'o cunj adonj. Ne ase vaa levadura rihaan cunj yo' ro', danj vaa orún' síi 'yaj cacun' rihaan soj, ne dan me se quirii' que'ee soj, qui'yaj orún' síi tumé cacun' 'nij sca'núj soj ei. <sup>7</sup> Che'é dan me, ne quirii yaníj soj nu' se nij 'nij sca'núj soj, gaa ne ase vaa cunj naca sa' ro', danj gaa soj, ne se guun qui'nij se nij sca'núj soj a ma'. Xa' soj, tzaj ne ya vaa sa' soj, qui'yaj Jesucristó, ne dan me se aj cavi' so' che'é ní', ne ase vaa caráan matzinj rihaan sayuun che'é nij yuvii israelitá gaa naá ro', danj vaa caráan Jesucristó rihaan nu' sayuun che'é ní', ne se quiran' ní' sayuun che'é cacun' tumé ní' a ma'.

8 Che'é dan, ase vaa navij rá nij yuvií israelitá cha'anj pascuá cha'anj avi' matzinj che'é nij so' ro', danj gaa ve'é ndo'o qui'yaj ma'an ní' rihaan Diose cuano, che'é rej cavi' Jesucristó che'é ní' á. Dan me se yuvií israelitá ro', ri'ij nij so' nu' se cu'naj levadura man tucua' nij so' gaa navij rá nij so' cha'anj pascuá, ne 'o cyaan qui'yaj ní' ga' nij so', quiri'ij ní' nu' se chi'ii man nimán ní', gaa ne se gaa chi'ii nimán ní' ei. Se qui'yaj ní' se nij qui'yaj ní' gaa rque ma'. Tananj ca'mii chij ní', ne inanj tucuaán ya qui'yaj ní' á.

*Nana nihánj taj xna'anj se vaa sese vaa 'o sítaj se vaa tinúú ní' me so', tzaj ne sese 'yaj ndo'o so' cacun', ne se chá ní' chraa ga so' a*

9 Aj ca'née 'unj nana rihaan soj rihaan yo'ó yanj se vaa se cunuu chre' soj ga' nij sítaj 'yaj cacun' ga' chana adonj. 10 Tzaj ne ne ca'mii 'unj che'é sítaj man rihaan chumii nihánj sítaj ne noco' man Jesucristó ma'. Dan me se nij so' me sítaj 'yaj ndo'o cacun' ga' chana, ne uun xcoj ruvaa rá nij so' ne'en nij so' tuvi' nij so', ne 'yaj ituu nij so' si'yaj tuvi' nij so', ne na'víj nij so' rihaan ya'anj ne vaa i'na' uún a. Tzaj ne sese me rá soj guun yanj soj ga' nij sítaj 'yaj cacun' man rihaan chumii nihánj, ne me rej ca'anj soj ga'. 'O se man nij so' rihaan nu' cachra' chumii nihánj, ne se ca'vee curihanj soj rihaan nij so' rihaan chumii nihánj ma'. 11 Maan se che'é soj cachron 'unj nana nihánj se vaa se guun cunuu chre' soj ga' yo'ó sítaj uun tinúú man soj, ne ne ya noco' so' man Jesucristó, ne 'nij so' sca'núj soj ei. Dan me se sese tinúú soj me so', taj yo'ó so', tzaj ne sese 'yaj so' cacun' ga' chana do', sese uun xcoj ruvaa rá so' do', sese na'víj so' rihaan ya'anj ne vaa i'na' do', sese nachri' so' ni'yaj so' tuvi' so' do', sese sítaj xno me so' do', sese sítaj ituu me so' do', ne se cunuu chre' soj ga' so' do', a ne nó xcúún so' cataj tinuj soj man so' a mei. Ne a 'ó chraa se chá soj ga' so' a ma'.

12-13 Dan me se ne nó xcúún 'unj ca'ne' 'unj cacun' che'é nij sítaj ne noco' man Diose ma'. Ma'an Diose nó xcúún ca'ne' cacun' che'é nij so' adonj. Tzaj ne no xcúún soj ca'ne' soj cacun' che'é nij tinúú soj sítaj nuu chre' ga' soj, ne danj Diose taj: "Quirii yanj soj man sítaj chi'ii 'nij sca'núj ma'an soj á". Danj taj danj Diose adonj.

## 6

*Nana nihánj taj xna'anj se vaa ne nó xcúún ní' ca'mii ní' che'é pleitó man sca'núj ní' rihaan nij cuese man chiháán ní' a. Ne se guun qui'yaj ní' cacun' man tinúú ní' ma'*

1 Gaa unu' soj ga' tinúú soj, ne 'anj soj uchruj soj cacun' rihaan cuese sítaj ne amán rá ni'yaj man Jesucristó ne ne 'anj soj rihaan yo'ó tuvi' nij sítaj sa' noco' man Diose man chuguanj. Nij uxrá vaa 'yaj soj danj ei. 2 Ne ne ne'en soj se vaa vaa güii, ne ca'ne' ní' sítaj sa' noco' man Diose cunudanj cacun' che'é cunudanj nij yuvií man rihaan chumii nihánj a. Sese ca'ne' soj cacun' che'é cunudanj chumii vaa güii, gaa ne me che'é se guun nucuaj soj ca'ne' soj cacun' che'é cacun' le'ej nii cuano ga'. 3 Ne ne'en soj se vaa vaa güii, ne ndaa che'é ya se-mozó Diose ca'ne' ní' cacun' vaa güii a. Che'é dan me ya guun nucuaj ya soj ca'ne' soj cacun' che'é daj a nij sítaj man rihaan chumii nihánj cuano ei. 4 Che'é dan, sese vaa cacun' sca'núj soj rihaan chumii nihánj, ne ca'anj cuchruj soj cacun' rihaan naj guun sítaj amán rá ni'yaj man Jesucristó ei. Me ma'an sítaj nica' doj rihaan cunudanj soj ro', guun nucuaj so' ca'ne' so' cacun' che'é tinúú soj ei. 5 Dan me se vaa che'é guun na'aj ya soj che'é se vaa 'yaj soj danj ei. Ne nuvi' a 'ó tinúú soj sítaj guun nucuaj naqui'yaj cuu man pleitó che'é tinúú soj sítaj man sca'núj soj a a. 6 Tzaj ne nuveé, maan se inanj unu' soj ga' tinúú soj, maan ne ndaa 'anj soj uchruj soj cacun' 'yaj soj rihaan nij sítaj ne amán rá ni'yaj



man Jesucristó, ne nij uxrá vaa 'yaj soj adonj.

<sup>7</sup> Che'é yan unu' soj ga tinúú soj me se aj tumé uxrá soj cacun' vaa nanj adonj. Aj quiri' nu' soj, ne sa' doj sese ca'ne' cachrij rá soj qui'yaj chi'ii tinúú soj man soj do', ca'ne' rá soj qui'yaj ituu cachrij tinúú soj man si'yaj soj do', nanj ei. <sup>8</sup> Tzaj ne na'vej rá soj qui'yaj soj danj, maan ne tananj a ma'an soj 'yaj chi'ii man tinúú soj do', 'yaj ituu soj si'yaj tinúú soj do', nanj chihá'. <sup>9</sup> Ne ne'en soj se vaa se cayáan nij síi chi'ii ga Diose asa' guun chij Diose rihaan chumii nihánj a'. Se guun tihá' yu'unj soj man ma'an soj ma'. 'O se síi chi'ii do', síi na'víj rihaan ya'anj ne vaa i'na' do', síi otoj ga nica tuvi' do', chii chana do', síi otoj ga chii chana do', <sup>10</sup> síi ituu do', síi uun xcoj ruvaa rá do', síi xno do', síi nachri' ni'yaj tuvi' do', síi tihá' yu'unj man tuvi' do', se cayáan nij so' ga Diose asa' guun chij Diose rihaan chumii nihánj a ma'. <sup>11</sup> Dan me se danj inanj qui'yaj ta'aj soj gaa rque, tzaj ne yaj me se x'néj cacun' taj xráá soj, ne cunuu sa' nimán soj, ne cunuu sa' soj rihaan Diose, qui'yaj Jesucristó sij 'nij ra'a man ní' do', qui'yaj Nimán Diose síi noco' ní' man do', cuano ei.

*Nana nihánj taj xna'anj se vaa ne nó xcúún ní' qui'yaj ní' cacun' ga chana ma'*

<sup>12</sup> Dan me se taj ya uún nii, ne: "Síi vaa ya'núj rihaan mej a. Ca'vee qui'yáá 'unj naj guun rasuun me raj qui'yáj á". Tzaj ne se cavii sa' 'unj, qui'yaj naj guun rasuun me raj qui'yáj a ma'. Dan me se ya uxrá síi vaa ya'núj rihaan mej, tzaj ne se ca'vej raj guun chij a doj rasuun rihanj ma'. <sup>13</sup> Dan me se taj ya uún nii, ne: "Vaa rque ní' a. Che'é dan chá ní' a. Inanj che'é rque ní' ro', vaa se chá yo' a. Ne che'é se chá yo' vaa rque ní' uún", taj uún nii a. Dan me se ya uxrá ei. Danj vaa roj yo' ei. Tzaj ne Diose qui'yaj navij roj yo' nanj chuguanj. Dan me se xa' nee man ní', tzaj ne nuveé se qui'yaj naj

guun rasuun chi'ii ga chana me yo' ma'. Se cayáan ga síi 'nij ra'a man ní' me yo', ne rej ne so' me uún yo' chuguanj. <sup>14</sup> Dan me se nda' rá se vaa naqui'yaj i'na' Diose man síi 'nij ra'a man ní' gaa cavi' so' ro', danj guun nucuj Diose cunuu i'na' uún ma'an ní' qui'yaj uún so' nanj adonj.

<sup>15</sup> Ne ne ne'en soj se vaa nee man nij soj me se ase vaa nee man Jesucristó ro', vaa nee man soj a. Dan me se ca'vee nica' ní' nee man Jesucristó, ne cunuu rcua'aan yo' ga chana niha' rá ga chii, qui'yaj ní' na'. Se ca'vee gaa danj qui'yaj ní' a ma'. <sup>16</sup> Dan me se ne ne'en soj se vaa síi otoj ga chana niha' rá ro', nuu 'o nee man so' ga chana yo' a. Dan me se ase vaa orún' yuvii vaa so' ga chana yo' nanj chuguanj. Danj Diose taj: "Ase vaa orún' yuvii ro', danj vaa roj so' a". Danj a'mii danj Diose ei. <sup>17</sup> Tzaj ne sese guun tuvi' ní' ga síi 'nij ra'a man ní', ne 'o vaa nimán ní' ga so' adonj.

<sup>18</sup> Tumé uxrá soj man soj, ne naxuun soj man soj rihaan nij chana niha' chana me rá cotoj ga soj ei. Se ca'vej uxrá rá soj qui'yaj soj danj ma'. Naj guun cacun' qui'yaj ma'an snó'o ro', nuveé cacun' qui'yaj so' man ma'an nee man so' me cacun' yo' ma'. Tzaj ne sese qui'yaj snó'o cacun' ga chana niha' rá, ne yo' me cacun' qui'yaj so' man ma'an nee man so' adonj.

<sup>19</sup> Ne ne ne'en soj se vaa ase vaa nuvií sa' ndo'o vaa nee man soj, ne rej yanj Nimán Diose me yo' a. Dan me se Diose me síi rque nee man soj rihaan soj, ne nuveé si'yaj ma'an soj me nee man soj a man adonj. <sup>20</sup> Dan me se vaa ndo'o yu'vee nó soj rihaan Diose, ne noco' ndo'o naru'vee so' gaa quiránj so' man soj, ne che'é dan nó xcúún soj qui'yaj suun nee man soj che'é Diose, ne ve'é ndo'o ca'mii yuvii che'é Diose, qui'yaj soj ei.

## 7

*Nana nihánj taj xna'anj daj qui'yaj ní' sese vaa nica' ní' do', sese taj vaj nica'*

*ní' do' a*

<sup>1</sup> Ne cuano nihánj me cataj xna'anj 'unj rihaan soj che'é rasuun xná'anj soj manj a. Dan me se sa' vaa sese se xcaj tuvi' snó'o ga chana saj adonj. Sa' vaa sese quinaj uun so', cayáan ma'an so' adonj. <sup>2</sup> Tzaj ne cuano nihánj me se 'yaj ndo'o yuvii cacun' ga chana, ne che'é dan ca'vee a doj xcaj snó'o man nica so' nanj á. Dan me se no xcuún snó'o xcaj so' man chana, ne no xcuún chana xcaj no' man snó'o, <sup>3</sup> ne ve'é qui'yaj snó'o cotoj so' ga chana nica so', ne ve'é qui'yaj chana cotoj no' ga snó'o nica no' uún a. No xcuún roj so' cotoj roj so' ga tuvi' roj so' ei. <sup>4</sup> Dan me se chana ro', se quirii ta'nga' no' rihaan nee man ma'an no' ma'. 'O se nica no' quirii ta'nga' rihaan nee man no', ne vaa snó'o uún, ne se quirii ta'nga' so' rihaan nee man ma'an so' uún ma'. 'O se nica so' quirii ta'nga' rihaan nee man so' uún adonj.

<sup>5</sup> Se guun cataj yo'o so' se vaa na'vej rá so' cotoj so' ga nica so' ma'. Tzaj ne sese 'o cyaan guun rá roj nica roj so' se vaa me rá roj so' guun yanij roj so' rihaan tuvi' roj so' che'é yan yo'o cachinj ni'yaj roj so' rihaan Diose doj güii, ne ca'vee qui'yaj roj so' danj ei. Dan me se ndaa quisij cachín ni'yaj roj so' rihaan Diose, gaa ne cunu rcua'aan uún roj nica roj so', cotoj rcua'aan uún roj so' ei. Sese se cuno soj nana nihánj, ne caxrii síi chree chrej chilij rque soj, che'é se se guun nucuaj soj guun yanij soj rihaan nica soj que'ee güii ma'.

<sup>6</sup> Ne a'né' 'unj suun rihaan soj se vaa xcaj tuvi' soj, man tinuj, man no-coj. Maan se ataj 'unj se vaa sese me rá soj xcaj tuvi' soj, ne ca'vee qui'yaj soj danj ei. <sup>7</sup> Dan me se sa' doj sese 'o cyaan gaa cunudanj yuvii ga 'unj, ne guun nucuaj cunudanj nij yuvii cayáan ma'an nij yuvii, rá 'unj, tzaj ne se guun nucuaj cunudanj yuvii qui'yaj nij so' danj a ma'. Dan me se ndaa ino vaa se nucuaj 'o 'o ní' yaj ní', 'yaj Diose, ne dan me se ino vaa se nucuaj yo'o tinúú ní' qui'yaj so', ne

ino doj vaa se nucuaj yo'o tinúú ní' qui'yaj so' uún a.

<sup>8</sup> Dan me se cataj xna'anj 'unj rihaan nij soj sij yaan do', rihaan soj chana yaan do', rihaan soj chana cavi' nica do', se vaa sa' vaa sese guun nucuaj soj cayáan ma'an soj, ne ase vaa uun ma'anj ro', danj gaa cane ma'an soj tzaj adonj. <sup>9</sup> Tzaj ne sese se guun nucuaj nij soj cayáan ma'an soj, ne táa a se xcaj tuvi' cachrij soj nanj ei. Che'é se aca tiha' gaa me uun rá soj cotoj soj ga 'o chana, táa a se xcaj tuvi' cachrij soj nanj adonj.

<sup>10</sup> Nihánj me cataj xna'anj 'unj rihaan soj sij vaa nica daj qui'yaj soj ga nica soj ei. Dan me se nuvee nana cavii raá ma'anj me nana nihánj ma'. 'O se nana cataj xna'anj síi 'nij ra'a man ní' rihaan ní' me nana nihánj adonj. Dan me se se cunanj chana rihaan nica no' ma'. <sup>11</sup> Sese cunanj chana rihaan nica no', ne quinaj uun no', ne se xcaj no' yo'ó snó'o ma'. Maan se ca'vee canicaj uún no' nan' no' rihaan nica no', ne guun tuvi' uún no' ga nica no' ei. Ne snó'o uún me se se tanaj so' man nica so' ma'.

<sup>12</sup> Vaa doj nana cataj xna'anj uún 'unj rihaan soj sij vaa nica, tzaj ne nuvee nana cataj xna'anj síi 'nij ra'a man ní' me nana nihánj, tzaj ne nana ya me nana nihánj, raj adonj. Dan me se sese vaa nica yo'o tinúú ní', ne nuvee chana amán rá ni'yaj man Jesucristó me no', tzaj ne taj che'é quiri'ij tinúú ní' man no', sese a'vej rá no' cane no' ga so' a. <sup>13</sup> Ne sese vaa chana ra'vij ní' chana amán rá ni'yaj man Jesucristó, ne nica no' ne amán rá ni'yaj man Jesucristó, tzaj ne cane no' ga so', ne taj che'é cunanj no' rihaan so', sese a'vej rá so' cane no' ga so' ma'. <sup>14</sup> Snó'o ne amán rá ni'yaj man Jesucristó ro', me rá Diose qui'yaj suun Diose nimán so' che'é nica so' chana ra'vij ní', ne chana ne amán rá ni'yaj man Jesucristó ro', me rá Diose qui'yaj suun Diose nimán no' che'é nica no' tinúú ní', ne che'é dan me cunu sa' ta'níi roj so' rihaan Diose, qui'yaj Diose vaa güii adonj. Sese se

qui'yaj Diose danj, ne sij yo'o tumé cacun' me ta'níi soj rihaan Diose asuun tzaj adonj. Nihánj me se che'é se sij amán rá ni'yaj man Diose me ma'an soj, ne ya uxrá cunu sa' ta'níi soj rihaan Diose vaa nanj adonj.

<sup>15</sup> Sese nica ní' ne amán rá ni'yaj man Jesucristó, ne me rá nica ní' ca'anj yanij yo' rihaan ní', ne ca'ne' cachrij rá ní' ca'anj nica ní' nanj ei. Gaa ya'núj rihaan ní' gaa nanj adonj. Sese ne amán rá nica ní' ni'yaj nica ní' man Jesucristó, ne taj che'é qui'yaj ní' fuerzá man nica ní' cane nica ní' ga ní' a ma'. 'O se canacúún Diose man ní' che'é rej dínj cumán ní' adonj.

<sup>16</sup> Asa' ne'én so' chana gaa xraj, ne ca'vee quinanií snó'o nica so' rihaan sayuun qui'yáa so' ga. Ne asa' ne'én so' snó'o quinanií chana nica so' rihaan sayuun qui'yaj uún so' ga.

<sup>17</sup> Veé ndaa se vaa 'o 'o ní' gaa canacúún Diose man ní' ca'na' ní' xrej so' ro', veé danj gaa ní' nanj á. 'O se nihánj me chrej narqué 'unj man daj a nij síi noco' man Jesucristó man daj a chuman' a. <sup>18</sup> Sese Diose me síi canacúún man síi aj taj ta'nga' man canoco' so' man so', gaa ne taj se 'yaj mei. Veé danj gaa quitaj ta'nga' man nij so' nanj ei. Ne veé danj vaa nij síi nuvi' ta'nga' táa man uún gaa canacúún Diose man nij so' canoco' nij so' man Diose uún, ne taj che'é guun rá nij so' cano ta'nga' man nij so' ma'. Veé danj gaa cachrij nij so' nanj ei. <sup>19</sup> Dan me se ca'vee se taj ta'nga' man ní', ca'vee se nuvi' ta'nga' táa man ní', ca'vee se, tzaj ne taj se 'yaj ma'. Maan se inanj no xcuún ní' cunó ní' nu' nana cataj xna'anj Diose rihaan ní' nanj adonj. <sup>20</sup> Veé ase vaa ní' gaa canacúún Diose man ní' canoco' ní' man Diose ro', veé danj gaa cayáán ní' rej rihaan ní' nanj ei.

<sup>21-22</sup> Dan me se sese mozó mé so' gaa canacúún Diose mán so' canocó' so' man Diose, ne se nanó rá so' ma'. 'O se mozó sij canacúún Diose man canoco' man Diose ro', nuveé mozó uun me so', ni'yaj Diose ma'. 'O se vaa ya'núj rihaan so' canoco' so' man

síi 'nij ra'a man ní' nanj adonj. Ne síi ne uun mozó gaa canacúún Diose man so' me se no xcuún so' guun so' mozó nuu rihaan Jesucristó yaj adonj. Tzaj ne sese gaa ya'núj rihaan mozó guun yanij so' rihaan ru'vee rii ta'nga' rihaan so', ne vaa che'é guun yanij so' chuguanj. <sup>23</sup> Sayuun ndo'o quiran' Diose gaa quiránj Diose man soj, ne che'é dan se ca'vej rá soj quirii ta'nga' rma'an yuvij rihaan soj a ma'. <sup>24</sup> Dan me se ase vaa cayáán ní' gaa canacúún Diose man ní' canoco' ní' man Diose ro', veé danj gaa cayáán ní' rej rihaan ní' che'é Diose, tinuj, nocoj.

<sup>25</sup> Cataj xna'anj 'unj rihaan nij soj che'é rej xcaj tuvi' ní', tinuj, nocoj. Nuveé nana cataj xna'anj síi 'nij ra'a man ní' rihaan ní' me nana nihánj, tzaj ne cunu 'ee rá síi 'nij ra'a man ní' manj, ne che'é dan me ca'ne' so' suun rihanj, ne che'é dan cataj xna'anj 'unj rihaan soj daj me raj, ne ca'vee guun nucuaj rá soj man nana nihánj nana cataj xna'anj 'unj rihaan soj a. <sup>26</sup> Dan me se vaj ní' quiran' ndo'o ní' sayuun rihaan chumii nihánj, ne che'é dan me sa' a doj sese cayáán ma'an snó'o ndaa vaa ne so' cuano, raj a.

<sup>27</sup> Dan me se sese vaa nica so', ne se nanó rá so' rej quirii'ij so' man nica so' ma'. Ne sese nuvi' nica so', ne se xcaj so' chana ma'. <sup>28</sup> Tzaj ne sese xcaj so' 'o chana, ne nuveé cacun' me yo' mei. Ne sese xcaj chana yaan man 'o snó'o, ne nuveé cacun' me yo' uún mei. Tzaj ne nij síi vaa nica ro', me se quiran' nij so' sayuun rihaan chumii nihánj, ne me raj quinanií soj rihaan sayuun yo' ei.

<sup>29</sup> Dan me se me raj quene'en soj se vaa nichrun' quisij güii ca'na' uún Jesucristó rihaan chumii nihánj, ne che'é dan me se nicaj raan ní' man rasuun man rihaan chumii nihánj ma'. 'O se ra'yanj navij nu' rasuun man rihaan chumii nihánj nanj ei. Dan me se síi vaa nica ro', ase vaa síi yaan ro', danj gaa so' cayáán so' á. <sup>30</sup> Ne síi nanó ndo'o rá ro', se ta'vee so' ma'. Ne síi niha' ndo'o rá ro', se

ca'nga' so' ma'. Ne síí naránj natu'vej ro', ase vaa síí nuvi' rasuun rihaan danj gaa so', ne inanj qui'yaj suun so' che'é Jesucristó á. <sup>31</sup> Ne síí 'yaj suun ga chumii nihánj ro', ase vaa síí ne achiin chumii nihánj rihaan ro', danj gaa so' á. 'O se vaj navij chumii nihánj, ne ino uxrá gaa chumii nihánj vaa güii nanj ei.

<sup>32</sup> Ne na'vej raj nano ndo'o rá nij soj ma'. Dan me se síí nuvi' nica vaa ro', inanj acaj so' cuentá daj qui'yaj so', ne guun niha' rá síí 'nij ra'a man ní' ni'yaj síí 'nij ra'a man ní' man so' a. <sup>33</sup> Tzaj ne síí vaa nica ro', me se acaj ndo'o so' cuentá che'é chumii nihánj daj qui'yaj so', gaa ne guun niha' rá nica so' ni'yaj no' man so', <sup>34</sup> ne uun vij rá so' a. Ne ase vaa snó'o ro', danj vaa chana uún, ne chana yaan do', chana ne vaa nica do', inanj che'é síí 'nij ra'a man ní' acaj no' cuentá, ne acaj ndo'o no' cuentá daj qui'yaj no' che'é rej inanj sa' uxrá gaa nee man no' do', nimán no' do', rihaan Diose a. Tzaj ne chana vaa nica ro', me se acaj ndo'o no' cuentá che'é chumii nihánj daj qui'yaj no', gaa ne guun niha' rá nica no' ni'yaj so' man no' a. <sup>35</sup> Maan che'é se inanj me raj cavii sa' soj me a'mij nana nihánj rihaan soj ei. Nuveé che'e se me raj caránj chrej rihaan soj daj qui'yaj soj me a'mij nana nihánj rihaan soj ma'. Maan che'é se me raj ve'é inanj qui'yaj soj ne yo'o canoco' sa' soj man síí 'nij ra'a man ní' ro', che'é dan ca'mij danj, ne na'vej raj guun vij rá soj a man adonj.

<sup>36</sup> Dan me se vaa ta'níí ta'aj soj chana yaan, ne sa' doj cane ma'an no' tucua soj, rá soj, tzaj ne sese chana yaan cachij me no' ne me ndo'o rá no' xcaj no' man snó'o, ne sese aj xcaj rej no' cuentá se vaa nanó rá no' 'yaj ma'an so', gaa ne ca'vee go' so' man no' rihaan snó'o, ne xcaj tuvi' roj so' ei. Dan me se sese se ca'vee quinaj uun no', rá rej no', ne no xcuún rej no' rque so' man no' adonj. Nuveé cacun' me yo' ma'. Ca'vee xcaj tuvi' chana yaan ga 'o snó'o ei. <sup>37</sup> Tzaj ne sese me ndo'o rá rej chana se vaa cane

no' tucua so', ne cane no', ne sese taj che'é xcaj chana man snó'o, ne guun nucuaj rej no' qui'yaj so' ndaa vaa me rá ma'an so' qui'yaj so' a. Cane ta'nij chana so' tucua so', qui'yaj so', ne sa' uxrá vaa 'yaj so' sese danj 'yaj so' ei. <sup>38</sup> Che'é dan me, síí o' ta'nij chana rihaan snó'o ro', sa' 'yaj so', ne síí na'vej rá go' ta'nij chana rihaan snó'o ro', me se sa' doj 'yaj so' adonj.

<sup>39</sup> No xcuún chana cayáan chana ga nica chana ndaa se cavi' so', tzaj ne sese cavi' nica chana, ne ca'vee xcaj chana man naj guun snó'o me rá ma'an no' xcaj no', tzaj ne no xcuún no' xcaj no' man síí noco' man síí 'nij ra'a man ní' a. <sup>40</sup> Tzaj ne sese quinaj uun no', ne ve'é doj gaa cane ma'an no' ei. Danj inanj vaa rá 'unj, ne ase vaa yaan Nimán Diose ga soj ro', danj vaa ne Nimán Diose ga 'unj uún nanj ei.

## 8

*Nana nihánj taj xna'anj se vaa se guun quiran' tinúú ní' sayuun, qui'yaj ní' ma'*

<sup>1</sup> Ne cataj xna'anj 'unj rihaan soj che'é nee aj cuta' nii rihaan ya'anj cacój yuvii a. Ne'en ní' se vaa síí acaj cuentá me cunudanj ní', ne nuveé se ya'anj tiha' me ne'en ní', ne ca'mii xta' ní' ma'. 'O se nij ndo'o vaa sese danj qui'yaj ní' adonj. Tzaj ne sese 'ee rá ní' man tinúú ní', ne racuíj ní' man tinúú ní', gaa ne cavii sa' tinúú ní' doj á. <sup>2</sup> Dan me se síí taj se vaa sa' uxrá ne'en ma'an so' ro', ataa doj narí' so' nana achiin man so' ei. <sup>3</sup> Tzaj ne sese ya aráj cochroj yo'o so' rihaan Diose, ne ya ne'en Diose man so' uún adonj.

<sup>4</sup> Dan me se cataj xna'anj 'unj rihaan soj se vaa ne nó xcuún ní' cha ní' nee cuta' nii rihaan ya'anj cacój yuvii a. Ne ya ne'en ní' se vaa taj se guun ya'anj cacój yuvii rihaan chumii nihánj ma'. Ne xa' Diose, tzaj ne oruun ya so' adonj. <sup>5</sup> Dan me se man ndo'o ya'anj noco' nij yuvii man rihaan chumii nihánj, ne tumé ya'anj yo' man nij yuvii, rá nij yuvii, ne ya'anj me yo', rá nij so', ne



ta'aj ya'anj yo' rii ta'nga' rej xta', ne yo'ó ta'aj ya'anj yo' rii ta'nga' rihaan yo'óó, rá nij so' a. <sup>6</sup> Ne xa' ní', tzaj ne ne'en ní' se vaa oruun ya Diose á. Rej ní' Diose me so', ne orún' so' me síi qui'yaj cunudanj rasuun man rihaan chumii nihánj, ne inanj che'é ma'an so' vaa i'na' ní' a. Ne vaa orún' síi 'nij ra'a man ní', ne Jesucristó cu'naj so', ne che'é so' curuvi' nu' rasuun man rihaan chumii nihánj, ne che'é so' cunuu i'na' cunudanj ní' ya adonj.

<sup>7</sup> Tzaj ne nuveé cunudanj tinúú ní' ne'en nana nihánj ma'. Tzaj ne 'o se vaa ta'aj nij so' canoco' man ya'anj cacój yuvií gaa rque, ne ta'aj nij tinúú ní' me se ne nucuaj nimán nij so', ne gaa chá nij so' nee cuta' nii rihaan ya'anj me se uun vij rá nij so' ni'yaj nij so' man nee yo', che'é se nee cuta' nii rihaan ya'anj me yo', rá nij so' a. Cacun' me cha' man nee cuta' nii rihaan yo', rá nij so', ne che'é dan me sese cha' nij tinúú ní' síi vaa danj rá man nee yo', ne quirí' rá nij so' nanj adonj. Dan me se qui'yaj nij so' cacun' rihaan Diose, rá nij so', ne che'é dan me no xcúún ní' racuíj ní' man tinúú ní', ne se chá ní' nee yo', sese cacun' me yo' rihaan tinúú ní' mei. <sup>8</sup> Nuveé che'e se chá ní' me cavii sa' ní' doj rihaan Diose ma'. Dan me se ca'vee se se chá ní' man nee yo' do', tzaj ne se quina'aan tiha' rque ní' do' a ma'. Ne ca'vee se cha' ní' man nee yo', tzaj ne se nari' nucuaj tiha' ní' do', qui'yaj nee yo' nanj ma'. Nuveé nee yo' me 'yaj vaa i'na' ní' a man adonj.

<sup>9</sup> Nda' se ca'vee cha' soj me ma'an rasuun, tzaj ne tadó soj se vaa maan che'é se chá quiran' tinúú soj cacun', qui'yaj soj á. <sup>10</sup> 'O se sese aj ne'en so' nu' rasuun nihánj, tzaj ne 'anj so' rej na'víj nii rihaan ya'anj cacój yuvií, ne ca'anj cayáán so' chá nee yo' ga' nij síi na'víj rihaan ya'anj yo', gaa ne ne'en tinúú so' síi ne nucuaj nimán, gaa ne dan me se ndaa a so' ndaa a ca'anj cayáán chá, gaa ne uun vij rá so' che'é se chá yo', gaa ne 'yaj so' cacun' rihaan síi 'nij ra'a man nij ma'an soj nanj adonj. <sup>11</sup> Dan me se

quirí' rá so' che'é se vaa qui'yaj soj nanj adonj. Dan me se ma'an soj me se guun ya' rá xa' soj cha' soj, tzaj ne tinúú soj síi ne guun ya' rá ro', me se quirí' so' gaa nanj adonj. Dan me se cavi' Jesucristó che'é tinúú soj, tzaj ne quirí' tinúú soj, qui'yaj ma'an soj, sese danj qui'yaj soj chuguanj. <sup>12</sup> Dan me se qui'yaj soj cacun' rihaan tinúú soj, ne quirí' rá so', qui'yaj soj, ne yo' me cacun' cutumé soj rihaan Jesucristó sese danj qui'yaj soj adonj. <sup>13</sup> Che'é dan me sese quiran' tinúú 'unj sayuun che'é nee chá 'unj, ne daj chihaa míj se chá 'unj nee, gaa ne se gaa nanj quiran' tinúú 'unj sayuun, qui'yáá 'unj a ma'.

## 9

*Nana nihánj taj xna'anj se vaa nda' se no xcúún Pabló ca'nee so' rasuun rihaan nij síi uno nana a'mii natáj so', tzaj ne ne 'yaj so' danj ma'. Maan se inanj me rá so' cavii sa' nij so' rihaan Diose a*

<sup>1</sup> Ne'en soj se vaa nuveé mozó uun mé 'unj ma'. Apóstol cune' Jesucristó man nata' se-nana so' rihaan cunudanj yuvií man rihaan chumii mej, ne quene'en yá 'unj man Jesucristó sij 'nij ra'a man ní', ne che'é suun qui'yaj suun 'unj canoco' ma'an nij soj man síi 'nij ra'a man ní' adonj. <sup>2</sup> Dan me se vaa yuvií taj se vaa nuveé ya' apóstol cune' Jesucristó man mé 'unj, tzaj ne ya' ne'en soj se vaa cune' Jesucristó man 'unj nata' 'unj se-nana so' rihaan soj, ne dan me se che'é se canoco' soj man síi 'nij ra'a man ní', che'é dan xcaj yuvií cuentá se vaa ya' cune' Diose man 'unj nata' 'unj rihaan yuvií che'é so' adonj. <sup>3</sup> Ne gaa achín na'anj nij yuvií manj sese ya' ya' cune' Diose manj, ne dan me se taj xna'anj 'unj rihaan nij yuvií se vaa ya' ya' canoco' nij soj man Jesucristó che'é nana natá' 'unj rihaan soj a.

<sup>4</sup> Che'é dan no xcúún núj cha' núj chraa á. No xcúún núj co' o núj á. <sup>5</sup> No xcúún núj xcaj núj man ra'vij núj ní' nocó' man Jesucristó, ca'anj no' me

rej ma'an ca'anj núj á. Ne'en soj se vaa nij tinúú sí 'nij ra'a man ní' do', sí cu'naj Pedró do', yo'ó nij apóstol cune' Jesucristó man nata' se-nana so' rihaan yuvii do', vaa nica 'o 'o nij so' a. <sup>6</sup> No xcúún núj nica'j núj sa'anj rque yuvii a. Me che'é vij ran' guee núj ga sí cu'naj Bernabé me sí 'yaj suun che'é rej quirí' núj sa'anj cha núj gaa chéé núj ga soj ga. Me che'é ne 'yaj núj ndaa vaa 'yaj yo'ó nij apóstol cune' Jesucristó man nata' rihaan yuvii che'é so', rá soj ga. <sup>7</sup> Tanuu ro', o' so' sa'anj che'é se vaa achiin rihaan ma'an so' na'. Taj, man tinuj, man nocoj. Maan se gobiernó rque nu' se vaa achiin rihaan tanuu yo' ei. Ne sí 'yaj suun naa ro', me se inanj 'yaj suun rma'an so' náa. Taj, man tinuj, man nocoj. Maan se me rá so' cha so' se achij man raa naa yo' ei. Ne sí tumé matzinj ro', cataj so' se vaa ne nó xcúún so' co'o so' stoo matzinj na'. Taj, man tinuj, man nocoj. 'O se anuu so' too, ne co'o so' ei. Ne danj vaa guee núj, raj, tinuj, nocoj. Vaa núj, ne no xcúún núj nica'j núj se vaa me rá soj rque soj rihaan núj nanj adonj.

<sup>8</sup> Nuveé nana avii raa yuvii me nana nihánj ma'. 'O cyaan a'mii se-tucuanj Moisés ga nana nihánj, ne: <sup>9</sup> "Se numíj so' tu'va scúj gaa 'yaj suun xo' gaa tuguáj che'é xo' 'núú trigó cunuu sa' 'núú trigó ma'", taj se-tucuanj Moisés yo' a. Inanj che'é scúj nanó rá Diose, rá soj na'. <sup>10</sup> Ase che'é ma'an ya ní' a'mii nana nihánj xa'. Che'é ma'an ya ní' a'mii nana nihánj ei. Sí uxra' yo'ó ro', me se no xcúún so' gaa nucuaj rá so' se vaa ya quirí' so' ta'aj se achij rihaan yo'ó yo', vaa güii ei. Ne sí rii tan' ro', no xcúún so' gaa nucuaj rá so' se vaa quirí' ma'an so' ta'aj tan' rii so' man rque naa yo' chuguanj.

<sup>11</sup> Ne ase vaa sí 'yaj suun yo'ó ro', danj vaa núj che'é soj, ne dan me se caxríj núj se-nana Diose nimán soj, ne cavii sa' nij soj nu' cavii nu' ca'anj, ne che'é dan, sese rque soj doj se chá man rihaan chumi' nihánj rihaan

núj, ne nuveé se ya'anj tiha' me yo' rihaan núj ma'. <sup>12</sup> Sese no xcúún yo'ó yuvii cha nij so' se vaa rque soj rihaan nij so', ne táa a núj, ne doj a no xcúún núj cha núj se vaa rque soj rihaan núj, raj a. Tzaj ne ne achín núj se chá rihaan soj ma'. 'O se chu'vi' núj se vaa guun rá yuvii se vaa a'mii natáj núj se-nana Diose che'é sa'anj do', che'é se chá do', ne se cuchumán rá nij yuvii cunó nij yuvii se-nana Diose nana sa', rá núj, ne che'é dan na'vej rá núj nica'j núj sa'anj che'é nana a'mii natáj núj ma'. 'O se a'vej rá núj quirán' núj me ma'an sayuun che'é se-nana Diose nanj adonj.

<sup>13</sup> Ne'en soj se vaa nij sí 'yaj suun rihaan Diose rque nuvií ro', chá nij so' ta'aj rasuun 'anj nica'j yuvii rque nuvií yo', ne nij sí racuíj man yuvii rque rasuun rihaan Diose ro', chá ma'an nij so' ta'aj rasuun yo', ne dan me se no xcúún nij so' cha nij so' rasuun yo' adonj. <sup>14</sup> Ne xa' núj sij nata' se-nana Diose nana sa' rihaan yuvii, tzaj ne cataj xna'anj sí 'nij ra'a man ní' rihaan ní' se vaa no xcúún núj qui'yaj núj se vaa 'yaj nij sí 'yaj suun rá nuvií yo', ne no xcúún núj cha núj se vaa rque yuvii rihaan núj che'é se-suun núj suun nata' se-nana Diose rihaan yuvii a. Danj taj sí 'nij ra'a man ní' adonj.

<sup>15</sup> Tzaj ne a 'ó güii ne qui'yáj danj ma'. Nuveé che'e se me raj rque soj rasuun rihanj me cachronj nana nihánj ma'. 'O se nda' se cavij, tzaj ne se guun raj daj chihaa míj rque soj sa'anj manj ma'. 'O se sí nucuaj nimán mej adonj. Sese cata'aa 'unj sa'anj, ne cataj yuvii se vaa tu'va rma'an 'unj taj 'unj se vaa se cata'aa 'unj sa'anj che'é se-suun 'unj suun a'mii natáj se-nana Diose nana sa', ne che'é dan daj chihaa míj se qui'yáj danj ma'. <sup>16</sup> Dan me se a'mii natáj 'unj se-nana Diose, tzaj ne se ca'mii xta' 'unj che'é suun yo' mei. Maan se suun ca'ne' Diose rihaan 'unj me suun yo', ne sese se ca'mii natáj 'unj se-nana Diose nana sa', gaa ne quirán' 'unj

cacun' nocoo ndo'o gaa nanj adonj. <sup>17</sup> Sese guun niha' raj qui'yaj sunj suun ca'ne' Diose rihanj, ne naru'vee Diose rihanj, tzaj ne ca'vee se ne gaa niha' raj qui'yaj sunj che'é Diose, tzaj ne daj chihaa mij se ca'ne' raj ga suun a'mii natáj se-nana Diose ma'. Maan se yo'o qui'yaj sunj nanj ei. <sup>18</sup> Ne me se naru'vee Diose rihanj, rá soj ga. 'O se inanj ca'vej rá Diose rque uun 'unj se-nana Diose rihaan yuvii, ne cunoo uun yuvii se-nana Diose nana sa' ca'mii natáj 'unj, ne se rque yuvii sa'anj rihanj ma'. No xcunj cachinj sa'anj rihaan yuvii cunoo nana sa', tzaj ne na'vej rá Diose qui'yáj danj ma'. Maan se cunoo uun nij yuvii, ne se luj rque Diose manj me nana yo' a. Se naru'vee yuvii rihanj ma'.

<sup>19</sup> Nuveé mozó mej rihaan yuvii ma'. A 'ó yuvii se guun nucuaq quirii ta'nga' rihanj, tzaj ne naqui'yaj yá 'unj mozó manj rihaan cunudanj yuvii, che'é se me raj cunuu rii ndo'o yuvii, ne cumán doj nij so' canoco' man Jesucristó adonj. <sup>20</sup> Dan me se gaa vaa 'unj sca'núj nij yuvii israelitá, gaa ne naqui'yaj manj ndaa vaa 'yaj ma'an nij so', gaa ne ca'vee canoco' nij so' se-tucuanj Jesucristó, che'é se me raj cunoo nij so' se-nana Jesucristó ei. Ase vaa nij síi nocoo' uxrá se-tucuanj Moisés ro', danj vaa ma'anj gaa taj xna'anj 'unj rihaan nij so' che'é Jesucristó ei. Taj che'é canoco' ma'anj se-tucuanj Moisés, tzaj ne maan che'é rej me raj cunoo nij so' se-nana Jesucristó me 'yáj danj nanj adonj. <sup>21</sup> Ase vaa nij síi ne nocoo' se-tucuanj Moisés ro', danj vaa 'unj gaa taj xna'anj 'unj rihaan nij so' che'é Jesucristó, che'é rej me raj cunoo nij so' se-nana Jesucristó, ne dan me se ne 'yáa 'unj naj guun se vaa me raj qui'yáj ma'. 'O se unoo 'unj rihaan Diose, ne unoo 'unj cunudanj nana cataj xna'anj Jesucristó rihaan ní' adonj. <sup>22</sup> Ase vaa nij síi ne guun ya rá se vaa a'vej rá Diose cha' nij so' naj guun rasuun ro', danj vaa ma'anj gaa tucu'yonj se-nana Diose rihaan nij so', che'é rej

me raj raan doj canoco' nij so' man Jesucristó ei. Dan me se ase vaa 'o 'o nij yuvii ro', danj vaa naqui'yáj man ma'anj gaa taj xna'anj 'unj rihaan 'o 'o nij so' che'é Jesucristó, gaa ne canoco' ta'aj 'o 'o nij yuvii man Jesucristó, qui'yáj adonj.

<sup>23</sup> Inanj danj 'yáa 'unj ga se-nana Diose nana sa', gaa ne cavii sa' ma'anj, qui'yaj se-nana Diose, raj a. <sup>24</sup> Ne'en soj se vaa nij síi unánj tico tuvi' ro', nucuaq unánj cunudanj nij so', tzaj ne orún' tuvi' nij so' 'yaj canaán, ne dan me se ase vaa 'yaj suun ndo'o síi 'yaj canaán ro', danj gaa soj qui'yaj suun soj che'é Jesucristó, gaa ne qui'yaj canaán soj, ne cavii sa' soj ei. <sup>25</sup> Dan me se síi me rá qui'yaj canaán gaa tico nii ro', tumé uxrá so' man ma'an so' daj qui'yaj so', ne se naj qui'yaj rma'an so' ma'. 'O se me rá so' guun nucuaq so' qui'yaj canaán so' 'o cachriin coj cunuú raa so', tzaj ne nuveé 'o cachriin coj gaa nu' cavii nu' ca'anj me yo' ma'. Maan se vaa güii canacoo yo' nanj adonj. Tzaj ne ino vaa se rque Diose man ní' sese qui'yaj canaán ní', ne dan me se se rque Diose man ní' ro', yo'o gaa yo' nu' cavii nu' ca'anj, ne che'é dan cutumé uxrá ní' man ma'an ní' ei.

<sup>26</sup> Xa' síi unánj tico tuvi', tzaj ne ne'en so' me rej cuchí' so', ne ne 'anj so' naj guun chrej ma'. Ne danj 'yaj guee 'unj nanj á. Dan me se ne'en yaj me rej cuchí' 'unj, ne che'é dan inanj 'yaj sunj adonj. Ne síi tico tuvi' cuxru', tzaj ne ne o' so' rihaan nana uun ma'. 'O se ne'en so' daj qui'yaj so', ne qui'yaj canaán so', ne ase 'yaj so' ro', danj 'yáj adonj. Ne'enj daj qui'yáj, ne qui'yaj cananj ni'yaj Diose, ne danj 'yaj guee 'unj nanj á. <sup>27</sup> Dan me se síi tico tuvi' cuxru' ro', me se o' so' man ma'an so', che'é se me rá so' gaa sca' nee man so', gaa ne qui'yaj canaán so' man tuvi' so' a. Uxrá tumé so' man nee man ma'an so', ne ase vaa tumé so' man ma'an so' ro', danj vaa tumej man ma'anj a. Dan me se ca'mii natáj 'unj rihaan yo'ó yuvii se

vaa canoco' nij so' man Jesucristó, ne na'vej raj cataj Jesucristó se vaa ne canoco' ya ma'anj man so' ma'.

## 10

*Nana nihánj taj xna'anj se vaa tadó uxrá ní' se vaa se qui'yaj ní' cacun' rihaan Diose, ne se na'víj ní' rihaan ya'anj cacój yuvií a*

<sup>1</sup> Me raj xcaj nij soj cuentá che'é xii núj sij israelitá nij síí cumán gaa naá, gaa ne quene'en soj me che'é canoco' raan ní' man síí 'nij ra'a man ní', tinuj, nocoj. Xii núj sij israelitá nij síí cumán gaa naá ro', me se caráán ngaa rihaan güii xráá cunudanj nij so', qui'yaj Diose, ne cachén sa' nij so' tanuu na ya'anj, ne canó nij so' ndaa rej xco na ya'anj, qui'yaj Diose, <sup>2</sup> ne gaa cachén nij yuvií israelitá rej caráán ngaa rihaan güii xráá nij so' do', gaa cachén sa' nij so' ndaa rej xco na ya'anj do', ne yo' me cata' ne nij so' vaa, ne cunuu rcua'aan nij so' ga síí cu'naj Moisés, ne canoco' cunudanj nij so' man Diose ga síí cu'naj Moisés ei. <sup>3</sup> Ne vaa se rqué Jesucristó rihaan nij so' chá cunudanj nij so', <sup>4</sup> ne vaa na rqué Jesucristó rihaan nij so' co'o cunudanj nij so', ne rqué Jesucristó cunudanj rasuun cachiin man nee man nij so' do', man nimán nij so' do', nanj adonj. Dan me se cachée Jesucristó ga nij so' me rej ma'an vaj nij so', ne ase vaa yujej quixra' cavii na co'o nij yuvií israelitá ro', danj vaa Jesucristó rihaan nimán nij so', rqué Jesucristó nu' se vaa cachiin man nimán nij so' adonj. <sup>5</sup> Tzaj ne ne guun niha' uxrá rá Diose ni'yaj Diose man que'ee nij so' ma'. Doj tzin' tuvi' nij so' me síí sa' rihaan Diose, ne che'é dan cavi' nu' yo'ó ta'aj nij so' rej tacaan, qui'yaj Diose ei.

<sup>6</sup> Xcaj raa ní' daj qui'yaj nij yuvií israelitá gaa naá, ne xcaj ní' cuentá daj qui'yaj ní' yo' yaj á. Dan me se guun ndo'o rá nij yuvií israelitá qui'yaj nij so' se nij, gaa ne quiran' nij so' sayuun, ne che'é dan xcaj ní' cuentá se vaa ne nó xcúún ní' guun

rá ní' qui'yaj ní' se nij ma'. <sup>7</sup> Dan me se quina'víj ta'aj nij so' rihaan ya'anj cacój yuvií, ne dan me se cayáán nij yuvií israelitá rej rihaan nij ya'anj yo', gaa ne chá nij so' chraa, gaa ne co'o nij so' na, gaa ne canicun' nij so', gaa ne qui' tico tuvi' nij so' ga tuvi' nij so' rihaan ya'anj yo', taj danj Diose a. Gaa ne quiran' ndo'o nij so' sayuun, che'é yan qui'yaj nij so' danj a. Dan me se xcaj ní' cuentá se vaa se quina'víj ní' rihaan ya'anj cacój yuvií ma'. <sup>8</sup> O se qui'yaj yo'ó ta'aj nij yuvií israelitá cacun' ga chana, ne dan me se cavi' ico va'nuj mój tuvi' nij so' rque 'o güii yo', qui'yaj cacun' yo' a. Che'é dan xcaj ní' cuentá se vaa se qui'yaj ní' danj ma'. <sup>9</sup> Ne ne cuchu'vi' nij yuvií israelitá qui'yaj nij so' cacun' ma'. Maan se guun rá nij so' quene'en nij so' sese ya ya qui'yaj Diose sayuun man nij so' che'é cacun' tumé nij so' a. Doj a qui'yaj nij so' cacun', tzaj ne cavi' que'ee nij so', qui'yaj xcuáá, ne che'é dan xcaj ní' cuentá se vaa se qui'yaj ní' danj ma'. <sup>10</sup> Ne ca'mii ta'aj nij so' nana nij rihaan Diose, se vaa ne ve'é qui'yaj Diose rihaan nij so' a. Ne che'é dan cavi' yo'ó ta'aj nij so', qui'yaj se-mozó Diose síí ca'née Diose rihaan nij so', ne che'é dan xcaj ní' cuentá se vaa se qui'yaj ní' danj ma'.

<sup>11</sup> Inanj danj quiran' nij yuvií israelitá nij síí cumán gaa naá, gaa ne cachrón nii nana nihánj che'é nij so' rihaan yanj, che'é yan xcaj ní' cuentá daj qui'yaj ní' yo' yaj a. Nichrun' quinavij chumii nihánj, ne che'é dan no xcúún ní' xcaj ní' cuentá daj qui'yaj ní' a. <sup>12</sup> Sese sa' uxrá noco' ní' man Jesucristó rá ní', ne tumé uxrá ní' man ní' se gaa nanj ca'anj yaníj ní' ne quiri' ní' a. <sup>13</sup> Xa' soj, tzaj ne ne cachén soj rihaan sayuun nocoo ndo'o ne guun nucuaj soj quiran' soj ma'. Maan se inanj sayuun le'ej nii 'vee guun nucuaj soj 'na' rihaan soj nanj adonj. Tzaj ne vaa che'é gaa nucuaj rá soj man Diose, gaa ne se gaa nanj ca'na' sayuun nocoo ndo'o rihaan soj ei. Tzaj ne asa' ca'na' sayuun



nocoo ndo'o rihaan soj, ne gaa nucuaj rá soj man Diose, ne racuíj so' man soj daj gaa qui'yaj soj, gaa ne quinanii soj rihaan chrej chi'ii yo', gaa ne se gaa nanj qui'yaj soj cacun' chuguanj. Dan me se daj chihaa mij se guun nucuaj sayuun nocoo yo' qui'yaj canaan yo' rihaan soj ma'. 'O se Diose racuíj nanj adonj.

<sup>14</sup> Che'é dan tumé uxrá soj man soj ei. Se quina'vúj soj rihaan ya'anj cacój yuvij, man tinuj, man nocoj. <sup>15</sup> Sí aj acaj cuentá me soj, raj, ne che'é dan me nuchruj raá soj nana a'mij á. <sup>16</sup> Dan me se gaa nuu chre' ní, ne vaa yo'o tazá na vinó rihaan ní, ne nago' ní graciá rihaan Diose che'é tazá se vaa che'é inanj orún' Diose gaa na vinó yo', ne ase vaa ton man Jesucristó ro', danj vaa na vinó yo' rihaan ní a. Ne ne'en ní se vaa cavi' Jesucristó che'é nu' nij tinuj ní a. Gaa ne uxra' ta'aj ní rachrúun, gaa ne chá taran' ní doj rachrúun yo', ne ase vaa nee man Jesucristó ro', danj vaa rachrúun yo' rihaan ní a. Ne ne'en ní se vaa cavi' Jesucristó che'é nu' nij tinuj ní a. <sup>17</sup> Dan me se orún' rachrúun vaa rihaan ní chá cunudanj ní a. Che'é dan me ase vaa orún' yuvij ro', danj vaa cunudanj nij tinuj ní a. <sup>18</sup> Ne xcaj soj cuentá se vaa ase vaa 'yaj ní' cuano ro', danj qui'yaj nij yuvij israelitá nij sí man gaa naá, chá cunudanj nij so' nee rqué nij so' rihaan Diose, ne che'é dan ase vaa orún' yuvij ro', danj vaa cunudanj nij so' rihaan Diose a.

<sup>19</sup> Xcaj nij soj cuentá ni'yaj soj nana a'mij á. Yu'va' chá' nee uta' nii rihaan ya'anj cacój yuvij na'. Taj ma'. Ya ya'anj me nij ya'anj cacój yuvij na'. Taj ma'. <sup>20</sup> Inanj me rá 'unj cataj 'unj se vaa nee uta' nii rihaan ya'anj cacój yuvij ro', nuveé Diose me sí rqué nii nee yo' rihaan ma'. Maan se rihaan nana chree rqué nii nee yo' nanj adonj. Ne na'vej raj guun tuvij soj ga' nij nana chree ma'. <sup>21</sup> Sese co'o soj na vinó che'é sí 'nij ra'a man ní, ne se ca'vee canicaj soj co'o soj na vinó che'é nij nana chree ma'. Se

guun co'o soj vij na yo' ma'. Sese chá soj chraa rihaan sí 'nij ra'a man ní, ne se ca'vee canicaj soj chá soj chraa rihaan nij nana chree ma'. <sup>22</sup> Sese danj qui'yaj ní, ne caxrii yuvaa sí 'nij ra'a man ní' man ní' nanj adonj. Che'é se sa' Diose, ne nano' ní daj qui'yaj ní, gaa ne ca'maan rá Diose ni'yaj Diose man ní' na'. Taj ma'. Sese danj qui'yaj ní, ne se guun nucuaj ní quinanii ní' rihaan so' a ma'.

<sup>23</sup> "Ca'vee qui'yaj naj guun se me raj á", taj ta'aj yuvij, ne ya vaa nana a'mii nij so', tzaj ne se cavii sa' ní' a doj, qui'yaj naj guun se 'yaj ní' ma'. Se cunuu sa' ní, qui'yaj naj guun se 'yaj ní' man chuguanj. <sup>24</sup> Se guun nano' ní se sa' gaa rihaan ma'an inanj ní' ma'. 'O se no xcuún ní' nano' ní' se sa' gaa rihaan yo'ó yuvij adonj. Danj qui'yaj ní, gaa ne cavii sa' doj ní' ei.

<sup>25</sup> Ca'vee chá soj naj guun nee ane' rihaan yu'vee, ne se nanó rá soj sese nee cuta' nii rihaan ya'anj cacój yuvij me nee yo' mei. Maan se chá uun soj ei. <sup>26</sup> Danj Diose taj se vaa nu' cachra' chumij do', cunudanj rasuun man rihaan chumij do', me si'yaj sí 'nij ra'a man ní' a. Danj taj danj Diose, ne taj che'é cuchu'vi' ní' chá ní' man si'yaj sí 'nij ra'a man ní' ma'.

<sup>27</sup> Sese nacúun yo'o sí ne amán rá ni'yaj man Jesucristó man soj chá soj chraa ga' so', ne ca'vee ca'anj soj chá soj ga' so', sese danj me rá soj, ne ca'vee chá soj naj guun rasuun rque so' chá soj ei. Se xcaj soj cuentá sese nee cuta' nii rihaan ya'anj cacój yuvij me nee yo' ma'. Chá soj cuaj ei. <sup>28</sup> Tzaj ne sese cataj xna'anj yo'o so' rihaan soj se vaa nee uta' nii rihaan ya'anj cacój yuvij me nee chá soj, ne se chá soj man nee yo' a mei. 'O se sí cataj xna'anj rihaan soj ro', ne guun ya' rá so' se vaa ca'vee chá soj nee yo', ne che'é dan me se guun chá soj a ma'. <sup>29-30</sup> Dan me se ne'en ma'an soj se vaa nuveé cacun' me chá soj nee yo' ma'. Tzaj ne tinúu soj sí cataj xna'anj rihaan soj ro', cacun' me chá' nee yo', rá so', ne che'é dan me se táa a se

chá soj nee yo' a man adonj. Ca'vee chá 'unj nee yo', raj, tzaj ne sese chá 'unj nee yo', gaa ne cuta' tinúú 'unj cacun' xráj, ne nda' se nago' 'unj gracia rihaan Diose che'é nee yo', tzaj ne cataj tinúj se vaa chi'ii vaa nimanj, ne na'vej uxrá raj ca'mii tinúj danj a ma'. Che'é dan me taj che'é chaj nee yo' ma'.

<sup>31</sup> 'O se veé danj qui'yaj soj uún ei. Dan me se nu' se chá soj do', nu' se co'o soj do', naj guun se qui'yaj soj do', inanj che'é Diose qui'yaj soj cunudanj nij rasuun yo', gaa ne ve'é doj ca'mii yuvii che'é Diose, qui'yaj soj chuguanj. <sup>32</sup> Tananj uún, ne se quinano rá nij yuvii israelita do', nij yuvii yanij do', cunudanj nij síi noco' man Jesucristó do', qui'yaj soj ma'. <sup>33</sup> Inanj danj 'yaj ma'anj, ne nu' se vaa me rá 'o 'o ta'aj yuvii qui'yáa 'unj ro', 'yáa 'unj, ne ne 'yáa 'unj inanj se me raj qui'yáa ma'. 'O se 'yáa 'unj ndaa vaa me rá nij yuvii nanj adonj. 'O se nanó' 'unj chrej cavii sa' cunudanj nij yuvii doj, gaa ne quinanii nij so' rihaan sayuun che'é se sa' yo' adonj. Inanj danj qui'yaj soj uún ei.

## 11

<sup>1</sup> Dan me se xcaj 'unj cuentá daj qui'yaj Jesucristó, ne inanj danj 'yáa 'unj, ne xcaj soj cuentá daj 'yáa 'unj, ne inanj danj qui'yaj soj uún ei.

*Nana nihánj taj xna'anj daj qui'yaj ní' gaa na'vii ní' rihaan Diose a*

<sup>2</sup> A'ó güii ne quini'yon nij soj manj, ne ve'é 'yaj soj nu' tucuáan tucu'yonj rihaan soj, ne che'é dan sa' uxrá qui'yaj soj á. <sup>3</sup> Me raj xcaj soj cuentá se vaa uun chij Jesucristó rihaan nu' snó'o, ne snó'o uun chij rihaan chana nica so', ne uun chij Diose rihaan Jesucristó a.

<sup>4</sup> Dan me se gaa achíin ni'yaj snó'o rihaan Diose do', gaa nata' so' se-nana Diose cunó cunudanj nij síi amán rá ni'yaj man Jesucristó do', ne sese caráán so' raá so', ne nij ndo'o 'yaj so' rihaan ma'an so' do', rihaan Jesucristó do', vaa ei. <sup>5</sup> Ne chana me

se gaa achíin ni'yaj no' rihaan Diose do', gaa nata' no' se-nana Diose cunó cunudanj nij síi cuchumán rá ni'yaj man Jesucristó do', ne sese se caráán no' raá no', ne nij 'yaj no' rihaan ma'an no' do', rihaan nica no' do', vaa ei. Ase vaa chana raá caan ro', vaa no', <sup>6</sup> sese se ca'vej rá no' caráán raá no' ei. Táa a se ca'vej cachrij rá no' caca caan nii raá no', sese ne na'aj no' gaa danj raá no' ei. Sese na'aj no', ne caráán no' raá no' adonj.

<sup>7</sup> Ne nó xcúún núj sno'o caráán núj raá núj ma'. 'O se ase vaa Diose ro', danj vaa ma'an núj sno'o, ne che'é dan ni'yaj yuvii man snó'o ne xcaj yuvii cuentá se vaa ve'é ndo'o vaa Diose síi qui'yaj man snó'o adonj. Ne ni'yaj yuvii man chana ne xcaj yuvii cuentá se vaa ve'é ndo'o vaa snó'o, che'é se cúu man snó'o ro', guun chana a. <sup>8</sup> Ne'en soj se vaa cúu man ma'an snó'o ro', cavii chana, ne nuveé cuj man chana cavii snó'o ma'. <sup>9</sup> Ne nuveé che'e chana me qui'yaj Diose man snó'o ma'. Che'e snó'o ro', me qui'yaj Diose man chana adonj. <sup>10</sup> Che'é dan no xcúún chana tijaan chana se vaa uun chij snó'o rihaan no', ne che'é dan caráán no' raá no', ne quene'en nij se-mozó Diose se vaa ve'é 'yaj no' ei.

<sup>11</sup> Tzaj ne ní' sij noco' man síi 'nij ra'a man ní' ro', se guun cataj ní' se vaa taj se uun snó'o rihaan chana, ne se guun cataj ní' se vaa taj se uun chana rihaan snó'o ma'. <sup>12</sup> 'O se che'e snó'o guun chana rihaan chumii nihánj, tzaj ne che'é chana me a'ngaa snó'o, ne Diose me síi qui'yaj man cunudanj ní' adonj. <sup>13</sup> Nuchruj raá ma'an soj daj qui'yaj soj á. Cunaj vaa cachinj ni'yaj chana rihaan Diose sese se caráán raá no', rá soj na'. Taj ma'. <sup>14</sup> Ne'en cunudanj yuvii se vaa sese gaa xcaan ndo'o yuvé raá snó'o, ne guun na'aj so', <sup>15</sup> tzaj ne sese xcaan yuvé raá chana, ne ve'é vaa no', rá yuvii a. Me rá Diose gaa xcaan yuvé raá chana, ne che'é dan me rqué Diose yuvé raá no', me rá Diose caráán yo' raá no' ei. <sup>16</sup> Sese

vaa 'o síi na'vej rá cunō nana nihánj, ne taj se qui'yaj ní a ma'. 'O se nuvi yo'ó tucuaán canoco' ní a ma'. 'O se veé nihánj me tucuaán noco' ní do', tucuaán noco' taran' nij síi amán rá ni'yaj man Jesucristó man cunudanj chuman' do', nanj adonj.

17 Vaa yo'ó nana cataj xna'anj uún 'unj rihaan soj, tzaj ne se cataj 'unj se vaa ve'é 'yaj soj ma'. Maan se nij 'yaj soj gaa nuu chre' soj, ne se cavii sa' soj, qui'yaj se vaa 'yaj soj ma'. Maan se nij doj cavii soj adonj. 18 Asino yaan cataj xna'anj 'unj rihaan soj che'é se vaa ne cuyaan vaa rá taran' soj a man chuguanj. Dan me se ca'na' nana rihanj, ne cunoj se vaa gaa nuu chre' soj, ne uun yanij ta'aj soj rihaan tuvi' soj, ne ino vaa rá ta'aj 'o 'o soj, ne xa' nana yo', tzaj ne nana ya ya me nana yo', raj nanj á. 19 'O se cunaj uxrá vaa cuxra' ta'aj soj man ma'an soj axee. Ne yaj me se xcaj ní' cuentá ni'yaj ní' me tuvi' soj me síi noco' ya man Jesucristó raá adonj. 20 Dan me se gaa nuu chre' soj, navij rá soj chá xti'no soj che'é síi 'nij ra'a man ní', rá soj, tzaj ne ino uxrá 'yaj soj, ne nuveé che'e ya síi 'nij ra'a man ní' chá xti'no soj ga tinúú soj a ma'. 21 Maan se che'é ma'an soj chá xti'no 'o 'o soj, ne dan me se ta'aa 'o 'o soj chá ma'an soj, ne na'vej rá soj go' soj chraa cha tinúú soj ma'. Che'é dan na'aan rque yo'o ta'aj tinúú soj, 'yaj soj ei. Ne yo'ó ta'aj soj me se uun xno soj ei. 22 Sese inanj me rá soj cha soj do', co'o soj do', ne me che'é ne quinān' soj tucua soj cha soj do', co'o soj do' ga. Taj vaj tucua soj vaa, don 'yaj soj danj na'. Nachri' soj ni'yaj soj man tinúú soj síi noco' man Jesucristó, don 'yaj soj danj na'. Me che'é me rá soj guun na'aj nij tinúú soj nij síi nique ga. Daj cataj 'unj rihaan soj, rá soj ga. Ca'vee cataj 'unj se vaa sa' uxrá 'yaj soj axee.

23 Dan me se cataj xna'anj síi 'nij ra'a man ní' rihanj daj qui'yaj ní' gaa cha xti'no ní' che'é so', ne aj cataj xna'anj 'unj nana yo' rihaan soj á. Dan me se gaa quisij güii tacuachén

síi cu'naj Judas man Jesucristó sijn 'nij ra'a man ní' rihaan nij síi taj ri'yunj man Jesucristó, gaa ne maan ti'nuu dan ro', nicaj síi 'nij ra'a man ní' rachruún, 24 ne nago' so' graciá rihaan Diose che'é rachruún yo', ne guun che'e so' cuxra' ta'aj so' man rachruún yo', gaa ne dan me se cataj so':

—Nihánj me nee manj, ne inanj che'é soj vaa nihánj adonj. Cha soj man nihánj, gaa ne yo'o cunuú rá soj manj á —taj Jesucristó rihaan nij síi noco' man so' a.

25 Gaa ne quisij chá xti'no nij so', gaa ne nicaj Jesucristó 'o copá nuu na vinó, gaa ne cataj uún so':

—Na vinó nihánj ro', me ton manj, ne che'é ton manj ro', rque naca Diose 'o nana rihaan soj daj qui'yaj Diose ga soj, ne me ma'an güii co'o soj na nihánj, ne na'nuj rá soj manj á —taj Jesucristó rihaan nij síi noco' man so' a.

26 Dan me se me ma'an güii cha soj rachruún yo' do', me ma'an güii co'o nij soj na vinó yo' do', ne tihaan soj rihaan taran' nij yuvii man rihaan chumii se vaa cavi' Jesucristó che'é soj, ne inanj danj qui'yaj soj ndaa se quisij güii ca'na' uún Jesucristó rihaan chumii nihánj a.

27 Che'é dan me sese nij 'yaj yo'o tinúú ní' gaa chá so' rachruún do', gaa 'o so' na vinó do', che'é síi 'nij ra'a man ní', ne tumé so' cacun', che'é yan 'yaj so' danj adonj. Tumé so' cacun' rihaan nee man síi 'nij ra'a man ní' do', rihaan ton man síi 'nij ra'a man ní' do', nanj adonj. 28 Che'é dan xcaj 'o 'o nij soj cuentá daj qui'yaj 'o 'o soj, gaa ne ve'é cha soj rachruún do', ve'é co'o soj na vinó do' á. 29 Sese ne acaj soj cuentá sese nee man síi 'nij ra'a man ní' me se chá soj, ne quirān' soj sayuun, ne sese ne acaj soj cuentá sese ton man síi 'nij ra'a man ní' me se 'o soj, ne quirān' soj sayuun ei. 30 Dan me se maan che'é se nij 'yaj soj rihaan síi 'nij ra'a man ní' ro', che'é dan aj ran' que'ee soj sayuun chuguanj. Dan me se ta'aj soj anó chi'ii man, ne yo'ó

ta'aj soj yo'ò inaj, ne yo'ò ta'aj soj aj cavi' nanj ei.

<sup>31</sup> Sese naqui'yaj cuu ní' che'é ma'an ní' daj vaa ní', gaa ne se qui'yaj síi 'nij ra'a man ní' sayuun ma'. <sup>32</sup> Tzaj maan che'é se nij 'yaj ní', rá síi 'nij ra'a man ní', ne che'é dan 'yaj so' sayuun man ní', che'é rej quinari' ní' daj qui'yaj ní' cavii sa' ní' adonj. Sese nari' sa' ní' chrej sa', gaa ne se quiran' ní' sayuun qui'yaj Diose, asa' qui'yaj so' sayuun man cunudanj yuvii man rihaan chumii nihánj, gaa güii qui'yaj Diose sayuun man nij so' ma'.

<sup>33</sup> Che'é dan, gaa nuu chre' soj cha soj, gaa ne na'vij soj ca'na' cunudanj tinúú soj, tinuj, nocoj. <sup>34</sup> Sese na'aan ndo'o rque yo'ò tuvi' soj ta' asuun, ne cha so' chraa tucua' so', gaa ne se quiran' soj sayuun che'é se vaa 'yaj soj gaa nuu chre' soj ei. Ne yo'ò nana xna'anj soj manj ro', cataj xna'anj 'unj nana yo' rihaan soj asa' cuchij chiháan soj ei.

## 12

*Nana nihánj taj xna'anj che'é suun sa' nicaj ní' 'yaj Nimán Diose a*

<sup>1</sup> Me raj xcaj soj cuentá che'é suun sa' nicaj ní' 'yaj Nimán Diose, tinuj, nocoj. <sup>2</sup> Ne'en soj se vaa gaa ataa canoco' soj man Diose, ne 'anj yanij soj rihaan Diose, ne chéé soj rihaan ya'anj acój yuvii, qui'yaj nii, ne náá qui'yaj rma'an nii man soj, tiha' yu'unj nii man soj ei. Ne nij ya'anj yo' me se ne uno nij yo' nana a'mii soj a man adonj. <sup>3</sup> Che'é dan xa' ní' sij noco' man Jesucristó nihánj me se ino 'yaj ní', ne che'é dan cataj xna'anj 'unj rihaan soj se vaa nda' se cataj yo'ò so' se vaa quij ndo'o vaa Jesucristó, tzaj ne nuveé nana rqué Nimán Diose rihaan so' me nana a'mii so' a ma'. Tzaj ne sese cataj yo'ò so' se vaa 'nij ra'a Jesucristó man ní', ne nana yo' me nana rqué Nimán Diose rihaan so', don a'vee a'mii so' danj adonj. Che'é se racuíj Nimán Diose man ní', che'é dan guun nucuaj ní' ca'mii ní' danj ei.

<sup>4</sup> Dan me se ino vaa 'ò 'ò suun sa' rqué Nimán Diose man ní' nicaj 'ò 'ò ní' chuguanj. Tzaj ne orún' Nimán Diose me síi rqué man 'ò 'ò suun sa' yo' ei. <sup>5</sup> Ne ino vaa 'ò 'ò suun 'yaj suun 'ò 'ò ní' rihaan tinúú ní' ei. Tzaj ne veé orún' síi 'nij ra'a man ní' me 'yaj nu' rasuun yo' ei. <sup>6</sup> Ne ino vaa suun 'yaj suun Diose nimán 'ò 'ò ní', tzaj ne veé orún' Diose 'yaj nu' daj a rasuun sa' yo' ei. Ne Diose me síi 'yaj suun nimán 'ò 'ò ní', ne inanj ma'an so' 'yaj don a'vee qui'yaj suun ní' ei.

<sup>7</sup> Dan me se vaa suun sa' nicaj 'ò 'ò ní', 'yaj Nimán Diose, ne che'é dan ne'en ní' se vaa yanj Nimán Diose ga ní', ne che'é suun sa' nicaj ní' ro', cavii sa' doj nu' nij tinuj ní', qui'yaj ní' adonj. <sup>8</sup> Dan me se yo'ò tinúú ní' a'mii nana cuu, 'yaj Nimán Diose, ne avii ndo'o raá yo'ò tinúú ní', 'yaj uún ma'an Nimán Diose, <sup>9</sup> ne yo'ò tinúú ní' me síi nucuaj ndo'o rá man Diose se vaa racuíj ndo'o Diose man ní', ne inanj danj vaa rá so', 'yaj uún ma'an Nimán Diose, ne uun nucuaj yo'ò tinúú ní' tinahuun so' man síi ran', 'yaj uún ma'an Nimán Diose, tzaj ne veé orún' Nimán Diose 'yaj nanj adonj. <sup>10</sup> Yo'ò tinúú ní' me síi uun nucuaj 'yaj suun sa' noco, ne yo'ò tinúú ní' uun nucuaj nata' nana rqué Diose rihaan, ne yo'ò tinúú ní' me síi uun nucuaj xcaj cuentá daj vaa nana a'mii 'ò 'ò ní', ne so' ro', me síi ne'en sese se-nana Nimán Diose a'mii ní' ni', ase se-nana síi chree a'mii ní' a. Dan me se ne'en so' nu' nana a. Ne vaa yo'ò tinúú ní' a'mii xna'anj naca xna'anj ne ne'en a ma'an nij so' ma'. Ne yo'ò tinúú ní' ro', me síi nata' daj ca'mii tinúú ní' síi a'mii xna'anj naca yo' a.

<sup>11</sup> Ne ma'an Nimán Diose me síi 'yaj uun nucuaj 'ò 'ò tinúú ní' qui'yaj suun tinúú ní' suun sa' nicaj so', ne orún' Nimán Diose me síi 'yaj suun nimán 'ò 'ò ní' nanj adonj. Ne'en Nimán Diose daj vaa 'ò 'ò ní', ne rqué so' rihaan 'ò 'ò ní' se vaa me rá so' rque so' man ní', ne dan me se ndaa ino vaa se rqué so' rihaan 'ò 'ò ní' a.



<sup>12</sup> Ne'en nij soj se vaa vaa orún' nee man ní', tzaj ne man que'ee rej 'yaj suun man ní' adonj. Man ra'a ní' do', man tacóo ní' do', man xréé ní' do', man rlij rihaan ní' do' a. Dan me se que'ee nee 'yaj suun man ní', tzaj ne orún' ní', ne ase vaa nee man orún' yuvij ro', danj vaa taran' ní' sij noco' man Jesucristó adonj. Dan me se 'o yuvij me ní' nanj ei. <sup>13</sup> Dan me se canoco' cunudanj ní' man Jesucristó, ne cayáan Nimán Diose ga 'o 'o ní', ne che'é dan cata' ne ní', gaa ne cunuu rcua'aan taran' ní', ne che'é dan ase vaa nee man orún' yuvij ro', vaa taran' ní' cuano nanj chuguanj. Ino vaa ta'aj 'o 'o ní', ne veé dan me se ta'aj ní' me yuvij israelitá do', ta'aj ní' me yuvij yanij do', ta'aj ní' me mozó do', ta'aj ní' ne uun mozó me do', tzaj ne ase vaa nee man orún' yuvij ro', vaa taran' ní' cuano, ne yanj ndo'o Nimán Diose ga cunudanj ní' cuano ei.

<sup>14</sup> Ne'en soj se vaa ne 'o cyaan vaa cunudanj nee man yo'o yuvij ma'. Maan se ino vaa 'o 'o rej 'yaj suun man yuvij adonj. <sup>15</sup> Dan me se ca'vee se guun rá tacóo ní' se vaa, che'é se na'vee qui'yaj suun yo' se-suun ra'a ní' ro', che'é dan naxuun yo' man ma'an yo' rihaan ní' cataj yo', tzaj ne se guun nucuaj yo' qui'yaj yo' danj ma'. 'O se nee man ma'an ní' me tacóo ní' nanj adonj. <sup>16</sup> Ne ca'vee se guun rá xréé ní' se vaa, che'é se na'vee qui'yaj suun yo' se-suun rlij rihaan ní', ne che'é dan naxuun yo' man ma'an yo' rihaan ní', tzaj ne se guun nucuaj yo' qui'yaj yo' danj ma'. 'O se nee man ma'an ní' me xréé ní' nanj adonj. <sup>17</sup> Ne vaa se uun nu' nee man ní' rihaan ní', ne sese inanj rlij rihaan ní' me nu' nee man ní', ne asa' ca'vee cunó ní', rá soj ga. Ne sese inanj xréé ní' me nu' nee man ní', ne asa' ca'vee naxuun ní' nana, rá soj ga.

<sup>18</sup> Diose me sí qui'yaj nu' nee man ní', ne Diose ro', me sí rqué suun rihaan 'o 'o nee man ní' daj qui'yaj nij yo' ei. <sup>19</sup> Sese cyaan gaa cunudanj nee man ní', ne nuveé yuvij me ní'

ma'. <sup>20</sup> Dan me se nda' se ino vaa 'o 'o nee man ní', tzaj ne ve'é vaa nu' nee man ní' ei. <sup>21</sup> Ne nó xcúun rlij rihaan ní' cataj yo' rihaan ra'a ní': "Taj se uún so' rihanj ma'". Se guun tu'va yo' danj ma'. Ne ne nó xcúun raa ní' cataj yo' rihaan tacóo ní': "Taj se uún so' rihanj ma'". Se guun tu'va yo' danj ma'.

<sup>22</sup> 'O se nee man ní' nee ninaj doj ro', doj a achiin nee yo' man ní', <sup>23</sup> ne nee man ní' nee nij doj ro', ve'é a doj niquee sa' yo', 'yaj ní', ne na'vej rá ní' quene'en yuvij man nee yo', ne che'é dan aráan ní' yatzij man nee yo' a. <sup>24</sup> Tzaj ne nee man ní' nee ve'é doj ro', taj se qui'yá' caráan ní' yatzij man nee yo' ma'. Ne ve'é ndo'o vaa rcua'aan nu' nee man ní', qui'yaj Diose, ne ve'é doj qui'yaj so' che'é nee man ní' nee cunii doj, <sup>25</sup> che'é rej na'vej rá so' gaa yanij nee yo' man ní' a. Maan se ve'é cutumé 'o nee man ní' man tuvi' nee man ní', rá Diose, <sup>26</sup> ne sese quiran' chi'ij doj nee man ní', ne nano rá nu' nee man ní', ne danj inanj uún, ne sese ve'é cavij sa' doj nee man ní', ne guun niha' rá nu' nee man ní' uún a.

<sup>27</sup> Yaj me se aj canoco' taran' soj man Jesucristó, ne che'é dan ase vaa nee man Jesucristó vaa cunudanj soj, ne ase vaa doj nee man Jesucristó vaa 'o 'o nij soj á. <sup>28</sup> Ne Diose ro', me sí cune' man 'o 'o soj qui'yaj suun soj che'é cunudanj nij sí noco' man Jesucristó, ne ino vaa suun ca'ne' Diose rihaan 'o 'o soj, ne dan me se asino cune' Diose man núj sij apóstol nata' se-nana so' rihaan cunudanj nij yuvij man rihaan chumij, gaa ne cune' uún Diose man nij sí nata' nana rqué Diose rihaan nij so' a. Gaa ne cune' uún Diose man nij sí tucuyón se-nana Diose rihaan yuvij, gaa ne cune' uún Diose man nij sí 'yaj suun sa' noco' a. Gaa ne cune' uún Diose man nij sí uun nucuaj tinahuun man yuvij ran', ne cune' uún Diose man nij sí racuj man yuvij quiran' sayuun a. Ne cune' Diose man nij sí uun chij rihaan nij sí noco' man Jesucristó, ne cune' Diose man nij sí ne'en ca'mij

xna'ánj naca a.

<sup>29</sup> Tzaj ne nuveé apóstol nata' se-nanā Jesucristó rihaan cunudanj yuvii man rihaan chumii me taran' soj ma'. Nuveé sij nata' nanā rque Diose rihaan nij so' me cunudanj soj ma'. Nuveé sij tucu'yón se-nanā Diose rihaan tinúú ní' me cunudanj soj ma'. Ne uun nucuaj cunudanj ní' qui'yaj suun ní' suun sa' nocoo ma'. <sup>30</sup> Ne uun nucuaj taran' soj tinahuun taran' soj man yuvii ran' ma'. Ne a'mii cunudanj soj xna'ánj naca ma'. Ne uun nucuaj taran' soj cataj xna'anj soj me taj nanā a'mii tinúú ní' gaa a'mii tinúú ní' xna'ánj naca ma'. <sup>31</sup> 'O se nano' soj daj qui'yaj soj, gaa ne ca'ne' Diose suun rihaan soj qui'yaj suun soj nij suun sa' doj á. Sese danj qui'yaj soj, ne cavii sa' taran' soj chuguanj. Tzaj ne me rá 'unj cataj 'unj yo'ó nanā rihaan soj, ne me ya raj nari' soj yo'ó tucuáan sa' inanj ei.

### 13

*Nanā nihánj taj xna'anj se vaa no xcuún ní' cunuú 'ee rá ní' man yuvii a*

<sup>1</sup> Dan me se ca'vee se ca'mij xna'ánj a'mii yuvii do', ca'vee se ca'mij xna'ánj a'mii se-mozó Diose do', tzaj ne sese ne 'ee raj tuvij, ne se guun niha' rá yuvii cunō yuvii nanā ca'mij ma'. Maan se tu'va rma'anj, cataj nij yuvii, ne ase uun gaa agüiin aga' do', ase uun gaa anó aga' do', ta'nga' danj vaa se-nanaj, cataj yuvii nanj á. <sup>2</sup> Ca'vee se ve'é ndo'o natá' 'unj nanā rque Diose manj do', ca'vee se ne'enj nu' nanā tihaan Diose rihaan yuvii do', ca'vee se sa' uxrá avii raj do', ca'vee se amán uxrá raj ni'yaj 'unj man Diose do', ca'vee se guun nucuaj natunaj rej nicun' 'o quij xcaan che'é se amán uxrá raj ni'yaj 'unj man Diose do', tzaj ne sese ne 'ee raj tuvij, ne taj se uún 'unj gaa a ma'. <sup>3</sup> Ca'vee se rque uun 'unj cunudanj si'yáj rihaan nij síi nique do', ca'vee se rque 'unj ndaa nee man ma'anj do', tzaj ne sese

ne 'ee raj man nij síi nique, ne se cavii sa' 'unj daj chihaa mój ma'.

<sup>4</sup> Ne ra'yanj rá síi 'ee rá man tuvi' qui'yaj so' sayuun man tuvi' so' ma'. Tzaj ne vaa inaj nimán so', ne 'ee rá so' man tuvi' so', ne inanj ve'é 'yaj so' rihaan tuvi' so' á. Ne uun xcoj ruvaa rá síi 'ee rá man tuvi' ni'yaj so' tuvi' so' ma'. Ne a'mii xta' so' ma'. 'O se nica' vaa nimán so' a. <sup>5</sup> Síi 'ee rá man tuvi' ro', inanj ve'é 'yaj so' rihaan tuvi' so', ne ne aráya'anj so' inanj ma'an so' ma'. 'O se aráya'anj so' tuvi' so' a. Ne ra'yanj rá so' caxrii yuvaa so' ma'. Ne nuú rá so' sayuun qui'yaj yuvii man so' gaa rque ma'. <sup>6</sup> Nuveé sij niha' rá ne'en man yuvii 'yaj cacun' me so' ma'. Tzaj ne niha' rá so' ne'en so' se vaa uno yuvii nanā ya a. <sup>7</sup> Uun nucuaj so' ran' so' naj guun sayuun, ne ne tanáj ma'an so' man tinúú so' ma'. 'O se yo'o amán rá so' uno so' cunudanj nanā sa', ne yo'o ne'en so' se vaa inanj sa' uxrá cavii ní' vaa güii, ne inanj danj vaa rá síi 'ee rá man tuvi' adonj.

<sup>8</sup> Xa' suun 'ee rá tuvi', tzaj ne yo'o gaa yo' nu' cavii nu' ca'anj ei. Cuanō nihánj me se man síi nata' nanā rque Diose rihaan nij so', tzaj ne vaa güii ca'ne' rá nij so' ga suun yo' ei. Ne cuanō nihánj me se man yuvii a'mii xna'ánj naca xna'ánj ne ne'en ma'an yuvii, tzaj ne vaa güii ca'ne' rá nij so' ga suun a'mii xna'ánj yo' a. Ne cuanō nihánj me se man síi avii ndo'o raá, 'yaj Nimán Diose, tzaj ne vaa güii se go' nij so' doj nanā rihaan yuvii a ma'. <sup>9</sup> Dan me se nu' nanā sa' a'mii ní' do', nu' nanā cuu avii raá ní' 'yaj Diose do', me se ta'aj guee nanā me yo' nanj adonj. Tzaj ne vaa güii quinavij yo' nanj adonj. <sup>10</sup> 'O se güii quinanj ní' rihaan Diose me se Diose me síi qui'yaj yo'o quene'en ní' cunudanj nanā, ne se cachiin a doj nanā ca'mii ní' a ma'.

<sup>11</sup> Gaa mej xnii me se a'mii xnii 'unj, ne daj se uun rá xnii, danj uun raj, ne daj se nuchruj raá xnii, danj nuchruj raá 'unj a. Tzaj ne yaj cachij 'unj, guún 'unj snó'o nocoo, ne tanáj xco 'unj nu' se vaa qui'yáj gaa mej xnii a.

Dan me se ase vaa se 'yaj inanj xni ro', danj vaa 'yaj ní' cuano, tzaj ne vaa güii tanáj xco ní' man nu' se vaa 'yaj ní' cuano á. <sup>12</sup> Vaa se ne'en ní' cuano, rá ní', tzaj ne ne ne'en sa' ní' man yo' ma'. Dan me se ase vaa yuvii ni'yaj rihaan 'o se ni'yaj rihaan ro', danj vaa ní', ne sese ne naruvii rihaan se ni'yaj rihaan, ne se quene'en sa' yuvii rihaan yuvii ma'. Ne danj vaa ní' uún, ne man ndo'o rasuun ne ne'en sa' ní' ei. Tzaj ne vaa güii canicun' ní' rihaan ma'an Diose, ne sa' uxrá quene'en ní' man ma'an so' a. Cuanó nihánj me se ne ne'enj cunudanj, tzaj ne vaa güii, ne ase vaa ne'en Diose manj ro', danj gaa quene'enj man cunudanj adonj. <sup>13</sup> Tzaj ne vaa va'núj suun sa' no xcuún ní' qui'yaj ní' cuano, ne dan me se guun nucuj rá ní' man Diose, ne guun ya rá ní' se vaa ya cavii sa' ní', ne gaa 'ee rá ní' tuvi' ní' a. Yo' me va'núj se no xcuún ní' qui'yaj ní', tzaj ne orún' suun gaa 'ee rá man tuvi' ro', yo' me suun nocoo doj rihaan cunudanj yo'ó suun ei.

## 14

*Nana nihánj taj xna'anj che'e xna'ánj naca xna'ánj ne ne'en ma'an yuvii a*

<sup>1</sup> Che'é dan yo'o gaa suun 'ee rá man tuvi' nimán soj ei. Tzaj ne nano' soj daj qui'yaj soj, ne nıcaj soj suun sa', qui'yaj Nimán Diose ei. Tzaj ne doj a guun rá soj nata' soj nana rqué Diose rihaan soj ei. 'O se sa' doj vaa suun yo' chuguanj. <sup>2</sup> Dan me se xa' sí a'mii xna'ánj naca, tzaj ne ne a'mii so' rihaan yuvii ma'. Rihaan Diose a'mii so', ne taj sí uno nana a'mii so' ma'. 'O se racuj Nimán Diose man so' a'mii so' nana tihaan Diose rihaan ma'an so' adonj. <sup>3</sup> Tzaj ne sí nata' nana rqué Diose rihaan, tzaj ne rihaan yuvii a'mii so', ne sa' doj xcaj nij yuvii cuentá daj qui'yaj nij yuvii canoco' nij yuvii man Diose, ne nari' nucuj nimán nij yuvii, qui'yaj so', ne se nanó rá nij yuvii ma'. 'O se guun niha' doj rá nij so' adonj. <sup>4</sup> Dan me se sí a'mii xna'ánj naca ro', orún' ma'an

so' noco' sa' doj man Diose, 'yaj so', tzaj ne sí nata' nana rqué Diose rihaan me se sa' doj noco' cunudanj nij sí amán rá ni'yaj man Jesucristó man Diose, 'yaj so' adonj. <sup>5</sup> Me raj ca'mii taran' soj xna'ánj naca, tzaj ne sa' doj nata' soj nana rqué Diose rihaan soj ei. Dan me se sa' doj 'yaj sí nata' se-nana Diose rihaan sí a'mii xna'ánj naca, tzaj ne sese guun nucuj sí a'mii xna'ánj naca cataj xna'anj so' rihaan nij yuvii me taj nana a'mii so' gaa uun che'e so' a'mii so' xna'ánj naca, ne sa' doj qui'yaj so', ne cavii sa' doj nij sí amán rá ni'yaj man Jesucristó, qui'yaj so', sese danj qui'yaj so' adonj.

<sup>6</sup> Cuno soj ca'mij, tinuj, nocoj, ne dan me se sese cuchı' 'unj rihaan soj, ne cuno soj sese inanj xna'ánj naca ca'mij rihaan soj, rá soj na'. Taj ma'. Me nana nari' soj, sese danj qui'yaj ga. Tzaj ne sese tihaan 'unj yo'o nana naca nana ca'mii Diose rihanj rihaan soj, ne cuno soj doj, ne sese cavii ndo'o raá 'unj do', sese nata' 'unj nana rqué Diose manj do', sese tıcu'yonj rihaan soj do', ne cuno sa' soj doj ei. <sup>7</sup> Dan me se ne'en soj daj vaa ya'ánj, ne ne vaa i'na' ya'ánj, tzaj ne vaa che'é agüiin sca' yo', ne sese ne tica'mii sca' nii man ya'aâ nuu rihaan ya'ánj yo' gaa anicaj 'o 'o chra', gaa ne asa' ca'vee xcaj yuvii cuentá me chra' me achraá nii rihaan ya'ánj yo' ga. <sup>8</sup> Sese ne tunacaj nii se-nana chruun a'yánj yo' gaa a'yánj nii, gaa ne asa' ca'vee xcaj nij tanuu cuentá se vaa ca'anj nij so' cunu' nij so' ga. <sup>9</sup> Ne ase vaa ya'ánj do', chruun a'yánj do', ta'nga' danj vaa nij soj uún, ne sese ca'mii soj xna'ánj naca, ne sese se gaa nica nana ca'mii soj, ne asa' ca'vee cuno yuvii me taj soj ga. 'O se se ca'mii soj rihaan yuvii a ma'. Maan rihaan nana un ca'mii soj, raj a.

<sup>10</sup> Dan me se man uxrá xna'ánj a'mii yuvii rihaan chumii nihánj, raj, ne vaa yuvii uno cunudanj nij xna'ánj yo', <sup>11</sup> tzaj ne sese ca'mii yo'o so' xna'ánj a'mii ma'an so' rihanj, ne sese

se cunoj nana ca'mii so', gaa ne sij 'na' yo'ó chuman' guun so' rihanj, ne tananj 'unj, ne guun 'unj sij 'na' yo'ó chuman' rihaan so' a.

<sup>12</sup> Che'é dan me xcaj soj cuentá daj qui'yaj ma'an soj uún, ne dan me se guun rá soj nicaj soj suun sa', qui'yaj Nimán Diose, tzaj ne nano' soj daj qui'yaj soj, ne ca'vee nicaj soj suun sa' doj suun racuuj man cunudanj yo'ó nij sí amán rá ni'yaj man Jesucristó, qui'yaj Nimán Diose a. 'O se cavii sa' soj doj, sese danj qui'yaj soj adonj.

<sup>13</sup> Che'é dan me sese vaa yo'ó tinúú soj sí a'mii xna'ánj naca, ne no xcúun so' cachinj ni'yaj so' rihaan Diose se vaa guun nucuaj so' cataj xna'ánj so' me taj nana ca'mii so' rihaan nij yuvii cuno nana yo' adonj. <sup>14</sup> Tzaj ne sese ca'mii 'unj xna'ánj naca cachinj ni'yáa 'unj rihaan Diose, ne inanj maan nimán 'unj me cachinj ni'yaj rihaan Diose, ne cúu yavej, tzaj ne se cachín ni'yaj yo' rihaan Diose a ma'.

<sup>15</sup> 'O se me se no xcúun 'unj qui'yaj ga. 'O se no xcúun 'unj asino yaan cachinj ni'yaj rihaan Diose ga nimanj, gaa ne cachinj ni'yaj cúu yavej uún rihaan Diose, ne asino yaan cachraa 'unj chra' rihaan Diose ga nimanj, gaa ne nu' cúu yavej cachraa chra' uún rihaan Diose adonj. <sup>16</sup> Danj qui'yaj soj che'é se asa' nuu chre' soj cachinj ni'yaj soj rihaan Diose, ne 'na' nij sí ataa nari' sa' se-nana Diose a. Ne sese inanj nimán so' cachinj ni'yáa so' rihaan Diose do', sese inanj nimán so' nago' so' graciá rihaan Diose do', sese inanj nimán so' cataj se vaa sa' vaa Diose do', ne asa' ca'vee cuno sí 'na' naca nana ca'mii so' ga. Asa' ca'vee cataj so' se vaa ya uxrá vaa nana ca'mii so' ga. <sup>17</sup> Ca'vee se ve'é uxrá gaa nana cachinj ni'yáa so' rihaan Diose, tzaj ne yo'ó so' ro', se ca'vee guun niha' rá so', qui'yáa so' ma'.

<sup>18</sup> Nagó' 'unj graciá rihaan Diose che'é se xcaan vaa xna'ánj naca a'mij rihaan taran' nij soj, che'é se 'unj me sí ne'en doj xna'ánj naca rihaan taran' soj a. <sup>19</sup> Tzaj ne gaa nuu chre' 'unj ga nij tinúú ní' nij sí amán rá

ni'yaj man Jesucristó, ne no xcúun ca'mij nana avii cúu yavej rihaan nij so', ne dan me se ca'vee se chi' mij nana xna'ánj naca ca'mij, tzaj ne se cavii sa' doj tinúj, qui'yaj nana yo' a ma'. Tzaj ne sese ca'mij nuj se 'un' guee nana cavii cúu yavej rihaan tinúú ní', tzaj ne cavii sa' nij so' doj, qui'yaj nana yo', che'é se nana uno nij so' me yo' ei.

<sup>20</sup> Gaa sca' raaj nij soj, tinuj, nocoj. Se gaa raaj soj ase vaa raaj 'o xnii ma'. Dan me se ase vaa ne'ej ataa nari' qui'yaj cacun' ro', danj gaa soj, tzaj ne gaa sca' raaj soj ei. <sup>21</sup> Dan me se vaa nana no rihaan danj Diose taj se vaa: "Ca'nej 'unj yuvii man gan' cuchí' rihaan nij yuvii israelitá, ne yo'ó xna'ánj quinata' nij so' rihaan nij yuvii israelitá, tzaj ne se cuno nij yuvii israelitá nana ca'mij rihaan nij so' ma'." Danj cataj Diose rihaan nij yuvii israelitá gaa naá a. <sup>22</sup> Dan me se xcaj ní' cuentá se vaa nuveé che'e ma'an ní' sij amán rá ni'yaj man Jesucristó vaa xna'ánj naca xna'ánj ne ne'en a 'ó yuvii yo' ma'. 'O se che'é nij sí ne amán rá ni'yaj man Jesucristó vaa xna'ánj naca yo', ne dan me se cuno nij so' xna'ánj naca, gaa ne xcaj nij so' cuentá se vaa nuveé sij noco' man Diose me ma'an nij so' a. Ne se-nana Diose nana nata' nii ro', nuveé che'e nij sí ne amán rá ni'yaj man Jesucristó vaa nana yo' ma'. 'O se che'é ní' sij amán rá ni'yaj man Jesucristó vaa nana yo' adonj.

<sup>23</sup> Dan me se sese inanj xna'ánj naca ca'mii taran' soj gaa nuu chre' soj, ne catuu nij sí ataa nari' sa' tucuaán noco' ní' catuu sí ne amán rá ni'yaj man Jesucristó catuu rá ve' ga nij soj, ne daj cataj nij so', rá soj ga. Se cuno nij so' xna'ánj ca'mii soj a ma'. Che'é dan: "Snúú rma'an nij soj", cataj nij so' nanj adonj. <sup>24</sup> Tzaj ne sese nata' taran' soj nana rqué Diose rihaan soj, ne catuu nij sí ataa nari' tucuaán noco' ní' catuu nij sí ne amán rá ni'yaj man Jesucristó catuu rá ve', gaa ne xcaj nij so' cuentá che'é cacun' tumé nij so', qui'yaj taran' soj, ne



quinano rá nij so' che'é cacun' tumé nij so', qui'yaj taran' soj chuguanj. <sup>25</sup> Cuno nij so' nana ca'mii taran' soj, gaa ne xcaj nij so' cuentá che'é nu' se chi'ii man nimán nij so', ne ca'anj canicun' ruj nij so', gaa ne na'vij nij so' rihaan Diose, ne cataj ya nij so' se vaa ya Diose ne ga soj ei.

<sup>26</sup> Che'é dan nihánj me cataj xna'anj 'unj rihaan soj daj qui'yaj soj, tinuj, nocoj. Gaa nuu chre' soj, ne ino gaa se qui'yaj 'o 'o soj ei. Yo'o tinúú soj cachraa 'o chra', ne tucu'yón yo'ó tinúú soj se-nana Diose rihaan soj, ne nata' yo'ó tinúú soj nana rqué Diose rihaan so', ne ca'mii yo'ó tinúú soj xna'ánj naca, ne cataj xna'anj yo'ó tinúú soj me taj nana ca'mii tinúú soj sí ca'mii xna'ánj naca, ne inanj danj qui'yaj soj, racuj taran' soj man tinúú soj, gaa ne ve'é doj canoco' sa' soj man Jesucristó a.

<sup>27</sup> Sese vaa vij va'núj soj me rá ca'mii xna'ánj naca, ne ca'vee ca'mii nij so', tzaj ne sese que'ee soj doj me rá ca'mii, gaa ne se ca'vee ma'. 'O se dínj tu'va ta'aj soj, gaa ne canicun' yo'ó tuvi' soj nata' so' me nana me ca'mii nij sí ca'mii xna'ánj naca yo' á. <sup>28</sup> Tzaj ne sese taj vaj a 'o soj guun nucuaj nata' che'é nana ca'mii nij sí ca'mii xna'ánj naca, ne táa a se se ca'mii nij so' xna'ánj naca rihaan yuvii a ma'. Maan se dínj gaa tu'va nij so' gaa nuu chre' soj á. Inanj rihaan ma'an nij so' do', rihaan Diose do', ca'mii nij so' xna'ánj naca yo' á.

<sup>29</sup> Dan me se veé danj qui'yaj guee soj asa' nata' soj se-nana Diose uún a. Nata' vij va'núj tinúú soj, sí rqué Diose se-nana so' rihaan, ne nuchruj raa yo'ó tinúú soj nana nata' nij so', sese ya ya se-nana Nimán Diose me nana nata' nij so' a. <sup>30</sup> Sese nata' yo'ó so', ne sese guun rá yo'ó so' nata' so' yo'ó nana rqué Diose rihaan ma'an so', ne ca'ne' rá sí nicun' a'mii yo' ca'mii yo'ó tinúú so' á. <sup>31</sup> Veé dan me se gaa ya'núj rihaan taran' soj, ne ndaa yo'o yo'o soj nata' nana rqué Diose rihaan soj, ne nari' cunudanj

soj nana achiin man soj, gaa ne nari' nucuaj nimán taran' soj a. <sup>32</sup> Sese uun nucuaj nij sí nata' nana rqué Diose rihaan nij so' quirii ta'nga' nij so' rihaan nimán ma'an nij so', ne uun nucuaj nij so' ca'ne' rá nij so' ga nana a'mii nij so' adonj.

<sup>33-34</sup> Dan me se xa' Diose, tzaj ne nuveé sij tinachej rasuun me Diose ma'. 'O se Diose ro', me sí 'yaj nica vaa nu' rasuun adonj.

Dínj gaa tu'va chana gaa nuu chre' nij soj sij amán rá ni'yaj man Jesucristó á. Ne nó xcúún chana ca'mii chana ma'. Maan se danj nano xrej no' á. Inanj danj taj se-tucuanj Moisés, ne inanj danj vaa tucuaán noco' cunudanj ní' sij sa' noco' man Diose man daj a chuman' a. <sup>35</sup> Sese vaa 'o nana me rá chana nari' no', ne xna'anj no' man snó'o nica no' ve' tucua no', ne cataj xna'anj so' rihaan no' a. Tzaj ne nij vaa sese canicun' chana ca'mii no' rihaan cunudanj nij sí amán rá ni'yaj man Jesucristó gaa nuu chre' nij so' adonj.

<sup>36</sup> Nuveé nana cavii raa nij soj me se-nana Diose ma'. Nuveé inanj soj me sí cuhi' se-nana Diose rihaan ma'. Che'é dan me xcaj soj cuentá daj vaa tucuaán noco' núj sij amán rá ni'yaj man Jesucristó á. <sup>37</sup> Sese guun rá yo'o so' se vaa ne'en so' nata' so' nana rqué Diose rihaan so' do', sese guun rá so' se vaa yanj Nimán Diose ga ma'an so' do', ne xcaj so' cuentá se vaa nana nihánj nana cachrón 'unj che'é soj ro', nana cataj xna'anj ma'an sí 'nij ra'a man ní' rihaan ní' me nana nihánj a. <sup>38</sup> Sese vaa yo'o sí taj se vaa nuveé nana cataj xna'anj sí 'nij ra'a man ní' me nana nihánj, ne se cuchumán rá ní' se vaa sij nata' se-nana Diose me ma'an so' ma'. <sup>39</sup> Che'é dan me nano' uxrá soj daj qui'yaj soj, ne guun nucuaj soj nata' soj nana rqué Diose rihaan soj, tinuj. Ne se cataj soj se vaa se ca'vee ca'mii yuvii xna'ánj naca mei. <sup>40</sup> Tzaj ne ve'é inanj qui'yaj soj nu' se vaa 'yaj soj, ne chij inanj qui'yaj soj nu' se-suun Diose ei.

## 15

*Nana nihánj taj xna'anj se vaa cunuu i'na' ya uún Jesucristó gaa cavi' so', ne danj gaa cunuu i'na' ya ma'an ní' uún a*

<sup>1</sup>Yaj me se me raj na'nuj rá soj nana cataj xna'anj 'unj rihaan soj, tinuj, nocoj. Dan me se nana sa' aj natá' 'unj rihaan soj asij rque me nana nihánj, ne cuno soj nana nihánj, ne raan noco' soj man nana nihánj a. <sup>2</sup>Dan me se che'e nana nihánj nana natá' 'unj rihaan soj me quinani soj rihaan sayuun, sese yo'o raan canoco' soj nana nihánj ei. Tzaj ne sese tu'va rma'an soj do', sese ne ya noco' soj nana sa' nihánj do', ne se cavi sa' soj ma'. Maan se quiran' soj sayuun nanj adonj.

<sup>3</sup>'O se asino yaan nataj nana sa' nari' 'unj rihaan soj, ne nana cataj xna'anj nii rihanj me nana nihánj, se vaa cavi' Jesucristó che'é cacun' tumé ní', ndaa vaa taj danj Diose a. <sup>4</sup>Dan me se cachin' nii man so' rque yo'óo, gaa ne dan me se cachén va'nuj güii, ne cunuu i'na' uún so', ne dan me se ase vaa tu'va guee danj Diose vaa quiran' so' a. <sup>5</sup>Dan me se curuvi' so' ni'yaj sí cu'naj Pedró, ne gaa doj, gaa ne curuvi' uún so' ni'yaj nu' chuvij nij apóstol cune' so' man nata' se-nana so' a.

<sup>6</sup>Cachén doj güii, gaa ne curuvi' uún so' rihaan 'un' cientó táa doj tinúú ní' sí noco' man so' a. Dan me se ta'aj nij so' cavi', tzaj ne yo'ó ta'aj nij so' vaa i'na' cuano ga ní' a. <sup>7</sup>Gaa ne cachén doj, gaa ne curuvi' uún Jesucristó ni'yaj sí cu'naj Santiago, ne veé dan, gaa ne curuvi' uún so' ni'yaj cunudanj nij apóstol cune' so' man nata' se-nana so' a. <sup>8</sup>Veé dan, gaa ne curuvi' uún so' ni'yaj ma'anj a. Sí noco' xcó taran' nij sí quene'en man so' mej, ne ase vaa 'o ne'ej ni'ya' vaa 'unj rihaan nij so' nanj ei. 'O se ne nó xcúún 'unj guún 'unj apóstol rihaan nij so' a ma'.

<sup>9</sup>'O se gaa ataa canocoj man Jesucristó, ne qui'yaj ndo'oj sayuun man nij sí cuchumán rá ni'yaj man

Jesucristó, ne che'é dan yaj mej sí noco' rihaan cunudanj nij apóstol cune' Jesucristó man nata' se-nana so' a. Che'é dan nuveé sij no xcúún nata' rihaan yuvij che'é so' mej, raj a ma'. <sup>10</sup>Tzaj ne sa' uxrá qui'yaj Diose che'ej, ne racuíj ma'an Diose manj, ne che'é dan mej apóstol cuano adonj. Nuveé se qui'yaj rma'an Diose danj manj ma'. 'O se 'unj nihánj ro', me sí 'yaj suun doj rihaan cunudanj nij apóstol cune' Jesucristó man, tzaj ne nuveé ma'anj 'yaj suun ma'. 'O se che'é se racuíj Diose manj ro', che'é dan 'yá danj, ne ma'an Diose 'yaj danj adonj. <sup>11</sup>Ne a'mii natáj 'unj a'mii natáj yo'ó nij apóstol cune' Jesucristó man a'mii natáj se-nana Diose nana sa', ne che'é se ca'mii natáj cunudanj nuj rihaan soj, che'é dan cuchumán rá soj cuno soj nana sa' yo' ei.

<sup>12</sup>Dan me se ne'en soj se vaa a'mii natáj nuj se vaa cunuu i'na' uún Jesucristó gaa cavi' so', ne che'é dan me che'é taj ta'aj yuvij 'nij sca'núj soj se vaa se ca'vee cunuu i'na' uún nij sí cavi' ga. <sup>13</sup>Sese ya se ca'vee cunuu i'na' uún nij sí cavi', gaa ne me che'é cunuu i'na' uún Jesucristó, rá soj ga. <sup>14</sup>Sese ya ne cunuu i'na' uún Jesucristó, gaa ne tu'va rma'an nuj gaa a'mii natáj nuj aj na'. Amán rma'an rá soj ni'yaj soj nana ne a'mii nuj gaa aj na'. <sup>15</sup>Aj cataj xna'anj nuj rihaan soj se vaa cunuu i'na' uún Jesucristó, qui'yaj Diose, tzaj ne sese se ca'vee cunuu i'na' uún nij sí cavi', gaa ne ne cunuu i'na' uún Jesucristó vaa gaa na'. Sí ne me nuj, ne ca'mii ne nuj che'é ma'an Diose vaa gaa aj na'. <sup>16</sup>'O se sese se ca'vee cunuu i'na' uún nij sí cavi', gaa ne ne cunuu i'na' uún Jesucristó vaa gaa a ma'. <sup>17</sup>Ne sese ya ne cunuu i'na' uún Jesucristó, ne nana amán rá soj yo' ro', nana tiha' yu'unj me yo' vaa gaa asanj. Ne quiran' ma'an soj sayuun che'é nu' cacun' tumé soj, <sup>18</sup>ne nij sí cavi' sí cuchumán rá ni'yaj man Jesucristó me se cuchumán rma'an rá nij so', ne ca'anj nij so' rihaan ya'an vaa gaa

nanj asanj. <sup>19</sup> Ne ní' sij guun ya rá se vaa cavii sa' ní' qui'yaj Jesucristó me se doj a quij quiran' ní' rihaan daj a nij yuvii man rihaan chumii nihánj vaa gaa asanj. Dan me se che'é se nana tiha' yu'unj noco' ní', gaa ne doj a quij quiran' ní' vaa gaa ei.

<sup>20</sup> Tzaj ne, taj ma'. 'O se ya uxrá cunuu i'na' uún Jesucristó gaa cavi' so' adonj. Che'é se cunuu i'na' uún so' ro', che'é dan ne'en ya ní' se vaa cunuu i'na' uún nij sí cavi' cuchumán rá ni'yaj man so' adonj. <sup>21</sup> Dan me se che'é se orún' snó'o me qui'yaj cavi' cunudanj yuvii man rihaan chumii ro', che'é dan orún' snó'o me qui'yaj cunuu i'na' uún yuvii adonj. <sup>22</sup> Dan me se che'é se vaa qui'yaj orún' sí cu'naj Adán ne cavi' taran' yuvii ro', veé danj qui'yaj Jesucristó, ne che'é orún' so' ro', me cunuu i'na' uún cunudanj yuvii noco' man so' adonj.

<sup>23</sup> Tzaj ne ndaa 'o 'o orá quisij 'o 'o rasuun adonj. Dan me se Jesucristó me sí cunuu i'na' asino yaan rihaan cunudanj yuvii, gaa ne güii ca'na' uún so' rihaan chumii nihánj ro', me se asino nij sí cuchumán rá ni'yaj man so' cunuu i'na' uún ei. Dan me se quisij cunuu i'na' taran' nij sí noco' man so', <sup>24</sup> gaa ne quinavij nu' chumii nihánj a. Dan me se asino yaan ca'nee Jesucristó nu' suun ata taran' nij yuvii do', taran' nij ya'anj uun chij rihaan chumii nihánj do', gaa ne nago' Jesucristó nu' chumii nihánj rihaan Rej ní' Diose, gaa ne ma'an Diose guun chij rihaan chumii nihánj adonj. <sup>25</sup> 'O se no xcúún Jesucristó guun chij Jesucristó rihaan chumii nihánj ndaa se qui'yaj canaán ya ya so' rihaan taran' nij sí taj ri'yunj man so' adonj. <sup>26</sup> 'O se sí taj ri'yunj man Jesucristó me se 'yaj avi' yuvii, ne dan me se yo'o qui'yaj canaán Jesucristó rihaan se 'yaj avi' yuvii, gaa ne quisij quinavij cunudanj nij sí taj ri'yunj man Jesucristó ei.

<sup>27</sup> Danj Diose taj se vaa qui'yaj canaán Jesucristó rihaan cunudanj rasuun, qui'yaj Diose a. Danj a'mii

danj Diose, tzaj ne se guun chij Jesucristó rihaan ma'an Diose ma'. 'O se Diose me sí qui'yaj guun chij so' rihaan cunudanj yo'ó nij rasuun adonj. <sup>28</sup> Asa' guun chij Jesucristó rihaan nu' rasuun qui'yaj Diose, ne guun chij Diose rihaan ma'an Jesucristó, ne dan me se qui'yaj canaán Jesucristó rihaan cunudanj rasuun, qui'yaj Diose, gaa ne guun chij Diose rihaan ma'an so', gaa ne Diose me sí guun chij ndo'o rihaan cunudanj rasuun adonj.

<sup>29</sup> Sese se cunuu i'na' sí cavi', gaa ne me che'é ata' ne nii che'é 'o xnangá, rá soj ga. Sese se cunuu i'na' ya uún nij sí cavi', gaa ne ata' ne rma'an nii che'é sí cavi' a. Tzaj ne 'o se ya uxrá cunuu i'na' uún nij sí cavi', rá nii ei. <sup>30</sup> Me che'é niganj vaj núj rihaan sayuun che'é se-nana Diose, rá soj ga. <sup>31</sup> Ya inanj danj vaj núj rihaan sayuun, tinuj, nocoj. Ne'en soj se vaa niha' ndo'o rá núj che'é suun 'yaj suun núj sca'núj soj che'é sí 'nij ra'a man ní', ne dan me se ya taj xna'anj 'unj rihaan soj se vaa maan na'vij núj 'o 'o güii cavi' núj che'é se-nana Diose ei. <sup>32</sup> Quiran' ndo'oj sayuun chuman' Efeso, ne dan me se ase vaa sayuun ran' sí unu' ga xcuu yuvaa ro', ta'nga' danj vaa sayuun quiranj, ne me che'é qui'yaj danj, rá soj, sese yuun che'e cavij ga. 'O se qui'yaj suun uun 'unj vaa gaa nanj ei. Sese ya uxrá se cunuu i'na' uún nij sí cavi', gaa ne doj a ve'é sese canoco' ní' nana a'mii yuvii man rihaan chumii nihánj chuguanj. Dan me se yuvii man rihaan chumii nihánj taj: "Daj doj quisij güii cavi' ní' á. Che'é dan cha ní' chraa do', co'o ní' tzi' do', yaj gaa vaa i'na' ní' á", taj nij yuvii man rihaan chumii nihánj yuvii ne guun ya rá se vaa cunuu i'na' uún ní' a. Tzaj ne ne 'yaj núj danj ma'. 'O se ne'en ya núj se vaa cunuu i'na' ya uún nij sí cavi' adonj.

<sup>33</sup> Ca'ne' rá soj ga suun tiha' yu'unj man ma'an ei. Nda' se sa' vaa nimán soj, tzaj ne sese cachee soj ga sí chi'ii, ne nuu chi'ii nimán soj, qui'yaj nij

so' ei. <sup>34</sup> No xcuún soj xcaj naca soj cuentá, ne ca'ne' rá soj ga suun 'yaj cacun' ei. 'O se ta'aj soj me síí ne ne'en uxrá daj vaa Diose, raj a ma'. 'O se vaa che'é guun na'aj soj chuguanj.

*Nana nihánj taj xna'anj daj quiran' ní' güii cunuu i'na' uún ní' a*

<sup>35</sup> Tzaj ne vaa yuvij cataj: “Asa' ca'vee cunuu i'na' uún nij síí cavi' ga. Daj gaa nee man nij so' asa' cunuu i'na' uún nij so' ga”, taj nij yuvij, xna'anj nij yuvij a. <sup>36</sup> Tzaj ne síí ni'yón mé so', sese danj a'mii so' chuguanj. Ne'én so' daj ran' 'núú unô so' ei. Asino yaan uchruu 'núú yo' rque yo'óó, gaa ne xtun' ma'an 'núú yo', gaa ne xra' naa le'ej man 'núú yo' a. Sese se cuchruu 'núú yo' rque yo'óó, ne daj chihaa mij se xra' naa ma'. 'O se ase vaa ran' 'núú gaa unô nii man yo' rque yo'óó ro', danj gaa quiran' ní' adonj.

<sup>37</sup> Ne sese cunô so' yo'ô caân 'núú trigó do', naj guun caân do', rque yo'óó, ne nuveé ma'an coj me se caxrij so' rque yo'óó ma'. Maan se caân me yo', tzaj ne síj xra' yo', gaa ne nahuun yo' coj adonj. <sup>38</sup> Tzaj ne ino vaa coj xra' man 'o 'o caân, ne ase vaa me rá Diose gaa 'o 'o coj ro', ta'nga' danj vaa 'o 'o coj xra', 'yaj Diose adonj. <sup>39</sup> Ne ne 'o cuyaán vaa nu' nee ma'. 'O se ca'vee se nee man yuvij do', ca'vee se nee man xcuu do', ca'vee se nee man xtâj do', ca'vee se nee man xcuaj do', tzaj ne ino vaa a'ngaa 'o 'o nij nee yo' adonj. <sup>40</sup> Ne man rasuun rej xta', ne man rasuun rihaan yo'óó, ne ino doj vaa rasuun man rej xta' ga rasuun man rihaan yo'óó nihánj, tzaj ne ve'é uxrá vaa cunudanj nij rasuun yo' ei. <sup>41</sup> Dan me se ve'é vaa güii do', ve'é vaa yavii do', ve'é vaa yati' do', tzaj ne ino vaa ruvi' 'o 'o nij rasuun yo' gaa ni'ya' man nij yo', ne veé danj ino vaa 'o 'o nij yati' uún chuguanj.

<sup>42</sup> Dan me se ase vaa ino vaa 'o 'o nij rasuun yo' ro', vaa 'o 'o ní' uún chuguanj. Ne nee man ní' asa' quisij cunuu i'na' uún ní' me se ino gaa nee

yo' ga nee man ní' cuano chuguanj. Ne nee man ní' cuano, tzaj ne daj doj cavi' yo', ne vaa güii cavi' ní', gaa ne cachin' nii man nee man ní' rque yo'óó, gaa ne cunuu ino yo' ei. Tzaj ne asa' cunuu i'na' uún ní', gaa ne daj chihaa mij se cavi' uún nee man ní' a ma'. <sup>43</sup> Xa' nee man ní' cuano, tzaj ne nij vaa yo', tzaj ne asa' cunuu i'na' uún ní', ne inanj ve'é ndo'o gaa nee man ní' asa' cunuu i'na' uún ní' ei. Tzaj ne cuano me se taj se 'yá' guun nucuaj yo' ma'. Tzaj ne asa' cunuu i'na' uún ní', ne gaa nucuaj ndo'o nee man ní' adonj. <sup>44</sup> Nee man uun rihaan chumij nihánj cuano me ní', tzaj ne asa' cunuu i'na' uún ní', ne nee yo'ô canoco' sa' man Diose guun nee man ní' adonj. Dan me se sese ne'en ní' se vaa ya vaa nee man ní' cuano, ne veé danj ya uxrá gaa yo'ô nee sa' man ní', qui'yaj Diose ei. Ne nee yo' me yo'ô canoco' sa' man Diose chuguanj.

<sup>45</sup> Ne danj Diose taj se vaa snó'o qui'yaj Diose asino yaan me síí cu'naj Adán, ne gaa tihaj qui'yaj Diose man so' me se ca'née Diose nana vaa i'na' rque nee man so' a, taj danj Diose a. Dan me se ase vaa síí cu'naj Adán ro', danj vaa síí cu'naj Jesucristó, tzaj ne ino doj vaa Jesucristó, ne dan me se gaa cunuu i'na' uún Jesucristó, ne cunuu ino un' nee man so', ne dan me se 'vee vaa i'na' ndaa ma'an ní', 'yaj so' a. Ne che'é dan cunuu i'na' uún taran' ní' chuguanj. <sup>46</sup> Tzaj ne asino yaan vaa nee man ní' gaa man ní' rihaan chumij nihánj, gaa ne vaa güii, gaa ne ma'an ní' nicaj nee sa' doj yo' a. <sup>47</sup> Xa' snó'o qui'yaj Diose asino yaan, tzaj ne yo'óó uun guun so' a. Dan me se nicaj Diose yo'óó man rihaan chumij nihánj, qui'yaj Diose man so', tzaj ne xa' yo'ô snó'o, tzaj ne Jesucristó me so', ne so' me síí cavii rej xta' ca'na' rihaan ní' adonj. <sup>48</sup> Ne ase vaa síí cu'naj Adán síí guun yo'óó ro', ta'nga' danj vaa cunudanj yuvij man rihaan chumij nihánj, tzaj ne ase vaa Jesucristó síí cavii rej xta' ro', ta'nga' danj vaa cunudanj yuvij yanj



rej xta' nanj á. <sup>49</sup> Gaa mán ní' rihaan chumiij nihánj me se ase vaa Adán síi guun yo'óo ro', danj vaa ma'an ní', tzaj ne vaa güii, ne ase vaa Jesucristó síi cavii rej xta' ro', ta'nga' danj gaa ní' adonj.

<sup>50</sup> Cuanó nihánj me se cataj xna'anj 'unj rihaan nij soj se vaa se guun nucaj nee man ní' do', ton man ní' do', cúu man ní' do', cayáan yo' ga Diose asa' guun chij Diose rihaan chumiij nihánj, man tinuj, man nocoj. 'O se se guun cumán rasuun cuchruu ga rasuun ne uchruu mei.

<sup>51</sup> Tzaj ne cataj xna'anj 'unj rihaan nij soj yo'o nana yuve tihaan naca Diose rihanj, se vaa se cavi' taran' ní' ma'. 'O se vaa güii, ne rque orún' orá le'ej nii yuun che'e cunuu ino taran' ní', <sup>52</sup> ne dan me se daj se uun rá' gaa nanij doj yuvé scu'lu' rihan' ro', danj guun un doj rá' asa' quisij orá cunuu ino ní' nanj adonj. Dan me se güii quinavij chumiij nihánj me se nu' ca'yanj se-mozó Diose chruun a'yanj, ne cunuu ino taran' ní' nanj adonj. 'O se asa' ca'yanj so' chruun a'yanj, ne cunuu i'na' nu' nij síi cavi', tzaj ne ino gaa nij so', ne se cavi' uún nij so' daj chihaa míj gaa a ma'. Dan me se quisij cunuu i'na' nij síi cavi', gaa ne cunuu ino taran' ní' sij gaa i'na' rihaan chumiij nihánj adonj.

<sup>53</sup> Sese ase vaa ní' cuanó nihánj ro', danj gaa ní' ca'anj ní' rihaan Diose, rá ní', gaa ne se ca'vee daj chihaa míj ma'. 'O se vaa che'é asino cunuu sa' nee man ní', gaa ne ca'vee quinán' ní' rihaan Diose adonj. Dan me se che'é se nichrun' cavi' nee man ní', che'é dan vaa che'é cunuu sa' yo', ne daj chihaa míj se cavi' yo' gaa a ma'.

<sup>54</sup> Dan me se asa' nanó nee se cavi' uún xráá ní', gaa ne daj chihaa míj se cavi' nee man ní' a ma'. 'O se güii dan ro', quisij ya nu' nana nihánj nana no rihaan danj Diose nana taj: "Sa' uxrá qui'yaj canaán ní', ne daj chihaa míj se cavi' ní' a ma'. 'O se quisij ní' qui'yaj canaán ní' rihaan ta'naj 'yaj avi' yuvií adonj. <sup>55</sup> Me rej vaj ta'naj 'yaj avi' yuvií ga. Me rej vaj se nucaj

so' ga. Yaj me se se nanó rá ní' se vaa quirán' uún ní' sayuun ma'. 'O se daj chihaa míj se cavi' ní' ma'. 'O qui'yaj canaán ya ní' adonj", taj danj Diose, ne quisij ya nu' nana yo' adonj. <sup>56</sup> Se nucaj ta'naj 'yaj avi' ní' ro', me cacun' tumé ní' adonj. Ne che'é se-tucuanj Moisés qui'yaj ní' cacun', <sup>57</sup> tzaj ne tinavij Jesucristó sij 'nij ra'a man ní' cacun' tumé ní', ne dan me se ya qui'yaj canaán ní', qui'yaj Diose, ne che'é dan no xcúun ní' nago' ní' graciá rihaan Diose ei.

<sup>58</sup> Ne'en soj se vaa 'ee raj man soj, tinuj, nocoj. Che'é se vaa cataj 'unj rihaan soj ro', che'é dan raan canoco' soj man Jesucristó á. Se ca'ne' rá soj ma'. 'O se niganj qui'yaj suun ndo'o soj che'é síi 'nij ra'a man ní' á. Ne'en soj se vaa suun 'yaj suun soj che'é síi 'nij ra'a man ní' ro', nuveé suun snúu rma'an me yo' ma'. 'O se cavii sa' soj che'é se noco' sa' soj man so' adonj.

## 16

*Nana nihánj taj xna'anj che'é sa'anj naqui'yaj chre' nij síi man chuman' cu'naj Corinto rque nij so' man nij síi nique man chuman' cu'naj Jerusalén a*

<sup>1</sup> Cataj xna'anj 'unj rihaan nij soj che'é sa'anj naqui'yaj chre' soj rque soj man nij síi nique síi sa' noco' man Diose á. Dan me se qui'yaj soj ndaa se vaa cataj xna'anj 'unj rihaan nij síi amán rá ni'yaj man Jesucristó yanj estadó Galacia, <sup>2</sup> ne rque 'o 'o cotungó ro', ca'nej sa' soj doj sa'anj tucua' soj che'é nij síi nique á. Sese nocoj doj qui'yaj canaán yo'o soj, ne nocoj doj ca'nej sa' soj, ne sese doj doj qui'yaj canaán yo'ó soj, ne doj doj ca'nej sa' soj á. Ve'é cutumé soj sa'anj yo' ndaa se cuchí' 'unj chiháan soj á. 'O se na'vej raj naqui'yaj chre' soj sa'anj ndaa güii cuchí' 'unj ma'. 'O se güii yo' aj naqui'yaj chre' soj sa'anj, raj ei. <sup>3</sup> Asa' cuchí' 'unj rihaan soj, ne go' soj sa'anj naqui'yaj chre' soj man tinúu soj síi me rá soj nica' sa'anj yo' a. Ne tinúu soj síi nica' sa'anj yo' ro', ca'anj nica' nij so' sa'anj yo'

ndāa chuman' Jerusalén a. Ne me raj n̄icaj nij so' yanj cartá ca'an̄j nij so', ne yanj cartá yo' ro', cataj xna'an̄j yo' rihaan nij síi man Jerusalén se vaa vaj sa'an̄j yo' rihaan nij so', 'yaj nij tinúú ní' a. <sup>4</sup> Sese vaa che'é ca'an̄j ma'an̄j chuman' Jerusalén, ne n̄icaj tuvi' núj ca'an̄j núj a.

*Nana nihánj taj xna'an̄j me güii cuchì' Pabló chuman' cu'naj Corinto a*

<sup>5</sup> Cachèn 'un̄j estadó Macedonia, gaa ne cuchì' 'un̄j chiháán soj a. Se guun raan 'un̄j estadó Macedonia ma'. <sup>6</sup> 'O se xraj, ne carán' 'un̄j chiháán soj que'ee güii, tzaj ne ne ne'enj sese canej gaa soj nu' yavii ayuu yu've' man adonj. 'O se veé maan chiháán soj me raj cavii 'un̄j ca'an̄j 'un̄j adonj. <sup>7</sup> Na'vej raj cachèn ra'yanj uún 'un̄j chiháán soj ma'. 'O se me raj guun raan 'un̄j que'ee güii, sese ca'vej síi 'nij ra'a man ní' danj gaa adonj. <sup>8</sup> Tzaj ne me raj cunuú 'un̄j chuman' Efeso nihánj ndaa se cachèn ya cha'an̄j Pentecostés adonj. <sup>9</sup> 'O se vaa ndo'o rej rihanj qui'yaj sunj se-suun Diosé, tzaj ne 'o se man ndo'o síi taj ri'yunj man ní' chuman' yo' ei.

*Nana nihánj taj xna'an̄j che'é nij tinúú Pabló síi canoco' man Jesucristó a*

<sup>10</sup> Tzaj ne sese cuchì' síi cu'naj Timoteo rihaan soj, ne ve'é ca'mii soj ga so', gaa ne guun niha' rá so' ga soj ei. 'O se 'yaj suun so' che'é síi 'nij ra'a man ní', ne ase vaa 'yaj sunj ro', ta'nga' danj vaa 'yaj suun ma'an so' che'é síi 'nij ra'a man ní' adonj. <sup>11</sup> Se nachri' soj ni'yaj soj man so' ma'. Maan se dínj cumān soj ga so', ne ve'é račuúj soj man so' yan ca'na' uún so' rihanj nihánj á. Na'vij uxraj ca'na' uún so' ga yo'ó nij tinúú ní' adonj.

<sup>12</sup> Ne tinúú ní' síi cu'naj Apolos me se cataj xna'an̄j ndo'oj rihaan so' se vaa cuchì' so' ga yo'ó nij tinúú ní' rihaan soj, tzaj ne ne ca'vej so' cuchì' so' cuano mei. Tzaj ne ndaa güii quix'núj rihaan so' asuun, gaa ne cuchì' so' rihaan soj a.

<sup>13</sup> Tumé soj man soj á. Raan canoco' soj man Jesucristó á. Gaa nucuaj nimán soj, ne 'o ca'nej nimán soj qui'yaj suun soj á. <sup>14</sup> Ne gaa 'yaj suun soj nu' suun vaa rihaan soj, ne uxrá gaa 'ee rá soj man tinúú soj á.

<sup>15-16</sup> Ne'en nij soj man nij tucua tinúú ní' síi cu'naj Estéfanos se vaa nij so' me síi cuchumán rá ni'yaj man Jesucristó asino yaan rihaan cunudan̄j nij yuvii man estadó Acaya a. Ne ca'neé nimán ma'an̄j nij so' qui'yaj suun nij so' račuúj nij so' man nij síi sa' nocó' man Diosé á. Cuanó nihánj me se cataj xna'an̄j 'un̄j rihaan soj se vaa ve'é cunó soj rihaan cunudan̄j yuvii 'yaj suun ndaa vaa 'yaj suun nij so', tinuj, nocoj. Ne cunó uún soj rihaan cunudan̄j nij síi a'neé ndo'o nimán qui'yaj suun ga nij so' ei. <sup>17</sup> Guun niha' ndo'o raj se vaa ca'na' ma'an̄j síi cu'naj Estéfanos do', síi cu'naj Fortunato do', síi cu'naj Acaico do', ei. Dan me se guun niha' uxrá raj gaa ca'na' va'nuj nij síi nihánj rej nej, ne gaa quene'enj man nij so', ne ndaa ma'an̄j ya soj quene'enj nda' rá se 'yaa raj nanj ei. 'O se nayón nij so' rihaan soj ei. <sup>18</sup> Dan me se nuu cuij nimanj, qui'yaj nij so', ne dan me se nuu cuij nimán ma'an̄j soj, qui'yaj uún nij so' a. 'O se nij yuvii vaa danj me se no xcúún ya soj caraá cochroj soj rihaan nij so' nanj adonj.

*Nana nihánj taj xna'an̄j che'é saludó a'neé nij síi amán rá ni'yaj man Jesucristó a'neé ma'an̄j Pabló a'neé a*

<sup>19</sup> Cunudan̄j nij síi amán rá ni'yaj man Jesucristó man estadó Asia a'neé saludó rihaan soj, ga síi cu'naj Aquila do', chana cu'naj Priscila do', taran' nij síi amán rá nuu chre' tucua roj so' do', a'neé ndo'o saludó rihaan soj a. <sup>20</sup> Dan me se cunudan̄j nij tinúú ní' a'neé saludó rihaan nij soj ei. Gaa nari' tuvi' soj, ne ve'é ndo'o ca'mii soj ga tinúú soj, ne go' soj 'o xto guee rihaan tinúú soj asa' nari' tuvi' soj ei.

<sup>21</sup> A'neé ma'an̄j saludó do' rihaan soj uún ei. Nihánj me nana cachrón

ma'anj ra'aj ya rihaan yanj nihánj adonj.

<sup>22</sup> Sese vaa yo'o tuvi' soj ne amán rá ni'yaj man sí 'nij ra'a man ní', ne quene'en soj se vaa ya quiran' sí vaa danj sayuun nanj chuguanj. Ya ca'na' uún sí 'nij ra'a man ní' ei.

<sup>23</sup> Me rá 'unj qui'yaj ndo'o Jesucristó sij 'nij ra'a man ní' se luj che'é soj ei. <sup>24</sup> Ne se sa' 'ee rá yuviij nuu nimanj 'yaj Jesucristó me se a'néj rihaan soj cunuû nimán soj ei.

**Nihánj me síj vij yanj  
cartá qui'yaj síi cu'naj  
Pabló ca'neé so'  
rihaan nij yuvij noco'  
man Diose yanj  
chuman' cu'naj  
Corinto a**

<sup>1</sup> Unj me síi cu'naj Pabló sij apóstol cune' Jesucristó man nata' se-nana so' rihaan yuvij, ndaa vaa me rá ma'an Diose qui'yaj a. Yanj tinú' Timoteo gaj, ne 'yaj núj yanj nihánj ca'nej núj rihaan soj sij noco' man Diose yanj chuman' cu'naj Corinto, ne ca'nej núj yanj nihánj rihaan cunudanj yo'ó nij soj sij sa' noco' man Diose yanj nu' estadó cu'naj Acaya uún a. <sup>2</sup> Dan me se me rá núj qui'yaj ndo'o Rej ní' Diose do', Jesucristó sij 'nij ra'a man ní' do', se luj che'é nij soj, ne me rá núj gaa xej nimán soj qui'yaj roj so' a.

*Nana nihánj taj xna'anj se vaa quiran' ndo'o nij tuví' Pabló sayuun, tzaj ne tinanii Diose man nij so' rihaan sayuun yo' a*

<sup>3</sup> Ve'é ndo'o vaa Diose ei. Se-Diose Jesucristó sij 'nij ra'a man ní' me Diose, ne Rej Jesucristó me uún Diose chuguanj. Ne so' me síi 'ee ndo'o rá man yuvij, ne so' me síi racuíj ndo'o nana sa' nimán yuvij chuguanj. <sup>4</sup> Ca'vee se me ma'an sayuun ran' núj, tzaj ne Diose ro', me síi narqué ndo'o chrej nucuaaj man núj, ne che'é dan guun nucuaaj núj nago' núj chrej nucuaaj man tinúú núj güii quiran' tinúú núj sayuun uún chuguanj. Che'é dan asa' ran' tinúú núj sayuun, ne ca'vee nago' núj chrej nucuaaj man tinúú núj chrej narqué ma'an Diose man núj nago' núj man tinúú núj chuguanj. <sup>5</sup> Dan me se nda' rá se vaa quiran' uxrá Jesucristó sayuun ro', danj vaa 'na' uxrá sayuun xráá núj, ne che'é dan cunuu 'ee uxrá rá Jesucristó man

núj che'é sayuun ran' núj ei. Che'é dan nari' nucuaaj rá núj che'é Jesucristó, 'yaj Diose a. <sup>6</sup> 'Q se sese ran' núj sayuun, ne che'é yan nari' nucuaaj nimán soj do', che'é yan nanij soj rihaan cacun' tumé soj do', me ran' núj sayuun adonj. Dan me se sese Diose rqué se nucuaaj nuu nimán núj, ne veé danj gaa guee cunuú se nucuaaj nimán soj asa' quiran' soj sayuun se vaa ran' núj adonj. <sup>7</sup> Dan me se yo'o guun ya rá núj ni'yaj núj man soj che'é se vaa ran' soj ei. 'Q se nda' rá se vaa 'na' sayuun xráá soj ro', veé danj vaa a'neé Diose se nucuaaj nimán soj uún chuguanj. Ase vaa ran' núj sayuun ro', danj vaa ran' guee soj sayuun, ne ase vaa nari' nucuaaj rá núj 'yaj Diose ro', danj vaa nari' nucuaaj rá soj 'yaj uún Diose a.

<sup>8</sup> Me rá núj na'núj rá soj se vaa quiran' núj sayuun estadó Asia, tinuj, nocoj. Ne me rá núj quene'en soj se vaa uxrá quiran' ya núj sayuun, ne daj doj se cavi' ya núj ei. <sup>9</sup> Dan me se 'o sayuun noco ya ya me yo', ne nuveé sayuun guun nucuaaj yá' me sayuun yo' a ma'. 'Q se ne gaa ya ya rá núj gaa i'na' núj a ma'. 'Q se ca'neé nimán núj quinaaj nimán núj rej yo' nanj adonj. Nda' rá se vaa síi nata' se-cacun' cavi' ro', danj vaa guun rá núj nanj adonj. Tzaj ne 'o se cunaj uxrá quiran' núj danj, gaa ne yuun che'e, gaa ne se gaa nucuaaj rá núj man ma'an núj ma'. 'Q se vaa che'é gaa nucuaaj ya rá núj man Diose síi naqui'yaj i'na' man yuvij cavi' nanj adonj. <sup>10</sup> Dan me se daj doj se cavi' núj, tzaj ne Diose me síi tinanii man núj rihaan sayuun yo', ne so' me síi tinanii man núj rihaan sayuun quiran' núj rej rihaan, ne nucuaaj rá núj man so', ne ya ya tinanii so' man núj rihaan sayuun, <sup>11</sup> che'é se racuíj ndo'o soj man núj achín ni'yaj soj rihaan Diose che'é núj ei. Dan me se cuno Diose se vaa achín ni'yaj que'ee yuvij rihaan so' che'é núj, ne qui'yaj so' se luj che'é núj tinanii so' man núj rihaan sayuun ei. Ne nago' que'ee ní' graciá rihaan



Diose che'é se vaa tinanii so' man núj rihaan sayuun ei.

*Nana nihánj taj xna'anj me che'é ne cuchij' Pabló chuman' cu'naj Corinto a*

<sup>12</sup> Ne'en núj se vaa quinanií núj rihaan sayuun, ne niha' ndo'o rá núj, che'é se ne'en núj se vaa nuvi' cacun' tumé núj a. 'O se ve'é qui'yaj núj ga soj gaa chéé núj rihaan chumií nihánj, ne ne tiha' yu'unj núj man soj ma'. Maan se cuno núj rihaan Diöse, ne ca'mii chij núj rihaan soj, ne ne qui'yaj núj inanj se vaa cavii raá ma'an núj ma'. 'O se ma'an Diöse racuíj man núj, ne qui'yaj núj inanj se vaa me rá Diöse qui'yaj núj nanj adonj. <sup>13-14</sup> Dan me se taj vaj nana nachran' cachrón núj nayaa soj ma'. Inanj nana guun nucuaj soj nayaa soj do', inanj nana guun nucuaj soj cuno soj do', me nana cachrón núj nayaa soj nanj adonj. Cuanó ro', aj nari' soj ta'aj nana cataj xna'anj núj rihaan soj, ne me rá núj nari' guee soj nu' nana yo' ei. Danj me rá núj, che'é yan guun niha' rá núj che'é soj güii ca'na' uún Jesucristó sij 'nij ra'a man ní' rihaan chumií nihánj, ne veé danj guun niha' rá soj che'é núj uún ei.

<sup>15</sup> Che'é se guun ya raj se vaa cavii sa' taran' ní' vaa güii, che'é dan guun raj ca'anj 'unj chiháán soj, gaa ne quisij vij ca'anj ni'yaj 'unj man soj, che'é se me raj guun niha' rá soj doj, raj a. <sup>16</sup> Dan me se gaa vaj 'unj ca'anj 'unj estadó Macedonia, ne guun raj caranj chiháán soj gaa cachén 'unj chrej ca'anj 'unj estadó yo' ei. Dan me se guun raj caranj chiháán soj rej ca'anj 'unj ne rej 'na' niquej uún ei. Danj guun raj qui'yaj che'é se guun raj racuíj soj manj ca'anj 'unj estadó Judea ei. Tzaj ne ne caranj chiháán soj gaa ca'naj nihánj a mei.

<sup>17</sup> Me che'é me ne carán' 'unj chiháán soj, rá soj ga. Guun vij rá 'unj gaa cataj 'unj se vaa guun rá 'unj carán' 'unj chiháán soj, rá soj na'. Gaa nuchruj raá 'unj daj qui'yaj, ne naj guun nana avii raá 'unj ca'mii 'unj, rá soj na'. 'O cyaan vaa nana ya

ga nana ne rihanj, rá soj na'. <sup>18</sup> Taj ma'. 'O se Diöse me testigó se vaa ya uxrá vaa nu' nana a'mii núj rihaan soj ei. Xa' núj, tzaj ne ne a'mii rma'an núj nana rihaan soj ma'. <sup>19</sup> 'O se a'mii natáj ma'anj ga sí cu'naj Silvano do', sí cu'naj Timoteo do', rihaan soj che'é ta'núí Diöse sí cu'naj Jesucristó, ne ne tinachej núj nana ne ga nana ya gaa a'mii natáj núj rihaan soj ma'. Tananj inanj nana ya me nana a'mii núj rihaan soj, che'é se quene'en núj se vaa ya uxrá vaa nu' se-nana Jesucristó nana sa' chuguanj. <sup>20</sup> Cunudanj nij nana cata' tu'va Diöse che'é ní' ro', ni'yaj ní' man Jesucristó ne xcaj ní' cuentá se vaa ya vaa nu' nana yo' chuguanj. Ne che'é se sij noco' man Jesucristó me ní', che'é dan taj ní' "Veé danj gaa ya ei", taj ní' rihaan Diöse, ne sa' doj xcaj yuvij cuentá se vaa ve'é ndo'o 'yaj Diöse á. <sup>21</sup> Diöse me sí racuíj man núj noco' sa' núj man Jesucristó ga soj, ne so' me sí cune' man núj qui'yaj suun núj rihaan so' a. <sup>22</sup> Ne so' me sí cataj se vaa ya ya ta'nij so' me ní', ne ca'neé so' Nimán so' cayáán nimán ní', ne che'é dan guun ya rá ní' se vaa ya rque so' se sa' man ní', vaa güii adonj.

<sup>23</sup> Tzaj ne sese ne cuchij rej man soj, ne me raj quene'en Diöse nimanj, se vaa ya vaa nana a'mij rihaan soj cuanó nihánj, ne che'é se ne ca'vej ya raj qui'yaj sayuun man soj, che'é dan ne cuchij chuman' Corinto adonj. <sup>24</sup> 'O se ne me rá núj quirij ta'nga' núj rihaan soj daj qui'yaj soj canoco' soj man Jesucristó ma'. 'O se sí 'yaj suun ga soj yan cavii sa' soj ne guun niha' rá soj me núj, ne aj nari' sa' soj canoco' ma'an soj man Jesucristó nanj adonj.

## 2

<sup>1</sup> Maan che'é se guun raj yo'o gaa niha' nimán soj ro', che'é dan ne cuchij rej man soj nanj adonj. <sup>2</sup> Sese nanó rá soj qui'yaj, gaa ne me sí qui'yaj guun niha' raj ga. 'O se soj me sí naqui'yaj niha' nimanj adonj.

Tzaj ne sese nuvi' soj, gaa ne a me síi qui'yaj danj ga. <sup>3</sup> 'O se che'é dan qui'yáj yanj cartá yo', ndaa vaa me rá ma'anj, che'é se ne ca'vej raj cuchij ne quinano raj qui'yaj soj ei. Tzaj ne 'o se no xcuún soj guun niha' raj qui'yaj soj, ne ndaa ma'an soj do', guun niha' rá gaa chuguanj. <sup>4</sup> Tzaj ne gaa qui'yáj yanj cartá yo' me se nuu quitzii ndo'o raj, ne nanó ndo'o raj, ne ndaa ta'vee ma'anj, qui'yaj suun nanó rá chuguanj. Tzaj ne nuveé che'e se me raj quinano rá soj me qui'yáj yanj cartá yo' ma'. 'O se me raj quene'en soj se vaa 'ee uxrá raj man soj nanj adonj.

*Nana nihánj taj xna'anj se vaa ve'é na'mii sa' uún nij síi man Corinto ga tinúú nij so' síi tanáj cacun' tumé so' a*

<sup>5</sup> Tzaj ne sese vaa yo'o síi 'yaj nanó raj doj, ne nuveé inanj ma'anj nanó rá 'yaj so', cataj ní' vaa ma'. 'O se ndaa ma'an soj do', nanó rá, cataj ní' vaa, che'é se na'vej rá ní' cuta' ní' doj vaa nanj adonj. <sup>6</sup> Ne sayuun cuta' soj xráa síi qui'yaj cacun' yo' me se veé dan ca'vee, ne ca'nee soj sayuun xráa so' nanj ei. Taj che'é qui'yaj soj doj sayuun man so' a ma'. <sup>7</sup> Maan se caraa x'naa soj rihaan so', ne veé dan quisij qui'yaj soj sayuun man so', tadó soj se nanó ndo'o rá so', qui'yaj soj, ne quirí' nimán so', qui'yaj soj ei. <sup>8</sup> Che'é dan cataj xna'anj 'unj rihaan soj se vaa me raj ve'é qui'yaj soj, gaa ne guun ya rá so' se vaa ya ya 'ee rá soj man so' ei. <sup>9</sup> Gaa qui'yáj yanj cartá ca'néj rihaan soj gaa rque, ne ca'né' 'unj suun rihaan soj se vaa qui'yaj soj sayuun man síi qui'yaj cacun' yo', che'é rej me rá 'unj xcaj 'unj cuentá daj sij me soj, ne me raj quene'enj sese sij uno nu' nana a'mij rihaan me soj a. <sup>10</sup> Sese ca'vej rá soj caraa x'naa soj che'é so', ne veé danj qui'yáj, ne caraa x'naj che'é so', che'é rej me raj cavii sa' doj soj, ne ne'enj se vaa tumé Jesucristó man ní' ei. <sup>11</sup> Danj qui'yaj ní', gaa ne se gaa nanj qui'yaj canaán síi cu'naj Satanás man ní' ei. 'O se aj

ne'en ní' daj me rá so' qui'yaj so' ga ní' ei.

*Nana nihánj taj xna'anj se vaa cavii Pabló chuman' cu'naj Troas, ne ca'anj so' estadó cu'naj Macedonia a*

<sup>12</sup> Dan me se ca'anj 'unj chuman' cu'naj Troas ca'mii natáj 'unj se-nana Jesucristó nana sa', ne dan me se vaa ndo'o rej ca'mii natáj 'unj nana sa', qui'yaj síi 'nij ra'a man ní', <sup>13</sup> tzaj ne ne nari' 'unj man tinúú ní' síi cu'naj Titó, ne nanó ndo'o raj, ne che'é dan tanáj 'unj man nij tinúú ní' síi ne chuman' Troas yo', ne cavii 'unj ca'ná' 'unj estadó Macedonia nihánj nanj adonj.

*Nana nihánj taj xna'anj che'é nana a'mii natáj nij tuvi' Pabló rihaan nij yuvii a*

<sup>14</sup> Tzaj ne nago' ní' graciá rihaan Diose, che'é se Diose me síi 'yaj se vaa 'yaj canaán uxrá núj rihaan síi chree che'é Jesucristó a. Ne Diose me síi 'yaj uno yuvii man rihaan nu' cachra' chumii nana sa' a'mii núj che'é Jesucristó, ne yo'o cha'nuu nana sa' yo' rihaan nu' cachra' chumii, nda' rá se vaa avii se gun' daj man yâj gaa naxra' yo' ro', danj vaa cha'nuu se-nana Diose chuguanj. <sup>15</sup> Dan me se nda' rá se vaa yachruu squii gun' daj, ne achén yo' sca'núj nij síi quinanii rihaan sayuun, ne achén yo' sca'núj nij síi ca'anj rihaan ya'an, danj vaa núj gaa nata' núj se-nana Jesucristó rihaan yuvii che'é Diose ei. <sup>16</sup> Ne xa' nij síi ca'anj rihaan ya'an, tzaj ne nda' rá se vaa gun' squii rihaan nij yuvii cavi' ro', danj vaa se-nana Diose rihaan nij so' ei. Tzaj ne xa' nij síi quinanii rihaan sayuun me se nda' rá se uun rá' gaa sa' uxrá gun' squii ro', danj uun rá' nij so' gaa uno nij so' se-nana Diose ei. Tzaj ne a me síi uun nucuaj 'yaj danj, rá soj ga. <sup>17</sup> 'O se núj me se ne 'yaj núj ndaa vaa 'yaj ta'aj nij síi a'mii natáj se-nana Diose a ma'. 'O se ta'aj nij so' me se me inanj nij síi me rá qui'yaj canaán sa'anj che'é se-nana Diose, ne xa' núj, tzaj ne inanj nana ya me rá núj ca'mii núj, ne na'vej rá núj

ca'neē núj sa'anj che'é se-nanā Diose rihaan yuvii ma'. 'O se Diose me sí ca'ne' suun rihaan núj ca'mii natáj núj, ne tumé Diose man núj daj ca'mii núj, ne sí noco' man Jesucristó me núj adonj.

### 3

*Nanā nihánj taj xna'anj se vaa ase vaa 'o'yanj cartá qui'yaj Jesucristó vaa nij sí amán rá ni'yaj man Jesucristó yanj chuman' Corinto ga nu' ní' a*

<sup>1</sup> Dan me se gaa a'mii núj nana nihánj me se uun che'e uún núj a'mii núj che'é ma'an núj, rá soj na'. Taj meí. Dan me se ase vaa yanj cartá vaa nu' ní' sij amán rá ni'yaj man Jesucristó ei. Dan me se nuveé che'e nucui' rá núj a'mii núj danj ma'. 'O se veé danj vaa ya ei. Nda' se me rá soj tihaan núj yanj cartá a'mii sa' che'é núj chiha'. Nda' se me rá soj cachinj núj yanj cartá a'mii sa' che'é núj rihaan soj chiha'. 'O se taj ma'. Ne vaa danj meí. 'O se aj ne'en soj man núj á. Ne taj che'é qui'yaj soj yanj cartá cataj xna'anj rihaan yo'ó yuvii daj sij me núj ma'. <sup>2</sup> 'O se ase vaa yanj cartá a'mii che'é núj vaa ma'an soj adonj. Dan me se aj ne'en cunudanj yuvii daj vaa nimán núj se vaa 'ee rá núj man soj, ne che'é dan xcaj nij yuvii cuentá se vaa sij sa' me núj ei. <sup>3</sup> Dan me se ne'en ya ya ní' adi' se vaa yanj cartá qui'yaj ma'an Jesucristó vaa soj chuguanj. Tzaj ne nuveé yanj cartá qui'yaj nii ga tintá me yo' ma'. Nuveé letrá cachrón nii rihaan yahij me yo' ma'. 'O se letrá cachrón ya ma'an Jesucristó ndaa nimán soj me nanā yo' adonj. Ne yo' me qui'yaj Nimán Diose, ne che'é Nimán Diose me nuû nanā yo' ndaa rque nimán soj ei.

*Nanā nihánj taj xna'anj se vaa guun nucuaj nij tuvi' Pabló ca'mii natáj nij so', qui'yaj ma'an Diose a*

<sup>4</sup> Yo' o nucuaj rá núj man Diose che'é Jesucristó se vaa ya racuúj Diose man núj ei. <sup>5</sup> Dan me se ne nó xcúún núj cataj núj se vaa guun nucuaj núj

qui'yaj suun núj che'é Diose ma'. 'O se ma'an Diose me sí 'yaj uun nucuaj núj qui'yaj suun núj adonj. <sup>6</sup> Ne Diose me sí qui'yaj guun nucuaj núj cataj xna'anj núj che'é tucuáán naca cuchruj Diose che'é yuvii adonj. Ne xa' tucuáán naca yo', tzaj ne nuveé inanjanj tucuáán no rihaan yanj daj vaa no xcúún ní' canoco' ní' me tucuáán naca yo' ma'. 'O se se guun nucuaj ní' canoco' ní' tucuáán no rihaan yanj ma'. Xa' tucuáán no rihaan yanj, tzaj ne cavi' nimán ní', qui'yaj tucuáán vaa danj ei. Dan me se xa' tucuáán naca cuchruj Diose che'é ní', tzaj ne tananj a cunuu i'na' nimán ní' qui'yaj Nimán Diose che'é tucuáán naca yo' nanjanj adonj.

*Nanā nihánj taj xna'anj se vaa ve'é ndo'o vaa nanā a'mii natáj nij tuvi' Pabló nanā a'mii che'é Nimán Diose a*

<sup>7</sup> Nanā cataj xna'anj Diose rihaan Moisés gaa naá ro', cachrón Diose nanā yo' rihaan yahij caxra', ne cataj so' se vaa sí se cuno nu' nanā yo' ro', yuun che'e cavi' so', taj so' a. Dan me se gaa tucuachén Moisés tucuáán yo' rihaan nij yuvii, ne cuchuguun uxrá rihaan so', ne ndaa do' do' quina'áj ya'an rihaan Moisés, tzaj ne ne guun nucuaj nij yuvii israelitá ni'yaj nij so' rihaan Moisés ma'. <sup>8</sup> Táa a suun vaa rihaan núj suun nata' se-tucuanj Nimán Diose chuguanj. <sup>9</sup> 'O se nanjanj se-tucuanj Moisés, tzaj ne sa' uxrá ca'mii nii ni'yaj nii se-suun Moisés suun nata' che'é tucuáán 'yaj 'na' cacun' xráa yuvii, ne táa a se-suun núj, ne sa' doj 'yaj núj nata' núj tucuáán 'yaj nuu sa' yuvii rihaan Diose ei. <sup>10</sup> Dan me se gaa naá ro', ve'é ndo'o chuguun rihaan Moisés, rá nij yuvii israelitá, tzaj ne yaj ro', me se ne ve'é vaa nanā nga yo' rihaan ní' a ma'. Ne tucuáán naca cuchruj Diose che'é ní' ro', yo' ve'é vaa rihaan ní' yaj adonj. 'O se ve'é doj vaa tucuáán cuchruj Diose cuano rihaan nanā ca'mii Diose gaa naá nanjanj adonj. <sup>11</sup> 'O se doj orá cuchuguun rihaan Moisés, qui'yaj nanā ca'mii

Diose rihaan so' gaa naá, tzaj ne sa' doj vaa nana ca'mii Diose cuno ní' yaj, ne ve'é uxrá doj cumán ní' nu' cavii nu' ca'anj, qui'yaj nana naca yo' adonj.

<sup>12</sup> Che'é se guun ya rá núj se vaa gaa i'na' núj nu' cavii nu' ca'anj, che'é dan niha' rá núj, ne ne na'aj núj a ma'. <sup>13</sup> Ne 'yaj núj ndaa vaa qui'yaj Moisés gaa naá ma'. Dan me se caráán so' yatzíj rihaan so', che'é yan ne ca'vej rá so' ni'yaj nij yuvii israelitá rihaan so' daj guun quiti'inj chuguun rihaan so' a. <sup>14</sup> Dan me se ne quene'en nij so' daj vaa canicun' se chuguun rihaan Moisés ma'. 'O se ne guun nucuaj nij so' xcaj nij so' cuentá a man adonj. Ne inanj danj vaa uún nij yuvii israelitá ndaa cuano nihánj, ne aráán rihaan nij so' gaa nayaa nij so' nana ca'mii Diose gaa naá, ne taj se 'yá' xcaj nij so' cuentá che'é nana yo' a man adonj. Inanj nij síi noco' man Jesucristó me síi uun nucuaj xcaj cuentá che'é nana yo' nanj ei. <sup>15</sup> Tzaj ne veé danj vaa ndaa cuano, ne ne guun nucuaj nij yuvii israelitá xcaj sa' nij so' cuentá gaa nayaa nij so' se-tucuanj Moisés ma'. Veé danj aráán rihaan nij so' nanj á. <sup>16</sup> Ne gaa canicaj ní' noco' ní' man síi 'nij ra'a man ní', gaa ne x'néj yatzíj aráán rihaan ní', ne a'vee ruvi'sa' rihaan ní' ni'yaj ní' ei. <sup>17</sup> (Dan me se daj vaa ese Nimán Diose me síi 'nij ra'a man ní', ne dan me se rej yanj Nimán Diose me se vaa ya'núj rej yo' ei.) <sup>18</sup> Ne taj se aráán rihaan taran' ní' ma'. 'O se uun nucuaj ní' ne'en ní' man síi 'nij ra'a man ní', se vaa ve'é uxrá vaa so', ne ase vaa so' ro', danj gaa uún ma'an ní', che'é se ni'yaj ní' man so' ei. Dan me se do' do' naqui'yaj sa' síi 'nij ra'a man ní' nimán ní', ne dan me se ne so' nimán ní', ne ase vaa ma'an so' ro', danj gaa taran' ní' uún adonj.

#### 4

*Nana nihánj taj xna'anj se vaa nda' se ran' ndo'o nij tuvì' Pabló sayuun,*

*tzaj ne uun nucuaj nij so' a'mii natáj nij so' se-nana Diose, qui'yaj Diose a*

<sup>1</sup> Dan me se cunuu 'ee rá Diose man núj, ne ca'ne' so' suun rihaan núj ca'mii natáj núj, ne che'é dan ne ri' rá núj ca'mii natáj núj se-nana Diose ma'. <sup>2</sup> Tananj a 'o tanáj xco núj nu' nij rasuun na'aj chi'ii 'yaj yuve nii ei. Se cuchu'vi' núj quene'en yuvii me 'yaj núj ma'. Se ca'mii núj nana tiha' yu'unj ma'. Se ca'mii ne núj che'é se-nana Diose ma'. Inanj nana ya ca'mii núj cuno cunudanj yuvii, ne xcaj ma'an nij yuvii cuentá se vaa ya vaa nana a'mii núj, ne Diose me síi cuno nu' nana ca'mii núj nanj ei. <sup>3</sup> Tzaj ne sese nana yuve me nu' nana a'mii natáj núj, rá ta'aj nij yuvii, ne inanj nij síi chi'ii ca'anj rihaan sayuun me nij síi uun danj rá nanj ei. <sup>4</sup> Ne xa' nij so', tzaj ne ne amán rá nij so' ni'yaj nij so' man Jesucristó ma'. 'O se caráán xréé nij so', qui'yaj síi chree síi noco' nij so' man, ne ne guun nucuaj nij so' xcaj nij so' cuentá che'é se-nana Jesucristó ma'. Ne ne'en nij so' se vaa sa' ndo'o vaa Jesucristó ma'. Ne xa' Jesucristó, tzaj ne ase vaa ma'an Diose vaa so' ni'yaj ní' man so' adonj.

<sup>5</sup> Xa' núj, tzaj ne ne a'mii natáj núj che'é ma'an núj ma'. Inanj che'é Jesucristó sij 'nij ra'a man ní' a'mii natáj núj, ne taj núj se vaa che'é se noco' ní' man so', che'é dan sij 'yaj suun rihaan soj me núj ei. <sup>6</sup> 'O se Diose me síi cataj se vaa chuguun rihaan chumii, ne danj ca'mii Diose gaa naá uxrá gaa vaa rmi' rihaan chumii nihánj, gaa ne cuchuguun rihaan chumii nihánj, ne yaj me se chuguun nimán núj, qui'yaj uún Diose á. Che'é dan me guun nucuaj núj cataj xna'anj núj rihaan yuvii se vaa sa' uxrá vaa Diose, ne sese cuno nij yuvii se-nana Jesucristó, ne xcaj nij so' cuentá se vaa sa' uxrá qui'yaj Diose adonj.

<sup>7</sup> Dan me se nuu nu' rasuun sa' yo' nimán núj, tzaj ne ase vaa 'o xruj yo'óo niqiii uun vaa núj, ne che'é dan ne'en ya ní' se vaa nu' se sa' nucuaj



yo' 'na' 'yaj Diose ei. Ne nuveé ma'an núj 'yaj veé 'na' se sa' yo' ma'. Diose me sí rqué se nucuaj man núj che'é rej ca'vee nata' núj se-nana so' adonj. <sup>8</sup> Dan me se me rej ma'an vaj núj me se 'yaj nii sayuun man núj, tzaj ne rqué Diose rej quinani núj rihaan sayuun yo' a. Chu'vi' nimán núj, tzaj ne ne ri' nimán núj ma'. <sup>9</sup> Noco' uxrá yuvi man núj che'é yan me rá nij so' go' nij so' man núj, tzaj ne ne tanáj Diose man núj ma'. 'Yaj ya nii sayuun man núj, tzaj ne ne avi' núj a ma'. <sup>10</sup> Niganj ne'en ya núj se vaa ase guun rá nii gaa ticavi' nii man Jesucristó ro', cunudanj me rá nii ticavi' nii man núj adonj. Che'é se ne cavi' núj, gaa ne caráya'anj uxrá nij yuvi adonj. Ne xcaj nij yuvi cuentá se vaa vaa i'na' núj che'é se 'nij Jesucristó nimán núj ne tumé so' man núj adonj. <sup>11</sup> Dan me se vaa i'na' núj rihaan chumi nihánj, tzaj ne niganj ne'en núj se vaa ca'vee cavi' núj che'é se noco' núj man Jesucristó, ne ne'en yuvi se vaa ca'vee cavi' núj, tzaj ne xcaj nij yuvi cuentá se vaa vaa i'na' núj che'é se 'nij Jesucristó nimán núj ne racu'j ndo'o so' man núj adonj. <sup>12</sup> Dan me se núj me se sij daj doj cavi' me núj, tzaj ne soj ro', tananj a yo'o gaa i'na' nimán nij soj á.

<sup>13</sup> No nana ca'mii 'o sí cane gaa naá rihaan danj Diose se vaa cataj so':

—Cuchumán raj ni'yaj 'unj man Diose, ne che'é dan ca'mij che'é so' a —taj yo'o sí cane gaa naá yo' a.

Ne ase vaa cuchumán rá sí cane gaa naá yo' ro', danj vaa amán rá núj, ne che'é dan a'mii núj che'é Diose, <sup>14</sup> che'é se ne'en núj se vaa Diose me sí qui'yaj cunuu i'na' uún Jesucristó sij 'nij ra'a man ni', ne che'é dan cunuu i'na' uún ma'an núj ga Jesucristó, qui'yaj uún Diose, gaa ne canicun' núj rihaan Jesucristó, qui'yaj uún Diose, ne danj qui'yaj uún Diose che'é soj uún adonj. <sup>15</sup> 'O se inanj che'é soj ran' núj nu' se vaa ran' núj, tzaj ne che'é se me rá núj nicaj que'ee soj se luj qui'yaj Diose, gaa ne

guun rii doj ní' sij nago' graciá rihaan Diose, ne guun rii doj ní' sij ve'é a'mii che'é Diose adonj.

*Nana nihánj taj xna'anj se vaa nata' ndo'o nij tuvi' Pabló se-nana Diose, che'é se ne'en nij so' se vaa naru'vee Jesucristó rihaan nij so' a*

<sup>16</sup> Che'é dan se ca'ne' rá núj ma'. Dan me se núj me se daj doj cavi' nee man núj, tzaj ne daj a güii tananj a nahuun sca' doj nimán núj nanj ei. <sup>17</sup> Cuanó yaj me se vaa doj sayuun ran' núj, tzaj ne ra'yanj cachén nu' sayuun yo', ne che'é sayuun ro', ve'é uxrá cavi' núj nu' cavi' nu' ca'anj ei. <sup>18</sup> Che'é dan ne xcaj núj cuentá che'é nij rasuun ruvi' ni'yaj yuvi ma'. 'O se rasuun ruvi' ni'yaj yuvi ro', vaa güii quinavij nu' rasuun yo', ne che'é dan inanj che'é nij rasuun ne ruvi' ni'yaj yuvi cuano xcaj núj cuentá, che'é se rasuun cumán nu' cavi' nu' ca'anj me rasuun yo' adonj.

## 5

<sup>1</sup> Dan me se ne'en núj se vaa ase vaa 'o ve' mantá uta' uun nii 'o orá le'ej nii ne doj orá a'néj nii mantá ro', vaa nee man núj, ne yanj nee man núj gaa vaa i'na' núj rihaan chumi nihánj, tzaj ne ne'en núj se vaa ca'vee navij nee man núj vaa güii, ne asa' navij yo', gaa ne rqué Diose yo'ó nee naca cunuú núj, ne daj chihaa m'j se quinavij nee naca yo' a ma'. Tananj a cayáán núj rej xta' nu' cavi' nu' ca'anj adonj. <sup>2</sup> 'O se aráj chej núj, che'é se me uxrá rá núj cunuú núj nee naca yo', nee qui'yaj Diose rej xta' che'é núj a. <sup>3</sup> Ne nee naca yo' me caráán xráá núj, gaa ne se gaa nanj gaa canj núj ei.

<sup>4</sup> Dan me se nuú núj nee nga nihánj cuano, ne che'é dan nanó rá núj, ne aráj chej núj, che'é se na'vej rá núj cavi' núj a man adonj. Dan me se na'vej rá núj tanáj núj nee nuú núj cuano, tzaj ne me ndo'o rá núj cunuú núj nee naca yo', ne veé dan me se nee man núj nee daj doj cavi' nihánj ro', cunuu naca uún yo', ne gaa i'na' yo' nu' cavi' nu' ca'anj ei. <sup>5</sup> Ne Diose

me sí 'yaj suun nimán núj yan ca'vee cunu naca nee man núj vaa güii, ne rque so' Nimán so' man núj, ne che'é dan guun ya rá núj se vaa cunu naca ya núj adonj. <sup>6</sup> Che'é dan niganj vaa nucuaj nimán núj, ne dan me se ne'en núj se vaa gaa vaa nee man núj nihánj cuano ro', ne taj vaj núj ne rej xta' ga sí 'nij ra'a man ní' ma'. <sup>7</sup> 'O se ataa quita'aa núj se vaa rque Diose rihaan núj, tzaj ne amán rá núj ni'yaj núj man Diose se vaa ya vaa nana cataj xna'anj so' rihaan núj, ne che'é dan uno núj rihaan so' nanj adonj. <sup>8</sup> Dan me se nari' nucuaj nimán núj, ne uun rá núj se vaa cunaj uxrá gaa tanáj núj nee man núj, ne ca'anj núj cayáán núj ga sí 'nij ra'a man ní', ne sa' doj cavii núj asa' qui'yaj núj danj adonj.

<sup>9</sup> Che'é dan me ndo'o rá núj guun niha' rá sí 'nij ra'a man ní' ni'yaj so' man núj á. Ca'vee se cayáán núj rihaan chumii nihánj, ca'vee se cayáán núj rej xta', tzaj ne me rá núj guun niha' rá sí 'nij ra'a man ní' ni'yaj so' man núj nanj adonj. <sup>10</sup> Ne'en núj se vaa vaa güii no xcuún taran' ní' canicun' taran' ní' rihaan Jesucristó, ne naquiyaj cuu so' che'é ní' a. Gaa ne naru'vee Jesucristó rihaan ní' che'é se vaa qui'yaj ní' gaa vaa i'na' ní' rihaan chumii nihánj, ne sese sa' qui'yaj ní', ne se sa' naru'vee Jesucristó rihaan ní', ne sese nij qui'yaj ní', ne se nij quinicaj ní' nanj adonj.

<sup>11</sup> Chu'vi' núj che'é se ne'en núj se vaa qui'yaj sí 'nij ra'a man ní' sayuun man nij sí tumé cacun', ne che'é dan nago' núj chrej nucuaj man yuvii canoco' nij yuvii man so', ne aj ne'en Diose daj vaa nimán núj a. Ne guun ya rá 'unj se vaa xcaj ma'an nij soj cuentá daj vaa nimán núj nanj adonj. <sup>12</sup> Nuveé che'e se me rá núj ca'mii núj nana sa' che'é ma'an núj me a'mii 'unj danj ma'. Maan se me rá núj guun nucuaj soj ca'mii nacaj soj ni'yaj soj man núj nanj adonj. 'O se nij sí taj ri'yunj man núj me se inanj xcaj nij so' cuentá daj ruvi' yuvii ni'yaj nij so', tzaj ne ne acaj nij so' cuentá

daj vaa nimán yuvii ma'. <sup>13</sup> Ca'vee se snúu rma'an núj rá nij so', tzaj ne inanj che'é se noco' núj Diose me 'yaj núj ndaa vaa 'yaj núj, ne ca'vee se nuvi' nana niha' nimán núj rá nij so', tzaj ne inanj che'é se me rá núj racuuj núj man soj me 'yaj núj ndaa vaa 'yaj núj adonj.

<sup>14</sup> 'O se ne'en núj se vaa 'ee rá Jesucristó man cunudanj yuvii, ne che'é dan 'o me rá núj cataj xna'anj núj rihaan yuvii che'é so' a. 'O se guun ya rá núj se vaa orún' Jesucristó me sí cavi' che'é cunudanj yuvii, ne che'é dan ase vaa sí cavi' ro', danj vaa cunudanj nij yuvii noco' man so' ni'yaj nij so' chrej chi'ii a. <sup>15</sup> Ne che'é se cunuu sa' nimán nij yuvii ro', che'é dan se guun rá nij yuvii se vaa vaa i'na' nij yuvii rihaan chumii nihánj che'é yan qui'yaj suun nij yuvii che'é ma'an nij yuvii ma'. 'O se gaa i'na' nij so' che'é yan canoco' nij so' man Jesucristó, ne Jesucristó me se so' me sí cavi' che'é nij so', ne cunuu i'na' uún so' che'é yan cavii sa' nij yuvii doj nanj adonj.

*Nana nihánj taj xna'anj se vaa a'mii natáj nij tuvi' Pabló se vaa ca'vej rá yuvii tinanii Diose man nij yuvii rihaan sayuun a*

<sup>16</sup> Che'é dan me ca'ne' rá núj ga suun acaj cuentá ndaa vaa ruvi' yuvii ni'yaj tuvi' yuvii á. Asij rque me se nanj yuvii me Jesucristó rá núj, ne inanj xcaj núj cuentá ndaa vaa ruvi' so', tzaj ne yaj me se ne 'yaj núj danj a ma'. <sup>17</sup> Ne che'é se cunuu sa' nimán núj, che'é dan ne'en núj se vaa me ma'an yuvii amán rá ni'yaj man Jesucristó ro', cunuu sa' nimán so', qui'yaj Diose á. Ne sí amán rá ro', se guun rá uún so' qui'yaj so' ndaa vaa qui'yaj so' gaa rque ma'. 'O se sí acaj naca cuentá me so' adonj.

<sup>18</sup> Ne xa' nu' nihánj, tzaj ne Diose me sí 'yaj nu' nihánj che'é yuvii, ne so' me sí qui'yaj cunuu rcua'aan ní' ga ma'an so' che'é se vaa qui'yaj Jesucristó, ne ca'ne' ma'an Diose suun rihaan núj cataj xna'anj núj rihaan

yuvii se vaa ca'vee cunu rcua'aan nij yuvii ga Diose adonj. <sup>19</sup> Dan me se ma'an Diose ca'neé man Jesucristó rihaan chumii nihánj, ne che'é se vaa qui'yaj Jesucristó ro', che'é dan ca'vee cunu rcua'aan yuvii ga Diose, qui'yaj Diose, ne tiri' Diose cuentá cacun' vaa rihaan nij yuvii a. Ne Jesucristó me síi rqué nana nihánj man núj cataj xna'anj núj nana nihánj rihaan yuvii, qui'yaj uún Diose ei.

<sup>20</sup> Dan me se a'mii núj se-nana Jesucristó rihaan yuvii, ne ma'an Diose rqué se-nana Diose rihaan núj ca'mii núj che'é ma'an Diose, ne che'é dan achíin ni'yaj ndo'o núj rihaan nij yuvii, ne a'mii núj nana nihánj rihaan nij yuvii a: “Cunu rcua'aan nij soj ga Diose ei. <sup>21</sup> A 'ó cacun' ne tumé Jesucristó ma'. Tzaj ne naraa Diose nu' cacun' tumé ní' xráá ma'an Jesucristó, ne quiran' Jesucristó sayuun che'é cacun' yo', ne che'é dan ca'vee cunu sa' ya ní' rihaan Diose che'é se sij noco' man Jesucristó me ní' adonj.” Yo' me nana a'mii natáj núj rihaan yuvii nanj adonj.

## 6

<sup>1</sup> Dan me se 'yaj suun núj suun ca'ne' Diose rihaan núj, ne che'é dan taj xna'anj núj rihaan soj se vaa se quiri'íj yaníj soj se luj qui'yaj Diose che'é soj ma'. <sup>2</sup> 'Q se nana nihánj me nana ca'mii Diose á:

—Maan güii cunó 'unj cachíin ni'yaj soj rihanj, ne güii dan me racuíj 'unj man soj cavii sa' soj a —cataj Diose gaa naá a.

Ne xcaj soj cuentá se vaa cuano nihánj me güii cunu 'ee rá Diose man soj, ne cuano nihánj me güii ca'vee cavii sa' soj chuguanj.

*Nana nihánj taj xna'anj se vaa tumé ndo'o nij tuvi' Pabló man ma'an nij so' daj 'yaj nij so' che'é yan cunó yuvii nana a'mii nij so' a*

<sup>3</sup> Ne tumé uxrá núj man núj che'é chrej sa', che'é se na'vej rá núj guun yaníj soj rihaan chrej sa' a. Ne na'vej rá núj cataj soj se vaa nij vaa suun 'yaj

suun núj rihaan Diose uún a. <sup>4-5</sup> 'Q se me rá núj ni'yaj soj man núj ne cataj soj se vaa ya ya sij 'yaj suun rihaan Diose me núj, ne che'é dan a'vee se daj a ran' núj sayuun, tzaj ne vaa inaj nimán núj nanj adonj. Dan me se ran' núj sayuun, ne achiin rasuun man núj, ne chu'vi' nimán núj, ne o' nii cuxru' xráá núj, ne axríj nii taga' man núj, ne nuu chre' nii caxrii yuvaá nii man núj, ne 'yaj suun ndo'o núj che'é se qui'yaj canaán núj cha núj, ne vaa güii narii ndo'o núj nej, ne vaa güii, ne ne vaa ya'núj rihaan núj cha núj, tzaj ne vaa inaj nimán núj, ne ne a'ne' rá núj a ma'. <sup>6</sup> Ne a'neé nimán núj qui'yaj suun núj rihaan Diose, ne núj ro', ne uun yuvaá núj man tuvi' núj ma'. Tananj ve'é 'yaj núj rihaan tuvi' núj, ne noco' núj Nimán Diose, ne ya ya 'ee rá núj man tuvi' núj adonj. <sup>7</sup> Nana ya a'mii núj, ne rqué Diose se nucuaj man núj, ne cunu sa' nimán núj rihaan Diose, ne che'é dan a'vee unu' núj ga síi chree, ne tumé núj man núj se vaa se qui'yaj síi chree chi'íj man núj a. <sup>8</sup> Vaa yuvii a'mii sa' che'é núj, ne vaa yuvii a'mii nij che'é núj, ne vaa yuvii taj se vaa síi ne me núj, tzaj ne nana ya a'mii núj ei. <sup>9</sup> Ne nuvi' se uun núj, taj uún nii, tzaj ne sij ne'en uxrá yuvii man me núj a. Ne taj uún nii se vaa daj doj caví' núj, tzaj ne ne'en soj se vaa vaa nucuaj núj a. Ne ma'an Diose 'yaj sayuun man núj che'é rej nari' núj cunó núj doj rihaan Diose, tzaj ne ne avi' núj, 'yaj Diose ma'. <sup>10</sup> Ne nanó rá núj che'é sayuun, tzaj ne niha' rá núj rihaan Diose uún a. Ne síi nique me núj, tzaj ne avii sa' doj que'ee yuvii, 'yaj núj a. Ne taj si'yaj núj, tzaj ne cunudanj chumii nihánj me si'yaj núj a.

*Nana nihánj taj xna'anj se vaa me rá Pabló cunu 'ee rá nij síi man Corinto ni'yaj nij so' man nij tuvi' Pabló a*

<sup>11</sup> Dan me se nihánj me cataj xna'anj 'unj rihaan soj sij man chuman' Corinto daj vaa nimán núj a. Dan me se ne'en soj se vaa 'ee ndo'o rá núj man soj á. <sup>12</sup> Nuveé che'ee se vaa

qui'yaj núj me nanó rá soj ma'. Maan che'é se ne nucaj rá soj man núj ro', che'é dan nanó rá soj adonj. <sup>13</sup> Daj se uun rá nii ne'en nii ta'níi nii ro', danj vaa uun raj ne'enj man soj, ne che'é dan cataj xna'anj 'unj rihaan soj se vaa, ase vaa qui'yaj núj che'é soj ro', danj qui'yaj uún soj che'é núj, ne gaa nucaj rá soj man núj á.

*Nana nihánj taj xna'anj se vaa no xcúún ní tanáj ní chrej chí'ii, ne cunuu sa' nimán ní rihaan Diose a*

<sup>14</sup> Se guun guun tuví' soj ga nij síi ne amán rá ni'yaj man Jesucristó ma'. Se guun qui'yaj soj ndaa vaa 'yaj nij so' ma'. Asa' ca'vee cyaan gaa rej ranga' ga rej rmi', rá soj ga. Che'é dan, asa' ca'vee guun tuví' síi me rá qui'yaj sa' ga síi me rá qui'yaj cacun', rá soj ga. <sup>15</sup> Asa' ca'vee cyaan gaa rá Jesucristó ga síi chree, rá soj ga. Ne ca'vee cyaan gaa rá síi amán rá ni'yaj man Diose ga síi na'vej rá cuchuman rá, rá soj na'. Taj ma'. <sup>16</sup> Ne xa' ní' sij noco' man Diose, tzaj ne asa' ca'vee cunuu chre' ní' ga ya'anj cacój yuvií, rá soj ga. Xa' ya'anj cacój yuvií, tzaj ne ne vaa i'na' yo' ma'. Ne xa' Diose, tzaj ne síi vaa i'na' me so', ne ne so' nimán ní' ei. 'O cyaan vaa nana nihánj ga nana ca'mii Diose gaa naá gaa cataj Diose:

—Cayáan 'unj ga nij so', ne cachee 'unj ga nij so', ne guún 'unj Diose noco' nij so', ne guun nij so' yuvií tumé 'unj man a —taj Diose gaa naá che'é ní' sij noco' man so' a.

<sup>17</sup> Ne cataj uún Diose rihaan ní' sij noco' man so':

—Che'é dan guun yaníj soj rihaan nij síi chí'ii yo', ne a 'ó se chí'ii se qui'yaj soj, gaa ne nacaj 'unj man soj, <sup>18</sup> ne guun Rej soj manj, ne guun soj ta'níj a. Veé danj síj nana cataj xna'anj 'unj sij 'nij ra'a man soj rihaan soj, ne sij guun nucaj qui'yaj nu' nana nihánj mej adonj —taj uún Diose rihaan ní' a.

## 7

<sup>1</sup> Dan me se nu' nana nihánj nana ca'mii ya Diose gaa naá ro', ca'mii

Diose nana yo' rihaan ní', tinuj, no-coj. Che'é dan quirii yaníj ní' man cunudanj se chí'ii qui'yaj ní' asij rque do', man cunudanj se chí'ii man nimán ní' do', ne gaa cuj nimán ní' á. Ne naqui'yaj sa' inanj ní' nimán ní', che'é se uxrá aráj cochroj ní' rihaan Diose á.

*Nana nihánj taj xna'anj se vaa guun niha' rá Pabló cuno so' nana se vaa cuno nij síi man Corinto se-nana Pabló a*

<sup>2</sup> Me rá núj ve'é ca'mii soj ga núj á. 'O se a 'ó soj ne qui'yaj chí'ii núj man ma'. A 'ó soj ne tiha' yu'unj núj man ma'. <sup>3</sup> Dan me se nuveé che'e se me rá 'unj cuta' 'unj cacun' xráá soj me a'mij danj ma'. 'O se aj cataj xna'anj 'unj rihaan soj se vaa 'ee uxrá rá núj man soj, ne ca'vee se gaa i'na' ní' do', ca'vee se cavi' ní' do', tzaj ne yo'o gaa 'ee rá núj man soj nanj adonj. <sup>4</sup> Inanj nucaj ndo'o rá 'unj ni'yaj 'unj man soj se vaa ve'é qui'yaj soj, ne niha' ndo'o rá 'unj ni'yaj 'unj man soj, ne nda' se sayuun ran' núj, tzaj ne uun niha' ndo'o raj adonj.

<sup>5</sup> Dan me se ca'anj núj estadó Macedonia, tzaj ne taj se 'yá' cane sa' núj a ma'. 'O se qui'yaj ndo'o nii sayuun man núj, ne vaa yuvií ca'mii cunu' ga núj, neuchu'vi' ndo'o núj a. <sup>6</sup> Tzaj ne Diose me síi racuíj ndo'o man nij síi ni'yanj nimán, ne dan me se racuíj ndo'o Diose man núj se vaa ca'na' tinú' Titó rihaan núj, qui'yaj Diose, ne cunuu cuíj rá núj, qui'yaj so' a. <sup>7</sup> Ne veé uún so' me síi cataj xna'anj rihaan núj se vaa guun niha' rá so' quene'en so' man soj, ne cataj xna'anj so' se vaa me ndo'o rá soj quene'en soj man núj do', se vaa nanó rá soj che'é síi qui'yaj cacun' 'nij sca'núj soj do', se vaa niha' rá soj ca'mii sa' soj che'é núj do', ne che'é dan doj a guun niha' raj adonj.

<sup>8</sup> Dan me se nda' se quinanó rá soj, qui'yaj yanj cartá ca'néj, tzaj ne cunaj qui'yaj, raj ei. 'O se quinanó rá soj che'é se cataj xna'anj 'unj che'é cacun' tumé soj, tzaj ne ne'én 'unj cuano



se vaa ya quinano rá soj doj güi, qui'yaj yanj cartá yo' chuguanj. Dan me se ne guun niha' raj gaa cachronj nana nucuaj yo' rihaan soj ma'. <sup>9</sup> Tzaj ne yaj me se guun niha' raj, ne nuveé che'e inanj se quinano rá soj me guun niha' raj ma'. Che'é se tanáj soj cacun' tumé soj, ne canicaj nimán soj ro', che'é dan guun niha' raj adonj. 'O se quinano rá soj, ne canicaj nimán soj ndaa vaa me rá Diose qui'yaj soj, ne che'é dan ne quiran' soj sayuun, qui'yaj núj a ma'. Tananj a cavii sa' soj doj, qui'yaj núj adonj. <sup>10</sup> 'O se sese quinano rá ní' ndaa vaa me rá Diose qui'yaj ní', ne canicaj nimán ní', ne cavii sa' ní', ne guun rá ní' se vaa sa' qui'yaj Diose che'é ní' adonj. Tzaj ne sese quinano rá ní' ndaa vaa nanó rá nij síi man rihaan chumii nihánj, ne quirí' nu' nimán ní' nu' cavii nu' ca'anj nanj adonj. <sup>11</sup> 'O se xcaj soj cuentá se vaa ve'é ndo'o qui'yaj soj, che'é se quinano rá soj che'é cacun' qui'yaj soj, qui'yaj Diose á. 'O se cunaj ca'mii soj che'é nana ca'mii núj do', ne niha' rá soj ni'yaj soj cacun' tumé yuvii 'nij sca'núj soj do', caráj cochroj ndo'o soj ni'yaj soj Diose do', guun rá soj quene'en soj man núj do', guun niha' rá soj qui'yaj soj sayuun man síi qui'yaj cacun' do' a. Nu' nihánj qui'yaj soj, tihaan soj se vaa nuveé sij tumé cacun' me ma'an soj ma'. 'O se síi sa' me soj nanj ei.

<sup>12</sup> Nuveé che'e síi tumé cacun' me qui'yáa 'unj yanj cartá yo' ma'. Nuveé che'e síi qui'yaj so' cacun' rihaan me qui'yáa 'unj yanj cartá yo' ma'. 'O se qui'yáa 'unj yanj cartá yo' che'é se guun rá 'unj xcaj ma'an soj cuentá se vaa niha' rá ma'an soj cunó soj nana ca'mii núj rihaan soj, che'é se noco' nu' ní' man Diose adonj. <sup>13</sup> Ne che'é se vaa qui'yaj soj ro', che'é dan guun niha' rá núj nanj adonj.

Ne dan me se guun niha' rá núj che'é se cunuu cuij rá síi cu'naj Titó ne guun niha' rá so', qui'yaj soj a. <sup>14</sup> Dan me se ca'mii 'unj nana sa' rihaan síi cu'naj Titó che'é soj, ne

quisíj ya nu' nana ca'mii 'unj rihaan so' che'é soj vaa ei. Dan me se ya vaa nu' nana a'mii núj rihaan soj, ne ya vaa nana ca'mii núj rihaan Titó, ne che'é dan taj a yo'ó chrej na'aj nó rihaan 'unj ma'. <sup>15</sup> Ne nuu rá síi cu'naj Titó se vaa uxrá ve'é cuno soj nana cataj xna'anj so' rihaan soj, ne uxrá caráj cochroj soj rihaan so' asij cuchi' so' rihaan soj, ne cuchu'vi' soj caxrii yuvaá so' man soj a. Che'é dan uxrá doj 'ee rá so' man soj chuguanj. <sup>16</sup> Guun niha' rá 'unj, che'é se ca'vee gaa nucuaj yá yá 'unj man soj adonj.

## 8

*Nana nihánj taj xna'anj daj qui'yaj nij síi man Corinto, ne quirii nij so' sa'anj rihaan nij síi man Jerusalén a*

<sup>1</sup> Ne cataj xna'anj núj rihaan soj che'é se luj qui'yaj Diose che'é nij síi sa' noco' man Diose man estadó Macedonia, tinuj, nocoj. <sup>2</sup> Dan me se quiran' uxrá nij so' sayuun, tzaj ne guun niha' uxrá rá nij so', ne nda' se síi nique ndo'o me nij so', tzaj ne guun niha' rá nij so' quirii nij so' sa'anj rihaan tinúú nij so' síi nique a. Nda' rá se 'yaj síi ru'vee 'yaj nij so' nanj adonj.

<sup>3</sup> Dan me se cavii raa ma'an nij so' rque nij so' nu' se vaa guun nucuaj nij so' rque nij so' ei. Nuveé sij quirii sa'anj me nij so' vaa, tzaj ne quirii nij so' noco sa'anj adonj. <sup>4</sup> Ne cachín ni'yaj uxrá nij so' rihaan núj se vaa qui'yaj núj se ndo'o ca'vej núj qui'yaj nij so' ndaa vaa qui'yaj yo'ó tinúú ní' síi quirii sa'anj rihaan yo'ó nij síi sa' noco' man Diose, <sup>5</sup> ne doj a qui'yaj nij so' rihaan se vaa me rá núj qui'yaj nij so' nanj chuguanj. Dan me se asino yaan guun rá nij so' qui'yaj nij so' nu' se vaa me rá síi 'nij ra'a man ní' qui'yaj nij so', gaa ne guun rá uún nij so' qui'yaj nij so' nu' se vaa me rá núj qui'yaj nij so', ne dan me se sa' uxrá cuno nij so' rihaan Diose nanj adonj.

<sup>6</sup> Che'é dan cataj xna'anj núj rihaan síi cu'naj Titó se vaa cuchi' so' rihaan soj sij ne chuman' Corinto, ne

cataj so' se vaa ase vaa qui'yaj nij síi man estadó Macedonia ro', danj gaa ca'vee qui'yaj ma'an nij soj uún, gaa ne quisij quirii taran' soj sa'anj rihaan nij síi nique yo' ei. <sup>7</sup> Dan me se 'yaj suun ndo'o nij soj nu' suun sa' adonj. Tzaj ne soj me se veé danj síi nucuaj ndo'o rá man Jesucristó me soj do', síi a'mii sa' me soj do', síi avii raá me soj do', síi niha' rá qui'yaj suun me soj do', síi 'ee rá man núj me soj do' ei. Che'é dan guun soj síi rii ndo'o sa'anj rihaan tinúú á.

<sup>8</sup> Se ca'né' 'unj suun rihaan soj daj qui'yaj soj ma'. Maan se me rá 'unj xcaj 'unj cuentá sese ya ya 'ee rá soj tinúú soj ndaa vaa 'ee rá nij síi man Macedonia tinúú nij so' a. <sup>9</sup> 'O se aj ne'en soj se vaa qui'yaj ndo'o Jesucristó sij 'nij ra'a man ní' se luj che'é ní' á. Dan me se ru'vee ndo'o so' gaa cayáán so' rej xta', tzaj ne naquiyaj nique so' man so' ne ca'na' so' rihaan chumii nihánj che'é ní', gaa ne che'é se danj qui'yaj so' ro', che'é dan cavii sa' doj ní' nanj adonj.

<sup>10</sup> Maan se cataj xna'anj 'unj se vaa me raj qui'yaj soj á. Ne'en soj se vaa yo' cachén qui'yaj suun ndo'o soj, ne guun che'e soj racuíj soj man nij síi nique, ne che'é dan cavii sa' soj doj, sese <sup>11</sup> tinavij soj suun guun che'e soj ei. Dan me se ase vaa ya ya guun niha' rá soj racuíj soj asij tacóo gaa guun che'e soj ro', veé danj guun rá soj tinavij soj nu' suun yo', ne racuíj soj sa'anj guun nucuaj soj man nij síi nique ei. <sup>12</sup> Sese ya ya rii nimán soj rque soj sa'anj yo', ne guun niha' rá Diose nacaj Diose sa'anj guun nucuaj soj rque soj a. Se cataj Diose rque soj doj sa'anj, sese se guun nucuaj soj qui'yaj soj danj ma'. <sup>13</sup> Nuveé che'e se me rá núj cunuu nique soj ne cunuu ru'vee yo'ó yuvii me a'mii núj danj ma'. 'O se me rá núj cyaan gaa nu' nij tinuj ní' adonj. <sup>14</sup> Maan se cuano nihánj ro', vaa ndo'o sa'anj rihaan soj, ne nique ndo'o yo'ó tinúú ní', ne che'é dan no' xcúún soj racuíj soj man nij so' ei. Ne xraj, ne cachin sa'anj

rihaan soj, ne sese vaa sa'anj rihaan yo'ó tinúú ní', ne racuíj nij so' man soj, gaa ne cyaan gaa nij tinuj ní' a. <sup>15</sup> Ne ase vaa nana nihánj ro', danj vaa nana no' rihaan danj Diose che'é nij yuvii israelitá, taj yo': "Ne quinaj se chá rihaan síi vaa ndo'o se chá rihaan ma'. Tananj uún, ne ne cachin se chá rihaan síi vaa doj se chá rihaan ma'", taj nana yo' a.

<sup>16</sup> Nago' uxrá núj graciá rihaan Diose, che'é se ase vaa me ndo'o rá núj racuíj núj man soj ro', danj vaa guun ndo'o rá síi cu'naj Titó racuíj so' man soj, qui'yaj Diose chuguanj. <sup>17</sup> Dan me se cuno so' nana cataj xna'anj núj rihaan so' se vaa ca'anj so' chiháán soj, tzaj ne guun niha' rá ma'an so' racuíj so' man soj, ne che'é dan quirii nimán so' ca'anj so', ne dan me se ca'anj so' chiháán soj a.

<sup>18</sup> Ne cuchí' yo'ó tinúú ní' ga síi cu'naj Titó, ne yo'ó so' ro', me síi a'mii natáj ndo'o se-nana Diose nana sa', ne che'é dan ve'é a'mii taran' nij síi amán rá ni'yaj man Jesucristó ni'yaj nij so' man so' ei. <sup>19</sup> Ne ca'ne' taran' nij síi amán rá ni'yaj man Jesucristó suun rihaan so' ca'anj so' ga núj racuíj so' man núj tacuachén núj sa'anj yo' rihaan nij síi nique yo', gaa ne uxrá ve'é ca'mii yuvii che'é síi 'nij ra'a man ní', ne guun niha' doj rá ma'an núj qui'yaj suun núj suun yo' chuguanj. <sup>20</sup> Tzaj ne na'vej rá núj cataj yuvii se vaa caxríj yuve núj ta'aj sa'anj ma'. <sup>21</sup> 'O se nuchruj raá núj daj qui'yaj núj ne guun niha' rá síi 'nij ra'a man ní' ni'yaj so' man núj, ne guun niha' rá yuvii uún ni'yaj nij yuvii man núj adonj.

<sup>22</sup> Ne ca'nej uún núj man yo'ó tinúú ní' ga roj so' á. Guun que'ee uxrá quene'en núj se vaa sij ya ya me rá qui'yaj suun me so', ne yaj ro', guun ya rá so' se vaa ya ya racuíj soj man nij síi nique, ne che'é dan niha' doj rá so' qui'yaj suun so' che'é soj nanj adonj. <sup>23</sup> Dan me se xa' tinú' Titó, tzaj ne síi 'yaj suun ga 'unj me so', 'yaj suun so' che'é ma'an soj, ne yavij roj

tinúú ní' ro', sí cune' nij sí amán rá ni'yaj man Jesucristó cutumé sa'anj yo' me roj so', ne ve'é ca'mii yuvii che'é Jesucristó, qui'yaj roj so' nanj adonj. <sup>24</sup> Che'é dan gaa 'ee rá soj man nij so', ne ve'é ndo'o qui'yaj soj ga nij so', gaa ne quisij ya 'unj nana ve'é ca'mii núj che'é soj rihaan nij so', ne quene'en taran' nij sí amán rá ni'yaj man Jesucristó daj qui'yaj soj ei.

## 9

<sup>1</sup> Taj che'é cataj xna'anj 'unj rihaan soj che'é sa'anj quirii soj rihaan nij sí sa' noco' man Diose ma'. <sup>2</sup> 'O se aj ne'én 'unj se vaa guun niha' rá soj quirii soj sa'anj rihaan nij so', ne ve'é ca'mii 'unj rihaan nij tinúú ní' sí man estadó Macedonia che'é soj, cataj 'unj: "Yo' cachén ro', guun che'e nij sí man estadó Acaya quirii nij so' sa'anj rihaan nij sí sa' noco' man Diose adonj", taj 'unj che'é soj, gaa ne guun niha' doj rá que'ee nij so' quirii ma'an nij so' sa'anj a.

<sup>3</sup> Tzaj ne ca'nej 'unj nij tinúú ní' cuchí' nij so' rihaan soj, ne racuíj nij so' man soj qui'yaj soj nu' se vaa cataj xna'anj 'unj che'é soj rihaan nij sí man estadó Macedonia a. Me rá 'unj racuíj nij so' man soj naqui'yaj chre' soj sa'anj yo', gaa ne quisij ya nu' nana ca'mii núj che'é soj, raj a. <sup>4</sup> 'O se sese cuchí' ta'aj nij sí man estadó Macedonia chiháán soj ga núj, ne sese xcaj nij so' cuentá se vaa taj vaj sa'anj nuu chre' qui'yaj soj, ne guun na'aj uxrá núj ei. Ne guun na'aj doj ma'an soj che'é nana ca'mii núj se vaa guun ya rá núj se vaa quirii soj sa'anj adonj.

<sup>5</sup> Che'é dan guun rá núj se vaa ca'nej núj man nij tinúú ní' cuchí' nij so' rihaan soj chuguanj. Dan me se asino yaan cuchí' nij tinúú ní' rihaan soj, ne racuíj nij so' man soj naqui'yaj chre' soj sa'anj yo', ne asa' cuchí' núj, gaa ne aj cunuu chre' sa'anj yo' a. 'O se danj qui'yaj soj, gaa ne se gaa nanj guun rá nij sí man Macedonia se vaa na'vej rá soj qui'yaj soj se vaa cataj soj a. 'O se quene'en nij so' se vaa ya me rá soj qui'yaj suun soj nu' suun yo' ei.

<sup>6</sup> Dan me se ne'en soj se vaa sí unô doj tzin' 'núú ro', doj tan' quirii so', ne sí unô nocoo uxrá 'núú ro', nocoo uxrá tan' quirii so', ne ase vaa ran' sí unô 'núú ro', danj quiran' soj che'é sa'anj rque soj vaa adonj. <sup>7</sup> Xcaj yo'o yo'o soj cuentá me daj sa'anj rque yo'o soj, ne se quinanó rá soj che'é sa'anj rque soj mei. Se cataj soj se vaa maan che'é se no xcúún soj rque soj sa'anj, che'é dan rque soj ma'. 'O se sí niha' rá quirii sa'anj rihaan tinúú ro', 'ee rá Diose man so' adonj. Che'é dan inan' sa'anj rii nimán soj ro', go' soj á. <sup>8</sup> Ne guun nucuaj Diose rque ndo'o Diose nu' se sa' man soj, ne ca'vee se me ma'an sayuun quiran' soj, tzaj ne niganj nıcaj soj nu' se cachıın man soj, ne guun nucuaj soj qui'yaj soj nu' suun sa' ca'ne' Diose rihaan soj chuguanj. <sup>9</sup> Ase vaa nana nihánj vaa nana no rihaan danj Diose, taj yo': "Sí niha' rá racuíj man nij sí nique ro', daj chihaa mıj se quini'yón Diose se sa' qui'yaj so' a ma'", taj danj Diose a. <sup>10</sup> Dan me se Diose me sí rque 'núú rihaan sí unô naa, ne Diose me sí rque se chá rihaan sí na'aan rque, ne cavii sa' uxrá nij tinúú ní' che'é se sa' qui'yaj soj, qui'yaj uún Diose ei. <sup>11</sup> Ne me a' se sa' nıcaj soj, gaa ne guun niha' doj rá soj racuíj soj man tinúú ní', ne nago' tinúú ní' graciá rihaan Diose che'é se vaa rque soj sa'anj man núj tacuachén núj rihaan nij so' ei.

<sup>12</sup> Ne xa' suun qui'yaj suun ní' che'é tinúú ní', tzaj ne nuveé inan' suun qui'yaj suun ní' yan caraa rque nij sí sa' noco' man Diose me yo' ma'. 'O se suun qui'yaj suun ní' yan nago' ndo'o yuvii graciá rihaan Diose me suun yo' adonj. <sup>13</sup> Ne quene'en nij yuvii se vaa ya uno soj se-nana Jesucristó nana sa' noco' ní', ne quene'en nij yuvii se vaa niha' rá soj rque soj si'yaj soj man nij sí sa' yan' chuman' Jerusalén do', man taran' nij tinúú ní' do', ne che'é dan guun ya rá nij so' se vaa ya ya sıj noco' man Diose me soj, ne ve'é uxrá ca'mii nij so' che'é Diose a. <sup>14</sup> Ne cunuu 'ee rá ma'an nij tinúú ní' man chuman' Jerusalén man soj,

ne cachinj ni'yaj nij so' rihaan Diose che'é soj, che'é yan uxrá racuíj Diose man soj qui'yaj suun soj che'é nij so' nanj ei. <sup>15</sup> Nago' uxrá ní' graciá rihaan Diose che'é se ve'é uxrá qui'yaj Diose che'é ní', ne daj chihaa mǐj se guun nucuaj ní' cataj ní' nu' se vaa qui'yaj Diose che'é ní' a ma'.

## 10

*Nana nihánj taj xna'anj se vaa no xcúun nij síi man Corinto cunō nij so' rihaan Pabló, ne se cuno nij so' rihaan nij síi tiha' yu'unj a*

<sup>1</sup> Xa' 'unj sij cu'naj Pabló, tzaj ne me rá 'unj gaa 'unj ndaa rá se vaa ma'an Jesucristó adonj. Dan me se na'vej rá 'unj caxrii yuvaa 'unj man soj ma'. Maan se ve'é inanj ca'mij ga soj, raj a. Ne'en soj se vaa vaa yuvii 'nij sca'núj soj taj se vaa ve'é uxrá a'mii 'unj rihaan soj gaa nicún' 'unj rihaan soj, tzaj ne axríj yuvaa 'unj man soj gaa nicún' yanij 'unj a. Danj tu'va nij yuvii yo', tzaj ne cuano nihánj me cataj xna'anj 'unj rihaan soj <sup>2</sup> se vaa qui'yaj soj se ndo'o, ne se qui'yaj tuchi' soj cumán soj, ne asa' cuchí' 'unj, gaa ne se caxríj yuvaa 'unj man soj man ruguanj. Ya quisij rá 'unj caxrii yuvaa 'unj man nij síi taj se vaa inanj 'yaj núj se vaa me rá nee man núj qui'yaj núj nanj á. Tzaj ne taj che'é caxrii yuvaa 'unj man ma'an soj, sese ve'é qui'yaj soj ma'.

<sup>3</sup> Dan me se vaa i'na' nee man núj cuano, tzaj ne ne unu' ma'an nee man núj ga síi chree ma'. <sup>4</sup> Xa' se nucuaj núj, tzaj ne nuveé se nucuaj man rihaan chumiij nihánj me yo' ma'. 'O se se nucuaj rque ma'an ya Diose man núj me yo' adonj. Che'é dan guun nucuaj núj qui'yaj canaán núj rihaan cunudanj nij síi me rá cunu' ga Diose, ne dan me se tiri' núj nana tiha' yu'unj nana avii raaj yuvii, <sup>5</sup> ne tiri' núj nu' nana aráán chrej rihaan yuvii cunō nij yuvii se-nana Diose, gaa ne guun rá nij yuvii cunō nij yuvii rihaan Jesucristó, qui'yaj núj a. <sup>6</sup> Ne asa' cuno ma'an soj rihaan Diose, ne

guun nucuaj núj qui'yaj núj sayuun man cunudanj nij tuvi' soj síi na'vej rá cunō rihaan Diose ei.

<sup>7</sup> Dan me se ni'yaj sa' soj man núj, ne xcaj soj cuentá daj vaa núj, ne sese vaa yo'o tuvi' soj me rá se vaa ya ya noco' so' man Jesucristó, ne xcaj so' cuentá se vaa ase vaa noco' so' man Jesucristó ro', ta'nga' danj vaa noco' ma'an núj uún man Jesucristó nanj adonj. <sup>8</sup> Dan me se ne'en soj se vaa ca'ne' síi 'nij ra'a man ní' suun rihanj, ne veé dan me se na'vej rá so' tiri' 'unj man soj ma'. 'O se me rá so' cavii sa' soj doj qui'yaj nanj adonj. Ne ca'vee se ve'é ca'mij che'é suun atá 'unj, tzaj ne se guun na'aj 'unj daj chihaa mǐj ma'. 'O se ma'an ya síi 'nij ra'a man ní' ca'ne' suun rihanj se vaa ya nō xcúnj ca'nej suun rihaan soj se vaa naqui'yaj sa' soj doj nimán soj adonj.

<sup>9</sup> Dan me se na'vej uxrá rá 'unj guun rá soj se vaa maan che'é se me rá 'unj tuchuví' 'unj man soj me a'neé 'unj nij yanj cartá rihaan soj a mei. <sup>10</sup> 'O se ne'en soj se vaa cataj ta'aj nij síi 'nij sca'núj soj se vaa nda' se nana nucuaj achrón 'unj rihaan yanj cartá, tzaj ne gaa nicún' 'unj rihaan soj, ne ne guun nucuáa 'unj ca'mii sca' 'unj rihaan soj, taj nij so' a. Maan se taj yu'vee nó nana a'mii 'unj rihaan soj gaa nicún' 'unj rihaan soj, taj nij so' a. <sup>11</sup> Tzaj ne xcaj nij síi a'mii danj cuentá se vaa ase vaa nana achrón núj rihaan yanj cartá gaa nuvi' núj yáán ga soj ro', ta'nga' danj gaa suun qui'yaj suun núj asa' cuchí' núj rihaan soj adonj.

<sup>12</sup> Dan me se xa' nij síi a'mii danj, tzaj ne taj nij so' se vaa sa' uxrá vaa ma'an nij so', ne che'é dan se quisij rá núj cataj núj se vaa 'yaj nij so' ndaa vaa 'yaj ma'an núj a. 'O se ne'en núj se vaa nuveé sij acaj cuentá me nij so' ma'. 'O se ma'an nij so' taj se vaa cunudanj yuvii 'yaj tucuáán noco' nij so' ro', me síi sa', ne taj uún nij so' se vaa ma'an nij so' me síi sa' doj rihaan yo'ó nij yuvii noco' tucuáán noco' ma'an nij so', ne



inanj danj tu'va nij so', <sup>13</sup> tzaj ne daj chihaa míj se ca'mii xta' núj ndaa vaa tu'va nij so' danj ma'. Maan se inanj che'é suun ca'ne' ma'an Diose rihaan ma'an núj me ca'mii núj a. Ne Diose me síi ca'ne' suun rihaan núj nata' núj se-nana Diose ndaa rihaan ma'an soj nanj adonj.

<sup>14</sup> Dan me se ne 'anj núj qui'yaj suun núj rej na'vej rá Diose ca'anj núj ma'. 'Q se me rá Diose cuchí' núj rihaan soj cataj xna'anj núj se-nana Jesucristó nana sa' rihaan soj, ne danj qui'yaj núj, ne asino núj me síi cataj xna'anj se-nana Jesucristó rihaan soj nanj adonj. <sup>15</sup> Dan me se se ca'mii xta' núj che'é se vaa qui'yaj yo'ó yuvii ma'. Se cataj núj se vaa ma'an núj me síi qui'yaj se vaa qui'yaj suun yo'ó yuvii ma'. Ne nó xcúún núj qui'yaj núj danj ma'. Maan se na'vij ndo'o núj se vaa cuchuman doj rá soj ni'yaj soj man Diose, gaa ne uxrá doj qui'yaj suun núj sca'núj soj, ndaa vaa me rá Diose qui'yaj núj, <sup>16</sup> gaa ne ndaa guun nucuaj núj cataj xna'anj núj se-nana Diose nana sa' rihaan nij yuvii man yo'ó chuman' gan' doj uún a. Tzaj ne taj che'é cataj núj se vaa ma'an núj me síi qui'yaj se vaa qui'yaj suun yo'ó so' a ma'.

<sup>17</sup> 'Q se síi me rá ca'mii sa' che'é ma'an ro', no xcúún so' cataj so' se vaa sa' qui'yaj so' canoco' so' man síi 'nij ra'a man ní' ei. <sup>18</sup> 'Q se sese cataj yo'ó so' se vaa ma'an so' qui'yaj sa', ne taj se 'yaj ma'. Tzaj ne sese cataj síi 'nij ra'a man ní' se vaa sa' qui'yaj so', ne ya ya sa' qui'yaj so' chuguanj.

## 11

<sup>1</sup> Me rá 'unj ca'vej rá soj ca'mii snuj 'unj doj rihaan soj ei. 'Q se danj vaa ma'an, tzaj ne 'o se caraa x'naa soj doj chuguanj. Dan me se yo'ó danj qui'yaj soj nanj á. <sup>2</sup> Dan me se ase vaa me ndo'o rá Diose cutumé Diose man soj ro', danj vaa me rá 'unj cutumé 'unj man soj ei. 'Q se ase vaa yo'ó chana yaan taj cacun' tumé ro', danj vaa cunudanj nij soj rihaan 'unj, ne cataj 'unj rihaan Jesucristó se vaa ya

nacaj so' man soj canoco' soj man orún' so', taj 'unj rihaan so' ei. <sup>3</sup> Tzaj ne chu'ví' 'unj se vaa ase vaa tiha' yu'unj xcuáá man chana cu'naj Eva gaa naá ro', danj gaa tiha' yu'unj síi chree man soj, ne se guun nucuaj soj xcaj sa' soj cuentá, gaa ne tanáj xco soj man nana sa' nari' soj gaa canoco' soj man Jesucristó, raj nanj adonj. <sup>4</sup> 'Q se ca'vee se ca'na' me ma'an yo'ó so' rihaan soj, ne ca'vee se nata' so' yo'ó nana rihaan soj che'é Jesucristó, ne ca'vee se ino doj gaa se-nana so' ga se-nana núj, tzaj ne nuveé sij rihuun rá me soj a ma'. Ase ra'yanj tanáj xco soj Nimán Diose canoco' soj yo'ó nana xee. <sup>5</sup> Taj che'é tiha' yu'unj nij síi ca'na' man soj ma'. 'Q se sij sa' ndo'o me nij so', rá soj, ne apóstol cune' Jesucristó man me nij so', rá soj, tzaj ne nuveé sij sa' doj me nij so' rihaan 'unj, rá 'unj a ma'. <sup>6</sup> Nda' se ataa nari' sa' 'unj ca'mii natáj 'unj rihaan soj, tzaj ne aj ne'en soj se vaa sij avii raá mej, ne nu' se vaa qui'yaj núj ve'é qui'yaj núj, quene'en cunudanj soj nanj adonj.

<sup>7</sup> Ne'en soj se vaa ne ca'nee 'unj sa'anj man soj gaa ca'mii natáj 'unj se-nana Diose nana sa' rihaan soj ma'. Ne dan me se nuu ni'qué 'unj doj, tzaj ne cavii sa' soj doj adonj. Che'é dan nij qui'yáá 'unj, rá soj na'. Cacun' me se vaa qui'yáj, rá soj na'. <sup>8</sup> Ne nicaj 'unj sa'anj rqué nij síi amán rá ni'yaj man Jesucristó síi man yo'ó chuman', ne cutún' 'unj sa'anj yo'yan guun nucuáá 'unj qui'yaj suun 'unj che'é soj nanj adonj. <sup>9</sup> Ne gaa cayáán 'unj ga soj, ne gaa cachiin rasuun mán 'unj, ne a 'ó rasuun ne cachinj 'unj man soj a ma'. Maan se nij tinúú ní' nij síi ca'na' estadó Macedonia ro', rqué nij so' nu' se vaa cachiin manj, ne dan me se ne caraa chrúú 'unj a doj rihaan soj a ma'. Dan me se veé danj qui'yáj rej rihaan, ne se caráj chrúj rihaan soj, raj man adonj.

<sup>10</sup> Che'é se yanj Jesucristó ga 'unj, che'é dan ne'en soj se vaa ya vaa nana a'mii 'unj rihaan soj, ne cataj xna'anj

'unj rihaan soj cuano se vaa se guun daj chihaa míj cataj yuvii man estadó man soj se vaa quita'aj se-sa'anj soj ma'. <sup>11</sup> Me che'é tu'vaj danj, rá soj ga. Danj tu'vaj che'é se ne 'ee raj man soj, rá soj na'. Taj ma'. 'O se Diose me sí ne'en se vaa ya ya 'ee rá 'unj man soj ei.

<sup>12</sup> Tzaj ne ne'en soj se vaa me rá yo'ó nij so' cataj nij so' se vaa 'o cyaan vaa se 'yaj núj ga se 'yaj nij so', ne che'é dan ase vaa 'yáá 'unj cuano ro', ta'nga' danj qui'yáá 'unj xraj, ne se ca'néj 'unj sa'anj man soj ma'. Ne se ca'vee cataj nij so' se vaa 'o cyaan 'yaj nij so' ga núj a ma'. <sup>13</sup> Dan me se taj nij so' se vaa me nij so' apóstol cune' Jesucristó man nata' se-nana so', tzaj ne a'mii ne nij so', ne dan me se 'yaj suun nij so' rihaan soj, tzaj ne tiha' yu'unj nij so' man soj nanj adonj. Ne ase vaa apóstol cune' Jesucristó man ro', danj vaa nij so' rihaan soj a. <sup>14</sup> Tzaj ne taj se 'yaj sese cuchumán rá soj ni'yaj soj man nij so' ma'. 'O se ma'an sí chree cu'naj Satanás naqui'yaj ino man, ne naqui'yaj sí chree yo' man yo' yo'o se-mozó Diose chuguun ndo'o, ne tiha' yu'unj so' man soj nanj adonj. <sup>15</sup> Ne ase vaa 'yaj sí chree ro', danj 'yaj uún nij so' a. Che'é dan, nuveé se ya'anj tiha' me yo', sese ne'en nij sí 'yaj suun che'é sí cu'naj Satanás qui'yaj nij so' danj a ma'. Ca'vee natuna nij so' man ma'an nij so' guun nij so' sí 'yaj suun che'é rej cunu sa' nimán yuvii ei. Tzaj ne che'é se 'yaj ndo'o nij so' sayuun ro', che'é dan uxrá quiran' nij so' sayuun nu' cavii nu' ca'anj adonj.

<sup>16</sup> Dan me se cataj xna'anj uún 'unj rihaan soj se vaa se guun cataj soj se vaa sij snúú mé 'unj ma'. Ca'vee se sij snúú ya ya mé 'unj rá soj, tzaj ne ve'é nacaj soj manj, ne ve'é cunó soj nana ca'mij, ne ca'mii xta' 'unj doj che'é ma'anj ndaa ase vaa 'yaj yo'ó nij so' ei. <sup>17</sup> (Nuveé nana rqué sí 'nij ra'a man ní' rihaan 'unj me nana nihánj nana ca'mii 'unj rihaan soj cuano ma'. Tananj che'é se snúú rma'anj, don ca'mii 'unj nana nihánj

rihaan soj nanj ei.) <sup>18</sup> Dan me se che'é se que'ee yuvii a'mii xta' che'é se vaa qui'yaj ma'an nij so' ro', che'é dan ca'mii xta' ma'an 'unj doj rihaan soj gaa ei. <sup>19</sup> 'O se ne'en 'unj se vaa sí avii ndo'o raá me soj, rá ma'an soj, ne che'é dan ne ne'en soj se vaa sij snúú me nij sí ca'na' rihaan soj, ne che'é dan niha' rá soj ve'é cunó soj rihaan nij so' a. <sup>20</sup> Ne nda' se rii ta'nga' ndo'o nij so' rihaan soj do', nda' se a'néj nij so' nu' si'yaj soj do', nda' se tiha' yu'unj nij so' man soj do', nda' se sa' doj vaa nij so' rihaan soj rá nij so' do', nda' se ase vaa sí oxro xruu soj vaa nij so' do', tzaj ne ve'é uno soj rihaan nij so' á. <sup>21</sup> Che'é dan guun na'aj núj doj tzin' rihaan soj, che'é se ne guun nucuaj núj qui'yaj núj se nij yo' rihaan soj a mei. 'O se che'é se ne quisij rá núj qui'yaj quij núj ro', che'é dan sa' doj vaa yo'ó nij so', rá soj asanj.

Ne nda' se nana snuj me nana nihánj, tzaj ne ase vaa quisij rá nij so' ca'mii xta' nij so' ro', danj gaa quisij rá ma'anj ca'mii xta' ma'anj rihaan soj ei. <sup>22</sup> Dan me se yuvii israelitá me nij so', taj nij so' na'. 'O se veé danj sij israelitá me ma'anj uún nanj á. Noco' xna'anj tuví' nij so' ga sí cu'naj Abraham sí cane gaa naá, taj nij so' na'. 'O se veé danj sij noco' xna'anj tuví' ga so' mej uún nanj ei. <sup>23</sup> 'Yaj suun nij so' che'é Jesucristó, taj nij so' na'. 'O se veé danj qui'yaj suun gaa 'unj do', nanj á. 'O se nihánj me nana snuj cataj 'unj rihaan soj se vaa 'unj me sí 'yaj suun doj che'é Jesucristó rihaan nij so' nanj ei. Dan me se 'unj nihánj ro', me sí qui'nij doj taga' che'é Jesucristó rihaan nij so' do', uxrá go' nii cuartá xráá 'unj che'é Jesucristó do', que'ee güii daj doj se caví' 'unj che'é Jesucristó do', <sup>24</sup> quisij 'un' ya quita'aa nij sí uun chij rihaan nij yuvii israelitá manj, ne icó xnu' ca'anj ya go' nij so' cuartá xrá a. <sup>25</sup> Va'núj go' nii chruun xrá a. Ne yuun go' nii yahij manj a. Quisij va'núj quirí' rihoo vaj 'unj rihaan na

ya'anj, ne ca'anj cunuū rihoo yo' rque na ya'anj, ne 'o güii 'o yan' quitáá 'unj rihaan na ya'anj cunuū ndo'o ya a. <sup>26</sup> Dan me se aj cachéé ndo'oj nu' nij chrej, ne vaa ndo'o sayuun quirán' 'unj rihaan chráá do', che'é síi ituū do', che'é nij síi israelitá ne noco' man Jesucristó do', che'é nij síi yaníj do', che'é yuvií yanj chuman' do', che'é nij yuvií yanj quij do', che'é na ya'anj do', che'é síi tiha' yu'unj manj se vaa tinúj me nij so' do' á.

<sup>27</sup> Dan me se aj suun ndo'o quirán' 'unj rihaan nij sayuun, ne que'ee yan' ne ca'vee cotoj, ne ta'aj güii me se quina'aan ndo'o rquej, ne yo'ó ta'aj güii canacoō ndo'oj na, ne quisíj que'ee ndo'o ne quiríj chraa chaj, ne ta'aj güii me se go' ndo'o ya nuvíj xráj, ne yo'ó ta'aj güii me se ne quirí' yá 'unj yatzíj caráán xráá 'unj uún, ne dan me se vaa canj yá 'unj nda' rasuun nanj á. <sup>28</sup> Tzaj ne se ca'mii 'unj che'é yo'ó sayuun quirán' 'unj a ma'. Maan se nihánj nanó rá 'unj che'é cunudanj nij síi amán rá ni'yaj man Jesucristó man 'o 'o chuman' a. <sup>29</sup> Sese ne nucuaj nimán yo'ó tinúú ní', ne ase vaa ran' nimán so' ro', danj ran' nimanj, ne sese qui'yaj yo'ó tinúú ní' cacun', ne uun na'aj uxrá ma'anj adonj.

<sup>30</sup> Dan me se, sese me rá soj ca'mii xta' 'unj, tzaj ne inanj cataj xna'anj yaj se vaa ne guun nucuaj ma'anj qui'yaj suun ma'anj a ma'. <sup>31</sup> Diose Rej Jesucristó sij 'nij ra'a man ní' ro', ne'en se vaa a'mii yá 'unj, ne ve'é uxrá ca'mii ní' che'é so' nu' cavii nu' ca'anj nanj ei. <sup>32</sup> Gaa ca'anj 'unj chuman' cu'naj Damasco ro', ne síi nicaj suun 'yaj suun che'é rey cu'naj Aretas ro', caráán so' rej atúj yuvií chuman', che'é yan guun rá so' quita'aa so' manj, <sup>33</sup> tzaj ne na'núj nij tuví' 'unj yo'ó ta'yaa nii taj chraan nicun' nu' anicaj tu'va chuman' yo', ne ca'née nij so' rá 'o scaa manj, ne tinanij nij so' rej xe' manj, ne dan me se curihanj 'unj chuman' yo', ne quinanii 'unj rihaan síi nicaj suun yo'

ei.

## 12

<sup>1</sup> Dan me se taj a doj se quirí' ní' che'é yan ca'mii sa' ní' che'é ma'an ní', tzaj ne nihánj me ca'mii 'unj che'é doj rasuun curuvi' rihanj ei. Ne cataj xna'anj 'unj che'é se vaa tihaan síi 'nij ra'a man ní' rihanj a. <sup>2</sup> Dan me se ne'enj man 'o síi amán ndo'o rá ni'yaj man síi 'nij ra'a man ní' ei. Ne quisíj xca'anj yo' nicaj Diose man so', ca'anj so' rej xta', qui'yaj Diose, ne ndaa va'nuj xta' cavii so' ca'anj so' ei. Dan me se ma'anj me yo' ei. Tzaj ne ne ne'enj sese inanj nimanj cavii ní', ase nu' nee manj cavii ca'anj ní', ne ne'en uxraj ma'. Orún' Diose me síi ne'en daj vaa 'unj gaa cavii 'unj ca'anj 'unj a. <sup>3-4</sup> Ne ne'én 'unj se vaa cavii 'unj ndaa rej sa' ndo'o yanj ma'an Diose, qui'yaj Diose, ne cunó 'unj nana sa' ndo'o nana ne nó xcúún yuvií ca'mii yuvií a. Tzaj ne ne ne'enj sese inanj nimanj cavii ca'anj ní', ase nu' nee manj cavii ca'anj ní', ne ne'en yaj a mei. Orún' Diose me síi ne'en daj vaa 'unj gaa cavii 'unj ca'anj 'unj ei.

<sup>5</sup> Dan me se ve'é ca'mij che'é se vaa quiranj nda' rasuun, tzaj ne se ca'mij che'é se vaa qui'yaj danj ma'. Maan se inanj cataj xna'anj 'unj se vaa nuveé 'o síi sca' mej ma'. <sup>6</sup> Dan me se ca'vee se ve'é ca'mij che'é ma'anj, tzaj ne se ca'mii snuj 'unj ma'. 'O se nana ya ca'mij á. Dan me se me rá 'unj xcaj yuvií cuentá che'é inanj daj vaa 'yáá 'unj ni'yaj nij so' do', che'é inanj nana a'mii 'unj uno nij so' do', gaa ne ca'vee xcaj sa' nij yuvií cuentá daj sij mé 'unj á. Tzaj ne taj che'é cataj xna'anj 'unj yo'ó nana rihaan nij yuvií a mei. Che'é dan se cataj xna'anj 'unj <sup>7</sup> che'é cunudanj nij nana tihaan naca Diose rihanj a mei.

Dan me se ne ca'vej rá Diose ca'mii xta' 'unj ma'. Che'é dan ca'vej Diose qui'yaj síi chree cu'naj Satanás sayuun man nee manj, che'é rej se guun rá 'unj se vaa sij sa' ndo'o mej a. <sup>8</sup> Ne quisíj va'nuj ya cachíín ni'yáá 'unj rihaan síi 'nij ra'a man ní' se vaa

ca'neē so' sayuun yo' rihanj a. <sup>9</sup> Tzaj ne 'o se cataj so' rihanj a:

—Ma'anj racuíj mán so', ne cavii sa' so' á. Che'é dan se ca'néj 'unj sayuun yo' rihaan so' ma'. 'O se che'é se vaa ninaj neē mán so' ro', che'é dan guun nucuáá 'unj racuíj 'unj mán so' qui'yaj suun so' adonj —taj síi 'nij ra'a man ní' rihanj a.

Che'é dan guun niha' rá 'unj cataj xna'anj 'unj se vaa ninaj 'unj, ne guun nucuaj Jesucristó racuíj so' manj qui'yaj sunj a. <sup>10</sup> Dan me se che'é se ninaj 'unj do', che'é se uun na'aj 'unj do', che'é se rán' 'unj sayuun do', che'é se 'yaj ndo'o nii sayuun manj do', che'é nu' se rán' 'unj che'é Jesucristó do', che'é dan guun niha' ndo'o raj chuguanj. 'O se che'é se síi ninaj mej ro', che'é dan guun nucuáaj qui'yaj sunj nanj adonj.

<sup>11</sup> Dan me se nda' rá se tu'va 'o síi snúú tu'vaj, tzaj ne ma'an soj qui'yaj don tu'vaj danj ca'mii snuj 'unj doj ei. 'O se ma'an soj me síi no xcuún cataj se vaa sa' 'yáj ei. Nda' se taj yu'vee nó 'unj, tzaj ne nuveé sij sa' doj me yo'ó nij so' rihanj ma'. Dan me se sij sa' uxrá me nij so', ne ma'an nij apóstol cune' ya ma'an Jesucristó me nij so', rá soj, tzaj ne nuveé sij sa' doj me nij so' rihanj ma'. <sup>12</sup> 'O se 'unj me se suun sa' nocoo ya qui'yáj ni'yaj soj, ne suun sa' nocoo 'yaj nij apóstol cune' Jesucristó man me suun sa' qui'yáj ni'yaj soj, ne dan me se naqui'yaj naj ndo'o 'unj nimanj, ne ne ca'ne' raj ga suun 'yaj suun sa' nocoo yo' ma'. <sup>13</sup> 'O se caraa x'naa soj doj rihanj sese nij ca'mij rá soj ei. Xa' 'unj, tzaj ne a doj ne naqui'yaj yaníj 'unj man soj ma'. 'O se orún' rasuun me naqui'yaj yaníj 'unj adonj. Ne ca'vej ya raj naqui'yaj chrúj rihaan soj ma'. Tzaj ne sese nij qui'yáj ne cachinj 'unj sa'anj rihaan soj, rá soj, ne caraa x'naa soj ei.

<sup>14</sup> Dan me se aj qui'yaj chuvii uún 'unj cuchí' 'unj rihaan soj, gaa ne quisij va'núj cuchí' 'unj rihaan soj, ne asa' cuchí' 'unj rej man soj, ne se ca'néj 'unj rasuun man soj ma'.

Maan se me raj cunō sa' ma'an soj rihanj ei. Dan me se ase vaa ta'nij vaa soj rihanj, ne ne nó xcuún xnii caraa sa' xnii rasuun che'é rej xnii ma'. 'O se maan rej xnii no xcuún caraa sa' rasuun che'é ta'núí so' adonj. <sup>15</sup> Guun niha' rá 'unj cutun' 'unj sa'anj che'é nimán soj, ne ndaa nimán yá 'unj me raj qui'yaj sunj che'é nimán soj chuguanj. Dan me se che'é se 'ee raj man soj, ne doj a rá soj chiha'. Me che'é 'yaj soj danj ga. <sup>16</sup> Dan me se ne ca'neē 'unj rasuun man soj ma'. Tzaj ne vaa yuvii cataj se vaa tiha' yu'unj uxrá 'unj man soj, <sup>17</sup> ne cataj nij yuvii se vaa ca'néé 'unj yo'ó so' cuchí' so' rihaan soj, ne racuíj yo'ó so' manj tiha' yu'unj núj man soj, ne ca'néj núj rasuun rihaan soj, cataj nij yuvii adonj. <sup>18</sup> Dan me se ya cataj xna'anj 'unj rihaan síi cu'naj Titó se vaa cuchí' so' rihaan soj, ne ca'néé 'unj yo'ó tinúú ní' ca'anj ga so' á. Tiha' yu'unj síi cu'naj Titó man soj na'. Taj ma'. 'O se veé orún' Nimán Diose noco' núj ga síi cu'naj Titó, ne cuyaan qui'yaj síi cu'naj Titó ga 'unj nanj adonj.

*Nana nihánj taj xna'anj se vaa me rá Pabló tanáj nij síi man Corinto chrej chí'ii, ne se canó xcuún Pabló qui'yaj so' sayuun man nij síi tumé cacun' a*

<sup>19</sup> Dan me se che'é se chu'ví' ndo'o núj se vaa cuta' soj cacun' xraá núj me se ca'mii ndo'o núj nu' nana nihánj, rá soj na'. Taj ma'. 'O se ne'en Diose daj a'mii núj, ne che'é se sij nocoo man Jesucristó me núj, ne ca'mii núj nu' nana nihánj che'é se 'ee rá núj man soj, ne me rá núj nari' sa' soj canoco' soj man Diose, tinuj, nocoj. <sup>20</sup> 'O se chu'ví' 'unj doj tzin' se vaa cuchí' 'unj chiháán soj ne quene'enj se vaa ne 'yaj soj ndaa vaa no xcuún soj qui'yaj soj, ne cataj soj se vaa ne 'yáá 'unj ndaa vaa me rá soj qui'yáá 'unj a. Chu'ví' 'unj se vaa quene'en 'unj se vaa guun yuvaa soj rihaan tinúú soj do', se vaa guun xcoj ruvaa rá soj ni'yaj soj tinúú soj do', se vaa caxrii yuvaa soj man tinúú soj do',



se vaa cuxra' ta'aj soj man ma'an soj ne guun ra' soj cunu' soj do', se vaa nano' soj cuentó ne che'é tinúú soj do', se vaa ca'mii xta' soj do', se vaa gaa sayuun sca'núj soj do' chuguanj. <sup>21</sup> Dan me se chu'vi' uún 'unj se vaa asa' cuchí' 'unj rihaan soj, ne guun na'aj ndo'o 'unj qui'yaj Diose che'é soj, ne quinano' ndo'o ra' 'unj che'é que'ee nij tinúú ní' nij síí tumé cacun', che'é se na'vej ra' nij so' tanáj nij so' cacun' ne cunu sa' nimán nij so' a. 'O se yo'o cutumé nij so' cacun' se vaa nij ndo'o 'yaj nij so' do', se vaa 'yaj nij so' cacun' ga yo'ó chana do', nanj ei.

### 13

<sup>1</sup> Dan me se cuchí' uún 'unj, ne quisij va'núj cuchí' 'unj rihaan soj, ne sese vaa yo'o tinúú soj síí tumé cacun', ne sese canicun' vij síí quene'en do', sese canicun' va'núj síí quene'en do', ne quirí' so' sayuun nanj á. <sup>2</sup> Gaa quisíj vij cuchí' 'unj rihaan soj, ne cataj xna'anj 'unj rihaan soj se vaa sese cuchí' uún 'unj rihaan soj, ne se caráj x'naj quene'enj man síí qui'yaj cacun' ma'. Ne cuano' nihánj me se nuví' 'unj ne rej man soj, tzaj ne cataj xna'anj uún 'unj rihaan soj se vaa ya ya qui'yáa' 'unj sayuun man cunudanj nij síí tumé cacun' yo' ei. <sup>3</sup> 'O se ca'vee don ma'an soj me ra' quene'en sese ya ya Jesucristó me síí rque nana a'mii 'unj rihaan soj ei. Xa' Jesucristó, tzaj ne nuveé sij ninaj me so' rihaan soj ma'. 'O se sij guun nucuaj ndo'o tumé man soj me Jesucristó ei. <sup>4</sup> Dan me se ca'vej ra' Jesucristó guun nucuaj doj yuvi rihaan so', ne cachrón nii man so' rihaan rcutze, tzaj ne guun nucuaj so' cunu i'na' uún so', qui'yaj Diose, ne che'é se noco' núj man Jesucristó ro', che'é dan ase vaa síí ninaj vaa ma'an núj rihaan chumii nihánj, tzaj ne Diose ro', me síí rque se nucuaj man núj, gaa ne guun nucuaj núj ga Jesucristó qui'yaj suun núj ga nij soj nanj adonj.

<sup>5</sup> Xcaj ma'an soj cuentá sese ya ya noco' soj se-tucuanj Jesucristó ei. Ne'en soj se vaa yanj Jesucristó ga soj na'. Ase ne ne'en soj xa'. Ya ne Jesucristó ga soj, sese nuveé sij tiha' yu'unj me soj chuguanj. <sup>6</sup> 'O se amán ya raj, ne me raj quene'en soj se vaa nuveé sij tiha' yu'unj me núj man chuguanj. <sup>7</sup> 'O se achíin ni'yaj núj rihaan Diose se vaa a 'ó se chí'ii se qui'yaj soj mei. Nuveé che'e se me ra' núj cataj yuvi se vaa sa' qui'yaj núj me achíin ni'yaj núj danj ma'. 'O se che'é se me ra' núj qui'yaj sa' inan soj, che'é dan achíin ni'yaj núj danj rihaan Diose ei. Ca'vee se cataj yuvi se vaa síí tiha' yu'unj me ma'an núj, tzaj ne yo'o qui'yaj sa' soj ei. <sup>8</sup> 'O se se guun nucuaj núj tiha' yu'unj núj man Diose daj vaa nimán 'o 'o ní' ma'. Maan se inan a tananj rquee núj ca'mii núj nana ya che'é 'o 'o ní' a. <sup>9</sup> Ne ca'vee se nuveé sij nucuaj me núj, tzaj ne uun niha' ra' núj che'é se sij nucuaj me soj, ne achíin ni'yaj núj rihaan Diose se vaa rque Diose nu' se vaa achiin man soj, gaa ne qui'yaj suun soj che'é so' a. <sup>10</sup> Che'é dan cuano' nihánj me se cachrón 'unj nana nihánj rihaan yanj cartá nayaá soj a. Dan me se nda' se nuví' 'unj yáan ga soj cuano, tzaj ne cachrón 'unj nana nihánj, gaa ne güii cuchí' 'unj rihaan soj me se se gaa suun rihanj qui'yaj ndo'oj sayuun man soj a. Dan me se ca'ne' síí 'nij ra'a man ní' suun rihanj cutumej man soj, ne dan me se na'vej ra' so' quirí' soj qui'yaj ma'. 'O se me ra' so' racuíj 'unj man soj yan canoco' sa' soj man so' adonj.

*Nana nihánj taj xna'anj se vaa a'néé nij tuvi' Pabló saludó rihaan nij síí man Corinto a*

<sup>11</sup> Ne vaa doj nana me raj cataj xna'anj 'unj rihaan soj, tinuj, nocoj. Dan me se gaa niha' nimán soj ei. Racuíj soj nana sa' man tinúú soj yan guun nucuaj soj canoco' soj man Diose á. Se guun cano' tuvi' soj ga tuvi' soj ma'. 'O se cyaan gaa nimán soj ga tuvi' soj ei. Ne cayaán Diose

ga soj ei. 'O se Diose me sí 'yaj nuu 'ee rá ní' tinúú ní', ne vaa xej nimán ní', 'yaj Diose a. <sup>12</sup> Ne gaa nari' tuvi' soj ga tinúú soj, ne uxrá ve'é ca'mii soj ga tinúú soj ei. Danj me rá Diose qui'yaj soj chuguanj. <sup>13</sup> Ve'é cayáán nij soj, rá cunudanj nij sí sa' rihaan Diose ei. <sup>14</sup> Dan me se me rá núj qui'yaj ndo'o Jesucristó sij 'nij ra'a man ní' se luj che'é cunudanj soj, ne me rá núj gaa 'ee rá Diose ni'yaj Diose man cunudanj soj, ne me rá núj ve'é ca'mii cunudanj soj ga tinúú soj qui'yaj Nimán Diose nanj adonj.

**Nihánj me 'o yanj  
cartá qui'yaj sítí cu'naj  
Pabló ca'néé so'  
rihaan nij yuvii noco'  
man Diose yanj estadó  
cu'naj Galacia a**

<sup>1</sup> Sítí cu'naj Pabló mej, ne dan me se gaa cavi' Jesucristó, ne cunuu i'na' uún so', qui'yaj Diose, ne Jesucristó do', Rej ní' Diose do', me roj sítí cune' mán 'unj guún 'unj apóstol nata' se-nana Jesucristó rihaan cunudanj nij yuvii man rihaan chumii a. Nuveé inanj yuvii me sítí cune' mán 'unj ma'. Ma'an ya Diose cune' mán 'unj adonj. <sup>2</sup> Dan me se taran' nij tinúú ní' sítí ne ga 'unj ro', 'yaj yanj cartá nihánj ga 'unj, ne ca'nej núj yanj nihánj rihaan nij soj sij amán rá ni'yaj man Jesucristó sij yanj nij chuman' naj rihaan estadó Galacia a. <sup>3</sup> Dan me se me rá núj qui'yaj Rej ní' Diose qui'yaj Jesucristó sij 'nij ra'a man ní' qui'yaj ndo'o se luj che'é nij soj, ne me rá núj gaa xej nimán soj qui'yaj roj so' adonj. <sup>4</sup> Dan me se chí'ii vaa nimán yuvii man rihaan chumii nihánj cuano, ne me rá Rej ní' Diose quinanií ní' rihaan sayuun quiran' nij yuvii man rihaan chumii nihánj, ne che'é dan ca'vej Jesucristó sij 'nij ra'a man ní' cavi' ya ma'an so' che'é cacun' tumé ní' adonj. <sup>5</sup> Sa' uxrá vaa 'yaj Diose, cataj ní' nu' cavii nu' ca'anj a. Veé danj gaa ya ei.

*Nana nihánj taj xna'anj se vaa se canoco' ní' yo'ó nana ma'. Maan se inanj se-nana Jesucristó canoco' ní' a*

<sup>6</sup> Ne ne'en uxraj me che'é me rá nij soj tanáj ra'yanj soj man Diose ne canoco' soj yo'ó nana ma'. Ne'en soj se vaa qui'yaj ndo'o Jesucristó se luj che'é soj, ne che'é dan canacúún ma'an Diose man soj canoco' soj man so', ne me che'é me rá soj tanáj soj man Diose ga. <sup>7</sup> Nuveé se vaa yo'ó se-tucuanj Diose ma'. Maan se vaa

nij sítí me rá naqui'yaj ino se-tucuanj Jesucristó chuguanj. Tzaj ne inanj se-nana Diose nana cataj xna'anj núj rihaan soj che'é Jesucristó me nana sa' adonj. <sup>8</sup> Che'é dan se ca'vej rá soj nata' yuvii yo'ó nana naca rihaan soj mei. 'O se inanj nana nata' núj rihaan soj asij rque ro', cuchuman rá soj ei. Dan me se ca'vee se ndaa ma'an núj do', ca'vee se ndaa 'o se-mozó Diose nanij rej xta' do', nata' yo'ó nana naca rihaan soj, tzaj ne yo'o guun ya rá soj se vaa quiran' ndo'o sítí a'mii yo'ó nana yo' sayuun qui'yaj Diose á. 'O se taj sítí no xcuún natuna se-nana Diose ma'. <sup>9</sup> Dan me se aj cataj xna'anj núj rihaan soj, ne cuano nihánj me cataj xna'anj uún 'unj rihaan soj, se vaa sese ino gaa nana nata' yo'o so' rihaan soj ga nana canoco' soj asij rque, ne guun ya rá soj se vaa quiran' uxrá sítí nata' yo'ó nana yo' sayuun, qui'yaj Diose ei.

*Nana nihánj taj xna'anj se vaa inanj me rá sítí cu'naj Pabló gaa niha' rá Diose ni'yaj Diose man so' a*

<sup>10</sup> Me rá 'unj gaa niha' rá yuvii ni'yaj yuvii mán 'unj, rá soj na'. Taj mei. 'O se inanj me rá 'unj gaa niha' rá Diose ni'yaj Diose manj ei. Dan me se gaa rque me se inanj me rá 'unj gaa niha' rá yuvii ni'yaj yuvii manj, tzaj ne yaj ro', me taj ma'. Sese inanj guun rá 'unj gaa niha' rá yuvii ni'yaj yuvii mán 'unj, ne nuveé sij 'yaj suun che'é Jesucristó mé 'unj a man chuguanj.

*Nana nihánj taj xna'anj se vaa nana a'mii natáj Pabló ro', orún' Jesucristó me sítí tucu'yón nana yo' man so' a*

<sup>11</sup> Me rá 'unj xcaj nij soj cuentá se vaa se-nana Diose nana sa' a'mii natáj 'unj ro', nuveé nana cavii raá yuvii me nana yo' ma'. <sup>12</sup> Ne nuveé yuvii nata' nana yo' rihanj ma'. Ne taj sítí tucu'yón nana yo' manj ma'. Tzaj ne ma'an ya Jesucristó me sítí qui'yaj xcaj 'unj cuentá che'é nana sa' yo' adonj.

<sup>13</sup> Aj ne'en soj daj vaa raj asij rque doj adonj. Dan me se gaa canoco' 'unj tucuaán noco' nij yuvii israelitá, ne

dan me se qui'yaj ndo'o 'un̄j sayuun man taran' nij síi cuchumán rá ni'yaj man Diose, ne qui'yaj suun uxrá 'un̄j che'é se me rá 'un̄j tiri' 'un̄j man nij so' a. <sup>14</sup> Ne tucuáán noco' nij yuvií israelitá ro', 'un̄j me síi noco' sa' doj tucuáán yo' rihaan que'ee nij tuvi' 'un̄j síi israelitá vaa cuyaán ga 'un̄j ei. Ne 'un̄j ro', me síi a'née sa' doj nu' se-tucuanj xií 'un̄j sij israelitá adonj.

<sup>15</sup> Tzaj ne asij ataa ca'ngaa 'un̄j, ne guun rá Diose se vaa qui'yaj sunj che'é so' ei. Dan me se qui'yaj ndo'o Diose se luj che'ej se vaa canacúun so' manj qui'yaj sunj che'é so', <sup>16</sup> ne tihaan so' ta'níi so' Jesucristó rihanj, che'é se me rá so' ca'an̄j 'un̄j nata' 'un̄j se-nana so' nana sa' rihaan nij yuvií yaníj nanj adonj. Tzaj ne 'un̄j me se a doj ne ca'an̄j 'un̄j xna'an̄j 'un̄j man yuvií daj qui'yáj canocoj man Diose ma'. <sup>17</sup> Dan me se vaa nij síi yanj chuman' Jerusalén, ne apóstol cune' Jesucristó nata' se-nana so' rihaan yuvií me nij so', ne dan me se asij ataa cune' Jesucristó mán 'un̄j ro', cune' Jesucristó man nij so', tzaj ne ne cuchí' 'un̄j rihaan nij so' xna'an̄j 'un̄j man nij so' daj qui'yáj ma'. Maan se ra'yanj ca'an̄j 'un̄j cuaj estadó Arabia, ne canicaj 'un̄j ca'naj chuman' Damasco adonj.

<sup>18</sup> Quisíj va'nuj ya yo' nocoj man Jesucristó ta' asuun, gaa ne ca'an̄j 'un̄j chuman' Jerusalén, gaa ne cunuu yaan 'un̄j man síi cu'naj Pedró a. Dan me se nanó 'un̄j cuentó ga so', ne cayáán 'un̄j tucuá so' rque xnu' güii a. <sup>19</sup> Ne dan me se gaa canej ga so' me se quene'enj man síi cu'naj Santiagó tinúú síi 'nij ra'a man ní' uún a. Tzaj ne orún' so' quene'enj nanj á. Ne ne quene'én 'un̄j man yo'ó nij apóstol ma'. <sup>20</sup> Ne'en ya Diose se vaa ya vaa nana nihánj nana cachrón 'un̄j rihaan yanj nihánj adonj. Nuveé nana ne me nana nihánj ma'.

<sup>21</sup> Dan me se curihanj 'un̄j chuman' Jerusalén, ne cachée 'un̄j nu' chuman' naj estadó Siria do', nu' chuman' naj estadó Cilicia do', <sup>22</sup> tzaj ne

nij síi man estadó Judea síi cuchumán rá ni'yaj man Jesucristó ro', me se ne quene'en̄j nij so' mán 'un̄j ma'. <sup>23</sup> Maan se cuno nij so' cuentó cataj xna'an̄j tuvi' nij so' che'é 'un̄j se vaa síi chí'ii ndo'o mé 'un̄j, tzaj ne yaj nihánj cuano me se sij a'mii natáj se-nana Diose mé 'un̄j cuano, taj nij so', caráya'an̄j nij so' a. "Síi qui'yaj ndo'o sayuun man ní' gaa rque me se cuano nihánj nata' ma'an so' nana sa' nana noco' ní' nana me rá so' tiri' so' gaa rque chuguanj", taj tuvi' nij so' a. <sup>24</sup> Dan me se caráya'an̄j ndo'o nij so', ne cataj nij so' se vaa sa' uxrá qui'yaj Diose se vaa quene'en̄j nij so' manj a.

## 2

<sup>1</sup> Dan me se cachén xca'an̄j yo' gaa curihanj 'un̄j chuman' Jerusalén, gaa ne canicaj uún 'un̄j ca'an̄j 'un̄j chuman' Jerusalén ga síi cu'naj Bernabé, ne dan me se nicaj núj man síi cu'naj Titó ca'an̄j núj rej yo' a. <sup>2</sup> Dan me se ca'an̄j 'un̄j chuman' Jerusalén, che'é se cataj xna'an̄j Diose rihaan 'un̄j se vaa me rá Diose ca'an̄j 'un̄j chuman' Jerusalén, ne cataj xna'an̄j 'un̄j rihaan nij tinúú ní' síi israelitá daj vaa nana sa' nana ca'mii natáj 'un̄j rihaan nij soj sij yaníj a. Tzaj ne quirii yaníj 'un̄j man nij síi uun chij doj rihaan nij so', ne natá' 'un̄j rihaan ma'an̄j inanj nij so' che'é nana a'mii natáj 'un̄j rihaan nij soj a. Dan me se me rá 'un̄j xcaj sa' nij síi uun chij yo' cuentá daj vaa se-nanaj, gaa ne se gaa nanj tiri' nij so' nu' suun qui'yaj suun 'un̄j che'é Jesucristó a.

<sup>3</sup> Ne nicun' síi cu'naj Titó ga 'un̄j, ne nda' se nuveé sij israelitá me so', tzaj ne ne qui'yaj nij síi man Jerusalén fuerzá man so' cata' ta'nga' man so' ma'. <sup>4</sup> Tzaj ne doj nij síi tiha' yu'unj, ne dan me se taj nij so' se vaa tinúú ní' me nij so', tzaj ne nuveé tinuj ní' me nij so' ma'. 'Q se tu'va rma'an̄j nij so' nanj adonj. Dan me se catúj yuve nij so' rej nuu chre' núj, ne me rá nij so' quene'en̄j yuve nij so' daj qui'yaj núj a. Tzaj ne xa' ní' sij canoco' man Jesucristó, tzaj ne daj chihaa



míj ne nó xcúún ní' canoco' ní' nu' se-tucuanj Moisés a ma'. Che'é dan guun rá nij so' xcaj nij so' cuentá daj 'yaj ní', gaa ne tihaañ uún nij so' man ní' canoco' ní' nana noco' nij so', rá a nij so' a. <sup>5</sup> Tzaj ne núj me se a 'ó xco' nii ne cunō núj rihaan nij so' a ma'. 'O se guun rá núj se vaa ve'é ya quinaj nu' se-nana Diose nana ya rihaan soj, rá núj adonj. <sup>6</sup> Dan me se ase vaa síi uun chij vaa ta'aj nij síi man Jerusalén, rá nii, tzaj ne taj vaj síi sa' doj rihaan tuvi', rá 'unj a ma'. Maan se 'o cyaan vaa cunudanj yuvii rihaan Diose nanj adonj. Dan me se nij síi uun chij yo' ro', ne cataj xna'anj nij so' a doj nana rihaan 'unj ma'. Maan se cunaj vaa nana ca'mii natáj 'unj, taj nij so' a.

<sup>7-8</sup> Dan me se Diose me síi qui'yaj guun nucuaj síi cu'naj Pedró nata' so' se-nana Diose nana sa' rihaan nij yuvii israelitá, ne danj qui'yaj guee Diose ga 'unj uún, ne dan me se guun nucuáa 'unj nata' 'unj se-nana Diose nana sa' rihaan nij yuvii yaníj, qui'yaj Diose, ne che'é dan me xcaj nij síi uun chij man Jerusalén cuentá se vaa ne cachiiñ doj nana man 'unj a. Maan se ase vaa ata síi cu'naj Pedró suun nata' rihaan nij yuvii israelitá, qui'yaj Diose ro', danj vaa ata 'unj suun nata' rihaan nij yuvii yaníj, qui'yaj uún Diose a. <sup>9</sup> Ne quene'en síi cu'naj Santiagó do', síi cu'naj Pedró do', síi cu'naj Juan do', se vaa qui'yaj ndo'o Diose se luj che'é 'unj do', che'é síi cu'naj Bernabé do', se vaa guun nucuáa 'unj nata' 'unj se-nana Diose nana sa' rihaan yuvii, qui'yaj Diose, ne guun ya nu' rá nij so' se vaa Diose me síi ca'ne' suun rihaan núj ei. Dan me se síi uun chij rihaan nij síi cuchumán rá ni'yaj man Jesucristó man Jerusalén me nij so', tzaj ne guun ya rá nij so' se vaa tuvi' ma'an nij so' me núj, ne 'o cyaan vaa suun vaa rihaan núj ga suun vaa rihaan nij so', rá nij so' a. Dan me se ne nata' nij so' se-nana Diose nana sa' rihaan nij yuvii israelitá, ne tananj núj uún, ne

nata' núj rihaan nij síi yaníj, cataj nij so' uún a. <sup>10</sup> Tzaj ne orún' ya rasuun me cachiiñ ni'yaj ndo'o nij so' rihaan núj se vaa asino nij síi nique me racuíj núj, taj nij so' a. Tzaj ne tumé ndo'o núj man nij síi nique, ne asino yo' me 'yaj núj chéé núj ei.

*Nana nihánj taj xna'anj che'é nana cataj xna'anj Pabló rihaan síi cu'naj Pedró, se vaa inanj che'é Jesucristó cunuu sa' ní' rihaan Diose a*

<sup>11</sup> Cachén doj güii, gaa ne cuchi' síi cu'naj Pedró chuman' cu'naj Antioquía a. Tzaj ne qui'yaj so' doj se nij, ne tumé so' cacun' che'é se nij qui'yaj so', rá 'unj, ne che'é dan ca'mii rihaan yaj ga so' rihaan cunudanj yuvii, ne cataj 'unj se vaa tumé so' cacun' che'é se vaa qui'yaj so' a. <sup>12</sup> Dan me se gaa ca'na' so' chuman' Antioquía, ne xcaj so' cuentá se vaa ca'vee cha so' chraa ga nij yuvii yaníj, ne danj qui'yaj so', ne cha so' chraa ga nij so' chuguanj. Tzaj ne gaa namán nij síi ca'na' suun qui'yaj síi cu'naj Santiagó chuman' nihánj, gaa ne cucu'vi' Pedró ca'mii nij síi man Jerusalén síi taj se vaa no xcúún cunudanj nij snó'o noco' man Diose cata' ta'nga' man nij so' a. Dan me se chu'vi' Pedró se vaa xcaj nij so' cuentá se vaa chá so' chraa ga nij yuvii yaníj, ne cataj nij so' se vaa ne nó xcúún so' qui'yaj so' danj, rá so', ne che'é dan me ca'ne' rá so' ga rej chá chraa ga nij yuvii yaníj, ne naxuun yaníj so' man so' rihaan nij yuvii yaníj nanj adonj. <sup>13</sup> Quene'en ma'an so' se vaa ca'vee cha so' chraa ga nij yuvii yaníj, tzaj ne nuveé sij 'o vaa rá ga nana a'mii me so' a ma'. Ne ase vaa qui'yaj so' ro', ta'nga' danj qui'yaj uún taran' nij yuvii israelitá, ne ndaa síi cu'naj Bernabé qui'yaj cacun' ga nij so' se vaa ca'ne' rá so' ga rej chá chraa ga nij yuvii yaníj nanj adonj.

<sup>14</sup> Dan me se xcaj 'unj cuentá se vaa ne raan noco' nij so' se-nana Diose nana ya ma'. Dan me se ca'mii yá 'unj rihaan Pedró, ne cuno taran' nij so', ne cataj 'unj:

—Sís israelitá mé so', tzaj ne ne nocó' so' tucuáán nocó' nij yuvii is-raelitá ma'. Maan se ase vaa 'yaj nij yuvii yaníj ro', danj vaa 'yáá so' chuguanj. Me che'é qui'yáá so' fuerzá man nij yuvii yaníj canoco' nij yuvii yaníj tucuáán nocó' nij yuvii is-raelitá ga. <sup>15</sup> Dan me se yuvii israelitá me ní' á. Nuveé yuvii yaníj yuvii 'yaj ndo'o cacun' me ní' ma'. <sup>16</sup> Tzaj ne ne'en ní' se vaa nda' se ve'é noco' yo'o so' se-tucuanj Moisés, tzaj ne se cunuu sa' ma'an so' rihaan Diose ma'. 'O se cunuu sa' ya so' rihaan Diose sese cuchuman rá so' ni'yaj so' man Jesucristó adonj. Dan me se cuchumán rá ma'an ní' ni'yaj ní' Jesucristó, yan cunuu sa' ní' rihaan Diose, tzaj ne se cunuu sa' ní', qui'yaj se-tucuanj Moisés ma'. Inanj danj taj danj Diose á. A 'ó yuvii se cunuu sa' rihaan Diose qui'yaj se-tucuanj Moisés ma', taj uún danj Diose adonj. <sup>17</sup> 'O se ní' me se canoco' ní' man Jesucristó, gaa ne ca'vee x'nee cacun' xráá ní' qui'yaj so', rá ní', tzaj ne 'o se veé danj 'yaj ní' cacun' ta' rasuun chiha'. Me che'é 'yaj ní' danj ga. 'O se Cristó me síi ca'ne' suun qui'yaj ní' cacun', rá so' na'. Taj ma'. —Nu' nana nihánj me nana ca'mii 'unj rihaan síi cu'naj Pedró adonj.

<sup>18</sup> Dan me se ma'an 'unj me síi tiri' chrej canoco' se-tucuanj Moisés, ne veé dan, gaa ne sese guun che'e uún 'unj naquiyaj sa' uún 'unj man chrej yo', ne dan me se ma'an inanj yá 'unj me síi tumé cacun' gaa nanj adonj. <sup>19</sup> Asij rque me se canocó' 'unj tucuáán yo', tzaj ne quiri' rá 'unj, qui'yaj tucuáán yo', ne yaj me se ase vaa cavi' Jesucristó rihaan rcutze ro', danj vaa cavi' 'unj rihaan tucuáán yo' chuguanj. Ne yaj me se inanj che'é Diose gaa i'na' 'unj ei. <sup>20</sup> Che'é se amán rá 'unj ni'yaj 'unj Jesucristó ro', maan che'é dan vaa i'na' 'unj ei. Yaj me se nuvé 'unj me síi yanj cuano ma'. 'O se Jesucristó me síi yanj nimanj, ne che'é dan vaa i'na' 'unj cuano ei. Che'é se amán rá 'unj ni'yaj 'unj man ta'níi Diose ro', che'é

dan inanj nocó' 'unj man so' gaa chéé 'unj rihaan chumii nihánj adonj. Ne dan me se maan che'é se cunuu 'ee uxrá rá so' mán 'unj ro', che'é dan ca'ne' guee rá so' cavi' so' rihaan rcutze che'é 'unj nanj adonj. <sup>21</sup> Ne na'vej rá 'unj tanáj yaníj 'unj se luj qui'yaj Diose che'é 'unj ma'. 'O se vaa che'é ya qui'yaj Diose se luj adonj. Dan me se sese ca'vee ya navij cacun' che'é qui'yaj se-tucuanj Moisés, gaa ne cavi' uun ma'an Jesucristó vaa gaa aj na'. Taj ma'. 'O se ne cavi' uun so' mei.

### 3

*Nana nihánj taj xna'anj se vaa inanj che'é se amán rá ní' ni'yaj ní' man Jesucristó, che'é dan yanj Nimán Diose ga ní' a*

<sup>1</sup> Sís nij snúú rma'an ya me soj sij man estadó Galacia nanj chuguanj. Me che'é guun rá soj tanáj soj tucuáán sa' ga. Vaa síi qui'yaj chree man soj na'. Nuveé se sa' uxrá nata' nii rihaan soj se vaa cavi' Jesucristó rihaan rcutze che'é soj á. <sup>2</sup> 'O se me rá 'unj xna'anj 'unj 'o nana man soj chuguanj. Che'é se canoco' nij soj se-tucuanj Moisés me yáán Nimán Diose ga soj na'. Ase che'é se amán rá soj cuno soj se-nana Jesucristó me yáán Nimán Diose ga soj xa'. <sup>3</sup> 'O se síi nij snúú rma'an ya me soj nanj chuguanj. Gaa guun che'e soj canoco' soj man Jesucristó, ne guun nucuaj rá soj man Nimán Diose se vaa racuíj Nimán Diose man soj, tzaj ne yaj me se nucuaj rá soj man ma'an soj se vaa cunuu sa' soj qui'yaj ma'an soj nanj ason. <sup>4</sup> Nu' se sa' qui'yaj Diose che'é soj gaa canoco' naca soj man Jesucristó ro', taj yu'vee nó yo', qui'yaj soj a a' man ason. Ya ya aj na'. Ne cuchuman ya raj se vaa qui'yaj soj a mei. <sup>5</sup> Gaa rque Diose Nimán so' rihaan soj qui'yaj ndo'o soj rasuun sa', gaa ne me che'é qui'yaj Diose danj, rá soj ga. Che'e se canoco' soj se-tucuanj Moisés me qui'yaj Diose danj na'. Taj mei. Dan me se che'é se amán rá soj

ni'yaj soj man Jesucristó me qui'yaj Diose danj chuguanj.

<sup>6</sup> Dan me se ase vaa qui'yaj síi cu'naj Abraham síi cayáán gaa naá ro', inanj danj qui'yaj soj ei. Dan me se síi cu'naj Abraham ro', me se cuchumán rá so' ni'yaj so' Diose, ne che'é dan cataj Diose se vaa sij sa' me Abraham, ne cunuu sa' so' rihaan Diose á. Inanj danj a'mii danj Diose adonj. <sup>7</sup> Che'é dan xcaj soj cuentá se vaa ní' sij amán rá ni'yaj man Diose me se ase vaa síi cu'naj Abraham ro', ta'nga' danj vaa ma'an ní' chuguanj.

<sup>8</sup> Dan me se gaa naá ne'en Diose se vaa cuchuman rá nij yuvij yanij ni'yaj nij so' man Diose, ne ne'en Diose se vaa cunuu sa' nij so' rihaan Diose, qui'yaj ma'an Diose, ne che'é dan me nata' Diose se-nana Diose nana sa' rihaan Abraham, cataj Diose:

—Che'é se vaa qui'yáá so' ro', che'é dan me qui'yáá 'unj se luj che'é taran' nij yuvij yanij adonj —taj Diose rihaan síi cu'naj Abraham asij taj vaj a 'ó yuvij ne'en se-nana Diose nana sa', ne nu' nana yo' nana ca'mii Diose rihaan síi cu'naj Abraham ro', canó nana yo' rihaan danj Diose a.

<sup>9</sup> Dan me se cuchumán rá Abraham ni'yaj so' Diose, ne qui'yaj Diose se luj che'é so', ne ase vaa qui'yaj Diose che'é síi cu'naj Abraham ro', danj qui'yaj uún Diose che'é taran' nij síi cuchuman rá ni'yaj man so', ne qui'yaj uún Diose se luj che'é nij so' adonj.

*Nana nihánj taj xna'anj se vaa se ca'vee cunuu sa' ní' rihaan Diose, qui'yaj se-tucuanj Moisés a ma'*

<sup>10</sup> Tzaj ne a'mii uún danj Diose che'é yuvij nucuaj rá man se-tucuanj Moisés, taj yo': “Sese se qui'yaj yo'ó so' cunudanj nij nana no' rihaan danj Diose nana cataj xna'anj Moisés ro', ne so' me síi cachran' xna'anj ni'yaj rihaan Diose á”, taj danj Diose, ne a 'ó yuvij se guun nucuaj qui'yaj nu' se-tucuanj Moisés a ma'. Che'é dan me taran' nij yuvij nucuaj rá man se-tucuanj Moisés ro', quiran' nij so'

sayuun, qui'yaj Diose adonj. <sup>11</sup> Tzaj ne: “Síi amán rá ni'yaj man Diose ro', me se cunuu sa' so' rihaan Diose, ne cayáán so' ga Diose nu' cavii nu' ca'anj a”, taj uún danj Diose, ne che'é dan me ne'en ní' se vaa inanj nij yuvij amán rá ni'yaj man Diose me yuvij cunuu sa' rihaan Diose á. Se cunuu sa' nij yuvij nucuaj rá man se-tucuanj Moisés ma'. <sup>12</sup> Dan me se xa' se-tucuanj Moisés, tzaj ne ne che'e yan cuchuman rá' me nani' rihaan sayuun ma'. Maan che'é yan qui'yá' nu' rasuun taj tucuaán yo' me nani' rihaan sayuun, taj se-tucuanj Moisés nanj adonj.

<sup>13</sup> Dan me se gaa naá me se ne guun nucuaj ní' qui'yaj ní' nu' se-tucuanj Moisés ma'. Che'é dan me sij cachran' xna'anj ni'yaj me ya ní' gaa rque, tzaj ne cavi' Jesucristó rihaan rcutze che'é ní', ne guun so' síi cachran' xna'anj ni'yaj che'é ní', ne che'é dan se quiran' ma'an ní' sayuun daj chihaa mój a man chuguanj. “Síi aj noco' rihaan rcutze me síi cachran' xna'anj ni'yaj rihaan Diose”, taj danj Diose á. Dan me se guun Jesucristó 'ó síi cata se-cacun' cunudanj ní' nago' so' nu' nij cacun' yo' rihaan rcutze, ne cuano nihánj me se síi vaa uun xráa me ní' cuano ei. <sup>14</sup> Ndaa síj, gaa ne se luj cata' tu'va Diose rihaan síi cu'naj Abraham ro', ca'na' se luj yo' ndaa rihaan nij yuvij yanij, che'é se vaa qui'yaj Jesucristó a. Dan me se gaa naá, ne cata' tu'va Diose se vaa catuu Nimán Diose nimán ní', ne cuchumán rá ní' ni'yaj ní' man Diose, ne che'é dan catúj ya Nimán Diose nimán taran' ní' cuano ei.

*Nana nihánj taj xna'anj se vaa cata' tu'va Diose rihaan síi cu'naj Abraham cataj Diose se vaa rque ndo'o Diose se sa' rihaan nij ta'nú ta'nij si'no Abraham a*

<sup>15</sup> Ne ca'mij 'unj che'é ndaa vaa 'yaj nij síi man rihaan yo'óo nihánj, tinuj, nocoj. Sese vaa vij roj so' numíj nana, ne asa' quisíj numíj roj so' nana, gaa ne naxcaj roj so' 'ó yanj a'mii che'é

ndaá vaa qui'yaj roj so', gaa ne dan me se ndaa vaa taj yanj naxcaj roj so' ro', 'yaj roj so' a. Se guun ca'ne' rá roj so' ma'. <sup>16</sup> Ne dan me se ta'nga' danj qui'yaj guee Diose ga síí cu'naj Abraham, ne dan me se cunumíj roj so' nana ndaa vaa qui'yaj Diose ga síí cu'naj Abraham a. Dan me se cataj Diose se vaa cavii sa' so' do', cavii sa' ta'níí ta'nij si'no so' do' a. (Dan me se danj a'mii danj Diose, tzaj ne ne cataj Diose se vaa cavii sa' que'ee ta'níí ta'nij si'no síí cu'naj Abraham ma'. 'O se che'é orún' ta'níí ta'nij si'no síí cu'naj Abraham ca'mii danj Diose adonj. Ne síí cu'naj Jesucristó me síí cavii sa' nanj adonj.)

<sup>17</sup> Ne inanj nihánj me nana me rá 'unj cataj xna'anj 'unj rihaan soj ei. Dan me se Diose cataj rihaan síí cu'naj Abraham daj qui'yaj Diose che'é Abraham do', che'é ta'níí ta'nij si'no Abraham do', ne cachén yo'ó ca'anj cientó táá yo'ó ico chí' yo', gaa ne rqué Diose se-tucuanj Moisés, tzaj ne ne quiri' nana cata' tu'va Diose qui'yaj Diose che'é síí cu'naj Abraham qui'yaj se-tucuanj Moisés ma'. 'O se ya qui'yaj so' ndaa vaa cataj so' adonj. <sup>18</sup> Dan me se sese che'e se-tucuanj Moisés me rqué Diose rasuun sa', gaa ne nuveé che'e yan cata' tu'va so' rqué so' rasuun sa' asij naá me yo' gaa a ma'. Maan se ca'mii uun so' vaa gaa nanj adonj. Tzaj ne sese inanj nij síí noco' se-tucuanj Moisés me síí nıcaj nij rasuun sa' yo', gaa ne taj yu'vee nó nana cata' tu'va Diose rihaan Abraham gaa naá vaa gaa a ma'. Tzaj ne ne vaa danj a ma'. 'O se che'é nana ca'mii Diose rihaan Abraham me nıcaj ní' nij rasuun sa' ei. Dan me se quiri' uun ní' nu' nij rasuun sa' yo', qui'yaj Abraham chuguanj. Ne a doj sa'anj ne curu'vee ní' che'é nu' rasuun sa' yo' a ma'.

*Nana nihánj taj xna'anj se vaa rqué Diose se-tucuanj Moisés che'é yan xcax yuvii cuentá se vaa síí tumé ndo'o cacun' me yuvii a*

<sup>19</sup> Dan me se sese danj vaa, gaa ne me che'é rqué Diose se-tucuanj Moisés, rá soj ga. Rqué Diose tucuaán yo' rihaan Moisés che'é cacun' tumé yuvii, ne me rá Diose canoco' yuvii tucuaán yo' ndaa se ca'na' ta'níí ta'nij si'no Abraham síí cu'naj Jesucristó rihaan chumii nihánj, gaa ne so' ro', me síí rqué nu' nij rasuun sa' rihaan yuvii, ndaa vaa cataj Diose rihaan síí cu'naj Abraham gaa naá ei. Dan me se guun rá Diose se vaa gaa ca'na' Jesucristó, ne ca'ne' rá yuvii ga se-tucuanj Moisés yo' adonj. Tzaj ne se-mozó Diose me nij síí cataj xna'anj tucuaán yo' rihaan síí cu'naj Moisés, gaa ne cataj xna'anj so' tucuaán yo' rihaan nij yuvii a. Dan me se cataj xna'anj Moisés rihaan nij yuvii, <sup>20</sup> tzaj ne gaa ca'mii Diose rihaan síí cu'naj Abraham, ne ma'an ya so' ca'mii adonj. Taj vaj síí ca'mii che'é Diose ma'. Taj vaj síí cataj xna'anj rihaan Diose daj me rá síí cu'naj Abraham ma'. Maan se ma'an ya so' me síí ca'mii ga síí cu'naj Abraham, ése orún' ya so' me Diose nanj adonj.

<sup>21</sup> Tzaj ne taj ri'yunj se-tucuanj Moisés man nana cata' tu'va Diose rihaan Abraham gaa naá, rá soj na'. Daj chihaa míj ne vaa danj ma'. Tzaj ne sese guun nucuaaj yuvii qui'yaj yuvii 'o tucuaán rqué Diose, ne ya cunuu sa' yuvii rihaan Diose, qui'yaj tucuaán yo' ei. Tzaj ne se guun nucuaaj yuvii qui'yaj yuvii tucuaán vaa danj ma'. <sup>22</sup> Che'é dan me taj danj Diose se vaa cunudanj yuvii tumé ndo'o cacun' nanj adonj. Inanj danj vaa tumé taran' yuvii cacun', taj danj Diose, ne che'é dan me nana cata' tu'va Diose rihaan síí cu'naj Abraham ro', quisij ya nu' nana yo' che'é taran' ní' sij amán rá ni'yaj man Jesucristó adonj.

*Nana nihánj taj xna'anj se vaa gaa ca'na' Jesucristó, ne taj che'é canoco' ní' se-tucuanj Moisés a man adonj*

<sup>23</sup> Tzaj ne gaa ataa doj quisij güii cuchuman rá ní' ni'yaj ní' man Jesucristó, ne inanj se-tucuanj Moisés canoco' ní', ne ase vaa 'o síí tumé man



ní' ro', danj vaa se-tucuanj Moisés rihaan ní' gaa rque ei. Inanj se-tucuanj Moisés vaa rihaan ní' canoco' ní' ndaa se ca'na' güii tihaan Diose rihaan ní' se vaa cuchuman rá ní' ni'yaj ní' man Jesucristó a. <sup>24</sup> Dan me se ase vaa síi tumé man xnii daj qui'yaj xnii ro', ta'nga' danj vaa se-tucuanj Moisés rihaan ní' gaa rque, cutumé yo' man ní' ndaa se ca'na' Jesucristó ei. Ndaa síj, gaa ne no xcúún ní' cuchuman rá ní' ni'yaj ní' man so', ne ca'vee cunu sa' ní' rihaan Diose adonj. <sup>25</sup> Cuanó ro', nihánj me se aj cuchumán rá ní' ni'yaj ní' man Jesucristó, ne che'é dan me taj che'é tumé se-tucuanj Moisés man ní' a ma'.

<sup>26</sup> Che'é se amán rá nij soj ni'yaj soj man Jesucristó ro', che'é dan ta'níi Diose me taran' soj cuano nanj adonj. <sup>27</sup> Dan me se che'é se cata' ne soj che'é Jesucristó ro', che'é dan me ase vaa Jesucristó ro', ta'nga' danj vaa soj cuano nanj ei. <sup>28</sup> Ne se cataj soj se vaa ta'aj soj me yuvií israelitá ne yo'ó ta'aj soj me yuvií yaníj ma'. Ne se cataj soj se vaa ta'aj soj me mozó ne yo'ó ta'aj soj, nuveé síj uun mozó me yo'ó ta'aj soj, cataj soj ma'. Ne se cataj soj se vaa ta'aj soj me snó'o ne yo'ó ta'aj soj me chana ma'. 'O se tananj ase vaa orún' yuvií vaa taran' soj, ne 'o cuyan vaa taran' soj che'é se noco' soj man Jesucristó nanj ei. <sup>29</sup> Che'é se síj noco' man Jesucristó me soj ro', che'é dan ma'an ya ta'níi ta'nij si'no síi cu'naj Abraham me soj rihaan Diose, ndaa vaa cataj Diose rihaan síi cu'naj Abraham se vaa rque so' rasuun sa' rihaan taran' nij ta'níi ta'nij si'no síi cu'naj Abraham adonj.

#### 4

<sup>1</sup> Ne ne'en soj daj vaa xnii, se vaa vaa güii, ne guun si'yaj xnii nu' rasuun man tucua' rej xnii ei. Tzaj ne gaa xnii me so', ne ase vaa mozó ro', danj vaa so' tucua' rej so' gaa yaán rej so' ei. <sup>2</sup> Dan me se vaa yuvií tumé man xnii daj qui'yaj xnii, ne inanj danj vaa tumé nii man xnii ndaa se cachij ya xnii, gaa ne vaa güii ca'vej

rá rej xnii quita'aa xnii rasuun man tucua' xnii ei. <sup>3</sup> Ne ase vaa xnii ataa cachij ro', ta'nga' danj vaa ma'an ní' gaa rque, ne inanj ne'en ní' canoco' ní' man nij ya'anj uun chij rihaan chumií nihánj a.

<sup>4</sup> Tzaj ne quisíj güii me rá Diose rque Diose nu' se sa' rihaan ní', ne che'é dan ca'néé Diose ta'níi so' ca'na' ta'níi so' rihaan chumií nihánj, ne cuchruj 'o chana man ta'níi Diose, ne síi noco' se-tucuanj Moisés me nu' nij tuví' so' gaa cayáán so' rihaan chumií nihánj adonj. <sup>5</sup> Dan me se me rá Jesucristó racuíj so' man taran' ní' síj noco' tucuaán noco' yuvií man rihaan chumií nihánj, se vaa ca'vee tanáj ní' tucuaán noco' yuvií man rihaan chumií, ne nıcaj ní' nu' se sa' me rá Diose rque Diose rihaan ta'níi Diose ei. Ne danj me rá Jesucristó qui'yaj so' che'é ní' chuguanj. <sup>6</sup> Cuanó nihánj me se ta'níi Diose me nij soj ei. Che'é dan ca'néé Diose man Nimán ta'níi so' nimán ní', ne che'é dan me: "Ataj chij. Rej núj mé so' á", taj ní', aguáj ní', 'yaj Nimán ta'níi so' ei. <sup>7</sup> Che'é dan me nuveé mozó me soj rihaan Diose cuano nihánj ma'. Ase vaa mozó vaa soj gaa rque, tzaj ne xa' yaj, nahuun soj ta'níi Diose, ne vaa güii nacaj soj nu' se sa' rque Diose rihaan nij ta'níi so' adonj.

*Nana nihánj taj xna'anj se vaa ne nó xcúún ní' qui'yaj ní' tucuaán noco' yuvií man rihaan chumií nihánj cuano mei*

<sup>8</sup> Gaa rque me se ne ne'en ya soj daj vaa Diose ma'. Che'é dan me qui'yaj suun soj rihaan ya'anj uun chij rihaan rasuun man rihaan chumií nihánj, tzaj ne nuveé ya'anj ya me nij ya'anj qui'yaj suun soj rihaan ma'. <sup>9</sup> Tzaj ne cuano nihánj me se ne'en nij soj man ma'an ya Diose ei. Tzaj ne sa' doj cataj 'unj se vaa ne'en Diose man nij soj chuguanj. Sese aj ne'en soj man ma'an ya Diose, gaa ne me che'é canicaj uún soj canoco' soj man nij ya'anj uun chij rihaan rasuun man rihaan chumií nihánj ga. Ne'en soj se

vaa se guun nucuaj nij so' racuj nij so' man soj ma'. Taj yu'vee a 'o xco' nó ma'an nij so' ma'. Me che'é me rá uún soj qui'yaj suun soj rihaan nij so' ga. <sup>10</sup> Ne navij rá soj güii guee do', navij rá soj cha'anj che'é 'o 'o yavii do', vaa dió guee rihaan soj do', vaa yo' guee rihaan soj do' ga. Me che'é 'yaj soj danj ga. <sup>11</sup> Nanó ndo'o rá 'unj se vaa 'yaj soj, ne nanó rá 'unj se vaa quirí' rma'an nu' suun qui'yaj suun 'unj tucu'yón 'unj se-nana Diose nana sa' man nij soj nanj chuguanj.

*Nana nihánj taj xna'anj se vaa nanó rá Pabló che'é se tanáj nij sú man Galacia nana tucu'yón so' man nij so' a*

<sup>12</sup> Ase vaa 'unj ro', danj gaa guee soj, ése ndaa adi' se vaa soj ro', danj vaa guee 'unj, tinuj, nocoj. Che'é dan me daj se 'yaj guej cuano ro', danj qui'yaj guee soj ei. Nuveé che'e se qui'yaj chi'ii soj manj ma'. Tananj a, ne inanj ve'é qui'yaj soj gaa cayáan 'unj ga soj ei. <sup>13</sup> Aj ne'en soj se vaa che'é se canó chi'ii manj, che'é dan natá' 'unj se-nana Diose nana sa' rihaan soj gaa asino yaan ei. <sup>14</sup> Ne gaa quirán' 'unj rihaan soj me se ne nachri' soj ni'yaj soj manj ma'. Tananj a, ne caraya'anj ndo'o soj ni'yaj soj manj, ne ndaa adi' ve'é 'yaj nii ga 'o se-mozó Diose ro', danj qui'yaj soj, gaa ne ve'é ndo'o ca'mii soj gaj ei. Ne ase vaa ma'an ya Jesucristó ro', ta'nga' danj vaa 'unj, rá soj, <sup>15</sup> ne che'é dan me guun niha' uxrá rá nij soj ne ve'é uxrá cuno soj nana ca'mij, ne cunuu 'ee uxrá rá soj manj nanj adonj. Dan me se cataj yá' ta' asuun, ne sese guun nucuaj nij soj quirí' soj rlij rihaan soj cunuú yo' rihanj, ne ca'vej rá soj qui'yaj soj danj, nda' rasuun nanj chuguanj. Tzaj ne yaj me se me che'é ne niha' rá soj gaa uno soj nana a'mij cuano ga. <sup>16</sup> Maan che'é se ca'mij nana ya ya rihaan soj, che'é dan mej sí' taj ri'yunj man soj, rá soj nanj na'. Taj ma'.

<sup>17</sup> Dan me se aráya'anj uxrá yo'ó nij so' man soj, tzaj ne ne cunaj daj chihaa m'ij 'yaj nij so' ma'. Maan se

me rá nij so' tanáj xco soj nana noco' ní' sij amán rá ni'yaj man Jesucristó, ne inanj ma'an nij so' canoco' soj, rá nij so' nanj adonj. <sup>18</sup> Sese ve'é 'yaj yuvií ga soj, ne cunaj uxrá sese caraya'anj nij yuvií man soj, rá 'unj á. Tzaj ne yo'ó danj qui'yaj nij so', sese ya me sa' rá nij so' ni'yaj nij so' man nij soj ei. Tzaj ne taj ma'. Me che'é gaa yáan 'unj ga soj, gaa ne uun che'e nij so' 'yaj nij so' se sa' ga soj ga. Nuveé se sa' 'yaj nij so' ga soj man chuguanj. <sup>19</sup> Dan me se ase vaa ta'ní' 'unj ne'ej ro', danj vaa nij soj, tinuj, nocoj. Cuanó nihánj me se uun che'e uún 'unj nanó ndo'o raj che'é soj ndaa vaa nanó raj gaa rque, ne me rá 'unj se vaa nari' sa' ya soj se-nana Diose nana sa' ya ei. Dan me se ase vaa nanó rá chana nichrun' cuchruj ne'ej che'é se ne ne'en no' sese ca'ngaa sa' ta'ní' no' ro', danj vaa nanó rá 'unj che'é soj cuano chuguanj. Ne veé inanj danj nanó ndo'o rá uún 'unj che'é nij soj ndaa nari' ya ya soj ndaa vaa qui'yaj ma'an ya Jesucristó nanj ei. <sup>20</sup> O se 'vee, ne ndaa cuano cayáan yá 'unj ga soj, gaa ne ca'mii ma'an yá 'unj ga soj, raj ei. Tzaj ne ne ne'en yaj daj nano raj che'é soj a mei.

*Nana nihánj taj xna'anj se vaa sese noco' ní' se-tucuanj Moisés, ne mozó me ní', ne ne nó xcuún ní' qui'yaj ní' danj a ma'*

<sup>21</sup> Me rá 'unj cataj ya soj 'o nana rihanj ei. Me rá nij soj canoco' soj se-tucuanj Moisés, tzaj ne ne'en soj daj taj nana cachrón Moisés rihaan yanj yo' na'. <sup>22</sup> Dan me se cachrón Moisés nana nihánj rihaan yanj, se vaa vaa vij ta'ní' sí' cu'naj Abraham sno'o cunii, ne yo'ó ta'ní' so' me ne'ej cuchruj mozó chana nuu rihaan so', ne yo'ó ta'ní' so' me ne'ej cuchruj ma'an nica so' a. Xa' nica so', tzaj ne nuveé mozó me chana nica so' ma'. Nica ya so' me yo' adonj. <sup>23</sup> Dan me se ne'ej cuchruj mozó chana ro', me se ase vaa a'ngaa naj guun ne'ej ro', danj vaa ca'ngaa so' a. Tzaj ne xa' ne'ej cuchruj ma'an nica Abraham, tzaj ne

aj cata' tu'va Diose daj qui'yaj Diose che'é so' asij gaa ataa ca'ngaa so' a.

24-25 Ne ase vaa cuentó che'é roj chana cuchruj ne'ej ro', danj vaa yo'ó nana tucu'yón ní', rá 'unj, ne ase vaa roj chana ro', danj vaa vij nana cataj xna'anj Diose rihaan yuvij a. Dan me se yo'ó chana me se-mozó Abraham, ne Agar cu'naj se-chuvij no', ne ase vaa mozó chana cu'naj Agar ro', ta'nga' danj vaa nana cataj xna'anj Diose rihaan sí cu'naj Moisés gaa ca'mii Diose ga Moisés xráa quij xcaan cu'naj Sinaí a. Se-tucuanj Moisés me nana yo', ne ase vaa mozó ro', danj vaa yuvij noco' nana yo' a. Nicun' quij xcaan cu'naj Sinaí rej cu'naj Arabia, tzaj ne ase vaa chana cu'naj Agar ro', ta'nga' danj vaa nij yuvij man chuman' Jerusalén cuano a. Dan me se taran' nij yuvij man chuman' Jerusalén me yuvij israelitá yuvij noco' se-tucuanj Moisés, ne ase vaa mozó ro', danj vaa taran' nij so' nanj ei. 26 Tzaj ne sí man yo'ó chuman' Jerusalén chuman' naj rej xta' me ní', ne nuveé mozó me ní' ma'. 'O se aj guun nij ní' man chuman' Jerusalén naj rej xta' adonj.

27 Nihánj me nana no rihaan danj Diose a: "Gaa niha' nimán so', chana ituun á. Ataa cuchruj so' ne'ej, tzaj ne gaa niha' uxrá nimán so' á. 'O ruún so' cuano, tzaj ne vaa güii, ne doj a gaa ta'níi so' rihaan ta'níi chana otoj ga snó'o adonj". Inanj danj a'mii danj Diose che'é nica Abraham chana cuchruj man sí cu'naj Isaac a.

28 Ne ase vaa ta'níi no' sí cu'naj Isaac ro', ta'nga' danj vaa nij soj, tinuj, nocoj. Soj me ne'ej se vaa cataj ya Diose ca'ngaa ya ei. Ne ase vaa cavii sa' sí cu'naj Isaac ro', danj cavii sa' soj uún ei. 29 Ne'en nij soj se vaa xnii ca'ngaa ma'an ta'níi yo'ó chana ro', me se taj ri'yunj ndo'o so' man ne'ej tucua ya ve' chuguanj. Dan me se ta'nga' danj ran' guee ní' cuano nihánj, ne dan me se 'yaj ndo'o nij yuvij noco' ma'an se-tucuanj Moisés sayuun man ní' sij cunuu sa' nimán che'é Nimán Diose chuguanj.

30 Tzaj ne xcaj ní' cuentá me taj danj Diose ei. Dan me se taj yo' se vaa: "Quirri so' man roj ta'nij mozó chana ca'anj yanij roj ta'nij no' á. 'O se orún' ta'níi nica so' ní' ne uun mozó me sí guun sí si'yaj nu' si'yáa so' vaa güii ei. Ne xa' ta'níi chana uun mozó, tzaj ne daj chihaa míj ne nó xcúún ta'níi mozó chana yo' quirri' yo' ta'aj si'yáa so' ma'". Dan me se danj vaa nana ca'mii Diose rihaan Abraham nana no rihaan danj Diose a. 31 Dan me se nuveé ta'nij mozó chana me ní', man tinuj, man nocoj. Nuveé yuvij 'yaj suun ndo'o canoco' se-tucuanj Moisés me ní' ma'. Maan se ase vaa ta'níi chana ne uun mozó ro', danj vaa ní', ne a 'ó tucuaán ne nó xcúún ní' canoco' ní' a ma'.

## 5

1 Maan se aj ca'néj Jesucristó nu' suun taj xráa ní', ne che'é dan vaa ya'núj rihaan ní' canoco' ní' man Diose cuano ei. Che'é dan me ca'nej nucuj soj nimán soj, ne se ca'vej uún soj qui'yaj suun soj suun uun mozó a ma'. Se guun rá soj canoco' soj nu' se-tucuanj Moisés a ma'.

*Nana nihánj taj xna'anj se vaa taj che'é cuta' nii ta'nga' man nee man ní' ma'*

2 Xcaj nij soj cuentá se vaa nihánj me nana taj xna'anj ma'an 'unj sij cu'naj Pabló rihaan soj ei. Dan me se sese cuta' nii ta'nga' man soj, ne taj yu'vee nó Jesucristó rihaan soj vaa gaa a ma'. 3 Nihánj me cataj xna'anj uún 'unj rihaan soj se vaa taran' nij snó'o a'vej rá cuta' nii ta'nga' man ro', no xcúún nij so' canoco' nij so' nu' se-tucuanj Moisés adonj. 4 Ta'aj nij soj me rá canoco' se-tucuanj Moisés, ne cunuu sa' nij so' rihaan Diose, rá nij so', tzaj ne nuveé sij noco' man Jesucristó me sí 'yaj danj ma'. 'O se sí tanáj xco se luj qui'yaj Diose che'é ní' me nij so' adonj. 5 Xa' ní', tzaj ne nuu Nimán Diose nimán ní', ne amán rá ní' ni'yaj ní' man Jesucristó, ne che'é dan me guun ya rá ní' se vaa vaa güii cunuu sa' ní' rihaan

Diose, ne yo'lo na'vij ní' ndaa se quisij ya güii yo' adonj. <sup>6</sup> Xa' ní' sij noco' man Jesucristó me se taj se 'yaj sese quitaj ta'nga' man ní', taj se 'yaj sese se quitáa ta'nga' man ní', taj se 'yaj ma'. 'O se amán rá ní' ni'yaj ní' man Jesucristó, ne che'é dan cunuu 'ee rá ní' ni'yaj ní' man tinúú ní', ne che'é roj yo' me cavi sa' ní' adonj.

<sup>7</sup> Gaa rque me se aj sa' uxrá noco' soj man Diose tzaj niha'. Me sí caráan chrej rihaan soj se cuchumán rá soj cunó soj nana ya yaj ga. <sup>8</sup> Xa' nana uno soj cuano, tzaj ne nuveé Diose me sí ca'mii nana yo' rihaan soj ma'. Dan me se xa' Diose, tzaj ne yo'lo canacúún so' man soj canoco' soj man orún' ya so' adonj. <sup>9</sup> Ne'en nij soj se vaa yo'óo cu'naj levadura se 'yaj namij rque rachruún, me se doj tzin' yo' araa nii rque cunj, tzaj ne namij rque cunudanj cunj, 'yaj yo', ne ase vaa yo'óo cu'naj levadura ro', ta'nga' danj vaa nana ne uno soj adonj. Dan me se doj tzin' nana ne uno soj, tzaj ne ca'anj ni'ya que'ee nij soj, qui'yaj nana ne yo' ei.

<sup>10</sup> Dan me se 'unj me se yo'lo amán raj ni'yaj 'unj man sí 'nij ra'a man ní' se vaa yo'lo cyaan gaa rá soj ga 'unj chuguanj. Ne sí a'mii yo'óo nana ro', tzaj ne 'yaj chruj so' rihaan soj se vaa se canoco' sa' soj man Diose chuguanj. Che'é yan 'yaj so' danj ro', che'é dan quiran' so' sayuun, qui'yaj Diose nanj adonj. Me ma'an sij me so', tzaj ne ya quiran' so' sayuun, qui'yaj Diose ei.

<sup>11</sup> A'mii natáj ma'an 'unj rihaan yuvij se vaa cuta' nii ta'nga' man yuvij, rá soj na'. Taj, man tinuj, man nocoj. Sese danj vaa nana a'mii natáj 'unj, ne ne guun na'aj yuvij cunó yuvij nana se vaa cavi' Jesucristó rihaan rcutze asuun saj ma'. Tzaj ne guun na'aj nij yuvij ei. Ne maan che'é dan 'yaj ndo'o nij yuvij sayuun manj adonj. <sup>12</sup> Dan me se vaa che'é cataj ní' se vaa nij sí 'yaj sayuun man soj ro', 'o se veé, ne vaa che'é ca'ne' nij so' nu' nee man ma'an nij so' vaa tzaj adonj.

*Nana nihánj taj xna'anj se vaa ve'é qui'yaj ní' nu' se vaa me rá Nimán Diose qui'yaj ní' á*

<sup>13</sup> Dan me se canacúún Diose man nij soj guun niha' nimán soj canoco' soj man so', tinuj, nocoj. Tzaj ne se guun rá soj se vaa ca'vee qui'yaj soj náa guun se me rá nee man ma'an soj qui'yaj soj ma'. Tananj cunuu 'ee rá soj tinúú soj, ne yo'lo qui'yaj suun soj che'é tinúú soj ei. <sup>14</sup> Dan me se 'o cyaan ya vaa nu' se-tucuanj Moisés ga orún' nana nihánj chuguanj: “Adi' se 'ee rá so' man ma'an so' ro', ta'nga' danj gaa 'ee rá so' man yo'óo yuvij á”. Ne nihánj me nana no xcúún ní' cunó ní', ne sese danj qui'yaj ní', ne sí 'yaj nu' se-tucuanj Moisés me ya ní' adonj. A 'o nana se cachiin cunó uún ní', sese danj qui'yaj ní' a ma'. <sup>15</sup> Tzaj ne sese cunu' soj do', sese guun xcoj ruvaa rá soj ni'yaj soj tuvi' soj do', sese qui'yaj soj sayuun man tuvi' soj do', ne dan me se tadó uxrá soj ei. 'O se sese danj uun rá soj, ne quirí' cunudanj tuvi' soj, qui'yaj soj nanj chuguanj.

<sup>16</sup> Ne cataj xna'anj 'unj rihaan soj se vaa yo'lo cunó soj a'mii Nimán Diose gaa chéé soj rihaan chumii nihánj, ne sese inanj danj qui'yaj soj, ne daj chihaa mij se guun qui'yaj soj se vaa me rá nee man ma'an soj qui'yaj soj ma'. <sup>17</sup> Dan me se ino uxrá vaa se me rá nee man ní' qui'yaj yo' ga se me rá Nimán Diose qui'yaj yo' ei. Dan me se ino me rá 'o 'o roj yo' ei. Sese me rá ní' cunó ní' rihaan Nimán Diose, ne aráan nee man ní' chrej rihaan ní' cunó ní' rihaan Diose chuguanj. Ne sese me rá ní' qui'yaj ní' se nij me rá nee man ní' qui'yaj yo', ne aráan Nimán Diose chrej rihaan ní' se qui'yaj ní' danj ma'. Ne unu' Nimán Diose ga nee man ní', ne ca'vee se me rá ní' qui'yaj ní' ndaa vaa me rá ma'an ní' qui'yaj ní', tzaj ne se guun nucuaj ní' qui'yaj ní' danj a man adonj. <sup>18</sup> Tzaj ne sese noco' soj man Nimán Diose, ne taj che'é canoco' soj se-tucuanj Moisés a mei.



19 Dan me se aj ne'en soj daj vaa rasuun me rá nee man ma'an soj qui'yaj yo' ei. Me rá yo' qui'yaj yo' cacun' ga yo'ó chana do', me rá yo' qui'yaj yo' se nij ndo'o do', me rá yo' qui'yaj yo' se na'aj ndo'o do', 20 quina'vij soj rihaan ya'anj acój yu-vij do', me rá uún yo' ca'mii soj ga síi chruun nano' so' chrej che'é soj do', uun xcoj ruvaa rá soj ni'yaj soj tinúú soj do', unu' soj ga tinúú soj do', axrij yuvaa soj man tinúú soj do', inanj me rá 'o 'o soj cavii sa' uún soj do', uxra' ta'aj nij soj man nij soj do', 21 uun xcoj ruvaa rá soj ni'yaj soj tinúú soj do', achraá ndo'o soj chra' xno ga tuvi' soj do', ne dan me se que'ee doj tuvi' cacun' nihánj 'yaj uún soj, 'yaj nee man ma'an soj nanj adonj. Aj cataj xna'anj 'unj rihaan soj, ne cuano nihánj me se cataj xna'anj uún 'unj rihaan soj se vaa yuvii 'yaj danj ro', daj chihaa mij se cayáán nij so' ga Diose asa' guun chij Diose rihaan chumii nihánj a ma'.

22 Tzaj ne sese inanj rihaan Nimán Diose cunó ní', ne cunuú 'ee rá ní' tuvi' ní' do', guun niha' rá ní' do', gaa xej nimán ní' do', gaa inaj nimán ní' do', ve'é qui'yaj ní' rihaan yu-vij do', yo'o cuchuman rá ní' do', 23 síi ni'yanj a'mii guun ní' do', ve'é cutumé ní' man ní' daj qui'yaj ma'an ní' do', qui'yaj Nimán Diose ei. Inanj danj gaa ní' sese ve'é cunó ní' rihaan Nimán Diose nanj adonj. Yo' me sese qui'yaj ní' ndaa vaa taj nana nihánj, ne taj cacun' quitaj xraá ní' qui'yaj nana nihánj a ma'. 24 Dan me se ní' sij aj canoco' man Jesucristó ro', me se aj ticavi' Jesucristó man nu' se chi'ii man nimán ní', gaa cavi' so' rihaan rcutze, ne dan me se quisij qui'yaj nee man ní' cacun', ne daj chihaa mij se qui'yaj uún ní' se chi'ii me rá nee man ní' qui'yaj yo' a ma'. 25 Dan me se che'é se cunuú sa' nimán ní', qui'yaj Nimán Diose, che'é dan yo'o cunó ní' nu' se vaa cataj xna'anj Nimán Diose rihaan ní' ei. 26 Se ca'mii xta' ní' a 'ó xco' a ma'. Se ca'mii ra'yunj ní' rihaan tinúú ní' a ma'. Se guun xcoj

ruvaa rá ní' ni'yaj ní' tinúú ní' a ma'.

## 6

*Nana nihánj taj xna'anj se vaa ve'é racuj ní' man tinúú ní' a*

1 Sese ya xcaj nij soj cuentá se vaa qui'yaj 'o tinúú soj cacun', ne soj sij ve'é noco' Nimán Diose ro', nago' soj chrej man síi tumé cacun' daj qui'yaj so' rej rihaan so', tinuj, nocoj. Tzaj ne nica' gaa nimán soj, ne ve'é ca'mii soj nana sa' ga síi tumé cacun' ei. Dan me se tadó soj ga ma'an soj gaa nago' soj chrej ei. Sese se tadó soj, ne ma'an soj do' ca'anj chrej chi'ii nanj chuguanj. 2 Dan me se ca'vee se me ma'an sayuun ran' tinúú soj, tzaj ne racuj soj man so' ei. Sese danj qui'yaj soj, ne síi qui'yaj nu' tucuáán cuchruj Jesucristó che'é ní' me soj gaa nanj chuguanj. 3 Ne sese vaa síi guun rá se vaa síi sa' me ma'an so', ne síi ne ne'en uxra' me so', ne síi tiha' yu'unj man ma'an me so' nanj ei. 4 Tzaj ne naqui'yaj cuu 'o 'o ní' daj 'yaj ma'an ní', ne sese ve'é 'yaj ní', ne guun niha' rá ní' che'é se vaa ve'é 'yaj ma'an ní' ei. Tzaj ne ne nó xcúún ní' naqui'yaj cuu ní' daj 'yaj tinúú ní' ma'. Se cataj ní' se vaa sa' doj 'yaj ní' rihaan tinúú ní' ma'. 5 Maan se ino vaa suun ata 'o 'o ní', ne no xcúún 'o 'o ní' cata ní' suun vaa rihaan ma'an ní' nanj adonj.

6 Dan me se síi tucuyón se-nana Diose ro', me se no xcúún so' cuxra' ta'aj so' nu' se sa' rihaan síi tihaan se-nana Diose nana sa' rihaan so' a.

7 Tzaj ne se tiha' yu'unj soj man ma'an soj ma'. Se ca'vee tiha' soj man Diose ma'. Dan me se sese 'yaj yo'o so' sayuun rihaan chumii nihánj, ne gaa ndo'o sayuun quitaj xraá so', 8 ne sese qui'yaj yo'o so' inanj se vaa me rá nee man ma'an so' qui'yaj so', ne nee man so' qui'yaj quirí' nu' so' nanj adonj. Sese qui'yaj yo'o so' inanj se vaa me rá Nimán Diose qui'yaj so', ne Nimán Diose qui'yaj gaa i'na' so' cayáán so' ga Diose nu' cavii nu' ca'anj adonj. 9 Se guun rmii ní' qui'yaj sa' ní' ma'. Sese se quirí' rá ní', ne quisij güii

cachrón Diose, ne sa' uxrá doj cavií ní', qui'yaj Diose ei. <sup>10</sup> Dan me se yaj vaa ya'núj rihaan ní' ro', qui'yaj suun ndo'o ní' che'é se sa' cuano ei. Che'é dan ve'é uxrá qui'yaj suun ní', racuíj ní' man cunudanj yuvií ei. Tzaj ne doj a guun rá ní' racuíj ní' man nij tinúú ní' nij síí amán rá ni'yaj man Jesucristó adonj.

*Nana nihánj taj xna'anj se vaa guun niha' rá Pabló inanj che'é se cavi' Jesucristó rihaan rcutze che'é ní' a*

<sup>11</sup> Ni'yaj soj ei. Xiíj ndo'o vaa letrá cachrón ra'aj ma'anj che'é nij soj chuguanj. <sup>12</sup> Nij síí me rá ve'é ca'mií yuvií che'é ro', ma'an nij so' me síí me rá cata' ta'nga' man soj nanj adonj. Danj 'yaj nij so' che'é se na'vej rá nij so' qui'yaj yuvií sayuun man nij so' che'é se noco' nij so' man Jesucristó síí cavi' rihaan rcutze nanj chuguanj. Maan che'é dan a'mií nij so' danj rihaan soj nanj adonj. <sup>13</sup> Dan me se ata' ta'nga' man nij so', tzaj ne ne noco' sa' ma'an nij so' se-tucuanj Moisés ma'. Tzaj ne inanj me rá nij so' cata' ta'nga' man soj, gaa ne ca'mií xta' nij so' cataj nij so' se vaa cata' ta'nga' man soj qui'yaj ma'an ya nij so', che'é se qui'yaj nij so' fuerzá man soj, cataj nij so' a. <sup>14</sup> Ne xa' 'unj, tzaj ne daj chihaa míj se ca'mií xta' 'unj ma'. 'O se guun niha' rá 'unj inanj che'é se cavi' Jesucristó sij 'nij ra'a man ní' rihaan rcutze che'é ní', ne xa' chumií nihánj, tzaj ne ase vaa se cavi' ro', danj vaa chumií nihánj rihaan 'unj, ne taj yu'vee nó chumií nihánj rihaan 'unj, ne yo'o tanáj 'unj man se vaa 'yaj nij yuvií man rihaan chumií nihánj nanj adonj. <sup>15</sup> Taj se 'yaj sese taj ta'nga' man ní' do', taj se 'yaj sese nuvi' ta'nga' táá man ní' do' ma'. Núj naqui'yaj naca Diose man ní', ne cavií sa' ya ní' nanj adonj. <sup>16</sup> Me rá 'unj gaa xej nimán taran' soj sij noco' tucuaán nihánj, ne gaa 'ee rá Diose man soj ei. Ya yuvií israelitá me soj rihaan Diose nanj chuguanj.

<sup>17</sup> Dan me se aj quiran' ndo'o nee mán 'unj sayuun che'é se 'yaj suun

'unj che'é Jesucristó natá' 'unj rihaan yuvií che'é so', ne che'é dan na'vej rá 'unj qui'yaj soj doj sayuun mán 'unj a ma'.

*Nana nihánj taj xna'anj se vaa me rá Pabló qui'yaj Jesucristó se luj che'é nij síí man Galacia a*

<sup>18</sup> Me rá 'unj qui'yaj ndo'o Jesucristó sij 'nij ra'a man ní' se luj che'é nimán nij soj, tinuj, nocoj. Ya uxrá ei. Veé danj gaa ya ei.

**Nihánj me 'o yanj  
cartá qui'yaj sítí cu'naj  
Pabló ca'néé so'  
rihaan nij yuvij noco'  
man Diose yanj  
chuman' cu'naj Efeso  
a**

<sup>1</sup> Sítí cu'naj Pabló mej, ne cune' Jesucristó mán 'unj guún 'unj apóstol nata' se-nanā so' rihaan nij yuvij, che'é se danj me rá Diose qui'yaj a. 'Yáá 'unj yanj cartá nihánj ca'nej 'unj rihaan nij soj sij sa' rihaan Diose yanj chuman' cu'naj Efeso sij amán rá ni'yaj man Jesucristó a. <sup>2</sup> Me rá 'unj qui'yaj ndo'o Rej ní' Diose do', qui'yaj Jesucristó sij 'nij ra'a man ní' do', se luj che'é nij soj, ne me rá 'unj gaa xej nimán nij soj, qui'yaj roj so' a.

*Nana nihánj taj xna'anj che'é nu' se luj qui'yaj ndo'o Diose che'é nij yuvij israelitá do', che'é ní' sij yanij do' a*

<sup>3</sup> Inanj sa' uxrá vaa Diose Rej Jesucristó sij 'nij ra'a man ní', ne ve'é ndo'o qui'yaj so' che'é ní', ne rqué ndo'o so' se sa' man ní', ne se sa' cavii rej xta' cavii ma'an ya Nimán Diose me rqué Diose man ní', che'é se sítí noco' man Jesucristó me ní' a. <sup>4</sup> Ne dan me se che'é se sij noco' man Jesucristó me ní', che'é dan me asij ataa qui'yaj Diose chumij nihánj me narii so' man ní' guun ní' sítí sa' rihaan ma'an so', ne se tumé ní' cacun', rá so' a ma'. Ne dan me se cunuu 'ee rá so' man ní', <sup>5</sup> ne cune' so' man ní' canoco' ní' man Jesucristó ne guun ta'nij ma'an so' man ní', ndaa vaa quirii nimán ma'an so' qui'yaj so' che'é ní', <sup>6</sup> gaa ne che'é dan ve'é ca'mij ní' ni'yaj ní' man Diose, ne cataj ní' se vaa ve'é ndo'o qui'yaj so' se luj che'é ní', che'é se noco' ní' man Jesucristó sítí 'ee rá so' man adonj.

<sup>7</sup> Ne che'é se cavi' Jesucristó che'é ní' ro', che'é dan navij cacun' xraá

ní', che'é se sa' uxrá vaa rá Diose ni'yaj Diose man ní', <sup>8</sup> ne Diose ro', me sítí qui'yaj ndo'o se luj che'é ní' se vaa rqué ndo'o so' nana cuu man ní', ne xcaj ndo'o ní' cuentá, qui'yaj so' adonj. <sup>9</sup> 'O se so' me sítí qui'yaj xcaj ní' cuentá che'é nana naca nana a'mii che'é daj me rá ma'an so' qui'yaj so' che'é ní' sij noco' man Jesucristó, <sup>10</sup> asa' quisij güii ca'na' uún Jesucristó rihaan chumij nihánj a. Dan me se güii yo' me se guun chij Jesucristó rihaan cunudanj rasuun, qui'yaj Diose, ne guun chij Jesucristó rihaan taran' nij rasuun man rej xta' do', rihaan cunudanj nij rasuun man rihaan chumij nihánj do' a.

<sup>11-12</sup> Ne che'é Jesucristó me se narii Diose man núj sij israelitá sij amán rá ni'yaj man Jesucristó, ne dan me se narii so' man núj che'é se aj cune' so' man núj guun núj nij sítí gaa nucuaj rá gaa asino yaan man Jesucristó, che'é rej ve'é nata' núj se vaa sa' uxrá vaa Diose a. Dan me se inanj danj guun rá Diose qui'yaj so', ne so' me sítí avii ndo'o raá daj qui'yaj, ne so' me sítí 'yaj nu' ndaa vaa avii raá so' qui'yaj so' adonj.

<sup>13</sup> Ne vaa nij soj sij yanij uún, ne cuno soj nana ya se vaa ca'vee cavii sa' uxrá ní' qui'yaj Jesucristó, ne cuchumán rá soj ni'yaj soj man Jesucristó, ne che'é Jesucristó me se ca'na' Nimán Diose catúj Nimán Diose nimán soj, ne Nimán Diose me se ca'na' rihaan ní' sij noco' man Diose, ndaa vaa cata' tu'va Diose gaa naá, ne che'é se nuu Nimán Diose nimán ní' ro', che'é dan ne'en ya ní' se vaa me ní' ta'níí Diose <sup>14</sup> ne ya rqué ndo'o Diose se sa' man ní' vaa güii nanj adonj. Dan me se rqué Diose Nimán Diose rihaan ní', cataj Diose se vaa ya nacaj Diose man ní' vaa güii, ne quinanj ní' rihaan sayuun, che'é rej ve'é nata' taran' ní' se vaa sa' uxrá vaa Diose a.

*Nana nihánj taj xna'anj se vaa achún ni'yaj Pabló rihaan Diose se vaa*

*xcaj sa' doj nij sí man Efeso cuentá che'é Jesucristó qui'yaj Diose a*

<sup>15</sup> Dan me se cunó 'un̄j nana se vaa amán rá nij soj ni'yaj nij soj man Jesucristó sij 'nij ra'a man ní', ne cunó 'un̄j nana se vaa 'ee rá soj man taran' nij sí sa' noco' man Diose, ne che'é se vaa qui'yaj Diose che'é ní' sij noco' man Jesucristó ro', che'é dan <sup>16</sup> yo'o nagó' 'un̄j graciá rihaan Diose che'é soj gaa achíin ni'yáá 'un̄j che'é soj rihaan Diose adonj. <sup>17</sup> Dan me se Diose me sí ca'née man Jesucristó sij 'nij ra'a man ní' ca'na' so' rihaan chumii, ne Rej ní' nicun' xta' me uún Diose, ne sí uun chij sa' uxrá me so', ne che'é dan achíin ni'yáá 'un̄j rihaan Diose se vaa rque ndo'o so' nana cuu sa' nimán soj, ne achíin ni'yáá 'un̄j se vaa guun nucuaj soj nari' soj nu' nana naca tihaan so' man ní', gaa ne sa' doj xcaj ma'an soj cuentá che'é so' ei.

<sup>18</sup> Dan me se xcaj soj cuentá sa' doj, ne quene'en soj me che'é nacúun Diose man soj, ne quene'en soj nu' se vaa qui'yaj Diose che'é soj, ne guun rá soj se vaa vaa che'é ndo'o canoco' soj man Jesucristó adonj. Quene'en soj se vaa sa' uxrá vaa se qui'yaj Diose che'é taran' ní' sij sa' noco' man so', <sup>19</sup> ne quene'en soj se vaa guun nucuaj ndo'o Diose racuíj Diose man ní' sij amán rá ni'yaj man so' a. Nucuaj ndo'o Diose adonj.

<sup>20</sup> Che'é se nucuaj Diose ro', che'é dan cunuu i'na' ya uún Jesucristó, qui'yaj Diose gaa cavi' Jesucristó, ne guun chij uxrá Jesucristó rej xta' rej x'nuj Diose, qui'yaj uún Diose adonj. <sup>21</sup> Veé dan, ne uun chij ya Jesucristó rihaan taran' nij yuvii do', rihaan taran' nij ya'anj rii ta'nga' rihaan chumii nihánj do', tzaj ne ne doj cuano me uun chij so' ma'. 'O se guun chij so' nu' cavii nu' ca'anj nanj adonj. <sup>22</sup> Ne uun chij Jesucristó rihaan cunudan̄j rasuun qui'yaj Diose, ne dan me se Diose me sí qui'yaj rii ta'nga' Jesucristó rihaan cunudan̄j rasuun che'é ní' sij amán rá ni'yaj man so' adonj. <sup>23</sup> Ne ase vaa nee man

Jesucristó ro', danj vaa ní', uno ní' rihaan so', ne dan me se so' me sí 'nij ra'a man cunudan̄j rasuun man rihaan nu' cachra' chumii, ne so' me sí rque nu' se vaa achíin man nu' nij rasuun man rihaan chumii nihánj adonj.

## 2

*Nana nihánj taj xna'anj daj vaa cavii sa' ní' sij yanij, qui'yaj Diose, ne sí cunuu sa' nimán rihaan Diose me ní' cuano, che'é se luj qui'yaj uun Diose che'é ní' a*

<sup>1</sup> Gaa rque me se ma'an nij soj me sí tumé ndo'o cacun', ne che'é dan quiri' nu' nimán nij soj, ne taj se qui'yá' ca'vee quinani soj rihaan sayuun a ma'. <sup>2</sup> Dan me se qui'yaj soj ndaa vaa 'yaj yuvii man rihaan chumii nihánj, ne qui'yaj soj nu' rasuun chi'ii rasuun niha' rá sí chree sí rii ta'nga' rihaan chumii nihánj cuano sí chée uun chij rque nana, ne so' me sí rii ta'nga' rihaan nimán nij yuvii na'vej rá cuano rihaan Diose a. <sup>3</sup> Ne ase vaa 'yaj nij yuvii vaa danj ro', danj qui'yaj guee taran' ní' gaa rque, ne qui'yaj ní' cacun' ga nij so', ne qui'yaj ní' inanj se me rá nee man ní' qui'yaj ní' a. Inanj se cavii raá ma'an ní' qui'yaj ní', ne yuvii ca'maan rá Diose ni'yaj Diose man me ní' gaa rque, ne ase vaa nij yuvii chée rihaan chumii nihánj cuano ro', ta'nga' danj vaa ní' gaa rque ei.

<sup>4</sup> Tzaj ne cunuu 'ee ndo'o rá Diose man ní', <sup>5</sup> ne quene'en Diose se vaa aj quiri' nu' nimán ní' che'é cacun' tumé ní', ne che'é dan, ase vaa cunuu i'na' uún Jesucristó, qui'yaj Diose ro', ta'nga' danj vaa uún ní' cunuu sa' nimán ní', qui'yaj Diose, ne che'é dan ca'vee cayáán ní' ga Diose nu' cavii nu' ca'anj nanj adonj. (Dan me se maan che'é se luj qui'yaj Diose che'é soj me se ca'vee quinani soj rihaan chrej chi'ii uun chij nimán soj ne cavii sa' soj ei.) <sup>6</sup> Ne ase vaa cavii Jesucristó cayáán so' rej xta', qui'yaj Diose ro', danj qui'yaj uún Diose che'é ní', che'é se sij noco' man Jesucristó me ní', ne



vaa güii cavii ní' cayáán ní' ga so' rej xta' ei. <sup>7</sup> Ndaa síj, gaa ne nu' cavii nu' ca'anj quene'en nij yuvii se vaa qui'yaj ndo'o Diose se luj che'é ní', ne dan me se quene'en nij yuvii se vaa cunuu 'ee ndo'o rá Diose man ní' che'é se síí noco' man Jesucristó me ní' nanj adonj.

<sup>8</sup> Dan me se xcaj nij soj cuentá se vaa inanj che'é se luj qui'yaj Diose che'é soj me quinanii soj rihaan chrej chi'ii uun chíj nimán soj ne cavii sa' soj á. Dan me se maan che'é se amán rá soj ni'yaj soj man so' me cavii sa' soj ei. Nuveé ma'an soj me síí 'yaj a'vee avii sa' soj ma'. Maan se Diose racuíj man soj don a'vee avii sa' soj nanj adonj. <sup>9</sup> Nuveé che'e rasuun sa' qui'yaj soj me cavii sa' soj ma'. 'O se na'vej Diose ca'mii xta' yuvii cataj yuvii se vaa ma'an nij yuvii me síí qui'yaj cavii sa' nij yuvii ma'. <sup>10</sup> 'O se Diose me síí qui'yaj man ní', ne qui'yaj Diose man ní' che'é rej canoco' ní' man Jesucristó ne ve'é qui'yaj suun ní' suun sa', rá Diose, ne che'é ma'an Diose me a'vee qui'yaj suun ní' suun sa' yo' nanj adonj.

<sup>11</sup> Dan me se ne'en soj se vaa nuveé yuvii israelitá me soj ma'. 'O se yuvii yaníj me soj, ne dan me se cataj núj sij israelitá se vaa nij vaa nee man soj adonj. Tzaj ne cuta' núj ta'nga' man nee man ma'an núj, ne che'é dan me síí ata' ta'nga' me núj, taj yuvii ni'yaj yuvii man núj adonj. Yo'o xcaj soj cuentá <sup>12</sup> se vaa gaa rque ro', nuveé sij noco' man Jesucristó me nij soj ma'. 'O se sij yaníj rihaan núj sij israelitá me soj gaa naá nanj adonj. Dan me se nuveé sij no xcuún a 'ó xco' canoco' man Diose me soj gaa rque ma'. Maan se sij 'yaj rma'an rihaan chumii me soj nanj adonj. Dan me se ya cata' tu'va Diose che'é núj sij israelitá se vaa cavii sa' núj, tzaj ne taj nana cata' tu'va Diose che'é nij soj gaa rque ma'. Dan me se aj quene'en nij soj se vaa se cavii sa' nij soj do', se racuíj Diose man nij soj do', gaa man adonj. Maan se chéé uun

nij soj rihaan chumii gaa rque nanj adonj. <sup>13</sup> Tzaj ne yaj me se nda' se ne quene'en uxrá soj man Diose, tzaj ne ca'na' Jesucristó cavi' Jesucristó che'é soj, ne guun che'e soj canoco' soj man Diose, qui'yaj Jesucristó, ne guun che'e Jesucristó naqui'yaj chre' so' man nij soj che'é ton cayanj man so' rihaan rcutze nanj adonj.

<sup>14</sup> Ne Jesucristó ro', me síí naqui'yaj dínj man núj sij israelitá ga soj sij yaníj, gaa ne orún' ya chuman' me taran' ní' cuano, qui'yaj so' a. 'O se tiri' so' chingá ca'ne' tanuu man ní' ga tuvi' ní', gaa cavi' ma'an so' rihaan rcutze, <sup>15</sup> ne dan me se chingá yo' ro', me se-tucuanj Moisés, ne yo'o tinavij Jesucristó tucuáán yo' nanj adonj. Che'é dan me 'o cuyaán vaa taran' ní' cuano, ne cunuu 'ee rá ní' man tuvi' ní', qui'yaj Jesucristó, ne yo'o cunuu naca nimán ní', qui'yaj Jesucristó, ne dínj vaa nimán taran' ní', qui'yaj ya so' adonj. <sup>16</sup> Che'é se cavi' Jesucristó rihaan rcutze ro', che'é dan orún' ya chuman' me ní' cuano, ne yo'o qui'yaj canaán Jesucristó man nu' se a'maan rá man nimán taran' ní', ne dan me se cunuu rcua'aan taran' ní' ga Diose, qui'yaj Jesucristó a.

<sup>17</sup> Dan me se ca'na' Jesucristó, ne nata' so' rihaan nu' soj sij yaníj do', rihaan núj sij israelitá sij nicaj se-tucuanj Diose do', se vaa dínj cumán taran' ní' rihaan Diose á. <sup>18</sup> 'O se che'é Jesucristó me se nuu Nimán Diose nimán taran' ní', ne che'é dan vaa ya'núj rihaan taran' ní' cachinj ni'yaj ma'an ní' rihaan Rej ní' Diose adonj.

<sup>19</sup> Che'é dan nuveé sij man yo'ó chuman' me soj a ma'. 'O se sij ne'en man Diose me nij soj cuano nanj adonj. Nuveé sij noco' yo'ó tucuáán me soj ma'. Maan se ma'an soj me síí cunuu sa' nimán, ne noco' nu' taran' ní' man Diose yaj adonj. <sup>20</sup> Xa' tucuáán noco' taran' ní' cuano ro', ase vaa 'o ve' sa' 'yaj nii xráá yuvej sa' inanj ro', danj vaa ní', ne nij yuvej sa' yo' ro', me núj sij apóstol cune' Jesucristó do', nij síí nata' se-nana

Diose gaa naá do', ne yuvej sa' doj rihaan taran' nij yuvej naj tacóo ve' yo', tzaj ne ma'an ya Jesucristó me yo' vaa nanj chuguanj. <sup>21</sup> Dan me se yo'o chre' gaa ní' sij noco' man Jesucristó, gaa ne yo'o cyaan naxcaj nuvií ei. Ne nuvií yo' ro', me nu' ní' sij noco' man sí' 'nij ra'a man ní' nanj adonj. <sup>22</sup> Ne ma'an nij soj ro', me se che'é se noco' soj man sí' 'nij ra'a man ní', che'é dan cunuu rcua'aan soj ga yo'ó nij sí' guun nuvií, ne nihánj me se ma'an ya Nimán Diöse yáan sca'núj taran' ní' ei.

### 3

*Nana nihánj taj xna'anj se vaa ca'ne' Diöse suun rihaan Pabló nata' so' se-nana Diöse nana sa' rihaan ní' sij yaníj a*

<sup>1</sup> Ne'en nij soj se vaa 'nij 'unj taga' che'é se nocó' 'unj man Jesucristó, ne 'yaj suun 'unj a'mii natáj 'unj rihaan nij soj sij yaníj che'é so', <sup>2</sup> ne aj ne'en soj se vaa atá 'unj suun qui'yaj Diöse che'é soj sij yaníj nanj adonj. Dan me se qui'yaj ndo'o Diöse se luj che'é 'unj, ne ca'ne' so' suun rihanj qui'yaj sunj che'é soj ei. <sup>3</sup> Dan me se tihaan naca Diöse rihanj daj me rá Diöse qui'yaj Diöse che'é nij yuvii man rihaan chumii nihánj, ne aj cachrón 'unj doj nana che'é se vaa tihaan Diöse manj rihaan yanj cartá ca'née 'unj rihaan soj gaa rque adonj. <sup>4</sup> Nayaá soj yanj cartá yo', ne xcaj soj cuentá che'é nu' nana narí' 'unj nana che'é nu' se vaa qui'yaj Jesucristó che'é yuvii ei. <sup>5</sup> Gaa rque ro', ne cataj xna'anj Diöse nana yo' rihaan yuvii ma'. Tzaj ne ndaa yaj ro', me tihaan Nimán Diöse nana yo' rihaan núj sij apóstol sij sa' cune' Jesucristó man nata' se-nana so' rihaan yuvii, ne tihaan so' nana yo' rihaan yo'ó nij sí' nata' se-nana Diöse rihaan yuvii a. <sup>6</sup> Dan me se tihaan so' nana se vaa cunó nij soj sij yaníj se-nana Diöse nana sa', ne cunuu sa' soj ga núj sij israelitá adonj. Ne nana cata' tu'va Diöse che'é nij sí' canoco' man Jesucristó ro', quisíj ya nu' nana yo'

che'é nij soj sij yaníj ga núj sij israelitá nanj chuguanj.

<sup>7</sup> Ne vaa ndo'o suun rihanj nata' 'unj nana sa' yo', ne yo' me se luj qui'yaj Diöse che'éj adonj. Nda' se ne nó xcúún 'unj qui'ri' 'unj se luj nihánj, tzaj ne ma'an ya Diöse me sí' rque se luj nihánj manj nanj ei. So' me sí' nucuaj ndo'o, ne guun nucuáj qui'yaj sunj, qui'yaj Diöse nanj chuguanj. <sup>8</sup> Nda' se sí' nica' doj rihaan taran' nij sí' sa' noco' man Diöse mej, tzaj ne qui'yaj Diöse se luj yo' rihanj, ne ca'ne' so' suun rihanj nataj nana sa' rihaan nij soj sij yaníj se vaa sa' uxrá vaa se qui'yaj Jesucristó che'é ní' adonj. <sup>9</sup> Ne me rá Diöse cataj xna'anj 'unj rihaan yuvii nu' se vaa qui'yaj so' che'é nij yuvii a. Dan me se Diöse me sí' qui'yaj nu' rasuun, ne aj ne'en so' daj qui'yaj so' che'é yuvii, tzaj ne ne cataj xna'anj so' rihaan yuvii nu' cavii nu' ca'na' ma'. <sup>10</sup> Tzaj ne nij ya'anj man rej xta' ro', me rá Diöse xcaj nij so' cuentá cuano se vaa inanj nana cuu sa' ndo'o avii raá Diöse, ne quene'en nij so' man taran' ní' sij noco' man Jesucristó, ne xcaj nij so' cuentá se vaa avii ndo'o raá Diöse adonj. <sup>11</sup> Dan me se guun rá Diöse nu' cavii nu' ca'na' se vaa qui'yaj so' danj tió man ní', ne guun rá so' se vaa ca'nej so' man Jesucristó sij 'nij ra'a man ní' rihaan chumii nihánj a. <sup>12</sup> Ne che'é se amán rá ní' ni'yaj ní' Jesucristó ro', che'é dan ca'vee cachinj ni'yaj ma'an ní' rihaan Diöse, ne taj che'é cuchu'vi' ní' ca'mii ní' ga Diöse ma'.

<sup>13</sup> Che'é dan cataj xna'anj 'unj rihaan soj se vaa se cuchu'vi' nimán soj quene'en soj sayuun quirán' 'unj che'é soj ma'. Maan se tananj a cavii sa' soj doj che'é sayuun rán' 'unj nihánj nanj adonj.

*Nana nihánj taj xna'anj se vaa achúún ni'yaj Pabló rihaan Diöse se vaa sa' doj xcaj nij sí' man Efeso cuentá se vaa 'ee ndo'o rá Jesucristó man ní' a*

<sup>14</sup> Che'é se cavii sa' ndo'o nij soj ga núj, che'é dan canicun' ruj 'unj, ne

achíin nì'yáá 'un̄j rihaan Rej ní' Diose che'é soj adon̄j. <sup>15</sup> Dan me se Diose me Rej nu' taran' nij x'ne' nij síi man rej xta' do', Rej nu' taran' nij x'ne' ní' s̄ij man rihaan chumīi nihánj do', <sup>16</sup> ne achíin nì'yáj rihaan so' che'é soj se vaa nari' nucuāj nimán soj qui'yaj Nimán Diose adon̄j. <sup>17</sup> Ne achíin nì'yáj se vaa cuchuman̄ doj rá soj quene'en soj man Jesucristó, ne yo'o natuū Jesucristó nimán soj qui'yaj Diose, gaa ne yo'o cunuū 'ee rá soj man taran' tinúú soj adon̄j. <sup>18-19</sup> Ndaa síj, gaa ne nari' nucuāj ndo'o nimán soj, ne guun nucuāj soj xcaj sa' soj cuentá se vaa 'ee uxrá rá Jesucristó man ní', ne quene'en taran' ní' s̄ij cunuu sa' nimán rihaan Diose se vaa 'ee uxrá rá Jesucristó man ní' adon̄j. Taj a 'o síi guun nucuāj ma'an quene'en se vaa 'ee uxrá rá Jesucristó man ní' ma'. Tzaj ne guun nucuāj ní' xcaj ní' cuentá se vaa 'ee uxrá rá Jesucristó man ní', qui'yaj Diose, ne qui'yaj ndo'o Diose se luj che'é ní', ne dan me se cunuu sa' inanj ní', ndaa vaa ma'an Diose adon̄j.

<sup>20</sup> Dan me se yaj me se síi sa' uxrá me Diose, ne uun nucuāj so' rque so' nu' rasuun achíin ní' gaa rihaan ní' a. Tzaj ne ne rque so' maan inanj nij rasuun achíin nì'yaj ní' gaa rihaan ní' ma'. 'O se rque so' nu' rasuun achíin ní' rihaan so', ne rque so' yo'ó doj a rasuun rihaan ní' ei. <sup>21</sup> Che'é dan cataj ní' s̄ij nocó' man Jesucristó se vaa inanj sa' uxrá vaa Diose, ne yo'o danj ca'mii ní' ga ta'níi ní' nu' cavii nu' ca'an̄j che'é Jesucristó a. Veé danj gaa ya ei.

## 4

*Nana nihánj taj xna'an̄j se vaa ve'é qui'yaj ní' rihaan tinúú ní', che'é se ase vaa nee man yo'o yuvii ro', danj vaa taran' nij tinuj ní' a*

<sup>1</sup> Ne'en nij soj se vaa 'nij 'un̄j taga' che'é se nocó' 'un̄j man síi 'nij ra'a man ní', ne cataj xna'an̄j 'un̄j rihaan nij soj se vaa ve'é qui'yaj ma'an soj rihaan Diose á. Diose me síi canacúun

man soj canoco' soj man so', ne che'é dan ve'é canoco' soj man so' gaa chéé soj rihaan chumīi nihánj á. <sup>2</sup> Ne guun nij soj síi nì'yanj a'mii, ne ve'é qui'yaj soj ga tinúú soj, ne se guun yuvāa soj man tinúú soj ma'. Maan se inanj cunuu 'ee rá soj man tinúú soj, ne gaa inanj nimán soj ga tinúú soj á. <sup>3</sup> Ne se cunu' soj ga tuvi' soj, ne se quitáa ri'yunj soj tuvi' soj ma'. Maan se d̄inj cumán soj ga tinúú soj á. Ve'é cunó taran' soj rihaan Nimán Diose, ne ase vaa nimán orún' yuvii ro', danj gaa nimán soj ga tinúú soj á. <sup>4</sup> Dan me se orún' ya yuvii me ní' vaa, ne orún' ya nimán ní' vaa, ne dan me se orún' ya Nimán Diose me nuú nimán ya ní', ne guun ya rá taran' ní' se vaa canacúun Diose man taran' ní', ne 'o cuyaan cavii sa' taran' ní', qui'yaj Diose adon̄j. <sup>5</sup> Oruun síi 'nij ra'a man ní', ne oruun nana sa' amán rá ní', ne s̄ij cata' ne che'é Jesucristó me taran' ní', <sup>6</sup> ne orún' Rej taran' ní' Diose uún a. Nicaj yu'unj so' man taran' ní', ne 'yaj suun so' nimán taran' ní', ne yanj so' ga taran' ní' nanj adon̄j.

<sup>7</sup> Tzaj ne ndaa 'o 'o ní' rque Jesucristó 'o 'o suun sa' rihaan a. Dan me se yo' me rsuun sa' rque Jesucristó, ndaa vaa me rá so' rque so' man ní' ei. Ne qui'yaj ndo'o Diose se luj rihaan 'o 'o ní' se vaa guun nucuāj 'o 'o ní' qui'yaj suun ní' suun ca'ne' Jesucristó rihaan ní' a. <sup>8</sup> 'O cuyaan vaa nana nihánj ga nana no rihaan danj Diose, ne dan me se nana no rihaan danj Diose taj se vaa qui'yaj canaán Jesucristó rihaan nij síi taj ri'yunj man so', gaa ne ca'an̄j nicaj so' man nij so' rej xta', gaa ne rque so' se sa' rihaan nij yuvii a. Danj taj danj Diose a. <sup>9</sup> (Ne nana yo' taj se vaa cavii so' xta', ne ne'en ní' se vaa asino yaan nanij so' rej man nij síi cavi' rque yo'ó a. <sup>10</sup> Ne orún' so' me síi nanij rej man nij síi cavi', ne orún' so' me síi cavii rej xta' uún adon̄j. Dan me se xta' doj cavii so' rihaan daj a rasuun, gaa ne guun so' síi nicaj yu'unj man daj a rasuun adon̄j.)

<sup>11</sup> Ne ma'an so' me síi cune' man

ta'aj ní guun ta'aj ní apóstol nata' se-nana so' rihaan cunudanj nij yuvi man rihaan chumij, ne yo'ó ta'aj ní me sí cune' so' nata' nana tihaan naca Diose rihaan so', ne yo'ó ta'aj ní me sí cune' so' nata' se-nana Diose nana sa' rihaan nij sí ataa cuchuman rá ni'yaj man so', ne yo'ó ta'aj ní me sí nicaj yu'unj man nij sí amán rá ni'yaj man so', qui'yaj so', ne yo'ó ta'aj ní me sí ticha'nuu se-nana Diose rihaan nu' tinúú ní', qui'yaj so', ne dan me se ndaa ino vaa 'o 'o suun sa' nicaj 'o 'o ní', qui'yaj Jesucristó a. <sup>12</sup> Dan me se danj qui'yaj Jesucristó, che'é se me rá Jesucristó guun nucuaj ní sij cunuu sa' rihaan Diose qui'yaj suun ní' racuíj ní' man tinúú ní', gaa ne ve'é doj cuman taran' ní' sij noco' man Jesucristó, ne sa' doj qui'yaj suun ní' rihaan so' nanj adonj. <sup>13</sup> Ne sa' doj cuchuman rá ní' quene'en ní' ta'ní Diose, ne sa' doj quene'en ní' daj vaa so', ne ve'é cunuu rcua'aan taran' ní' adonj. Chij inanj gaa rá ní', gaa ne daj se sa' ndo'o vaa Jesucristó ro', danj gaa sa' taran' ní' nanj adonj.

<sup>14</sup> Tzaj ne cuano ro', me se ase vaa xnii vaa ní', ne vaa yuvi tiha' yu'unj ndo'o man ní', ne dan me se nuchruj raa ndo'o nij yuvi daj qui'yaj nij so', ne tiha' yu'unj nij so' man ní', ne tucu'yón ndo'o nij sí tiha' yu'unj nana naca man ní', ne amán rá ní' uno ní' náa guun nana tiha' yu'unj yo', 'yaj nij so' a. Tzaj ne asa' quisij cunuu chij rá ní', ne se cuno ní' nana tiha' yu'unj yo' a ma'. <sup>15</sup> Maan inanj nana ya ca'mij ní' rihaan tinúú ní', che'é se 'ee rá ní' man tinúú ní', gaa ne sa' doj quene'en ní' canoco' ní' man Jesucristó, nu' se vaa qui'yaj ní' adonj. Dan me se ase vaa rii ta'nga' cúu yave yuvi rihaan nu' nee man yuvi ro', danj vaa rii ta'nga' Jesucristó rihaan ní' adonj. <sup>16</sup> Ne maan che'é so' ro', me ase vaa oro' tuvi' nu' cúu man yo'o yuvi ro', danj vaa noco' tuvi' ní' ga tinúú ní', ne narqué Jesucristó se nucuaj achiin rihaan nu' nij tinuj ní', ne che'é dan ve'é doj cuman taran' ní', ne ve'é doj cunuu 'ee rá ní'

tinúú ní' adonj.

*Nana nihánj taj xna'anj se vaa ca'ne' rá ní' ga suun 'yaj ndaa vaa 'yaj nij sí ne amán rá ni'yaj man Jesucristó, ne ve'é qui'yaj ní' ga tinúú ní' do', ga sí 'nij ra'a man ní' do' ei*

<sup>17</sup> Che'é dan me cataj xna'anj yá 'unj 'o nana rihaan soj, che'é se noco' ní' man sí 'nij ra'a man ní' ei. Dan me se quisij qui'yaj soj se vaa 'yaj yo'ó nij sí yanij nij sí ne amán rá ni'yaj man Jesucristó nanj ei. Nij sí yanij yo' me se noco' nij so' nana snúú rma'an nana avii raa ma'an nij so', <sup>18</sup> ne ne uun nucuaj nij so' xcaj sa' nij so' cuentá a ma'. Se cavii sa' nimán nij so', qui'yaj Diose ma'. Maan se quiran' nij so' sayuun che'é se sí ni'yon me nij so' ne nichraj ndo'o rá nij so' adonj. <sup>19</sup> Ne rihuun rá nij so' che'é cacun' 'yaj nij so' ma'. Tananj yo'o noco' nij so' tucuáan chi'ii, ne 'yaj ndo'o nij so' cacun' se vaa me rá nee man nij so' qui'yaj nij so', ne niha' ndo'o rá nij so' qui'yaj nij so' cacun' yo' a. Ne a'ne' rá nij so' ga suun 'yaj cacun' a ma'.

<sup>20</sup> Tzaj ne ino uxrá vaa nana nari' soj asij guun che'e soj canoco' soj man Jesucristó ei. <sup>21</sup> Ya uxrá cuno nij soj se-nana Jesucristó, ne nari' nij soj nana ya adonj. <sup>22</sup> Nana nari' nij soj taj se vaa no xcúún soj tanáj soj chrej chi'ii chrej canoco' soj asino yaan a. Dan me se inanj se me rá nee man soj qui'yaj soj asino yaan, ne che'é dan tiha' yu'unj sí chree man soj, ne veé danj vaj soj, ne ca'anj soj rihaan ya'an nanj á. <sup>23</sup> Tzaj ne cuano nihánj no xcúún soj ca'vej soj cunuu sa' nimán soj, ne xcaj naca soj cuentá ei. <sup>24</sup> Ne ca'vej soj guun soj yuvi naca qui'yaj Diose á. Dan me se Diose me sí qui'yaj cunuu nica ya nimán soj, ne cunuu sa' ya nimán soj, qui'yaj so' adonj.

<sup>25</sup> Che'é dan ca'ne' rá soj ga nana ne, ne inanj nana ya ca'mij soj rihaan tinúú soj, che'é se ase vaa nee man ma'an soj ro', vaa nee man taran' nij tinuj ní' a. <sup>26</sup> Nda' se a'maan ndo'o rá



soj, tzaj ne se qui'yaj soj cacun' ma'. Ne ra'yanj na'maan rá uún soj cuaj ei. Se ca'vej rá soj yo'o gaa yuvaa nimán soj cunu' güii ma'. <sup>27</sup> Se gaa ya'núj rihaan sí chree caxrii sí chree chrej chi'ii rque soj, qui'yaj soj mei. <sup>28</sup> Sese vaa sí ituu 'nij sca'núj soj, ne ca'ne' rá nij so' ga suun 'yaj ituu rasuun ei. Maan se ve'é qui'yaj suun ma'an nij so' suun sa', gaa ne sese achiin rasuun rihaan tinúú so', ne guun nu-cuaj so' rque ma'an so' rasuun rihaan tinúú so' ei. <sup>29</sup> Se ca'vej soj ca'mii soj nana quij ma'. Maan se inanj guun rá soj ve'é ca'mii soj, ne nana sa' nana achiin man tinúú soj ro', yo' me nago' soj rihaan tinúú soj á. Ne cavi sa' doj taran' nij sí cunō nana ca'mii soj, sese sa' ca'mii soj ei.

<sup>30</sup> Ne se guun quinano rá Nimán Diose, qui'yaj soj ma'. Che'é se yanj Nimán Diose ga soj ro', che'é dan ne'en ya soj se vaa cavi sa' soj asa' quisij güii tinanii Diose man ní' rihaan sayuun adonj. Che'é se Nimán Diose yáan nimán soj ro', che'é dan me ne'en Diose se vaa ta'nij ya Diose me soj adonj. <sup>31</sup> Ca'ne' rá soj ga suun nachri' ni'yaj tinúú á. Ca'ne' rá soj ga suun axrij yuvaa man tinúú á. Ca'ne' rá soj ga suun a'maan rá á. Se caguáj soj doj rihaan tinúú soj ma'. Se ca'mii soj doj nana nij che'é tinúú soj ma'. Quiri'ij soj cunudanj chrej chi'ii yo' á. <sup>32</sup> Dan me se ve'é qui'yaj soj rihaan tinúú soj á. Gaa 'ee rá soj ni'yaj soj tinúú soj á. Ne'en soj se vaa caráj x'naa Diose che'é cacun' tumé ní', che'é se cavi' Jesucristó che'é ní' a. Che'é dan nō xcuún ya soj caraa x'naa soj ni'yaj soj tinúú soj adonj.

## 5

<sup>1</sup> Ne'en nij soj se vaa ta'nij Diose me soj cuano, ne 'ee uxrá rá Diose man soj, ne che'é dan ase vaa 'yaj ma'an Diose ro', danj gaa qui'yaj uún ma'an soj ei. <sup>2</sup> Gaa 'ee rá soj man tinúú soj gaa chéé soj rihaan chumii nihánj á. Inanj danj qui'yaj Jesucristó, cunuu 'ee rá so' man ní', ne ca'vej so' cavi' so' che'é ní', ne ase vaa se luj nago' yuvii

rihaan Diose ro', ta'nga' danj vaa Jesucristó che'é ní' nanj chuguanj.

<sup>3</sup> Se qui'yaj soj cacun' ga chana ma'. A 'ó se chi'ii se qui'yaj soj ma'. Ne se guun niha' rá soj quirí' ndo'o soj rasuun ma'. Sí sa' noco' man Diose me soj, ne daj chihaa mij se qui'yaj soj a doj cacun' vaa danj mei. <sup>4</sup> Ne se ca'mii soj nana chi'ii do', nana nij do' ma'. Se ca'mii soj nana snúú rma'an ma'. 'O se taj che'é ca'mii soj nana vaa danj mei. Maan se nō xcuún soj nago' inanj soj gracia' rihaan Diose ei. <sup>5</sup> Dan me se sí 'yaj cacun' ga chana ro', quiran' so' sayuun, ne sí niha' rá quirí' ndo'o rasuun ro', quiran' so' sayuun adonj. 'O se ase vaa sí na'vúj rihaan ya'anj cacój yuvii ro', danj vaa uún sí niha' rá quirí' ndo'o rasuun ei. Xcaj ya soj cuentá se vaa a 'ó sí 'yaj cacun' yo' se cayáan ga Diose asa' quisij güii guun chij Jesucristó do', guun chij Diose do', rihaan chumii nihánj a ma'.

<sup>6</sup> Se ca'vej rá soj ca'mii yuvii nana ne rihaan soj ne tiha' yu'unj nij yuvii man soj ma'. Se qui'yaj soj se chi'ii me rá nij yuvii qui'yaj soj ma'. Maan se yo' me se 'yaj nij sí na'vej rá cunō rihaan Diose, ne che'é dan axrij yuvaa Diose man nij so' adonj. <sup>7</sup> Che'é dan naxuun yanij soj man soj rihaan nij sí 'yaj danj ei. <sup>8</sup> Asij rque ro', ase vaa nij sí chéé rej rmi' ro', danj vaa ma'an soj, ne nuvi' cuentá nica' soj ma'. Tzaj ne yaj ro', canoco' soj man sí 'nij ra'a man ní', ne che'é dan ase vaa sí chéé rej ranga' ro', danj vaa soj, nica' ndo'o soj cuentá, ne che'é dan ve'é qui'yaj soj gaa chéé soj rihaan chumii nihánj ei. <sup>9</sup> Sí chéé rej ranga' ro', sa' 'yaj so', ne nica' vaa rá so', ne nana ya inanj a'mii so' adonj. <sup>10</sup> Dan me se nuchruj ra' soj daj qui'yaj soj, ne guun niha' rá sí 'nij ra'a man ní' quene'en so' man soj adonj.

<sup>11</sup> Tzaj ne se guun guun tuvij' soj ga nij sí chi'ii ne acaj cuentá ne qui'yaj soj se chi'ii ga nij so' ma'. 'O se xa' se vaa 'yaj nij so', tzaj ne taj se guun

yo' rihaan nij so' a ma'. 'O se tananj a guun rá soj tihaañ soj man nij sí 'yaj danj se vaa ne sa' vaa se 'yaj nij so' a. <sup>12</sup> 'O se xa' se vaa 'yaj yuve nij so', tzaj ne ndaa uun na'aj ya' ca'mij' che'é se vaa 'yaj yuve nij so' chuguanj. <sup>13</sup> Tzaj ne sese tihaañ ní' rihaan nij yuvii daj vaa nu' rasuun 'yaj yuve nij so', gaa ne quene'en nij so' daj vaa yo', ne xcaj ya' nij so' cuentá se vaa nij vaa qui'yaj nij so' ei. <sup>14</sup> 'O se ya'an chuguun me se ya' ruvi' nu' nij rasuun, 'yaj ya'an adonj. Che'é dan taj nana nihánj: “Narij soj nej, sij otoj sca'núj nij xngá, ne naxagaa soj, canicun' caya soj, ne Cristó me sí quichuguun rihaan soj a”, taj nana yo' a.

<sup>15</sup> Che'é dan tumé uxrá nij soj daj vaa 'yaj soj gaa chéé soj rihaan chumij nihánj ei. Se qui'yaj soj se vaa 'yaj nij sí ne ne'en ma'. Tananj qui'yaj soj ndaa vaa 'yaj sí cuu raá á. <sup>16</sup> Ne se ca'ne' uun rá soj cachén ndo'o orá rihaan soj ma'. 'O se uun ndo'o cacun' cuano nihánj, ne che'é dan no' xcúun soj qui'yaj suun ndo'o soj yaj gaa vaa ya'núj rihaan soj chuguanj. <sup>17</sup> Ne se guun soj sí ni'yon ma'. Tananj xcaj soj cuentá daj me rá sí 'nij ra'a man ní' qui'yaj soj ei. <sup>18</sup> Ne se guun xno soj ma'. Che'é se uun xno yuvii ro', che'é dan 'yaj ndo'o nij yuvii cacun' chi'ii ndo'o adonj. Tzaj ne yo'o cunuú Nimán Diose nimán soj ei. <sup>19</sup> Ase vaa nana achraá soj rihaan Diose ro', danj gaa nana ca'mij soj rihaan tinúú soj á. Ne cachraa nimán soj chra' rihaan sí 'nij ra'a man ní' á. <sup>20</sup> Ne niganj nago' soj graciá rihaan Diose che'é cunudanj rasuun, che'é se sí noco' man ta'ní Diose Jesucristó sij 'nij ra'a man ní' me soj á. <sup>21</sup> Ne ve'é qui'yaj cunudanj soj ndaa vaa me rá tuvi' soj, ne yo'o cunuú rá soj se vaa Jesucristó me sí ca'ne' cacun' che'é ní' vaa güii a.

*Nana nihánj taj xna'anj daj qui'yaj 'o' o' ní' rihaan tuvi' ní' a*

<sup>22</sup> Dan me se ve'é qui'yaj nij chana ndaa vaa me rá nica no' á. Dan me se

daj se uun rá ní' ni'yaj ní' man sí 'nij ra'a man ní' ro', danj guun rá chana ni'yaj chana nica no' á. <sup>23</sup> Dan me se Jesucristó me sí qui'yaj cavii sa' ní' sij noco' man so' rihaan sayuun, ne guun chij so' rihaan ní', ne che'é dan daj se uun rá ní' ni'yaj ní' man so' ro', danj inanj guun rá chana ni'yaj no' man nica no' a. <sup>24</sup> Ne ase vaa uno taran' ní' sij noco' man Jesucristó rihaan Jesucristó ro', ta'nga' danj qui'yaj nij chana cunó no' nu' nana sa' a'mii nica no' rihaan no' á.

<sup>25</sup> Ne nij snó'o ro', me se gaa 'ee uxrá rá nij so' man nica nij so' uún á. Dan me se ase vaa 'ee rá Jesucristó man taran' ní' sij noco' man so' ro', danj gaa 'ee rá nij snó'o man nica nij so' uún adonj. Ne'en soj se vaa ca'neé nimán Jesucristó cavi' so' che'é ní' sij noco' man so', <sup>26</sup> che'é se me rá so' cata' ne ní' ne naruvii nimán ní' ne x'nee cacun' taj xraá ní' ne cunó ní' se-nana Diose ne cunuú sa' ní' rihaan Diose, rá Jesucristó a. Danj me rá Jesucristó qui'yaj so' che'é taran' ní' sij noco' man so' adonj. <sup>27</sup> Ndaa síj, gaa ne vaa güii, ne cachron so' man ní' sij noco' man so' rihaan ma'an so', ne ve'é uxrá gaa taran' ní' ni'yaj so', ne a 'ó cacun' do', a 'ó se nij do', se quitáá xraá ní' a ma'. Maan se ase vaa vaa sa' Diose ro', danj gaa sa' taran' ní' adonj.

<sup>28</sup> Dan me se ase vaa 'yaj Jesucristó che'é ní' sij noco' man so' ro', danj qui'yaj uún nij snó'o che'é nica snó'o, ne ase vaa aráya'anj snó'o man nee man ma'an so' ro', danj gaa caraya'anj so' man nica so' uún á. Dan me se ase vaa nee man ma'an ní' ro', danj vaa chana nica ní' rihaan ní', ne che'é dan me se sese aráya'anj snó'o man nica snó'o, ne sí aráya'anj man ma'an me uún so' nanj chuguanj. <sup>29</sup> Ne a 'ó yuvii se qui'yaj chi'ii man nee man ma'an ma'. Tananj sese na'aan rque ní', ne ri' ní' se cha' ní', ne aráya'anj uxrá ní' man nee man ní' nanj adonj. Dan me se ase vaa 'yaj Jesucristó aráya'anj Jesucristó man taran' ní' sij noco'

man so' ro', danj inanj 'yaj uún ní' aráya'anj uxrá ní' man nee man ní' ei. <sup>30</sup> Dan me se ase vaa nee man ma'an Jesucristó ro', danj vaa taran' ní' sij noco' man so' rihaan so' uún adonj. <sup>31</sup> Ne nihánj me nana no rihaan danj Diose a: "Che'é dan tanáj snó'o man rej so' do', man nii so' do', ne ve'é nacaj snó'o man chana nica so', ne ase vaa orún' yuvi ro', danj gaa roj so' a", taj danj Diose a.

<sup>32</sup> Nana noco ndo'o me nana nihánj nana tihaan naca Diose rihaan ní', ne a'mii nana nihánj che'é Jesucristó do', che'é taran' ní' sij noco' man so' do', nanj adonj. <sup>33</sup> Dan me se sese snó'o me soj, ne no xcúún 'o 'o soj gaa 'ee rá soj man nica soj, ne ase vaa aráya'anj soj man ma'an soj ro', danj gaa caraya'anj soj man nica soj ei. Ne chana ro', no xcúún chana caraa cochroj chana rihaan nica chana uún ei.

## 6

<sup>1</sup> Ne nij xnii noco' man sí' 'nij ra'a man ní' ro', no xcúún nij xnii ve'é cunó nij xnii rihaan rej xnii do', rihaan nii xnii do' ei. <sup>2</sup> Nihánj me 'o nana noco taj xna'anj danj Diose rihaan ní' a: "Ve'é caraa cochróo so' rihaan rée so' do', rihaan ní' so' do' á", taj danj Diose rihaan ní', ne cata' tu'va Diose se vaa sese cunó ní' nana nihánj, ne sa' uxrá qui'yaj Diose che'é ní', ne orún' nana nihánj me nana ca'mii Diose asino yaan rihaan nu' yo'ó nij tuvi' nana nihánj adonj. <sup>3</sup> Dan me se cataj Diose se vaa sese danj qui'yaj ní' ndaa nihánj, gaa ne cavii sa' ní', ne guun que'ee doj güii cané ní' rihaan chumii nihánj a. Danj qui'yaj Diose che'é ní', sese cunó ní' rihaan rej ní' do', rihaan nii ní' do' adonj. <sup>4</sup> Ne sese rej xnii me soj, ne se ca'maan rá ta'níi soj qui'yaj soj ma'. Tananj ve'é tacuachij soj man ta'níi soj, ne dan me se tucu'yón soj suun man ta'níi soj, ne tucu'yón soj se-nana sí' 'nij ra'a man ní' man ta'níi soj á.

<sup>5</sup> Ne mozó ro', me se ve'é cunó so' rihaan se-ru'vee so', ne gaa ni'yanj nimán mozó, ne caraa cochroj uxrá mozó rihaan se-ru'vee mozó á. Ase vaa 'yaj mozó rihaan ma'an Jesucristó ro', danj qui'yaj uún mozó rihaan se-ru'vee mozó á. <sup>6</sup> Ne se qui'yaj mozó yo' se vaa 'yaj nij síi vaa quij nimán ma'. Dan me se nij síi vaa quij nimán ro', me rá nij so' gaa niha' rá se-ru'vee nij so' ni'yaj so' man nij so', tzaj ne inanj gaa ni'yaj ru'vee man nij so' 'yaj suun nij so', ne se guun qui'yaj soj danj ma'. Tananj 'o ca'nej nimán soj qui'yaj suun soj, ne guun rá soj se vaa se-mozó Jesucristó me soj, ne qui'yaj soj nu' se vaa me rá Diose qui'yaj soj á. <sup>7</sup> Guun niha' rá soj qui'yaj suun soj á. Se guun rá soj se vaa rihaan yuvi 'yaj suun soj mei. Tananj guun rá soj se vaa mozó 'yaj suun rihaan ma'an sí' 'nij ra'a man ní' me soj á. <sup>8</sup> Xcaj soj cuentá se vaa sese qui'yaj suun sa' ní', ne taj se 'yaj sese ca'vee se mozó me ní' do', ca'vee se nuveé mozó me ní' do', taj se 'yaj mei. Dan me se ya naru'vee sí' 'nij ra'a man ní' che'é suun 'yaj suun sa' ní' nanj adonj.

<sup>9</sup> Ne soj sij ru'vee ro', me se ve'é qui'yaj uún soj ga se-mozó soj ei. Ca'ne' rá soj ga suun axrij yuvaa man mozó, ne ca'ne' rá soj ga suun tuchu'vi' man mozó uún á. 'O se ne'en soj se vaa nicun' sí' 'nij ra'a man soj do', man se-mozó soj do', rej xta', ne 'o cyaan vaa taran' ní' rihaan so' adonj.

*Nana nihánj taj xna'anj daj qui'yaj ní', ne ca'vee qui'yaj canaan ní' rihaan sí' chree a*

<sup>10</sup> Taj vaj yo'ó nana cataj xna'anj 'unj rihaan soj, man tinuj, man nocoj. Yo'o gaa chre' soj ga sí' 'nij ra'a man ní' ei. Ca'vej soj ca'nej sí' 'nij ra'a man ní' se nucuaj nimán soj, ne daj se vaa se nucuaj nicaj ma'an so' ro', danj gaa se nucuaj nicaj ma'an soj, qui'yaj so' chuguanj. <sup>11</sup> Dan me se nu' se nucuaj rqué Diose man soj ro', ca'nej soj se nucuaj yo' nimán soj, ne guun nucuaj

soj qui'yaj canaán soj rihaan sí chree gaa me rá sí chree tihá' yu'unj sí chree man soj ei. <sup>12</sup> 'O se nuveé inanj yuvií man rihaan chumií nihánj me nij sí unu' ga soj mei. 'O se nij ya'anj rii ta'nga' rihaan chumií nihánj me nij sí unu' ga soj, ne ase vaa nimán vaa nij so', ne vaj nij so' rque nana vaj xta' ndo'o, ne chí'ii ndo'o vaa nij so', ne yuvií man rihaan chumií nihánj cuano, tzaj ne vaj ndo'o nij so' rej rmi', ne che'é dan rii ta'nga' ndo'o nij ya'anj yo' rihaan nij so' adonj. <sup>13</sup> Che'é dan ca'nej soj nu' se nucuaj rqué Diose man soj nimán soj, ne güii qui'yaj ndo'o sí chree sayuun rihaan chumií nihánj ro', ne guun nucuaj soj qui'yaj canaán soj rihaan sí chree ei. Ne asa' cunu' soj ga sí chree yo', ne sí gaa nucuaj doj rihaan sí chree guun soj adonj.

<sup>14</sup> Dan me se nana' soj daj qui'yaj soj cunu' soj ga sí chree yo' á. Uxra canoco' soj nana ya, ne ase vaa nuj 'nij catuun tanuu ro', danj gaa nana yo' rihaan soj, ne guun nucuaj soj cunu' soj ga sí chree yo' ei. Ne ca'vej soj cunu sa' nimán soj rihaan Diose, ne ase vaa aga' aráan nu' rucuaa tanuu ro', danj gaa se caráan nimán soj, qui'yaj Diose, gaa ne se guun nucuaj sí chree qui'yaj chí'ii sí chree yo' nimán soj a mei. <sup>15</sup> Ne gaa listó soj, ne cavii soj ca'anj soj, nata' soj se-nana Diose nana sa' rihaan yuvií, ne cuno nij yuvií nana sa' yo', ne cavii sa' nij yuvií, ne ve'é cayáan nij yuvií ga Diose, qui'yaj nana sa' yo' ei. Ne ase vaa canuj 'nij tacóo tanuu ro', danj gaa nana sa' yo' rihaan soj a. Qui'yaj canaán soj rihaan sí chree qui'yaj nana sa' yo' adonj. <sup>16</sup> Ne niganj gaa nucuaj uxra rá soj man Jesucristó, gaa ne ase vaa tanuu noco' rcuchra' manj ra'a ro', danj gaa ma'an soj uún, ne sese go' sí chree chruun taj tanj raá aco' ya'an man soj, ne guun nucuaj soj tina'áj soj ya'an yo' chuguanj. <sup>17</sup> Ne guun ya rá soj se vaa quinanií soj rihaan sayuun, qui'yaj Diose, ne ase vaa nave aga'

nuu raá tanuu ro', danj gaa nana sa' cunuú raá soj, ne se guun nucuaj sí chree qui'yaj sí chree se chí'ii man soj, che'é se guun ya rá soj se vaa quinanií soj rihaan sayuun adonj. Ne canoco' uxra soj se-nana Diose nana sa' nana rqué Nimán Diose rihaan ní', ne ase vaa neê espadá noco' ra'a tanuu ro', danj gaa se-nana Diose rihaan soj, ne guun nucuaj soj go' soj man sí chree, qui'yaj se-nana Diose yo' adonj.

<sup>18</sup> Ne niganj cachinj ni'yaj uxra soj rihaan Diose, ne racuíj Nimán Diose man soj cachinj ni'yaj soj ei. Se ca'ne' rá soj ma'. Tananj a yo'o cachinj ni'yaj uxra soj che'é taran' ní' sij sa' noco' man Diose ei. <sup>19</sup> Ne cachinj ni'yaj soj che'é ma'án 'unj se vaa rque Diose nana cuu ca'mii 'unj rihaan yuvií, ne sca' tiháan 'unj nu' se-nana Diose nana sa' rihaan nij yuvií á. Dan me se nana tiháan naca Diose man ní' me nana sa' yo', <sup>20</sup> ne nda' se numií 'unj aga' ne', tzaj ne 'unj me sí quirí' suun nata' nana sa' yo' rihaan yuvií, ne cachinj ni'yaj soj rihaan Diose se vaa se cuchu'ví' 'unj ca'mii 'unj nana sa' yo' rihaan yuvií, che'é se no xcúún yá 'unj ca'mii sca' yá 'unj nana sa' yo' rihaan yuvií adonj.

*Nana nihánj taj xna'anj se vaa ca'neé Pabló man sí cu'naj Tíquico cuchí' so' rihaan nij sí man Efeso a*

<sup>21</sup> Cataj xna'anj tinúú ní' sí cu'naj Tíquico rihaan soj nu' se vaa quirán' 'unj a. 'Ee ndo'o rá 'unj man so', ne ve'é ndo'o 'yaj suun so' rihaan 'unj, che'é se sí noco' man sí 'nij ra'a man ní' me núj chuguanj. Ne a'ne' rá so' ga suun 'yaj suun ma'. Tananj 'o 'yaj suun so' che'é se-nana Diose nanj adonj. <sup>22</sup> Ne me rá 'unj quene'en soj nu' se vaa quiran' núj, ne me rá 'unj quinarií' nucuaj nimán soj, ne che'é dan ca'nej 'unj man so' cuchí' so' rihaan soj ei.

*Nana nihánj taj xna'anj se vaa me rá Pabló qui'yaj ndo'o Diose se luj che'é nij sí cuchumán rá ni'yaj man Jesucristó yanj chuman' Efeso a*



<sup>23</sup> Me rá 'uj̄ gaā xej̄ nimán̄ nij̄ tinuj̄  
nij̄ soj̄, nē gaā 'eē rá soj̄ tinúú soj̄, nē  
gaā nucuaj̄ rá soj̄ man̄ Diosē, qui'yaj̄  
Rej̄ ní' Diosē do', qui'yaj̄ Jesucristó  
sij̄ 'nij̄ ra'a man̄ ní' do' adonj̄. <sup>24</sup> Nē  
me rá 'uj̄ qui'yaj̄ ndo'o Diosē se luj̄  
che'é taran' nij̄ soj̄ sij̄ yo'o aráj̄ cochroj̄  
rihaan̄ Jesucristó sij̄ 'nij̄ ra'a man̄ ní'  
nu' caviī nu' ca'anj̄ a.

**Nihánj me 'o yanj  
cartá qui'yaj síí cu'naj  
Pabló ca'neé so'  
rihaan nij yuvii noco'  
man Diose yanj  
chuman' cu'naj  
Filipos a**

<sup>1</sup> Síí cu'naj Pabló ga síí cu'naj Timoteo me rój, ne síí 'yaj suun rihaan Jesucristó me rój, ne nihánj me se 'yaj rój yanj cartá nihánj ca'nej rój rihaan cunudanj nij soj sij sa' rihaan Diose noco' man Jesucristó sij yanj chuman' cu'naj Filipos a. Me rá rój nayaa nij soj nayaa nij síí uun chij rihaan soj nayaa nij síí 'yaj suun che'é soj nayaa yanj cartá nihánj a.

<sup>2</sup> Dan me se me rá rój qui'yaj Rej ní' Diose qui'yaj Jesucristó sij 'nij ra'a man ní' qui'yaj se luj che'é nij soj, ne me rá rój gaa xej nimán nij soj qui'yaj roj so' a.

*Nana nihánj taj xna'anj se vaa achíín ni'yaj ndo'o Pabló rihaan Diose che'é nij síí cuchumán rá ni'yaj man Jesucristó yanj chuman' cu'naj Filipos a*

<sup>3</sup> Gaa na'nuj rá 'unj man nij soj, ne nagó' 'unj graciá rihaan Diose che'é soj a. <sup>4</sup> Ne gaa achíín ni'yaj rihaan Diose, ne uun niha' ndo'o raj gaa achíín ni'yaj che'é taran' soj rihaan Diose chuguanj. <sup>5</sup> Dan me se nagó' 'unj graciá rihaan Diose che'é se vaa gaa cuno soj se-nana Diose, ne yuun che'e racuíj soj manj cataj xna'anj cunudanj ní' se-nana Diose rihaan yuvii, ne veé danj 'yaj soj ndaa cuano ei. <sup>6</sup> Veé danj nagó' 'unj graciá rihaan Diose che'é soj che'é se guun ya raj se vaa ya uxrá guun che'e ya Diose qui'yaj suun ma'an Diose nimán soj, ne guun ya raj se vaa guun nucuj soj tinavij soj nu' suun ca'ne' Diose rihaan soj, qui'yaj uún Diose, ne asa' quisíj güii ca'na' uún

Jesucristó rihaan chumii nihánj ro', ne quisij guee nu' suun vaa rihaan soj adonj. <sup>7</sup> Ne vaa che'é ya ca'mij danj che'é taran' nij soj, ese ya no xcúún soj chuguanj. Dan me se ya caráya'anj uxrá soj manj, ne gaa 'nij 'unj taga' do', gaa ca'mii 'unj rihaan nij síí na'vej rá cuno se-nana Diose do', gaa vaj 'unj rihaan nij síí nicaj suun che'é yan a'ne' nij so' cacun' che'ej do', gaa tucu'yón 'unj se-nana Diose man yuvii do', ne racuíj ndo'o cunudanj nij soj manj, ne che'é dan me se soj sij 'yaj suun gaj me se me ndo'o ya raj quene'anj man soj ei. <sup>8</sup> Ne Diose me síí ne'en ya se vaa ase vaa 'ee rá Jesucristó man nij soj ro', veé danj 'ee guee rá ma'anj man cunudanj nij soj chuguanj.

<sup>9</sup> Ne achíín ni'yaj rihaan Diose se vaa cunu 'ee doj rá soj tuvi' soj 'o 'o güii, ne sa' doj xcaj soj cuentá daj vaa 'o 'o rasuun, <sup>10</sup> gaa ne inanj chrej sa' doj narij soj canoco' soj nanj adonj. Ndaa sij, gaa ne asa' ca'na' uún Jesucristó rihaan chumii nihánj, ne sa' inanj gaa nimán soj, ne taj cacun' cutumé soj a ma'. <sup>11</sup> Dan me se ya guun soj yuvii cunu sa' nimán, ese ya qui'yaj canaán soj nacaj ndo'o soj rihaan cacun', ne dan me se gaa güii ca'na' uún Jesucristó me se cataj nii se vaa sa' uxrá vaa Diose síí naqui'yaj sa' nimán soj adonj.

*Nana nihánj taj xna'anj se vaa cuno ndo'o yuvii se-nana Diose nana sa' a*

<sup>12</sup> Me rá 'unj xcaj nij soj cuentá se vaa cavii sa' doj se-nana Diose nana sa' che'é nu' sayuun quirán' 'unj, tinuj, nocoj. <sup>13</sup> Dan me se nij tanuu man tucua' suun do', cunudanj nij yuvii man nihánj do', ne'en nij so' se vaa 'nij 'unj taga' che'é se canocó' 'unj man Jesucristó, <sup>14</sup> ne yo'ó nij tinúú ní' síí noco' man síí 'nij ra'a man ní' ro', nari' nucuj nimán que'ee ndo'o nij so', che'é se ne'en nij so' se vaa 'nij 'unj taga', ne ne chu'vi' nij so' ca'mii nij so' se-nana Diose rihaan yuvii cuano ma'.

<sup>15</sup> Dan me se, ta'aj nij so' a'mii natáj se-nana Jesucristó che'é se uun xcoj ruvaa rá nij so' ni'yaj nij so' manj, tzaj ne yo'ó ta'aj nij so' a'mii natáj che'é se me inanj rá nij so' qui'yaj sa' nij so' adonj. <sup>16</sup> Nij síi sa' yo' ro', 'ee rá nij so' manj, ne ne'en nij so' se vaa cune' Diose manj ca'mij rihaan nij yuvii na'vej rá cunō nana sa' yo' a. <sup>17</sup> Tzaj ne yo'ó nij so' ro', me se che'é se guun xcoj ruvaa rá nij so' ni'yaj nij so' manj, che'é dan a'mii natáj nij so' se-nana Jesucristó, tzaj ne ne a'mii chij nij so' ma'. Maan se danj 'yaj nij so' che'é se me rá nij so' nana doj rá 'unj che'é se 'nij 'unj taga' adonj. <sup>18</sup> Tzaj ne ca'vee se vaa nica nimán ta'aj nij so' do', ca'vee se ne vaa nica nimán ta'aj nij so' do', tzaj ne taj se 'yaj ma'. Maan se nata' cunudanj nij so' se-nana Jesucristó rihaan yuvii, ne che'é dan guun niha' raj adonj. Tzaj ne vaa güii, ne guun niha' doj rá yá 'unj nanj ei. <sup>19</sup> 'O se ne'én 'unj se vaa cavii sa' 'unj doj vaa güii, che'é nu' se vaa rán' 'unj nihánj adonj. Dan me se guun ni'yaj ní' che'é se achíin ni'yaj soj rihaan Diose che'é 'unj, ne guun ni'yaj ní' che'é se racuíj ya Nimán Diose manj, ne che'é dan cavii sa' yá 'unj doj ei.

*Nana nihánj taj xna'anj se vaa vaa i'na' Pabló che'é Jesucristó a*

<sup>20</sup> Dan me se daj chihaa mój se canó chrej na'aj rihanj, raj ma'. Ca'vee quitaj xta' rihanj ca'mij nana ya rihaan nij yuvii, ne dan me se guun ya raj se vaa se guun na'aj 'unj ma'. Dan me se asij rque ro', xcaj ndo'o yuvii cuentá se vaa sa' uxrá vaa Jesucristó, qui'yáj, ne ca'vee se gaa i'na' 'unj do', ca'vee se cavi' 'unj do', tzaj ne danj inanj qui'yáj cuano nihánj, rá 'unj, ne se kuchu'vi' 'unj daj chihaa mój, rá 'unj ma'. <sup>21</sup> Vaa i'na' 'unj che'é Jesucristó, ne sese cavi' 'unj che'é Jesucristó, ne cavii sa' 'unj doj, qui'yaj so' adonj. <sup>22</sup> Dan me se sese yo'o gaa i'na' 'unj rihaan chumii nihánj, ne gaa ya'núj rihanj qui'yaj sunj che'é Jesucristó, ne che'é dan ne ne'enj ase

sa' doj cavi' 'unj ni', ase sa' doj canej ni', ne ne'enj daj qui'yáj a mei. <sup>23</sup> 'O se sa' cuyaan vaa roj chrej chuguanj. Dan me se sese cavi' 'unj, ne quinán' 'unj rihaan Jesucristó, ne ve'é uxrá doj gaa uún nanj ei. <sup>24</sup> Tzaj ne achiin doj cayánj quitihanj se-nana Diose rihaan soj, <sup>25</sup> ne che'é dan ne'én 'unj se vaa se guun cavi' 'unj cuano ma'. Maan se quinaj 'unj ga soj doj, ne racuíj 'unj man soj, ne sa' doj canoco' soj Diose, qui'yáj adonj. Ndaa síj, gaa ne guun niha' doj rá soj rihaan Diose adonj. <sup>26</sup> Dan me se asa' curihanj 'unj taga', ne quene'en uún soj manj, ne che'é dan ve'é uxrá doj ca'mii soj che'é Jesucristó ei.

*Nana nihánj taj xna'anj se vaa ve'é qui'yaj suun ní' che'é Jesucristó a*

<sup>27</sup> Síi noco' se-nana Jesucristó nana sa' me nij soj, ne che'é dan cunō soj tucuaán yo', ne ve'é qui'yaj soj cane soj ga tinúú soj á. Ne sese cuchí' 'unj chiháán soj, ne quene'én 'unj se vaa cuyaan vaa rá cunudanj soj a. Dan me se nda' se se cuchí' 'unj, tzaj ne nda' se nana uun cunōj se vaa cuyaan vaa rá cunudanj soj á. Dan me se cuyaan gaa rá soj, ne racuíj soj tinúú soj, ne yo'o qui'yaj suun soj che'é nana sa' noco' ní' á. <sup>28</sup> Ne daj chihaa mój se kuchu'vi' soj ni'yaj soj man nij síi taj ri'yunj man ní' ma'. Ne yo' me quene'en nij so' daj 'yaj soj, ne xcaj nij so' cuentá se vaa xa' ma'an nij so', tzaj ne cacaa nij so' vaa güii, ne xa' soj, tzaj ne cavii sa' soj a. Veé danj xcaj ya nij so' cuentá, qui'yaj Diose nanj adonj. <sup>29</sup> Maan che'é Jesucristó qui'yaj ndo'o Diose se luj rihaan soj se vaa cuchumán rá soj ni'yaj soj man Jesucristó qui'yaj ma'an Diose adonj. Tzaj ne yo'ó se luj qui'yaj Diose me se ca'vej rá Diose quirán' soj sayuun che'é Jesucristó, ne doj a ve'é gaa sese quirán' soj sayuun che'é so' adonj. Ne yo' me yo'ó se luj qui'yaj uún Diose rihaan soj a. <sup>30</sup> Dan me se cuyaan vaa sayuun ran' soj ga sayuun rán' 'unj nanj ei. Tzaj ne aj ne'en soj daj vaa canó tuví' 'unj ga sayuun yo' adonj.

Ne cuano nihánj me se aj cuchí' uún nana nihánj rihaan soj se vaa anó tuví' uún 'unj ga sayuun nanj adonj.

## 2

*Nana nihánj taj xna'anj se vaa ase vaa rá Jesucristó ro', danj gaa rá ma'an ní' uún a*

<sup>1</sup> Ya ya nari' nucuaj nimán ní', 'yaj Jesucristó, rá soj na'. Ya ya uun niha' nimán ní', 'yaj tinúú ní' sí' 'ee rá man ní', rá soj na'. Ya ya ve'é mán nu' nij tinuj ní', 'yaj Nimán Diose, rá soj na'. Ya ya nuu 'ee rá ní' sij noco' man Jesucristó man tinúú ní' sí' quiran' sayuun, rá soj na'. Dan me se nana nihánj ro', me ya uxrá vaa nanj adonj.

<sup>2</sup> Che'é dan qui'yaj soj ndaa vaa taj nana nihánj, gaa ne guun niha' uxrá raj, ne dan me se cyaan gaa nimán soj ga tinúú soj, ne cunuu 'ee rá soj man tinúú soj, ne guun niha' uxrá raj adonj.

<sup>3</sup> Se guun xcoj ruvaa rá soj ni'yaj soj tinúú soj ma'. Se guun rá soj se vaa cataj tinúú soj se vaa sa' uxrá vaa ma'an soj ma'. Tzaj ne gaa nica' nimán soj, cataj soj se vaa sa' doj vaa tinúú soj rihaan ma'an soj á.

<sup>4</sup> Se caraya'anj soj man inanjanj ma'an soj ma'. Tzaj ne caraya'anj 'o 'o soj man tinúú soj á.

<sup>5</sup> Ase vaa rá ma'an Jesucristó ro', danj gaa rá ma'an soj uún á. <sup>6</sup> Ne Jesucristó me se Diose ya me so', ne so' me sí' no xcúún guun chij ndo'o, tzaj ne ne guun niha' ndo'o rá so' guun chij so' ma'. <sup>7</sup> Tananj a tanáj so' nu' suun uun chij yo', ne guun so' yuvií guun so' se-mozó yuvií guun so', ne ase vaa yuvií ro', danj vaa so' gaa ca'na' so' rihaan chumií nihánj adonj.

<sup>8</sup> Dan me se cunuu nica' nimán so', ne cuno so' ca'mii Diose, ne ndaa ca'vej rá so' cachron nii man so' rihaan rcutze ya, ne ve'é danj me nó so' gaa cavi' so' nanj adonj. <sup>9</sup> Che'é dan guun chij ndo'o so' rej xta', qui'yaj Diose, ne guun so' sí' guee doj rihaan cunudanjanj yuvií, qui'yaj uún Diose nanj adonj.

<sup>10</sup> Che'é dan vaa güii, ne canicun' ruj cunudanjanj nij sí' man xta' do', nij sí'

man rihaan chumií do', nij sí' man rej rque yo'óo do', asa' cuno nij so' se-chuvií Jesucristó, <sup>11</sup> ne cataj ya nij so' se vaa ma'an Jesucristó me sí' 'nij ra'a man ní', ne quene'en nij so' se vaa sa' uxrá qui'yaj Rej ní' Diose adonj.

*Nana nihánj taj xna'anj se vaa qui'yaj suun ní' yan cunuu sa' nimán ní' a*

<sup>12</sup> Che'é dan cuno soj ca'mij, tinuj, nocoj. Gaa cayáán 'unj ga soj, ne cuno soj nu' nana ca'mij, ne qui'yaj suun uxrá soj che'é rej quinavij nu' chrej chi'ii uun chij nimán soj, ne cunuu sa' nimán soj a. Cuanó nihánj me se nda' se nuví' 'unj yáán ga soj, tzaj ne me rá 'unj doj cuno soj a. Ase 'yaj xnii gaa chu'vi' xnii ni'yaj xnii rej xnii ro', danj gaa qui'yaj soj cuchu'vi' soj ni'yaj soj Diose, ne doj a qui'yaj suun soj che'é rej quinavij nu' chrej chi'ii uun chij nimán soj, ne cunuu sa' nimán soj rihaan Diose á. <sup>13</sup> Diose me sí' 'yaj suun nimán soj yan guun rá soj cuno soj se-nana so', ne so' me sí' qui'yaj guun nucuaj soj qui'yaj soj nu' se vaa me rá so' qui'yaj soj adonj.

<sup>14</sup> A 'ó güii se ca'mii tu'va yuve soj che'é tinúú soj ma'. Inanjanj ve'é qui'yaj suun soj ga tinúú soj á. <sup>15</sup> Ne guun soj sí' sa', ne taj cacun' cutumé soj rihaan Diose mei. Ne nda' se chéé soj ga yuvií vaa quij nimán man rihaan chumií nihánj cuano, tzaj ne ve'é cuno soj rihaan Diose, ne yo'o ya guun ta'nij Diose man soj chuguanjanj. Dan me se ase vaa ve'é ndo'o vaa chuguanjanj yati' rej xta' ro', danj ve'é uxrá quene'en yuvií man soj vaj soj rihaan chumií nihánj, ne <sup>16</sup> raan canoco' soj se-nana Diose nana 'yaj vaa i'na' nimán ní', gaa ne guun niha' raj ni'yaj 'unj man soj gaa güii ca'na' uún Jesucristó rihaan chumií nihánj, che'é se quene'en so' se vaa qui'yaj suun uxránj tucu'yonjanj man soj ne cavií sa' nu' suun qui'yaj sunj a.

<sup>17</sup> Ne nda' se ndaa ayanjanj ma'an ton manjanj che'é sayuun rán' 'unj che'é se me ndo'o raj yo'o cuchuman rá soj



nì'yaj soj Diose, tzaj ne guun niha' ndo'o raj, ne tucuachenj doj se niha' nuu nimanj nimán soj ei. <sup>18</sup> Ne guun niha' rá soj uún, ne guun niha' rá 'unj che'é soj a.

*Nana nihánj taj xna'anj se vaa cuchì' sí cu'naj Timoteo doj', sí cu'naj Epafrodito doj', chuman' cu'naj Filiposa*

<sup>19</sup> Me rá 'unj ca'nej 'unj man sí cu'naj Timoteo cuchì' so' rihaan soj, sese ca'vej rá Jesucristó sij 'nij ra'a man ní' cuchì' so' a. Ne canicaj so' ca'na' so' rihanj, ne cataj xna'anj so' rihanj daj quiran' soj, gaa ne guun niha' raj a. <sup>20</sup> Orún' so' me sí nanó ndo'o rá che'é soj daj ran' soj, ne taj vaj yo'ó sí sa' ase sa' orún' so' ma'. <sup>21</sup> Tzaj ne yo'ó nij so' ro', inanj che'é ma'an nij so' aráya'anj nij so', tzaj ne ne aráya'anj nij so' che'é Jesucristó ma'. <sup>22</sup> Tzaj ne aj ne'en soj se vaa sí sa' uxrá me sí cu'naj Timoteo, ne daj se 'yaj xnii 'yaj suun xnii ga' rej xnii ro', danj vaa 'yaj Timoteo 'yaj suun so' che'é se-nana Diose gaj ei. <sup>23</sup> Che'é dan xcaj 'unj cuentá daj quirán' 'unj rej rihaan, gaa ne nu' ca'nej 'unj man so' cuchì' so' rej yanj soj a. <sup>24</sup> Ne nucuaj rá 'unj man sí 'nij ra'a man ní' se vaa ra'yanj cuchì' ma'anj rihaan soj adonj.

<sup>25</sup> Vaa che'é ndo'o ca'nej 'unj man tinúú ní' sí cu'naj Epafrodito cuchì' so' rihaan soj vaa nanj ei. So' me sí qui'yaj suun ndo'o gaj rej man sí taj ri'yunj man ní', ne ma'an nij soj me sí ca'neé man so' ca'na' so' rque so' se vaa achiin manj, <sup>26</sup> ne me ndo'o rá so' quene'en uún so' man nij soj nanj adonj. Dan me se nanó rá so' se vaa cuno soj nana che'é so' se vaa canó chi'ij man so' adonj. <sup>27</sup> Ya daj doj se cavi' so', tzaj ne cunuu 'ee rá Diose man so', ne cunuu 'ee rá Diose man 'unj doj', ne ne cavi' so' ma'. 'O se sese cavi' sí cu'naj Epafrodito, ne nanó ndo'o raj nanj ei. <sup>28</sup> Che'é dan ra'yanj ca'nej 'unj man so' cuchì' so' rihaan soj, ne guun niha' rá soj quene'en soj man so', ne che'é dan se nanó rá 'unj

che'é soj ma'. <sup>29</sup> Che'é dan asa' cuchì' so', ne gaa niha' ndo'o rá soj ca'mii soj ga' so' ei. Dan me se ya tinúú ní' sij noco' man sí 'nij ra'a man ní' me so' ei. Caraa cochroj soj rihaan cunudanj nij yuvi 'yaj ndaa vaa 'yaj sí cu'naj Epafrodito yo' ei. <sup>30</sup> 'O se daj doj se cavi' so' che'é suun qui'yaj suun so' che'é Jesucristó nanj adonj. Dan me se ca'neé nimán so' cavi' so' che'é se nayón so' rihaan soj racu'ij so' manj nanj chuguanj.

### 3

*Nana nihánj taj xna'anj se vaa sa' doj vaa Jesucristó rihaan cunudanj a*

<sup>1</sup> Dan me se gaa niha' rá soj nì'yaj soj sí 'nij ra'a man ní', tinuj, nocoj. Ne sayuun vaa cachrón uún 'unj nana nihánj nayaa soj ma'. Ne cavi sa' doj soj, sese cuno soj nana nihánj chuguanj. <sup>2</sup> Dan me se tumé soj man soj sese cuchì' nij sí chi'ij, nij sí niha' rá ca'ne' nee man yuvi rej man soj á. 'O se ase vaa chuvee ro', danj vaa nij so' adonj. <sup>3</sup> Ne xa' ní', tzaj ne ino 'yaj ní' ei. 'O se sí ya cunuu sa' rihaan Diose me ní', ne inanj Nimán Diose noco' ní' gaa 'yaj suun ní' rihaan Diose adonj. Ne nucuaj rá ní' man ma'an ní' se vaa cavi sa' ní' che'é se vaa 'yaj ma'an ní' ma'. Tananj niha' rá ní' nata' ní' se vaa Jesucristó me sí 'yaj ca'vee cavi sa' ní' adonj.

<sup>4</sup> Dan me se nij sí chi'ij ro', sa' uxrá 'yaj ma'an nij so', rá nij so', ne che'é dan cavi sa' nij so' qui'yaj ma'an nij so', rá nij so', tzaj ne 'unj nihánj me se sa' doj qui'yaj ma'anj rihaan nij so' ei. <sup>5</sup> Dan me se ya sí israelitá mej, ne gaa cachén tunj güii ca'ngaa 'unj, ne cuta' nii ta'nga' man nee manj a. Yo'o ta'ní ta'nij si'no sí cu'naj Benjamín gaa naá mej, ne xi' 'unj doj', réj doj', ma'anj doj', me sí a'mii xna'ánj hebreo, ne sí fariseo mej, ne canocó 'unj se-tucuanj Moisés ga' nij so' a. <sup>6</sup> Gaa rque doj, ne sí nichraj nimán mej, ne qui'yaj uxraj sayuun man nij sí noco' man Jesucristó, che'é se me raj guun niha' rá Diose nì'yaj Diose

manj, ne ve'é uxrá canocó' 'un̄j nu' se-tucuanj Moisés, ne a 'ó nana yo' ne quinaj, qui'yáj ma'.

<sup>7</sup> Ne sa' uxrá qui'yáj, raj gaa rque, tzaj ne yaj ro', quene'enj se-nana Jesucristó, ne nu' rasuun qui'yáj gaa naá ro', ase vaa sigui' ri'yuj vaa nu' rasuun qui'yáj gaa naá, raj nanj ei. <sup>8</sup> Dan me se che'é se me ndo'o raj xcaj sa' 'un̄j cuentá che'é Jesucristó sij 'nij ra'a manj ro', che'é dan nu' se vaa qui'yáj gaa rque ro', daj se me raj ne'enj sigui' ri'yuj ro', danj me raj ne'enj man yo' cuano, ne che'é se ni'ya uun me yo' rihanj ro', che'é dan ca'vee canocó' 'un̄j man Jesucristó adonj. <sup>9</sup> Gaa ne vaa güii, ne cunu sa' 'un̄j rihaan Diose, tzaj ne nuveé se-tucuanj Moisés me se qui'yaj cunu sa' 'un̄j rihaan Diose ma'. Maan se che'é se amán rá 'un̄j ni'yaj 'un̄j Jesucristó ro', che'é dan me cunu sa' 'un̄j qui'yaj ma'an Diose adonj. <sup>10</sup> Inanj me rá 'un̄j sa' doj xcaj 'un̄j cuentá che'é Jesucristó á. Dan me se nucaj Diose, ne cunu i'na' uún Jesucristó gaa cavi' so', qui'yaj Diose, ne che'é dan me ndo'o raj quene'enj daj qui'yaj Diose che'é 'un̄j a. Ne ase vaa quiran' Jesucristó sayuun ro', danj gaa quiran' ma'an 'un̄j sayuun ga so', raj, ne ase vaa ca'vej rá Jesucristó cavi' so' che'é ní' ro', danj gaa 'un̄j, raj, ne yo'o qui'yaj sunj che'é tinúú 'un̄j rihaan Diose adonj. <sup>11</sup> Ndaa síj, gaa ne sese yo'o canocó' 'un̄j man so', ne ca'vee cunu i'na' uún 'un̄j asa' cavi' 'un̄j, qui'yaj so' nanj adonj.

*Nana nihánj taj xna'anj se vaa qui'yaj suun uxrá ní', ne ca'anj ní' rej xta', qui'yaj Diose a*

<sup>12</sup> Nuveé se aj quisij 'un̄j cunu sa' 'un̄j, taj 'un̄j ma'. Maan se ataa quisij 'un̄j se vaa me rá Diose gunj, ne che'é dan me yo'o raan nocó' 'un̄j man Jesucristó, che'é rej me raj cunu sa' 'un̄j, vaa güii a. Jesucristó me sí qui'yaj canocó' 'un̄j man so', che'é se me rá ma'an so' cunu sa' 'un̄j adonj. <sup>13</sup> 'Un̄j me sí ne'en se vaa ataa quisij 'un̄j se

me raj gunj, tinuj, nocoj. Che'é dan orún' suun vaa rihanj cuano nihánj me 'yaj tanáj xco 'un̄j nu' se vaa qui'yáj asij rque, ne guun niha' uxrá raj qui'yáj nu' se vaa qui'yáj rej rihanj, <sup>14</sup> ne 'yaj suun uxraj, ne ca'na' güii qui'yaj cananj qui'yaj Diose, ne cavii sa' 'un̄j, qui'yaj Diose, ne nacunj Diose manj cavii 'un̄j rej xta', che'é se 'un̄j me sí noco' man Jesucristó adonj. <sup>15</sup> Ne sese aj cuchumán sa' rá ní', ne inanj danj gaa rá taran' ní' á. Tzaj ne sese ino vaa rá nij soj, ne Diose me sí tihaa rihaan soj me ma'an nana cachii rihaan soj a. <sup>16</sup> Tzaj ne tucuaán aj nari' ní' ro', raan canocó' ní' tucuaán yo' á.

<sup>17</sup> Xcaj nij soj cuentá daj 'yaj ma'anj do', daj 'yaj nij sí noco' manj do', ne cuyaán danj qui'yaj soj ga núj á. <sup>18</sup> Ino vaa rá que'ee yuvii, ne aj cataj xna'anj uxraj rihaan soj che'é nij so', ne nihánj me cataj xna'anj uún 'un̄j rihaan soj daj vaa nij so', tzaj ne 'o se ta'veé 'un̄j che'é nij so' nanj adonj. Dan me se cavi' Jesucristó che'é ní' rihaan rcutze, tzaj ne me rá nij so' tiri' nij so' se vaa qui'yaj Jesucristó che'é ní' adonj. <sup>19</sup> Vaa güii cacaá ndo'o nij so' ei. Inanj nee man nij so' aráya'anj nij so', tzaj ne Diose ne noco' nij so' ma'. Nij 'yaj nij so', tzaj ne ne na'aj nij so' ma'. Tzaj ne sa' uxrá 'yaj nij so', rá ma'an nij so' chuguanj. Inanj che'é rasuun ruvi' rihaan chumii nihánj xcaj nij so' cuentá nanj adonj. <sup>20</sup> Xa' ní', tzaj ne ino vaa ní', ne chiháán ní' me rej xta', ne na'vij uxrá ní' cavii Jesucristó sij 'nij ra'a man ní' rej xta' ca'na' so' tinanii so' man ní' rihaan sayuun, <sup>21</sup> ne nıcaj so' nee man ní', ne nda' se ninaj uxrá nee man ní' cuano, tzaj ne natuna so' man yo', ne ase vaa nee man so' nee sa' ndo'o ro', danj inanj gaa nee man ní', qui'yaj so' adonj. Dan me se che'é se me so' sí guun nucaj qui'yaj canaán rihaan cunudanj rasuun, ne che'é se quirii ta'nga' so' rihaan cunudanj rasuun ro', che'é dan ne'en ní' se vaa guun nucaj so' natuna so' man nee man

ní' ei.

#### 4

<sup>1</sup> Dan me se 'ee ndo'o raj man soj, ne me uxrá raj ni'yaj 'unj man soj, tinuj, nocoj. Niha' ndo'o raj, qui'yaj soj, ne vaa güii cataj Diose se vaa sa' uxrá qui'yáj, tucu'yón 'unj man soj, ne che'é dan vaa che'é cunō soj nu' nana nihánj, ne raan canoco' soj man sí 'nij ra'a man ní', tinuj, nocoj.

*Nana nihánj taj xna'anj se vaa nago' Pabló chrej sa' man nij sí cuchumán rá ni'yaj man Jesucristó yanj chuman' cu'naj Filipos a*

<sup>2</sup> Achíin ni'yáá 'unj rihaan chana cu'naj Evodia do', rihaan chana cu'naj Síntique do', se vaa yo'o cyaan gaa rá roj no', che'é se chana noco' man sí 'nij ra'a man ní' me roj no' á. <sup>3</sup> Vaa so', ne tuví' 'unj sí sa' noco' raan man Diose mé so', ne sí 'yaj suun ga 'unj me uún so', ne dan me se achíin ni'yáj rihaan so' racuíj so' man roj chana yo', tinuj. Roj chana nihánj ga yo'ó sí cu'naj Clemente do', yo'ó nij tinúú 'unj do', qui'yaj suun ndo'o nij so' racuíj nij so' mán 'unj ca'mii núj se-nana Diose nana sa' rihaan yuvii, ne nō se-chuvii nij so' rihaan yanj taj rihaan Diose se vaa gaa i'na' nij so' rihaan Diose nu' cavii nu' ca'anj ei.

<sup>4</sup> Gaa niha' niganj rá soj ni'yaj soj man sí 'nij ra'a man ní' á. Dan me se cataj xna'anj uún 'unj rihaan soj se vaa nō xcúún soj gaa niha' niganj rá soj ei.

<sup>5</sup> Inanj ni'yanj ca'mii soj rihaan cunudanj yuvii man rihaan chumii nihánj, ne xcaj nij yuvii cuentá se vaa sí sa' me soj á. Nichrun' ca'na' uún sí 'nij ra'a man ní' nanj adonj. <sup>6</sup> Se nanó rá soj mei. Tzaj ne cachinj ni'yaj soj rihaan Diose, ne me ma'an rasuun achiin man soj, ne cachinj soj rihaan Diose, ne nago' soj gracia rihaan Diose ei. <sup>7</sup> Danj qui'yaj soj, gaa ne yo'o gaa dínj nimán soj, qui'yaj Diose, che'é se sij noco' man Jesucristó me soj, ne dan me se guun

nucuj Diose qui'yaj canaán Diose rihaan cunudanj nana cavii raá yuvii nanj adonj.

<sup>8</sup> Dan me se inanj che'é se ya do', che'é se sa' do', che'é tucuaán sa' do', che'é se luj do', che'é se nica vaa nimán do', che'é se ni'yanj do', nuchruj raá soj, tinuj, nocoj. Dan me se sese ve'é vaa se 'yaj yo'o so' rá soj, ne xcaj soj cuentá, ne nuchruj raá soj daj 'yaj so' ei. <sup>9</sup> Nu' nana tucu'yón 'unj man soj do', nu' rasuun qui'yáá 'unj quene'en soj do', nu' nana ca'mii 'unj cuno soj do', danj qui'yaj uún soj á. Gaa ne cayáán ma'an Diose ga soj, ne Diose me sí naqui'yaj dínj nimán yuvii ei.

*Nana nihánj taj xna'anj se vaa sa' uxrá qui'yaj nij sí cuchumán rá ni'yaj man Jesucristó yanj chuman' Filipos racuíj nij so' man Pabló a*

<sup>10</sup> Guun niha' ndo'o raj rihaan sí 'nij ra'a man ní', che'é se yo'ó uun che'e soj caráya'anj soj manj ne rque soj nu' se vaa cachiin manj ei. 'O se ne taj 'unj rihaan soj se vaa ne racuíj soj manj ma'. Maan se gaa rque me se ne gaa ya'núj rihaan soj racuíj soj manj man adonj. <sup>11</sup> Nuveé che'e se vaa doj rasuun achiin manj me tu'vaj danj rihaan soj cuano ma'. Nda' se doj rasuun man rihanj, tzaj ne ne nanó rá 'unj ma'. 'O se aj narí' 'unj naqui'yaj inaj 'unj nimanj, ne niha' inanj raj nanj adonj. <sup>12</sup> Dan me se vaa güii achiin ndo'o rasuun manj, ne vaa güii vaa ndo'o rasuun rihanj, tzaj ne ca'vee se vaa raan rquej do', ca'vee se na'aan rquej do', ca'vee se vaa se achiin manj do', ca'vee se man ndo'o rasuun rihanj do', tzaj ne taj se 'yaj ma'. Maan se daj a güii vaa inaj nimanj, ne vaa niha' raj, ne ne nanó raj ma'. <sup>13</sup> Che'é se rque ndo'o Jesucristó se nucuj manj ro', che'é dan uun nucuj 'yaj sunj nu' suun vaa rihanj adonj.

<sup>14</sup> Tzaj ne cunaj uxrá qui'yaj soj racuíj soj manj gaa quirán' 'unj sayuun gaa rque chuguanj. <sup>15</sup> Ne'en ma'an soj se vaa gaa curihanj 'unj

estadó Macedonia ne guun che'ej tucu'yonj se-nana Diose, ne nu' rque soj sa'anj manj cuaj nanj niha'. Taj vaj yo'ó yuvií cuchumán rá ni'yaj man Jesucristó racuíj manj ma'. Maan se orún' soj me sí racuíj manj nanj niha'. <sup>16</sup> Ne gaa cayánj qui'yaj sunj chuman' Tesalónica, ne yavíj nu' rque uún soj sa'anj cachiin manj rihanj a'. <sup>17</sup> Nuveé che'e se me raj rque uun soj doj sa'anj manj me tu'va uún 'unj danj nihánj cuano ma'. Maan se che'é se me raj naru'vee Diose doj se sa' rihaan soj, che'é dan tu'vaj danj adonj. <sup>18</sup> Dan me se nacaj 'unj cunudanj se vaa ca'née soj rihanj, ne a 'ó rasuun ne achiin manj a ma'. Ne sa'anj ca'née soj rihanj ga sí cu'naj Epafrodito me se narqué so' nu' sa'anj yo' rihanj, ne guun niha' rá Diose ne'en Diose se vaa rque soj sa'anj yo' manj, ne ase vaa xcuu sa' acaa rihaan chraan altar, ne daj ndo'o gun' yo' ro', danj vaa sa'anj yo' ni'yaj Diose adonj. <sup>19</sup> Dan me se 'unj me sí noco' man Diose, ne sese vaa se achiin man soj, ne rque Diose nu' rasuun yo' rihaan soj che'é se me soj sí noco' man Jesucristó, ne xa' Diose, tzaj ne taj vaj rasuun achiin rihaan Diose ma'. 'Q se so' me sí uun chij rihaan cunudanj rasuun, <sup>20</sup> ne ve'é uxrá uun chij Rej ní' Diose, cataj ní' nu' cavii nu' ca'anj adonj. Veé danj gaa ya ei.

*Nana nihánj taj xna'anj se vaa ve'é cumán nij sí cuchumán rá ni'yaj man Jesucristó yanj chuman' cu'naj Filipos, rá nij tuví' Pabló a*

<sup>21</sup> Me raj cataj nij soj rihaan cunudanj nij sí sa' rihaan Diose sí noco' man Jesucristó se vaa ve'é cayáán nij so' raj, ne vaa nij tinúú ní' sí man gaj, ne ve'é cumán nij soj, rá nij so', <sup>22</sup> ne vaa nij sí sa' noco' man Diose man chuman' nihánj, ne ve'é cumán soj, rá daj a nij so' uún, ne vaa nij sí 'yaj suun tucúa sí nicaj suun emperador cu'naj César, ne ve'é cumán soj, rá nij so' uún adonj.

<sup>23</sup> Me raj qui'yaj ndo'o Jesucristó sij 'nij ra'a man ní' se luj che'é soj ei.



**Nihánj me 'o yanj  
cartá qui'yaj síí cu'naj  
Pabló ca'neé so'  
rihaan nij yuvii noco'  
man Diose yanj  
chuman' cu'naj  
Colosas a**

<sup>1</sup> 'Unj ro', me síí cu'naj Pabló, ne sij apóstol cune! Jesucristó man nata! se-nana so' rihaan yuvii mej ndaa vaa guun rá Diose, ne yanj tinú! Timoteo ga 'unj cuano a.

<sup>2</sup> 'Yaj rój yanj nihánj ca'nej rój rihaan nij soj sij sa' noco' man Diose yanj chuman' cu'naj Colosas a. Che'é se amán rá soj ni'yaj soj man Jesucristó ro', che'é dan nuu tinuj ní', ne nucuaj rá rój ne'en rój man soj cuano, tinuj, nocoj.

Me rá rój qui'yaj Rej ní' Diose se luj che'é soj, ne me rá rój gaa xej nimán soj, qui'yaj Diose uún ei.

*Nana nihánj taj xna'anj che'é se vaa achín ni'yaj Pabló rihaan Diose che'é nij síí cuchumán rá ni'yaj man Diose yanj chuman' Colosas a*

<sup>3</sup> Niganj achín ni'yaj rój rihaan Diose Rej Jesucristó sij 'nij ra'a man ní' che'é soj, ne nago' rój graciá rihaan Diose che'é soj, <sup>4</sup> che'é se ca'na' nana rihaan rój se vaa amán rá soj ni'yaj soj man Jesucristó ne 'ee rá soj ne'en soj cunudanj yo'ó nij síí sa' noco' man Diose a. <sup>5</sup> Danj vaa rá soj cuano, che'é se cuno soj se-nana Jesucristó nana ya, ne guun ya rá soj se vaa man ndo'o se sa' rej xta' nacaj soj vaa güii ei. <sup>6</sup> Dan me se aj cuchil' nana sa' nihánj rihaan cunudanj nij yuvii man rihaan chumij, ne cuchumán rá que'ee nij yuvii cuno nij yuvii nana sa' yo', ne 'o cuyaan qui'yaj nij soj ga yo'ó nij síí cuno nana yo', ne dan me se gaa cuchil' nana nihánj rihaan soj, ne cuno soj, ne xcaj soj cuentá che'é se luj qui'yaj Diose che'é ní',

ne cuchumán rá soj adonj. <sup>7</sup> Ne síí cu'naj Epafras me síí tucu'yón nana yo' man soj, ne dan me se síí 'yaj suun ga núj me so', ne 'ee rá núj man so', ne yo'ó 'yaj suun so' rihaan Jesucristó che'é soj adonj. <sup>8</sup> Ne cataj xna'anj so' rihaan núj se vaa 'ee uxrá rá soj man tinúú soj, qui'yaj Nimán Diose adonj.

<sup>9</sup> Che'é dan gaa cuno núj nana cataj so' rihaan núj, ne niganj achín ni'yaj núj rihaan Diose che'é soj se vaa rque Nimán Diose nana sa' cuu nimán soj, ne xcaj soj cuentá daj me rá Diose qui'yaj soj, <sup>10</sup> che'é rej qui'yaj soj nu' se vaa no xcúún ní' sij noco' man síí 'nij ra'a man ní' qui'yaj ní', ne guun niha' rá Diose ni'yaj Diose man soj ei. Ne cunudanj suun sa' qui'yaj suun ndo'o soj, gaa ne sa' doj xcaj soj cuentá daj vaa ma'an Diose ei. <sup>11</sup> Diose me síí uun chij ndo'o, ne achín ni'yaj núj se vaa ca'nej ndo'o Diose se nucuaj nimán soj, gaa ne ca'vee gaa raan rá soj rihaan sayuun qui'yaj yuvii man soj, ne gaa inaj nimán soj, ne gaa niha' rá soj, <sup>12</sup> ne nago' soj graciá rihaan Diose Rej Jesucristó ei. Nu' dan me se vaa achín ni'yáa 'unj rihaan Diose che'é soj, ne ne'en soj se vaa aj cunuu sa' ní' qui'yaj Diose, ne che'é dan me vaa güii quirij' ní' se sa' rque Diose man taran' nij síí sa' noco' man so', che'é se yuvii xcaj cuentá chéé rej ranga' me ní' chuguanj. <sup>13</sup> Asino yaan me se guun chij síí chree rihaan ní', ne inanj cacun' qui'yaj ní', ne ase vaa síí chéé rej rmi' ro', danj vaa ní', ne taj se qui'yá' xcaj ní' cuentá che'é Diose tzaj ma'. Tzaj ne yaj me se tinanii Diose man ní' rihaan síí chree, ne guun chij Jesucristó ta'núí Diose rihaan ní', qui'yaj Diose yaj ei. Dan me se 'ee ndo'o rá Diose man ta'núí so', <sup>14</sup> ne che'é ta'núí so' navij cacun' tumé ní', ne che'é dan se qui'yaj Diose sayuun man ní' a man adonj. Tananj tinanii Jesucristó man ní' rihaan sayuun adonj.

*Nana nihánj taj xna'anj me síí me Jesucristó a*

15 Ne ruvi' Diose ni'yaj yuvii ma'. Maan se quene'en ní' man Jesucristó, ne xcaj ní' cuentá daj vaa ma'an Diose adonj. Asij ataa qui'yaj Diose chumii, ne aj nicun' Jesucristó ga so' ei. 16 Dan me se nicun' Jesucristó ga Diose gaa qui'yaj Diose se man xta' do', se man rihaan chumii do', nu' rasuun ruvi' ni'yaj yuvii do', nu' rasuun ne ruvi' ni'yaj yuvii do', nij ya'anj uun chij rihaan chumii nihánj do', cunudanj rasuun yo' me se qui'yaj Diose á. Dan me se ca'ne' Diose suun rihaan Jesucristó qui'yaj Jesucristó nu' rasuun, ne che'é dan qui'yaj Jesucristó nu' rasuun yo', ne inanj che'é Jesucristó vaa nu' rasuun yo', ne dan me se me rá Diose nicaj yu'unj Jesucristó man chumii nanj adonj. 17 Asij ataa curuvi' rasuun man rihaan chumii nihánj, ne nicun' Jesucristó, ne che'é orún' Jesucristó vaa cunudanj rasuun yo' cuano ei.

18 Ne so' me sí' uun chij ndo'o rihaan ní' ei. Dan me se ase vaa rii ta'nga' cúu yave yuvii rihaan ma'an yuvii ro', danj vaa rii ta'nga' Jesucristó rihaan cunudanj ní' sij noco' man so' chuguanj. Asino so' me sí' cunuu i'na' uún gaa cavi' so', ne danj inanj gaa cunuu i'na' uún ní', qui'yaj so', gaa ne guun so' sí' sa' doj rihaan cunudanj ní' ei. 19 Ase vaa ma'an Diose ro', danj vaa Jesucristó, qui'yaj Diose, ne so' me sí' nicaj cunudanj se sa' ei. 20 Asino quirí' nu' chumii rihaan Diose che'é cacun' qui'yaj yuvii, tzaj ne cavi' Jesucristó rihaan rcutze che'é yuvii, qui'yaj Diose, ne ca'vee cunuu sa' yuvii do', nu' chumii do', rihaan Diose, ne guun niha' rá Diose ni'yaj Diose nu' se man rihaan chumii do', nu' se man xta' do', nanj adonj. Yo' me se vaa qui'yaj Diose gaa ca'née Diose man Jesucristó rihaan chumii nihánj nanj adonj.

*Nana nihánj taj xna'anj se vaa cunuu rcua'aan ní' ga Diose, qui'yaj Jesucristó a*

21 Gaa naá me se yuvii yaníj me soj, ne yuvii taj ri'yunj man Diose me soj

gaa naá ei. 'O se quij vaa rá soj, ne inanj se chi'ii qui'yaj soj, ne sí' taj ri'yunj man Diose guun soj gaa rque che'é se ne guun soj tuvi' Diose gaa rque ma'. 22 Tzaj ne guun Jesucristó yuvii, ne cavi' so', ne che'é dan cunuu rcua'aan soj ga Diose, qui'yaj so', ne vaa güii canicun' soj rihaan Diose, qui'yaj Jesucristó, ne sij sa' guun soj rihaan Diose, ne taj cacun' cutumé soj a ma'. 23 Dan me se cavii sa' soj, sese yo'o canoco' soj se-tucuanj Jesucristó nanj adonj. Raan canoco' soj man so' ei. Aj cuno soj se-nana Diose nana sa', ne che'é dan guun ya rá soj se vaa cavii sa' soj, ne se guun cataj soj se vaa ne ya vaa nana sa' cuno soj ma'. 'O se nana ca'mii natáj nii rihaan cunudanj nij yuvii man rihaan chumii me nana sa' yo', ne 'unj nihánj me sí' a'mii natáj se-nana Diose nana sa' yo' rihaan yuvii nanj adonj.

*Nana nihánj taj xna'anj che'é suun 'yaj suun Pabló che'é nij sí' cuchumán rá ni'yaj man Jesucristó a*

24 Aj quirán' 'unj sayuun che'é nij soj, ne nihánj me guun niha' raj che'é sayuun rán' 'unj á. Dan me se ase vaa sayuun quiran' Jesucristó che'é nij sí' noco' man so' ro', danj vaa sayuun ran' ma'án 'unj che'é nij soj sij noco' man so' a. 25 Sí' 'yaj suun che'é nij soj sij noco' man Jesucristó mej, ne Diose me sí' cune' mán 'unj nata' 'unj cunudanj se-nana Diose rihaan nij soj a. 26 'O vaa yuve se-nana Diose nana sa' gaa naá, tzaj ne ndaa yaj me tinaruvi' sa' Diose nu' se-nana Diose nana sa' rihaan ní' sij sa' noco' man so' yaj ei. 27 Dan me se guun rá Diose xcaj cunudanj ní' sij sa' noco' man so' cuentá che'é nana naca nihánj se vaa sa' uxrá qui'yaj Diose che'é soj sij yaníj nanj adonj. Dan me se nuveé yuvii israelitá me nij soj ma'. Yuvii yaníj me soj, tzaj ne yanj Jesucristó nimán soj, ne che'é dan guun ya rá ní' se vaa vaa güii cavii sa' uxrá soj ga Diose nanj adonj. 28 Ne ma'an núj me sí' nata' rihaan cunudanj yuvii che'é

Jesucristó, ne nago' núj chrej nucuaj man nij yuviij se vaa canoco' nij yuviij man Jesucristó, ne tucu'yón núj nana sa' cuu rihaan cunudanj yuviij, che'é rej gaa asa' cachrón núj man nij so' rihaan Diose, ne sa' inanj gaa nij so', che'é se sa' uxrá noco' nij so' man Jesucristó a. <sup>29</sup> Che'é dan 'yaj suun uxraj tucu'yonj se-nana Jesucristó a. Ne danj 'yáj che'é se nucuaj do', nana sca' nuu nimanj qui'yaj Jesucristó do' ei.

## 2

<sup>1</sup> Me rá 'unj quene'en nij soj se vaa 'yaj suun ndo'oj che'é soj do', che'é nij síi amán rá ni'yaj man Jesucristó yanj chuman' Laodicea do', che'é yo'ó nij yuviij amán rá yuviij ataa quene'en manj do' a. <sup>2</sup> 'O se rquee ndo'oj nari' nucuaj nimán soj ne yo'ó cunuú se sa' nimán soj cumán soj ga' tuvi' soj, ne yo'ó nari' ndo'o soj ndaa guun ya ya rá soj nana naca se vaa Jesucristó me se veé ma'an so' me nana naca yo' ei. <sup>3</sup> Dan me se veé rihaan Jesucristó me mán sa' cunudanj rasuun cuu do', rasuun sa' do', nu' yo'ó rasuun achiin quene'en yuviij do' ei.

*Nana nihánj taj xna'anj se vaa se cuno ní' nana tiha' yu'unj a. 'O se inanj Jesucristó canoco' ní' a*

<sup>4</sup> Nana nihánj me taj xna'anj 'unj rihaan nij soj che'é se na'vej rá 'unj tiha' yu'unj yuviij man soj a. Dan me se vaa yuviij me rá caxrii nana chi'ii rque soj, tzaj ne me rá 'unj caráán 'unj chrej rihaan nij yuviij se vaa se qui'yaj nij so' danj ga' soj ma'. <sup>5</sup> Nda' se nuví' 'unj nicun' ni'yaj soj, tzaj ne nicun' nimán 'unj ga' soj chuguanj. 'O se guun niha' uxrá ya raj se vaa 'o sa' mán soj, ne yo'ó Jesucristó nucuaj rá soj, mán soj ei. <sup>6</sup> Dan me se nda' rá se guun rá soj gaa guun che'e soj canoco' soj man Jesucristó ro', danj guun rá soj yo'ó canoco' chre' soj man so' ei. <sup>7</sup> Dan me se yo'ó guun xej soj rihaan so', ne yo'ó canicun' raan soj rihaan so', ne yo'ó cunō soj rihaan so', ne tucu'yón uxrá soj tucuáán tucu'yón

núj man soj, ne yo'ó so' cuchuman rá soj ni'yaj soj, ne nago' uxrá soj gracia rihaan Diose á.

<sup>8</sup> Tumé soj man soj se gaa nanj tiha' yu'unj yuviij man soj á. Me rá nij yuviij canoco' soj se-tucuanj nij so', tzaj ne nuvi' yu'vee nó se-tucuanj nij so' rihaan tucuáán sa' noco' ní' mei. Maan se nana tiha' yu'unj me nana a'mii nij so', ne se quinanii soj rihaan cacun' tumé soj, qui'yaj nana yo' a man adonj. Maan se nana yo' ro', nana tucu'yón nanj tuvi' nij yuviij rihaan nij yuviij me nana yo', ne se-nana nij ya'anj man rihaan chumii nihánj me nana yo', tzaj ne nuveé se-nana Jesucristó me nana yo' ma'. <sup>9</sup> 'O se ase vaa ma'an Diose ro', danj vaa Jesucristó, tzaj ne vaa nee man Jesucristó, ne che'é dan ruvi' Jesucristó rihaan ní', ne ne'en ní' Jesucristó, ne xcaj ní' cuentá daj vaa ma'an Diose uún chuguanj. <sup>10</sup> Ne Jesucristó me síi guun chij rihaan nij ya'anj man rihaan chumii nihánj, ne yanj Jesucristó ga' soj, ne che'é dan taj se achiin man soj cuano mei. <sup>11</sup> Tananj uún, ne maan che'é se nuu rcua'aan soj ga' Jesucristó ro', maan che'é dan aj táá ta'nga' sa' inanj man soj vaa ei. Nuveé ta'nga' taj nee man yuviij me ta'nga' yo' ma'. Ta'nga' 'yaj ca'vee tanáj soj nu' rasuun chi'ii me yo' adonj. 'O se che'é yan tanáj soj nu' rasuun chi'ii ro', che'é dan ase vaa táá ta'nga' man soj vaa ya ei. <sup>12</sup> 'O se gaa cata' ne soj, ne ase vaa cachin' nii man Jesucristó rque yo'ó rque va'núj güii ne na'núj uún so' ro', danj vaa soj, che'é se cuchumán rá soj se vaa veé ya Diose sij nucuaj ndo'o qui'yaj ya cunuu i'na' ya uún Jesucristó ei.

<sup>13</sup> Gaa naá gaa ataa quene'en soj sij yanij man Jesucristó, ne qui'yaj ndo'o soj cacun', ne taj ta'nga' cuta' nii man nee man soj ma'. Tzaj ne ca'néj uun Diose nu' cacun' taj xráá ní', ne ase vaa cunuu i'na' uún Jesucristó gaa cavi' so' ro', danj vaa soj, ne yo'ó cunuu sa' nimán soj, qui'yaj Diose ei. <sup>14</sup> Ne dan me se tinavij so' nu'

suun vaa rihaan ní' suun cunō ní' nu' se-tucuanj Moisés, ne xa' se-tucuanj Moisés yo', tzaj ne que'ee ndo'o nana ne guun nucuaj ní' qui'yaj ní' ndaa vaa taj tucuaán yo' a ma'. 'O se che'é se ne guun nucuaj ní' cunō ní' nu' tucuaán yo' ro', che'é dan cutumé ndo'o ní' cacun', qui'yaj yo' adonj. Tzaj ne gaa go' nii caquí ra'a Jesucristó ne cachrón nii man so' rihaan rcutze, gaa ne Diose me sí tinavij man nu' suun vaa rihaan ní' cunō ní' nu' se-tucuanj Moisés yo' adonj. <sup>15</sup> Maan che'é rasuun sa' qui'yaj Jesucristó ro', maan che'é dan qui'yaj canaán Diose rihaan taran' nij ya'anj man rihaan chumij nihánj, ne tihaan so' man nij so' se vaa daj chihaa mij se guun nucuaj nij ya'anj yo' guun chij nij yo' rihaan ní' ma'. Dan me se che'é se cavi' Jesucristó rihaan rcutze ro', che'é dan qui'yaj canaán Diose man cunudan' nij ya'anj man rihaan chumij nihánj, ne yo'o caxrij yuve Diose man nij ya'anj man nihánj vaa, ne guun na'aj ndo'o taran' nij ya'anj yo', qui'yaj Diose chuguaj.

<sup>16</sup> Che'é dan se ca'vej rá soj cataj xna'anj yuvij rihaan soj daj qui'yaj soj ma'. Se guun cataj yuvij me rasuun se ca'vee cha soj do', me rasuun se ca'vee co'o soj do', me güii quinavij rá soj cha'anj do', daj qui'yaj soj güii naránj rá soj do' ma'. Se ca'vej soj cataj xna'anj yuvij daj qui'yaj soj mei. <sup>17</sup> Tucuáán tucu'yón nij yuvij rihaan soj ro', tucuaán yo' me se canoco' nij yuvij israelitá gaa naá, ne xcaj nij so' cuentá daj gaa qui'yaj ní' gaa cayáán ní' ga Diose nu' cavii nu' ca'anj, qui'yaj tucuaán yo', tzaj ne yaj ro', che'é Jesucristó me se xcaj ní' cuentá sa' doj, se vaa ma'an so' canoco' ní' nu' cavii nu' ca'anj, ne taj che'é canoco' ní' yo'ó tucuaán cuano ma'. Tananj orún' so' canoco' ní' nanj adonj.

<sup>18</sup> Se ca'vej soj quirí' soj qui'yaj nij sí taj se vaa nica' ndo'o a'mii nij so' mei. Ca'vee se cataj nij so' se vaa na'vúj nij so' rihaan se-mozó Diose do', ca'vee se nucui' ndo'o rá nij so' se

vaa ne'en nij so' rasuun tihaan Diose rihaan nij so' taj nij so' do', tzaj ne tu'va rma'an nij so', ne maan rasuun avii raá ma'an nij so' me tu'va rma'an nij so' danj ei. <sup>19</sup> Dan me se taj cúu yave nij so' táá gaán chihá nij so' vaa, ese taj Jesucristó rihaan nij so' mei. Ne uno nij so' se-nana Jesucristó ma'. Ne Jesucristó me se ase vaa rii ta'nga' cúu yave ní' rihaan nee man ní' ro', danj vaa rii ta'nga' Jesucristó rihaan taran' ní' sij noco' man so', ne sa' doj noco' ní' man Diose, 'yaj Jesucristó, ne inanj danj me rá Diose qui'yaj ní' nanj adonj. Ne ase vaa vaa sca' nee man ní' 'yaj ya'aá man ní' ro', danj vaa cuyaán rá taran' ní' sij noco' man Diose 'yaj Jesucristó adonj.

<sup>20</sup> Che'é se cavi' Jesucristó che'é nij soj ro', che'é dan ne nó xcúun soj daj chihaa mij cunō soj se-nana nij ya'anj man rihaan chumij nihánj a mei. Che'é dan, me che'é 'yaj ndo'o soj se vaa 'yaj nij yuvij man uun rihaan chumij nihánj ga. Dan me se me che'é niha' rá soj cunō soj nana se vaa <sup>21</sup> vaa rasuun se guun cha soj do', vaa rasuun se guun xcaj tu'va soj daj chá yo' do', vaa rasuun se guun cano ra'a soj do' ga. <sup>22</sup> Me che'é uno rma'an soj nana vaa danj ga. 'O se rasuun yo' me se cha yuvij man rasuun yo', ne quinavij nu' rasuun yo' vaa güii adonj. Ne xa' nana vaa danj, tzaj ne nana avii raá uun yuvij me nana yo', ne niha' rá nij yuvij cataj nij yuvij nana vaa danj rihaan tuvi' nij yuvij nanj adonj. <sup>23</sup> Ne avii raá yuvij uno nana yo', taj nii, ne sa' uxrá nari' nij so' chrej canoco' nij so' Diose, taj nii, ne sí ni'yanj a'mii me nij so', taj nii, tzaj ne ne ya ya sij noco' man Diose me nij so' ma'. Maan se che'é nana noco' nij so' ro', 'yaj ndo'o nij so' naj guun cacun' me rá nee man nij so' qui'yaj nij so' nanj adonj.

### 3

<sup>1</sup> Dan me se ase vaa cunuu i'na' uún Jesucristó ro', danj vaa cunuu sa' nimán soj, ne canoco' soj chrej sa', qui'yaj Jesucristó a. Che'é dan



che'é inan̄j rasuun̄ man̄ rej xta' xcaj soj cuentá, nē cuanō nihánj me se x'núú Diosē rej nuva' Diosē nicun' Jesucristó cuanō ei. <sup>2</sup> Dan me se xcaj soj cuentá che'é rasuun̄ man̄ rej xta', nē se nanó rá soj che'é rasuun̄ man̄ rihaan̄ chumiī nihánj mei. <sup>3</sup> Dan me se aj cavi' neē man soj rihaan̄ chumiī nihánj vaa, nē cuanō nihánj me se táá nimán soj rej xta' rej yan̄j Diosē, 'yaj Jesucristó ei. <sup>4</sup> Nē che'é dan ca'veē cayáán soj gā Diosē nu' cavii nu' ca'an̄j, nē vaa güii ca'na' uún Jesucristó rihaan̄ chumiī nihánj, nē curuvi' soj gā so', nē ve'é ndo'o gā cuman̄ soj gā so' nan̄j adon̄j.

*Nanā nihánj taj xna'an̄j che'é tucuaán ngā nē che'é tucuaán cuchruj Pabló che'é ní a*

<sup>5</sup> Yaj me se sē qui'yaj uún nij soj cacun' qui'yaj soj asij naá mei. Sē qui'yaj soj se vaa 'yaj yuviī man̄ rihaan̄ chumiī nihánj a ma'. 'O se sa' xcaj soj cuentá, nē orún' nicā soj cotoj gā soj, nē se guun rá soj qui'yaj soj se nij a ma'. Sē guun rá soj qui'yaj ituu soj si'yaj tuvi' soj ma'. Ase vaa yuviī na'víj rihaan̄ naj guun ya'an̄j ro', dan̄j vaa yuviī 'yaj ituu si'yaj tuvi' adon̄j. Nij vaa Diosē, nē sa' doj vaa rasuun̄ yo', rá nij so', nē <sup>6</sup> che'é cacun' yo' guun yuvaā uxrá Diosē, nē qui'yaj ndo'o Diosē sayuun̄ man̄ nij síi 'yaj cacun' yo' adon̄j. <sup>7</sup> 'O cuyaán vaa cacun' yo' gā cacun' qui'yaj ma'an̄ soj asij naá, gā canoco' soj tucuaán chi'iī ei.

<sup>8</sup> Tzaj nē cuanō nihánj me se sē qui'yaj nij soj dan̄j ma'. Sē guun yuvaā soj ma'. Sē guun rá soj qui'yaj soj chi'iī man̄ yo'ó yuviī ma'. Sē ca'miī soj nanā nij che'é tuvi' soj ma'. Sē nachri' soj ni'yaj soj tuvi' soj ma'. <sup>9</sup> Se ca'miī nē soj che'é tuvi' soj ma'. Yo' me se qui'yaj soj gā ataa canoco' soj man̄ Jesucristó, tzaj nē yaj me se cunuu sa' soj, nē se qui'yaj soj a doj dan̄j a mei. <sup>10</sup> Cunuu sa' nimán soj, qui'yaj Diosē, nē che'é dan sa' doj namán nanā sa' cuu rā soj 'o 'o güii adon̄j. Ne'en soj se vaa Diosē me síi

qui'yaj man soj, nē ase vaa ma'an̄ Diosē ro', dan̄j gā uún soj ei. <sup>11</sup> Yaj me se taj se 'yaj sese naj guun yuviī me soj mei. Ca'veē se sij israelitá do', ca'veē se sij yan̄j do', ca'veē se sij taj ta'nga' man do', ca'veē se nuveē sij taj ta'nga' do', ca'veē se sij man yo'ó chuman' do', ca'veē se sij ru'veē do', ca'veē se sij niquē do', ca'veē se sij chéé ma'an̄ do', taj se 'yaj a doj mei. Orún' yā yā rasuun̄ sa' me Jesucristó, nē orún' so' me nicun' rihaan̄ daj a rasuun̄ nan̄j ei.

<sup>12</sup> Dan me se narii Diosē man soj canoco' soj man so', nē guun soj síi sa' noco' man Diosē, nē 'eē rá Diosē man soj, nē che'é dan cunuu 'eē rá soj tuvi' soj chuguan̄j. Dan me se gā sa' nimán soj, nē ca'miī sa' soj, nē se guun yuvaā soj man tuvi' soj ma'. Maan̄ se gā inaj nimán soj ei. <sup>13</sup> Sese qui'yaj chi'iī tuvi' soj rihaan̄ soj, nē caraā x'naa yo'ó yo'ó soj rihaan̄ tuvi' soj ei. Dan̄j qui'yaj síi 'nij ra'a man ní' che'é soj, caráj x'naa so' rihaan̄ soj, nē che'é dan dan̄j qui'yaj soj rihaan̄ tuvi' soj ei. <sup>14</sup> Nu' yo' qui'yaj soj, nē vaa yo'ó se sa' doj qui'yaj uún soj, nē yo' me se gā 'eē yā yā rá soj tuvi' soj, nē yo' me qui'yaj guun raan̄ cuman̄ soj ei. <sup>15</sup> Nē ca'vej soj gā dínj nimán soj qui'yaj Jesucristó a. Che'é se me rá ma'an̄ Diosē gā dínj nimán soj, che'é dan narii Diosē man soj, nē naqui'yaj rcua'aan̄ so' man nu' nij tinuj soj, nē che'é dan nago' soj graciá rihaan̄ Diosē ei. <sup>16</sup> Cunō uxrá soj se-nanā Jesucristó, nē caviī nanā sa' cuu rā soj, nē tucu'yón soj nanā sa' rihaan̄ tuvi' soj, nē nago' soj chrej sa' man tuvi' soj ei. Cachraā soj chra' rihaan̄ Diosē, nē nago' soj graciá rihaan̄ Diosē ei. <sup>17</sup> Yuviī noco' man Jesucristó me soj, nē che'é dan xcaj soj cuentá daj me rá Jesucristó qui'yaj soj do', daj me rá Jesucristó ca'miī soj do', daj qui'yaj soj canoco' soj man Jesucristó síi 'nij ra'a man ní' do', nē maan̄ che'é Jesucristó sij 'nij ra'a man ní' nago' soj graciá rihaan̄ Rej ní' Diosē ei.

*Nana nihánj taj xna'anj daj qui'yaj 'o 'o ní' rihaan tuvi' ní' a*

<sup>18</sup> Cataj xna'anj 'unj rihaan nij chana vaa nica, se vaa ve'é cunō nij no' rihaan nica nij no' á. Danj vaa no xcúun nij no' qui'yaj nij no', ese chana noco' man síi 'nij ra'a man ní' me nij no' a.

<sup>19</sup> Ne ve'é gaa 'ee rá nij snó'o man nica nij so' uún á. Se caxrj yuvaa nij snó'o man nica nij so' ma'. Se qui'yaj quij snó'o man no' ma'.

<sup>20</sup> Ve'é cunō nij xnii nu' nana a'mii rej xnii nu' nana a'mii nii xnii uún á. Danj qui'yaj nij xnii noco' man síi 'nij ra'a man ní', ne guun niha' rá Diose ni'yaj Diose man xnii ve'é uno a.

<sup>21</sup> Se ca'mii rej xnii nana chi'ii rihaan xnii, gaa ne se quirí' nimán xnii, qui'yaj rej xnii a.

<sup>22</sup> Cunō sa' mozó rihaan se-ru'vee mozó á. Se naqui'yaj rmii mozó man mozó rihaan se-ru'vee mozó ma'. Nda' se nuvi' se-ru'vee mozó, tzaj ne yo'o qui'yaj suun mozó á. Síi 'nij ra'a man ní' ro', tumé so' man mozó yo', ne che'é dan cuchu'vi' mozó ne ve'é qui'yaj suun so' a. <sup>23</sup> Ne rihaan yuvi' uun 'yaj suun mozó ma'. Tananj rihaan síi 'nij ra'a man ní' 'yaj suun so', ne che'é dan 'o ca'nej nimán so' qui'yaj suun uxrá so' nu' suun vaa rihaan so', ne se naqui'yaj rmii so' nimán so' ma'. <sup>24</sup> Aj ne'en soj se vaa ma'an síi 'nij ra'a man ní' me síi qui'yaj cayáan soj rej sa' ga Diose nu' cavii nu' ca'anj, ne che'é dan ve'é qui'yaj suun soj rihaan Jesucristó sij 'nij ra'a man ní' á. <sup>25</sup> Ne síi qui'yaj cacun' ro', inanj sayuun quiran' so', ne 'o cyaan qui'yaj Diose ca'ne' Diose cacun' che'é mozó do', che'é ru'vee do', che'é taran' yuvi' do', nanj adonj. Xa' Diose, tzaj ne taj vaj síi cunii do', taj vaj síi le'ej do', taj vaj síi uun chij do', rihaan Diose man adonj.

#### 4

<sup>1</sup> Dan me se ve'é qui'yaj soj sij ru'vee rihaan se-mozó soj uún á. Se tiha' yu'unj soj sij ru'vee man se-mozó soj ma'. Xcaj soj sij ru'vee

cuentá se vaa ase vaa mozó rihaan soj ro', danj vaa ma'an soj rihaan Diose uún ei.

*Nana nihánj taj xna'anj se vaa cachinj ni'yaj nij síi cuchumán rá ni'yaj man Jesucristó rihaan Diose che'é Pabló a*

<sup>2</sup> Dan me se yo'o cachinj ni'yaj uxrá soj rihaan Diose daj a güii ei. Se ca'ne' rá soj ga suun achíin ni'yaj rihaan Diose mei. Ne tadó soj cumān soj, ne niganj nago' soj graciá rihaan Diose á. <sup>3</sup> Dan me se cachinj ni'yaj uún soj rihaan Diose che'é núj se vaa gaa ya'núj rihaan núj ca'mii núj se-nana Jesucristó nana tihaan naca Diose rihaan ní' á. Che'é nana yo' me 'nij 'unj taga' nihánj cuano ei. <sup>4</sup> Vaa suun rihaan 'unj tihaán 'unj se-nana Jesucristó rihaan yuvi', ne che'é dan cachinj ni'yaj soj rihaan Diose se vaa ca'vee ca'mii natáj sca' 'unj rihaan nij so' ei.

*Nana nihánj taj xna'anj se vaa nuchruj raa ní' daj ca'mii ní' rihaan nij síi ataa cuchuman rá ni'yaj man Jesucristó a*

<sup>5</sup> Asa' chée soj ga nij síi ataa cuchuman rá ni'yaj man Jesucristó, ne sa' nuchruj raa soj daj ca'mii soj ga nij so', ne se quirí' uun tiempó qui'yaj soj ga nij so' mei. <sup>6</sup> Nu' cuentó nanó soj ga nij so' me se inanj cuentó ve'é do', inanj cuentó sa' aran' rá nij so' do', inanj cuentó a'mii danj Diose do', ca'mii soj, ne quene'en soj me nana ca'mii soj rihaan 'o 'o síi xná'anj man soj che'é tucuaán noco' soj adonj.

*Nana nihánj taj xna'anj se vaa ve'é cumān nij síi cuchumán rá ni'yaj man Jesucristó yanj chuman' Colosas, rá nij tuvi' Pabló a*

<sup>7</sup> Tinúú ní' síi 'ee ndo'o rá ní' man síi sa' ndo'o 'yaj suun gaj che'é síi 'nij ra'a man ní' síi cu'naj Tíquico me síi ca'nej 'unj cuchí' nica nana che'é núj rihaan soj ei. <sup>8</sup> Ne me rá 'unj cataj xna'anj so' rihaan soj daj quiran' núj, gaa ne guun ya' rá soj, ne nari' nu-cuaj nimán soj ei. <sup>9</sup> Ne ca'nej 'unj man tinú' Onésimo cuchí' so' ga tinú'

Tíquico yo', ne síi man chiháán soj me tinú' Onésimo, ne 'ee rá ní' man so', ne nucaj rá 'unj man so', ne cataj xna'anj roj so' rihaan soj nu' se vaa quiran' núj rej nihánj ei.

<sup>10</sup> Aj ne'en soj man síi cu'naj Aristarco uún a. Cuanō nihánj me se 'nij so' taga' ga 'unj, ne me rá so' se vaa ve'é cumān soj a. Ne vaa síi cu'naj Marcos tinúú tachruu síi cu'naj Bernabé a. Veé danj ve'é cumān soj, rá so' uún a. Aj cuchí' nana rihaan soj che'é síi cu'naj Marcos, se vaa sese cuchí' so' chiháán soj, ne ve'é ca'mij soj ga so' á. <sup>11</sup> Ne ne'en soj man síi cu'naj Jesús Justo uún a. So' ro', me rá se vaa ve'é cumān soj a. Síi cu'naj Aristarco do', síi cu'naj Marcos do', síi cu'naj Jesús do' a. 'O se orún' va'nuj nij so' me yuvií israelitá 'yaj suun ga núj che'é yan guun chij Diose rihaan chumij nihánj, ne nari' nucaj doj rá 'unj, qui'yaj nij so' ei.

<sup>12</sup> Ne ve'é cumān soj, rá síi cu'naj Epafra uún a. Síi cavii chiháán soj me so', ne 'yaj suun uxrá so' che'é Jesucristó, ne nu' güii achín ni'yaj uxrá so' rihaan Diose che'é soj, ne me rá so' gaā chij rá soj, ne guun ya rá soj se vaa ne'en soj daj me rá Diose qui'yaj soj, <sup>13</sup> ne 'unj me síi ne'en ya se vaa qui'yaj suun uxrá so' che'é soj do', che'é nij yuvií amán rá ni'yaj man Jesucristó yanj chuman' Laodicea do', che'é nij yuvií amán rá ni'yaj man Jesucristó yanj chuman' Hierápolis do' a. <sup>14</sup> Doctor síi cu'naj Lucas síi 'ee ndo'o rá ní' me se me rá uún so' se vaa ve'é cumān soj a. Ne tananj síi cu'naj Demas uún, ne me rá so' se vaa ve'é cumān soj a.

<sup>15</sup> Cataj soj rihaan nij yuvií amán rá ni'yaj man Jesucristó yanj chuman' Laodicea do', rihaan chana cu'naj Ninfas do', rihaan nij yuvií amán rá na'víj rihaan Diose tucúa no' do', se vaa ve'é cumān nij so', rá 'unj ei. <sup>16</sup> Asa' navij nayaa soj yanj cartá nihánj, ne ca'nej soj yanj nihánj ca'anj yo' rihaan nij yuvií amán rá ni'yaj man Jesucristó yanj chuman'

Laodicea, ne nayaa nij so' uún á. Ne ca'nej nij so' yanj ca'née 'unj rihaan nij so', nayaa soj uún a.

<sup>17</sup> Ne cataj soj rihaan síi cu'naj Arquipo se vaa 'o ca'nej nimán so' qui'yaj suun so' nu' suun ca'ne' síi 'nij ra'a man ní' rihaan so' á.

<sup>18</sup> Ma'anj ra'aj sij cu'naj Pabló cachrón nana nihánj adonj. Se quini'yón soj se vaa 'nij 'unj taga' ma'. Me rá 'unj qui'yaj ndo'o Diose se luj che'é nij soj ei.

**Nihánj me 'o yanj  
cartá qui'yaj síí cu'naj  
Pabló ca'néé so'  
rihaan nij yuvii noco'  
man Diose yanj  
chuman' cu'naj  
Tesalónica a**

<sup>1</sup> Síí cu'naj Pabló do', síí cu'naj Silvano do', síí cu'naj Timoteo do', me núj, ne tu'va taran' núj avii 'yaj núj yanj nihánj ca'nej núj rihaan nij soj sij yanj chuman' cu'naj Tesalónica sij noco' man Rej ní' Diose do', man Jesucristó sij 'nij ra'a man ní' do' a. Me rá núj qui'yaj ndo'o Diose se luj che'é soj, ne me rá núj gaa xej nimán soj, qui'yaj Diose a.

*Nana nihánj taj xna'anj se vaa nij síí cuchumán rá ni'yaj man Jesucristó yanj chuman' cu'naj Tesalónica ro', sa' uxrá noco' nij so' man Diose a*

<sup>2</sup> Niganj nago' núj graciá rihaan Diose che'é cunudanj soj, ne gaa achíin ni'yaj núj rihaan Rej ní' Diose, ne achíin ni'yaj ndo'o núj che'é taran' nij soj ei. Dan me se yo'ó <sup>3</sup> nuû rá núj se vaa qui'yaj suun ndo'o soj che'é se amán rá soj ni'yaj soj man Jesucristó, ne caran' rá soj ni'yaj soj man so', ne nuu rá núj se vaa ne'en soj se vaa cavii sa' soj qui'yaj Jesucristó sij 'nij ra'a man ní' vaa güii, ne che'é dan yo'ó a'néé nimán soj qui'yaj suun soj che'é so' adonj. <sup>4</sup> Dan me se 'ee rá Diose man soj, tinuj, nocoj. Ne ne'en núj se vaa narii Diose man soj canoco' soj man so' adonj.

<sup>5</sup> 'O se cuno soj nana sa' nana nata' núj rihaan soj, ne ne cuno rma'an soj nana yo' ma'. Dan me se gaa cuno soj nana yo', ne yuun che'e guun ya rá soj se vaa nana ya me yo', ne guun nucaj ndo'o soj canoco' soj nu' nana yo' ei. 'O se Nimán Diose ne ga soj ei. 'O se gaa cane núj ga soj, ne quene'en soj daj qui'yaj núj che'é se

me rá núj cavii sa' soj a. <sup>6</sup> Ne ase qui'yaj guee núj do', ase 'yaj guee síí 'nij ra'a man ní' do', danj qui'yaj guee soj chuguanj. Dan me se nda' se quiran' soj sayuun qui'yaj nij yuvii ne amán rá ni'yaj man Jesucristó, tzaj ne yo'ó canoco' soj se-nana Diose, ne guun niha' rá soj, qui'yaj Nimán Diose adonj. <sup>7</sup> Ne cunudanj nij yuvii noco' man Diose man estadó Macedonia do', man estadó Acaya do', xcaj nij so' cuentá che'é se vaa qui'yaj soj, ne danj qui'yaj guee nij so' uún ei.

<sup>8</sup> Dan me se aj cuno ndo'o yuvii se-nana síí 'nij ra'a man ní', qui'yaj soj, ne dan me se nuveé inanj nij yuvii man estadó Macedonia do', nij yuvii man estadó Acaya do', me yuvii cuno nana se vaa amán rá soj ni'yaj soj man Diose ma'. 'O se yuvii man rihaan nu' cachra' chumii me yuvii cuno nana yo' nanj adonj. Che'é dan me taj che'é cataj xna'anj núj rihaan nij yuvii che'é se vaa qui'yaj soj ma'. <sup>9</sup> Ma'an nij yuvii taj xna'anj rihaan tuvi' nij so' se vaa ve'é uxrá ca'mii soj ga núj gaa cayáán núj ga soj, ne taj xna'anj nij so' se vaa tanáj soj ya'anj canoco' soj gaa rque, ne dan me se chruun cacój soj do', yahij cacój soj do', me nij ya'anj yo', ne yaj me se canicaj soj canoco' soj man Diose síí vaa i'na' ya ya, <sup>10</sup> ne na'vij soj ca'na' uún ma'an Jesucristó ta'níí Diose rej xta' a. Ne Jesucristó ro', me síí cunuu i'na' ya uún qui'yaj Diose gaa cavi' so', ne tinanii Jesucristó man ní' rihaan sayuun asa' quisj güii caxrii yuvaá Diose man nij síí tumé cacun' ne qui'yaj Diose sayuun man nij so' ei.

## 2

*Nana nihánj taj xna'anj se vaa ve'é tucuyón síí cu'naj Pabló se-nana Diose nana sa' rihaan nij síí cuchumán rá ni'yaj man Jesucristó yanj chuman' cu'naj Tesalónica a*

<sup>1</sup> Ne'en ma'an soj se vaa cavii sa' suun qui'yaj suun núj gaa cayáán núj ga soj, tinuj, nocoj. <sup>2</sup> Dan me se asino



yaan quiran' núj sayuun chuman' Filipos, ne nachri' ndo'o nij síi man chuman' yo' ni'yaj nij so' man núj, tzaj ne che'é se sij noco' man Diose me núj, che'é dan nda' se sayuun ndo'o vaa nata' núj se-nana Diose nana sa' rihaan soj qui'yaj nij síi man chiháan soj, tzaj ne ne cuchu'vi' núj ma'. Tananj ca'neé nimán núj nata' núj doj nana sa' rihaan soj a.

<sup>3</sup> Vaa che'é a'mii natáj núj se-nana Diose rihaan soj, ne dan me se nuveé sij noco' tucuaán ne me núj ma'. Ne quij vaa nimán núj ma'. Nuveé sij tiha' yu'unj man yuvi me núj ma'. <sup>4</sup> 'Q se guun nucuaj rá Diose man núj, ne ca'ne' so' suun rihaan núj nata' núj se-nana so' nana sa', ne danj 'yaj guee núj adonj. Ne uun rá núj se vaa cataj yuvi se vaa ve'é 'yaj núj ma'. Maan se me rá núj guun niha' rá Diose ni'yaj Diose man núj, ne che'é dan 'yaj suun núj che'é Diose, ne Diose me síi acaj cuentá che'é núj daj vaa nimán núj adonj. <sup>5</sup> Ne'en soj do', ne'en ma'an Diose do', se vaa ne ca'mii ya'anj ndo'o núj ga soj che'é rej ca'vee ca'nee núj sa'anj man soj ma'. <sup>6</sup> Ne guun rá núj cataj soj do', cataj yo'ó yuvi do', se vaa ve'é 'yaj núj ma'. Nda' se Jesucristó me síi cune' man núj guun núj apóstol nata' se-nana so', tzaj ne ne cachinj núj rasuun rihaan soj ma'.

<sup>7</sup> Tananj ase 'yaj nij chana ga ta'nii chana ro', danj qui'yaj núj ga soj gaa cayáan núj ga soj, ne ve'é inanj qui'yaj núj ga soj adonj. <sup>8</sup> Dan me se cunuu 'ee rá núj man soj, ne che'é dan nuveé inanj se-nana Diose me se vaa rque núj man soj ma'. Rque núj se-nana Diose man soj, ne yo'o ca'neé nimán núj qui'yaj suun núj che'é soj uún adonj. <sup>9</sup> Dan me se ne'en soj se vaa nuvi nigan' 'yaj suun núj, gaa ne ri' núj sa'anj, ne ránj ma'an núj se chá núj, ne ne ca'vej rá núj ca'nee núj se chá man soj, man tinuj, man nocoj. Danj inanj qui'yaj núj gaa ca'mii natáj núj se-nana Diose nana sa' rihaan soj adonj.

<sup>10</sup> Quene'en ma'an soj do', quene'en Diose do', se vaa sij nica nimán me núj rihaan soj sij amán rá ni'yaj man Diose, ne dan me se qui'yaj núj inanj se me rá Diose qui'yaj núj, ne ne qui'yaj núj cacun' a ma'. <sup>11</sup> Ne'en soj se vaa ase vaa 'yaj snó'o ga ta'nii snó'o ro', danj vaa qui'yaj núj ga 'o 'o nij soj, ne dan me se guun nucuaj nimán soj, qui'yaj núj, ne narqué núj chrej nucuaj man soj <sup>12</sup> se vaa qui'yaj soj se vaa no xcúun soj qui'yaj soj che'é se narii Diose man soj cane soj ga Diose güi guun chij Diose rihaan chumii nihánj, ne ve'é ndo'o cumán soj ga Diose a.

*Nana nihánj taj xna'anj se vaa nij síi cuchumán rá ni'yaj man Jesucristó man chuman' Tesalónica ro', quiran' nij so' sayuun, qui'yaj nij síi ne amán rá ni'yaj man Jesucristó man chiháan nij so' a*

<sup>13</sup> Niganj nago' núj graciá rihaan Diose che'é soj ei. Dan me se gaa cuno soj se-nana Diose nana ca'mii natáj núj rihaan soj, ne ne cataj soj se vaa se-nana yuvi uun me nana yo' ma'. Ya cataj soj se vaa se-nana Diose me nana nata' núj, ne veé ya se-nana Diose me yo' adonj. Ne nuu sa' nimán soj, 'yaj nana yo', che'é se cuchumán rá soj cuno soj nana yo' ei. <sup>14</sup> 'Q se ase vaa quiran' nij síi noco' man Diose síi man estadó Judea ro', danj quiran' uún soj, che'é se sij noco' man Jesucristó me taran' soj, tinuj, nocoj. Dan me se quiran' nij síi man estadó Judea sayuun, qui'yaj nij yuvi israelitá síi man chiháan nij so', ne quiran' uún soj sayuun, qui'yaj nij síi man chiháan soj ei. <sup>15</sup> Ne xa' nij síi israelitá yo', tzaj ne nij so' me síi ticavi' man Jesucristó sij 'nij ra'a man ní do', man nij síi nata' se-nana Diose gaa naá do', ne veé uún nij so' canoco' ndo'o man núj, guun rá nij so' go' nij so' man núj uún nanj adonj. Nij ndo'o 'yaj nij so' ni'yaj Diose, ne taj ri'yunj nij so' man cunudanj yuvi uún adonj. <sup>16</sup> Dan me se me rá núj nata' núj se-nana Diose rihaan soj sij

yaníj che'é yan quinanií soj rihaan sayuun, tzaj ne aráán ndo'o nij sí israelitá yo' chrej rihaan núj, ne guun nocoo uxrá cacun' quitaj xráá nij so' nu' cavii nu' ca'anj, ne che'é dan yo'o ca'maan rá Diose ni'yaj Diose man nij so', ne yuun che'e quiran' nij so' sayuun, qui'yaj Diose ei.

*Nana nihánj taj xna'anj se vaa me ndo'o rá sí cu'naj Pabló quene'en so' man nij sí cuchumán rá ni'yaj man Jesucristó man chuman' cu'naj Tesalónica a*

<sup>17</sup> Xa' yaj me se guun gan' ya núj doj rihaan chiháán soj doj güii nihánj, tzaj ne 'o nuú rá núj man soj, ne che'é dan me ndo'o rá núj quene'en yucuan' núj man soj, <sup>18</sup> ne che'é dan guun rá núj cuchí' núj rihaan soj, ne xa' 'unj sij cu'naj Pabló me se guun que'ee ndo'o me raj cuchij rej man soj, tzaj ne caráán Satanás chrej rihaan núj cuchí' núj rihaan soj ei. <sup>19</sup> Dan me se asa' ca'na' uún Jesucristó rihaan chumii nihánj ne guun niha' uxrá rá núj che'é soj, ne nata' núj rihaan Jesucristó se vaa ve'é canoco' soj man so' qui'yaj núj, ne cavii sa' núj rihaan so' che'é soj ei. Taj vaj yo'ó yuvii 'yaj danj a ma'. 'O se orún' ya soj me sí 'yaj danj ei. <sup>20</sup> 'O se soj me sí qui'yaj cavii sa' núj, ne soj me sí qui'yaj guun niha' rá núj adonj.

### 3

*Nana nihánj taj xna'anj se vaa cataj xna'anj sí cu'naj Timoteo rihaan Pabló se vaa sa' uxrá cuchumán rá nij sí man chuman' Tesalónica ni'yaj nij so' man Jesucristó a*

<sup>1</sup> Che'é dan ne ca'vej uxrá rá núj cane raan taran' núj chuman' nihánj a ma'. Che'é dan cavii raá núj se vaa vij ran' guee rój me sí quinaj chuman' Atenas nihánj, <sup>2</sup> ne dan me se ca'née núj man tinú' Timoteo cuchí' so' rej man soj a. Dan me se so' me sí 'yaj suun ndo'o rihaan Diose ga núj suun nata' se-nana Jesucristó nana sa', ne me rá núj racuíj so' man soj, narque so' chrej nucuaj man

soj, ne raan doj canoco' soj man Jesucristó, qui'yaj so', <sup>3</sup> ne a 'ó tuvi' soj se quirí'ij tucuáán noco' soj che'é sayuun qui'yaj yuvii man soj, rá núj a ma'. 'O se ne'en soj se vaa no xcúún ní' quiran' ní' sayuun rihaan chumii nihánj, <sup>4</sup> ne gaa cayáán núj ga soj, ne cataj ya núj rihaan soj se vaa xraj, ne quiran' ní' sayuun, ne ne'en soj se vaa ya quiran' ní' sayuun niha'. <sup>5</sup> Che'é se me uxrá rá 'unj quene'en 'unj daj quiran' soj, ne che'é dan ca'née 'unj man Timoteo cuchí' so' rej man soj, ne cataj xna'anj so' rihanj daj 'yaj soj noco' soj man Diose, raj a. Dan me se quinano rá 'unj sese aj caxrój sí chree chrej chí'ij rque soj do', sese quirí' nu' suun qui'yaj suun núj che'é soj do', raj a.

<sup>6</sup> Dan me se canicaj uún Timoteo namán so' rihaan núj, ne cataj xna'anj so' se vaa ve'é uxrá amán rá soj ni'yaj soj man Jesucristó, ne 'ee rá soj tinúú soj, taj so', ne niganj ve'é nuú rá soj man núj, taj so', ne ase vaa me rá núj quene'en núj man soj ro', danj vaa rá soj me rá soj quene'en soj man núj, taj so', ne guun niha' ndo'o rá núj gaa cuno núj se-nana so' adonj.

<sup>7</sup> Dan me se quiran' ndo'o núj sayuun gaa rque gaa qui'yaj suun núj yan cuchuman rá soj ni'yaj soj Diose, tzaj ne cuano nihánj me guun niha' uxrá rá núj che'é rej nata' Timoteo che'é soj rihaan núj, tinuj, nocoj. <sup>8</sup> Dan me se che'é se raan noco' soj man sí 'nij ra'a man ní', che'é dan vaa che'é gaa niha' rá núj qui'yaj suun núj rihaan chumii nihánj adonj. <sup>9</sup> Dan me se guun niha' uxrá rá núj rihaan Diose che'é soj, ne che'é dan no xcúún núj nago' ndo'o núj graciá rihaan Diose che'é soj, <sup>10</sup> ne nuví nigan' cachinj ni'yaj núj rihaan Diose se vaa ca'vej Diose quene'en núj man soj, ne sese ataa nari' soj nu' tucuáán noco' ní', ne me rá núj narque núj doj chrej sa' man soj, ne sa' doj canoco' soj Diose nanj adonj.

*Nana nihánj taj xna'anj se vaa cunu 'ee rá ní' man cunudanj yuvii*

a

<sup>11</sup> Me rá núj raćuǵ ma'ǵn Rej ní' Diose raćuǵ Jesucristó sǵ 'nij ra'a man ní' raćuǵ man núj cuchǵ' núj rihaan soj, <sup>12</sup> ne ase vaa 'ee rá núj man soj ro', danj gaa cunu 'ee ndo'o rá soj ni'yaj soj tinúú soj do', cunudanj yuvii do', qui'yaj sǵ 'nij ra'a man ní', rá núj a. <sup>13</sup> Ndaa sǵ, gaa ne yo'o cunu sa' nimán soj rihaan Rej ní' Diose gaa güii ca'na' uún Jesucristó sǵ 'nij ra'a man ní' rihaan chumiǵ nihánj gaa cunudanj nij se-mozó so' sǵ guee, ne a 'o cacun' se tumé soj vaa gaa man adonj.

#### 4

*Nana nihánj taj xna'anj daj qui'yaj ní', ne ve'é cuman ní' ga nij tinúú ní' a*

<sup>1</sup> Yaj me se che'é se sǵ aj noco' man sǵ 'nij ra'a man ní' me nu' ní' ro', che'é dan cuano nihánj me cataj xna'anj núj rihaan soj se vaa doj a canoco' soj nu' tucuáán noco' soj tucuáán cuchruj núj rihaan soj gaa cataj núj daj qui'yaj soj gaa man soj rihaan chumiǵ nihánj gaa ne gaa niha' rá Diose ni'yaj Diose man soj, tinuj, nocoj. <sup>2</sup> 'O se aj ne'en soj se vaa vaa doj nana cataj xna'anj núj rihaan soj che'é Jesucristó sǵ 'nij ra'a man ní' nanj á. <sup>3</sup> 'O se nihánj me se vaa me rá Diose qui'yaj soj, ne dan me se me rá Diose guun soj sǵ sa' rihaan so', ne na'vej rá Diose cotoj nij snó'o ga náa guun chana ma'. <sup>4</sup> Maan se ve'é qui'yaj 'o 'o snó'o, nano' so' orún' chana xcaj so', ne ve'é qui'yaj snó'o rihaan Diose, ne ve'é qui'yaj so' rihaan chana uún a. <sup>5</sup> Dan me se se guun canoco' soj tucuáán noco' nij yuvii ne ne'en man Diose ma'. Maan che'é se ve'é vaa chana rihaan nij so', ne uun rá nij so' xcaj nij so' man chana, tzaj ne ne acaj nij so' cuentá daj qui'yaj nij so' taj ya'anj nij so' man chana ma'. <sup>6</sup> Sese cunó soj nana nihánj, ne se guun soj sǵ tiha' yu'unj man tinúú ní' che'é chana ma'. 'O se aj cataj ya núj rihaan soj se vaa qui'yaj sǵ 'nij ra'a man ní' sayuun man yuvii tiha'

yu'unj man tinúú nanj adonj. <sup>7</sup> Nuveé che'e se me rá Diose qui'yaj ní' cacun' me canacúún Diose man ní' ma'. Canacúún Diose man ní', tzaj ne che'é rej cunu sa' nimán ní' rihaan Diose me canacúún Diose man ní' adonj. <sup>8</sup> Che'é dan xcaj soj cuentá se vaa sǵ ri'ij yanǵ man nana nihánj ro', nuveé se-nana yuvii me ri'ij yanǵ so' ma'. Se-nana Diose sǵ rque Nimán cunuú nimán ní' me nana ri'ij so' nanj adonj.

<sup>9</sup> Dan me se taj che'é cachron 'unj nana rihaan yanj cartá nihánj cataj xna'anj 'unj rihaan soj se vaa no xcúún soj gaa 'ee rá soj man tinúú soj ma'. 'O se ma'ǵn Diose me sǵ tuculyón man soj se vaa qui'yaj soj danj adonj. <sup>10</sup> 'O se danj inanj 'yaj ya soj nuu 'ee rá soj man nu' nij tinúú ní' sǵ man estadó Macedonia, tzaj ne inanj me rá núj narque núj chrej man soj se vaa doj a cunu 'ee rá soj man tinúú ní', tinuj, nocoj. <sup>11</sup> Ne guun rá soj gaa dǵn cuman soj, ne se tiguǵ soj man soj rihaan se-suun tinúú soj ma'. Maan se ndaa se-suun 'o 'o soj qui'yaj suun soj á. Dan inanj vaa chrej narque núj rihaan soj asǵ rque á. <sup>12</sup> Sese danj qui'yaj soj, ne nij sǵ ne amán rá ni'yaj man Jesucristó ro', cataj nij so' se vaa ve'é 'yaj soj ei. Ne se cachiin a doj rasuun man soj ma'. 'O se ma'ǵn soj nano' rej cavi rasuun achiin man soj adonj.

*Nana nihánj taj xna'anj daj quiran' ní' asa' quisǵ güii ca'na' uún Jesucristó rihaan chumiǵ nihánj a*

<sup>13</sup> Me rá núj quene'en soj daj quiran' nij tinúú ní' nij sǵ noco' man Jesucristó nij sǵ cavi', tinuj, nocoj. Ne se quinanó rá soj che'é tinúú ní' sǵ cavi' ma'. Dan me se nij sǵ ne amán rá ni'yaj man Diose ro', nanó ndo'o rá nij so' che'é tuvi' nij so' sǵ cavi' che'é se taj se qui'yá' cavi sa' tuvi' nij so', rá nij so' a. <sup>14</sup> Tzaj ne cuchumán ya rá ní' se vaa cavi' Jesucristó, ne cunu i'na' uún so', qui'yaj Diose, ne che'é dan ne'en ní' se vaa xa' nij tinúú ní' sǵ cavi', tzaj ne che'é se cavi' Jesucristó che'é nij so' ro', che'é dan cunu i'na'

uún nij so', ne ca'na' uún nij so' ga so', qui'yaj Diose adonj.

<sup>15</sup> Nihánj me nana cataj xna'anj ma'an síi 'nij ra'a man ní' rihaan núj, ne dan me se asa' quisij güii ca'na' uún síi 'nij ra'a man ní' rihaan chumii nihánj, ne ní' sij gaa i'na' rihaan chumii nihánj ro', se quitáa yaan ní' rihaan nij síi cavi' ma'. <sup>16</sup> 'O se caguaj ma'an síi 'nij ra'a man ní' gaa cavii so' rej xta' nanij so' rihaan chumii nihánj, ne caguaj nij se-mozó Diose nij síi uun chij doj, ne ca'yanj se-mozó Diose xruún Diose chruun a'yanj, gaa ne nij tinúú ní' nij síi canoco' man Jesucristó nij síi cavi' me se asino nij so' cunuu i'na' a. <sup>17</sup> Ne sese gaa i'na' ní' cayáán ní' rihaan chumii nihánj, ne nacaj nij se-mozó Diose man ní', ne cavii ní' rej xta' raá ngaa ga nij síi cunuu i'na' uún, ne nari' tuvi' ní' ga síi 'nij ra'a man ní' rej xta', gaa ne cayáán ní' ga síi 'nij ra'a man ní' nu' cavii nu' ca'anj nanj adonj. <sup>18</sup> Nihánj me nana cataj xna'anj soj rihaan tinúú soj, ne nari' nucuaaj nimán 'o 'o soj, qui'yaj nana nihánj ei.

## 5

*Nana nihánj taj xna'anj se vaa xcaxj ní' cuentá daj qui'yaj ní' ndaa se quisij güii ca'na' uún Jesucristó a*

<sup>1</sup> Taj che'é cachron núj nana rihaan yanj cartá nihánj cataj xna'anj núj rihaan soj me güii ca'na' uún Jesucristó, man tinuj, man nocoj. <sup>2</sup> 'O se aj ne'en ya soj se vaa ase vaa ne ne'en ní' me güii catuu síi ituu qui'yaj ituu so' ro', danj vaa ne ne'en ní' me güii ca'na' uún síi 'nij ra'a man ní' rihaan chumii nihánj a ma'. <sup>3</sup> Dan me se vaa güii cataj yuvii: "Yaj me se dínj vaa rihaan chumii, ne taj che'é cuchu'vi' ní' ma'", cataj nij yuvii a. 'O se güii yo' me taj ni'yón ase vaa ran' chana cuchruj ne'ej ro', danj gaa quiran' ndo'o nij yuvii sayuun, ne se quinanii nij so' ma'. 'O se yuun che'e cutuna nij so' nanj adonj.

<sup>4</sup> Xa' soj, tzaj ne nuveé sij chéé rej rmi' ne acaj cuentá me soj, man tinuj,

man nocoj. 'O se güii ca'na' uún Jesucristó me se taj che'é cuchu'vi' soj ndaa vaa chu'vi' nij síi ne'en man síi ituu ma'. <sup>5</sup> Ino vaa soj rihaan nij síi ne amán rá ni'yaj man Jesucristó ei. Dan me se xa' soj, tzaj ne sij chéé ranga' man naán güii me soj, ne sij acaj sa' cuentá me soj uún, ne nuveé sij chéé rej rmi' do', rej nii do', me soj ma'. 'O se sij chéé rej ranga' me soj ei. <sup>6</sup> Che'é dan se guun guun ní' síi otoj nda' rá se vaa 'yaj ta'aj nii ma'. 'O se vaa che'é ni'yaj ranga' rlij rihaan ní' ei. Se canoco' ní' tucuaán noco' yo'ó nij yuvii mei. Tananj yo'ó gaa yu've ní', ne se gaa xno ní' mei. <sup>7</sup> Dan me se nij síi man rihaan chumii nihánj ro', síi vaj rej rmi' me nij so', ne taj se 'yá' xcaxj nij so' cuentá ma'. Che'é dan ase vaa 'o síi otoj nu' do', ase vaa síi xno do', vaa nij so', ne ne ne'en nij so' daj 'yaj nij so' a ma'. <sup>8</sup> Xa' ní', tzaj ne sij vaj rej ranga' me ní', ne acaj ní' cuentá daj qui'yaj ní' nanj á. Dan me se yo'ó gaa nucuaaj rá ní' man síi 'nij ra'a man ní', ne gaa 'ee rá ní' man tinúú ní', ne ase vaa aráán rihaan nimán tanuu 'yaj aga' no rucuaa tanuu ro', danj gaa caráán rihaan nimán ní' a. Ne guun ya rá ní' se vaa ya cavii sa' ní', ne ase vaa avii sa' tanuu 'yaj aga' nuu raá tanuu ro', danj gaa cavii sa' ní' che'é se guun ya rá ní' se vaa cavii sa' ní' a.

<sup>9</sup> Nuveé che'e se me rá Diose caxrii yuvaa Diose man ní' me cataj Diose se vaa canoco' ní' man so' ma'. 'O se cataj Diose danj che'é se me rá Diose quinanii ní' rihaan sayuun ne cavii sa' ní' che'é Jesucristó sij 'nij ra'a man ní' adonj. <sup>10</sup> Ne Jesucristó me síi cavi' che'é ní', ne che'é dan ca'vee se cavi' ní', ca'vee se gaa i'na' ní', tzaj ne cayáán rcua'aan cunudanj ní' ga so' adonj. <sup>11</sup> Che'é dan ase vaa 'yaj soj cuano ro', danj inanj qui'yaj soj, raj a. Dan me se nago' soj nana sa' man tinúú soj, nari' nucuaaj nimán tinúú soj, ne racuúj soj man tinúú soj yan sa' doj canoco' nij tinuj nij soj man Diose á.

*Nana nihánj taj xna'anj se vaa*



*nago' Pabló chrej man nu' nij síi noco' Diose a*

<sup>12</sup> Cuanō nihánj me cataj xna'anj núj rihaan soj se vaa caraā cochroj soj rihaan nij síi uun chij rihaan soj, tinuj, nocoj. Dan me se nij so' ro', me síi nicaj yu'unj man soj rihaan síi 'nij ra'a man ní', ne narqué nij so' chrej sa' man soj, <sup>13</sup> ne 'yaj suun ndo'o nij so' che'é soj, ne che'é dan gaa 'ee rá soj man nij so', ne caraā cochroj soj rihaan nij so' á. Ne ve'é cumān soj ga tinúú soj á. <sup>14</sup> Ne cuanō nihánj me cataj xna'anj núj rihaan soj se vaa nago' soj chrej nucuaj man nij síi rmii se vaa qui'yaj suun nij so', tinuj, nocoj. Sese vaa 'o síi chu'vi' nimán, ne ca'mii soj nana sa' rihaan so', ne nari' nucuaj nimán so', qui'yaj soj á. Rauij soj man nij yuvi' ninaj, ne gaa inaj nimán soj ni'yaj soj man cunudanj yuvi' á. Se guun ca'maan ra'yanj rá soj ma'. <sup>15</sup> Tumé soj man soj se guun qui'yaj chi'ii yo'o tuvi' soj man síi 'yaj chi'ii man soj ma'. Maan se inan' suun sa' qui'yaj suun soj che'é tuvi' soj do', che'é cunudanj yuvi' do' á.

<sup>16</sup> Niganj gaa niha' rá soj, <sup>17</sup> ne se ca'ne' rá soj ga suun achín ni'yaj rihaan Diose mei. <sup>18</sup> Ne ca'vee se me ma'an sayuun quiran' soj, tzaj ne yo'o nago' soj gracia' rihaan Diose á. Danj me rá Diose qui'yaj soj che'é se sij noco' man Jesucristó me soj adonj.

<sup>19</sup> Se guun caráán soj chrej rihaan Nimán Diose tucu'yón Nimán Diose nana sa' man soj ma'. <sup>20</sup> Se quiril'ij yanij soj man nana cataj xna'anj naca Nimán Diose rihaan soj ma'. <sup>21</sup> Tzaj ne xcaj soj cuentá daj vaa 'o 'o nana cunō soj, gaa ne quene'en soj sese ya nana ca'mii Nimán Diose me yo', ne sa' cunuû rá soj nu' nana sa' yo' á. <sup>22</sup> Ne a 'ó se nij se ca'vej rá soj qui'yaj soj ma'. <sup>23</sup> Diose ro', me síi naqui'yaj xej nimán ní', ne me rá núj cunu sa' inan' nimán soj rihaan so', qui'yaj ma'an so', ne me rá núj tumé Diose man ma'an soj ndaa se quisij güii ca'na' uún Jesucristó sij 'nij ra'a man ní' rihaan chumii nihánj, ne dan me

se me rá núj tumé Diose man nimán soj do', man nee man soj do', ne a 'ó cacun' se tumé soj a mei. <sup>24</sup> Dan me se Diose me síi nacúún man soj canoco' soj man so', ne vaa che'é gaa nucuaj rá soj man so' se vaa tumé so' man soj adonj.

<sup>25</sup> Ne cachinj ni'yaj soj rihaan Diose che'é núj, tinuj, nocoj.

<sup>26</sup> Asa' nari' tuvi' soj ga tinúú ní' síi noco' man Diose, ne ve'é ca'mii soj ga nij so', ne go' soj 'o xto man nij so' rihaan Diose ei. <sup>27</sup> Maan che'é se síi 'nij ra'a man ní' rqué suun manj, che'é dan me no xcúnj cataj xna'anj 'unj rihaan soj se vaa nayaā soj yanj cartá nihánj rihaan cunudanj nij tinúú ní' síi noco' man Diose ei. <sup>28</sup> Ne me rá núj qui'yaj ndo'o Jesucristó sij 'nij ra'a man ní' se luj che'é soj adonj.

**Nihánj me síj vij yanj  
cartá qui'yaj síí cu'naj  
Pabló ca'néé so'  
rihaan nij yuvii noco'  
man Diose yanj  
chuman' cu'naj  
Tesalónica a**

<sup>1</sup> Síí cu'naj Pabló do', síí cu'naj Silvano do', síí cu'naj Timoteo do', me núj, ne 'yaj núj yanj cartá nihánj ca'nej núj rihaan nij soj sij yanj chuman' cu'naj Tesalónica sij noco' man Rej ní' Diose do', man Jesucristó sij 'nij ra'a man ní' do' a. <sup>2</sup> Me rá núj qui'yaj Rej ní' Diose do', qui'yaj Jesucristó sij 'nij ra'a man ní' do', se luj che'é soj, ne me rá núj gaa xej nimán soj, qui'yaj roj so' a.

*Nana nihánj taj xna'anj se vaa ve'é noco' nij síí cuchumán rá ni'yaj man Jesucristó yanj chuman' Tesalónica man Diose a*

<sup>3</sup> Sa' uxrá doj canoco' nij soj man Diose, ne cunuu 'ee doj rá 'o 'o soj tinúú soj daj a güii, ne che'é dan no xcúún núj niganj nago' núj graciá rihaan Diose che'é soj, tinuj, nocoj. <sup>4</sup> Ne ma'an núj nata' rihaan nij yuvii noco' man Diose yanj que'ee chuman' se vaa ve'é 'yaj soj, ne dan me se taj núj se vaa 'yaj ndo'o nii sayuun man soj, tzaj ne yo'o amán rá soj ni'yaj soj man Diose, ne 'o vaa sca' rá soj rihaan sayuun, ne yo'o noco' raan soj man Diose ei. Dan me se yo'o a'mii sca' ya ma'an núj che'é soj rihaan daj a nij síí noco' Diose yanj daj a chuman' se vaa uxrá táá ri'yunj nii man soj ne uxrá ran' soj sayuun, taj núj rihaan nij so' ei.

*Nana nihánj taj xna'anj che'é güii qui'yaj Diose sayuun man nij yuvii 'yaj sayuun man nij síí cuchumán rá ni'yaj man Jesucristó a*

<sup>5</sup> Che'é se vaa 'yaj soj, che'é dan ne'en ní' se vaa nica vaa nana cataj

xna'anj Diose che'é soj a. Dan me se nuchruj raa Diose che'é soj, ne cataj xna'anj Diose se vaa ca'vee cayáán soj ga Diose asa' guun chij Diose rihaan chumiij nihánj, ne che'é ma'an güii dan ran' soj sayuun nanj á. <sup>6</sup> Dan me se ne'en ní' se vaa nica vaa rá Diose qui'yaj Diose sayuun man nij yuvii qui'yaj sayuun man soj, <sup>7</sup> ne nica vaa rá Diose cataj xna'anj Diose se vaa navij güii ran' soj sayuun, ne naraan rá soj ga núj, ne veé danj naraan rá taran' ní' güii curuvi' uún Jesucristó sij 'nij ra'a man ní' do', curuvi' nij se-mozó so' síí nucuaj ndo'o do', curuvi' rej xta' rque 'o ya'an chuguun a. <sup>8</sup> Ne qui'yaj Jesucristó sayuun man nij yuvii ne ne'en man Diose do', man nij yuvii na'vej rá cunó se-nana Jesucristó sij 'nij ra'a man ní' nana sa' do' a. <sup>9</sup> Dan me se quiran' nij so' sayuun che'é cacun' qui'yaj nij so', ne dan me se rej yanj cumán nij so', cacaaj nij so' nu' cavii nu' ca'anj a. Se quene'en nij so' man síí 'nij ra'a man ní' do', se quene'en nij so' se vaa ve'é ndo'o vaa so' do', yan nucuaj ndo'o so' do' ma'. <sup>10</sup> 'O se güii ca'na' uún síí 'nij ra'a man ní' rihaan chumiij nihánj me se cataj nij síí sa' noco' man so' se vaa ve'é ndo'o vaa so', ne sa' uxrá vaa nu' se vaa qui'yaj so' a. 'O se cuchumán ya rá soj cuno soj nana nata' núj rihaan soj ei.

*Nana nihánj taj xna'anj se vaa achín ni'yaj Pabló rihaan Diose se vaa racuj Diose man nij síí cuchumán rá ni'yaj man Jesucristó a*

<sup>11</sup> Che'é dan niganj achín ni'yaj núj rihaan Diose che'é soj se vaa ca'vee quisij soj guun soj nu' ndaa vaa me rá Diose guun soj gaa canacúún Diose man soj canoco' soj man so' a. Ne achín ni'yaj núj se vaa racuj ndo'o Diose man soj qui'yaj suun soj nu' suun sa' me rá soj qui'yaj suun soj, che'é se sij amán rá ni'yaj man Jesucristó me soj a. <sup>12</sup> Dan me se ndaa síj, gaa ne ca'vee cavii sa' doj Jesucristó sij 'nij ra'a man ní' ni'yaj yuvii che'é se vaa qui'yaj ma'an soj, ne cavii

sa' ma'an soj ni'yaj yuvii che'é se sij noco' man Jesucristó me soj a. Danj inanj me se luj me rá Diose sí noco' ní' man do', Jesucristó sij 'nij ra'a man ní' do', qui'yaj roj so' che'é soj adonj.

## 2

*Nana nihánj taj xna'anj che'é sí chi'ii ca'na' rihaan chumii a*

<sup>1</sup> Dan me se aj ne'en soj se vaa ca'na' uún Jesucristó sij 'nij ra'a man ní', ne cunuu chre' ní' ga so', tinuj, nocoj. Che'é dan cataj xna'anj núj rihaan soj cuano <sup>2</sup> se vaa se guun vij ra'yanj rá soj ma'. Se caráya'anj soj nana cuno soj se vaa aj quisij güii ca'na' uún Jesucristó rihaan chumii ma'. Nuveé nana ya me nana yo' ma'. Ca'vee se nana ca'mii Nimán Diose me yo' taj nii, ca'vee se danj a'mii 'o sí a'mii natáj taj nii, ca'vee se nana cachrón núj rihaan 'o yanj cartá me yo' taj nii, tzaj ne taj se 'yaj ma'. 'O se ataa quisij güii ca'na' uún Jesucristó adonj. <sup>3</sup> Dan me se na'vej uxrá raj tiha' yu'unj nii a doj man soj a mei. Dan me se asino tucuaaj yuvii rihaan Diose, ne ca'na' yo'o sí chi'ii rihaan chumii, ne sí se ca'vej rá cuno rihaan Diose guun so' a. Dan me se xa' so', tzaj ne sij aj cacaa guun so' vaa güii ei. <sup>4</sup> Dan me se quinachri' so' man cunudanj ya'anj, ne a 'ó rasuun se ca'vej rá so' na'vij yuvii rihaan ma'. Dan me se catuu ma'an so' nuvií nocoó cayáán so' rej na'víj yuvii rihaan Diose, gaa ne ca'mii ne so' cataj so' se vaa ma'an so' me Diose á.

<sup>5</sup> Sese na'núj rá soj, ne nu' nana nihánj me nana cataj xna'anj 'unj rihaan soj asij rque doj gaa cayáán 'unj ga soj ei. <sup>6</sup> Ne aj ne'en soj me rasuun aráán chrej rihaan sí chi'ii yo', se vaa se ca'vee ca'na' so' cuano ma'. Dan me se caráán chrej rihaan so' ndaa se quisij güii cachrón Diose ca'na' so', gaa ne ca'na' so' adonj. <sup>7</sup> Cuano nihánj me se uun ndo'o cacun', tzaj ne ataa quene'en ní' daj gaa nu' cacun' qui'yaj sí chi'ii yo' ei. Ne xa' sí aráán chrej ca'na' sí chi'ii, tzaj ne vaa güii naxuun so' man ma'an

so', <sup>8</sup> gaa ne ca'na' sí chi'ii yo' sí na'vej rá cuno rihaan Diose, gaa ne quene'en ní' daj guun ei. Tzaj ne asa' ca'na' Jesucristó sij 'nij ra'a man ní', ne ca'yanj uun so' man sí chi'ii yo', ne quirí' nu' so' adonj. <sup>9</sup> Sí chree sí cu'naj Satanás me sí qui'yaj ca'na' sí chi'ii yo', ne ma'an sí chree qui'yaj guun nucuaj sí chi'ii yo' qui'yaj ndo'o so' suun nocoó ni'yaj yuvii, che'é yan tiha' yu'unj so' man nij yuvii a. <sup>10</sup> Ne nu' se chi'ii ndo'o qui'yaj so', tiha' yu'unj so' man nij yuvii ca'anj cacaa nu' cavii nu' ca'anj a. Ne nij yuvii yo' me se nuveé yuvii aran' rá cuno nana ya nana qui'yaj quinanii nij so' rihaan sayuun me nij so' ma'. <sup>11</sup> Che'é dan ma'an Diose qui'yaj cuchuman rá nij so' nana ne, ne canoco' nij so' chrej tiha' yu'unj, qui'yaj Diose adonj. <sup>12</sup> Danj inanj qui'yaj Diose ga cunudanj nij yuvii ne cuchuman rá nana ya, ne inanj chrej chi'ii niha' rá nij so' canoco' nij so' adonj.

*Nana nihánj taj xna'anj se vaa narii Diose man ní' canoco' ní' man so' a*

<sup>13</sup> Tzaj ne no xcúún núj niganj nago' núj gracia rihaan Diose che'é soj sij 'ee rá sí 'nij ra'a man ní' man, tinuj, nocoj. 'O se narii Diose man soj cunuu sa' soj qui'yaj Nimán Diose, ne cuchuman rá soj cuno soj nana ya, ne quitaj yaan soj rihaan yo'ó nij sí cavii sa' nu' cavii nu' ca'anj adonj. <sup>14</sup> Dan me se gaa nata' núj se-nana Diose nana sa' rihaan soj, ne canacúún Diose man soj se vaa cavii sa' soj ga so', ne che'é dan daj se ve'é ndo'o vaa Jesucristó sij 'nij ra'a man ní' ro', danj gaa soj uún adonj. <sup>15</sup> Che'é dan canoco' raan soj tucuaán cuchruj núj rihaan soj gaa ca'mii núj ga soj do', gaa qui'yaj núj yanj cartá ca'née núj rihaan soj do' ei. <sup>16-17</sup> Ne me rá núj quinari' nucuaj nimán soj, qui'yaj ma'an Jesucristó sij 'nij ra'a man ní' do', Rej ní' Diose do' a. Ne Diose ro', me sí 'ee rá man ní', ne qui'yaj ndo'o so' se luj ga ní' se vaa naqui'yaj nucuaj so' nimán ní' nu' cavii nu' ca'anj, ne guun ya rá ní' se vaa cavii sa' ní',

qui'yaj uún so' ei. Ne me rá núj guun nucuaj soj qui'yaj suun soj nu' suun sa', ne ca'mii soj nu' nana sa', qui'yaj Diose adonj.

### 3

*Nana nihánj taj xna'anj se vaa cachinj ni'yaj nij síí cuchumán rá ni'yaj man Jesucristó rihaan Diose che'é síí cu'naj Pabló a*

<sup>1</sup> Dan me se vaa yo'ó nana me rá núj ca'nej núj rihaan soj, tinuj, nocoj. Ne me rá núj cachinj ni'yaj soj rihaan Diose se vaa xna'anj uxrá se-nana síí 'nij ra'a man ní', ne cavii sa' nana yo' rej cunó yo'ó yuvii nana yo', ndaa vaa cavii sa' nana yo' gaa cuno ma'an soj nana yo' a. <sup>2</sup> Ne cachinj ni'yaj soj che'é núj se vaa quinanii núj rihaan nij síí chí'ii uún á. 'O se vaa yuvii ne amán rá ni'yaj man Jesucristó a man adonj.

*Nana nihánj taj xna'anj se vaa vaa che'é gaa nucuaj rá ní' man síí 'nij ra'a man ní' a*

<sup>3</sup> 'O se síí sa' ndo'o me síí 'nij ra'a man ní', ne vaa che'é ndo'o gaa nucuaj rá ní' man so', ne so' me síí qui'yaj nari' nucuaj rá soj, ne tumé so' man soj se vaa se qui'yaj canaán síí chree rihaan soj adonj. <sup>4</sup> Ne nucuaj rá núj man síí 'nij ra'a man ní' se vaa yo'ó 'yaj ya soj nu' se vaa cataj núj rihaan soj, ne dan me se veé 'o danj ya qui'yaj soj ei.

<sup>5</sup> Ne me rá núj se vaa racúij síí 'nij ra'a man ní' man ma'an soj daj qui'yaj soj, caraá cochroj soj rihaan Diose, ne yo'ó canoco' soj man Diose ndaa vaa qui'yaj ma'an Jesucristó, ne se ca'ne' rá soj gaa suun 'yaj danj ma'.

*Nana nihánj taj xna'anj se vaa se gaa rmii ní' ma'*

<sup>6</sup> Ne che'é se sij noco' man síí 'nij ra'a man ní' me nu' ní', ne che'é dan cataj xna'anj 'unj yo'ó nana rihaan soj, tinuj, nocoj. Dan me se guun yanij soj rihaan nu' nij tinúú ní' nij síí noco' chrej rmii na'vej rá qui'yaj suun ei. 'O se sij ne noco' tucuaán narqué núj rihaan me nij so' nanj adonj. <sup>7</sup> 'O

se aj ne'en soj se vaa nō xcúún soj qui'yaj soj ndaa vaa qui'yaj núj gaa cayáán núj gā soj, ne dan me se ne vaa rmii núj gaa cane núj gā soj ma'.

<sup>8</sup> Ne ne chá un núj chraa rihaan soj ma'. 'O se nu' se chá núj naru'vee núj sa'anj rihaan soj adonj. Tzaj ne 'o se nuvii nigan' qui'yaj suun uxrá núj quirij' núj chá núj, ne ne qui'yaj suun soj che'é núj, qui'yaj núj ma'.

<sup>9</sup> Dan me se sese guun rá núj cachinj núj se chá rihaan soj, ne cunó xcúún núj qui'yaj núj danj, tzaj ne ne ca'vej rá núj qui'yaj núj danj ma'. Maan se guun rá núj cuchruj núj tucuaán rihaan soj daj qui'yaj ma'an soj adonj.

<sup>10</sup> 'O se gaa cayáán núj gā soj, ne tananj nata' núj nana nihánj rihaan soj ca'mii soj a: “sese vaa 'o síí na'vej rá qui'yaj suun, ne se chá so' chraa ma'”, taj núj rihaan soj adonj.

<sup>11</sup> Aj cuhi' nana rihaan núj se vaa ta'aj síí rmii 'nij sca'núj soj, ne nij so' me se na'vej rá nij so' qui'yaj suun nij so', tzaj ne na'née rma'an nij so' nana rihaan tuvi' nij so' a. <sup>12</sup> Che'é Jesucristó sij 'nij ra'a man ní' a'ne' núj suun cuano rihaan yuvii 'yaj danj, se vaa dínj gaa tu'va nij so', ne qui'yaj suun nij so', ne inanj se chá qui'yaj canaán ma'an nij so' chá nij so' á.

<sup>13</sup> Ne xa' ma'an soj, tzaj ne se ca'ne' rá soj qui'yaj suun soj suun sa', man tinuj, man nocoj. <sup>14</sup> Sese yo'ó tuvi' soj na'vej rá cunó nana cachrón núj rihaan yanj nihánj, ne xcaj soj cuentá me síí na'vej rá cunó nana, ne se cayáán rcua'aan soj gā so' ma'. Ndaa síj, gaa ne guun na'aj so' a. <sup>15</sup> Tzaj ne se nachri' soj ni'yaj soj man síí rmii yo' ma'. Tananj ve'é qui'yaj soj, nago' soj chrej nucuaj man so' á. 'O se tinúú soj me so' adonj.

*Nana nihánj taj xna'anj se vaa ve'é cumán nij síí cuchumán rá ni'yaj man Jesucristó yo', rá síí cu'naj Pabló a*

<sup>16</sup> Qrún' síí 'nij ra'a man ní' ne'en qui'yaj gaa xej nimán ní', ne me rá núj qui'yaj so' danj che'é soj nu' güü a. Ne ca'vee se me ma'an sayuun quiran' soj, tzaj ne dínj gaa nimán soj, qui'yaj



so' á. Ne me rá núj cayáán síi 'nij ra'a man ní' ga taran' soj adonj.

<sup>17</sup> Ma'anj sij cu'naj Pabló ra'aj achronj nana nihánj se vaa ve'é cumañ soj raj a. Danj inañ 'yáá 'unj doj nana rihaan cunudanj nij yanj cartá a'née 'unj, ne nanj vaa letrá achronj a. <sup>18</sup> Me rá núj qui'yaj ndo'o Jesucristó sij 'nij ra'a man ní' se luj che'é cunudanj soj adonj.

## Nihánj me 'o yanj cartá qui'yaj síí cu'naj Pabló ca'néé so' rihaan síí cu'naj Timoteo a

<sup>1</sup> 'Unj nihánj me síí cu'naj Pabló síí uun apóstol síí nata' se-nana Jesucristó rihaan yuvií a. Yo' me suun ca'ne' Diose do', Jesucristó do', rihanj, ne Diose me síí tinanii man ní' rihaan sayuun, ne guun ya rá ní' se vaa cavíi sa' ní' qui'yaj Jesucristó adonj.

<sup>2</sup> 'Yáá 'unj yanj cartá nihánj ca'nej 'unj rihaan so' síj cu'naj Timoteo a. Dan me se tihaán 'unj se-nana Diose rihaan so', ne cuchumán rá so' nana yo', ne che'é dan ase vaa 'o ta'níj ro', danj vaa yá so' rihanj ei.

Me rá 'unj qui'yaj Rej ní' Diose qui'yaj Jesucristó síj 'nij ra'a man ní' qui'yaj ndo'o se luj che'é so', ne gaa 'ee rá roj so' mán so', ne gaa xej nimán so', qui'yaj roj so', raj a.

*Nana nihánj taj xna'anj che'é nij síí tucuyón tucuaán ne a*

<sup>3</sup> Dan me se aj ne'én so' se vaa gaa ataa ca'anj 'unj estadó Macedonia, ne cataj xna'anj 'unj rihaan so' se vaa cané so' chuman' Efeso á. Dan me se me rá 'unj cataj xna'anj so' rihaan ta'aj nij síí man Efeso se vaa se tucuyón nij so' tucuaán ne rihaan nij tinúú ní' mei. <sup>4</sup> Dan me se cataj so' rihaan nij tinúú ní', ne a se cuta' xrej nij so' cuentó yo' ma'. 'O se cuentó man gaa naá do', cuentó che'é daj vaa daj a xíi nij so' man gaa naá do', me yo' ei. 'O se a'mii unu' uxrá yuvií che'é nana yo', tzaj ne ne racuíj nana yo' man ní' canoco' ní' man Diose ma'. 'O se me rá Diose gaa nucuaj rá ní' man ma'an Diose ei. <sup>5</sup> 'O se che'é suun a'né' 'unj rihaan so' me se a'né' 'unj suun yo' rihaan so' che'é rej gaa 'ee rá ní' tuvi' ní' ndaa nimán ya ya ní' ndaa vaa cuchumán ya rá ní' ni'yaj ní' man Jesucristó ei. <sup>6</sup> Dan me se

vaa ta'aj nij yuvií, ne ta'aa nij so' yo'ó chrej a'mii nij so', ne dan me se ri' rma'an tiempÓ, 'yaj nij so', a'mii nij so' che'é yo'ó tucuaán ei. <sup>7</sup> 'O se me rá nij so' guun nij so' maestró tucuyón se-tucuanj Moisés, tzaj ne na'vee ran' nij so' a ma'. A ma'an nij so' ne ne'en nana tucuyón nij so' a mei.

*Nana nihánj taj xna'anj se vaa inanj che'é nij síí 'yaj cacun' vaa se-tucuanj Moisés a*

<sup>8</sup> Ne'en ní' se vaa sa' vaa se-tucuanj Moisés, ne cataj Diose rihaan Moisés daj qui'yaj nij yuvií israelitá canoco' nij so' man Diose, tzaj ne xcaj ní' cuentá me che'é me ca'mii Diose danj á. <sup>9</sup> Ne'en ní' se vaa xa' yuvií nica nimán, tzaj ne taj tucuaán achiin man yuvií nica nimán canoco' nij so' Diose ma'. 'O se ma'an Diose uun chij nimán nij so' daj gaa qui'yaj nij so' nanj á. Maan se che'é nij yuvií 'yaj cacun' do', yuvií na'vej rá canoco' Diose do', yuvií a'mii nana nij che'é Diose do', yuvií ticavi' rej do', yuvií ticavi' nii do', <sup>10</sup> síí 'yaj cacun' ga yo'ó chana do', chíi chana do', síí otoj ga chíi chana do', yuvií tu'vej man tuvi' do', yuvií a'mii nana ne do', yuvií na'vej rá cunó nana ya do', me cuchruj Diose se-tucuanj Moisés adonj. <sup>11</sup> Inanj danj a'mii se-nana Diose nana sa' che'é se-tucuanj Moisés, ne 'unj me síí cune' Diose nata' nana yo' rihaan yuvií se vaa ve'é uxrá yáán Diose, ne guun chij so' nu' cavii nu' ca'anj ei.

*Nana nihánj taj xna'anj se vaa cunuu 'ee ndo'o rá Jesucristó man síí cu'naj Pabló, ne 'ee ndo'o rá Jesucristó man cunudanj ní' síj noco' man so' uún a*

<sup>12</sup> Nagó' 'unj graciá rihaan Jesucristó síj 'nij ra'a man ní' che'é se guun nucuáá 'unj qui'yaj suun 'unj, qui'yaj so' a. Dan me se nucuaj rá so' mán 'unj, ne cune' so' mán 'unj qui'yaj suun 'unj rihaan so' adonj. <sup>13</sup> Asino yaan me se nij uxrá ca'mii 'unj che'é Jesucristó, ne qui'yaj ndo'o 'unj sayuun man so', ne ca'mii xta' 'unj

ni'yaj 'unj man so', tzaj ne quene'en Jesucristó se vaa che'é se ne quene'en yá 'unj daj vaa so' ro', che'é dan ne cuchuman rá 'unj ni'yaj 'unj man so' a. Tzaj ne cunuu 'ee rá Jesucristó manj, ne ne qui'yaj so' sayuun manj ma'.

<sup>14</sup> Tananj sa' uxrá qui'yaj uun Jesucristó sij 'nij ra'a man ní' manj, se vaa cuchumán rá 'unj ni'yaj 'unj man so', ne cunuu 'ee raj tuvij, qui'yaj so' adonj. <sup>15</sup> Dan me se ya uxrá vaa nana nihánj, ne taran' ní' no xcúun cunó nana nihánj se vaa me rá Jesucristó tinanii so' man nij yuvij rihaan chrej chi'ii uun chij nimán nij so', ne na'vej rá so' quirán' nij so' sayuun ma'. Che'é dan ca'na' so' rihaan chumii nihánj ei. Dan me se nocoo doj cacun' qui'yáá 'unj rihaan cacun' qui'yaj taran' yo'ó nij yuvij, <sup>16</sup> tzaj ne cunuu 'ee rá Jesucristó ni'yaj so' manj, che'é se guun rá Jesucristó se vaa xcaj yo'ó nij síi cuchuman rá ni'yaj man so' cuentá se vaa canoco' nij so' man Jesucristó, ne x'nee cacun' xráá nij so', ne ca'vee cayáán nij so' ga so' nu' cavii nu' ca'anj ei. <sup>17</sup> Nu' cavii nu' ca'anj cataj ní' se vaa sa' uxrá vaa Diose, ne so' me síi guun chij nu' cavii nu' ca'anj, ne daj chihaa míj se cavi' so' ma'. Ne ruvi' so' ni'yaj yuvij ma'. Taj vaj 'ó Diose ma'. Qrún' so' me Diose ya adonj. Veé danj gaa ya ei.

<sup>18-19</sup> Timoteo. Ase vaa ta'níi ya ma'anj vaa yá so' ei. Dan me se a'ne' yá 'unj suun rihaan so' yo'ó ca'mii cunu' sa' yá so' che'é chrej sa' ya nihánj ei. Daj chihaa míj se ca'ne' rá so' ma'. Tzaj ne yo'ó gaa nica nimán so', ne yo'ó gaa nucuaj rá so' cuchuman rá so', gaa ne quisij ya ndaa vaa ya ca'mii nij síi naruvi' Diose rihaan che'é so' ei. Dan me se vaa ta'aj nij síi quiri' rá, ne ne cuchuman ya rá nij so' ma'. <sup>20</sup> Dan me se vij tuvi' nij so' me roj síi cu'naj Himeneo ga Alejandro síi ca'mii nij che'é Diose a. Dan me se nago' yá 'unj man roj so' ra'a Satanás, gaa ne ri' rá roj so', gaa ne xcaj roj so' cuentá, ne yuún che'ę me se se ca'mii nij roj so'

che'é Diose ma'.

## 2

*Nana nihánj taj xna'anj se vaa cachinj ni'yaj ní' rihaan Diose che'é cunudanj yuvii a*

<sup>1</sup> Nihánj me se asino yaan a'né' 'unj suun rihaan nij soj se vaa cachinj ni'yaj soj rihaan Diose che'é cunudanj yuvii, ne nago' soj gracia rihaan Diose che'é cunudanj nij yuvii, <sup>2</sup> ne cachinj ni'yaj soj che'é cunudanj nij síi nica' suun, gaa ne gaa dínj cayáán ní' rihaan chumii nihánj, ne ve'é qui'yaj ní', canoco' ní' man Diose á. <sup>3</sup> Sa' uxrá vaa sese danj qui'yaj ní' ni'yaj Diose, ne aj ne'en soj se vaa Diose me síi 'yaj avii sa' ní' ei. <sup>4</sup> Me rá Diose racuíj Diose man cunudanj yuvii, che'é rej cavii sa' cunudanj yuvii, ne me rá Diose nari' cunudanj yuvii nana ya ei.

<sup>5</sup> 'O se oruun Diose, ne oruun 'o snó'o cataj xna'anj rihaan ní' daj vaa Diose, ne so' me síi racuíj man yuvii cunuu sa' yuvii rihaan Diose, ne yo'ó snó'o cu'naj Jesucristó me síi qui'yaj danj ei. <sup>6</sup> Ne Jesucristó me se ca'ne' rá so' cavi' so' che'é cunudanj yuvii, ne nanii nij yuvii rihaan sayuun a. Dan me se cachrón Diose güii cavi' Jesucristó, ne tihaan Jesucristó se vaa me uxrá rá Diose cavii sa' cunudanj yuvii a. <sup>7</sup> Ne cune' Diose mán 'unj guún 'unj apóstol nata' rihaan yuvii se vaa me rá Diose cavii sa' nij yuvii, tzaj ne ne tucu'yón 'unj man nij yuvii israelitá ma'. Maan se inanj nij yuvii yaníj tucu'yón 'unj daj qui'yaj nij so', se vaa cuchuman rá nij so' ni'yaj nij so' man Diose, ne cunó nij so' nana ya ca'mii Diose, taj 'unj rihaan nij so' adonj. Xa' nana nihánj, tzaj ne nana ya uxrá me nana nihánj, ne ne a'mii ne 'unj ma'.

<sup>8</sup> Dan me se gaa nuu chre' soj sij amán rá ni'yaj man Jesucristó, ne me rá 'unj cachinj ni'yaj nij snó'o rihaan Diose, ne naxcaj ra'a nij so' rej xta' cachinj ni'yaj nij so' rihaan Diose, ne yo'ó guun rá nij so' se vaa ve'é canoco'

nij so' man Diose, ne se ca'maan rá nij so' do', se canó tuvi' nij so' do', se ca'mii cunu' nij so' do', 'o se sa' inanj cachinj ni'yaj nij so' nanj adonj.

*Nana nihánj taj xna'anj daj qui'yaj chana cuchumán rá ni'yaj man Jesucristó a*

<sup>9</sup> Ne xa' chana, tzaj ne se guun rá chana cunu' chana yatzíj sa' ndo'o vaa ma'. Maan se ve'é qui'yaj chana caráan chana nee man chana, gaa ne cataj nii se vaa chana sa' me no' ei. Tzaj ne se caxríj chana que'ee quitzi' yuvé raá chana do', se toco' chana que'ee caquíí xréé chana do', se ca'neé chana ticuu gaán chihá no' do' ma'. <sup>10</sup> Tzaj ne qui'yaj suun chana racuíj chana man yuvij, ne quene'en nii se vaa ya vaa nana a'mii chana yo', se vaa noco' no' man Diose adonj. <sup>11</sup> Ve'é cunō chana gaa tucuyón nii nana sa' man no' á. <sup>12</sup> Se ca'vee tucuyón chana man snó'o ma'. Se guun guun chij chana rihaan snó'o ma'. Maan se dínj gaa tu'va chana adonj.

<sup>13</sup> Dan me se gaa guun che'e chumij, ne asino qui'yaj Diose man snó'o cu'naj Adán, gaa ne qui'yaj Diose man chana cu'naj Eva adonj. <sup>14</sup> Ne tiha' yu'unj sí chree man sí cu'naj Adán ma'. Tzaj ne chana tiha' yu'unj so', ne qui'yaj no' cacun' rihaan Diose, qui'yaj sí chree adonj. Che'é dan se guun chij chana rihaan snó'o ma'. <sup>15</sup> Tzaj ne cavij sa' nij chana che'é se cunū se uun nij chana se vaa cuchruj chana ne'ej adonj. Danj gaa cavij sa' chana, sese cuchuman rá chana ni'yaj chana man Diose do', sese cunū 'ee rá chana tuvi' chana do', sese cunō chana se-nana Diose do', sese tumé chana man ma'an chana daj qui'yaj no' do' adonj.

### 3

*Nana nihánj taj xna'anj daj gaa nij snó'o guun sí chij nicaj yu'unj man nij yuvij noco' man Diose a*

<sup>1</sup> Ya vaa nana nihánj ei. Sese me rá yo'o so' guun so' sí chij nicaj yu'unj

man nij yuvij noco' man Diose, ne sa' vaa suun me rá so' cata so' ei. <sup>2-3</sup> Che'é dan inanj snó'o ne a'mii chree nii che'é guun sí chij nicaj yu'unj man nij yuvij noco' man Diose á. Orún' nica so' nicaj so', ne sí chij vaa rá guun so', ne sí a'mii nica inanj guun so', ne sí aráj cochroj do', sí aráj x'naa do', sí 'yaj se luj rihaan taran' yuvij do', sí yo'o a'neé nimán racuíj man yuvij do', sí aran' rá caran' yuvij tucua do', sí ne'en tihaan sa' man yuvij do', sí ne aran' rá gaa xno do', sí ne aran' rá cunū' ga yuvij do', sí se guun rá gaa que'ee uxrá si'yaj do', guun so' ei. <sup>4</sup> Maan se yan gaa so' me se inanj sí tumé sa' uxrá tucua guun chij do', yan ve'é uxrá cunō ta'níi so' rihaan so' do', se tucuaá nij xnií rihaan so' do' adonj. <sup>5</sup> 'O se sese ne ne'en so' guun chij so' rihaan tucua so', ne asa' ca'vee cutumé so' man cunūdanj nij yuvij noco' man Diose ga. <sup>6</sup> Sese sí noco' naca se-tucuanj Diose me yo'o so', ne se gaa nanj ca'mij so' ne quiran' so' sayuun ga sí chree se vaa cacaa so', qui'yaj Diose ei. <sup>7</sup> Tananj uún, ne chij gaa rá so' ga nij yuvij ne noco' man Jesucristó, gaa ne xcaj nij so' cuentá se vaa ya chij a'mii sí nicaj yu'unj man nij sí noco' man Jesucristó, gaa ya rá nij so' a. 'O se danj qui'yaj sí me rá quinica yu'unj man nij sí noco' man Jesucristó, gaa ne se gaa nanj tiha' yu'unj sí chree man so' ei.

*Nana nihánj taj xna'anj daj gaa nij snó'o do', nij chana do', guun diácono a*

<sup>8</sup> Ne veé danj gaa guee nij sí guun diácono uún, ne sí ni'yanj guun nij so' á. Se ca'mii nij so' nana tiha' yu'unj mei. Se gaa niha' rá nij so' co'o ndo'o nij so' na vinó mei. Se tiha' yu'unj nij so' man yuvij ca'nee uun nij so' sa'anj mei. <sup>9</sup> Canoco' raan nij so' nana tucuyón Diose man ní' á. Se guun vij rá nij so' ma'. <sup>10</sup> 'O se asino xcaj nii cuentá ni'yaj nii man nij so' sese taj cacun' tumé nij so', gaa ne ca'vee guun nij so' diácono ei. <sup>11</sup> Veé danj gaa guee nij chana me rá guun diácona, ne



chij gaa rá nij no' do', chij ca'mii nij no' rihaan nij yuvii do', se gaa ne nij no' do', se guun xno nij no' do', yo'o ve'é qui'yaj nij no' daj a rasuun do' ei. <sup>12</sup> Xa' nij sí guun diácono, tzaj ne orún' nica nij so' nicaj nij so' do', sa' cutumé nij so' man ta'nii nij so' do', sa' cutumé nij so' man nu' nij tucua nij so' do' ei. <sup>13</sup> Ne sese sa' 'yaj nij so' nu' suun vaa rihaan nij so', ne sí sa' me nij so', cataj nij yuvii noco' man Diose, ne se cuchu'vi' nij so' cataj xna'anj nij so' daj qui'yaj ní' canoco' ní' man Jesucristó ma'.

*Nana nihánj taj xna'anj se vaa sa' uxrá vaa nana cataj xna'anj Diose rihaan ní' nana canoco' ní' a*

<sup>14</sup> Dan me se cachrón 'unj nana nihánj rihaan yanj nihánj, ne ca'nej 'unj rihaan so' á. Tzaj ne me ndo'o rá 'unj cuchí' 'unj rihaan so' rque doj güii ei. <sup>15</sup> Tzaj ne asa' ne cuchí' ra'yanj 'unj, ne taj se 'yaj mei. Aj ne'én so' daj qui'yaj soj sij noco' man Diose gaa yáan soj ga tinúú soj ei. 'Q se tucua Diose me ma'an cunudanj soj sij noco' man Diose sí vaa i'na' ya ei. Che'é ma'an soj me se acaj yuvii cuentá se vaa ya vaa se-nana Diose ne ma'an soj me sí nicaj nana ya ei. <sup>16</sup> Ne'en cunudanj ní' sij amán rá ni'yaj man Jesucristó se vaa sa' uxrá vaa nana cataj xna'anj Diose rihaan ní' nana canoco' ní', ne nihánj me nana yo' a: "Ca'na' Jesucristó a. Curuvi' so' ni'yaj yuvii a. Guun so' yuvii a. Ve'é ndo'o qui'yaj so', cataj Nimán Diose, ne quene'en rihaan nij se-mozó Diose daj qui'yaj so' a. Dan me se nata' nii che'é so' rihaan nij yuvii yanj yuvii ne noco' se-nana Diose, ne cuchumán rá ta'aj nij so' quene'en nij so' man so' a. Ne quinan' so' xta', qui'yaj Diose, ne ve'é ndo'o yáan so' rej xta' cuano adonj". Dan me nana noco' ní' a.

#### 4

*Nana nihánj taj xna'anj se vaa cuno ta'aj yuvii se-nana nij sí ne, gaa ne quiri'ij nij yuvii se-tucuanj Diose a*

<sup>1</sup> Tzaj ne taj xna'anj Nimán Diose se vaa vaa güii, ne quiri'ij ta'aj yuvii se-tucuanj Diose, ne canoco' nij so' yo'ó tucuaán, ne cuno nij so' nana tiha' yu'unj nana tucu'yón nij nana chree adonj. <sup>2</sup> Dan me se cuchuman rá nij so' nana ca'mii sí taj a'mii sa' tu'va rma'an ei. Ne sí ne ndo'o me nij so' ei. Ne xa' nij sí ne yo', tzaj ne a'mii rma'an nij so', ne nimán nij so' me se nda' rá se vaa táa yaan cavi' i'na' ro', vaa táa yaan chi'ii nimán nij so' a. <sup>3</sup> Ne tucu'yón nij sí ne rihaan yuvii se vaa se ca'vee xcaj yuvii chana, ne cacun' me yo', taj nij so' a. Ne tucu'yón nij so' se vaa se ca'vee cha yuvii náa guun rasuun uún a. Tzaj ne 'o se nu' nij rasuun man rihaan yo'ó me se rasuun chá nago' graciá rihaan Diose me yo', rá Diose, don araa so' rasuun yo' rihaan yo'ó che'é nij sí mán raá nana ya ei. <sup>4</sup> Dan me se nu' rasuun qui'yaj Diose me se sa', ne ne nó xcúún ní' nachri' ní' ni'yaj ní' man se vaa qui'yaj Diose che'é ní' ma'. Maan se nicaj ní' man yo', ne nago' ní' graciá rihaan Diose che'é rasuun yo' cha ní' ei. <sup>5</sup> Ne'en ní' daj taj se-nana Diose, ne che'é dan ne'en ní' se vaa sese cachinj ni'yaj ní' asino yaan rihaan Diose, ne Diose me sí naqui'yaj sa' yo' cha ní' ei.

*Nana nihánj taj xna'anj se vaa ve'é qui'yaj suun Timoteo suun ca'ne' Diose rihaan so' a*

<sup>6</sup> Sese tucu'yón so' nana nihánj rihaan yo'ó nij tinúú ní' sí noco' man Jesucristó, ne sí ve'é 'yaj suun rihaan Jesucristó mé so', ne sí ve'é nari' nu' nana noco' ní' mé so' chuguanj. 'Q se tucu'yón nii nana sa' yo' rihaan so', ne cuchumán rá so', ne canocó' so' nana yo', ne che'é dan guun nucuáa so' tucu'yón so' nana yo' rihaan tinúú ní' a. <sup>7</sup> Se cunó so' cuentó nata' yuvii cuentó ne ya a'mii che'é Diose ma'. 'Q se nana snúú rma'an me nana yo' nanj á. Tzaj ne tucu'yón so' daj qui'yáa so', ne ve'é doj canocó' so' se-tucuanj Diose á. <sup>8</sup> Nda' se vaa yu'vee nó suun 'yaj suun nee man

ní, tzaj ne vaa doj yu'vee nó nimán ní, canoco' nimán ní man Diose ei. Che'é suun 'yaj suun nimán ní me se cavii sa' ní gaa yáán ní rihaan chumii nihánj, ne ne'en ní se vaa cavii sa' ní cayáán ní ga Diose nu' cavii nu' ca'anj ei. <sup>9</sup> Ya vaa nana yo', ne vaa che'é cunō ní man yo' chuguanj. <sup>10</sup> Dan me se nucuaj rá ní man Diose sí vaa i'na' se vaa cavii sa' ní qui'yaj Diose, ne che'é dan 'yaj suun uxrá ní, ne ne chu'vi' ní ca'mii yuvii nana nij che'é ní a mei. Orún' Diose ca'vee cavii sa' cunudanj yuvii ei. Ne ya cavii sa' cunudanj nij yuvii amán rá ni'yaj man Diose adonj. <sup>11</sup> Tucuyón so' nana yo' rihaan yuvii, ne ca'ne' so' suun rihaan nij yuvii se vaa canoco' nij yuvii nana yo' á.

<sup>12</sup> 'O se xnii mé so', ne ataa cachij so', tzaj ne taj se 'yaj yo' mei. Se guun cataj yuvii se vaa taj se uún so' mei. Maan se ve'é qui'yáá so' nu' tucuaán noco' ní, se vaa ve'é ca'mii so' do', ve'é qui'yáá so' do', gaa 'ee rá so' man tinúú so' do', gaa nucuaj rá so' man Diose do', cutumé so' mán so' se qui'yáá so' cacun' do', gaa ne xcaj nij sí noco' man Diose cuentá daj 'yáá so', ne danj qui'yaj nij so' uún adonj. <sup>13</sup> Asa' guun raan 'o xco' le'ej nii cuchij, ne nayaá so' se-nana Diose cunō nij so', tucuyón sa' so' man nij so', ne inanj danj gaa suun qui'yaj suun so' ndaa güii cuchí' 'unj rihaan so' ei. <sup>14</sup> Se quini'yón so' suun sa' ca'ne' Diose rihaan so' mei. 'O se che'é suun sa' yo' me tihaan Diose 'o nana che'é so' rihaan nij sí chij nicaj yu'unj man nij yuvii noco' man Diose, ne cuta' nij so' ra'a nij so' raá so' ei. <sup>15</sup> Dan me se yo' o ca'nej so' raá so' man nij rasuun yo', gaa ne quene'en cunudanj nij yuvii se vaa vaj nari' so' qui'yaj suun so' se-suun Diose, ni'yaj nij yuvii ei. <sup>16</sup> Xcaj so' cuentá se vaa 'yáá so' do', se vaa tucuyón so' do' á. Canocó' so' nu' nana nihánj, gaa ne cavii sa' ma'án so' cavii sa' nij yuvii uno nana a'mii so' cavii sa', qui'yáá so' a.

## 5

*Nana nihánj taj xna'anj daj ca'mii ní' rihaan 'o 'o yuvii noco' man Diose a*

<sup>1</sup> Se caxrij yuvaá so' man nij chii nga ma'. Maan se ve'é ca'mii so' rihaan nij so' nago' so' chrej sa' man nij so' á. Daj se a'mii so' rihaan rée so' ro', danj ca'mii so' rihaan nij chii nga á. Ase a'mii so' rihaan tinúú so' ro', danj ca'mii so' rihaan nij sí tachruu uún a. <sup>2</sup> Ase a'mii so' rihaan nií so' ro', danj ca'mii so' rihaan nij vichij uún a. Ase a'mii so' rihaan ra'vij so' ro', danj ca'mii so' rihaan nij chana tachruu á. Se ca'mii so' a doj nana chi'ii ga nij no' ma'.

*Nana nihánj taj xna'anj che'é nij chana cavi' nica a*

<sup>3</sup> Caraa cochróo so' rihaan nij chana cavi' nica á. Go' so' rasuun achiin man nij no', sese nuvi' tuvi' chana racuíj man chana a. <sup>4</sup> Tzaj ne sese vaa ta'núí chana do', ta'nij si'no chana do', ne taj ya'anj nij so' man chana yo' á. Danj qui'yaj nij so', gaa ne quinari' nij so' suun ca'ne' Diose rihaan nij so' se vaa taj ya'anj nij so' man tuvi' nij so' á. 'O se danj gaa ya, gaa ne cunuú rá nij so' se vaa asij xnii me nij so', ne taj ya'anj nii nij so' do', xcua'anj nij so' do', man ma'an nij so', ne ase vaa qui'yaj nii nij so' do', ase vaa qui'yaj xcua'anj nij so' do', man nij so' ro', danj qui'yaj ma'an nij so' man nii nij so' do', man xcua'anj nij so' do' ei. Yo' me, gaa ne guun niha' rá Diose ni'yaj Diose man nij so' a. <sup>5</sup> Sese ya chana nique me yo' o no', ne gaa nucuaj rá no' ni'yaj no' Diose á. Se-suun no' guun suun achín ni'yaj rihaan Diose nuvi' nigan' a. <sup>6</sup> Tzaj ne sese me inanj rá no' guun niha' rá no' rihaan chumii nihánj, ne nda' se vaa i'na' nee man no', tzaj ne nimán no' me se aj cavi' a. <sup>7</sup> Nago' so' nana nihánj rihaan nij sí amán rá ni'yaj man Diose, ne se cuta' yuvii a doj cacun' xráá nij so' mei. <sup>8</sup> Sese vaa yuvii na'vej rá taj ya'anj man tuvi' yuvii do', man nij tucua yuvii do', ne nuveé yuvii noco' se-tucuanj ní' sij

noco' man Diose me nij so' ma'. Nij doj 'yaj yuvii yo' rihaan nij yuvii ne amán rá ni'yaj man Diose adonj.

9 Inanj se-chuvii nij chana vaj va'nuj chihaa yo' taj doj cachron so' rihaan yanj no se-chuvii nij chana cavi' nica á. Ne inanj se-chuvii chana nicaj raan man orún' nica cachron so' uún á. 10 Ne quene'en cunudanij nii man nij no' se vaa ve'é 'yaj suun nij no' che'é tuvi' nij no' do', se vaa ve'é tucuachij nij no' ta'nii nij no' do', se vaa rqué nij no' chraa chá yuvii ca'na' rej man gan' do', se vaa na'nu' nij no' tacóo nij yuvii noco' man Diose do', se vaa racuj nij no' man nij sí quiran' sayuun do', ne nij no' me ca'vee cachron so' se-chuvii rihaan yanj no se-chuvii nij chana cavi' nica a.

11 Tzaj ne se cachron so' se-chuvii chana ta'aj rihaan yanj ma'. 'O se vaa güii guun niha' rá nij chana ta'aj yo' canoco' nij no' yo'ó chii, ne quiri'ij nij no' suun ata' nij no' che'é Jesucristó nanj adonj. 12 Sese danj qui'yaj nij chana ta'aj, gaa ne cutumé nij no' cacun' che'é se tanáj nij no' suun 'yaj suun che'é Jesucristó a. 13 Tananj uún, ne ne yáan xej nij no' ve', ne chéé rma'an nij no' daj a ve', ne uun rmii nij no', ne achén uun tiempo, 'yaj nij no', ne nanó nij no' cuentó ne uún, ne tiguíj nij no' se-cuento nij no' rihaan se-cuento nij yo'ó yuvii, ne a'mii nij no' náá guun rasuun ne nó xcúún nij no' ca'mii nij no' a. 14 Maan che'é dan me rá 'unj xcaj nij chana ta'aj yo' yo'ó chii, ne cuchruj nij no' ne'ej, ne cutumé nij no' ve' tucua' nij no', ne danj gaa, gaa ne se ca'vee ca'mii nij sí taj ri'yunj man ní' nana chi'ii che'é ní' adonj. 15 'O se vaa ta'aj nij chana cavi' nica, ne aj quiri'ij ta'aj nij no' tucuaán noco' ní', ne canoco' nij no' man sí cu'naj Satanás nanj adonj. 16 Tzaj ne sese vaa chana noco' man Diose, ne sese vaa tuvi' nij no' chana cavi' nica 'nij sca'núj nij no', ne racuj chana noco' man Diose man tuvi' no' chana cavi' nica á. Gaa ne se cachiin taj ya'anj cunudanij nij

sí noco' man Diose man chana cavi' nica yo' a. Maan se taj ya'anj nij so' man nij chana quináj uun inanj ei.

*Nana nihánj taj xna'anj daj qui'yaj ní' man nij sí uun chij nicaj yu'unj man nij yuvii noco' man Diose a*

17 Vij ya nuu che'e soj go' soj tu'vee nij sí uun chij nicaj yu'unj man nij sí noco' man Diose ei. Danj qui'yaj soj, ne caraa cochroj soj rihaan nij so' sese ya sij 'yaj suun uxrá a'mii natáj se-nana Diose me nij so' do', sese ya tucu'yón nij so' nana rihaan yuvii do' ei. 18 Danj Diose taj, ne: "Se numíj so' tacúún scúj gaa 'yaj suun scúj utun' scúj 'núú trigó cunuu sa' 'núú trigó ma'", taj yo' a. Ne taj uún yo': "Nacaj mozó sa'anj tu'vee so' sese 'yaj suun so' á". Danj taj danj Diose a. Ne che'é dan xcaj ní' cuentá se vaa no xcúún ní' naru'vee ní' rihaan nij sí 'yaj suun tucu'yón man ní' á. 19 Sese cuta' nii cacun' xraá 'o sí uun chij nicaj yu'unj man nij sí noco' man Diose, ne se cuchumán rá so' ma'. Tzaj ne sese vaa vij va'nuj sí quene'en se vaa tumé so' cacun', ne cunó so' nana ca'mii nij so' á. 20 Sese vaa 'o sí uun chij qui'yaj ndo'o cacun', ne ca'ne' so' cacun' che'é so' quene'en cunudanij yo'ó nij sí uun chij, gaa ne cuchu'vi' nij so' qui'yaj ma'an nij so' cacun' uún a.

21 Nihánj me suun ca'né' 'unj rihaan so' ni'yaj Diose do', ni'yaj Jesucristó do', ni'yaj nij se-mozó Diose narii Diose man do' a. Dan me se ca'ne' so' cacun' che'é yuvii, ne 'o cuyaan qui'yáá so' ga 'o 'o nij so' a. Taj se 'yaj sese sij sa' doj me yo'ó so' rihaan so' ma'. Maan se ca'ne' yá so' cacun' me ma'an cacun' tumé 'o 'o nij so' a. 22 Se gaa ra'yanj rá so' cuta' ra'á so' raá me ma'an 'o so' che'é yan guun so' sí cata' suun che'é Diose mei. 'O se sese sij tumé cacun' me so', ne taj che'é racuj so' man so' guun chij so' ma'. Danj inanj qui'yáá so', gaa ne se gaa nanj cutumé so' se-cacun' so' a. Dan me se yo'ó inanj se ca'vee catuu a yo'ó se chi'ii mei.

*Nana nihánj taj xna'anj se vaa co'o sítu'cu'naj Timoteo doj tzin' na vinó a*

<sup>23</sup> Che'é se ran' ndo'o so', ne ve'ee rqué so', ne se co'o so' inanj na uun ma'. Maan se co'o so' doj tzin' na vinó a.

*Nana nihánj taj xna'anj se vaa vaa güii, ne ya quene'en ní me yuvii tumé cacun' do', me yuvii qui'yaj suun sa' do' a*

<sup>24</sup> Vaa yuvii tumé cacun', ne nda' se ataa quirán' nij so' sayuun, tzaj ne aj ne'en cunudanj yuvii man rihaan chumii se vaa tumé nij so' cacun' ei. Tzaj ne ino vaa yo'ó ta'aj nij yuvii tumé cacun' uún ei. Nda' se ne ne'en nii se vaa cacun' qui'yaj nij so', tzaj ne vaa güii quirán' nij so' sayuun che'é cacun' tumé nij so', ne quene'en nii man nij so', ne xcaj ní cuentá se vaa ya tumé nij so' cacun' adonj. <sup>25</sup> Veé danj vaa uún nij suun sa' 'yaj suun yo'ó ta'aj nij yuvii, ne canó yuvii ni'yaj man nij suun sa' adonj. Tzaj ne sese vaa suun sa' ne ruvi' do', ne acaj yuvii cuentá do', ne taj se 'yaj mei. Maan se vaa güii, ne xcaj cunudanj yuvii man rihaan chumii cuentá se vaa sa' qui'yaj suun nij so' ei.

## 6

*Nana nihánj taj xna'anj se vaa ve'é qui'yaj suun mozó rihaan se-ru'vee mozó a*

<sup>1</sup> Ne nij mozó me se ve'é caraa cochroj nij mozó rihaan se-ru'vee nij so' a. 'O se yo' me qui'yaj nij so', gaa ne se gaa nanj ca'mii chi'ii yuvii che'é Diose do', che'é nana tucu'yón ní do' a. <sup>2</sup> Ne sese sítu' nocó' man Diose me ru'vee, ne se guun cataj mozó: "Tinúú 'unj me se-ru'vee 'unj, ne taj che'é qui'yaj suun nucuáá 'unj rihaan so' ma'". Se guun ca'mii mozó danj ma'. Maan se ve'é qui'yaj suun so' rihaan se-ru'vee so', ne gaa 'ee rá so' se-ru'vee so' á. 'O se ne'en mozó se vaa sij nocó' man Diose me se-ru'vee mozó, ne guun niha' rá mozó se vaa cavii sa' 'o tinúú so' che'é suun 'yaj suun so' adonj.

*Nana nihánj taj xna'anj se vaa ní sítu'cu'yón yo'ó tucuáán ro', nij 'yaj nij so', ne inanj me rá nij so' qui'yaj canaán nij so' sa'anj a*

Nana nihánj me chrej nucuaj nago' so' man nij yuvii a. <sup>3</sup> Ino vaa ta'aj nij sítu'cu'yón yo'ó tucuáán, ne ino vaa nana a'mii nij so' ga nana ya ca'mii Jesucristó sij 'nij ra'a man ní adonj. Nuvee se-tucuanj Diose me tucuáán tucu'yón nij so' ma'. <sup>4</sup> Sítu' sa' uxrá me nij so', rá nij so', tzaj ne sítu' tuchrii me nij so', ne ne ne'en uxrá nij so' a ma'. Niha' uxrá rá nij so' ca'mii cunu' nij so' che'é nana a'mii nij so', ne che'é dan uun xcoj ruvaa rá nij so' ni'yaj nij so' tuvi' so', ne unu' ndo'o nij so', ne a'mii nacoo nij so' che'é Diose, ne nij 'yaj nij so', uta' nij so' cacun' rmi' xráá tuvi' nij so' adonj. <sup>5</sup> Sítu' ni'yón me nij so', ne na'vee xcaj nij so' cuentá a ma'. Nana ya na'vee cunó nij so' mei. Maan se sese ve'é canoco' nij so' man Diose, ne qui'yaj canaán ndo'o nij so' sa'anj, rá nij so' adonj.

<sup>6</sup> Dan me se ya uxrá danj vaa, ne sij quirí' uxrá ya se sa' me ní, tzaj ne yo' gaa xej nimán ní canoco' ní Diose, gaa ne ca'vee guun ní sítu' ru'vee rej xta' ei. <sup>7</sup> Dan me se xcaj ní cuentá, ne gaa ca'ngaa ní rihaan chumii nihánj, ne taj se nicaj ní ca'na' ní ma'. Ne taj rasuun nicaj ní ca'anj ní asa' cavi' ní uún mei. <sup>8</sup> Che'é dan me sese vaa se chá ní do', sese vaa yatzi' taj xráá ní do', ne taj che'é guun rá ní nicaj ní do' rasuun ma'. <sup>9</sup> Tzaj ne xa' nij yuvii me rá guun ru'vee me se achiin que'ee rasuun man nij so', rá nij so', ne ne uun nucuaj nij so' canoco' nij so' man Diose a mei. Ne ndaa uun rá nij so' qui'yaj nij so' cacun' che'é rej qui'yaj canaán nij so' rasuun gaa rihaan nij so', ne dan me se ran' ndo'o nij so' sayuun, ne síj, gaa ne yuun che'e quirí' nij so' nanj ei. <sup>10</sup> Maan che'é se uun ndo'o rá yuvii ni'yaj yuvii sa'anj ro', che'é dan 'na' daj a sayuun ei. Man yuvii aran' rá sa'anj, ne che'é dan quirí'ij nij so' se-tucuanj Diose tucuáán canoco' nij so' asij rque doj, gaa ne quirán' ndo'o



nij so' sayuun, ne quinano ndo'o rá  
nij so' adonj.

*Nana nihánj taj xna'anj se vaa ve'é  
cuno ní' nu' se-nana Diose a*

<sup>11</sup> Tzaj ne so' sij noco' man Diose  
me se se guun rá so' qui'yaj canaán  
so' noco sa'anj ma'. Tananj gaa niha'  
rá so' qui'yáa so' se vaa me rá Diose  
qui'yáa so' á. Gaa nucuaj rá so' man  
Diose, ne cunu 'ee doj rá so' tuví'  
so', ne caraá x'naa so', ne se caxrj  
yuvaa so' man tuví' so' ma'. Ve'é inanj  
qui'yáa so' che'é nij so' á. <sup>12</sup> Qui'yaj  
suun uxrá so' suun sca' sa' ca'ne'  
Diose rihaan ní' sij noco' man so', gaa  
ne cayáan so' ga Diose nu' cavii nu'  
ca'anj a. Che'é dan cune' Diose man  
so' qui'yaj suun so', ne cataj yá so' se  
vaa ya qui'yaj suun so' che'é Diose  
gaa canocó' so' man so' ei. Dan me  
se danj ca'mii so' cuno que'ee tinúú  
ní', ne se ca'ne' rá so' ca'anj yanj so'  
rihaan chrej sa' rque Diose mei.

<sup>13</sup> Ne'én so' se vaa Diose me sí  
qui'yaj vaa i'na' ní', ne ne'én so' daj  
qui'yaj sí cu'naj Jesucristó gaa can-  
cun' so' rihaan sí nicaj suun sí cu'naj  
Poncio Pilato, se vaa nata' ya so'  
che'é suun cata so' a. Ne cuno Diose  
cuno Jesucristó cuno chrej narque  
'unj nihánj man so' á. <sup>14</sup> Dan me se  
cunó so' se-nana Diose, ne qui'yáa so'  
cunudanj yo' á. Se qui'yáa so' cacun'  
ma'. Danj qui'yáa so' ndaa güii ca'na'  
uún Jesucristó sij 'nij ra'a man ní'  
rihaan chumij nihánj á. <sup>15</sup> 'O se Diose  
me sí qui'yaj ca'na' so' güii cachron  
ma'an Diose, ne xa' Diose, tzaj ne sa'  
uxrá vaa so', ne orún' so' uun nucuaj  
guun chij rihaan chumij nihánj, ne  
uun chij so' rihaan cunudanj nij sí  
nicaj suun vaa rihaan chumij nihánj  
adonj. <sup>16</sup> Orún' so' me sí uun nu-  
cuaj qui'yaj gaa i'na' ní' nu' cavii  
nu' ca'anj, ne yanj so' rej aco' ya'an  
chuguun rej na'vee quinichrun' yuvij  
ei. A 'ó yuvij ne quene'en man so',  
ne daj chihaa m'j se ca'vee quene'en  
yuvij man so' ma'. Che'é dan caraá

cochroj ní' rihaan so', ne so' me sí nu-  
cuaj ndo'o nu' cavii nu' ca'anj adonj.  
Veé danj gaa ya ei.

*Nana nihánj taj xna'anj daj qui'yaj  
nij ru'vee a*

<sup>17</sup> Nago' so' chrej nucuaj man nij  
sí ru'vee yanj rihaan chumij nihánj  
cuno se vaa se guun cataj nij so' se  
vaa sij sa' uxrá me nij so' che'é se  
vaa sa'anj rihaan nij so' mei. Se gaa  
nucuaj rá nij so' man si'yaj nij so'  
mei. 'O se sese quiran' nij so' sayuun,  
ne se racuj si'yaj nij so' man nij so'  
ma'. Che'é dan yo'o gaa nucuaj rá  
nij ru'vee man Diose, ne Diose me sí  
rque cunudanj se sa' rihaan ní', che'é  
rej guun niha' rá ní' qui'yaj rasuun  
yo' a. <sup>18</sup> Maan se cataj xna'anj so'  
rihaan nij sí ru'vee se vaa suun sa'  
qui'yaj suun nij so', che'é rej guun  
ru'vee nij so' rihaan Diose, ne ve'é  
rque nij so' rasuun achiin man tinúú  
nij so' sí nique á. <sup>19</sup> Danj qui'yaj nij  
ru'vee che'é rej cataj Diose vaa güii se  
vaa ya cuno ru'vee yo' rihaan Diose,  
gaa ne cayáan ru'vee yo' ga Diose nu'  
cavii nu' ca'anj, ne doj a gaa i'na' nij  
sí cayáan ga Diose rihaan nij sí man  
rihaan chumij nihánj cuno adonj.

*Nana nihánj taj xna'anj se vaa se  
cuno ní' yo'ó nana ma'*

<sup>20</sup> Yo'o tumé so' se-suun Diose suun  
ca'ne' Diose rihaan so', tinuj. Se cuno  
so' yo'ó nana cuu tucu'yón nii, nana  
a'mii yuvij uun ma'. Nuveé se-nana  
Diose me yo' a ma'. 'O se avii ndo'o  
raa nij sí noco' yo'ó nana, rá nij so',  
tzaj ne ne ne'en uxrá nij so' a ma'.  
<sup>21</sup> Vaa yuvij noco' yo'ó nana yo', tzaj  
ne veé danj aj tanáj nij so' se-tucuanj  
Diose nanj adonj.

Me rá 'unj qui'yaj ndo'o Diose se luj  
che'é taran' soj adonj.

## Nihánj me síj vij yanj cartá qui'yaj síi cu'naj Pabló ca'neé so' rihaan síi cu'naj Timoteo a

<sup>1</sup> 'Unj nihánj me síi cu'naj Pabló, ne cune' Jesucristó mán 'unj guún 'unj apóstol nata' rihaan yuviij se vaa gaa i'na' ní' nu' cavii nu' ca'anj qui'yaj Jesucristó, ne yo' me suun me rá Diose qui'yaj sunj adonj.

<sup>2</sup> 'Yáa 'unj yanj nihánj ca'nej 'unj rihaan so' sij cu'naj Timoteo a. 'Ee rá 'unj mán so', tinuj. Ase vaa 'o ta'níi 'unj, danj vaa so' rihanj á. Me rá 'unj qui'yaj ndo'o Diose Rej ní' do', Jesucristó sij 'nij ra'a man ní' do', se luj che'é so', ne me rá 'unj gaa 'ee rá roj so' mán so', ne gaa xej nimán so', qui'yaj roj so' a.

*Nana nihánj taj xna'anj se vaa guun niha' doj rá ní' qui'yaj suun ní' rihaan Diose a*

<sup>3</sup> Dan me se 'unj nihánj me síi 'yaj suun rihaan Diose ndaa vaa qui'yaj nij xií 'unj gaa naá, ne nuvi' cacun' tumej mei. Ne dan me se tananj nagó' 'unj graciá rihaan Diose che'é so', ne yo'o nuú raj mán so', ne 'o achíin nì'yáj che'é so' rihaan Diose nuvíi nigan' ei. <sup>4</sup> Ne na'nuj rá 'unj se vaa ta'veé so' gaa tanáj 'unj mán so', ne che'é dan me ndo'o rá 'unj quene'en uún 'unj mán so', gaa ne cunuu cuij nimanj qui'yáa so', raj a. <sup>5</sup> Dan me se achíin nì'yáa 'unj che'é so' che'é se nuú rá 'unj se vaa ne tihá' yu'unj so' mei. Ya nocó' so' man Diose, ne dan me se tucuaán nicaj níi so' chana cu'naj Eunice ga Xcuá'áan so' chana cu'naj Loida ro', nicaj ma'án so' uún, raj a. <sup>6</sup> Che'é dan cataj xna'anj 'unj rihaan so' se vaa yuun che'e ca'nej so' nimán so' qui'yaj suun so', ndaa vaa rqué Diose se nucuaj mán so' qui'yaj suun so', gaa cutaj ra'aj raá so' á. <sup>7</sup> 'O se nuveé sij chu'vi' nimán me

ní', qui'yaj Diose ma'. Tananj nari' nucuaj nimán ní', ne nuu 'ee rá ní' tuvi' ní', ne tumé ní' man ní' me daj 'yaj ní', qui'yaj Diose adonj.

<sup>8</sup> Che'é dan se guun na'aj so' nata' so' rihaan yuviij che'é síi 'nij ra'a man ní' mei. Ne se guun na'aj so' che'é se 'nij 'unj taga' ma'. Se cuchu'ví' so' qui'rán' so' sayuun ma'. Raquíj so' manj ca'mii natáj ní' se-nana Diose nana sa', ne Diose me síi qui'yaj guun nucuaj ní' adonj. <sup>9</sup> Ne Diose me síi tinanii man ní' rihaan sayuun, ne canacúun so' man ní' canoco' ní' man so' ei. Nuveé che'e suun qui'yaj suun ma'an ní' me qui'yaj Diose danj ma'. Maan se danj guun rá ma'an so' qui'yaj so', ne guun rá so' qui'yaj uun so' se luj che'é ní' ei. Asij ataa qui'yaj so' chumij, ne qui'yaj so' se luj che'é ní' che'é se sij noco' man Jesucristó me ní' a. <sup>10</sup> Ne yaj me se tihaan Diose rihaan ní' nu' se sa' nuu nimán so', se vaa ca'na' Jesucristó síi tinanii man ní' rihaan sayuun, qui'yaj Diose a. Yaj me se se ca'vee caví' ní', qui'yaj Jesucristó yaj a mei. Tzaj ne yo'o gaa i'na' nimán ní' ga Diose nu' cavii nu' ca'anj, qui'yaj so', ne danj taj se-nana Jesucristó nana sa' adonj.

<sup>11</sup> Ne 'unj nihánj me síi cune' Diose se vaa guún 'unj apóstol nata' nana yo' rihaan yuviij, ne tucu'yonj nana yo' man yuviij adonj. <sup>12</sup> Maan che'é dan rán' 'unj sayuun nihánj cuano, tzaj ne ne na'aj 'unj a doj se vaa rán' 'unj mei. 'O se ne'én 'unj se vaa Diose me síi cuchumán raj ni'yaj 'unj man, ne guun ya raj se vaa uun nucuaj so' tumé so' manj qui'yaj sunj nu' suun ca'ne' so' rihanj, ne danj inanj qui'yaj so', raquíj so' manj ndaa güii ca'na' uún Jesucristó adonj.

<sup>13</sup> Dan me se aj cunó so' nij nana ya ca'mii 'unj rihaan so' á. Ne ase cunó so' ro', danj qui'yáa so', ne yo'o gaa nucuaj rá so' man Diose, ne gaa 'ee rá so' man tuví' so' che'é se sij noco' man Jesucristó mé so' á. <sup>14</sup> Ne Nimán Diose nuu nimán so' ro', raquíj mán so' se vaa yo'o qui'yaj suun so'

suun sa' suun ca'ne' Diose rihaan so' qui'yáá so' á. Ne ve'é nıcaj so' tucuáán sa' nari' so' á.

<sup>15</sup> Aj ne'én so' se vaa cunudanj nij síí cuchumán rá ni'yaj man Jesucristó yanj estadó Asia ro', tanáj nij so' manj, ne canoco' nij so' yo'ó tucuáán a. Vij tuvi' nij so' me síí cu'naj Figelo do', síí cu'naj Hermógenes do' a. <sup>16</sup> Me rá 'unj gaa 'ee rá Diose man nij tucua síí cu'naj Onesíforo a. 'O se aj guun que'ee ndo'o racuíj so' manj, ne ndaa nuu cuij nimán 'unj qui'yaj so', ne ne guun na'aj so' se vaa 'nij 'unj taga' ma'. <sup>17</sup> Tzaj ne gaa ca'na' so' chuman' Romá, ne cuaj nano' so' manj, ne nari' so' manj ei. <sup>18</sup> Me ndo'o raj gaa 'ee rá síí 'nij ra'a man ní' man so' se vaa se quiran' so' sayuun gaa güii ca'na' uún síí 'nij ra'a man ní' rihaan chumi nihánj a. Ne so' me síí ne'en doj rihanj se vaa qui'yaj suun ndo'o síí cu'naj Onesíforo che'é ní' sij noco' man Jesucristó gaa cane so' chuman' Efeso a.

## 2

*Nana nihánj taj xna'anj se vaa se cunánj ní' rihaan sayuun a*

<sup>1</sup> Ase vaa 'o ta'nıj, danj vaa so' rihanj, tinuj. Ne me rá 'unj ca'vej rá so' nari' nucuj nimán so', qui'yaj Jesucristó síí 'yaj ndo'o se luj che'é ní' a. <sup>2</sup> Dan me se man ndo'o síí cuno nana cataj xna'anj 'unj rihaan so', ne me rá 'unj tucu'yón so' nana yo' man doj nij snó'o luj nicaj tuvi' ga so' guun nij so' síí gaa nucuj nimán nata' rihaan yuvi guun nij so' uún a.

<sup>3</sup> Se chuchuvı' so' quirán' so' sayuun che'é se sij noco' man Jesucristó mé so' mei. Maan se ase vaa uno tanuu nana a'mii tanuu uun chij ro', danj gaa cuno ma'án so' se-nana Jesucristó á. <sup>4</sup> Dan me se vaa nij tanuu 'nij cuarteé, ne ne avii yanıj nij so' 'yaj suun nij so' ma'. Maan se ve'é 'yaj suun nij so' inanj suun a'ne' nii rihaan nij so', che'é se me rá nij so' guun niha' rá tanuu uun chij ni'yaj so' man nij so' a. Ne ase 'yaj guee tanuu, danj qui'yáá so', ve'é qui'yaj suun so' rihaan orún'

Jesucristó á. <sup>5</sup> Dan me se veé danj 'yaj nij síí tico canaán uún, ne no xcuún nij so' cuno sa' nij so' nu' suun a'ne' nii rihaan nij so' qui'yaj nij so' adonj. Tzaj ne sese se cuno sa' nij so' suun a'ne' nii rihaan nij so' qui'yaj nij so', ne daj chihaa mıj se qui'yaj canaán nij so' cachriin yáj cunuú raaj nij so' ma'. Che'é dan sese me rá so' qui'yaj canaán so' ni'yaj Jesucristó, ne ve'é cuno so' rihaan so' ei. <sup>6</sup> Ne veé danj vaa síí 'yaj suun ndo'o naaj uún, ne gaa rii nii naaj, ne so' me síí quirı' tan' asino yaan gaa cuxra' ta'aj nii tan' uún adonj. Ne ase vaa ran' síí 'yaj suun naaj ro', danj quiran' ma'án so', ne cavii sa' uxrá so' sese yo'o qui'yaj suun so' che'é Diose ei. <sup>7</sup> Cuno so' nana nihánj, ne racuíj Diose man so' nari' so' cunudanj yo'ó nij nana chuguanj.

<sup>8</sup> Se quini'yón so' man síí cu'naj Jesucristó a doj mei. Se quini'yón so' se vaa cunuu i'na' uún so' gaa cavii so', ne se quini'yón so' se vaa noco' xna'anj tuvi' so' ga síí cu'naj David síí cayáán gaa naá mei. Nihánj me nana sa' a'mii natáj 'unj á. <sup>9</sup> Che'é nana nihánj quirán' 'unj sayuun, ne ndaa 'nij 'unj taga', ne nda' rá se vaa ran' síí tumé cacun' chuguanj. 'O se taj se 'yaj mei. Xa' se-nana Diose, tzaj ne se ca'vee numıj nii man yo' do', se ca'vee caxrii nii taga' man nana yo' do' mei. <sup>10</sup> Che'é dan ne chuvı' 'unj quirán' 'unj me ma'an sayuun che'é nij síí narii Diose man ma'. 'O se danj gaa quirán' 'unj, gaa ne ca'vee cavii sa' nij so' ga 'unj che'é se vaa qui'yaj Jesucristó che'é ní', ne ve'é ndo'o gaa ní' ga Diose nu' cavii nu' ca'anj a. <sup>11</sup> Ya vaa nana nihánj ei. "Ne sese aj cavii ní' ga so', ne gaa i'na' ní' ga so' uún a. <sup>12</sup> Sese se cunánj ní' rihaan sayuun, ne guun chij ní' ga so' uún a. Sese cataj ní' se vaa nuveé sij noco' man so' me ní', ne cataj so' se vaa nuveé tuvi' so' me ní' uún a. <sup>13</sup> Nda' se ne sa' rá ní' ga so', tzaj ne so' me se sa' inanj so' ga ní' uún a. 'O se ne ne'en so' naqui'yaj ino so' nana ca'mii so' rihaan ní' a

man adonj". Nana ya cunō ní' me nu' nana nihánj ei.

*Nana nihánj taj xna'anj se vaa se cunō ní' nana a'mii rma'an yuvij ma'*

<sup>14</sup> Dan me se cataj xna'anj so' rihaan nij sí' noco' man Diose se vaa se quini'yón nij so' nana nihánj mei. Ne nago' so' chrej nucuj man nij so' se vaa se canó tuvi' nij so' che'é nana tucu'yón nij so' ma'. 'O se taj che'é qui'yaj nij so' danj man adonj. Maan se sí' quene'en che'é yan unu' nij so' ro', quirí' rá nij so' adonj. <sup>15</sup> Ca'nej nucuj nimán so', gaa ne ca'vee cataj Diose se vaa sí' ve'é qui'yaj suun rihaan so' mé so', ne se cunó rej na'aj rihaan so' che'é suun 'yaj suun so' mei. Tananj nata' nica so' se-nana Diose nana ya ei.

<sup>16</sup> Se nanó xrej so' nana a'mii rma'an ta'aj yuvij ma'. A'mii a'mii un nij so', tzaj ne che'é nana a'mii nij so' ro', me se doj a 'yaj nij so' se vaa na'vej rá Diose qui'yaj nij so' adonj. <sup>17</sup> Ase vaa ran' yuvij nó luj yuva ro', danj quiran' nij sí' cunō nana a'mii nij so', ne nij doj quiran' nij yuvij uno nana avii tu'va nij so' adonj. Vij tuvi' nij so' me sí' cu'naj Himeneo do', sí' cu'naj Fileto do' chuguanj. <sup>18</sup> Dan me se cataj roj so' se vaa aj quisij cunuu i'na' uún nij sí' cavi', ne se cunuu i'na' uún doj yuvij, taj roj so' a. Danj tu'va roj so', tzaj ne ne ne'en uxrá roj so' a doj a ma'. Tzaj ne vaa ta'aj yuvij cuchumán rá nana ca'mii roj so', ne che'é dan ca'ne' rá nij yuvij ga suun nucuj rá man Diose, qui'yaj roj so', <sup>19</sup> tzaj ne aj cuchruj sca' Diose tucuaán noco' ní', ne aj naj se-selló so', qui'yaj so' a. Ne nihánj me nana nō rihaan se-selló so' a: "Ne'en sí' 'nij ra'a man ní' man nij sí' noco' man so' a". Ne yo'ó nana nō rihaan se-selló so' taj: "Nu' nij sí' nata' se vaa sij noco' man sí' 'nij ra'a man ní' me nij so' ro', nō xcúún nij so' tanáj nij so' nu' chrej chi'ij á". Dan me roj nana noco' ní' adonj.

<sup>20</sup> Dan me se ve' tucua' o ru'vee me se mán xruj tu'vee ndo'o do', man

xruj aga' oró mí' do', man xruj aga' platá catzii do' a. Tananj uún, ne vaa xruj nij doj do' uún a. Vaa se rii nii man chruun do', vaa se rii nii man yo'óo niqúi do' a. Dan me se vaa se sa' doj, ne vaa uún se nij doj uún a. <sup>21</sup> Dan me se sese guun yanij so' ga nij yuvij tu'va rma'an yo', ne ase vaa xruj sa' doj ro', danj gaa ma'án so' rihaan nij so' a. Dan me se inanj suun sa' doj qui'yaj suun so' che'é Diose, ne guun nucuaá so' qui'yaj suun so' nu' suun sa' che'é Diose á.

<sup>22</sup> Tzaj ne se ca'vej rá so' qui'yáa so' ndaa vaa me rá nij sí' tachruu qui'yaj nij so' mei. Maan se guun rá so' qui'yáa so' se sa' ni'yaj Diose á. Gaa nucuj rá so' man so' á. Gaa 'ee rá so' tuví' so' á. Díj cayáan so' ga yo'óo nij sí' sa' nimán nij sí' achín ni'yaj rihaan sí' 'nij ra'a man ní' á. <sup>23</sup> Se ca'vej rá so' cano' tuví' so' ga yuvij che'é nana mei. Ne acaj nij sí' 'yaj danj cuentá ma'. Sij ataa narí' sa' me nij so' nanj adonj. Ne che'é se vaa 'yaj nij so', che'é dan unu' ndo'o nij so' ga tuvi' nij so' ei.

<sup>24</sup> Ne nó xcúún sí' 'yaj suun che'é sí' 'nij ra'a man ní' cunū' so' danj ma'. Maan se ve'é qui'yaj so' che'é cunudanj yuvij, ne ve'é tucu'yón so', <sup>25</sup> ne tijaan so' chrej sa' man nij sí' me rá cunū' ga so' uún a. 'O se xcaj so' cuentá se vaa ca'vee racuj Diose man nij so', ne quinano rá nij so' che'é cacun' tumé nij so', ne quinari' nij so' nana ya a. <sup>26</sup> Gaa ne ca'vee xcaj nij so' cuentá, gaa ne quinani' nij so' rihaan sí' chree a. Ne sí' chree me se so' me sí' tiha' yu'unj man nij yuvij, ne quita'aa so' man nij so', ne cuano nihánj me se 'yaj so' ndaa vaa me rá ma'an so' qui'yaj so' man nij so' adonj.

### 3

*Nana nihánj taj xna'anj daj qui'yaj nij sí' chi'ij asa' nichrun' ca'na' uún Jesucristó a*

<sup>1</sup> Ne'én so' se vaa asa' nichrun' ca'na' uún Jesucristó, ne guun ndo'o



sayuun a. <sup>2</sup> 'O se gaa 'ee uxrá rá nij yuvii man ma'an yuvii, ne guun ndo'o rá nij yuvii qui'yaj canaán nij so' sa'anj, ne cataj uxrá nij so' se vaa sij sa' ndo'o me ma'an nij so', ne nij ndo'o ca'mii nij so' che'é Diose uún a. Se cuno nij so' ca'mii rej nij so' do', nii nij so' do', uún ma'. Ca'mii nij so', ne se nago' nij so' gracia che'é rasuun, ne se guun rá nij so' canoco' nij so' man Diose mei. <sup>3</sup> Se gaa 'ee rá nij so' man tuvi' nij so', ne o ra'yunj tuvi' nij so', ne nano ndo'o nij so' cuentó ne che'é tuvi' nij so', ne se guun na'aj nij so' ni'yaj nij so' man nij so' mei. Ne se guun nucuaj nij so' ca'ne' rá nij so' ga suun chi'ii nicaj nij so' mei. Inanj quij gaa nij so' ei. Ne inanj quinachrj' nij so' ni'yaj nij so' rasuun sa' ei. <sup>4</sup> Ne inanj sí tiha' yu'unj tuvi' guun uún nij so' ei. Ne inanj ca'nej nimán nij so' qui'yaj nij so' chrej chi'ii ei. Ne yo'o ndaa raan rma'an cumán se nucuí' rá nimán nij so', ne inanj nano' nij so' rasuun me rá ma'an nij so' a. Se nano' nij so' a doj man Diose a ma'. <sup>5</sup> Ase vaa yuvii noco' Diose ro', danj gaa nij so', tzaj ne daj chihaa míj se ca'vej rá nij so' naquiyaj sa' Diose nimán nij so' ma'. Naxuun yanj so' mán so' rihaan nij sí vaa danj ei.

<sup>6</sup> Atúj nij so' rá ve' tucúa chana ne nicaj cuentá, ne tiha' yu'unj nij so' man nij chana atá daj a cacun' quij avii raá ma'an no' a. <sup>7</sup> Niganj tucuyón nij chana yo' nu' nana sa', tzaj ne daj chihaa míj ne guun nucuaj nij no' xcaj nij no' cuentá che'é nana ya yo' a mei. <sup>8</sup> Ne xa' nij sí chi'ii yo', tzaj ne nda' rá se vaa quiran' 'o sí chruun cu'naj Janes ga sí chruun cu'naj Jambres gaa quitáa ri'yunj roj so' man sí cu'naj Moisés gaa naá ro', danj quiran' guee nij sí taj ri'yunj man inanj nana sa' ei. 'O se sí man inanj nana chi'ii raá me nij so' do', sí aj tanáj xco man Diose do', me nij so' ei. <sup>9</sup> Tzaj ne se quisj nij so' xna'anj nana chi'ii yo' ndaa gan' ndo'o qui'yaj nij so' mei. 'O se cunudanj nij yuvii man rihaan chumii xcaj cuentá se

vaa sij nij snúu rma'an me nij so', ne se cuchumán rá nij yuvii a doj ca'mii nij so' mei. 'O se nda' rá se vaa quiran' roj sí cu'naj Janes ga sí cu'naj Jambres gaa ne cuchumán rá yuvii ca'mii roj so' ro', danj quiran' nij sí chi'ii yo' ei.

*Nana nihánj taj xna'anj se vaa nda' se quiran' ní sayuun, tzaj ne yo'o canoco' ní se-nana Diose a*

<sup>10</sup> Ne xa' ma'an so', tzaj ne xcaj ndo'o so' cuentá che'é nana tucuyón 'unj man yuvii do', che'é tucuaán noco' 'unj do', che'é se vaa guun raj qui'yaj rej rihaan ní do' a. Ne'én so' se vaa nucuaj ndo'o raj man Diose do', se vaa nanaj rá 'unj caxrii yuvaa 'unj man yuvii do', se vaa 'ee raj man tinúj do', se vaa yo'o nucuaj rá 'unj rihaan sayuun do' ei. <sup>11</sup> Ne aj ne'én so' daj vaa sayuun qui'yaj nii manj, ne aj ne'én so' nu' se vaa quirán' 'unj chuman' Antioquia do', chuman' Iconio do', chuman' Listra do', uún chuguanj. Tzaj ne sí 'nij ra'a man ní me sí tinanii manj rihaan nu' sayuun quirán' 'unj ei. <sup>12</sup> Dan me se cunudanj uún nij yuvii me rá canoco' man Diose yuvii amán rá ni'yaj man Jesucristó ro', quirán' sayuun uún che'é Jesucristó ei. <sup>13</sup> Tzaj ne xa' nij sí tiha' yu'unj, tzaj ne tananj a doj a doj a ca'anj nij so' tiha' yu'unj nij so' man nij yuvii do', tiha' yu'unj nij yuvii man nij ma'an nij so' do' ei.

<sup>14</sup> Ne ma'an so', tzaj ne yo'o canoco' so' nana cuchumán rá so' nana nari' so' á. 'O se aj ne'én so' me ní me roj chana tucuyón nana yo' mán so' ei. <sup>15</sup> Ne aj ne'én so' se vaa asij ne'ej mé so', ne quene'én so' daj taj nij yanj guee, ne yanj yo' me se qui'yaj ca'vee xcaj ní' cuentá, ne che'é dan cuchumán rá so' ni'yaj so' man Jesucristó, ne cavií sa' so' nu' cavií nu' ca'anj yaj adonj. <sup>16</sup> 'O se ma'an Diose qui'yaj cachrón nii nu' nana man rihaan yanj yo' adonj. Ne che'é dan vaa se guun ndo'o man nana yo' rihaan ní' adonj. 'O se vaa ndo'o rasuun nari' ní' uno ní' nana man rihaan

yanj yo', ne taj xna'anj yo' rihaan ní' che'é cacun' tumé ní', ne axríj yuvaa yo' man ní' che'é cacun' 'yaj ní', ne tucu'yón yo' man ní' daj qui'yaj ní' ve'é qui'yaj ní' canoco' ní' man Diose, ne taj xna'anj yo' rihaan ní' daj gaa sa' nimán ní' uún a. <sup>17</sup> 'O se ní' sij noco' man Diose me se danj gaa ya, gaa ne yo'o ca'vee cunuû nana sa' nimán ní', ne yo'o qui'yaj ní' daj a rasuun sa' ei.

#### 4

*Nana nihánj taj xna'anj se vaa se ca'ne' rá ní' ga suun a'mii natáj se-nana Diose rihaan yuvii ma'*

<sup>1</sup> Cuanõ nihánj me se me rá 'unj cunõ Diose cunõ Jesucristó síí ca'na' uún guun chij rihaan chumii nihánj síí ca'ne' cacun' che'é síí vaa i'na' do', che'é síí cavi' do', se vaa ca'ne' yá 'unj suun rihaan so' <sup>2</sup> ca'anj so' nata' so' nana sa' á. Taj se 'yaj sese vaa ya'núj rihaan so' do', se ne vaa ya'núj rihaan so' do', taj se 'yaj ma'. Maan se ca'mii natáj yá so' ei. Cataj xna'anj so' rihaan yuvii che'é cacun' tumé nij yuvii, ne cataj so' se vaa nij ndo'o 'yaj nij so', ne nago' so' chrej nucuaaj man nij so' qui'yaj nij so' inanj se sa' ei. Tzaj ne se gaa ra'yanj rá so' caxrii yuvaa so' man nij yuvii mei. Tananj yo'o gaa inaj nimán so', ne ve'é tucu'yón so' man nij so' ei. <sup>3</sup> 'O se vaa güii, ne se ca'vej rá nij yuvii cunõ nij yuvii nana 'yaj ca'vee cunuû sa' nimán nij so' man chuguanj. Maan se guun rá nij so' cunõ nij so' yo'ó nana naca, ne che'é dan nano' nij so' que'ee síí tucu'yón yo'ó nana me rá ma'an nij so' man nij so' a. <sup>4</sup> Ne ca'anj nij so' rej nuvi' nana ya cunõ nij so', ne nanj cuentó ne cunõ nij so' a. <sup>5</sup> Tzaj ne so' me se ca'nej sa' inanj so' tucuaán sa', ne gaa inaj nimán so' gaa rán' so' sayuun, ne yo'o nata' so' se-nana Diose rihaan nij síí ataa xcaj cuentá á. Dan me se qui'yaj suun so' nu' suun ca'ne' Diose rihaan so' á.

<sup>6</sup> Xa' 'unj, tzaj ne nichrun' cavi' 'unj che'é Diose, ne quinaj chumii nihánj nanj ei. <sup>7</sup> 'Unj me se quisij qui'yaj

suun uxrá yaj suun ca'ne' Diose rihaanj, ne yo'o canocó' 'unj se-tucuanj Jesucristó, <sup>8</sup> ne cuano nihánj me se maan se na'vij uún 'unj quisij güii ca'na' uún síí 'nij ra'a man ní' rihaan chumii nihánj, ne rque so' 'o cachriin yâj cunuû raá 'unj, ne cataj so' se vaa nuvi' cacun' taj xráj a. Dan me se cuese nica nimán ya me Jesucristó, ne nuveé che'e orún' 'unj me qui'yaj so' danj ma'. Ne veé danj qui'yaj so' che'é cunudanj nij yuvii me ndo'o rá ca'na' uún so' rihaan chumii nihánj nanj adonj.

*Nana nihánj taj xna'anj se vaa cuchí' Timoteo rihaan Pabló a*

<sup>9</sup> Ra'yanj ca'na' so' rej nuu 'unj nihánj ca'na' so' ni'yaj so' manj ei. <sup>10</sup> 'O se tanáj síí cu'naj Demas manj, che'é se caran' doj rá so' ni'yaj so' rasuun man rihaan chumii nihánj, ne ca'anj so' chuman' Tesalónica nanj ei. Síí cu'naj Crescente ca'anj estadó Galacia, ne síí cu'naj Titó ca'anj estadó Dalmacia ei. <sup>11</sup> Daj orún' síí cu'naj Lucas nicun' ga 'unj nihánj cuano nanj ei. Nicaaj so' man síí cu'naj Marcos ca'na' so' ei. 'O se vaa ndo'o suun qui'yaj suun 'unj, ne racuíj so' manj, raj a. <sup>12</sup> Ne síí cu'naj Tíquico me se ca'néj 'unj man so' ca'anj so' chuman' Efeso ei. <sup>13</sup> Tanáj 'unj se-rotõ 'unj tucua' síí cu'naj Carpo síí ne chuman' Troas, ne nicaaj so' man yo' ca'na' so' doj ei. Dan me se nicaaj so' nij daán 'unj do', nij yanj nuj xcuu do', ca'na' so', che'é se ra'yanj ndo'o achiin yo' manj nihánj ei.

*Nana nihánj taj xna'anj se vaa qui'yaj ndo'o síí cu'naj Alejandro sayuun man Pabló a*

<sup>14</sup> Dan me se xa' síí cu'naj Alejandro síí 'yaj suun aga', tzaj ne qui'yaj ndo'o so' sayuun manj, ne narque síí 'nij ra'a man ní' sayuun man so' che'é sayuun qui'yaj so' manj, raj a. <sup>15</sup> 'O se tadó so' ga so' se gaa nanj qui'yaj so' sayuun man so' á. 'O se na'vej uxrá rá so' cunõ yuvii se-nana ní' a ma'.

*Nana nihánj taj xna'anj se vaa racuj Jesucristó man Pabló gaa canicun' Pabló rihaan cuese a*

<sup>16</sup> Gaa ca'anj 'unj rihaan nij sí nicaj suun qui'yaj nii, ne nuvi' a 'ó tinúú ní' racuj manj a ma'. Maan se tanáj cunudanj nij so' man orún' 'unj rihaan nij sí nicaj suun, tzaj ne na'vej raj caraa Diose cacun' xraá nij so' a mei. <sup>17</sup> Q se canicun' sí 'nij ra'a man ní' ga 'unj, ne so' me sí qui'yaj guun nucuáá 'unj natá' 'unj nu' se-nana Diose cuno cunudanj nij yuvii yaníj, ne tinanii so' manj rihaan sayuun nocoo, <sup>18</sup> ne so' me sí tinanii manj rihaan daj a se nij me rá nii qui'yaj nii manj, ne so' me sí qui'yaj cavii sa' 'unj cayáán 'unj ga so' asa' nanij so' rej xta' ne guun chij so' rihaan chumii nihánj a. Ve'é inanaj ca'mii ní' che'é so' nu' cavii nu' ca'anj á. Veé danj gaa ya ei.

*Nana nihánj taj xna'anj se vaa ve'é cuman nij tui' Timoteo, rá nij tui' Pabló a*

<sup>19</sup> Me rá 'unj se vaa ve'é cuman chana cu'naj Prisca do', nica no' sí cu'naj Aquila do', nij tucua sí cu'naj Onesíforo do' ei. <sup>20</sup> Quináj sí cu'naj Erasto chuman' Corinto, ne sí cu'naj Trófimo me se ran' so' a. Che'é dan tanáj 'unj man so' chuman' Mileto nanj ei. <sup>21</sup> Ra'yanj ca'na' so' nihánj yaj gaa ataa ca'na' yavii acoj ndo'o a. Ve'é cayáán so', rá sí cu'naj Eubulo do', sí cu'naj Pudente do', sí cu'naj Lino do', chana cu'naj Claudia do', taran' nij tinúú ní' do' ei. <sup>22</sup> Me rá 'unj cayáán sí 'nij ra'a man ní' ga nimán so', ne qui'yaj ndo'o Diose se luj che'é nij soj a.

## Nihánj me 'o yanj cartá qui'yaj síí cu'naj Pabló ca'néé so' rihaan síí cu'naj Titó a

<sup>1</sup> 'Unj ro', me síí cu'naj Pabló, síí 'yaj suun che'é Diose, ne cune' Jesucristó mán 'unj guún 'unj apóstol ca'anj rihaan nij yuvij narii Diose man che'é rej narí' nij so' se-tucuanj Jesucristó, ne narí' nij so' se-nanā Diose nanā ya, ne ve'é uxrā canoco' nij so' man Diose, qui'yaj nanā ya yo' a. <sup>2</sup> Gaa ne guun ya rá nij yuvij se vaa cayáán nij yuvij gā Diose nu' cavii nu' ca'anj, ndāa vaa cata' tu'va Diose asij naá ndo'o, ne xā' Diose, tzaj ne ne a'mii ne Diose ma'. <sup>3</sup> Gaa ne gaa quisíj güii cachrón Diose, ne tihaan Diose rihaan ní' se vaa ca'vee cayáán ní' gā Diose nu' cavii nu' ca'anj a. Danj qui'yaj so' gaa ca'ne' so' suun rihanj se vaa ca'mii natáj 'unj se-nanā so', ne xā' so', tzaj ne so' me síí tinanii man ní' rihaan sayuun adonj.

<sup>4</sup> Dan me se qui'yáá 'unj yanj nihánj ca'nej 'unj rihaan so' sij cu'naj Titó a. Amán rá so' se-nanā Jesucristó nanā cataj xna'anj 'unj rihaan so', ne cyaan vaa nanā amán rá ní', ne che'é dan ase vaa 'o ta'níj ro', danj vaa so' rihanj, tinuj. Me rá 'unj qui'yaj Rej ní' Diose do', qui'yaj Jesucristó síí tinanii man ní' rihaan sayuun do', se luj che'é so', ne gaa xej nimán so', qui'yaj roj so' a.

*Nanā nihánj taj xna'anj se vaa cune' síí cu'naj Titó doj síí guun chij nica'j yu'unj man nij síí amán rá ni'yaj man Jesucristó yanj estadó cu'naj Creta a*

<sup>5</sup> Tanáj 'unj mán so' estadó Creta, che'é se vaa doj suun ataa tinavíí 'unj rej yo', ne me rá 'unj tinavíí so' suun yo' a. Dan me se me rá 'unj cune' so' doj síí guun chij nica'j yu'unj man nij síí amán rá ni'yaj man Jesucristó yanj 'o 'o chuman' yo' a. <sup>6</sup> Dan me se aj cataj xna'anj 'unj rihaan so' daj gaa

nij síí uun chij cune' so' á. Inanj síí nuvi' cacun' tumé do', síí nica'j raan nica do', síí amán rá ta'níí ni'yaj man Jesucristó do', cune' so' á. Tzaj ne sese sij 'yaj cacun' gā chana do', sij tucuáá rihaan rej do', me ta'níí yo'o so', ne se cune' so' man so' ma'. <sup>7</sup> Dan me se inanj síí nuvi' cacun' tumé guun síí uun chij, che'é se sij nica'j yu'unj man nij yuvij noco' man Diose me síí uun chij yo' adonj. 'O se se ca'mii xta' nij síí uun chij ma'. Se gaa ya'aan rá nij so' ma'. Se guun xno' nij so' ma'. Se go' nij so' tuvi' nij so' ma'. Se tiha' yu'unj nij so' tuvi' nij so' che'é yan ca'nee' nij so' sa'anj man tuvi' nij so' ma'. <sup>8</sup> Maan se ve'é qui'yaj nij so' ca'vej nij so' cotoj yuvij 'na' yo'ó chuman' tucuá' nij so', ne rque' nij so' chraa chá' nij yuvij á. Gaa niha' rá nij so' ni'yaj nij so' man yuvij 'yaj se sa', ne xca'j nij so' cuentá daj 'yaj ma'an' nij so' uún á. Inanj ve'é qui'yaj nij so' rihaan tuvi' nij so' do', rihaan Diose do' a. Se guun nij so' síí 'yaj canaán se chi'ii rihaan ma'. <sup>9</sup> Raan canoco' nij so' se-nanā Diose nanā tucu'yón nuj rihaan nij síí noco' man Diose a. Danj qui'yaj nij so', gaa ne guun nucuaj nij so' nago' nij so' se-tucuanj Diose tucuáán sa' man yo'ó nij yuvij, ne guun nucuaj nij so' tihaan nij so' rihaan nij síí tucu'yón yo'ó tucuáán ei.

*Nanā nihánj taj xna'anj se vaa caráán síí cu'naj Titó chrej rihaan nij síí cuchumán rá ni'yaj man Jesucristó se vaa se canoco' nij so' yo'ó tucuáán a*

<sup>10</sup> Dan me se man ndo'o síí tucuáá do', síí tu'va rma'an do', síí tiha' yu'unj do', estadó Creta, ne síí chi'ii doj rihaan yo'ó nij so' me nij síí taj se vaa no' xcúún nij snó'o noco' man Jesucristó cata' ta'nga' man nij so', taj nij síí chi'ii yo' a. <sup>11</sup> Vaa che'é ndo'o ca'ne' rá nij so' gā nanā vaa danj qui'yáá so' ei. 'O se ri' ndo'o rá que'ee' nij tucua' yuvij, 'yaj nij so' gaa tucu'yón nij so' nanā vaa danj nanā ne nó' xcúún nij so' tucu'yón nij so' nanj adonj. Ne inanj sa'anj quirí' uun



nij so', rá nij so', don 'yaj chi'ii nij so' adonj.

<sup>12</sup> Dan me se yo'o tuvi' ma'an nij so' síí nata' se-nana ya'anj noco' nij so' ro', cataj so' se vaa xa' nij síí man Creta, tzaj ne síí ne me nij so', ne xcuu chi'ii me nij so', ne inanj síí rmii me rá caraa rque uún me nij so', taj ma'an tuvi' nij so' ni'yaj so' man nij so' a. <sup>13</sup> Ne dan me se ya uxrá cataj so' che'é nij tuvi' so' ei. Che'é dan sca' inanj cataj xna'anj so' che'é se-cacun' nij so' rihaan nij so', gaa ne ca'vee canicaj nij so' canoco' nij so' se-tucuanj ní' sij amán rá ni'yaj man Jesucristó, ne gaa sa' nij so' ei.

<sup>14</sup> Dan me se danj qui'yáa so', gaa ne se gaa nanj xcaj nij so' cuentá che'é nij cuentó uun nanó nij yuvii israelitá ei. Ne se cuno nij so' se vaa taj nij yuvii na'vej rá canoco' man Diose man rihaan chumii nihánj rihaan nij so' ma'. Sese xcaj nij so' cuentá a'mii yuvii uún, ne tanáj nij so' tucuaán ya nanj adonj.

<sup>15</sup> Dan me se yuvii vaa sa' nimán, tzaj ne sa' vaa cunudanj rasuun rihaan nij so', ne xa' yuvii vaa chi'ii nimán, tzaj ne daj a rasuun ruvi' ni'yaj nij síí chi'ii síí na'vej rá cuchuman rá ni'yaj man Jesucristó ro', chi'ii vaa taran' rasuun rihaan nij so' nanj adonj. <sup>16</sup> Ne ne'en nij so' man Diose, taj ma'an nij so', tzaj ne ni'yaj ní' se vaa 'yaj nij so', ne xcaj ní' cuentá se vaa ne ne'en uxrá nij so' man Diose a ma'. Tananj síí chi'ii me nij so', ne síí ne uno me nij so', ne taj vaj a doj suun sa' ne ne'en nij so' qui'yaj suun nij so' man adonj.

## 2

*Nana nihánj taj xna'anj che'é tucuaán cuchruj síí cu'naj Titó che'é nij síí cuchumán rá ni'yaj man Jesucristó a*

<sup>1</sup> Ne ma'an so' me se tucuyón so' nu' nana sca' achiin man nij so' á. <sup>2</sup> Cataj xna'anj so' rihaan nij chii nga se vaa se guun xno' nij so' ma'. Gaa ni'yanj nij so' á. Xcaj nij so' cuentá daj qui'yaj nij so' á. Yo'o cuchuman rá nij so'

ni'yaj nij so' man Diose, ne gaa 'ee rá nij so' tuvi' nij so', ne daj chihaa míj se ca'ne' rá nij so' ga se-tucuanj Jesucristó che'é sayuun ma'. <sup>3</sup> Dan me se veé danj ve'é ndo'o qui'yaj nij chana' chij uún, gaa ne ca'vee xcaj yuvii cuentá se vaa chana' sa' noco' uxrá man Diose me nij no', guun rá nij yuvii a. Se quinano' nij chana' chij cuentó ne che'é tuvi' nij no' ma'. Se gaa niha' rá nij no' co'o ndo'o nij no' na vinó ma'. Tananj guun nij no' chana' ve'é tucuyón man tuvi', <sup>4</sup> gaa ne ca'vee nago' no' chrej sa' man nij chana' ta'aj se vaa gaa 'ee rá nij chana' ta'aj nica' no' do', ta'níí no' do' a. <sup>5</sup> Ne ve'é cutumé nij chana' ta'aj daj qui'yaj ma'an nij no' do', inanj nica' no' cotoj ga no' do', ve'é cutumé nij no' ve' tucua' nij no' do' á. Ne chana' sa' guun nij no', ne ve'é cuno' nij no' rihaan nica' nij no' á. Danj qui'yaj nij no', cataj chana' chij rihaan nij no', gaa ne se gaa nanj ca'mii yuvii ne amán rá ni'yaj man Jesucristó nana' nij che'é se-nana' Diose a.

<sup>6</sup> Ne nago' so' chrej nucuaj man nij síí tachruu uún se vaa xcaj nij so' cuentá daj gaa qui'yaj nij so' á. <sup>7</sup> Ne ma'an so' ro', ve'é qui'yaj suun so' nu' suun sa', ne quene'en nij tinúú ní' daj 'yáa so', gaa ne cuyaaj qui'yaj nij so' ga so' á. Inanj tucuaán sca' tucuyón so' á. Ne guún so' 'o' síí ni'yanj a'mii a. <sup>8</sup> Inanj nana' sa' ca'mii so' á. Gaa ne guun na'aj nij síí taj ri'yunj man ní' che'é se se ca'vee ca'mii nij so' nana' nij che'é ní' a.

<sup>9</sup> Ne cataj xna'anj so' rihaan nij mozó se vaa ve'é cuno' nij mozó rihaan se-ru'vee mozó, ne qui'yaj suun nij mozó nu' suun ca'ne' nij ru'vee rihaan nij so' á. Ne qui'yaj mozó guun niha' rá se-ru'vee mozó ni'yaj so' man mozó yo' á. Se ca'mii cunu' mozó ga se-ru'vee mozó ma'. <sup>10</sup> Se qui'yaj ituu mozó si'yaj se-ru'vee mozó ma'. Tananj ve'é qui'yaj mozó, ne xcaj se-ru'vee mozó cuentá se vaa ca'vee gaa nucuaj rá ru'vee man mozó se vaa me ma'an rasuun qui'yaj

mozó, gaa ne ve'é inanj ca'mii yuvii che'é tucuáán tucu'yón ní' tucuáán che'é Diose sí tinanii man ní' rihaan sayuun adonj.

<sup>11</sup> Dan me se aj xcaj ní' cuentá se vaa qui'yaj ndo'o Diose se luj che'é cunudanj yuvii, se vaa ca'vee quinanii cunudanj nij yuvii rihaan chrej chi'ii uun chij nimán nij yuvii, <sup>12</sup> ne che'é dan xcaj ní' cuentá se vaa no xcúún ní' ca'ne' rá ní' ga rasuun na'vej rá Diose qui'yaj ní' a. Ne se qui'yaj ní' inanj se vaa me rá nee man ní' qui'yaj yo' ma'. 'O se xcaj ní' cuentá daj qui'yaj ní', ne tucuáán nica qui'yaj ní', ne qui'yaj ní' inanj se vaa me rá Diose qui'yaj ní' gaa yaj ne ní' rihaan chumii nihánj cuano á. <sup>13</sup> Ne na'vij ndo'o ní' ca'na' uún Jesucristó sí tinanii man ní' rihaan sayuun, ne dan me se guun niha' uxrá rá ní' che'é se guun ya rá ní' se vaa ca'na' uún so' a. Ne xa' so', tzaj ne quene'en ní' se vaa ve'é uxrá vaa so', ne Diose uun chij ndo'o me ya so' adonj. <sup>14</sup> Ne so' me sí ca'neé nimán cavi' che'é ní', che'é rej ca'vee ca'ne' rá ní' ga me ma'an tucuáán chi'ii canoco' ní' gaa rque, ne ca'vee cunuu sa' ní', ne guun ní' yuvii noco' man orún' so', ne guun niha' ndo'o rá ní' qui'yaj suun ní' suun sa' adonj. <sup>15</sup> Nana nihánj me chrej sa' ya nago' so' rihaan nij tinúú ní', ne sca' ndo'o ca'mii so', ca'ne' so' suun rihaan nij so', gaa ne ca'ne' rá nij so' ga se chi'ii á. Ne danj qui'yáá so' do', danj ca'mii so' do', gaa ne daj chihaa' mój se guun cataj yuvii se vaa taj yu'vee nó so' do', nana a'mii so' do' a.

### 3

*Nana nihánj taj xna'anj se vaa ve'é qui'yaj ní' rihaan yuvii che'é se tinanii Diose man ní' rihaan sayuun a*

<sup>1</sup> Cataj uún so' rihaan nij yuvii se vaa caraa cochroj nij yuvii rihaan nij sí nica' suun, ne cunó nij yuvii rihaan nij so' á. Ca'vej nij yuvii qui'yaj suun nij yuvii suun a'ne' nij sí nica' suun rihaan nij so', ne me ma'an suun sa' qui'yaj suun nij so' á. <sup>2</sup> Se

ca'mii chi'ii nij so' ni'yaj nij so' tuvi' nij so' ma'. Se cunu' nij so' ga tuvi' nij so' ma'. Maan se ve'é inanj qui'yaj nij so', ne nica' ndo'o ca'mii nij so' rihaan cunudanj yuvii a.

<sup>3</sup> Dan me se asij rque, ne sí ni'yon rma'an me ma'an ní', ne ne cunó ní' rihaan tuvi' ní', ne canoco' ní' tucuáán tiha' yu'unj, ne qui'yaj ní' náá guun se vaa guun rá ní' qui'yaj ní' a. Dan me se quij me rá ní' ni'yaj ní' tuvi' ní', ne guun xcoj ruvaa rá ní' ni'yaj ní' tuvi' ní', ne quitáá ri'yunj tuvi' ní' ni'yaj nij so' man ní', ne nachri' ní' man tuvi' ní' a.

<sup>4</sup> Tzaj ne gaa xcaj ní' cuentá che'é Diose sí tinanii man ní' rihaan sayuun, se vaa so' me sí me rá racuj man ní', gaa ne dan me se quene'en ní' se vaa cunuu 'ee rá so' man ní' a. <sup>5</sup> Dan me se tinanii Diose man ní' rihaan chrej chi'ii uun chij nimán ní' ei. Nuveé che'e se sa' qui'yaj ma'an ní' me tinanii Diose man ní' rihaan sayuun ma'. Maan se cunuu 'ee rá ma'an Diose quene'en so' man ní', ne rque Diose Nimán Diose rihaan ní', don cunuu naca' nimán ní' ne cunuu sa' nimán ní' adonj. <sup>6</sup> Dan me se maan che'é Jesucristó sí tinanii man ní' rihaan sayuun me qui'yaj ndo'o Diose se luj rihaan ní', ne ndaa ayuu rma'an se luj, qui'yaj so' ei. <sup>7</sup> Se luj qui'yaj so' me se tinavij so' cacun' xráá ní', ne cunuu sa' ní', qui'yaj so', ne maan che'é dan ca'anj ní' cayáán ní' ga so' nu' cavii nu' ca'anj ndaa vaa me rá ya ní' ei. <sup>8</sup> Ya uxrá vaa nu' nana nihánj adonj.

*Nana nihánj taj xna'anj che'é nij yuvii 'yaj unu' nij sí cuchumán rá ni'yaj man Diose a*

Ne me rá 'unj sca' ca'mii so' nu' nana nihánj rihaan nij yuvii amán rá ni'yaj man Diose, che'é rej xcaj nij so' cuentá se vaa no xcúún nij so' qui'yaj suun nij so' suun sa' inanj á. Sese danj qui'yaj nij so', ne s'ij vaa sa' me nij so', ne cavii sa' doj yuvii, qui'yaj nij so' adonj. <sup>9</sup> Tzaj ne se canó tuví so' ga yuvii mei. Sí ni'yon me sí 'yaj danj chuguanj. Se nanó rá so' che'é xií so'

gaa naá daj sij me nij so' ma'. Se canó tuví' so' che'é se-tucuñanj Moisés mei. 'O se qui'yaj rma'an ðanj ñanj ei. Taj cuentá ní' 'yá' ðanj ma'. <sup>10</sup> Sese vaa 'o síi 'yaj unu' ndo'o yuvii, ne cataj xna'anj so' rihaan so' se vaa ca'ne' rá so' ga suun 'yaj unu' yuvii a. Ndaa vij ca'mii so' rihaan so', ne sese se ca'vej rá so' cunō so', ne ca'anj yaníj so' rihaan so' ei. <sup>11</sup> 'O se xa' síi 'yaj unu' yuvii, tzaj ne aj tanáj so' tucuaán ya, ne tumé so' cacun' ei. Ne maan che'é cacun' ata so' 'yaj tananj yuun che'e ri' so' ñanj ei.

*Nana nihánj taj xna'anj che'é suun a'ne' síi cu'naj Pabló rihaan síi cu'naj Titó a*

<sup>12</sup> Ca'nej 'unj man síi cu'naj Artemas cuchí' so' rihaan so', ne sese se ca'vee cuchí' so', ne ca'nej 'unj man síi cu'naj Tíquico a. Asa' cuchí' so' rihaan so', ne ra'yanj cuchí' so' chuman' Nicópolis, gaa ne nari' tuvi' ní' ei. 'O se guun rá 'unj cayáán 'unj chuman' yo' yavii acoj ndo'o adonj. <sup>13</sup> Raquíj so' man síi cu'naj Zenas licenciado síi a'mii che'é yuvii rihaan cuese do', man síi cu'naj Apolos do', qui'yaj chuvii roj so' ca'anj roj so' ei. Taj se cachíin man roj so', qui'yáá so' ma'. 'O se me ma'an rasuun achiin man roj so', ne go' so' ei.

<sup>14</sup> Ne me rá 'unj nari' yo'ó nij tinúú ní' qui'yaj suun ndo'o nij so' suun sa' che'é tuvi' nij so' síi achiin ya rasuun man uún chuguanj. Se taj, ne taj se gún' man nij so' ma'.

*Nana nihánj taj xna'anj se vaa ve'é cumañ nij tuvi' Titó, rá nij tuvi' síi cu'naj Pabló a*

<sup>15</sup> Me rá cunudanj nij yuvii yanj ga 'unj cuano se vaa ve'é cayáán so' ei. Ne cataj so' rihaan nij síi 'ee rá man ní' nij síi noco' man Diose se vaa ve'é cumañ cunudanj nij so' ei. Me rá 'unj qui'yaj ndo'o Diose se luj che'é cunudanj nij soj ndaa cayuu rma'an se luj qui'yaj Diose ei.

## Nihánj me 'o yanj cartá qui'yaj síí cu'naj Pabló ca'néé so' rihaan síí cu'naj Filemoó a

<sup>1</sup> 'Unj ro', me síí cu'naj Pabló síí 'nij taga' cuano che'é se nocó' 'unj man Jesucristó, ne nicun' tinúú ní' Timoteo ga 'unj cuano, ne dan me se 'yáá 'unj yanj nihánj ca'nej 'unj rihaan so' síí cu'naj Filemoó a. 'Ee rá 'unj mán so', ne tuvi' ní' síí 'yaj suun ga 'unj mé so', <sup>2</sup> ne veé danj vaa uún nu' nij síí nocó' man Diose nuu chre' tucua so' do', ra'vij ní' chana cu'naj Apia do', síí cu'naj Arquipo síí yo'o rquee che'é suun 'yaj suun ní' do', nu' rihaan nij so' 'yáá 'unj yanj nihánj ca'nej 'unj rihaan nij soj ei.

<sup>3</sup> Me rá 'unj qui'yaj Rej ní' Diose qui'yaj Jesucristó síí 'nij ra'a man ní' qui'yaj ndo'o se luj che'é nij soj, ne gaa xej nimán nij soj, qui'yaj roj so', raj ei.

*Nana nihánj taj xna'anj se vaa nago' Pabló gracia rihaan Diose che'é síí cu'naj Filemoó che'é se canoco' sa' síí cu'naj Filemoó man Diose a*

<sup>4</sup> Daj a güii gaa tananj nanj achín ni'yáá 'unj rihaan Diose, achín ni'yáá 'unj che'é so', ne nagó' 'unj gracia rihaan Diose che'é so' ei. <sup>5</sup> Danj 'yáá 'unj, che'é se ca'na' nana rihanj se vaa amán ndo'o rá so' ni'yaj so' man Jesucristó síí 'nij ra'a man ní', ne 'ee ndo'o rá so' man cunudanj nij síí sa' nocó' man so' vaa cunó' 'unj ei. <sup>6</sup> Dan me se che'é se aj canocó' so' se-tucuanj Jesucristó ga yo'ó nij tinúú ní', ne che'é dan achín ni'yáá 'unj se vaa ca'vee xcaj yo'ó nij so' cuentá che'é nu' se sa' nicaj nij tinuj nij soj qui'yáá so', gaa ne ca'vee cavii sa' doj Jesucristó qui'yaj taran' nij soj a. <sup>7</sup> 'O se guun niha' uxrá rá 'unj, ne nari' nucaj nimán 'unj, che'é se 'ee rá so'

man tinúú so' ne nuu cuij rá nij síí sa' nocó' man Diose 'yáá so', tinuj.

*Nana nihánj taj xna'anj se vaa me rá Pabló ve'é nacaj uún síí cu'naj Filemoó man síí cu'naj Onésimo a*

<sup>8</sup> Nda' se uun chij ndo'o 'unj ne ca'vee ca'ne' 'unj suun rihaan so' qui'yáá so' ndaa vaa suun qui'yáá so', tzaj ne taj ma'. <sup>9</sup> Maan se ve'é rquee 'unj mán so' qui'yáá so' ndaa vaa no xcuún so' qui'yáá so' ei. 'Unj síí cu'naj Pabló nihánj me se aj chii nga mej ne 'nij 'unj taga' cuano che'é se nocó' 'unj man Jesucristó ei. 'O se ne'én 'unj se vaa 'o 'ee rá so' tinúú so', ne che'é dan cachinj ni'yáá 'unj doj rihaan so' <sup>10</sup> che'é síí cu'naj Onésimo a. Dan me se ase vaa 'o ta'nij ro', danj vaa so' rihanj cuano, che'é se gaa 'nij 'unj taga', ne cataj xna'anj 'unj rihaan so' che'é Jesucristó, ne guun che'e so' canoco' so' man Jesucristó nanj adonj. <sup>11</sup> Dan me se asij rque doj me se taj se gún' a doj man so' rihaan so' ma'. Tzaj ne cuano nihánj me se cunuu sa' so', ne vaa se guun so' rihaan ní' cuano ei.

<sup>12</sup> Dan me se aj ca'néé 'unj man so' cuchí' uún so' rihaan so', ne ne'én so' se vaa 'ee uxrá raj man so' adonj. <sup>13</sup> Ne guun rá 'unj nayon so' rihaan so' quinaj so' nihánj rej 'nij 'unj taga' nihánj che'é se-nana Jesucristó nana sa', ne qui'yaj suun so' rihaan 'unj nihánj che'é so', raj ei. <sup>14</sup> Tzaj ne ne ca'vej rá 'unj quinaj so' rej nihánj, che'é se ndaa tu'va ma'an yá so' cavii, gaa ne quinaj so', raj ei. 'O se ne guun raj qui'yaj fuerzá mán so' qui'yáá so' se ndo'o che'ej ma'. Maan se inanj se rii nimán ma'an so' qui'yáá so' se ndo'o yo' che'ej, raj ei. <sup>15</sup> Dan me se maan che'é rej ca'vee cayáán so' ga so' nu' cavii nu' ca'anj ro', che'é dan ca'anj yanij so' doj rihaan so' doj güii ei. <sup>16</sup> Tzaj ne yaj me se se guun so' mozó uun rihaan so' nu' cavii nu' ca'anj yaj a ma'. Tananj a sa' doj gaa so' rihaan yo'ó nij mozó rihaan so', ne 'o tinúú ní' síí 'ee rá ní' man guun so' ei. 'O se 'ee uxrá raj man so', ne táá a so', ne doj a gaa 'ee rá ma'an so'



man so' a ei. 'O se sij 'yaj suun rihaan so' me so' rihaan chumiñ nihánj, ne sij noco' man síi 'nij ra'a man ní' me uún so', ne doj a gaa ya rá so' man so' ei.

<sup>17</sup> Dan me se sese tinuj ya ní', ne ve'é na'miñ sa' so' ga so', ne daj se uun rá so' ne'én so' manj ro', danj guun rá so' quene'én so' man so' ei. <sup>18</sup> Ne sese qui'yaj chi'ii so' man so' do', sese vaa xcúún qui'yaj so' rihaan so' do', ne ma'án 'unj naru'vee rihaan so' se vaa qui'yaj xcúún so' ei. <sup>19</sup> Ma'anj ra'aj sij cu'naj Pabló cachronj nanañ nihánj se vaa naru'vee 'unj cunudanj se vaa qui'yaj xcúún so' rihaan so' ei. Veé danj vaa xcúún rihaan so' do', tzaj ne taj che'é cataj xna'anj 'unj rihaan so' se vaa vaa xcúún rihaan ma'án so' se vaa quinaniñ so' rihaan sayuun nu' cavii nu' ca'anj, qui'yaj ma'anj gaa natá' 'unj se-nanañ Jesucristó rihaan so' ma'. <sup>20</sup> Dan me se me inanj rá 'unj qui'yáa so' se ndo'o che'ej, che'é se sij noco' man síi 'nij ra'a man ní' me ní', tinuj. 'O se ndaa cunuu cuij rá 'unj, qui'yáa so' che'é Jesucristó ei.

<sup>21</sup> Dan me se gaa cachrón 'unj nanañ nihánj, ne nucuañ rá 'unj man so' se vaa qui'yáa so' nu' nihánj, ne ndaa doj a qui'yáa so' rihaan se vaa cataj xna'anj 'unj rihaan so' chuguanj. <sup>22</sup> Ne me rá 'unj naqui'yaj chuvii so' ve' cané 'unj doj ga so' á. 'O se guun ya raj se vaa che'é se cachíin ni'yaj soj rihaan Diose che'ej ro', che'é dan racuíj Diose manj cuchij rihaan soj, raj adonj.

*Nanañ nihánj taj xna'anj se vaa me rá nij tuvi' Pabló se vaa ve'é cayáan síi cu'naj Filemoó a*

<sup>23</sup> Me rá síi cu'naj Epafra se vaa ve'é cayáan so' á. 'Nij so' taga' ga 'unj, che'é se sij noco' man Jesucristó me so' a. <sup>24</sup> Ne síi cu'naj Marcos do', síi cu'naj Aristarco do', síi cu'naj Demas do', síi cu'naj Lucas do', me rá uún se vaa ve'é cayáan so' a. Taran' nij so' me síi 'yaj suun ga 'unj adonj.

<sup>25</sup> Me rá 'unj qui'yaj ndo'o Jesucristó sij 'nij ra'a man ní' se luj che'é nimán nij soj adonj.

## Nihánj me 'o yanj cartá qui'yaj yo'o so' ca'néé so' rihaan nij yuvij israelitá noco' man Diose a

*Nana nihánj taj xna'anj se vaa sa'  
uxrá vaa ta'ní Diose sí cu'naj Jesu-  
cristó a*

<sup>1</sup> Nata' uxrá Diose se-nana Diose rihaan nij sí nata' se-nana Diose gaa naá, ne nata' nij so' nana yo' rihaan xii ní' nij sí cumán gaa naá a. Dan me se do' do' cataj xna'anj Diose se-nana so' rihaan nij sí nata' yo', ne ino vaa qui'yaj Diose ga 'o 'o nij so', gaa cataj xna'anj Diose se-nana Diose rihaan 'o 'o nij so' a. <sup>2</sup> Tzaj ne yaj gaa nichrun' ca'anj ni'ya chumij nihánj me se cataj xna'anj ma'an ya ta'ní Diose se-nana Diose rihaan ní', qui'yaj Diose, ne ta'ní Diose me se so' me sí cune' Diose man se vaa guun chij so' rihaan cunudanj rasuun vaa güii, ne so' me sí qui'yaj cunudanj chumij, qui'yaj Diose ei. <sup>3</sup> Ne ase vaa ma'an Diose ro', danj vaa so' chuguanj. Dan me se ni'yaj ní' man so', ne xcaj ní' cuentá se vaa ve'é ndo'o vaa Diose, ne xcaj ya ní' cuentá daj vaa ma'an Diose ei. Ne che'é se sij nucuaj ndo'o me so' ro', che'é dan maan nana avii uun tu'va so', ne 'o mán chre' nu' rasuun, ne se quirí' a 'o rasuun qui'yaj so' ma'. Che'é dan tinavij so' cacun' tumé ní', gaa ne ca'anj cayáán so' rej xta' ndo'o rej x'nuj Diose, ne rej nuva' Diose yáán so' cuano ei. <sup>4</sup> Dan me se guun so' sí sa' doj rihaan nij se-mozó Diose, ne noco uxrá doj vaa suun ata so' rihaan suun ata taran' nij se-mozó Diose nanj chuguanj. <sup>5</sup> 'O se aj ne'en soj nana nihánj nana ca'mii Diose che'é ta'ní so' a:

—Ta'níj mé so' á. Cuano nihánj me se quene'en yuvij se vaa ta'níj mé so', qui'yáj a. —Danj ca'mii Diose che'é ta'ní Diose, tzaj ne nuveé rihaan

se-mozó Diose ca'mii Diose nana vaa danj ma'.

Ne nihánj me nana ca'mii Diose che'é ta'ní Diose, cataj Diose:

—Guún 'unj rej so', ne guun so' ta'níj a —cataj uún Diose che'é ta'ní Diose a. Tzaj ne ne ca'mii so' nana vaa danj che'é se-mozó so' ma'. Maan che'é ta'ní so' ca'mii so' nana yo' adonj.

<sup>6</sup> Dan me se so' me sí guun sí chava' rihaan taran' ní' sij noco' man Diose a. Ne danj Diose taj se vaa asa' ca'na' uún so' rej cumán taran' nij yuvij gaa i'na' rihaan chumij nihánj qui'yaj Diose, ne quina'vij taran' nij se-mozó Diose rihaan so', taj danj Diose a.

<sup>7</sup> Ne a'mii uún danj Diose che'é nij se-mozó Diose, taj yo' se vaa nana uun do', nda' rá se vaa daa ya'an do', vaa se-mozó Diose, qui'yaj Diose a.

<sup>8</sup> Tzaj ne vaa doj nana nó rihaan danj Diose nana a'mii rihaan ma'an ta'ní Diose, ne nana yo' taj: “Diose mé so', ne quiríj ta'ngá so' nu' cavii nu' ca'anj, ne nica gaa rá so' nicaj yu'unj so' man yuvij nu' cavii nu' ca'anj a. <sup>9</sup> Niha' inanj rá so' canocó so' chrej sa', tzaj ne nachri' uxrá so' chrej chí'ii ei. Che'é dan Diose sí uun chij rihaan so' ro', cune' so' mán so', se vaa cavii sa' so' doj rihaan nij tuví so' a”, taj danj Diose a.

<sup>10</sup> Ne taj uún danj Diose: “Asij guun che'e chumij nihánj, ne so' me sí cune' man chumij nihánj, Señor. Ne ma'án so' ra'a yá so' qui'yáá so' nu' se man rej xta' adonj. <sup>11</sup> Ne vaa güii, ne quinavij nu' nihánj, tzaj ne daj chihaa míj se quinaví so' ma'. Dan me se ase vaa yatzíj nga ro', danj gaa nu' chumij nihánj do', nu' rej xta' do' ei. <sup>12</sup> Ne ase vaa yatzíj ro', danj gaa narumii so' man roj yo', ne guun ino roj yo', qui'yáá so' ei. Tzaj ne se cunuu ino ma'án so' ma'. 'O veé danj gaa so', ne daj chihaa míj se cavi' so' man chuguanj”, taj uún danj Diose che'é ma'an ta'ní Diose a.

<sup>13</sup> Ne ca'mii uún Diose rihaan ta'ní Diose, cataj so':

—Cayáán so' rej x'núú 'unj rej nuva' 'unj, ne qui'yaj canaán 'unj rihaan nij sí taj ri'yunj mán so', ne quirii ta'ngá' so' rihaan nij so' a —cataj Diose rihaan ta'ní Diose a. Tzaj ne a 'ó rihaan se-mozó so' ne ca'mii so' danj ma'.

<sup>14</sup> Dan me se xa' nij se-mozó Diose, tzaj ne nana un me nij so' a. 'Yaj suun nij so' rihaan Diose, ne ca'née Diose man nij so' qui'yaj suun nij so' rihaan ní sij cavii sa' ga Diose nu' cavii nu' ca'anj ei. Ne sa' doj vaa ta'ní Diose rihaan nij se-mozó Diose nanj chuguanj.

## 2

*Nana nihánj taj xna'anj se vaa no xcúún uxrá ní' cunó ní' se-nana Jesucristó a*

<sup>1</sup> Che'é dan doj a nó xcúún ní' cunó sa' ní' nana aj nari' ní' ei. Sese se qui'yaj ní' danj, ne do' do' tanáj ní' chrej sa' yo', ne quinij ní' xrej Diose, ne ca'anj ni'ya ní' gaa nanj chuguanj. <sup>2</sup> 'O se ya uxrá vaa se-nana Diose nana cataj xna'anj nij se-mozó Diose rihaan sí cu'naj Moisés gaa naá ei. Tzaj ne nij yuvii me se ne cunó nij so' nana yo' ma'. Tzaj ne nica ya qui'yaj Diose sayuun man 'o 'o nij yuvii ne cunó nana yo' chuguanj. <sup>3</sup> Che'é dan, asa' ca'vee quinanii ma'an ní' rihaan sayuun, sese se xcaj sa' ní' cuentá che'é chrej sa' chrej qui'yaj naca Diose quinanii ní' rihaan sayuun, rá soj ga. Dan me se asino ma'an sí 'nij ra'a man ní' me sí cuchruj chrej sa' yo', gaa ne nij sí cunó nana ca'mii so' ro', cataj xna'anj nij so' se-nana so' nana sa' yo' rihaan ní', ne nari' sa' ní' nana yo', qui'yaj nij so' ei. <sup>4</sup> Ne qui'yaj ndo'o ma'an Diose suun sa' nocó ni'yaj yuvii, ne rque ndo'o so' Nimán so' cunuú nimán yuvii adonj. Danj inanj guun rá Diose qui'yaj Diose, che'é se guun rá so' cunó ní' se-nana sí 'nij ra'a man ní' yo' ei.

*Nana nihánj taj xna'anj che'é nu' se vaa quiran' Jesucristó che'é ní' a*

<sup>5</sup> Dan me se cataj xna'anj 'unj rihaan soj che'é güii guun chij Diose rihaan chumii nihánj a. Ne ne cuné' Diose man nij se-mozó Diose se vaa quirii ta'nga' nij so' rihaan chumii nihánj ma'. <sup>6</sup> Maan se vaa nana no rihaan danj Diose nana ca'mii yo'o so' rihaan Diose, ne cataj so' se vaa: “Taj yu'vee nó a doj yuvii ma'. Me che'é nuú uxrá rá so' man yuvii ga. Taj yu'vee nó a 'ó ta'ní yuvii ma'. Me che'é nuu 'ee rá so' man nij so' ga. <sup>7</sup> Tzaj ne sij nocó' doj tzin' me nij yuvii rihaan nij se-mozó so', qui'yáa so' chuguanj. Gaa ne ve'é uxrá cavii sa' nij yuvii, ne ve'é uxrá ca'mii nii che'é nij yuvii, qui'yáa so' asanj. <sup>8</sup> Ne quirii ta'nga' nij yuvii rihaan cunudanj rasuun, qui'yáa so' uún asanj”, taj nana no rihaan danj Diose yo' a. Ne dan me se ya quirii ta'nga' nij yuvii rihaan cunudanj rasuun adonj. Tzaj ne ne'en ní' se vaa yaj me se ataa quirii ta'nga' nij yuvii rihaan cunudanj rasuun a. <sup>9</sup> Tzaj ne ni'yaj ní' man Jesucristó, ne nda' se ya ya sij nocó' doj guun so' rihaan nij se-mozó Diose rque doj yo', tzaj ne yaj me se aj guun chij ndo'o so', ne ve'é ndo'o a'mii nii che'é so', qui'yaj Diose a. Ne danj cavii sa' so', che'é se cavi' so' a. 'O se sese ne cavi' so', ne ne ca'vee nayon so' rihaan cunudanj ní' a ma'. Tzaj ne yaj me se qui'yaj ndo'o Diose se luj che'é ní' se vaa nayón Jesucristó rihaan ní' nanj adonj.

<sup>10</sup> Dan me se Diose me sí qui'yaj nu' rasuun che'é ma'an inanj so' chuguanj. Dan me se vaa güii, ne nucu' ndo'o nij ta'ní Diose rihaan Diose rej xta', qui'yaj Diose, ne Jesucristó me sí narqué chrej sa' canoco' nij ta'ní Diose, ne quinanii nij so' rihaan sayuun, ne cavii sa' nij so' chuguanj. Che'é dan vaa che'é quiran' Jesucristó sayuun rihaan yo'óo nihánj qui'yaj Diose, ne maan che'é se quiran' Jesucristó sayuun ro', ne che'é dan me guun chij ndo'o so' ne ne achiin cavii sa' nu' so', qui'yaj Diose nanj ei. <sup>11</sup> Dan me se ta'nij Diose me Jesucristó, ne ta'nij Diose

me ní' yuvii cunuu sa' rihaan Diose che'é Jesucristó, ne che'é dan ne guun na'aj Jesucristó cataj so' se vaa tinúú so' do', ra'vij so' do', me ní' ma'. <sup>12</sup> Dan me se cataj so': "Nata' 'unj rihaan nij tinúj che'é so', ne ve'é cachraj chra' che'é so' asa' cunuu chre' núj rihaan so' a", cataj so', ca'mii so' nana no rihaan danj Diose a. <sup>13</sup> Ne ca'mii uún so', cataj so': "Gaa nucuaj raj ni'yaj 'unj man Diose adonj", taj so' a. Ne guun che'e uún so', cataj so': "Ni'yaj soj manj ga nij ta'ní Diose sí rque Diose manj vij", taj uún Jesucristó a. Dan me se nu' nana nihánj me nana ca'mii Jesucristó che'é ní' sij tinúú Jesucristó do', ra'vij Jesucristó do', nana no rihaan danj Diose adonj.

<sup>14</sup> Dan me se che'é se vaa nee vaa cúu vaa ton vaa man ní' sij ta'ní Diose ro', che'é dan ase vaa ma'an ní' ro', danj gaa guee Jesucristó, ne ca'na' so', ne cavi' so' a. Ne gaa cavi' so' me se qui'yaj canaán so' rihaan sí 'yaj avi' ní' a. Dan me se sí chree me sí 'yaj avi' ní', ne Jesucristó me sí ca'vee qui'yaj canaán che'é yan cavi' so' ei. <sup>15</sup> Ne guun nucuaj so' nacaj so' man ní' sij chée rihaan cacun', ne gaa rque me se ndaa chée chu'vi' cavi' rma'an ní' che'é se inanj cacun' qui'yaj ní' chuguanj. Tzaj ne che'é se vaa cavi' Jesucristó che'é ní', che'é dan güej sayuun yo' xráa ní' ne sí chée ma'an me ní' ei. <sup>16</sup> 'Q se ne ca'na' Jesucristó tinanii so' man nij se-mozó Diose rihaan sayuun ma'. Maan se ca'na' so' tinanii so' man ní' ta'nij ta'nij si'no sí cu'naj Abraham sí cane gaa naá rihaan sayuun adonj. <sup>17</sup> Che'é dan me naqui'yaj so' man so', ne nda' rá se vaa guee nij tinúú ya so' ro', vaa so' adonj. Danj qui'yaj so' che'é rej ca'vee cunuu 'ee rá so' man ní', ne guun so' xrej ata suun nocoo doj rihaan Diose che'é ní', ne guun nucuaj rá ní' ni'yaj ní' man so', ne tinavij so' cacun' tumé ní' sij nocoo man Diose adonj. <sup>18</sup> 'Q se che'é se quiran' ma'an ya so' sayuun se vaa guun rá sí chree caxrii sí chree chrej chi'ii rque so' ro', che'é dan guun nu-

cuaj so' racuíj so' man ní' asa' guun rá sí chree caxrii sí chree chrej chi'ii rque ma'an ní' adonj.

### 3

*Nana nihánj taj xna'anj se vaa sa' doj vaa Jesucristó rihaan sí cu'naj Moisés sí cane gaa naá a*

<sup>1</sup> Dan me se sij sa' me soj rihaan Diose, tinuj, nocoj. Ne nacúún Diose sí nicun' xtá' man soj se vaa cavii sa' soj ga so' adonj. Che'é dan xcaj soj cuentá che'é Jesucristó, ne sij ca'neé Diose rihaan ní' me so', ne cataj xna'anj so' rihaan ní' nana ya che'é Diose, ne ase vaa xrej ata suun nocoo doj vaa uún so', tinavij ya so' cacun' tumé ní' rihaan Diose ei. Inanj danj vaa nana noco' ní' nanj ei. <sup>2</sup> Ne ve'é 'yaj suun Jesucristó nu' suun ca'ne' Diose rihaan so', nda' rá se vaa ve'é qui'yaj suun sí cu'naj Moisés nu' suun ca'ne' Diose rihaan so' qui'yaj suun so' che'é nij yuvii nocoo man Diose adonj. <sup>3</sup> Dan me se xcaj sa' ní' cuentá che'é Jesucristó ei. 'Q se sa' uxrá doj vaa so' rihaan sí cu'naj Moisés yo' nanj chuguanj. Dan me se ne'en soj se vaa doj yu'vee nó sí cune' ve' rihaan ma'an ve' yo' ei. Ne ase vaa sí cune' ve' vaa Jesucristó, ne cavii sa' taran' ní' ga Diose, qui'yaj so', ne ase vaa ve' yo' vaa ní' do', vaa sí cu'naj Moisés do', nanj ei. <sup>4</sup> Dan me se vaa 'o ya míj sí 'yaj daj a nij ve' ei. Tzaj ne orún' Diose me sí qui'yaj daj a rasuun nanj ei. <sup>5</sup> Ne sí cu'naj Moisés me se ve'é ya qui'yaj suun so' nu' suun ca'ne' Diose rihaan so' adonj. Tzaj ne nanj mozó me so' rihaan nij yuvii narii Diose, ne cataj xna'anj so' rihaan nij yuvii che'é nij nana nata' Diose rihaan nij yuvii rej rihaan nij yuvii adonj. <sup>6</sup> Tzaj ne Jesucristó me se nuveé mozó me so' ma'. Tananj ta'ní sí tucua ya ve' me so' ei. Ne veé danj 'yaj suun so' nu' suun vaa rihaan so' rá ve', ne dan me se ma'an ya ní' me ve' yo', sese yo'o guun ya rá ní' se vaa cavii sa' ní', qui'yaj Diose, ne sese guun niha' rá ní' cataj xna'anj ní'



rihaan tuvi' ní, ne sese se cuchu'vi ní canoco' ní man Diose ei.

*Nana nihánj taj xna'anj se vaa se gaa nichraj nimán ní ni'yaj ní Diose a*

<sup>7</sup> Che'é dan cuno ní nana nihánj nana ca'mii Nimán Diose á: “Cuan' ro', sese ya cuno soj nana ca'mii Diose, <sup>8</sup> ne se naqui'yaj nichraj soj nimán soj ndaa rá se vaa qui'yaj nij sí cumán gaa naá gaa cachéé nij so' rej tacaan a. Dan me se cunu' nij so' ga Diose, ne guun rá nij so' xcaj nij so' cuentá sese ya qui'yaj Diose sayuun man nij so' a. <sup>9</sup> Veé danj qui'yaj xii soj nij sí cumán gaa naá rihaan Diose, ne quene'en nij so' nu' nij suun sa' nocoo qui'yaj suun 'unj che'é nij so' <sup>10</sup> vij chihaa ya yo' a. Che'é dan ca'maan raj ni'yaj 'unj man nij so', ne cataj 'unj se vaa ne ne'en uxrá nij so' a ma'. 'O se ne quene'en uxrá nij so' daj qui'yaj nij so' canoco' nij so' manj a ma'. <sup>11</sup> Dan me se ca'maan raj, ne guun ya raj daj quirán' nij so', ne yo'o cataj 'unj se vaa daj chihaa míj se quinaránj ya rá nij so' ga 'unj a man chuguanj”, taj nana ca'mii Nimán Diose a.

<sup>12</sup> Dan me se cutumé uxrá soj man soj se gaa nanj gaa quij nimán yo'o tuvi' soj cataj so' se vaa taj vaj Diose, man tinuj, man nocoj. Dan me se se gaa nanj tanáj xcó yo'o tuvi' soj man Diose sí vaa i'na' ya ma'. <sup>13</sup> Cuanó nihánj me se nago' soj chrej nucuaj man tinúú soj daj a güii gaa vaa ya'núj rihaan soj ei. Danj qui'yaj soj, se gaa nanj guun nichraj rá tinúú soj qui'yaj nana ne chi'ii a. <sup>14</sup> 'O se yaj me se guun ní sí cavii sa' ga Jesucristó, ne cavii sa' ya ní ga so' sese yo'o cuchuman rá ní cuno ní nana ya, ndaa vaa qui'yaj ní gaa guun che'e ní canoco' ní man Jesucristó chuguanj.

<sup>15</sup> Dan me se danj Diose taj: “Cuan' ro', sese ya cuno soj nana ca'mii Diose, ne se naqui'yaj nichraj soj nimán soj nda' rá se vaa qui'yaj nij sí cumán gaa naá a. Dan me se cunu' nij so' ga Diose a”, taj danj Diose a.

<sup>16</sup> Ne me sí ne ca'vej rá cuno se-nana Diose, ne cunu' nij so' ga Diose, rá soj ga. Ne taran' nij sí cavii Egiptó ga sí cu'naj Moisés me nij so' chuguanj. Veé ya nij so' ei. <sup>17</sup> Ne me sí me ca'maan rá Diose ni'yaj Diose rque vij chihaa ya yo', rá soj ga. Ne sij ca'maan rá Diose ni'yaj Diose me nij sí qui'yaj cacun', ne cavi' nij so' rihaan yo'óo tacaan a. <sup>18</sup> Ne me rihaan nij sí cataj Diose se vaa daj chihaa míj se cachén nij so' naraan rá nij so' ga Diose, rá soj ga. Rihaan nij sí ne ca'vej rá cuno rihaan so' me yo' na'. Veé ya nij so' ei. <sup>19</sup> Ne ne'en ní se vaa che'é se ne cuchuman rá nij so' ni'yaj nij so' man Diose ro', che'é dan ne guun nucuaj nij so' quinaráan rá nij so' ga Diose chuguanj.

#### 4

<sup>1</sup> Che'é dan cutumé uxrá ní man ní ei. Tadó ní se gaa nanj caráan ní xréé ní rihaan nana cataj xna'anj Diose rihaan ní se vaa catúu ní chrej ca'anj ní naraan rá ní ga Diose á. 'O se adi' se vaa sí ne ruvi' rihaan ro', gaa ní, sese se cutumé ní man ní adonj. <sup>2</sup> Ne ase vaa catúj se-nana Diose xréé nij sí cumán gaa naá ro', danj vaa guee catúj se-nana Diose xréé ma'an ní cuano ei. Gaa cuno nij so' se-nana Diose me se cuno un nij so' nana yo', ne taj se gún' nana yo' rihaan nij so' a ma'. Dan me se nata' nii nana yo' rihaan nij so', tzaj ne ne cuchuman rá nij so' daj chihaa míj nana yo' a man chuguanj. <sup>3</sup> 'O se orún' ní sij amán rá ni'yaj man Diose me nij sí ca'anj quinaráan rá ga Diose nanj ei. Inanj danj ca'mii Diose, cataj Diose: “Dan me se ca'maan raj, ne guun ya raj daj quirán' nij so', ne yo'o cataj 'unj se vaa daj chihaa míj se quinaránj rá nij so' ga 'unj a mei”, taj Diose a. Ne dan me se gaa naá gaa quisíj qui'yaj Diose chumiij nihánj, ne navij suun rihaan Diose, ne ca'ne' rá Diose a. <sup>4</sup> Ne vaa nana no rihaan danj Diose nana taj xna'anj che'é güii chij, ne taj nana yo': “Ne güii chij quinaránj rá Diose che'é yan quisíj qui'yaj suun Diose

nu' suun qui'yaj suun so' a", taj nana yo' a. <sup>5</sup> Ne vaa nana taj uún, ne: "Daj chihaa míj se quinaránj ya rá nij so' ga 'unj a man chuguanj", taj uún Diose a.

<sup>6</sup> Dan me se ataa ta'aj nij yuvij catuú quinaraaan rá ga Diose adonj. Tzaj ne xa' nij síi aj cuno se-nana Diose gaa naá ne ne ca'vej rá nij so' cuno nij so' me se daj chihaa míj se quinaránj rá nij so' ga Diose ma'. Dan me se yo' me quirán' nij so' che'é se ne ca'vej rá nij so' cuno nij so' nana sa' adonj. <sup>7</sup> Che'é dan cachrón uún Diose yo'ó güii canoco' yuvij man so', ne cuano nihánj me güii cachrón Diose canoco' yuvij man so' ei. Ne ma'an síi cu'naj David ca'mii se-nana Diose nana yo' nana aj cachrón 'unj rihaan yanj nihánj, cataj so': "Yaj ro', sese ya catúj se-nana Diose xréé soj, ne se naqui'yaj nichraj soj nimán soj ma'", taj síi cu'naj David yo' a.

<sup>8</sup> Ne che'é se ne quinaraaan rá nij síi cumán gaa naá, qui'yaj síi cu'naj Josué ro', che'é dan me cachén ndo'o güii, gaa ne ca'mii síi cu'naj David che'é yo'ó güii canoco' yuvij man Diose, ne quinaraaan rá nij yuvij ga Diose adonj. <sup>9</sup> Dan me se ne'en ní' se vaa ya uxrá vaa güii quinaraaan rá ní' sij noco' man Diose adonj. <sup>10</sup> 'O se nij síi naránj rá ga Diose me se aj quisij qui'yaj suun nij so', ne navij suun rihaan nij so' ei. Ase vaa qui'yaj Diose gaa navij se-suun Diose rihaan Diose ro', danj 'yaj nij so' chuguanj. <sup>11</sup> Che'é se nano' ní' daj qui'yaj ní' quinaraaan rá ní' ga Diose, gaa ne se guun tumé a 'ó tuvi' ní' cacun' tumé nij síi cumán gaa naá ma'. Dan me se ve'é cuno taran' ní' rihaan Diose adonj.

<sup>12</sup> 'O se vaa i'na' ya se-nana Diose adonj. Ne nucuaj uxrá yo', ne ase vaa yo'ó neê espadá sihaa nu' niha rihaan ro', vaa yo', tzaj ne nuveé inanj cúú do', nee do', me se a'ne' yo' ma'. 'O se a'ne' yo' ndaa nimán ya ní', ne che'é se-nana Diose yo' ro', uun nucuaj Diose xcaj Diose cuentá daj vaa nimán ya ní' chuguanj. <sup>13</sup> Ne nu' nij rasuun vaa yuve ro', ruvi' nu'

nij yo' rihaan Diose chuguanj. 'O se ranga' uxrá rihaan Diose ei. Ne ruvi' nu' rasuun ni'yaj so', ne ya ruvi' sa' nu' rasuun ni'yaj Diose ei. Ne veé rihaan ma'an ya Diose ro', me ca'anj ní' nago' ní' cuentá adonj.

*Nana nihánj taj xna'anj se vaa ase vaa xrej atá suun noco'oj ro', danj vaa Jesucristó rihaan ní' a*

<sup>14</sup> Tzaj ne vaa 'o xrej sa' xrej atá suun noco'oj nicaj yu'unj man ní' adonj. Ne sij cavii xtá' doj rihaan rej xtá' me so', ne Jesucristó ta'níi Diose ya me uún so' nanj chuguanj. Che'é dan nicaj raan ní' tucuáan noco' ní' ei. <sup>15</sup> 'O se nuveé xrej ne ne'en daj vaa sayuun ran' ní' me so' ma'. 'O se aj ne'en so' daj vaa chrej chi'ij 'na' rihaan ní' adonj. Che'é dan cunuu 'ee rá so' man ní' gaa ninaj ní' rihaan sayuun adonj. Dan me se ase vaa ma'an ní' ro', vaa so', ne ase vaa sayuun 'na' rihaan ní' ro', danj vaa sayuun ca'na' rihaan so', tzaj ne ne qui'yaj so' a 'ó xco' cacun' ma'. <sup>16</sup> Che'é se xrej me so' che'é ní' ro', che'é dan se chucu'vi' ní' a doj mei. Tananj quinichrun' ní' rihaan chrej sa', gaa ne ca'vee cunuu 'ee rá Diose man ní', ne asa' 'na' sayuun rihaan ní', ne ca'vee cata' tu'va ní' man so', ne nacaj so' man ní' rihaan sayuun chuguanj. Dan me se ya cunuu 'ee rá Diose man ní', ne sese vaa güii quirán' ní' sayuun, ne qui'yaj so' se luj che'é ní' adonj.

## 5

<sup>1</sup> 'O se xa' nij xrej atá suun noco'oj doj xrej une' yuvij, tzaj ne atá nij so' suun se vaa racu'ij nij so' man yuvij me rá cunuu sa' rihaan Diose ei. Dan me se racu'ij nij so' man nij yuvij rque yuvij xcuu cacaa rihaan Diose che'é cacun' tumé nij yuvij a. <sup>2</sup> Danj 'yaj nij so', che'é se nanj yuvij me nij so', ne che'é dan ne uun nucuaj nij so' qui'yaj nij so' inanj se sa' a man adonj. Che'é dan ca'vee guun 'ee rá nij so' ni'yaj nij so' man nij síi ne ne'en do', man nij síi vaj chrej chi'ij do' a. Ne che'é cacun' tumé ma'an nij

so' ro', <sup>3</sup> che'é dan ase vaa uta' nij so' xcuu cacaa rihaan Diose che'é cacun' tumé yuvií ro', inanj danj no xcuún nij so' cuta' nij so' xcuu cacaa rihaan Diose che'é cacun' tumé ma'an nij so' uún adonj.

<sup>4</sup> Ne taj síí une' man ma'an cata suun nocoo yo' ma'. 'O se inanj síí nacúún Diose me síí cata suun nocoo adonj. Danj quiran' síí cu'naj Aarón síí cane gaa naá, ne nacúún Diose man so' cata so' suun nocoo yo' gaa naá ei. <sup>5</sup> Ne ase vaa quiran' síí cu'naj Aarón ro', danj quiran' Jesucristó chuguanj. Ne cune' so' man ma'an so' se vaa cavii sa' so' guun so' xrej ata suun nocoo doj ma'. 'O se Diose cune' man so', cataj Diose: "Ta'nij mé so' á. Cuanó nihánj me se quene'en yuvií se vaa ta'nij mé so', qui'yaj nanj á", taj nana no rihaan danj Diose nana ca'mii Diose rihaan Jesucristó a. <sup>6</sup> Ne vaa yo'ó nana uún nana ca'mii Diose rihaan Jesucristó, ne nana yo' taj se vaa: "Xrej mé so' nu' cavii nu' ca'anj a. Dan me se ase vaa xrej cu'naj Melquisedec xrej cane gaa naá ro', danj vaa ma'an so' nanj á", taj doj nana no rihaan danj Diose nana ca'mii Diose rihaan Jesucristó a. <sup>7</sup> Dan me se gaa chéé Jesucristó rihaan chumii nihánj, ne cachíín ni'yaj uxrá so' rihaan Diose se vaa tinanii Diose man so' se cavi' so', ne che'é dan ndaa ta'vee ma'an so', ne che'é se sij aráj cochroj ya rihaan Diose me so', che'é dan cuno ya Diose ca'mii so', <sup>8</sup> ne ta'nij ya Diose me so', tzaj ne taj se qui'yá' quinanii so' rihaan sayuun a ma'. Che'é sayuun quiran' so' ro', che'é dan tananj a nari' sa' so' cuno so' adonj. <sup>9</sup> Dan me se guun so' síí uno nu' se-nana rej, ne che'é dan guun so' síí tinanii man taran' ní' sij uno rihaan so' rihaan sayuun, ne dan me se cavii sa' ní' nu' cavii nu' ca'anj, qui'yaj so' ei. <sup>10</sup> Ne guun uún so' xrej ata suun nocoo doj, qui'yaj Diose, ne ase vaa xrej cu'naj Melquisedec vaa uún so' nanj adonj.

*Nana nihánj taj xna'anj se vaa no*

*xcuún ní' xcaj ní' cuentá sa' doj che'é se-nana Jesucristó a*

<sup>11</sup> Vaa uxrá yo'ó nana me rá 'unj cataj xna'anj 'unj rihaan soj che'é síí cu'naj Melquisedec yo', ne sayuun uxrá vaa cataj xna'anj 'unj nana yo' rihaan soj, che'é se nuveé sij niha' rá cuno ra'yanj me soj mei. <sup>12</sup> Dan me se guun que'ee yo' noco' soj man Jesucristó, ne no xcuún soj tucu'yón soj se-nana Jesucristó rihaan tuvi' soj, tzaj ne ne guun nucuaj soj qui'yaj soj danj man asan. 'O se achiin 'o síí tucu'yón asij tacóo se-nana Diose man soj, rá soj, ne che'é dan ase vaa ne'ej vaa soj, ne ne'ej me se ne ne'en ne'ej cha ne'ej se chá ma'. Tihaj utzii ne'ej nanj adonj. Ne ta'nga' danj vaa soj, ne tihaj ndaa tacóo se-nana Diose guun nucuaj soj cuno soj, rá soj nanj adonj. <sup>13</sup> Dan me se síí utzii too ro', ase vaa ne'ej uun vaa so', ne ataa nari' so' daj qui'yaj so' ne cunuu sa' so' rihaan Diose ei. <sup>14</sup> Ne ase vaa síí nocoo síí chá nu' rasuun sca' ro', danj vaa síí acaj ndo'o cuentá, ne tucu'yón niganj so' nuchruj raá so' che'é rasuun, ne che'é dan ne'en so' nuchruj raá so' me se me se sa' do', me se me se nij do', ne xcaj so' cuentá che'é nu' rasuun yo' chuguanj.

## 6

<sup>1</sup> Che'é dan se guun rá ní' tucu'yón uún ní' nana aj nari' ní' gaa guun che'e ní' canoco' ní' man Jesucristó mei. Tzaj ne yo'ó tananj guun rá ní' nari' ní' nana chij doj nana cachiin rihaan ní' canoco' sa' ní' man Jesucristó ei. Dan me se aj nari' ní' nana se vaa canicaj nimán ní' tanáj ní' tucuaán chí'ii canoco' ní' asij rque á. Ne aj nari' ní' nana se vaa cuchuman rá ní' ni'yaj ní' man Diose ei. <sup>2</sup> Ne aj nari' ní' nana se vaa cata' ne ní' á. Ne aj nari' ní' nana se vaa cuta' ní' ra'a ní' raá tinúú ní' gaa nago' ní' suun man tinúú ní' á. Ne aj nari' ní' nana se vaa cunuu i'na' uún nij síí cavi' á. Ne aj nari' ní' nana se vaa ca'ne' Diose cacun' che'é yuvií daj quiran' yuvií nu' cavii nu' ca'anj á. <sup>3</sup> Dan me

se quisíj tucu'yón ní' nana nihánj, ne cachén ní' tucu'yón ní' nana nocoo doj, sese ca'vej rá Diose qui'yaj ní' danj á.

<sup>4</sup> 'O se sese aj xcaj ní' cuentá che'é se-nana Diose do', sese aj nicaj ní' nu' nij se sa' rqué Diose rihaan ní' do', sese aj cayáan Nimán Diose ga ní' do', <sup>5</sup> sese aj nari' ní' se vaa taj se-nana Diose che'é ní' do', sese aj ne'en ní' suun sa' qui'yaj suun Diose naqui'yaj sa' Diose chumii nihánj do', <sup>6</sup> gaa ne sese cunu ino nimán ní' ne tanáj rma'an ní' se-tucuanj Jesucristó, gaa ne daj chihaa míj se guun nucuaj ní' canicaj uún nimán ní' canoco' uún ní' chrej sa' a man chuguanj. Maan se síi 'yaj danj ro', me rá so' caví' uún ta'níi Diose rihaan rcutze che'é so', ne me rá so' ca'nga' nacoo yuvii ni'yaj yuvii man Jesucristó che'é so', rá so' adonj. Dan me se nu' yo' me rá ní' quiran' uún Jesucristó, sese guun rá ní' canicaj uún nimán ní' canoco' uún ní' man so' adonj.

<sup>7</sup> 'O se ase vaa yo'óo vaa ní' rihaan Diose, ne sese aman' uxrá maan rihaan yo'óo, ne sese sa' uxrá avii naa do', cuêj do', rihaan yo'óo yo' chá nij síi qui'yaj suun yo'óo yo', ne cavii sa' uxrá yo'óo yo', qui'yaj Diose ei. <sup>8</sup> Tzaj ne sese quixra' uxrá coj tanj uun do', tanj ya'aa uun do', rihaan yo'óo yo', ne quiran' uxrá yo'óo yo' sayuun, qui'yaj Diose, ne cacaa nu' yo'óo yo', qui'yaj Diose nanj ei.

<sup>9</sup> 'Ee rá 'unj man soj, tinuj, nocoj. Ne nda' se nana nucuaj ca'mii 'unj rihaan soj nihánj, tzaj ne guun ya rá 'unj se vaa sa' uxrá qui'yaj soj, ne ya cavii sa' soj, qui'yaj Diose ei. <sup>10</sup> 'O se nuveé sij chi'ii me Diose ma'. Sij vaa nica rá me Diose, ne yo'c cunuú rá Diose taran' nij suun sa' qui'yaj suun soj gaa canoco' soj man so' ei. Ne yo'c cunuú rá Diose se vaa aran' uxrá rá soj cunoo soj nana a'mii Diose nanj chuguanj. Dan me se qui'yaj suun uxrá soj racuíj soj man nij síi sa' noco' man Diose gaa rque, ne 'o danj qui'yaj ya soj ei. <sup>11</sup> Tzaj ne me uxrá rá

'unj se vaa 'o yaan guun ya rá taran' nij tinuj soj se vaa cavii sa' ya uxrá soj qui'yaj Jesucristó, ne guun niha' rá soj canoco' raan soj man so' ndaa se quisij güii ca'na' uún so' ei. <sup>12</sup> Ne se gaa rmii soj ma'. Maan se ve'é xcaj soj cuentá daj 'yaj nij síi chumán sa' rá ni'yaj man Diose, ne ase vaa 'yaj nij so' ro', danj qui'yaj uún soj, gaa ne ca'vee chuguanj. Dan me se nij síi chumán sa' rá me se ne a'ne' rá nij so' ma'. 'O se yo'c noco' nij so' man Jesucristó, gaa ne vaa güii nacaj nij so' nu' se sa' cataj xna'anj Diose se vaa rque Diose man ní' sij noco' man Diose adonj.

*Nana nihánj taj xna'anj daj qui'yaj Diose gaa cataj xna'anj Diose rihaan síi cu'naj Abraham daj qui'yaj Diose che'é so' a*

<sup>13</sup> Dan me se quisíj cataj xna'anj Diose rihaan síi cu'naj Abraham daj qui'yaj Diose che'é so', gaa ne guun rá Diose cuta' Diose raá yo'c síi sa' ndo'o, ne cuchuman rá síi cu'naj Abraham se vaa ya vaa nana cataj xna'anj Diose rihaan so' a. Tzaj ne ne nano' Diose yo'c so' ma'. Maan se ma'an Diose cataj se vaa ya danj qui'yaj Diose adonj. <sup>14</sup> Dan me se cataj Diose rihaan síi cu'naj Abraham a:

—Ya uxrá cavii sa' so', qui'yaj, ne ya uxrá xna'anj ndo'o nij ta'níi ta'nij si'no so', qui'yaj nanj á —taj Diose rihaan síi cu'naj Abraham a.

<sup>15</sup> Ne ya danj quiran' síi cu'naj Abraham, gaa inaj nimán so', yo'c noco' so' man Diose, ne cavii sa' uxrá ya so', ndaa vaa cataj xna'anj Diose rihaan so' nanj ei. <sup>16</sup> Dan me se tananj nij yuvii, ne sese guun rá yo'c so' cano tuvi' so' che'é 'o nana, ne cuta' so' raá 'o rasuun ca'mii so', gaa ne cuchuman rá tuvi' so', qui'yaj so' chuguanj. Tzaj ne inanj raá yo'c rasuun sa' doj rihaan ma'an yuvii uta' yuvii adonj. <sup>17</sup> Ne gaa ca'mii Diose ga nij síi nacaj nu' se sa' rque so', ne guun rá so' cuchuman sa' doj rá nij so' che'é nana ca'mii so', ne che'é dan cuta' ma'an ya Diose raá



yo'õ rasuun, ca'mii Diose a. <sup>18</sup> Dan me se asino ca'mii ya Diose, gaa ne cuta' Diose raa ma'an so' a. Dan me se quisij vij nana ca'mii so', ne daj chihaa mij se natuna Diose se-nana so' ma'. 'O se ne uun nucuaj Diose a'mii Diose nana ne ma'. Che'e dan me ndo'o ra ni' racuj Diose man ni', ne che'e dan vaa che'e ndo'o cuchuman ra ni', ne guun ya ra ni' se vaa ya cavii sa' ni', ndaa vaa cataj xna'anj Diose rihaan ni' nanj adonj. <sup>19</sup> Ne sese yo'õ guun ya ra ni', ne gaa sca' niman ni', ne se kuchu'vi' niman ni' ma'. 'O se ya uxrã vaa nana aman ra ni', ne che'e nana yo' ca'vee quinã ni' rihaan ma'an Diose adonj. <sup>20</sup> Dan me se aj taj yaan Jesucristo rihaan ni' quinã so' rihaan Diose qui'yaj suun so' che'e ni', ne so' me sii guun xrej ata suun nocoo doj, ne ase vaa sii cu'naj Melquisedec gaa naã ro', danj gaa guee so' nu' cavii nu' ca'anj adonj.

## 7

*Nana nihanj taj xna'anj se vaa ase vaa xrej cu'naj Melquisedec vaa Jesucristo, ne xrej sa' uxrã me Jesucristo che'e ni' a*

<sup>1</sup> Dan me se xa' xrej cu'naj Melquisedec, tzaj ne sii nicaj suun rey guun chij rihaan chuman' cu'naj Salem me so', ne xrej me uun so' rihaan Diose sii nicun' xta' adonj. Gaa nanicaj sii cu'naj Abraham 'na' nique so' gaa quisij qui'yaj canaan so' man yo'õ nij sii nicaj suun rey sii cunu' ga so', ne dan me se ca'anj carã ni' sii cu'naj Melquisedec man so' chrej 'na' nique so', ne ve'e cataj sii cu'naj Melquisedec se vaa me ra so' qui'yaj Diose se luj che'e sii cu'naj Abraham yo' a. <sup>2</sup> Gaa ne xa' nij rasuun qui'yaj canaan Abraham ro', rque so' 'õ rasuun rihaan daj a chi' rasuun rihaan Melquisedec, ne diezmo cu'naj yo' a. Ne se-chuvii sii cu'naj Melquisedec taj se vaa sii nicaj suun rey sii 'yaj inanj se sa' me ma'an so' a. Ne sii nicaj suun rey ne chuman' Salem me uun so', ne nana

Salem taj se vaa sii nicaj suun rey qui'yaj cumã dãn yuvii me so', taj nana yo' a. <sup>3</sup> Ne xa' so', tzaj ne taj rej so' taj nii so' taj tuvi' so' taj ma'. Ne taj guii ca'ngaa so', ne taj guii cavi' so' do' a ma'. Dan me se ase vaa ma'an ta'ni' Diose vaa so', gaa guun so', ne xrej guun so' nu' cavii nu' ca'anj nanj adonj.

<sup>4</sup> Dan me se xa' sii cu'naj Abraham, tzaj ne xii tarã ni' sij israelita me so', ne rque so' diezmo rihaan sii cu'naj Melquisedec che'e nij rasuun qui'yaj canaan ma'an so' adonj. Che'e dan me xcaj soj cuentã daj sij me sii cu'naj Melquisedec yo', se vaa sij sa' uxrã me so' nanj ei. <sup>5</sup> Dan me se xa' nij ta'ni' ta'nij si'no sii cu'naj Leví, tzaj ne cune' Diose man nij so' guun nij so' xrej che'e nij yuvii israelita ei. Ne a'nej nij so' diezmo man nij sii israelita, ndaa vaa taj se-tucuanj Moisés yo' adonj. Ne ase vaa tinuu nij yuvii israelita vaa nij so', che'e se ta'ni' ta'nij si'no sii cu'naj Abraham me nij so' ga yo'õ nij yuvii israelita adonj.

<sup>6</sup> Tzaj ne nuvee tuvi' nij so' me sii cu'naj Melquisedec ma'. Tzaj ne so' me sii ca'nej diezmo man sii cu'naj Abraham chuguanj. Ne nda' se sij cavii sa' qui'yaj ma'an Diose me sii cu'naj Abraham, tzaj ne cuno so' se-nana sii cu'naj Melquisedec se vaa qui'yaj Diose se luj che'e so' adonj. <sup>7</sup> Dan me se ne'en tarã ni' se vaa sii a'mii nana sa' se vaa qui'yaj Diose se luj che'e tuvi' ro', so' me sii ata suun nocoo doj rihaan tuvi' so' sii uno nana sa' yo' adonj. Che'e dan me sij ata suun nocoo doj me sii cu'naj Melquisedec rihaan sii cu'naj Abraham adonj. <sup>8</sup> Ne xa' nij ta'ni' ta'nij si'no sii cu'naj Leví, tzaj ne a'nej nij so' diezmo man yuvii, tzaj ne nanj yuvii me nij so', ne vaa guii cavi' nij so' ei. Ne xa' sii cu'naj Melquisedec, tzaj ne danj Diose taj se vaa yo'õ vaa i'na' so' nanj adonj. <sup>9</sup> Ne nda' se a'nej nij ta'ni' ta'nij si'no Leví diezmo man yuvii, tzaj ne vaa che'e cataj ni' se vaa gaa rque Abraham diezmo

rihaan sí cu'naj Melquisedec, gaa ne rque ma'an nij so' diezmo uún rihaan sí cu'naj Melquisedec adonj. <sup>10</sup> 'O se nicaj Abraham semilla guun nij ta'ní ta'nij si'no Leví gaa nari' tuvi' so' ga sí cu'naj Melquisedec adonj.

<sup>11</sup> Dan me se nij ta'ní ta'nij si'no sí cu'naj Leví ro', ta'ní ta'nij si'no sí cu'naj Aarón me nij so', ne tucu'yón nij so' se-tucuanj Moisés rihaan nij yuvi israelitá, tzaj ne ne quisij guun sa' inanj nij yuvi israelitá, qui'yaj nij so' ma'. 'O se danj Diose taj se vaa ase vaa sí cu'naj Melquisedec ro', danj gaa yo'ó xrej cune' Diose, tzaj ne nuveé tuvi' sí cu'naj Aarón me xrej naca yo' a. <sup>12</sup> Ne che'é se nu ino doj xrej, che'é dan nu ino tucuáán tucu'yón xrej yo' rihaan nij yuvi, ne canoco' nij yuvi yo' yo'ó tucuáán yo' adonj. <sup>13</sup> Ne danj Diose taj se vaa xrej naca yo' ro', me tuvi' yo'ó x'ne' nij yuvi israelitá, ne taj tuvi' nij so' guun xrej rihaan Diose gaa rque ma'.

<sup>14</sup> 'O se sí 'nij ra'a man ní' ro', so' me yo'ó ta'ní ta'nij si'no sí cu'naj Judá, ne ne cataj Moisés se vaa guun ta'ní ta'nij si'no sí cu'naj Judá yo' 'o xrej canicun' rihaan Diose gaa rque ma'. <sup>15</sup> Dan me se ase vaa sí cu'naj Melquisedec vaa yo'ó xrej naca yo' adonj. Ne che'é dan ya uxrá ino doj vaa tucuáán noco' ní', qui'yaj so' adonj. <sup>16</sup> Ne yo'ó xrej naca yo', tzaj ne nuveé che'e se-tucuanj yuvi uun me guun so' xrej ma'. 'O se ase vaa ma'an yuvi vaa tucuáán noco' ma'an yuvi, ne che'é dan vaa güii quinavij tucuáán noco' nij yuvi nanj chuguanj. Tzaj ne xa' xrej naca yo', tzaj ne guun nucuj so' gaa i'na' so' nu' cavii nu' ca'anj, ne daj chihaa míj se navij xrej yo' man adonj. <sup>17</sup> 'O se danj Diose taj: "Xrej mé so' nu' cavii nu' ca'anj a. Dan me se ase vaa xrej cu'naj Melquisedec xrej cane gaa naá ro', danj vaa ma'an so' á", taj danj Diose a.

<sup>18</sup> Dan me se taj se uun tucuáán nga yo' a ma'. Ne ne guun nucuj yo' racuíj yo' man yuvi a man chuguanj.

Che'é dan quinavij tucuáán nga yo', qui'yaj Diose nanj adonj. <sup>19</sup> 'O se taj vaj a doj rasuun cunuu sa' qui'yaj se-tucuanj Moisés ma'. Dan me se navij tucuáán nga, ne yo'ó tucuáán sa' naca noco' ní' cuano, ne guun ya rá ní' se vaa cavii sa' ní', qui'yaj tucuáán naca yo' adonj. 'O se che'é tucuáán naca yo' qui'yaj ca'vee cuchi' ma'an ní' rihaan Diose adonj.

<sup>20-21</sup> Ne xa' nij ta'ní ta'nij si'no sí cu'naj Leví, tzaj ne taj raá a 'ó rasuun cuta' Diose gaa cune' Diose man nij so' a ma'. Tzaj ne xa' Jesucristó me se vaa se cuta' Diose raá gaa cune' Diose man so' adonj. Dan me se danj Diose taj: "Cuta' sí 'nij ra'a man ní' raá ma'an so', ne daj chihaa míj se nanicaj se-nana so', qui'yaj so' ma'. Dan me se cataj so' se vaa xrej guún so' nu' cavii nu' ca'anj a", taj danj Diose a. Ne che'é se cuta' Diose raá ma'an so' ro', <sup>22</sup> che'é dan ne'en ya ní' se vaa sa' doj vaa tucuáán noco' ní' sese sij noco' man Jesucristó me ní', ne sa' doj qui'yaj Diose che'é ní' adonj. <sup>23</sup> Ne nij ta'ní ta'nij si'no sí cu'naj Leví ro', yuvi cavi' vaa güii me nij so', ne che'é dan a 'ó nij so' se cayáán guun xrej nu' cavii nu' ca'anj ma'. Che'é dan aj cayáán que'ee nij so' a. <sup>24</sup> Tzaj ne Jesucristó me se daj chihaa míj se cavi' so' ma'. Che'é dan orún' so' me xrej qui'yaj suun rihaan Diose che'é ní' nu' cavii nu' ca'anj adonj. Se gaa yo'ó xrej rihaan so' ma'. <sup>25</sup> Dan me se yo'ó vaa i'na' so', ne cachinj ni'yaj so' rihaan Diose che'é ní' nu' cavii nu' ca'anj ei. Che'é dan nu' ní' sij cuchi' rihaan Diose che'é so' me se guun nucuj so' tinanii so' man ní' rihaan sayuun nu' cavii nu' ca'anj adonj.

<sup>26</sup> Dan me se vaa che'é ndo'o guun so' xrej atá suun noco' doj che'é ní' adonj. 'O se sí guee ya me so', ne taj vaj a doj cacun' tumé so' ma'. 'O se sí sa' inanj nimán me so', ne gan' uxrá yáán so' ga ní' sij tumé cacun' nanj adonj. Dan me se xta' doj yáán so' rihaan nu' rej xta' ei. <sup>27</sup> Ne nij

xrej at̄a suun noc̄o doj mān rihaan chumīi nihánj ro', 'o 'o güii nó xcúún nij so' caxrīi ya'an nij so' xcuu rihaan Diose che'é cacun' tumé ma'an nij so' asino yaan, gaa ne caxrīi ya'an uún nij so' xcuu rihaan Diose che'é cacun' tumé nij yuvīi nanj chuguanj. Tzaj ne Jesucristó me se ne nó xcúún so' qui'yaj so' danj ma'. 'O se xa' so', tzaj ne ca'neé nimán ma'an so' cavi' so' che'é cacun' tumé ní' nanj adonj. Taj che'é cavi' uún so' che'é ní' ma'. <sup>28</sup> Ne se-tucuanj Moisés taj se vaa cune' yuvīi man nanj yuvīi cayáán nij yuvīi xrej, ne che'é dan nanj sí tumé cacun' me nij xrej yo' nanj adonj. Tzaj ne quinavij tucuáán nga yo', gaa ne cuta' Diose raá ma'an Diose, ne cune' Diose man ta'ní Diose, ne sí sa' inanj me so' nu' cavii nu' ca'anj nanj adonj.

## 8

*Nana nihánj taj xna'anj se vaa sa' doj vaa se-tucuanj Jesucristó rihaan se-tucuanj Moisés a*

<sup>1</sup> Dan me se nihánj me nana noc̄o doj rihaan taran' nij nana cataj xna'anj 'unj rihaan soj nihánj, ne nana nihánj taj se vaa sa' inanj vaa Jesucristó sí guun xrej at̄a suun noc̄o doj xrej 'yaj suun rihaan Diose che'é ní' ei. Ne rej xta' yáán so' rej nuva' Diose, <sup>2</sup> ne 'yaj suun so' rihaan Diose rá ve' ne rej xta', ne nuveé 'o ve' cune' yuvīi uun me ve' yo' ma'. 'O se ve' cune' ma'an sí 'nij ra'a man ní' me ve' yo' adonj. <sup>3</sup> 'O se nij xrej at̄a suun noc̄o doj mān rihaan chumīi nihánj ro', no xcúún nij so' rque nij so' rasuun do', xcuu cacaá do', rihaan Diose adonj. Che'é dan me nij so' xrej ei. Che'é dan no xcúún Jesucristó rque uún so' yo' rasuun rihaan Diose ei. <sup>4</sup> Dan me se nuveé xrej mān rihaan chumīi nihánj me Jesucristó ma'. 'O se sese sij mān rihaan chumīi nihánj me Jesucristó, ne taj che'é guun so' xrej ma'. Maan se rihaan chumīi nihánj mān xrej rque rasuun rihaan Diose ndaa vaa taj Moisés nanj ei. <sup>5</sup> Ne nij xrej mān rihaan chumīi nihánj

ro', ne 'yaj suun nij so' ga ma'an nij rasuun mān rej xta' ma'. Maan se ase vaa se tinanga' uun do', ase vaa se-cachun' nij rasuun mān rej xta' do', vaa suun 'yaj suun nij so' nanj adonj. Che'é dan me asij ca'ne' Diose suun rihaan sí cu'naj Moisés cune' so' ve' mantá xij ve' na'vij nij yuvīi israelitá rihaan Diose, ne nago' so' chrej rihaan Moisés daj qui'yaj so', cataj so':

—Xcaj so' cuentá se vaa ase vaa ve' tihaán 'unj rihaan so' raá quij ro', danj gaa guee ve' cune' so' á —taj Diose rihaan Moisés a.

<sup>6</sup> Tzaj ne cuano ro', sa' doj vaa tucuáán noc̄o ní' gaa 'yaj suun ní' rihaan Diose a. 'O se sa' uxrá doj vaa sí tucu'yón rihaan ní' daj qui'yaj ní' ne cavii sa' ní' rihaan Diose, ne gaa cune' Diose man so', ne cataj xna'anj Diose rihaan ní' se vaa sa' doj qui'yaj Diose ga ní' rihaan nij sí cumán gaa naá a. <sup>7</sup> 'O se sese inanj sa' uxrá vaa nana cataj xna'anj Diose rihaan Moisés, ne taj che'é cataj xna'anj Diose yo'ó nana che'é ní' ma'. Tzaj ne cataj Diose se vaa ca'mii Diose yo'ó nana ei. <sup>8</sup> Dan me se cuta' Diose cacun' xráá nij sí mān gaa naá, cataj Diose se vaa vaa yo'ó nana cachiin uún rihaan nij so', cataj Diose:

—Ni'yaj so' 'na' güii, —taj sí 'nij ra'a man ní'— ne cataj xna'anj naca 'unj rihaan nij ta'ní ta'nij si'no sí cu'naj Israel do', rihaan nij ta'ní ta'nij si'no sí cu'naj Judá do', daj qui'yaj nij so', ne cavii sa' nij so' rihanj á. <sup>9</sup> Ne ino doj gaa nana naca yo' ga nana cataj xna'anj 'unj rihaan xii nij so' sij cumán gaa naá, gaa quita'aa 'unj ra'a nij so', ne quirii 'unj man nij so' Egiptó a. Tzaj ne tanáj xco nij so' nana yo', gaa ne na'néj ra'a nij so' nanj adonj —taj sí 'nij ra'a man ní' a—. <sup>10</sup> Dan me se ino doj gaa nana naca yo' nana tucu'yonj rihaan nij ta'ní ta'nij si'no sí cu'naj Israel asa' quisij güii yo' adonj —taj sí 'nij ra'a man ní' a—. 'O se ca'nej 'unj se-nanaj nimán nij so', ne quene'en ma'an nij so' daj me rá 'unj qui'yaj nij so' adonj.

Ne guún 'un̄j Diose canoco' nij so', ne guun nij so' yuvī cutumé 'un̄j adon̄j. <sup>11</sup> Ne se tucu'yón̄ nij so' rihaan tuvi' nij so' do', rihaan tinúú nij so' do', daj qui'yaj̄ nij so' canoco' nij so' man̄j a ma'. Se cataj̄ nij so': "Xcaj̄ so' cuentá che'é Diose vij̄", se cataj̄ nij so' ma'. 'O se quene'en̄ cunud̄anj̄ nij so' man̄j nan̄j adon̄j. Dan me se quene'en̄ síi cun̄ij do', quene'en̄ síi chij̄ doj̄ do', man̄j nan̄j adon̄j. Quene'en̄ cunud̄anj̄ nij so' man̄j, <sup>12</sup> che'é se cunūu 'ee raj man̄j nij so', ne se qui'yáj̄ sayuun man̄j nij so' che'é cacun' tumé nij so' a ma'. Quinavij̄ cacun' taj̄ xráá nij so', qui'yáj̄ nan̄j adon̄j —taj̄ Diose a.

<sup>13</sup> Veé dan̄j ca'mii Diose che'é nana naca yo', ne che'é dan ne'en ní se vaa guun nga nana cataj̄ xna'anj̄ so' rihaan síi cu'naj̄ Moisés, ne che'é dan taj̄ se uun se-nana Moisés yo' a ma'. Nichrun' navij̄ nana nga yo' nan̄j adon̄j.

## 9

*Nana nihánj̄ taj̄ xna'anj̄ se vaa ase vaa cunūu sa' nee man̄j yuvī israelitá rihaan Diose qui'yaj̄ ton man̄j xcuu ro', dan̄j vaa cunūu sa' nimán ní' rihaan Diose, qui'yaj̄ ton man̄j Jesu-cristó a*

<sup>1</sup> Dan me se gaa ca'mii Diose rihaan Moisés asino yaan, ne cataj̄ xna'anj̄ Diose daj̄ qui'yaj̄ nij yuvī israelitá gaa na'v̄ij̄ nij so' rihaan Diose, ne cataj̄ xna'anj̄ Diose daj̄ gaa ve' guee cune' nij yuvī israelitá rihaan chumij̄ nihánj̄ a. <sup>2</sup> Dan me se cune' nij yuvī israelitá ve' ne rihaan tuvi' ve', ne rá ve' yo' ro', nuú aga' taj̄ aga' ya'an do', chruun mesá cuta' nii rachrúún rihaan Diose do', ne ve' cu'naj̄ rej̄ guee me ve' yo' a. <sup>3</sup> Ne vaa yo' o yatzíj̄ cortiná canoco' rej̄ xco rej̄ guee yo', ne rej̄ xco yatzíj̄ cortiná yo' ne yo' o ve' cu'naj̄ rej̄ guee doj̄ a. <sup>4</sup> Ne rá ve' rej̄ guee doj̄ yo' nicun' aga' oró míi, ne aga' caca squí rihaan Diose me aga' oró míi tu'vee ndo' o yo' a. Ne vaa se-chrun̄j̄ Diose chrúún guee, ne chrúún qui'yaj̄ síi cu'naj̄ Moisés gaa ca'mii Diose se-nana Diose rihaan so'

me yo' a. Ne nu' xráá chrúún yo' nó aga' oró míi a. Ne rque chrúún yo' ro', nuú xruj̄ oró, ne rque xruj̄ oró cunuú se chá cu'naj̄ maná a. Ne x'núú xruj̄ oró yo' ro', naj̄ xruún síi cu'naj̄ Aarón chruun vará, ne chruun xra' ma'an̄ coj̄ rihaan me yo', ne x'núú chruun vará yo' ro', naj̄ yahij̄ no se-nana Diose nana guun rá Diose cuno nij síi israelitá a. <sup>5</sup> Ne xráá chrúún guee yo' ro', táá vij̄ aga', ne ase vaa se-mozó Diose ro', dan̄j̄ vaa curuvi' roj̄ aga' yo', ne querubines cu'naj̄ roj̄ aga' yo' a. Dan me se táá roj̄ aga' yo' che'é Diose, ne caráán xcoó roj̄ yo' man chrúún guee yo', ne rej̄ xráá chrúún guee yo' ro', me rej̄ tinavij̄ Diose cacun' che'é yuvī a. Tzaj̄ ne se nataj̄ doj̄ che'é rasuun yo' cuano a mei.

<sup>6</sup> Dan me se nu' nij rasuun yo' man rque roj̄ ve' yo' a. Ne daj̄ a güii atúj̄ nij xrej̄ rá ve' rej̄ guee yo', 'yaj̄ suun nij xrej̄ rihaan Diose che'é nij yuvī a. <sup>7</sup> Tzaj̄ ne rque 'o ve' rej̄ guee doj̄ yo' ro', orún' güii rque 'o yo' atúj̄ xrej̄ ata suun nocoo doj̄ rá ve' yo' nan̄j adon̄j. Ne dan me se rej̄ guee doj̄ yo' me se inanj̄ ton nicaj̄ xrej̄ atúj̄ xrej̄ rej̄ yo' adon̄j. Ne ton yo' me se yo' me ton che'é cacun' tumé ma'an̄ xrej̄ do', che'é cacun' qui'yaj̄ nij yuvī gaa ne xcaj̄ nij yuvī cuentá se vaa cacun' me se vaa qui'yaj̄ nij so' do' adon̄j. <sup>8</sup> Inanj̄ dan̄j̄ vaa tucuáán tihaan Nimán Diose a. Dan me se yo' o ne ve' cu'naj̄ rej̄ guee yo', ne che'é dan ne nó xcúún yuvī catuu yuvī rej̄ guee doj̄ yo' ma'. <sup>9</sup> Ne ase vaa rej̄ guee ro', vaa yo' yaj̄ adon̄j. Dan me se se cunūu sa' inanj̄ yuvī rihaan Diose qui'yaj̄ rej̄ guee yo' ma'. Ne yo' yaj̄ me se rque yuvī rasuun do', xcuu cacaa do', rihaan Diose, tzaj̄ ne taj̄ se qui'yá' cunūu sa' inanj̄ nimán yuvī rihaan Diose qui'yaj̄ rasuun yo' a ma'. <sup>10</sup> Maan̄ se ase vaa tucuáán nocoo yuvī che'é se chá yuvī do', che'é se 'o yuvī do', che'é daj̄ 'yaj̄ yuvī na'ya' yuvī do', vaa tucuáán che'é rasuun rque yuvī rihaan Diose nan̄j̄ á. Dan me se tucuáán nocoo' yuvī man̄j̄ yaj̄



me tucuáán yo', ne taj xna'anj nana yo' rihaan yuvii daj qui'yaj yuvii ne cunu sa' nee man yuvii rihaan Diose adonj. Tzaj ne asa' quisij nari' yuvii tucuáán naca cuchruj Diose, gaa ne ino uxrá qui'yaj nij yuvii canoco' nij yuvii Diose ei.

11 Dan me se guun Jesucristó xrej ata suun nocoo doj, ne cavii sa' uxrá ní', qui'yaj so', ne 'yaj suun so' yo'ó rej guee, tzaj ne nuveé ve' cune' yuvii rihaan chumii nihánj me yo'ó rej guee yo' ma'. 12 Ne orún' uun catúj so' rá rej guee yo', ne yuun che'e navij cacun' tumé ní' nu' cavii nu' ca'anj, qui'yaj so' nanj adonj. Tzaj ne nuveé nanj ton man tana do', ton man scúj le'ej do', me nicaj so' ma'. Maan se ton man ma'an ya so' nicaj so' gaa catúj so' rihaan Diose, ne qui'yaj canaán ya so' nanj adonj. 13 Dan me se sese ton man tana do', ton man scúj toró do', yaj man nij scúj vacá cacaa do', taman' xrej man nij yuvii, ne cunu sa' nee man nij yuvii yo' rihaan Diose, 14 gaa ne táa a ton man Jesucristó, ne sa' doj vaa yo' rihaan nu' nij rasuun yo' nanj chuguanj. Dan me se taj a doj cacun' tumé Jesucristó ma'. 'O se cayáán Nimán Diose ga so', ne che'é dan rque so' man ma'an so' rihaan Diose chuguanj. Che'é dan me doj a cunu sa' nimán ní', qui'yaj ton man Jesucristó, ne quinavij cacun' tumé ní' che'é se chi'ii qui'yaj ní' asij rque doj a. 'O se daj chihaa mój se cavii sa' ní', qui'yaj ma'an ní' ma'. Maan se cavii uun ní', qui'yaj ma'an ní' nanj ei. Tananj uún, ne taj che'é qui'yaj ní' se vaa 'yaj ní' nu' 'na' mei. Maan se yaj ro', qui'yaj ní' nu' rasuun rej rihaan ní', ne canoco' inanj ní' man Diose sí vaa i'na' yaj ei.

15 Dan me se Jesucristó me se cavii so' che'é rej quene'en so' se vaa ne guun nucaj yuvii canoco' nij yuvii nu' tucuáán cataj xna'anj Diose asino yaan rihaan sí cu'naj Moisés chuguanj. Che'é dan Jesucristó me sí narqué tucuáán naca che'é ní', cataj xna'anj so' nana naca rihaan ní' daj

qui'yaj ní', cavii sa' ní' rihaan Diose a. Che'é dan ní' sij canacúun Diose man ro', nacaj ní' nu' se sa' cataj xna'anj Diose se vaa rque so' rihaan ní' nu' cavii nu' ca'anj ei. 16 Dan me se sese vaa si'yaj yo'ó so' rasuun guun si'yaj yo'ó yuvii, ne asa' cavi' so', ne asino yaan cavi' so', gaa ne guun ya rá yuvii se vaa cavi' so', gaa ne ca'vee guun rasuun yo' si'yaj yo'ó yuvii yo' adonj. 17 'O se asa' quisij cavi' yo'ó so', gaa ne quisij ya nu' se-nana so' che'é si'yaj so' ei. Tzaj ne se guun quita'aa yuvii si'yaj yo'ó so' sese ataa cavi' so' mei. 18 Che'é dan gaa cataj xna'anj Diose asino yaan rihaan sí cu'naj Moisés daj qui'yaj nij yuvii israelitá cavii sa' nij so' rihaan Diose, ne vaa xcuu cavi' che'é nana yo' nana cataj xna'anj Diose, ne dan me se che'é ton cayan man xcuu yo' ro', che'é dan quisij ya nu' se-nana Diose che'é nij yuvii yo' adonj. 19 Dan me se gaa quisij cataj xna'anj sí cu'naj Moisés rihaan nij yuvii nu' nana me rá Diose cunó nij yuvii, gaa ne nicaj so' ton man scúj le'ej nicaj so' na nicaj so' cachij matzinj cachij maree nicaj so' coj cu'naj hisopo nicaj so', gaa ne taman' so' ton yo' rihaan yanj no se-nana Diose do', rihaan taran' nij yuvii do' adonj. 20 Ne cataj xna'anj so' rihaan nij yuvii a:

—Che'é ton nihánj quisij ya nu' nij nana cataj xna'anj Diose rihaan ní' daj qui'yaj ní' cavii sa' ní' rihaan Diose adonj —taj Moisés rihaan nij yuvii a.

21 Gaa ne taman' uún so' ton yo' rihaan ve' mantá guee do', rihaan nu' nij rasuun rasuun nij xrej gaa na'vív nij xrej rihaan Diose do' a. 22 Dan me se inanj ton me se vaa achiin che'é rej nahuun sa' que'ee uxrá rasuun rihaan Diose, taj se-tucuanj Moisés a. Ne sese nuvi' ton, ne se caráj x'naa Diose ni'yaj Diose cacun' tumé yuvii ma'.

23 Dan me se xa' nij rasuun taman' Moisés ton rihaan, tzaj ne ase vaa nij rasuun man rej xta' rej nicun' Diose vaa nij rasuun yo', ne achiin ton che'é

rej cunu sa' nij rasuun yo' rihaan Diose, ne che'é dan avi' xcuu, 'yaj Moisés chuguanj. Tzaj ne sa' uxrá doj vaa ma'an nij rasuun man rej xta' rihaan nij rasuun man rihaan chumii nihánj, ne che'é dan achiin se sa' doj rihaan ton man xcuu yan cunu sa' nij rasuun man rej xta' rej catuu ní' rihaan Diose ei. <sup>24</sup> Dan me se ma'an Jesucristó me sí' rqué ton man ma'an so', che'é rej cunu sa' nij rasuun man rej xta' che'é ní' ei. 'O se nuveé rej guee nuu rá ve' cune' ma'an yuvii me rej catúj Jesucristó ma'. 'O se rej guee man rihaan chumii nihánj ro', ase vaa rej nicun' ma'an Diose rej xta' vaa yo', tzaj ne nuveé ya ya rej nicun' Diose me yo' ma'. Tzaj ne yaj me se catúj ma'an Jesucristó rej xta' yo', ne cuano nicun' so' rihaan ma'an Diose, ne achíin ni'yaj so' rihaan Diose che'é ní' adonj. <sup>25</sup> Tzaj ne se qui'yaj so' ndaa vaa 'yaj nij xrej ata suun nocoo doj man rihaan chumii nihánj ma'. Nij xrej me se nicaj nij xrej ton man xcuu atúj nij xrej rá rej guee doj yo' daj a yo' adonj. Tzaj ne ne cachíin niganj rque Jesucristó ton man ma'an so' rihaan Diose man adonj. <sup>26</sup> 'O se sese vaa che'é qui'yaj so' danj, ne no xcúun so' que'ee ndo'o quiran' so' sayuun asij gaa qui'yaj Diose chumii nihánj ndaa cuano adonj. Tzaj ne yaj ro', nichrun' quinavij chumii nihánj, ne ndaa yaj ca'na' Jesucristó rihaan chumii nihánj, ne orún' uun cavi' so' che'é ní', ne navij nu' cacun' tumé ní' nanj adonj.

<sup>27</sup> Dan me se ne'en ní' daj quiran' 'o 'o ní' sij man rihaan chumii nihánj, ne dan me se ne'en ní' se vaa orún' uun cavi' 'o 'o ní', gaa ne canicun' ní' rihaan Diose, ne ca'ne' so' cacun' che'é ní' nanj adonj. <sup>28</sup> Ne dan me se che'é se orún' uun cavi' Jesucristó, ne tinavij so' cacun' tumé que'ee yuvii ro', vaa güii ca'na' uún so' rihaan chumii nihánj ei. Tzaj ne nuveé che'e rej cavi' uún so' che'é cacun' tumé yuvii me ca'na' so' ma'. 'O se ca'na' so', ne ní' sij na'vij ndo'o man so' ro', cavi' sa' ní' rihaan Diose, qui'yaj so' adonj.

## 10

<sup>1</sup> 'O se ase vaa nij se sa' quene'en ní' rej xraj vaa se-tucuanj Moisés, tzaj ne nuveé ma'an nij se sa' yo' me tucuáan yo' ma'. 'O se ticavi' nii man xcuu, ne rqué nii xcuu yo' rihaan Diose, ne inanj danj 'yaj nii 'o yo' 'o yo' nanj adonj. Dan me se taj güii yo' o cunu sa' ya nij sí' rqué rasuun yo' rihaan Diose ma'. <sup>2</sup> Dan me se x'néj cacun' xráá nij sí' rqué xcuu rihaan Diose, tzaj ne quene'en uún nij so' se vaa vaa doj cacun' tumé uún nij so', ne che'é dan se ca'ne' rá nij so' ga suun rqué xcuu cavi' rihaan Diose a ma'. <sup>3</sup> Dan me se che'é xcuu cavi' rqué nij so' rihaan Diose ro', che'é dan 'o yo' 'o yo' me se ne quini'yon nij so' se vaa sij tumé ya cacun' me nij so' a man adonj. <sup>4</sup> 'O se taj se qui'yá' quinavij cacun' tumé yuvii qui'yaj ton man scúj toró do', ton man tana do' a ma'. <sup>5</sup> Che'é dan ca'na' Jesucristó rihaan chumii nihánj, ne ca'mii so' rihaan Diose, cataj so':

—Taj se uun xcuu rque nij yuvii cavi' rihaan so' a ma'. Taj se uun nu' nij rasuun rque yuvii rihaan so' a ma'. Tzaj ne nee manj ro', vaa se uun rihaan so', ne che'é dan qui'yáá so' nee manj adonj. <sup>6</sup> Dan me se ne niha' rá so' ni'yaj so' xcuu acaa che'é cacun' ma'. <sup>7</sup> Dan me se cataj 'unj: “Veé 'unj nicun' rihaan so' 'na'. Rihaan dáan so' yanj libró nó nana a'mii che'é 'unj, se vaa qui'yáá 'unj nu' se vaa me rá so' qui'yáj, Ataj”, taj 'unj rihaan so' a —taj nana ca'mii Jesucristó rihaan Diose nana no rihaan danj Diose a.

<sup>8</sup> Dan me se cataj so' se vaa xcuu rqué yuvii rihaan Diose do', 'núú rqué yuvii rihaan Diose do', xcuu acaa do', xcuu avi' che'é cacun' do', ne achiin rihaan Diose ma'. Ne ne niha' rá Diose ni'yaj Diose rasuun yo' a man adonj. Ne nanj rasuun yo' me se rqué nij sí' nocoo se-tucuanj Moisés rihaan Diose nanj adonj.

<sup>9</sup> Gaa ne cataj uún so' a:

—Veé 'unj nicun' rihaan so', 'na' qui'yáá 'unj nu' se vaa me rá so' qui'yáj a —taj uún so' a.

Veé dan me tinavij so' tucuáán nga yo', ne vaa tucuáán naca cuchruj so' canoco' ní' a. <sup>10</sup> Ne che'é se yuun che'e nago' Jesucristó man ma'an so' rihaan Diose ndaa vaa guun rá Diose qui'yaj so' ro', che'é dan aj cunuu sa' ní' rihaan Diose adonj.

<sup>11</sup> Ne xa' taran' nij xrej, tzaj ne yo'o nicun' nij so' 'yaj suun nij so' rihaan Diose daj a güii, ne nanj xcuu do', 'núú do', rqué nij so' rihaan Diose, tzaj ne taj se qui'yá' x'nee cacun' xraá yuvii qui'yaj rasuun yo' ma'. <sup>12</sup> Tzaj ne Jesucristó me se orún' uun ca'vej so' cavi' so' che'é nij yuvii, ne yuun cavi' so' che'é nu' cacun' ata' nij yuvii nanj adonj. Dan me se rqué ma'an so' man so' rihaan Diose che'é nu' cacun' tumé yuvii, gaa ne ca'anj cayáán so' x'núú Diose rej nuva' Diose ei. <sup>13</sup> Ne cuano nihánj me se na'vij uun Jesucristó ndaa se qui'yaj canaán Diose rihaan taran' nij sí' taj ri'yunj man Jesucristó, gaa ne quirii ta'nga' Jesucristó rihaan taran' nij so' adonj. <sup>14</sup> 'O se orún' uun nago' so' man ma'an so' rihaan Diose, ne che'é dan yo'o cunuu sa' nij sí' sa' noco' man Diose nu' cavii nu' ca'anj ei. <sup>15</sup> Ne ma'an Nimán Diose taj xna'anj uún rihaan ní' daj quiran' ní' ei. Asino yaan cataj so':

<sup>16</sup> —Dan me se ino' do' gaa nana naca yo' nana tucu'yón 'unj rihaan nij so' asa' quisij güii yo' adonj. 'O se ca'nej 'unj xrej 'unj nimán nij so', ne cachron 'unj letrá nana yo' cúú raa nij so' daj qui'yaj nij so', ne quene'en ma'an nij so' qui'yaj nij so' rasuun sa' adonj —taj sí' 'nij ra'a man ní' a.

<sup>17</sup> Gaa ne cataj uún so':

—Ne güej nu' cacun' tumé nij so' xraá nij so', qui'yáj á —taj uún Nimán Diose a.

<sup>18</sup> Ne che'é se aj caráj x'naa Diose che'é cacun' tumé ní' ro', che'é dan ca'ne' rá ní' ga' suun rqué rasuun rihaan Diose che'é cacun' nanj adonj.

*Nana nihánj taj xna'anj se vaa no xcuún ní' canoco' raan ní' man Diose a*

<sup>19</sup> Dan me se che'é se cayanj ton man Jesucristó ro', che'é dan taj che'é cuchu'vi' ní' catuu ní' rá rej guee xta' a ma'. Dan me se taj che'é cuchu'vi' ní' canicun' ní' rihaan ma'an Diose, man tinuj, man nocoj. <sup>20</sup> 'O se cavi' nee man Jesucristó, ne inanj danj ca'nú' so' chrej naca rihaan ní' catuu ní' rihaan Diose, ne gaa i'na' ní' rihaan Diose nanj adonj. <sup>21</sup> Ne xrej sa' uxrá me uún Jesucristó che'é ní' sij noco' man Diose nanj ei. <sup>22</sup> Che'é dan no' xcúún ní' cuchí' ní' rihaan Diose, ne che'é se amán rá ní' ni'yaj ní' man Jesucristó, che'é dan guun ya uxrá rá ní' se vaa ca'vee canoco' sa' ní' man Diose, ne 'o' cuyaán gaa rá taran' ní' ei. Dan me se 'o' cuyaán gaa rá taran' ní', che'é yan quisij nanó rá ní' che'é cacun' tumé ní', ne cunuu sa' ya nimán ní', qui'yaj ní', gaa canoco' ní' man Jesucristó nanj chuguanj. Ne cata' ne ní' rque na sa', ne cunuu sa' ya nee man ní' nanj adonj.

<sup>23</sup> Ne yo'o cuchuman rá ní' se vaa ya cavii sa' ní', ne se guun vij rá ní' daj chihaa míj mei. 'O se vaa che'é gaa nucuaj rá ní' man sí' cataj se vaa sa' qui'yaj so' che'é ní' á. <sup>24</sup> Ne xcaj ní' cuentá che'é tinúú ní' daj qui'yaj ní' ne sa' do' cunuu 'ee rá nij tinúú ní' man tuví' so', ne do' a qui'yaj suun nij tinúú ní' suun sa' che'é Diose a. <sup>25</sup> Ne se tanáj ní' tucuáán nuu chre' ní' ga' tinúú ní' ma'. 'O se vaa yuvii ne noco' tucuáán yo', tzaj ne no' xcúún soj nago' soj chrej nucuaj man tinúú soj gaa nuu chre' soj ei. Ne yaj ro', me se do' a cunuu chre' soj, che'é yan ne'en soj se vaa nichrun' quisij güii ca'na' uún Jesucristó rihaan chumii nihánj nanj adonj.

<sup>26</sup> 'O se sese aj canoco' ní' nana ya nana nari' ní', gaa ne sese quirii nimán ní' qui'yaj ní' cacun', ne taj vaj yo'ó se vaa qui'yaj ní' gaa ne caraá x'naa Diose uún che'é cacun' tumé ní' a ma'. <sup>27</sup> Dan me se nique ní', ne vaa güii ca'ne' Diose cacun' che'é ní', ne gaa yo'o ya'an, ne guun niha' uxrá rá ya'an yo' cha' ya'an yo' man nij sí' taj ri'yunj man Diose nanj adonj.

28 Xa' nij sí noco' se-tucuanj Moisés, tzaj ne sese 'yaj 'o tuvi' nij so' cacun', ne sese vaa vij va'nuj sí quene'en se vaa 'yaj so' cacun', ne se cunuu 'ee rá nii man so' a ma'. Maan se avi' so' cuaj, 'yaj nii nanj á. 29 Ne nij uxrá doj gaa sayuun quiran' sí taj ri'yunj man ma'an ta'ní Diose adonj. 'O se ton man Jesucristó ro', qui'yaj cunuu sa' ní rihaan Diose ne yo'o canoco' ní chrej sa' cuchruj Diose che'é ní ei. Tzaj ne taj yu'vee nó ton yo', rá nij sí tanáj xco se-nana Jesucristó a ma'. Ne quij a'mii nij so' rihaan Nimán Diose sí qui'yaj ndo'o se luj che'é ní ei. 30 'O se aj ne'en ní daj ca'mii Diose, cataj Diose:

—'Unj me sí nō xcúún qui'yaj sayuun man yuvij tumé cacun' a. Ya naru'vee 'unj nu' che'é se vaa qui'yaj nij so' rihaan chumij nanj á —taj Diose a.

Ne taj uún Diose:

—'Unj sij 'nij ra'a man soj ro', ca'nej cacun' che'é soj sij noco' manj adonj —taj uún Diose a.

31 Dan me se kuchu'vi' ndo'o vaa me se vaa quiran' nij sí tanáj ra'a Diose vaa i'na' ya adonj.

32 Dan me se cunuú rá soj daj qui'yaj soj gaa guun che'e soj canoco' soj man Jesucristó ei. Dan me se gaa guun che'e soj canoco' soj man Jesucristó, ne sí xcaj cuentá me soj, ne guun nucuaj soj quiran' soj sayuun, ne yo'o raan canoco' soj man Jesucristó chuguanj. 33 Ne quene'en yuvij daj sij me soj, ne nachri' nij yuvij ni'yaj nij yuvij man soj, ne qui'yaj nij yuvij sayuun man soj, ne guun tuvi' soj ga yo'ó nij sí ran' sayuun yo' a.

34 'O se cunuu 'ee rá soj man tinúú soj nij sí 'nij taga', ne guun niha' rá soj ni'yaj soj se vaa ca'néj yuvij si'yaj soj che'é se sij noco' man Jesucristó me soj a. 'O se ne'en soj se vaa sa' doj vaa si'yaj soj rasuun nicaj soj rej xta', ne rasuun yo' me se daj chihaa mij se quinavij rasuun yo' a man adonj. 35 Dan me se se gaa kuchu'vi' soj canoco' soj man Jesucristó, ne se ca'ne' rá soj ma'. Ne 'o veé danj gaa rá

soj nu' cavii nu' ca'anj ei. Che'é yan a'néé nucuaj nimán soj ro', vaa güii, ne noco' ya vaa rasuun quirí' soj ei. 36 'O se vaa che'é gaa inaj nimán soj, ne yo'o qui'yaj soj se vaa me rá Diose qui'yaj soj, ne vaa güii nacaj soj nu' se vaa cataj Diose nacaj soj chuguanj.

37 Dan me se danj Diose taj se vaa nichrun' ca'na' sí ca'na', ne se guun raan so' ma'. 38 Ne sí sa' rihaan Diose ro', maan che'é se amán rá so' ro', che'é dan yo'o cayáán so' ga Diose adonj. Tzaj ne sese canicaj so' rej xco so', ne se gaa niha' rá Diose quene'en Diose man so' a ma', taj danj Diose a.

39 Tzaj ne nuveé sij anicaj rma'an rej xco me ní ma'. Che'é dan se quirí' ní ma'. 'O se sij nucuaj rá man Diose me ní, ne che'é dan quinanii nimán ní rihaan sayuun adonj.

## 11

*Nana nihánj taj xna'anj daj 'yaj sí amán rá ni'yaj man Diose a*

1 Vaa se ne ruvi' ni'yaj yuvij, tzaj ne guun ya rá ní se vaa ya vaa nu' nij rasuun yo' ei. Tzaj ne orún' ní sij amán rá ni'yaj man Diose me nij sí amán rá se vaa ya vaa nu' nij rasuun yo' chuguanj. 2 Ne nij sí man gaa naá ro', amán rá nij so' ni'yaj nij so' Diose, ne che'é dan gaa naá cataj Diose se vaa sí sa' me nij so' ei.

3 Xa' ma'an ní, tzaj ne che'é se amán rá ní ni'yaj ní Diose ro', che'é dan xcaj ní cuentá se vaa ca'mii Diose, gaa ne guun nu' nij chumii, qui'yaj so' adonj. Dan me se nicaj Diose rasuun ne ruvi', ne qui'yaj Diose nu' rasuun ruvi' ni'yaj ní adonj.

4 Xa' sí cu'naj Abel, tzaj ne che'é se cuchumán rá so' ni'yaj so' Diose ro', che'é dan sa' doj vaa se rqué so' rihaan Diose, ne tinúú so' Caín me se nij doj vaa rasuun rqué so' man Diose adonj. Che'é dan cataj Diose se vaa sa' vaa nimán sí cu'naj Abel, ni'yaj Diose che'é nij rasuun rqué sí cu'naj Abel rihaan Diose a. Dan me se che'é se cuchumán rá so' ni'yaj so' Diose ro',



che'é dan yaj taj xna'anj yuvij che'é so' daj qui'yaj so' gaa naá nanj adonj.

<sup>5</sup> Xa' síi cu'naj Enoc, tzaj ne che'é se cuchumán ndo'o rá so' ni'yaj so' Diose ro', che'é dan vaa i'na' so' cavii so' ca'anj so' rej xta' rej yanj Diose, ne ne ca'vej rá Diose cavi' so' ma'. Dan me se nano' ndo'o nii man so', tzaj ne ne nari' nii man so' a ma'. Maan se naxcaj nu' Diose man so' ca'anj so' rej xta' nanj adonj. 'O se gaa ataa cavii so' rej xta', ne cataj xna'anj Diose che'é so' se vaa guun niha' uxrá rá Diose ni'yaj Diose man so', che'é se síi sa' guun so' rihaan Diose ei. <sup>6</sup> Tzaj ne síi ne amán rá ni'yaj man Diose ro', daj chihaa mij se guun niha' rá Diose ni'yaj Diose man so' a ma'. 'O se síi me rá cuchí' rihaan Diose ro', no xcuún so' cuchuman rá so' se vaa ya vaa Diose, ne vaa che'é cuchuman rá so' se vaa naru'vee ma'an Diose rihaan nij síi nano' ya man Diose ei.

<sup>7</sup> Dan me se síi cu'naj Noé, tzaj ne che'é se cuchumán ndo'o rá so' ni'yaj so' Diose ro', che'é dan, nda' se ataa quene'en so' daj gaa sayuun qui'yaj Diose man chumij nihánj, tzaj ne maan che'é se ve'é cuno so' nana cataj xna'anj Diose rihaan so', ne che'é dan qui'yaj so' rihoo xij chéé rihaan na, ne che'é dan me quinanii nij tuví' nij so' rihaan sayuun yo' adonj. Ne maan che'é se cuchumán ya rá so' ni'yaj so' Diose, che'é dan cuta' so' cacun' ya xráá nij yuvij man rihaan chumij se vaa ne ca'vej rá nij yuvij cuno nij yuvij se-nana Diose, ne guun ma'an so' síi sa' ni'yaj Diose adonj.

<sup>8</sup> Dan me se síi cu'naj Abraham uún me se che'é se cuchumán ndo'o rá so' ni'yaj so' Diose ro', che'é dan cuno so' rihaan Diose gaa canacúún Diose man so', ne cavii so' ca'anj so' rej rque Diose yo'ó guun to'oj so' vaa güii a. Dan me se a doj ne quene'en so' me rej cuchí' so', tzaj ne ne guun vij rá so' ma'. Maan se cavii so' ca'anj so' adonj. <sup>9</sup> Dan me se maan che'é se cuchumán rá so' ni'yaj so' Diose ro', che'é dan cavii so' chiháán so' ca'anj so' rej cataj xna'anj Diose se vaa guun

to'oj so' ei. Ne gaa cuchí' so' yo'ó yo', ne to'oj yo'ó yuvij me yo'ó yo', tzaj ne veé danj quináj síi cu'naj Abraham yo', ne cuta' so' ve' mantá, ne yáán so' ga ta'níi so' síi cu'naj Isaac do', ta'nij si'no so' síi cu'naj Jacob do' a. Taran' nij so' me síi guun to'oj yo', cataj Diose rihaan síi cu'naj Abraham a. <sup>10</sup> Danj qui'yaj síi cu'naj Abraham, cuno so' rihaan Diose, che'é se sij na'vij ndo'o cayáán yo'ó chuman' nocoo chuman' naj rej xta' me so' a. Ne nuveé ve' mantá uun me chuman' yo' ma'. 'O se raan ndo'o vaa tacóo nu' ve' naj chuman' yo' ei. 'O se ma'an Diose cuchruj chuman' yo', ne ma'an Diose qui'yaj nu' chuman' yo' adonj.

<sup>11</sup> Dan me se che'é se cuchumán rá síi cu'naj Abraham ni'yaj so' Diose ro', che'é dan nda' se chana ituun me nica so' chana cu'naj Sará, ne nda' se chii nga me ma'an so', tzaj ne guun nucuaj rá so' man Diose se vaa ca'ngaa ta'níi so', che'é se cuchumán rá so' se vaa Diose me síi qui'yaj nu' se vaa cataj xna'anj ma'an Diose rihaan so' adonj. <sup>12</sup> Dan me se nda' se daj doj cavi' síi chii nga yo', tzaj ne xna'anj ndo'o nij so', ne ase vaa que'ee ndo'o nij yati' man rej xta' ro', danj vaa guun que'ee uxrá nij tuví' nij so' nij síi israelitá yo', ne dan me se ase vaa naj yo'óo chruu tu'va na ya'anj ro', cunudanj vaa xna'anj nij so' nanj adonj.

<sup>13</sup> Dan me se yo'o cuchumán rá taran' nij síi man gaa naá ni'yaj nij so' Diose ndaa se cavi' taran' nij so' ei. Ne ne quirí' ma'an nij so' se vaa cataj xna'anj Diose se vaa rque Diose rihaan nij tuví' nij so' ma'. Tzaj ne quene'en nij so' se vaa vaa güii qui'yaj Diose cunudanj yo', ne che'é dan guun niha' rá nij so' nanj adonj. Ne cataj xna'anj nij so' se vaa nuveé chihanj nij so' me chumij nihánj ma'. Maan se vaj uun nij so' doj rihaan chumij nihánj, ne síi man yo'ó chumij me nij so', cataj ma'an nij so' nanj adonj. <sup>14</sup> Ne síi a'mii danj me se nata' nij so' se vaa nano' uxrá nij so' yo'ó chumij guun chihanj nij so' ei.

15 Ne sese guun rá nij so' se vaa sij chihanj chumiij nihánj me nij so', ne gaa ya'núj rihaan nij so' nanicaj nij so' chiháán nij so' chuman' naj rihaan chumiij nihánj, tzaj ne ne guun rá nij so' danj ma'. 16 'O se guun ndo'o rá nij so' cane nij so' chuman' sa' doj chuman' naj rej xta' ei. Ne sese taj vaj chuman' sa' cayáán nij so' vaa güii, ne guun na'aj Diose gaa nanj ei. Tzaj ne taj che'é guun na'aj Diose ma'. 'O ya vaa chuman' noco cayáán nij so', qui'yaj Diose ei.

17 Ne che'é se cuchumán rá síi cu'naj Abraham ni'yaj so' Diose ro', che'é dan gaa guun rá Diose quene'en Diose sese raan ya noco' so' man Diose, ne ca'vej rá síi cu'naj Abraham ticavi' so' rihaan Diose man orún' ta'níi so' Isaac síi rqué ma'an Diose man so' a. Dan me se danj qui'yaj síi cu'naj Abraham yo', che'é se me ndo'o rá so' ni'yaj so' Diose a. Ne Isaac me síi rqué Diose guun ta'nij síi cu'naj Abraham, ndaa vaa cataj xna'anj Diose rihaan so' se vaa gaa ta'níi so' a. 18 Dan me se cataj xna'anj Diose rihaan síi cu'naj Abraham se vaa cumán ndo'o ta'níi ta'nij si'no síi cu'naj Abraham qui'yaj síi cu'naj Isaac yo' a. 19 Ne nda' se guun ndo'o rá síi cu'naj Abraham ca'ngaa ta'níi ta'nij si'no so', tzaj ne ca'vej rá so' ticavi' so' man síi cu'naj Isaac rihaan Diose nanj chuguanj. 'O se guun rá so' se vaa guun nucuaj Diose cunuu i'na' uún yuviij qui'yaj Diose asa' cavi' yuviij, rá so' a. Dan me se ya uxrá, ne daj doj se cavi' síi cu'naj Isaac, qui'yaj Abraham, tzaj ne caráán Diose rihaan so', ne tanáj uún Diose man síi cu'naj Isaac rihaan síi cu'naj Abraham a.

20 Dan me se síi cu'naj Isaac me se che'é se cuchumán rá so' ni'yaj so' Diose ro', che'é dan cataj so' se vaa qui'yaj Diose se luj che'é roj ta'níi so' síi cu'naj Jacob ga síi cu'naj Esaú a. Ne cataj xna'anj so' daj gaa quiran' roj ta'níi so' rej rihaan roj so' a.

21 Dan me se síi cu'naj Jacob me se che'é se cuchumán rá so' ni'yaj so'

Diose ro', che'é dan gaa nichrun' cavi' so', ne cataj so' se vaa qui'yaj Diose se luj che'é roj ta'níi síi cu'naj José, ne dan me se ru'maan so' se-garro'té so' rihaan yo'óó, ne quina'víj ndo'o so' rihaan Diose a.

22 Ne dan me se síi cu'naj José me se che'é se cuchumán rá so' ni'yaj so' Diose, che'é dan gaa nichrun' cavi' so', ne nuchruj raa so' daj qui'yaj nij yuviij israelitá ga cúu man so' asa' curihanj nij so' Egiptó vaa güii, ne che'é dan cataj xna'anj so' se vaa asa' cavii nij síi israelitá rej Egiptó, ne quirii nij so' cúu man ma'an so' nicaj nij so' ca'anj nij so', cataj so' rihaan nij so' a.

23 Dan me se Moisés me se che'é se cuchumán rá nij tuvi' síi cu'naj Moisés ni'yaj nij so' Diose ro', che'é dan va'núj ya yavii caxrj yuve nij so' man Moisés gaa ca'ngaa so' a. Danj qui'yaj nij so' che'é se quene'en nij so' se vaa ve'é ndo'o vaa ne'ej yo' a. Ne ne cuhu'vi' nij so' rihaan síi nicaj suun rey síi cataj xna'anj se vaa cavi' nu' ta'níi nij so' ne'ej sno'o cunii a ma'.

24 Che'é se cuchumán rá ma'an síi cu'naj Moisés ni'yaj so' Diose ro', che'é dan gaa cachij so', ne ne ca'vej rá so' cataj yuviij se vaa ta'nij si'no síi nicaj suun rey cu'naj Faraón me so' ma'. 25 'O se ca'neé nimán so' quiran' so' sayuun ga nij yuviij noco' man Diose nanj adonj. 'O se sa' a doj vaa canocó' man Diose, rá so', ne nij vaa guun niha' rá qui'yá' cacun' rihaan Diose yaj vaa i'na' rihaan chumiij nihánj, rá so' a. 26 Dan me se vaa yu'vee ndo'o nó sayuun quiran' so' che'é síi ca'nej Diose tinanii man yuviij man rihaan chumiij nihánj rihaan sayuun, ne taj yu'vee nó taran' nij rasuun sa' man rej cu'naj Egiptó, rá so', ne ve'é a doj canocó' man Diose, rá Moisés a. 'O se aj navij nu' nuchruj raa so' che'é nu' rasuun sa' rque Diose man so' ei. 27 Che'é se cuchumán rá so', che'é dan tanáj so' Egiptó ca'anj so', ne ne cuhu'vi' so' daj qui'yaj síi nicaj suun rey man

so' ma'. Nda' se ne ruvi' Diose ni'yaj yuvii, tzaj ne ase 'yaj sí ruvi' nicun' Diose rihaan ro', danj qui'yaj sí cu'naj Moisés, yo'o canoco' so' man Diose adonj. <sup>28</sup> Che'é se cuchumán rá so' ni'yaj so' Diose, che'é dan cuchruj so' cha'anj cu'naj pascuá navij rá nij yuvii israelitá, ne cataj xna'anj so' rihaan nij yuvii israelitá se vaa caxrii nij so' ton matzinj tu'va ta'yaa rihaan tucuá nij so', gaa ne se gaa nanj cavi' ta'níi nij so' síi chava' qui'yaj se-mozó Diose síi 'yaj avi' ndo'o yuvii, taj Moisés rihaan nij so' a.

<sup>29</sup> Dan me se nij yuvii israelitá me se che'é se cuchumán rá nij so' ni'yaj nij so' Diose ro', che'é dan guun nucuaj nij so' cachén nij so' tanuu na ya'anj cu'naj Na Ya'anj Ve'ej a. Ne ca'ne' na ya'anj yo' man yo', ne quináj yo'óo nacoó inanj cachén nij so', qui'yaj Diose a. Tzaj ne gaa guun rá nij síi man Egiptó cachén nij so' rihaan yo'óo nacoó yo' me se caráán na xráá nij so', ne canó xráá nij so', qui'yaj na yo' a.

<sup>30</sup> Ne che'é se cuchumán rá nij yuvii israelitá ni'yaj nij so' Diose ro', che'é dan cachén chij ya güii gaa aman tu-cuachriin nij so' nu' anicaj chuman' cu'naj Jericó, ne canee nu' chingá nicun' nu' anicaj tu'va chuman' yo', qui'yaj Diose, che'é yan cuchumán rá nij so' ni'yaj nij so' Diose a.

<sup>31</sup> Dan me se che'é se cuchumán rá chana niha' rá ga chii chana cu'naj Rahab ni'yaj no' Diose ro', che'é dan ne cavi' no' ga yo'óo nij síi man chiháán no' síi ne ca'vej rá cuno rihaan Diose a. Maan se ve'é nacaj no' man roj síi israelitá síi me rá quene'en daj vaa nu' chiháán no', ne ne qui'yaj no' sayuun man roj so' a.

<sup>32</sup> Ne me yo'óo nana cataj xna'anj 'unj rihaan nij soj, rá soj ga. 'O se achén ndo'o orá, 'yáá 'unj, ne ataa cataj xna'anj 'unj che'é síi cu'naj Gedeón do', che'é síi cu'naj Barac do', che'é síi cu'naj Sansón do', che'é síi cu'naj Jefe do', che'é síi cu'naj David do', che'é síi cu'naj Samuel do', che'é yo'óo taran' nij síi nata' se-nana

Diose gaa naá do', nanj chuguanj. <sup>33</sup> Dan me se che'é se cuchumán rá nij so' ni'yaj nij so' Diose ro', che'é dan qui'yaj canaán nij so' rihaan síi nicaj suun rey do', ca'ne' sa' nij so' cacun' che'é yuvii do', quiri' nij so' se vaa cataj xna'anj Diose quiri' ya nij so' do', guun nucuaj nij so' caráán nij so' tu'va chuvaá do', <sup>34</sup> tina'áj nij so' ya'an yuvaá se gaa nanj cacaa nij so' qui'yaj ya'an do', quinanii nij so' rihaan yuvii nicaj neé espadá me rá ticavi' man nij so' do', nari' nucuaj nij so' qui'yaj Diose gaa ninaj nij so' do', guun nucuaj nij so' qui'yaj canaán nij so' rihaan síi man yo'óo chuman' síi cunu' ga nij so' do' ei. <sup>35</sup> Ne vaa nij chana cuchumán rá ni'yaj man Diose se vaa ya cunuu i'na' uún tuvi' nij chana síi cavi', ne ya uxrá cunuu i'na' uún tuvi' nij chana yo' ei.

Ne yo'óo ta'aj nij síi cuchumán rá ni'yaj man Diose ro', quita'aa nii numij nii man nij so', ne go' uxrá nii man nij so' ndaa se cavi' nij so' ei. Dan me se cavi' nij so' che'é se ne ca'vej rá nij so' cataj nij so' se vaa nij vaa Diose a. 'O se sa' doj cavi' nij so' che'é Diose, ne ve'é doj cunuu i'na' uún nij so' vaa güii qui'yaj Diose, rá nij so' a. <sup>36</sup> Ne yo'óo ta'aj nij so' me se ca'nga' nacoó yuvii ni'yaj yuvii man yo'óo ta'aj nij so', ne go' yuvii cuartá xráá nij so', ne yo'óo ta'aj nij so' me se numij nii aga' ne' ra'a nij so', ne caxrij nii taga' man nij so' chuguanj. <sup>37</sup> Yo'óo ta'aj nij so' cavi', qui'yaj yuvii gaa go' nij yuvii yahij man nij so' a. Ne ta'aj nij so' ro', ca'ne' aga' seraa a'ne' chruun man nij so' a. Go' yuvii neé espadá man ta'aj nij so' a. Ne dan me se taran' nij síi sa' yo' me se cachéé uun nij so' rej xraj rej rque rihaan chumii nihánj, ne taj vaj ve' sa' cayáán nij so' ma'. Ne inanj nuj matzinj do', nuj tana do', cunuú nij so' ei. Ne síi nique uxrá me nij so', ne síi cachiin ndo'o rasuun rihaan guun uún nij so', ne síi nij uxrá quiran' guun uún nij so', qui'yaj yuvii ei. <sup>38</sup> Dan me se sij sa' uxrá me nij so', ne ne nó xcúún nij yuvii man rihaan chumii nihánj cayáán nij so' ga nij

yuvii nihánj a man adonj. Dan me se táá ri'yunj yuvii man nij so' rihaan chumii nihánj, ne dan me se unánj nij so' tucúá nij so', ne vaj nij so' rej tacaan do', rej quij do', atúj nij so' rque yu'uj taj yuvej do', rque yu'uj taj rque yo'óo do', 'yaj nij yuvii yo' nanj adonj.

<sup>39</sup> Ne dan me se nda' se guun niha' rá Diose ni'yaj Diose man cunudanj nij so' che'é se cuchumán rá nij so' ni'yaj nij so' Diose, tzaj ne ne quiri' nij so' nu' se vaa cataj xna'anj Diose se vaa qui'yaj Diose che'é nij síi noco' man so' ma'. <sup>40</sup> 'O se aj ne'en Diose se vaa sa' doj gaa suun qui'yaj suun ní' che'é so', ne che'é dan ne ca'vej rá Diose cunu sa' inanj nij síi cumán gaa naá yo' rihaan Diose, gaa ataa cunu sa' ma'an ní' rihaan so' ma'. 'O se che'é ní' me guun raan qui'yaj Diose nu' se sa' che'é nij síi cumán gaa naá yo' adonj.

## 12

*Nana nihánj taj xna'anj se vaa se ca'ne' rá ní' ga suun noco' man Diose á*

<sup>1</sup> Dan me se sa' uxrá vaa nij síi man gaa naá, ne cuano nihánj me se man nij so' nu' anicaj rej x'nuj ní' ni'yaj nij so' man ní' daj 'yaj ma'an ní' adonj. Che'é dan ne daj qui'yaj ní', rá soj ga. Maan se tanáj xco ní' nu' se vaa caráán chrej rihaan ní' qui'yaj suun ní', ne tanáj xco ní' nu' chrej chi'ii ei. 'O se sayuun ndo'o vaa tanáj xco ní' chrej chi'ii yo' adonj. Ne dan me se yo'o qui'yaj suun ní' nu' suun vaa rihaan ní' ei. Dan me se ase vaa síi unánj tico tuvi' ro', danj gaa ní', ne se ca'ne' rá ní' ca'anj ní' rej rihaan ní' ma'. <sup>2</sup> Tzaj ne yo'o ni'yaj ní' rej nicun' Jesucristó, ne veé so' me síi cuchruj tucúáán amán rá ni'yaj man Diose ei. Dan me se cuchumán rá ma'an so' ni'yaj so' Diose, ne so' me síi quisíj qui'yaj ya nu' suun vaa rihaan so' che'é rej canoco' ní' man so' adonj. Dan me se guun rá Jesucristó se vaa cavii sa' yuvii qui'yaj so', ne quene'en so' se vaa guun niha' rá so' sese cavii

sa' nij yuvii, ne che'é dan guun nu-cuaj so' cavi' so' rihaan rcutze, ne ne xcaj so' cuentá che'é rej ca'nga' naco yuvii ni'yaj yuvii man so' ma'. Ne xcaj ní' cuentá se vaa x'núú Diose rej nuva' Diose ro', ne so' cuano, uun chij so' ga Diose chuguanj. <sup>3</sup> Che'é dan me nuchruj raá soj se vaa ase vaa taj ri'yunj yuvii tumé cacun' man soj ro', danj táá ri'yunj yuvii tumé cacun' man uún so' chuguanj. Tzaj ne ne ca'ne' rá so' ma'. Tananj soj uún, ne nuchruj raá soj, ne se ninaj nimán soj mei.

<sup>4</sup> Dan me se 'yaj ndo'o nij síi tumé cacun' sayuun man soj, tzaj ne aj ne'enj se vaa na'vej uxrá rá soj qui'yaj soj cacun' ga nij so' ma'. Ne nda' se sayuun 'yaj nij so' man nij soj, tzaj ne ne cavi' nij soj, qui'yaj nij so' mei. <sup>5</sup> Ne aj ni'yón soj chrej nucuj no' rihaan danj Diose, nanj raj a. Dan me se ase vaa ta'nii Diose vaa soj, taj nana yo' chuguanj. Ne nihánj me se taj nana yo' ei: "Cunó so' ca'mij, ta'nij ne'ej. Se guun nachri' so' chrej sa' rqué síi 'nij ra'a man ní' mán so' ma'. Ne se quiri' rá so' asa' caxrj yuvaa síi 'nij ra'a man ní' mán so' che'é cacun' 'yáa so' mei. <sup>6</sup> 'O se síi 'nij ra'a man ní' me se tucuyón so' man taran' ní' sij 'ee rá so', ne uun yuvaa so' man taran' nij síi nacaj so' guun ta'nij so', sese qui'yaj nij so' cacun' adonj." Dan me se nu' nana yo' me a'mii danj Diose ei. <sup>7</sup> Dan me se sese guun nucuj soj gaa axrj yuvaa Diose man soj, ne cunaj ndo'o vaa yo' ei. Dan me se ase 'yaj nij síi man nihánj ga ta'nii so' ro', danj 'yaj Diose ga soj chuguanj. Ne me sij ta'nij me yo'o so' sese ne yuvaa rej so' man so' ne ne narqué rej so' chrej rihaan so' ga. Daj chihaa mój se cavii sa' síi vaa danj ma'. <sup>8</sup> 'O se cunudanj yuvii yuvaa rej man sese qui'yaj nij so' cacun' ei. Tzaj ne sese ne yuvaa rej ní' Diose man soj, ne nuveé ta'nij Diose me soj gaa a ma'. Dan me se taj vaj rej soj gaa mei.

<sup>9</sup> Dan me se vaa rej ní' síi ne rihaan chumii nihánj, ne caráj cochroj ní' rihaan nij so' gaa narqué nij so' chrej



rihaan ní' daj qui'yaj ní' adonj. Che'é dan táá a doj sese cunō sa' ní' rihaan Diose chuguanj. 'O se rej nimán ya ní' me Diose chuguanj. Dan me se yo'o gaa i'na' nimán ní', qui'yaj so' ei. <sup>10</sup> Dan me se gaa me ní' xnii ro', doj güii me yo', ne güii yo' me se tucu'yón rej ní' rihaan ní' daj qui'yaj ní' cavii sa' ní', ne narqué so' chrej man ní' adonj. Dan me se qui'yaj rej ní' ndaa vaa me rá ma'an so' ga ní' ei. Dan me se Diose me se sa' uxrá doj cavii sa' ní', qui'yaj xrej so' chrej sa' chuguanj. Dan me se ase vaa Diose, sa' inanj vaa so' ro', danj gaa sa' inanj ma'an ní', qui'yaj Diose ei. <sup>11</sup> Tzaj ne ya uxrá, ne gaa tihaj narqué nii chrej man ní', ne sayuun uxrá vaa nari' ní' daj qui'yaj ní', ne ne niha' uxrá rá ní' ma'. 'O se nanó rá ní', gaa sayuun vaa yo' adonj. Tzaj ne achén doj, ne nuu sa' nimán ní' 'yaj chrej sa' yo', ne nuu xej nimán ní', 'yaj yo' ei.

<sup>12</sup> Che'é dan ase 'yaj síi naqui'yaj nica ra'a do', tacóo do', danj qui'yaj soj, naqui'yaj nica soj nimán soj sese vaa vij nimán soj ei. <sup>13</sup> Ne ase 'yaj síi naqui'yaj sa' chrej cachee yuvii ro', danj qui'yaj soj, nuchruj raá soj daj qui'yaj nimán soj ei. Asa' quisij qui'yaj soj danj, gaa ne ca'vee se nuveé sij noco' sa' chrej sa' me soj, tzaj ne se tanáj nu' soj chrej sa' ma'. 'O se cunu sa' soj adonj.

<sup>14</sup> Dan me se tirquee soj gaa dínj cayáán soj ga cunudanj yuvii ei. Ne tirquee soj cunu sa' soj ndaa vaa ma'an Diose ei. 'O se sese taj vaj se sa' yo', ne daj chihaa mój se quene'en ní' man síi 'nij ra'a man ní' ma'. <sup>15</sup> Ne tumé soj man soj, gaa ne se gaa nanj tanáj yo'o tinúú soj se luj qui'yaj Diose che'é ní' ei. Dan me se se guun nachri' yo'o tinúú soj ni'yaj so' tinúú so' ma'. Tadó uxrá soj che'é se 'o síi nachri' ni'yaj tinúú ro', qui'yaj quirí' rá que'ee tinúú soj ei. <sup>16</sup> Ne se guun cataj yo'o tinúú soj se vaa taj se uun se-nana Diose mei. 'O se ase vaa síi cu'naj Esaú síi cane gaa naá vaa síi a'mii danj chuguanj. Dan me se síi chava' me síi cu'naj Esaú, tzaj

ne nu' rasuun sa' tanáj rej so' rihaan so' me se cutu'vej so' nu' rasuun sa' yo' rihaan tinúú so', che'é se guun rá so' rque tinúú so' doj se chá chá so' chuguanj. <sup>17</sup> Ne aj ne'en soj se vaa cachén doj, gaa ne guun rá uún síi cu'naj Esaú cataj rej so' se vaa nacaj uún so' se sa' yo', tzaj ne quináj uun so' nanj ei. 'O se taj se qui'yá' tucua'anj ni'ya so' nana ca'mii so' a ma'. Nda' se ndaa ta'vee ma'an so' che'é yan guun rá so' quirí' so' se sa' yo', tzaj ne ne quirí' so' daj chihaa mój a ma'.

<sup>18</sup> Dan me se tumé uxrá soj man soj ei. 'O se cavii sa' soj doj rihaan nij síi israelitá vaa nanj chuguanj. Nij so' me se cuchi' nij so' tacóo quij xcaan rej rque Diose se-nana Diose rihaan síi cu'naj Moisés, ne quene'en nij so' caco' ya'an raá quij quene'en nij so' rej rmi' ndo'o quene'en nij so' nana yuvaá quene'en nij so' do' ei. <sup>19</sup> Tananj uún, ne cuno nij so' chruun a'yánj cuno nij so' nana ca'mii ma'an Diose rihaan nij so' do' ei. Dan me se cuchu'vi' uxrá nij so', ne cachíin ni'yaj nij so' rihaan Diose se vaa ne ca'vej rá nij so' ca'mii ma'an Diose se-nana Diose rihaan nij so' a. <sup>20</sup> 'O se nana sayuun ndo'o me nana cataj xna'anj Diose rihaan nij so', rá nij so', ne dan me se cataj Diose rihaan nij so' se vaa sese ndaa xcuu cachee xráá quij yo', ne go' nij so' yahij man xcuu yo' ndaa se cavi' xcuu cuaj, taj Diose rihaan nij so' a. <sup>21</sup> Dan me se cuchu'vi' ndo'o nij yuvii ni'yaj nij yuvii quij yo', ne ndaa ma'an síi cu'naj Moisés cataj se vaa cuchu'vi' uxrá so' ne ndaa quirí'lj ma'an man so', taj so' a.

<sup>22</sup> Tzaj ne ino uxrá quiran' nij soj ga nij so' nanj ei. Dan me se xa' soj, tzaj ne ca'vee cuchi' ma'an soj chuman' Jerusalén chuman' naj rej xta' nanj chuguanj. Ne chuman' Jerusalén naj rej xta' me se ase vaa chuman' Jerusalén naj raá quij cu'naj Sion rihaan chumii nihánj ro', vaa chuman' yo' ei. Ne ma'an Diose síi vaa i'na' yáán chuman' Jerusalén naj rej xta'

yo', ne yo' me rej man mĭj mĭj se-mozó Diose me rej yo', ne navij ndo'o rá nij se-mozó Diose cha'anĭ che'é Diose rej yo' adonĭ. <sup>23</sup> Ne dan me se cunu chre' soj ga taran' nij ta'ní Diose, ne ase vaa sí chava' vaa cunudanĭ nij ta'ní Diose yo', ne ne nij so' ga ma'an ya Diose rej xta' yo', ne no se-chuvĭi nij so' rihaan yanĭ taj rej xta' yo' ei. Ne ca'vee cuchĭ' soj rihaan ma'an ya Diose sí a'ne' cacun' che'é cunudanĭ yuvĭi adonĭ. Ne ca'vee cuchĭ' soj rej ne nimán nij sí aj cunu sa' inanĭ rihaan Diose ei. <sup>24</sup> Ne ca'vee guun tuvĭ' soj ga Jesucristó, ne so' ro', me sí cuchruj tucuaán naca che'é ní daj qui'yaj ní canoco' ní man Diose ei. Dan me se sa' a doĭ a'mii ton cayanĭ man Jesucristó vaa ton cayanĭ man sí cu'naj Abel qui'yaj tinúú so' sí cu'naj Caín nanĭ adonĭ.

<sup>25</sup> Sa' uxrá ni'yaj soj sese se nachri' soj ni'yaj soj man sí narqué chrej sa' man soj ei. Dan me se ma'an ya Diose me so', ne tadó uxrá soj ei. Dan me se tananĭ nij sí ne ca'vej rá cunó rihaan sí cataj xna'anĭ se-nana Diose rihaan nij so' rihaan yo'óo nihánĭ gaa naá me se ne quinaniĭ nij so' mei. Táa a ní' sĭj man cuano, ne a'mii sí nicun' rej xta' rihaan ní, ne sese nachri' ní ni'yaj ní xrej so' chrej sa', ne daj chihaa mĭj se quinaniĭ ní a ma'. <sup>26</sup> Dan me se gaa ca'mii Diose gaa naá, ne quinaan ya yo'óo, ne cuano nihánĭ me se taj xna'anĭ so' se vaa quinaan uún yo'óo, qui'yaj so' chuguanĭ. Tzaj ne nuveé inanĭ yo'óo me se quinaan ma'. 'Q se yo'óo do', rej xta' do', quinaan, qui'yaj so' adonĭ. <sup>27</sup> Ne che'é se quinaan nu' yo', che'é dan ne'en ní se vaa quinavĭj nu' nij rasuun, qui'yaj Diose ei. Ne rasuun qui'yaj Diose ruvi' ni'yaj ní cuano me se quinaan adonĭ. Ne nij rasuun ne ruvi' rihaan ní me se se quinaan rasuun yo' ma'. 'Q se gaa rasuun yo' nu' cavĭi nu' ca'anĭ adonĭ. <sup>28</sup> Dan me se guun ní sĭj chihanĭ rej sa' ndo'o rej guun chĭj ní ga Diose, ne daj chihaa mĭj se quinaan chuman' yo' a ma'. Che'é

dan guun ni'yaj uxrá ní rihaan Diose, ne che'é dan yo'o qui'yaj suun ní rihaan Diose, ne guun niha' rá Diose, qui'yaj ní ei. Ne caraa cochroj uxrá ní rihaan Diose nanĭ á. <sup>29</sup> 'Q se ase vaa 'o ya'an vaa Diose sí noco' ní, ne cacaa nu' se chi'ii, qui'yaj so' adonĭ.

## 13

*Nana nihánĭ taj xna'anĭ daj qui'yaj ní, ne ve'é canoco' ní man Diose a*

<sup>1</sup> Yo'o gaa 'ee rá soj man tinúú soj ei. <sup>2</sup> Se tanáj xco soj suun a'mii sa' ga yuvĭi 'na' yo'óo chuman' ma'. 'Q se cunuú rá soj ndaa vaa qui'yaj sí ca'mii sa' ga yuvĭi 'na' yo'óo chuman' asĭj rque ei. Ne ne quene'en nij so' se vaa se-mozó Diose me sí ca'mii ga nij so' ma'. 'Q se ndaa síj, gaa ne quene'en nij so' adonĭ. <sup>3</sup> Se ni'yón soj tinúú soj sí 'nij taga' ma'. Dan me se guun rá soj ndaa adi' se ma'an soj 'nij taga' ga tinúú soj a. Ne se ni'yón soj tinúú soj sí ran' sayuun 'yaj yuvĭi ma'. Dan me se guun rá soj ndaa adi' se ma'an soj 'yaj yuvĭi sayuun man a. <sup>4</sup> Ne ve'é uxrá sese xcaj soj 'o chana adonĭ. Nuveé se na'aj me yo' ma'. Ne nuveé cacun' me sese otoĭ soj ga nica ma'an soj ma'. Tzaj ne sí otoĭ ga yo'óo chana do', sí otoĭ ga nica tuvĭ' do', me se qui'yaj Diose sayuun man so' adonĭ. <sup>5</sup> Se guun soj sí 'ee rá ni'yaj sa'anĭ ma'. Maan se gaa xej nimán soj che'é doĭ rasuun man rihaan soj ei. 'Q se ma'an Diose cataj xna'anĭ rihaan ní, ne:

—Daj chihaa mĭj se tanáj 'unĭ man soj ma' —taj Diose rihaan ní a.

<sup>6</sup> Che'é dan vaa che'é ca'mii ní nana nihánĭ nana no rihaan danĭ Diose a: “Che'é se racuĭj sí 'nij ra'a man ní manĭ, che'é dan se cuchu'ví' 'unĭ ma'. 'Q se nuveé se ya'anĭ tiha' me sayuun qui'yaj yuvĭi manĭ ma'”, cataj ní a.

<sup>7</sup> Nuchruj raa soj daj 'yaj nij sí uun chĭj rihaan soj, nij sí cataj xna'anĭ se-nana Diose rihaan soj á. Xcaj uxrá soj cuentá daj 'yaj nij so' gaa yanĭ nij so' rihaan chumiĭ nihánĭ, ne xcaj uxrá

soj cuentá daj gaa quiran' nij so' vaa güii a. Ne ase vaa nucuaj uxrá rá nij so' ni'yaj nij so' Diose ro', danj gaa qui'yaj soj uún, ne gaa nucuaj rá soj ni'yaj soj Diose ei.

<sup>8</sup> Dan me se orún' Jesucristó me síí nicun' asij rque, ne veé so' me síí nicun' cuano, ne veé so' me síí canicun' nu' cavii nu' ca'anj nanj adonj.

<sup>9</sup> Se ca'vej soj tihá' yu'unj nii man soj ga yo'ó tucuáán naca mei. 'O se aj sa' uxrá vaa sese nari' nucuaj nimán soj che'é se luj qui'yaj Jesucristó che'é ní' ei. Tzaj ne se nari' nucuaj nimán soj qui'yaj se chá mei. 'O se se cavii sa' nij síí noco' tucuáán yo' tucuáán che'é se chá ma'. <sup>10</sup> Dan me se ase vaa síí nicun' mesá altar rihaan, ne man rasuun sa' rihaan 'yaj Diose ro', danj vaa ní' chuguanj. Ne orún' ní' me síí no xcúún chá rasuun taj rihaan mesá altar yo' ei. Ne nij síí 'yaj suun che'é tucuáán nga tucuáán noco' nii rá nuvíí noco ro', ne no xcúún nij so' chá nij so' nij rasuun sa' taj rihaan se-mesa ní' a ma'. <sup>11</sup> Dan me se 'anj nicaj xrej atá suun noco doj ton man xcuu rá rej guee doj che'é nij yuvii, ne ton che'é cacun' tumé yuvii me ton yo' a. Ne nu' nee man scúj yo' me se rii nii man nee yo' rej tu'va chuman', ne axríj ya'an nii nu' nee yo' nanj adonj. <sup>12</sup> Che'é dan danj qui'yaj guee Jesucristó cavi' so' tu'va chuman' rej atúj yuvii chuman', gaa ne cunuu sa' nij yuvii rihaan Diose che'é ton cayanj man ma'an so' nanj adonj.

<sup>13</sup> Che'é dan me cuano nihánj me se no xcúún ní' curihanj ní' ne cuchí' ní' rihaan so' tu'va chuman' a. Dan me se ase qui'yaj so' ca'vej rá so' nachri' yuvii ni'yaj yuvii man so' ro', danj qui'yaj ní' ca'vej rá ní' nachri' yuvii ni'yaj yuvii man ma'an ní' á. <sup>14</sup> 'O se rihaan chumii nihánj ro', taj vaj chiháán ní' chuman' quinaj nu' cavii nu' ca'anj mei. 'O se nano' ní' yo'ó chuman' cane ní' vaa güii ei. <sup>15</sup> Che'é se vaa qui'yaj Jesucristó ro', che'é dan yo'ó cataj ní' rihaan Diose se vaa ve'é uxrá vaa qui'yaj Diose nanj adonj. Ne

dan me se nuveé inanj rasuun man rihaan chumii nihánj me se vaa nago' ní' man Diose ma'. 'O se nana sa' tu'va ní' me se vaa nago' ní' man so' ei. <sup>16</sup> Ne se tanáj soj suun sa' 'yaj soj, suun racúj soj man tinúú soj síí nique mei. 'O se yo'ó se sa' nago' ní' man Diose me uún yo', ne uun niha' rá Diose ni'yaj Diose man síí 'yaj danj adonj.

<sup>17</sup> Ve'é cunó soj rihaan nij síí uun chij rihaan soj á. 'O se síí tumé man nimán soj me nij so', ne vaa güii xna'anj Diose man nij so' daj qui'yaj nij so' che'é soj adonj. Ne ve'é cunó soj, ne guun niha' rá nij so' cataj xna'anj nij so' che'é soj chuguanj. Ne se rnúj soj rihaan nij síí guun chij mei. 'O se sese rnuj soj rihaan nij so', ne rnuj nij so' rihaan Diose che'é soj, ne se cavii sa' soj mei.

<sup>18</sup> Cachinj ni'yaj soj rihaan Diose che'é núj á. 'O se guun ya rá núj se vaa taj vaj cacun' tumé núj ma'. 'O se inanj me rá núj qui'yaj sa' núj gaa yáán núj rihaan chumii nihánj ei. <sup>19</sup> Ne cuano nihánj me se uxrá doj cataj xna'anj 'unj rihaan soj se vaa cachinj ni'yaj soj se vaa ca'vej rá Diose ra'yanj cuchí' uún 'unj rihaan soj ei.

*Nihánj me taj síí 'yaj yanj nihánj se vaa ve'é cayáán nij síí nayaa yanj nihánj rá so' a*

<sup>20</sup> Dan me se Diose me síí 'yaj vaa xej nimán ní', ne so' me síí qui'yaj cunuu i'na' uún Jesucristó sij 'nij ra'a man ní' gaa cavi' so' a. Ne Jesucristó me se ase vaa síí tumé matzinj vaa so', ne ase vaa daán so' matzinj vaa ní', ne tumé so' man ní' sij noco' man so', ne síí sa' uxrá me so', ne che'é ton man so' me nicaj ní' yo'ó tucuáán cuchruj so' che'é ní' se vaa canoco' ní' man Diose a. Ne me rá 'unj <sup>21</sup> guun nucuaj soj qui'yaj suun soj nu' suun sa', ne qui'yaj soj nu' se vaa me rá Diose qui'yaj soj, qui'yaj ma'an Diose chuguanj. Ne dan me se guun ní' se niha' rihaan Diose, qui'yaj ma'an Diose che'é Jesucristó ei. Ne ve'é

ndo'o cayáán so' nu' cavii nu' ca'anj adonj. Veé danj gaa ya ei.

<sup>22</sup> Cuanō nihánj me se cataj xna'anj 'unj rihaan soj se vaa ve'é cunō soj nana nihánj, tinuj, nocoj. 'O se chrej nucuaj narqué 'unj man soj me nana nihánj, ne doj vaa nana nihánj nana cachrón 'unj rihaan yanj cartá nihánj nayaa soj ei.

<sup>23</sup> Xcaj soj cuentá se vaa curihanj tinú' Timoteo taga', ne sese ra'yanj ca'na' so' rihanj, ne cuchí' núj rihaan soj ra'yanj ei.

<sup>24</sup> Cataj soj rihaan taran' nij síi uun chij rihaan soj do', rihaan taran' nij síi sa' rihaan Diose do', se vaa ve'é cayáán nij so' raj ei. Nij tinúú ní' nij síi man rej cu'naj Italia ro', ve'é cayáán nij soj, rá nij so' chuguanj.

<sup>25</sup> Me rá 'unj qui'yaj ndo'o Diose se luj che'é taran' nij soj nanj adonj. Amén.



## Nihánj me 'o yanj cartá qui'yaj síí cu'naj Santiagó ca'néé so' rihaan nij yuvij noco' man Diose a

<sup>1</sup> 'Unj ro', me síí cu'naj Santiagó síí 'yaj suun rihaan Diose do', rihaan Jesucristó sij 'nij ra'a man ní' do', ne 'yáá 'unj yanj nihánj ca'nej 'unj rihaan taran' soj sij noco' man Diose sij ca'anj cayáán que'ee chuman' naj rihaan chumij a. Dan me se ase vaa chuvij nij x'ne' yuvij israelitá yuvij noco' man Diose gaa naá ro', danj vaa guee soj rihaan Diose nanj ei.

*Nana nihánj taj xna'anj se vaa rque Diose nana cuu sa' rihaan ní' a*

<sup>2</sup> Dan me se asa' ca'na' me ma'an sayuun rihaan soj, ne guun niha' rá soj, tinuj, nocoj. <sup>3</sup> 'Q se ne'en soj se vaa asa' ca'na' sayuun rihaan soj che'é se me soj síí amán rá ni'yaj man Diose, ne tananj cunuu nucuaj doj nimán soj ei. <sup>4</sup> Maan se gaa nanaj uxrá nimán soj rihaan sayuun, gaa ne ca'vee cavij sa' nu' se-suun soj, ne síí cachij nu' nimán ya guun soj, ne se cachiin a doj se sa' man nimán soj a man adonj.

<sup>5</sup> Sese yo'o tuvi' soj me rá nari' nana cuu sa', ne cachinj ni'yaj so' rihaan Diose, ne rque Diose nana cuu sa' yo' man so' chuguanj. 'Q se nuveé sij nachri' man síí achíín ni'yaj me Diose ma'. Tananj niha' rá so' gaa achíín ní' rasuun man so', ne rque so' nu' se sa' man cunudanj yuvij ei. <sup>6</sup> Tzaj ne yo'o cuchuman ya rá síí achíín ni'yaj rihaan Diose ni'yaj so' man Diose, gaa ne ca'vee, ne se guun vij rá so' mei. Tzaj ne sese guun vij nimán 'o so', ne ase chéé nuú na ya'anj gaa o' nana rihaan na ya'anj ro', danj vaa nimán síí uun vij nimán, chéé nuú uxrá nimán so' uún, <sup>7</sup> ne taj che'é guun rá so' sese rque Diose rasuun man so' a ma'. <sup>8</sup> 'Q se síí vij vaa nimán me se daj chihaa

mij se ca'vee yo'o qui'yaj suun so' a doj suun sa' a ma'.

*Nana nihánj taj xna'anj che'é ru'vee do', che'é síí nique do' a*

<sup>9</sup> Ne soj sij nique, tzaj ne gaa niha' rá soj che'é se sij cavii sa' rihaan Diose me soj ei. <sup>10</sup> Ne vaa nij soj sij ru'vee uún, ne gaa niha' rá soj che'é se nuu nica' nimán soj rihaan Diose á. 'Q se ase vaa navij yucuan' yâ man tacaan ro', danj gaa quinavij nij ru'vee nucuaj rá ni'yaj sa'anj, vaa güii, nanj adonj. <sup>11</sup> Dan me se gaa uun xta' güii, ne uun ya'aan naán, gaa ne nacoj coj, ne uun che'e yâ yo' ayuu yo' raaj coj a. Núj ayuu yo', ne taj se gún' man yo' gaa ma'. Ne veé danj vaa guee nij ru'vee uún, ne yo'o nuú rá nij so' rej qui'yaj canaán nij so' sa'anj, ne dan me se vaj cavij' nij so' ei.

*Nana nihánj taj xna'anj se vaa nuveé sij 'yaj uun rá ní' qui'yaj ní' cacun' me Diose ma'*

<sup>12</sup> Síí nucuaj nimán rihaan sayuun ro', so' me síí cavij sa', ne cataj Diose se vaa:

—Che'é se raan noco' so' manj ro', che'é dan ca'vee cayáán so' gaj nu' cavii nu' ca'anj —cataj Diose, ndaa vaa cataj Diose se vaa ya qui'yaj Diose che'é nij síí aráj cochroj rihaan so' a.

<sup>13</sup> Sese me rá ní' qui'yaj ní' cacun', ne se guun cataj ní' se vaa Diose me síí qui'yaj guun rá ní' qui'yaj ní' cacun' ma'. A 'ó xco' na'vej rá Diose qui'yaj Diose cacun' mei. Ne nuveé Diose me síí axrij chrej chi'ii rque a 'ó yuvij a ma'. <sup>14</sup> 'Q se ma'an inanj ní' me rá qui'yaj se chi'ii che'é se ve'é vaa se chi'ii yo' rihaan ní' nanj adonj. <sup>15</sup> Tzaj ne sese qui'yaj ní' ndaa vaa me rá ma'an ní' qui'yaj ní', ne qui'yaj ní' cacun', ne asa' quisij qui'yaj ndo'o ní' cacun', gaa ne yuun che'e quirij' nu' nimán ní' vaa gaa nanj ei.

<sup>16</sup> Se cuchumán rá soj nana ne, man tinuj, man nocoj. <sup>17</sup> Xcaj soj cuentá se vaa daj a se sa' vaa rihaan ní' ro', Diose me se rque nij yo', ne dan me se maan rej yanj ma'an ya síí 'yaj avii ya'an chuguun ro', maan dan 'na'

nu' se sa' do', se luj do', se ni'yanj do' ei. Dan me se se ca'vee natuna se-nana so' nana sa' nana nica ya ya mei. Dan me se 'o vaa ra' so', ne na'vee cunuu ino Diose a ma'. Yo'o sa' 'yaj so' ga ni' nanj adonj. <sup>18</sup> Guun ra' so' guun ta'nij so' man ni', gaa ne cuno ni' se-nana so' nana ya, qui'yaj so', ne che'e dan asino ni', guun ta'nij so' man ni' gaa asino yaan, gaa ne vaa guii naquiyaj sa' so' man cunudanj nij rasuun qui'yaj so' rihaan chumii nihanj a.

*Nana nihanj taj xna'anj me sii noco' ya man Diose a*

<sup>19</sup> Se quini'yon soj nana nihanj, man tinuj, man nocoj. Gaa niha' ra taran' ni' nano xrej ni' se-nana Diose ei. Tzaj ne se gaa niha' ra ni' ca'mii ni' do', ca'maan ra ni' do' mei. <sup>20</sup> O se sese a'maan ndo'o ra ni', ne se ca'vee qui'yaj sa' ni' ndaa vaa me ra Diose qui'yaj ni' ma'. <sup>21</sup> Yuun che'e ca'ne' ra soj ga suun 'yaj se nij, ne gaa nica' niman soj, ne cun soj nana ca'nee Diose niman soj, ne ca'vee quinanii niman soj rihaan sayuun ei. <sup>22</sup> Se guun catuu rma'an se-nana Diose xree ni' ma'. Tzaj ne qui'yaj ni' ndaa vaa taj Diose ei. Sese se qui'yaj ni' danj, ne tiha' yu'unj ni' man ma'an ni' gaa nanj a. <sup>23</sup> O se sii atuj rma'an se-nana Diose xree ro', ase vaa sii ni'yaj rihaan espejo ro', danj vaa so', <sup>24</sup> ne sii ni'yaj rihaan espejo me se xcaj so' cuentá se vaa cano nacaj rihaan so', tzaj ne 'anj so', gaa ne yuun che'e ni'yon so' nacaj no rihaan so' a. <sup>25</sup> Ne ase vaa espejo ro', danj vaa tucuaan sa' cuchruj Diose rihaan ni', ne xcaj ni' cuentá daj me ra Diose qui'yaj ni', 'yaj tucuaan sa' yo', ne ne sayuun vaa uno ni' rihaan Diose, 'yaj tucuaan yo' ma'. Se guun ni' sii tucuyon rma'an nana yo' ne ni'yon nana yo' ma'. Tzaj ne cavii ni' qui'yaj ni' ndaa vaa taj nana yo' ei. Ne sese se ca'ne' ra ni' ga nana yo', ne Diose me sii qui'yaj cavii sa' ni' adonj.

<sup>26</sup> Sij ve'e noco' man Diose me soj, ra soj na'. Sese nanó soj cuentó che'e

tuvi' soj, ne nuvee sij noco' ya man Diose me soj ma'. Sij tiha' yu'unj man ma'an me soj nanj chuguanj. <sup>27</sup> Cataj xna'anj 'unj rihaan soj me sii me sii noco' ya man Rej ni' Diose a. Sii racuj man xnii nique do', sii racuj man chana nique do', sii ne noco' man sii chi'ii man rihaan chumii nihanj do', so' me sii noco' ya man Diose adonj.

## 2

*Nana nihanj taj xna'anj se vaa no xcúun ni' qui'yaj ni' se luj rihaan daj a yuvii a*

<sup>1</sup> Aman ra soj ni'yaj soj man Jesucristó sii uun chij ndo'o rihaan ni', tinuj, nocoj. Che'e dan se guun cataj soj se vaa sa' doj vaa sii ru'vee rihaan sii nique ma'. <sup>2-3</sup> Xcaj soj cuentá, ne gaa nuu chre' soj cachraa soj rihaan Diose, ne sese atuj 'o sii ru'vee nuu yatzij sa' rej man soj, ne 'nij ra'a so' se'ej tu'vee ndo'o, ne araya'anj ndo'o soj man so', ne taj soj se vaa quitaj so' chruun xla sa' a. Ne sese atuj 'o sii nique nuu yatzij tachrinj rej man soj, ne ne a'mii nocoj soj ga so' ma'. Ca'vee canicun' caya so' do', ca'vee cane so' rihaan yo'oo rej tajoj soj do', nanj ei. <sup>4</sup> Tzaj ne sese danj qui'yaj soj, ne sa' doj vaa ru'vee rihaan sii nique, ra soj, ne ase vaa cuese chi'ii niman na'vej ra xcaj sa' cuentá che'e yuvii vaa soj nanj chuguanj.

<sup>5</sup> Nano xrej soj nana ca'mij, tinuj, nocoj. Narii Diose man nij sii nique guun nij so' sii aman uxrá ra ni'yaj man so' ei. Nique nij so' rihaan yo'oo nihanj, tzaj ne araj cochroj nij so' rihaan Diose, ne che'e dan cata' tu'va Diose se vaa ya cayaan nij so' ga Diose asa' guun chij Diose rihaan chumii nihanj adonj. <sup>6</sup> Tzaj ne nij soj me se nij ndo'o 'yaj soj rihaan nij sii nique chuguanj. Xcaj soj cuentá se vaa ru'vee me sii 'yaj sayuun man soj, ne 'anj soj rihaan cuese, 'yaj nij ru'vee a. <sup>7</sup> Ne nana nij a'mii nij ru'vee che'e Jesucristó sii cata' ne soj che'e a.

<sup>8</sup> Dan me se vaa che'e qui'yaj ni' nana ca'mii sii cu'naj Moisés nana no

rihaan danj Diose nana ya, ne dan me se taj nana yo': "Gaa 'ee ra ni' man tuvi' ni' ndaa ra se vaa 'ee ra ni' man ma'an ni'", taj nana yo', ne sese qui'yaj soj nana yo', ne cunaj 'yaj soj ei. <sup>9</sup> Tzaj ne sese narii soj yuvij ru'vee inanj, gaa ne tumé ndo'o soj cacun' che'é se ne 'yaj ya soj se-tucuanj Diose adonj. <sup>10</sup> Sese vaa 'o sí 'yaj nu' se-tucuanj Diose, ne sese vaa orún' nana na'vej so' qui'yaj so', ne ase vaa sí ne uno daj chihaa mij rihaan Diose ro', vaa so' ei. <sup>11</sup> 'Q se cataj Diose se vaa se cotoj ni' ga nica tuvi' ni', ne veé cataj uún Diose se vaa se ticavi' ni' tuvi' ni' a. Vaa sí ne otoj ga nica tuvi', tzaj ne ticavi' so' tuvi' so', gaa ne sí 'yaj danj ro', me se yuun che'e tiri' so' se-tucuanj Diose tucuaán noco' so' gaa nanj adonj. <sup>12</sup> Che'é dan ve'é ca'mii soj, ne ve'é qui'yaj soj, ne cunuú ra soj se vaa vaa güii ca'ne' Diose cacun' che'é ni', ni'yaj Diose se-tucuanj Diose chuguanj. 'Q se ne sayuun vaa cunó ni' nana yo' ma'. <sup>13</sup> 'Q se asa' ca'ne' Diose cacun' che'é yuvii, ne se gaa 'ee ra Diose ni'yaj Diose man sí ne 'ee ra man tuvi' ma'. Tzaj ne se ni'yanj ra me se yo' me qui'yaj canaan rihaan sayuun adonj.

*Nana nihánj taj xna'anj se vaa cuchuman ra ni' ni'yaj ni' Diose, ne qui'yaj ni' se luj uún a*

<sup>14</sup> Cuno soj ca'mij, tinuj, nocoj. Sese taj ni' se vaa amán ra ni' ni'yaj ni' Diose, ne sese ne 'yaj ni' a doj se luj rihaan tuvi' ni', ne ca'vee quinanii ni' rihaan sayuun, ra soj na'. Taj ma'. Se ca'vee a doj man adonj. <sup>15</sup> Xcaj soj cuentá ei. Sese vaa tinúú ni' do', ra'vij ni' do', ne achiin se chá achiin yatzij cunuú so' do', <sup>16</sup> ne sese cataj ni' rihaan sí achiin rasuun man, ne: "Ca'anj sa' so', ne dínj gaa nimán so' ei. Rque Diose yatzij quitaj xraa so' do', rque Diose se chá cha so' do' ei", cataj ni' rihaan sí achiin man, gaa ne sese se quirii ni' se vaa achiin man tuvi' ni', ne taj se guun se-nana ni' gaa a ma'. <sup>17</sup> Veé danj vaa ya, ne sese taj ni' se vaa sí amán ra ni'yaj man Diose

me ni', ne sese taj se luj 'yaj ni', gaa ne nuveé sij amán ya ra me ni' gaa a mei.

<sup>18</sup> Tzaj ne ta'aj nii cataj rihaan tuvi' se vaa so' me se sí amán ra ni'yaj man Diose mé so', ne 'unj nihánj me se sí 'yaj se sa' rihaan Diose mé 'unj, cataj nii chuguanj. Tzaj ne xcaj so' cuentá, ne asa' ca'vee xcaj yuvii cuentá se vaa sí amán ra ni'yaj man Diose mé so', sese nuvi' a 'o se sa' 'yaa so' ga. Tzaj ne 'unj nihánj me se che'é se sa' 'yaa 'unj ro', che'é dan ne'en yuvii se vaa sí amán ra ni'yaj man Diose mé 'unj chuguanj. <sup>19</sup> Dan me se cunaj 'yaa so' se vaa amán ra so' se vaa oruun Diose, tzaj ne danj 'yaj guee nij nana chree uún, ne che'é dan chu'vi' nij so' ndaa ri'ij ma'an man nij so' che'é sayuun qui'yaj Diose man nij so' vaa güii a. <sup>20</sup> Sí ni'yon mé so', sese uun ra so' se vaa taj che'é qui'yaa so' se luj, ne nihánj me se tiháan 'unj rihaan so' se vaa sese taj se luj 'yaj ni', ne amán rma'an ra ni' ni'yaj ni' Diose nanj chuguanj. <sup>21</sup> Dan me se xii ni' sí cu'naj Abraham me se ne'en so' se vaa ca'vej so' ticavi' so' ta'nii so' sí cu'naj Isaac rihaan mesá altar go' so' man ta'nii so' rihaan Diose a. Ne che'é se vaa qui'yaj so' danj ro', che'é dan cunuu sa' so' rihaan Diose ei. <sup>22</sup> Xcaj so' cuentá se vaa che'é se cuchumán ra Abraham ni'yaj so' man Diose ro', che'é dan me guun ra so' qui'yaj so' se luj che'é Diose, ne che'é se qui'yaj so' danj ro', che'é dan ne'en ni' se vaa cuchumán nu' ra so' ni'yaj so' man Diose chuguanj. <sup>23</sup> Ne quisij ya nu' se-nana Diose nana nihánj a: "Cuchumán ra Abraham ni'yaj so' man Diose, ne che'é dan cataj Diose se vaa sij sa' me Abraham a". Ne sí chéé ga Diose me uún Abraham, taj nii uún a.

<sup>24</sup> Xcaj soj cuentá se vaa che'é se luj 'yaj ni' ro', che'é dan nuu sa' ni' rihaan Diose, ne nuveé che'e se taj ni' se vaa amán ra ni' ni'yaj ni' man Diose doj me nuu sa' ni' rihaan Diose ma'. <sup>25</sup> Dan me se Rahab chana niha' ra me se cunuu sa' no' rihaan Diose gaa qui'yaj no' se luj rihaan roj sí ca'neé

Diose man ca'mii nana sa' rihaan no' a. Cunuu sa' no' rihaan Diose che'é se luj qui'yaj no', ne dan me se ve'é racuúj no' man roj sí israelitá ca'anj suun chiháán no' caxríj yuve no' man roj so' rihaan nij sí guun rá ticavi' man roj so', gaa ne ca'née no' man roj so' yo'ó chrej vaa dínj nan' roj so' tucua' roj so' a.

<sup>26</sup> Dan me se sese nuvi' nimán 'o so', ne nuveé sij vaa i'na' me so' ma'. Maan cúu cavi' uun me so', ne ase vaa xngangá nuvi' nimán rque ro', danj vaa sí taj se vaa amán rá ni'yaj man Diose, ne nuvi' a doj se luj 'yaj so', ne taj se gún' man nana tu'va uun so' a man adonj.

### 3

*Nana nihánj taj xna'anj se vaa 'yaj chi'ii ní' man tuvi' ní', sese ne tumé ní' nana avii tu'va ní' a*

<sup>1</sup> Tinuj. Nocoj. Se guun gaa que'ee sí narqué chrej man soj ma'. 'O se núj sij narqué chrej ro', ne'en soj se vaa doj a caraa Diose cacun' xraá núj sese se cuno núj rihaan Diose ei. <sup>2</sup> 'O taran' ní' avii nana chi'ii tu'va nanj adonj. Tzaj ne sese vaa 'o sí ne a'mii nana chi'ii, ne so' me sí ca'vee guun nucuaj guun chij rihaan nu' nee man so' chuguanj. <sup>3</sup> Xcaj soj cuentá ni'yaj soj man cuayó á. Nda' se xij vaa cuayó, tzaj ne anu' ní' aga' le'ej nii tu'va xo', gaa ne cuno xo' rihaan ní' ca'anj xo' me rej ma'an me rá ní' chuguanj. <sup>4</sup> Ne xcaj soj cuentá ni'yaj soj man rihoo chéé rihaan na uún á. Xij vaa rihoo, ne nucuaj ndo'o o' nana rihaan rihoo, ne rcuchra' le'ej nii vaa rásuun nii tuguáj nii rihoo, tzaj ne ca'anj yo' me rej ma'an me rá nii ca'anj yo' uún ei.

<sup>5</sup> Ne ta'nga' danj vaa guee daa ní' uún, ne tzin' vaa daa ní', tzaj ne nucuaj uxrá daa ní' nanj adonj. Dan me se ne'en soj se vaa orún' ya'an le'ej nii ro', ca'vee qui'yaj yo' cacaa cunu' quij ei. <sup>6</sup> Ne ase vaa ya'an vaa nana a'mii daa ní', ne ase vaa nu' chi'ii man rihaan chumii nihánj ro', danj vaa nana a'mii daa ní', ne ndaa

ri' nu' nee man ní', 'yaj daa ní' nanj adonj. Unu' ní' ga tuvi' ní', 'yaj daa ní', che'é se sí chree me sí 'yaj a'mii daa ní' nana chi'ii nanj á. <sup>7</sup> A'vee uun chij yuvi' rihaan me ma'an xcuu, ne dan me se rihaan xcuu man quij do', rihaan xtâj do', rihaan xcuáá do', rihaan xcuaj do', uun chij yuvi', <sup>8</sup> tzaj ne taj se 'yá' guun chij a doj yuvi' rihaan daa ma'an yuvi' ma'. Avii ndo'o nana chi'ii tu'va ní', ne taj se 'yá' guun dínj tu'va ní', 'yaj daa ní' ía ma'. Ase vaa na xnaj taj tu'va xcuáá yuvaa ro', danj vaa nana chi'ii avii tu'va ní', 'yaj daa ní', ne 'yaj chi'ii yo' man tuvi' ní' chuguanj. <sup>9</sup> Dan me se tu'va ní' me avii nana luj a'mii ní' che'é Rej ní' Diose sí 'nij ra'a man ní', ne veé daa ní' a'mii nana chree che'é tuvi' ní' uún a. Ne dan me se ase vaa Diose ro', danj vaa nij tuvi' ní' gaa qui'yaj Diose man taran' ní' a. <sup>10</sup> Veé tu'va ní' avii nana luj ne veé tu'va ní' avii nana chree, 'yaj daa ní', ne nij uxrá vaa 'yaj ní' danj, nanj tinuj, nocoj. <sup>11</sup> Se ca'vee cavii na chihan' ga na 'ne' rque orún' curuj na ma'. <sup>12</sup> Taj rutzi' avii raá chruun rcoo ma'. Ne rcoo ne avii raá chruun rcue'é ma'. Ne danj nanj na uún, ne se ca'vee curihanj na chihan' rej nuu na 'ne', ne taj che'é cavii nana chi'ii tu'va ní', sese rej nuu nana sa' me nimán ní' a man adonj.

*Nana nihánj taj xna'anj me sí me sí nicaj tucuaán sa' cavii rihaan Diose a*

<sup>13</sup> Sese vaa ta'aj soj sí acaj cuentá ne avii ndo'o raá soj, rá soj, ne ve'é inanj qui'yaj soj sij vaa danj rá rihaan tuvi' soj, ne xcaj tuvi' soj cuentá se vaa che'é se avii raá soj ro', che'é dan sí ni'yanj nimán me soj, ne che'é dan me ve'é inanj 'yaj soj a. <sup>14</sup> Tzaj ne sese xcoj ruvaa rá soj, ne sese me inanj rá soj quirii ta'nga' soj rihaan tuvi' soj, gaa ne se guun ca'mii xta' soj cataj soj se vaa sí acaj cuentá avii raá me soj a ma'. 'O se nuveé sij acaj cuentá me sí 'yaj danj mei. <sup>15</sup> Sese sij xcoj ruvaa rá me soj, ne nuveé sij nicaj tucuaán sa' cavii rihaan Diose me soj a ma'. Inanj tucuaán cavii raá nij sí man rihaan



yo'óo nihánj uun me tucuáán nicaj soj, ne danj inanj 'yaj yuvií che'é se nana chree uno nij yuvií nanj adonj. <sup>16</sup> Rej yanj sí xcoj ruvaa rá me se taj se qui'yá' gaa dínj ma'. Me a' se chi'ij 'yaj nij so' nanj á. <sup>17</sup> Tzaj ne sí nicaj tucuáán sa' cavii rihaan Diose me se yo'o vaa sa' nimán so', ne che'é dan 'o chij yáán so', ne ne unu' so' ga yuvií ma'. Yo'o luj a'mii so' ga tuvi' so', ne ne naqui'yaj so'o so' xréé so' gaa a'mii tuvi' so' ga so' ma'. 'Ee rá so' ni'yaj so' tuvi' so', ne inanj se sa' 'yaj so', ne yo'o cyaan ve'é 'yaj so' rihaan nu' nij yuvií, ne 'yaj so' nu' ndaa vaa taj so' a. Ne nij sí 'yaj danj ro', me sí nicaj ya tucuáán sa' cavii rihaan Diose chuguanj. <sup>18</sup> Dan me se sí 'yaj dínj ne yuvií ga tuvi' yuvií ro', ma'an so' me sí ne dínj ga tuvi', ne che'é dan cunuu sa' nij tuvi' so' rihaan Diose, qui'yaj so' nanj adonj.

#### 4

*Nana nihánj taj xna'anj se vaa se guun rá ní' cavii sa' ní' rihaan chumii nihánj a*

<sup>1</sup> Me che'é unu' ndo'o nij soj ga tuvi' soj, rá soj ga. Nuveé che'e se me ndo'o rá soj cavii sa' soj rihaan chumii nihánj, ne che'é dan na'vee gaa xej nimán soj a a. Ne nuveé che'e dan unu' soj ga tuvi' soj a a. <sup>2</sup> Me ndo'o rá soj gaa rasuun sa' rihaan soj, tzaj ne ne ca'vee quirí' soj rasuun yo' cumán yo' rihaan soj a a. Dan me se che'é dan uun xcoj ruvaa ndo'o rá soj ni'yaj soj man sí vaa rasuun rihaan adonj. Tzaj ne soj me se taj se 'yá' quirí' soj, ne che'é dan unu' soj ga tuvi' soj ei. Tzaj ne nuvi' rasuun sa' rihaan soj, che'é se ne achíin ni'yaj soj rihaan Diose adonj. <sup>3</sup> Ne nda' se achíin ni'yaj soj rihaan Diose, tzaj ne ne rqué Diose nij rasuun yo' rihaan soj, che'é se chi'ij ndo'o vaa nimán soj gaa achíin ni'yaj soj rihaan Diose ei. Dan me se me inanj rá soj cavii sa' ma'an inanj soj rihaan chumii nihánj qui'yaj nij rasuun yo' ei.

<sup>4</sup> Ne ase vaa chana otoj ga yo'óo chii ro', danj vaa soj, ne ne noco' ya soj man Diose a ma'. Xcaj soj cuentá se vaa sí me rá cavii sa' rihaan chumii nihánj ro', so' me sí taj ri'yunj man Diose adonj. Ya uxrá ei. <sup>5</sup> Ne xcaj soj cuentá se vaa ne tu'va rma'an nana nihánj nana a'mii danj Diose a: “Diose qui'yaj nimán ní', ne me uxrá rá Diose canoco' nimán ní' man orún' so'”, taj danj Diose a. <sup>6</sup> Ne uxrá doj 'yaj Diose se luj che'é ní', ne che'é dan no nana nihánj rihaan danj Diose a: “Aráán Diose chrej rihaan nij sí xta' nimán se cavii sa' nij so', tzaj ne 'yaj Diose se luj che'é nij sí vaa nica' nimán”, taj danj Diose a.

<sup>7</sup> Che'é dan cunō soj rihaan Diose á. Naqui'yaj so'o soj xréé soj rihaan sí chree, ne cunanj sí chree rihaan soj á. <sup>8</sup> Quinichrun' soj rihaan Diose, gaa ne quinichrun' Diose rihaan soj á. Nij sí tumé cacun' ro', tanáj nij so' se-tucuanj nij so' tucuáán chi'ij, ne nij sí uun vij rá canoco' man Diose ro', naqui'yaj nica' nij so' nimán nij so' á. <sup>9</sup> Se gaa niha' rá soj ca'nga' soj mei. Vaa che'é quinano rá soj ta'vee soj che'é cacun' tumé soj ei. <sup>10</sup> Naqui'yaj nica' soj nimán soj rihaan sí 'nij ra'a man ní', gaa ne cavii sa' soj, qui'yaj so' chuguanj.

*Nana nihánj taj xna'anj se vaa se ca'mii ní' nana nij che'é tuvi' ní' ma'*

<sup>11</sup> Se guun nano soj cuentó ne che'é tuvi' soj, man tinuj, man nocoj. Sí nanó cuentó ne do', sí araa cacun' xráá tuvi' do', so' me sí taj se vaa taj che'é cunō ní' cunudanj se-tucuanj Diose chuguanj. Ne sí a'mii danj ro', nuveé sij uno se-tucuanj Diose me so' ma'. Maan se sí naqui'yaj cuu se-tucuanj Diose me uun so' nanj ei. <sup>12</sup> Dan me se orún' Diose ya me sí cuchruj se-tucuanj Diose, ne veé orún' Diose me sí ca'ne' cacun' che'é ní' vaa güii, ne so' me sí guun nucuaj tinanii man ní' rihaan sayuun, ne veé so' me sí guun nucuaj ca'nej man ní' rihaan ya'an ei. Tzaj ne ní' me se

yuvii uun me ní', ne taj che'é caraa ní cacun' xráá tuvi' ní' ma'.

*Nana nihánj taj xna'anj se vaa ne ne'en ní' daj quirán' ní' a'yuj a*

<sup>13</sup> Ne vaa soj sij a'mii nana nihánj uún a: “Cuan' se, a'yuj se, ca'anj núj 'o chuman' cayáán núj 'o yo', ne quiraan núj rasuun natu'vee núj, ne qui'yaj canaán ndo'o núj sa'anj”, taj soj, ne nihánj me se cunō soj ca'mij á. <sup>14</sup> Nij soj me se ne ne'en uxrá soj daj quirán' soj a'yuj a ma'. 'O se ase vaa ngaa ya'aan ro', danj vaa soj rihaan chumii nihánj, ne nanij ngaa ya'aan 'o orá le'ej nii, ne ra'yanj naxtun' uún ngaa ya'aan yo' nanj adonj. <sup>15</sup> Che'é dan no xcúún soj cataj soj: “Sese me rá sí 'nij ra'a man ní', ne ca'vee gaa i'na' ní', ne ca'vee qui'yaj suun ní' á”, cataj soj á. <sup>16</sup> Tzaj ne soj me se a'mii xta' ndo'o soj rihaan Diose, ne chi'ii ndo'o vaa nu' nana xta' a'mii soj adonj. <sup>17</sup> Tzaj ne sese ne'en ní' daj me rá Diose qui'yaj ní', ne ne 'yaj ní' ndaa vaa me rá Diose qui'yaj ní', gaa ne guun ní' sí tumé ndo'o cacun' nanj adonj.

## 5

*Nana nihánj taj xna'anj se vaa quirán' ndo'o nij ru'vee sayuun a*

<sup>1</sup> Ne soj sij ru'vee me se yaj me se quene'en soj ei. Ta'vee uxrá soj che'é sayuun quirán' soj vaa güii chuguanj. <sup>2</sup> Ne rihaan Diose me se ase vaa se cuchruu vaa nu' si'yaj soj, ne ase vaa yatzíj navij chá xcuu vaa nu' sagan' soj, <sup>3</sup> ne ase vaa aga' navij qui'yaj tucunj yoo ro', danj vaa nu' se-sa'anj soj, ne tucunj yoo yo' ro', ni'yaj Diose, ne xcaj Diose cuentá se vaa sí yanu' me soj rihaan sí nique, ne che'é dan cacaa ma'an soj, qui'yaj tucunj yoo yo' adonj. Dan me se uxrá caraa sa' soj sa'anj rihaan chumii nihánj, tzaj ne nichrun' ca'anj ni'ya chumii nihánj nanj adonj. <sup>4</sup> Dan me se acaj ndo'o Diose cuentá se vaa ne naru'vee sa' soj tu'vee se-mozó soj sí rii xnaa soj a. Ne aguáj ndo'o nij mozó yo' rihaan Diose che'é se-sa'anj nij so' chuguanj. Ne catúj se-nana nij so'

xréé Diose sij uun chij ndo'o rej xta' nanj ei. <sup>5</sup> Ne dan me se uun niha' uxrá rá soj rihaan chumii nihánj, ne inanj rasuun sa' uxrá mán rihaan soj, ne ase vaa xcáá namij ro', danj vaa soj, ne ne acaj soj cuentá se vaa nichrun' ca'na' sayuun rihaan soj a ma'. <sup>6</sup> Tzaj ne dan me se cuta' ndo'o soj cacun' xráá nij sí sa', ne ndaa ticavi' soj man ta'aj tuvi' nij so', ne ca'ne' sa' guee rá nij so' cavi' tuvi' nij so', qui'yaj soj a.

*Nana nihánj taj xna'anj se vaa gaa inaj nimán ní' cachinj ni'yaj ní' rihaan Diose a*

<sup>7</sup> Che'é dan gaa inaj nimán soj na'vij soj ndaa se quisij güii ca'na' uún sí 'nij ra'a man ní', tinuj, nocoj. Xcaj soj cuentá daj 'yaj sí unō naa ei. Naj vaa nimán so' na'vij so' maan che'é rej cachij sa' ve'é xnaa so', gaa ne quirii so' tan' adonj. <sup>8</sup> Danj qui'yaj guee soj, ne gaa inaj nimán soj, ne ca'nej nucuaj soj nimán soj, che'é se nichrun' ca'na' sí 'nij ra'a man ní' ei. <sup>9</sup> Se ca'mii soj nana nij che'é tuvi' soj, ne se gaa nanj quitaj cacun' xráá ma'an soj, man tinuj, man nocoj. 'O se aj nicun' chruun sí ca'ne' cacun' che'é ní' rej ta'yaa ei. <sup>10</sup> Xcaj soj cuentá, ni'yaj soj nij sí nata' se-nana Diose gaa naá se vaa nucuaj nimán nij so' rihaan sayuun, ne ase vaa qui'yaj nij so' ro', danj gaa qui'yaj soj ei. <sup>11</sup> Ne uxrá cavii sa' nij sí nucuaj nimán rihaan sayuun, rá ní', ni'yaj ní' man nij so', ne aj cuno soj se vaa nucuaj nimán sí cu'naj Job rihaan sayuun gaa naá, ne aj ne'en soj se vaa avii sa' nu' nij sí vaa danj, 'yaj sí 'nij ra'a man ní', che'é se 'ee uxrá rá so' ni'yaj so' man ní' chuguanj.

<sup>12</sup> Dan me se nana nihánj me nana nocoj doj rihaan nu' nij nana, tinuj, nocoj. Se cuta' soj raá Diose ca'mii soj mei. Se cataj soj chumanj yo'óo man soj, sese se ca'mii ya soj mei. Ne me ma'an yo'óo rasuun, ne se ca'mii soj danj che'é ma'. Sese ca'vee qui'yaj soj, rá soj, ne: “Ca'vee ei”, cataj uun soj, ne sese se ca'vee qui'yaj soj, rá soj, ne: “Se ca'vee ma'”, cataj uun soj, gaa

ne se cuta' Diose cacun' xraá soj man chuguanj.

<sup>13</sup> Sese vaa 'o tuvi' soj ran' sayuun, ne cachinj ni'yaj so' rihaan Diose á. Sese vaa 'o tuvi' soj niha' rá, ne cachraa so' chra' rihaan Diose á.

<sup>14</sup> Sese vaa 'o tuvi' soj ran', ne nacunj so' man nij sí chij nicaj yu'unj man nij sí noco' man Jesucristó ca'na' nij so', ne cata' tu'va nij so' se-chuvii sí 'nij ra'a man ní', ne cutaa nij so' casté raá sí ran', ne cachinj ni'yaj nij sí chij yo' rihaan Diose che'é sí ran' a.

<sup>15</sup> Sese ya amán rá nij sí achíin ni'yaj rihaan Diose se vaa racuúj Diose man sí ran', ne nahuun sí ran' yo', qui'yaj sí 'nij ra'a man ní', ne sese tumé sí ran' yo' cacun', ne quinavij cacun' xraá so' a. <sup>16</sup> Che'é dan ndaa 'o 'o ní nata' ya rihaan tinúú ní' che'é cacun' tumé ní', ne ndaa 'o 'o ní' cachinj ni'yaj rihaan Diose che'é tuvi' ní', gaa ne nahuun ní', qui'yaj Diose a. Sese vaa 'o sí vaa nica ya nimán achíin ni'yaj uxrá rihaan Diose, ne cunq ya Diose, ne qui'yaj Diose ndaa vaa cachíin ni'yaj so' ei. <sup>17</sup> Nanj yuvii me sí cu'naj Elías sí cayáan gaa naá, ne ase vaa ma'an ní' vaa so', tzaj ne cachíin ni'yaj so' rihaan Diose se vaa se caman', ne quisij ndaa va'nuy ya yo' táa yanéé ne caman' qui'yaj so', qui'yaj Diose gaa cachíin ni'yaj so' rihaan Diose ei. <sup>18</sup> Ndaa síj, gaa ne cachíin ni'yaj uún so' maan rihaan Diose, gaa ne caman' uún, qui'yaj Diose, gaa ne cavii sa' naa a.

<sup>19</sup> Cunq soj ca'mij, tinuj, nocoj. Sese tanáj xco 'o tuvi' soj se-tucuanj Diose tucuaán ya, ne sese guun nucaj yo'ó tuvi' soj qui'yaj canaán so' canicaj uún sí ca'anj yanij yo' canoco' so' tucuaán sa', <sup>20</sup> ne dan me se sí qui'yaj canaán yo' me se so' me sí tinanii man tuvi' rihaan sayuun adonj. Ne guun nucaj so' tinanii so' man nimán tuvi' so' rihaan sayuun ei. Dan me se ca'néj noco ndo'o so' cacun' xraá tuvi' so' adonj.

## Nihánj me 'o yanj cartá qui'yaj síí cu'naj Pedró ca'néé so' rihaan nij yuvii noco' man Diose a

<sup>1</sup> 'Unj ro', me síí cu'naj Pedró, ne apóstol cune' Jesucristó ca'anj nata' rihaan yuvii che'é so' mej a. Ne qui'yáá 'unj yanj nihánj ca'nej 'unj rihaan soj síj narii Diose man canoco' man so' síj cha'nuu ca'anj estadó Ponto do', estadó Galacia do', estadó Capadocia do', estadó Asia do', estadó Bitinia do', che'é sayuun quiran' soj a. <sup>2</sup> Asij naá quene'en Rej ní' Diose se vaa canoco' soj man so', ne che'é dan quinarii so' man soj, gaa ne guun che'e soj canoco' soj man orún' Diose, qui'yaj Nimán Diose, che'é se me rá so' cunó soj rihaan so', ne me rá so' cunu sa' nimán soj qui'yaj ton man Jesucristó ton cayanj man so' gaa cavi' so' che'é ní' a.

Me rá 'unj qui'yaj ndo'o Diose se luj che'é soj, ne gaa xej ndo'o nimán soj qui'yaj Diose a.

*Nana nihánj taj xna'anj se vaa na'vij ní' güii cayáán ní' rihaan Diose a*

<sup>3</sup> Cunaj uxrá vaa Diose Rej Jesucristó síj 'nij ra'a man ní', cataj ní' á. Dan me se cunu 'ee uxrá rá so' ni'yaj so' man ní', ne che'é dan naqui'yaj i'na' so' man Jesucristó, ne che'é se cunu i'na' uún Jesucristó ro', che'é dan guun ta'nij Diose man ní', ne che'é se ta'nij Diose me ní', che'é dan guun niha' rá ní' ne na'vij ní' quisij güii cayáán ní' rihaan Diose nu' cavii nu' ca'anj ei. <sup>4</sup> Ne dan me se vaa se sa' nicaj Diose rque Diose man soj asa' nucui' soj rihaan so', ne daj chihaa mij se quiri' se sa' yo', ne yo'o gaa sa' yo' nu' cavii nu' ca'anj nanj adonj. <sup>5</sup> Nucuj ndo'o Diose, ne che'é se amán rá soj ni'yaj soj man Jesucristó, che'é dan tumé Diose man

soj, che'é rej ca'vee cavii sa' soj asa' quisij güii ca'anj ni'ya chumii nihánj ne quene'en ní' nu' se vaa qui'yaj so' che'é ní' ei.

<sup>6</sup> Che'é dan guun niha' uxrá rá soj nanj á. Dan me se nda' se cuano nanó rá soj che'é sayuun 'na' rihaan soj doj güii nanj rihaan chumii nihánj cuano, tzaj ne aj guun niha' ndo'o rá soj, che'é se ne'en soj se vaa cavii sa' soj vaa güii, qui'yaj Diose chuguanj.

<sup>7</sup> Dan me se ne'en soj se vaa aga' oró mii me se se man uun rihaan chumii nihánj me yo', ne vaa güii ca'anj ni'ya yo' ga chumii nihánj, tzaj ne axrij ya'an nii man aga' oró mii yo', che'é rej me rá nii xcaj nii cuentá sese aga' sa' me yo' ni', ase aga' nij me yo' a. Ne ase vaa ya'an rihaan aga' oró mii yo' ro', danj vaa sayuun rihaan soj, ne che'é sayuun ran' soj ro', che'é dan acaj ní' cuentá sese ya ya amán rá soj ni'yaj soj man Diose ni', ase 'yaj ma'an soj a. Tzaj ne sa' doj vaa soj rihaan aga' oró mii yo', ne daj chihaa mij se ca'anj ni'ya soj, sese amán ya rá soj ni'yaj soj man Diose mei. Dan me se uxrá cavii sa' Diose, qui'yaj soj, ne uxrá ca'mii sa' yuvii che'é Diose, asa' ca'na' uún Jesucristó rihaan chumii nihánj chuguanj.

<sup>8</sup> Ne Jesucristó me se nda' se ne quene'en rihaan soj man so', tzaj ne amán rá soj ni'yaj soj man so', ne ne ne'en xa' rihaan soj man so' nihánj cuano, tzaj ne che'é se cuchumán ya rá soj ni'yaj soj man so' ro', che'é dan guun niha' uxrá rá soj che'é se aj ne'en soj se vaa cavii sa' uxrá soj adonj. <sup>9</sup> Ne che'é se amán rá soj ni'yaj soj man Diose ro', che'é dan cavii sa' nimán soj rihaan so' ei.

<sup>10</sup> Dan me se nij síí nata' se-nana Diose gaa naá ro', nata' nij so' che'é se luj qui'yaj Diose che'é soj, ne guun ndo'o rá nij so' xcaj nij so' cuentá daj gaa cavii sa' yuvii qui'yaj Diose, ne naqui'yaj cuu nij so' cúu yave nij so' che'é nu' nij rasuun sa' chuguanj. <sup>11</sup> Dan me se naqui'yaj cuu uxrá ya nij so' aman ca'na' síí ca'nej Diose rihaan



chumiij a. 'O se nicaj yu'unj Nimán Jesucristó man nij so', ne ma'an Nimán Jesucristó cataj xna'anj rihaan nij so' daj quiran' ma'an Jesucristó asa' ca'na' so' do', che'é suun sa' cata so' asa' quisij quiran' so' sayuun do' a. <sup>12</sup> Dan me se cataj xna'anj Diose rihaan nij so' se vaa nuveé ma'an nij so' me nij sí quene'en ca'na' sí ca'nej Diose ma'. Tananj nu' nij soj me nij sí quene'en man sí ca'nej Diose, asa' ca'na' so', taj Diose rihaan nij sí nata' se-nana Diose gaa naá yo' a. Ne nihánj me se nij sí nata' se-nana Diose nana sa' yo' yaj ro', ca'née Diose Nimán Diose rihaan nij so', ne aj nata' nij so' nu' se vaa qui'yaj Jesucristó sí ca'née Diose rihaan chumiij nihánj cuno soj a. Ne ndaa nij se-mozó Diose sí yanj xta' me rá quene'en daj gaa cavii sa' ní qui'yaj Jesucristó ei.

*Nana nihánj taj xna'anj se vaa nacúun Diose man ní guun ní sí sa' inanj rihaan so' a*

<sup>13</sup> Che'é dan 'o ca'nej nimán soj qui'yaj soj ndaa vaa me rá Diose ei. Gaa chij rá soj ga' tuvi' soj, ne yo'o gaa nucaj rá soj man Diose se vaa qui'yaj ndo'o so' se luj che'é soj asa' ca'na' uún Jesucristó rihaan chumiij nihánj ei. <sup>14</sup> Dan me se guun soj sí uno sa' rihaan Diose ei. Gaa naá me se ne quene'en soj daj vaa Diose, ne inanj guun rá soj qui'yaj soj se nij, tzaj ne yaj me se se guun qui'yaj uún soj danj mei. <sup>15</sup> Tananj che'é se sí sa' inanj me Diose sí nacúun man soj canoco' soj, che'é dan ma'an soj ro', no xcuún guun sí sa' ei. <sup>16</sup> Che'é dan no nana nihánj rihaan danj Diose a: "Sí sa' inanj mé 'unj, ne che'é dan guun soj sí sa' inanj uún á", taj Diose rihaan nij sí canoco' man so' gaa naá a.

<sup>17</sup> Diose ro', me sí nica inanj a'ne' cacun' che'é 'o 'o ní' ndaa vaa 'yaj 'o 'o ní', ne che'é se: "Ataj chij", taj soj rihaan Diose gaa achíin ni'yaj soj rihaan so' ro', che'é dan 'o caraa cochroj soj rihaan so' doj nij güii cayáan soj rihaan yo'óo nihánj á. <sup>18</sup> Aj

ne'en soj daj qui'yaj Diose gaa tinanii so' man soj rihaan tucuáan nij rma'an canoco' nij xii soj sí cumán gaa naá, ne nuveé sa'anj me se go' Diose gaa tinanii so' man soj ma'. Sa'anj me se se navij uun me yo' ei. <sup>19</sup> Tzaj ne ca'née Diose man Jesucristó cavi' ya so' cayanj ton man so' che'é ní', ne ase vaa avi' matzinj le'ej sa' inanj 'yaj nij sí israelitá che'é cacun' tumé nij so' ro', danj vaa cavi' Jesucristó che'é ní', ne so' me se vaa yu'vee ndo'o nó so' che'é se taj cacun' tumé so' man chuguanj. <sup>20</sup> Dan me se asij ataa qui'yaj Diose chumiij, ne aj ne'en Diose se vaa cavi' Jesucristó che'é ní', ne cuano gaa nichrun' quinavij chumiij nihánj me se curuvi' Jesucristó rihaan chumiij nihánj che'é ma'an nij soj ei. <sup>21</sup> Ne che'é se vaa qui'yaj Jesucristó che'é soj ro', che'é dan amán rá soj ni'yaj soj man Diose sí naqui'yaj i'na' man Jesucristó, ne cune' Diose man so' se vaa guun chij so' a. Ne che'é se danj qui'yaj Diose ro', che'é dan amán rá soj ni'yaj soj man Diose, ne na'vij soj quisij güii cavii sa' ndo'o soj qui'yaj so' a.

<sup>22</sup> Dan me se uno soj se-nana Diose nana ya, ne che'é dan cunuu sa' nimán soj, ne che'é dan no xcuún soj gaa 'ee rá soj man tuvi' soj adonj. Se cataj rma'an soj se vaa 'ee rá soj man tuvi' soj ma'. Ya gaa 'ee ndo'o rá soj man tuvi' soj ei. <sup>23</sup> 'O se cunuu i'na' nimán soj, qui'yaj se-nana Diose, ne nuveé se cavi' me se-nana Diose ma'. Tananj ase vaa 'o rasuun vaa i'na' vaa se-nana Diose, ne daj chihaa mój se ca'anj ni'ya yo' mei. <sup>24</sup> Che'é dan nó nana nihánj rihaan danj Diose a: "Ase vaa coj chrin' man tacaan ro', danj vaa taran' ní', ne ase vaa yâj taj ra coj ro', danj vaa suun sa' 'yaj ní' a. Daj se vaa naco coj ne navij yâj ayuu ro', danj vaa ní' navij ní' a. <sup>25</sup> Tzaj ne daj chihaa mój se navij se-nana sí 'nij ra'a man ní' ma'". Danj taj nana no rihaan danj Diose, ne se-nana Diose yo' me nana sa' nata' núj rihaan soj adonj.

## 2

<sup>1</sup> Che'é dan ca'ne' rá soj ga suun noco' tucuáán chí'ij ei. Se nachri' soj ni'yaj soj nu' tuvi' soj mei. Se tiha' yu'unj soj man tuvi' soj mei. 'Q ndaa taj soj ro', veé danj qui'yaj guee soj ei. Se guun xcoj ruvaa rá soj ni'yaj soj tuvi' soj mei. Se nanó soj cuentó ne che'é tuvi' soj ma'. <sup>2</sup> Ase vaa me ndo'o rá leé no cutzii leé no too ro', danj guun ndo'o rá soj tucu'yón soj se-nana Diose nana ya, ne ase vaa racuíj too man leé no achij leé no ro', danj gaa racuíj se-nana Diose man soj cunuu sca' nimán soj chuguanj. Dan, gaa ne cavii sa' ndo'o soj, qui'yaj Diose ei. <sup>3</sup> 'Q se aj ne'en soj se vaa ve'é ndo'o 'yaj síi 'nij ra'a man ní' che'é ní' adonj.

*Nana nihánj taj xna'anj se vaa ase vaa yuvej sa' vaa Jesucristó a*

<sup>4</sup> Ca'na' soj rihaan Jesucristó ei. Ase vaa 'o yuvej xij sa' uchruj nii asino yaan tacóo ve' gaa nachráj nii ve' ro', danj vaa so', tzaj ne nij síi man rihaan chumii nihánj me se nachri' nij so' ni'yaj nij so' yuvej yo', tzaj ne síi sa' ndo'o narii Diose me so' nanj adonj. <sup>5</sup> Ne ase vaa nij yuvej le'ej nii nata' xraá yuvej xij ro', danj vaa taran' soj, sese canoco' raan soj man Jesucristó, ne ve'é cumán rcua'aan soj, qui'yaj Jesucristó, gaa ne cunuu sa' nimán soj, gaa ne ase vaa xrej ro', danj gaa soj rihaan Diose, ne ase vaa se sa' nago' nij xrej rihaan Diose ro', danj gaa se sa' qui'yaj soj che'é se me soj síi noco' man Jesucristó, gaa ne caran' rá Diose se vaa 'yaj soj ei.

<sup>6</sup> Che'é dan nó nana nihánj rihaan danj Diose a: “Ni'yaj so' ei. Aj cuné' 'unj yo'o yuvii chuman' Jerusalén naj rej cu'naj Sion, ne ase vaa 'o yuvej vaa so', nucuaj ndo'o so' chuguanj. Sij sa' ndo'o me so', ne quinariii 'unj man so', ne ase vaa yuvej xij une' yuvii tacóo ve' ro', danj gaa so', ne sese chuman rá yo'o so' quene'en so' man síi cuné' 'unj, ne se guun na'aj so' ma'. Tananj cavii sa' ndo'o so' adonj”.

Danj cataj Diose, ca'mii so' che'é Jesucristó gaa naá a. <sup>7</sup> Vaa yu'vee ndo'o nó Jesucristó rihaan soj sij amán rá ni'yaj man so', tzaj ne xa' nij síi ne amán rá ni'yaj man Jesucristó me se quisij ya ndaa vaa taj nana nihánj nana no rihaan danj Diose adonj: “Yuvej quiri'ij nij síi cune' ve' ro', guun yuvej sa' doj rihaan taran' nij yuvej naj tacóo ve' yo' nanj adonj”, taj danj Diose a. <sup>8</sup> Ne: “Naxru' yuvii, qui'yaj yuvej yo', ne guun na'aj nij yuvii gaa quene'en nij yuvii man so'”, taj yo'ó nana no rihaan danj Diose a. Ne nij síi ne amán rá ni'yaj man Jesucristó me se che'é se ne cunó nij so' se-nana Diose ro', che'é dan naxru' nij so' ne quiri'ij nij so' a. Dan me se ca'née ra'a Diose man nij so' quiran' nij so' danj nanj ei.

*Nana nihánj taj xna'anj se vaa narii Diose man ní' sij noco' man Jesucristó a*

<sup>9</sup> Xa' soj, tzaj ne sij narii Diose me soj, ne xrej uun chij ya nuu rihaan Diose me soj, ne sij cunuu sa' nimán me soj, ne yuvii man chuman' noco sa' ndo'o ya uun chij Diose rihaan me soj, ne che'é se me rá Diose nata' soj che'é se sa' qui'yaj so' ro', che'é dan narii so' man soj ei. Dan me se sij noco' tucuáán rmi' me soj gaa naá, tzaj ne canacúún Diose man soj xcaj soj cuentá, ne cunaj uxrá vaa se-tucuanj Diose tucuáán noco' soj cuano ei. <sup>10</sup> Dan me se gaa naá me se nuveé yuvii 'nij ra'a Diose me soj, ne ne gaa 'ee rá Diose ni'yaj Diose man soj ma'. Tzaj ne yaj me se cunuu 'ee rá so' ni'yaj so' man soj, ne guun soj síi chéé ga ma'an Diose, ne 'nij ra'a Diose man soj ei.

*Nana nihánj taj xna'anj se vaa qui'yaj suun ní' rihaan Diose á*

<sup>11</sup> Dan me se 'ee ndo'o raj man soj, ne qui'yaj soj se ndo'o uxrá, ne cunó soj ei. Nuveé chihanj ní' me chumii man ní' cuano, man tinuj, man nocoj. Ase vaa 'o síi aran' me ma'an rej ro', danj vaa ní' rihaan chumii nihánj cuano ei. Che'é dan se guun qui'yaj

soj rasuun chi'ii me rá nee man soj qui'yaj soj ma'. 'O se unu' se chi'ii yo' ga nimán ní' adonj. <sup>12</sup> Ne ve'é inanj qui'yaj soj rej ne soj sca'núj nij síi chi'ii man rihaan chumij nihánj, gaa ne sese guun rá nij so' cuta' nij so' cacun' rmi' xráá soj se vaa nij 'yaj soj, gaa ne xcaj nij so' cuentá se vaa ve'é inanj 'yaj soj ei. Gaa ne güii cuchí' Diose rihaan nij so' me se cataj nij so' se vaa sa' uxrá vaa Diose chuguanj.

<sup>13</sup> Che'é se sij noco' man síi 'nij ra'a man ní' me soj ro', che'é dan cunō soj rihaan taran' nij síi nicaj suun ei. Dan me se cunō soj rihaan síi nicaj suun noco' emperador, che'é se sij uun chij doj me so' ei. <sup>14</sup> Ne dan me se cunō soj rihaan yo'ó nij síi nicaj suun gobernador noco' do' nij uún, che'é se sij a'ne' suun síi nicaj suun emperador rihaan me nij so', ne nō xcuún nij so' qui'yaj nij so' sayuun man nij síi chi'ii do', ca'mii sa' nij so' che'é nij síi sa' do' chuguanj. <sup>15</sup> Ne me rá Diose qui'yaj ní' se sa', gaa ne cunū dínj tu'va nij síi ne acaj cuentá síi tu'va rma'an nana nij che'é Jesucristó chuguanj. <sup>16</sup> Ne'en ní' se vaa sij chéé uun me ní', tzaj ne se guun cataj ní' se vaa che'é dan me ca'vee qui'yaj ní' me ma'an se chi'ii ma'. Tananj guun ní' síi 'yaj suun rihaan Diose ei. <sup>17</sup> Dan me se ve'é ca'mii soj ga daj a yuvij, ne gaa 'ee rá soj man nu' nij síi amán rá ni'yaj man Jesucristó, ne cunō soj rihaan Diose, ne ve'é caraa cochroj soj rihaan síi nicaj suun emperador ei.

*Nana nihánj taj xna'anj se vaa ase vaa ca'ne' sa' guee rá Jesucristó gaa quiran' so' sayuun ro', danj gaa qui'yaj ní' a*

<sup>18</sup> Ve'é cunō soj rihaan se-ru'vee soj sij uun mozó á. Nuveé inanj rihaan nij ru'vee sa' ru'vee ni'yanj a'mii cunō soj ma'. Veé danj cunō uún soj rihaan nij ru'vee nij 'yaj do' uún nanj ei. <sup>19</sup> Ne sese quiran' ta'aj soj sayuun qui'yaj se-ru'vee ta'aj soj ru'vee chi'ii, che'é se maan se sij noco' man Diose me síi ran' sayuun yo', ne sese a'ne'

sa' guee rá síi ran' sayuun yo' ga suun tucuáá rihaan ru'vee, gaa ne cunaj uxrá 'yaj so' ni'yaj Diose adonj.

<sup>20</sup> Dan me se síi tumé ya cacun' ro', vaa che'é cayuun so', ne nda' se ca'vee ca'ne' guee rá so' ayuun so' do', ran' so' sayuun do', tzaj ne se cataj ní' se vaa cunaj 'yaj so' ran' so' sayuun a ma'. Maan che'é cacun' tumé so' me ayuun so' nanj á. Tzaj ne síi inanj se sa' 'yaj me se sese ca'ne' sa' guee rá so' quiran' cachrij so' sayuun che'é Diose, ne cunaj uxrá qui'yaj so' nanj á. 'O se Diose ro', me síi naru'vee nu' sayuun quiran' so' che'é so' nanj adonj. <sup>21</sup> 'O se canacúún Diose man ní' canoco' ní' man so' ne quiran' ní' sayuun adonj. Tananj Jesucristó, tzaj ne quiran' so' sayuun che'é ní', ne ca'ne' sa' guee rá so' gaa quiran' so' danj adonj. Dan me se ndaa rá se vaa ca'ne' rá Jesucristó gaa quiran' so' sayuun che'é ní' ro', danj gaa guee ca'ne' rá ní' quiran' ní' sayuun, rá so' ei. <sup>22</sup> Ne Jesucristó me se a 'ó nana ne do', a 'ó cacun' do', ne nari' ní' tu'va so' mei. <sup>23</sup> Ca'mii chree yuvij che'é so', tzaj ne ne ca'mii chree so' che'é nij yuvij ma'. Quiran' so' sayuun, tzaj ne ne ca'mii so' nana quij ma'. Tananj guun rá so' se vaa Diose síi a'ne' nica cacun' che'é ní' ro', so' me síi ca'ne' cacun' che'é so' vaa güii a. <sup>24</sup> Cacun' tumé ní' ro', nata' xráá Jesucristó gaa cavi' so' rihaan rcutze, che'é rej ca'ne' rá ní' ga suun 'yaj cacun' ne inanj tucuáán sa' canoco' ní' a. Ne che'é se go' nii xráá so' ro', che'é dan nahuun sa' nimán soj a.

<sup>25</sup> Dan me se ase vaa matzinj cha'nuu rco' ro', vaa soj gaa naá, ne ne canoco' soj man Diose gaa naá, tzaj ne yaj ro', canicaj nimán soj, ne guun che'e soj canoco' soj man Jesucristó, ne ase vaa síi ve'é ndo'o tumé daán matzinj ro', danj vaa so' ga soj cuano, ne ve'é nicaj yu'unj so' man soj cuano ei. Dan me se so' me síi uun chij rihaan nimán soj cuano chuguanj.

### 3

*Nana nihánj taj xna'anj daj qui'yaj*

*yuvii ga nica yuvii a*

<sup>1</sup> Ase vaa no xcuún mozó cuno mozó rihaan se-ru'vee mozó ro', danj vaa no xcuún soj chana cuno soj rihaan nica soj á. Gaa ne ca'vee se na'vej rá nica ta'aj soj cuno nij so' se-nana Diose, tzaj ne che'é se ve'é ndo'o 'yaj soj rihaan nica soj ro', che'é dan guun rá nica soj canoco' nij so' man Diose ga soj chuguanj. Dan me se ca'vee se se guun rá nica soj ca'mii natáj soj rihaan nij so', tzaj ne che'é se ve'é ndo'o 'yaj ma'an soj, che'é dan guun rá nica soj canoco' nij so' man Diose ei. <sup>2</sup> Dan me se xcaj nij so' cuentá se vaa chana aráj cochroj rihaan nica me soj, ne nuveé chana niha' rá me soj a. <sup>3</sup> Se caráya'anj ndo'o soj chana che'é rej niquee sa' soj ma'. Se nanó rá soj che'é rej daj gaa yuvé raá soj do', che'é caquí canoco' xreé soj do', che'é ticuu cunuú chihá soj do', che'é yatzij tu'vee cunuú soj do' ma'. Se guun rá soj se vaa ve'é gaa soj qui'yaj rasuun danj ma'. <sup>4</sup> Dan me se xcaj soj cuentá che'é nimán ma'an soj che'é rej gaa sa' nimán soj á. 'O se ve'é gaa nimán soj, ne dínj gaa nimán soj, ne nimán soj me se daj chihaa mij se quirí' yo' ma'. Ne ve'é gaa soj, gaa ne caran' rá Diose ni'yaj Diose man soj adonj. <sup>5</sup> Danj qui'yaj nij chana canoco' man Diose cumán gaa naá, ne nucaj rá nij no' man Diose, ne ve'é cuno nij no' rihaan nica nij no', che'é rej ve'é gaa nij no' a. <sup>6</sup> Ne danj qui'yaj chana cu'naj Sará, ne ve'é cuno no' rihaan nica no' síi cu'naj Abraham, ne: "Síi chij", cataj no' ni'yaj no' man so' a. Dan me se sese sa' inanj qui'yaj soj, ne sese a 'ó xco' se cuchu'vi' soj, gaa ne guun soj ta'nij si'no níi cu'naj Sará uún chuguanj.

<sup>7</sup> Ne tananj soj sno'o uún, ne xcaj soj cuentá me se achiin man nica soj, ne ve'é cayáán soj ga no' ei. Xcaj soj cuentá se vaa nucaj soj doj rihaan no', ne che'é dan ve'é qui'yaj soj ga no' á. Ne xcaj soj cuentá se vaa 'o cyaan cayáán chana rihaan Diose nu' cavii nu' ca'anj a. Sese ve'é qui'yaj

soj, ne se guun vij rá soj gaa achín ni'yaj soj rihaan Diose ma'.

*Nana nihánj taj xna'anj se vaa nda' se quiran' nij síi 'yaj se sa' sayuun cuano, tzaj ne vaa güii cavii sa' uxrá nij so' a*

<sup>8</sup> Daj yo'ó nana cataj xna'anj 'unj rihaan soj, ne dan me se cyaan gaa nimán taran' soj ga tuvi' soj, ne dan me se ase 'ee rá soj tinúú a'ngaa soj ro', danj gaa 'ee rá soj man tuvi' soj yo'ó nij síi amán rá ni'yaj man Jesucristó á. Raquíj soj man nij síi ran' sayuun, ne gaa nica' nimán soj ei. <sup>9</sup> Ca'vee se qui'yaj chi'ii yuvii man soj, tzaj ne se qui'yaj chi'ii soj man nij yuvii ma'. Ca'vee se ca'mii chree yuvii che'é soj, tzaj ne se ca'mii chree soj che'é nij yuvii ma'. Tananj ve'é ca'mii soj ga nij yuvii ei. 'O se canacúun Diose man soj, che'é rej qui'yaj soj danj, gaa ne ca'vee ca'mii luj Diose che'é ma'an soj chuguanj. <sup>10</sup> 'O se nana nihánj nó rihaan danj Diose, taj yo' se vaa: "Sese me rá yo'o so' guun niha' rá so' cayáán so', ne sese me rá so' cavii sa' so', ne se ca'mii so' nana nij se ca'mii so' nana ne se ca'mii so' nana chree do' ma'. <sup>11</sup> Naxuun so' man so' rihaan suun chi'ii, ne inanj se sa' qui'yaj so' á. Dan me se nano' ndo'o so' rej ca'vee cayáán dínj so' ga tuvi' so', ne yo'o canoco' so' man chrej dínj yo' a. <sup>12</sup> 'O se ni'yaj ndo'o Diose daj ran' nij síi vaa sa', ne nanó xrej Diose nu' nana achín ni'yaj nij so' rihaan so', tzaj ne taj ri'yunj Diose ni'yaj Diose man nij síi 'yaj chi'ii a", taj nana no' rihaan danj Diose a.

<sup>13</sup> Ne se guun rá yuvii qui'yaj chi'ii yuvii man soj, sese sij niha' rá qui'yaj sa' me soj ma'. <sup>14</sup> Tzaj ne ca'vee se quiran' soj sayuun che'é se sij vaa sa' inanj me soj, tzaj ne vaa che'é guun niha' rá soj chuguanj. 'O se vaa güii cavii sa' soj adonj. Che'é dan se nanó rá soj, ne se cuchu'vi' soj che'é se vaa qui'yaj yuvii man soj ma'. <sup>15</sup> Caraa cochroj soj ni'yaj soj man Jesucristó sij 'nij ra'a man níi ei. Xcaj soj cuentá daj gaa ca'mii soj



gã me ma'an sîi xná'anj man soj me che'é me guun rá soj se vaa caviî sa' soj qui'yaj Diose vaa güii a. <sup>16</sup> Ve'é nata' soj rihaan nij sîi xná'anj man soj, ne se naqui'yaj xta' soj nimán soj asa' nata' soj se-nana Diose ma'. A'ó xco' se qui'yaj soj cacun' ma'. Gaa ne nij sîi nachri' ni'yaj man soj sij noco' man Jesucristó che'é se ve'é inanj 'yaj soj me se guun na'aj nij so' che'é nana quij tu'va ma'an nij so' adonj. <sup>17</sup> Ne sese ca'vej rá Diose ne sese quiran' ní' sayuun che'é se qui'yaj sa' ní', ne cunaj quiran' ní' sayuun ei. Tzaj ne sese maan che'é se qui'yaj ní' cacun' ne quiran' ní' sayuun, ne nij uxrá vaa quiran' ní' sayuun gaa ei.

<sup>18</sup> Tzaj ne Jesucristó me se nda' se taj cacun' tumé so', tzaj ne gaa cachée so' rihaan chumiî nihánj, ne quiran' ndo'o so' sayuun che'é cacun' tumé ní' sij tumé cacun', che'é rej ca'vee nuci' ní' rihaan Diose chuguanj. Dan me se cavi' maan nee man Jesucristó, tzaj ne cunuu i'na' nimán so' adonj. <sup>19</sup> Gaa ne ca'anj so' ca'mii natáj so' rihaan nij nana chree 'nij taga' rmi' a. <sup>20</sup> Ne nij nana chree me se ne ca'vej rá nij so' cunõ nij so' rihaan Diose gaa naá gaa cayáán sîi cu'naj Noé adonj. Dan me se Noé me se 'yaj so' rihoo ne a'mii natáj so' se-nana Diose se vaa caman' uxrá, tzaj ne ne cuchuman rá nij yuviî ma'. Tzaj ne caráj x'naa Diose che'é nij yuviî, ne na'vij ndo'o Diose canicaj nimán nij so', tzaj ne ne canicaj nimán nij so', ne canó xráá nij so' gaa ca'na' na ya'anj a. Ne daj yo'ó tunj guee yuviî catúj rque rihoo, ne quinaniî nij so' rihaan na ya'anj, qui'yaj na yo' nanj adonj. <sup>21</sup> Ne veé na me se 'yaj nanii ní' rihaan sayuun yo' yaj ei. Na ata' ne ní' me yo' chuguanj. Nuveé che'e rej guun rá ní' güej nacaj xráá ní' cata' ne ní' ma'. Che'é rej cataj ní' rihaan Diose se vaa guun rá ní' se vaa navij chrej chi'ii uun chij nimán ní' ne inanj se sa' guun rá ní' qui'yaj ní' rej rihaan ní' me se che'é dan cata' ne ní' adonj. Ne inanj che'é se cunuu i'na' uún Je-

sucristó gaa cavi' so' ro', che'é dan ca'vee quinaniî ní' sij cata' ne rihaan sayuun chuguanj. <sup>22</sup> Dan me se quisij cunuu i'na' uún Jesucristó, gaa ne quinan' so' rej xta', ne x'núú Diose rej nuva' Diose yáán so' cuano, ne uun chij so' rihaan cunudanj nij se-mozó Diose do', rihaan nu' nij nana uun chij rihaan nij rasuun man rihaan chumiî nihánj do', rihaan yo'ó nij sîi man rej xta' adonj.

#### 4

*Nana nihánj taj xna'anj daj qui'yaj ní'yaj che'é se nichrun' ca'na' uún Jesucristó rihaan chumiî nihánj a*

<sup>1</sup> Dan me se che'é se quiran' ndo'o Jesucristó sayuun gaa me so' yuviî ro', che'é dan nõ xcúún soj ca'nej nucaj soj nimán soj, gaa ne ca'vee guun nucaj soj rihaan sayuun quiran' soj ei. Ne'en soj se vaa sîi quiran' nee sayuun che'é Diose me se daj chihaa mij se qui'yaj canaán cacun' rihaan so' ma'. <sup>2</sup> Dan me se doj güii quinaj cayáán so' rihaan chumiî nihánj me se se qui'yaj uún so' me ma'an se nij me rá nee man so' qui'yaj so' ma'. Tananj qui'yaj so' ndaa vaa me rá Diose qui'yaj so' ei. <sup>3</sup> Dan me se gaa naá me se ya qui'yaj ndo'o soj nu' nij rasuun nij ndaa vaa me rá nij sîi yanij chuguanj. Dan me se cachée soj chrej chi'ii do', chrej a'mii gaa chana niha' rá do', chrej uun xno do', chrej a'mii chree do', yo'ó nij chrej chi'ii do', 'yaj soj chuguanj. Ne na'vij soj rihaan ya'anj cacój yuviî ndaa vaa na'vej rá Diose qui'yaj soj ei. <sup>4</sup> Tzaj ne yaj me se ca'ne' rá soj gaa suun chée gaa nij sîi chi'ii ne 'yaj ndo'o se nij gaa nij so' chuguanj. Che'é dan yaj me se ma'anj rá nij so' ni'yaj nij so' man soj, ne a'mii chree nij so' che'é soj cuano ei. <sup>5</sup> Tzaj ne aj nicun' chruun Jesucristó ca'ne' so' cacun' che'é nij sîi vaa i'na' do', che'é nij sîi cavi' do', ne nij sîi chi'ii yo' ro', nõ xcúún nij so' nata' nij so' rihaan Jesucristó che'é nu' nij se chi'ii qui'yaj nij so' ei. <sup>6</sup> Maan che'é dan me ca'mii

natáj Jesucristó se-nanā Diose nana sa' ndaa rihaan nij sí cavi', che'é rej nda' se quiran' nij so' sayuun ga yo'ó nij yuvií che'é cacun' qui'yaj nij so' rihaan chumií nihánj, tzaj ne ca'vee cayáán nimán nij so' rihaan Diose nu' cavii nu' ca'anj a.

<sup>7</sup> Nichrun' un' ca'anj ni'ya chumií nanj ei. Che'é dan gaa chij inanj rá soj, ne yo'ó xcaj soj cuentá, gaa ne ca'vee cachinj ni'yaj soj rihaan Diose chuguanj. <sup>8</sup> Ne suun sa' nocoj doj qui'yaj soj me nihánj, ne gaa 'ee rá soj man tuvi' soj nij sí amán rá ni'yaj man Jesucristó, ne sese 'ee rá ní' tuvi' ní', gaa ne quinavij ndo'o nij cacun' tumé tuvi' ní', qui'yaj ní' adonj. <sup>9</sup> Ca'vej soj caran' tuvi' soj sí amán rá ni'yaj man Jesucristó ve' tucua' soj, ne go' soj se chá chá nij so', ne se guun cataj soj se vaa sayuun uxrá vaa 'yaj soj danj ma'. <sup>10</sup> Dan me se qui'yaj Diose se luj che'é 'o 'o ní', rqué Diose suun rihaan 'o 'o ní' qui'yaj suun ní' che'é tinúú ní', ne ino' doj vaa suun 'yaj suun 'o 'o ní' che'é tinúú ní', ne che'é dan no' xcuún soj racuúj soj man tinúú soj, ndaa vaa uun nucuaj soj chuguanj. <sup>11</sup> Sese ca'mií natáj yo'ó tuvi' soj, ne yo'ó cunuú rá so' se vaa se-nanā Diose me nij nanā a'mií natáj so' á. Sese qui'yaj suun yo'ó tuvi' soj che'é soj, ne qui'yaj so' nu' ndaa vaa guun nucuaj so' qui'yaj so' qui'yaj Diose á. Gaa ne ca'vee ca'mií sa' yuvií che'é Diose ni'yaj nij yuvií man soj sij noco' man Jesucristó ei. Ne Diose me se nu' cavii nu' ca'anj ca'mií sa' ní' che'é so', ne guun chij ndo'o so' adonj. Veé danj gaa ya ei.

*Nanā nihánj taj xna'anj se vaa se nanó rá ní' che'é sayuun ran' ní' a*

<sup>12</sup> Se ca'anj rá soj che'é sayuun quiran' soj, man tinuj, man nocoj. Ya quiran' ndo'o soj sayuun, che'é rej ca'vee xcaj soj cuentá sese sij amán ya rá ni'yaj man Diose me soj chuguanj. Ne se guun rá soj se vaa orún' soj me sí ran' sayuun ma'. <sup>13</sup> Maan se guun niha' rá soj che'é se ase quiran' Jesucristó sayuun ro', danj vaa ran'

guue soj ga so', gaa ne güii ca'na' uún so' guun chij so' rihaan chumií nihánj me se ca'vee guun niha' doj rá soj ei. <sup>14</sup> Sese nachri' yuvií ni'yaj yuvií man soj che'é se sij noco' man Jesucristó me soj, ne vaa che'é guun niha' rá soj adonj. 'O se yanj Nimán Diose ga soj, ne uun chij ndo'o Nimán Diose ei.

<sup>15</sup> A 'ó soj se guun sí ticavi' yuvií do', sí ituu do', sí chi'ii do', sí tiguúj man do' ma'. Tadó soj ei. Vaa che'é quiran' sí vaa danj sayuun ei. <sup>16</sup> Tzaj ne sese quiran' yo'ó tuvi' soj sayuun che'é se sij noco' man Jesucristó me so', ne taj che'é guun na'aj so' ma'. Tananj che'é se sij noco' man Jesucristó me so' ro', che'é dan cataj so' se vaa sa' vaa Diose a. <sup>17</sup> 'O se yaj me se aj guun che'e Diose ca'ne' Diose cacun' che'é ní' sij tucua' Diose a. Che'é dan ne'en ní' se vaa nij doj quiran' nij sí na'vej rá cunō se-nanā Diose nanā sa' asa' ca'ne' Diose cacun' che'é nij so' chuguanj. <sup>18</sup> 'O se danj Diose taj: “Nanj sí noco' ndo'o man Diose, tzaj ne sayuun ndo'o quinanií nij so' rihaan sayuun, ne táá a nij sí ne noco' man Diose do', táá a nij sí chi'ii do', ne ca'anj ya nij so' rihaan ya'an ei”. Danj taj nanā no' rihaan danj Diose a. <sup>19</sup> Che'é dan xa' soj sij ran' sayuun ndaa vaa me rá Diose quiran' soj, tzaj ne yo'ó inanj qui'yaj sa' soj, ne dan me se ca'vej rá soj nicaj yu'unj Diose man nimán soj á. 'O se Diose me sí qui'yaj man soj, ne vaa che'é gaa nucuaj rá soj man so' ei.

## 5

*Nanā nihánj taj xna'anj che'é chrej narqué Pedró rihaan nij sí cuchumán rá ni'yaj man Jesucristó a*

<sup>1</sup> Rihaan soj sij chij nicaj yu'unj man nij sí noco' man Jesucristó man daj a chuman' ca'mií cuano' a. 'O se sí chij mé 'unj ga soj, ne sí quene'en sayuun se vaa quiran' Jesucristó mé 'unj, ne dan me se ve'é guun chij 'unj ga Jesucristó asa' ca'na' uún so' rihaan chumií nihánj, raj a. <sup>2</sup> Ase vaa nicaj yu'unj yuvií man matzinj

ro', danj gaa ve'é nicaj yu'unj soj man nij sí noco' man Diose ndaa vaa ca'ne' Diose suun rihaan soj á. Se naqui'yaj 'ee soj man soj rihaan suun yo' ma'. Maan se ve'é qui'yaj suun soj che'é Diose ei. Ne se guun inanj rá soj qui'yaj canaan soj che'é suun 'yaj soj ma'. Tananj gaa niha' rá soj che'é ma'an suun yo' ei. <sup>3</sup> Ne se guun niha' rá soj quirii ta'nga' soj rihaan nij sí noco' man Jesucristó ma'. Inanj ve'é qui'yaj suun soj ga nij so', ne quene'en nij so' daj qui'yaj soj, gaa ne xcaj nij so' cuentá daj qui'yaj ma'an nij so' uún a. <sup>4</sup> Gaa ne asa' curuvi' Jesucristó sí nicaj yu'unj man taran' ní' sij nicaj yu'unj man nij sí noco' man Jesucristó me se ca'na' 'o cachriin corona sa' inanj cunuú raa ní', qui'yaj so', ne dan me se nu' cavii nu' ca'anj ve'é ndo'o gaa ní', qui'yaj Jesucristó chuguanj.

<sup>5</sup> Tananj soj sij tachruu, ne cuno soj rihaan nij sí chij, ne veé dan me taran' soj me se naqui'yaj nica' soj nimán soj rihaan tuvi' soj á. 'O se nana nihánj nó rihaan danj Diose, taj yo' se vaa: "Aráan Diose chrej rihaan nij sí xta' nimán se cavii sa' nij so', tzaj ne 'yaj Diose se luj che'é nij sí nica' nimán a", taj nana yo' a. <sup>6</sup> Che'é dan me yo'o naqui'yaj nica' soj nimán soj rihaan Diose sí nucuaj ndo'o, ne cuno soj rihaan so', gaa ne vaa güii, ne cavii sa' soj, qui'yaj so' adonj. <sup>7</sup> A'ó xco' se nanó rá soj ma'. Diose ro', me sí nanó ndo'o rá daj ran' soj, ne che'é dan me 'o gaa nucuaj rá soj man so' ei.

<sup>8</sup> Gaa sca' rá soj, ne tumé soj man soj daj qui'yaj soj ei. 'O se vaa sí taj ri'yunj ni'yaj man soj, ne sí chree me so', ne ase 'yaj chuvaá aguáj chée nano' xcuu cha ro', danj 'yaj sí chree, chée so' nano' so' man sí ca'vee tiri' so' man chuguanj. <sup>9</sup> 'O raan canoco' soj man Diose, ne daj chihaa míj se cuno soj rihaan sí chree mei. Xcaj soj cuentá se vaa ase vaa sayuun ran' soj ro', danj vaa guee sayuun ran' taran' nij sí noco' man Jesucristó man rihaan chumii nihánj chuguanj. <sup>10</sup> Dan

me se Diose ro', me sí 'yaj daj a se luj che'é soj, ne so' me sí canacúun man soj cavii sa' uxrá soj ga so' nu' cavii nu' ca'anj che'é Jesucristó, ne asa' quisíj quiran' soj sayuun doj güii rihaan chumii nihánj, gaa ne cune' sa' Diose man soj, ne naqui'yaj sca' so' man soj, ne gaa nucuaj inanj rá soj, qui'yaj so' adonj. <sup>11</sup> Ne guun chij ndo'o Diose nu' cavii nu' ca'anj, ne daj a güii ve'é cayáan so' nanj adonj. Amén.

*Nana nihánj taj xna'anj se vaa ve'é cayáan nij sí ca'anj yanj cartá nihánj rihaan, rá nij tuvi' Pedró a*

<sup>12</sup> Veé danj síj natá' 'unj doj nij nana no rihaan yanj nihánj, ne tinú' Silvano me sí cachrón se-nanaj rihaan yanj nihánj, ne dan me se tinúú ní' sí nucuaj rá ní' man me so', ne dan me se nana nihánj me se narquej chrej nucuaj rihaan soj, ne cataj xna'anj 'unj rihaan soj se vaa tucuáan noco' ní' ro', ma'an ya tucuáan yo' me rej 'yaj Diose se luj che'é ní' chuguanj. Raan canoco' soj tucuáan yo' ei. <sup>13</sup> Dan me se nij tinúú ní' sí man chuman' nihánj chuman' cu'naj Babilonia ro', me rá nij so' se vaa ve'é cumán soj a. Narii Diose man nij so' ga soj canoco' taran' nij soj man Diose, ne vaa tinú' Marcos, ne ase vaa 'o ta'níj ro', vaa so' rihanj, ne ve'é cayáan soj, rá so' uún a.

<sup>14</sup> Ve'é uxrá ca'mii soj nana luj ga tinúú soj sí amán rá ni'yaj man Jesucristó gaa nari' tuvi' soj á.

Ne me ndo'o rá 'unj gaa xej nimán cunudanj soj sij noco' man Jesucristó qui'yaj Diose nanj chuguanj.

## Nihánj me síj vij yanj cartá qui'yaj síi cu'naj Pedró ca'néé so' rihaan nij yuvij noco' man Diose a

<sup>1</sup> 'Unj ro', me síi cu'naj Simón Pedro síi 'yaj suun rihaan Jesucristó, ne apóstol cune' so' nata' rihaan yuvij che'é so' mej, ne qui'yáá 'unj yanj nihánj ca'nej 'unj rihaan soj sij noco' man Jesucristó, ne dan me se cuyaan yu'vee nó soj ga núj rihaan Diose ei. Dan me se síi nica nimán me Jesucristó, ne amán rá soj ga núj ni'yaj soj man Diose, qui'yaj Jesucristó, ne so' ro', me Diose síi noco' ní', ne so' me síi tinanii man ní' rihaan sayuun adonj.

<sup>2</sup> Me rá 'unj xcaj ndo'o soj cuentá che'é Diose do', che'é Jesucristó sij 'nij ra'a man ní' do', gaa ne ca'vee quiri' ndo'o soj se luj ne gaa xej nimán soj, qui'yaj roj so' ei.

*Nana nihánj taj xna'anj daj qui'yaj ní' ne canoco' raan ní' man Jesucristó a*

<sup>3</sup> Dan me se canacúún Diose man ní' cavii sa' uxrá ní' ne guun chij ní' ga ma'an so', ne Jesucristó me se ya'anj ndo'o rá so', ne so' me síi qui'yaj xcaj ní' cuentá che'é Diose, ne che'é dan ca'vee cayáán sa' ní' ga Diose, ne ve'é canoco' ní' man Diose, ne taj a doj rasuun cachjin man ní', qui'yaj so' ma'. <sup>4</sup> Ne che'é dan cata' tu'va so' che'é nij se luj qui'yaj ndo'o so' che'é ní', che'é rej ca'vee quinanii soj rihaan se chi'ii nuu nimán nij síi man rihaan chumij nihánj, ne ase vaa ma'an Diose ro', danj gaa soj ei.

<sup>5</sup> Ne che'é dan soj sij amán rá ni'yaj man Jesucristó me se yo'o naqui'yaj cuu soj che'é se-tucuanj Diose, ne naqui'yaj sca' ndo'o soj nimán soj, ne asa' guun sca' nimán soj, gaa ne terquee soj xcaj soj cuentá sa' doj che'é se-nana Diose, <sup>6</sup> ne asa' quene'en sa' soj se-nana Diose, gaa

ne terquee soj guun soj síi tumé sa' man ma'an daj qui'yaj ma'an, ne asa' quisij tumé sa' soj man ma'an soj, gaa ne terquee soj guun nucuaj nimán soj rihaan sayuun, ne asa' quisij guun nucuaj nimán soj rihaan sayuun, gaa ne terquee soj qui'yaj soj ndaa vaa me rá Diose qui'yaj soj, <sup>7</sup> ne asa' quisij nari' soj qui'yaj soj ndaa vaa me rá Diose, gaa ne terquee soj cunuu ni'yanj nimán soj, ne asa' quisij cunuu ni'yanj nimán soj, gaa ne terquee soj cunuu 'ee rá soj ni'yaj soj tuvi' soj ei.

<sup>8</sup> Dan me se sese doj a nari' soj qui'yaj soj nu' danj daj a güii, gaa ne se ca'vee guun soj síi ni'yon síi ne ne'en qui'yaj suun che'é Diose a ma'. Tananj sa' uxrá doj quene'en soj man Jesucristó sij 'nij ra'a man ní' adonj. <sup>9</sup> Tzaj ne síi ataa nari' qui'yaj nu' ndaa vaa taj 'unj nihánj me se ase vaa síi ne ruvi' gan' ni'yaj vaa so', se vaa síi tuchrii vaa so', ne nichrun' yáj tacúún so' ruvi' ni'yaj so', ne taj se 'yá' xcaj so' cuentá che'é nij rasuun noco' doj a man adonj. Ne dan me se quini'yón so' nu' cacun' naruvii xraá so' gaa rque nanj adonj.

<sup>10</sup> Che'é dan me doj a tananj terquee ndo'o soj canoco' raan soj man Diose, tinuj, nocoj. Dan, gaa ne quene'en ya' soj se vaa nacúún Diose man soj ne narii Diose man soj cavii sa' soj ga so', ne daj chihaa mij se quiri' soj rihaan Diose ma'. <sup>11</sup> Gaa ne Jesucristó sij 'nij ra'a man ní' síi tinanii man ní' rihaan sayuun ro', ve'é uxrá nucu' sa' soj rej guun chij so' nu' cavii nu' ca'anj, qui'yaj so' chuguanj.

<sup>12</sup> Che'é dan nda' se aj ne'en soj nana nihánj, ne nda' se aj guun che'e soj canoco' soj se-nana Diose nana ya' vaa rihaan soj, tzaj ne nano niganj 'unj nana nihánj rihaan soj se gaa nanj quini'yón soj ei. <sup>13</sup> Vaa che'é ndo'o nanoj nana nihánj rihaan soj yaj gaa vaa i'na' 'unj rihaan chumij nihánj, raj chuguanj. <sup>14</sup> 'O se aj ne'enj se vaa nichrun' cavi' 'unj, ndaa vaa



cataj Jesucristó sij 'nij ra'a man ní rihanj, <sup>15</sup> ne che'é dan yo'lo qui'yáj ndaa daj a ca'vee ma'an, gaa ne nda' se cavij, tzaj ne yo'lo cunuû rá soj nana sa' nihánj ei.

*Nana nihánj taj xna'anj se vaa quene'en nij tuví! Pedró se vaa sí uun chij me Jesucristó a*

<sup>16</sup> 'Q se gaa cataj xna'anj núj rihaan soj se vaa ca'na' uún Jesucristó sij 'nij ra'a man ní rihaan chumij nihánj ne gaa nucuaj ndo'lo so' asa' ca'na' so', ne nuveé cuentó avii raá ma'an núj me yo' ma'. Rihaan ma'an núj quene'en núj se vaa sí sa' uxrá me so' adonj. <sup>17</sup> Ya sij uun chij me so', cataj Diose, gaa ca'mii Diose nana nihánj rihaan so' a: "Ta'nú 'unj sí 'ee ndo'lo raj man mé so', ne niha' ndo'lo raj ni'yaj mán so' adonj", taj Diose rihaan so' adonj. <sup>18</sup> Xréé ma'an núj cuno núj nana nihánj nana cavii rej xta' gaa cumán núj xráá quij guee ga so' ei.

<sup>19</sup> Che'é se quene'en núj ndaa vaa guun chij Jesucristó qui'yaj Diose, che'é dan doj a cuchumán rá núj nana cachrón nij sí nata' se-nana Diose gaa naá chuguanj. Ne sa' qui'yaj soj, sese xcaj ma'an soj cuentá che'é nana ca'mii nij so' ei. 'Q se ase vaa ya'an chuguun racuáj man nij sí yanj rej rmi' ro', danj vaa se-nana nij so', racuáj yo' man ní gaa yáán ní' chumij nihánj adonj. Tzaj ne vaa güii quene'en soj man ma'an Jesucristó, ne se cachiin uún se-nana nij sí man gaa naá rihaan soj ma'. 'Q se ase vaa yati' xta'ngaa chuguun gaa rej nichrun' rá ranga' ro', danj gaa so', quene'en nimán soj rej sa', qui'yaj so' a. <sup>20</sup> Maan se asino yaan xcaj soj cuentá che'é se-nana nij sí nata' se-nana Diose gaa naá, ne nuveé raá ma'an nij so' cavii nana cachrón nij so' rihaan yanj ma'. <sup>21</sup> 'Q se a 'ó yuvij qui'yaj ca'na' se-nana Diose rihaan chumij nihánj cuno yo'ó nij yuvij ma'. Maan se Nimán Diose me sí qui'yaj ca'mii nij yuvij nana cavii rihaan ma'an ya Diose adonj.

## 2

*Nana nihánj taj xna'anj che'é nij sí nago' tucuáán ne a*

<sup>1</sup> Tzaj ne cumán uxrá nij sí ne nata' se-nana Diose gaa naá rihaan nij sí israelitá, ne ndaa rá se vaa nij sí ne gaa naá ro', ta'nga' danj vaa nij sí ne cuchí' rihaan soj narque tucuáán ne rihaan soj adonj. Ne sese cuchuman rá soj, ne ca'anj soj rihaan ya'an ga nij so' a. Dan me se Jesucristó sij 'nij ra'a man ní' ro', cavi' so' che'é rej ca'vee quinaniij nij so' rihaan sayuun, tzaj ne ma'an nij so' me se inanj nana ne a'mii nij so' che'é Jesucristó, ne che'é dan quiran' ra'yanj ya nij so' sayuun, qui'yaj Diose a. <sup>2</sup> Tzaj ne canoco' que'ee nij sí amán rá ni'yaj man Jesucristó man nij sí ne yo', ne qui'yaj ndo'lo nij so' nu' tucuáán chí'ii, ne che'é tucuáán chí'ii 'yaj nij so' ro', che'é dan ca'mii nij sí ne amán rá ni'yaj man Diose nana nij che'é se-tucuanj Diose tucuáán ya ei. <sup>3</sup> Guun rá nij sí narque tucuáán ne yo' qui'yaj canaán ndo'lo nij so' sa'anj, ne che'é dan nano' nij so' nana ne ca'mii nij so' rihaan nij soj, tzaj ne asij naá cataj Diose se vaa quiran' ndo'lo nij so' sayuun vaa güii, ne ya uxrá quiran' nij so' sayuun ei.

<sup>4</sup> Dan me se aj ne'en soj se vaa ne caraá x'naa Diose a rihaan ma'an nij se-mozó so' gaa qui'yaj nij so' cacun' a ma'. Ya ca'neé Diose man nij so' rej quiran' nij so' sayuun, ne numij Diose aga' ne' man nij so', nago' Diose man nij so' rej rmi' quiran' nij so' sayuun, ne dan me se danj gaa cumán nij so' ndaa güii ca'ne' Diose cacun' che'é nij so' adonj. <sup>5</sup> Ne aj ne'en soj se vaa ne caraá x'naa Diose a rihaan nij sí cumán gaa naá ma'. Maan tunj guee nij tuví' sí cu'naj Noé sí ca'mii natáj nana sa' rihaan yuvij se vaa ca'vee cunuû sa' nij yuvij rihaan Diose ro', inanj nij so' me nij sí quinaniij rihaan sayuun qui'yaj Diose, gaa ca'ne' rá Diose ca'na' na ya'anj, ne canó xráá nij sí chí'ii man rihaan chumij

nihánj, che'é se ne cunō nij so' rihaan Diose adonj. <sup>6</sup> Tananj uún, ne ne'en soj se vaa yuun che'e cacaa nu' roj chuman' cu'naj Sodoma ga Gomorra, qui'yaj Diose uún, ne dan me se cataj Diose se vaa daj chihaa mij se cumán uún yuvi roj chuman' yo', ne danj qui'yaj Diose che'é se guun rá Diose xcaj ní' cuentá daj quiran' nu' nij sí na'vej rá cunō rihaan Diose a. <sup>7</sup> Tzaj ne tinanii Diose man sí cu'naj Lot rihaan sayuun yo', che'é se sí nica nimán me sí cu'naj Lot yo', ne quiri' rá sí cu'naj Lot che'é se chi'ii qui'yaj nij sí tucuaá rihaan Diose nij sí cumán roj chuman' yo' a. <sup>8</sup> Dan me se gaa cayáán sí nica nimán yo' chiháán nij so', ne daj a güii quene'en so' se chi'ii qui'yaj nij sí chi'ii yo', ne cuno so' nu' nana chi'ii ca'mii nij so' a. Veé dan, ne quiri' ndo'o rá so' a.

<sup>9</sup> Tzaj ne sí 'nij ra'a man ní' me se nacaj so' man nij sí noco' man so', ne tinanii so' man nij so' rihaan sayuun, ne veé danj guun nucuaj so' tumé so' man nij sí chi'ii, ne yo'o quiran' nij sí chi'ii yo' sayuun ndaa se quisij güii ca'ne' so' cacun' che'é nij so' adonj. <sup>10</sup> Dan me se táa a qui'yaj so' man nij sí chéé se-tucuanj ma'an, ne 'yaj nij so' ndaa vaa me rá nee man ma'an nij so', ne nachri' nij so' ni'yaj nij so' man Jesucristó sij 'nij ra'a man ní', ne sí a'mii xta' ndo'o me nij so', ne a 'ó xco' ne na'aj nij so' a ma'. Ne ne chu'vi' nij so' ca'mii nij so' nana nij che'é nij ya'anj uun chij rihaan nij rasuun man rihaan chumii nihánj a ma'. <sup>11</sup> Ne nanj sij nucuaj doj me nij se-mozó Diose nij sí noco' sa' man so', tzaj ne ne quisij rá nij so' cuchí' nij so' rihaan sí 'nij ra'a man ní' ne cuta' nij so' cacun' xráá nij ya'anj yo' ma'.

<sup>12</sup> Tzaj ne ase vaa xcuu ne acaj cuentá, ne ta'aa nii, ne ticavi' nii man ro', danj vaa nij sí narqué tucuaán ne yo' ei. Ne acaj nij so' cuentá daj vaa nij ya'anj, tzaj ne a'mii nij so' nana nij che'é nij ya'anj yo', ne che'é dan quiran' nij so' sayuun ndaa vaa quiran' ma'an nij ya'anj yo' vaa

güii, qui'yaj Diose, <sup>13</sup> ne dan me se naru'vee Diose sayuun rihaan nij so' che'é sayuun qui'yaj nij so' man tuvi' nij so' adonj. Niha' rá nij so' qui'yaj nij so' se nij rej ranga', ne veé danj niha' ndo'o rá nij so' gaa chá nij so' chraa ga soj, ne che'é dan tiri' nij so' man soj gaa nuu chre' soj cha soj chraa adonj. <sup>14</sup> Inanj me rá nij sí narqué tucuaán ne ni'yaj nij so' man chana niha' rá, ne ne a'ne' rá nij so' ga suun 'yaj cacun' a ma'. Tiha' yu'unj nij so' man nij sí ne nicaj raan se-tucuanj Diose, ne yo'o vaa nimán nij so' me rá nij so' quiri' ndo'o nij so' sa'anj ei. Ase vaa xnii maña ndo'o ro', danj vaa nij so', ne ya quiran' ndo'o nij so' sayuun vaa güii chuguanj.

<sup>15</sup> Tanáj nij so' se-tucuanj Diose tucuaán nica, ne canoco' nij so' tucuaán ne, ne ase vaa qui'yaj sí cu'naj Balaam ta'ní Beor gaa naá ro', danj qui'yaj nij so' ei. Ne sí cu'naj Balaam me se che'é se guun rá so' ni'yaj so' sa'anj, ne qui'yaj so' cacun', <sup>16</sup> tzaj ne ase vaa a'mii yuvi ro', danj ca'mii daán so' burró rihaan so', ne cuta' daán so' burró cacun' xráá so', ne dan me se caráán daán so' burró chrej rihaan so' qui'yaj chi'ii rma'an so' rihaan Diose, qui'yaj Diose adonj.

<sup>17</sup> Ne ase vaa curuj na utun' ro', danj vaa nij so', ne ase vaa ngaa achén rma'an 'yaj nana ne ne aman' maan 'yaj ro', danj vaa nij sí narqué tucuaán ne yo', ne guun na'aj ndo'o nij yuvi nucuaj rá man nij so' ei. Aj cataj Diose se vaa cune' Diose man nij so' rej rmi' ndo'o nu' cavii nu' ca'anj adonj.

<sup>18</sup> Dan me se a'mii xta' ndo'o nij so' nana nij rma'an, ne uno nij sí cuchumán naca rá ni'yaj man Jesucristó, ne nda' se tihaj guun yaníj nij so' rihaan nij sí ne acaj cuentá man rihaan chumii nihánj, tzaj ne nanicaj nij so', ne tanáj nij so' chrej sa', ne 'yaj uún nij so' se chi'ii ndaa vaa me rá ma'an nij so' qui'yaj nij so', <sup>19</sup> ne taj nij sí narqué tucuaán ne rihaan yuvi, ne: "Ca'vee qui'yaj soj me ma'an se me rá soj ei", taj nij sí narqué

tucuáán ne rihaan nij síi cuchumán naca rá yo', tzaj ne ma'an nij so' ro', me mozó 'yaj suun che'é rej quirí' nu' nimán yuvií adonj. 'O se me ma'an rasuun 'yaj canaán rihaan ní' ro', yo' me rasuun 'yaj suun ní' rihaan, ne mozó me ní' rihaan yo' adonj. <sup>20</sup> 'O se gaa rque me se xcaj nij so' cuentá che'é Jesucristó sij 'nij ra'a man ní' síi tinanii man ní' rihaan chrej chi'ii uun chij nimán ní' do', rihaan cunudanj chrej chi'ii man rihaan chumii nihánj do', tzaj ne yaj me se nanicaj nij so' qui'yaj uún nij so' chi'ii, ne ndaa qui'yaj canaán chrej chi'ii yo' rihaan nij so', ne dan me se asino yaan me se maan ta'nga' nij vaa nij so', tzaj ne yaj me se chi'ii doj vaa nij so' adonj. <sup>21</sup> Cavií sa' nij so' doj sese ne quene'en nij so' se-tucuanj Diose tucuáán nica se vaa yaj quene'en nij so' se-tucuanj Diose, gaa ne nanicaj uún nij so' tanáj nij so' tucuáán sa' nago' Diose man nij so' saj adonj. <sup>22</sup> Ase vaa 'yaj nij so' vaa nana ya nihánj a: “Uchráán chuvee, gaa ne anicaj uún xo' chá xo' se-cuchranj xo' a”, ne vaa se-nana xcaá uún taj: “Quisíj cane xcaá na sa', gaa ne anicaj uún xo' natúj xo' rá siguí' a”, vaa yo'ó nana taj xna'anj daj 'yaj nij síi narqué tucuáán ne yo' a.

### 3

*Nana nihánj taj xna'anj se vaa taj ni'yón ca'na' uún Jesucristó rihaan chumii nihánj a*

<sup>1</sup> Nihánj me yanj vij ca'nej 'unj rihaan soj, tinuj, nocoj. Rihaan roj yanj nihánj nаноj se-nana Diose rihaan soj che'é se me raj xcaj soj cuentá che'é rej sa' ei. 'O se sij me ya rá canoco' man Diose me soj, <sup>2</sup> ne me raj ninuj rá soj nana ca'mii nij síi vaa sa' rihaan Diose síi nata' se-nana Diose gaa naá, ne me raj ninuj rá soj se-nana Jesucristó sij 'nij ra'a man ní' síi tinanii man ní' rihaan sayuun nana narqué núj sij apóstol cune' so' man rihaan soj a.

<sup>3</sup> Tzaj ne vaa che'é ndo'o xcaj nij soj cuentá, ne ca'na' síi a'nga' nacoj

nij'yaj man soj asa' nichrun' ca'na' uún Jesucristó rihaan chumii nihánj, ne náá guun se nij guun rá nij so' qui'yaj nij so' a. <sup>4</sup> Gaa ne cataj nij so' nana nihánj rihaan soj a: “Cataj nij síi nata' se-nana Diose ga naá rihaan xii ní' se vaa ca'na' uún Jesucristó rihaan chumii nihánj, tzaj ne ne ca'na' uún so' chiha'. Veé danj vaa cavi' xii ní', ne taj vaj so' ca'na' man asanj. Veé ase vaa chumii ga asino curuvi' chumii ro', veé danj vaa guee chumii ndaa cuano nanj asanj”, cataj nij so' ca'nga' nacoj nij so' rihaan soj a.

<sup>5</sup> Dan me se danj cataj nij so' che'é se na'vej rá nij so' xcaj nij so' cuentá ndaa vaa curuvi' chumii gaa naá qui'yaj Diose ei. Tzaj ne ca'mii Diose, ne guun rej xta', ne curihanj yo'óo nacoj rque na ya'anj chuguanj. <sup>6</sup> Gaa ne gaa naá me se ca'anj ni'ya nij yuvií man rihaan chumii, qui'yaj maan do', na ya'anj do' ei. <sup>7</sup> Tzaj ne xta' ga yo'óo man ní' cuano me se ma'an Diose ca'mii, ne cataj Diose se vaa quinaj roj yo' ndaa se quisij güii ca'ne' Diose cacun' che'é nij síi chi'ii, gaa ne nu' che'e cacaa nij so' chuguanj. Ne güii yo' me se ca'nej Diose ya'an, ne cacaa nu' xta' ga yo'óo man ní' cuano, ne ca'anj ni'ya uún yo' adonj.

<sup>8</sup> Se quini'yón soj nana nihánj, man tinuj, man nocoj. Ase vaa 'o mój yo' vaa orún' güii rihaan síi 'nij ra'a man ní', ne ase vaa orún' güii vaa 'o mój yo' rihaan so' ei. <sup>9</sup> Ta'aj nij yuvií me se guun raan ndo'o Diose qui'yaj Diose ndaa vaa cataj so' gaa naá, rá nij so', tzaj ne se guun raan Diose mei. Maan se inaj nimán Diose ni'yaj Diose man soj, ne na'vej rá Diose cavi' nimán a doj tuvi' soj mei. Tananj me rá so' canicaj nimán taran' soj ne tanáj xco soj tucuáán chi'ii chuguanj.

<sup>10</sup> Tzaj ne taj ni'yón quisij güii ca'ne' Diose cacun' che'é yuvií ei. Dan me se carijn ndo'o ca'anj ni'ya xta', ne quinavij nu' nij se man rej xta' cacaa, ne ca'anj ni'ya yo'óo ga nu' se man rihaan yo'óo adonj. <sup>11</sup> Che'é se ca'anj ni'ya chumii, che'é dan se

guun nanō rá soj che'é rasuun man rihaan chumij nihánj ma'. Tananj xcaj soj cuentá che'é rej daj qui'yaj soj canoco' raan soj man Diōse ei.

<sup>12</sup> Na'vij soj quisij güii yo', ne ve'é canoco' soj man Diōse che'é rej ra'yanj doj quisij güii yo' chuguanj. Ne güii yo' me se quinavij nu' xta' cacaā, ne nacune nu' nij rasuun man rej xta' yo' ei. <sup>13</sup> Tzaj ne aj cataj Diōse se vaa ya gaa yo'ó yo'óó naca, ne gaa yo'ó rej xta' naca, ne inanj se sa' qui'yaj nij síi cumān rej yo' asa' quisij ei. Dan me se na'vij ndo'o ní' quisij güii yo' cuaj ei.

<sup>14</sup> Che'é se na'vij ní' güii yo' ro', che'é dan terquee soj doj qui'yaj soj se sa' inanj rihaan Diōse, ne se gaa nanj cutumé soj cacun' asa' ca'na' uún Jesucristó ei. Ne dínj gaa nimán soj, tinuj, nocoj. <sup>15</sup> Xcaj soj cuentá se vaa na'vij Diōse nanj che'é se me rá so' quinaniij nij yuvij rihaan sayuun chuguanj. Veé danj taj uún nij nana cachrón tinú' Pabló rihaan yanj ca'née so' rihaan soj, ndaa vaa chrej cuu narqué Diōse rihaan so' a. <sup>16</sup> Dan me se daj a nij yanj cartá qui'yaj Pabló ro', ca'mii so' che'é rasuun nihánj, ne vaa doj nana cuu sayuun cunó' nó rihaan yanj qui'yaj so', ne dan me se nij síi ne ne'en do', nij síi uun vij rá me se tinicaj nij so' se-nana Pabló, ne a'mii ne nij so' che'é Pabló, taj nij so' se vaa inō vaa tucuáán tucu'yón so' a. Ne danj 'yaj nij so' ga yo'ó nij nana nō rihaan danj Diōse uún, ne che'é dan quirān' ndo'o nij so' sayuun vaa güii adonj.

<sup>17</sup> Aj cataj xna'anj 'unj rihaan soj che'é nij síi narqué tucuáán ne ca'na' rihaan soj vaa güii, tinuj, nocoj. Che'é dan tadó uxrá soj se gaa nanj canoco' soj tucuáán ne narquee nij síi na'vej rá cunō rihaan Diōse yo' ei. Sese canoco' soj se-nana nij so', ne guun vij rá soj, qui'yaj nij so' ei. <sup>18</sup> Che'é dan yo'ō guun rá soj ni'yaj soj se luj rqué Diōse rihaan soj, ne yo'ō guun rá soj xcaj soj cuentá sa' doj che'é Jesucristó sij 'nij ra'a man ní' síi tinaniij man ní' rihaan sayuun adonj. Vaa che'é ndo'o cataj

ní' se vaa sij sa' ndo'o me so' ne sij sa' ndo'o guun so' nu' cavii nu' ca'anj adonj. Veé danj gaa ya ei.



## Nihánj me 'o yanj cartá qui'yaj síí cu'naj Juan ca'néé so' rihaan nij yuvií noco' man Diose a

*Nana nihánj taj xna'anj se vaa cataj xna'anj síí cu'naj Juan che'é se vaa quene'en rihaan ma'an so' a*

<sup>1</sup> Dan me se núj me se cataj xna'anj núj rihaan nij soj che'é 'o síí cane gaa naá asij guun che'e Diöse qui'yaj Diöse chumií, ne inanj se vaa cuno ma'an núj do', se vaa quene'en rihaan ma'an núj do', se vaa cuta' núj ra'a núj xráá do', che'é inanj rasuun vaa danj cataj xna'anj núj rihaan soj a. Dan me se cataj xna'anj núj che'é se-nana Diöse, ne so' me síí qui'yaj cayáán ní' ga Diöse nu' cavii nu' ca'anj adonj. <sup>2</sup> Dan me se so' me síí qui'yaj cayáán ní' ga Diöse nu' cavii nu' ca'anj, ne ca'na' so', ne quene'en núj man so', ne nihánj me se nata' núj rihaan nij soj che'é so' se vaa asino canicun' so' ga Diöse rej yanj Diöse gaa naá, gaa ne yaj me se ca'na' so' rej ne ní' a. <sup>3</sup> Dan me se nata' núj rihaan ma'an nij soj che'é se vaa quene'en núj do', che'é se vaa cuno núj do', che'é rej ca'vee cunu rcua'aan soj ga núj, ne dan me se cunu rcua'aan ní' ga Rej ní' Diöse, ga ta'níí so' Jesucristó a. <sup>4</sup> Ne achrón núj nana nihánj rihaan yanj nayaá soj, che'é rej ca'vee guun niha' uxrá rá taran' ní' adonj.

*Nana nihánj taj xna'anj se vaa ase vaa ya'an chuguun ro', danj vaa Diöse, ne ca'vee cunu sa' nimán ní' qui'yaj so' a*

<sup>5</sup> Ne nihánj ro', me nana cataj xna'anj Jesucristó cuno núj, ne nata' núj nana nihánj rihaan soj, ne dan me se ase vaa 'o ya'an chuguun vaa Diöse, ne rej vaj Diöse me se nuvi' rej rmi' rej vaj so' ma'. <sup>6</sup> Che'é dan sese cataj ní' se vaa sij chéé ga Diöse me

ní', ne sese chéé ní' rej rmi', gaa ne tu'va rma'an ní' vaa gaa nanj ei. Ne ne noco' ní' tucuáán ya yo' gaa a ma'. <sup>7</sup> Tzaj ne sese chéé ní' rej chuguun sa' rej vaj ma'an Diöse, ne ve'é sa' mán taran' ní', ne quinavij nu' cacun' tumé ní', qui'yaj Jesucristó síí cavi' che'é ní', ne yo'o cunu sa' nimán ní' ei. <sup>8</sup> Dan me se sese cataj ní' se vaa a doj cacun' ne tumé ní', ne dan me se tiha' yu'unj ní' vaa gaa nanj adonj. Ne nuveé sij a'mii nana ya me ní' gaa a ma'. <sup>9</sup> Tzaj ne sese nata' ya ní' rihaan Diöse che'é cacun' tumé ní', ne Diöse me se vaa che'é gaa nucuaj rá ní' se vaa nica qui'yaj so' che'é ní', ne dan me se cataj so' se vaa navij cacun' tumé ní', ne tinavij so' nu' se chi'ij man nimán ní' adonj. <sup>10</sup> Dan me se sese cataj ní' se vaa a doj ne qui'yaj ní' cacun', ne sij tu'va rma'an me ní', ne 'yaj ní' síí ne man ndaa ma'an Diöse vaa gaa nanj chuguanj. Dan me se aj cataj ya Diöse se vaa tumé ní' cacun' nanj ei. Ne sese ca'mii ní' danj, ne nuveé sij uno se-nana Diöse me ní' gaa mei.

## 2

*Nana nihánj taj xna'anj che'é nana no xcúún ní' cunó ní' a*

<sup>1</sup> Ase vaa ta'níí 'unj ro', danj vaa soj, tinuj, nocoj. Ne achrón 'unj nu' nana nihánj rihaan yanj nihánj, che'é rej se qui'yaj soj cacun' mei.

Dan me se sese qui'yaj ní' cacun', ne vaa 'o síí nica nimán a'mii yu'unj che'é ní' rihaan Rej ní' Diöse, ne Jesucristó me síí a'mii yu'unj che'é ní' ei. <sup>2</sup> Ne so' me síí cavi' che'é rej ca'vee quinavij cacun' tumé ní' adonj. Tzaj ne nuveé che'e doj se-cacun' ní' me cavi' so' ma'. Cavi' so' che'é cacun' tumé cunudanj nij yuvií man rihaan chumií adonj.

<sup>3</sup> Dan me se nihánj me rej ne'en ní' se vaa sij noco' man Jesucristó me ní' a. Dan me se sese 'yaj ní' ndaa vaa cataj xna'anj Jesucristó rihaan ní', ne sij noco' ya man so' me ní' adonj. <sup>4</sup> Tzaj ne sese taj yo'o so' se vaa sij

noco' man Jesucristó me so' ne ne 'yaj so' ndaa vaa cataj xna'anj Jesucristó rihaan ní', ne sítí ne me so', ne nuveé sij a'mii nana ya me so' mei. <sup>5</sup> Tzaj ne sítí uno se-nana Jesucristó ro', so' me sítí ya ya aráj cochroj rihaan Diose chuguanj. Che'é dan, sese qui'yaj ní' danj, ne ca'vee guun ya rá ní' se vaa sij noco' man Jesucristó me ní' ei. <sup>6</sup> Ne sítí taj se vaa yo' o noco' man Jesucristó ro', ase vaa qui'yaj Jesucristó ro', danj inanj nó xcúún so' qui'yaj ma'an so' uún adonj.

<sup>7</sup> Dan me se 'ee raj man soj, tinuj, nocoj. Ne nihánj me se cachron 'unj 'o nana naca rihaan yanj nihánj cuno soj chuguanj. Tzaj ne nuveé nana naca me nana nihánj ma'. Veé nana cuno soj asij guun che'e soj canoco' soj man Jesucristó me nana nihánj nanj adonj. <sup>8</sup> Dan me se cachron uún 'unj nana naca nihánj cuno soj, ne ya ya nana naca tucu'yón Jesucristó me nana nihánj, ne cuno soj nana naca nihánj adonj. 'O se vaj navij rej rmi' rihaan chumii nihánj, ne Jesucristó ro', me ya'an chuguun, ne dan me se guun che'e se-nana so' cuchuguun se-nana so' rihaan chumii nihánj ei. <sup>9</sup> Ne xa' sítí taj se vaa vaj so' rej chuguun ga se-nana Jesucristó ne nachri' so' ni'yaj so' man tinúú so', ne sij vaj guee rej rmi' me ya so' nanj chuguanj. <sup>10</sup> Ne sítí 'ee rá man tinúú me se so' me sítí chéé rej chuguun ga se-nana Jesucristó, ne se ca'vee quirí' so' ma'. <sup>11</sup> Ne xa' sítí nachri' man tinúú, tzaj ne so' me sítí vaj rej rmi', ne 'o chéé guee so' rej rmi' nanj á. Ne ne'en so' me rej vaj so' a ma'. 'O se caráán rihaan so', qui'yaj rej rmi' vaj so' nanj adonj. Na'vee a doj xcaj so' cuentá a ma'.

<sup>12</sup> Dan me se achrón 'unj nu' nana nihánj nayaa soj xnii, ne 'o se che'é se noco' soj man Jesucristó ro', che'é dan quinavij cacun' tumé soj rihaan Diose ei.

<sup>13</sup> Achrón 'unj nu' nana nihánj nayaa soj sij vaa ta'níí, ne 'o se aj ne'en soj man sítí cayáán ga Diose

gaa guun che'e Diose qui'yaj Diose chumii nihánj a.

Achrón 'unj nu' nana nihánj nayaa soj sij tachruu, ne 'o se aj qui'yaj canaán soj rihaan sítí chree ei.

<sup>14</sup> Achrón 'unj nu' nana nihánj nayaa soj xnii, ne 'o se aj ne'en soj man Rej ní' Diose adonj.

Achrón 'unj nu' nana nihánj nayaa soj sij vaa ta'níí, ne 'o se aj ne'en soj man sítí cayáán ga Diose gaa guun che'e Diose qui'yaj Diose chumii nihánj ei.

Achrón 'unj nu' nana nihánj nayaa soj sij tachruu, ne 'o nucuaj ndo'o nimán soj rihaan sayuun, ne yo' o uno soj se-nana Diose, ne aj qui'yaj canaán soj rihaan sítí chree ei.

<sup>15</sup> Se guun rá soj ni'yaj soj chumii nihánj do', nij rasuun man rihaan chumii nihánj do' mei. 'O se xa' sítí me rá ni'yaj chumii nihánj, tzaj ne nuveé sij aráj cochroj rihaan Rej ní' Diose me so' man chuguanj. <sup>16</sup> 'O se rihaan chumii nihánj vaa ndo'o se me rá yuvii qui'yaj yuvii do', vaa ndo'o se me rá yuvii ni'yaj yuvii do', vaa ndo'o rasuun 'yaj uun xta' nimán yuvii do', tzaj ne nuveé rasuun cavii rihaan Rej ní' Diose me nu' nij rasuun vaa danj ma'. 'O se nanj rasuun man rihaan chumii nihánj me nij rasuun yo' nanj adonj. <sup>17</sup> Ne vaj navij chumii nihánj ei. Ne vaj navij nu' se vaa me rá nij yuvii man rihaan chumii nihánj qui'yaj nij so' ei. Tzaj ne sítí 'yaj ndaa vaa me rá Diose me se cayáán so' nu' cavii nu' ca'anj ga Diose chuguanj.

*Nana nihánj taj xna'anj che'é sítí tu'va rma'an se vaa sij tinanii man yuvii rihaan sayuun me so' a*

<sup>18</sup> Dan me se ase vaa ta'níj vaa soj, ne me raj cuno soj nana nihánj ei. 'O se nichrun' quinavij chumii nihánj, ne aj cuno soj nana se vaa ca'na' 'o sítí quitaj yu'unj, ne cataj so' se vaa sij ca'néé Diose tinanii man yuvii rihaan sayuun me so', ne nihánj me se aj ca'na' que'ee sítí tu'va danj, ne che'é dan ne'en ya ní' se vaa ya nichrun' quinavij chumii nihánj ei. <sup>19</sup> Dan

me se ase vaa tinúú ní' vaa nij so' asij rque, tzaj ne ca'anj yaníj nij so' rihaan ní', ne nuveé ya ya tinuj ní' me nij so' a ma'. 'O se ca'anj yaníj nij so' rihaan ní' che'é rej ca'vee xcaj ní' cuentá se vaa nuveé tinuj ní' me taran' nij so' a man adonj.

<sup>20</sup> Ne xa' soj, tzaj ne cune' Diose man soj, ne guun nucuaj soj xcaj soj cuentá, qui'yaj Diose, ne ne'en soj cunudanj rasuun ei. <sup>21</sup> Nuveé che'e se ne ne'en soj nana ya me cachrón 'unj nana nihánj nayaa soj ma'. Tzaj ne achrón 'unj nana nihánj nayaa soj che'é se sij ne'en nij nana ya me soj, ne aj ne'en soj se vaa ino' doj vaa nana ne ga nana ya nana noco' ní' adonj.

<sup>22</sup> Ne síi ne me se so' me síi taj se vaa nuveé sij ca'née Diose tinanii man yuvij rihaan sayuun me Jesucristó chuguanj. Dan me se taj so' se vaa ma'an so' me Cristó ca'née Diose, taj so' chuguanj. Ne dan me se ne aráj cochroj so' rihaan Rej ní' Diose do', rihaan ta'níi Diose do' ma'. <sup>23</sup> Dan me se xa' síi ne aráj cochroj rihaan ta'níi Diose, tzaj ne sij ne noco' man Rej ní' Diose me so' ei. Tzaj ne síi nata' ya se vaa ve'é noco' so' man ta'níi Diose ro', so' me síi noco' ya man Rej ní' Diose uún adonj.

<sup>24</sup> Ne xa' soj, tzaj ne yo'o cunō soj nana cunō soj gaa guun che'e soj canoco' soj man Jesucristó ei. Sese qui'yaj soj danj, ne sij noco' man ta'níi Diose do', man ma'an ya Rej ní' Diose do', me soj chuguanj. <sup>25</sup> Ne nihánj me nana cata' tu'va ma'an Jesucristó rihaan ní', se vaa ca'vee cayáán ní' ga Diose nu' cavii nu' ca'anj ya ei.

<sup>26</sup> Dan me se cachrón 'unj nu' nana nihánj nayaa soj che'é rej xcaj soj cuentá che'é nij síi me rá tiha' yu'unj man soj adonj. <sup>27</sup> Ne xa' soj, tzaj ne che'é se cune' Diose man soj ro', che'é dan yo'o noco' soj man Diose, ne taj che'é tucu'yón nii doj nana man soj a ma'. Tananj che'é se cune' Diose man soj, che'é dan aj nari' soj nana che'é nu' rasuun, ne inanj nana ya

nari' soj ei. Nuveé nana ne me nana nari' soj, qui'yaj Diose ma'. Dan me se yo'o noco' soj man Diose, ndaa vaa tucu'yón ya so' man soj adonj.

### *Nana nihánj taj xna'anj se vaa ta'nij Diose me ní' a*

<sup>28</sup> Dan me se ase vaa ta'nij vaa nij soj rihanj, ne me rá 'unj se vaa yo'o canoco' raan soj man Jesucristó, che'é rej asa' ca'na' uún so' rihaan chumij nihánj, ne se guun na'aj soj a doj ma'. Tananj guun niha' rá soj ca'mij soj ga so' ei. <sup>29</sup> Dan me se ne'en soj se vaa síi sa' inanj me Jesucristó, ne che'é dan ne'en soj se vaa nu' nij síi 'yaj sa' ro', taran' nij so' me síi cunuu sa' nimán qui'yaj so' adonj.

## 3

<sup>1</sup> Dan me se xcaj soj cuentá se vaa cunuu 'ee uxrá rá Rej ní' Diose ni'yaj so' man ní', ne ndaa ta'níi Diose guun ní', qui'yaj Diose chuguanj. Ne ta'nij Diose me xa' ní' adonj. Che'é dan ne ne'en nij síi man rihaan chumij nihánj man ní' daj sij me ní' man chuguanj. 'O se tananj uún, ne ne ne'en nij so' man ma'an Diose uún a man adonj. <sup>2</sup> Dan me se 'ee raj man nij soj, tinuj, nocoj, ne cuano nihánj me se ta'nij Diose me ní', ne ataa xcaj ní' cuentá daj sij guun ní' qui'yaj Diose vaa güii ei. Maan se ne'en ní' se vaa asa' ca'na' so', ne ase vaa so' ro', danj gaa ma'an ní' uún adonj. 'O se quene'en ní' man so', ne xcaj ya ní' cuentá daj vaa xa' so' nanj adonj. <sup>3</sup> Ne nij síi nucuaj rá man nana nihánj se vaa ya vaa nana nihánj me se ya cunuu sa' nimán nij so' qui'yaj nij so', ne ase vaa sa' nimán Jesucristó ro', danj gaa sa' nimán nij so' uún adonj.

<sup>4</sup> Dan me se nu' nij síi 'yaj cacun' ro', nij so' me nij síi na'vej rá cunō rihaan Diose, <sup>5</sup> ne ne'en nij soj se vaa ca'na' Jesucristó rihaan chumij nihánj, che'é rej ca'vee tinavij so' cacun' tumé yuvij, ne a doj cacun' taj tumé so' ma'. <sup>6</sup> Ne taran' nij síi yo'o noco' man so' ro', ne 'yaj nij so' cacun' ma'. Ne nij síi noco' tucuáán 'yaj

cacun' ro', nuveé sij ne'en man Jesucristó me nij so' man adonj. <sup>7</sup> Dan me se ase vaa ta'níj vaa soj rihanj, tinuj, nocoj, ne se guun tihá' yu'unj a doj yuvií man soj man chuguanj. Síí 'yaj sa' ro', síí sa' me so', ne ase vaa ma'an Jesucristó vaa so' adonj. <sup>8</sup> Ne síí 'yaj cacun' me se síí noco' se-tucuanj síí chree me so' ei. 'O se asij guun che'e Diose qui'yaj Diose chumií nihánj, ne sij 'yaj inanj cacun' me síí chree nanj adonj. Ne ca'na' ta'níí Diose rihaan chumií nihánj, che'é rej ca'vee tirí' so' nu' se vaa 'yaj síí chree yo' ei. <sup>9</sup> Ne taran' nij síí cunuu sa' nimán qui'yaj Diose ro', ne 'yaj nij so' cacun' a ma'. 'O se Diose me síí qui'yaj cunuu sa' nimán nij so', ne se ca'vee yo'o qui'yaj so' cacun', ése ma'an Diose qui'yaj ca'ngaa naca nij so' nanj adonj. <sup>10</sup> Ne nihánj me xcaj ní' cuentá nì'yaj ní', gaa ne cunuu yaan ní' ta'níí Diose do', ta'níí síí chree do' ei. Dan me se nij síí ne 'yaj se sa' ro', nuveé sij noco' man Diose me nij so' ma'. Dan me se nuveé sij 'ee rá man tinúú me nij so' a man adonj.

*Nana nihánj taj xna'anj se vaa no xcúún ní' cunuu 'ee rá ní' man tuvi' ní' a*

<sup>11</sup> 'O se nana nihánj me nana cuno soj asij guun che'e soj canoco' soj man Diose, ne nana nihánj taj se vaa no xcúún ní' cunuu 'ee rá ní' man tuvi' ní' chuguanj. <sup>12</sup> Dan me se se qui'yaj ní' ndaa vaa qui'yaj síí cu'naj Caín gaa naá ma'. 'O se sij noco' tucuáán chi'ii me so', ne ticavi' so' tinúú so' adonj. Ne me che'é qui'yaj so' danj, rá soj ga. 'O se nu' rasuun qui'yaj so' me se inanj chi'ii ndo'o qui'yaj ma'an so', ne tinúú so' me se sa' inanj vaa rasuun qui'yaj tinúú so', ne che'é dan guun xcoj ruvaa rá so' nì'yaj so' tinúú so' adonj.

<sup>13</sup> Dan me se se ca'anj rá soj sese quitaj ri'yunj nij síí man rihaan chumií nihánj nì'yaj nij so' man soj, man tinuj, man nocoj. <sup>14</sup> 'O se che'é se cunuu 'ee rá ní' man tinúú ní' ro', che'é dan ne'en ní' se vaa aj tanáj xco

ní' chrej chi'ii chrej qui'yaj cavi' ní', ne aj cunuu sa' nimán ní', ne ca'vee cayáán ní' ga Diose ei. Ne síí ne 'ee rá man tuvi' me se adi' se vaa nij síí cavi' ro', vaa nij so' nanj adonj. <sup>15</sup> Dan me se xa' taran' nij síí nachri' nì'yaj man tinúú me se ase vaa síí ticavi' man tinúú ro', vaa nij so', ne ne'en soj se vaa daj chihaa míj se ca'vee gaa i'na' síí vaa danj rihaan Diose nu' cavii nu' ca'anj ma'. <sup>16</sup> Ne Jesucristó ro', me síí ca'vej rá cavi' che'é ní', ne che'é dan ne'en ní' se vaa 'ee rá so' man ní' adonj. Ne che'é dan no xcúún ní' ca'nej nimán ní' cavi' ní' che'é tinúú ní' chuguanj.

<sup>17</sup> Dan me se sese vaa ndo'o rasuun man rihaan chumií nihánj nìcaj yo'o so', ne nda' se ne'en so' se vaa achiin ndo'o rasuun man tinúú so' tzaj ne na'vej rá so' racuúj so' man tinúú so', ne nuveé sij aráj cochroj rihaan Diose me so' a man adonj. <sup>18</sup> Dan me se ase vaa ta'níj vaa soj chuguanj. Dan me se se guun cataj uun ní' nana uun se vaa aráj cochroj ní' rihaan Diose chuguanj. Qui'yaj ya ya ní' se sa' ndaa vaa me rá Diose qui'yaj ní', ne ya ya sij aráj cochroj rihaan Diose me ní' adonj.

*Nana nihánj taj xna'anj se vaa taj che'é guun na'aj ní' nì'yaj ní' Diose ma'*

<sup>19</sup> Dan me se sese qui'yaj ní' danj, ne quene'en ní' se vaa sij noco' ya nana ya me ní', ne dan me se guun ya ya rá nimán ní' rihaan Diose ei. <sup>20</sup> 'O se nda' se ca'vee quinano rá ní' che'é cacun' tumé ní', tzaj ne sa' doj vaa Diose rihaan nimán ní', ne Diose me síí ne'en cunudanj adonj. <sup>21</sup> Dan me se 'ee raj man nij soj, tinuj, nocoj. Ne sese nuvi' cacun' tumé ní', ne se cuchu'vi' ní' ca'mii ní' ga Diose ma'. <sup>22</sup> Dan me se me ma'an rasuun cachinj ní' rihaan Diose, ne rque Diose cunudanj se vaa cachinj nì'yaj ní' rihaan so', che'é se sij uno se-nana so' me ní', ne uun niha' rá so' nì'yaj so' se sa' 'yaj ní' ei. <sup>23</sup> Dan me se nihánj me se vaa me rá Diose qui'yaj ní' a. Me rá Diose cuchuman



rá ní n̄'yaj ní' man ta'níí so' Jesucristó, ne me rá Dioso cunuú 'ee rá ní n̄'yaj ní' man tuvi' ní' ndaa vaa ca'ne' Dioso suun rihaan ní' a. <sup>24</sup> Ne s̄í uno se-n̄ana Dioso ro', so' me s̄í yo'o noco' man Dioso, ne yo'o ne Dioso ga so' adonj. Ne nihánj me rej ne'en ní' se vaa yo'o ne Dioso ga ní' ei. Che'é se xcaj ní' cuentá se vaa 'yaj suun Nimán Dioso nimán ní', che'é dan ne'en ní' se vaa ne Dioso ga ní' adonj.

#### 4

*Nana nihánj taj xna'anj me nana ca'vee cunō ní' a*

<sup>1</sup> 'Ee raj man nij soj, tinuj, nocoj. Ne se guun cunō soj me ma'an nana ma'. Asino xcaj soj cuentá sese nana rqué Nimán Dioso me nana ca'mii yo'o so', ne sese Nimán Dioso me s̄í rqué nana yo', ne ca'vee cunō soj nana yo' ei. 'O se aj ca'na' ndo'o s̄í ne, ne taj nij so' se vaa sij nata' se-n̄ana Dioso me nij so', tzaj ne tu'va rma'an nij so' nanj ei. Dan me se danj tu'va nij so' rihaan nij s̄í man rihaan chumiij nihánj che'é se me rá nij so' cuchuman rá nij s̄í man rihaan chumiij nihánj chuguanj. <sup>2</sup> Tzaj ne nihánj me se vaa qui'yaj soj, gaa ne ca'vee xcaj soj cuentá me nana me nana ca'mii Nimán Dioso ei. Sese cataj yo'o so' se vaa Jesucristó me s̄í ca'née Dioso tinanii man yuvij rihaan sayuun, ne guun Jesucristó yuvij ca'na' so', cataj yo'o so', ne nana yo' me se-n̄ana Nimán Dioso adonj. <sup>3</sup> Tzaj ne nu' nij s̄í taj se vaa nuveé sij ca'née Dioso man me Jesucristó me se nuveé nana rqué Nimán Dioso me yo' ma'. 'O se se-n̄ana nij s̄í ne tu'va rma'an me yo', ne dan me se aj cunō soj se vaa ca'na' nij so', ne cataj nij so' se vaa sij ca'née Dioso tinanii man yuvij rihaan sayuun me ma'an nij so' ei. Ne yaj nihánj me se aj mán ndo'o nij so' rihaan chumiij nihánj yaj cuano chuguanj.

<sup>4</sup> Tzaj ne yaj nihánj me se s̄í cunuu sa' nimán qui'yaj Dioso me nij soj, tinuj, nocoj. Ne aj qui'yaj canaan soj rihaan nij s̄í ne cuano ei. 'O se nuú Nimán Dioso nimán soj, ne nucuaaj

doj Nimán Dioso rihaan s̄í chree vaj rihaan chumiij nihánj chuguanj. <sup>5</sup> Ne nij s̄í ne yo', tzaj ne s̄í man rihaan chumiij nihánj me nij so', ne che'é dan inanj a'mii nij so' ndaa vaa nari' nij so' rihaan chumiij nihánj, ne uno nij s̄í man rihaan chumiij nihánj se-n̄ana nij so' ei. <sup>6</sup> Tzaj ne s̄í cunuu sa' nimán qui'yaj Dioso me ní', ne nij s̄í ne'en man Dioso ro', uno nij so' se-n̄ana ní' adonj. Ne xa' s̄í ne cunuú sa' nimán qui'yaj Dioso, tzaj ne ne uno nij so' se-n̄ana ní' a ma'. Che'é dan ne'en ní' me s̄í nuú Nimán Dioso nimán, ne ne'en ní' me s̄í nuú nana tiha' yu'unj nimán chuguanj.

*Nana nihánj taj xna'anj se vaa no xcúún ní' cunuú 'ee rá ní' man tuvi' ní', che'é se 'ee rá Dioso man ní' a*

<sup>7</sup> 'Ee raj man nij soj, tinuj, nocoj. Ne no xcúún ní' cunuú 'ee rá ní' man tuvi' ní' adonj. 'O se Dioso me s̄í rqué rej nucuaaj rihaan ní' cunuú 'ee rá ní' man tuvi' ní' a. Che'é dan nu' s̄í 'ee rá man tuvi' me se s̄í cunuu sa' nimán qui'yaj Dioso me nij so' adonj. Ne ne'en nij so' man Dioso adonj. <sup>8</sup> Ne s̄í ne 'ee rá man tuvi' me se ataa xcaj nij so' cuentá che'é Dioso ei. 'O se ataa xcaj nij so' cuentá se vaa Dioso me s̄í 'ee inanj rá man ní' adonj. <sup>9</sup> Ne nihánj me cataj xna'anj 'unj rihaan soj me che'é ne'en ní' se vaa 'ee rá Dioso man ní' a. Dan me se nda' se orún' ya ta'níí Dioso, tzaj ne ca'née Dioso man ta'níí ma'an ya Dioso rihaan chumiij nihánj, che'é rej ca'vee gaa i'na' nimán ní' nu' cavii nu' ca'anj qui'yaj so' a. <sup>10</sup> Ne vaa che'é xcaj ní' cuentá se vaa ne caraa cochroj ní' rihaan Dioso asino yaan ma'. Tananj asino yaan me se cunuu 'ee rá Dioso ni'yaj Dioso man ní', gaa ne ca'née so' man ta'níí so' che'é rej cavi' ta'níí so' ne tinavij ta'níí so' cacun' tumé ní' a. <sup>11</sup> Ne che'é se cunuu 'ee rá Dioso man ní' ro', che'é dan no xcúún ní' cunuú 'ee rá ní' man tuvi' ní', tinuj, nocoj. <sup>12</sup> A doj yuvij ne quene'en rihaan man Dioso nu' cavii nu' ca'na' ma'. Tzaj ne sese gaa 'ee rá ní' man tuvi' ní', ne ya ne Dioso ga ní', ne aj cunuu sa' nimán ní' ndaa vaa

guun rá Diose gaa cunuu 'ee rá Diose man ní' a.

<sup>13</sup> Dan me se che'é se rqué Diose Nimán Diose rihaan ní' ro', che'é dan ne'en ní' se vaa sij noco' man Diose me ní' ne yo' o ne so' nimán ní' a. <sup>14</sup> Ne aj ne'en núj se vaa ca'née Rej ní' Diose man ta'níi so' rihaan chumií nihánj che'é rej tinanii so' man nij síi man rihaan chumií nihánj rihaan sayuun, ne aj nata' núj nana yo' rihaan yuvií ei. <sup>15</sup> Ne síi taj rihaan tuvi' se vaa ta'níi Diose me Jesucristó ro', so' me síi 'o noco' man Diose, ne 'o ne Diose ga so' chuguanj. <sup>16</sup> Ne aj ne'en núj se vaa 'ee rá Diose man ní', ne amán rá núj se vaa 'ee rá so' man ní' ei.

Diose me síi 'ee rá man ní' ei. Ne sij 'o 'ee rá man tuvi' ro', so' me síi 'o noco' man Diose, ne 'o ne Diose ga so' ei. <sup>17</sup> Ne che'é dan sese 'ee rá ní' man tuvi' ní', ne asa' quisij güii ca'ne' Diose cacun' che'é yuvií, ne se cuchu'vi' ní' ma'. 'O se quene'en ní' se vaa ase vaa qui'yaj Jesucristó gaa vaj so' rihaan chumií nihánj ro', danj qui'yaj ma'an ní' uún adonj. <sup>18</sup> Che'é dan síi ya ya 'ee rá man tuvi' ro', a doj ne chu'vi' so' ma'. Síi chu'vi' me síi uun rá se vaa qui'yaj Diose sayuun man so', ne nuveé sij ya ya 'ee rá man tuvi' me síi guun danj rá ma'. <sup>19</sup> Dan me se 'ee rá ní' man tuvi' ní' che'é se asino cunuu 'ee rá ma'an Diose man ní' a. <sup>20</sup> Ne sese cataj yo' o so' se vaa aráj cochroj so' rihaan Diose, ne sese nachri' so' ni'yaj so' tinúú so', ne síi ne me so' ei. 'O se sese ruvi' ya tinúú so' ni'yaj so' tzaj ne ne 'ee rá so' man tinúú so', ne asa' ca'vee caraá cochroj so' rihaan Diose, sese ne ruvi' Diose ni'yaj so' ga. <sup>21</sup> Ne nihánj me nana cataj xna'anj Jesucristó rihaan ní', ne cataj so' se vaa síi aráj cochroj rihaan Diose ro', no xcúún so' gaa 'ee rá so' man tuvi' so' uún adonj, taj Jesucristó a.

## 5

<sup>1</sup> Cunudanj nij síi amán rá se vaa me Jesucristó síi ca'née Diose tinanii man yuvií rihaan sayuun ro', aj cunuu sa' nimán nij so', qui'yaj Diose chuguanj. Ne che'é dan sese aráj

cochroj ní' rihaan Diose, ne no xcúún ní' gaa 'ee rá ní' man nij síi cunuu sa' nimán yo' ei. <sup>2</sup> Ne sese aráj cochroj ní' rihaan Diose, ne sese uno ní' nana cataj xna'anj Diose rihaan ní', ne veé síi aráj cochroj rihaan ta'níi Diose me uún ní' adonj. <sup>3</sup> Ne sese uno ní' nana cataj xna'anj Diose rihaan ní', ne sij aráj cochroj rihaan Diose me ní' chuguanj.

*Nana nihánj taj xna'anj se vaa sese cuchuman rá ní' ni'yaj ní' man Jesucristó, ne qui'yaj canaán ní' rihaan se nij man rihaan chumií nihánj a*

Ne ne sayuun vaa cunó ní' rihaan Diose ma'. <sup>4</sup> 'O se cunudanj nij síi cunuu sa' nimán qui'yaj Diose ro', qui'yaj canaán nij so' rihaan se nij man rihaan chumií nihánj, ne che'é se amán rá ní' ni'yaj ní' man Jesucristó ro', che'é dan aj qui'yaj canaán ní' rihaan chumií nihánj nanj ei. <sup>5</sup> Dan me se síi amán rá se vaa Jesucristó me ta'níi Diose ro', so' me síi 'yaj canaán rihaan se nij man rihaan chumií nihánj adonj.

<sup>6</sup> Nihánj me Jesucristó síi ca'na' cata' ne, ne 'o se ne ca'na' so' cata' ne uun so' ma'. Dan me se ca'na' so' cata' ne so', ne ca'na' so' cavi' so' che'é ní' uún adonj. 'O se Nimán Diose me se taj xna'anj Nimán Diose rihaan ní', ne amán ya rá ní', ése ya uxrá a'mii Nimán Diose adonj. <sup>7</sup> 'O se va'núj nij rasuun taj xna'anj rihaan ní' che'é Jesucristó ei. <sup>8</sup> Dan me se Nimán Diose taj xna'anj rihaan ní' che'é Jesucristó, ne che'é se cata' ne Jesucristó, che'é dan xcaj ní' cuentá che'é so', ne che'é se cavi' Jesucristó, che'é dan xcaj ní' cuentá che'é so', ne cuyaan a'mii va'núj nij rasuun yo' a. <sup>9</sup> Dan me se uno ní' nana nata' tuvi' ní' síi man rihaan chumií nihánj rihaan ní', ne che'é dan vaa che'é cunó ní' nana nata' Diose rihaan ní' a. 'O se sa' doj vaa Diose rihaan yuvií, ne nata' so' rihaan ní' che'é ta'níi so' a. <sup>10</sup> Dan me se síi amán rá ni'yaj man ta'níi Diose ro', so' me síi cunó se-nana Diose a. Tzaj ne síi na'vej rá cuchuman rá se-nana Diose ro', so'

me sí uun rá se vaa sí ne me Diose a. 'O se ne cuchuman rá so' nana nata' Diose rihaan so' che'é ta'ní Diose ma'. <sup>11</sup> Ne nana nata' Diose rihaan ní' taj se vaa ca'vee cayáan ní' ga Diose nu' cavii nu' ca'anj, qui'yaj Diose, che'é rej cavi' ta'ní Diose che'é ní' a. <sup>12</sup> Sí noco' man ta'ní Diose me sí cayáan ga Diose nu' cavii nu' ca'anj ya ei. Tzaj ne sí na'vej rá canoco' man so' taj ma'. Se cayáan so' ga Diose ma'.

*Nana nihánj taj xna'anj se vaa xcaxj ní' cuentá se vaa ca'vee cayáan ní' ga Diose nu' cavii nu' ca'anj a*

<sup>13</sup> Dan me se aj cachronj nana nihánj nayaa nij soj, che'é rej quene'en soj se vaa cayáan soj ga Diose nu' cavii nu' ca'anj, che'é rej me soj sí amán rá ni'yaj man ta'ní Diose ei. <sup>14</sup> Ne cuano nihánj me se a doj ne chu'vi' ní' cachinj ni'yaj ní' 'o rasuun rihaan Diose a ma'. 'O se aj ne'en ya ní' se vaa sese ca'vej rá so' nıcaj ní' rasuun cachín ni'yaj ní' rihaan so', ne rque so' adonj. <sup>15</sup> Ne che'é se ne'en ní' se vaa cunó so' me ma'an nana cachinj ni'yaj ní' rihaan so', che'é dan ne'en ní' se vaa qui'yaj so' ndaa vaa cachinj ni'yaj ní' rihaan so' ei.

*Nana nihánj taj xna'anj che'é cacun' a*

<sup>16</sup> Dan me se sese ne'en ní' tinúú ní' 'yaj so' me ma'an cacun', ne cachinj ni'yaj ní' che'é so' rihaan Diose, ne Diose me sí caraá x'naa che'é cacun' qui'yaj so' adonj. Tzaj ne sese ne'en ní' man tinúú ní' 'yaj so' cacun' noco ndo'o cacun' qui'yaj cavi' nu' so' rihaan Diose, ne taj che'é cachinj ni'yaj ní' rihaan Diose che'é so' a ma'. Dan me se vaa cacun' uun, ne vaa cacun' noco ndo'o qui'yaj cavi' nu' ní' rihaan Diose adonj. Tzaj ne che'é cacun' noco yo' me se se cachín ni'yaj soj mei. <sup>17</sup> Dan me se me ma'an se nij 'yaj ní' me cacun' chuguanj. Tzaj ne se cavi' nu' ní' rihaan Diose qui'yaj me ma'an cacun' yo' ma'. 'O se ca'vee tinavij Diose cacun' yo' ei.

<sup>18</sup> Dan me se ne'en ní' se vaa nu' nij sí ca'ngaa nimán qui'yaj Diose ro',

daj chihaa míj ne chée nij so' xrej sí chree ma'. 'O se tumé ta'ní Diose man nij so', ne se ca'vee qui'yaj chi'ii sí chree man nij so' a. <sup>19</sup> Ne ne'en ní' se vaa sí noco' man Diose me ní' adonj. Tzaj ne cunudanj nij yuvij man rihaan chumij nihánj noco' man sí chree ei. <sup>20</sup> Ne ne'en ní' se vaa aj ca'na' ta'ní Diose, ne qui'yaj suun so' che'é ní', che'é rej ca'vee xcaxj ní' cuentá che'é Diose ya, ne ne'en ní' se vaa me ní' sí noco' man ma'an ya ta'ní so' Jesucristó, ne Jesucristó ro', me ma'an ya Diose, ne so' me sí qui'yaj cayáan ní' ga Diose nu' cavii nu' ca'anj adonj.

<sup>21</sup> Ase vaa ta'níj vaa nij soj rihanj, tinuj, nocoj. Dan me se cataj 'unj rihaan soj, ne cutumé ndo'o soj man soj rihaan ya'anj acój yuvij man rihaan chumij nihánj ei. Ne se guun guun rá soj ni'yaj soj a 'ó rasuun vaa danj ma'.

## Nihánj me síj vij yanj cartá qui'yaj síj cu'naj Juan ca'néé so' rihaan nij yuvií noco' man Diose a

<sup>1</sup> Síj chii nga mej, ne achrón 'unj yanj nihánj nayaa taran' nij soj sij narii Diöse man sij nuu chre' rej achíin ni'yaj soj rihaan Diöse a. Dan me se 'ee raj man soj, che'é rej sij noco' nana ya me taran' ní' a. Ne nuveé orún' 'unj me síj 'ee rá man soj ma'. 'O se taran' nij síj ne'en nana ya 'ee rá man soj adonj. <sup>2</sup> 'Ee rá núj man soj che'é se nuu nana ya nimán ní', ne yo'o cunuú nana ya yo' nimán ní' nu' cavii nu' ca'anj ruguanj. <sup>3</sup> Ne me rá 'unj qui'yaj Rej ní' Diöse do', ta'ní so' Jesucristó do', se luj che'é nij soj, ne me rá 'unj cunuú 'ee rá roj so' ni'yaj roj so' man soj, ne me rá 'unj gaa xej nimán soj qui'yaj roj so', ne yo'o canoco' soj nana ya ne gaa 'ee rá soj man tuvi' soj ei.

*Nana nihánj taj xna'anj se vaa yo'o qui'yaj ní' nana cataj xna'anj Diöse rihaan ní', ne gaa 'ee rá ní' man tuvi' ní' a*

<sup>4</sup> Guun niha' uxrá raj, che'é se xcaj 'unj cuentá se vaa ta'aj nij soj me síj yo'o noco' tucuáan ya, ndaa vaa cataj xna'anj Rej ní' Diöse rihaan ní' chuguanj. <sup>5</sup> Ne nihánj me se achíin ni'yáa 'unj rihaan soj se vaa qui'yaj nij soj ndaa vaa cataj xna'anj Diöse rihaan ní' a. Ne nuveé nana ca'na' naca rihaan ní' me nana nihánj ma'. Maan se nana cataj xna'anj Diöse rihaan ní' asij guun che'e ní' canoco' ní' man so' me nana nihánj adonj. Ne nana nihánj taj se vaa cunuú 'ee rá ní' man tuvi' ní' a. <sup>6</sup> Sese gaa 'ee rá ní' man tuvi' ní', ne síj 'yaj ndaa vaa cataj xna'anj Diöse rihaan ní' me ní' ei. Ne yo' me nana cataj xna'anj so' rihaan ní' asij guun che'e ní' canoco' ní' man so', ne me rá so'

yo'o qui'yaj ní' nana yo' adonj. <sup>7</sup> 'O se yaj me se curihanj ndo'o nij síj tiha' yu'unj rihaan chumii nihánj, ne cataj nij so' se vaa nuveé sij guun yuvií me Jesucristó a. Che'é dan me nij so' síj tiha' yu'unj a'mii nana ne, ne taj nij so' se vaa ma'an nij so' me síj ca'néé Diöse tinanii man yuvií rihaan sayuun a. <sup>8</sup> Cutumé ndo'o soj man soj se gaa nanj ca'anj ni'ya nu' nij rasuun sa' qui'yaj canaán soj ma'. Tzaj ne yo'o canoco' soj nana ya, gaa ne ve'é naru'vee Diöse rihaan soj ei. <sup>9</sup> Ne me ma'an síj tanáj se-tucuanj Jesucristó ro', nuvi' Diöse yáan ga so' ma'. Tzaj ne síj noco' raan se-tucuanj Jesucristó me se so' me síj yo'o yáan roj ta'nij Diöse ga so' adonj. <sup>10</sup> Ne sese ca'na' 'o síj a'mii yo'ó nana rej yanj soj, ne se ca'vej rá soj catuu so' rihaan soj, ne se ca'mii sa' soj ga so' ma'. <sup>11</sup> 'O se síj a'mii sa' ga so' me síj racuij man so' qui'yaj so' se chi'ii adonj.

*Nana nihánj taj xna'anj se vaa cuchí' Juan rej yanj nij so' a*

<sup>12</sup> Vaa ndo'o nana me rá 'unj cataj xna'anj 'unj rihaan soj, tzaj ne na'vej rá 'unj cachron 'unj cunudanj nij nana rihaan yanj nihánj, che'é se que'ee ndo'o nana me yo' ei. Tzaj ne cuchij rihaan soj, raj, gaa ne ca'vee ca'mii rihaan ma'an tuvi' ya ní', gaa ne guun niha' uxrá rá ní' gaa nari' tuvi' ní' chuguanj. <sup>13</sup> Ne nij síj narii Diöse yanj chuman' nihánj ro', me rá taran' nij so' se vaa ve'é cayáan taran' soj ei.



## Nihánj me síj va'núj cartá qui'yaj síj cu'naj Juan, ne ca'néé so' yanj nihánj rihaan síj cu'naj Gayo a

<sup>1</sup> Síj chii nga mej, ne achrón 'unj yanj nihánj nayaa so' síj cu'naj Gayo a. 'Ee raj mán so', che'é se síj noco' nana ya me ní' a. <sup>2</sup> Dan me se me rá 'unj se vaa cavii sa' so' ne gaa nucuáa so' á. 'O se ya ya vaj avii sa' nimán so' nanj adonj. <sup>3</sup> 'O se guun niha' uxrá rá 'unj, che'é se ca'na' doj tinúú ní' rihanj nihánj, ne nata' nij so' rihanj se vaa yo'ó noco' so' tucuáan ya ei. <sup>4</sup> Ne taj vaj yo'ó rasuun ca'vee qui'yaj guun niha' raj a ma'. Maan se orún' nana cunó 'unj se vaa ve'é noco' nij soj síj guun ta'níi 'unj man tucuáan ya, ne che'é nana yo' ro', uun niha' uxrá raj nanj adonj.

*Nana nihánj taj xna'anj se vaa ve'é racuíj síj cu'naj Gayo man nij síj chéé nata' se-nana Jesucristó a*

<sup>5</sup> Dan me se 'ee raj mán so', ne ve'é 'yáa so' racuíj so' man nij tinúú ní' nij síj 'na' yo'ó chuman', ne che'é dan síj ve'é noco' man síj 'nij ra'a man ní' mé so', raj adonj. <sup>6</sup> Ne aj nata' nij so' rihaan nij síj amán rá yanj chuman' nihánj se vaa cunuu 'ee rá so' man nij so' chuguanj. Ne cunaj uxrá sese yo'ó racuíj so' man nij so' gaa chéé nij so' que'ee chuman' yo' ei. 'O se síj 'yaj suun rihaan ma'an Diose me nij so' adonj. <sup>7</sup> 'O se cavii nij so' nata' nij so' se-nana síj 'nij ra'a man ní', ne taj vaj a 'ó rasuun ne quirí' nij so' ra'a nij síj na'vej rá cunó se-nana Jesucristó a man chuguanj. <sup>8</sup> Che'é dan no xcuún ní' racuíj ní' man taran' nij síj chéé che'é Diose, gaa ne guun ní' tuvi' nij so' síj nata' nana ya rihaan yuvii ei.

*Nana nihánj taj xna'anj che'é 'o síj chí'ii nimán a*

<sup>9</sup> Dan me se qui'yáj 'o yanj cartá ca'néé 'unj rihaan cunudanj nij síj amán rá ni'yaj man Jesucristó yanj chiháan so' a. Tzaj ne vaa yo'ó tuvi' nij so' síj cu'naj Diótrefes, ne so' me síj me rá guun chij rihaan nij so', ne na'vej rá so' cunó so' se-nana ma'. <sup>10</sup> Che'é dan, sese cuchí' uún 'unj rihaan so', ne cataj xna'anj 'unj rihaan so' che'é se nij 'yaj so' gaa tu'va so' nana nij che'é núj ei. Ne nuveé inanj nana nij a'mii so' ma'. Dan me se gaa uchi' nij tinúú ní' chiháan so', ne ne a'mii so' ga nij tinúú ní' ma'. Tananj uún, ne me ma'an síj me rá ca'mii ga nij tinúú ní', ne aráan so' chrej rihaan nij yuvii se gaa nanj ca'mii nij yuvii ga nij tinúú ní', ne ndaa rii so' xe' man nij yuvii chuguanj. Danj 'yaj síj cu'naj Diótrefes ei.

*Nana nihánj taj xna'anj se vaa ve'é qui'yaj ní' a*

<sup>11</sup> Dan me se 'ee rá 'unj mán so', tinuj. Ne se guun qui'yáa so' ndaa vaa 'yaj nij síj chí'ii ma'. Maan se qui'yáa so' ndaa vaa 'yaj nij síj vaa sa' á. 'O se síj 'yaj se sa' ro', me síj noco' man Diose adonj. Ne síj 'yaj se chí'ii ro', ne ne'en so' man Diose a ma'.

*Nana nihánj taj xna'anj che'é síj cu'naj Demetrio a*

<sup>12</sup> Cunudanj nij tinúú ní' taj xna'anj che'é síj cu'naj Demetrio se vaa síj vaa sa' me so', ne ya ya síj sa' me so' adonj. Yo' me nana taj xna'anj núj rihaan so', ne aj ne'én so' se vaa nana ya me nij nana ataj xna'anj núj rihaan so' a.

*Nana nihánj taj xna'anj se vaa cuchí' Juan rej yanj Gayo a*

<sup>13</sup> Vaa ndo'o nana guun rá 'unj cataj xna'anj 'unj rihaan so', tzaj ne na'vej rá 'unj cachron 'unj nu' nana yo' rihaan yanj nihánj a man chuguanj. <sup>14</sup> Tzaj ne cuchij rihaan so', gaa ne ca'vee ca'mii ní' me ma'an nana rihaan tuvi' ní' ei. <sup>15</sup> Díj gaa nimán so' á. Me rá nij tinúú ní' se vaa ve'é cayáan so' á. Cataj so' rihaan 'o 'o nij tinúú 'unj yanj chiháan so' se vaa ve'é cumán nij so' raj a.

## Nihánj me 'o yanj cartá qui'yaj síí cu'naj Judas ca'néé so' rihaan nij yuvij noco' man Diose a

<sup>1</sup> 'Unj ro', me síí cu'naj Judas síí 'yaj suun rihaan Jesucristó, ne tinúú Santiagó mej a. Cachronj nana nihánj rihaan yanj ca'nej 'unj rihaan soj sij canacúún Diose man canoco' man so' a. Dan me se 'ee rá Rej ní' Diose man soj, ne nicaj yu'unj Jesucristó man soj se gaa nanj tanáj soj se-nana Diose a.

<sup>2</sup> Me raj gaa 'ee ndo'o rá Diose man soj ne gaa xej nimán soj qui'yaj Diose ne gaa 'ee ndo'o rá soj tuvi' soj qui'yaj Diose a.

*Nana nihánj taj xna'anj che'é nij síí narqué tucuáán ne a*

<sup>3</sup> Dan me se guun ndo'o raj cachronj nana rihaan yanj ca'nej 'unj rihaan soj che'é daj gaa cavii sa' ndo'o taran' ní' vaa güii qui'yaj Diose, tinuj, nocoj. Tzaj ne yaj me se no xcúnj cachronj yo'ó nana rihaan yanj, ne cataj xna'anj 'unj rihaan soj se vaa terquee ndo'o soj canoco' raan soj se-tucuanj Diose tucuáán tucuachén nij síí nata' se-nana Jesucristó rihaan soj sij cunuu sa' rihaan Diose a. <sup>4</sup> 'O se aj catúj yuve doj nij síí narqué tucuáán ne sca'núj soj, ne asij naá ndo'o nó nana rihaan danj Diose che'é nij so' se vaa vaa güii quiran' nij so' sayuun, qui'yaj Diose adonj. Sij na'vej rá cunó rihaan Diose me nij so', ne aj nari' nij so' nana se vaa me rá Diose ca'nee Diose cacun' xraá nij so', ne che'é dan taj nij so' se vaa ca'vee qui'yaj nij so' me ma'an se nij ga nij chana niha' rá a. Dan me se orún' Jesucristó me síí 'nij ra'a man ní', tzaj ne taj che'é cunó nij so' rihaan Jesucristó, rá nij so' a.

<sup>5</sup> Nda' se aj ne'en soj nu' nana no rihaan danj Diose, tzaj ne na'vej raj quini'yon soj nana yo', ne che'é dan

noná uún 'unj nana nihánj xrée soj, ne dan me se síí 'nij ra'a man ní' ro', tinanii so' man taran' nij síí israelitá rihaan nij síí man Egiptó gaa naá, tzaj ne ta'aj nij so' ro', ne cuchuman rá ni'yaj man Diose, ne che'é dan cachén doj yo', gaa ne cavi' nij so', qui'yaj Diose a. <sup>6</sup> Ne aj ne'en soj se vaa ta'aj nij se-mozó Diose ro', ne ca'vej rá nij so' cataj nij so' suun ca'ne' Diose rihaan nij so', ne curihanj nij so' rej guun rá Diose cumán nij so', ne che'é dan numíj nii man nij so', ne yo'ó veé danj gaa numii nij so' cayáán nij so' rej rmi' ndaa se quisij güii guee güii ca'ne' Diose cacun' che'é nij so', ne daj chihaa míj se ca'vee quinanj nij so' ma'. <sup>7</sup> Dan me se quiran' nij so' ndaa vaa quiran' nij síí man roj chuman' cu'naj Sodoma ga Gomorra ga yo'ó nij chuman' naj nichrun' a. Dan me se ase vaa se chi'ii qui'yaj ta'aj se-mozó Diose yo' ro', danj vaa se chi'ii qui'yaj nij síí man nij chuman' yo', ne ndaa guun rá nij so' cotoj nij so' ga chii chana do', ga xcuu do', ne che'é dan yuun che'e tucuayuu Diose ya'an chiháán nij so', ne che'é dan me ca'vee xcaj ní' cuentá se vaa sese qui'yaj ní' se chi'ii, ne cacaa ní' rihaan ya'an nu' cavii nu' ca'anj, qui'yaj Diose adonj.

<sup>8</sup> Nda' se ne'en nij síí narqué tucuáán ne rihaan soj daj vaa sayuun quiran' nij síí israelitá do', nij se-mozó Diose do', nij síí man Sodoma do', tzaj ne taj se qui'yá' xcaj nij so' cuentá ma'. 'O danj 'yaj nij so' se nij, ne ase vaa síí a'nu' vaa nij so', che'é se amán rma'an rá nij so' nana ne nanj ei. Ne che'é dan 'yaj ndo'o nij so' se chi'ii, ne tucuáá nij so' rihaan Diose, ne a'mii nij so' nana chi'ii che'é nij se-mozó Diose a. <sup>9</sup> Tzaj ne ndaa síí cu'naj Migueé síí 'nij ra'a man nu' nij se-mozó Diose ro', gaa naá gaa cavi' Moisés ne canó tuvi' Migueé ga síí chree che'é cúú man Moisés, ne ne quisij rá Migueé ca'mii so' nana nij rihaan síí chree ma'. Maan se cataj Migueé rihaan síí chree se vaa síí 'nij ra'a man ní' me síí caxrii yuvaa

man sí chree, cataj Migueé a. <sup>10</sup> Tzaj ne ino 'yaj nij sí narqué tucuáán ne ga sí cu'naj Migueé yo', ne nda' se ne ne'en nij so' daj vaa nij se-mozó Diose, tzaj ne ne chu'vi' nij so' ca'mij nij so' nana nij che'é nij se-mozó Diose ma'. Ne ase vaa xcuu ne acaj cuentá 'yaj náá guun se vaa me rá qui'yaj ro', danj vaa nij sí narqué tucuáán ne, ne che'é dan quirí' nij so' vaa güii adonj. <sup>11</sup> Nique nij so' che'é sayuun quiran' nij so' nanj adonj. 'O se ase vaa qui'yaj sí cu'naj Caín gaa ticavi' so' man tinúú so' gaa naá ro', danj vaa 'yaj nij so', ne xcoj ruvaa rá nij so' ga tuvi' nij so' a. Ne ase vaa qui'yaj sí cu'naj Balaam gaa naá ro', danj vaa 'yaj nij so', ne me ndo'o rá nij so' qui'yaj canaán nij so' sa'anj, ne che'é dan tiha' yu'unj nij so' man tuvi' nij so' a. Ne ase vaa qui'yaj sí cu'naj Coré ro', danj vaa 'yaj nij so', ne dan me se tucuáá Coré rihaan Moisés, ne che'é dan chumánj yo'óó man nij tuvi' nij so', qui'yaj Diose a. Ne danj quiran' guee nij sí narqué tucuáán ne, quiran' uxrá nij so' sayuun vaa güii, qui'yaj Diose ei.

<sup>12</sup> Gaa nuu chre' soj chá soj chraa, ne ne chu'vi' nij sí narqué tucuáán ne yo' qui'yaj nij so' se nij, ne che'é dan ase vaa luj chi'ij ro', danj vaa nij so' rihaan soj ei. Sí taj ya'anj man ma'an me nij sí narqué tucuáán ne yo', ne ne racuíj nij so' man tuvi' nij so' ma'. Ase vaa ngaa no rma'an xta' ne ne aman' 'yaj ro', vaa nij so', ne vaj nij so' rej rque do', rej xraj do' adonj. Ne ase vaa chruun nuvi' vaj chruj mán raa gaa síj dió cumán chruj raa ro', vaa nij so', ne chruun naco me nij so', ne chruun quiriháj nii quirí'ij nii rihaan yo'óó me uún nij so' adonj. Ase vaa ngaa ga chruun ro', danj vaa nij sí narqué tucuáán ne yo' ei. Asino yaan guun rá yuvi se vaa sí sa' me nij so', tzaj ne nuvi' suun sa' síj, 'yaj nij so' ma'. <sup>13</sup> Ase vaa rii ndo'o na ya'anj yatan' chi'ij rej tu'va na ya'anj ro', danj vaa rii ndo'o nij so' se chi'ij 'yaj nij so' quene'en yuvi, ne ase vaa yati' natuná rej chéé 'o 'o yavii ro',

danj vaa uún nij so', ne taj che'é gaa nucuaj rá ní' man nij so' ma'. Vaa güii, ne ca'nej Diose man nij so' cayáán nij so' rej rmi' ndo'o nu' cavii nu' ca'anj nanj ei.

<sup>14</sup> Sí cu'naj Enoc me se aj síj vatan' xii so' cachén, ne dan me se ta'ní ta'nij si'no sí cu'naj Adán me so', ne dan me se nata' so' che'é nij sí narque tucuáán ne rihaan soj cuano, ne dan me se cataj sí cu'naj Enoc a: "Cuno soj ca'mij á. Vaa güii, ne ca'na' sí 'nij ra'a man ní' ga que'ee míj nij se-mozó so' nij sí guee, <sup>15</sup> ne ca'ne' so' cacun' che'é cunudanj yuvi, ne cataj so' se vaa tumé nij sí ne noco' man Diose cacun' che'é nu' cacun' qui'yaj nij so' do', che'é nu' nana nij ca'mii nij so' che'é Diose do' a." Danj ca'mii Enoc che'é nij sí narqué tucuáán ne rihaan soj nihánj cuano a. <sup>16</sup> Nij so' me se taj se qui'yá' caran' rá nij so' ni'yaj nij so' se vaa 'yaj Diose do', se vaa 'yaj tuvi' nij so' do' ma'. Inanj 'yaj nij so' se nij ndaa vaa me rá ma'an nij so', ne inanj danj 'yaj nij so' nanj chuguanj. Sí xta' inanj a'mii me nij so', ne ve'é ndo'o a'mii nij so' ga ru'vee che'é se inanj me rá nij so' quirí' nij so' sa'anj man nij ru'vee adonj.

*Nana nihánj taj xna'anj che'é tucuáán narqué Judas rihaan nij sí cuchumán ya rá ni'yaj man Jesucristó a*

<sup>17</sup> Tzaj ne soj ro', yo'o cunuú rá soj nana cataj xna'anj nij apóstol cune' Jesucristó sij 'nij ra'a man ní' man nata' rihaan yuvi che'é so', tinuj, nocoj. <sup>18</sup> Nihánj me nana ca'mii nij so' rihaan soj a: "Asa' nichrun' ca'anj ni'ya chumij, ne ca'na' sí ca'nga' naco ni'yaj man nij sí amán rá ni'yaj man Jesucristó, ne inanj qui'yaj nij so' se nij, ne guun rá nij so' cachee nij so' ndaa vaa me rá ma'an nij so', ne se canoco' nij so' man Diose a man adonj". Danj vaa nana cataj nij apóstol che'é nij sí narqué tucuáán ne a.

<sup>19</sup> Nij sí narqué tucuáán ne yo' ro', 'yaj uun yaníj nij sí noco' man Jesucristó rihaan tuvi' nij so' ei. Inanj che'é nee man nij so' acaj nij so' cuentá, ne che'é yo'ó rasuun ne acaj nij so' cuentá a ma'. Ne ase vaa xcuu vaa nij so', ne nuvi' nimán nij so' nuu a ma'. <sup>20</sup> Tzaj ne soj me se yo'o raan canoco' soj se-tucuanj Diose tucuáán guee, tinuj, nocoj. Ne ca'vej rá soj racuíj Nimán Diose man soj cachinj ni'yaj soj rihaan Diose ei. <sup>21</sup> Yo'o qui'yaj soj ndaa vaa me rá Diose, gaa ne yo'o gaa 'ee rá Diose man soj chuguanj. Na'vij soj güii cayáán ní' rihaan Diose nu' cavii nu' ca'anj qui'yaj Jesucristó sij 'nij ra'a man ní', che'é se 'ee rá so' man ní' ei.

<sup>22</sup> Xa' nij sí uun vij rá, tzaj ne naqui'yaj nica soj nimán nij so' canoco' nij so' Diose ei. <sup>23</sup> Nago' soj chrej nucuaj man yo'ó ta'aj nij sí tumé cacun' che'é rej quinanjij nij so' rihaan ya'an a. Ne gaa 'ee rá soj man nij sí aj cuno se-nana nij sí narqué tucuáán ne ei. Tzaj ne cuchu'vi' soj se gaa nanj qui'yaj soj ndaa vaa 'yaj nij so', ne quinachri' soj ni'yaj soj se chi'ij 'yaj nij so' ei.

*Nana nihánj taj xna'anj se vaa sa' uxrá vaa Diose daj a güii a*

<sup>24-25</sup> Sa' uxrá vaa orún' Diose sí tinanii man ní' rihaan sayuun, ne guun nucuaj so' caráán so' rihaan ní' se qui'yaj ní' cacun' man chuguanj. Guun nucuaj so' tumé so' man ní' ndaa se quisij güii cayáán ní' rihaan so' rej guun chij so', ne gaa nica nimán ní' güii yo', qui'yaj so', ne guun niha' uxrá rá ní', qui'yaj so' adonj. Ne Jesucristó sij 'nij ra'a man ní' me sí racuíj man ní', ne che'é dan cataj ní' se vaa sa' uxrá vaa Diose nu' cavii nu' ca'na', ne sa' uxrá 'yaj so' yaj, ne sa' uxrá qui'yaj so' nu' cavii nu' ca'anj, ne yo'o guun chij so' chuguanj. Veé danj gaa ya ei.



## Yanj nihánj taj xna'anj che'é nij rasuun tihaan naca Jesucristó rihaan sí cu'naj Juan a

<sup>1</sup> Nihánj me nij rasuun tihaan naca Jesucristó rihaan nij sí 'yaj suun rihaan so', ndaa vaa cataj xna'anj ma'an Diose rihaan so', ne rasuun guun ra'yanj ya vaa güii me nij rasuun yo' ei. Ne Jesucristó ro', so' me sí ca'née se-mozó rihaan sí cu'naj Juan sí nuu 'yaj suun rihaan so', ne dan me se xcaj sí cu'naj Juan cuentá che'é nu' nij rasuun nihánj, qui'yaj Jesucristó ei. <sup>2</sup> Ne sí cu'naj Juan me sí ataj xna'anj nihánj rihaan nu' nij yuvij che'é nu' se-nana Diose ndaa vaa cataj xna'anj Jesucristó rihaan so', ne rasuun quene'en ma'an so' me nu' nij rasuun nihánj adonj. <sup>3</sup> Ne cavij sa' uxrá nij sí nayaá nana nihánj rihaan tuvi', ne tananj uún ne cavij sa' nij sí a'née sa' nana nihánj, sese ya 'yaj nij so' ndaa vaa taj nana no rihaan yanj nihánj chuguanj. 'O se daj doj quisij ya güii ca'na' nij rasuun yo' ei.

<sup>4-5</sup> Dan me se 'unj sij cu'naj Juan me sí 'yaj yanj nihánj, ca'nej 'unj rihaan cunu' chij ya x'ne' nij soj sij man estado Asia sij amán rá ni'yaj man Jesucristó a. Dan me se me rá 'unj qui'yaj ndo'o Diose qui'yaj ndo'o Nimán Diose qui'yaj ndo'o Jesucristó qui'yaj ndo'o se luj che'é nij soj, ne me rá 'unj gaa xej nimán soj, qui'yaj nij so' adonj. Ne Diose ro', me sí nicun' yaj, ne asij naá nicun' so', ne vaa güii ca'na' so' adonj. Ne Nimán Diose ro', vaa guee inanj, ne chij ya se nucuaj nicaj so', ne nicun' so' rihaan xruún Diose chruun xlá rej rii ta'nga' Diose ei. Ne dan me se Jesucristó me sí nata' nana ya rihaan ní', ne so' me sí cunuu i'na' uún asino yaan rihaan cunudanj nij sí cavi' sí cunu i'na'

uún vaa güii, ne uun chij so' rihaan cunudanj nij sí nicaj suun rey man rihaan chumij nihánj adonj.

Ne Jesucristó me sí 'ee rá man ní', ne aj tinanii so' man ní' rihaan cacun' tumé ní' gaa cavi' so' a. <sup>6</sup> Ne cune' so' man ní' guun ní' sí nicaj suun rey ne guun ní' xrej nuu rihaan Rej so' Diose a. Ne ve'é guun chij so' nu' cavii nu' ca'anj adonj. Veé danj gaa ya ei.

<sup>7</sup> Dan me se ca'na' so' xráá ngaa, ne quene'en cunudanj nij yuvij man so', ne ndaa nij sí qui'yaj sayuun man so' quene'en man so', ne go' cunudanj nij yuvij man rihaan chumij cuxru' nimán nij so', che'é rej quinano ndo'o rá nij so' che'é cacun' tumé nij so' adonj. Veé danj gaa ya ei.

<sup>8</sup> Ne Diose sí 'nij ra'a man ní' taj:

—'Unj me se ase vaa letrá A ga letrá Z vaa 'unj a. Dan me se veé 'unj nicun' asij rque, ne veé 'unj canicun' nu' cavii nu' ca'anj adonj. Dan me se veé 'unj nicun' yaj, ne veé 'unj nicun' asij naá, ne vaa güii cuchí' yá 'unj rihaan soj a. Ne 'unj me sí guun nucuaj qui'yaj cunudanj a —taj Diose sí 'nij ra'a man ní' a.

*Nana nihánj taj xna'anj daj vaa Jesucristó gaa curuvi' so' rihaan sí cu'naj Juan a*

<sup>9</sup> 'Unj sij cu'naj Juan ro', tinúú soj mé 'unj, ne sí ran' sayuun ga soj mé 'unj, ne sí nucuaj nimán rihaan sayuun mej ga soj, ne danj ran' ní' che'é se sij me rá guun chij Diose rihaan chumij nihánj me nu' ní' a. Dan me se yáán 'unj yo'óó naj tanuu na ya'anj yo'óó cu'naj Patmos, ne yo' me rej ca'née nii manj che'é se sij nata' se-nana Diose mej ne sij taj xna'anj nana che'é Jesucristó mej a. <sup>10</sup> Ne 'o güii na'vív ní' rihaan sí 'nij ra'a man ní' me se quene'en nimanj rasuun, ne dan me se rej xcoj ro', nucuaj ndo'o ca'mii yo'o so' cunoj, ne daj se uun rá' gaa a'yánj nii chruun a'yánj ro', danj guun raj gaa cunoj se-nana so' adonj.

<sup>11</sup> Ne cataj so':

—'Unj ro', me ya sí canicun' asij rque, ne veé 'unj canicun' nu' cavii

nu' ca'anj adonj —taj so' a. Dan me se cataj so'— Cachron so' nana che'é nu' nij rasuun quene'én so' rihaan yanj, ne ca'nej so' rihaan nij sí amán rá ni'yaj manj yanj chij chuman' á. Dan me se rihaan nij sí man Efeso do', rihaan nij sí man Esmirna do', rihaan nij sí man Pérgamo do', rihaan nij sí man Tiatira do', rihaan nij sí man Sardis do', rihaan nij sí man Filadelfia do', rihaan nij sí man Laodicea do', ca'nej so' yanj yo' á —taj so' cunoj a.

<sup>12</sup> Gaa ne canicaj 'unj ni'yaj 'unj man sí ca'mii nana dan rihanj, ne quene'enj chij aga' oró míi aga' taj aga' ya'an a. <sup>13</sup> Ne tanuuj nij aga' taj aga' ya'an ro', quene'enj 'o síi nicaj yu'unj man yuvii, ne nuu so' yatzij xcaan, ne 'nij catuun so' merque caxra' anó ndaa rucuaa so' a. Ne merque aga' oró míi me yo' a. <sup>14</sup> Ne raá so' do', yuvé raá so' do', me se catzii ndo'o vaa yo' a. Dan me se ase vaa cachij xraá matzinj catzii do', ase vaa yu've' do', danj vaa raá so' a. Ne rlij rihaan so' ro', ase vaa ya'an vaa yo', chuguun yo' a. <sup>15</sup> Ne tacóo so' ro', ase vaa aga' bronce maree axrij ya'an nii man rque chrúun hornó vaa tacóo so' a. Ne daj se uun rá' unó' cayuj vaj chraá xij ro', danj guun raj cunoj nana ca'mii so' a. <sup>16</sup> Ne ra'a so' rej nuva' so' ro', coró' so' chij yati', ne neé espadá sihaa nu' niha rihaan curihanj tu'va so', ne ase vaa nucuaj ndo'o chuguun güii ro', danj vaa chuguun nu' so' ni'yaj 'unj man so' a.

<sup>17</sup> Dan me se gaa quene'én 'unj man so', ne naxrú' 'unj ca'anj quináa 'unj rihaan yo'óo tacóo so', ne ase vaa síi cavi' ro', danj vaa 'unj a. Dan me se cuta' so' ra'a so' rej nuva' so' xraj, ne cataj so':

—Se cuchu'ví' so' ma'. 'Unj ro', me síi táa yaan rihaan cunudanj, ne veé 'unj me síi noco' xco rihaan cunudanj adonj. <sup>18</sup> Ne síi vaa i'na' mej a. Dan me se cavi' 'unj, tzaj ne cuano nihánj me se vaa i'na' uún 'unj, ne dan me se yo'o gaa i'na' 'unj nu' cavii nu' ca'anj

adonj. Ne 'unj ro', me síi no xcuún cataj me síi cavi' ne me síi ca'anj rej man nij síi cavi' adonj.

<sup>19</sup> Che'é dan me cachron so' nana rihaan yanj che'é nu' se vaa quene'én so' nihánj, ne dan me se cachron so' che'é rasuun man cuano, ne cachron so' che'é rasuun ca'na' rej rihaan ní' a. <sup>20</sup> Ne nihánj me se cataj xna'anj 'unj che'é chij nij yati' taj ra'aj ne'én so' do', che'é chij nij aga' oró míi aga' taj aga' ya'an do' a. Dan me se chij nij yati' do', nij aga' taj aga' ya'an do', ma'an nij yuvii amán rá ni'yaj manj yanj chij nij aman' me nij rasuun yo' a —taj so' rihanj a.

## 2

*Nana nihánj me nana ca'anj rihaan nij síi amán rá ni'yaj man Jesucristó ne chuman' Efeso a*

<sup>1</sup> Gaa ne cataj so' rihanj a:

—Nana nihánj me nana cachron so' ca'nej so' rihaan nij síi amán rá ni'yaj manj ne chuman' Efeso á: “Dan me se nihánj me nana ca'mii 'unj sij nicaj chij yati' ra'a rej nuva' ei. Ne sij vaj sca'núj chij nij aga' oró míi taj aga' ya'an mej ei. Dan me se cunoj soj sij ne chuman' Efeso a. <sup>2</sup> Aj ne'én 'unj daj 'yaj soj se vaa 'yaj suun uxrá soj ne nucuaj ndo'o vaa nimán soj rihaan sayuun adonj. Ne aj ne'enj se vaa na'vej uxrá rá soj ni'yaj soj man nij síi chi'ii mei. Ne xa' nij síi tiha' yu'unj tu'va rma'an se vaa sij cune' Jesucristó nata' rihaan yuvii che'é so' me nij so', tzaj ne aj nuchruj raá soj che'é nij so', ne aj xcaj soj cuentá se vaa nuveé sij a'mii ya me nij so' a man adonj. <sup>3</sup> Ne nucuaj ndo'o vaa nimán soj rihaan sayuun quiran' soj che'é rej sij noco' manj me soj, ne ne ca'ne' a doj rá soj a ma'. <sup>4</sup> Tzaj ne vaa 'o cacun' tumé soj rihanj se vaa asij rque doj me se caráj cochroj ndo'o soj rihanj, tzaj ne yaj me se do' do' ca'ne' rá soj aráj cochroj soj rihanj ei.

<sup>5</sup> Che'é dan nanuj rá soj daj qui'yaj soj gaa ataa ca'anj yanij soj rihanj, ne canicaj nimán soj, ne guun rá soj

ndāa vaa guun rá soj asino yāan á. Sese se canicaj nimán soj, ne cuchì 'un̄j rihaan soj, ne ca'nee 'un̄j se-aga' soj aga' taj aga' ya'an rej nicun' yo' nan̄j adon̄j. <sup>6</sup> Tzaj ne nihánj me se sa' qui'yaj soj, se vaa na'vej uxrá rá soj ni'yaj soj se vaa 'yaj nij sí nicolaíta, ne veé danj vaa guee, ne na'vej rá ma'an̄j ni'yaj 'un̄j se vaa 'yaj nij so' uún ma'. <sup>7</sup> Dan me se sese taj yu'uj xréé soj, ne nō xcúún soj cunō soj nanā nihánj nanā taj xna'an̄j Nimán Diosē rihaan nij sí amán rá ni'yaj manj ne 'o 'o chuman' a. Dan me se rihaan sí 'yaj canaán rihaan nu' sayuun me se rque 'un̄j chruj man̄ rā chruun qui'yaj gāa i'na' yuvii nu' cavii nu' ca'an̄j gā Diosē cha so', ne chruun yo' ro', nicun' rej sa' ndo'o rej rihaan ma'an̄ Diosē ei." Veé danj sij nanā cachron̄ so' ca'nej so' rihaan nij sí amán rá ni'yaj manj ne chuman' Efeso a —taj so' rihanj a.

*Nanā nihánj me nanā ca'an̄j rihaan nij sí amán rá ni'yaj man Jesucristó ne chuman' Esmirna a*

<sup>8</sup> Gāa ne cataj uún so' rihanj a:

—Nanā nihánj me nanā cachron̄ so' ca'nej so' rihaan nij sí amán rá ni'yaj manj ne chuman' Esmirna a: “Dan me se nihánj me nanā ca'mii 'un̄j sij nicun' asij rque do', sij canicun' nu' cavii nu' ca'an̄j do', ne sij cavi' mej, tzaj ne cunuu i'na' ya uún 'un̄j ei. <sup>9</sup> Ne'én 'un̄j daj vaa sayuun ran' nij soj sij man̄ chuman' Esmirna, ne ne'én 'un̄j se vaa nique ndo'o soj adon̄j. Tzaj ne rihaan Diosē me se sí ru'vee me ya soj ei. Ne vaa nij sí tu'va rma'an̄ taj se vaa yuvii israelitá me nij so', tzaj ne nuveé sij israelitá me ya nij so' ma'. Maan̄ sij tucu'yón se-nanā Satanás me nij so' nan̄j á. Ne ne'én 'un̄j se vaa a'mii nij so' nanā nij che'é soj ei.

<sup>10</sup> ”Tzaj ne a doj se chuchu'vi' soj che'é sayuun quiran' soj ma'. Dan me se sí chree ro', me se caxrii so' taga' man ta'aj soj, che'é rej chuchu'vi' soj ne tanáj soj tucuáán sa' ei. Ne chi' güii quiran' soj sayuun danj chuguan̄j.

Dan me se nda' se ticavi' nii man soj, tzaj ne yo'o canoco' soj manj, ne vaa güii rque 'un̄j 'o cachriin̄ cunuû rā soj, che'é rej sij gāa i'na' nu' cavii nu' ca'an̄j gā Diosē guun soj ei. <sup>11</sup> Dan me se sese taj yu'uj xréé soj, ne nō xcúún soj cunō soj nanā nihánj nanā taj xna'an̄j Nimán Diosē rihaan nij sí amán rá ni'yaj manj ne 'o 'o chuman' a. Dan me se se quiran' sí qui'yaj canaán yo' sayuun asa' cavi' uún nij sí tumé cacun' a ma'.” Veé danj sij nanā cachron̄ so' ca'nej so' rihaan nij sí amán rá ni'yaj manj ne chuman' Esmirna a —taj uún so' rihanj a.

*Nanā nihánj me nanā ca'an̄j rihaan nij sí amán rá ni'yaj man Jesucristó ne chuman' Pérgamo a*

<sup>12</sup> Gāa ne cataj uún so' rihanj a:

—Nanā nihánj me nanā cachron̄ so' ca'nej so' rihaan nij sí amán rá ni'yaj manj ne chuman' Pérgamo a: “Dan me se nihánj me nanā ca'mii 'un̄j sij nicaj neé espadá sihāa nu' nihā rihaan rihaan soj sij ne chuman' Pérgamo a. <sup>13</sup> Ne'én 'un̄j rej ne nij soj, se vaa uun chij ndo'o Satanás rej yo' ei. Tzaj ne yo'o noco' soj manj, ne ne tanáj xco soj se-tucuan̄j 'un̄j ma'. Dan me se vaa sí cu'naj Antipas sí yo'o nata' rihaan yuvii che'é 'un̄j, ne nda' se ticavi' nii man so' rej ne soj rej ne ma'an̄ Satanás, tzaj ne ne ca'ne' rá soj gā se-nan̄aj ma'. <sup>14</sup> Tzaj ne vaa doj cacun' tumé soj rihanj, se vaa maan̄ sca'núj soj 'nij sí noco' se-nanā sí cu'naj Balaam sí tucu'yón rihaan sí cu'naj Balac se vaa ca'nej so' tucuáán chi'ii nimán nij sí israelitá se vaa chā nij sí israelitá rasuun rque nii rihaan nij ya'an̄j cacój nij tuvi' Balac ne qui'yaj nij so' cacun' gā chanā, ne dan me se quirí' nij sí israelitá rihaan Diosē, qui'yaj cacun' yo' ei. <sup>15</sup> Ne tanan̄j uún, ne man ta'aj nij sí nicaj se-tucuan̄j nij sí nicolaíta sca'núj soj uún ei. Dan me se nachrí' 'un̄j ni'yaj 'un̄j tucuáán yo' ei.

<sup>16</sup> ”Che'é dan canicaj nimán soj, tanáj soj chrej chi'ii yo' ei. Se taj, ne ra'yan̄j cuchì 'un̄j rihaan soj, ne

nīcaj 'un̄j neê espadá nuu tu'vaj cun̄j 'un̄j gā nij soj adon̄j. <sup>17</sup> Sese taj yu'uj xrée soj, nē nō xcúún soj cun̄o soj nanā nihánj nanā taj xna'an̄j Nimán Dios̄e rihaan̄ nij síí amán rá ni'yaj manj nē 'o 'o chuman' a. Rihaan síí 'yaj canaán ro', rque 'un̄j se cu'naj maná se 'nij yuve chá so', nē caxrii 'un̄j 'o yahij catzii ston so', nē quino naca 'o se-chuvii yo'o so' nīcaj síí qui'yaj canaán, nē dan me se taj a 'o síí ca'vee nayaá nanā yo' a ma'. Maan se orún' síí nīcaj yahij catzii yo' me síí quene'en me taj yo' nanj adon̄j." Veé danj síj nanā cachron̄ so' ca'nej so' rihaan̄ nij síí amán rá ni'yaj manj nē chuman' Pérgamo a —taj so' rihanj a.

*Nanā nihánj me nanā ca'an̄j rihaan̄ nij síí amán rá ni'yaj man Jesucristó nē chuman' Tiatira a*

<sup>18</sup> Gaa nē cataj uún so' rihanj a:

—Gaa nē cachron̄ so' nanā nihánj nē ca'nej so' rihaan̄ nij síí amán rá ni'yaj manj nē chuman' Tiatira a: “Dan me se nanā nihánj me nanā ca'mii 'un̄j ta'nij Dios̄e cun̄o soj, nē 'un̄j ro', ase vaa ya'an vaa rlii rihanj, nē ase vaa aga' bronce maree vaa tacó j a. <sup>19</sup> Ne'én 'un̄j daj 'yaj nij soj se vaa 'ee rá soj tinúú soj nē yo'o amán rá soj ni'yaj soj manj nē 'yaj suun soj che'é tinúú soj nē yo'o nucuj vaa nimán soj rihaan̄ sayuun a. Dan me se doj a 'yaj suun soj yaj adon̄j. Gaa guun che'e soj canoco' soj manj me se doj doj 'yaj suun soj nda' rá se 'yaj soj yaj ei. <sup>20</sup> Tzaj nē vaa cacun' tumé soj rihanj se vaa a'vej rá soj cayáan chanā cu'naj Jezabel gā soj a. Nē no' me níí taj se vaa chanā nata' se-nanā Dios̄e me no', nē tucu'yón no' man yuvii, nē tiha' yu'unj no' man nij síí 'yaj suun rihaan̄ ma'an̄j ei. Ndaa síj, gaa nē 'yaj nij so' cacun' gā chanā nē chá nij so' rasuun rque níi rihaan̄ ya'an̄j cacó j nii uún adon̄j. <sup>21</sup> Nē ca'ne' raj cach̄en doj güii che'é rej guun raj se vaa canicaj nimán no' nē tanáj no' chrej chi'ii nē canoco' no' chrej sa' adon̄j. Tzaj nē na'vej rá no' canicaj rá no' nē tanáj no' se chi'ii 'yaj no'

ma'. <sup>22</sup> Che'é dan nihánj me se quiri'ij 'un̄j man no' rihaan̄ chruun camá, nē nij síí qui'yaj cacun' gā no' ro', quiran' uxrá nij so' sayuun, qui'yáj adon̄j. Danj quiran' nij so' sese se canicaj nimán nij so' nē se tanáj xcō nij so' se vaa 'yaj nij so' gā no' ei. <sup>23</sup> Nē yo'o cavi' ta'nii chanā yo', qui'yáj, gaa nē quene'en cunudan̄j nij síí amán rá ni'yaj manj nē 'o 'o chuman' se vaa 'un̄j me síí acaj ndo'o cuentá daj vaa raá yuvii do', daj vaa nimán yuvii do', nē naru'vee 'un̄j rihaan̄ 'o 'o nij soj che'é se vaa 'yaj 'o 'o nij soj chuguan̄j.

<sup>24</sup> ”Nē nihánj me se ca'mii 'un̄j rihaan̄ yo'ó nij soj sij man̄ chuman' Tiatira sij nē noco' tucuáan̄ chi'ii yo' a. 'O se tucuáan̄ sca' yuve ndo'o me tucuáan̄ noco' yo'ó nij so', rá ma'an̄ nij so', tzaj nē se-tucuan̄j Satanás me yo' rihaan̄ soj, nē nē nari' soj tucuáan̄ yo' a ma'. Dan me se taj che'é cuta' 'un̄j doj suun xráa soj a ma'. <sup>25</sup> Maan se yo'o noco' soj tucuáan̄ nicaj soj ndaa se quisij güii cuch̄i' 'un̄j rihaan̄ soj ei. <sup>26</sup> Nē síí 'yaj canaán yo'o 'yaj suun suun ca'né' 'un̄j rihaan̄ ndaa se cuch̄i' 'un̄j rihaan̄ soj ro', guun chij so' rihaan̄ nij chuman' na'vej rá canoco' manj, qui'yáj adon̄j. <sup>27</sup> Nē nīcaj so' vará aga' hierró, nē tumé so' man nij so', nē dan me se ndaa rá se vaa 'yaj nii gaa uxra' nii xruj ro', danj gaa qui'yaj síí guun chij yo' chuguan̄j. <sup>28</sup> Dan me se ase vaa guun chij ma'an̄j qui'yaj Réj Dios̄e ro', danj gaa guun chij so', nē rque 'un̄j yati' xta'ngaa urihan̄j rej nichrun' rá ranga' rihaan̄ so' adon̄j. <sup>29</sup> Sese taj yu'uj xrée soj, nē nō xcúún soj cun̄o soj nanā nihánj nanā taj xna'an̄j Nimán Dios̄e rihaan̄ nij síí amán rá ni'yaj manj nē 'o 'o chuman' a.” Veé danj síj nanā cachron̄ so' ca'nej so' rihaan̄ nij síí amán rá ni'yaj manj nē chuman' Tiatira a —taj so' rihanj a.

### 3

*Nanā nihánj me nanā ca'an̄j rihaan̄ nij síí amán rá ni'yaj man Jesucristó nē chuman' Sardis a*



1 Gaa ne cataj uún so' rihanj a:

—Nana nihánj me nana cachron so' ca'nej so' rihaan nij sí amán rá ni'yaj manj ne chuman' Sardis a: “Dan me se nihánj me nana ca'mii 'unj sij nicaj Nimán Diose do', chij nij yati' do', rihaan soj sij man chuman' Sardis, ne Nimán Diose ro', vaa guee so', ne chij ya se nucuaj nicaj so' a. Ne'én 'unj daj 'yaj nij soj, ne dan me se sí vaa i'na' ya nimán me soj, rá yuvi, tzaj ne ase vaa sí cavi' nimán vaa soj rihanj nanj adonj. 2 Dan me se narij soj nej rihaan soj ruguanj. Tumé soj man ma'an soj, ne ca'nej soj se nucuaj nimán tinúú soj nij sí daj doj cavi' nimán á. 'O se xcaj 'unj cuentá se vaa nu' se 'yaj soj, nuveé se aran' rá Diose me nij yo' ma'. Tadó soj ei.

3 ”Che'é dan nanuj rá soj nana tucu'yón nii man soj do', nana cuno soj do', ne yo'o qui'yaj soj ndaa vaa taj nana yo', ne canicaj nimán soj canoco' soj chrej sa' ei. Sese se tumé soj man soj, ne ase vaa 'na' sí ituu ro', danj gaa cuchij rihaan nij soj, ne se quene'en uxrá soj me orá me cuchij rihaan soj man adonj. 4 Tzaj ne man ta'aj tuvi' soj sij man chuman' Sardis ne qui'yaj cacun' mei. Ne che'é dan ase vaa sí nuu yatzij naruvii ro', danj vaa nij so' cuano rihanj chuguanj. Ne nij so' ro', vaa güii cunuû nij so' yatzij catzii, ne cachee nij so' gaj adonj. 'O se no xcúún nij so' qui'yaj nij so' danj adonj. 5 Dan me se cunudanj nij sí 'yaj canaán ro', vaa güii rque nii yatzij catzii cunuû so', ne daj chihaa míj se tirí 'unj se-chuvii so' no rihaan yanj no se-chuvii nij sí gaa i'na' ga Diose nu' cavii nu' ca'anj ma'. Ne nata' 'unj rihaan Réj Diose, rihaan nij se-mozó so' do', se vaa me nij so' sí noco' manj adonj. 6 Sese taj yu'uj xrée soj, ne no xcúún soj cuno soj nana nihánj nana taj xna'anj Nimán Diose rihaan nij sí amán rá ni'yaj manj ne 'o 'o chuman' a.” Veé danj síj nana cachron so' ca'nej so' rihaan nij sí amán rá ni'yaj manj ne chuman' Sardis a —taj so' rihanj a.

*Nana nihánj me nana ca'anj rihaan nij sí amán rá ni'yaj man Jesucristó ne chuman' Filadelfia a*

7 Gaa ne cataj uún so' rihanj a:

—Nana nihánj me nana cachron so' ca'nej so' rihaan nij sí amán rá ni'yaj manj ne chuman' Filadelfia a: “Dan me se nihánj me nana ca'mii 'unj sij vaa sa' inanj sij ca'née ya Diose rihaan chumii cuno soj a. Ne 'unj ro', me sí uun chij ndo'o ndaa vaa guun chij sí cu'naj David gaa naá adonj. Dan me se sese ca'núj 'unj ta'yaa, ne taj sí quisij naráán ta'yaa yo' ma'. Ne sese caráán 'unj ta'yaa, ne taj sí quisij ca'nuu uún ta'yaa yo' ma'. 8 Dan me se aj ne'én 'unj daj 'yaj nij soj a. Ne nihánj me se xcaj soj cuentá se vaa aj ca'núj 'unj ta'yaa rej rihaan soj, ne taj sí quisij naráán ta'yaa yo' ma'. Ne nij soj me se nda' se nuveé sij nucuaj ndo'o nimán me soj, tzaj ne yo'o 'yaj soj se-nanaj, ne ne cataj soj se vaa nuveé sij noco' manj me soj ma'. Yo'o taj soj se vaa sij noco' manj me soj adonj. 9 Ne vaa nij sí tu'va rma'an se vaa sij israelitá me nij so', tzaj ne nuveé sij israelitá ya me nij so' ma'. Maan se sí ne me nij so', ne sí tucu'yón se-nana Satanás me uún nij so' ei. Dan me se nagoj man nij so' rihaan soj, ne cuchí' nij so' rihaan soj, ne canicun' ruj nij so' rihaan soj, ne quene'en nij so' se vaa sij cunuu 'ee raj man me soj adonj. 10 Che'é se aj qui'yaj soj nu' se-nanaj nana taj se vaa no xcúún soj gaa nucuaj nimán soj rihaan sayuun ro', che'é dan tinanii 'unj man soj rihaan sayuun ca'na' rihaan nu' chumii nihánj vaa güii, asa' xcaj 'unj cuentá daj vaa nimán cunudanj nij yuvi man rihaan chumii adonj.

11 ”Dan me se daj doj cuchij rihaan soj chuguanj. Nicaj raan soj tucuaán nicaj soj, gaa ne se ca'vee ca'nee nii cachriin cunuû raaj soj cachriin qui'yaj canaán soj rihaan soj ei. 12 Ne sí qui'yaj canaán ro', me se ase vaa 'o chraan xcaan nicun' tacóo nuví noco' rej na'víj yuvi rihaan Diose ro', danj gaa so' rihanj, qui'yaj,

ne se curihanj uún so' rej né 'un̄j ma'. Ne rihaan so' ro', cachron 'un̄j va'n̄uj nana, ne dan me se cachron 'un̄j se-chuv̄ii Diose síi noco' 'un̄j, ne cachron 'un̄j se-chuv̄ii chuman' ne Diose noco' 'un̄j chuman' cu'n̄aj chuman' Jerusalén chuman' naca nan̄ij rihaan chum̄ii nihánj, ne cachron 'un̄j se-chuv̄ii ma'an̄j nana naca ya cachron 'un̄j rihaan so' adonj. <sup>13</sup> Sese taj yu'uj xrée soj, ne no xcúún soj cun̄o soj nana nihánj nana taj xna'an̄j Nimán Diose rihaan nij síi amán rá ni'yaj manj ne 'o 'o chuman' a." Veé danj síj nana cachron so' ca'nej so' rihaan nij síi amán rá ni'yaj manj ne chuman' Filadelfia a —taj so' rihanj a.

*Nana nihánj me nana ca'an̄j rihaan nij síi amán rá ni'yaj man Jesucristó ne chuman' Laodicea a*

<sup>14</sup> Gaa ne cataj uún so' rihanj:

—Nana nihánj me nana cachron so' ca'nej so' rihaan nij síi amán rá ni'yaj manj ne chuman' Laodicea a: “Dan me se nana nihánj me nana ca'mii 'un̄j sij qui'yaj nu' nana cataj xna'an̄j 'un̄j rihaan soj a. Dan me se 'un̄j me síi nata' ya se-nana Diose rihaan soj ndaa vaa me rá Diose qui'yáj, ne 'un̄j me síi qui'yaj nu' se man rihaan chum̄ii nihánj ei. Ne qui'yáj nu' se vaa me rá Diose qui'yáj ei. <sup>15</sup> Dan me se ne'enj nu' se vaa 'yaj soj, ne nuveé se acoj ne nuveé se ya'aan me soj mei. Ca'vee doj a sese guun soj se acoj inanj ni', ase se ya'aan inanj ni' a. <sup>16</sup> Dan me se che'é se ase vaa na guun vaa soj ne nuveé se acoj nuveé se ya'aan nuveé me soj, ne che'é dan ne se uun soj rihanj ma'. Dan me se maan che'é se danj vaa soj ro', che'é dan ticamanj man soj rihaan yo'óo nanj adonj. <sup>17</sup> Dan me se taj soj se vaa ru'vee inanj soj, ne taj vaj a doj rasuun ne achiin rihaan soj, rá soj a. Tzaj ne ne ne'en soj sese ase vaa síi nique ndo'o vaa soj, ne ase vaa síi achiin caridad rihaan vaa soj, ne ase vaa tuchrii vaa soj, ne ase vaa síi canj nuvi' sagan' ro', vaa nu' soj nanj adonj.

<sup>18</sup> “Che'é dan narquej rej nucuañ man soj se vaa quiraan soj aga' oró míi rihanj aga' cachén ya'an ne cunuu sa' inanj, gaa ne ca'vee cunuu ru'vee ya ya soj rihanj ei. Ne quiraan soj yatzij catzii rihanj, ne ca'vee cunuú soj, ne se quene'en yuvii se vaa nuvi' sagan' soj ne se guun na'aj soj se vaa nuvi' sagan' soj ma'. Ne quiraan soj rmedió sa' rihanj, ne caxrii soj rlii rihaan soj, gaa ne ca'vee quene'en soj, ne xcaj sa' soj cuentá ei. <sup>19</sup> Dan me se 'un̄j ro', taj xna'an̄j 'un̄j rihaan nu' nij síi 'ee raj man daj qui'yaj nij so', ne qui'yáj sayuun man nij so' sese se cuno nij so' rihanj chuguanj. Che'é dan guun niha' rá soj cun̄o soj rihanj, ne canicaj nimán soj canoco' soj chrej sa' doj á. <sup>20</sup> Nihánj me se ase vaa 'o síi nicun' ta'yaa ne tica'mii ta'yaa ro', vaa 'un̄j a. Ne sese vaa yo'o so' cun̄o se-nan̄aj, ne sese ca'nuu so' ta'yaa, ne catuu 'un̄j rihaan so', ne chaj chraa ga so', ne so' cha chraa ga 'un̄j, ne ve'é qui'yaj núj ei. <sup>21</sup> Ne síi qui'yaj canaán ro', cayáan so' rihaan xrúún 'un̄j chruun xlá sa' ga 'un̄j, ne guun chij so' gaj, qui'yáj, ndaa vaa qui'yaj Réj Diose gaj ei. Dan me se gaa qui'yaj canaán ma'an̄j, ne cayáan 'un̄j rihaan xrúún Réj Diose chruun xlá sa' ga so', ne guun chij 'un̄j ga so', qui'yaj so' chuguanj. <sup>22</sup> Sese taj yu'uj xrée soj, ne no xcúún soj cun̄o soj nana nihánj nana taj xna'an̄j Nimán Diose rihaan nij síi amán rá ni'yaj manj ne 'o 'o nij chuman' adonj.” Veé danj síj nana cachron so' ca'nej so' rihaan nij síi amán rá ni'yaj manj ne chuman' Laodicea a —taj so' rihanj a.

## 4

*Nana nihánj taj xna'an̄j se vaa quene'en Juan ma'an̄j chruun xlá sa' rej uun chij Diose a*

<sup>1</sup> Quisij ca'mii so' nu' nana dan, gaa ne quene'en 'un̄j 'o ta'yaa taj ya'núj rej xta' a. Gaa ne cunó 'un̄j ca'mii uún síi ca'mii asino yaan rihanj, ne se-nana so' ro', daj se uun rá' unó'

a'yánj nii chruun a'yánj ro', danj guun raj gaa cunoj se-nana so' a. Ne cataj so' rihanj a:

—Cavij so' ca'na' so' nihánj, gaa ne tihanj rihaan so' nu' se vaa guun rej rihaan so' á —taj so' rihanj a.

<sup>2</sup> Ne ra'yanj quene'en nimanj rasuun, ne quene'enj chruun xlá sa' ndo'o rej xta', ne vaa síj taj chruun xlá yo' síj uun chij ndo'o, <sup>3</sup> ne ase vaa yahij jaspe do', ase vaa yahij cornalina do', danj vaa so' curuvi' so' a. Ne ase vaa xcuáa cu'lúu ro', danj vaa nu' anicaj chruun xlá sa' yo', ve'é chuguun yo', ne ase vaa chuguun yahij esmeralda ro', danj vaa chuguun yo' a. <sup>4</sup> Ne nu' anicaj chruun xlá sa' yo' ro', nicun' yo'ó ico ca'anj chruun xlá sa', ne taj ico ca'anj síj uun chij rihaan nij chruun xlá sa' yo', ne nuu nij síj uun chij yatzij catzij, ne nuu raaj nij so' cachriin aga' oró míj a. <sup>5</sup> Ne rej nicun' chruun xlá nicun' tanuu tuvi' me se raan ndo'o, ne cariin ndo'o, ne caguáj ndo'o tu'vii a. Ne chij aga' chuguun táa ya'an ro', nicun' rihaan chruun xlá sa', ne chij aga' chuguun yo' ro', me Nimán Diose síj guee inanj síj nicaj chij ya se nucuaj a. <sup>6</sup> Ne rej rihaan chruun xlá sa' yo' ro', nuu 'o na ya'anj, tzaj ne nuveé na ya me yo' ma'. Maan scuraan inanj me yo', ne ase vaa yahij cristal danj vaa yo' a.

Ne nu' anicaj chruun xlá sa' yo' ne tanuu yo'ó nij chruun xlá me se nicun' ca'anj xcuu, ne nu' anicaj man nij xcuu man rlij rihaan nij xo' a. <sup>7</sup> Ne yo'ó xcuu ro', ase vaa chuvaá vaa xo' a. Ne xcuu vij ro', ase vaa scúj le'ej vaa xo' a. Ne xcuu va'nuj ro', ase vaa rihaan snó'o vaa rihaan xo' a. Ne xcuu ca'anj ro', ase vaa xtaa vaj rej xta' vaa xo' a. <sup>8</sup> Ne vaa vatan' scachee 'o 'o nij xo' taj xraá nij xo', ne ase vaa scachee xtâj vaa scachee nij xo' yo' a. Ne nu' xraá xo' nu' rque xo' nu' man rlij rihaan xo' adonj. Ne nuvii nigan' me se ne a'ne' rá nij xo' ga suun taj: “Sij guee ndo'o me Diose síj 'nij ra'a man ní' síj uun nucuaj 'yaj cunudanj a. Ne so' me síj nicun' yaj, ne asij

naá nicun' so', ne vaa güii cuchí' so' rihaan chumiij a”, taj ca'anj nij xcuu yo' a. <sup>9</sup> Ne gaa ca'mii sa' nij xcuu che'é Diose síj taj rihaan chruun xlá sa' yo' síj cayáan nu' cavii nu' ca'anj, ne gaa nago' nij xo' graciá rihaan so', <sup>10</sup> ne canicun' ruj ico ca'anj nij síj uun chij yo' rihaan síj taj rihaan chruun xlá sa' yo', ne quina'vij nij so' rihaan so', che'é rej me so' síj cayáan nu' cavii nu' ca'anj, ne tagüej nij so' cachriin nuu raaj nij so' rej rihaan chruun xlá sa' yo' a. Gaa ne cataj nij so':

<sup>11</sup> —No xcúun ndo'o so' Diose sij 'nij ra'a man núj ca'mii sa' núj che'é so' ne guun chij ndo'o so' á. 'O se so' me síj qui'yaj cunudanj rasuun, ne maan che'é se guun rá so' cumán nij rasuun yo' ro', che'é dan guun cunudanj nij rasuun, qui'yáa so' adonj —taj ico ca'anj nij síj uun chij yo' rihaan Diose a.

## 5

*Nana nihánj taj xna'anj che'é yanj do', che'é matzinj le'ej no xcúun nuxra' yanj do' a*

<sup>1</sup> Ne rej nuva' síj taj rihaan chruun xlá sa' yo' ro', quene'enj 'o yanj, ne no nana nu' rej rque yanj nu' rej xraj yanj nu' a. Ne no chij selló yánj tu'va yanj yo', ne aráan selló yo' nu' anicaj tu'va yanj yo' a. <sup>2</sup> Gaa ne quene'en 'unj yo'ó se-mozó Diose síj nucuaj ndo'o, ne nucuaj ndo'o xná'anj so', cataj so', ne:

—Me síj no xcúun ca'nee nij selló no aráan tu'va yanj ne nuxra' so' yanj ga —taj so', xná'anj so' a.

<sup>3</sup> Ne taj vaj a 'o síj ne rej xta' do', síj ne rihaan chumiij do', síj ne rej rque chumiij do', guun nucuaj nuxra' yanj ne ni'yaj so' yanj yo' a ma'. <sup>4</sup> Che'é dan ta'vee uxraj che'é se ne nari' nii man a 'o síj ni'yanj nimán nuxra' yanj yo' ni'yaj man yanj yo' a man adonj. <sup>5</sup> Gaa ne yo'ó tuvi' nij síj uun chij cataj rihanj a:

—Se ta'veé so' ma'. Xcaj so' cuentá, ne aj qui'yaj canaán síj chuvaá ta'nii ta'nij si'no síj cu'naj Judá síj cayáan gaa naá, ne yo'ó ta'nii ta'nij si'no

David me uún so', ne che'é dan ca'vee ca'nee so' chij nij selló nō tu'va yanj ne nuxra' so' yanj yo' nanj adonj —taj so' rihanj a.

<sup>6</sup> Gaa ne quene'én 'unj se vaa tanuuj nij chruun xlá sa' do', tanuuj ca'anj nij xcuu do', tanuuj nij sí uun chij do', nicun' 'o matzinj le'ej, ne matzinj aj ticavi' nii man asij rque me yo' a. Ne chij cúu taj raa xo', ne chij nij rlij rihaan xo', ne nij rlij rihaan xo' ro', nij yo' me Nimán Diose sí guee inanj sí nicaj chij ya se nucuaj sí aj ca'neé Diose rihaan nu' chumij a. <sup>7</sup> Dan me se cuchí' xo' rihaan sí taj rihaan chruun xlá sa' yo', ne quita'aa xo' yanj oro' ra'a sí taj rihaan chruun xlá rej nuva' so' a. <sup>8</sup> Ne gaa quita'aa xo' yanj, ne canicun' ruj ca'anj nij xcuu do', ico ca'anj nij sí uun chij do', rihaan matzinj le'ej yo' a. Ne nicaj 'o 'o nij so' ya'anj sa' do', co'oo aga' oró míi caraa squí xlá rque do', ne squí xlá yo' ro', me nij nana achíin ni'yaj nij sí sa' nocó' man Diose rihaan ma'an Diose a. <sup>9</sup> Gaa ne achráá nij so' chra' naca rihaan matzinj le'ej, cataj nij so', ne:

—Nō xcúún so' nicaj so' yanj ne ca'nee so' selló yánj aráán nō tu'va yanj yo' á. 'O se ticavi' nii mán so', ne dan me se nicaj so' ton mán so' quiránj so' man 'o 'o nij yuvij man rihaan chumij nihánj, ne dan me se quiránj so' man nij yuvij a'mii nu' yo'ó xna'anj, ne quiránj so' man nij yuvij man daj a chuman' man daj a yo'óo nocoo do', quiránj so' che'é Diose á. <sup>10</sup> Gaa ne guun chij Diose rihaan nij so', qui'yáá so', ne guun nij so' xrej nuu rihaan Diose, qui'yáá so', ne vaa güii guun chij nij so' rihaan chumij adonj —taj chra' achráá nij so' a.

<sup>11</sup> Gaa ne quene'en uún 'unj, ne cunó 'unj se-nana que'ee mij mij se-mozó Diose nicun' nu' anicaj chruun xlá sa' do', nij xcuu do', nij sí uun chij do' a. <sup>12</sup> Ne nucuaj ndo'o ca'mii nij se-mozó Diose yo', cataj nij so' a:

—Nō xcúún ndo'o matzinj le'ej ticavi' nii man guun nucuaj ndo'o so' do', nicaj so' nu' rasuun sa' do', cavij ndo'o raa so' do', ca'mii sa' taran' ní che'é so' do', guun chij ndo'o so' do' adonj —taj nij se-mozó Diose ni'yaj nij so' matzinj le'ej yo' a.

<sup>13</sup> Gaa ne cunó 'unj se vaa ca'mii cunudanj nij rasuun qui'yaj Diose rasuun man rej xta' do', rasuun man rihaan chumij do', rasuun man rque chumij do', rasuun man rihaan na ya'anj do', rasuun man rque na ya'anj do' a. Ne cataj nij rasuun:

—Rihaan sí taj rihaan chruun xlá sa' do', rihaan matzinj le'ej do', ca'mii sa' taran' ní' nu' cavij nu' ca'anj, ne guun chij roj so' nu' cavij nu' ca'anj ei —taj cunudanj nij rasuun a.

<sup>14</sup> Gaa ne:

—Veé danj gaa ya ei —taj ca'anj nij xcuu yo' a.

Gaa ne canicun' ruj nij sí uun chij, ne na'vúj nij so' rihaan Diose a.

## 6

*Nana nihánj taj xna'anj se vaa ca'neé matzinj le'ej chij nij selló yánj caráán tu'va yanj yo' a*

<sup>1</sup> Gaa ne quene'én 'unj se vaa ca'neé matzinj le'ej yo' yo' o' tuvi' nij chij selló caráán tu'va yanj libró yo', gaa ne cunoj ca'mii yo' o' tuvi' ca'anj nij xcuu, ne ase uun rá' gaa aguáj tu'vii ro', danj guun raj gaa ca'mii xo' a. Ne:

—Cuvá' so' ni'yaj so' ei —taj xcuu yo' a.

<sup>2</sup> Gaa ne quene'én 'unj se vaa cavij 'o cuayó catzii, ne sí taj xráá cuayó yo' ro', nicaj so' curuvej, ne rqué nii cachriin cunuú raa so' man so', ne sij 'yaj canaán ndo'o me so', ne cavij so' qui'yaj canaán so' a.

<sup>3</sup> Ne gaa ca'neé matzinj le'ej selló vij nō tu'va yanj yo', ne cunó 'unj ca'mii xcuu vij a. Ne xcuu vij cataj:

—Cuvá' so' ni'yaj so' ei —taj xo' a.

<sup>4</sup> Gaa ne cavij yo'ó cuayó, ne cuayó maree me xo' a. Gaa ne ca'ne' nii suun rihaan sí taj xráá cuayó yo' se vaa quisij cayáán dínj yuvij rihaan chumij, qui'yaj so', ne ticavi' ndo'o



yuvii tuvi' yuvii, qui'yaj so' a. Ne rque nii 'o neê espadá xij rihaan so' a.

<sup>5</sup> Gaa ne gaa ca'néj matzinj le'ej selló va'nuj, gaa ne cunoj ca'mii xcuu va'nuj a. Ne cataj xo':

—Cuva' so' ni'yaj so' ei —taj xo' a.

Gaa ne quene'enj se vaa cavii cuayó maruu, ne síj taj xráa cuayó ro', 'nij ra'a so' aga' romaná aga' a'née ta'nga' nij rasuun a. <sup>6</sup> Gaa ne cunó 'unj nana cavii rej tanuu ca'anj nij xcuu, ne nana yo' cataj:

—Nu' sa'anj 'yaj canaán yuvii rque 'o güii ro', nu' yo' me quino vij kiló 'núú trigó do', vatan' kiló 'núú cebada do', qui'yáa so' á. Tzaj ne se tiri' so' casté chá do', na vinó do' ma' —taj nana yo' a.

<sup>7</sup> Gaa ne gaa ca'néj matzinj le'ej yo' selló ca'anj no tu'va yanj me se cunó 'unj ca'mii xcuu ca'anj yo' a. Ne cataj xo':

—Cuva' so' ni'yaj so' ei —taj xo' a.

<sup>8</sup> Gaa ne quene'én 'unj, ne dan me se cavii cuayó daj, ne síj taj xráa cuayó daj ro', ta'naj 'yaj avi' yuvii cu'naj so', ne rej xco so' ro', noco' rej ca'anj nij síj cavi' a. Gaa ne ca'ne' nii suun rihaan roj so' se vaa guun chij roj so' rihaan 'o ta'aj nij yuvii man rihaan chumii, ne nicaj roj so' neê espadá nicaj roj so' x'naa na'aan rque nicaj roj so' chi'ii yuvaa nicaj roj so' xcuu quij nicaj roj so', ticavi' roj so' man nij yuvii yo' a.

<sup>9</sup> Gaa ne gaa ca'néj matzinj le'ej selló 'un' no tu'va yanj yo', ne quene'én 'unj rej rque mesá altar, ne rque mesá altar me se naj nij nimán nij síj cavi' che'é se-nana Diose che'é yan nata' nij so' nana ya rihaan yuvii a. <sup>10</sup> Ne nucuaj ndo'o aguáj nij so', cataj nij so', ne:

—Ndaa me güii ca'ne' so' cacun' che'é nij síj man rihaan chumii, ne qui'yáa so' sayuun man nij so' che'é ton cayanj man núj qui'yaj nij so' ga. 'O se so' me síj vaa sa' inanj, ne síj uun chij ya rihaan núj mé so' á —taj nij nimán, aguáj nij so' a.

<sup>11</sup> Gaa ne rque nii yatzíj xcaan catzii rihaan 'o 'o nij so', gaa ne cataj

xna'anj nii rihaan nij so' se vaa gaa inaj nimán nij so' doj ndaa se quisij cavi' nu' nij tinúú nij so' síj 'yaj suun ga nij so' síj cavi' ndaa vaa cavi' ma'an nij so' a.

<sup>12</sup> Gaa ne quene'én 'unj se vaa ca'néj matzinj le'ej yo' selló vatan' no tu'va yanj yo', gaa ne cachén ndo'o yuún, ne guun maruu rihaan güii, ne nda' rá se vaa maruu yatzíj maruu ro', danj vaa güii a. Ne ase vaa ton ro', danj vaa rihaan yavii a. <sup>13</sup> Ne cayuu nij yati' man xta' rihaan yo'óó, ne nda' rá se vaa ayuu chruj higó rihaan yo'óó gaa o' nana yuvaa raá chruun man chruj higó ne tinasqui' ndo'o nana raá chruun yo' ro', danj vaa ayuu yati' a. <sup>14</sup> Ne quixra' rej xta', ne ase vaa yanj gaa nacué nii yanj ro', danj guun rej xta' yo' a. Ne nasqui' nu' quij nu' yo'óó taj rihaan na ya'anj do' a. <sup>15</sup> Gaa ne dan me se nij síj nicaj suun do', nij síj sa' do', nij síj uun chij rihaan tanuu do', nij síj ru'vee do', nij síj nucuaj do', nu' nij mozó do', nu' nij síj ne uun mozó do', catúj yuve nij so' rque yu'uj yuvej do', rque nij yuvej naj quij do' a. <sup>16</sup> Gaa ne cataj nij so' rihaan nij quij rihaan nij yuvej rihaan:

—Cayuu nij soj xráa núj, ne caxrii yuve soj man núj, ne se gaa nanj quene'en síj taj rihaan chruun xlá sa' yo' man núj, ne se caxrij yuvaa matzinj le'ej yo' man núj ruguanj. <sup>17</sup> 'O se aj quisij güii guee güii caxrii yuvaa roj so' man núj, ne se quisij rá núj canicun' núj a ma' —taj nij so' rihaan quij do', rihaan yuvej do' a.

## 7

*Nana nihánj taj xna'anj che'é nij síj israelitá cata' ta'nga' caan rihaan che'é Diose a*

<sup>1</sup> Veé dan, gaa ne quene'én 'unj ca'anj se-mozó Diose nicun' ca'anj nij scúj chumii nihánj, ne caráán nij so' chrej rihaan ca'anj nij nana avii rihaan chumii, se cavii nij nana rihaan yo'óó rihaan na ya'anj rihaan a doj chruun rihaan a. <sup>2</sup> Ne ca'anj

nij se-mozó Diose ro', aj ca'ne' Diose suun rihaan nij so' qui'yaj nij so' sayuun man yo'óo do', man na ya'anj do' a. Dan me se quene'én 'unj yo'ó se-mozó Diose cavii rej síj güii, ne nicaj so' selló no se-ta'nga' Diose a. Dan me se caguáj so' rihaan ca'anj nij se-mozó Diose, cataj so', ne:

<sup>3</sup> —Se guun qui'yaj soj sayuun man yo'óo do', man na ya'anj do', man chruun do' ma'. Ca'ne' rá soj doj tzin', ne ndaa quisíj cuta' núj ta'nga' caan rihaan nij síi 'yaj suun che'é Diose, ne ca'vee ei —taj so', caguáj so' a.

<sup>4</sup> Gaa ne cunó 'unj me daj nij so' cuta' nii ta'nga' caan rihaan, ne cientó táa yavíj chihaa ca'anj míj yuvii me nij so', ne síj man 'o 'o x'ne' nij yuvii israelitá me uún nij so' a.

<sup>5</sup> Dan me se chuvij míj nij so' me ta'níi ta'nij si'no síi cu'naj Judá a. Ne chuvij míj nij so' me ta'níi ta'nij si'no síi cu'naj Rubén a. Ne chuvij míj nij so' me ta'níi ta'nij si'no síi cu'naj Gad a. <sup>6</sup> Ne chuvij míj nij so' me ta'níi ta'nij si'no síi cu'naj Aser a. Ne chuvij míj nij so' me ta'níi ta'nij si'no síi cu'naj Neftalí a. Ne chuvij míj nij so' me ta'níi ta'nij si'no síi cu'naj Manasés a. <sup>7</sup> Ne chuvij míj nij so' me ta'níi ta'nij si'no síi cu'naj Simeón a. Ne chuvij míj nij so' me ta'níi ta'nij si'no síi cu'naj Leví a. Ne chuvij míj nij so' me ta'níi ta'nij si'no síi cu'naj Isacar a. <sup>8</sup> Ne chuvij míj nij so' me ta'níi ta'nij si'no síi cu'naj Zabulón a. Ne chuvij míj nij so' me ta'níi ta'nij si'no síi cu'naj José a. Ne chuvij míj nij so' me ta'níi ta'nij si'no síi cu'naj Benjamín a.

*Nana nihánj taj xna'anj che'é nij síi man 'o 'o chuman' a*

<sup>9</sup> Veé dan, gaa ne quene'én 'unj que'ee ndo'o yuvii, ne taj vaj síi guun nucuaj qui'yaj contá man nij yuvii a man chuguanj. Ne síi man cunudanj chuman' naj rihaan chumij me nij so', ne síi man 'o 'o x'ne' yuvii me nij so', ne síi a'mii nu' xna'ánj a'mii yuvii me uún nij so', ne dan me se canicun' nij so' rihaan chruun xlá sa' yo' do', rihaan matzinj le'ej yo' do' a.

Ne yatzíj xcaan catzii nuû nij so', ne oro' nij so' ra'a chruun yuun a. <sup>10</sup> Ne nucuaj ndo'o caguáj nij so', cataj nij so', ne:

—Diose síi noco' ní' man síi taj rihaan chruun xlá sa' do', matzinj le'ej do', me roj síi tinanii man ní' rihaan sayuun adonj —taj nij so' a.

<sup>11</sup> Gaa ne cunudanj nij se-mozó Diose ro', canicun' nij so' nu' anicaj xruún Diose chruun xlá sa' do', nij síi uun chij do', ca'anj nij xcuu do', gaa ne canicun' ruj nij so' rihaan chruun xlá sa' yo', ne toco' nij nij so' rihaan nij so' rihaan yo'óo, ne na'víj nij so' rihaan Diose a. <sup>12</sup> Ne cataj nij so':

—Veé danj gaa ya ei. Ve'é inanj ca'mii ní' rihaan Diose síi noco' ní' man nu' cavii nu' ca'anj á. So' me síi avii ndo'o raa, ne nago' ní' graciá rihaan so', ne so' me síi nucuaj ndo'o nu' cavii nu' ca'anj adonj. Veé danj gaa ya ei —taj nij so' ni'yaj nij so' Diose a.

<sup>13</sup> Gaa ne xná'anj yo'o tuvi' nij síi uun chij manj, cataj so':

—Ne nij síi nuu yatzíj xcaan catzii ro', me síj me nij so', ne me rej cavii nij so', rá so' ga —taj so', xná'anj so' manj a.

<sup>14</sup> Gaa ne cataj 'unj rihaan so' a:

—Ne ne'én 'unj me síi me nij so', man señor. Tzaj ne so' me síi ne'en, raj a —taj 'unj rihaan so' a.

Gaa ne cataj so' rihanj a:

—Nij síi nihánj ro', me nij síi cachén rihaan que'ee ndo'o sayuun, gaa guun sayuun noco' rihaan chumij adonj. Ne cavi' matzinj le'ej che'é nij so', ne cayanj ton man matzinj le'ej che'é nij so', ne canoco' nij so' man matzinj le'ej, ne che'é dan naruvii sagan' nij so', ne cunuú catzii sagan' nij so', qui'yaj ton cayanj man matzinj le'ej adonj. <sup>15</sup> Che'é dan me nicun' nij so' rihaan xruún Diose chruun xlá sa', ne nuvíi nigan' nicun' nij so' rá nuvíi noco' ne rej xta' 'yaj suun nij so' rihaan Diose, ne Diose síi taj rihaan chruun xlá sa' yo' ro', ma'an so' cayáán ga nij so', ne caráán so' rihaan sayuun che'é nij so' a. <sup>16</sup> Ne

daj chihaa míj se quina'aan uún rque nij so' do', se canacoo nij so' na do', se go' naán xráá nij so' do', se cunuû cachi' rá nij so' do', a ma'. <sup>17</sup> 'O se ma'an matzinj le'ej nicun' ma'an rej rihaan chruun xlá sa' yo' ro', cutumé man nij so', ne ca'anj nicaj so' man nij so' rej xra' na sa', ne co'lo nij so', gaa ne yo'lo gaa i'na' nimán nij so', qui'yaj na yo' a. Ne ma'an Diose ro', me sí tñnacoo na ayanj rihaan nij so' ei —taj síi uun chij yo' rihanj a.

## 8

*Nana nihánj taj xna'anj che'é selló yánj chij do', che'é aga' nuu squíi do' a*

<sup>1</sup> Gaa ne gaa ca'néj matzinj le'ej selló chij no tu'va yanj yo', gaa ne yuun che'e cunuu dínj rej xta' 'o yanéj orá a. <sup>2</sup> Gaa ne quene'én 'unj chij nij se-mozó Diose nij síi nicun' rihaan Diose, se vaa rqué nii chij chruun a'yánj rihaan nij so' a. <sup>3</sup> Gaa ne ca'na' yo'lo se-mozó Diose uún, ne canicun' so' rihaan mesá altar aga' oró míi nicun' rihaan xruún Diose chruun xlá sa' a. Ne noco' ra'a so' aga' acaa squíi, ne aga' oró míi me aga' yo' a. Gaa ne rqué ndo'o nii squíi man so' che'é rej ricatze' so' squíi rihaan mesá altar che'é nij síi vaa sa' rihaan Diose gaa achíin ni'yaj nij so' rihaan Diose a. <sup>4</sup> Gaa ne cavii yachruu squíi noco' ra'a se-mozó Diose yo' rihaan ma'an Diose, gaa cachíin ni'yaj nij so' rihaan Diose a. <sup>5</sup> Gaa ne dan me se ca'anj nicaj se-mozó Diose yo' aga' acaa squíi yo' rihaan mesá altar, gaa ne caraa ndo'o so' ru'vi' ya'an man rihaan mesá altar yo' rá aga', gaa ne tagüéj so' ya'an yo' rihaan chumij a. Gaa ne caguáj tu'vii, ne cariin ndo'o, ne quiraan ndo'o, ne cachén ndo'o yuún, qui'yaj se-mozó Diose yo' gaa tagüéj yo' squíi rihaan chumij a.

*Nana nihánj taj xna'anj daj guun gaa ca'yánj nij se-mozó Diose chij nij chruun a'yánj a*

<sup>6</sup> Gaa ne chij nij se-mozó Diose nicaj chij nij chruun a'yánj ro', yuun

che'e guun rá nij so' ca'yánj nij so' nij chruun a'yánj yo' a.

<sup>7</sup> Gaa ne ca'yánj yo'lo so' xruún so', gaa ne maan yahij do', ya'an do', nachej ga ton me se caman' yo' rihaan chumij a. Gaa ne cacaa nu' 'o va'nuj scuj yo'lo man rihaan chumij, ne cacaa 'o va'nuj scuj nij chruun nicun' rihaan chumij, ne nu' coj chrin' ya'lij cacaa uún a.

<sup>8</sup> Gaa ne ca'yánj se-mozó Diose mozó vij chruun a'yánj, gaa ne cayuu 'o ya'an xij rque na ya'anj a. Ne ase vaa quij xcaan vaa ya'an xij yo' a. Gaa ne 'o va'nuj scuj na ya'anj yo' ro', cunuu ton a. <sup>9</sup> Ne cavi' 'o xcuu rihaan daj a va'nuj xcuu man rque na ya'anj, ne quiril' 'o va'nuj scuj nij rihoo chéé rihaan na ya'anj, qui'yaj ya'an yo' a.

<sup>10</sup> Gaa ne ca'yánj se-mozó Diose mozó va'nuj chruun a'yánj, gaa ne cavii 'o yati' xij ndo'o rej xta', ne yati' yo' ro', ya'an inanj me yo', ne chuguun yo', ne adi' chuguun aga' taj ya'an raá ro', danj chuguun yo' a. Ne quiniy yati' yo' rque 'o va'nuj scuj nij chráá man rihaan chumij do', rque nij na yu'uj man rihaan chumij do' a. <sup>11</sup> Ne se-chuvii yati' yo' ro', me “yati' e”, ne cunuu e' nu' na quiniy yati' yo' rque, gaa ne cavi' que'ee yuvii, qui'yaj na e' yo', che'é se cunuu e' na yo', qui'yaj yati' a.

<sup>12</sup> Gaa ne ca'yánj se-mozó Diose mozó ca'anj chruun a'yánj, gaa ne quiran' chí'ii 'o va'nuj scuj rihaan güii do', 'o va'nuj scuj rihaan yavii do', 'o va'nuj scuj nij yati' do', ne dan me se yo'lo cunuu rmi' 'o va'nuj scuj nij yo', ne dan me se ne cuchuguun nij yo' 'o va'nuj scuj rej ranga' do', ne ne cuchuguun nij yo' 'o va'nuj scuj rej nij do', a ma'.

<sup>13</sup> Gaa ne quene'én 'unj, ne cunó 'unj caguáj yo'lo xtaa vaj tanuu rihaan risca' xta', ne dan me se cunó 'unj se vaa nucuaj ndo'o caguáj xtaa yo', taj xo', ne:

—Ai. Ai. Ai. Nique nij síi ne rihaan chumij che'é sayuun quiran' nij so' asa' quisj ca'yánj ya'núj nij se-mozó Diose síi nichrun' ca'yanj

chruun a'yánj á —taj xtaa, caguáj xo' a.

## 9

<sup>1</sup> Gaa ne ca'yánj se-mozó Diose mozó 'un' chruun a'yánj, gaa ne quene'én 'unj se vaa cavii yo' o yati' rej xtá' quiniy yo' rihaan yo'óo, gaa ne rqué nii raga' rihaan so' nuxra' so' tu'va yu'uj cunuú ndo'o rej man nij nana chree a. <sup>2</sup> Gaa ne nuxra' so' tu'va yu'uj cunuú ndo'o, gaa ne curihanj ndo'o catze' tu'va yu'uj yo', ne ase vaa catze' avii chrúún hornó xij ro', danj vaa catze' cavii tu'va yu'uj yo' a. Gaa ne caráán rihaan güii, ne guun rmi' rihaan chumii, qui'yaj catze' yo' a. <sup>3</sup> Gaa ne curihanj ndo'o rquíí rque catze' yo', ne ca'anj nij rquíí rihaan nu' chumii, gaa ne guun nucuaj nij rquíí yo' qui'yaj nij xo' ndaa vaa 'yaj nij xcuun, qui'yaj nii a. <sup>4</sup> Gaa ne cataj xna'anj nii rihaan nij xo' se vaa se qui'yaj sayuun nij xo' man coj chrin' do', man coj do', man cuêj do', man nij chruun do' a. Maan se qui'yaj nij xo' sayuun man inanj nij yuvii nuvi' se-ta'nga' Diose cata' caan rihaan a. <sup>5</sup> Ne ne nó xcúún nij xo' ticavi' nij xo' man nij yuvii ma'. Maan se 'un' ya yavii qui'yaj ndo'o nij xo' sayuun man nij yuvii a. Ne a'ngaj ndo'o man yuvii rej xtáj nij xo' a. Ne ase vaa sayuun 'yaj xcuun gaa xtáj xcuun man yuvii vaa sayuun qui'yaj nij rquíí man yuvii yo' a. <sup>6</sup> Ne güii vaj nij rquíí yo' rihaan chumii me se guun ndo'o rá nij yuvii cavi' nij yuvii, tzaj ne se ca'vee cavi' nij yuvii a ma'.

<sup>7</sup> Ne nij rquíí me se ase vaa cuayó taj sí ca'anj cunu' ro', danj vaa nij xo' curuvi' un' nij xo', ne ase vaa cachriin aga' oró míí ro', danj vaa se nuu raá nij xo' a. Ne ase vaa rihaan yuvii ro', danj vaa rihaan nij xo' a. <sup>8</sup> Ne vaa yuvé raá nij xo', ne ase vaa yuvé raá chana vaa yuvé raá nij xo', ne ase vaa cúú yan' chuvaá vaa cúú yan' nij xo' a. <sup>9</sup> Ne caráán aga' hierró nu' rucuaa nij xo' a. Ne daj se uun rá' gaa unó' que'ee cuchri' xuun cuayó 'anj rej cunu' nii ro', danj guun raj

gaa cunoj cariin scachee nij xo' gaa chéé nij xo' xtá' a. <sup>10</sup> Ne ase vaa tane' xcuun vaa tane' nij xo', ne guun nucuaj nij xo' xtáj nij xo' man yuvii, ne che'é dan guun nucuaj nij xo' qui'yaj nij xo' sayuun man yuvii 'un' ya yavii a. <sup>11</sup> Ne se-mozó Diose síí tumé yu'uj cunuú ro', uun chij so' rihaan nij rquíí yo' a. Ne se-chuvii se-mozó Diose yo' me Abaddón xna'ánj hebreo, ne Apolión cu'naj so' xna'ánj griego, ne nana yo' taj se vaa sij tiri' rasuun me so' a. <sup>12</sup> Dan me se navij 'o tuvi' nij sayuun quiran' nij yuvii, ne ataa ca'na' yavij roj sayuun quiran' yuvii a.

<sup>13</sup> Gaa ne dan me se ca'yánj se-mozó Diose mozó vatan' chruun a'yánj, gaa ne cunoj nana ca'mii 'o so' rej tanuú nij xcúú mesá altar aga' oró míí nicun' rihaan Diose a. <sup>14</sup> Gaa ne ca'mii so' rihaan se-mozó Diose mozó nicaj chruun a'yánj vatan', cataj so':

—Naché so' man ca'anj nij se-mozó Diose síí numii tu'va chráá xij cu'naj Eufrates á —taj so' rihaan se-mozó Diose yo' a.

<sup>15</sup> Gaa ne nache so' ca'anj nij se-mozó Diose síí cune' Diose cavii maan orá yo', maan güii yo', maan yavii yo', maan yo' ya yo', che'é rej ticavi' nij so' 'o yuvii rihaan daj a va'nuj yuvii man rihaan chumii nanj adonj. <sup>16</sup> Ne vij cientó míj míj síí taj xráá cuayó me nij síí noco' man ca'anj nij se-mozó Diose yo', taj nii cunoj a. <sup>17</sup> Ne dan me se gaa naqui'yaa nu' rasuun nihánj rihaan 'unj, qui'yaj se-mozó Diose yo', ne quene'én 'unj man nij cuayó do', man nij síí taj xráá nij cuayó do', ne nij so' ro', me se nicaj nij so' aga' caráán rucuaa nij so', ne dan me se no se maree ndo'o, ne no se maree risca', ne no se míí, ndaa vaa chuguun yo'óo azufré acaa a. Ne ase vaa raá chuvaá vaa raá nij cuayó, ne curihanj ya'an curihanj catze' curihanj yo'óo azufré curihanj tu'va nij xo' a. <sup>18</sup> Ne che'é ya'an do', catze' do', yo'óo azufré do', curihanj tu'va nij cuayó ro', che'é dan cavi' 'o yuvii rihaan daj a va'nuj yuvii



man rihaan chumi, qui'yaj nij xo' a. <sup>19</sup> 'O se guun nucuaj nij cuayó ticavi' nij xo' man yuvi che'é rasuun cavii tu'va nij xo' do', che'é tane' nij xo' do' a. 'O se ase vaa xcuáá vaa tane' nij xo', ne vaa raá xcuáá yo', ne chá nij xo' man yuvi, quene'enj a.

<sup>20</sup> Ne vaa yuvi quinanii rihaan nij cuayó yo', tzaj ne ne canicaj nimán nij so' tanáj xco' nij so' chrej chi'ii ma'. Tananj yo' na'víj nij so' rihaan nij nana chree do', rihaan ya'anj cacóy yuvi do', ne ya'anj cacóy nij yuvi me se aga' oró mí do', aga' platá catzii do', aga' cobre maree do', yahij do', chruun do', me uun nij yo' a. Ne dan me se nuvi' rihaan yo' ni'yaj yo' do', nuvi' xréé yo' cunoy yo' do', a ma'. Ne chéé nij yo' do', a ma'. <sup>21</sup> Dan me se ne canicaj nimán nij yuvi ca'ne' rá nij yuvi ga' suun ticavi' tuvi' do', ga' suun a'mii ga' sí chruun do', ga' suun 'yaj cacun' ga' chana do', ga' suun 'yaj ituu si'yaj tuvi' do', a man adonj.

## 10

*Nana nihánj taj xna'anj che'é yanj rqué se-mozó Diose chá sí cu'naj Juan a*

<sup>1</sup> Gaa ne quene'én 'unj yo'ó se-mozó Diose sí nucuaj ndo'o cavii rej xta' ne nanij rihaan yo'óo, ne nu' anicaj man so' niquee so' ngaa, ne nda' rá se vaa nicun' xcuáá cu'lúú ro', danj vaa nicun' raá so', ne chuguun nu' anicaj raá so', ne chuguun rihaan so', ndaa vaa chuguun güii a. Ne ase vaa chraan acaa vaa tacóo so' a. <sup>2</sup> Ne nicaj so' 'o yanj cunii a. Ne cuta' so' 'o tacóo so' rej nuva' so' rihaan na ya'anj, ne cuta' so' yo'óo tacóo so' rej nichruun so' rihaan yo'óo a. <sup>3</sup> Ne nucuaj ndo'o caguáj so', nda' adi' se aguáj chuvaa aguáj so' a. Ne gaa caguáj so' me se chij ya' caguáj tu'vii cunoy a. <sup>4</sup> Ne gaa quisíj chij caguáj tu'vii, gaa ne guun raj cachronj nana caguáj tu'vii rihaan yanj, tzaj ne cunoy nana cavii rej xta', ne nana cunoy taj:

—Ca'nej yuve so' nana caguáj tu'vii, ne se cachron so' nana yo'

rihaan yanj ma' —taj nana cavii rej xta' cunoy a.

<sup>5</sup> Gaa ne se-mozó Diose sí nicun' tacóo rihaan na ya'anj do', rihaan yo'óo do', me se naxcaj ra'a so' rej nuva' so' rej xta', <sup>6</sup> ne cuta' so' raá Diose sí cayáán nu' cavii nu' ca'anj sí qui'yaj rej xta' ga' nu' se man rej xta', sí qui'yaj chumi ga' nu' se man rihaan chumi, sí qui'yaj na ya'anj ga' nu' se man rque na ya'anj, se vaa se ca'vee guun raan a doj a ma'. <sup>7</sup> Dan me se asa' quisíj güii ca'yanj se-mozó Diose mozó chij chruun a'yánj me se quisíj nu' se vaa guun rá Diose qui'yaj so', ndaa vaa nata' so' rihaan nij sí nata' se-nana so' sí 'yaj suun che'é so' a, taj se-mozó Diose yo' a.

<sup>8</sup> Gaa ne cavii doj nana rej xta', rej cavii nana cunoy asij rque doj, ne cataj nana yo':

—Cavii so' nicaj so' yanj nicaj se-mozó Diose sí taj tacóo rihaan na ya'anj do', rihaan yo'óo do' á —taj nana yo' rihanj a.

<sup>9</sup> Gaa ne cavii 'unj rihaan se-mozó Diose yo', ne cataj 'unj rihaan so' se vaa rque so' doj yanj cunii yo' rihanj a. Gaa ne cataj so' rihanj a:

—Veé yanj nihánj nicaj so', ne chá nu' so' man yo' a. Dan me se tu'vá so' ro', gaa tzi' ndo'o nda' adi' catzi' xtaan, tzaj ne rqué so' me se guun e', qui'yaj yanj yo' adonj —taj se-mozó Diose yo' rihanj a.

<sup>10</sup> Gaa ne dan me se nicaj 'unj yanj cunii rqué se-mozó Diose yo' rihanj, ne chá nu' 'unj man yo', ne ase tzi' catzi' xtaan ro', danj vaa tzi' yo' tu'vaj a. Ne gaa quisíj chaj man yo', ne cunuu e' rquej, qui'yaj yo' a. <sup>11</sup> Gaa ne cataj nii rihanj a:

—Vaa che'é ca'mii natáj uún so' che'é yuvi man que'ee chuman' man que'ee yo'óo nocoy do', che'é yuvi a'mii que'ee xna'ánj a'mii yuvi do', che'é que'ee sí nicaj suun rey do' ei —taj nii rihanj a.

# 11

*Nana nihánj taj xna'anj che'é vij síi nata' rihaan yuvií che'é Diose a*

<sup>1</sup> Gaa ne rque nii 'o rihaa ase vaa 'o vará a'née ta'nga' manj, ne cataj Diose rihanj a:

—Cavii so' ne xcaj ta'ngá' so' nuvíi nocoo rej ne Diose, ne xcaj ta'ngá' so' mesá altar, ne qui'yaj contá so' nij síi na'víj rihaan Diose do' á. <sup>2</sup> Tzaj ne xa' rej rihaan nuvíi, tzaj ne se xcaj ta'ngá' so' man yo' ma'. 'O se ca'vee ca'na' nij síi yaníj rej yo', ne vij chihaa vij yavii yuun che'e ru'maan che'é nij so' nu' chuman' guee yo' adonj. <sup>3</sup> Ne cune' 'unj man vij roj síi nata' rihaan yuvií che'é 'unj, ne 'o míj táa yavíj cientó ne táa ya'núj chihaa güii me se ca'mii natáj roj so' rihaan yuvií, ne cunuú roj so' yatzíj ya' a —taj Diose rihanj a.

<sup>4</sup> Roj so' ro', me roj chruun man chruj olivó raá do', roj aga' taj aga' ya'an nicun' rihaan síi 'nij ra'a chumii nihánj do' a. <sup>5</sup> Ne sese guun rá yo' o so' qui'yaj chi'ii so' man roj so', ne avii ya'an tu'va roj so', ne acaa síi taj ri'yunj man roj so', qui'yaj ya'an avii tu'va roj so', ne yuun che'e cavii síi 'na' guun rá qui'yaj chi'ii man roj so' a. <sup>6</sup> Ne guun nucuaj roj so' caráán roj so' rej xta', che'é yan se caman' a doj maan nu' güii ca'mii natáj roj so' a. Ne guun nucuaj roj so' naqui'yaj roj so' ton man na a. Ne guun nucuaj roj so' qui'yaj chi'ii roj so' man chumii ndaa vaa me rá ma'an roj so' qui'yaj roj so' a.

<sup>7</sup> Ne asa' quisíj ca'mii natáj roj so' se-nana roj so', gaa ne cavii xcuu yuvaa yu'uj cunuú ndo'o yo' a. Ne cunu' xo' ga roj so', ne qui'yaj canaán xo', ne ticavi' xo' man roj so' a. <sup>8</sup> Gaa ne cúu man roj so' ro', quinaj uun yo' rihaan callé rá chuman' nocoo a. Ne chuman' nocoo yo' me se sese ca'mii cachron ní', ne Sodoma do', Egiptó do', cu'naj chuman' yo' a. Ne yo' me rej cachron nii rihaan rcutze man ma'an síi 'nij ra'a man roj síi nata' yo' asij rque doj a. <sup>9</sup> Ne cunudanj nij yuvií man daj a chuman' do', cunudanj

nij yuvií a'mii nu' nij xna'ánj do', cunudanj nij yuvií man daj a yo'óo nocoo do', ni'yaj man roj síi cavii va'nuj güii táa yanée yo' a. Ne ne ca'vej rá nij yuvií yo' cachin' nii man roj so' rihaan yo'óo santó ma'. <sup>10</sup> Ne nu' nij síi man rihaan chumii me se guun niha' ndo'o rá nij so' che'é se cavii roj síi nata' yo', ne ndaa narque nij yuvií rasuun rihaan tuvi' nij yuvií che'é se cavii roj so' a. Dan me se gaa vaa i'na' roj so' me quiran' ndo'o nij yuvií sayuun, qui'yaj roj so' a.

<sup>11</sup> Ne gaa quisíj va'nuj güii táa yanée yo', gaa ne catúj uun nana rque roj so', qui'yaj Diose, ne cunuú i'na' uun roj so', ne canicun' caya roj so', ne dan me se nu' nij yuvií quene'en man roj so' me se cuchu'vi' ndo'o nij so' a. <sup>12</sup> Gaa ne cuno roj so' nana nucuaj sca' ndo'o cavii rej xta', ne nana yo' cataj:

—Cavii roj soj ca'na' roj soj nihánj á —taj nana yo' cuno roj so' a.

Gaa ne catúj roj so' rque ngaa, cavii roj so' xta', ne ca'anj roj so' a. Dan me se nij síi taj ri'yunj man roj so' me se quene'en nij so' se vaa cavii roj so' rej xta' a.

<sup>13</sup> Ne maan orá dan cachén ndo'o yuún, ne canee 'o ve' rihaan daj a chi' ve' ne chuman' yo', ne cavii chij mij yuvií, qui'yaj yuún, ne cuchu'vi' ndo'o yo'óo nij yuvií, ne guun che'e nij so' ca'mii sa' nij so' che'é Diose síi nicun' rej xta' a. <sup>14</sup> Dan me se quisíj vij sayuun yo', ne nichrun' quisij sayuun va'nuj a.

*Nana nihánj taj xna'anj daj guun gaa ca'yánj se-mozó Diose mozó chij chruun a'yánj a*

<sup>15</sup> Gaa ne dan me se ca'yánj se-mozó Diose mozó chij chruun a'yánj, gaa ne ca'mii ndo'o nij síi man rej xta', cataj nij so':

—Nihánj me yuun che'e guun chij síi 'nij ra'a man ní', ne guun chij síi ca'née so' tinanii man yuvií rihaan sayuun, ne dan me se guun chij roj so' rihaan chumii, ne dan me se yo' o

guun chij Diosē nu' cavii nu' ca'anj nanj adonj —taj nij sí man rej xta' a.

<sup>16</sup> Nē ico ca'anj nij sí uun chij taj rihaan chruun xla sa' rej rihaan Diosē me se ca'anj canicun' ruj nij so' rihaan Diosē, nē toco' nij nij so' rihaan nij so' rihaan yo'óó, nē quina'víj nij so' rihaan Diosē a. <sup>17</sup> Dan me se cataj nij so':

—Narquē núj graciá rihaan so', Diosē sij 'nij ra'a man núj á. So' me sí guun nucuaj qui'yaj cunudanj a. Nē sí nicun' yaj mé so', sí nicun' asij naá mé so' á. Dan me se guun ni'yaj ní' se vaa yaj me se guun nucuaj ndo'o so', qui'yaá so', nē guun chij so' rihaan chumij a. <sup>18</sup> Dan me se ca'maan rá nij sí man rihaan chumij ni'yaj nij so' man so', gaa nē ca'ná' so', nē caxrj yuvaa so' man nij so' a. Nē quisj güii ca'ne' so' cacun' che'é nij sí cavi' nē naru'vee so' rihaan nij sí 'yaj suun rihaan so' nij sí ca'mii natáj se-nana so' do', rihaan nij sí vaa sa' rihaan so' do', rihaan nij sí aráj cochroj rihaan so' do' a. Dan me se ca'vee se sí nique me nij so' ni', ca'vee se sí sa' ata suun me nij so' ni', tzaj nē naru'vee so' rihaan nij so' a. Nē tiri' so' man nij sí tiri' chumij a —taj ico ca'anj nij sí uun chij rihaan Diosē a.

<sup>19</sup> Gaa nē naxra' ta'yaa rihaan nuví nocoo rej nē Diosē rej xta', nē rá nuví nocoo me se curuvi' se-chrunj Diosē chruún guee qui'yaj nii gaa ca'mii Diosē se-nana Diosē rihaan sí cu'naj Moisés gaa naá a. Gaa nē quiraan ndo'o, nē cariin ndo'o, nē canuu ndo'o, nē cavii ndo'o nana yuvaa, nē caguáj tu'vii, nē cachén yuún, nē caman' ndo'o maan yahij nanj adonj.

## 12

*Nana nihánj taj xna'anj che'é chana do', che'é xcuáá tu'vii do', curuvi' rej xta' a*

<sup>1</sup> Gaa nē dan me se naqui'yaa 'o rasuun nocoo curuvi' rej xta' rihaan 'unj, qui'yaj Diosē, nē chana me yo', nē sagan' chana yo' ro', me güii, nē táá tacóó no' xraá yavii a. Nē nuu raa no' 'o cachriin nō chuvij yati' a. <sup>2</sup> Nē

chana yo' ro', nuû rque, nē ve'ee uxrá rque no' che'é se me rá no' cuchruj no' ne'ej, nē che'é dan ta'vee ndo'o no' a. <sup>3</sup> Nē naqui'yaa uún yo'ó rasuun rej xta' rihaan 'unj, qui'yaj Diosē, nē xcuáá tu'vii xij marée me yo' a. Nē vaa chij raa xo', nē chj' cúú táá raa xo', nē chj cachriin nuû raa xo' a. <sup>4</sup> Nē tane' xo' me se cuxuun yo' yo'o va'nuj scuj nij yati' man rej xta', nē cayuu nij yati' rihaan yo'óó, qui'yaj xo' a. Nē canicun' xcuáá tu'vii yo' rihaan chana cuchruj ne'ej, che'é rej cha nu' xo' man ne'ej cuchruj chana yo' a. <sup>5</sup> Gaa nē cuchruj no' ne'ej sno'o, nē so' ro', me sí nica' vará hierró nē cutumé man cunudanj nij yuvij man rihaan chumij a. Gaa nē ca'néj nii ta'ní chana yo', nē ca'anj nica' nii man ne'ej rihaan Diosē rej táá so' rihaan chruun xla sa' yo' uun chij so' a. <sup>6</sup> Gaa nē cunanj chana ndaa rej tacaan rej qui'yaj ma'an Diosē cane no', che'é rej ca'vee cayáán no', nē ca'vee rque Diosē se cha no' 'o mój táá yavij cientó nē táá ya'núj chihaa güii a.

<sup>7</sup> Gaa nē guun che'e nij sí man rej xta' cunu' nij so' a. Dan me se se-mozó Diosē sí cu'naj Migueé ga yo'ó nij se-mozó Diosē nuu rihaan so' me se cunu' ndo'o nij so' ga xcuáá tu'vii a. Nē tananj xcuáá tu'vii do', nij se-mozó ma'an xcuáá tu'vii do', cunu' ndo'o nij so' ga nij tuvi' se-mozó Diosē Migueé, <sup>8</sup> tzaj nē nē guun nucuaj nij so' qui'yaj canaán nij so' man Migueé a man adonj. Nē taj rej cumán nij so' rej xta', qui'yaj nij tuvi' Migueé a man chuguanj. <sup>9</sup> Nē xcuáá tu'vii yo' ro', xcuáá cayáán asij naá tempó me xo', nē sí chree do', Satanás do', cu'naj xo', nē sí tiha' yu'unj man cunudanj nij yuvij man rihaan chumij me uún xo' nanj adonj. Nē go' nii man xcuáá tu'vii xij yo' rihaan chumij ga nij se-mozó so' a. <sup>10</sup> Gaa nē cunó 'unj nana nucuaj ca'mii yo'o so' rej xta', nē cataj so':

—Nihánj me se guun che'e Diosē tinanii Diosē man yuvij rihaan sayuun, nē guun nucuaj ndo'o so', nē

guun chij ndo'o so' adonj. Ne guun chij sí ca'née so' t̄inani man yuvi rihaan sayuun a. 'O se sí cuta' cacun' xráá tinúú ní' nuví nigan' rihaan Diose ro', quiri yaníj nii man so' nanj adonj. <sup>11</sup> Ne qui'yaj canaán nij tinúú ní' man xcuáá tu'vii che'é ton cayanj man matzinj le'ej yo' che'é nij tinúú ní', ne che'é se nata' nij so' nana ya sa' rihaan yuvi ro', che'é dan qui'yaj canaán nij so' rihaan xcuáá tu'vii yo' nanj ei. Ne nij so' me se ne cuchu'vi' nij so' sese cavi' nij so' che'é nana sa' nata' nij so' ma'. <sup>12</sup> Che'é dan guun niha' rá nij soj rej xta' do', sij ne rej xta' do' ei. Tzaj ne nique ndo'o soj sij man rihaan chumi' do', na ya'anj do', nanj adonj. 'O se quiri'íj nii man sí chree rihaan roj soj, ne che'é dan nuu yuvaa uxrá rá so' nanj chuguanj. 'O se ne'en sí chree se vaa nichrun' ca'na' sayuun quiran' so' nanj ei —taj nana ca'mii yo'o so' rej xta' a.

<sup>13</sup> Gaa ne dan me se gaa xcaj xcuáá tu'vii yo' cuentá se vaa quiri'íj nii man xo' rihaan chumi', gaa ne canoco' ndo'o xo' man chana cuchruj ne'ej yo' a. <sup>14</sup> Tzaj ne rque nii vij scachee xtaa xij man chana, che'é rej ca'vee cavi' no' ca'anj no' rej tacaan rej ne no' qui'yaj Diose, ne yo' me rej rque Diose se cha no' va'núj yo' táá yanée, ne gan' ndo'o cunanj no' rihaan xcuáá tu'vii a. <sup>15</sup> Tzaj ne quiri'íj ndo'o xcuáá yo' na tu'va xo' rej vaj chana, ne ase vaa chraá vaa na ca'née xo' rej vaj chana, che'é rej guun rá xo' rnuu chana qui'yaj chraá yo', rá xo' a. <sup>16</sup> Gaa ne racuíj yo'óo man chana, ne dan me se nuxra' yo'óo tu'va yo'óo, ne chumánj yo'óo nu' chraá quiri'íj xcuáá tu'vii tu'va yo' a. <sup>17</sup> Gaa ne ca'maan ndo'o rá xcuáá tu'vii ni'yaj xo' man chana, gaa ne cavi' xo' cunu' xo' ga yo'óo nij ta'núí no' sí uno rihaan Diose sí nata' se-nana Jesucristó rihaan yuvi a. Gaa ne canicun' xo' rihaan yo'óo chruu naj tu'va na ya'anj a.

### 13

*Nana nihánj taj xna'anj che'é xcuu*

*yuvaa cavii na ya'anj a*

<sup>1</sup> Gaa ne quene'én 'unj se vaa cavii 'o xcuu yuvaa rque na ya'anj, ne chij ya raá xo', ne chi' cúu raá chij cúu yave xo', ne táá chi' cachriin raá nij cúu taj raá xo' a. Ne quij ndo'o vaa se-chuvii xo' nó rihaan xo' a. <sup>2</sup> Ne ase vaa sni'yó vaa xo', ne ase vaa tacóo xcuu osó vaa tacóo xo', ne ase vaa tu'va chuvaa vaa tu'va xo' a. Ne xcuu yuvaa cavii rque na ya'anj ro', guun nucuaj ndo'o xo' guun chij xo', qui'yaj xcuáá tu'vii a. <sup>3</sup> Ne yo'o raá xo' ro', aj quiran' chi'íj ndaa se daj doj se cavi' xo', tzaj ne quinahuun sa' uún man xo' a. Ne caráya'anj nij yuvi man nu' rihaan chumi' ni'yaj nij yuvi man xcuu yuvaa yo', <sup>4</sup> ne quina'víj nij yuvi rihaan xcuáá tu'vii yo', che'é se guun nucuaj xcuu yuvaa yo' guun chij yo', qui'yaj ma'an xcuáá tu'vii yo' a. Ne quina'víj uún nij yuvi rihaan xcuu yuvaa uún, cataj nij yuvi:

—Me 'ó sí ca'vee qui'yaj ndaa vaa 'yaj xcuu yuvaa nihánj ga. Taj vaj a doj sí guun nucuaj cunu' ga xo' ma' —taj nij yuvi ni'yaj nij yuvi man xcuu yuvaa yo' a.

<sup>5</sup> Gaa ne ca'vej rá Diose guun nucuaj xo' ca'mii xta' ndo'o xo' ndaa rihaan ma'an Diose a. Ne ca'vej rá Diose guun chij xo' vij chihaa vij yavii a. <sup>6</sup> Gaa ne dan me se ca'mii ndo'o xo' nana chi'íj ni'yaj xo' man Diose do', ve' mantá rej ne Diose do', che'é nij sí ne rej xta' ga Diose do' a. <sup>7</sup> Ne ca'vej rá Diose cunu' xo' ga nij sí vaa sa' nimán rihaan Diose, ne dan me se qui'yaj canaán ya xo' man nij so' a. Ne ca'vej rá Diose guun chij xo' rihaan 'o 'o ta'aj yuvi do', rihaan nij yuvi man cunudanj chuman' naj rihaan chumi' do', rihaan nij yuvi a'mii cunudanj nij xna'ánj a'mii yuvi do', rihaan nij yuvi man nu' nij yo'óo nocoo do' a. <sup>8</sup> Ne quina'víj cunudanj nij yuvi man rihaan chumi' rihaan xo' a. Ne nij sí quina'víj rihaan xo' me se nuvi' se-chuvii nij so' no' rihaan danj matzinj le'ej sí cavi' rihaan rcutze, ne che'é dan se gaa i'na' nij so' rihaan Diose nu' cavi'



nu' ca'anj ma'. Ne nij sí ne quina'vij rihaan xcuu yuvaa yo' me se aj nó se-chuvii nij so' rihaan yanj yo' asij ataa qui'yaj Diose chumii nanj adonj.

<sup>9</sup> Dan me se sese taj yu'uj xréé yo'o so', ne no xcúún so' cunō so' nana nihánj adonj. <sup>10</sup> Dan me se sí 'yaj atúj yuvii taga' ro', vaa güii catuu ma'an so' uún nanj adonj. Ne sí o' neê espadá man tuvi' me se cavi' ya ma'an so', qui'yaj neê espadá nanj adonj. Nihánj me se xcaj ní' cuentá che'é nij sí vaa sa' rihaan Diose, se vaa yo'o Diose gaá nucuaj rá nij so', ne yo'o Diose cuchuman rá nij so' ni'yaj nij so', ne yo'o gaá nucuaj nimán nij so' rihaan sayuun ei.

*Nana nihánj taj xna'anj che'é xcuu yuvaa cavii rque yo'óo a*

<sup>11</sup> Gaa ne quene'én 'unj yo'óo xcuu yuvaa cavii rque yo'óo, ne táá vij cúú raá xo', ne ase vaa cúú taj raá matzinj le'ej ro', danj vaa cúú taj raá xo' a. Ne a'mii xo' ndaa vaa a'mii ma'an xcuáá tu'vii a. <sup>12</sup> Ne dan me se ca'na' xo' rihaan xcuu yuvaa cavii rque na ya'anj, ne guun chij xo' rihaan yuvii ndaa vaa uun chij ma'an xcuu cavii rque na ya'anj yo' a. Dan me se quina'vij nij yuvii man nu' rihaan chumii rihaan xcuu yuvaa cavii rque na ya'anj xcuu nahuun sa' gaá daj doj se cavi', qui'yaj xcuu yuvaa cavii rque yo'óo yo' a. <sup>13</sup> Ne qui'yaj suun ndo'o xo' suun nocoo quene'en nij yuvii, ne ndaa cavii ya'an rej xta' ne quiniy ya'an rihaan yo'óo, qui'yaj xo' a. <sup>14</sup> Dan me se qui'yaj suun xo' suun nocoo rihaan xcuu yuvaa cavii rque na ya'anj yo', qui'yaj ma'an xo', ne che'é suun nocoo yo' me se tiha' yu'unj ndo'o xo' man nij sí man rihaan chumii, ne cataj xo' rihaan nij so' se vaa qui'yaj nij so' 'o se-tinanga' xcuu cavii rque na ya'anj yo' xcuu quiran' chi'ij qui'yaj neê espadá ne cunuu i'na' uún a. <sup>15</sup> Dan me se guun nucuaj xo' qui'yaj xo' nayón nana nimán se-tinanga' xcuu cavii rque na ya'anj yo', ne qui'yaj uún xo' ca'mii se-tinanga' yo', ne taran' nij sí na'vej

rá na'vij rihaan se-tinanga' yo' ro', me se ticavi' xo' man taran' nij so' a. <sup>16</sup> Gaa ne qui'yaj xcuu cavii rque yo'óo yo' fuerzá man cunudanj yuvii se vaa cuta' nii ta'nga' ra'a nij yuvii rej nuva' nij yuvii, ne se taj, ne caan rihaan nij yuvii cata' ta'nga' a. Dan me se danj qui'yaj nii man nij sí ata suun do', man nij sí chéé ma'an do', man nij sí nique do', man nij sí ru'vee do', man nij mozó do', man nij sí ne uun mozó do' a. <sup>17</sup> Ne dan me se sese nuvi' ta'nga' yo' ra'a yo'o so' do', rihaan yo'o so' do', ne ne ca'vee quiraan so' rasuun do', cutu'vee so' rasuun do', qui'yaj se-tinanga' xcuu yo' a man adonj. Ne ta'nga' yo' ro', me se-chuvii xcuu cavii rque na ya'anj, ne dan me se número me yo' ei.

<sup>18</sup> Ne nihánj me se cavii raá soj sij nayaa nana nihánj, ne sese cuu raá soj, ne nuchruj raá soj daj taj se-número xcuu yuvaa cavii rque na ya'anj yo' ei. 'O se número yo' ro', me se-chuvii yo'o snó'o nanj chuguanj. Ne vatan' cientó táá ya'núj chihaa vatan' me número yo' ei.

## 14

*Nana nihánj taj xna'anj che'é cientó táá yavij chihaa ca'anj mij nij sí vaa sa' rihaan Diose a*

<sup>1</sup> Gaa ne quene'én 'unj se vaa nicun' matzinj le'ej yo' raá quij cu'naj Sion, ne nicun' 'o cientó táá yavij chihaa ca'anj mij nij so' ga so', ne no se-chuvii matzinj le'ej do', se-chuvii Rej matzinj le'ej do', caan rihaan nij so' a. <sup>2</sup> Gaa ne cunó 'unj se vaa ca'mii nana cavii rej xta', ne ase vaa uun ayuj vaj chráá xij do', ase uun aguáj ndo'o tu'vii do', danj vaa nana yo', ne ase vaa chra' achráá nii ya'anj vaa nana yo' a. <sup>3</sup> Ne achráá nij so' chra' naca inanj rihaan sí taj chruun xlá sa' yo' do', rihaan ca'anj nij xcuu nicun' nu' anicaj chruun xlá sa' do', rihaan nij sí uun chij do' a. Ne taj vaj a 'o nij sí ca'vee nari' cachraa chra' yo' ma'. Maan se orún' cientó táá yavij chihaa ca'anj mij nij sí vaa

sa' yo' ro', me nij sí guun nucuaj nari' chra' yo' nanj adonj. Nij so' ro', me nij sí narii Diose rihaan chumii, ne nij so' me sí tinanii matzinj le'ej man rihaan sayuun gaa cavi' so' a. <sup>4</sup> Ne ne cunu chi'ii nij so' rihaan Diose che'é chana ma'. 'O se sí vaa sa' inanj me taran' nij so' nanj adonj. Ne sí canoco' xcó matzinj le'ej me rej ma'an vaj xo' me uún nij so' a. Ne nij so' me nij sí táa yaan rihaan taran' yo'ó nij sí man rihaan chumii sí cunu sa' rihaan Diose do', rihaan matzinj le'ej do', gaa cavi' matzinj le'ej yo' a. <sup>5</sup> Ne dan me se taj vaj a doj nana ne ne ca'mii nij so' ma'. 'O se sij vaa sa' inanj me nij so' nanj ei.

*Nana nihánj taj xna'anj daj ca'mii va'núj nij se-mozó Diose a*

<sup>6</sup> Gaa ne quene'én 'unj yo'ó se-mozó Diose vaj tanu rihaan risca' xta', ne nicaj so' nana sa' nana che'é se vaa quiran' yuvii nu' cavii nu' ca'anj nata' so' rihaan nij sí man cunudanj nij yo'ó nocoo man rihaan chumii do', rihaan nij sí man cunudanj nij chuman' do', rihaan nij sí a'mii cunudanj nij xna'ánj a'mii nij yuvii do', rihaan 'o 'o ta'aj nij yuvii man rihaan chumii do' a. <sup>7</sup> Gaa ne dan me se nucuaj ndo'o ca'mii so', cataj so', ne:

—Caraa cochroj nij soj rihaan Diose, ne ve'é ca'mii soj che'é so' ei. 'O se aj quisíj orá ca'ne' so' cacun' che'é yuvii nanj adonj. Dan me se na'vij soj rihaan so', che'é se so' me sí qui'yaj rej xta' do', yo'ó do', na ya'anj do', rej avii na do' a —taj se-mozó Diose yo' cunoj a.

<sup>8</sup> Gaa ne canoco' yo'ó se-mozó Diose xcó tuvi' so', ne cataj so':

—Aj quiri' nu' chuman' nocoo chuman' cu'naj Babilonia, ne qui'yaj ndo'o nij sí man rihaan chumii cacun' chi'ii, qui'yaj chuman' yo', ne nihánj me se caxrii yuvaa Diose man nij so' che'é cacun' chi'ii qui'yaj nij so' chuguanj —taj yo'ó se-mozó Diose yo' a.

<sup>9</sup> Gaa ne canoco' se-mozó Diose mozó va'núj rej xcó roj tuvi' so', ne nucuaj ndo'o ca'mii so', cataj so', ne:

—Sese na'vij yo'o so' rihaan xcuu yuvaa yo' do', rihaan se-tinanga' xcuu yuvaa yo' do', ne sese ca'vej rá yo'o so' cata' ta'nga' caan rihaan so' do', ra'a so' do', <sup>10</sup> ne ya co'o so' na vinó sayuun nucuaj caraa Diose rque tazá, ne na vinó yo' ro', me sayuun qui'yaj Diose man so' asa' caxrii yuvaa Diose man so', ne dan me se cacaa so' rihaan ya'an do', rihaan yo'ó azufre' acaa do', ni'yaj nij se-mozó Diose mozó vaa sa' do', ni'yaj matzinj le'ej do' a. <sup>11</sup> Ne dan me se nu' cavii nu' ca'anj cavii catze' rej quiran' nij so' sayuun, ne yo'o danj quiran' nij so' nuvii nigan' nanj adonj. Danj quiran' nij sí na'vij rihaan xcuu yuvaa yo' do', rihaan se-tinanga' xcuu yuvaa yo' do', sí ca'vej rá cata' ta'nga' se-chuvii xcuu yo' do' a —taj se-mozó Diose mozó va'núj yo' a.

<sup>12</sup> Ne nihánj me rej xcaj ní' cuentá che'é nij sí vaa sa' rihaan Diose, se vaa yo'o vaa nucuaj nimán nij so' rihaan sayuun ei. 'O se nij so' me sí yo'o uno nana taj xna'anj Diose, ne yo'o amán rá nij so' ni'yaj nij so' Jesucristó a.

<sup>13</sup> Gaa ne cunó 'unj yo'ó nana cavii rej xta', ne nana yo' cataj rihanj a:

—Cachron so' nana nihánj rihaan yanj á. Cachron so' se vaa nij sí nocó' man sí 'nij ra'a man soj me se sese cavi' nij so' rej rihaan yaj, ne vaa che'é guun niha' rá nij so' ei. 'O se cavii sa' nij so' nanj á. Ne Nimán Diose taj se vaa ca'ne' rá nij so' ga suun 'yaj suun, ne naraan rá nij so' a. 'O se yuun che'e cavii sa' nij so' che'é suun sa' aj qui'yaj suun nij so' adonj, cachron so' á —taj nana cavii rej xta' yo' a.

*Nana nihánj taj xna'anj che'é sayuun quiran' nij sí man rihaan chumii nihánj a*

<sup>14</sup> Gaa ne quene'én 'unj se vaa curuvi' 'o ngaa catzii rej xta', ne táa 'o sí

nicaj yu'unj man yuvij xráá ngaa, ne nuu raá so' 'o cachriin aga' oró míi, ne noco' ra'a so' 'o aga' seraa cuyuu a'ne' coj, ne sihaa uxrá seraa yo' a. <sup>15</sup> Gaa ne yo'ó se-mozó Diose curihanj rque nuvií nocoo, ne nucuj ndo'o caguáj so' rihaan síi taj xráá ngaa yo' a. Dan me se cataj so', ne:

—Tacuachén so' sagá' so' aga' sihaa tacóo nij rasuun man rihaan yo'óo, ne cutá so' se man rihaan yo'óo cuaj ei. 'O se quisíj orá cuta ní' se man rihaan yo'óo nanj adonj. 'O se aj cachij nu' se man rihaan yo'óo nanj á —taj se-mozó Diose rihaan síi taj xráá ngaa yo' a.

<sup>16</sup> Gaa ne síi taj xráá ngaa yo' ro', me se tacuachén so' saga' so' tacóo nij rasuun man yo'óo, ne dan me se cuta so' nu' rasuun cachij man rihaan yo'óo yo' a.

<sup>17</sup> Gaa ne curihanj yo'ó se-mozó Diose uún rque nuvií nocoo ne rej xta', ne ma'an so' nicaj yo'ó aga' seraa cuyuu sihaa uún a. <sup>18</sup> Gaa ne curihanj yo'ó se-mozó Diose uún rej nicun' mesá altar, ne síi guun chij rihaan ya'an me so', ne nucuj ndo'o caguáj so' rihaan síi nicaj yo'ó aga' sihaa yo' a. Dan me se cataj so', ne:

—Tacuachén so' sagá' so' aga' seraa sihaa tacóo nij rasuun man rihaan yo'óo, ne naqui'yaj chre' so' nij chruj uvá cachij rihaan yo'óo á. 'O se aj cané nu' nij chruj uvá nanj ei —taj so' rihaan tuvi' mozó so' a.

<sup>19</sup> Gaa ne dan me se tacuachén se-mozó Diose yo' saga' so' aga' seraa tacóo nij rasuun man rihaan yo'óo, gaa ne naqui'yaj chre' so' nij chruj uvá cachij man rihaan chumii, gaa ne caraa sa' so' nij chruj uvá yo' rque 'o xruj xij rej rii nii na man nij chruj uvá, ne dan me se rej yo' me rej quiran' uxrá nij chruj uvá yo' sayuun qui'yaj Diose vaa nanj adonj.

<sup>20</sup> Gaa ne dan me se rej tu'va chuman' quirii nii man chruj uvá, ne rej yo' me canuu nii man chruj uvá yo', ne curihanj ndo'o ton rque xruj xij yo', ne quisíj ton yo' ndaa tu'va nij cuayó yo' rej nuu rtá, ne va'núj cientó taa

yo'ó ico kilómetro ya cunanj ton yo' rej gan' rihaan yo'óo a.

## 15

*Nana nihánj taj xna'anj che'é chij se-mozó Diose nij síi nicaj sayuun a*

<sup>1</sup> Gaa ne quene'én 'unj yo'ó rasuun curuvi' rej xta' qui'yaj Diose, ne se xij ndo'o me yo', ne rasuun caráya'anj yá' me yo' a. Dan me se quene'enj chij se-mozó Diose, ne chij sayuun ca'na' me nicaj nij se-mozó Diose yo' a. Ne asa' quisíj guun sayuun yo' rihaan chumii qui'yaj Diose, gaa ne ca'ne' rá Diose ga suun axrij yuvaa man chumii a.

<sup>2</sup> Gaa ne quene'én 'unj na ya'anj, ne ndaa raan ma'an rihaan na ya'anj yo', ne ase vaa raan vidrió ro', danj vaa raan yo', ne ase vaa ya'an vaa yo', ne nij síi qui'yaj canaán rihaan xcuu yuvaa yo' do', rihaan se-tinanga' xcuu yuvaa yo' do', rihaan número uun se-chuvii xcuu yuvaa yo' do', nij so' me nij síi nicun' rihaan na ya'anj vidrió yo', ne nicaj nij so' ta'anj Diose nicun' nij so' yo' a. <sup>3</sup> Ne achraá nij so' chra' qui'yaj síi cu'naj Moisés síi qui'yaj suun che'é Diose gaa naá, ne xra' matzinj le'ej me chra' yo' a. Ne nihánj me nana cachraá nij so' a:

—Xij ndo'o ne ya'anj ndo'o vaa nu' suun qui'yaj suun so', Diose sij ne'en qui'yaj cunudanj sij 'nij ra'a man núj á. Tucuáán nica ne tucuáán ya me nu' tucuáán cuchruj so', ne síi nicaj suun rey uun chij rihaan cunudanj yuvij mé so' á. <sup>4</sup> Me síi se ca'vej rá caraa cochroj rihaan so', ga man Señor. Ve'é ca'mii cunudanj yuvij ni'yaj nij yuvij mán so' a. 'O se orún' so' me síi sa' inanj, ne ca'na' cunudanj nij yuvij man rihaan chumii, ne na'vij nij yuvij rihaan so' á. 'O se quene'en nij so' nu' nij suun nica qui'yaj suun so' adonj —me chra' cachraá nij síi qui'yaj canaán yo' a.

<sup>5</sup> Gaa ne quene'én 'unj se vaa naxra' ta'yaa rihaan nuvií nocoo rej ne Diose rej xta' rej xcay yuvij cuentá che'é so' a. <sup>6</sup> Gaa ne curihanj chij

nij se-mozó Diose nij sí nicaj sayuun rque nuví nocoo yo', ne nuu nij so' yatzíj linó sa' inanj naruvii chuguun, ne 'nij catuun nij so' merque caxra' anó ndaa rucuaa nij so', ne merque aga' oró míi inanj me nij merque yo' a. <sup>7</sup> Gaa ne yo' o' tuvi' ca'anj nij xcuu ro', rque xo' chij co'oo aga' oró míi rihaan chij nij se-mozó Diose, ne sayuun qui'yaj Diose caxrii yuvaa Diose man nij sí man rihaan chumii ro', maan ndaa araa ma'an sayuun yo' rque nij co'oo a. Ne Diose, tzaj ne so' me sí gaa i'na' nu' cavii nu' ca'anj adonj. <sup>8</sup> Ne che'é se ve'é ndo'o 'yaj Diose ne che'é se nucuaj ndo'o Diose, che'é dan caraa catze' rá nuví nocoo yo', ne taj vaj sí guun nucuaj catuu rque nuví nocoo yo' ndaa se quisij chij nij sayuun nicaj chij nij se-mozó Diose tagüej nij so' rihaan chumii a.

## 16

*Nana nihánj taj xna'anj che'é sayuun man rque co'oo nicaj chij nij se-mozó Diose a*

<sup>1</sup> Gaa ne cunó 'unj se vaa nucuaj ca'mii 'o' sí ne rá nuví nocoo yo' rihaan chij nij se-mozó Diose, cataj so':

—Cavii nij soj, tucuayuu soj se man rque se-co'oo soj rihaan yo'óó, che'é rej caxrii yuvaa Diose man nij sí man rihaan yo'óó á —taj sí ne rá nuví nocoo yo' a.

<sup>2</sup> Gaa ne guun yaan 'o' se-mozó Diose, cavii so' ca'anj so', ne tucuayuu so' se nuu rque se-co'oo so' rihaan yo'óó a. Gaa ne dan me se canó ndo'o luj ri'yuj chi'ii man nij sí no se-ta'nga' xcuu yuvaa sí na'víj rihaan se-tinanga' so' a.

<sup>3</sup> Gaa ne se-mozó Diose mozó vij, ne tucuayuu so' se man rque se-co'oo so' rihaan na ya'anj yo', ne ase vaa ton man xngá ro', danj vaa nu' na ya'anj yo' a. Gaa ne cunudanj nij xcuu do', xcuaj do', cavi' rque na ya'anj yo' a.

<sup>4</sup> Gaa ne se-mozó Diose mozó va'nuj, ne tucuayuu so' se man rque se-co'oo so' rihaan nij chráá do',

rihaan nij rej avii na do' a. Gaa ne guun ton man nu' nij na yo' a.

<sup>5</sup> Gaa ne cunó 'unj ca'mii se-mozó Diose sí tumé na, se vaa cataj so':

—Cunaj uxrá 'yáá so' sij nicun' yaj sij nicun' asij naá, ne sij sa' inanj mé so' á. 'O se ma'an so' me sí cataj xna'anj se vaa guun nu' nij rasuun nihánj nanj adonj. <sup>6</sup> 'O se nij sí man rihaan chumii ro', tucuayuu nij so' ton man nij sí sa' do', ton man nij sí nata' se-nana so' do', rihaan yo'óó, ne nihánj me se rque so' ton rihaan nij so' co' ma'an nij so' yaj adonj. Dan me se yaj me nayon ya cuentá ndaa vaa qui'yaj nij so' gaa naá ei —taj se-mozó Diose sí tumé na yo' a.

<sup>7</sup> Gaa ne cunó 'unj se vaa ca'mii mesá altar, ne cataj yo':

—Veé danj vaa, Diose sij 'nij ra'a man núj sij guun nucuaj qui'yaj cunudanj a. Nana ya ne nana nica me nu' nana cataj xna'anj so' gaa ca'ne' so' cacun' che'é nij yuvii yo' —taj yo' uún a.

<sup>8</sup> Gaa ne se-mozó Diose mozó ca'anj ro', me se tucuayuu so' se man rque se-co'oo so' rihaan güi a. Gaa ne guun nucuaj güi cacaa nij yuvii qui'yaj güi a. <sup>9</sup> Gaa ne cacaa ndo'o nij yuvi, gaa ne dan me se nda' se Diose me sí uun chij rihaan nu' nij sayuun yo', tzaj ne ca'mii chi'ii nij yuvi ni'yaj nij yuvi man Diose, ne ne canicaj nimán nij yuvi ca'mii sa' nij yuvi che'é Diose a ma'.

<sup>10</sup> Gaa ne se-mozó Diose mozó 'un' ro', me se tucuayuu so' se man rque se-co'oo so' rihaan chruun xlá rej taj xcuu yuvaa a. Gaa ne yuun che'e cunuu rmi' nu' rej quirii ta'nga' xo' rihaan, ne dan me se que'ee ndo'o man nij sí guun chij xo' rihaan, ne ndaa chá ruj ma'an nij so' tu'va nij so' che'é yan a'ngaj man nij so' a. <sup>11</sup> Gaa ne dan me se ca'mii chi'ii nij so' che'é Diose, che'é se que'ee ndo'o man nij so' ne canó luj chi'ii ri'yuj man nij so' a. Tzaj ne ne canicaj nimán nij so' tanáj nij so' se chi'ii qui'yaj nij so' a ma'.



12 Gaa ne se-mozó Diose mozó vatan' ro', me se tucuayuu so' se man rque se-co'oo so' rihaan chráá xij cu'naj chráá Eufates, gaa ne canacoo nu' na man rque chráá yo', qui'yaj so' a. Ne dan me se guun chráá yo' chrej cachén nij sí nicaj suun rey cavii rej sí güii ca'na' nij so' a. 13 Gaa ne quene'én 'unj se vaa curihanj va'nuj nana chi'ii tu'va xcuáá tu'vii do', tu'va xcuu yuvaá do', tu'va sí nata' nana ne do', ne ase vaa riquij vaa va'nuj nij nana chi'ii yo' a. 14 'O se nana chree me nij so', ne vaj nij so' 'yaj suun nij so' suun nocoo ne'en nij yuvii, ne dan me se cavii nij so' ca'anj nij so' rej ne nij sí nicaj suun rey uun chij rihaan nu' nij yuvii man rihaan chumii a. Gaa ne cunuu chre' cunudanj nij sí nicaj suun rey, qui'yaj nij nana chree, che'é rej cunu' nij sí nicaj suun rey yo' ga Diose asa' quisij güii ca'ne' Diose cacun' che'é yuvii a. Ne Diose me sí guun nucaj qui'yaj cunudanj ei.

15 Ne nihánj me se-nana sí 'nij ra'a man ní' a:

—Dan me se ase vaa 'na' yuve sí ituu ro', danj gaa cuchí' 'unj rihaan soj á. Ne cavii sa' sí ne otoj, ne ni'yaj ranga' nij so', ne tumé sa' nij so' sagan' nij so' yatzíj catzii á. Dan me se se gaa canj nij so' cachee nij so', ne se cunó chrej na'aj rihaan nij so' ni'yaj yuvii man nij so' ma' —taj sí 'nij ra'a man ní' ni'yaj so' man nij sí ne tumé cacun' a.

16 Gaa ne dan me se cunuu chre' nij sí nicaj suun rey yo' rej cu'naj Armagedón xna'ánj hebreo, qui'yaj va'nuj nij nana chree yo' a. 17 Gaa ne se-mozó Diose mozó chij me se tucuayuu so' se man rque se-co'oo so' rihaan nana a. Gaa ne nucaj ca'mii sí taj chruun xlá sa' nicun' rá nuví nocoo, cataj so', ne:

—Quisij guun yo' á —taj so' a.

18 Gaa ne quiraan, ne cariin ndo'o, ne caguáj ndo'o tu'vii, ne cachén uxrá yuún yuvaá, ne nucaj doj yuún yo' rihaan nu' nij yuún cachén rihaan chumii nihánj asij guun che'e yuvii

cayáán yuvii rihaan chumii nihánj a. 19 Dan me se quixra' ta'aj chuman' xij nocoo yo', ne cunuu va'nuj ta'aj chuman' xij yo', ne canee cunudanj yo'ó nij chuman' naj rihaan chumii, qui'yaj yuún a. Dan me se na'nuj rá Diose chuman' nocoo cu'naj Babilonia se vaa rque so' 'o aga' na vinó 'na' sayuun co'oo chuman' yo', ne na vinó yo' ro', me se vaa caxríj yuvaá Diose man chuman' yo' a. 20 Gaa ne cunánj cunudanj nij yo'óo naj tanuu rihaan na ya'anj do', cayuu cunudanj nij quij xcaan do', ne ne curuvi' a 'oóo nij quij a ma'. 21 Ne caman' ndo'o maan yahij xráá nij yuvii, ne vij chihaa chí' kiló me 'o 'o chraan yu've' yo' cayuu xráá nij yuvii a. Gaa ne guun che'e nij so' ca'mii chí'ii nij so' ni'yaj nij so' man Diose che'é maan yahij go' xráá nij so' qui'yaj Diose a. 'O se sayuun uxrá vaa sayuun quiran' nij so' nanj adonj.

## 17

*Nana nihánj taj xna'anj che'é chana niha' rá ga chíi a*

1 Gaa ne dan me se ca'na' yo'oo tuvi' chij nij se-mozó Diose nicaj chij nij co'oo, gaa ne cataj so' rihanj a:

—Cuvá' so' nihánj, ne tiháán 'unj rihaan so' daj gaa sayuun quiran' chana niha' rá ga chíi chana taj rihaan que'ee nij na ya'anj ei. 2 Dan me se qui'yaj chí'ii nij sí nicaj suun rey uun chij rihaan chumii ga no', gaa ne ase 'yaj nij sí xno ro', danj qui'yaj nij sí man rihaan chumii, che'é se qui'yaj chí'ii nij so' ga no' chuguanj —taj se-mozó Diose rihanj a.

3 Gaa ne ca'anj nimán 'unj rej tacaan, qui'yaj uún se-mozó Diose a. Gaa ne dan me se quene'én 'unj 'o chana taj xráá xcuu yuvaá maree, ne nó ndo'o se-chuvii xo' xráá xo', ne nij nana yo' me se inanj nana chí'ii me nij yo', ne vaa chij raá xo', ne táá chí' cúu raá xo' a. 4 Ne chana yo' ro', nuú no' yatzíj tintá ga yatzíj maree, ne nó aga' oró míi do', yahij chuguun tu'vee ndo'o do', rmii raan perlá tu'vee ndo'o do', nó rihaan sagan' no'

a. Ne nicaj ra'a no' yo'o aga' tazá aga' oró mii, ne ndaa araa ayanj ma'an inanj nij se chi'ii rque aga' oró yo', ne dan me se inanj se chi'ii qui'yaj ma'an no' me se vaa araa man rque saga' no' a. <sup>5</sup> Ne caan rihaan no' ro', nó se-chuvii no', ne nana yuve me se-chuvii no', ne dan me se chuman' nocoo cu'naj Babilonia cu'naj no', ne nii taran' nij chana niha' rá ga chii me no', ne nii cunudanj nij se chi'ii man rihaan chumij me uún no' a. <sup>6</sup> Gaa ne quene'én 'unj se vaa xno chana yo', che'é se aj co'o ndo'o no' ton man nij sí vaa sa' rihaan Diose do', ton man nij sí nata' se-nana Jesucristó do' a. Ne ca'anj ndo'o raj ni'yaj 'unj man no' a. <sup>7</sup> Gaa ne xná'anj se-mozó Diose manj, cataj so', ne:

—Me che'é ca'anj rá so' ga. 'O se cataj xna'anj 'unj rihaan so' nana yuve nana che'é chana do', che'é xcuu yuvaa atá man no' xcuu taj chij cúu yave do', che'é chi' cúu taj raá chij cúu yave xo' do' a. <sup>8</sup> Xcuu yuvaa ne'én so' ro', me sí cayáán asij rque doj, tzaj ne taj vaj so' rihaan chumij cuano ma'. Ne rej rihaan ní' me se vaa cavii uún so' yu'uj cunuú ndo'o, gaa ne ca'anj so' rej quirí' nu' so' ei. Tananj uún, ne vaa nij sí man rihaan chumij sí ne no se-chuvii rihaan yanj no se-chuvii nij sí gaa i'na' nu' cavii nu' ca'anj asij ataa qui'yaj Diose chumij, ne ca'anj rá nij so' ni'yaj nij so' xcuu yuvaa yo', che'é se quene'én nij so' se vaa asij rque doj cayáán xo', ne taj vaj xo' cuano ma'. Ne rej rihaan ní' me se ca'na' uún xo' adonj. <sup>9</sup> Ne nihánj me xcáj sí avii raá cuentá a. Dan me se chij nij raá xcuu yuvaa yo' ro', me chij quij, ne ne chana yo' xráá nij quij yo' a. Ne chij sí nicaj suun rey me uún chij nij raá xcuu yuvaa yo' a. <sup>10</sup> Dan me se 'un' nij so' ro', aj quirí' ne aj navij cachén nij so' suun a. Ne yo'ó so' ro', ne cuano, ne ataa quisij yo'ó so' uún, ne asa' ca'na' yo'ó so', ne doj cayáán so' rihaan suun nanj á. <sup>11</sup> Ne ma'an xcuu yuvaa yo' me se sí cayáán asij rque me so', ne taj vaj so' ne cuano ma'. Ne sí nicaj suun rey

tunj me so', tzaj ne yo'o tuvi' yo'ó chij nij sí nicaj suun rey me uún so', ne cavii so', ne quirí' nu' so' nanj adonj.

<sup>12</sup> "Ne chi' nij cúu taj nij raá xcuu yuvaa ro', me chi' nij sí nicaj suun rey uún a. Dan me se ataa cayáán nij so' qui'yaj nij so' suun a. Tzaj ne asa' qui'yaj nij so' suun rey me se orún' orá nii guun nij so' sí nicaj suun rey ne guun chij nij so' ga ma'an xcuu yuvaa yo' ei. <sup>13</sup> Dan me se yo'o cuyaán gaa rá taran' nij so', ne nayon xcuu yuvaa rihaan nij so' guun chij ma'an xcuu yuvaa, qui'yaj ma'an nij so' adonj. <sup>14</sup> Gaa ne cunu' taran' nij so' ga matzinj le'ej, tzaj ne qui'yaj canaán nij tuvi' matzinj le'ej rihaan nij so' ei. 'O se matzinj le'ej ro', me sí 'nij ra'a man nu' sí uun chij, ne sí nicaj suun rey uun chij rihaan nu' sí nicaj suun rey me uún so' adonj. Ne nij tuvi' so' ro', me nij sí canacúún so' canoco' man so', ne dan me se aj narii so' man nij so', ne yo'o amán rá nij so' ni'yaj nij so' man so' ei —taj se-mozó Diose rihanj a.

<sup>15</sup> Gaa ne cataj uún so':

—Nij na quene'én so' rej ne chana niha' rá ga chii ro', me que'ee yuvij do', yuvij man que'ee chuman' do', yuvij a'mii que'ee xna'ánj a'mii yuvij do' a. <sup>16</sup> Ne xcuu yuvaa yo' do', chi' nij cúu taj raá xcuu yuvaa do', nachri' ndo'o nij so' ni'yaj nij so' man chana niha' rá ga chii yo' a. Ne quirí' nu' no', qui'yaj nij so', ne cánj uun gaa no', qui'yaj nij so', ne cha nij so' man no', ne cacaa nu' no', qui'yaj nij so' nanj ei. <sup>17</sup> 'O se ma'an Diose caxríj chrej rque nij so' se vaa qui'yaj nij so' ndaa vaa me rá ma'an so' qui'yaj nij so', ne che'é dan yo'o vaa rá taran' nij so', ne nayón xcuu yuvaa rihaan nij so' guun chij xo', qui'yaj nij so', ne veé danj guun chij ya xo' ndaa se quisij ya nu' se-nana Diose ei. <sup>18</sup> Ne ma'an chana quene'én so' ro', no' me chuman' nocoo 'nij ra'a man nij sí nicaj suun rey uun chij rihaan chumij a —taj se-mozó Diose rihanj a.

## 18

*Nana nihánj taj xna'anj se vaa ca-  
nee nu' chuman' Babilonia a*

<sup>1</sup> Veé dan, gaa ne quene'én 'unj yo'ó se-mozó Diose cavií rej xta' nanij rihaan yo'óó, ne síí nucuaj ndo'o me so' a. Ve'é ndo'o curuvi' so', ne chuguun rihaan yo'óó, qui'yaj so' a. <sup>2</sup> Gaa ne nucuaj ndo'o caguáj so', cataj so', ne:

—Canee nu' chuman' nocoo cu'naj Babilonia, ne guun chihanj nana chree man yo', ne taga' nuu nij nana chi'ii do', yachruú do', me yo' yaj ei. <sup>3</sup> 'O se chuman' yo' me se rque ndo'o no' na vinó co'o cunudanj nij yuvii man rihaan chumii, ne na vinó yo' ro', me sayuun quiran' nij so' che'é cacun' chi'ii qui'yaj nij so' ga no' a. Dan me se qui'yaj ndo'o nij síí nicaj suun rey cacun' ga no', ne nij síí naránj natu'vej ro', guun ru'vee ndo'o nij so' che'é rej ca'néj nu' nij so' nu' se sa' man chuman' yo' nanj adonj —taj se-mozó Diose yo' a.

<sup>4</sup> Gaa ne cunó 'unj nana ca'mii yo'ó so' rej xta', ne dan me se cataj so':

—Curihanj soj sij nocoo manj chuman' yo' ei. Se guun qui'yaj soj cacun' ndaa vaa 'yaj nij síí man chuman' yo' mei. Curihanj soj do', se quiran' soj sayuun ndaa vaa quiran' nij so' ei. <sup>5</sup> 'O se aj ne'en Diose se vaa nocoo ndo'o cacun' taj xraá nij so', ne nihánj me se qui'yaj Diose sayuun man nij so' chuguanj. <sup>6</sup> Dan me se ase vaa qui'yaj chuman' yo' sayuun man yuvii ro', danj gaa qui'yaj guee soj sayuun man chuman' yo', ne vij naru'vee soj sayuun man chuman' yo' ei. Dan me se rque ma'an aga' tazá tinachej chuman' yo' na co'o yuvii ro', veé maan rque aga' tazá yo' ro', vij guun che'e soj caraa soj na co'o ma'an chuman' yo' á. <sup>7</sup> Dan me se ca'mii xta' ndo'o no', ne nano' ndo'o no' se sa' gaa rihaan no', ne che'é dan qui'yaj ndo'o soj sayuun ndaa ca'ngaj ma'an nimán no', qui'yaj soj, ne ndaa que'ee ndaa cúú man no', qui'yaj soj, gaa ne xri' ndo'o rá no' ei. Dan me se taj nimán no': “Ne

amán raj daj chihaa míj mei. Ma'anj me chana reiná uun chij ya, ne ne chu'vij ma'. Nuveé chana cavi' nica mej, ne se quirán' 'unj sayuun daj chihaa míj ma'", taj no' a. <sup>8</sup> Ne che'é dan rque orún' güii me se ca'na' nu' nij sayuun quiran' no', ne dan me se cavi' ndo'o yuvii rque no' do', quinanó ndo'o rá nij yuvii do', cachén ndo'o x'naa rque no' do', cacaa nu' no', qui'yaj ya'an do', nanj ei. 'O se nucuaj ndo'o Diose síí 'nij ra'a man soj síí ca'ne' cacun' che'é chuman' yo' nanj chuguanj —taj nana ca'mii síí ca'mii rej xta' a.

<sup>9</sup> Dan me se ta'vee ndo'o nij síí nicaj suun rey uun chij rihaan chumii ni'yaj nij so' man chuman' yo' asa' quene'en nij so' se vaa avii ndo'o catze' rej acaa chuman' yo' a. 'O se nij so' me síí qui'yaj ndo'o cacun' chi'ii ga no', ne cutun' ndo'o nij so' se sa' ga no' a. <sup>10</sup> Ne dan me se gan' canicun' nij so' rej naj chuman' yo', che'é rej chuchu'vi' nij so' quene'en nij so' sayuun quiran' no' a. Ne cataj nij so':

—Ai. Ai. Ná'unj. Ni'qué so' chuman' nocoo chuman' nucuaj chuman' cu'naj Babilonia ei. 'O se rque orún' orá ca'na' sayuun rihaan so' che'é cacun' tumé so' a —cataj nij síí nicaj suun rey yo', ni'yaj nij so' man chuman' Babilonia yo' a.

<sup>11</sup> Ne nij síí naránj natu'vej rihaan chumii ro', ta'vee ndo'o nij so', ne quinanó ndo'o rá nij so' ni'yaj nij so' chuman' yo' a. 'O se se ca'vee cane' a doj si'yaj nij so' rasuun, <sup>12</sup> aga' oró míí do', aga' platá catzii do', yahij chuguun tu'vee ndo'o do', rmii raan perlá do', yatzíj linó do', yatzíj sedá do', yatzíj tintá do', yatzíj maree do', nu' chruun gun' daj do', nu' rasuun rii nii man cúú marfil do', nu' rasuun rii nii man chruun sa' do', nu' rasuun rii nii man aga' bronce maree do', nu' rasuun rii nii man aga' hierró ndo'o do', nu' rasuun rii nii man yahij mármol do', <sup>13</sup> quíí canelá do', coj gun' daj do', na gun' daj do', squíí cu'naj mirra do', squíí xlá do', na vinó

do', casté do', hariná do', 'núú trigó do', scúj do', matzinj do', cuayó do', cuchri' do', ndaa ma'an yuvií guun mozó do', se cane' daj chihaa mij uún rasuun yo', qui'yaj nij so' a ma'. <sup>14</sup> Ne nij sí naránj natu'véj ro', ca'mij nij so' rihaan chuman' yo', cataj nij so', ne:

—Ne nij chruj niha' ndo'o rá so' cha so' ro', navij nu' chruj yo', ne nu' se tu'vee ndo'o do', nu' se chuguun do', ca'anj ni'ya nij yo' rihaan so', ne daj chihaa mij se nari' uún so' man nij rasuun sa' vaa danj yaj a ma' —cataj nij sí naránj natu'véj rasuun a.

<sup>15</sup> Ne nij so' ro', me nij sí cunuu ru'vee qui'yaj chuman' yo', ne gan' canicun' nij so' ga no', che'é se cuchu'vi' nij so' ni'yaj nij so' sayuun quiran' no' a. Dan me se ta'vee nij so', ne quinano ndo'o rá nij so', <sup>16</sup> ne cataj nij so':

—Ai. Ai. Nique ndo'o so' chuman' nocoo nanj á. Chuman' nuu yatzíj linó mé so', ne yatzíj tintá do', yatzíj maree do', nuú so', ne aga' oró mii do', yahij chuguun tu'vee ndo'o do', rmii raan perlá do', nó rihaan so', <sup>17</sup> tzaj ne rque orún' orá navij nu' nij yo' quiri' tananj —cataj nij sí naránj natu'véj yo' a.

Ne cunudanj nij sí tuguáj rihoo chéé rihaan na ya'anj do', nu' nij sí 'yaj suun rihaan rihoo chéé rihaan na ya'anj do', canicun' nij so' rej gan' a. <sup>18</sup> Dan me se gaa quene'en nij so' rej avii catze' yan acaa chuman', gaa ne caguaj nij so', cataj nij so':

—Me rej naj yo'ó chuman' nocoo doj rihaan chuman' nihánj, rá soj yaj onj —cataj nij so' a.

<sup>19</sup> Dan me se caraa nij so' yo'óó tachruu raaj nij so', ne ta'vee ndo'o nij so', ne quinano rá nij so', ne cataj uún nij so', ne:

—Ai. Ai. Nique so' chuman' nocoo nanj á. Dan me se guun ru'vee taran' núj sij si'yaj rihoo chéé rihaan na ya'anj, qui'yaj rasuun sa' tu'vee man rque so' tzaj man. Tzaj ne nihánj me se rque orún' orá navij nu' so' nanj asuun. <sup>20</sup> Tzaj ne guun niha' rá nij soj

sij ne rej xta' do', sij vaa sa' rihaan Diose do', sij ca'née Jesucristó nata' rihaan yuvií che'é so' do', sij nata' se-nana Diose do', ni'yaj soj chuman' yo' á. 'O se qui'yaj Diose sayuun man chuman' yo' che'é cacun' qui'yaj chuman' yo' rihaan soj ei —cataj uún nij sí tuguáj rihoo chéé rihaan na a.

<sup>21</sup> Gaa ne yo'ó se-mozó Diose sí nu-cuaj ndo'o ro', naxcaj so' yo'ó yuvej xij, ne yuvej xij caxra' ndo'o me yo', ne quiri'íj so' man yo' rque na ya'anj, ne cataj so':

—Veé danj gaa quiran' guee so' chuman' nocoo cu'naj Babilonia ei. Dan me se quiri'íj nii man so' rque na ya'anj, ne daj chihaa mij se nari' uún nii man so' rque na ya'anj a ma'.

<sup>22</sup> Ne daj chihaa mij se cuno nii chra' rque se-callé so' chuman' a ma'. Se cuno nii cachraa ya'anj do', cachraa rihoo do', cachraa chruun a'yánj do', rque so' a ma'. Ne se gaa sí qui'yaj me ma'an suun do', se gaa máquina váj nihaj do', se gaa a 'ó rasuun rque so' a ma'. <sup>23</sup> Ne se cuchuguun a 'ó aga' ya'an rej náá so' do', se nara'aa yuvií rej náá so' do', se cuno nii ca'mij cachraa yuvií do', rque so' a ma'. 'O se nij sí naránj natu'véj ne rque so' ro', me se nij sí ru'vee doj rihaan cunudanj nij ru'vee man rihaan chumii me nij so' adonj. Ne nij rmedió chí'ij cane' rque so' ro', me se tiha' yu'unj yo' man cunudanj nij yuvií man rihaan chumii chuguanj. <sup>24</sup> Ne ma'án so' tumé cacun' se vaa cavi' nij sí nata' se-nana Diose cavi' nij sí vaa sa' rihaan Diose cavi' cunudanj nij sí ticavi' nii rihaan chumii adonj —taj se-mozó Diose yo', ca'mii so' rihaan chuman' nocoo cu'naj Babilonia a.

## 19

<sup>1</sup> Veé dan, gaa ne cunó 'unj nana ca'mii nucuaj que'ee yuvií nicun' rej xta', ne cataj nij yuvií:

—Caraa guee ní' rihaan Ya'anj ei. Diose sí noco' ní' man ro', so' me sí tinanii man ní' rihaan sayuun, ne guun chij ndo'o so', ne sí nucuaj ndo'o me so' adonj. <sup>2</sup> 'O se nana ya



nana nica inanj me nu' nana a'mii so' gaa a'ne' so' cacun' che'é yuvii adonj. 'O se yaj me naru'vee Diose rihaan nij yuvii che'é nu' cacun' qui'yaj nij yuvii rihaan Diose a. Che'é dan qui'yaj so' sayuun man chuman' nocoo chuman' guun chana niha' rá ga chii, che'é se quiri' nu' chumii, qui'yaj no' do', che'é nu' nij síi nuu rihaan ma'an Diose síi cavi' qui'yaj chuman' nocoo yo' do' a —taj nij yuvii yo' a.

<sup>3</sup> Gaa ne cataj uún nij síi ca'mii rej xta' yo':

—Caraa guee ní' rihaan Ya'anj ei. Ne nu' cavii nu' ca'anj me se yo'o cavii catze' rej acaa chuman' yo' a —taj uún nij so' a.

<sup>4</sup> Gaa ne canicun' ruj ico ca'anj nij síi uun chij do', ca'anj nij xcuu do', rihaan Diose síi taj rihaan chruun xlá sa' yo', ne na'víj nij so' rihaan so', cataj nij so':

—Veé danj gaa ya ei. Caraa guee ní' rihaan Ya'anj ei —taj nij so' a.

*Nana nihánj taj xna'anj che'é cha'anj nara'aa matzinj le'ej yo' a*

<sup>5</sup> Gaa ne cunó 'unj doj nana cavii rej nicun' chruun xlá sa', ne cataj nana yo':

—Ca'mii sa' inanj soj rihaan Diose síi nocó' ní' man á. Dan me se soj sij 'yaj suun rihaan so' sij aráj cochroj rihaan so' ro', ta'aj soj me síi nique, ne ta'aj soj me síi sa' ata suun, ne ca'mii sa' taran' soj che'é so' á —taj nana cavii rej nicun' chruun xlá sa' yo' a.

<sup>6</sup> Gaa ne cunó 'unj doj nana ca'mii que'ee ndo'o yuvii, ne ase uun rá' unó' cayuj vaj chráa xij do', ase uun rá' unó' aguáj ndo'o tu'víi do', danj guun raj gaa cunoj se-nana nij so', ne cataj nij so':

—Caraa guee ní' rihaan Ya'anj ei. 'O se guun che'e Diose síi 'nij ra'a man ní' guun chij so' ei. Síi uun nucuaj qui'yaj cunudanj me so' adonj. <sup>7</sup> Dan me se guun niha' uxrá rá ní', ne ca'mii sa' ní' che'é so' á. 'O se nihánj me se anuú cha'anj nara'aa matzinj le'ej, ne chana xcaj so' man ro', aj quisij qui'yaj chuvii no' man no' nara'aa

no' ga so' ei. <sup>8</sup> Ne rqué nii yatzij linó sa' inanj cunuú no', ne ndaa too chuguun ma'an yatzij yo', ne naruvii sa' ndo'o yatzij yo' a. Ne yatzij yo' ro', me nu' se sa' qui'yaj nij síi vaa sa' rihaan Diose adonj —cataj nij yuvii yo' a.

<sup>9</sup> Gaa ne cataj yo'o so' rihanj a:

—Cachron so' nana nihánj rihaan yanj á. Dan me se vaa che'é gaa niha' rá nij síi canacúun nii man cha xti'no cha'anj nara'aa matzinj le'ej yo', cachron so' á —taj so' rihanj, ne cataj uún so' —Nana nihánj me nana ya ca'mii ma'an Diose adonj —taj uún so' a.

<sup>10</sup> Gaa ne canicun' ruj 'unj rihaan so' quina'vij 'unj rihaan so' a. Tzaj ne cataj uún so' rihanj a:

—Se qui'yáa so' danj ma'. 'O se 'unj ro', me síi 'yaj suun ga nij tinuj nij soj sij nata' se-nana Jesucristó rihaan yuvii a. Rihaan orún' Diose na'vij so' ei. 'O se nu' nana ca'mii nij síi nata' se-nana Diose ro', me nana rqué Nimán Diose rihaan nij so', ne se-nana Jesucristó me nana yo' adonj —taj so' rihanj a.

*Nana nihánj taj xna'anj che'é síi taj xráa cuayó catzii a*

<sup>11</sup> Gaa ne quene'én 'unj se vaa naxra' rej xta', gaa ne cavii 'o cuayó catzii, ne síi taj xráa cuayó yo' ro', me síi cu'naj síi sa' a'mii nana ya a. Ne síi no xcúun ata suun cu'naj uún so', ne a'ne' nica so' cacun' che'é yuvii, ne sa' uxrá unu' so' a. <sup>12</sup> Ne ase vaa ya'an chuguun vaa rlij rihaan so', ne que'ee ndo'o cachriin nuú raa so' a. Ne nó se-chuvii so' xráa so', tzaj ne dan me se orún' so' me síi ne'en daj cu'naj so' a. <sup>13</sup> Ne nuu so' yatzij quixij ndo'o ton man, ne tucu'náj nii se-nana Diose man so' a. <sup>14</sup> Ne canoco' nij tanuu man rej xta' xcó so', ne táa nij so' xráa cuayó catzii, ne nuu taran' nij so' yatzij linó sa' catzii naruvii sa' a. <sup>15</sup> Ne 'nij tu'va so' neê espadá sihaa, ne yo' me se vaa go' so' xráa nij yuvii man rihaan chumii, ne nicaj so' vará aga'

hierró, ne tumé ma'an so' man nij yuvii a. Ne ma'an so' me sí ca'ne' cacun' che'é yuvii, ne quirii so' nu' cacun' ata yuvii, ne nda' rá se vaa ru'maan che'é nii chruj uvá ne rii nii nu' na uvá ro', veé danj gaa guee qui'yaj so', ne cavii nu' cacun' ata yuvii, qui'yaj so' a. Dan me se racu'j so' man Diose sí uun nucuaj qui'yaj cunudanj axri'j yuvaa Diose man nij sí tumé cacun' a. <sup>16</sup> Ne rihaan sagan' so' ne rihaan ta'maan so' do', nó se-chuvii so', ne sí 'nij ra'a man nu' nij sí uun chij, ne sí nicaj suun rey uun chij rihaan nu' nij sí nicaj suun rey me se-chuvii so' a.

<sup>17</sup> Gaa ne quene'én 'unj se vaa nicun' 'o se-mozó Diose tanuu rihaan güii, ne nucuaj ndo'o caguáj so' rihaan cunudanj nij xtaa do', rihaan cunudanj yachruú do', cataj so', ne:

—Ca'na' cunudanj soj cunuu chre' soj, ne qui'yaj chuvii Diose cha xti'no soj ei. <sup>18</sup> Ne dan me se nee man sí nicaj suun rey do', nee man tanuu uun chij doj do', nee man sí nucuaj do', nee man cuayó do', nee man nij sí taj xráa cuayó do', nee man mozó do', nee man sí ne uun mozó do', nee man sí nique do', nee man sí sa' ata suun do', cha soj á —cataj se-mozó Diose rihaan nij xo' a.

<sup>19</sup> Gaa ne quene'én 'unj man xcuu yuvaa yo' ga nij sí nicaj suun rey uun chij rihaan chumii ga nij tanuu nuu rihaan nij so', ne dan me se aj nuu chre' nij so' cunu' nij so' ga sí taj xráa cuayó catzii do', ga nij tanuu nuu rihaan so' do' a. <sup>20</sup> Tzaj ne quita'aa nii man xcuu yuvaa yo' do', man sí nata' nana ne sí qui'yaj suun nocoo rihaan xcuu yuvaa do' a. Ne suun nocoo qui'yaj so' me se veé danj tiha' yu'unj ndo'o so' man nij sí ca'ne' rá quino se-ta'nga' xcuu yuvaa yo' man do', sí quina'víj rihaan se-tinanga' xcuu yuvaa che'é suun nocoo quene'en nij so' do' a. Gaa ne dan me se quiri'íj nii man roj so' rque na ya'anj rej aca ndo'o yo'ó azufre, ne veé danj vaa i'na' roj so' quiri'íj nii man roj so' rihaan na ya'anj yo' a. <sup>21</sup> Gaa ne nee espadá nuu tu'va sí taj xráa cuayó

catzii yo' ro', me se cavi' yo'ó nij sí nocó' xcó roj so', qui'yaj nee espadá yo' a. Dan me se chá nij xtaa do', chá nij yachruú do', man nee man nij sí cavi' yo' ndaa daj quisíj caraa ma'an rque nij xo' a.

## 20

*Nana nihánj taj xna'anj che'é míj nij yo' numii xcuáa tu'vii a*

<sup>1</sup> Gaa ne quene'én 'unj yo'o se-mozó Diose cavii rej xta', ne nanij so' 'na' so', ne oro' so' aga' ne' ga raga' yavé 'nij tu'va yu'uj cunuu rmi' ndo'o yo' a. <sup>2</sup> Gaa ne quita'aa so' xcuáa tu'vii xcuáa cayáan gaa naá a. Ne xcuáa tu'vii yo' ro', me sí chree, ne Satanás cu'naj so' a. Gaa ne dan me se nicaj se-mozó Diose aga' ne' numíj se-mozó Diose man so' rque 'o míj ya yo' a. <sup>3</sup> Gaa ne quiri'íj se-mozó Diose man so' rque yu'uj cunuu rmi' ndo'o, ne caxríj so' raga', ne cachrón so' 'o ta'nga' selló ya tu'va yu'uj cunuu rmi' ndo'o yo', che'é rej yo'o qui'nij yuve xcuáa yo', gaa ne se gaa nanj tiha' yu'unj uún xcuáa tu'vii yo' doj man nij yuvii man rihaan chumii rque 'o míj ya yo' a. Dan me se gaa quisíj míj nij yo' yo', gaa ne naché uún xcuáa tu'vii yo' doj tzin' a.

<sup>4</sup> Gaa ne dan me se quene'én 'unj chruun xlá sa', ne vaa nij sí taj nij chruun xlá sa' yo' a. Dan me se ca'ne' Diose suun rihaan nij so' se vaa ca'ne' nij so' cacun' che'é nij yuvii a. Ne quene'én 'unj man yo'ó nij sí ne rej yo' a. Ne nij so' ro', me nij sí sa' cavi' che'é se-nana Jesucristó nana nata' nij so' do', che'é se-nana Diose do' a. Ne nij so' ro', ne na'víj nij so' rihaan xcuu yuvaa do', rihaan se-tinanga' xcuu yuvaa do' ma'. Ne ne ca'vej rá nij so' cata' se-ta'nga' xcuu yuvaa yo' caan rihaan nij so' do', ra'a nij so' do' ma'. 'O se cunuu i'na' uún nij so', ne 'o míj yo' cayáan nij so' ne guun chij nij so' ga Jesucristó a. <sup>5</sup> Ne xa' yo'ó nij sí cavi', tzaj ne ne cunuu i'na' uún nij so' ndaa se quisíj ya nu' míj yo' yo' a. Tzaj ne nij sí taj rihaan chruun xlá sa' yo'

ro', nij so' me nij sí cunuu i'na' uún asino yaan rihaan cunudanj nij yuvii a. <sup>6</sup> Dan me se sí vaa sa' inanj me se sí cavii sa' ndo'o me nij so', che'é se sí cunuu i'na' uún asino yaan me nij so' ei. Se ca'vee daj chihaa míj caví uún nij so' a ma'. Tzaj ne guun nij so' xrej cayáan rihaan Diose do', rihaan Jesucristó do', ne guun chij nij so' ga Jesucristó nu' míj ya yo' yo' ei.

<sup>7</sup> Gaa ne asa' quisíj míj nij yo', gaa ne curihanj uún sí cu'naj Satanás taga' nuu so', <sup>8</sup> gaa ne cavii so' tihá' yu'unj so' man nij sí man rihaan nu' cachra' chumii adonj. Dan me se tihá' yu'unj so' man nij sí ne chuman' Gog do', man nij sí ne chuman' Magog do', gaa ne cunuu chre' taran' nij so', qui'yaj so', che'é rej cunu' nij so' a. Ne ase vaa que'ee ndo'o nij yo'óo chruu naj tu'va na ya'anj ro', danj gaa que'ee nij tuví' nij so' nanj ei. <sup>9</sup> Dan me se cavii nij so' rihaan taa, ne tucuachriin nij so' man rej ne nij tanuu sa' nij sí vaa sa' rihaan Diose do', man ma'an chuman' 'ee rá Diose man do' a. Gaa ne maan orá yo' cavii ndo'o ya'an rej xta' nanij yo' rihaan yo'óo, gaa ne cacaa nu' nij sí chi'ii yo', qui'yaj ya'an yo' nanj adonj. <sup>10</sup> Gaa ne dan me se sí chree sí tihá' yu'unj man nij so' ro', quirí'ij nii man so' rque na ya'anj rej acaa ndo'o yo'óo azufre, ne yo' me rej nuu xcuu yuva do', sí nata' nana ne do' a. Gaa ne dan me se nuvii nigan' quiran' ndo'o nij so' sayuun nu' cavii nu' ca'anj nanj adonj.

*Nana nihánj taj xna'anj che'é chruun xlá xij catzii rej ca'ne' Diose cacun' che'é yuvii a*

<sup>11</sup> Gaa ne dan me se quene'én 'unj 'o chruun xlá xij catzii, ne quene'én 'unj 'o sí taj chruun xlá yo', ne cuchu'vi' ndo'o nu' chumii do', nu' rej xta' do', ni'yaj roj yo' man so' a. Dan me se naxuun roj yo' man roj yo' rihaan sí taj chruun xlá, ne 'o se ne nari' roj yo' rej quinaj roj yo' a ma'. <sup>12</sup> Gaa ne quene'én 'unj man nij sí cavii uún a. Dan me se sí sa' atá suun do', sí

nique do', sí noco do', sí cunii do', quene'én 'unj, ne nicun' nij so' rihaan sí taj chruun xlá xij catzii yo' a. Gaa ne nuxra' nii nij yanj libró a. Dan me se nuxra' nij so' man yo'óo yanj libró no se-chuvii nij sí gaa i'na' nu' cavii nu' ca'anj ga Diose a. Dan me se ca'ne' Diose cacun' che'é nij sí cavii yo', ne ni'yaj so' nana no rihaan nij yanj libró yo' nana taj xna'anj ndaa vaa qui'yaj nij so' gaa vaa i'na' nij so' rihaan chumii a. <sup>13</sup> Dan me se narqué na ya'anj nu' nij sí cavii rque na ya'anj, ne me rej ma'an naj nij sí cavii yo' nurihanj nij so' canicun' nij so' rihaan sí taj chruun xlá xij catzii yo' a. Dan me se ni'yaj Diose rihaan yanj libró, ne ca'ne' Diose cacun' che'é 'o 'o nij so' ndaa vaa qui'yaj 'o 'o nij so' a. <sup>14</sup> Dan me se ma'an ta'naj 'yaj avii yuvii do', nu' rej naj nimán nij sí cavii do', quirí'ij Diose man nij yo' rihaan ya'an cacaa nij yo' a. Ne rihaan ya'an yo' ro', me rej yo' cavii ya uún nii nu' cavii nu' ca'anj a. <sup>15</sup> Ne xa' taran' nij sí nuvi' se-chuvii rihaan yanj no se-chuvii nij sí gaa i'na' nu' cavii nu' ca'anj, tzaj ne quirí'ij nii man nij so' rihaan ya'an, ne yo' cacaa nij so' ei.

## 21

*Nana nihánj taj xna'anj che'é rej xta' naca do', che'é yo'óo naca do' a*

<sup>1</sup> Dan me se cachén nu' rasuun nga, gaa ne quene'én 'unj rej xta' naca do', yo'óo naca do' a. 'O se aj navij nu' rej xta' nga do', yo'óo nga do', ne na ya'anj me se nuvi' yo' naj a ma'. <sup>2</sup> 'O se 'unj sij cu'naj Juan me quene'en se vaa cavii chuman' guee chuman' Jerusalén naca rej xta' rej ne Diose, ne nanij yo', ne ase uun rá' ni'ya' chana nara'aa ro', danj guun raj ni'yaj 'unj man chuman' yo' a. <sup>3</sup> Gaa ne dan me se cunó 'unj nana ca'mii sí taj chruun xlá sa', cataj so', ne:

—Ni'yaj soj ei. Nihánj me rej cayáan Diose ga yuvii a. Dan me se cayáan so' ga nij yuvii, ne taj ya'anj so' man nij yuvii, ne dan me se cayáan rcua'aan Diose ga nij so', ne Diose sí noco' nij

so' man me so' nanj adonj. <sup>4</sup> Ne ma'an Diose ro', na've nu' na ayanj rihaan nij so', ne se cavi' uún nij so' a ma'. Ne se nanó rá nij so' do', se ta'vee nij so' a doj do', se quiran' nij so' a doj sayuun do', a ma'. 'O se aj cachén nu' rasuun nga yo' nanj adonj —taj síi taj rihaan chruun xlá sa' yo' a.

<sup>5</sup> Gaa ne cataj uún so':

—Ni'yaj soj ei. Nihánj me se qui'yaj naca uún 'unj man cunudanj nij rasuun nanj ei —taj so', gaa ne cataj uún so'— Cachron so' nana nihánj rihaan yanj á. 'O se nana ya me nana nihánj, ne vaa che'é gaa nucuaj rá soj manj se vaa qui'yáj nu' rasuun nihánj ei —taj so' a. <sup>6</sup> Gaa ne cataj uún so' rihanj— Aj quisíj qui'yáa 'unj nu' rasuun nanj á. Ne ase vaa letrá A do', ase vaa letrá Z do', vaa 'unj, ne dan me se sij nicun' asij rque mej, ne veé 'unj canicun' nu' cavii nu' ca'anj nanj adonj. Ne rihaan síi naco na me se rque 'unj na co'o so', ne gaa i'na' so' nu' cavii nu' ca'anj, qui'yaj na yo' ei. Ne dan me se co'o uun so' na, ne se ca'néj 'unj a doj sa'anj man so' a ma'. <sup>7</sup> Ne síi 'yaj canaán ro', me se guun so' síi nicaj cunudanj rasuun si'yáa 'unj, ne 'unj ro', me se guun Diose taj ya'anj man nij so', ne nij so' ro', guun ta'níj ne'ej adonj. <sup>8</sup> Tzaj ne xa' nij síi cunanj rihaan sayuun do', nij síi ne noco' raan manj do', nij síi 'yaj se chi'ii do', nij síi ticavi' tuvi' do', nij síi 'yaj chi'ii ga chana do', nij síi chruun do', nij síi na'víj rihaan ya'anj acój yuvij do', taran' nij síi ne do', me se vaa rej cacaa nij so' rihaan ya'an, ne rej acaa ndo'o yo'óo azufré me yo' ei. Yo' me rej cavi' uún nij so' nu' cavii nu' ca'anj nanj chuguanj —taj síi taj rihaan chruun xlá sa' yo' a.

*Nana nihánj taj xna'anj che'é chuman' Jerusalén naca a*

<sup>9</sup> Gaa ne ca'na' yo'o tuvi' chij nij se-mozó Diose síi nicaj chij nij co'oo araa ndaa ayanj ma'an chij nij sayuun a. Gaa ne cataj so' rihanj a:

—Cuva' so' nihánj, ne tihaán 'unj chana xcaj matzinj le'ej man rihaan so' á —taj so' rihanj a.

<sup>10</sup> Gaa ne dan me se ca'anj nicaj so' nimanj raaj quij xcaan, gaa ne tihaan so' chuman' guee cu'naj Jerusalén rihanj, ne cavii chuman' yo' rej xta' rej ne Diose, ne nanij yo' rihaan yo'óo a. <sup>11</sup> Ne chuman' yo' ro', me se ma'an ta'an Diose me 'yaj chuguun cunudanj chuman' yo' nanj adonj. Ne chuguun yo' ndaa vaa chuguun yahij chuguun tu'vee ndo'o a. Dan me se ase vaa yahij jasper vaa yo', chuguun ndo'o yo' a. <sup>12</sup> Dan me se nicun' 'o chingá chraan xij xcaan nu' anicaj tu'va chuman' yo', ne taj chuvij ta'yaa tu'va chingá yo', ne nicun' se-mozó Diose tu'va 'o 'o ta'yaa yo' a. Ne nó se-chuvii chuvij nij x'ne' nij yuvii israelitá rihaan chuvij nij ta'yaa yo' a. <sup>13</sup> Dan me se rej síj güii rihaan chingá chraan ro', táa va'núj nij ta'yaa, ne rej norte rihaan chingá ro', táa ya'núj nij ta'yaa, ne rej sur rihaan chingá chraan ro', táa ya'núj nij ta'yaa, ne rej ata' güii rihaan chingá chraan ro', táa ya'núj nij ta'yaa yo' a. <sup>14</sup> Ne vaa chuvij yuvej xij naj tacóo che'é chingá chraan yo', ne rihaan chuvij nij yuvej yo' ro', nó se-chuvii chuvij nij apóstol cune' matzinj le'ej man nata' se-nana so' rihaan yuvii a.

<sup>15</sup> Ne se-mozó Diose síi ca'mii ga 'unj ro', nicaj so' 'o vará aga' oró míi, che'é rej xcaj ta'nga' so' chuman' do', nij ta'yaa do', nu' chingá do' a. <sup>16</sup> Ne dan me se cuyaan vaa rej xcaan ga rej caxra' man chuman' yo' a. Gaa ne xcaj ta'nga' so' chuman' yo', ne vij míj táa yavíj cientó kilómetro vaa chuman' yo' rej xcaan do', rej caxra' do', rej xta' uún do' a. Dan me se cuyaan vaa rej xcaan do', rej caxra' do', rej xta' do', man chuman' yo' a. <sup>17</sup> Gaa ne dan me se xcaj ta'nga' so' rej xcaan xta' chingá yo', ne va'núj chihaa ca'anj metró taj doj vaa chraan chingá yo' xta' a. Dan me se ase vaa xcaj ta'nga' yuvii rasuun ro', danj vaa xcaj ta'nga'



se-mozó Diose yo' nu' chingá yo' a. <sup>18</sup> Ne inanj yahij jaspe me nu' chraan yo', ne inanj aga' oró mí sa' me nu' chuman' yo', ne ase vaa vidrió ro', danj vaa nu' aga' oró mí sa' yo' a. <sup>19</sup> Ne canó me a' yahij chuguun tu'vee ndo'o ro', nó rihaan tacóo chuman' yo' a. Dan me se yo'o yuvej xij naj tacóo chraan ro', me yahij jaspe, ne yo'ó yuvej ro', me yahij zafiro, ne yo'ó yuvej ro', me yahij ágata, ne yo'ó yuvej ro', me yahij esmeralda a. <sup>20</sup> Ne yo'ó yuvej ro' me yahij ónice, ne yo'ó yuvej ro', me yahij cornalina, ne yo'ó yuvej ro', me yahij crisólito, ne yo'ó yuvej ro', me yahij berilo, ne yo'ó yuvej ro', me yahij topacio, ne yo'ó yuvej ro', me yahij crisopraso, ne yo'ó yuvej ro', me yahij jacinto, ne yo'ó yuvej ro', me yahij amatista a. Ne nu' nij yahij yo' ro', nó rihaan 'o 'o nij yuvej xij naj tacóo chingá chuman' yo' a. <sup>21</sup> Ne chuvij nij ta'yaa taj rej atúj yuvij rque chuman' ro', me rmii perlá nanj a. Dan me se orún' rmii perlá yo' me 'o 'o nij ta'yaa a. Ne inanj aga' oró mí sa' me nu' nij callé taj rque chuman' yo', ne ase vaa raan vidrió ro', vaa nu' aga' oró mí yo' a.

<sup>22</sup> Ne nuvi' nuvií nocoo quene'én 'unj rque chuman' yo' ma'. 'O se ma'an Diose síi 'nij ra'a man ní síi uun nucaj qui'yaj cunudanj ga ma'an matzinj le'ej me roj síi guun nuvií rque chuman' yo' nanj adonj. <sup>23</sup> Ne ne achiin güii do', yavii do', chuguun rihaan chuman' yo' a ma'. 'O se ma'an Diose chuguun rihaan chuman' yo', ne ma'an matzinj le'ej yo' guun aga' chuguun rque nu' chuman' yo' nanj chuguanj. <sup>24</sup> Ne cunudanj nij yuvii man rihaan chumii, curuvi' ni'yaj nij so' cachee nij so', qui'yaj ma'an chuman' yo' a. Ne nij síi nicaj suun rey ro', me se nicaj nij so' nu' si'yaj nij so' rasuun sa', 'na' nij so' rque chuman' yo' a. <sup>25</sup> 'O se inanj rej ranga' gaá yo', ne daj chihaa míj se caráán nii ta'yaa taj tu'va chuman' yo' ma'. 'O se taj vaj rej nij chuman' yo' ma'. <sup>26</sup> Ne nu'

rasuun sa' nicaj cunudanj nij yuvii man rihaan chumii me se ca'anj nicaj nii nu' rasuun sa' yo' rque chuman' yo' a. <sup>27</sup> Tzaj ne taj vaj a doj se chi'ii catuu rque chuman' yo' ma'. 'O se síi 'yaj se chi'ii do', síi a'mii ne do', se catúj nij so' daj chihaa míj rque chuman' yo' a man adonj. Tzaj ne orún' nij síi no se-chuvii rihaan danj matzinj le'ej yanj libró no se-chuvii nij síi gaá i'na' ga Diose nu' cavii nu' ca'anj ro', orún' nij so' me nij síi catuu rque chuman' yo' nanj adonj.

## 22

<sup>1</sup> Gaá ne tihaan se-mozó Diose yo' 'o chráa rihanj, ne chráa nuu na 'yaj vaa i'na' yuvii ga Diose nu' cavii nu' ca'anj me chráa yo' a. Ne ndaa chuguun raan ma'an chráa yo' a. Ne chráa yo' ro', me avii tacóo chruun xlá sa' xruún Diose do', xruún matzinj le'ej do' a. <sup>2</sup> Ne tanuu callé nocoo taj rque chuman' yo' nicun' chruun 'yaj vaa i'na' yuvii ga Diose nu' cavii nu' ca'anj a. Dan me se nu' niha tu'va chráa yo' nicun' chruun yo' a. Ne vaa chuvij chruj rii chruun yo', ne dan me se ino vaa chruj rii chruun yo' 'o 'o yavii, ne dan me se cunu' yo' man chruj raá chruun yo' a. Ne coj man ra'a chruun yo' ro', 'yaj nahuun sa' cunudanj nij yuvii man rihaan chumii a. <sup>3</sup> Ne taj vaj a doj rasuun chree man yo' a ma'. Ne chruun xlá sa' xruún Diose do', xruún matzinj le'ej do', nicun' chuman' yo', ne yo' me rej man nij síi 'yaj suun rihaan so' a. <sup>4</sup> Ne rihaan ya quene'én nij so' rihaan ma'an ya Diose, ne quino se-chuvii Diose caan rihaan nij so', <sup>5</sup> ne taj vaj rej nij quene'én nij so' rej yo' a ma'. Ne se cachiin aga' chuguun do', naán güii do', rihaan nij so' a ma'. 'O se ma'an Diose síi 'nij ra'a man ní chuguun rihaan nij so', ne dan me se guun chij nij so' nu' cavii nu' ca'anj ga Diose nanj chuguanj.

*Nana nihánj taj xna'anj se vaa nichrun' ca'na' uún Jesucristó a*

<sup>6</sup> Gaa ne cataj uún se-mozó Diose yo' rihanj a:

—Vaa che'é gaa nucuaj rá so' man nana ya nihánj ei. Ne Diose síi 'nij ra'a man ní' síi uun chij nimán nij síi nata' se-nana so' ro', ca'née so' man se-mozó so' rihaan nij síi 'yaj suun rihaan so', che'é rej tihaan se-mozó so' rihaan nij so' rasuun nichrun' guun adonj —taj se-mozó Diose yo' rihanj a.

<sup>7</sup> Dan me se:

—Nichrun' cuchij rihaan soj ei —taj Jesucristó rihaan ní' a.

Dan me se cavii sa' síi uno nu' nana no rihaan yanj nihánj nana taj xna'anj daj guun rej rihaan ní' a. <sup>8</sup> 'Unj sij cu'naj Juan ro', me síi cuno nu' nana nihánj, ne 'unj me síi quene'en nu' rasuun nihánj a. Dan me se gaa quisij cunó 'unj do', quene'én 'unj do', gaa ne canicun' ruj 'unj na'vij 'unj rihaan se-mozó Diose síi tihaan nu' rasuun nihánj rihanj a.

<sup>9</sup> Tzaj ne cataj so' rihanj a:

—Se qui'yáa so' danj ma'. 'O se síi 'yaj suun rihaan Diose ga so' do', ga taran' nij tinúú so' nij síi nata' se-nana Diose síi 'yaj nu' nana no rihaan yanj nihánj do', mej nanj adonj. Rihaan orún' Diose na'vij so' á —taj so' rihanj a. <sup>10</sup> 'O se cataj uún so'— Se caráán yuve so' se-nana Diose nana taj xna'anj daj guun rej rihaan ní' nu' nana no rihaan yanj nihánj ma'. 'O se nichrun' quisij güi guun nu' nij rasuun nihánj nanj adonj. <sup>11</sup> Che'é dan nij síi 'yaj cacun' ro', yo' o qui'yaj nij so' cacun', ne síi chi'ij nimán ro', yo' o gaa chi'ij nimán so' á. Ne síi vaa nica nimán, tzaj ne yo' o naqui'yaj sa' so' nimán so', ne síi vaa sa' rihaan Diose ro', yo' o gaa sa' so' rihaan Diose á —taj se-mozó Diose yo' a.

<sup>12</sup> Dan me se Jesucristó taj:

—Nichrun' cuchij rihaan soj ei. Ne nicaj 'unj se naru'vee 'unj rihaan soj chuguanj. Dan me se naru'vej rihaan 'o 'o soj ndaa vaa rasuun qui'yaj 'o 'o soj adonj. <sup>13</sup> Dan me se ase vaa letrá A do', ase vaa letrá Z do', vaa 'unj a. Dan me se 'unj ro', me síi taj yaan rihaan

cunudanj, ne veé 'unj me síi noco' xcó cunudanj a. Ne veé 'unj me síi nicun' asij gaa guun chumi, ne veé 'unj ro', me síi canicun' nu' cavii nu' ca'anj a.

<sup>14</sup> "Cavii sa' uxrá nij síi na'nu' sagan' ne navij cacun' ata so' a. 'O se cunó xcúún nij so' cha nij so' chruj man raa chruun 'yaj gaa i'na' yuvii ga Diose nu' cavii nu' ca'anj, ne catuu nij so' ta'yaa taj tu'va chuman' yo' a.

<sup>15</sup> Tzaj ne xa' nij síi 'yaj ndaa vaa 'yaj chuvee, tzaj ne xe' ro', quinaj nij so' do', nij síi chruun do', nij síi 'yaj se chi'ij ga chana do', nij síi ticavi' man tuvi' do', nij síi na'vij rihaan ya'anj cacój yuvii do', nij síi niha' rá ca'mii nana ne do' a.

<sup>16</sup> "O se 'unj Jesucristó ro', me se ca'née 'unj se-mozó 'unj cuchí' so' rihaan nij soj nata' so' nana nihánj rihaan soj, che'é rej ca'anj soj cataj xna'anj soj nana nihánj rihaan cunudanj nij síi amán rá ni'yaj manj ne 'o 'o chuman' adonj. 'Unj ro', me ta'nii ta'nij si'no síi cu'naj David, ne noco' xna'anj tuvi' so' gaj ei. Ne ase vaa yati' xta'ngaa avii nichrun' rá ranga' ro', vaa 'unj rihaan chumi adonj —taj Jesucristó a.

<sup>17</sup> Ne dan me se Nimán Diose do', chana guun nica Jesucristó do', taj roj so': "Cuva' so' ei", taj roj so' a. Ne síi uno nana nihánj ro', cataj so': "Cuva' so' á", cataj so' rihaan tuvi' so' a.

Ne síi naco na ro', ca'na' so', ne co' o so' na 'yaj vaa i'na' yuvii ga Diose nu' cavii nu' ca'anj, sese me rá so' a. Se naru'vee so' a 'o cha'aa che'é na yo' ma'. 'O se co' o uun so' na yo' nanj adonj.

<sup>18</sup> Dan me se 'unj ro', me síi nata' nu' nana no rihaan yanj nihánj rihaan nij soj, ne nana taj xna'anj daj guun rej rihaan ní' me nana nihánj chuguanj. Ne sese nuta' yo' o so' doj yo' o nana uún rihaan yanj nihánj, ne quiran' so' nu' sayuun taj xna'anj yanj nihánj, qui'yaj Diose adonj. <sup>19</sup> Ne sese tirij' yo' o so' ta'aj nij nana no rihaan yanj nihánj nana taj xna'anj daj guun rej rihaan ní', gaa ne daj chihaa mij se chá so' chruj man raa chruun

'yaj gaa i'na' yuvij ga Diose nu' cavii nu' ca'anj ndaa vaa taj xna'anj yanj nihanj, qui'yaj Diose ma'. Ne se cayaan so' chuman' guee, ndaa vaa taj xna'anj yanj nihanj, qui'yaj Diose ma'.

<sup>20</sup> Dan me se Jesucristó síí nata' ya nana nihanj me se taj so', ne:

—Ra'yanj cuchij rihaan soj ei —taj

so' rihaan ní' a.

“Veé danj gaa ya ei. Cuvá' so' Jesucristó, cuvá' so' sij 'nij ra'a man núj á”, taj ní' rihaan Jesucristó adonj.

<sup>21</sup> Dan me se me rá 'unj qui'yaj ndo'o Jesucristó sij 'nij ra'a man ní' se luj che'é nij soj nanj ei. Veé danj gaa ya ei.